


# Migabac Bible Portions



Portions of the Bible in the Migabac language of Papua New  
Guinea

**Migabac Bible Portions**  
**Portions of the Bible in the Migabac language of Papua New**  
**Guinea**

**Sampela hap long Buk Baibel long tokples Migabac long Niugini**

copyright © 2010-2020 Wycliffe Bible Translators, Inc.

Language: Migabac

Translation by: Wycliffe Bible Translators

Audio recording © 2013 Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-02-20

---

PDF generated using Haiola and XeLaTeX on 21 Feb 2024 from source files dated 31 Aug 2023  
620e6058-116b-51e5-b20a-ab9e8b9bea5d

Contents

Ruti . . . . .	1
Mataio . . . . .	6
Mareko . . . . .	59
Luka . . . . .	90
Yoane . . . . .	143
Salecebaicne . . . . .	180
Roma . . . . .	225
1 Korin . . . . .	248
2 Korin . . . . .	269
Galata . . . . .	283
Efesas . . . . .	291
Filipai . . . . .	299
Kolosi . . . . .	305
1 Tesalonika . . . . .	311
Tesalonika . . . . .	316
1 Timoti . . . . .	319
2 Timoti . . . . .	326
Titus . . . . .	331
Filemon . . . . .	334
Hibru . . . . .	336
Yakobos . . . . .	352
1 Pita . . . . .	358
2 Pita . . . . .	365
1 Yoane . . . . .	369
2 Yoane . . . . .	375
3 Yoane . . . . .	376
Yude . . . . .	377
Miyegengkeicne . . . . .	379

## Ruti

Abraham ye Israel aling yengele ngambongineng. Esecne benang Israelle ngic sugucne, wacnginec Moses nga Yosuwā, yeke homaiboc. Dameng iwa Israel ngic-ngigac yenge ngictau mikac. Ngic gocne yenge Israel ngic-ngigac damongebalu hudu-ngic sugucneng-neng domaibong. Ilec mimocto-mimocto ngic wackegabeleng. Yengele siduc 'Hetman' Wapongte hibiwa fagac. Israel-ngic yengele himong wacine monic Yuda.

Aling monicka wacngineng Moabi gaibong. Lot ye Abraham gbainele madec. Moabi ye Lotle madec. Dameng gocne Moabi aling yenge Israel aling losi aiyeleibong.

Aling yogolec kwelina Ruti fikewec. Ye kpacuc ngigac. Ye himong nga alingine hegilelu Israel himongka hikelu gawec. Wapong balaibelu yowaine ngagenale Wapong ye angackewec. Ailu madicne aicnolu damongkewec. Lobeina Ruti ye gboli bafuwame fikesawec fecgu ngamboine Tau Dawidi fikewec. Lobeina Yesu ye Tau Dawidile alingkacni fikewec. Yesu ye Rutile ngapang-ngilic-nguluc.

### *Elimelec nga Naomi yekele siduc*

#### *Yuda himong loloc fikewec*

<sup>1</sup> Yuda himong yogo mimocto-mimocto ngic yengi damongkelu balu gaibong, dameng yogowa nosinte loloc fikelu fawec. Aime Betelehem taon kpsicne Yuda himongka ngiyewec, iwacni ngic monic ngigac-madeckecineholec Moabi aling yengele himongka kwilic galu monickolec hefaliyenogale hikeibong. <sup>2</sup> Ngic ye wacine Elimelec nga ngigacine wacine Naomi ailu madeckecine wacnginec Malong nga Kiliong. Yenge yogo Efaratale alingkacni, Yuda himong Betelehem taonkacni Moabi himongka hikelu gaibong.

#### *Elimelec nga madeckecine homaibong*

<sup>3</sup> Gacgu Naomi ngaweine Elimelec homame madeckecine yengilangkac gaibong. <sup>4</sup> Gacgu madeckecine yeke ngigac Moabihocni bacepaiboc monic wacine Oropa nga monic wacine Ruti. Aime yenge iwa gacgubong hifangineng 10 ingucne motowec. <sup>5</sup> Inguc gabong Malong nga Kiliong yeke homaiboc. Naomi ye ngawe-madeckecine mikac yeicnac gawec.

#### *Yuda himongka lileibong*

#### *Wapongti Israel habu nosing baficebawec*

<sup>6</sup> Inguc gacgume, Wapongti Israel ngic-ngigacfocine Yuda gaibong nosing baficyebawec, yogolec siduc Moabi aling yengele himongka hikeme ngagelu, Naomi yengaukecine yenge momochac Yuda himongka hefaliyenogale efeckeibong. <sup>7</sup> Efeckelu yengaukecine yekeholec himong gaibong, yogo hegilelu yefe weleibong inguc yefe Yuda himongka hatacmac hefaliyenogale hikeibong.

#### *Naomidi Ruti nga Oropa salecepawec*

<sup>8</sup> Yefewa hikelu Naomidi yengaukecine yanguc edocepawec, “Ngeke nenggackecnginec yekele macka hefaliyedabiec. Ailu na nga ngawekecnginec homaiboc, nonge madicne damongnubaiboc, ingucneyac Wapongti ngeke inguchac benang baficngepadaic. <sup>9</sup> Ailu Wapongti nalic baficngupame ngawekecnginec gbolicne bafuwacepalu bacepalu macnginac ngiye-domac madicne gadabiyec.”

Inguc milu kokocepame yeke aukwelu hiyaiboc. <sup>10</sup> Hiyalu yanguc miiboc, “Miyac, noke gale alingfocgone ngengeholec hikelu gadabelecte.”

<sup>11</sup> Inguc miboc Naomidi yanguc edocepawec, “ngeke hefalie hikenic! Omale naholec monickolec gadabiyecte? Na wenuc madec monickolec bacepabe sugulelu ngeke bacngepadabiyecte? <sup>12</sup> Yengaukecne, ngeke macnginac hefalie hikedabiyec! Na ngigac dandanginedi ngic monickolec wenuc badacte? Ailu na ngagebe nalic aiaine aidaicka, na ngic gbolicne deboc yagowahac badaba i nalic, madec fikeboc ngeke bacngepadaboc? <sup>13</sup> Ailu ngeke monicka mi hikedaboc madec suguleboc nganicpalu wangecnginec nalic gadaboc? Ailu yengaukecne, inguchac miyac! Wapongti bawacnulu lobe-holenelewec, na ngekele ailu doic kwele-umackolec gagabac ngeke hikedabiyec.”

<sup>14</sup> Inguc mime yeke monickolec aukwelu hiyaiboc. Aime Oropa ye yengauine gbagbangkelu hefalie hikewec. Nga Rutidi ine yengauine Naomiholec hikenogale sanangne hobame Naomidi yanguc edowec, <sup>15</sup> “Nganic, balugone ye alingfocine nga wapongfocine yengela hefaliegac. Ga ingucyac balugone balaibelu hefaliec.”

<sup>16</sup> Mime Rutidi yanguc bafaliyecnowec, “Na ga hegilecgulu hefaliedactele bocyac mi hatae nelec. Hikedamecte, yogo na hikedacte nga gadamecte yogo na ingucyac iwahac gadacte. Ailu gale alingfoc yogo nale agofoc. Nga gale Wapong yogo nale Wapong. <sup>17</sup> Aime ga wenuwa homadamecte, yogowahac na homabe longnudaingte. Homacti sugu na

galacni baicnudaicte. Na gaholec mi gadacte ilec ailu ameine Wapontacni umacineholec badacte.”<sup>18</sup> Inguc milu ye hataelu sanangne Naomi inguchac nganiwec. Ilec ailu yowa hegilelu hikeiboc.

*Betelehem ngic-ngigac yenge Ruti nga Naomi nganicyepaibong*

<sup>19</sup> Hikecgu Betelehem taonka sulumboc ngic-ngigac yenge sasawadi yekele kwatackelu olong baibong. Ailu mac-file ngigac yengi ngani-lilicyepalu miibong, “Yogo Naomi hocne.”

<sup>20</sup> Uwangagubong Naomidi yanguc miwec, “Nale wac Naomi hatacmac mi midaing. Kuc Fileine yedi ngageme nala doic kwele-umactowa fikewec, ilec ailu nale wac Mara wacnud-abieng.\*<sup>21</sup> Na esecne mafaneholec gaiba. Nga yakucmac ine Wapongti bafaliyecnume wiyac mikac, ngani-motolu hefaliegabac. Wapongti umac witina lolu monickolec Kuc Fileinedi lokwesacka locnuwec. Yogolec ngenge omale Naomi wacnugaing?”

<sup>22</sup> Dameng iwa Naomi nga yengauine Ruti yeke Moabi himong hegilelu Betelehem taonka padi ingucne bali wewe dameng fungke-fungkeina hefalieiboc. Ruti ye ine Moabi alingkacni ngigac.

## 2

*Rutidi Boasle bolewa galu yeicne bole bawec*

*Rutidi nosing ba-habu ainale uwawec*

<sup>1</sup> Naomi ngaweine Elimelec, yeke alingkacni ngic dongeineholec monic gawec, wacine Boas.

<sup>2</sup> Aime Moabi ngigac Ruti yei Naomi edolu yanguc miwec,\* “Na Israel aling ngengele aibaba balaibelu bolewa nalic hikedacka, me? Iwa hikebe ngic monicti nalic midaicte. nosing inguc wecaigaing, yogowacni noine monic-monic wa-fame ba-habu aidacte.”

Inguc mime Naomidi yanguc edowec, “Yengaune, ga migic inguc ainong.”

*Rutidi bolewa hikelu nosing ba-habu aiwec*

<sup>3</sup> Inguc mime ye bole monic iwa lekwesilu webac aibong lobenginang domame noine gocne wa-fawec, yogo ba-habu aiwec. Lobeina ngageme bole yogo Boasle bole aiwec. Boas ye ine Elimelecte alingkacni.

*Boasdi Rutile ago holerwec*

<sup>4</sup> Dameng yogowahac Boas ye Betelehem taonkacni wawec. Walu webac aibong nganicyebalu yanguc edocebawec, “Wapongti ngengeholec gadaic.”

Inguc mime yenge ameine yanguc bafaliyecnoibong, “Wapongti mosocgudaic.”

<sup>5</sup> Aime Boas ye webac aibong yengele damong, yela lelu uwacnowec, “Ngigac-adu yogo male?”

<sup>6</sup> Inguc mime yanguc bafaliyecnowec, “Ngigac-adu ye Naomiholec Moabi aling himongkacni weleiboc.”<sup>7</sup> Ailu ye yakucmac wele yanguc migac, ‘na nalic webac aigaing yengele lobewa galu noine gocne dodockacni wa-fame ba-habu aidaba, me?’ Inguc milu ubiyacte benang wele ba-habu aigac. Ailu mi ngiye-ngagegac. Yakucmac falewa kpsicnemac ngiye-ngagegac.”

<sup>8</sup> Inguc mime Boasdi Ruti edowec, “Adune, na edocgube ngagec! Ga noine ba-habu ainogale milu bole monicka mi hikedamec. Bole yagowa sugu nale bole-adufocne yengeholec gadamec. Bole yago mi hegiledamec.”<sup>9</sup> Ailu webac aidaingte yenge wenuwa gabong, yogo nganilu adufocne yengele balaibecebadamec. Nga ngic yenge mi basowalecgudabiyentele aka-yowa mibac. Ailu misale aigeleme nalic galu misa kufockacni balu nodamec. Yogo nale bole-madec yengi bawelebiyeng domagac.”

<sup>10</sup> Boasdi Ruti inguc micnome Ruti ye keta badulu haicine himongka heluluckelu miwec, “Na wenuc haicfulu ngigacti gale dongowa fikebe emegona locnugic?”

<sup>11</sup> Inguc mime Boasdi miwec, “Ga ngawegone biyac homame gacgu yengaugoneholec yawa weleiboc. Aime yengaugone madickeng yogo siduc sasawa nala biyac kwesiwec. Ailu nenggac-mamacfocgone nga mac-himonggone yogo hegilelu ngic mi ngagecubagic, nongela kwilic wele gagic.”<sup>12</sup> Yogolec ameine Wapongti badugeledaic. Ailu ga Wapong yeke habalac bageina sangkelu gagic. Yogolec Anutu, Israelle Wapong yeicne sugulacni ameine sasawa gala weledaic.”

\* 1:20: Mara wac yogolec fungine ye ‘ngigac kwele-umackolec’ nga Naomi wac yogolec fungine ye ‘ngigac beliyegac’

\* 2:2: Aibaba yogo yanguc fagac, ‘Wok Pris’ 19:9-10 “Wapongti miwec, ‘Dameng iwa nosing webac ailu ba-habu ainoga, nosing ungguluina domagac me nosing monic-monic wa-fagac, Yogo mi badaing. Nosing hegilebong ngic-ngigac mafa mikac me aling monickacni nalic yengileng badaingte.’”

<sup>13</sup> Inguc mime Rutidi miwec, “Sugucnene Boas, ga kwele-madic ainelelu baficnugadamec. Ailu bamadicnulu yowa efecnemac kwelec kwekwegone edocnugic, yogo na sifu gale bole-adufoc yenge ingucne mi aidacte.”

<sup>14</sup> Gagcu nosing-dameng aime Boasdi Ruti edolu miwec, “Ga yawa wele bret gocne balu waing-hulung kpomuluckelu noc.”

Inguc mime Ruti ye bole ngic-ngigac ngiyeibong, yengeholec ngiyewec. Ngiyeme Boas ye bali noine lobong loboicne gocne lacnome nowec. Nome gebeckeme toseine bawec. <sup>15</sup> Ngiyeme Ruti ye monickolec noine ba-habu ainale fangkewec. Fangkelu leemowa Boasdi bole-madecfocine edocebalu yanguc miwec, “Ye nalic hegilebong galu noine dodockacni hewacnginang monic-monic fagac, yogo banoga aime aka mi hedickedaing. <sup>16</sup> Ailu ngenge dodockacni benang yedi badaictele, noine monic-monic nebecine fulucke wickebong fame ye nganilu badaic. Bame ngic monicti ilec ailu ngage-sowac mi aidaic.”

*Ruti bole bawecte mingagec aiboc*

<sup>17</sup> Boasdi inguc mime Ruti ye bolewa noine ba-habu gaemowa mac debolewec. Deboleme ba-habu aiwec yogo balu weme wame bawec, bali hucine yogolec umacine 12 kilo, ingucne aiwec. <sup>18</sup> Aime weme wame umacine balu delu taonka fewec. Feme nosing bocyac ba-habu aiwec, yogo yengauine edalime nganiwec. Nga nosing loboicne nolu gebeckeme balewec, yogolec toseine ingucyac witina lacnowec.

<sup>19</sup> Lacnome yengauinedi uwacnowec, “Ga yakucmac wenuwa galu noine ba-habu bole bagic? Ngic emeina locguyec, ye Waponte mosocti yela fadaic.”

Inguc mime Ruti ye male bolewa galu bawec, yogolec siduc yengauine yanguc aicnowec, “Na yakucmac ngic monic wacine Boas, yele bolewa gagabac.”

<sup>20</sup> Aime Naomidi yengauine edowec, “Wapong ye gagaing nga homaicne yengela pasi madicne banale tatakic mi aicaigac. Wapong yeicne mosoc sugudi ngic yela fadaic. Ailu ye nongele alingcacni ngic gocne ame-babafocnonggeng gaibong. Yengelacni monic ye hocne aigac.”†

<sup>21</sup> Inguc mime Moabi ngigac Rutidi miwec, “Ye na ingucyac yanguc edocnugac, ‘Ga nale bole-babafocne yengeholec gadamec gagcu noba nosing ba-habu dameng iwa moto-daicte.’”

<sup>22</sup> Aime Naomidi yengauine Ruti yanguc edowec, “Yengaune ga yele bole-adufocineholec madicne benang gaengka wiyac monicti nalic mi basowalecgudaictele gadamec. Entacka bole monicka hikedamecte iwaine umac badamecte.”

<sup>23</sup> Aime Ruti ye Boasle bole-adufocine yengeholec noine ba-habu gagcume bali nga wit ba-habu dameng motowec. Dameng iwa Ruti ye yengauinele macka ngiye-fac gawec.

### 3

*Naomidi Ruti yefe milockecnowec*

*Naomidi Ruti nosing-wewe macka salewec*

<sup>1</sup> Hadeng monic Naomidi yanguc edowec, “Yengaune, na nalic ga yefe monic bafuwagelebe ngiye-ngiyegone madicne aidaicka. <sup>2</sup> Nga bole-adufoc yengeholec gagic, yengele damong Boas, ye nongele alingcacni aigac. Ye deboc yagowahac nosing-wewe macina bali hucine gbelongka wikelu gadaicte. <sup>3</sup> Ilec ailu ga nalic misa lowalu ngakpi-kpolucgone madicne benang holelu socgone tokic lowalu nosing-wewe macka hikedamec. Inguc aiyengka, yei ine mi nganicgudaic. Ailu, nosing misa nowackeme motome hike wenuwa fadaicte,\* <sup>4</sup> Yogo ngani-ngagec aidamec. Ailu ga yogowa hikelu hemac higeina fadaicte, yogo baickelu emeina moc wa-fadamec. Aime ga oma bole badamecte, yogo yeuctiyac edocgudaicte.”

<sup>5</sup> Inguc mime Ruti ye yanguc bafaliyecnowec, “Ga edocnugic, yogo na nalic sasawa aidacte.”

*Rutidi uwame Boas ye ame-baba ngic aibaba badaic*

† **2:20:** Israel ngic-ngigac yenge pasi yanguc aibong. Wapong ye gieng neboc-neboc gaganginengsoc monic-monicka gumeme yenge ngiyelu bole baibong. Aime sifu ngic monic umacineholec giengine salelu fuliine balu bole nalic mi hole-duwec aidaicte. Lobeina ngic monicte alingine, ame-baba ngic wackegac, hatac fuli balu gieng badaicte. Yakuc ngic alingine umacineholec gieng hatac yele gieng fikeme bole hole-duwec aidaingte. Ame-baba ngicte aibaba monic yanguc aibong. Entacka ngic homame ngigacine hufing gagac, ngic hae-gbaine me alingine ngigacine badaicte. Lobeina kogoc baboc ngic homaicne madicine wackeibong. Kogoc suguleme ye ngic homaicnele gieng nga wiyacine badaicte. Ilec ailu ame-baba ngic ye inguc bole bawec. \* **3:3:** Dameng iwa bole fileine ye mac ubieme nosingine emeina falu damongkewec.

<sup>6</sup> Inguc milu ye nosing-wewe macka hikelu yengauine edowec, yogolec soc benang yanguc aiwec.

<sup>7</sup> Aime Boas ye nosing misa nowackelu kwele-madictowa ngagewec. Ngagelu ye nosing habu ngiyewec, yogolec nevocina hikelu wa gung fawec. Gung faemowa Ruti ye akikic hikelu higeina hemac baickelu fawec. <sup>8</sup> Faemowa deboc hewacina ngic ye kwatackelu hefaliye nganime ngigac monic ye hige emeina fawec.

<sup>9</sup> Faemowa nganilu uwacnowec, "Ga ma?"

Inguc mime yei bafaliyelu miwec, "Na Ruti, gale kwelec-adu. Ga nale ame-baba ngic aigicte ailu hemacgone toseinedi na nalic hemacnunong."<sup>†</sup>

*Boas Ruti sawang-yowa edowec*

<sup>10</sup> Aime Boasdi miwec, "Adune, Waponte mosocti gala fanale. Yogolec ga ngic-madec feicne waične gagabiyeng, ingucne yengela hikebe milu mi hikemec. Ilec yakucmac aibaba madicne aigamec yogodi yengaugone aibaba madicne esecne aicnoing ewaligac.

<sup>11</sup> Ailu adune, ga hangoc mi aidamec. Ga wiyac sasawa edocnugic, yogo na nalic aidacte. Ailu nale ngic-ngigac taonka gagabiyeng yenge, gale pasi dondonne yogo biyac ngani-ngagac aicaigabiyengte ailu inguc aidacte. <sup>12</sup> Aime na gale ame-baba, noine. Ailu ame-babagone monic haene sugucne gagac, yei ine na ewalicnugac. <sup>13</sup> Ga nalic deboc yago yawa fadamec. Aime ye saeme ame-baba ngic yefenonggeng fagac, yogo balaibelu angac ngagelu bacgunogale ngagelu nalic bacgudaic. Aime ye yefe yogo mi balaibelu nalic bacgudaicewa ingucne ine nani nalic bacgudacte. Yogo Wapongti ngageme migabac. Yogolec ga yawa faengka mac saena."

*Boasdi Ruti pasi madicne aicnowecte Naomi siduc bacnowec*

<sup>14</sup> Inguc edome Ruti ye Boasle higeina faemowa gacgu Boasdi yele ngageme ngigac monic yawa nosing-wewe macka kwesiye, yogodi yengele ngage-ngagewa mi fikedaic. Mac sae-saele ngic yengi mi ngani-motobongka Ruti fangkewec.

<sup>15</sup> Aime Boas edowec, "Ga ngakpigone witina hemac hemoctolu badomaengka!" Inguc mime ye hemacine hemoctolu badomame Boas ye bali hucine yogo 40 kilo, yogolec soc balu umengkecnowec. Umengkecnolu hefalie taonka hikewec.

<sup>16</sup> Aime Ruti ye yengauinela hike sulumeme yengauinedi uwacnowec, "Yengaune, wenuc fikegac?"

Mime ngicti Ruti wiyac sasawa aicnowec, <sup>17</sup> Yogolec siduc aicnolu taockelu edowec, "Ye bali umacine 40 kilo, yago yanguc milu nelegac, 'Ga mologona wiyac monic mi balu moc benang yengaugonela nalic mi hikedamecte.'" "

<sup>18</sup> Aime Naomidi edowec, "Yengaune, ga wangec gacgu bole yogolec noine wenuc fikedaicte, yogo nganidamec. Ngic ye moc sugu benang nalic mi gadaictele ailu boleine balu gagac, bagacgu yakucmac noine fikedaicte."

## 4

*Boasdi Ruti balu damongkenale miwec*

*Boasdi ngic micne hefolecebawec*

<sup>1</sup> Aime Boas ye taonka felu taon nuina hike ngiyewec.\* Ngiyelu Rutile ame-baba ngic, Boasdi Ruti ubiyac siducine edowec yogo, ngic ye hocne yogowa yefe wele kwesiwec. Wele kwesime Boasdi nganilu wacine wackelu miwec, "Nebecne, ga ya wele wangiye!" Wackeme le-ngiyewec.

<sup>2</sup> Boasdi taonte ngic micne yengelacni ngic 10 hefolecebalu miwec, "Yawa wele ngiyen-ing!" Inguc mime yenge ingucyac lelu wangiyeibong. <sup>3</sup> Wangiyeibongka Boasdi Rutile ame-baba ngic siduc yanguc aicnowec, "Naomidi Moabi aling himongkacni hefalie welelu Elimelecte bole giyeng yogo fuli baninte miwec. <sup>4</sup> Na mimi yogolec ngagelu miyengkelu edocgugabac. Ga, yawa ngiyegabeleng nga habu nongele micne ngiyegabiyeng, yengele dongowa himong yogo fuli badamec. Ame-baba ngic yefenonggeng fagac. Yele ame-baba ngic ingucne monic mi gagaing. Yogo ga molic-molic nga na gale lobewa gagabelec. Ilec yefe yogo balaibelu badamecte milu nalic ameine fuli badamec. Nga yefe yogo mi balaibelu badamecte milu, yogo nalic edocnug ngagebe."

Inguc edome ngicti miwec, "Na nalic ame-baba ngic yefenonggeng fagac, yogo balaibelu himong yogo ameine fuli badacte."

<sup>5</sup> Inguc mime Boasdi taockelu miwec, "Ga Naomilacni himong fuli badamecte, dameng iwahac ngigacgone Ruti ingucyac balu bagadamecte. Ailu Ruti ye Moabi ngigac. Ngic

<sup>†</sup> 3:9: Inguc mime uwawec, 'na ngigacgone ingucne aidacte.' \* 4:1: Ngic sugucne nga micne yenge taon nuina wele-ngiyelu yowa-umac nga awa bole bacaoigang.

homawec, yele hodac. Yogolec ga yefenonggeng fagac, yogo balaibelu Ruti ingucyac balu ngaweine homawec, yele wacine himong yogowa hole-gboliyelu mole-danoc yogo basanangkelu damongkelu bagadamec.”

<sup>6</sup> Yowa inguc mime yedi yanguc bafaliyecnowec, “Inguc aime na sifu ame-baba ngic yefenonggeng, yogo nalic mi balaibedacte. Inguc ailu nanicne mole-danoc basowaledacka. Yogolec ga gageuc yogo ameine fuli banong. Nani badackalesoc ameine na mi aidacte.”

<sup>7</sup> (Dameng iwa Israel-ngic yenge wiyac gocne fuli baba aibong mimipang yanguc sanangkewec, Ngic yogo ye mimipang micnolu basanangkenale suine nebocine hemoctolu lacnowec. Inguc aibong fuli baba yogo sanangkewec.)

<sup>8</sup> Ailu ame-baba ngicti Boas yanguc edowec, “Yogo ga fuli badamec!” Milu hige ebecine hemoctowec.

<sup>9</sup> Inguc aime Boasdi micnefocine nga ngic-ngigac ngiyeibong yanguc edocebawec, “Ngege na widecnubongka na yakucmac Naomilacni Elimelec, Kiliong nga Malong, yengele wiyac sasawa yogo fuli badacte. <sup>10</sup> Iwacnihac na ingucyac Moabi ngigac Ruti, Malong hodacine ye babe nale ngigac aidaicte. Ailu na ngic homawec, yele wac hole-gboliyelu mole-danoc gadaicte ailu wacine yele mackacni me ngesa-ngamboine siduc mi miyac aidaicte. Yogolec yakucmac ngege na widecnugabieng.”

<sup>11</sup> Inguc milu ngic-ngigac nga micne taon nuina ngiyeibong, uwayeleme yenge sasawadi miibong, “Nonge widecgugabeleng. Wapong yeuc ngageme Resel nga Lea yeke Israel habu basugulecnubaibocte yakucmac gagabeleng. Yakucmac Wapong yeuc Ruti ngagecnome yeke ingucne aidaic. Ngigac yago baefeckeme macgona ofedaicte. Ga Efarata alingkacni ngic sugucne ailu Betelehem taonka gaengka wac-siducgone suguledaic. <sup>12</sup> Aime Wapong ye ngigac-adu yogowacni gale gbolifocgone bafuwageledaic. Bafuwageleme gbolifocgone yogo Peresle gboli ingucne fikedaing. Peres ye Tamar nga Yuda yekele madec.”

*Wapongti ngageme Ruti kogockolec aiwec*

<sup>13</sup> Inguc miibong Boas ye Ruti bame ngigacine aime gaiboc. Aime Wapongti Ruti kogockolec aidaictele ngagecnome ye madeckolec aiwec. <sup>14</sup> Madec fikeme ngigac yenge Naomi edoibong, “Nongileng Wapong mitengkenang! Ye yakucmac pasi ingucne gala bame ame-baba ngicgone fikegac, yogo mi miyac aidaicte. Israel aling himongka yele wacine sugule-hikedaic. <sup>15</sup> Yengaugone ye madec yogo bagacte ailu ga sugucne aidamecte, dameng yogowa yedi misa-welec ngicgone ailu damonggulu gadaicte. Aime yengaugone ye gale angac sugucne ngagedaicte, yogo gale madecfocgone 7 gadabong midec yengele angac ingucne mi fikedec.”

<sup>16</sup> Inguc miibong Naomi ye kogoc yogo ba-tabu aicnolu damongkelu gawec. <sup>17</sup> Gacgume yele mac emeinacni ngigac habu gaibong yenge miibong, “Naomi ye madec monic bangiyegac.” Inguc milu yenge wacine Obede wackeibong. Aime gacgu ye Yesile mamac aiwec. Aime Yesi ye Dawidle mamac aiwec.

*Dawid ngesa-ngambofocine yengele wac*

<sup>18</sup> Peresle ngesa-ngambofocine yengele wac-aling yanguc fagac: Peres yelacni Hesoron fikewec.

<sup>19</sup> Hesorontacni Ram fikewec.

Ramtacni Aminadap fikewec.

<sup>20</sup> Aminadaplacni Nasong fikewec.

Nasontacni Salamong fikewec.

<sup>21</sup> Salamontacni Boas fikewec.

Boaslacni Obede fikewec.

<sup>22</sup> Obedelacni Yesi fikewec.

Aime Yesi ye Dawidle mamac.



## Mataiodi Yesule Siduc Madicne Kwelengkwec

### *Mimi-yegeng yowa*

Mataio ye Yuda ngic monic, yele wac monic yogo Liwai. Ye Roma yengele gamangte bole balu takes-baba ngic aiwec. Dameng iwa Yuda ngic-ngigac yenge Roma yengi damongebaningte takicebame gaibong. Ilec ailu takes-baba ngic yengele momoc takicebawec. Mataio ye takes-baba bole bagacgume Yesudi wackeme yele mic-tengteng aiwec.

Yesu ye homame hifa 30 ngama ingucne motome, Mataiodi Yuda ngic-ngigac yengela hibi yago kwelengkeyelewec. Yesu ye Mesia, yogo mime yegengkenale Wapongte Hibi Esecna yowa fagac, yogo balu kwelengkwec. Ailu Yesu ye Yuda ngic-ngigac yengele ngictau, yogo yegengkenale kwelengkwec.

Dameng iwa ngic yeicne siduc kwelengkelu “na” mi lolu gawec. Ye yeicne siduc kwelengkelu “ye” lolu gawec. Mataio ye aibaba yogo bafaliyelu siducine kwelina kwelengkelu “ye” lowec fagac.

### *Yowa yago hibi nevocina fagac*

1:1–2:23 Yesu fikewecte siduc

3:1–12 Yoane misa-lowacti bole bawec

3:13–4:11 Yesu misa lowame Aleng Sugucnenginengti lokwesacka lowec

4:12–18:35 Yesudi Galili iwa lolickelu siduc mime yegengkwec

19:1–20:34 Yesu ye Galili hegilelu Yerusalem hikenogale hikelu gawec

21:1–27:66 Sonda monic moto-motoina Yesu homawec

28:1–20 Yesu ye homackacni gboliye fangkelu ngic-ngigac yengela fikeme nganiibong

### *Yesule ngesa-ngambofocine*

*Luk 3:23-38*

<sup>1</sup> Yesu Kristolacni fikesawec ailu fike-ofeibong, yogolec yanguc kwelengkeibong. Yesu ye Dawidile fikesaweckacni, Dawidi ye Abrahamte fikesaweckacni.

<sup>2</sup> Abraham ye Aisakle mamac,

Aisak ye Yakobole mamac nga

Yakobolacni Yuda nga ngic hae-gbafocine.

<sup>3</sup> Yudale madeckecine Peres nga Sera fikeiboc, yekele nenggacnginec Tama.

Aime Peres ye Hesorongte mamac nga

Hesorong ye Ramte mamac.

<sup>4</sup> Ramti Aminadaptte mamac,

Aminadapti Nasongte mamac nga

Nasonti Salmonte mamac.

<sup>5</sup> Salmon ye Boasle mamac nga nenggacine Rahap.

Boas ye Obedele mamac nga nenggacine, yogo Ruti.

Aime Obede ye Yesile mamac.

<sup>6</sup> Yesidi ngictau Dawidile mamac.

Dawidi ye esecne gacgu Uriale ngigac\* bawec. Balu madecine Solomon bafuwawec.

<sup>7</sup> Solomon ye Rehoboamte mamac,

Rehoboam ye Abiyale mamac nga

Abiya ye Asale mamac.

<sup>8</sup> Asa ye Yehosafatte mamac,

Yehosafat ye Yehoramte mamac nga

Yehoram ye Usiale mamac.

<sup>9</sup> Usia ye Yotamte mamac,

Yotam ye Ahasile mamac nga

Ahasi ye Heseziale mamac.

<sup>10</sup> Hesezia ye Manasele mamac,

Manase ye Amonte mamac nga

Amon ye Yosiale mamac.

<sup>11</sup> Yosia yelacni Yekonia nga gbafocine fikeibong. Babilon yengi Israel ngic-ngigac witicebalu bacebalu Babilon taonka hikeibong, dameng iwa yenge fikeibong.

<sup>12</sup> Babilon hikeibong lobeina

Yekonia yelacni Sialtiel fikewec.  
Nga Sialtiel ye Serubabelle mamac.

<sup>13</sup> Serubabel ye Abiutte mamac,  
Abiut ye Eliakimte mamac nga  
Eliakim ye Asorle mamac.

<sup>14</sup> Asor ye Sadokte mamac,  
Sadok ye Akimte mamac nga  
Akim ye Eliutte mamac.

<sup>15</sup> Eliut ye Eleasale mamac,  
Eleasa ye Matante mamac nga  
Matan ye Yakobole mamac.

<sup>16</sup> Yakobo ye Yosefele mamac. Aime Yosefe ye Mariale ngawe aiwec. Nga Maria yelacni  
Yesu madec fikeme ye Mesia wackeibong.

<sup>17</sup> Aime yengele fikesawecngineng Abrahamtacni fike-ofecgubong Dawidi fikeme  
alecine 14 aiwec. Nga Dawidilacni fikesawecngineng fike-ofecgubong alecine 14 aiyemewa  
Babilon bacebalu hikeibong. Aime iwacni gaofebong alecine 14 aiyemewa Mesia  
fikewec.

*Yesu fikewec*

*Luk 2:1-7*

<sup>18</sup> Yago Yesu Kristole fike-fikele siduc. Maria ye Yesule nenggac. Ye ngic monic,  
wacine Yosefe, yeholec bingeca gaiboc. Nga Maria ye Yosefeholec monic fa-fangkec  
mi aiyebocna Tili Asulacni madec gobeewec. <sup>19</sup> Aime ngaweine Yosefedi inguc ngagelu  
ngic dondonne gawecte ngic-ngigac yengele haicka ngigac-bingecine yowa aicnome game-  
game aidaickale, ngageme nalic mi aime yeicnakac akikic lome hikenale ngagewec.

<sup>20</sup> Ngagelu ye ilec ngage-ngage bole balu gawec. Hei, Sugucnele angelo monicti gungka  
fikecnolu yanguc edowec, "Yosefe, Dawidile fikesaweckacni, ga ngigac-bingecgone Maria  
banogale mi hangocgudaic. Kogoc yele gobewa ngiyegac, yogo Tili Asulacni. <sup>21</sup> Mariadi  
madec yogo badaicte, yedi galu ngic-ngigacfcine bikickacni bamoctocebame wasecne  
aidaingte. Ilec ailu yele wacine Yesu wackedamec."

<sup>22</sup> Aime esecne Sugucnedi yowa yogo Wapongte siduc-mimi ngic yela lome miwec, yogo  
hocne fikenale inguc fikewec.

<sup>23</sup> "Ngagegaing, ngigac-neleweng ngickolec mi faicnedi madec monic gobeelu bame yele  
wacine Emanuel midaingte." (Yes 7:14)

Wac yogolec fungine yanguc: Wapongti nongilengkolec gagac.

<sup>24</sup> Aime Yosefe ye gungkacni fangkelu Sugucnele angelodi yowa edowec, yogo balaibe  
hikelu Maria bame macina feiboc. <sup>25</sup> Felu ngigacineholec mi faebocka madec fikewec.  
Fikeme Yosefedi madec yogo wacine Yesu wackewec.

## 2

*Yesu fikeme ngage-ngage ngic yengi ibu locnoibong*

<sup>1</sup> Yesu ye Betelehem taonka fikewec, Yudeya himongka, dameng iwa Herodedi ngictau  
gawec. Gacgume ngage-ngage ngic gocne himong wenac ofe-ofeinacni Yerusalem kwesii-  
bong. <sup>2</sup> Kwesilu yanguc miibong, "Yuda ngic-ngigac ngengele ngictau fikewec, ye wenuwa  
fagac? Nonge wenac ofe-ofeina ngiyelu yele asocmeng ofeme nganilu ye ketadi holecnolu  
afeanangte kwesigabeleng."

<sup>3</sup> Inguc miibong ngictau Herodedi yowa yogo ngagelu kwele-umac bawec. Aime ngic-  
ngigac Yerusalem gaibong, yenge inguchac aiibong. <sup>4</sup> Aime yedi Yuda ngic-ngigac yengele  
depec-baba ngic micne nga Wapongte yefe-yowale wewedu ngicfcocngineng sasawa kpa-  
ducebalu mi-uwac aiyelewec, "Mesia wenuwa fikenale miicne?"

<sup>5</sup> Uwayeleme miibong, "Yogo Betelehem Yudeya himongka. Ilec ailu Wapongte siduc-  
mimi ngicti yanguc biyachac kwelengkewec fagac,

<sup>6</sup> "Yuda himongka Betelehem habu-macka micne monic fikelu Israel ngic-ngigacfcine  
lama ingucne damongbadaicte. Ilec ailu mac yogo Yuda ngic-ngigac yengele taon  
gocne, yengele wamicne miyac, Betelehem ye wac-bingecineholec." (Mika 5:2)

<sup>7</sup> Inguc edobong Herodedi wenac ofe-ofeinacni ngage-ngage ngic yenge sangke-sangke  
hefolecebalu asocmeng ma damengka fikewec, yogolec dameng dondonne ngagenale mi-  
uwac aiyeleme edoibong. <sup>8</sup> Edobong yedi yanguc milu salecebawec, "Nenge Betelehem  
taonka hikelu kogoc wenuwa fagac, yogo basackegacgu bafuwalu kwesi edocnubong  
nanidihac hikelu ketadi holecnolu afeedacte."

<sup>9-10</sup> Ngictau ye inguc mime yenge yogo ngagelu yefewa hikeibong. Hei, asocmeng wenac ofe-ofeina nganiibong, yogohac hatacmac fikeme nganilu belyebenangkeibong. Aime asocmengti molickeyeleme hikegacgu kogoc fawec, mac yogolec feina holelu ngiyewec. <sup>11</sup> Ngiyeme yenge macka felu kogoc nga nenggacine Maria nganicepaibong. Nganicepalu ketadi holecnolu ngosockelu afeebong. Ailu hiyenginangkocni kwele-madicte wiyac, yogo gol nga hasoc hole-holele nepa hoine madicne ailu tokic hoine madicne wacine mira, yogo lacnoibong. <sup>12</sup> Ailu Herodela yefe mi hefaliye hikeningte Wapongti gungka akayowa milu edocebawec. Edocebame yenge yefe monic balaibelu himongnginang hefaliye hikeibong.

*Herodele hangoc Yesu balu Isip hikeiboc*

<sup>13</sup> Hefaliyelu hikebong Sugucnele angelo monicti Yosefe gungka fikecnolu yanguc edowec, "Ga fangkelu kogoc nenggacineholec bacepang hangoc Isip himongka hikelu gadaing. Herode ye kogoc yogo bafuwalu wehomanale migacte ngenge hike gaebongka nani gagu edocngebabe hatacmac kwesidaing." <sup>14</sup> Inguc mime Yosefe ye deboc iwahac fangkelu kogoc nenggacineholec bacepame Isip himongka hikeibong. <sup>15</sup> Hikelu iwa gacgubong Herode homawec. Aime esecne Sugucnedi yeicne siduc-mimi ngic yele micka lolu yanguc miwec, "Isip himongkacni madecne wackebe kwesiwec." (Hos 11:1) Dameng iwa yowa yogo noine fikewec.

*Madec wecebayackewec*

<sup>16</sup> Aime ngage-ngage ngic yenge Herode kwesackelu yele yowa hegileibong, ye inguc ngagelu aalic sugucne ngagewec. Ngagelu Betelehem nga mac-himong yogolec emewa faibong, iwa hudu-baba ngic salecebawec. Salecebame yengi hikelu ngic-ngigac mac iwacni yengele madecfocngineng hifangineng yaeckang ailu kogoc gbolicne fikeibong, yenge sasawa wecebabong homayackeibong. Yogo ngage-ngage ngic yengelacni dameng ngagewecte, yogo aiyelewec. <sup>17</sup> Inguc aime siduc-mimi ngic Yeremiyadi yowa yanguc miwec, yogolec noine fikewec.

<sup>18</sup> "Rama habu-macka hisonggong nga kwele-sowac sugucne fikegac. Yogo Resel\* kogocfocine homagaing, yengele hiyagac. Ye kogocfocine monic mi gagaing. Ilec bakolockeningte mi aicnogac." (Yer 31:15)

*Israel himongka hefaliye hikeibong*

<sup>19</sup> Aime Yosefe ye Isip himongka ngiyeemewa Herode homawec. Hei, Sugucnele angelo monicti gungka fikecnolu yanguc edowec, <sup>20</sup> "Madec yogo wehomanogale miibong, ngic yogo yenge biyac homaibong. Ilec ga fangkelu madec nenggacineholec bacepaengka ngenge Israel himongka hatacmac hikening."

<sup>21</sup> Inguc mime Yosefe ye efeckelu fangke madec nenggacineholec bacepame Isip himong hegilelu Israel himongka hefaliye hikeibong. <sup>22</sup> Hikelu ngageme, "Akelaosdi mamacine Herodele mac balu Yudeya himong, yogolec ngictau aiwec." Yosefe ye yowa-siduc yogo ngagelu iwa ganogale hangockewec. Ailu ye gungka sawang-yowa ngagewecte Galili prowins iwa hikeibong. <sup>23</sup> Hikelu taon monic wacine Nasaret, iwa gaibong. Aime esecne Wapongte siduc-mimi ngic yengi yowa yanguc miibong, "Ye Nasaret ngic, inguc midaingte." Yogo noine fikenale inguc aiwec.

### 3

*Yoane boleine fungkewec*

*Mrk 1:2-8; Luk 3:1-18; Yoa 1:19-28*

<sup>1</sup> Dameng iwa Yoane misa-lowacti Yudeya himong kisiwa misaine mikacka hikelu ngic-ngigac Wapongte yowa edocebalu weduyelelu <sup>2</sup> miwec, "Honocmengte ngani-damongti\* biyac bangkalegacte ngenge kwelengineng hefaliyena." <sup>3</sup> Aime Wapongte siduc-mimi ngic Yesaiyadi Yoanele yanguc kwelengkewec, "Himong kisiwa misaine mikacka wawac monic yanguc fikegac, 'Ngenge Sugucnele yefe wesackelu hole-wenengkening.'" (Yes 40:3)

**2:11:** Mige 72:10-15; Yes 60:6 \* **2:18:** Resel ye Yakobole ngigac. Ye Israel yengele ngambo. Dameng iwa Israel ngigac yenge Resel ingucne hiyaibong. **2:23:** Luk 2:39; Yes 11:1; 53:2; Yoa 1:45 \* **3:2:** Israel ngic-ngigac yenge Wapongte wac alang bacnolu mi wackeibong. Ilec ailu Mataioidi Wapongte ngagelu "Honocmeng" kwelengkewec. Ilec "Wapongte ngani-damong" nga "Honocmengte ngani-damong" yekele fungine yogo wiyac moniyang aigabiyec. **3:2:** Mat 4:17; Mrk 1:15

<sup>4</sup> Aime ye ngakpiine kamel dowecinedi baicne, yogo holelu umbikaine monic sic socinedi baicne, yogodi hewacina hefelu gawec. Ailu ye ipowa nga hasengte begec misaine nolu gawec.<sup>†</sup>

<sup>5</sup> Aime Yerusalem ngic-ngigac nga Yudeya himongkacni ailu Yodan misa emeina himong falewecka, iwacni yenge sasawadi macono yela hikeibong. <sup>6</sup> Hikelu bikicngineng micfikibong yedi Yodan misawa domalu misa lowayelewec. <sup>7</sup> Aime Farisaio nga Sadyusi yenge homacnedi misa lowanogale hikeibong Yoanedi nganicebalu yanguc edocebawec, "Hema gbolifocine, madi ung-yowa yanguc edocngebawec, ngenge Wapongti aalicine badungelenale aidaicte, yogolec hangoc hikedaingte?" <sup>8</sup> Ilec ngenge kwele-hefaliyecte silicka pasi noine bafuwadabiyeng. <sup>9</sup> Ailu gageicnele yanguc mi ngagadamec, 'Abraham ye ngambone aigacte wasecne aidacte.'<sup>‡</sup> Wapong ye posa yago nalic mime Abraham ngambofocine fikedaingte, yogo noine edocngebabac.

<sup>10</sup> "Naka yoc fungina biyac loicne fagac. Aime yoc gocne noine madicne mi aicaigaing, yogo sasawa weyackelu dacka wickedaingte. <sup>11</sup> Na kwele-hefaliyecte misa lowangelegabac. Nga ngic nale lobewa kwesidaicte, yedibac Tili Asu nga dac lowangeledaicte. Ailu ye le tapilidi nale tapili ewaligac. Na waweweine ingucnedi yele hige-ebec hemotocnobe nalic mi madickedaicte. <sup>12</sup> Ye moleina yafole fok balu welelu wit yafoineholec baic-baicte sobengka fame yogo filalu yafoine baickedaicte. Baickelu noine bakpaduc ailu nosingmacina lolu, yafoine pelengkulu dac pisic-pisicine mikac, iwa wickeme lobedaicte."

*Yoanedi Yesu misa lowacnowec*

*Mrk 1:9-11; Luk 3:21-22*

<sup>13</sup> Dameng iwa Yesu ye Galili prowinswacni Yodan misawa hikelu Yoanedi misa lowacnonale edowec. <sup>14</sup> Edome Yoane ye yogo ngageme nalic mi aime yanguc miwec, "Gagi na nalic lowaneleengka madickedaicte. Aime ga nala kwesilu nani lowagelebele migic."

<sup>15</sup> Inguc mime Yesudi yanguc miwec, "**Ga yowa yogo hegileng, pasi dondone sasawa noine fikenale yakumac edocgugabac, inguc aiyengka madickedaicte.**" Inguc mime nalic milu yowaine balaibewec.

<sup>16</sup> Aime Yesu ye misa lowalu misawacni ofeemewa honocmeng angkewec. Angkeme Wapongte Asudi tudiling nangole silic ingucne ailu yela wame nganiwec. <sup>17</sup> Hei, honocmengkacni mic-yowa monic yanguc fikeme ngagewec, "Yogo nale madec, kwelenedi yele angac ngagegabac, na ye ngani-angac aicnogabac."

## 4

*Yesu lokwesacka lowec*

*Mrk 1:12-13; Luk 4:1-13*

<sup>1</sup> Aime Aleng Sugucnenginengti Yesu lokwesacka lonale Asudi mengockeme himong kisiwa misaine mikacka hikewec. <sup>2</sup> Hikeme Yesu ye iwa deboc hadeng 40 nosing-sawegalu nosingte homawec. <sup>3</sup> Inguc aime Lokwesac Ngicti yela kwesilu miwec, "Ga Wapongte Madec noine gagicka posa yago miyengka bafaliyelu bret aina!"

<sup>4</sup> Inguc mime Yesudi yowa ameine bafaliyecnolu yanguc edowec, "**Yowa yanguc kwelengkeicne fagac,**

**'Ngicti nosingka sugu mi ganoga, miyac. Ye Wapongte mickacni yowa ofecaigac, yogo sasawa balu ganoga.'**"

*(Yef 8:3)*

<sup>5</sup> Inguc mime Aleng Sugucnenginengti Yesu mengockeme taon gbagbacna\* hikelu Ibu-mac feina wilinibenang, iwa lome domawec. Domame edolu yanguc micnowec, <sup>6</sup> "Ga Wapongte Madec noine gagicka gageuctihac yawacni wintackelu haunong. Yowa yanguc kwelengkeicne fagac,

'Ye gale ailu angelofocine bole-yowa yeleme yengi molengineng feina sesegubong, posa monicti higecone nalic mi helockedaicte.'

*(Mige 91:11-12)*

<sup>7</sup> Inguc mime Yesudi yanguc edowec, "**Ailu hatacmac yowa yanguc kwelengkeicne fagac,**

**'Ga Sugucne Waponggone lokwesacka mi lonong.'**"

*(Yef 6:16)*

<sup>8</sup> Inguc mime Aleng Sugucnenginengti Yesu hatacmac mengockeme tiki sugucne monicka fewec. Felu himongtowa himong gamangnginengkolec nga tapili nga hibi-angocine

<sup>†</sup> **3:4:** Ngakpiine nga umbikaine yogo Elaiyale ngakpi nga umbika ingucne. Siducine 2 Ngictau 1:8 yogowa fagac.

**3:7:** Mat 12:34; 23:33 <sup>‡</sup> **3:9:** Abraham ngambofocine sasawadi gaga-sanang badaingte inguc ngagesibong. **3:9:** Yoa 8:33,39; Rom 4:12 **3:10:** Mat 7:19; Luk 13:6-9 **3:11:** Yoa 1:26-27,33; Sale 1:5 **3:16:** Yoa 1:32 **3:17:**

Mige 2:7; Yes 42:1; Mat 12:18; 17:5; Luk 9:35 **4:1:** Hib 2:18; 4:15 **4:2:** Wah 34:28 <sup>\*</sup> **4:5:** Ibu-mac Yerusalem iwa domawecte taon gbagbacne wackeibong.

haicine monic-monic, yogo edalilu <sup>9</sup> miwec, “Ngagegic, ga ngosockelu ketadi holenelelu afenuengka, wiyac sasawa yago geledacte.”

<sup>10</sup> Inguc mime Yesudi yanguc edowec, **“Satang, ga baickenong. Yowa yanguc kwe-lengkeicne fagac, ‘Ga Sugucne Waponggone, ye moniyang sugu afeelu kwelec kwecnodamec.’”** (*Yef 6:13*)

<sup>11</sup> Inguc mime Aleng Sugucnengineng ye hegilelu hikeme angelo yengi kwesilu Yesu bafickelu gaibong.

*Yesu boleine molickelu bawec*

*Mrk 1:14-15; Luk 4:14-15*

<sup>12</sup> Ngic yenge yowa yogo miibong, “Yengi Yoane muc-macka lobong ngiyegac.” Yesu ye yogo ngagelu Galili prowinswa Nasaret taonka hefaliye hikewec. <sup>13</sup> Hikelu Nasaret hegilelu Sebulun nga Nafatali yekele himong Galili lifuc mecina, Kapeneam taonka hikelu gawec. <sup>14</sup> Aime Wapongte siduc-mimi ngic Yesaiyadi yanguc miwec, yogolec noine fikewec, <sup>15</sup> “Yodan misa nebocina yefe lifucka hikegac, Sebulun nga Nafatali himong iwa Israel yengele alingkacni miyac, yengi Galili prowinswa gagaing. <sup>16</sup> Ngic-ngigac yogo yenge kundungka gagaing, yenge angoc sugucne nganiibong. Aime ngic-ngigac himongka homacte bagewa gaibong, yengele hewacka angocine fikewec.” (*Yes 9:1-2*)

Yowa yogo noine ainale ye Kapeneam taonka ngiye-fangkec ailu gawec. <sup>17</sup> Dameng iwa Yesudi ngic-ngigac yowa yanguc edocebalu weduyelelu gawec, **“Honocmengte ngani-damongti biyac bangkalegacte ngenge kwelengineng hefaliyena.”**

*Mic-tengteng wacebawec*

*Mrk 1:16-20; Luk 5:1-11*

<sup>18</sup> Hadeng monicka Yesu ye Galili lifuc mecina haulu dingong balaibelu hikecgu hae-gba yaeckang nganicepame ufcnginec lifucka wickelu domainoc. Yogo Saimon, wacine monic Pita wackelu gaibong nga gbaine Endru. Yeke misa-sic baba ngic gaiboc. <sup>19</sup> Yeke nganicepalu yanguc edocepawec, **“Ngeke wele na balaibecnunic. Ngic yengi misa-sic ba-caigaing, ngeke silicine yogo ingucnehac ngic-baba bole banicte wedungetedacte.”**

<sup>20</sup> Inguc mime yeke iwahac ufcnginec hegilelu Yesu balaibeiboc.

<sup>21</sup> Aime iwacni lelu hatacmac hae-gba yaeckang, Sebedi madeckecine, Yakobos nga gbaine Yoane nganicepawec. Nganicepame yeke mamacnginec Sebediholec gombawa ufcngineng bamadickelu gaebongka wacepawec. <sup>22</sup> Wacepame yeke dameng iwahac mamacnginec nga gomba hegilelu ye balaibeiboc.

*Siduc Madicne edocebawec*

*Luk 6:17-19*

<sup>23</sup> Yesu ye Galili iwa himongsoc lolickelu kpakpaduc macnginang felu wewedu bole balu ngani-damongte Siduc Madicne edocebalu weduyelelu gawec. Ailu ye ngic-ngigac huc haicine monic monicti bacebame taplingineng waicne yenge sasawa bamadicebayackewec. <sup>24</sup> Inguc aime yeke siducti hikelu Siria prowins sasawa saweyackewec. Saweme ngic-ngigac madicne yenge huc haicine monic monicti ngic-ngigac basowalecebaicne nga doic ngegaigaing. Ailu ngic alengkolec nga gocne homa-gbolic aicaigaing, ailu ngic-ngigac hige-molengineng homaicne, yenge sasawa Yesula bacebalu hikeyackebong yedi bamadicebawec. <sup>25</sup> Aime Galili prowinswacni nga Dekapolis, iwacni ailu Yerusalem taonkacni nga Yudeya himong ailu Yodan nebocinacni ngic-ngigac habutowadi ye balaibeibong.

## 5

*Ngic-ngigac kwele-angackolec*

*Luk 6:20-23*

<sup>1-2</sup> Yesu ye ngic-ngigac habutowa nganicebalu kupicka felu ngiyewec. Ngiyeme mic-tengtengfocine yenge yela lebong yedi yowa yanguc milu weduyelewec,

<sup>3</sup> **“Ngic-ngigac asule babaficte homalu gacaigaing, yenge kwele-angackolec.**

**I yangucte, honocmengte ngani-damong yogo yengele hocne.**

<sup>4</sup> **Ngic-ngigac kwele-umackolec gacaigaing, yenge kwele-angackolec.**

**I yangucte, Wapongti yenge hocne hasanangebawagac.**

<sup>5</sup> **Nga ngic-ngigac bawacnagulu gacaigaing, yenge kwele-angackolec.**

**I yangucte, himongtowadi\* yengele mole-damoc aidaicte.**

<sup>6</sup> Ngic-ngigac nosing nga misale homacaigaing, silicine ingucnehac yefe dondonne gagale homacaigaing, yenge kwele-angackolec.

**I yangucte, Wapongti yenge yogo gumecebame gebecebadaicte.**

<sup>7</sup> Ngic-ngigac agofocngineng yengele kwele-sowac ngagecaigaing, yenge kwele-angackolec.

**I yangucte, Wapongti ingucnehac yengele kwele-sowac ngagedaicte.**

<sup>8</sup> Ngic-ngigac kwelengineng gbagbacne gacaigaing, yenge kwele-angackolec.

**I yangucte, yenge Wapong nganidaingte.**

<sup>9</sup> Ngic-ngigac hudu nga ngaba babong mogungkecaigac, yenge kwele-angackolec.

**I yangucte, Wapongti yeicne adu-madecfocine wacebadaicte.**

<sup>10</sup> Ngic-ngigac aibaba dondonne aiyeibongka weyebic aiyelecaigaing, yenge kwele-angackolec.

**I yangucte, honocmengte ngani-damong yogo yengele.**

<sup>11</sup> “Nga nenge nale alingka gagaingte ailu ngic-ngigac yengi misofoc nga weyebic ainglelu kwesac ailu ngengele ngagelu yowa sowacne haicine monic-monic aingeledaingte. Yenge inguc aingeledaingte, nenge kwele-angackolec. <sup>12</sup> Fulingineng sugucne honocmengka lowec fagac. Ngenge ilec kwele-madic ngagelu heliyedaing. **I yangucte, ngic-ngigac yenge esecne Wapongte siduc-mimi ngic weyebic aiyeleibong, nenge aibaba ingucnehac aingeledaingte.**

*Kiwec nga hifa*

*Mrk 9:50; Luk 14:34-35*

<sup>13</sup> “Ngenge kiwec nosingka haume angacineholec aicaigac, nenge himongka ngic-ngigac kiwec ingucnehac aigaing. Aime kiwec yogodi angacine miyac aidaictewa, nenge wenuc aibong hatacmac angacineholec nalic aidaicte? Kiwec ingucne, yogo boleine mikac aigac. Yogo moc himongka wickebeng ngic yengi higedi edesocebadaingte.

<sup>14</sup> “Aime nenge himongtowa himong yagolec angoc. Taon monic ye kupicka ngiyegac, yogo nalic mi sangkedaicte. <sup>15</sup> Nga monicti hifa kwendangkelu pakec bageina nalic mi lome ngiyedaicte. Ye hifa yogo mac ngiye-ngiyeina lome ngiyeme ngic-ngigac mac kwelina ngiyegaing, yenge bacebame angoleyackedaingte. <sup>16</sup> Aime ngengele angocti silicine ingucnehac ailu ngic-ngigac bacebame angoledaingte. Angolelu ngengele aibaba madicne nganilu Mamacngineng honocmengka gagac, yele wac hafedaingte.

*Wapongte yefe-yowa Mosesdi kwelengkewec, nga Wapongte siduc-mimi ngic yengele yowa*

<sup>17</sup> “Ngenge yanguc mi ngagedaing, na Wapongte yefe-yowa Mosesdi kwelengkewec, nga Wapongte siduc-mimi ngic yengele yowa wenogale waiba. Ngagegaing, na yowa wenogale mi waiba, miyac. Mic-yowaine yogo noine fikenale waiba. <sup>18</sup> Foinac, Wapongte yefe-yowale sisine me kapucine monicti nalic mi miyac aidaicte. Famehac yowa kwelengkeicne fagac, yogo sasawadi noineholec aiyaekbong himong nga sawa motodabiyecte, yogo noine edocngebagabac. <sup>19</sup> Ilec ailu yanguc aigac. Monic ye ung-yowa iwacni wiyac kpisicne monic baickedaicte, ailu agofocine ingucnehac ainingte weduyeledaicte, ye hocne honocmengte ngani-damongte aling yengelacni ngic waweweinebenang wackenoga. Nga monic ye ung-yowa balaibelu agofocine balaibeningte weduyeledaicte, ye honocmengte ngani-damongka ngic-ngigac yengele feicne wackenoga. <sup>20</sup> Na yanguc edocngebabe ngagening, Wapongte yefe-yowale wewedu ngic nga Farisaio yenge aibaba dondonne aicaigaing. Aime entacka ngengele aibaba dondonnedi yengele mi ewalidaictewa, nenge honocmengte ngani-damongka nalic mi fedaingte.

*Ngaba nga ngic-wewe aibaba*

*Luk 12:57-59*

<sup>21</sup> “Ngampafocnonggeng edocebame nenge yanguc ngageibong,  
‘Ga ngic-ngigac mi wehomacebadamec.’

*(Wah 20:13)*

\* 5:5: Hibi Esecne iwa Wapongti Abraham himong mipangkelu lacnodaicte. Yesule damengka Israel ngic-ngigac yenge gaga madicne himongka damongkeningte wangec gaibong. 5:5: Mige 37:11 5:6: Yes 55:1-2 5:10: 1Pi 3:14 5:11: 1Pi 4:14 5:12: 2Ngsi 36:16; Sale 7:52 5:14: Yoa 8:12; 9:5 5:15: Mrk 4:21; Luk 8:16; 11:33 5:16: Efs 5:8-9; 1Pi 2:12 5:17: Rom 3:31 5:18: Luk 16:17; 21:33 5:19: Yak 2:10

Aime 'monic ye ngic wehomadaicte, ye yowawa domadaicte.' <sup>22</sup> Na yanguc sugu edocngebabe, monic ye ngic hae-gbainele aalic ngagecaigac ye momoc yowawa domanowagac. Nga monic ye ngic hae-gbainele yanguc midaicte, 'Ga ngic acititigone mikac,' ye Yuda ngic-ngigac yengele Tutumangtowawa yowawa lonowagaing. Nga monic ye ngic hae-gbainele yanguc midaicte, 'Ga ngage-ngagegone mikac, ga kapaineenang,' inguc midaicte ye dac-sanangka wickebhong haunowagac.

<sup>23-24</sup> "Ga ilec ailu kwele-madicte ibu Wapongte lonogale milu yanguc aidamec. Alatawa hikelu ngic hae-gbagone gale ngaba aicaigac, yogo ngagesilu ga depecgone alatawa hegileng ngiyedaic. Ailu hikelu agogoneholec yowa miboc madickedaic. Madickeme kwele-moniyang fikemebac kwesi kwele-madicte ibu lodamec.

<sup>25</sup> "Aime ngabagonedi yowawa loggudaickale, ngeke momoc yefewa hikelu yeholec yowa mificnagulu ngaba hegiledabiyec. Ga inguc mi aidamectewa, ngabagonedi ngage-wosaec ngic yela loggume yedi lebe-ngic yengele molewa loggume muc-macka loggudaingte. <sup>26</sup> Foinac, ga muc-macka ngiyecgu ngabagonele tofa sasawa buchuchac baducnoyackelu wadamecte, yogo noine edocngugabac.

*Selo-boic yefe*

*Mat 19:9; Mrk 10:11-12; Luk 16:18*

<sup>27</sup> "Aime yowa yanguc biyac edocebaine ngageibong,  
'Ga selo-boic aibaba mi aidamec.'

*(Wah 20:14)*

<sup>28</sup> Na yanguc sugu edocngebabe, ngic monicti ngigac monic nganilu ngani-angac aidaicte, ye kweleinedi selo-boic aibaba yogo biyac aigac ingucne aidaicte.

<sup>29</sup> Ailu dongegone folewapecti aigeleme bikic bafuwadamectewa, ga dongegone kwofutuckelu wickeengka hikedaic. Gacgu socgone buchuchac dac-sanangka wickedaickale, socgone tofaine miyac aime gaengka yogodibac madickedaicte. <sup>30</sup> Nga mole-folegonedi aigeleme bikic bafuwadamectewa, ga yogo helockelu wickeengka hikedaic. Gacgu socgone buchuchac dac-sanangka hikedameckale, socgone tofaine miyac aime gaengka yogodibac madickedaicte.

<sup>31</sup> "Esecne yanguc milu gaibong,  
'Ngic monicti ngigacine hegilenale ngagelu, ye hibi kwelengkelu lacnodaic.' *(Yef 24:1-4)*

<sup>32</sup> Na yanguc sugu edocngebabe, ngic monic ye ngigacine selo-boic aibaba mi aiyemewa ye moc hegiledaicte, ye selo-boic ngigac ainogale aidaicte.† Nga ngiti inguc aime ngigacine ngawe-ngigacte yefe ewalilu gadaicte. Ailu ngic ye ngic monicte ngigac hegileicne badaicte, ye ngawe-ngigacte yefe ewalilu selo-boic aibaba aidaicte.

*Mimi sanangne minoga*

<sup>33</sup> "Aime ngampafocnonggeng inguchac edocebame ngenge yanguc ngageibong, 'Ga dodofic yowa hefeicne yogo mi baickedamec. Ailu yowagone Sugucnele haicka miyengka sanangkewec, yogo balaibedamec.' <sup>34</sup> Na yanguc sugu edocngebabe, ngenge yowangineng sanangkenale wiyac monic wackelu mi mibong sanangkedaic. Honocmeng yogo Wapongte mac ngiye-ngiye. Ilec ailu ngenge honocmeng wackelu yowangineng mi mibong sanangkedaic. <sup>35</sup> Nga himong, yogo yele hige ede-edec. Ilec ngenge yowangineng mibong sanangkenale himong mi wackedabiyeng. Ailu ngenge Yerusalem wacka inguchac yowangineng mibong sanangkenale mi wackedabiyeng, yogo Ngictautowa, yele taon. <sup>36</sup> Aime ga hodoc-dowecgone kwalac-kwalac moniyang hakic me saec-saec banogalesoc mi aidamecte. Hodocgone wackelu mimipang sanangne mimi, yogo inguchac hegiledamec. <sup>37</sup> Ngenge yowangineng sasawa yanguc sugu midaing, 'Foinac' yogo foinac. Nga 'miyac' yogo miyac. Yowangineng yogo ewalilu taockelu midaingte, yogo Kindololo fileine yelacni weledaicte.

*Kwele-angacka damongngebanogale aibaba*

*Luk 6:29-30*

<sup>38</sup> "Ngenge yowa monic yanguc biyac ngageibong,  
'Monicti monicte donge hucine basowaleme, yele donge ingucnehac basowalenoga. Nga monicti monicte sofi hedume, yele sofi ingucnehac hedunoga.' *(Wah 21:24; Dep 24:20; Yef 19:21)*

5:21: Yef 5:17    5:22: 1Yoa 3:15    5:23-24: Mrk 11:25    5:27: Yef 5:18    5:29: Mat 18:9; Mrk 9:47    5:30: Mat 18:8; Mrk 9:43    5:31: Mrk 10:4    † 5:32: Wapongte haicka ngigac ye ngaweineholec gagachac. Ilec ailu ngic monicti yele ngigac badaicte yele selo-boic aibaba aidaicte.    5:33: Wah 20:7; Dep 19:12; Him 30:2; Yef 23:21    5:34: Yes 66:1; Yak 5:12; Mat 23:22    5:35: Mige 48:2; Yes 66:1

<sup>39</sup> Na yanguc sugu edocngebabe, ngic-ngigac sowacne aingelebong ngenge ameine monic mi baduyeledaing. Monicti munggunngone folewapec wedaictewa, ga munggunngone kanawapec ingucnehac sungkecnodamec. <sup>40</sup> Nga monicti ngakpigone kwelina banogale yowa lodaictewa, ga ngakpigone feina ingucnehac hegilecnodamec. <sup>41</sup> Nga monicti yoinggulu aigeleme mafaine tengkeengka yefe kilomitaine moniyangtesoc yeholec hikenogale adocgudaictewa, ga kilomitaine yaeckangtesoc yeholec hikedamec. <sup>42</sup> Ailu monicti wiyac monic lacnocte uwageleme, ga yogo lacnodamec. Nga monicti galacni wiyac monic tofa ainogale milu uwageleme, ga wiyacgone yogo mi sebiledamec.

*Ngabafocgone kwele-angac ngageyeledamec*

*Luk 6:27-28; 6:32-36*

<sup>43</sup> “Yowa monic yanguc fagac, ngenge yogo esecne biyachac ngageibong, ‘Ngic-ngigac gale emewa gagaing, yengele kwelegonedi ago aiyelelu angac ngageyelelu gadamec.’”

*(Dep 19:18)*

Ailu ‘ga ngabagone kweledi wickedamec.’ Ngage-ngage ingucne mi ngagedaing. <sup>44</sup> Na yanguc sugu edocngebabe, ngenge ngabafocngineng kweledi angac ngageyeledabiyeng. Ailu ngic-ngigac weyebic aingelecaigaing, yengele milockedaing. <sup>45</sup> Ngenge inguc ailu Mamacngineng honocmengka gagac, yele adu-madecfocine aidaingte. Ye wenacine bole-yowa lacnocte yogodi ngic madicne nga sowacne yengele ailu ofecaigac. Ailu ye ngic dondonne nga ngic aibaba dondonne mi aicaigaing, yenge momochac mac yelecaigac. <sup>46</sup> Ailu ngic-ngigac yengi ngenge kweledi angac ngagengelebong, ngengi yenge ingucnehac kweledi angac ngageyeledabiyengtewa, aibaba yogolec fuline nalic mi badaingte. Takes-baba ngic<sup>‡</sup> yenge yogo ingucnehac aicaigaing. <sup>47</sup> Ngenge ngic haegbafocngineng yenge aneng-baneng aiyelelaingte, yogodi aibaba feicne miyac. Ngic-ngigac aling Wapong mi ngagegaing, yenge inguchac yogo aicaigaing. <sup>48</sup> Ilec ailu ngenge ngabafocngineng kweledi angac ngageyeledaing. Honocmeng Mamacngineng ye dondonne gagacte ailu ngenge yele silic ingucnehac dondonne gadabiyeng.”

## 6

*Mole-bafic ainagunoga*

<sup>1</sup> “Ngenge ngic-ngigac yengi nganicnglobalu mitengngabaningte yengele haicka aibaba dondonne mi ailu gadaing, miyac. Ngenge inguc ailubac honocmeng Mamacngineng yelacni aibaba dondonnele fuline monic mi badaingte. Inguc fikedaickale, ngani-motolu gadabiyeng. <sup>2</sup> Ngic kwesacine gocne yenge ngic-ngigac waweweine kwele-madicté wiyac yelenogale kpakpaduc macka me yefe sugucna kpeng uctowaineholicti fitobong ngic-ngigac yengi wacngineng bafedaingte. Foinac, ngic ingucne yenge fulingning buchuchac biyac baibong, yogo noine edocngabagabac. Ngenge inguc mi aidaing. <sup>3</sup> Ga ngic-ngigac waweweine kwele-madicté wiyac monic yelenogale ngagegic, yogo monicti mi ngagegeledaic. <sup>4</sup> Ilec ailu ga kwele-madicté wiyac yeledamecte, yogo sangke-sangke faemewa Mamacngone wiyac sangke-sangke nganicaigac, yedi hocne fuline geleidaicte.”

*Mimilocte yowa*

*Luk 11:2-4*

<sup>5</sup> “Aime ngic kwesacine yengi milockenogale milu aicaigaing, yenge kpakpaduc macka nga yefe kweyasicina milockelu domabong ngic yengi nganicebalu mitengngabaningte aiyelecaigac. Foinac, yenge fulingning buchuchac biyac baibong, yogo noine edocngabagabac. Ngenge yenge ingucne mi aidaing. <sup>6</sup> Ga milockenogale milu, ibac macngone kweline kpisicna felu nugone holelu Mamacngone mi nganiyengka gagac, ye milockedamec. Inguc aiyengka Mamacngone aibaba sangke-sangke nganingingac aicaigac, yedi fuline geleidaicte.”

<sup>7</sup> “Ailu ngenge milockenogale milu, ngic-ngigac aling Wapong mi ngagegaing, yengi milockecaigaing, ngenge yenge ingucne mi milockedaing, miyac. Yenge mimiloc dalicne ngage-wosaec mikac moc milockecaigaing. Ailu yowangning homacne wafecaigaingte ailu ngagebong mimilocngineng noineholec aicaigac. <sup>8</sup> Ilec ngenge

5:44: Wah 23:4-5; Luk 23:34; Sale 7:60; Rom 12:14,20    ‡ 5:46: Takes yogo gamang yengi fuli gocne taocekbong bacaigaing. Dameng iwa Roma yengi Israel damonglobalu takes balu gaibong. Takes-baba ngic yenge Roma gamangte takes-bole babong Israel ngic-ngigac yenge takicebawec.    5:48: Dep 19:2; Yef 18:13    6:1: Mat 23:5    6:5: Mat 23:5; Luk 18:10-14    6:7: 1Ngt 18:26-29



yenge ingucne mi aidaing. Ngege mi milockeebongka Mamacngineng ye ngege oma wiyacte kpungkecaigaing, yogo ye hiyac ngagecaigac.

<sup>9</sup>“Inguc aime ngege yanguc milu milockedaing.

‘Honocmeng Mamacnonggeng, ga wagone gbagbacne fadaic.

<sup>10</sup>Aime ngani-damonggone welenoledaic.

Honocmengka gale angac nga ngege-ngage balaihebong fagac, silicine ingucnehac himongka nongela fikedaic.

<sup>11</sup>Ga yakumac nosing soconggeng noledamec.

<sup>12</sup>Aime nonge ngic yengele bikic hegilegabeleng, silicine ingucnehac ga nongele bikicte ameine hegilenolenong.

<sup>13</sup>Ga lokwesacka mi locnubadamec.

Ailu Kindololo fileine yelacni haicnubadamec.\*

<sup>14</sup>“Ngege ngic-ngigac kindololo aingelebong, ngege yengele bikic hegiledaingtewa, honocmeng Mamacnginengti ngegele bikic inguchac hegiledaicta. <sup>15</sup>Nga ngege ngic yengele bikic mi hegiledaingtewa, ibac honocmeng Mamacnginengti ngegele bikic inguchac mi hegiledaicta.

*Nosing-sawe gaga*

<sup>16</sup>“Aime kwesac-ngic yengi nosing-sawe gacaigaing, dameng iwa ngicti nganicebaningte haic-mesungineng sowalecaigac. Foinac, ngic ingucne yenge fulingineng buchuchac biyac baibong, yogo noine edocngebagabac. Ngege yenge ingucne mi aidaing. <sup>17</sup>Ga nosing-sawe galu hodocgona heloc hosolu haic-mesugone suweyackedamec. <sup>18</sup>Inguc aiyengka ngic yenge ga nosing-sawe gagic, yogo mi ngagemotobong Mamacgone mi nganiyengka gagac, yedi sugu ngagedaicta. Ailu Mamac aibabagone sangke-sangke nganicaigac, yedi sugu fuline geledaicta.

*Honocmengte wiyac madicne*

*Luk 12:33-34*

<sup>19</sup>“Himongka une-kwadac dangti wiyacngineng madicne hilockecaigac. Nga hufengti wiyacngineng bacaigac. Ailu hise ngic yengi mac heuckelu wiyacngineng bacaigaing. Ilec ngege himongka wiyacngineng madicne bakpaduc mi aidaing. <sup>20</sup>Ngege wiyacngineng madicne honocmengka bakpaduc aidaing. Yogowa une-kwadac dangti wiyacngineng mi hilockedaingte. Nga wiyacngineng hufengti mi badaicte. Ailu hise ngic yengi iwa nalic mi heuckelu wiyac badaingte. <sup>21</sup>Ga wiyacgone madicne bakpaduc aicaigic, iwa kwele-angacgone ingucnehac fadaicte.

*Socnonggengte angoc*

*Luk 11:34-36*

<sup>22</sup>“Donge yogo socte hifa aigac. Aime dongegoned i madicne fadaictewa, socgone sasawa bame angoleyackedaicta. <sup>23</sup>Aime ga donge-heloc me donge-sowac me dongegoned i sowaledaictewa, socgone sasawa kundung kwedaicte. Ailu angoc gala fagac, yogodi kundung kweme kundung sugucnebenang fikegeledaicta.

*Wapong me moneng-mafa*

*Luk 16:13*

<sup>24</sup>“Monicti ngic sugucne yaeckang yekele kwelec nalic mi kwelu gadaicte, miyac. Ye monicte angac ngagelu monic lobe holecnodaicte, me monicte wetackelu monic hegiledaicta. Ngege Wapong nga moneng-mafa yekele kwelec momochac nalic mi kwedaingte.

*Ngageboc nga mimedec*

*Luk 12:22-31*

<sup>25</sup>“Ilec ailu yanguc edocngebabe, ngege noba-nosingte milu gaganginengte mi medecnggebadaic, ‘Nonge oma nosing misa nolu ganoga?’ Me socnginengte ngagelu, ‘Oma ngakpi-kpoluc holelu ganoga?’ Ngagegaing, gagadi nosing ewaligac, ailu socti ngakpi-kpoluc ewaligac. <sup>26</sup>Ngege sawawa nango nganicebaning. Yenge hole-duwenoc me luwangka nosing monic mi locaigaingte Mamacngineng honocmengka gagac, yedi nosing moc yelecaigac. Ailu ngege wosaelu ngagedaing, ngengi Wapongte haicka nango yengele feicne aigaing. <sup>27</sup>Aime ngengelacni monicti

6:8: Mat 6:32    6:10: Luk 22:42    6:12: Mat 18:21-35    \* 6:13: Hibi esecne Mataioidi kwelengkewec, yogo nganilu iwacni kwelengkebong kwelengkebong ofewec, yengelacni gocne yowa yanguc fagac, “Ailu ngani-damonggone, nga tapiligone, ailu wac feicne gala fafeginowagac. Yogo foinac.”    6:13: Luk 22:40; Yak 1:13; Yoa 17:15; 2Tes 3:3; 2Tim 4:18    6:14: Mrk 11:25-26    6:16: Yes 58:5-9    6:19: Yak 5:1-3    6:20: Mat 19:21; Luk 18:22    6:25: Filp 4:6; 1Tim 6:6-8; 1Pi 5:7    6:26: Mat 10:29-31; Luk 12:6-7

mimedec ailu game yogodi gaga-damengngine kpiscnemac hatacmac nalic mi bame daliwedaicte, miyac.

<sup>28</sup> “Aime ngenge omale medecngbame yanguc micaigaing, ‘Nongileng ngakpi-kpoluc wenuwacni balu ganoga?’ Ngenge daling mac-sobengka moc siyeckecaigaing nganicebaning. Yenge muc mi yumulu boletowa mi balu sifu sugulecaigaing. <sup>29</sup> Aime ngictau Solomon ye esecne ngakpiine hibine madicne holelu holelu gawec, yele hibi-angoctowadi daling yengele hibi keleng angacine mi ewaliwec, yogo noine edocngbagabac. <sup>30</sup> Aime daling aliine kpanggewa moc siyeckecaigaing, yogo yakucte sugu fikegaing. Nga saemebac helockelu dacka wickedaingte. Aime Wapongti dalingbenang ingucne ngakpi holeyedaicte, ye ngic-ngigac ngage-ngagesingngineng kpiscnemac fagac, ngenge inguchac ngakpi-kpolucngineng taockelu ngeledaicte.

<sup>31</sup> “Ilec ailu ngenge yogo milu mi medecngbadaic, ‘Nongileng nosing misa wenuwacni nodabelengte me ngakpi-kpoluc wenuwacni holenoga?’ <sup>32</sup> Ngic-ngigac aling Wapong mi ngagegaing, yenge socte wiyac sasawadi baningte ngage-ngagengineng iwa lobong fadaicte. Aime Honocmeng Mamacnginengti ngenge socte wiyac kpungkecaigaing, yogo biyac ngagedaicte. <sup>33</sup> Ilec ngenge molimolicbenang Wapongte ngani-damong nga yele pasi dondone bafuwanogale bole sugucnehac badabiyeng. Ngenge inguc aibong yedi socte wiyac yogo hocne ingucnehac taockelu ngeledaicte. <sup>34</sup> Inguc ailu ngenge saemele milu mi medecngbadaic. Saeme yogo yeuctihac damongkedaicte. Deboc hadengsoc ye yeuctihac umacinele silicina umacine badaicte, yogodibac andoine aidaicte.”

## 7

*Ngenge ngage-wosaec mi aiyeledaing*  
Luk 6:37-38; 6:41-42

<sup>1</sup> “Ngenge ngic-ngigac yengele aibaba ngage-wosaec mi aiyeledaing. Inguc aidaingtewa, Wapongti inguchac ngengele aibaba ngage-wosaec mi aingeledaicte. <sup>2</sup> I yangucte, ngenge ngic-ngigac ngage-wosaec aiyeledaingte, silicine ingucnehac Wapongti ngenge ngage-wosaec aidaicte. Ailu ngenge wiyac umacine wosaelu ngic-ngigac yelecaigaing, aime umacine silicine ingucnehac wosaelu ameine ngeledaicte.

<sup>3</sup> “Ga wenucte ngic hae-gbagonele dongewa gochakic fagac, yogo nganicaigic. Nga geicne dongewa yoc hewacine fagac, yogobac mi ngani-motogic, me? Aibaba ingucnedi mi madickegac. <sup>4</sup> Ngagegic, gageicne dongewa yoc hewacine faemewa ngic hae-gbagonele yanguc milu gagic, ‘Ga nalic ngageengka dongegona gochakic ngiyegac, yogo baickebe.’ <sup>5</sup> Kwesac-ngic, gageicne dongewa yoc hewacine fagac, yogo baickelubac ngic hae-gbagonele dongewa gochakic ngiyegac, yogo nalic ngani-motolu baickedamecte.

<sup>6</sup> “Ngenge Wapongte wiyac monic gbaghacne yogo ngic-ngigac wonongkolec aibabangineng hoda ingucne mi yeledaing. Inguc yelebong yenge hefaliyelu hicngibadaingte. Ailu kwanangngineng yogo bec yengela mi wickedaing. Inguc aibong yenge inguchac gagcu yogo higenginengti edesockedaingte.

*Ngenge milockelu gadabiyeng*  
Luk 11:9-13

<sup>7</sup> “Ngenge milockening, aime yedi wiyac ngeledaicte. Nga basackening, ailu bafuwadaingte. Nga nuwa holening, aime ye nu laliyedaicte. <sup>8</sup> I yangucte, monic ye milockelu gagac, yedi wiyac badaicte. Nga monic ye basackelu gagac, yedi wiyac bafuwadaicte. Ailu nuwa holelu gagac, ye nu laliyecnodaicte.

<sup>9</sup> “Nngengelacni ngic monicte madecti nosingte mamacine uwacnome ye posa nalic mi lacnodaicte. <sup>10</sup> Me misa-sicte uwacnome hema sowacne nalic mi lacnodaicte. <sup>11</sup> Ngenge ngic aibabangineng sowacneholec gacaigaing. Ailu sifu adu-madecfocngineng kwele-madicte wiyac madicne yelenogale ngage-motogaing. Ilec ngenge yanguc ngagedaing, Honocmeng Mamacnginengte aibabadi ngengele aibaba madicne yogo ewaliyackegac. Ngenge yela wiyac monicte uwacnobong yedi taockelu wiyac madicne ngeledaicte.

<sup>12</sup> “**Ngic-ngigac yengi oma aibaba aingelenogale ngagesicaigabiyeng, wiyac ngagesicaigabiyeng, yogo ngengi aiyeledabiyeng. Yogodi hocne Wapongte yefe-yowa Mosesdi kwelengkewec, nga Wapongte siduc-mimi ngicte yowa fungine aigac.**

*Yefe yaeckang*

*Luk 13:24*

<sup>13</sup> “**Ngege nu kpisicna felu hikedaing. I yangucte, sowacnele yefe yogo nuine sugucne, ailu yefe yogo sugucne. Aime ngic-ngigac homacnedi yefe yogo balaibe hikecgu kpasoliyelu sowaledaingte.** <sup>14</sup> **Nga gagale yefe yogolec nuine kpisicne ailu yefe yogo doicineholec. Aime ngic-ngigac efecnemacti iwa hikecgu gaga noine bafuwadaingte.**

*Siduc-mimi ngic kwesacine*

*Luk 6:43-44; 13:25-27*

<sup>15</sup> “**Siduc-mimi ngic kwesacine yengi basowalecngebadaingkale, ngege yengele ngani-motolu gadabiyeng. Yenge socnginengti lama soc nga kwelenginengtibac kate-hoda, ailu yenge kindololo aingelelu basowalecngebaningte kwesidaingte.** <sup>16</sup> **Aime noine fikeme, ngege yogo nganilu ngagecebadaingte. Ngic-ngigac yogo yenge muc somangineholec iwacni waing noine nalic mi badaingte. Ailu tambong-tambongkacni fik noine nalic mi badaingte, yogo ngagedaing.** <sup>17</sup> **Aime yoc madicne sasawa, yengelacni noine madicne fikedaicte. Nga yoc sowacne iwacni noine sowacne fikedaicte.** <sup>18</sup> **Aime yoc madicnacni noine sowacne nalic mi fikedaicte. Nga yoc sowacnacni noine madicne nalic mi fikedaicte.** <sup>19</sup> **Yoc monic noine madicne mi fikedaictewa, yogo welockelu dacka wickedaingte.** <sup>20</sup> **Inguc ailu ngege siduc-mimi ngic kwesacine yengele aibaba nalic nganilu ngage-motocebadaingte.**

<sup>21</sup> “**Ngic-ngigac yenge ‘Sugucnene, Sugucnene,’ inguc micaigaing, yengelacni gocnedi honocmengte ngani-damongka nalic mi fedaingte. Mamacne honocmengka gagac, ngic-ngigac yele angac nga ngage-ngage balaibelu gacaigaing, yengi sugu iwa fedaingte.** <sup>22</sup> **Aime dameng iwa ngic-ngigac homacnedi yanguc edocnudaingte, ‘Sugucne, Sugucne, nonge gale wacka siduc-yowa miibeng, ailu aleng yebicebaibeng, ailu pasi damuineholec homacne haibeng. Ilec ga ngagenolec.’** <sup>23</sup> **Inguc mibong yanguchenang mibe yegengkeme edocebadacte, ‘Na ngege mi ngagecngabagabac. Yefe-yowa wewe ngic, ngege nale haicka haickening.’**

*Mac-baba ngic*

*Luk 6:47-49*

<sup>24</sup> “**Monic ye yowane yago ngagelu balaibecaigac, ye ngic fiticne, ye ngic macine fapacladeng feina bawec, ye ingucne.** <sup>25</sup> **Ye macinele fungine fapacladeng feina sanangne domame mac-gbelongkolec kweme lumongti kwesilu mac yogo mi kwelu wemalackewec.** <sup>26</sup> **Aime monic ye yowane yago ngagelu mi balaibedaicte, ye ngic ngage-ngageine mikac ailu ngic macine dingong feina bawec, ye ingucne.** <sup>27</sup> **Mac kweme lumong nga gbelong sugucnedi kwesilu mac yogo wemalackeme fuwangkelu wawewec.”**

<sup>28-29</sup> **Yesu ye yowa yogo mime motowec. Aime yedi yowa weduyelewec, yogo ngic bolele hibi bacaigaing, yengele silic ingucne bole-yowa tapiliineholec weduyelewec. Ailu Wapongte yefe-yowale wewedu ngic yengi hibiwacni nganilu micaigaing, yenge ingucne mi miwec. Ilec ailu ngic-ngigac habitowa yenge yowa weduyeleme ngagelu kwatackebong.**

## 8

*Ngic waic-sanangkolec*

*Mrk 1:40-44; Luk 5:12-14*

<sup>1</sup> **Yesu kupic hegilelu wame ngic-ngigac habitowa sugucnebenangti ye balaibeibong. <sup>2</sup> Balaibelu wabong ngic monic waic-sanangkolecti kwesilu ketadi holecnolu afeelu miwec, “Sugucne, ga ngageng angacgugacka, na nalic bamadicnung gbagbackedacte.”**

<sup>3</sup> **Inguc mime Yesudi moleine sungkelu ngic bauwalu yanguc edowec, “Madickecte angacnugac.” Inguc mime iwahac socine madickeme hucine miyac aiwec.** <sup>4</sup> **Aime Yesudi yanguc edolu mimackewec, “Ngagegic, socgona pasi fikegac, yogolec monic mi edodamec. Ga depec-baba ngic yela hikelu socgone gbagbacne aigac, yogo**

**edaliyengka, Mosesdi ibule miwec, yogolec silicina balaibelu lacnodamec! Ga inguc lacnoengka yenge ibugone nganilubac ngage-motodaingte.”**

*Hudu-baba ngic micne*

*Luk 7:1-10*

<sup>5</sup> Aime Yesu Kapeneam taonka feme Roma yengele hudu-baba ngic yengele damong monicti kwesilu Yesudi bafickenale dogbac aicnolu yanguc miwec,\* <sup>6</sup> “Sugucnene, bole-madecne ye hige-moleine homaicne ailu ye macka doic ngagelu falu gagac.”

<sup>7</sup> Inguc mime Yesudi yanguc edowec, **“Na nalic fulu bamadickedacte.”**

<sup>8</sup> Inguc mime hudu-baba ngic yengele damongti yowaine bafaliyelu yanguc micnowec, “Sugucnene, na oma ngic madicnele macne kwelina fudamecte. Ga yowadi sugu miyengka bole-madecne madickena. <sup>9</sup> I yangucte, na ngic tapilinginengkolec yengele bagewa gagabac. Aime nale bagewa hudu-baba ngicfocne gagabiyeng. Yengelacni monicte ‘hikec’ mibe ye hikedaicte. Nga yengelacni monicte ‘welec’ mibe ye weledaicte. Nga kwelec kwekwe ngic monicte ‘bole yogo banong’ mibe ye yogo badaicte. Na ngagegabac, ga tapiligoneholec gagac.”

<sup>10</sup> Inguc mime Yesu ye yogo ngagelu kwatackewec. Ailu ngic-ngigac balaibeibong, yenge yanguc edocebawec, **“Foinac, Israel himongka ngic-ngigac ngage-ngagesingngineng sanangne yangucne monic mi nganiibawa, ngic yago yela nganigabac, yogo noine edocngebagabac.** <sup>11</sup> **Ilec yanguc edocngebabe, wenac ofe-ofeinacni nga hau-hainacni ngic-ngigac homacnedi kwesilu Abraham nga Aisak ailu Yakobo yengeholec honocmengte ngani-damongka yenge momoc ngiyelu noba-nosing nodaingte.**

<sup>12</sup> **Aime Wapongti molic-molic yeicne ngani-damongte aling yogo Israel ngic-ngigac yengele miwec, yengebac lobewa kundungte dacka wicebabong haudaingte. Haulu iwa hiyalu micngineng hisalangkulu gadaingte.”**

<sup>13</sup> Inguc milu hudu-baba ngic yengele damong yanguc edowec, **“Ga hikenong, ngagesingkegic, yogo noine fikegeledaicte.”** Aime hadeng dameng iwahac bole-madecine yogo hige-moleine homaicne madickewec.

*Pita sefengngine*

*Mrk 1:29-31; Luk 4:38-39*

<sup>14</sup> Aime Yesu ye Pitale macka felu Pita sefengngine ye soc-dac aicnome fame nganiwec. <sup>15</sup> Nganilu moleina balu oiyame sefengngine hucine miyac aime fangkelu nosingka baficebawec.

*Ngic-ngigac homacne bamadicebawec*

*Mrk 1:32-34; Luk 4:40-41*

<sup>16</sup> Aweleme iwahac ngic-ngigac alengkolec homacne bacebalu Yesula kwesiibong. Kwe-sibong, yedi yowa milu aleng yebicebalu huckolec sasawa bamadicebawec. <sup>17</sup> Siduc-mimi ngic Yesaiyadi esecne yanguc miwec,

“Yedi nongileng huc sasawa baickeme madickeibeng.” (Yes 53:4)  
Yogowa noine fikewec.

*Yesu balaibenoga*

*Luk 9:57-60*

<sup>18</sup> Ngic-ngigac habutowadi Yesu hewalingkelu domabong ye yogo nganicebalu mic-tengtengfocine yanguc edocebawec, “Nongileng lifuc nebocina hikenang.” <sup>19</sup> Inguc miyemewa Wapongte yefe-yowale wewedu ngic monicti kwesilu yanguc edowec, “Wewedu, ga iwa me iwa hikedamectesoc na balaibecgulu gaholec hikenogale ngagegabac.”

<sup>20</sup> Inguc mime Yesudi bafaliyelu yanguc edowec, **“Kate-hoda yenge himong kwelina mac fafanginengkolec. Nga sawawa nango yenge selengnginengkolec. Nga Ngicte Madec yebac mac fafaine mikac, inguc gacaigac.”**

<sup>21</sup> Mime mic-tengtengfocine yengelacni monicti yanguc miwec, “Sugucne, ngageneleengka hikelu mamacne homame longkelubac ga balaibecgudacte.”

<sup>22</sup> Inguc mime Yesudi yanguc miwec, **“Ga homaicne hegilecebaengka yenge yengungtihac longnaguning. Nga ga wele na balaibecnuc.”**

*Gbelongti yowa ngagewec*

*Mrk 4:36-41; Luk 8:22-25*

<sup>23</sup> Yesu gombawa feme mic-tengtengfocine yenge momoc gombawa felu hikeibong. <sup>24</sup> Hei, gbelong tapillineholec weme dibongti gomba kwelina haunogale aiwec. Aime

8:4: Dep 14:1-32; Mat 9:30; Luk 17:14 \* 8:5: Hudu-baba ngic micne yogo, yele bagewa hudu-baba ngic 100 ingucne gairong. Yenge Roma himongkacni kwesiibong. 8:11: Luk 13:29 8:12: Mat 22:13; 25:30; Luk 13:28 8:20: 2Kor 8:9 8:21: 1Ngt 19:20

dameng iwa Yesu ye gung fawec. <sup>25</sup> Fame mic-tengtengfocine yenge Yesula lelu yeuckelu yanguc miibong, "Sugucne, nonge haulu homadabelengkale ailu, baficnubac!"

<sup>26</sup> Inguc mibong yedi yanguc edocebawec, "**Ngenge ngage-ngagesingnineng kpsic-nemac fagac, ngenge hangoc mi aining.**" Inguc milu gbelong nga lifuc ngelengkeli kpatalayetelu edocepame, gbelong miyanc aime lifuc ye kalong kwelu moc fawec.

<sup>27</sup> Fame ngic yenge kwatackelu uwanaguibong, "Ye oma ngic, aime gbelong nga misa lifuc yeke yowa ngagegabiye?"

*Ngic yaeckang yekele aleng  
Mrk 5:1-17; Luk 8:26-37*

<sup>28</sup> Aime yenge lifuc nebocina Gadara ngic-ngigac yengele himongka hike sulumbong ngic yaeckang alengngineckolec dongesiwacni kwesiiboc. Yeke odolecaigaic. Ilec ailu ngic-ngigac yenge inguc yefe mi hikelu gaibong. <sup>29</sup> Hei, yeke iwa domalu aukwelu yanguc miiboc, "Wapongte Madec, nokela wenuc ainogale ngagegic? Damengnonggeng mi weleemewa ga doicka mi locnupadamec."

<sup>30</sup> Aime ediyec neboc bec-habu sugucne monic yenge sulukwelu gaibong. Gaebongka <sup>31</sup> aleng yengi yanguc milu Yesu dogbac aicnolu miibong, "Ga yebicnubanogale milu, bec-habu yengela salecnubang hikedabeleng."

<sup>32</sup> Inguc mibong yedi yanguc edocebawec, "**Ngenge baickelu iwa hikening.**" Hei, yenge baickelu bec-habu yengela hauibong. Haubong bec yenge sasawadi fegeng kacni gasackelu lifucka haulu misa nolu homayackeibong. <sup>33</sup> Homabong bec-damong yenge yogo nganilu hangoc hike taonka galu pasi fikewec, yogolec siduc sasawa milu edocebaibong. Ailu ngic alengkolec yekela pasi fikewec, yogolec siduc momochac edocebaibong. <sup>34</sup> Edocebabong taon yogolec ngic-ngigac sasawadi Yesu nganinogale hike nganilu, ye yengela mac-himongngineng yogo hegilelu hikenale dogbac aicnolu edoibong.

## 9

*Ngic hige-moleine homaicne  
Mrk 2:1-12; Luk 5:17-26*

<sup>1</sup> Yesu ye gombawa felu lifuc falockelu yeicnac taonka hikewec. <sup>2</sup> Hikeme yenge ngic monic hige-moleine homaicne dembengka lolu tengkelu kwesiibong. Kwesiibong Yesudi ngage-ngagesingnineng nganilu ngic-puling yanguc edowec, "**Madecne, ga kwelegone madickena, bikicgone yogo biyac hegilegelegabac.**"

<sup>3</sup> Inguc mime Wapongte yefe-yowale wewedu ngic gocne yengungtihac yanguc ngagesiibong, "Ngic yago ye Wapong fecnogac!"

<sup>4</sup> Inguc ngagebong Yesudi ngage-ngagengineng nganilu yanguc miwec, "**Ngenge omale kwelenginang ngage-ngage sowacne ngagesigaing?** <sup>5</sup> **Weni yogodi efecne aigac? Yele yanguc minoga, 'Bikicgone biyac hegilegelegabac' me yanguc minoga, 'Ga fangkelu hikec.'** <sup>6</sup> **Ngicte Madec ye himongka bikic hegilenale bole-yowa tapiliineholec facnogac, ngengi yogo ngageningte ailu yanguc mibe.**" Ye inguc milu ngic-puling yanguc edowec, "**Na edocgugabac, ga fangkelu dembenggone balu macgona hikec.**" <sup>7</sup> Inguc mime ngic ye fangkelu macina hikewec. <sup>8</sup> Hikeme ngic-ngigac habu-towa domaibong, yenge yogo nganilu kwatackelu milu medecebawec. Wapongti bikic hegile-hegilele bole-yowa tapiliineholec ingucne ngic-ngigac yeleme, yenge yogo nganilu Wapong wacine bafeibong.

*Yesudi Mataio wackewec  
Mrk 2:13-17; Luk 5:27-32*

<sup>9</sup> Yesu ye iwacni falocke hikelu takes-baba ngic\* monic, wacine Mataio, ye takes-baba macka ngiyeme nganilu yanguc edowec, "**Ga wele na balaibecnuc!**" Inguc mime ye fangkelu balaibelu hikewec.

<sup>10</sup> Aime Yesu ye Mataiole macka felu nosing nolu ngiyemewa takes-baba ngic nga bikic-baba ngic bocyacti kwesilu Yesu nga mic-tengtengfocine yengeholec ngiyelu nosing momoc noibong. <sup>11</sup> Nolu ngiyebong Farisaio yenge yogo nganilu Yesu mic-tengtengfocine yanguc uwayeleibong, "Wewedungineng ye omale takes-baba nga bikic-baba yengeholec nosing nogac?"

<sup>12</sup> Inguc mibong Yesudi ngagelu yanguc edocebawec, "**Ngic-ngigac hucngineng mikac gagaing, yenge dotale mi aieylecaigac. Nga hucnginengkolec, yengibac dotale aieylecaigac.** <sup>13</sup> **Ngenge hikelu yowa yanguc fagac, yogolec ngage-ngage baning,**

**‘Na depec bacaigaing, yogolec mi ainelegac. Ngic-ngigac kwele-sowac aiyele-caigaing, yogolec ainelegac.’**

6:6)

(Hos

**I yangucte, na ngic-ngigac dondonne wacebabe nala weleningte mi waiba, miyac. Nabac bikic-baba ngic wacebabe nala weleningte waiba.”**

*Nosing-sawe gaga*

*Mrk 2:18-22; Luk 5:33-39*

<sup>14</sup> Dameng iwa Yoanele mic-tengtengfocine yengi kwesilu uwacnoibong, “Nonge nga Farisaio, dameng homacne nosing-sawe gacaigabeleng. Nga gale mic-tengtengfocgone yenge omale nosing-sawe mi gacaigaing?”

<sup>15</sup> Inguc mibong Yesudi yanguc edocebawec, **“Baba-tumangte ngicti agofocine yengeholec ngiyeme yenge kwele-sowackolec nalic gadaingte, me? Yogo miyac. Gacgu dameng monicka ngic yengi baba-tumangte ngic agofocine yengelacni baickedaingte, dameng yogowabac nosing-sawe gadaingte.**

<sup>16</sup> **“Monicti ngakpi esecna kpoluc sindacine gbolicne monic lolu mi gbododaicte, miyac. Ye gbolicne inguc lodaictewa, gbolicnedi esecne fuluckeme sulackelu yefine suguledaicte.** <sup>17</sup> **Ailu monicti waing gbolicne bokong sic socine esecnedi baicne, iwa nalic mi kweme haudaicte, miyac. Waing gbolicnedi siwinelu bokong esecne kwouckeme yeke momochac sowaledabiyecte. Ilec ailu waing gbolicne yogodi bokong gbolicna socne kweme haudaicte.† Ilec waing gbolicne kwebong bokong gbolicne monicka sic socinedi baicne iwa haume yeke momoc nalic ngiyed-abiyecte.”**

*Adu monic bagbolyewec ailu ngigac monic bamadickewec*

*Mrk 5:22-43; Luk 8:41-56*

<sup>18</sup> Yesu ye yowa yogo edocebalu ngiyeme damong monicti yela kwesilu ketadi holecnolu afeelu miwec, “Na adune yakumac homagac. Gagi welelu molegone feina loengka gboliyena.” <sup>19</sup> Inguc mime Yesu ye fangkelu yeholec hikeme mic-tengtengfocine inguchac fangkelu ye balaibelu hikeibong.

<sup>20-21</sup> Hikeebongka ngigac monic lobenginang balaibecebalu hikewec. Hei, ye sac-dale aicnome gaemewa hifa 12 biyachac aiwec. Inguc aiwecte ailu kwesilu yanguc ngagewec, “Na Yesule ngakpi sugu oiyalu madickedacte.” Inguc ngagelu ngakpi daleinele muc susucine oi yawec.

<sup>22</sup> Oiyame Yesu ye hefaliye nganilu yanguc edowec, **“Ngigac, ga kwelegone madick-ena. Ngage-ngagesinggonedi bamadickugac.”** Inguc miyemewa ngigac ye iwahac madickewec.

<sup>23</sup> Aime Yesu ye gacgu ngic micne yele macka hike feme hisonggong gee holebong ngic-ngigac habutowa hendolongngineng ngagelu <sup>24</sup> yanguc edocebawec, **“Ngenge yagowacni baickening. Adu ye mi homagac, ye gung fagac.”** Inguc mime yenge gouwecnoibong. <sup>25</sup> Gouwecnolu baickelu wabong, Yesu ye adu fawec, iwa felu adu moleina bame gboliyelu fangkelu. <sup>26</sup> Aime siduc yogodi himong yogo saweyackewec.

*Ngic yaeckang dongenginec pisickeicne*

<sup>27</sup> Yesu ye mac yogo hegilelu hikeemewabac ngic donge-pisic yaeckangti Yesu bal-aibelu aukwelu wackelu yanguc miiboc, “Dawidile fikesaweckacni, ga nokele kwelegone sowalena!”‡

<sup>28</sup> Ye macka feme donge-pisic yaeckang yeke yela lebec yedi yanguc uwayetewec, **“Na bamadicneganogale aigabac, ngeke yogo ngagesingnugabiyec, me?”**

Inguc mime yeki miiboc, “Oc, Sugucne, noke ngagesingnugabelec.”

<sup>29</sup> Inguc miboc dongenginec bauwalu yanguc miwec, **“Ngage-ngagesingnginecte noine fikenetena.”** <sup>30</sup> Inguc mime dongenginec hilaiboc. Aime wiyac fikeyetewec, yogo ngic monic mi edonicti mimacepawec. <sup>31</sup> Aime yeke hikelu siducine yogo miboc suguleme macsoc ngageyackeibong.

*Ngic yowaine mikac*

<sup>32</sup> Aime yeke hikeebocka ngic-ngigac yenge ngic monic yowaine mikac ailu alengkoklec Yesula balu kwesiibong. <sup>33</sup> Kwesiibong Yesudi aleng yebiyeme ngic yowaine mikac gawec,

9:13: Mat 12:7 9:14: Luk 18:12 † 9:17: Bokong sic socinedi baicne esecne, ye umec sucine ingucne nosing hatac lobebeng sulumedaicte. Yowa yanguc yegengkegac, Ngic-ngigac yenge Yesule yowa gbolicne balaibenogale yefe-yowa esecneholec hatac atang mi bacepadabiyeng. 9:20-21: Mat 14:36 ‡ 9:27: 2 Samuel 7:12-16 Wapongti Dawidiholec yowa yanguc milu hefewec. Ngic monic gale alingacnidi dameng moto-motoine mikac gale mac ngiye-ngiyewa ngiyedaicte. Yogolec yenge Yesu Dawidile ngambo miibong. 9:27: Mat 20:29-34 9:30: Mat 8:4

ye yowa miwec. Mime ngic-ngigac habutowadi yogo ngagelu kwatackelu yanguc miibong, "Israel himongka pasi ingucne esecne monic mi fikeme nganiibeng."

<sup>34</sup> Inguc miibong Farisaio yengi miibong, "Ye aleng yengele micnele tapiliwa bole balu ngic-ngigac yengelacni aleng yebicebacaigac."

### *Lama-damongngine mikac*

<sup>35</sup> Yesu ye taon nga mac-aling sasawa lolickelu kpkapaduc macnginang felu wewedu bole balu ngani-damongte Siduc Madicne edocebalu weduyelelu gawec. Ailu ye ngic-ngigac huc haicine monic monicti bacebame tapilingineng waicne yenge sasawa bamadicebayackewec. <sup>36</sup> Aime ngic-ngigac habutowa yenge mimedec nga tapili-wawa ailu lama yengi damong mikac gacaigaing, yogo ingucne gaibong. Ilec ailu Yesudi nganiccebalu kweleine sowaleme <sup>37</sup> mic-tengtengfocine yanguc edocebawec, "**Ngic-ngigac yenge nosing noine ingucne homacnedi houwelu fagaing. Aime bole-ngicti sugu efecnemac gagaing.** <sup>38</sup> **Ilec ailu ngenge Sugucne nosing fileine milockelu yanguc edodabiyeng, 'Ga bole-ngic salecebang yengi hikelu nosing noine bakpaduc aidabiyeng.'**"

## 10

### *Yesu mic-tengtengfocine*

*Mrk 3:13-19; Luk 6:12-16*

<sup>1</sup> Yesudi mic-tengtengfocine 12 wacebame weleyackeibong. Welebong ngic-ngigac yengelacni aleng wonongkolec yebicebaningte bole-yowa tapiliineholec yelewec. Ailu huc haicine monic-monic ailu ngic-ngigac tapilingineng waicne sasawa bamadicebaningte bole-yowa tapiliineholec yelewec. <sup>2</sup> Ngic 12 yogo yenge Salecebaicne, yengele wacngineng yanguc:

Molic-molic Saimon, ailu wacine monic Pita. Nga

ngic hae-gbaine Endru. Ailu

Yakobos, ye Sebedi madecine, nga

gbaine Yoane. Ailu

<sup>3</sup> Filip nga

Batolomeu. Ailu

Tomas nga

Mataio, ye takes-baba ngic. Ailu

Yakobos, ye Alfaius madecine. Nga

Tadeus ailu

<sup>4</sup> Saimon, ye ngic-habu gocne wacngineng Selot wackeibong.\* Ailu

Yudas Iskariot, yedi gagcu Yesu mudockeme badaingte.

### *Bole-yowa milu yelewec*

*Mrk 6:7-13; Luk 9:1-5*

<sup>5</sup> Yesudi mic-tengtengfocine 12 yogo hocne salecebalu yowa yanguc milu sanangne edocebawec, "**Ngenge hikelu Israel yengele aling kacni miyac, yengele himongka ailu Samaria ngic-ngigac yengele taonka mi hikedaing, miyac.** <sup>6</sup> **Israel habu yengela ngic-ngigac lama sangkeicne, ingucne gagaing, ngenge yengela hikedaing.** <sup>7</sup> **Ngenge hikelu yanguc edocebalu weduyeledaing, 'Honocmengte ngani-damong yogo biyac bangkalecnubagac.'** <sup>8</sup> **Ailu huckolec ngic-ngigac bamadicebadaing. Ailu ngic-ngigac homaicne bagholiyecebadaing. Ailu ngic-ngigac waic-sanangti bacebaicne yenge bamadicebadaing. Ailu aleng yebicebadaing. Wiyac ameine mikac haibong yogo ameine mikachac yeledaing.**

<sup>9</sup> "**Ngenge gol moneng nga siliwa ailu moneng sasacnedi baicne, yogo anggangka mi umengkedaing.** <sup>10</sup> **Ngenge bole balu gabong bole yogolec ailu nosing nga wiyacngineng ngic-ngigac yengi bafuwadaingte, aibaba yogodi madickedaicte. Ilec ngenge yefe hikenogale, hiye me ngakpi yaeckang me hige-ebec me yasu monic mi balu hikedaing.**

**9:33:** Mrk 2:12    **9:34:** Mat 12:24; Mrk 3:22; Luk 11:15    **9:35:** Mat 4:23; Mrk 1:39    **9:36:** Mat 14:14; Him 27:17; 1Ngt 22:17; Sek 10:2; Mrk 6:34    **9:37:** Luk 10:2    **10:1:** Mrk 6:7; Luk 9:1    \* **10:4:** Dameng iwa Roma ngic-ngigac yengi Israel ngic-ngigac damongebaibong. Israel ngic-ngigac yengele habu nebocine wacine Selot yengungtihac damongnaguningte ailu gaibong.    **10:6:** Yer 50:6    **10:7:** Mat 3:2; 4:17; Luk 10:9,11    **10:10:** Luk 10:4,7; 1Kor 9:14

<sup>11</sup> “Ailu ngenge taon me mac-aling monicka hikedaingte, iwa ngic madicne monic bafuwabong yeholec ngiyeningte silic ingucne mime ngenge yeholec ngiyefangkec aidaing. Aibong motome taon hegilelu hikedaing. <sup>12</sup> Ngenge mac yogolec kwelina felu wenac-madic yowa kwele-mogungkolec midaing. <sup>13</sup> Inguc mi-bong golowacfocongine ngenge kwele-mogung ngagelu mengocngebadaingtewa, kwele-mogungi golowacfocongine ngenge yengela fadaicte. Nga golowacfocongine ngenge kwele-mogung mi ngagedaingtewa, kwele-mogung yogo ngengilang hat-acmac hefaliyengeledaicte. <sup>14</sup> Nga monicti mi hefolecngembali yowangine ng mi ngagedaicte, ngenge mac me taon yogo hegilelu higenginangkocni lube webong wame hikedaing. Taonte ngic-ngigac yenge inguc nganilu wowosaele sawang-yowa ngagedaingte. <sup>15</sup> Foinac, gacgu wowosae damengka taon yogolec ngic-ngigac yengele umacti Sodom nga Gomora taon, yekele ngic-ngigac yengele umac ewalidaicte, yogo noine edocngebabac.

*Umac kwesidaicte*

*Mrk 13:9-13; Luk 21:12-17; 12:2-9*

<sup>16</sup> “Ngagegabiye ngenge lamadi kate-hoda yengele hewacka gacaigaing, na silicine yogolec soc salecngebabac. Ilec hema yenge ngage-ngagemotocnginengkolec ngabale hangoc hikedaing, ngenge yenge ingucnehac gadabiyeng. Ailu tudiling nango yenge sowacnengine mikac, ngenge yenge ingucnehac gadabiyeng. <sup>17</sup> Ngenge ngic yengele ngani-motolu gadabiyeng. Yenge yowawa locngebadaingte. Ailu kpakpaduc macnginang muc-hududi wecngebadaingte. <sup>18</sup> Ailu ngic-ngigac yengi nale ailu bacngebahikelu gawana nga ngictau yengele haicka locngebadaingte. Inguc aibong ngengi yenge nga Israel yengele alingacni miyac, ngic yogo yenge momoc nale Siduc Madicne mibong yegengkelu hikedaicte. <sup>19</sup> Ailu ngic-ngigac yengele haicka locngebabong yowawa domadaingte, iwa ngenge ‘Oma yowa minoga?’ me ‘Wenuc minoga?’ milu, ngeboc monic mi aidabiyeng. Tili Asudi dameng yogowahac yowa micnginang lodaicte, yogo midaing. <sup>20</sup> Ngenge dameng iwa ngengung-yowa mi midaingte, miyac. Mamacnginengte Asudi yowa micnginang lome yowa yogo midaingte.

<sup>21</sup> “Dameng iwa haedi gbaine ngic micne yengele molewa lome yengi homacka lodaingte. Aime mamac monicti madicinele ingucnehac aidaicte. Aime adumadec yengi nengac-mamacfocongine yowa kwekwe aiyelelu ngic gocne yengele molewa locebabong homacka locebadaingte. <sup>22</sup> Aime ngic-ngigac sasawa yenge nale wacte ailu ngenge kweledi wicngebadaingte. Aime monic ye sanangnehac gacgume damengine motodaicte, ye wasacne aidaicte. <sup>23</sup> Ngenge taon monicka gaebongka ngic-ngigac yengi weyebic aingelebong, ngenge taon yogo hegilelu monicka hikedaing. Foinac, ngenge Israel himongka taon sasawa falegac, iwa bolene mi bayackebongka Ngicte Madec kwesidaicte, yogo noine edocngebabac.

*Ngage-wosaec ainoga*

<sup>24</sup> “Hibi-mac madec monicti weweduinele feicne mi aidaicte. Nga kwelec kwekwe ngic monic ye sugucneinele feicne mi aidaicte, miyac. <sup>25</sup> Hibi-mac madec ye weweduinele silic ingucnehac aidaic. Nga kwelec kwekwe ngic ye sugucneinele silic ingucnehac aidaic, yogodi nalic aidaicte. Aime mac fileine nale wac Belsebul wackebong. Ilec ailu golowacfocone ngengela wac sowacne ingucne homacnehac wacngebadaingte.

<sup>26</sup> “Wiyac monic ebecineholec fagac, yogo gacgu yegengkedaicte. Nga wiyac sangke-sangke fagac, yogo ngageyackedaingte. Ilec ngenge yengele mi hangocngebadaic. <sup>27</sup> Na kundungka yowa edocngebabac, ngengi yowa yogo angocina domalu midaing. Ailu yowa sangicka hedecnginang mimiine yogo, ngengi mac feina domalu yogo sugucnehac edocebabong ngageyackedaing. <sup>28</sup> Gocne yengi socngine ng wehomalu ilucngine nalic mi wehomadaingte, ngenge yengele mi hangocngebadaic. Wapongti soc nga iluc yeke momochac dac-sanangka wicpadaicte, ngenge yeke sugu hangocngebadaic. <sup>29</sup> Ngic-ngigac yengi nango hakic yaeckang lobong peni sasacne moniyangti fuli bacaigaing. Aime nango yengelacni monicti himongka waweme ngengele Mamacti yogo biyac ngagedaicte. <sup>30</sup> Nga ngengele hodoc-dowecngine ng edomeng, yogo inguchac wafelu ngagegac. <sup>31</sup> Ngengi



**Wapongte haicka nango gogoc homacne yengele feicne aigaing. Ilec ailu ngenge mi hanconggebadaic.**

<sup>32</sup> “**Monic ye ngic-ngigac yengele haicka nale mime yegengkedaicte, ‘Na yele aling.’ Aime nani yele inguchac Mamacne honocmengka gagac, yele haicka yanguc mibe yegengkedaicte, ‘Ye nale ngic.’** <sup>33</sup> **Nga monic ye ngic-ngigac yengele haicka nale wac bisockedaicte, nani Mamacne honocmengka gagac, yele haicka ngic yele wac inguchac bisockedacte.**

*Kwele-mogung bafuwanale mi wawec  
Luk 12:51-53; 14:26-27; Mrk 9:41*

<sup>34</sup> “**‘Na himongka kwele-mogung bafuwanogale waiba,’ Ngenge nale inguc mi ngagedaing, miyac. Na kwele-mogung bafuwanogale mi waiba, na hudule waiba.**

<sup>35</sup> **‘Maded ye mamackolec ngaba ainagudabiyecte. Nga adu ye nenggacineholec ngaba ainagudabiyecte. Nga ngigac ye yengauineholec ngaba ainagudabiyecte, inguc fikenale waiba.** <sup>36</sup> **Monic ye macinabenang ngic-ngigac aling-focine gagaing, yengi hocne ngaba aicnodaingte.’** *(Mika 7:6)*

<sup>37</sup> “**Monic ye nenggac-mamackecine kweledi angac ngageyetelu nale angac efec-nemac ngagecaigac, ye nale alingka gagalesoc mi aidaicte. Nga monic ye madecine me aduine kweledi angac ngageyetelu nale angac efecnemac ngagecaigac, ye nale alingka gagalesoc mi aidaicte.** <sup>38</sup> **Monic ye malicpongine† tengkelu na mi balaibec-nudaicte, ye nale alingka gagalesoc mi aidaicte.** <sup>39</sup> **Monic ye yeuctihac gagaine bafuwalu sebiledaicte, ye gagaine sangkecnodaicte. Nga monic ye nale ailu gagaine hegiledaicte, yebac gagaine bafuwadaicte.**

<sup>40</sup> “**Monicti hefolecnebagac, ye na inguchac hefolecnguc. Ailu na hefolecnguc, ye Wapong na salecnuwec, ye inguchac hefolegac.** <sup>41</sup> **Nga monic ye Wapongte siduc-mimi ngic monic nganilu ngic yogo ye Wapongte siduc-mimi ngic gagac, inguc ngagelu ye sebiledaicte, ye Wapongte siduc-mimi ngicte fuli ingucnehac badaicte. Ailu monicti ngic ye dondonne gagacte ailu ngic yogo sebiledaicte, ye ngic-ngigac dondonne yengele fuli ingucnehac badaicte.** <sup>42</sup> **Foinac, monicti madec kpisicne monic nganilu nale mic-tengteng aigac inguc ngagelu misa mogung lacnome nodaictewa, ye gagcu wiyac yogolec fuline badaicte, yogo noine edocnebagabac.”**

## 11

<sup>1</sup> Yesu ye mic-tengtengfocine 12 yowa inguc weduyeleme motome mac-aling yogo hegile hikewec. Hikelu mac-himong yogo yengele taonnginangsoc Siduc Madicne edocebala weduyelenale hikelu gawec.

*Yoane misa-lowacte mic-tengtengfocine  
Luk 7:18-35*

<sup>2</sup> Aime Yoane ye muc-macka ngiyelu Kristodi bole bawec, yogolec siduc ngagewec. Inguc ngagelu mic-tengtengfocine Yesula salecebame hikelu <sup>3</sup> uwacnoibong, “Ngc kwesinolenogale miicne, yogo ga, me nonge ngic monicte wangep gadabelengte?”

<sup>4</sup> Inguc mibong yedi yanguc miwec, “**Ngenge hikelu wiyac ngani-ngagec aigaing, yogolec siduc Yoane edocnodabiyeng!** <sup>5</sup> **Ngc-ngigac donge-pisic yenge dongengineng hilagaing. Nga hige-sowac yenge yefe hikegaing. Ailu ngic-ngigac waic-sanangkolec yenge socnigineng madickeme gagaing. Hedec-fong yenge yowa ngagelu gagaing. Nga homaicne yenge gboliye fangkelu gagaing. Ailu ngic waweweine yenge Siduc Madicne ngagebong yegengkeyeleme gagaing.** <sup>6</sup> **Aime monicti nale ngagelu kweleine mi wadaicte, ye kwele-angackolec.”**

*Yoane misa-lowacte fungine*

<sup>7</sup> Aime Yoanele mic-tengtengfocine yenge hikeebongka Yesudi Yoanele fungine milu habu sugucne yanguc edocebawec, “**Ngenge himong kisiwa misaine mikacka oma wiyac nganinogale hikeibong? Ngic monic komba ingucne gbelongti weme lec-welec aiwec, ngenge yogo nganinogale hikeibong, me? Yogo miyac.** <sup>8</sup> **Aime ngenge oma wiyac nganinogale hikeibong? Ngic monic ngakpi-kpolucine hibiineholec,**

**10:31:** Mat 6:26    **10:33:** Mrk 8:38; Luk 9:26; 2Tim 2:12    † **10:38:** Roma gamang yenge kindololo ngic mimoctocebabong yengileng malicpong tengkelu hikebong malicpongka wehomacebacaigaing. Ilec ailu “malicpong tengkenogale” yowa yogo bole doicineholec inguc ngagelu micaigaing.    **10:38:** Mat 16:24-25; Mrk 8:34-35; Luk 9:23-24; 17:33; Yoa 12:25    **10:40:** Mrk 9:37; Luk 10:16; Yoa 13:20    **11:5:** Yes 35:5-6; 61:1    **11:7:** Yak 1:6

me? Yogo miyac. Ngagegailing, ngic ngakpi-kpolucngineng hibine madicne hole-caigaing, yenge ngictau yengele macka sugu gacaigaing. <sup>9</sup> Ngenge Wapongte siduc-mimi ngic monic nganinogale hikeibong, me? Ye hocne Wapongte siduc-mimi ngic gocne sasawa ewalicebagac, inguc hocne edocngebagabac. <sup>10</sup> Yoanele hocne yanguc kwelengkeicne fagac, 'Ngagegic, na mic-yowa mimine salebe yedi molickegelelu yefegone hamadick-geledaicte.'

(Mal 3:1)

<sup>11</sup> Foinac, ngic-ngigackacni fike-ofeibong, yengelacni monicti Yoane misa-lowac nalic mi ewalidaicte, miyac, yogo noine edocngebagabac. Nga monicti honocmengte ngani-damongte kwelina waweweine gagac, yedibac Yoanele feicne aigac. <sup>12</sup> Aime Yoane misa-lowac hile moleckeweckacni ofegacgu yakumac aigac, ngic-ngigac yenge honocmengte ngani-damong banogale bole sanangne bacaigaing. <sup>13</sup> Wapongte siduc-mimi ngic sasawa nga Wapongte yefe-yowa Mosesdi kwelengkewec, yogo yenge siduc-yowa milu ofecgubong Yoanela kwesi-wec. <sup>14</sup> Aime ngenge yowa yago balu sebilenogale ngagegailingka yanguc migabac, Elaiya kwesinale miibong, yogo ye hocne. <sup>15</sup> Monic ye hedeckolecti yowa yago aneng ngagedaic.

<sup>16</sup> "Aime ngic-ngigac aling yanguctihac gagaing, yenge aibabangineng yanguc. Adu-madec yengi sobengka ngiyelu agofocngineng yanguc wacebacaigaing, <sup>17</sup> 'Nonge kpeng fitobeng ngenge gee mi weibong. Nga kwele-sowac gee holebeng, ngenge monic mi hiyaihong.' <sup>18</sup> I yangucte, Yoanele kwesilu nosing nga waing misa mi nome yenge yogo nganilu yanguc miibong, 'Ye alengkolec.' <sup>19</sup> Nga Ngicte Madecti kwesilu nosing nga waing misa nomebac yenge ye nganilu yanguc micaigaing, 'Nganigaing, ye nosing nga waing misa efec mi nocaigac. Ailu ye takes-baba ngic nga bikic-baba ngic yengele agongineng.' Aime ye leledibac Wapongte ngage-ngagemotoc yogo dondonne fikengac aidaicte."

*Kwele mi hefaliyegaingte yowa*

*Luk 10:13-15*

<sup>20</sup> Yesudi mac-aling gocna pasi damuineholec homacne bame ngic-ngigac homacnedi nganilu kwele-hefaliyec mi aidaingkale, ye misofoc aiyelelu yanguc edocebawec, <sup>21</sup> "Korasin nga Besaida ngic-ngigac, mee, ngenge medecngedadaic. Ngengela pasi damuineholec homacne biyac fikewec. Pasi ingucne Tair nga Saidon taonka fikedec midec, ngic-ngigac yenge bikicnginengte ailu kwele-sowac ngakpi wambac biyac holedabong. Ailu defe lowalu kwele-hefaliyec aidabong. <sup>22</sup> Na yanguc edocngebabe, wowosae damengka ngengele umacti Tair nga Saidon yekele ngic-ngigac yengele umac ewalidaicte. <sup>23</sup> Nga Kapeneam ngic-ngigac, ngenge honocmengka fedaingte, inguc ngagecagibiyeng, yogo miyachenang. Ngenge Wangec-macka balu wicngebame haudaingte. Pasi damuineholec ngengela fikewec, yogodi Sodom taonka fikedec midec, Sodom ye dameng yanguctihac fadechac. <sup>24</sup> Na yanguc edocngebabe, wowosae damengka ngengele umacti Sodom ngic-ngigac yengele umac ewalidaicte."\*

*Mamac nga Madec ngagecepanoga*

*Luk 10:21-22*

<sup>25</sup> Dameng iwa Yesudi yanguc miwec, "Mamac, ga honocmeng nga himong fileine. Ngic-ngigac aling ngage-ngage-motocnginengkolec gacaigaing, gagi yenge wiyagone sasawa yago mi nganingte balu sangkeing. Ailu adu-madec-gogoc kpisicne ingucne, yenge sugu wiyac yogo baengka yegengkeyelewec. Ilec mitenggugabac. <sup>26</sup> Oc, Mamac, ga yogo ngagelu kwelegone madicngac. <sup>27</sup> Mamacnedi wiyac sasawa neleme na yogo damongkelu gagabac. Aime monicti Madec nalic mi ngagegac, Mamacti sugu ngagegac. Ingucnehac monicti Mamac nalic mi ngagegac, Madecti sugu ye ngagegac. Ailu Madecti ngic-ngigac bawosaecebalu edalicebagac, yengi sugu Mamac ngagegailing.

*Ngije-ngagec banoga*

**11:10:** Luk 1:76    **11:12:** Luk 16:16    **11:14:** Mal 4:5; Mat 17:10-13; Mrk 9:11-13    **11:19:** Mat 9:14    **11:21:**

Yes 23; Esek 26:1-28:26; Yol 3:4-8; Amo 1:9-10; Sek 9:2-4    **11:23:** Yes 14:13-15; Fike 19:24-28    \* **11:24:** Korasin nga Besaida ailu Kapeneam taon, yenge Israel ngic-ngigac yengele mac. Tair nga Saidon ailu Sodom taon, yenge Israel yengele alingacni miyac.    **11:24:** Mat 10:15; Luk 10:12    **11:25:** 1Kor 1:26-29    **11:27:** Mat 28:18; Yoa 3:35; 17:2; Filip 2:9; Yoa 1:18; 10:15

<sup>28</sup> “**Ngic-ngigac boletowa balu tapilingineng waicne gacaigaing. Nga umac homacne balu gacaigaing, nenge nala weleyackebong nani ngiye-ngagec ngeledacte.** <sup>29</sup> **Nenge kwesilu nale bole yogo teng ingucne bafangke tengkelu ngage-ngage nalacni baning. Na kwele-mogung ailu bawacnagulu gagabac. Inguc ailu kwele-ilucnginengti ngiye-ngagec bafuwadaicte.** <sup>30</sup> **Nale teng yogo nalic tengkenoga, aime teng bageina wiyac hefeicne yogo efecne.”**

## 12

### *Sabatle Sugucne*

*Mrk 2:23-28; Luk 6:1-5*

<sup>1</sup> Dameng iwa Yesudi Sabat damengka wit bole hewacina yefe balaibelu leme, mic-tengtengfocine yenge nosingte homalu wit noine moniyang moniyang banoc aii-bong. <sup>2</sup> Inguc aibong Farisaio yenge yogo nganilu yanguc edoibong. “Nganinong, mic-tengtengfocine yenge Sabat damengka aibaba mi aiaine, yogo aigaing.”

<sup>3</sup> Inguc mibong Yesudi yanguc edocebawec, “**Dawidi nga bole-ngicfocine yenge nosingte homalu aibaba aibong, nenge yogo wafe-ngagec mi aicaigaing, me?** <sup>4</sup> **Ye Wapongte Ibu-macka felu bret Wapongte ibu loicne, yogo balu bole-ngicfocine yengeholec noibong. Nga bret yogo depec-baba ngic yengi sugu nalic nodaingte, ngichenang yengibac miyac. Aimebac Wapongti yengele mi ngage-sowalewec.** <sup>5</sup> **Depec-baba ngic yenge inguchac Sabat damengka Ibu-macka bole balu Sabatka ngiye-ngagec aibaba yogo hegilelu hikic mi bafuwadaingte. Wapongte yefeyowawa fagac, nenge yogo wafelu ngagecaigaing.** <sup>6</sup> **Na yowa yanguc edocngebabe, wiyac yagodi\* Wapongte Ibu-mac ewaligac.** <sup>7</sup> **Aime yowa yanguc kwelengkeicne fagac,**

**‘Na depec bacaigaing, yogolec mi ainelegac. Ngic-ngigac kwele-sowac aiyela-caigaing, yogolec ainelegac.’** (Hos

6:6)

**Nenge yowa yogo ngage-motodabongka midec, nenge ngic bikicngineng mikac, ngage-wosaec aiyelelu mi mimoctocebadaibong.** <sup>8</sup> **Ngicte Madec ye Sabatle Sugucne gagac hocne, ye aibaba madicne nga sowacnele nalic midaicte.”**

### *Ngic mole-sowac bamadickewec*

*Mrk 3:1-6; Luk 6:6-11*

<sup>9</sup> Aime ye hegilelu iwacni hikelu kpakpaduc macnginang fewec. <sup>10</sup> Hei, ngic monic moleine neboc homaicne, ye iwa ngiyewec. Ngiyeme ngic yenge Yesudi wenuc mime ngagelu yowawa lonogale uwacnoibong, “Sabat damengka ngic nalic bamadicebanoga, me miyac?”

<sup>11</sup> Inguc mibong yedi yanguc edocebawec, “**Ngengelacni monicti lamaine monic Sabat damengka long monicka haudaicte ingucne, ye biyac hikelu lamaine fuluckeme ofedaicte.** <sup>12</sup> **Aime ngic ngengibac wiyac feicne ailu lama ewalicebayackegaing. Ile Sabat damengka aibaba madicne yogolec aka monic mi fagac.”**

<sup>13</sup> Inguc milu ngic yogolec yanguc micnowec, “**Ga molegone sungkec.**” Inguc micnome ye moleine sungkelu madickeme moleine nebocine ingucne aiwec. <sup>14</sup> Aime Farisaio yenge wahikelu yengilangkac kpaducke ngiyelu Yesu wehomanogale yowa milu hefeibong.

### *Wapongte angac madecine*

<sup>15</sup> Inguc aibong Yesu ye kwelengineng ngageyelelu iwahac mac yogo hegilelu hikewec. Hikeme ngic-ngigac homacnedi balaibelu hikebong, yedi ngic-ngigac hucnginengkolec sasawa bamadicebawec. <sup>16</sup> Bamadicebalu ngic-ngigac yengi yeicne fungine mibong yegengkedaickale ailu, aka-yowa edocebalu mimacebawec. <sup>17</sup> Siduc-mimi ngic Yesaiyadi yowa biyachac miwec, yogo noine aidaicte,

<sup>18</sup> “Ngagegaing, na bole-madecne bawosaeiba. Ailu kwelena yele angac ngagelu kwele-ilucnedi yele beliyegac. Aime Asune yele feiwa lobe yedi nale mimocto-mimoctole pasi dondone himongne himongne ngic-ngigac sasawa, yengela mime yegengkeyedaicte. <sup>19</sup> Ailu ye ngaba mi aidaicte. Nga ye tapiliineholec mi aukwedaicte. Ngic-ngigac yenge mac-sobengka domalu yele yowa-malacte ucine nalic mi ngagedaingte. <sup>20</sup> Ailu ye komba pelecne monic biyac sowaleicne, yogo mi baduyackedaicte. Ailu hifa monic ucine hasockolec hobanogale aigac, yogo mi

**11:28:** Yer 31:25    **11:30:** 1Yoa 5:3    **12:1:** Yef 23:25    **12:2:** Wah 20:10    **12:4:** 1Sm 21:1-6; Dep 24:5-9

**12:5:** Him 28:9-10    \* **12:6:** Yesu ye yeicnele ngagelu “wiyac yagodi” miwec.    **12:6:** Mat 12:41-42    **12:7:** Mat 9:13    **12:10:** Luk 14:3    **12:11:** Luk 14:5    **12:14:** Yoa 5:16,18    **12:16:** Mat 8:4; Mrk 3:12    **12:18:** Yes

42:1-4; Mat 3:17

bahobadaicte. Inguc ailu gacgu ye mimocto-mimoctole pasi dondonne damongkelu game pasi yogodi aibaba sowacne ewalidaicte. <sup>21</sup> Aime himongne himongne ngic-ngigac sasawa, yenge ngage-ngagengineng yele wacka lolu wangec gadaingte.” (Yes 42:1-4)

*Alengkolec bole bacaigac, me?*

*Mrk 3:20-30; Luk 11:14-23; 12:10*

<sup>22</sup> Yenge ngic monic alengkolec ailu dongeine pisickeicne ailu yowaine mikac, ye Yesula balu hikeibong. Hikeibong yedi ngic yogo bamadickeme yowa miwec, ailu dongeine hilawec. <sup>23</sup> Inguc aime habu domaibong, yenge yogo nganilu kwatackelu yanguc miibong, “Ngic yogo ye Mesia mecne Dawidile fikesaweckacni.”

<sup>24</sup> Inguc mibong Farisaio yenge yogo ngagelu yanguc miibong, “Aleng yebicebacaigac, yogo aleng yengele micne Belsebul, yele tapiliwa bole balu ngic-ngigac yengelacni aleng yebicebacaigac.”

<sup>25</sup> Inguc mibong Yesudi ngage-ngagenginang biyac ngagelu yanguc miwec, “**Himong monicte ngic-ngigac yenge ngaba ainagulu siyeckedaingtewa, himong yogo kisi kwedaicte. Nga taon me golowac monicte siyeckelu ngaba ainagudaingtewa, taon me golowac yogo gilodaingte.** <sup>26</sup> Aime Satang yeuctihac yebicnagudaicte, ye siyeckelu habu yaeckang aime yele ngani-damong sanangne nalic mi fadaicte. Ilec na yele tapiliwa aleng mi yebicebagabac. <sup>27</sup> Nani Belsebul yele tapiliwa aleng yebicebadaba midec, ngengileng madecfocngineng yenge inguchac yele tapiliwa aleng yebicebadabong. Inguc aime ngenge madecfocnginengti hac ngenge yowa wosaelu mimoctodaingte. <sup>28</sup> Aime nani Wapongte Asuholec aleng yebicebagabacka, ibac Wapongte ngani-damongti ngengela biyac weleyec fagac.

<sup>29</sup> “**Ngic monicte ngic tapiliineholec, yele macka felu woc-wiyacine nalic mi ewalilu badaicte, miyac. Ye ngic tapiliineholec yogo mucti dodocekulubac macine kwelina felu woc-wiyacine fagac, yogo nalic bayackedaicte.**”†

<sup>30</sup> “**Inguc aime yanguc edocngebabe ngagening, monic ye nale ago miyac ye na lobenugac. Nga monicte naholec bakpaduc bole mi bacaigac, yedi nale wiyac basowaleme singsalolong kwenale bole bacaigac. <sup>31</sup> Ilec yanguc edocngebabe, ngic monic ye bikic haicine monic-monic aicaigac, ailu misulec aiyelecaigac, yele sowacne yogo nalic hegiledaicte. Nga monicte Asu misulec aicnodaicte,‡ yele sowacne nalic mi hegiledaicte, miyac. <sup>32</sup> Aime monic ye Ngicte Madecte wac milu sulelu yowa midaicte, yele sowacne nalic hegiledaicte. Nga monic ye Tili Asule wac milu sulelu yowa midaicte, yele sowacne nalic mi hegiledaicte, miyac. Yogo dameng yanguctihac gagabeleng me dameng lobewa kwesidaicte, iwa inguc fafeginowagac.**”

*Yoc madicne*

*Luk 6:43-45*

<sup>33</sup> “**Yoc monic madicne mibong, iwacni noine madicne fikedaicte. Nga yoc sowacne mibong, iwacni noine sowacne fikedaicte. Foinac, yoc haicine monic monic yenge noinenginengti funginengineng bayegengkecaigac. <sup>34</sup> Ngenge hema gbolfocine. Aime wiyac kwelenginang wakelu fagac, yogo hocne micnginengti mibong yegengkeadaicte. Ngic kindololoholec yedi yowa madicne mimilesoc mi aigac. <sup>35</sup> Ngic madicne ye ngage-ngage madicne facnogac, iwacni wiyac madicne bame fikecaigac. Nga ngic kindololoholec, yedi ngage-ngage sowacne iwacni wiyac sowacne bame fikecaigac. <sup>36</sup> Na yanguc edocngebabe, ngenge yowangineng sasawa kosalasa micaigaing, yowangineng yogodihac wowosae damengka wosaecngebame yowa noine midaingte. <sup>37</sup> Yowagonele silicka wosaelu dondonne wacgudaicte. Ailu yowagonele silicka wosaelu umac geledaicte.**”

*Pasile maainele Yesu uwacnoibong*

*Mrk 8:11-12; Luk 11:29-32*

<sup>38</sup> Inguc mime Wapongte yefe-yowale wewedu ngic nga Farisaio gocne yengi yanguc miibong, “Wewedu, ga pasile maa monic edalicnubacte ainolegac.”

<sup>39</sup> Inguc mibong yedi yanguc edocebawec, “**Ngic-ngigac aling yanguctihac gagaing, ngenge sowacne nga selo-boic aling ingucne ailu, pasile maa monic nganinogale**

**12:24:** Mat 9:34; 10:25    **12:28:** Sale 10:38; 1Yoa 3:8    † **12:29:** Ngic monic yogo Yesu yeicnele miwec. Nga Aleng Sugucnengineng ye ngic tapiliineholec ingucne.    **12:30:** Mrk 9:40; Luk 9:50    ‡ **12:31:** Asule wac milu sulegac, yogo yanguc, ngicte Asule aibaba yogo mime Aleng Sugucnenginengte aibaba ingucne aigac. Farisaio yengi inguc miibong.

**12:31:** Hib 6:4-6    **12:33:** Mat 7:16-20    **12:34:** Mat 3:7; 15:18; Luk 3:7; 6:45    **12:38:** Mat 16:1; Luk 11:16; Yoa 6:30

uwalu gagaing. Aimebac ngenge pasile maa monic mi ngeleicne, miyac. Siduc-mimi ngic Yona, yela pasile maa fikewec, ngenge yogo sugu nganidaingte. <sup>40</sup> Yona ye deboc hadeng habackang kiwec-sic sugucnele gobe kwelina fawec, ingucnehac Ngicte Madecti himong kwelina deboc hadeng habackang fadaicte, ngenge yogo sugu nganidaingte. <sup>41</sup> Aime Niniwe taon sugucnele ngic yengi Yonale yowa ngagelu kwele-hefaliyec aibong. Aime ngagegaing, yakumac monicti<sup>§</sup> Yona ewaligac. Ilec ailu ngic-ngigac aling yanguctihac gagaing, ngenge wowosae damengka Niniwe ngic-ngigac yengeholec fangkelu domaebongka aibabangineng wosaelu ngengele sowacne mimoctodaingte. <sup>42</sup> Aime Seba himongte ngigac-taudi Solomonte ngage-ngage-motoc banogale himong mecine sautkacnipec kwesiwec. Aime ngagegaing, yakumac monicti\*\* Solomon ewaligac. Ilec ailu ngigac-taudi wowosae damengka ngic-ngigac aling yanguctihac gagaing, ngengeholec fangke domalu aibabangineng wosaelu ngengele sowacne mimoctodaicte.

*Aleng wonongkolec hefaliyedaicte*

*Luk 11:24-26*

<sup>43</sup> “Aleng wonongkolec yedi ngickacni ofelu himong misaine mikac, iwa hikelu ye mac ngiye-ngiyeine basackelu lolickelu gacaigac. Gacgu mac ngiye-ngiyeine monic mi bafuwalu, <sup>44</sup> yeuctihac yanguc migac, ‘Macne esecne ngiyelu hegileiba, iwa hatacmac hefaliyelu hikenogale ngagegabac.’ Inguc milu hikelu mac yogo nganigac. Aime mac yogo biyac pelengkelu bamadickeicne. Ailu fileine mikac moc domagac. Domame aleng wonongkolec ye yogo nganilu <sup>45</sup> hatacmac hikelu aleng 7 mengocebame kwesigaing. Aleng yogo yengi ye ewalilu sowacnebenang aigaing, yenge hacebame hikelu mac iwa gagaing. Inguc aibong ngic ye molic-molic sowacne gawec, ye yogo ewalilu sowacnebenang gagac. Aime ngic-ngigac yanguctihac galu sowacne aigaing, ngengele aibaba ingucnehac fikedaicte.”

*Yesu nenggac gbafocine*

*Mrk 3:31-35; Luk 8:19-21*

<sup>46</sup> Yesu ye ngic-ngigac yowa edocebalu domaemewa nenggac gbafocine yenge kwesilu mac lobina domalu yeholec yowa mingagec ainingte mibong fewec. <sup>47</sup> Yowa lobong feme monicti ngagelu edowec, “Ngagegic, nenggac gbafocgone yenge gaholec yowa mingagec ainingte lobina domagaing.”

<sup>48</sup> Inguc mime Yesudi ye edolu miwec, “Weni yogo yengi nale nenggac gbafocne?”

<sup>49</sup> Inguc milu mic-tengtengfocine domaibong, yengela moleine sungkelu yanguc miwec, “Ngagegaing, ngic-ngigac yago yengi nale nenggac gbafocne aigaing. <sup>50</sup> I yangucte, ngic-ngigac Macacne honocmengka gagac, yele angac nga ngage-ngage bal-aibecaigaing, yengi hocne nale nenggac-sengfocne nga ngic hae-gbafocne aigaing.”

## 13

*Wasec wicke-wickele nangeng yowa*

*Mrk 4:1-9; Luk 8:4-8*

<sup>1</sup> Hadeng iwahac Yesu ye mackacni walu lifuc mecina hikelu ngiyewec. <sup>2</sup> Ngiyeme habutowa sugucnebenangti yela hikebong, ye gombawa felu ngiyeme ngic-ngigac habutowadi lifuc mecina domaibong. <sup>3</sup> Domabong yedi nangeng yowa homacne edocebalu yanguc miwec, “Ngagegaing, wasec wicke-wicke ngic monicti huc-wasec wicke-nale bolewa hikewec. <sup>4</sup> Hikelu wasec wickeme, wasec gocne yengi walu yefewa holeibong, yogo nango yengi kwesilu nowackeibong. <sup>5</sup> Nga gocnedi posa tolowa holeibong, iwa himong efecnemac fawecte, wasec yogo kwac biyac kwodulu ofeibong. <sup>6</sup> Ofebong godocngineng mi hauibongte ailu, wenacti ofelu kweme ululuwelu homaibong. <sup>7</sup> Nga wasec gocnedi kpinding kwelina holeibong. Holelu kwac kwodubong kpindingti sugulelu hole-homacebawec. <sup>8</sup> Nga wasec gocnedi himong guwecineholecka holelu noine madicne aibong. Monicte hucine yogo 100, nga monicte 60, nga monicte 30, inguc aibong. <sup>9</sup> Monic ye hedeckolecti yowa yago aneng ngagedaic.”

*Nangeng yowa hole-holele fungine*

*Mrk 4:10-12; Luk 8:9-10*

12:39: Mat 16:4; Mrk 8:12      12:40: Yoa 1:17      § 12:41: Yesu ye yeicnele ngagelu “Yakumac monicti Yona ewaligac,” miwec.      12:41: Yoa 3:5      \*\*      12:42: Yesu ye yeicnele ngagelu “Yakumac monicti Solomon ewaligac,” miwec.      12:42: 1Ngt 10:1-13      12:45: 2Pi 2:20      12:50: Rom 8:29      13:2: Luk 5:1-3

<sup>10</sup> Aime mic-tengteng yengi yela hikelu uwacnoibong, “Ga wenucte yowa nangengngine milu edocebacaigic?”

<sup>11</sup> Inguc uwacnobong Yesudi yowangineng bafaliyelu yanguc edocebawec, “**Honocmengte ngani-damongte ngage-ngage sangkeicne, yogo ngengi sugu ngageningte biyac ngeleicne. Nga yenge monic mi yelewec.** <sup>12</sup> Ngic monic ngage-ngage gocne facnogac, ye ngage-ngage homacne hatacmac lacnome balu gadaicte. Aime monic ye ngage-ngage mikac, yelacni ngage-ngage kpisicne balu gagac, yogo ewalidaicte.

<sup>13</sup> Yenge dongenginengti wiyac monic nganilu nalic mi ngani-motogaing.

Nga hedecnginengti yowa monic ngagelu, sifu nalic mi ngage-motogaing.

Ilec ailu nangeng yowa edocebacaigabac. <sup>14</sup> Aime siduc-mimi ngic Yesaiyadi yowa miwec, yogo yengela noine fikegac,

‘Ngic-ngigac hedecti ngagecaigaing, yenge yogo ngagelu nalic mi ngage-motodaingte.

Ailu dongedi nganicaigaing, yenge yogo nganilu nalic mi ngani-motodaingte.

<sup>15</sup> Ngic-ngigac aling yago yenge kwelengineng fongkecaigac. Nga hedecnginengti yowa ngageningte hedecngineng fongkecaigac. Ailu dongenginengti wiyac nganinogale kundung kwecaigac.

Yenge dongenginengti wiyac monic nganidaingkale, nga hedecnginengti ngagedaingkale ailu, ngage-ngageningti wiyac monic ngage-motodaingkale.

Ilec yogo yenge kwelengineng wenucka hefaliyeme bamadicebadaba.’ (Yes 6:9-10)

<sup>16</sup> Aime dongedi ngani-motolu hedecti ngage-motocaigaing, ngenge kwele-angackolec. <sup>17</sup> Foinac, Wapongte siduc-mimi ngic nga ngic albabangineng dondonne homacnedi esecne gaibong, ngengi yenge wiyac nganicaigaing, yogo nganinogale angac ngagelu sifu mi nganiibong. Ailu ngenge yowa hedecnginengti ngagecaigaing, yenge yogo hedecti ngageningte aiyelewec, yogo inguchac mi ngageibong, yogo noine edocngebagabac.”

*Wasec wicke-wickele fungine*

*Mrk 4:13-20; Luk 8:11-15*

<sup>18</sup> “Aime ngic wasec wickewec, yogolec nangeng yowale fungine mibe nenge ngagening. <sup>19</sup> Wasec yefewa holeibong, yogo monicti ngani-damongte yowa hedecinedi ngagelu mi ngage-motodaicte. Ailu Kindololo fileinedi kwesilu yowa yogo wasec ingucne kweleina duweicne, yogo biyac baickeyelecaigac. Yogo wit wasecne yefewa holeibong, silic ingucne aigac. <sup>20</sup> Nga wasec posa tolowa holeibong, yogo monicti ngani-damongte yowa ngagelu kweleina biyac beliyelu sebilelu badaicte, ye ingucne. <sup>21</sup> Sebileme yogodi kweleina godoc mi baicnele dameng kpisicnemas fame, Wapongte yowale ailu umac me weyebic aicnobong ye wawedaicte. <sup>22</sup> Nga wasec kpindingka holeibong, yogo monic ye ngani-damongte yowa ngagelu gadaicte, ye ingucne. Ye yowa ngagelu socte gagale ngageboc nga moneng-mafale lokwesac yogodi sugulelu yowa yogo hole-homame noine monic mi fikedaicte. <sup>23</sup> Nga wasec himong guwecineholecka holeibong, yogo monic ye ngani-damongte yowa ngagelu ngage-motodaicte, ye ingucne. Ngic ingucne yelacni gocnedi noine 100 nga gocnedi 60 nga gocnedi 30, inguc bafuwadaicte.”

*Ngaba-ngicti wiyac monic wickedaicte*

<sup>24</sup> Yesudi nangeng yowa monic holelu yanguc edocebawec, “**Honocmengte ngani-damong yogo silicine yanguc, monicti boleina hikelu wit hucine madicne wickewec.** <sup>25</sup> Ngic ye wickeme fame macka hikeme ngic-ngigac sasawa yenge debocka gung fayackeebongka ngic yele ngabadi kwesilu kpinding sowacne inguchac wit bole hewacina wikelu hikewec. <sup>26</sup> Aime wit yogo kwodu ofelu noine fikeemewa kpinding sowacne inguchac kwodulu ofewec.

<sup>27</sup> “Inguc aime kwelec kwekwe yengi kwesilu bole fileine yanguc edoibong, ‘Sugucnenonggeng, ga bolewa wasec madicne wickeing. Aime kpinding sowacne yogo wenuwacni ofegac?’

<sup>28</sup> “Inguc mibong yedi yanguc edocebawec, ‘Ngaba ngic monicti yogo aigac.’

“Inguc mime miibong, ‘Nonge hikelu kpinding sowacne yogo fuluckelu wicked-abelengte, nonge inguc ainangte ngagegic, me?’

<sup>29</sup> “Inguc mibong yedi yanguc edocebawec, ‘Miyac, ngenge kpinding fuluckega-beleng milu wit momochac fuluckedaingkale ailu, hegilening. <sup>30</sup> Wit nga kpinding

yekilec momochac sugulehoc noine babale dameng kwesime noine welu babale ngicti yanguc edocebadaacte, “Ngenge molickelu kpinding sowacne fuluckelu dodocebalu dacka wickebong lobedaic. Aime wit sugu bakpaduc ailu nosing-macna lobong ngiyedaic.” ’ ’

*Mastet hucinele nangengyowa*

*Mrk 4:30-32; Luk 13:18-19*

<sup>31</sup> Yesudi nangeng yowa monic holelu yanguc edocebawec, “**Honocmengte ngani-damong yogo mastet hucine ingucne. Ngic monicti hikelu boleina yogo duwewec.** <sup>32</sup> **Mastet hucine, yogo wasec sasawa yengele kpisicnengineng. Ailu ye sugulelu nosing-bolewa mendang ewalicebalu yoc bangkacne ingucne ailu domame sawawa nango yengi kwesilu mangngina yafu holelu ngiyecaigaing.**”

*Nangengyowa yiswa holelu miwec*

*Luk 13:20-21; Mrk 4:33-34*

<sup>33</sup> Aime Yesudi nangeng yowa monic holelu yanguc edocebawec, “**Honocmengte ngani-damong yogo yis ingucne. Ngigac monicti flawa umacine 20 kilo balu yisholec lalickelu bame atang aiboc sugulewec.**”

<sup>34</sup> Yesu ye yowa miwec, yogo nangeng yowawa sugu holelu ngic-ngigac habitowa edocebalu gawec, ye moc monic mi edocebalu gawec. <sup>35</sup> Wapongte siduc-mimi ngic monicti yowa yanguc miwec,

“Na nangeng yowa migabac, yogo micnacni wanale aigac. Aime himong fikeemewa wiyac sangke-sangke fawec, yogolec yowa midacte.” *(Mige 78:2)*

Yowa yogo noine fikenale Yesudi nangeng yowawa sugu holelu yowa edocebalu gawec.

*Kpindingte nangeng yowale fungine*

<sup>36</sup> Aime ye ngic-ngigac habitowa locebalu macka feme mic-tengtengfocine yenge yela felu miibong, “Ga nangeng yowawa kpinding sowacne bolewa ofewec migic, yogolec fungine miyengka yegengkeme ngagenang.”

<sup>37</sup> Inguc mibong yedi ameine bafaliyelu yanguc edocebawec, “**Ngicte Madecti wasec madicne wickelu gagac.** <sup>38</sup> **Aime nosing-hole yogo himongtowa himong falegac. Nga hucine madicne yogo Wapongte ngani-damongte adu-madecfocine. Nga kpinding sowacne yogo Kindololo fileinele adu-madecfocine.** <sup>39</sup> **Aime ngaba-ngicti wasec bolewa wickewec, yogo Aleng Sugucnengineng. Nga noine babale dameng, yogo dameng moto-motoine, yogolec dameng. Bole-ngic yogo angelo.** <sup>40</sup> **Yengi kpinding sowacne fuluckelu dacka wickebong lobedaicte, dameng moto-motoina ingucne fikedaicte.** <sup>41</sup> **Dameng iwa Ngicte Madecti angelofocine salecebame yengi yele ngani-damongkacni okac ingucne kwopocebadaingte. I yangucte, bikicka wawecaigaing, ailu yefe-yowa wewe ngic, yogo sasawa kpaducebayackelu** <sup>42</sup> **dac sugucna wicebabong haudaingte. Iwa haulu ngic-ngigac yenge hiyalu micngineng hisalangkelu gadaingte.** <sup>43</sup> **Aime ngic-ngigac dondonne yenge Mamacnginengte ngani-damongka wenac-dongeine ingucne angolelu gadaingte. Monic ye hedeckolecti yowa yago aneng ngagedaic.”**

*Moneng nga kwanang yekela nangengyowa*

<sup>44</sup> Yesudi hatacmac taockelu yanguc miwec, “**Honocmengte ngani-damong yogo moneng-mafa ingucne. Ngic yengi moneng-mafa bolewa sangkeibong. Sangkeibong ngic monicti iwa hikelu yogo bafuwalu hatacmac balu iwahac sangkewec. Sangkelu belic-helicka hikelu wiyacine sasawa salelu moneng balu hikelu bole yogo fuli bawec.**

<sup>45</sup> “**Ailu hatacmac yanguc, honocmengte ngani-damong yogo kwanang madicne ingucne. Monicti kwanang basackelu gawec.** <sup>46</sup> **Basackegacgu kwanang monic fuline sugucnebenang nganiwec. Nganilu hike woc-wiyacine sasawa salelu moneng bawec. Balu kwesi yogodi kwanang yogo fuli bawec.**

*Nangengyowa uficka holelu miwec*

<sup>47</sup> “Na hatacmac mibe ngagening. **Honocmengte ngani-damong yogo ufic ingucne. Ngic yenge ufic lifucka wickebong haulu kiwec-sic silicine haicine monic-monic bacebawec.** <sup>48</sup> **Wickebong lifucte sicti ufic wakelu ofowalu mecina fame fuluckebong ofewec. Ofeme ngic yenge sic nonoine yogo wosaelu duwacka loibong. Nga mi nonoine, yogo wickeibong.** <sup>49</sup> **Dameng moto-motoine iwa pasi ingucne-hac fikedaicte. Angelo yengi gagcu ngic-ngigac aling bikickolec gagaing, yenge**

**inguchac ngic-ngigac dondonne yengele hewackacni baicebalu** <sup>50</sup> **dac sugucna wice-babong haudaingte. Haulu yenge iwa hiyalu micngineng hisalangkelu gadaingte.”**

<sup>51</sup> Yesudi inguc milu uwayelewec, **“Ngenge yowa yogo sasawa ngage-motogaing, me?”**

Inguc mime miibong, “Oc, ngaegabeleng.”

<sup>52</sup> Inguc mibong yanguc edocebawec, **“Ilec Wapongte yefe-yowale wewedu ngic monic ye honocmengte ngani-damongte mic-tengteng aigac, ye hocne mac monicte fileine aigac. Yedi luwangkacni woc-wiyac madicne esecne nga gbolicne balu wacaigac.”**

*Yesu lobe-yowa aicnoibong*

*Mrk 6:1-6; Luk 4:16-30*

<sup>53</sup> Yesu ye nangeng yowa yogo milu mac-himong yogo hegilelu <sup>54</sup> yeicne mac-himongngina hikewec. Hikelu kpakpaduc macka felu yowa edocebalu weduyeleme ngic-ngigac ngiyebong, yenge mimedec ailu yanguc miibong, “Ngic yago ye ngage-ngage-motoc nga pasi damuineholec yogo wenuwacni baweckacni balu gagac? <sup>55</sup> Ye mac-baba ngic yele madec hocne. Nga nenggacine wacine Maria ailu ye Yakobos nga Yosefe nga Saimon ailu Yude yengele haengineng. <sup>56</sup> Ailu sengfocine sasawa yenge nongilengkolec gagaing. Aime ye ngage-ngage yogo wenuwacni bawec?” <sup>57</sup> Yenge inguc milu lobe-yowa aicnolu ye hegileibong.

Inguc aibong Yesudi yanguc edocebawec, **“Ngic-ngigac yenge Wapongte siduc-mimi ngic yele alang bacaigaing. Aime macfocine nga golowacfocine, yengi sugu yele alang mi bacaigaing.”** <sup>58</sup> Aime ngic-ngigac yenge mi ngagesingkeibongte ailu, yedi iwa pasi damuineholec homacne mi bawec.

## 14

*Yoane misa-lowac weibong*

*Mrk 6:14-29; Luk 3:19-20; 9:7-9*

<sup>1</sup> Dameng iwa Yesule siducti ngictau Herode, yele hedecka haume <sup>2</sup> ye ngagelu bole-ningfocine edocebawec, “Yoane misa-lowacti homackacni gboliye fangkelu gagac, ye Yesu. Ilec ailu tapili facnogacte pasi damuineholec balu gagac.”

<sup>3-4</sup> I yangucte, Herodedi Yesule siduc mi ngagelu esecne gbaine Filipte ngigac Herodias ye hise balu gawec. Aibaba yogolec ailu Yoanedi Herode yanguc edowec, “Ga ngigac yogo balu yeholec gagic, yogo yefe monic mi fagac.” Inguc mime Herodedi Yoane balu hefelu muc-macka lolu <sup>5</sup> wehomanogale ngagesiwec. Aime ngic-ngigac yenge ye Wapongte siduc-mimi ngic, inguc ngageibongte ailu hangocebawec.

<sup>6</sup> Aime Herodele fike-fike dameng kwesime, ngic-ngigac yenge yela habu balu ngiyeebongka Herodias aduinedi yengele hewacka fangkelu gee wewec. Weme Herodedi ngani-angac aicnolu <sup>7</sup> Wapongte wacka yowa sanangkenale yanguc mipangkewec, aduine ye wiyac monicte aicnome yogo nalic lacnodaicte. <sup>8</sup> Mipangkeme adu ye nenggacinedi ngage-ngage lacnome Herode yanguc edowec, “Ga Yoane misa-lowacte hodoc welockebong pelewa lolu bawelelu neledamec.”\* <sup>9</sup> Inguc mime ngictaudi ngagelu kwele-umac ngagewec. Ailu ngic ngiyebong, yengele haicka yowa biyac mime sanangkewec. Ilec ailu aduinele yowa ngagewec, Yoanele hodoc yogo lacnonale mipangkulu <sup>10</sup> hudu-baba ngic monic saleme lelu Yoane muc-macka ngiyewec, ye ubeine welockewec. <sup>11</sup> Welockelu hodocine pelewa lolu bawelelu aduine lacnome adudi nenggacinele balewec. <sup>12</sup> Aime Yoane mic-tengtengfocine yenge hikelu kponggbongine bahikelu longkeibong. Longkebong motome hikelu Yesu siduc yogo edoibong.

*Nosing gumecebawec*

*Mrk 6:31-44; Luk 9:10-17; Yoa 6:1-13*

<sup>13</sup> Edobong Yesu ye siduc yogo ngagelu mac-himong yogo hegilelu gombawa felu mic-tengtengfocine yengeholec mac-himong monic ngic mikacka, iwa yeicnac ganale hikewec. Aime ngic-ngigac habutowadi yenge yogo biyac ngagelu taonngineng hegilelu hige-yefe balaibelu hikeibong. <sup>14</sup> Hikebong Yesu ye gombawacni walu ngic-ngigac habutowa inguc nganicebalu kweleine sowaleme ngic-ngigac hucnginengkolec bamadicebawec.

<sup>15</sup> Bamadicebalu gacume mac aweleme mic-tengtengfocine yengi yela lelu yanguc miibong, “Himong yago ngic mikac, aime wenac haume mac biyac awelegac. Ilec ailu ga

**13:50:** Mat 13:42; Luk 13:28      **13:54:** Yoa 7:15      **13:55:** Yoa 6:42      **13:57:** Yoa 4:44      **14:3-4:** Dep 18:16;

20:21; Luk 13:19-20      **14:5:** Mat 21:26      \* **14:8:** Herodias ye Yoane homanale ngagewecte ailu hodocine nganilu ngagewec, Yoane ye homawec.



ngic-ngigac habutowa yago salecebang mac-aling gocna hikening. Yenge hikelu yengung nosing fuli banoc aining.”

<sup>16</sup> Inguc mibong yedi yanguc edocebawec, “**Yenge hike-hikelesoc mi aigaing, ngenge ngengung nosing yelebong noning.**”

<sup>17</sup> Inguc mime yengi miibong, “Nonge bret 5 nga misa-sic yaeckang sugu balu gagabeleng.”

<sup>18</sup> Inguc mibong yedi yanguc miwec, “**Ngenge nosing yogo nala bawelening.**” <sup>19</sup> Yesu ye inguc milu ngic-ngigac habutowa kpindingka wangiyeingte edocebawec. Edocebalu bret 5 ailu misa-sic yaeckang, yogo balu dongeine hilame honocmengka feme Wapong kwele-madic micnowec. Micnolu bret yogo baukelu mic-tengtengfocine yeleme yengi balu ngic-ngigac habutowa yelebong noibong. <sup>20</sup> Aime yenge sasawadi nogebec ailu nosing tofaine notiwa aibong ngiyewec, yogo kpaduckebong haulu damba 12 wakewec. <sup>21</sup> Ngic-ngigac nosing noibong, yogo yengelaacni ngic yengele dzalengineng yogo 5 taosen ngama ingucne. Nga ngigac adu-madec noibong, yengele dzalengineng yogo monic mi wafeibong.

*Lifuc feina hikewec*

*Mrk 6:45-52; Yoa 6:16-21*

<sup>22</sup> Damba wakeme Yesu ye mic-tengtengfocine salecebame yenge gombawa felu misa lifuc nebocina molickelu hikeibong. Hikebong ye yeicnac galu ngic-ngigac habutowa locebame hikeyackebong. <sup>23</sup> Hikeebongka ye milokenale kupicka feme mac deboleme yeicnac ngiyewec. <sup>24</sup> Ngiyeme yenge gombawa biyac lifuc hewacina hikeebongka gbelong sugucnedi yenge hikedaingtewa, yefe kwesilu dibongti gomba welu bafangkeme fec-wac aiwec.

<sup>25</sup> Inguc aime mac biyac saenogale aiyemewa Yesu ye lifuc feina edela edela mic-tengtengfocine yengela hikewec. <sup>26</sup> Ye lifuc feina edela edela hikeme mic-tengtengfocine yenge nganilu yanguc miibong, “Ilucti welegac.” Inguc milu hangocbame aukweibong.

<sup>27</sup> Aukwebong Yesudi ngagelu iwahac yanguc edocebawec, “**Nani welegabac.† Ngenge ngageboc mikac sanangne domadaing. Ngenge mi hangocngebana.**”

*Pita misa feina hikewec*

<sup>28</sup> Inguc mime Pitadi hefaliyelu miwec, “Sugucne, gageicne welegic ingucnehac, na misa feina edela edela gala fubele minelec.”

<sup>29</sup> Inguc mime Yesudi miwec, “**Ga welec.**”

Inguc mime Pita ye gombawacni walu misa feina edela edela Yesula lewec. <sup>30</sup> Leemewa dibong gbelong sugucne weme nganilu hangockewec. Inguc aime misawa haunogale ailu hangockeme aukwelu miwec, “Sugucne, ga baficnunong.”

<sup>31</sup> Inguc mime Yesu ye moleine biyac sungkelu Pitale mole balu bafangkelu yanguc edowec, “**Ga ngage-ngagesinggone kpisicnemas, ga omale ngageboc aigic?**” Inguc micnowec.

<sup>32</sup> Micnome yeke gombawa feebocka iwahac gbelong miyac aiwec. <sup>33</sup> Aime gombawa ngiyeibong, yenge Yesu afeelu yanguc miibong, “Foinac, ga Wapongte Madec.”

*Ngic-ngigac hucnginengkolec*

*Mrk 6:53-56*

<sup>34</sup> Aime yenge lifuc falockelu Genesaret himongka hike sulumeibong. <sup>35</sup> Iwa hikebong himong yogolec ngic yengi Yesu biyac ngani-motolu yowa lobong hikeyackeme yenge ngic-ngigac hucnginengkolec yela bacebalu kwesiibong. <sup>36</sup> Kwesilu hucnginengkolec yenge ngakpi daleinele muc susucine sugu oiyaningte dogbac ailu micnoibong. Aime oiyaibong, yenge sasawadi madickeibong.

## 15

*Oma yowa balaibenoga?*

*Mrk 7:1-23*

<sup>1</sup> Aime Farisaio nga Wapongte yefe-yowale wewedu ngic yenge Yerusalemkocni Yesula kwesilu miibong. <sup>2</sup> “Mic-tengtengfocine yenge molengineng mi suwelu nosing moc banoc aicaigaing. Aime yenge omale ngesa-ngambofocnonggeng yengele yefe-yowa yogo hegilecaigaing?”

<sup>3</sup> Inguc mibong Yesudi yanguc miwec, “**Ngenge omale ngengileng yefe-yowangineng balaibelu Wapongte ung-yowa hegilecaigaing?** <sup>4</sup> **Wapongti yanguc migac, ‘Ga nengnac-mamackecgone alang bayetedamec.’** (Wah 20:12; Yef 5:16)

**14:19:** Mat 15:35-39; Mrk 8:6-10    **14:23:** Luk 6:12; 9:28    **14:26:** Luk 24:37    † **14:27:** Grik yowawa yogolec fungine “Na gagabachac.” Yogo Wapongte wac monic, Wapongte angelodi Moses edowec.    **14:31:** Mat 8:26; Mrk 4:39

**14:36:** Mat 9:20-21

**Aime ‘Monic ye nenggacine me mamacinele sawec-yowa midaictewa, ye webong homadaic.’** (Wah 21:17; Dep 20:9)

<sup>5</sup> **Ngegebac yanguc micaigaing, ‘Monicti nenggacine me mamacine edolu yanguc midaicte, “Na wiyac gocne gelenogale ngagelu migabac, yogo biyac Wapongte ibu lacnobele miiba.”** <sup>6</sup> **Ye inguc milu nenggac-mamackecine alang mi bayetedaicte. Inguc ailu ngenge yefe-yowangineng balaihebong Wapongte yowa yogo someckeyackegac.** <sup>7</sup> **Kwesac-ngic, ngengele hocne Asudi siduc-mimi ngic Yesaiya edome siduc-yowa noinebenang yanguc kwelengkewec,**

<sup>8</sup> **‘Ngic-ngigac habu yago yenge micnginenngi sugu alang bacnucaigaing. Nga kwelenginenngitibac na hegilecnucaigaing.** <sup>9</sup> **Aime yenge ngic-ngigac weduyelecaigaing, yogo ngicte yefe-yowa sugu edocebalu weduyelecaigaing. Ailu moc afenubong nganibe noine mikac aicaigac.’** (Yes 29:13)

<sup>10</sup> **Aime Yesudi ngic-ngigac habu wacebame kwesibong yanguc edocebawec, “Ngenge hedec kwelu ngage-motoning.** <sup>11</sup> **Nosing nga wiyac ingucne yogodi ngic kweleina haume wonongkolec nalic mi aidaicte, miyac. Nga wiyac kwelenonggangkocni micka yefe ofecaigac, yogodi hocne ngic kweleine bame wonongkolec aidaicte.”**

<sup>12</sup> **Aime mic-tengtengfocine yengi yela kwesilu edolu miibong, “Farisaiyo yenge yowa yogo ngagelu yowa heesicne migaing, ga yogo ngagegic, me?”**

<sup>13</sup> **Inguc edobong yedi Farisaiyo yengele yanguc miwec, “Honocmeng Mamacnedi woc-wiyac monic mi duwewec, yogo godocine fuluckedaicte.** <sup>14</sup> **Ilec ngenge hegilecebadaing. Yenge yengung donge-pisic ailu donge-pisic yengele feicne gagaing. Aime donge-pisic monicti donge-pisic agoine mengockeme yekilec momochac longka haudabiyecte.”**

<sup>15</sup> **Mime Pitadi yanguc uwacnowec, “Yowa nangengngine holelu migic ilec fungine miyengka ngagenang.”**

<sup>16</sup> **Inguc mime Yesudi yanguc milu edowec, “Ngenge ngage-ngage-motocngineng mikac ingucne gagaing, me?”** <sup>17</sup> **Nosing me wiyac monic lobinacni gobe kwelina haulu hamacka haucaigac. Ngenge yogo mi ngage-motogaing, me?** <sup>18</sup> **Nga ngic kwelewacni ofecaigac, yogodibac ngic bame wonongkolec aicaigac.** <sup>19</sup> **Kwelewacni ngage-ngage yangucti ofecaigac. Ngage-ngage sowacne, nga ngic-wewe, ailu ngawengigac bahegilec, nga selo-boic aibaba. Ailu hise aibaba, nga kwesac-yowawa loceba-loceba, ailu misulec aibaba.** <sup>20</sup> **Aibaba yogodi ngic-ngigac basowaleme wonongkolec aicaigaing. Aime ngenge molengineng mi suwelu nosing moc no-caigaing, aibaba yogodi ngic kwelewa wonongkolec nalic mi aidaicte.”**

*Kenan ngigac monic*

*Mrk 7:24-30*

<sup>21</sup> **Yesu ye Genesaret himong hegilelu Tair nga Saidon himong, iwa hikewec.** <sup>22</sup> **Hikeemewa iwacni Kenan yengele alingkacni\* ngigac monicti kwesilu Yesu wacke-wasic aicnolu micnowec, “Sugucne, Dawidile fikesaweckacni, ga nale kwelegone sowalena, alengti adune basowalecaigac.”**

<sup>23</sup> **Mime Yesudi yele yowa ameine monic mi bafaliyecnome mic-tengtengfocine yengi kwesilu kpafengkelu yanguc miibong, “Ngigac ye lobenonggang homacnehac wackegacte saleengka hikena.”**

<sup>24</sup> **Inguc micnobong yedi yowa yanguc bafaliyewec, “Na Israel ngic-ngigac yengelacni lama sangkeicne gagaing, yengele ailu salecnume waiba.”**

<sup>25</sup> **Aime ngigac yogo kwesilu Yesu ketadi holecnolu afeelu miwec, “Sugucne, ga bafic-nunong.”**

<sup>26</sup> **Inguc mime yanguc edowec, “Adu-madec yengele nosing ewalicebalu hoda yengela wickedabelengte,† yogo mi madickedaicte.”**

<sup>27</sup> **Inguc mime ngigac yedi sanangnehac miwec, “Sugucnene, yogo nalic migic. Aime hoda yengebac filefocngineng yengi nosing nobong kapucine tebo bageina wacaigac, yogo nocaigaing.”**

<sup>28</sup> **Mime mime Yesudi bafaliyelu ngigac yogo yanguc edowec, “Ngigac, ngage-ngagesinggone yogo feicnebenang. Ngage-ngagegona ngagesigic, yogo hocne fikegelena.”** Inguc mime dameng iwahac aduine madickewec.

*Ngic-ngigac homacne bamadicebawec*

15:11: Mat 12:34 15:14: Luk 6:39; Rom 2:19 \* 15:22: Kenan aling yenge Israel yengele alingkacni miyac.

15:24: Mat 10:6 † 15:26: Adu-madec yenge Israel ngic-ngigac ingucne, nga Israel ngic-ngigac yenge Israel alingkacni miyac yengele hoda ingucne wacebaibong.

<sup>29</sup> Aime Yesu ye mac-himong yogo hegilelu, Galili lifuc mecina hikelu kupicka felu iwa ngiyewec. <sup>30</sup> Ngiyeme ngic-ngigac habutowa sugucnebenangti kwesiibong. Kwesilu huckolec ngic-ngigac, yenge hige-sowac nga pulingine, ailu donge-pisic nga yowangineng mikac, ailu ngic-ngigac homacne yela ingucnehac bacebalu kwesiibong. Kwesilu Yesule emewa locebabong yedi bamadicebawec. <sup>31</sup> Bamadicebame ngic-ngigac yowangineng mikac, yenge yowa miibong. Nga pulingine yenge madickeibong. Ailu hige-sowac yenge lec-welec aibong. Nga donge-pisic yenge donge hilaibong. Inguc aibong ngic-ngigac yenge yogo nganilu kwatackelu Israel yengele Wapong wacine bafeibong.

*Ngic 4 taosen nosing gumecebaibong*

*Mrk 8:1-10*

<sup>32</sup> Aime Yesudi mic-tengtengfocine wacebame welebong yanguc edocebawec, **“Ngic-ngigac habutowa yago yenge nosingngineng mikac hadeng habackang biyac naholec gaebongka yengele kwelene sowalegac. Yenge yefe hikegacgu nosingte homalu donge lolic aiyeledaickale, nalic mi salecebadacte.”**

<sup>33</sup> Inguc mime mic-tengtengfocine yengi bafaliyelu yanguc edoibong, “Nongileng mac yago himong kisiwa misaine mikacka gagabeleng. Ilec nosing wenuwacni baebengka ngic-ngigac habutowa sugucne yago yelebeng nobong gebecebadaicte?”

<sup>34</sup> Inguc mibong Yesudi yanguc uwayelewec, **“Ngenge bret edomeng balu gagaing?”** Uwayeleme miibong, “Bret 7 nga misa-sic gogoc kpisicne gocne.”

<sup>35</sup> Mibong Yesudi ngic-ngigac habu himongka walu ngiyeningte edocebawec. <sup>36</sup> Edocebame walu ngiyebong ye bret nga misa-sic balu Wapong kwele-madic micnolu bauckewec. Ailu mic-tengtengfocine yeleme yengi botoc balu ngic-ngigac habu yelebong noibong. <sup>37</sup> Yenge yogo nobong gebecebame, nosing tofaine ngiyewec, yogo balu kpaduckebong damba 7 aiwec. <sup>38</sup> Aime nosing noibong, ngic yogo yengele dzalengineng 4 taosen. Nga ngigac adu-madec noibong yengele dzalengineng yogo mi wafeibong. <sup>39</sup> Aime Yesu ye ngic-ngigac habutowa salecebame hikebong ye gombawa felu Magadan himongka hikewec.

## 16

*Pasile Yesu uwacnoibong*

*Mrk 8:11-13; Luk 12:54-56*

<sup>1</sup> Farisaio nga Sadyusi yenge Yesula hikelu yeicne tapiliine lokwesacka loningte ngageibong. Inguc ngagelu yedi pasile maa monic honocmengkacni bame fikeme edalicebanale uwacnoibong.

<sup>2</sup> Uwacnobong Yesudi yowangineng bafaliyelu yanguc edocebawec, **“Mac aweleme ngenge yanguc micaigaing, ‘Mac-himong sasacne aigacte saeme dameng madicne aidaicte.’** <sup>3</sup> Aime ubiyacte fangkelu micaigaing, **‘Mac-himong sasacne ailu kundung kwegacte mac-gbelong kwesidaicte.’** Ngenge sawawa maaine fikecaigac, **yogo madicne hocne wosaeagaing. Aime dameng yagolecte maa fikecaigac ngenge yogo nganilu sifu mi ngage-motocaigaing.** <sup>4</sup> Ngic-ngigac aling yanguctihac gagaing, **ngenge sowacne nga selo-boic aling ingucne ailu, ngenge pasile maa monic nganinogale uwalu gagaing. Aimebac ngenge pasile maa monic mi ngeleicne, miyac. Yonala pasile maa fikewec, ngenge yogo sugu nganidaingte.”** Inguc milu hegilecebalu hikewec.

*Farisaio yengele yis*

*Mrk 8:14-21*

<sup>5</sup> Yesu mic-tengtengfocine yengeholec lifuc nebocina hikeibong. Hikenogale bret ngigecbame moc hikeibong. <sup>6</sup> Hike sulumelu Yesudi yanguc edocebawec, **“Ngenge Farisaio nga Sadyusi yengele yisle ngani-motolu gadabiyeng.”**

<sup>7</sup> Mime mic-tengtengfocine yenge yengungtihac mingagec ailu yanguc miibong, “Nongileng bret mi balu kwesigabeleng. Ilec ailu inguc migac.”

<sup>8</sup> Inguc mibong ye kwelenginang biyac ngage-motolu yanguc miwec, **“Ngic ngenge ngage-ngagesingngineng kpisicnemas, ngenge omale ngengileng bret mi balu kwe-sigaingte mingagec aigaing?”** <sup>9</sup> Ngenge ngage-ngage-motocngineng mikac. **Bret 5 sugudi ngic 5 taosen andoebame damba edomeng umengkebong wakewec, ngenge yogo ngigecnebagac, me?** <sup>10</sup> Ailu bret 7 sugudi ngic 4 taosen andoebame damba edomeng umengkebong wakewec, **pasi yogo ingucne ngagesidaing.** <sup>11</sup> Omale ngenge mi ngage-motogaing? **Na brethenangte mi migabac. Ngenge Farisaio nga Sadyusi yengele yis, yogolec ngani-motolu ganingte migabac.”** <sup>12</sup> Inguc edocebame yenge

bretle yis ilec mi miwec, yogo biyac ngage-motoibong. Yenge Farisaio nga Sadyusi yengele wewedu-yowa, yogolec ngani-motolu ganingte miwec.

*Yesule fungine mime yegengkewec  
Mrk 8:27-30; Luk 9:18-21*

<sup>13</sup> Yesu ye Filipai himongka Sesarea taon bangkalelu mic-tengtengfocine yanguc uwayelewec, “**Ngic-ngigac yenge Ngicte Madec yele ma micaigaing?**”

<sup>14</sup> Inguc mime yengi miibong, “Gocne yengi Yoane misa-lowac micaigaing. Nga gocne yengi Wapongte siduc-mimi ngic wacine Elaiya micaigaing. Nga gocne yengibac Yeremiya me Wapongte siduc-mimi ngic monic esecne wackelu micaigaing.”

<sup>15</sup> Inguc mibong yanguc miwec, “**Aime ngenge ngenung nale ma micaigaing?**”

<sup>16</sup> Uwayeleme Saimon Pitadi miwec, “Ga Mesia, Wapongt gagaineholec yele Madec.”

<sup>17</sup> Inguc mime Yesudi yanguc edowec, “**Saimon, Yonale madec, yowa yogo ngic mimiwacni mi migic. Ilec ga kwele-angackolec gadamec. Mamacne honocmengka gagac, yedi hocne yogo bayengkelu edocguwecte migic.**” <sup>18</sup> Aime na inguchac edocgube ngagenong, ga Pita. **Aime posa yagolec feiwa\* na habune locebabe basuguledaicte. Aime yogo sanangnehac domame Wangec-mac yogolec tapiliinedi nalic mi bawadaicte.**

<sup>19</sup> “**Na honocmengte ngani-damongte tapili yogo ki ingucne gelebe gagi himongka wiyac sasawa hefedamecte, yogo honocmengka inguchac hefeicne fadaicte. Nga ga wiyac himongka lukedamecte, yogo honocmengka inguchac lukedaicte.**” <sup>20</sup> Inguc milu mic-tengtengfocine yenge Yesu ye yeicne Mesia, yogolec ngic monic mi edocebangingte mimacebawec.

*Homackacni gboliyelu fangkedaicte  
Mrk 8:31-9:1; Luk 9:22-27*

<sup>21</sup> Dameng iwa molickelu Yesudi mic-tengtengfocine yanguc edocebawec, “**Na Yerusalem hikebe Yuda ngic-ngigac yengele damongfocngineng nga decpababa ngic micne ailu Wapongte yefe-yowale wewedu ngic yengi doicka locnulu wehomacnudaingte. Aime hadeng habackang aiyemewa hatacmac gboliyelu fangkedaicte.**” Aibaba inguc fikenale miwec.

<sup>22</sup> Inguc edocebame Pitadi Yesu mecina mengocke lelu yekilackac domalu mikpatalac aicnolu miwec, “Sugucne, miyac! Wapongti baficgume wiyac yogo gala nalic mi fikedaicte.”

<sup>23</sup> Inguc mime Yesudi hefaliyelu Pita yanguc edowec, “**Satang, ga lobena wele-hikec. Ga okac ingucne kwopocnuengka wawecnunale ngagelu migic. Ga wiyac ngagesigic, yogo Wapongtacni miyac, yogo ngic ngage-ngage aigac.**”

*Yesu balaibenogale yefe*

<sup>24</sup> Inguc milu mic-tengtengfocine yanguc edocebawec, “**Monic ye na balaibecnunogale ngagegacka, ye yeicne soc-kweleinele angac bawalu umacte malicpongine bafangke tengkelu balaibecnudaic.**” <sup>25</sup> Monic ye yeicne gagaine sebilenale ngagelu boleine badaicte, ye gagaine yogo sangkecnodaicte. Nga monic ye nale ailu gagaine hegiledaicte, yebac gagaine bafuwadaicte. <sup>26</sup> Ilec monicti himongtowa yagolec wiyac sasawa bafuwanale ailu gagaine wickeme sangkedaicte, wiyac yogo yengi ngic yogo nalic bafickedaingte, me? Yogo miyac! Me monicti gagaine hatacmac bafuwanale wenuc lacnome bafuwacnodaicte? Yefe monic mi fagac.

<sup>27</sup> Aime Ngicte Madecti Mamactacni tapili nga hibi-angocineholecti angelofocine yengeholec kwesilu ngic-ngigac sasawa aibabangineng aicaigaing, yogolec silicina ameine baduyeleidaicte. <sup>28</sup> Foinac, ngic-ngigac yago domagaing, ngengelacni gocne mi homaebongkahac, Ngicte Madec ye ngani-damongineholec kwesime dongenginengti nganidaingte, yogo noine edocngebagabac.”

## 17

*Ngicte Madecte ngani-damong  
Mrk 9:2-13; Luk 9:28-36*

---

**16:14:** Mat 14:1-2; Mrk 6:14-15; Luk 9:7-8    **16:16:** Yoa 6:69    **16:17:** Gal 1:15-16    \* **16:18:** Pita wac yogo Grik yowawa fungine yogo posa kpisicne monic. Yesu ye yeicnele ngagelu “posa yagolec” inguc miwec. “Posa yagolec” yogo Grik yowawa fungine yogo posa lapane sugucne.    **16:18:** Yoa 1:42; Efs 2:20    **16:19:** Mat 18:18; Yoa 20:23  
**16:24:** Mat 10:38; Luk 14:27    **16:25:** Mat 10:39; Luk 17:33; Yoa 12:25    **16:26:** Mat 4:8-9    **16:27:** Mat 25:31; Mige 62:12; Ynn 24:12; Rom 2:6; Miye 22:12

<sup>1</sup> Hadeng 6 motome Yesudi Pita nga Yakobos ailu gbaine Yoane mengocebame tiki dalicne monicka felu yengilangkac gaibong. <sup>2</sup> Iwa galu dongenginengti nganiyebongka Yesule socti hefaliyelu angocinebenang aiwec. Aime haic-mesuine yogo wenac-dongeine ingucne aiwec. Nga ngakpi-kpolucine yogo kwalacne ailu angoc fikecaigac, ingucnehac aiwec. <sup>3</sup> Hei, inguc aime iwahac Moses nga Elaiya yeke fikelu yeholec mingagec aiboc nganicpaibong.

<sup>4</sup> Aime Pitadi Yesu yanguc edowec, “Sugucne, nongileng yagowa gabeng madickegacte ga ngageengka nalic aime fale habackang banang. Gale monic nga Mosesle monic ailu Elaiyale monic.”

<sup>5</sup> Hei, Pitadi inguc edome iwahac kaguwa monic angocineholecti walu somecebawec. Somecebame kaguwa kwelinacni yowa-malac monic yanguc wackelu miwec, “Yogo nale Madec, kwelenedi yele angac ngagegabac. Na ye ngani-angac aicnogabac. Ngenge yele yowa ngagedaing!”

<sup>6</sup> Aime mic-tengteng yenge yogo ngagelu hangocebame himongka wafalu haic-mesungineng sangkeibong. <sup>7</sup> Inguc aibong Yesudi yengela lelu yucebalu yanguc edocebawec, “**Ngenge fangkening, hangoc mi aining.**” <sup>8</sup> Inguc mime yenge dongengineng hilalu ngic monic mi nganiibong, yenge Yesu yeicnac domame nganiibong.

<sup>9</sup> Aime tikiwacni waluhac Yesudi mimacebalu yanguc miwec, “**Ngenge wiyac nganigaing, yogolec siduc ngic-ngigac monic mi edocebadaing. Gacgu Ngicte Madec homackacni gboliyelu fangkedacte, dameng yogowabac midaing.**”

<sup>10</sup> Inguc mime mic-tengtengfocine yengi yanguc uwacnoibong, “Wapongte yefe-yowale wewedu ngic yenge wenucte Elaiyadi molickelu kwesime Mesia lobeina kwesinale micaigaing?”

<sup>11</sup> Inguc mibong yedi yanguc edocebawec, “**Elaiyadi molicke kwesilu wiyac sasawa bame madickedacte hocne.**” <sup>12</sup> Na yanguc edocngebabe ngagening, Elaiya ye biy-achac kwesime yenge mi ngani-motolu yengileng angac balaihelu aibaha sowacne haicine monic-monic aicnolu gaibong. **Ailu yenge Ngicte Madec inguchac doicka lobong doic ngagedacte.**” <sup>13</sup> Inguc mime mic-tengteng yenge biyac ngage-motoibong, Yogo Yoane misa-lowacte miwec.

*Madec alengkolec bamadickewec*

*Mrk 9:14-29; Luk 9:37-42*

<sup>14</sup> Aime yenge tikiwacni walu habu sugucne yengela hike sulumbong ngic monicti Yesula kwesilu ketadi holecnolu yanguc miwec, <sup>15</sup> “Sugucne, ga madecnele kwelegone sowalena. Ye kwele-sifuc damengngine kwesime doic sugucne ngagelu dameng homacne dacka nga misawa haucaigac. <sup>16</sup> Aime madecne mic-tengtengfocine yengela bahikebe yengi ye bamadickenogale ngagebong kpungkeme hegilegabiyeing.”

<sup>17</sup> Inguc mime Yesudi bafaliyelu yanguc edowec, “**Dameng yagolec ngic-ngigac aling yago, ngenge ngage-ngagesingngineng mikacbenang, ailu ngenge aibabangineng kosa-balasaine. Na dameng dalicne ngage-ngagesing mikac ngic-ngigac ngengeholec hatacmac ganogale takicnugac. Ngenge madec yogo bawelening.**” <sup>18</sup> Inguc mime bawelebong Yesudi aleng kpatalacnome ye madec yogo hegilelu hikewec. Hikeme dameng iwahac madec yogo madickewec.

<sup>19</sup> Inguc aime mic-tengtengfocine yenge Yesula kwesilu yengilangkac ngiyelu yanguc uwacnoibong, “Nonge wenucte aleng yogo yebiyenangte aibibiyegabeleng?”

<sup>20</sup> Uwacnobong Yesudi bafaliyelu yanguc edocebawec, “**Foinac, ngenge ngage-ngagesingngineng kpicicnema fagacte kpungkelu hegilegabiyeing. Ngenge ngage-ngagesingngineng kpicicne mastet hucine\* ingucne fangeledecka midec, ngenge kupic yago nalic micnodaingte, ‘Kupic, ga yagowacni fangkelu edi hikec.’ Inguc mibong ye hikedacte. Ailu ngenge wiyac monicte nalic mi kauc badaingte, yogo noine edocngabagabac.**” <sup>21</sup> [Aleng ingucne yebicebanogale nosing-sawe galu mim-ilocti sugu yebiyedaingte.]”†

*Yesudi yeicne homanale hatacmac miwec*

*Mrk 9:30-32; Luk 9:43-45*

<sup>22</sup> Yesu nga mic-tengtengfocine yenge yengilangkac Galili prowinswa kpaduckelu gaebongka yedi yanguc edocebawec, “**Monicti Ngicte Madec balu ngic yengele**

**17:2:** 2P1:16-18    **17:5:** Mige 2:7; Yes 42:1; Mat 3:17; Mrk 1:11; Luk 3:22; Yef 18:15    **17:10:** Mal 4:5    **17:12:** Mat 11:14    **17:13:** Luk 1:17    **17:19:** Mat 10:1    \* **17:20:** Mastet hucine yogo homong hucine ingucne kpicicnebenang. **17:20:** Mat 21:21; Mrk 11:23; Luk 17:6; 1Kor 13:2    † **17:21:** Hibi esecne Mataio kwelengkwec, yogo nganilu iwacni kwelengkebong kwelengkebong ofewec, yengelacni gocne 17:21 iwa mi fagac. Ngic-ngigac yenge hibi kwelengkeicne yogo wosaelu nganibong Mataiodi mi kwelengkwec mecne.

**molewa lodaicte, yogolec dameng bangkalegac.** <sup>23</sup> **Lome yengi ye balu wehomadaingte. Wehomabong hadeng habackang aiyemewa homackacni hatacmac gboliyelu fangkedaicte.**” Inguc mime yenge yogolec kwele-umac sugucne ngageibong.

*Ibu-macte takes*

<sup>24</sup> Aime Yesu nga mic-tengtengfocine yenge Kapeneam taonka hike sulumbong, Wapongte Ibu-mac yogolec takes-baba ngic yengi kwesilu Pita uwacnoibong, “Ngengele wewedu ye Ibu-macte takes locaigac, me?”

<sup>25</sup> Inguc mibong Pitadi miwec, “Oc, locaigac.”

Inguc milu macka felu yowa mi mime Yesudi yanguc uwacnowec, “**Saimon, ga wenuc ngagegic, himongne himongne ngictaufocngineng, yenge takes malacni bacaigaing? Yenge yengileng ngic-ngigacfocngineng, yengelacni bacaigaing, me ngic-ngigac gocne himong monic damongkelu gagaing, yengelacni bacaigaing?**”

<sup>26</sup> Uwacnome miwec, “Yenge ngic-ngigac gocne himong monic baibong, yengelacni bacaigaing.”

Inguc mime Yesudi yanguc miwec, “**Ilec ailu yengileng ngic-ngigacfocngineng yenge takes mi lolu moc gadaingte.** <sup>27</sup> **Aime Ibu-mac yogo nale. Ilec ailu Ibu-macte takes mi lonogale ngagegabac. Aime yenge ngage-sowac mi ainingte ngagegabac. Ilec ga lifuc mecina hikelu misa-sic babale hawic monic wickedamec. Wickelu misa-sic molickelu fuluckedamecte, yogolec mic hauckelu moneng monic bafuwadamecte. Bafuwalu moneng yogo balu nokilec wacka takes-baba ngic yeledamec.**”

## 18

*Madi sugucne aigac?*

*Mrk 9:33-37; Luk 9:46-48*

<sup>1</sup> Dameng iwa mic-tengteng yenge Yesula kwesilu uwacnoibong, “Honocmengte ngani-damong, yogolec alinka madi feicne gagac?”

<sup>2</sup> Inguc uwacnobong Yesudi madec hakim monic wackewec. Wackeme weleme ye hewacnginang lome domame <sup>3</sup> yanguc miwec, “**Foinac, nenge kwelengineng mi bafaliyedaingte ailu adu-madec yago yenge ingucne mi aidaingtewa, honocmengte ngani-damongka nalic mi fedaingte, yogo noine edocngegabac.** <sup>4</sup> **Ilec ailu monic ye hawacnagulu madec yangucne yele silic gadaicte, ye honocmengte ngani-damongka sugucne gadaicte.** <sup>5</sup> **Nga monic ye madec yangucne nale wacka hefolegac, ye na hefolecnugac.**”

*Lokwesacti ngage-ngage basowalecaigac*

*Mrk 9:33-37; Luk 9:46-48*

<sup>6</sup> “**Entacka gocne yengi ngic monic balu balinga sugucne ubeina ubeecnolu kiwec gbolongna wickebong haudaictewa, yele umacine efectedaicte. Aime adu-madec kpiscicne monicti na ngagesingnulu game, ngic yogodi adu-madec ingucne aicnome bikic bafuwadaictewa, Wapongti ye ameine baducnodaicte, yogo umactowaineholec.** <sup>7</sup> **Mee, nenge medecgebadaic. Himongtowa himong yagolec ngic-ngigac, okac ingucne kwopocngebame bikicka wawecaigaing. Ngic monic ye agoine aicnome ngage-ngagesingine wagac, mee ye medeckedaic.** <sup>8</sup> **Ga hige-gone me mole-gone monicti aigeleme bikic bafuwadamectewa, ga yogo helockelu wickeengka hikedaic. Ga hige-mole-gone sasawa buchuchac gacgu dac-sanang moto-motoine mikac, iwa wigubong haudameckale, hige-sowac me hige-mole-sofong galu gaganangka feengka madickedaicte.** <sup>9</sup> **Me ga dongegone monicti sowacne aigeleme bikic bafuwadamectewa, ga dongegone haickelu wickeengka hikedaic. Ga dongegone yaeckanghac ngiyeboc dac-sanangka wigubong haudameckale, dongegone nebocinedi sugu ngiyeme galu gaga-sanangka feengka madickedaicte.**

<sup>10</sup> “**Ngenge adu-madec kpiscicne, yengelacni monic kweledi mi wickedaing. Na yanguc edocngehabe ngagening, angelo yenge honocmengka galu adu-madec nganicebacaigaing, yenge damengsoc Mamacne honocmengka gagac, yele haicka gacaigaing.** <sup>11</sup> **[Aime Ngicte Madec ye ngic-ngigac sangkeicne, yenge bikickacni kpducebalu bacebanale wawec.]”\***

17:22: Mat 16:21 17:24: Wah 30:13; 38:26 18:1: Luk 22:24 18:3: Mat 19:14; Mrk 10:15; Luk 18:17 18:5: Mat 10:40; Luk 10:16; Yoa 13:20 18:8: Mat 5:29-30 18:10: Hib 1:14 \* 18:11: Hibi esecne Mataio kwelengkewec, yogo nganilu iwacni kwelengkebong kwelengkebong ofewec, yengelacni gocne 18:11 iwa mi fagac. Ngic-ngigac yenge hibi yogo kwelengkeicne yogo wosaelu nganibong Mataiodi mi kwelengkewec mecne. 18:11: Luk 19:10

*Lama sangkeicnele nangeng yowa*  
Luk 15:3-7

<sup>12</sup> “Ngic monic ye lamafocine 100 bacebalu game, iwacni monic sangkeme ye wenuc aidaicte? Ye lamafocine 99 kupicka hegilecebame domabong hikelu sangkeicne, yogo hocne basackedaicte. <sup>13</sup> Basackegacgu bafuwalu beliyedaicte. Foinac, 99 sasawadi mi sangkeibong, yengele efecnemac beliyedaicte. Nga monic sangkeicne, yelebac beliyebenangkedaicte, yogo noine edocngebagabac. <sup>14</sup> Aime Mamacngineng honocmengka gagac, ye ingucnehac adu-madec kpisicne ingucne, yengelacni monicti mi sangkenale ngagelu gagac.”

*Sowacne bamadickenoga*

<sup>15</sup> “Ngic hae-gbagone monicti gala bikic bafuwadaictewa, ga hikelu yeholec ngekilackac ngiyelu sowacne hewacnginac fagac, yogo mifuwacnodamec. Aime ye yowagone ngagedaictewa, hatacmac gale ago aidaicte. <sup>16</sup> Nga ye yowagone mi ngagedaictewa, ga ngic moniyang me yaeckang bacepaengka hatac kwesilu ngengilangkac umac yogo mibong madickenale mingagec aidabiyeng. Inguc ailu ngic yaeckang me habackangti yowa sasawa mibong sanangkedaicte.

<sup>17</sup> “Aime ye yowangineng mi ngagedaictewa, ngenge hikelu Yesule habu edocebadaing. Edocebabong ye habu yengele yowa inguchac hegiledaictewa, ibac ngagedaing, ngic yogo ye Wapong mi ngagegac ailu takes-baba ngic, yenge ingucne aidaic.

<sup>18</sup> “Foinac, ngenge himongka wiyac sasawa hefedaingte, yogo honocmengka inguchac hefeicne fadaicte. Nga ngenge himongka wiyac lukeyackedaingte, yogo honocmengka inguchac lukedaingte, yogo noine edocngebagabac. <sup>19-20</sup> I yangucte, himong yagowa ngic-ngigac yaeckang me habackangti nale wacka kpaduckelu ngiyedaingtewa, na hewacnginang gadacte. Ilec ngengelacni yaeckangti kwelemoniyang ailu wiyac monicte me monicte uwadabiyectewa, Mamacne honocmengka gagac, ye ngageyetelu wiyac yogo yetedaicte, yogo noine edocngebagabac.”

*Sowacne hegilenoga*

<sup>21</sup> Aime Pitadi Yesula welelu yanguc uwacnowec, “Sugucne, ngic hae-gbanedi nala bikic bafuwadaictewa, dameng edomeng sowacneine hegilecnobe ngagegic? Alecine 7 andoine aigac, me?”

<sup>22</sup> Inguc mime Yesudi bafaliyelu yanguc edowec, “Alecine 7 miyac, alecine 70 domalu fegac, yogolec migabac.

<sup>23</sup> “Aime honocmengte ngani-damong yogo ngictau monic ngic homacne yengele sugucnengineng, ye ingucne gawec. Aime yedi kwelec kwekwe ngic yengi yela monengnineng ameine baduningte damengnineng lowec. <sup>24</sup> Lome kwesibong amengineng wowosae bole bawec. Molickelu ngic monic ye talant moneng sugucne ameine 10 taosen, yogolecsoc facnowec, ngic yogo yela baweileibong.† <sup>25</sup> Aime ye ameine yogo badunale ngageme kpungkeme, sugucnedi mime ngic yeicne nga ngigac adu-madecfocine yenge ngic monicta salecebame ngic yedi fuli bacebadaicte. Ailu wiyacine sasawa momoc saleyackelu, yogodi moneng balu ameine yogo badume miyac ainale miwec.

<sup>26</sup> “Inguc mime kwelec kwekwe ngic ye yogo ngagelu sugucneinele haicka ketadi holecnolu miwec, ‘Sugucne, ga nale kwelegone sowaleme wangepne gaengka amegone badugeledacte.’ <sup>27</sup> Inguc mime sugucnedi yele kweleine sowaleme ameine hegilewec. Ye umacine baickelu saleme hikewec.

<sup>28</sup> “Aime kwelec kwekwe ngic ye lobina hauwec. Haulubac kwelec kwekwe ngic agoine monic yela tofa moneng‡ 100 facnowec, ye bafuwawec. Bafuwalu ye hobalu ubeine bauckenale balu miwec, ‘Nale tofa gala fagac, yogo ameine biyac badunelec.’

<sup>29</sup> “Inguc mime kwelec kwekwe ngic agoinedi yogo ngagelu yele haicka ketadi holecnolu dogbac aicnolu yanguc miwec, ‘Folo mi ainelec. Ga nale kwelegone sowaleme wangep gaengka tofagone yogo ameine lobewa badugeledacte.’

<sup>30</sup> “Inguc mime agoinedi yele yowale takickeme tofainele ameine yogo baduyackelubac wanale balu muc-macka lome ngiyewec. <sup>31</sup> Ngiyeme kwelec kwekwe ngic agofocngineng gocne yenge aibaba yogo nganilu kwelengineng homacne sowaleme

18:15: Luk 17:3; Gal 6:1    18:16: Yef 19:15; Yoa 8:17    18:18: Mat 16:19; Yoa 20:23    18:19-20: Mrk 11:24; Yoa 15:7    18:22: Luk 17:4    † 18:24: Grik yowawa moneng yogo wacine talant. Talant moneng moniyang yogo hifa 15te bole-fuli.    ‡ 18:28: Denarius yogo Roma yengele moneng monicte wacine. Yesule damengka denarius moniyang yogo hadeng moniyangte fulli ailu gawec.

ngagebong nalic mi aiwec. Aime yenge hikelu aibaba fikewec, yogo sasawa sugucnengineng edoibong.

<sup>32</sup> “Edobong sugucnenginengti kwelec kwekwe ngic yogo micnome weleme edolu miwec, ‘Ga kwelec kwekwe ngic sowacnebenang. Ga nani dogbac aigelehe ketadi holeneleengka tofagone sasawa hegileiba. <sup>33</sup> Ailu na gale kwelene sowaleme tofagone hegileiba, ga ingucnehac kwelec kwekwe ngic agogonele kwelegone inguchac sowaleme tofagonele ameine hegiledengtesoc.’ <sup>34</sup> Inguc milu sugucneinedi aalic ngagelu ngaba aicnolu muc-mac damong yengele molewa lowec. Lome kwelec kwekwe ngic yogo ye tofaine yogo sasawa ameine baduyackelubac wanale micnowec.

<sup>35</sup> “Aime ngenge sasawadi ngic hae-gbafocngineng yengele sowacne kwelengingentibenang mi hegiledaingtewa, Mamacne honocmengka gagac, yedi silicine ingucnehac ngenge aingeledaicte.”

## 19

*Ngawe-ngigac gocnedi hegilecnagucaigaing*

*Mrk 10:1-12; Luk 16:18*

<sup>1</sup> Yesu ye yowa yogo miyackeme motome Galili prowins hegilelu Yudeya himongka Yodan misa nebocina hikewec. <sup>2</sup> Hikeme ngic-ngigac habu sugucnebenangti ye balaibebong yedi ngic-ngigac hucnginengkolec iwa bamadicebawec.

<sup>3</sup> Aime Farisaio yenge yela kwesilu kwesackeningte yanguc uwacnoibong, “Ngic monic ye ngigacine wiyac kpisicnele hegilenale, yogolec yefe fagac, me?”\*

<sup>4</sup> Inguc mibong Yesudi bafaliyelu yanguc edocebawec, “**Mime Fike-fike fileinedi molickelu mime**

**‘Ngic nga ngigac fikeiboc, inguc bafuwacepawec.’**

*(Fike 1:27; 5:2)*

**Ngenge yogo wafe-ngagec aicaigaing. <sup>5</sup> Ye bafuwacepalu yanguc miwec,**

**‘Ilec ailu ngic ye nenggac-mamackecine hegilecepalu ngigacineholec wetackelu yeholec soc moniyang aidabiyecte.’**

*(Fike 2:24)*

<sup>6</sup> **Inguc aidabiyectewa, yeke hatacmac yaeckang mi aigaic, yeke soc moniyang aigaic. Ilec ailu Wapongti wetacepawec, yogo ngicti mi welockedaic.”**

<sup>7</sup> Inguc mime yanguc miibong, “Aime wenucte Mosesdi ung-yowa yanguc nolewec? Ngic monicti ngigac hegilenogale hibi kwelengkelu ngigac lacnome ngigac ye ngic yogo hegilelu hikedaic.”

<sup>8</sup> Inguc mibong Yesudi yanguc miwec, “**Ngenge ngic kwelengineng fongkeicne. Ilec ailu Mosesdi ngigacocngineng hegilecebaningte aka mi lowec. Aime molickelu ofeicne iwa yefe ingucne monic mi fawec. <sup>9</sup> Na yanguc edocngebabe, ngic monicti ngigacine selo-boic aibaba mi aiymewa ye moc hegilelu ngigac monic badaicte, ngic yogo ye selo-boic aibaba aidaicte.”**

<sup>10</sup> Inguc mime ngagelu mic-tengtengfocine yengi yanguc miibong, “Ilec ailu ngawe-ngigac mi ailu adu-madechac domalu momoc mi ganoga, yogodibac madickedaidaicte.”

<sup>11</sup> Inguc mibong Yesudi yanguc edocebawec, “**Ngengele yowa ngic gocne mi bal-aibedaingte. Wapongti ngic inguc baficebame yengi sugu ngawe-ngigac mi aidaingte. <sup>12</sup> Ngic gocne yenge nenggac kwelewacni hufing fikeibong. Nga gocne yenge ngicti aibaba aiyelebong hufing aiibong. Nga ngic gocne yenge honocmengte ngani-damongte ailu hufing ingucne gacaigaing. Ngic monic ye yowa yogo ngagelu banogale nalic ye yowa yogo badaic.”**

*Adu-madec mimi-madic milu edocebawec*

*Mrk 10:13-16; Luk 18:15-17*

<sup>13</sup> Aime ngic-ngigac yenge adu-madecfocngineng kpisicne Yesula bacebalu hikebong, yedi moledi adu-madec feinginang lolu milockenale ngegebong. Inguc aibong mic-tengtengfocine yengi ngelengkelu edocebaibong.

<sup>14</sup> Aime Yesudi yanguc miwec, “**Adu-madec kpisicne yenge nala nalic kwesin-ing. Ngenge aka mi holeyelening. Honocmengte ngani-damong yogo adu-madec kpisicne yangucne yengele.**” <sup>15</sup> Inguc milu moleine feinginang lolu mimi-madic milu edocebame motome ye mac-himong yogo hegilelu monicka hikewec.

**18:34:** Mat 5:25-26    **18:35:** Mat 6:15; Mrk 11:25; Efs 4:32; Kol 3:13    \* **19:3:** Yuda ngic-ngigac gocne yenge ngagebong ngigac ye selo-boic aibaba aiwec, yogo sugu ye nalic ngigac hegiledaicte. Nga Yuda ngic-ngigac gocne yenge ngagebong ngigac ye wiyac kpisicnele aiwec, yogo nalic ngigac hegiledaicte. Ilec ailu Farisaio yenge uua yogo lokwesacka loibong.    **19:5:** Efs 5:31    **19:7:** Yef 24:1-4; Mat 5:31    **19:9:** Mat 5:32; 1Kor 7:10-11    **19:14:** Mat 18:2-3



*Ngic moneng-mafatowaineholec*

*Mrk 10:17-31; Luk 18:18-30*

<sup>16</sup> Aime ngic monicti Yesula kwesilu miwec, “Wewedu, na aibaba madicne wenuc ailu gaga-sanang badacte?”

<sup>17</sup> Inguc mime yedi yanguc miwec, “**Ga omale aibaba madicnele uwanelegic? Wapong moniyangti sugu madicne gagac. Aime ga gaga-sanangka fenogale milu Wapongte ung-yowa balaibedamec.**”

<sup>18</sup> Inguc mime yanguc miwec, “Ung-yowa weni yogo balaibenogale migic?”

Inguc mime Yesudi yanguc miwec,

“**‘Ga ngic-ngigac mi wehomacebadamec. Ailu selo-boic aibaba mi aidamec. Nga hise mi badamec. Ailu micka lolo mi aidamec.** <sup>19</sup> **Ga nenggac-mamackecgone alang bayetedamec.’** *(Wah 20:12-16; Yef 5:16-20)*

**‘Ailu gageicne aigelecaigac, silicine ingucnehac ngic-ngigac gale emewa gagaing, yengele kwelegonedi ago aiyelelu angac ngageyelelu gadamec.’** *(Dep 19:18)*

<sup>20</sup> Inguc mime soc-gboli madec yedi miwec, “Na yogo sasawa balaibecaigabac. Aime oma wiyacka kpungkegabac?”

<sup>21</sup> Mime Yesudi yanguc edowec, “**Ga ngic dondonnebanang ganogale ngagegicka ingucne, yanguc ainong, ga hikelu wiyacgone sasawa saleyackelu moneng balu ngic-ngigac waweweine gagaing, yogo yeledamec. Inguc aiyangka wiyac madicne honocmengka fikegeledaicte. Aime welelu na balaibecnudamec.**”

<sup>22</sup> Inguc mime soc-gboli madec yogo ye moneng nga woc-wiyacine bocyac facnowecte, yowa yogo ngagelu kweleine umaleme hikewec.

*Honocmengte ngani-damong nga himongte moneng-mafa*

<sup>23</sup> Hikeme Yesudi mic-tengtengfocine yanguc edocebawec, “**Foinac, monic moneng nga woc-wiyacineholec ye honocmengte ngani-damong kwelina fenogale aidaicte, yogo boleine sugucnehac, yogo noine edocngebagabac.** <sup>24</sup> **Ailu hatacmac edocngebabe, kameldi bungic yefina fedaicte, yogo boleine sugucne. Nga moneng nga woc-wiyackolec yedi Wapongte ngani-damongka fenogale aidaicte, yogodibac boletowaine sugucnehac.**”

<sup>25</sup> Inguc mime mic-tengteng yenge yowa yogo ngagelu kwatackelu medecebame yanguc miibong, “Inguc aime madi nalic wasecne aidaicte?”

<sup>26</sup> Inguc miibong Yesudi dongeine yengela hilalu yanguc miwec, “**Ngic-ngigac yengileng aibabanginengte ailu yogowa aibibiyelu hegiledaingte. Nga Wapongtibac wiyac sasawa yogo nalic aidaicte.**”

<sup>27</sup> Inguc mime Pitadi yanguc miwec, “Ngagegic, nonge woc-wiyacnonggeng sasawa hegilelu ga balaibecgulu gagabeleng. Ilec nonge oma wiyac badabelengte?”

<sup>28</sup> Inguc mime Yesudi yanguc edocebawec, “**Foinac, gacgu wiyac sasawa gbol-icne fikedaicte, dameng iwa Ngicte Madec ye honocmengte tapili nga hibi-angocineholecti ngictaule ngiye-ngiyewa ngiyedaicte. Aime ngic balaibecnuc-icaigaing, nenge inguchac ngictaule ngiye-ngiye 12 iwa ngiyelu Israel yengele ngambofocngineng 12 fagaing, yengele aibabangineng wosaclu mimoctodaingte, yogo noine edocngebagabac.** <sup>29</sup> **Aime ngic-ngigac nale wacte ailu macfocngineng me ngic hae-ghafocngineng me sengfocngineng me nenggac-mamacfocngineng me adu-madecfocngineng me himongngineng hegileibong. Wiyac yogolec ameine nenge sasawadi 100 hatacmac badaingte. Ailu Sugucnedi gaga-sanang yeledaicte.**

<sup>30</sup> **Ngic molic-molic gacaigaing, yengelacni homacnedi lobeine aidaingte. Nga lobeine gacaigaing, yengelacni homacnedi molic-molic aidaingte.**”

## 20

*Waing bole-babale ngic*

<sup>1</sup> “**Honocmengte ngani-damong yogo ngic monic mac-himongngineholec, silicine yogolecsoc. Ye 6 kilok ubiyacte hikelu waing bolewa bole baningte ngic bacebawec.**

<sup>2</sup> **Bacebame bole-ngic yenge hadeng moniyangte moneng moniyang baningte min-gagac ailu kwele-moniyang aiibong. Aime salecebame bolewa hikeibong.**

<sup>3</sup> “**Aime 9 kilok aiyemewa waing bolele fileinedi ngic gocne maket sobengka moc domabong nganicebalu** <sup>4</sup> **yanguc edocebawec, ‘Nenge inguchac nale waing bolewa hikelu bole babong, bolele moneng yogolec silicina ngeledacte.’** <sup>5</sup> **Inguc mime yenge waing bolewa hikeibong.**

“Aime ye 12 kilok nga 3 kilok aiyemewa aibaba ihac aiwec. <sup>6</sup> Aime 5 kilok aime ye hatacmac hikelu ngic gocne inguchac moc domabong bafuwacebalu yanguc edocebawec, ‘Ngenge omale moc domabong mac awelenogale aigac?’

<sup>7</sup> “Inguc mime yanguc miibong, ‘Monicti bole-yowa monic mi nolegac.’

“Inguc mibong yanguc edocebawec, ‘Ngenge inguchac hikelu nale waing bolewa bole badaing.’

<sup>8</sup> “Mac aweleme bole fileinedi bole-damong yanguc edowec, ‘Ga bole-madec wacebaangka welebong bolele fuli yelenong. Ailu ngic lobe kwesigaing, yenge molickelu yeledamec, hikegacgu molic-molic kwesigaing yengela motodaicte.’

<sup>9</sup> “Inguc mime bole-damongti ngic 5 kilok aiyemewa kwesibong, yenge molickelu hadeng moniyangte moneng moniyang, inguc yelewec. <sup>10</sup> Yeleme ngic molickelu kwesibong yengi yanguc ngageibong, ‘Ye moneng sugucnehac felu noledaicte,’ inguc ngageibong. Aime bole-damongti molic-molic ngic moneng yelewec, silicine ingucnehac ngic lobe kwesibong, yogo yelewec. <sup>11</sup> Yeleme yenge moneng yogo silicine nganilu ngagebong nalic mi aime, waing bole fileine <sup>12</sup> yanguc edoibong, ‘Ngc yago yenge lobebenang kwesilu mac aweleme bole bagaing. Nga nongibac ubiyactebenang kwesilu doic-bole umacineholec wenacka domalu balu gabeng mac awelegac. Aime ga yengeholec momochac moneng silicine moniyang nolegic.’

<sup>13</sup> “Inguc mibong yedi yengelacni monic yanguc edowec, ‘Agone, na sowacne monic mi hafuwagabac. Ngagegic, nokilec molickelu moneng moniyang yogolecsoc mipangkulu kwele-moniyang aigabelec. <sup>14</sup> Ga ilec monenggone balu hikenong. Aime na angacnedi bole-madec lobe kwesigaing, yenge fuli sockahac yelenogale ngagegabac. <sup>15</sup> Aime na aibaba madicne aibe, yogolec hasowac aigic, me? Naneicne monengti inguc me inguc ainogale ngagelu, yogo nalic aidacite.’

<sup>16</sup> “Silicine ingucnehac lobe yengi molic-molic aidaingte. Nga molic-molic yengi lobeine aidaingte.”

*Yesudi homanogale edocebame alecine habackang aiwec*

*Mrk 10:32-34; Luk 18:31-33*

<sup>17</sup> Yesu nga mic-tengtengfocine 12 yenge Yerusalem fenogale hikelu yefewa yengilangkac mengoceba-lelu yanguc edocebawec, <sup>18</sup> “Ngagegaing, nongileng Yerusalem hikegabeng. Hikelu fenoga iwa ngic yengi Ngicte Madec balu depec-baba ngic micne nga Wapongte yefe-yowale wewedu ngic, yengele molewa lodaingte. Lobong yengi ye homanale mimoctodaingte. <sup>19</sup> Mimoctobong ye Israel yengele alingkacni miyac, yengele molewa lodaingte. Lobong yengi ye yowa kwekwe aicnolu muc-huduli weli malicpongka webong homadaicte. Aime hadeng habackang aiyemewa homackacni hatacmac gboliyelu fangkedaicte.”

*Honocmengte ngiye-ngiye*

*Mrk 10:35-45*

<sup>20</sup> Aime Sebedi madeckecine yeke nenggacnginecti bacepame Yesula kwesibong. Kwe-silu nenggacnginecti Yesu ketadi holecnolu miwec, “Na wiyac monicte nalic uwageledacite, me?”

<sup>21</sup> Inguc mime, Yesudi miwec, “**Ga oma wiyacte aigelegac?”**

Mime yanguc miwec, “Madeckecne yago yeke ngani-damonggona monicti folegona nga monicti kanagona ngiyedabiyecte. Yogolec milocgugabacte aihomayetadamec.”

<sup>22</sup> Inguc mime Yesudi yanguc miwec, “**Ngenge wiyac uwagaing, yogolec fungine mi ngage-motogaing. Aime na doicte kwenoc kap iwa nonogale aigabac, ngeke yogo momoc nonicte migabiyece, me?”**

Mime yeki miiboc, “Oc, nalic nodabelecte.”

<sup>23</sup> Yeke inguc miboc Yesudi yanguc edocepawec, “**Na doicte kwenoc kap iwa nodacte, ngeke ihac nodabiyecte. Aimebac madi folena me kanana ngiyedacite, yogolec noinebac nani nalic mi mimoctodacte. Mamacnedi mac ngiye-ngiye yogo ngic weni yogo yekele biyachac bamockewec, yeki sugu iwa ngiyedabiyecte.**”

*Micnedi kwelec ganoga*

<sup>24</sup> Aime mic-tengtengfocine 10 yenge yowa yogo ngagelu, ngic hae-gba yekele kwele-dac ngageyeteibong. <sup>25</sup> Ngagebong Yesudi mic-tengtengfocine 12 wacebame lebong yanguc edocebawec, “**Israel yengele alingkacni miyac, yengele micnefocngineng yenge ngic-ngigac yengele ngagebong wawaine aicaigac. Ailu yengileng ngagebong feicne aigac. Aime sugucnefocngineng yenge tapili fayelegacte ngic-ngigacfocngineng**

**yenge yowangineng balaibecaigaing, ngenge yogo ngagegaing.** <sup>26-28</sup> **Aime aibaba ingucne ngengele hewacka monic mi fikedaic, miyac. Ngic-ngigac yengi Ngicte Madec bafickenigte mi wawec, miyac. Yebac yenge baficebalu ngic-ngigac homacne yengele ailu gagaine hegilelu fuli hacebanale wawec. Ingucnehac ngengelacni monicti feicne ganogale ngagelu, ye ngengele hewacka mole-baficngineng gadaic. Aime ngengele hewackacni monicti molic-molic ainogale aicnome, ye sasawa ngengele kwelec kwekwe gadaic.”**

*Donge-pisic bamadicepawec*

*Mrk 10:46-52; Luk 18:35-43*

<sup>29</sup> Yesu nga mic-tengtengfocine yenge Yeriko taon hegilelu hikebong, ngic-ngigac habu sugucnebenangti balaibecebaibong. <sup>30</sup> Hei, yefe mecina ngic donge-pisic yaeckangti ngiyeboc. Ngiyeboc ngic-ngigac yengi miibong, “Yesu kwesilu hikegac.”

Inguc miibong yeke yogo ngagelu aukwelu yanguc miiboc, “Sugucne, Dawidile fikesaweckacni, ga nokele kwelegone sowalena.”

<sup>31</sup> Inguc wackeboc ngic-ngigac habitowa yengi yeke waickelu ngiyenicti kpatalayeteibong. Aime yeke hatacmac sanangnehac wackeboc, “Sugucne, Dawidile fikesaweckacni, ga nokele kwelegone sowalena.”

<sup>32</sup> Wackeboc Yesudi domalu wacepalu yanguc miwec, **“Ngeke nani oma wiyac aingetebele ngagegabiye?”**

<sup>33</sup> Mime yeki yanguc miiboc, “Sugucne, noke dongenonggec hilanacte ngagegabelec.”

<sup>34</sup> Inguc miiboc Yesu ye kweleine sowaleme mole di dongenginec bauwame yeke iwahac dongenginec hilalu ye balaibeiboc.

## 21

*Donggi feina ngiyewec*

*Mrk 11:1-11; Luk 19:28-40; Yoa 12:12-19*

<sup>1</sup> Yesu nga mic-tengtengfocine yenge hikecgu Yerusalem bangkalelu Betfage machimongka Oliwa kupic ngiyewec, iwa hike sulumeibong. Ailu Yesudi mic-tengtengkecine yaeckang yanguc milu salecepawec, <sup>2</sup> **“Ngeke dondonne hikelu mac-aling yefe molic-molicka ngiyegac, iwa donggi monic biyachac witickeicne nganidabiyecte. Ye madecineholec witickeicne domagac. Ngeke hikelu donggi yogo bafuwalu mucine lukelu nala balu kwesinic.** <sup>3</sup> **Aime ngeke inguc aiyebocka monicti nganicngepalu uwangetedaictewa, ngeke yanguc edodabiyec, ‘Sugucnedi donggi yekeholec bole banogale migac.’ Inguc miiboc ye donggi nenggac-madec hegilecepame ngekeholec kwesidabiyecte.”**

<sup>4</sup> Siduc-mimi ngicti yowa monic yanguc miwec, yogo noine ainale inguc fikewec, yedi yowa yanguc miwec,

<sup>5</sup> “Ga Sion adu-madecfocine yanguc edocebac, ‘Nganining, ngictaungineng welegac. Ye donggiwa welegac, ye donggi madecinele feiwa ngiyegac ailu ye wacine mikac ingucne welegac.’” *(Sek 9:9)*

<sup>6</sup> Aime mic-tengteng yeke hikelu Yesudi edocepawec, yogo hocne aiiboc. <sup>7</sup> Inguc ailu donggi madecineholec bacepalu kwesi ngakpinginec dalicne hemoctolu donggi nenggac-madec yekele feinginac lumackeboc. Lumackeboc Yesu ye yogolec feiwa ngiyewec.

<sup>8</sup> Ngiyeme ngic-ngigac habitowa domaibong, yenge ngakpingineng dalicne hemoctolu yefewa lumackebong. Nga gocne yenge yoc mangngine hekengngineholec welockelu yefewa lumackebong. <sup>9</sup> Aime ngic-ngigac habitowadi molickelu hikeibong nga lobeina balaibeibong, yengi aukwelu yanguc miibong,

“‘Asec, Dawidile fikesaweckacni, Ngic Sugucnele wacka welegac, ye mimi-madicineholec.’” *(Mige 118:26)*

Sawawa wilini wacine feicne mitengkegaing, asec.”

<sup>10</sup> Yesu ye Yerusalem feme taonka ngic-ngigac sasawa yenge kwatackelu lec-welec ailu yanguc miibong, “Yogo madi?”

<sup>11</sup> Inguc miibong ngic-ngigac habitowa yengi edocebalu yanguc miibong, “Yogo Yesu, siduc-mimi ngic hocne ye Galili prowins iwa Nasaret taon fagac iwacni.”

*Lanac-ganac ailu gabongyebicebawec*

*Mrk 11:15-19; Luk 19:45-48; Yoa 2:13-22*

<sup>12</sup> Aime Yesu ye Wapongte Ibu-macte oda kwelina fewec. Felu ngic wiyac salelu gaibong, yenge yogowacni yebicebawec. Ye ngic monengngineng lanac-ganac aiibong, yengele tebo

bafaliyewec. Ailu tudiling nango saleibong, yengele mac ngiye-ngiye bafaliyelu <sup>13</sup> yanguc edocebawec, **“Yowa yanguc kwelengkeicne fagac, ‘Nale Ibu-mac yagodi mimilocte mac, wacine inguc wackenoga.’”** (Yes 56:7)

**Aime ngengibac yogo bafaliyebong, ‘Hise-baba ngic yengele sangke-sangke mac aigac.’”** (Yer 7:11)

<sup>14</sup> Aime Ibu-macte oda sugucne kwelina ngic donge-pisic ailu hige-sowac yenge yela kwesibong yedi hamadicebawec. <sup>15</sup> Ye pasi tapiliineholec inguc bawec aime adu-madec yenge Ibu-mac kwelina wackelu yanguc miibong, “Asec, Dawidile fikesaweckacni.”

Inguc wackebong depec-baba ngic micne nga Wapongte yefe-yowale wewedu ngic yenge yogo nganilu aalic ngagelu <sup>16</sup> Yesula lelu yanguc miibong, “Yenge yowa migaing, yogo ngagegic, me?”

Inguc miibong yedi yanguc miwec, **“Ngagegabac, ailu ngenge yowa yogo hocne wafengagec mi aicaigaing, me? Yowa yanguc kwelengkeicne fagac, ‘Ga adu-madec kpisicne nga kocog amuckacni gagaing bole-yowa yeleng yengi gale wac sugucne mitengkedaingte.’”** (Mige 8:2)

<sup>17</sup> Inguc milu yenge hegilecalu taon hegilelu Betani himongka hikelu debocka iwa gawec.

*Fikyoc yowa edowec*

*Mrk 11:12-14; 11:20-24*

<sup>18</sup> Aime Yesu ye ubiyacte Yerusalem taonka hikenale hefaliye hikelu nosingte homalu <sup>19</sup> yefe mecina donge hilalu fik yoc monic nganiwec. Nganilu ngageme noineholec ingucne aime fungina lelu nganime hekenngine sugu aime, yoc yogo yanguc edowec, **“Yoc, ga noine hatacmac mi aidamec.”** Inguc mime fik yoc iwahac homanale ululuwewec.

<sup>20</sup> Ululuweme mic-tengtengfocine yengi yogo nganilu kwatackelu uwacnoibong, “Fik yoc yogo wenuc ailu biyachenang ululuwegac?”

<sup>21</sup> Inguc milu uwacnobong Yesudi yanguc edocebawec, **“Foinac, ngenge ngagenngesingnginengkolec galu ngageboc mi aidaingtewa, yocka pasi bagabac, pasi yogo nalic badaingte, yogo noine edocngabagabac. Ailu yogo sugu miyac, ngenge kupic yagolec inguchac yanguc nalic midaingte, ‘Kupic, ga baickelu geuctihac kiwecka haunong.’ Ngenge inguc edobong, kupic ye inguc hocne aidaicte. <sup>22</sup> Ailu ngenge wiyac monicte ngagesingkelu mimilocnginang lolu uwadaingte, ngenge yogo sasawa badaingte.”**

*Yesule bole-hibi*

*Mrk 11:27-33; Luk 20:1-8*

<sup>23</sup> Yesu ye inguc milu taonka hikelu Ibu-macka felu wewedu bole bawec. Bame depec-baba ngic micnefocngineng nga Yuda ngic-ngigac yengele damongfocngineng, yengi yela kwesilu yanguc uwacnoibong, “Ga oma tapiliwa bole yogo bagamec? Ailu madi bole-yowa tapiliineholec yogo gelewec?”

<sup>24</sup> Inguc uwacnobong yedi yowangineng bafaliyelu yanguc edocebawec, **“Na yowa monic uwangelebe ameine edocnudaingtewa, na bole-yowa tapiliineholec fungine ingucnehac edocngabadacte. <sup>25</sup> Yoanedi misa-lowac bole balu gawec, bole-yowa tapiliineholec yogo wenuwacni, yogo honocmengkacni me ngickacni?”**

Inguc mime yenge yengilangkac mingagec ailu yanguc miibong, “Nongileng wenuc midabelengte? ‘Yogo honocmengkacni’ inguc midabelengtewa, ye yanguc uwanoledaicte, ‘Inguc ngagelubac ngenge omale ye mi ngagesingkeibong?’” <sup>26</sup> Me ‘ngickacni,’ inguc midabelengtewa, ngic-ngigac sasawa yenge Yoane ye Wapongte siduc-mimi ngic noine, inguc ngagegaining, yogo minogale yengele hangocnubadaic.”

<sup>27</sup> Ilec yengi bafaliyelu Yesu yanguc edoibong, “Yogo mi ngagegabeleng.”

Inguc miibong Yesudi yanguc edocebawec, **“Inguc migaingte, na inguchac male bole-yowa tapiliineholec bole balu gagabac, yogo nalic mi edocngabadacte.”**

*Madec yaeckangte nangeng yowa*

<sup>28</sup> Milu taockelu depec-baba ngic micnefocngineng nga Yuda ngic-ngigac micnefocngineng yowa yanguc milu edocebawec, **“Ngagegaing, ngic monic ye madeckecine yekeholec gaibong. Aime ye molic-molic madecinela hikelu yanguc edowec, ‘Madecne, ga yakumac waing bolewa hikelu bole badamec.’”**

<sup>29</sup> **“Inguc edome madecinedi bafaliyelu yanguc miwec, ‘Na takicnugac,’ inguc miwec. Ailu hatacmac kweleine hefaliyeme bolewa hikewec.”**

<sup>30</sup> “Aime mamac ye hikelu madecine kpisicne ye inguchac edome madecine kpisicnedi miwec, ‘Mamac, na nalic hikedacte.’ Inguc milu gacgu kpaoma ailu bolewa monic mi hikewec.

<sup>31</sup> “Ilec ngenge wenuc ngagegaing, madec yekelacni madi mamacinele angac balaibelu boleine bawec?”

Micweningenti inguc uwayeleme miibong, “Molic-molic madecine yedi.”

Mibong Yesudi yanguc edocebawec, “Foinac, takes-baba ngic nga yefe-ngigac yengi molickengelelu Wapongte ngani-damongka fedaingte. <sup>32</sup> Yoane ye yefe dondonne balaibelu ngengela kwesime ngengi ye mi ngagesingkeibong. Aime takes-baba ngic nga yefe-ngigac yengi ye ngagesingkeibong. Ngengebac yogo nganiibong. Ailu sifu kwelengineng mi hefaliyeibong, ailu mi ngagesingkeibong.”

*Waing bolele damong sowacne*

*Mrk 12:1-12; Luk 20:9-19*

<sup>33</sup> “Na nangeng yowa monic holelu mibe ngagening. Ngic monic mac-himongngineholec ye waing bole gbolicne monic duwelu oda hefewec. Hefelu waing hesoc-hesoc long faliwec. Falilu damong yengele donge hila-hilale mac-dale monic bawec. Inguc bame motome waing bole damongkeningte ngic gocne bafuwacebalu yengeholec yowa milu hefewec. Ailu yeicnebac himong dalicka hikewec. <sup>34</sup> Hikelu gacgume waing noine babale dameng weleme, ye kwelec kwekwefocine salecebame bole-damong yengelacni yeicne noine banogale hikeibong.

<sup>35</sup> “Hikebong bole-damong yengi waing fileinele kwelec kwekwefocine bacebalu monic dobo welu monic wehomaibong. Nga monic posadi holeibong. <sup>36</sup> Inguc aibong bole fileinedi kwelec kwekwe gocne homacne hatacmac salecebame hikebong, bole-damong yengi aibaga ingucnehac aiyeleibong. <sup>37</sup> Aime yogolec lobein-abac, bole fileinedi yanguc ngagelu yeicne madecine salewec, ‘Yenge madecnebanangbac alang hacnodaingte.’

<sup>38</sup> “Inguc milu saleme hikeme bole-damong yengi madecine nganilu mingagec ailu yanguc miibong, ‘Yedi gacgu bole yago bame yeicne aidaicte. Ilec ngenge kwesibong wehomalu yele himong nga mole-damoc sasawa baebengka nongileng aidaic.’ <sup>39</sup> Inguc milu bole fileinele madecbenang yogo fuluckelu wickebong waing bole lobina haume balu wehomaibong.

<sup>40</sup> “Aime bole fileine ye hatacmac kwesilu bole-damong yengele wenuc aiyeleidaicte?”

<sup>41</sup> Inguc mime depec-baba ngic micnefocngineng nga Yuda ngic-ngigac micnefocngineng, yengi miibong, “Bole fileine ye kwesilu damong sowacne basowalecebalu wehomacebadaicte. Ailu waing bole yogo bole-damong gocne yengele molewa lodaicte. Lome yengi bole yogo damongkelu noine baba damengka fileine nebocine lacnodaingte.”

<sup>42</sup> Inguc mibong Yesudi yanguc miwec, “Wapongte hibiwa yowa yanguc kwelengkeicne fagac,

‘Mac-baba ngic yenge posa monic sowacne milu wickeibong. Aime posa yogodi macte posa-bosing sanangne ailu domadaicte. Sugucne yeuctihac pasi yogo bame ngicti ngani-angac aidabelengte.’

*(Mige 118:22-23)*

Ngenge hibi yogo wafe-ngagec mi aicaigaing, me?

<sup>43</sup> “Ilec ailu yanguc edocngebabe, Wapongti ngani-damong ngengelacni baickelu aling monic yeledaicte. Aime yenge ngani-damongte bole balu noine bafuwadaingte. <sup>44</sup> Aime monic ye posa yogolec feiwa wawedaicte, ye socine lokey-ackedaicte. Nga posa yogodi monicte feiwa wawedaicte, yogo fasosockeme kapuc kwedaicte.”

<sup>45</sup> Aime Yesu ye nangeng yowa miwec, yogo depec-baba ngic micne nga Farisaio yengele miwec, yogo biyac ngage-motoibong. <sup>46</sup> Ailu yenge ye banogale yefe basackeibong. Aime ngic-ngigac yengi ye Wapongte siduc-mimi ngic miibongte hangocebame aibibiyelu hegileibong.

## 22

*Ngictau madecinele baba-tumang*

*Luk 14:16-24*

<sup>1</sup> Yesudi nangeng yowa monic taockelu holelu yanguc edocebawec, <sup>2</sup> “Honocmengte ngani-damong yogo ngictau monic ingucne, ye madecinele baba-tumang damengka

noba-nosing sugucne bamockewec. <sup>3</sup> Ailu ngictau ye kwelec kwekwefocine salecebame yenge ngic-ngigac baba-tumangte ailu molic-molic biyachac wacebawec, yogo yengi kwesiningte kwelec salecebame hikeibong. Hikeibong ngic-ngigac yenge takicebame hegileibong.

<sup>4</sup> “Hegileibong ngictau ye kwelec kwekwefocine gocne hatacmac yanguc milu salecebawec, ‘Ngenge biyac hikelu ngic nganicebalu edocebaning, ‘Ngagegaing, bulumakane ngicne ailu sic helocineholec yogo biyac welobec ailu nosing sugucne bamockegabac. Na wiyac sasawane biyac bamockegabac. Ilec ailu ngenge biyac kwesining.’”

<sup>5</sup> “Inguc mime hikelu edocebabong, yenge yowa yogo hatacmac hikeme ngagelu takicebame hegilelu lec-welec aibong. Monic ye boleina hikewec. Nga monic ye moneng-mafa boleina hikewec. <sup>6</sup> Nga ngic-ngigac nebocine yenge ngictaule kwelec kwekwefocine ngaba aiyelelu wehomacebaibong. <sup>7</sup> Inguc aibong ngictau ye yogo ngagelu aalickeme hudu-baba ngicfocine salecebame hikelu ngic yogo wehomacebalu taonngineng hifaebong lobewec.

<sup>8</sup> “Ailu kwelec kwekwefocine yanguc edocebawec, ‘Baba-tumangte nosing yogo biyac bamockeicne. Nga ngic wacebaicne yenge aling sowacne ingucnedi nala kwesidaingtesoc mi aigac. <sup>9</sup> Ilec ngenge yefe sosocka hike domalu ngic-ngigac nganicebalu yenge edocebabong baba-tumangte macka kwesidaing.’ <sup>10</sup> Inguc mime kwelec kwekwe ngic yenge yefewa hikelu ngic-ngigac madicne nga sowacne nganicebalu yenge momoc mengocebalu kwesibong baba-tumangte nosing-mac yogo wakeibong.

<sup>11</sup> “Aime ngic-ngigac yenge kwesilu ngiyebong ngictaudi nganicebanale welelu ngic monic nganime baba-tumangte ngakpi mi holelu ngiyewec. <sup>12</sup> Ngiyeme ye nganilu yanguc edowec, ‘Agone, ga wenuc baba-tumangte ngakpi mi holelu ofengiyegic?’

“Inguc mime ngic ye yowaine mikac waickelu ngiyeme <sup>13</sup> ngictaudi bole-ngicfocine yengele yanguc miwec, ‘Ngenge hige-moleine dodockelu lobina kundungka wickebong hauna. Iwa haulu hiyalu micine hisalangkelu gadaicte.’

<sup>14</sup> “Ngic-ngigac wacebaicne, yenge homacne. Nga bawosaecebaicne, yengibac efecnemac.”

*Takesle uwacnoibong*

*Mrk 12:13-17; Luk 20:20-26*

<sup>15</sup> Aime Farisaio yenge hikelu yowa wenuc milu Yesu kwesackebeng yowa gocne lilome banang milu ilec mingagec aibong. <sup>16</sup> Inguc ailu mic-tengtengfocngineng nga Herodele aling yenge Yesula salecebabong hikelu yanguc miibong, “Wewedu, ga yowa noine milu gagic, yogo ngagegabeleng. Ailu Wapongte yefe noina ngic-ngigac edocebalu weduyelelu gagic. Ailu ngic feicne me waicne yengele mi ngagesicaigic. Ga ngic-ngigac aling wiyac sockahac aiyelecaigic. <sup>17</sup> Ilec wenuc ngagegic, ngage-ngage weni yogodi nalic aigac, nongileng ngictau Sisa takes lacnodabelengte, me mi lacnodabelengte, yogolec yefe dondone wenuc fagac?”

<sup>18</sup> Inguc mibong, Yesu ye ngabawa-silic miibong, yogo biyac ngagelu yanguc edocebawec, “**Kwesac-ngic, ngenge omale lokwesacka locnugabiyeng?** <sup>19</sup> **Ngenge takes locaigaing, iwacni moneng monic bafuwalu edalicnubong nganibe.**” Inguc mime yenge moneng monic balelu edaliibong. <sup>20</sup> Edalibong ye yogo nganilu yanguc uwayelewec, “**Ilucc nga hibi yago male?**”

<sup>21</sup> Uwayeleme miibong, “Yogo Sisale.”

Inguc mibong yedi yanguc edocebawec, “**Ilec ngenge Sisale wiyac, yogo Sisa lacnodaing. Nga Wapongte wiyac, yogo Wapong lacnodaing!**”

<sup>22</sup> Inguc edocebame yenge kwatackelu hegilelu hikeibong.

*Homackacni gboliyelu fangke-fangke*

*Mrk 12:18-27; Luk 20:27-40*

<sup>23</sup> Sadyusi aling yenge homackacni gboliyelu fangke-fangkele yefe yogo monic mi fagac, inguc micaigaing. Yengelacni ngic goncedi hadeng iwahac Yesula kwesilu yanguc uwacnoibong, <sup>24</sup> “Wewedu, Mosesdi yanguc miwec,

‘Ngic monic ngigac badaicte ailu ye gboliine mikac gagu homame gbainedi haeinele hosec badaicte. Inguc balu gboli kwefickeme haele wac-bingec bafangkelu gadaicte.’  
(*Yef 25:5-6*)

<sup>25</sup> Dameng monicka hae-gba 7 yenge nongeholec gaibong. Aime haengineng molic-molicti ngigac monic balu gboli mikac moc gacgu homame, gbainedi yele hosec hatac bawec. <sup>26</sup> Balu ye ingucnehac homame, gbaine yogo nga yele bagewa gbafofocine 5 gaibong, yengela aibaba ingucnehac fikeme yenge sasawadi homayackeibong. <sup>27</sup> Homayackebong ngigac ye inguchac gacgu homawec. <sup>28</sup> Homame ngic 7 yenge ngigac yogohac baibongte ailu, gacgu homackacni gboliyelu fangkedaingte, dameng iwa ngigac yogo ye male ngigacbenang aidaicte?"

<sup>29</sup> Inguc mibong Yesudi bafaliyelu yanguc edocebawec, "**Ngege yowa Wapongte hibiwa fagac, nga Wapongte tapili, yogo mi ngage-motogaing. Ilec ailu yowa mibong lilogac.** <sup>30</sup> **Homackacni gboliyelu fangke-fangke damengka ngic-ngigac yenge mi banagudaingte. Aime mamac monicti 'Na adune ngic lacnodacte,' yogo nalic mi midaicte. Honocmengete angelo yenge ngawe-ngigac mi banagudaingte, yenge ingucnehac ngawe-ngigac mi banagudaingte.** <sup>31</sup> **Aime homackacni gboliyelu fangke-fangkele milu Wapongti yanguc biyachac Wapongte yefe-yowawa edowec.** <sup>32</sup> **'Na Abraham nga Aisak ailu Yakobo, yengele Wapong gagabachac.'** (Wah 3:6) **Ngege yowa yogo wafe-ngagec mi aicaigaing, me? Ailu ye ngic homaicne yengele Wapong miyac. Ye ngic gbolictne gagaing, yengele Wapong."**

<sup>33</sup> Aime ngic-ngigac habutowa yenge yowa weduyelewec, yogolec kwatackeibong.

*Wapongte ung-yowa*  
*Mrk 12:28-31; Luk 10:25-28*

<sup>34</sup> Aime Farisaio yenge yowa yanguc ngageibong, "Yesudi Sadyusi yengele yowa bafaliyeme yowangineng mikac aime moc domaibong."

Yenge yowa yogo ngagelu kpaduckelu domaibong. <sup>35</sup> Domabong yengele hewackacni Wapongte yefe-yowale ngage-ngage ngic monicti Yesu lokwesacka lolu yanguc uwacnowec, <sup>36</sup> "Wewedu, yefe-yowale kwelina ung-yowa weni yogodi noinebenang aigac?"

<sup>37</sup> Inguc uwacnome yanguc edowec,  
" **'Ga kwelegone nga ilucgone ailu ngage-ngagegone buchbuchac Sugucne Wapong-gonele angac ngagelu gadamec.'** (Yef 6:4-5)

<sup>38</sup> **Yogodi ung-yowale molic-molic yowa nga yowa sugucne aigac.** <sup>39</sup> **Aime monic yanguc fagac,** **'Gageicne aigelecaigac, silicine ingucnehac ngic-ngigac gale emewa gagaing, yengele kwelegonedi ago aieyelelu angac ngageyelelu gadamec.'** (Dep 19:18)

<sup>40</sup> **Yefe-yowale hibi nga sidunc-mimi ngicte hibi sasawa yengele fungine, ung-yowa yaeckang yago yeki aigaic."**

*Yesudi Mesiale uwayelewec*  
*Mrk 12:35-37; Luk 20:41-44*

<sup>41</sup> Aime Farisaio yenge kpaduckelu ngiyeebongka Yesudi yanguc uwayelewec, <sup>42</sup> **'Ngege Mesiale fungine wenuc ngagegaing, ye male fikesaweckacni?'** Uwayeleme bafaliyelu yanguc edoibong, "Ye Dawidile fikesaweckacni."

<sup>43</sup> Inguc mibong Yesudi yanguc miwec, "**Inguc aime Tili Asudi wenucte Dawidile micka yowa lome Mesiale miwec, 'Nale Sugucne,' milu yanguc miwec,**

<sup>44</sup> **'Sugucnedi nale Sugucne' edowec, 'Ga folenapec ngiyeengka ngabafocgone hige-gonele bagewa locebabe gadaingte.'**" (Mige 110:1)

**Inguc miwec.** <sup>45</sup> **Ailu Dawidi yeuctihac Mesia 'Nale Sugucne' wackewec. Aime Mesia ye wenucka Dawidile fikesaweckacni aigac? Ye Dawidile Sugucne."** <sup>46</sup> Inguc mime yenge Yesule yowa amaine bafaliyenogale aibibiyeibong. Aime gaibong, dameng iwa hatacmac uwacnoningte hangocebame hegileibong.

## 23

*Farisaio nga Sadyusi*  
*Mrk 12:38-39; Luk 11:43; 11:46; 20:45-46*

<sup>1</sup> Yesudi ngic-ngigac habutowa nga mic-tengtengfocine yanguc edocebawec, <sup>2</sup> **"Wapongte yefe-yowale wewedu ngic nga Farisaio yenge Mosesle mac balu**

**22:32:** Mat 8:11    **22:39:** Mat 7:12    **22:40:** Rom 13:10; Gal 5:14    **22:42:** Yoa 7:42    \* **22:44:** Miti Geewa Hibru yowawa Sugucnele wac yaeckangti fagaic. Molic-molic Hibru yowawa wacine yogo "Yawe" fagac. Nga yogolec lobeina, "Sugucne" inguc fagac. Mataio iwa Grik yowawa Sugucnele wac moniyang sugu bafaliyeicne fagac. "Nale Sugucne" yogo Mesia.    **22:44:** Mat 26:64

ngiyecaigaing. <sup>3</sup> Ilec yengi yowa edocngebagaing, ngenge yogo sasawa ngagelu balaibedaing. Aime yenge aibaba aicaigaing yogo, ngenge silic ingucnehac mi aidaing. Yenge yowa edocngebacaigaing, yogo yengileng mi balaibecaigaing. <sup>4</sup> Yenge yefe-yowale mimi umacnebenang yogo dodockelu ngic ngengele elecka lobong umaledaicte. Aime yengilengbac mimi yogo baefewelu baficngebanoale molenginengi bafangkenginte mi ayelecaigac.

<sup>5</sup> “Yenge ngicti aibabangineng sasawa nganicebaningte Wapongte yowa gocne kwelengkelu katapa gogocnginang lobong haume meinginang me molenginang bayegengkelu hefecaigaing. Ailu ngakpingineng dalicne dalimungineholec, aibaba yogo sugucnebenang ailu gaibong.\* <sup>6</sup> Yenge noba-nosing nonole damengka nga kpakpaduc mac iwa molic-molic ngiye-ngiyewa ngiyenogale ayelecaigac. <sup>7</sup> Ailu sobeng sugucna ngic-ngigac yengi ‘O Sugucne, wenac-madic,’ nga ‘Wewedu,’ inguc milu wacebaningte homacnebenang ayelecaigac.

<sup>8</sup> “Aime ngenge weweduningeng moniyangti sugu gagac. Ailu ngenge sasawa ngic hae-gba aigaing. Ilec ngengele ngagelu monicti ‘Wewedu,’ inguc mi wacngebadaic. <sup>9</sup> Mamacngineng moniyangti sugu honocmengka gagacte ailu, ngenge himongka ngic monicti ‘Mamacnonggeng,’ inguc mi midaing. <sup>10</sup> Aime sugucnenonggeng Mesia moniyangti sugu gagacte ailu monicti ‘Sugucnene,’ inguc mi wacngebadaic. <sup>11</sup> Aime sugucnenonggeng gagac, ye ngengele mole-bafic gadaicte. <sup>12</sup> Monic ye yeicne ngageme feicne aicaigac, ye wacine bawadaicte. Nga monic ye yeicne ngageme wawaine aicaigac, ye wacine bafedaicte.

*Aibaba sowacnele edocebawec*

*Mrk 12:40; Luk 11:39-52; 20:47*

<sup>13</sup> “Wapongte yefe-yowale wewedu ngic nga Farisaio, mee, ngenge medecngebadaic. Ngenge honocmengte ngani-damongte nu yogo habu yengele haicka holecaigaing. Ngenge iwa fenogale liloaigaing. Aime habu yengi fenogale aiyebongkabac, aka inguchac holeyelecaigaing. Ngenge kwesac-aibabangineng ingucne bagaigaing. <sup>14</sup> [Wapongte yefe-yowale wewedu ngic nga Farisaio, mee, ngenge medecngebadaic. Ngenge ngigac-hosec yengele macngineng ewalicebabong moc gagaing. Ailu ngic-ngigac yengi ngage-madickengeleningte ngenge mimiloc dalicnehac milockecaigaing. Ngenge kwesac-aibaba ingucne aicaigabiyengte ameine sugucnehac ngeledaicte.]†

<sup>15</sup> “Wapongte yefe-yowale wewedu ngic nga Farisaio, mee, ngenge medecngebadaic. Ngenge ngic moniyang sugu mic-heloc yowa aicnoningte himongne himongne nga kiwec falockelu hikecaigaing. Aime ye ngengela wele taockeme baefewebong, ye ngengileng ingucne dac-sanangte adu-madec ailu ngenge ewalincgebalu haudaicte. Ngenge kwesac-aibabangineng ingucne bagaigaing.

<sup>16</sup> “Yefe baba ngic yenge donge-pisic aigaing, ngenge yenge ingucne. Mee, ngenge medecngebadaic. Ngenge yowangineng mibong sanangkenale yanguc micaigaing, ‘Monicti Wapongte Ibu-mac wackecaigac, yogo yowa kpisicne micaigaing. Nga monicti Ibu-mac kwelina wiyac goldi baicne ngiyegac, yogo wackecaigac. Ilec ye yowaine nalic mi hegiledaicte.’ <sup>17</sup> Ibu-macka wiyac goldi baicne ngiyegacte gbagbacne aidaicte, yogo wiyac feicne. Nga wiyac goldi baicne yeicnac yogo wiyac omane. Ngenge donge-pisic aime ngage-ngagengineng mi ileckeicne. <sup>18</sup> Ailu ngenge yowangineng mibong sanangkenale yanguc micaigaing, ‘Monic ye alata wackecaigac, yogo yowa kpisicne. Nga monicti ibu alata feina biyac loicne, yogo wackecaigac, ibac yowaine yogo nalic mi hegiledaicte.’ <sup>19</sup> Alatawa ibu ngiyegacte gbagbacne aidaicte hocne, yogodi wiyac feicne nga ibu yeicnac yogo wiyac omane. Ngenge donge-pisic aling.

<sup>20</sup> “Monic ye alata wackelu yowaine mime sanangkedaicte, ye alata nga ibu alata feina fayackegac, yogo momochac wackeme yowainedi bayackedaicte. <sup>21</sup> Nga monic ye Ibu-mac wackelu yowaine mime sanangkedaicte, ibac Ibu-mac yeicne ailu Wapong iwa gagac, ye momochac wackeme yowainedi bayackedaicte. <sup>22</sup> Aime

23:3: Mal 2:7-8 \* 23:5: Yuda ngic-ngigac yenge katapa gogoc kpisicne sic socinedi baicne iwa Wapongte hibiwacni alingngine kwelengkeicne iwa emungkelu mesunginang me meinginang bakatackelu gaibong. Aibaba yogolec fungine Yefe-yowa 6:1-10 iwa kwelengkeicne fagac. Aime dalimunginele aibaba yogolec fungine Himong kisiwa 15:38-41, iwa kwelengkeicne fagac. 23:5: Mat 6:1; Wah 13:9 23:11: Mat 20:26; Mrk 9:35; Luk 22:26 23:12: Yop 22:29; Ynn 29:23; Luk 14:11; 18:14 † 23:14: Hibi escene Mataio kwelengkwec, yogo nganilu iwacni kwelengkebong kwelengkebong ofewec, yengelacni gocne 23:14 iwa mi fagac. Ngic-ngigac yenge hibi kwelengkeicne yogo wosaalu nganibong Mataiodi mi kwelengkwec mecne. 23:16: Mat 15:14



monic ye honocmeng wackelu yowaine mime sanangkedaicte, ye Wapongte mac ngiye-ngiye nga Wapong yeicne iwa ngiyegac, ye momochac wackeme yowainedi bayackedaicte.

<sup>23</sup> “Wapongte yefe-yowale wewedu ngic nga Farisaio, mee, ngenge medecnggebadaic. Ngenge kwesac-aibabangineng ingucne aicaigaing. Ngenge yefe-yowa feicne hegilelu yefe-yowa kpisicne sugu balaibecaigaing. Ngenge lomboc nga gime ailu mendangnineng sasawa yogowacni 10kacni moniyang botoc balu Wapong lacnoacaigaing, yogo yefe-yowa kpisicne aicaigaing. Ailu aibaba dondonne nga kwele-sowac ailu ngage-ngagesingngineng buchuchac balu gaga, yogobac kpaoma ailu hegilegaing. Ngenge aibabangineng madicne yogo nalic balaibegabiyeng. Ailu tofaine migabac, yogo inguchac mi hegiledaing. <sup>24</sup> Ngenge ngic-ngigac yefe edalicebaningte bole yogo bacaigaing, ngenge donge-pisic ingucne aicaigaing. Aime hulungnginang gisic hakic kpisicne, yogobac nganilu baickecaigaing. Nga kamelbac hulungka fame mi nganilu gbokecaigaing.

<sup>25</sup> “Wapongte yefe-yowale wewedu ngic nga Farisaio, mee, ngenge medecnggebadaic. Ngenge kwesac-aibabangineng yangucne balu gagaing. Ngenge pele nga kapngineng lobine sugu suwecaigaing. Ailu ngengileng kwelengineng kwelina ngani-nganc nga bonec nono homacne fagac, yogo ngengung mi damongkecaigaing. <sup>26</sup> Ga pele nga kap kweline suweengkabac lobeine ingucnehac kwalackedaicte. Farisaio, ngenge donge-pisic.

<sup>27</sup> “Wapongte yefe-yowale wewedu ngic nga Farisaio, ngenge kwesac-ngic! Mee, ngenge medecnggebadaic. Ngenge yanguc ngagegaing, dongesi yogo homaicne wonongkolec aime luwedi wakeicne fagac, yogo hibineholec ainale ngenge dongesi penti lowacnoacaigaing. Aime ngenge kwelenginang nga socnginang silicngineng ingucne ailu gagaing. <sup>28</sup> Ngenge socnginengti ngic-ngigac haicka dondonne ingucne aigac. Nga kwelenginang, ibac kwesacti wakeyackeicne ailu kwesac-aibabangineng ingucne balu gagaingte ngenge yefe-yowa wecaigaing.

#### *Ameine banoga*

<sup>29</sup> “Wapongte yefe-yowale wewedu ngic nga Farisaio, mee, ngenge medecnggebadaic. Ngenge soc-baba ailu kwesac-aibabangineng bagagaing. Ngenge Wapongte siduc-mimi ngic yengele dongesiwa simeng bayelelu ngic dondonne yengele simeng hibineholec ainale hatacmac hole-gboliyelu bamadickecaigaing. <sup>30</sup> Bamadicckelu yanguc micaigaing, ‘Nonge ngambofocnonggeng yengele damengka gadabeng midec, Wapongte siduc-mimi ngic nalic mi wehomacebadabeng. Ailu sacngineng wanale aibaba ingucne yengeholec mi aidabeng.’ <sup>31</sup> Ngenge ingucne bagalu funginengineng mibong yegengkegac, ‘Ngic Wapongte siduc-mimi ngic wehomacebabi-bong, nongileng ngic yogo yengele madecfocngineng.’ <sup>32</sup> Ngenge inguc milu ngambofocngineng yengele bikic basugulelu gagaing.

<sup>33</sup> “Ngenge ngengung hema ailu hemale gbolifocine, ngenge yowawa ameine mimoctolu dac-sanangka haudaingkale, wenuc aidaingte? <sup>34</sup> Ngagegaing, nani Wapongte siduc-mimi ngic nga ngage-ngage ngic ailu Wapongte yefe-yowale wewedu ngic salecebabe kwesidaingte. Aime ngenge galu yengelacni gočne wehomacebadaingte. Nga gočne malicpongka wecebadaingte. Ailu gočne kpkapaduc macnginang muc-hududi wecebalu ngaba aiyelelu taon monickacni welu yebicebabong monicka hikedaingte. <sup>35</sup> Ngenge inguc bagacgu ngic dondonne wecebayackebong sacngineng himongka wayackewec, yogolec ameine buchuchac ngengela fadaicte. Yogo Abel wehomaibong, yele sackacni molickelu ofegacgu Berekiale madec Sekariya, yele sacka ofegac. Ngenge ye Wapongte Ibu-mac nga alata hewacnginac wehomaibong. <sup>36</sup> Foinac, aibaba sasawa ilec ameine, yogo ngic-ngigac aling yanguctihac gagaing, ngengela fikedaicte, yogo noine edocngebabagabac.

#### *Yerusalemte yowa*

*Luk 13:34-35; 19:41-44*

23:22: Yes 66:1; Mat 5:34    23:23: Dep 27:30; Mika 6:8    23:24: Dep 11:1-2,4,20    23:25: Mrk 7:4    23:27: Sale 23:3    23:28: Luk 16:15    23:31: Sale 7:52    23:33: Mat 3:7; 12:34; Luk 3:7    † 23:35: Kein ye molickelu gbaine Abel wehomawec, siducine Fike-fike 4:1-10 iwa fagac. Ngictau Yowasi, yedi siduc-mimi ngic Sekariya wehomawec, siducine 2 Ngictaule siduc 24:17-27 iwa fagac. Yuda yengele Wapongte hibi moto-motoina 2 Ngictaule siduc fagac. Yogolec Yesudi yanguc miwec, “Abel yele sackacni molickelu ofegacgu Berekiale madec Sekariya, yele sacka ofegac.”

<sup>37</sup> “O, Yerusalem, Yerusalem, ga siduc-mimi ngic wehomacebayackeing. Nga ngic gala salecebaicne, yenge posadi holecebaing. Kokolec nenggacinedi adu-madecfocine kwegecine bageina ekongebacaigac, na dameng homacne adu-madecfocgone ingucnehac kpaducebanogale ngageiba. Aime ngengibac yogolec takicngebawec. <sup>38</sup> Ngagegaing, ngengileng mac fale yogo ngic mikac ailu mac kisi kwedaicte. <sup>39</sup> Na yanguc edocngehabe ngagening, yangucihac molickelu ngenge hatacmac mi nganicnudaingte. Aime gafecgu yanguc midaingte, ‘Sugucnele wacka ngic welegac, ye mimi-madicineholec.’ (Mige 118:26) Inguc midaingte, dameng iwa ngenge hatacmac nganicnudaingte.”

## 24

*Dameng moto-motoine*

*Mrk 13:1-13; Luk 21:5-19*

<sup>1</sup> Yesu ye Wapongte Ibu-mackacni lobina wame mic-tengtengfocine yenge yela weleibong. Welelu Ibu-macte kwelina mac fawec, yogo edalibong <sup>2</sup> yedi yanguc edocebawec, “Wiyac yogo yakumac nganiyackegaing, yogo lobewa yanguc fikedaicte. Aling monic yengi kwesilu yogo sasawa hembalackebong hikeyackedaicte. Foinac, hikeyackeme posa monicti monicte feiwa mi hegilebong ngiyedaicte, yogo noine edocngebagabac.”

<sup>3</sup> Inguc milu Yesu ye Oliwa kupicka hikelu ngiyeme mic-tengtengfocine yengilangkac yela hikelu yanguc uwacnoibong, “Ga Ibu-macte yowa migic, yogo ma damengka fikedaicte? Ailu dameng moto-motoina geicne kwesi-kwesile damengka maagone wenuc fikedaicte? Ilec edocnubanong.”

<sup>4</sup> Inguc mibong Yesudi bafaliyelu yanguc miwec, “Monicti kwesacngebadaicakale, ngenge ngani-motolu gadabiyeng. <sup>5</sup> I yangucte, ngic bocyac yengi kwesilu nale wac wackelu midaingte, ‘Na Mesia.’ Inguc milu ngic-ngigac bocyac kwele basifuc aiyeleadaingte. <sup>6</sup> Ailu hudu sugucnele siducti himong bangkacka, nga himong dalickacni kwesime ngenge yogo ngagelu mi kwatackedaing. Foinac, aibaba ingucne fikedaicte. Aime dameng moto-motoinebac yogowahac biyac mi kwesidaicte. <sup>7</sup> Himong gocne yengi himong monickacni gocne yengeholec hudu wenagulu gadaingte. Ailu ngictau monicte alingti ngictau monicte aling yengeholec ngaba ainagudaingte. Aime nosingte loloc-dameng fikelu hikedaingte. Ailu memeya yenge himongne himongne badaingte. <sup>8</sup> Aime aibaba ingucne, yogo wiyac gbolicne fikenogale aiyemewa, ngigac molickelu gado hicaigac, ingucnehac aidaicte.”

<sup>9</sup> “Inguc fikeme ngic-ngigac yengi ngenge ngabafocngineng yengele molewa locngებაingte. Locngებაing ngaba yengi weyebic aingelelu wehomacngებაingte. Aime himongne himongne ngic-ngigac sasawa yengi nale wacte ailu kweledi wicngებაingte. <sup>10</sup> Nga ngic-ngigac homacne yenge ngame-sowac ailu hegilecnulu yengungtihac agofocngineng ngaba yengele molewa locebadangte. Ailu kweledi wicebadangte. <sup>11</sup> Nga siduc-mimi ngic kwesacine homacnedi fikelu ngic-ngigac homacne kwesacebadangte. <sup>12</sup> Yefe-yowa wewele aibaba yogo suguledaicte. Aime ngic-ngigac homacne yenge kwele-angacka agofocngineng yengele angac ngagelu gagale aibaba yogo miyac aidaicte. <sup>13</sup> Nga monic ye sanangnehac gacgume damengine motodaicte, ye wasecne aidaicte. <sup>14</sup> Aime ngic-ngigac yenge ngani-damongte Siduc Madicne yogo himong sasawa iwa hikelu edocebalu weduylabong, yowa yogodi saweme ngic-ngigac yenge yogo ngageyackebong, dameng motodaicte.”

*Wiyac sowacnebenang fikedaicte*

*Mrk 13:14-23; Luk 21:20-24*

<sup>15</sup> “Siduc-mimi ngic Daniieldi yowa monic esecnebenang miwec, yogo wiyac monic sowacnebenang memenguine aigac, yogodi ngiyelu wiyac gbagbacne basowaleme wonngkolec ailu mac-bala ingucne aidaicte. Wiyac sowacne yogodi Ibu-mac kweline gbagbacne iwa domalu Ibu-mac basowaleme ngenge nganidaingte.” Monic ye yowa yago wafedaicte, ye yogo ngame-motodaic. <sup>16</sup> “Aibaba yogo fikeme ngic-ngigac Yudeya himongka gagaing, ngenge hangoc hikelu tikiwa fedaing. <sup>17</sup> Ailu monic ye mac feina ngiyedaicte, ye haulu wiyac monic banogale mac kwelina mi fedaic. Ye momoc hangoc hikedaic. <sup>18</sup> Nga monic ye nosing-bolewa domadaicte, ye ngakpi dalicne banogale macka mi hefaliyelu hikedaic. Ye momoc hangoc hikedaic.”

19 Dameng iwa ngigac gobholec gagaing nga nenggac kogoc amuc gumecebalu gagaing, mee, yenge medecebadaic. 20 Aime nenge hikenogale dameng yogo tilo damengka me Sabat damengka mi fikenale milokedaing. 21 Dameng iwa doic sugucnehac silicine monichenang fikedaicte. Doic ingucne himong molickelu fikeweckacni ofegacgu yanguctihac monic mi fikewec. Ailu lobewa inguchac hat-acmac nalic mi fikedaicte. 22 Aime entacka hadeng yogodi mi babangkaledaictewa, monicti wasecne nalic mi aidec. Ngic-ngigac bawosaecebaicne, nengele ailu dameng yogo bame bangkaledaicte.

*Mesia kwesacine*

23 “Dameng iwa yowa yanguc fikedaicte, ‘Nganining, Mesia yawa fikegac,’ me ‘Ye diwa fikegac.’ Ngic-ngigac inguc mibong nenge mi ngagesingkedaing. 24 I yangucte, ngic fikelu kwesac ailu midaingte, ‘Na Mesia.’ Yenge nga siduc-mimi ngic kwesacine yenge fikelu ngic-ngigac kwele basifuc aiyeledaingte. Ailu ngic-ngigac kwesacebalu pasile maa sugucne nga pasi mi ngani-nganiine badaingte. Ailu yenge yefe monic bafuwadaingtewa, ngic-ngigac bawosaecebaicne inguchac kwesacka bacebadaingte, aime yefe ingucne monic mi fagac. 25 Ngagegaing, na aibaba yogo mi fikeemewa yogo biyac edocngebagabac.

26 “Ngic-ngigac gocne yengi yanguc midaingte, ‘Nganining, ye himong kisiwa misaine mikacka gagac.’ Inguc mibong nenge iwa mi hikedaing. Me yanguc midaingte, ‘Ye mac kweline kpisicne yawa ngiyegac.’ Inguc mibong nenge yogo mi ngagesingkedaing. 27 Pilatacti wenac ofe-ofeinacni bame wenac hau-hauina angolecaigac. Aime Ngicte Madec ye kwesidaicte, dameng iwa silicine ingucnehac fikedaicte. 28 Aoc-aoc nango yenge sic kpeleckeicne fagaing, yenge iwa tumanecaigaing. Ngicte Madec kwesinogale aidaicte, dameng iwa wiyac ingucne hocne nganidaingte.

*Ngicte Madec hatacmac kwesidaicte*

*Mrk 13:24-27; Luk 21:25-28*

29 “Aime doic dameng motome, ‘Wenac-dongeine kundung kweme tamacne angocine mi angoledaicte. Aime asoc-meng yenge sawawacni motolu wabong sawawa wiyac sasawa yengele tapili yogo teng-teng kwedaingte.’ *(Yes 13:10; 34:4)*

30 “Dameng iwa Ngicte Madecte kwesi-kwesi damengte maa sawa hewacka fikeme himong fengnginang fengnginangsoc ngic-ngigac sasawa yenge yogo nganilu hisonggong aidaingte. Inguc aibong Ngicte Madec ye honocmengte kaguwa kwelina tapili nga hibi-angotowaineholecti kwesime nganidaingte. 31 Aime kpeng ucine sugucne hiyaemewa, ye angelofocine salecebame yengi hikedaingte. Hikelu honocmeng nga himong mecine neboc nga neboc motogac, iwa hikelu yeuctihac ngicngigac bawosaecehawec, yenge kpaducebadaingte.

*Fik yoc nganilu ngame-ngage banoga*

*Mrk 13:28-31; Luk 21:29-33*

32 “Fik yocte fungine nganilu nenge yogo ngame-motodaing. Mangngina gidecine ofeme hekengngine fosome ngic nenge yanguc ngagecaigaing, wenac dameng aigac. 33 Aime nenge wiyac sasawa migabac, yogo fikeme nganilu inguchac yanguc ngagedaing, Ngicte Madec damengngine biyac bangkale kwesilu nu lobina domagac.

34 “Foinac, ngic-ngigac aling yanguctihac gagaing, nenge mi homaebongkahac, wiyac sasawa yogo fikedaicte, yogo noine edocngebagabac. 35 Fikeme himong nga sawa yeke gagu miyac aidabiyecte. Nga nale yowabac mi miyac aidaicte.

*Damengne mi ngagegaing*

*Mrk 13:32-37; Luk 17:26-30,34-36*

36 “Aibaba yogo ma damengka ailu hadeng edomengka fikedaicte, yogo monicti nalic mi ngagedaicte. Honocmengte angelo yenge yogo mi ngagedaingte. Ailu Madec ye inguchac mi ngagedaicte. Mamacti sugu dameng yogo ngagegac.

37 “Noale damengka aibaba fikewec, Ngicte Madec ye kwesime aibaba silicine ingucnehac fikedaicte. 38 Mac tunggbaung mi weleemewa ngic-ngigac yenge nosing misa noibong. Ailu ngic yenge ngigac bacebaibong. Nga mamac yenge yanguc

miihonga, 'Na adune ngic lacnodacte.' Inguc ailu gaebongka Noa ye wagewa fewec.  
<sup>39</sup> Feme yenge mi ngagelu gaebongka mac kweme tunggbaungti kwesilu bacebayackewec. Ngicte Madecte kwesi-kwesi damengka aibaba ingucnehac aidaingte.  
<sup>40</sup> Dameng iwa ngic yaeckang yeke nosing-holewa gaebocka, yekelacni monic balu monic hegileme bolewa gadaicte. <sup>41</sup> Nga ngigac yaeckang yeke flawa masingka lalickelu gaebocka, yekelacni monic balu monic hegileme domadaicte.

*Deboc-gholi ganoga*

<sup>42</sup> "Sugucneningeng ma hadengka kwesidaicte, nenge yogo mi ngagegaing. Ilec ailu nenge deboc-gholi gadabiyeng. <sup>43</sup> Hise-baba ngic ye mac heuckelu fe-caigac. Aime mac fileine monic ye hise ngic ma damengka kwesidaicte, yogo ngagedaictewa, ye deboc-gholi nalic galu macine damongkelu hise ngic yogo aka holecnodaicte. <sup>44</sup> Ilec nenge inguchac efeckelu gadabiyeng. Ngicte Madecte dameng yogo nenge mi ngageebongka kwesidaicte.

*Kwelec kwekwe madicne*

*Luk 12:42-46*

<sup>45</sup> "Kwelec kwekwe monicti ngage-ngage-motockolec galu sugucneinele yowa balaibecaigac. Aime sugucneinedi ye kwelec kwekwe ngic agofocine yengele damong ailu nosing damengka botoc balu yelenale micnodaicte. <sup>46</sup> Ye bole yogo bayackeme sugucneine kwesilu nganime nalic aidaictewa, sugucneine ye kweleine angackedaicte. <sup>47</sup> Foinac, na yanguc edocngehabe, ye sugucneinedi wiyacine sasawa damongkenale micnodaicte. Ilec ailu nenge silicine yogolecso gadabiyeng. <sup>48</sup> "Nga kwelec kwekwe ngic sowacne, yebac yeuctihac yanguc ngagesidaicte, 'Na sugucnene dameng dalicne gacguhac kwesidaicte.' <sup>49</sup> Inguc milu kwelec kwekwe ngic ye agofocine wecebalu ngic gocne yengeholec nosing nga misa sanangne nodaicte. <sup>50</sup> Inguc ailu kwelec kwekwe ngic ye sugucneinele hadeng yogo mi ngageemewa sugucneine kwesidaicte. <sup>51</sup> Kwesilu kwelec kwekwe ngic yogo welockwalockelu ngic kwesacine yengeholec lodaicte. Aime yenge iwa hiyalu micnening hisalangkelu gadaingte."

## 25

*Ngigac-neleweng 10*

<sup>1</sup> "Honocmengte ngani-damong yogo ngigac-neleweng 10 ingucne. Yenge hifangineng balu baba-tumangte ngic yeholec yefewa bafuwacnagunogale hikeibong. <sup>2</sup> Yengelacni ngigac-neleweng 5 yenge ngage-ngagengineng mikac, nga 5 yenge ngage-ngagenginengkolec. <sup>3</sup> Ngigac-neleweng ngage-ngagengineng mikac yenge hifangineng balu hifale misa monic mi baibong. <sup>4</sup> Nga ngage-ngagenginengkolec, yenge hifangineng balu hifale misangineng kilungka kwebong haume baibong. <sup>5</sup> Aime baba-tumangte ngic yedi biyac mi kwesime, ngigac-neleweng yenge sasawadi dongengineng gungte aime gung faibong.

<sup>6</sup> "Faebongka deboc hewacina wawac monic yanguc fikewec, 'Ngagegaing, baba-tumangte ngic yogo welegac, nenge hikelu ye bafuwalu mengockelu kwesining.'

<sup>7</sup> "Inguc fikeme ngigac-neleweng 10 yenge gungkacni gholiye fangkelu hifangineng bamadickeibong. <sup>8</sup> Ailu ngigac-neleweng ngage-ngagengineng mikac yengi ngage-ngageholec yengele miihonga, 'Hifanonggeng pisickenogale aigacte ngengi misa monic kwenolebong hauna.'

<sup>9</sup> "Inguc mibong ngigac-neleweng ngage-ngageholec, yengi bafaliyeyelelu yanguc edocebaibong, 'Misa yagodi nongilengsoc mi aidaicte. Ilec nenge misa sale-caigaing, yengela hikelu fuli baning.'

<sup>10</sup> "Inguc mibong, yenge misa fuli banogale hikeebongka baba-tumangte ngic yogo kwesiwec. Kwesime ngigac-neleweng biyac efeckecicne, yengi yeholec baba-tumangte macka feibong. Felu nu wickebong holeme iwa noba-nosing no-angac ailu ngiyeibong.

<sup>11</sup> "Ngiyeebongka lobeina ngigac-neleweng agofocngineng nebocine yenge kwesilu yanguc miihonga, 'Sugucne, Sugucne, nu laliyenoleengka funang.'

<sup>12</sup> "Inguc mibong, yedi yanguc edocebawec, 'Foinac, na mi ngagecngabagabac.'

<sup>13</sup> "Nenge nale kwesi-kwesi dameng nga hadeng mi ngagegaing. Ilec ailu nenge deboc-gholi gadabiyeng.

*Moneng-damong habackang**Luk 19:11-27*

<sup>14</sup> “Aime Honocmengte ngani-damong yogo ngic monicti himong monicka hikewec, yogo ingucne. Ye hikenale kwelec kwekwefocine wacebalu moneng-mafaine yengele molewa lome damongkebong hikenale ngagewec. <sup>15</sup> Ye moneng damongkedaingte, yogolec tapili nga aibabanginengte silicka yanguc heuckelu yelewec. Ngic monic ye talant moneng 5 nga monic ye talant yaeckang, nga monic ye talant moniyang,\* moneng inguc yelelu hikewec. <sup>16</sup> Hikeme ngic talant 5 bawec, ye iwahac galu moneng bole balu talant 5 hatacmac taockelu bafuwawec. <sup>17</sup> Aime ngic talant yaeckang bawec, ye inguchac galu talant bole balu yaeckang hatacmac taockelu bafuwawec. <sup>18</sup> Nga ngic talant moniyang bawec, yedibac gagu sugucneine moneng lacnowec, yogo balu himong falilu longka longkelu sangkewec.

<sup>19</sup> “Aime sugucnengineng dameng dalicne gagu hatacmac hefaliye kwesilu moneng yelewec, yogolec ameine banogale wacebawec. <sup>20</sup> Wacebame ngic talant 5 bawec, ye talant 5 monic momoc taockelu bahikelu miwec, ‘Sugucnene, ga talant 5 neleng damongkeiba. Aime na moneng bole balu 5 hatacmac taockelu bafuwaiba.’

“Inguc mime <sup>21</sup> sugucnedi yanguc edowec, ‘Kwelec kwekwe ngic madicnebenang, ga aibabagone dondone ailu yowa balaibeing. Aime ga yowa balaibelu wiyac kpiscnemac yogo madicne damongkeingte ailu, wiyac homacnebenang damongebacte logudacte. Weleengka naholec belic-belicka gadabelecte.’

<sup>22</sup> “Aime ngic talant yaeckang bawec, ye inguchac welelu miwec, ‘Sugucnene, ga talant yaeckang neleing. Aime na moneng bole balu talant yaeckang hatacmac taockelu bafuwaiba.’

“Inguc mime <sup>23</sup> sugucneinedi yanguc edowec, ‘Kwelec kwekwe ngic madicnebenang. Ga aibabagone dondone ailu yowa ngage-ngagegone madicne. Aime ga yowa balaibelu wiyac kpiscnemac yogo madicne damongkeingte ailu, wiyac homacnebenang damongkecte logudacte. Weleengka naholec belic-belicka gadabelecte.’

<sup>24</sup> “Aime ngic talant moniyang bawec, ye inguchac welelu miwec, ‘Sugucnene, ga ngic dacine, inguc ngagegabac. Ailu bolewa ngic gocne wiyac hole-duwec aibong ga noine kpaduckeagac. Ailu gocne wasecne wickebong ga sifu noine bacaigic. <sup>25</sup> Ilec ailu gale hangocnume hikelu talantgone himongka longkebe fawec, yogo hatacmac bafaliyegabac.’

<sup>26</sup> “Inguc mime sugucneinedi yowaine ameine yanguc bafaliyecnowec, ‘Ga kwelec kwekwe ngic sowacne ailu oyonggine. Na bolewa hole-duwec mi ailu noine kpaduckeagabac. Ailu wasecne mi wickelu sifu noine bacaigabac, ga yogo biyac ngagegic. <sup>27</sup> Ga inguc ngagelu talantne bengka loengka ngiyedec. Ngiyeme na hefaliyelu talantne yogo nebocineholec badaba.

<sup>28</sup> “Ilec ngenge yelacni talant ewalilu ngic talant 10 balu gagac, ye lacnoning. <sup>29</sup> Monic ye wiyac gocne balu gagac, ye hatacmac lacnobong homacne aidaicte. Nga monic ye wiyac mi balu gagac, yelacni wiyac kpiscne balu gagac, yogo ewalidaicte. <sup>30</sup> Kwelec kwekwe ngic boleine sowacne yogo, ngenge ye balu lobina kundungka wickebong haudaicte. Ye iwa haulu yengeholec iwa galu hiyalu micngineng hisalangkelu gadaingte.’

*Wowosae dameng*

<sup>31</sup> “Gagcu Ngicte Madec ye tapili nga hibi-angocineholecti angelo sasawa yengeholec kwesidaingte, dameng iwa ye ngictaule ngiye-ngiyewa wacine feicneholecti iwa felu nyedaicte. <sup>32</sup> Ailu ye himongne himongne ngic-ngigac sasawa mime kwesilu yele haicka kpaduckedaingte. Kpaduckebong damongti lama nga noning baucbaicagac, ye dameng iwa ingucnehac baucbadaicte. <sup>33</sup> Lama yenge folewapec locebadaicte, nga noningtibac kanawapec locebadaicte.

<sup>34</sup> “Inguc ailu ngictaudi ngic-ngigac folewapec yanguc edocebadaicte, ‘Ngic-ngigac Mamacnele mimi-madicneholec, ngenge yawa welening. Ngenge yele mole-damoc nga mac-himongngineng haning, yogo biyachac himong molickelu fikeweckacni ofegac, iwa ngengele ngagelu loicne. <sup>35</sup> Na nosingte homabe ngenge nosing neleibong. Nga misale aineleme misa neleibong noiba. Ailu kwilic kwesilu gabe, ngenge ngani-damong aineleibong. <sup>36</sup> Na ngakpi-kpolucte basackelu kpungkelu gabe,

\* 25:15: Grik yowawa moneng yogo wacine talant. Moneng moniyang yogo hifa 15te bole-fuli. 25:15: Rom 12:6  
25:21: Mat 24:45-47; Luk 16:10 25:29: Mat 13:12; Mrk 4:25; Luk 8:18 25:30: Mat 8:12; Luk 13:28 25:31:  
Mat 16:27; 19:28 25:32: Esek 34:17; Miye 20:11-13 25:35: Yes 58:7

ngengi ngakpi-kpoluc neleibong. Ailu huc fabe ngengi kwesilu damongnuibong. Ailu muc-macka ngiyebe ngengi yugucnulu nganicnuibong.’

<sup>37</sup> “Inguc mime ngic-ngigac dondonne yengi yowa bafaliyelu yanguc edodaingte, ‘Sugucne, ga ma damengka nosingte homalu gaengka nganicgulu gumecguibeng, me ma damengka misale aigeleme gumecguibeng?’ <sup>38</sup> Me ma damengka kwilic kwesilu gaengka ngani-damong aigeleibeng, me ngakpi-kpoluc basackelu kpungkeengka geleibeng?’ <sup>39</sup> Me ma damengka hucka me muc-macka ngiyeengka yugucgulu nganicguibeng?’

<sup>40</sup> “Inguc mibong ngictaudi yanguc edocebadaicte, ‘Foinac, nenge gbafofne kpisicne yengelacni moniyang sugu kwele-madicka aicnoibong, yogo na hocne aineleibong, yogo noine edocngebagabac.’

<sup>41</sup> “Inguc milu kanawapec domadaingte, yenge yowa yanguc edocebadaicte, ‘Ngic-ngigac nenge Wapongte aalicta bagewa gagaing, nenge hegilecnulu dac-sanang moto-motoine mikac, iwa hikelu gadabiyeng. Yogo Aleng Sugucneningeng ye nga angelofocine, yengele ailu dac-sanang lowec yogo lobelu fagac. <sup>42</sup> Na nosingte homabe nenge nosing monic mi neleibong. Nga misale aineleme nenge misa monic mi neleibong noiba. <sup>43</sup> Ailu na kwilic kwesilu gabe nenge ngani-damong monic mi aineleibong. Ailu ngakpi-kpoluc mikac gabe monic mi neleibong. Na huc aineleme nga muc-macka ngiyebe nenge mi yugucnulu nganicnuibong.’

<sup>44</sup> “Inguc edocebame yengi yanguc midaingte, ‘Sugucne, ga ma damengka nosing misagone mikac me ngakpi-kpoluc mikac me kwilic kwesilu gaengka nonge nganicgulu kpaoma aibeng? Me mac wenuwa huc-macka me muc-macka ngiyeengka nganicgulu kpaoma aigeleibeng?’

<sup>45</sup> “Inguc mibong yedi yanguc edocebadaicte, ‘Foinac, nenge gbafofne kpisicne yengelacni moniyang sugu kwele-madicka mi aicnoibong, yogo na aineleibong ingucne aigac, yogo noine edocngebagabac.’

<sup>46</sup> “Aime yenge bikicte ameine baningte doic dameng moto-motoine mikac iwa hikedaingte. Aime aling dondonne yenge gaga-sanangka fedaingte.”

## 26

*Yesu wenogale mingagec aibong*

*Mrk 14:1-2; Luk 22:1-2; Yoa 11:45-53*

<sup>1</sup> Yesu ye yowa yogo sasawa miyackeme motome mic-tengtengfocine yanguc edocebawec, <sup>2</sup> “**Hadeng yaeckang faemewa Ewalicebaicnele hombang aime, iwahac ngic yenge Ngicte Madec malicpongka wehomanogale mipangkelu saledaingte.**”

<sup>3</sup> Aime depec-baba ngic micne nga Yuda ngic-ngigac yengele damongfocngineng, yengi Ibu-macte damong sugucne wacine Kaifas, yele macka feibong. <sup>4</sup> Felu Yesu sangke-sangke balu webong homanale yowa milu hefelu <sup>5</sup> yanguc miibong, “Ngic-ngigac yengele hewacka ngaba nga hendolong sugucne fikedaickale ailu, ye hombang damengka mi badabeleng.”

*Yesu sandadi lowacnowec*

*Mrk 14:3-9; Yoa 12:1-8*

<sup>6</sup> Aime Yesu ye Betani macka gawec, iwa ngic monic esecne waic-sanangkolec, wacine Saimon, yele macka nosing nolu ngiyewec. <sup>7</sup> Nolu ngiyeme ngigac monicti Yesula hikelu, kilung monic alabastros posadi baicne, yogolec kwelina sanda hoine madicne yogo fuline feicnebenang. Yogodi hodocina sotiyewec.

<sup>8</sup> Sotiyeme mic-tengteng yenge yogo nganilu sanda fuline sugucnedi baicnele ailu, yowa heesicne milu yanguc miibong, “Ye omale wiyac fuline feicne inguc kwondongkegac? <sup>9</sup> Yogo salelu moneng sugucne balu ngic-ngigac waweweine yelebeng madickedec.”

<sup>10</sup> Inguc mibong Yesudi yogo ngagelu yanguc edocebawec, “**Nenge omale ngigac yele inguc milu kwele-umac bafuwagaing? Ye aibaba madicnebenang ainelegac.** <sup>11</sup> Ngic waweweine yenge damengsoc nengeholec gadaingte. Nga nani sugu nengeholec damengsoc mi gadacte. <sup>12</sup> Na homabe longnudaingte. Ilec ailu ye nalic nale soc biyac baefecnulu sotingkenelegac. <sup>13</sup> Foinac, ngic-ngigac yenge Siduc Madicne himongsoc ngic-ngigac edocebalu weduyeledaingte, dameng iwa ngigac yagodi aibaba aigac, yogolec siduc inguchac milu ngagebong fadaicte, yogo noine edocngebagabac.”

*Yudasdi Yesu banogale mipangkewec*

*Mrk 14:10-11; Luk 22:3-6*

<sup>14</sup> Aime mic-tengtengfocine 12 yengelaconi monic wacine Yudas Iskariot, yedi depec-baba ngic micne yengela hikelu <sup>15</sup> yanguc uwayelewec, "Na Yesu molenginang lobe ngenge moneng edomeng nelenogale ngagegaing?" Inguc uwayeleme yengi siliwa moneng 30 wafelu lacnoibong. <sup>16</sup> Lacnobong, Yudas ye hikelu Yesu dameng monicka mudockelu balu yengele molewa lonale, yogolec donge hilalu wangec gawec.

*Wahikeicnele nosing*

*Mrk 14:12-21; Luk 22:7-14; 22:21-23; Yoa 13:21-30*

<sup>17</sup> Gagcu bret yis mikacte hombang iwa molickelu ngiyenogale mic-tengteng yenge Yesula hikelu yanguc uwacnoibong, "Nonge mac wenuwa hikelu Ewalicebaicnele hombangte lama madecineholec nosing bamockelu lobelu nonangte ngagegic?"\*

<sup>18</sup> Inguc mibong Yesudi yanguc miwec, "**Ngenge taonka hikelu ngic monic biyac basoabac, ye nganilu yanguc edodabiyeng. 'Wewedunonggenti gale yanguc migac, 'Damengne bangkalegacte na nga mic-tengtengfocne nonge gaholec Ewalicebaicnele hombangte lama madecineholec nosing nonogale ngagegabac.'**"

<sup>19</sup> Aime Yesu ye mic-tengtengfocine yowa edocebawec, yogo balabelu Ewalicebaicnele hombangte lama madecineholec nosing lobelu bamockebong.

<sup>20</sup> Aime mac deboleme, Yesu ye mic-tengtengfocine 12 yengeholec nosing nolu ngiyelu <sup>21</sup> yanguc edocebawec, "**Foinac, ngengelacni monicti ngaba yengele molewa locnudaicte, yogo noine edocngebagabac.**"

<sup>22</sup> Inguc mime mic-tengteng yenge kwelengineng homacne sowaleme yengelaconi moniyangni yanguc uwacnoibong, "Sugucne, ga yogo nale migic, me?"

<sup>23</sup> Uwacnobong yedi yanguc miwec, "**Ngic naholec pelewa bret kpomuluckelu ngiyegac, yedi hocne mudocnume bacnudaingte.** <sup>24</sup> Ngicte Madec ye hegilecngelalu hikedaicte, yogo nale ngagelu biyachac kwelengkeicne fagac. Ngic ye Ngicte Madec mudockeme badaingte, ye ameine baducnudaicte. Mee, ye medeckedaic. Ye nenggacinele gobe kwelinacni mi fikedec, yogodibac madicne aidec."

<sup>25</sup> Inguc mime Yudas ye Yesu mudockenale ngagewec, yedi inguchac yanguc uwacnowec, "Wewedu, ga yogo nale migic, me?"

Inguc mime Yesudi yanguc edowec, "**Gageuc hocne mificnagugic.**"

*Debocka tiwa noibong*

*Mrk 14:22-26; Luk 22:15-20; 1Kor 11:23-25*

<sup>26</sup> Aime yenge nolu ngiyebongka, Yesudi bret monic balu Wapong kwele-madic micnolu bret yogo bauckelu mic-tengtengfocine yanguc milu yelewec, "**Ngenge yago balu noning, yogo soc-biucne.**"

<sup>27</sup> Inguc milu kap monic balu Wapong kwele-madic micnolu milockelu yanguc milu yelewec, "**Yago sacne, nenge sasawadi balu noning.** <sup>28</sup> Nale sac yogodi dodofic gbolicne, yogo ngic-ngigac bocyac yengele bikic miyac aime madickeningte ailu sotingkeicne. <sup>29</sup> Na edocngebabe ngagening, waing noinele misaine hatacmac mi nolu gaebewa, Mamacnele ngani-damongka nongileng momoc yefe gbolicnele alingka felu nodabelngte."

<sup>30</sup> Aime yenge Wapongte gee holeibong. Holelu taon hegilelu Oliwa kupicka feibong.

*Umacte yowa edocebawec*

*Mrk 14:27-31; Luk 22:31-34; Yoa 13:36-38*

<sup>31</sup> Yefewa hikelu Yesudi yanguc edocebawec, "**Dehoc yagowa nenge sasawadi na hegilecnudaingte. Aibaba yogolec yanguc kwelengkeicne fagac, 'Na damongngineng webe lama habu yenge singsalolong kwedaingte.'** (Sek 13:7)

<sup>32</sup> **Aime na homackacni gboliye fangkelubac molickengelelu Galili prowinswa hikedacte."**

<sup>33</sup> Inguc mime Pitadi yanguc edowec, "Gocne yenge sasawadi gale inguc milu hegilecgudaingte. Nga nani sugubac nalic mi hegilecgudacte."

<sup>34</sup> Inguc mime yanguc edowec, "**Foinac, debohc yagowa kokolec ngicne mi hiyae-mewa, gagi bisocnung alecine habackang aidaicte, yogo noine edocgugabac."**

<sup>35</sup> Inguc mime yedi miwec, "Na gaholec homadactewa, ga nalic mi bisocgudacte." Inguc mime mic-tengtengfocine yenge sasawadi inguchac miibong.

**26:15:** Sek 11:12; Yoa 11:57    **26:17:** Wah 12; Yef 16:1-8    \* **26:17:** Dameng iwa yis mi fawec. Yenge flawa esecne misaineholecti hoineholec biyac aiicne, yogo flawa gbolicneholec lalickebong flawa sugulecaigac. Yogodi yis ingucne ailu gawec.    **26:23:** Mige 41:9    **26:28:** Wah 24:8; Yer 31:31-34; Sek 9:11; 1Kor 10:16    **26:30:** Luk 22:39; Yoa 18:1    **26:31:** Yoa 16:32    **26:32:** Mat 28:7,16    **26:34:** Mat 26:69-75

*Getsemane bolewa**Mrk 14:32-42; Luk 22:39-46*

<sup>36</sup> Aime Yesu ye mic-tengtengfocine yengeholec hikecgu bole himong monic wacine Getsemane, iwa hikeibong. Hike sulumelu yedi mic-tengtengfocine yanguc edocebawec, **“Ngenge yawa ngiyeebongka na edi lelu milockedacte.”** <sup>37</sup> Inguc milu Pita nga Sebedi madeckecine yaeckang bacebame leibong. Lelu Yesu ye kweleine umalebenangkeme kwele-sowac ngagelu <sup>38</sup> yanguc edocebawec, **“Kwele-ilucnedi umale-benangkeme homanogale ainelegac. Ilec ailu ngenge naholec yagowa deboc-gboli galu nganidaing.”**

<sup>39</sup> Inguc milu lelu himongka wafalu haic-mesuine helulucke ngiyelu yanguc milockewec, **“Mamacne, ga ngageng nalic aigacka, ga doicte kap yago baickenong. Ailu nale an-gacti mi sanangkedaic, miyac. Gale angac nga ngage-ngage yogodi sanangkedaic.”**

<sup>40</sup> Ye inguc milockeme motome hefaliyelu mic-tengtengfocine yengela welelu nganicebame yenge gung faibong. Fabong Pita yeuckelu yanguc edowec, **“Ngenge nalic naholec deboc-gboli kpiscnemac ngiyedabongka, me?”** <sup>41</sup> Ngenge lokwesacka felu wawedaingkale, deboc-gboli galu milockening! **Asunginengti efeckegac. Nga sconginengtibac umalegac.”**

<sup>42</sup> Ailu ye hatacmac lelu yanguc milockewec, **“Mamacne, yefe monic mi fagacte kap yago nobele miingte, nalic yogo nobe gale ngage-ngage sanangkedaic.”**

<sup>43</sup> Inguc milockelu wele nganicebame yenge hatacmac gung faibong. I yangucte, yenge dongenginengti gungte aime gung faibong. Faebongka nganicebalu <sup>44</sup> hatacmac hegilecebalu lelu milockeme alecine habackang aime yowa molickelu miwec, ingucnehac milu milockewec.

<sup>45</sup> Milockelu mic-tengteng yengela hefaliye welelu yanguc edocebawec, **“Ngenge gung falu gagainghac, me? Ngagegaing, dameng bangkalegac, ngic yenge Ngicte Madec mudockelu bikic-baba yengele molewa lodaingte.”** <sup>46</sup> Ngagegaing, mudoc ngic wele-gacte ailu ngenge fangkebong yengela hikenang.”

*Yesu baibong**Mrk 14:43-50; Luk 22:47-53; Yoa 18:3-12*

<sup>47-48</sup> Yudas, ye mudoc ngic, yedi molickelu aibaba ainogale depec-baba ngic micne nga Yuda ngic-ngigac yengele damongfocngineng yengeholec yowa hefelu miwec. Milu maaine yanguc biyac edocebawec, “Na ngic muduckedacte, ngenge ye hocne hobalu badabiyeng.” Aime yengi ngic-habu yogo salecebabong hudu-babale fitec nga gbalucnginengkolec hikeibong.

Yesu ye inguc milu domaemewa, mic-tengtengfocine 12 yengelacni monic wacine Yudas, ye kwesime ngic-habutowa sugucne mengocebalu molickeyeleme kwesiibong. <sup>49</sup> Kwesilu ye iwahac Yesula lewec. Lelu “Ohec, wewedu” milu muduckewec.†

<sup>50</sup> Inguc aicnome Yesudi yanguc edowec, **“Agone, ga kwesilu bole banogale ngagegic, yogo banong.”**

Mime yenge welelu Yesu moleine nebec nga nebec sanangnehac baibong. <sup>51</sup> Hei, ngic Yesuholec gaibong, yengelacni monicti hudu-babale fitec balu fuluckelu kwelec kwekwe ngic monic hedecine nebec wekwackeme wawec. Ngic yogo ye depec-baba ngic yengele damong sugucne, yele kwelec kwekwe ngic.

<sup>52</sup> Wekwackeme wame Yesudi yanguc edowec, **“Monic ye fitecti hudu badaicte, ye ameine homalu badaicte, gacgu yogo fikedaickale, hudu-babale fitecgone macina hatacmac loengka hauna.”** <sup>53</sup> Nale babaficte yefe monic mi fagac, yogo ngagelu inguc aidabong. Aime na Mamacne yakumachac sanangne edodaba, ye angelo habutowa, **72 taosen inguc, nalic salecebame walu baficnudabong.** <sup>54</sup> Aime baficnudaingtewa ingucne, **Wapongte hibiwa aibaba yago fikenale kwelengkeicne fagac, yogo noine mi fikedaicte.”**

<sup>55</sup> Inguc milu ngic-habu yanguc edocebawec, **“Na hadengsoc ngengeholec galu Ibu-macka yowa edocnglobalu wedungeleiba. Aime ngenge dameng yogowabac mi bacnuibong. Aime yakumachac kindololo ngic bacebacaigaing, ngenge silicine ingucnehac hudu-babale fitec, nga gbaluc balu bacnuningte kwesigaing.”** <sup>56</sup> Aimebac siduc-mimi ngic yengi Wapongte hibiwa yowa kwelengkeibong fagac, **yogo sasawa noine fikeyackedaic. I yangucte, ngenge kindololo ngic ingucne bacnugaing.”**

Inguc mime mic-tengtengfocine sasawadi Yesu hegilelu hangoc hikeibong.

26:38: Yoa 12:27    26:46: Yoa 14:31    † 26:49: Yuda ngic-ngigac yenge yefewa agongineng bafuwalu munggungka muducnagucaigaing, yogo Yuda ngic-ngigac yengele aibaba.    26:51: Yoa 18:26    26:52: Fike 9:6; Miye 13:10  
26:55: Luk 19:47; 21:37



*Yesu tutumangka bahikeibong**Mrk 14:53-65; Luk 22:54-55,63-71; Yoa 18:13-14,19-24*

<sup>57</sup> Aime Wapongte yefe-yowale wewedu ngic nga Yuda ngic-ngigac yengele damong-focngineng yenge depec-baba ngic yengele damong sugucne Kaifas, yele macka biyac kpaduckelu ngiyeibong. Ngiyebong iwa Yesu mengockelu hikeibong. <sup>58</sup> Aime Pita ye lobenginang dadalisuchac Yesu balaibelu hikewec. Hike sulumelu, Yesule yowa mimocto-daingte, yogo ngagenale depec-baba ngic yengele damong sugucne yele macte oda kwelina felu mac-damong yengeholec ngiyewec.

<sup>59</sup> Aime depec-baba ngic micne, nga Yuda ngic-ngigac yengele Tutumangtowale memba sasawa yenge yowa mingagec ailu hefeibong. Ailu Yesudi pasi sowacne wenuc aiwec, yogolec yowa milu hefeibong. Ailu yowa noine mikac aime wehomanogale ngagebong kpungkewec. <sup>60</sup> Inguc aibong ngic homacnedi kwesilu kwesackelu kpkopolic yowa gocne mibong, yogodi Yesu homacka lololesoc mi aime basackelu gaibong. Gacgu ngic yaeckang yeki fikelu kpolickelu yanguc miiboc, <sup>61</sup> "Yesudi yanguc miwec, 'Na Wapongte Ibu-mac hembalackelu hadeng habackang aiyemewa hatacmac badacte, na tapiline yogolec soc fagac.' "

<sup>62</sup> Inguc miboc depec-baba ngic yengele damong sugucnedi fangkelu Yesu yanguc uwacnowec, "Ga yowa migaic, yogolec nebocine monic mi bafaliyedamecte, me?" <sup>63</sup> Inguc mime Yesu ye waickelu domawec.

Domame depec-baba ngic yengele damong sugucnedi hatac edowec, "Wapong gaga fileine, yele haicka uwagelebe ga yowa noine minong. Ga Mesia, Wapongte madec me miyac, yogo edocnubac."

<sup>64</sup> Inguc mime yedi bafaliyelu yanguc edowec, **"I hocne gageuc migic. Aime yanguc edocngebabe, yakumac nga galu fenowagaing iwa, Ngenge Ngicte Madec ye Tapilitowa fileine, yele foleinapec ngiyelu honocmngte kaguwa kwelina kwesime nganidaingte."** (*Mige 110:1; Dan 7:13-14*)

<sup>65</sup> Inguc mime depec-baba ngic yengele damong sugucne ye ngageme Wapong fecnowecte aalickeme ngakpi daleine basulackelu yanguc miwec, "Ngenge yowaine sowacne ngagegaing. Ye Wapong fecnogacte, monicti sowacneine nganiwec, nongileng ngic ingucne hatac mi basackedabelengte. <sup>66</sup> Ngenge yowa yogo ngagelu wenuc migaing?"

Mime yengi bafaliyelu yanguc miibong, "Ye homadaicte hocne."

<sup>67</sup> Inguc milu yenge Yesu haic-mesuina sofockelu moledi wepatangkeibong. Aime gocne yengi moledi kingkung holelu <sup>68</sup> yanguc miibong, "Ga Mesia aigicka, madi wecgugac, yogolec siduc-yowa minong!"

*Yesu bisockewec**Mrk 14:66-72; Luk 22:56-62; Yoa 18:15-18,25-27*

<sup>69</sup> Inguc ailu gabong Pita ye oda kwelina mac-sobengka ngiyewec. Ngiyeme kwelec-adu monicti yela lelu miwec, "Ga Galili ngic hocne Yesuholec gaing."

<sup>70</sup> Mime ye ngic-ngigac sasawa ngiyeibong, yengele haicka bisockelu miwec, "Ga yowa migic, yogo mi ngame-motogabac."

<sup>71</sup> Inguc milu odale nuwa leemewa kwelec-adu monicti nganilu ngic-ngigac iwa domai-bong, yenge yanguc edocebawec, "Ngic yogo ye Yesu Nasaret-hocni, yeholec hocne gaing."

<sup>72</sup> Edocebame Pita ye Wapongte wacka hatacmac bisockelu yanguc miwec, "Na ngic yogo mi ngagegabac."

<sup>73</sup> Inguc milu domaemewa ngic yenge Pitala lelu miibong, "Nonge malacgone ngagegabeng, ga foinac yengele alingkacni."

<sup>74</sup> Edobong ye yeuctihac sanangkelu yowa yanguc miwec, "Na ngic yogo mi ngagegabac. Na yowa kwesacngebagabacka Wapongte aalicta bagewa gadac."

Inguc mime iwahac kokolec ngicne hiyawec. <sup>75</sup> Aime Yesudi yowa biyachac edowec, yogo ngagesiwec, **"Kokolec ngicne mi hiyaemewa, gagi biyac na bisocnung alecine habackang aidaicte."** Pita ye yowa yogo ngagesilu oda lobina haulu kwele-sowac sugucne ngagelu hii sugucnehac hiyawec.

**27***Yesu Pailatla bahikeibong**Mrk 15:1; Luk 23:1-2; Yoa 18:28-32*

<sup>1</sup> Mac saeme depec-baba ngic micne nga Yuda ngic-ngigac yengele damongfocngineng yenge kwele-moniyang ailu Yesu homanale mipangkeibong. <sup>2</sup> Mipangkelu Yesu moleine dodockelu Yudeya himongte gawana Pailat, yela bahikelu yele molewa loibong.

*Yudas mucnaguwec*  
*Sale 1:18-19*

<sup>3</sup> Aime Yesu homanale mimoctobong, Yudas mudoc ngic ye yogo nganilu miwec, "Na omale aibaba inguc aibac?" Inguc milu kweleine hefaliyeme siliwa moneng 30 lacnoibong, yogo depec-baba ngic micne nga Yuda ngic-ngigac yengele damongfocngineng yenge hatacmac yelenale bahikewec. <sup>4</sup> Bahikelu yanguc edocebawec, "Ngagegaing, nani bikic balu kwesac aibe ngic sowacneine mikac, yogo webong homadaicte."\*

Inguc mime yengi yanguc miibong, "Yogo nongele umac miyac, yogo gale umac."

<sup>5</sup> Yenge inguc milu moneng yogo hegilebong, ye bahikelu Ibu-macka wickeme feme hegile hikelu mucnagulu homawec.

<sup>6</sup> Aime depec-baba ngic micne yengi siliwa moneng yogo kpaduckelu miibong, "Moneng yagodi sac fuli bawec. Ilec ailu moneng yago Ibu-macte katapawa mi lonoga, yogolec yefe monic mi fagac." <sup>7</sup> Inguc milu yenge yowa hefelu moneng yogodi kwilic-ngic yengele dongesi fikenale hebec kudi-baba ngic, yengele bole himong monic fuli baibong. <sup>8</sup> Aime himong yogolec wacine Sac-himong molickelu wackeibong. Aime yogo yakumac fagachac. <sup>9-10</sup> Siduc-mimi ngic Yeremiyadi yowa yanguc miwec, yogo noineholec aiwec, "Aibaba yanguc fikenale Sugucnedi edocnuwec, 'Israel madecfocine yenge ngic yele fuli loibong, "Yogo siliwa moneng 30 yogolecoc," inguc miibong. Aime yenge moneng yogo balu yogodi hebec kudi-baba ngic yengele bole himong monic fuli baibong.'"†

*Yesu homanale mipangkewec*

*Mrk 15:2-15; Luk 23:3-5,13-25; Yoa 18:33; 19:16*

<sup>11</sup> Aime yenge Yesu bahikelu gawanale haicka lobong domame yedi yanguc uwacnowec, "Ga Yuda ngic-ngigac yengele ngictau, me?"

Inguc mime Yesudi bafaliyelu yanguc edowec, "**Yogo hocne gageuc migic.**"

<sup>12</sup> Aime depec-baba ngic micne nga Yuda ngic-ngigac yengele damongfocngineng yengi domalu yele sowacne miibong, yowa yogolec ameine monic mi bafaliyewec. <sup>13</sup> Inguc aime Pailatdi yanguc uwacnowec, "Yenge yowawa locgulu yowa homacnebenang migaing, ga yogo mi ngagegic, me?" <sup>14</sup> Mime ye yowa monic mi bafaliyeme gawana ye kwatacke-benangkwec.

<sup>15</sup> Aime gawana ye Ewalicebaicnele hombangte damengsoc yanguc ailu gawec. Ngic monic muc-macka ngiyeme, Yuda ngic-habu yengi yele wac wackebong, ye ngic yogo lukecnolu muc-mackacni hegileme wahikecaigac, inguc ailu gawec. <sup>16</sup> Dameng iwa kindololo ngic monic muc-macka ngiyewec, wacine Barabas, yenge aibabaine ngagecno-gaing. <sup>17</sup> Aime ngic-ngigac kpaduckeyackelu domaebongka Pailatdi yanguc uwayelewec, "Ma ngic lukengelebele ngagegaing, Barabas, me Yesu, wacine monic Mesia wacke-caigaing?" <sup>18</sup> Aime Yuda ngic micne yenge Yesu moc hasowac aicnolu yele molewa lonogale bahikeibong, yogo ngageyelelu inguc miwec.

<sup>19</sup> Aime Pailat ye mimocto-mimoctole damengka mac ngiye-ngiyeina ngiyeemewa ngigacinedi yela yowa yanguc lome hikewec, "Ga ngic dondonne yele yowa monic mi midamec, ga hegiledamec. Na debocka falu gungka nganilu yele ailu kwele-umac sugucne bagabac."

<sup>20</sup> Aime depec-baba ngic micne nga Yuda ngic-ngigac yengele damongfocngineng yenge ngic-ngigac habu kpfengebabong yenge Barabas lukeyelenale miibong. Nga Yesubac wehomanogale miibong.

<sup>21</sup> Aime gawanadi yanguc uwayelewec, "Ngic yaeckang domagabiye, yekelacni ma ngic lukecnobebe ngagegaing?"

Inguc mime yenge yogo ngagelu yanguc miibong, "Barabas!"

<sup>22</sup> Inguc miibong yanguc uwayelewec, "Inguc aime Yesu, wacine monic Mesia wacke-caigaing, yele wenuc aidacte?"

Inguc uwayeleme yenge sasawadi yanguc miibong, "Ga ye malicpongka weng homana!"

<sup>23</sup> Inguc miibong Pailatdi hatacmac uwayelewec, "Aime ye oma sowacne aiwec?"

Inguc mime yengi hatacmac dacineholec aukwelu wackelu miibong, "Ye malicpongka weng homana!"

\* **27:4:** Yefe-yowa 27:25 iwa yanguc migac, ngic monicti moneng bame, monic webong homame sacine hetingkedaicte, ye Wapongte aalicate bagewa gadaicte. **27:5:** Sale 1:18-19; Mat 26:14-15 † **27:9-10:** Mataioidi Yeremiya 32:6-9 nga Sekariya 11:12-13 kpatulecepulu migac. **27:9-10:** Sek 11:12-13 **27:12:** Yes 53:7 **27:18:** Yoa 11:47-48; 12:19

<sup>24</sup> Inguc milu domabong Pailat ye nganilu yowa dondonne minogale kpungkewec. Aime yenge sanangnehac wackelu domabong hendolong sugucne fikewec. Fikeme ye misa balu ngic-ngigac habutowa yengele haicka domalu moleine suwelu yanguc miwec, “Ngic yagolec sacte bikic, yogo nala mi fadaicte, yogo ngengela fadaic.”

<sup>25</sup> Inguc mime ngic-ngigac yenge sasawadi yowaine bafaliyelu yanguc miibong, “Ye sacte bikic yogo nonge nga adu-madecfocnonggeng nongela fadaicte.”

<sup>26</sup> Aime Pailat ye Barabas lukecnome yengela hauwec. Aime yengi Yesu socine muc-hududi welubac, malicpongka weningte hudu-baba ngic yengele molewa lolu hegileyewec.

*Aibaba sowacne aicnoibong*

*Mrk 15:16-20; Yoa 19:2-3*

<sup>27</sup> Aime gawanale hudu-baba ngicfocine yengi Yesu gawana nga hudu-baba ngic yengele macte oda kwelina baleibong. Lebong hudu-baba ngic sasawadi kpaduckeibong.

<sup>28</sup> Kpaduckeyackelu Yesu yeicne ngakpiine hemoctocnolu ngictaule ngakpi dalicne ingucne monic sasacne holecnobong hauwec. <sup>29</sup> Haume ngictaule duu ingucne muc-somang monic patiyelu hingoc ingucne hodocina holecnobong hauwec. Haume ngictaule yasu ingucne monic lacnobong mole-foleinedi balu domawec. Inguc ailu haicina ketadi holecnolu midelec aicnolu yanguc miibong, “Ohec, Yuda ngic-ngigac yengele ngictau.”

<sup>30</sup> Ailu yenge sofockelu yasu ewalilu yasu yogodihac hodocina weibong. <sup>31</sup> Welu misulec aicnobong motome, yengileng ngakpi dalicne hemoctocnolu yeicne ngakpiine hatacmac holecnobong haume malicpongka wenogale mengockelu hikeibong.

*Yesu malicpongka weibong*

*Mrk 15:21-32; Luk 23:26-43; Yoa 19:17-27*

<sup>32</sup> Bahikelu yefewa ngic monic monic bafuwaibong, wacine Saimon, ye Sairini taonkacni, yedi Yesule malicpong tengkenale dogbac aicnobong tengkeme hikeibong. <sup>33</sup> Hikegacgu himong bulilicne monic, wacine Goligata wackelu gaibong, yogolec fungine Hodoc-luwe, iwa hike sulumeibong. <sup>34</sup> Hike sulumelu waing misa wiyac monic hobecineholecti lalick-eicne, yogo doic tapiliine bawanale gumbong, ye wiyac yogo nongagec ailu hegilewec.

<sup>35</sup> Aime yenge ye malicpongka webong domame ngakpi-kpolucine loling monic ailu lanac-ganac aibong.

<sup>36</sup> Inguc ailu damong ngiyeibong. <sup>37</sup> Aime ye domame yowawa loibong, yogolec fungine tafe kpiscina malicpong hodocina loibong, yogo yanguc kwelengkelu loibong, “Yago Yesu, Yuda ngic-ngigac yengele ngictau.”

<sup>38</sup> Ailu yenge kindololo ngic yaeckang, monic foleinapec nga monic kanainapec yeholec malicpongka momoc wecepaibong. <sup>39</sup> Aime ngic-ngigac iwa lec-welec aibong, yenge Yesu misulec aicnolu hodocngineng dudalingkelu <sup>40</sup> yanguc miibong, “Kwele-sowac aigelegabeleng, gageicne Ibu-mac hembalackelu hadeng habackangte kwelina hatacmac banogale miing. Ailu Wapongte madec gagickabac gageuctihac baficnagulu malicpongkacni fotockelu wanong!”

<sup>41</sup> Aime depec-baba ngic micnefocngineng, nga Wapongte yefe-yowale wewedu ngic ailu Yuda ngic-ngigac yengele damongfocngineng, yengi inguchac misulec aicnoibong.

<sup>42</sup> Ailu yanguc microibong, “Ye ngic-ngigac gocne baficebacaigac. Nga yeicnebac nalic mi baficnagudaicte. Ye Israel nongileng ngictau gadecka, yakumac malicpongkacni wana. Inguc aime ngagesingkedabelengte! <sup>43</sup> Ye yanguc milu Wapong ngagapangkecaigac, ‘Na Wapongte madec,’ inguc micaigac. Ilec Wapongti yele angackecaigackabac yakuc malicpongkacni bamoctona.” <sup>44</sup> Aime kindololo ngic yeholec momoc wecepaibong, yeki yowa silicine ingucnehac yowa kwekwe aicnoiboc.

*Yesu homawec*

*Mrk 15:33-41; Luk 23:44-49; Yoa 19:28-30*

<sup>45</sup> Aime wenac hewac-hewac 12 kilok aiyemewa, mac kundung kweme kundungti himong someckelu falu game 3 kilok mac awelewec. <sup>46</sup> Aime 3 kilok aiyemewa Yesudi malac sugucnehac aukwelu yanguc miwec,

**“Eli, Eli lema sabaktani.”** Ilec fungine yanguc, **Wapongne Wapongne, ga omale hegilecnugic?** *(Mige 22:1)*

<sup>47</sup> Aime ngic-ngigac domaibong, yengelacni gocnedi yowa yogo ngagelu yanguc miibong, “Ye Wapongte siduc-mimi ngic wacine Elaiya wacke-wasic aicnogac.”

<sup>48</sup> Inguc wackeme monicti ngagelu dacineholec gasacke hikelu spans<sup>‡</sup> monic balu waing wobecineholecka kpomuluckelu kpingka lolu Yesule micka lome fewec. <sup>49</sup> Aime gocnedibac misulec ailu yanguc miibong, “Ngenge yogo hegilebong, Elaiya foinac kwesilu bafickeme nganinang.”

<sup>50</sup> Aime Yesu ye hatacmac malac sugucnehac wackeme asuine ofeme homawec.

<sup>51</sup> Hei, iwahac Ibu-macte kpoluc sugucne<sup>S</sup> yogo hewacka yefe wilengcakni fouckelu wame yaeckang aiboc. Ailu memeya sugucne bame fegengka posa sugucne sugucne siyeckeibong. <sup>52</sup> Aime dongesi fayackewec, yogo angkeme ngic-ngigac gbagbacne esecne homaibong, yengelacni homacnedi sockolec gboliyelu fangkeibong. <sup>53</sup> (Fangkelu wangep ailu gabong, Yesu ye dongesiwacni gboliyelu fangkeme, yenge yele lobewa dongesi hegilelu taon gbagbacne, iwa hikelu ngic-ngigac homacne fikeyeleibong.)

<sup>54</sup> Aime hudu-baba ngic yengele damong nga hudu-baba ngicfocine Yesule damong domaibong, yenge memeya nga wiyac fikewec, yogo nganilu damuebawec. Damuebame weleckelu yanguc miibong, “Foinac, ngic yago ye Wapongte madec hocne.”

<sup>55</sup> Aime ngigac homacnedi Galili prowinswacni Yesu kwele kweconingte balaibelu kwesiibong. Ailu Yesu weibong, yenge iwa kwesi dadalisuc domalu wiyac ngani-ngagec aibong. <sup>56</sup> Yengelacni ngigac gocne wacngineng yanguc, Maria wacine monic Magadalen. Ailu Maria monic, ye Yakobos nga Yosefe yekele nengcacnginec. Ailu Sebedi madeckecine yekele nengcacnginec, yenge ngigac habu yengeholec domaibong.

### *Yesu longkeibong*

*Mrk 15:42-47; Luk 23:50-55; Yoa 19:38-42*

<sup>57</sup> Aime Arimatea taoncakni ngic monic monengtowaineholec gawec, wacine Yosefe, ye Yesule mic-tengteng gawec. Ye mac aweleme <sup>58</sup> Pailatla hikelu Yesule kponggbong banogale uwacnowec. Uwacnome Pailatdi kponggbong lacnonale micnowec. <sup>59</sup> Lome Yosefe ye Yesule kponggbong yogo balu kpoluc gbagbacne monic madicnebenang, yogodi wabungkelu bahikewec. <sup>60</sup> Bahikelu yeicne dongesi gbolicne monic posa henebe gufuicna fawec, iwa Yesule kponggbong lolu posatowa monic kpalundungkeme dongesi yefine yogodi hedickeme domame hikewec. <sup>61</sup> Aime Maria Magadalen nga Maria agoine, yeki dongesi yefine yegena iwahaica nganilu ngiyeboc.

### *Dongesi damongkeibong*

<sup>62</sup> Saeme Sabat aime depec-baba ngic micne nga Farisaio yenge kpaduckelu Pailatla hikelu <sup>63</sup> yanguc miibong, “Sugucnenonggeng, kwesac-ngic yogodi gbolicne gawecka, yowa monic miwec, nonge yogo ngagesigabeleng. Yogo edocugubeng nagenong, ‘Na homalu fabe hadeng habackang aiyemewa, Wapongti homackacni hatacmac bagbolyec-nume fangkedacte.’ <sup>64</sup> Gacgu mic-tengtengfocine yengi kwesilu kponggbongine hise bahikelu, yanguc midaingkale, ‘Ye homackacni gboliyelu fangkeyec.’ Ilec ga dongesi damongkeningte edocebaengka yenge hikelu hadeng habackang damongkedabiyeng. Es-ecne kwesac monic aiwec, yogo faemewa lobeina kwesac hatacmac aime suguledaickale, yogolec edocugabeleng.”

<sup>65</sup> Inguc mibong Pailatdi yanguc edocebawec, “Nalic, na hudu-baba ngic milu edocebabe ngenge momoc hikedaing. Yenge dongesi damongkeningte tapili balu gagaing, yogolec silicina damongkedabiyengte.” <sup>66</sup> Inguc mime yenge hikelu dongesi nuine posadi baicne yogo mi baickeningte feina aka lobong fawec. Ailu hudu-baba ngic yengi damong domaningte edocebaibong.

## 28

### *Yesu ye dongesiwacni fangkewec*

*Mrk 16:1-10; Luk 24:1-10; Yoa 20:1-18*

<sup>1</sup> Sabat dameng motome Sonda ubiyacte mac sae-saele Maria Magadalen ailu Maria agoine, yeke dongesi nganinogale hikeiboc.

<sup>2</sup> Hei, Sugucnele angelo monicti honocmengkacni wame memeya sugucne tapiliineholec bawec. Bame yedi dongesile posa-nu yogo igockelu kpalundungkeme hikeme feina felu ngiyewec. <sup>3</sup> Ailu ye haicine ngani-nganiine latak-latak, nga ngakpiine kwalacne kaguwa ingucne. <sup>4</sup> Aime dongesi damong yenge ye nganilu hangocebame dengdeng kwelu homanogale ailu faibong.

<sup>‡</sup> **27:48:** Spans yogo materes ingucne misawa kpomuluckecaigaing. **27:48:** Mige 69:21 **S 27:51:** Kpoluc yogo mac gbagbacne, nga mac gbagbacnebenang, yekele hewacka loicne. **27:51:** Wah 26:31-33; Hib 10:19-20 **27:55:** Luk 8:2-3 **27:58:** Yef 21:22-23 **27:60:** Yes 53:9 **27:63:** Mat 12:40; 16:21; Mrk 9:31; 10:33-34; Luk 9:22; 18:31-33; Yoa 2:19-21

<sup>5</sup> Aime ngigac yeke hikeboc angelodi yanguc edocepawec, “Ngeke mi hangocngepana, ngeke Yesu malicponga weibong, ye nganinogale kwesigabiyec, yogo na ngagegabac. <sup>6</sup> Aime yebac yawa mi fagac. Ye yowa edocngebawec, yogo hocne balaiabelu gboliyelu fangkegac. Ngeke ya welelu mapicine nganinic. <sup>7</sup> Ngagegaic, ngeke yogo nganilu biyac hikelu mic-tengtengfocine yanguc edocebanic, ‘Yesu ye homackacni biyac gboliyelu fangkegac. Ye molickengelelu Galili prowinswa hikegac, ngenge iwa hikelu bafuwadaingte.’ Yowa yogo yakumac hocne edocngepabe ngagegabiyec.”

<sup>8</sup> Inguc aime yeke hangocepame dongesi hegilelu belic-belicka mic-tengtengfocine siduc edocebanogale biyac gasackelu hikeiboc. <sup>9</sup> Gasacke hikelu yefewa Yesu bafuwaboc yedi yanguc miwec, “**Wenac-madic.**” Inguc mime yeke emeina lelu ngosockelu higeina balu afeiboc. <sup>10</sup> Aime Yesudi yanguc edocepawec, “**Ngeke mi hangocngepana. Ngeke hikelu ngic hae-gbafocne\* Galili prowinswa hikeningte edocebaboc, yenge iwa hikelu nganicnudaingte.**”

*Hudu-baba ngic yengele siduc*

<sup>11</sup> Aime ngigac yeke hikebocka hudu-baba ngic gocne yenge dongesi damongkeibong, yengelacni gocnedi taonka felu wiyac fikewec, yogolec siduc depec-baba ngic micne edocebayackeibong. <sup>12</sup> Edocebabong yenge Yuda ngic-ngigac yengele damongfocngineng yengeholec mingagec ailu yowa hefeibong. Ailu yowa mipangkelu hudu-baba ngic dongesi damongkeibong, yengi yowa miningte moneng yogolecsoc yelelu <sup>13</sup> yanguc miibong, “Ngenge yowa yanguc milu edocebadaing. ‘Nonge debocka gung faebengka yeicne mic-tengtengfocine yengi kwesilu kponggbongine hise balu hikegaing.’ ngenge inguc midaing. <sup>14</sup> Aime gawana ye yowa yogo ngagelu wiyac monic mi aingeledaicte. Ilec ngenge mi hangocngebadaic. Nongi yeholec yowa nalic mingagec aidabelengte.” <sup>15</sup> Inguc milu edocebabong hudu-baba ngic yenge moneng yogo balu yowa edocebaibong, yogo miibong sugulewec. Aime kwesac-yowangineng yogodi Yuda ngic-ngigac yengela sawelu fawecti yakumac fagachac.

*Mic-tengteng bole badaing*

*Mrk 16:14-18; Luk 24:36-49; Yoa 20:19-23*

<sup>16</sup> Aime Yesu ye biyachac gbolicne gawecka mic-tengteng 11 yenge Galili prowinswa kupic monic iwa hikeningte edocebawec, iwa feibong. <sup>17</sup> Felu yeicne nganilu mitengkelu afeibong. Aime ngic moniyang moniyangti sugu kwelenginengti mi ngagepangkeibong. <sup>18</sup> Aime Yesudi haicnginang welelu yanguc edocebawec, “**Ngagegaing, himong nga honocmengte bole-yowa tapiliineholec sasawa na biyachac neleyackewec.** <sup>19</sup> **Ilec ngenge hikelu ngic-ngigac himongne himongne sasawa bacebabong nale mic-tengtengfocne aidaing. Ailu ngenge Mamac nga Madec ailu Tili Asule wacka misa lowayeledabiyeng.** <sup>20</sup> **Aime nani ung-yowa sasawa edocngebalu gaiba, ngenge yowa yogo sasawa balaiheyackeningte edocebalu weduyeledabiyeng. Ailu ngagegaing, na hadengsoc hadengsoc ngengeholec gabe himongte dameng motodaicte.”**

---

**28:6:** Mat 12:40; 16:21      \* **28:10:** Ngic yogo yenge Yesule mic-tengteng. Yesudi ngic hae-gba wacebawecte golowacfocine aigaing.      **28:10:** Mat 26:32      **28:16:** Mat 26:32      **28:18:** Yoa 13:3; Efs 1:20-22      **28:19:** Mrk 16:15-16; Sale 1:8

## Marekodi Yesule Siduc Madicne Kwelengkewec

### *Mimi-yegeng yowa*

Mareko wacine monic yogo Yoane. Aime ye Yesule mic-tengtengfocine 12 yengelacni miyac. Ye Banabasle madec, Yerusalem iwa sugulewec. Ilec Yesu ngani-ngagec aicnowec. Mareko 14:51-52 iwa yeicne siduc kwelengkewec mecne. Lobewa ye Pol nga Pita yekeholec bole balu gawec. Aime gocnedi hibi yago wafelu yanguc ngageibong, Pita ye Yesule siduc gocne edolu weducnowec.

Yesu ye homame hifa 25 ngama ingucne motome, Marekodi molickelu Yesule siduc yago kwelengkewec. Roma ngic-ngigac yenge yanguc milu gaibong, “Tapili yogo wiyac feicne aigac.” Ilec Mareko ye Roma ngic-ngigac yengele ngagelu Yesule aibaba tapilineholec homacne kwelengkelu Yesule yowa gocne sugu kwelengkewec.

### *Yowa yago hibi nevocina fagac*

1:1-13 Molic-molic yowa: Yesu kwesiwec

1:14—8:21 Yesudi Galili iwa lolickelu bole bawec

8:22—10:52 Yesudi Yerusalem iwa hikegacgu bole bawec

11:1—14:42 Yesudi Yerusalem iwa bole balu weduyelewec

14:43—16:20 Yesu balu webong homawec, ailu gboliyelu fangkewec

### *Yoane misa-lowac*

*Mat 3:1-12; Luk 3:1-9; 3:15-17; Yoa 1:19-28*

<sup>1</sup> Yago Yesu Kristo Wapongte Madec, yele Siduc Madicne molickelu fikewec. <sup>2</sup> Yogolec siduc Wapongte siduc-mimi ngic Yesaiyadi yanguc kwelengkewec fagac, “Ngagegic, na mic-yowa mimine salebe yedi molickegelelu yefegone bame madickegeledaicte.”

*(Mal 3:1)*

<sup>3</sup> “Aime himong kisiwa misaine mikacka yedi yanguc sanangne wackedaicte, ‘Ngenge Sugucnele yefe wesackelu hole-wenengkening.’”

*(Yes 40:3)*

<sup>4</sup> Yowa yogolec silicka Yoane kwesiwec. Kwesilu himong kisiwa misaine mikacka galu ngic-ngigac kwelengineng hefaliyeme bikicngineng miyac aime misa lowaningte edocebalu weduyelewec. <sup>5</sup> Aime ngic-ngigac yenge Yudeya himongkacni nga Yerusalem taonkacni sasawadi yela hikeibong. Hikelu bikicngineng mifickebong yedi Yodan misawa domalu misa lowayelewec.

<sup>6</sup> Yoane ye ngakpiine kamel dowecinedi baicne, yogo holelu umbikaine monic sic socinedi baicne, yogodi hewacina hefelu gawec. Ailu ye ipowa nga hasengte begeg misaine nolu gawec. <sup>7</sup> Ye ngic-ngigac yowa yanguc edocebalu weduyelewec, “Ngic nale lobewa kwesidaicte, yele tapilidi nale tapili ewaligac. Na waweweine ingucnedi ngosockelu yele hige-ebecte mucine lukebe nalic mi madickedaicte. <sup>8</sup> Na misa lowangelegabac. Nga yedibac kwesilu Tili Asudi lowangeledaicte.”

### *Yesu misa lowacnowec*

*Mat 3:13-17; 4:1-11; Luk 3:21-22; 4:1-13*

<sup>9</sup> Hadeng monic Yesu ye Nasaret taon Galili prowins yogo hegilelu Yodan misawa hike sulumewec. Hikeme Yoanedi misa lowacnowec. <sup>10</sup> Lowacnome Yesu ye misawacni ofeme, iwahac honocmeng angkeme Asudi tudiling nangole silic ingucne ailu yela wame nganiwec. <sup>11</sup> Nganime honocmengkacni mic-yowa monic yanguc fikeme ngagewec, “Ga nale madec, kwelenedi gale angac ngagegabac, na ga ngani-angac aigelegabac.”

<sup>12</sup> Aime iwahac Asudi Yesu saleme himong kisiwa misaine mikacka hikewec. <sup>13</sup> Hikelu hadeng 40 gaemewa Satang yedi lokwesacka lowec. Kwesackeme sanangne domalu katesic yengeholec gacgume angelo yengi bafickelu gaibong.

### *Yesu ye boleine fungkelu bawec*

*Mat 4:12-22; Luk 4:14-15; 5:1-11*

<sup>14</sup> Ngic yengi Yoane muc-macka lobong ngiyeme, Yesu ye Galili prowinswa hikelu Wapongte Siduc Madicne edocebalu weduyelelu <sup>15</sup> yanguc miwec, “**Dameng biyac welegac. Wapongte ngani-damongti bangkalecngabagacte, ngenge kwelengineng hefaliyeme Siduc Madicne ngagesingkening.**”

<sup>16</sup> Aime Yesu ye Galili lifuc mecina hikecgu, Saimon nga gbaine Endru nganicepame yeke ufinginec wickelu domaiboc. Yeke misa-sic baba ngic gaiboc. <sup>17</sup> Nganicepalu Yesudi yanguc edocepawec, **“Ngeke wele na balaibecnunic. Ngic yengi misa-sic bacaigaing, ngeke silicine yogo ingucnehac ngic-baba bole banicte wedungetedacte.”** <sup>18</sup> Inguc mime yeke iwahac ufinginec hegilelu Yesu balaibeiboc.

<sup>19</sup> Ailu yenge iwa lelu Yesudi Sebedi madeckecine, Yakobos nga gbaine Yoane nganicepawec. Yeke gombawa ufinginec bamadickelu ngiyeiboc. <sup>20</sup> Ngiyeebocka yedi nganicepalu wacepame yeke ngageiboc. Ngagelu iwahac mamacnginec Sebedi nga bole-ngicfocine gombawa ngiyeibong, yenge hegilecebalu Yesu balaibeiboc.

*Aleng wonongkolec yebiyewec*

*Luk 4:31-37*

<sup>21</sup> Aime yenge Kapeneam taonka hikelu sulumeibong. Hike sulumelu gabong Sabat dameng aime, Yesudi kpakpaduc macka felu Wapongte yowa weduyelewec. <sup>22</sup> Aime yedi yowa weduyelewec, yogo ngic bolele hibi bacaigaing, yengele silic ingucne bole-yowa tapiliineholec weduyelewec. Ailu Wapongte yefe-yowale wewedu ngic yenge hibiwacni nganilu micaigaing yenge ingucne mi miwec. Ilec ailu yenge yowa weduyeleme ngagelu kwatackeibong.

<sup>23</sup> Aime dameng iwahac kpakpaduc macka ngic monic aleng wonongkolecti ngiyelu aukwelu yanguc miwec, <sup>24</sup> “Yesu Nasaret-hocni, ga nongela wenuc ainogale ngagegic? Ga basowalecnubanogale kwesigic, me? Na ngagegabac, ga Wapongte bingec.”

<sup>25</sup> Inguc mime Yesudi aleng wonongkolec yowa sanangne aicnolu yanguc edowec, **“Ga waickelu ngickacni ofelu hikenong!”** <sup>26</sup> Inguc mime aleng wonongkolecti ngic kpenda-kpendaelu wepackelu tapiliineholec aukwelu ofelu hikewec.

<sup>27</sup> Hikeme ngic-ngigac sasawadi kwatackelu medecebame yengilangkac uwanaguibong, “Yogo oma wiyac fikegac? Yogo wewedu gbolicne, ailu ye bole fileinele tapiliineholec wedunolegac. Aime aleng wonongkolec inguchac yowa edocebame yenge yowaine ngagelu balaibegaing!” <sup>28</sup> Aime siducinedi Galili prowinswa biyachenang hikelu saweyackewec.

*Pita sefengngine*

*Mat 8:14-15; Luk 4:38-39*

<sup>29</sup> Aime yenge kpakpaduc mackacni waibong. Aime Yakobos nga Yoane yeke momoc Saimon nga Endru, yekela macka hikeibong. <sup>30</sup> Hikelu feibong, iwa Saimon sefengngine ye soc-dac aicnome fawec, yogolec Yesu edoibong. <sup>31</sup> Edobong Yesudi yela lelu moleina balu bafangkewec. Bafangkeme iwahac hucine miyac aiwec, aime yedi nosingka baficebawec.

*Ngic-ngigac bocyac bamadicebawec*

*Mat 8:16-17; Luk 4:40-41*

<sup>32</sup> Inguc aime mac debolenogale aime, ngic-ngigac yengi ngic-ngigac huckolec nga alengkolec sasawa bacebalu Yesula kwesiibong. <sup>33</sup> Aime taonka ngic-ngigac sasawa yenge mac nuina kpaduckeibong. <sup>34</sup> Kpaduckeebongka, Yesudi ngic-ngigac huc haicine monic-monicti basowalecebaicne yenge bamadicebalu aleng bocyac yebicebawec. Aime aleng yebicebawec, yogo yenge yele fungine ngageibongte ailu, aleng yengi yele fungine midainkale, mimacebawec.

*Wapongte yowa miwec*

*Luk 4:42-44*

<sup>35</sup> Aime mac mi saemewa, Yesu ye ubiyactebenang fangkelu taon hegilelu mac monic ngic mikacka hikelu milockewec. <sup>36</sup> Milockeemewa, Saimon nga agofocine yenge ye basackelu <sup>37</sup> hike bafuwalu yanguc edoibong, “Ngic-ngigac sasawadi ga basacgugaing.”

<sup>38</sup> Inguc mibong yanguc edocebawec, **“Taon gocne bangkacne ngiye-hikegac, nongilew iwa hikelu na yowa edocebalu weduyeledacte. I yangucte, na bole yogo hocne banogale kwesiiba.”** <sup>39</sup> Inguc mime yenge Galili prowinswa lolickelu hikeibong. Hikelu kpakpaduc macnginangsoc yedi yowa edocebalu weduyelewec, ailu aleng yebicebawec.

*Ngic waic-sanangkolec*

*Mat 8:1-4; Luk 5:12-16*

<sup>40</sup> Aime ngic waic-sanangkolec monicti yela kwesilu ketadi holelu dogbac aicnolu yanguc miwec, “Ga ngageng angacgugacka, na nalic bamadicnung gbagbackedacte.”

<sup>41</sup> Inguc mime Yesudi yele kweleine sowaleme moleine sungkelu ngic bauwalu yanguc edowec, **“Madicckecte angacnugac.”** <sup>42</sup> Mime iwahac waicine wisiyeme socine madickewec.

<sup>43</sup> Madickeme Yesudi ngic yogo mimackelu salelu yanguc miwec, <sup>44</sup> **“Ngagegic, socgona pasi fikegac, yogolec monic mi edodamec. Ga depec-baba ngic yela hikelu socgone gbagbacne aigac, yogo edaliyengka, Mosesdi ibule miwec, yogolec silicina balaibelu lacnodamec! Ga inguc lacnoengka yenge ibugone nganilubac ngagemotodaingte.”** <sup>45</sup> Inguc mime ye hikelu sifu siduc yogo milu edocebame sawewec. Illec ailu habutowadi kwesi-kpaduckelu domadaingkale, Yesu ye taonka hatacmac yegena mi gawec. Ye taon lobina himong kisiwa misaine mikacka sugu gacgume ngic-ngigac neboch nga nebockacni sifu ye ngagesilu kwesiyackeibong.

## 2

*Yesu ye bikic hegile-hegile ngic*

*Mat 9:1-8; Luk 5:17-26*

<sup>1</sup> Hadeng gocne motome, Yesu ye hatacmac Kapeneam taonka hikelu macka fewec. Feme ngic-ngigac bocyacti yogo ngagelu <sup>2</sup> macka wakelu nuine hedickeibong, yedi Wapongte yowa edocebalu weduyelewec. <sup>3</sup> Aime ngic <sup>4</sup> yenge ngic monic hige-moleine homaicne tengkelu yela hikeibong. <sup>4</sup> Ngagebong, ngic-ngigac bocyacti kwedickelu domaiibong. Illec ailu emeina lonogale kpungkelu mac feina tengkelu feibong. Felu mac hubuine nebochine basulackebong kikungngine fikewec. Fikeme yenge Yesu domawecka iwa ngic-puling dembengkolec lobong hauwec. <sup>5</sup> Haume Yesudi ngage-ngagesingngineng nganilu ngic-puling yanguc edowec, **“Madecne, bikicgone biyac hegilegelegabac.”**

<sup>6</sup> Inguc mime Wapongte yefe-yowale wewedu ngic gocne yenge iwa ngiyeibong, yengi kwelenginang yanguc ngageibong, <sup>7</sup> “Ngic yogo ye omale yowa inguc milu Wapong fecnogac! Wapong moniyangti sugu bikic nalic hegiledaicta.”

<sup>8</sup> Yenge inguc ngagebong, Yesudi kwelenginang nganilu yanguc edocebawec, **“Ngenge omale ngage-ngage ingucne kwelenginengti ngagesigaing?”** <sup>9</sup> **Weni yogodi efecne aigac? Ngic-puling yele yanguc minoga, ‘Bikicgone biyac hegilegelegabac’, me yanguc minoga, ‘Ga fangkelu dembenggone balu hikec.’** <sup>10</sup> Aime Ngicte Madec, ye himongka bikic hegilenale bole-yowa tapiliineholec facnogac, **ngengi yogo ngageningte ailu yanguc mibe.”** Ye inguc milu ngic-puling yanguc edowec, <sup>11</sup> **“Na edocgugabac, ga fangkelu dembenggone balu macgona hikec.”** <sup>12</sup> Inguc mime iwahac ngic ye fangkelu dembengngine balu ngic-ngigac yengele haicka hikewec. Hikeme ngic-ngigac sasawadi yogo nganilu kwatackelu mimedec ailu Wapong wacine bafelu yanguc miibong, **“Wiyac yago mi ngani-nganiine yogo yakumac fikeme nganigabeleng.”**

*Yesudi Liwai wackewec*

*Mat 9:9-13; Luk 5:27-32*

<sup>13</sup> Aime Yesu ye mac iwacni walu lifuc mecina hikewec. Hikeme ngic-ngigac bocyacti yela hikeibong wewedu bole bawec. <sup>14</sup> Aime hikelu Liwai Alfaiusle madec, ye takes-baba macka ngiyeme nganilu yanguc edowec, **“Ga wele na balaibecnuc!”** Inguc mime ye fangkelu balaibelu hikewec.

<sup>15</sup> Hikecgu Yesu ye Liwaile macka nosing nolu ngiyeme, takes-baba ngic nga bikic-baba ngic bocyacti Yesu nga mic-tengtengfocine yengeholec nosing momoc noibong. Ngic ingucne bocyacti yenge balaibecebalu gaibong. <sup>16</sup> Inguc aime Yesu ye takes-baba nga bikic-baba yengeholec ngiyelu nosing nowec. Nome Farisaio yengelacni Wapongte yefe-yowale wewedu ngic gocne, yenge yogo nganilu mic-tengtengfocine yanguc uwayeleibong, **“Ye omale takes-baba nga bikic-baba yengeholec nosing nogac?”**

<sup>17</sup> Inguc miibong Yesudi ngagelu yanguc edocebawec, **“Ngic-ngigac hucngineng mikac gagaing, yenge dotale mi aiyelecaigac. Nga hucnginengkolec, yengibac dotale aiyelecaigac. Aime na ngic-ngigac dondonne wacebabe nala weleningte mi waiba, miyac. Nabac bikic-baba ngic wacebabe nala weleningte waiba.”**

*Nosing-sawe gaga*

*Mat 9:14-17; Luk 5:33-39*

<sup>18</sup> Yoane mic-tengtengfocine nga Farisaio yenge nosing-sawe gacaigaing, yengelacni gocnedi kwesilu Yesu yanguc uwacnoibong, **“Yoane mic-tengtengfocine nga Farisaio yengele mic-tengtengfocine yenge nosing-sawe gacaigaing. Aime gale mic-tengtengfocine yenge omale nosing-sawe mi gacaigaing?”**



<sup>19</sup> Inguc uwacnobong Yesudi yanguc edocebawec, **“Baba-tumangte ngicti agofocine yengeholec ngiyeme yenge nosing-sawe nalic gadaingte, me? Ye yengeholec ngiyedaicte iwa nosing-sawe nalic mi gadaingte.** <sup>20</sup> Gacgu dameng monicka ngic yengi baba-tumangte ngic agofocine yengelacni baickedaingte, dameng yogowabac nosing-sawe gadaingte.

<sup>21</sup> **“Monicti ngakpi esecna kpoluc sindacine gbolicne monic mi gbododaicte. Inguc aidaictewa, suweme kpoluc susucine gbolicnedi esecne fuluckeme sulackelu yefine suguledaicte.** <sup>22</sup> **Aime monicti waing gbolicne bokong sic socine esecnedi baicne, iwa nalic mi kweme haudaicte, miyac. Waing gbolicnedi siwinelu bokong esecne kwouckeme yeke momochac sowaledabiyecte. Ilec ailu waing gbolicne yogodi bokong gbolicna socne kweme haudaicte.”**

*Sabatle Sugucne*

*Mat 12:1-8; Luk 6:1-5*

<sup>23</sup> Dameng monicka Sabat damengka Yesu ye wit bole hewacina yefe balabelu leme, mic-tengtengfocine yenge wit noine moniyang moniyang bamoctolu baibong. <sup>24</sup> Bamoctobong Farisaio yengi yogo nganilu yanguc miibong, “Nganinong, yenge omale Sabat damengka aibaba mi aiaaine aigaing?”

<sup>25</sup> Inguc mibong Yesudi ngageme madicne mi aime yenge yanguc edocebawec, **“Dawidi nga bole-ngicfocine yenge nosing mikac aime nosingte homalu aibaba aibong, ngenge yogo wafe-ngagac mi aicaigaing, me? <sup>26</sup> Abiatadi depec-baba ngic yengele dameng sugucne gawec, dameng iwa Dawidi ye Wapongte Ibu-macka fewec. Felu bret Wapongte ibu loicne, yogo banolu bole-ngicfocine inguchac gumecbawec. Nga bret yogo depec-baba ngic yengi sugu nalic nodaingte, ngicbenang yengibac miyac. Aimebac Wapongti yengele mi ngage-sowalewec.”**

<sup>27</sup> Inguc milu yanguc edocebawec, **“Ngicti Sabatle ailu mi fikewec, Sabat ye ngic-ngigac ngengele ailu fikewec.** <sup>28</sup> **Ilec ailu Ngicte Madec ye Sabatle Sugucne gagac hocne, ye aibaba madicne nga sowacnele nalic midaicte.”**

### 3

*Ngic moleine homaicne*

*Mat 12:9-14; Luk 6:6-11*

<sup>1</sup> Yesu ye dameng monicka kpakpaduc macka hatacmac feme ngic monic moleine nehoc homaicne, ye iwa ngiyewec. <sup>2</sup> Aime ngic gocne yenge Yesu yowawa lonogale ngagesibong. Ailu ngic yogo Sabat damengka bamadickedaicte me miyac, yogolec nganibiyeibong. <sup>3</sup> Nganibong Yesudi ngic moleine homaicne yanguc edowec, **“Ga fangkelu nongele hewacka domac.”**

<sup>4</sup> Inguc milu yanguc uwayelewec, **“Sabat damengka aibaba weni yogo nalic ainoga, aibaba madicne me sowacne ainoga? Ailu homanogale aigaing, yengele agong holenoga me wehomacebanoga?”** Inguc mime yenge moc uc mikac ngiyebong.

<sup>5</sup> Yenge kwelengineng fongkewecte ailu uc mikac ngiyebong, ngage-hobelevu kweleine aalickeme dongedi lengani-welengani ailu ngic yanguc micnowec, **“Ga molegone sungkec!”** Inguc mime ngic ye moleine sungkelu madickewec. <sup>6</sup> Madickeme Farisaio yenge dameng iwahac Herodele alingfocine yengela hikelu yefe monic bafuwalu ye balu wehomanogale yowa milu hefeibong.

*Yesula kwesiibong*

*Luk 6:17-19*

<sup>7</sup> Aime Yesu nga mic-tengtengfocine yenge mac-himung yogo hegilelu Galili lifucka hikeebongka, Galili prowinswacni ngic-ngigac habu sugucnedi yenge balaibecebaibong. <sup>8</sup> Aime Yudeya himongkacni ngic-ngigac, nga Yerusalem taonkacni, ailu Idumea himongkacni, nga Yodan misa nebcinacni, ailu Tair nga Saidon himongkacni, habutowa yogo yenge Yesudi pasi sasawa bawec, yogolec siduc ngagelu yela kwesiibong.

<sup>9</sup> Aime ngic-ngigac bocyacti kwesilu Yesu igockedaingkale ailu, mic-tengtengfocine yengi gomba balu yele wangec lobong fanale milu edocebawec. <sup>10</sup> I yangucte, ye ngic bocyac bamadicebawecte ailu huckolec yenge hikelu oiyaningte hepacnaguibong. <sup>11</sup> Aime aleng wonongkolec yengi Yesu nganilu ngosockelu aukwelu yanguc miibong, **“Ga hocne Wapongte madec.”**

<sup>12</sup> Inguc milu yeicne fungine mibong yegengkedaickale ailu, Yesudi mimacebawec.

*Mic-tengtengfocine 12 bawosaecebawec*

*Mat 10:1-4; Luk 6:12-16*

<sup>13</sup> Aime ye kupicka felu mic-tengteng gocne kweleinedi yeicneholec ganingte ngagesiwec, yogo mime yela hikeibong. <sup>14-15</sup> Hikebong mic-tengtengfocine 12 bawosaecebalu Salecebaicne wac yelewec. Yeleme yenge yeholec galu ngic-ngigac yowa edocebalu weduyeleningte, nga aleng yebicebaningte bole-yowa tapiliineholec yelewec.

<sup>16</sup> Ngic 12 bawosaecebawec, yengele wacngineng yanguc:

Saimon, wacine monic Pita wackewec. Ailu

<sup>17</sup> Sebedi madeckecine, Yakobos nga

gbaine Yoane, yekele wacnginec Boaneges yetewec. Wac yogolec fungine, gbululungte madec.

<sup>18-19</sup> Aime Endru nga

Filip. Ailu

Batolomeu nga

Mataio. Ailu

Tomas nga

Yakobos, yogo Alfaiusle madec. Ailu

Tadeus nga

Saimon, ye Selot wackeibong. Ailu

Yudas Iskariot, yedi gagcu Yesu mudockeme badaingte.

*Belsebulholec bole bacaigac, me?*

*Mat 12:24-32; Luk 11:14-23; 12:10*

<sup>20</sup> Aime Yesu ye macka hikeme habutowadi kwesilu kpaduckeibong. Aime mic-tengtengfocine yengeholec nosing nolu ngiyenogale sawaine monic mi fikeyelewec.

<sup>21</sup> Aime ngic hae-gbafocine yenge inguc ngagelu yanguc miibong, “Ye kweleine sifuwegac.” Inguc milu ye banogale hikeibong.

<sup>22</sup> Aime Wapongte yefe-yowale wewedu ngic Yerusalemkocni kwesiibong, yengi yanguc miibong, “Ye aleng yengele micne Belsebul, yele tapiliwa bole balu ngic-ngigac yengelacni aleng yebicebacaigac.”

<sup>23</sup> Inguc mibong Yesudi wacebalu nangeng yowa monic yanguc milu edocebawec, **“Satang yeuctihac wenuc yebicnagudaicte? <sup>24</sup> Nga himong monicte ngic-ngigac yenge ngaba ainagulu siyeckedaingtewa, himongte ngic-ngigac yenge nalic mi gagidaingte, miyac. <sup>25</sup> Aime golowac monicte siyeckelu ngaba ainagudaingtewa, golowac yogo gilodaingte. <sup>26</sup> Aime Satang yeuctihac siyeckelu yebicnagudaicte, ye inguchac nalic mi gadaicte. Ilec na yele tapiliwa aleng mi yebicebagabac.**

<sup>27</sup> **“Ngc monicte ngic tapiliineholec, yele macka felu woc-wiyacine nalic mi ewalilu badaicte, miyac. Ye ngic tapiliineholec yogo mucti dodockelubac macine kwelina felu woc-wiyacine fagac, yogo nalic bayackedaicte.**

<sup>28</sup> **“Foinac, ngic-ngigac yenge bikic haicine monic-monic aicaigaing, nga misulec aiyelecaigaing. Bikic ingucne sasawa, hegile-hegileine yogo fagac, yogo noine edocngebagabac. <sup>29</sup> Nga monicte Tili Asu misulec aicnodaicte, yele sowacne nalic mi hegiledaicte. I yangucte, ye sowacneinele ameine yogo fafeginowagac.”**

<sup>30</sup> Aime yengi yanguc miibong, “Ye aleng wonongkolec.” Inguc miibongte ailu ye yowa inguc edocebawec.

*Yesu nenggac gbafocine*

*Mat 12:46-50; Luk 8:19-21*

<sup>31</sup> Aime Yesu nenggac gbafocine yenge mac lobina hike sulumelu ngic monic salelu yanguc miibong, “Ga Yesu micnoengka wana.”

<sup>32</sup> Inguc mibong habu yenge Yesu hewalingke-ngiyelu yanguc edoibong, “Ngagegic, nenggac gbafocgone yenge lobina kwesi domalu ga basacgugaing.”

<sup>33</sup> Inguc mibong yedi yanguc edocebawec, **“Weni yogo yengi nale nenggac gbafocne?”**

<sup>34</sup> Inguc milu lollicke-ngiyeibong, dongeine yengela hilalu yanguc miwec, **“Ngc-ngigac yago ngiyegaing, ngengi nale nenggac gbafocne aigaing. <sup>35</sup> Aime ngic Wapongte angac nga ngage-ngage balaibecaigaing, yengi hocne nale nenggac-sengfocne nga ngic hae-gbafocne aigaing.”**

## 4

*Wasec wicke-wicke*

*Mat 13:1-9; Luk 8:4-8*

<sup>1</sup> Yesu ye lifuc mecina hatacmac hikelu ngic-ngigac yowa edocebalu weduyeleme, ngic-ngigac bocyachenangti kpaduckelu yela kwesiibong. Inguc aibong ye gomba monicka felu iwa ngiyeme, ngic-ngigac himongka domabong mic-yowa edocebawec. <sup>2</sup> Ailu ye nangeng yowawa siduc bocyac weduyelevu yanguc miwec, <sup>3</sup> **“Ngagegaing, wasec wicke-wicke ngic monicti huc-wasec wickenale bolewa hikewec.** <sup>4</sup> **Hikelu wasec wickeme, wasec gocne yengi walu yefewa holeibong, yogo nango yengi kwesilu nowackeibong.** <sup>5</sup> **Nga gocnedi posa tolowa holeibong, iwa himong efecnemac fawecte, wasec yogo kwac biyac kwodulu ofeibong.** <sup>6</sup> **Ofebong godocngineng mi hauibongte ailu, wenacti ofelu kweme ululuwelu homaibong.** <sup>7</sup> **Nga wasec gocnedi kpinding kwelina holeibong. Holelu kwac kwodubong kpindingti sugulelu holebong noine mikac aibong.**

<sup>8</sup> **“Nga wasec gocnedi himong guwecineholecka holelu kwacine kwodulu noine madicne aibong. Monicte hucine yogo 30, nga monicte 60, nga monicte 100, inguc aibong.”** <sup>9</sup> Yesu ye inguc milu yanguc edocebawec, **“Monic ye hedeckolecti yowa yago aneng ngagedaic.”**

*Nangeng yowale fungine*  
Mat 13:10-17; Luk 8:9-10

<sup>10</sup> Aime ngic-ngigac habutowa yenge hikebong, mic-tengtengfocine 12 nga ngic-ngigac gocne yeholec gacaigaing, yengi nangeng yowa yogolec funginele Yesu uwacnoibong. <sup>11</sup> Uwacnobong yedi yanguc edocebawec, **“Wapongte ngani-damongte ngage-ngage sangkeicne, yogo ngengi ngageningte biyac ngeleicne. Aime ngic-ngigac Wapongte ngani-damongte lobina gagaing, yengebac nangeng yowa sugu ngagegaing.** <sup>12</sup> **Inguc aime**

**‘Yenge dongenginengti wiyac monic nganilu nalic mi ngani-motogaing. Nga hedeccnginengti yowa monic ngagelu, sifu nalic mi ngage-motogaing. Ilec ailu yenge kwelengineng hefaliyeme bikicngineng miyac aidaickale, bikicngineng nalic mi hegiledaicte.’ ”**  
(Yes 6:9-10)

*Wasec wicke-wicke fungine*  
Mat 13:18-23; Luk 8:11-15

<sup>13</sup> Aime Yesudi yanguc edocebawec, **“Na nangeng yowa migabac, ngenge yogolec fungine mi ngage-motogaing, me? Ailu nangeng yowale fungine gocne hatacmac mibe yogo inguchac wenuc ngage-motodaingte?”** <sup>14</sup> **Wasec wicke-wicke ngicti Wapongte yowa wickecaigac.** <sup>15</sup> **Wasec yefewa holeibong, yogo ngic gocne yenge yowaine ngagedaingte. Aime Satang yedi biyac kwesilu yowa kwelenginang wickeicne fagac, yogo yedi baickeyelecaigac.**

<sup>16</sup> **“Nga wasec posa tolowa holeibong, yogo ngic gocne Wapongte yowa ngagelu kwelenginang biyac beliyelu sebilelu badaingte.** <sup>17</sup> **Ailu yowa kwelenginang godocine mi baicnele dameng kpisicnemac fame, Wapongte yowale ailu umac me weyebic aiyebong yenge wawedaingte.**

<sup>18</sup> **“Nga wasec kpindingka holeibong, yogo gocnedi Wapongte yowa ngagedaingte.** <sup>19</sup> **Ngagelu socte gagale ngageboc, nga moneng-mafale lokwesac nga wiyac gocnele ngani-angac aicaigaing, yogodi kwelenginang haulu sugulelu yowa hole-homame noine monic mi fikedaicte.**

<sup>20</sup> **“Nga wasec gocne himong guwecineholecka holeibong, yogo ngic gocnedi Wapongte yowa ngagelu balu gabong noine fikedaicte. Gocnedi 30, nga gocnedi 60, nga gocnedi 100 bafuwadaingte.”**

*Hifa mac ngiye-ngiyeina lonoga*  
Luk 8:16-18

<sup>21</sup> Inguc milu yanguc edocebawec, **“Monicti hifa kwendangkelu pakec bageina lome someckecaigac, me? Me mac ngiye-ngiyeinele bagewa lome ngiyecaigac, me? Yogo miyac! Ye hifa yogo kwendangkelu mac ngiye-ngiyeina lome ngiyecaigac.** <sup>22</sup> **I yangucte, wiyac sangke-sangke fagac, yogo gacgu yegengkedaicte. Nga wiyac someckeicne, yogo gacgu fikedaicte.** <sup>23</sup> **Monic ye hedeckolecti yowa yago aneng ngagedaic.”**

<sup>24</sup> Ailu Yesudi yanguc edocebawec, **“Ngenge yowa yago ngage-motodaing. Ngenge wiyac umacine wosaelu ngic-ngigac yelecaigaing, aime umacine silicine ingucne-hac wosaelu ameine ngeledaicte. Aime ngage-ngage-motoc hatacmac taockelu ngeledaicte.** <sup>25</sup> **I yangucte, monic ye wiyac gocne balu gagac, ye wiyac hatacmac**

**Iacnodaicte. Nga monic ye wiyac monic mi balu gagac, yelacni wiyac kpisicne balu gagac, yogo ewalidaicte.”**

*Wasec yogo noineholec*

<sup>26</sup> Ailu hatacmac yanguc miwec, “**Wapongte ngani-damongte silicine, yogo ngic monicti wasec wickecaigac, yogo ingucne.** <sup>27</sup> Wickelu deboc hadeng fac-fangkec aiyemewa, wasec yogo kwodulu ofecaigac. Aime yogo yefe wenucka ofegac, yogo ngic ye mi ngage-motocaigac. <sup>28</sup> Aime himong yeuctihac wiyac basuguleme ofelu hekengngine aicaigac. Ailu noine sugulelu houwecaigac. <sup>29</sup> Houweme noine babale dameng aime ye noine biyac welockelu badaicte.”

*Wapongte ngani-damong nga mastet hucine*

*Mat 13:31-32,34-35; Luk 13:18-19*

<sup>30</sup> Yesudi hatacmac yanguc miwec, “**Nongileng Wapongte ngani-damongte silicine wenuc holelu nangeng yowa mibeng nalic aidaicte?** <sup>31</sup> Wapongte ngani-damong yogo mastet hucine ingucne. Mastet hucine yogo wasec hucine sasawa yengele kpisicnengingeng. <sup>32</sup> Aime yogo himongka lobong ofelu sugulelu nosing-bolele mendang ewalicebalu mangngine sugucnehac aicaigac. Aime sawawa nango yengi kwesilu yogolec mangngina yafu holelu ngiyecaigaing.”

<sup>33</sup> Yesu ye nangeng yowawa siduc ingucne bocyac milu ngic-ngigac ngage-ngagengingte silicina Sugucnele yowa edocebawec. <sup>34</sup> Ailu yowa miwec, yogo nangeng yowawa sugu holelu edocebalu gawec. Edocebalu mic-tengtengfocine sugu bacebame yengilangkac hikelu fungine milu edocebame yegengkeme ngagelu gaibong.

*Gbelongti yowa ngagewec*

*Mat 8:23-27; Luk 8:22-25*

<sup>35</sup> Aime mac aweleme Yesudi mic-tengtengfocine yanguc edocebawec, “**Nongileng lifuc nebocina hikenang.**” <sup>36</sup> Inguc mime yenge ngic-ngigac habutowa hegilecebalu Yesudi gombawa biyac felu ngiyewec, gomba iwa yenge ye mengockelu hikeibong. Hikeebongka gomba gocne inguchac balaibecebaibong. <sup>37</sup> Aime iwahac gbelong sugucne tapiliineholec welu dibongti gomba kwelina haulu bamungkenogale aiwec. <sup>38</sup> Aime Yesu ye gomba haina hodoc-kpaling holelu gung fame, mic-tengtengfocine yengi yeuckelu yanguc miibong, “Wewedu, nongileng haulu homadabelengkale, ga yogolec ngageboc mi aigic, me?”

<sup>39</sup> Inguc mibong ye gungkacni fangkelu gbelong ngelengkelu kpatalacnolu lifuc yanguc edowec, “**Ga waickelu fanong!**” Inguc mime gbelong miyac aime lifuc yogo kalong kwelu moc fawec.

<sup>40</sup> Fame Yesudi mic-tengtengfocine yengele yanguc miwec, “**Ngenge omale hangoc aigaing, ngage-ngagesingngineng monic mi fagac, me?**”

<sup>41</sup> Inguc mime yenge hangoc ailu damuebame yengungtihac yanguc uwanaguibong, “Ye ma ngic, aime gbelong nga misa lifuc yeke yele yowa ngagegabiye?”

## 5

*Aleng yebiyewec*

*Mat 8:28-34; Luk 8:26-39*

<sup>1</sup> Aime lifuc falockelu Gerasa ngic-ngigac yengele himong nebocina ediyec woboc hikeibong. <sup>2</sup> Hike sulumelu Yesu ye gombawacni wawec. Iwa ngic monic aleng wonongkolec gawec, yedi dongesiwacni kwesilu Yesu bafuwawec. <sup>3</sup> Ngic yogo ye dongesiwa\* ngiye-fac ailu gawec. Game ngic monicti ye hatac nalic mi witickeidaicte. Yenge senti witickeogale aibibiyeibong. <sup>4</sup> Ngic yengi dameng bocyac hige-moleine senti witickeibong, ye sen yogo welockeyackewec. Aime higeine aen sen sugucnedi witickeibong, yogo inguchac welockeyackewec. Aime ngic yenge ye balu damongkenogale aibibiyeibong.

<sup>5</sup> Ngic yogo ye deboc hadeng dongesiwa nga fegengka aukwelu yeuctihac socine posadi helockelu gawec. <sup>6</sup> Ailu ye dalickahac domalu Yesu nganilu gasacke hikelu ketadi holecnowec. <sup>7-8</sup> Holecnome Yesudi aleng wonongkolec yelacni yebiyeme ofelu hikenale edowec. Inguc edome ngic yedi dacineholec aukwelu yanguc miwec, “Yesu Wapong Feicnetowale Madec, ga nala wenuc ainogale ngagegic? Na Wapongte haicka edocgugabac, ga doicka mi locnudamec.”

<sup>9</sup> Inguc mime Yesudi yanguc uwacnowec, “**Ga wacgone ma?**”

**4:25:** Mat 13:12; 25:29; Luk 19:26    **4:29:** Yol 3:13; Miye 14:15    \* **5:3:** Mac iwa henebe kwelina dongesi fawec. Ilec ye mac ingucne ngiye-fac ailu gawec.    **5:7-8:** Mrk 1:24

Uwacnome miwec, “Na wacne Habutowa. I yangucte, nonge bocyac.”<sup>†</sup> 10 Ye inguc mime Yesudi yenge yebicebame himong yogo mi hegileningte dogbac ailu micnowec.

<sup>11</sup> Aime himong iwa bec habu sugucne monic fegengka yogowahac sulukwelu gaibong. <sup>12</sup> Gaebongka aleng yengi yanguc milu dogbac aicnoibong, “Ga salecnubaengka becca haunang.” <sup>13</sup> Inguc mibong Yesudi ngageyelelu yebicebame yenge baickelu bec-habu yengela haubong. Haubong bec yenge fegengkaacni gasackelu lifucka haulu misa nolu homayackeibong. Aime bec homaibong, yengele dzalengineng yogo 2 taosen ingucne.

<sup>14</sup> Homabong bec-damong yenge hangoc hikelu taonka nga mac-gogocka ngic-ngigac gaibong, yengela hikelu pasi fikewec, yogolec siduc edocebabong yenge yogo nganinogale kwesiibong. <sup>15</sup> Aime yenge Yesula kwesilu nganibong, ngic aleng habutowaholecti esecne gawec, ye ngage-ngageine dulungkeme ngage-motolu ngakpi-kpoluc holelu ngiyeme, yenge ye nganilu hangocebawec. <sup>16</sup> Aime ngic dongenginengti pasi fikeme nganiibong, yengi ngic alengkolec, yela pasi ingucnehac fikewec, ailu bec yengele siduc yogo momoc ngic-ngigac edocebaibong.

<sup>17</sup> Aime yenge yowa yogo ngagebong motome, Yesu ye yengele mac-himongngineng yogo hegilelu hikenale dogbac aicnolu edoibong.

<sup>18</sup> Inguc edobong ye gombawa feme, ngic alengkoleciti madickewec, yedi Yesuholec hikenale dogbac aicnolu edowec. <sup>19</sup> Edome Yesudi kpatalacnolu yanguc miwec, **“Ga macgona hikelu Sugucnedi gale kweleine sowaleme wiyac sasawa aigelegac, yogolec siduc agofocgone edocebadamec.”** <sup>20</sup> Inguc mime ye hikelu Yesudi pasi sasawa yela bawec, yogolec siduc Dekapolis<sup>‡</sup> himongka ngic-ngigac yowa-siduc yogo milu edocebawec. Edocebame yenge yogo ngagelu mimedec aibong.

*Adu monic bagboliyewec*

*Mat 9:18-26; Luk 8:40-56*

<sup>21</sup> Aime Yesu ye gombawa felu hatacmac lifuc falockelu kwesi domame, ngic-ngigac bocyacti yele yowa ngageningte hikelu kpaduckeibong. <sup>22</sup> Kpaduckeebongka kpakpaduc macte damong monic, wacine Yairus, yedi kwesilu Yesule higewa wafalu <sup>23</sup> dogbac aicnolu yanguc miwec, “Adune homanogale aigac. Ga welelu mologone feina loengka madickelu gana.” <sup>24</sup> Inguc edome ngagelu yeke hikeebocka, ngic-ngigac habutowadi hepacnagulu ye balaiibeibong.

<sup>25</sup> Aime ngigac monic iwa domawec, ye sac-dale aicnome gaemewa hifa 12 biyachac aiwec. <sup>26</sup> Ailu ye dota bocyac yengela hikelu madickenale doic ngagelu monengngine moc wickelu gawec. Aime socine monic mi madickewec, ye socine sowaleme gawechac. <sup>27-28</sup> Aime ngigac yogo ye Yesule siduc ngagelu ngic-ngigac lobenginang yefe lelu yanguc ngagewec, “Na ngakpiine oiyalu madickedacte hocne.” Inguc ngagelu Yesule ngakpi dalicne yogo oiyawec. <sup>29</sup> Oiyame iwahac sacine kelengkewec. Aime socine mogungkeme hucine miyac aiwec, yogo ngagenaguwec.

<sup>30</sup> Aime Yesu ye kweleina ngageime tapiliine tofaine falockewec. Ilec ailu habutowa yengela hefaliyelu yanguc uwayelewec, **“Madi ngakpine oiyagac?”**

<sup>31</sup> Inguc mime mic-tengtengfocine yengi yanguc miibong, “Ngic-ngigac homacnedi hepacgugaing. Aime ga omale madi oiyacnugac milu uwagic?”

<sup>32</sup> Aime Yesudi ngigac oiyawec, ye ngani-motonogale lengani-welengani aiwec. <sup>33</sup> Aime ngigac ye hangoekeme dengdengkeme, Yesule higewa wangiyelelu fungineine sasawa mifickewec. I yangucte, socina pasi fikewec, yogo ngagewec. <sup>34</sup> Yogo mifickeme Yesudi yanguc edowec, **“Ngigac, ga ngage-ngagesinggonedi hamadicgugac. Ga socgone madickegacte kwele-mogungkolec hikenong!”**

<sup>35</sup> Aime Yesu ye yowa milu domaemewa, ngic gocne yengi kpakpaduc macte damong yele mackacni kwesilu Yairus yanguc edoibong, “Adugone biyac homagac, ga wewedu hatacmac umac mi lacnoc!”

<sup>36</sup> Inguc mibong Yesu ye yengele yowa ngagelu kpakpaduc macte damong yanguc edowec, **“Ga kwele-umac mi ngagenong, ga ngage-ngagesingka sugu domanong.”**

<sup>37</sup> Inguc milu habu kpatalayelelu, Pita nga Yakobos ailu gbaine Yoane, yenge sugu bacebame hikeibong. <sup>38</sup> Hikelu kpakpaduc macte damong yele macka sulumelu nganime, hendolong sugucne ailu ngic-ngigac habu yenge kwele-sowac ailu hisonggong aibong.

<sup>39</sup> Aime Yesu ye mac kwelina felu ngic-ngigac yanguc edocebawec, **“Nenge omale hendolong ailu hisonggong aigaing? Adu ye mi homagac, ye gung fagac.”** <sup>40</sup> Inguc mime yenge gouwecnoibong.

<sup>†</sup> 5:9: “Wacne Legion” miwec. Legion yogo ami aling monic, dzalengineng 5 taosen me 6 taosen. <sup>‡</sup> 5:20: Dekapolis yogolec fungine taon 10. 5:30: Luk 6:19 5:34: Mrk 10:52; Luk 7:50; 17:19

Aime yedi ngic-ngigac sasawa yebicebame mac lobina hauyackeibong. Haubong adu nenggac-mamackecine, nga mic-tengtengfocine habackang yenge sugu bacebame adu fawec, iwa leibong. <sup>41</sup>Lelu moleina balu yanguc edowec, “**Talita koumi!**” Yogolec fungine yanguc bafaliyeicne, “**Adu, na edocgugabac, fangkec.**” <sup>42</sup>Inguc mime adu ye yogowahac gboliyelu fangkelu lec-welec aiwec. Aime yenge ye nganilu kwatackeibong. Adu yogo ye hifaine 12 aiwec. <sup>43</sup>Aime Yesudi pasi fikewec, yogo mi mibong yegengkenale sanangne mimacebalu adu nosing lacnoningte edocebawec.

## 6

### *Macfocine yenge Yesu hegileibong*

*Mat 13:53-58; Luk 4:16-30*

<sup>1</sup>Yesu ye himong yogo hegilelu yeicne mac-himongngina hikeme, mic-tengtengfocine yenge ye balaibeibong. <sup>2</sup>Aime Sabat dameng aime ye kpakpaduc macka felu yowa edocebalu weduyeleme ngic-ngigac ngagelu ngiyeibong, yenge mimedec ailu yanguc miibong, “Ngage-ngage-motoc yogo madi weducnowec? Ailu bole-yowa yogo madi lacnowecte moledi pasi damuineholec ingucne balu gagac?” <sup>3</sup>Ye mac-baba ngic. Ye Mariale madec, nga Yakobos nga Yosefe, ailu Yude nga Saimon yengele haengineng, ailu sengfocine yenge nongilengkolec gacaigaing. Ye ngic yogo, me?” Yenge inguc milu lobe-yowa aicnolu ye hegileibong.

<sup>4</sup>Aime Yesudi yanguc edocebawec, “**Ngic-ngigac yenge Wapongte siduc-mimi ngic yele alang bacaigaing. Nga macfocine nga sac-tofafocine ailu golowacfocine, yengi sugu yele alang mi bacaigaing.**” <sup>5</sup>Aime ye pasi damuineholec monic yengela babalesoc mi aiwec. Ye ngic-ngigac huckolec efecne sugu moledi oiyecebame madickeibong. <sup>6</sup>Aime yenge ye mi ngagesingkeibongte ye ngagelu kwatackewec. Ailu ye mac-aling falewecka, iwa lolicke hikelu yowa edocebalu weduyelewec.

### *Bole-yowa yelewec*

*Mat 10:5-15; Luk 9:1-6*

<sup>7</sup>Yesudi mic-tengtengfocine 12 wacebame weleyackeibong. Welebong ngic-ngigac yengelaicni aleng wonongkolec yebicebaningte bole-yowa tapiliineholec yeletu yaeckang yaeckang heucebalu salecebawec. <sup>8</sup>Ailu ye yanguc milu edocebawec, “**Ngenge yefele babafic monic mi balu hikedaing. Yasu sugu badabiyeng. Ngenge nosing me hiye mi balu hikedaing. Ailu moneng monic anggbangka mi umengkedaing.**” <sup>9</sup>Ngenge hige-ebec sugu holedaing. Nga ngakpi yaeckang mi holelu hikedaing. **I yangucte, mac hikedaibiyengte iwa ngic-ngigac yengi baficngebadaingte.**” <sup>10</sup>Inguc milu yanguc edocebawec, “**Ngenge hikeccu mac-aling monicka sulumbekong ngic yengi mac kwelina bacngelalu febong, ngenge mac iwa sugu ngiye-fangkec aidaing. Aibong motome, mac-aling yogo hegilelu mac-himong monicka hikedaing.**”

<sup>11</sup>“**Nga mac-himong monicka hikebong ngic yengi mi hefolecngelalu yowangi-neng mi ngagedaingtewa, nenge higenginangkocni lube webong wame mac-himong yogo hegilelu hikedaing. Aime ngic yenge yogo nganilu Wapongti amengi-neng baduyeleidaicte, yogo ngage-motodaingte.**”

<sup>12</sup>Yesu ye inguc milu salecebame hikelu ngic-ngigac kwelengineng hefaliyeningte Wapongte yowa edocebalu weduyeleibong. <sup>13</sup>Ailu yenge aleng bocyac yebicebaibong. Ailu ngic-ngigac huckolec helocti hosoyelelu bamadicebaibong.

### *Yoane weibong*

*Mat 14:1-12; Luk 3:19-20; 9:7-9*

<sup>14</sup>Yesule siduc yogo himongne himongne sawelu hikeme ngictau Herodedi yowa yogo ngagewec. Gocnedi ngagelu yanguc miibong, “Yoane misa-lowacti homackacni gboliye fangkelu gagac, ye Yesu. Ilec ailu tapili facnogacte pasi damuineholec balu gagac.”

<sup>15</sup>Inguc mibong ngic gocne yengi ngagelu miibong, “Yogo Wapongte siduc-mimi ngic wacine Elaiya.”

Nga gocnedi ngagelu miibong, “Ye Wapongte siduc-mimi ngic hocne. Siduc-mimi ngic esecne gaibong, yenge ingucne.”

<sup>16</sup>Aime Herode ye yowa yogo ngagelu yanguc miwec, “Nani mibe Yoane ubeine welockeibong, yedi hocne gboliyelu gagac.”

<sup>17-18</sup>I yangucte, esecne Herode ye gbaine Filipte ngigac wacine Herodias, ye hise balu gawec. Aibaba yogolec ailu Yonedi Herode yanguc edowec, “Ga gbagonele ngigac balu gagic, yogo yefe monic mi fagac.” Inguc mime Herodedi Herodiasle ngage-ngage balaibelu

ngicfocine edocebame, Yoane balu hefelu muc-macka loibong. <sup>19-20</sup> Aime Herodias ye Yoanele aalic ngagewec. Ngageme, Herodedibac Yoanele hangockeme damongkenale aiwec. I yangucte, Yoane ye ngic dondonne ailu gbagbacne. Ilec Herode ye yogo ngagemotolu ngani-damong aicnolu gawec. Ailu ye yele yowa ngagegacgu ngageboc aicnolu sifu yowaine ngagenale aicnowec. Nga Herodias yedibac wehomanogale ngagewec, ailu ngageme kpungkewec.

<sup>21</sup> Gacgu Herodiasdi Yoane wenogale dameng miwec. Aime Herodele fike-fike dameng kwesime, ye ngic sugucne yele bagewa gaibong. Nga hudu-baba ngicfocine yengele damongfocngineng, ailu Galili prowinswacni ngic micne, yenge kpaducebalu noba-nosing lobeyelewec. <sup>22</sup> Lobeyeleme ngiyebongka, Herodiasle adudi kwesilu haicnginang gee wewec. Weme Herode nga ngic yeholec nosing noibong, yenge yogo nganilu angac ngageibong.

Ilec ailu ngictau Herodedi adule yanguc miwec, “Ga wiyac monicte ngagelu na milocnudamecte, yogo nalic geledacte.” <sup>23</sup> Milu Wapongte wacka yowa sanangkenale yanguc mipangkewec, “Ga wiyac monicte milocnuyengka gele-benangkedacte. Ailu himong damongkegabac, yogolec nehocinele miyengka heuckelu geledacte.”

<sup>24</sup> Inguc mime adu ye hikelu nenggacine yanguc uwacnowec, “Na oma wiyacte micnodacte?”

Mime nenggacinedi yanguc miwec, “Ga Yoane misa-lowacte hodocinele micnodamec.”

<sup>25</sup> Inguc mime adu ye iwahac ngictau yela hikelu yanguc miwec, “Yoane misa-lowac yele hodoc yakumac hocne pelewa lolu nelecte ainelegac.”\*

<sup>26</sup> Inguc mime ngictau ye kweleine umalewec. Aime ngic ngiyebong, yengele haicka yowa biyac mime sanangkewec. Ilec ailu yogo hegilenogale ngageme nalic mi aiwec.

<sup>27</sup> Aime ye yogowahac hudu-baba ngic monic saleme hikelu Yoane hodocine welocke balu kwesinale muc-macka hikewec. Hikelu Yoane ubeine welockelu <sup>28</sup> hodocine yogo pelewa lolu bakwesilu adu lacnome, adu ye yogo bahikelu nenggacine lacnowec. <sup>29</sup> Aime Yoane mic-tengtengfocine yenge siduc yogo ngagelu hikelu kponggbongine bakwesilu longkeibong.

#### *Nosing gumecebawec*

*Mat 14:13-21; Luk 9:10-17; Yoa 6:1-13*

<sup>30</sup> Salecebaine yenge hatacmac Yesula kwesilu kpatuleibong. Kpatulelu bole sasawa baibong, ailu edocebalu weduyeleibong, yogolec siduc edoyackeibong. <sup>31</sup> Aime ngicngigac bocyac yenge lec-welec aibongte ailu, yenge ngiye-ngagec nga nosing nonole sawaine monic mi fikewec. Ilec ailu Yesudi mic-tengtengfocine yanguc edocebawec, “**Ngenge welebong naholec himong kisiwa misaine mikacka hikelu nongilangkac wangec gadabeleng.**” <sup>32</sup> Inguc mime yenge yengilangkac gombawa felu himong monic ngic mikacka hikeibong.

<sup>33</sup> Hikeebongka ngic-ngigac bocyacti ngani-motocebalu, taon falewecka, yogowacni molickelu gasacke hikelu iwa sulumeibong. <sup>34</sup> Hike sulumbong, Yesu ye gombawacni walu ngic-ngigac habutowa inguc nganicebalu kweleine yengele sowalewec. I yangucte, yenge lama yengi damong mikac gacaigaing, yogo ingucne gaibong. Inguc ngagelu yowa bocyac edocebalu weduyelewec.

<sup>35</sup> Weduyelelu game mac aweleme mic-tengtengfocine yengi yela lelu yanguc miibong, “Himong yago ngicine mikac, aime wenac haume mac biyac awelegac. <sup>36</sup> Ilec ailu ga ngicngigac salecebang mac-gogoc nga mac-aling falegac, iwa hikelu nosing fuli banoc aining.”

<sup>37</sup> Inguc mibong yedi yanguc miwec, “**Ngengi nosing yelebong noning.**”

Inguc mime yengi yanguc miibong, “Nonge hikelu moneng 200<sup>†</sup> yogolecsocti nosing fuli balu yelebeng noningte migic, me?”

<sup>38</sup> Inguc mibong Yesudi yanguc uwayelewec, “**Ngengela bret edomengti fagac, ngenge lelu yogo nganing.**”

Inguc mime yenge yogo nganilu yanguc edoibong, “Bret 5 nga misa-sic yaeckang balu gagabeleng.”

<sup>39</sup> Inguc mibong yedi ngic-ngigac habu balu kpindingka walu ngiyeningte edocebawec. <sup>40</sup> Edocebame yenge wangiyeibong, gocnedi 100, nga gocnedi 50, inguc habu balu kpindingka ngiyeibong. <sup>41</sup> Ngiyeebongka Yesudi bret 5, nga misa-sic yaeckang yogo bawec. Balu dongeine hilame honocmengka feme, Wapong kwele-madic micnolu bret bauckelu ngic-ngigac yelebong noningte mic-tengtengfocine yelewec. Yelelu misa-sic inguchac

6:17-18: Dep 18:16 \* 6:25: Herodias ye Yoane homanale ngagelu hodocine nganilu ngageme Yoane ye homawec.  
6:30: Luk 10:17 6:34: Him 27:17; Mat 9:36 6:35: Mrk 8:1-9 † 6:37: Moneng wacine denarius. Aime denarius 200 yogo bulumaka 6lesoc fulingineng ingucne aigac.

bauckelu botoc balu yeleme bayackeibong. <sup>42</sup> Balu ngic-ngigac sasawadi nogebec ailu <sup>43</sup> bret nga misa-sic tofaine notiwa aibong ngiyewec, yogo kpaduckebong haulu damba 12 wakewec. <sup>44</sup> Ngic nosing noibong, yogo yengele dzalengineng 5 taosen.

*Lifuc feina edela hikewec*

*Mat 14:22-33; Yoa 6:16-21*

<sup>45</sup> Nowackebong motome, Yesu ye ngic-ngigac locebanogale domalu mic-tengtengfocine salecebame yenge molickelu gombawa felu Besaida taonka hikeibong. <sup>46</sup> Hikeebongka ye ngic-ngigac locebame hikebong milockenale kupicka fewec. <sup>47</sup> Aime mac deboleme mic-tengtengfocine yenge lifuc hewacina hikebong, Yesu yeicnac himongka gawec. <sup>48</sup> Game mic-tengtengfocine yenge hikeebongka mac biyac saenogale aiyemewa gbelongti wecebame yenge puli wenogale aibibiyeibong. Inguc aibong Yesu ye nganicebalu yengela haic lifuc feina edela edela hikelu ewalicebanogale aiwec.

<sup>49-50</sup> Ye lifuc feina edela edela hikeme, yengi ye nganilu ilucti welegac, inguc ngagelu hangocebame aukweibong.

Aime yedi iwahac yanguc edocebawec, “**Nani welegabac. Nenge ngageboc mikac sanangne domadaing. Nenge mi hangocgebana.**” <sup>51</sup> Inguc milu gombawa felu yengeholec ngiyeme, gbelong miyac aiwec. Aime yenge kwatacke-benangkelu mimedec aibong. <sup>52</sup> I yangucte, yenge kwelengineng hefeicnehac fawecte ailu, nosingka pasi fikewec, yogo mi ngage-motoibong.

*Ngic-ngigac bamadicebawec*

*Mat 14:34-36*

<sup>53</sup> Aime yenge lifuc falockelu Genesaret himongka hike sulumelu gombangineng hefebong fawec. <sup>54</sup> Fame gombawacni wabong ngic-ngigac yenge Yesu biyac ngani-motoibong. <sup>55</sup> Ngani-motolu macsoc gasacke hikelu ngic-ngigac huckolec dembengka locebalu, “Ye iwa me iwa gagac,” inguc milu iwa bacebalu kwesiyackeibong. <sup>56</sup> Yesu ye taonka nga mac-alingka ailu mac-gogocka hikeme, ngic-ngigac yengi ngic-ngigac huckolec bacebalu maket sobengka locebaibong. Ailu huckolec yengi Yesule ngakpi susucinele mucine oiyaningte dogbac ailu micnoibong. Aime oiyaibong, yenge sasawadi madickeibong.

## 7

*Wapongte mimipang yowadi yefe-yowa ewaligac*

*Mat 15:1-9*

<sup>1</sup> Yerusalemkocni Farisaio nga Wapongte yefe-yowale wewedu ngic gocne yengi Yesula kwesilu kpatulelu gaibong. <sup>2</sup> Gabong iwa Yesu mic-tengtengfocine gocne yengi molengineng mi suwelu nosing moc banoc aibong nganicebaibong. <sup>3</sup> I yangucte, Farisaio nga Yuda ngic-ngigac sasawadi ngesa-ngambofocngineng yengele yefe-yowa balaibelu molengineng suwelubac nosing nocaigaing.\* <sup>4</sup> Ailu yenge maket sobengcacni kwesilu misa mi lowagaingka, ibac nosing moc mi balu nocaigaing. Ailu pasi gocne ingucne momochac aicaigaing. Yenge kap nga pele ailu bengu inguchac suwebong gbagbacne aicaigac.

<sup>5</sup> Inguc aime Farisaio nga Wapongte yefe-yowale wewedu ngic yengi Yesu yanguc uwacnoibong, “Mic-tengtengfocgone yenge molengineng mi suwelu nosing moc banoc aicaigaing. Aime yenge omale ngesa-ngambofocngongeng yengele yefe-yowa yogo mi balaibegaing?”

<sup>6</sup> Inguc mibong yedi yanguc edocebawec, “**Siduc-mimi ngic Yesaiyadi ngic kwesacine nengele hocne siduc-yowa noinebenang yanguc kwelengkewec, Ngic-ngigac habu yago yenge micnginengti sugu alang bacnucaigaing. Nga kwelenginengtibac na hegilecnucaigaing.**” <sup>7</sup> Yenge ngic-ngigac yowa weduyelecaigaing, yogo ngic ngage-ngagewa yefe-yowa yogo edocebalu weduyelecaigaing. Ailu na moc afenubong afec-afecngineng yogo nganibe noine mikac aicaigac.’ *(Yes 29:13)*

<sup>8</sup> **Nenge Wapongte ung-yowa hegilelu ngic yengele yefe-yowa balaibecaigaing.**”

<sup>9</sup> Ailu hatacmac yanguc edocebawec, “**Nenge ngengileng yefe-yowa balaibeningte ailu, Wapongte ung-yowa baicke-benangkegaing. Yogolec ngage-madickegaing, me? <sup>10</sup> Mosesdi yowa monic yanguc miwec, Ga nenggac-mamackecgone alang bayetedamec.**” *(Wah 20:12; Yef 5:16)*

6:46: Luk 5:16

6:49-50: Luk 24:37

6:51: Mrk 4:39

7:2: Luk 11:38

\* 7:3: Yenge molengineng

wonongkolec mi ngagelu aibaba inguc aibong. Yenge ngesa-ngambonginengte aibaba balaibenogale inguc suweibong. Yenge yanguc ngageibong, yenge aibaba yogo madicne balaibegaingka, Wapongte haicka gbagbacne aidaingte. 7:4:

Mat 23:25



**Aime**

**'Monic ye nenggacine me mamacinele sawec-yowa midaictewa, ye webong homadaic.'**"

(Wah 21:17; Dep 20:9)

<sup>11</sup> "Ngengebac yanguc micaigaing, 'Monicti nenggacine me mamacine edolu yanguc midaicte, "Na wiyac gocne gelenogale ngagelu migabac, yogo biyac Wapongte ibu lacnohele miiba." <sup>†</sup> <sup>12</sup> Inguc milu ngic ye nenggacine me mamacine bafickenale kpatalacnodaingte. <sup>13</sup> Yefe iwa ngenge yefe-yowangineng balaibelu Wapongte yowa yogo someckeccaigaing, aibaba gocne ingucne bocyac aicaigaing."

*Oma wiyacti ngic kwelewa haume wonongkolec aidaicte?*

*Mat 15:10-20*

<sup>14</sup> Yesu ye inguc milu ngic-ngigac habu hatacmac wacebame kwesibong yanguc edocebawec, "Ngenge hedec kwelu ngage-motoning. <sup>15</sup> Nosing nga wiyac ingucne yogodi ngic kweleina haume wonongkolec nalic mi aidaicte, miyac. Ngic kwelewacni ngage-ngageine ofecaigac, yogodibac ngic kweleine bame wonongkolec aidaicte. <sup>16</sup> [Monic ye hedeckolecti yowa yago aneng ngagedaic.]"<sup>‡</sup>

<sup>17</sup> Ye inguc milu ngic-ngigac hegilecebalu macka feme, mic-tengtengfocine yengi nanging yowa holelu miwec, yogolec uwacnobong yanguc edocebawec, <sup>18</sup> "Ngenge momoc ngage-ngage-motocngineng mikac, me? Nosing me wiyac monic lobinacni gobe kwelina haucaigac, yogodi ngic bame wonongkolec nalic mi aidaicte. Ngenge yogo mi ngage-motogaing, me? <sup>19</sup> Wiyac yogodi kwelewa mi haucaigac, yogo gobe kwelina sugu haulu hamacka haucaigac." Yesu ye inguc milu nosing sasawa nonogale nalic miyackewec.

<sup>20</sup> Ailu taockelu yanguc miwec, "Nga ngic kwelewacni ofecaigac, yogodibac ngic bame wonongkolec aicaigac. <sup>21</sup> Aime ngic-ngigac kwelewacni ngage-ngage yangucti ofecaigac. Ngage-ngage sowacne, nga selo-boic aibaba ailu hise aibaba, nga ngic-wewe. <sup>22</sup> Ailu ngawe-ngigac bahegilec, nga hane aibaba, ailu aibaba sowacne gocne. Nga kwesac-aibaba, ailu aibaba kosaine, nga hasowac ailu misulec. Nga soc bafe, ailu kwele-fong. <sup>23</sup> Aibaba yogo sasawa yenge ngic-ngigac kwelewacni ofelu basowalecebame wonongkolec aicaigaing."

*Grik ngigacti Yesu ngagesingkwec*

*Mat 15:21-28*

<sup>24</sup> Aime Yesu ye mac-aling yogo hegilelu fangke hikewec. Hikelu Tair nga Saidon himongka hike sulumelu mac monicka fewec. Feme taon yogowacni ngic-ngigac yengi yogo mi ngageningte ngagewec. Ailu ye sangkelu ngiyenale kpungkwec. <sup>25-26</sup> Aime Fonisia himongkacni Grik ngigac monicti kwesiwec. Kwesilu Yesule higewa wangiyelu, aduina aleng wonongkolec yebiyenale micnolu gawec. <sup>27</sup> Micnome Yesudi yanguc edowec, "Adu-madec yenge nosing molic-molic nolu gebecebadai. Adu-madec yengele nosing ewalicebalu hoda yengela wickedabelengte, yogo mi madickedaicte."<sup>§</sup>

<sup>28</sup> Inguc mime ngigac yedi bafaliyelu yanguc edowec, "Sugucne, yogo ngagegabac. Ailu hoda yenge sifu adu-madec yengi nosing nobong kapucine tebo bageina wacaigac, yogo nocaigaing."

<sup>29</sup> Inguc mime Yesudi yanguc edowec, "Ga yowa inguc migicte hikec, aleng ye adugone biyac hegilegac."

<sup>30</sup> Inguc mime ngigac ye macina hikelu nganime aleng ye aduine biyac hegilelu hikeme, adu yogo ye mapicina waickelu fawec.

*Ngic hedec-fong*

<sup>31</sup> Yesu ye Tair himongkacni hefaliyelu Saidon taon falockelu Dekapolis himongka yefe hikelu Galili lifucka hikewec. <sup>32</sup> Hike sulumelu nganime, ngic-ngigac yenge ngic monic hedec-fong nga yowaine yegena mi micaigac, ye bakwesilu Yesudi moledi bauwanale dogbac aicnoibong.

<sup>33</sup> Inguc mibong ngagelu ye ngic-ngigac habu yenge hegilecebalu ngic yogo bame yekilackac lobenginang lelu lome domawec. Domame gbongnginedi hedecina lolu moleine sofockelu beluine oiyawec. <sup>34</sup> Oiyalu honocmengka hilame feme asuine fuluckelu miwec, "Effata!" Yogolec fungine yanguc bafaliyeicne, "Ga dulungkec!" <sup>35</sup> Inguc mime ngic

<sup>†</sup> 7:11: Ibu yogo Hibru yowawa yefe Korban. 7:15: Sale 10:14-15 <sup>‡</sup> 7:16: Hibi esecne Mareko kwelengkewec, yogo nganilu iwacni kwelengkebong kwelengkebong ofewec, yengelacni gocne 7:16 iwa mi fagac. Ngic-ngigac yenge hibi kwelengkeicne yogo wosaelu nganibong Marekodi mi kwelengkewec mecne. § 7:27: Yesudi Israel ngic-ngigac yengele ngagelu adu-madec miwec. Nga Israel yengele alingkacni miyac yengele ngagelu hoda miwec. Ailu nosing yogo babaficte silic ingucne. Grik ngigacte ngage-ngagesing esoickelu yowa ingucne miwec.

hedecine yogowahac dulungkewec. Aime beluine hatacmac hefaliyeme yowa dondonne miwec.

<sup>36</sup> Inguc milu Yesudi pasi fikewec, yogolec ngic-ngigac yengi mi mibong sawenale sanangnehachenang milu mimacebawec. Mime yenge pasi fikewec yogolec siduc hat-acmac mibong saweyackewec. <sup>37</sup> Inguc mibong ngic-ngigac yengi pasi yogolec bocy-achenang weleckelu mimedec ailu yanguc miibong, “Ye wiyac sasawa balu gagac, yogo madicke-benangkegac. Ye ngic-ngigac hedec-fong yengele hedec bame dulungkeme yowa ngagegailing. Ailu yowangineng mikac, yengi yowa kwegaing.”

## 8

*Ngic-ngigac 4 taosen nosing gumecebawec  
Mat 15:32-39*

<sup>1</sup> Dameng iwa ngic-ngigac habitowadi hatacmac Yesula kwesilu kpaduckeibong. Aime nosing mikac aime Yesudi mic-tengtengfocine wacebame welebong yanguc edocebawec, <sup>2</sup> **“Ngic-ngigac yago yenge nosingningeng mikac hadeng habackang biyac naholec gaebongka yengele kwelene sowalegac.** <sup>3</sup> **Gocne yenge mac-himong dalickacni kwesiibong. Aime nosing mikacte salecebabe macnginang hikegacgu yefewa donge lolic aiyeledaickale, migabac.”**

<sup>4</sup> Inguc mime mic-tengtengfocine yengi yanguc miibong, “Nongileng himong kisiwa misaine mikacka gagabeleng. Ilec nosing wenuwacni baebengka habitowa yago yelebong nobong gebecebadaicte?”

<sup>5</sup> Inguc mibong Yesudi yanguc uwayelewec, **“Ngenge bret edomeng balu gagaing?”** Mime yengi “bret 7” miibong.

<sup>6</sup> Inguc mibong ngagelu Yesudi ngic-ngigac habu himongka walu ngiyeningte edocebawec. Edocebalu bret 7 balu Wapong kwele-madic micnolu bauckelu mic-tengtengfocine yeleme yengi ngic-ngigac habuwa yelebong. <sup>7</sup> Ailu ye misa-sic gogoc kpisicne gocne balu gaibong, yogo inguchac Wapong kwele-madic micnolu yeleningte edocebawec. <sup>8</sup> Edocebame yelebong yenge yogo nobong gebecebame, nosing tofaine ngiyewec, yogo balu kpaduckebong damba 7 aiwec. <sup>9</sup> Aime ngic-ngigac 4 taosen ngama ingucne yengi iwa ngiyebong. Yenge nosing nobong motome salecebame hikeibong. <sup>10</sup> Hikebong Yesu ye yogowacni mic-tengtengfocine yengeholec gombawa felu Damanuta himongka hikeibong.

*Aibaba fulune  
Mat 16:1-4*

<sup>11</sup> Farisaio yenge kwesilu Yesuholec yowangineng fec-wac aiwec. Yenge tapiliine lokwesacka lolu pasile maa monic honocmengcakni bame nganiningte micnoibong. <sup>12</sup> Inguc mibong asuined ngageme umaleme yanguc miwec, **“Ngic-ngigac aling yanguctihac gagaing, ngenge omale pasile maa nganinogale milu gagaing? Foinac, ngic-ngigac aling yago ngengela pasile maaine monic nalic mi fikengeledaicte, yogo noine edocngebagabac.”** <sup>13</sup> Inguc milu ngic yogo hegilecebalu gombawa hatacmac felu lifuc nebecina hikeibong.

*Wasec sowacne  
Mat 16:5-12*

<sup>14</sup> Dameng iwa mic-tengtengfocine yenge bret ngigecebame moniyang sugu gombawa ngiyeme hikeibong. <sup>15</sup> Aime Yesudi sawang-yowa milu yanguc edocebawec, **“Ngenge Herode nga Farisaio yengele yisle\* ngani-motolu gadabiyeng.”**

<sup>16</sup> Inguc mime yengungtihac mingagec ailu yanguc miibong, “Nongileng bretnonggeng mikac. Ilec ailu inguc migac.”

<sup>17</sup> Inguc mibong ye kwelenginang biyac ngame-motolu yanguc edocebawec, **“Ngenge omale bret mi balu kwesigaingte mingagec aigaing? Ngenge kwelengineng fongke-icnele ailu wiyac monic mi ngame-motogaing, me? <sup>18-19</sup> Ngenge dongenginengti wiyac mi nganicaigaing, me? Ailu hedecnginengti yowa mi ngagecaigaing, me? Na bret 5 bauckelu ngic 5 taosen gumecebabe tofaine ngiyewec, yogo kpaduckebong damba edomeng wakewec, yogo ngicegcebawec, me?”**

Uwayeleme yengi “damba 12” miibong.

<sup>20</sup> **“Aime hatacmac bret 7 bauckelu ngic-ngigac 4 taosen gumecebabe tofaine ngiyeme kpaduckebong damba edomeng wakewec?”**

7:36: Mrk 1:43-45    7:37: Yes 35:5    8:2: Mrk 6:34-44    8:12: Mat 12:39; Luk 11:29    \* 8:15: Yis yogo flawawa sawelu basugulecaigac. Yengele ngame-ngame nga aibaba saweme ngic-ngigac balaibecaigaing, Yesudi yogo nganilu nangeng yowa holelu yis miwec.    8:15: Luk 12:1    8:17: Mrk 6:52    8:18-19: Mrk 6:41-44

Uwame yengi “damba 7” miibong.

<sup>21</sup> Inguc mibong yedi yanguc edocebawec, “**Ngenge yakumac inguchac mi ngage-motogainghac, me? Yis yogo nosingte mi migabac.**”

*Donge-pisic monic dongeine bamadickewec*

<sup>22</sup> Aime yenge Besaida himongka hike sulumbong, ngic-ngigac yengi ngic donge-pisic monic Yesula bakwesilu moleinedi bauwanale dogbac aicnoibong. <sup>23</sup> Inguc aibong ye donge-pisic moleina balu mac-aling fagaing yogo hegilecebalu lobina mengocke hikelu dongeina sofockelu moleinedi feina lolu yanguc uwacnowec, “**Ga wiyac monic nganigic, me?**”

<sup>24</sup> Uwacnome ngic donge-pisic ye donge hilalu yanguc miwec, “Ngic yenge nganingineng yoc ingucne nganicebabe lec-welec aigaing.”

<sup>25</sup> Inguc mime Yesudi donge feina moleine hatacmac lome madickeme donge hilalu wiyac sasawa madicne nganiwec. <sup>26</sup> Nganime yanguc edolu salewec, “**Ga macgona hikelu mac-alingka yefe mi fedamec.**”

*Yesule fungine mime yegengkewec*

*Mat 16:13-20; Luk 9:18-21*

<sup>27</sup> Aime Yesu ye mic-tengtengfocine yengeholec Filipai himongka Sesarea taon emeina mac-aling falewecka iwa hikeibong. Yefewa hikelu yedi mic-tengtengfocine yanguc uwayelewec, “**Ngic-ngigac yengi nale ma micaigaing?**”

<sup>28</sup> Inguc mime yengi yanguc miibong, “Gocne yengi Yoane misa-lowac micaigaing. Nga gocne yengi Wapongte siduc-mimi ngic wacine Elaiya micaigaing. Nga gocne yengibac Wapongte siduc-mimi ngic monic esecne wackelu micaigaing.”

<sup>29</sup> Inguc mibong yanguc uwayelewec, “**Aime ngenge ngengung nale ma micaigaing?**”

Uwayeleme Pitadi yanguc miwec, “Ga Mesia.”

<sup>30</sup> Inguc mime yedi wac yogo ngic monic mi edocebaningte mimacebawec.

*Yesu homackacni gboliyelu fangkedaicte*

*Mat 16:21-28; Luk 9:22-27*

<sup>31</sup> Aime Yesudi yanguc edocebalu weduyelewec, “**Ngicte Madec ye doic homacne ngagedaicte. Aime Yuda ngic-ngigac yengele damongfocngineng, nga depec-baha ngic micne, ailu Wapongte yefe-yowale wewedu ngic, yengi ye kweledi wickelu webong homadaicte. Homame hadeng habackang motome, hatacmac gboliyelu fangkedaicte.**” <sup>32</sup> Yowa yogo yegenabenang edocebame, Pitadi Yesu mecina mengocke lelu yekilackac domalu kpatalacnowec.

<sup>33</sup> Kpatalacnome Yesudi hefaliyelu dongeine mic-tengtengfocine yengela hilalu Pita kpatalacnolu yanguc edowec, “**Satang, ga lobena wele-hikec. Ga wiyac ngagesigic, yogo Wapongtacni miyac, yogo ngic ngage-ngage aigac.**”

*Yesu balaibenogale yefe*

<sup>34</sup> Yesudi habu nga mic-tengtengfocine wacebame welebong yanguc edocebawec, “**Monic ye na balaibecnunogale ngagegacka, ye yeicne soc-kweleinele angac bawalu umacte malicpongine bafangke tengkelu balaibecnudaic.**” <sup>35</sup> I yangucte, monic ye yeicne gagaine sebilenale ngagelu boleine badaicte, ye gagaine yogo sangkecnodaicte. Nga monic ye nale ailu nga Siduc Madicnele ailu gagaine hegiledaicte, yebac gagaine fikecnodaicte. <sup>36</sup> Ilec monicti himongtowa yagolec wiyac sasawa bafuwanale ailu gagaine wickeme sangkedaicte, wiyac yogo yengi ngic yogo nalic bafickedaingte, me? Yogo miyac! <sup>37</sup> Me monicti gagaine hatacmac bafuwanale wenuc lacnome bafuwacnodaicte? Yefe monic mi fagac. <sup>38</sup> I yangucte, dameng yagolec ngic-ngigac yenge bikicnginengkolec nga selo-boic alingkolec. Aime yengele kwelinacni monicti nale ngageme gameineholec aidaicte. Ailu nale yowale ngageme gameineholec aidaicte, yela yanguc fikedaicte. Ngicte Madecti Mamacinele tapili nga hibi-angocineholec, ailu Wapong yeicne angelo yengeholec kwesidaicte. Dameng iwa yedi ngic yogolec inguchac ngageme gameineholec aidaicte.”

## 9

<sup>1</sup> Aime Yesudi hatacmac taockelu yanguc edocebawec, “**Foinac, ngic-ngigac yago domagaing, ngengelacni gocne yenge mi homaebongkahac, Wapongte ngani-damong tapiliineholec fikelu yegengkeme nganidaingte, yogo noine edocngabagabac.**”

*Yesule tapili nga wac feicne*

*Mat 17:1-13; Luk 9:28-36*

<sup>2</sup> Aime hadeng 6 motome Yesudi Pita nga Yakobos ailu Yoane mengocebame tiki dalicne monicka felu yengilangkac gaibong. Felu dongenginang socine hefaliyeme ngani-nganiine monicbenang aiwec. <sup>3</sup> Ngakpiine dalicne yogo angolelu kwalacnebenang angocineholec aiwec. Himongtowawa monicti ngakpi kwalac-kwalac ingucne nalic mi bafuwadaicte. <sup>4</sup> Aime iwahac Moses nga Elaiya yeke fikelu Yesuholec yowa mingagec aiboc nganicpaibong. <sup>5</sup> Inguc aibong Pitadi Yesu yanguc edowec, "Wewedu, nongileng yagowa gabeng madickegacte fale habackang banang. Gale monic, nga Mosesle monic, ailu Elaiyale monic." <sup>6</sup> Yenge bocyabenang hangocebawecte, Pitadi moc milu yowa madicne micnonale, ngageme kpungkewec.

<sup>7</sup> Iwa domabong kaguwa monicti kwesilu somecebame, kaguwa kwelinacni yowa-malac monic yanguc fikewec, "Yogo nale Madec, kwelenedi yele angac ngagegabac. Nenge yele yowa ngagedaing!" <sup>8</sup> Yowa motome yogowahac yenge donge hilalu nganibong, Yesudi sugu yengeholec domame nganiibong. Nga ngic monic mi nganiibong.

<sup>9</sup> Aime yenge tikiwacni wabong Yesudi mimacebalu yanguc miwec, "**Nenge wiyac nganigaing, yogolec siduc ngic mi edocebadaing. Gagcu Ngicte Madec homackacni gboliyelu fangkedaicte, dameng yogowabac midaing.**"

<sup>10</sup> Inguc edocebame mic-tengteng yenge yowaine balaibelu yengungtihac yanguc uwanaguibong, "Homackacni gboliyelu fangke-fangke, yogolec fungine wenuc?" <sup>11</sup> Yengi yanguc milu uwacnoibong, "Wapongte yefe-yowale wewedu ngic yenge wenucte Elaiyadi hatacmac molickelu kwesime Mesia lobeina kwesinale micaigaing?"

<sup>12</sup> Inguc mibong yedi yanguc edocebawec, "**Elaiyadi hocne kwesilu wiyac sasawa bame madickedaicte. Aime Wapongte hibiwa yowa yanguc kwelengkeicne fagac, 'Ngicte Madec ye doic bocyac ngageme misulec aicnodaingte.' Ilec wenuc ngagesigaing?** <sup>13</sup> **Ailubac yanguc edocnebabu, Elaiya ye biyachac hatacmac kwesiwec,\* aime ngic yenge angacngineng balaibelu aibaha sowacne haicne monic-monic aicnolu gaibong, yogo yele hocne kwelengkeicne fagac.**"

*Madec monictacni aleng yebiyewec*

*Mat 17:14-21; Luk 9:37-43*

<sup>14</sup> Yenge tikiwacni wabong mic-tengtengfocine gocne yengi yengela lelu nganibong, yenge Wapongte yefe-yowale wewedu ngic yengeholec yowangineng fec-wac aiwec. Fec-wac aiyemewa habu sugucnedi ngagelu lolickelu domaibong. <sup>15</sup> Domalu yenge Yesu nganilu kwatackelu biyac yela gasacke lelu wenac-madic micnoibong.

<sup>16</sup> Inguc aibong Yesudi yanguc uwayelewec, "**Nenge omale yowangineng fec-wac aigac?**"

<sup>17</sup> Inguc mime habu yengelacni ngic monicti yanguc miwec, "Wewedu, aleng monic yowaine mikacti madecne micine badickeme gala balu kwesigabac. <sup>18</sup> Aime alengti dameng bocyac ye balu wepakckeme himongka wawecaigac. Inguc aicnome ye higemoleine linggankeme micinacni sofololoc ofelu micine hedickecaigac. Aime mic-tengtengfocgone yengi aleng yebiyeningte edocebabe, yenge ngagebong kpungkeme hegi-legabiyeng."

<sup>19</sup> Inguc mime Yesudi bafaliyelu yanguc edowec, "**Dameng yagolec ngic-ngigac aling yago, nenge ngage-ngagesingneng mikachenang. Na dameng dalicne ngage-ngagesing mikac ngic-ngigac nengeholec hatacmac ganogale takicnugac. Nenge madec yogo bawelening.**" <sup>20</sup> Inguc mime yenge madec yogo balu lebong alengti Yesu nganilu madec yogo wepakckeme himongka wawelu hefac-tafalic ailu fawec. Wawelu fame micinacni sofololoc ofawec.

<sup>21</sup> Ofeme Yesudi mamacine yanguc uwacnowec, "**Wiyac yago ma damengka fungkec-nowec?**"

Inguc mime mamacinedi yanguc miwec, "Yogo gegecne gaweckahac fikecnowec. <sup>22</sup> Fikecnome alengti dameng bocyac madec wehomanale dacka nga misawa wepakckeme haucaigac. Aime ga nalic baficnupanogale ngagegickabac sifu kwelegone sowaleme baficnupanong."

<sup>23</sup> Inguc mime Yesudi yanguc edowec, "**Yogo nalic aibele migic, me? Monic ye ngagesingkeme, yela wiyac sasawa nalic fikedaicte.**"

<sup>24</sup> Inguc mime yogowahac madec mamacinedi aukwelu yanguc miwec, "Na ngagesing-gube ngage-ngagesingnedi songtolegacte gagi baficnunong."

<sup>25</sup> Inguc mime habudi Yesula gasackelu hikebong ye nganicebalu aleng wonongkolec kpatalacnolu yanguc micnowec, **“Aleng, ga hedec-fong ailu yowagone mikac. Na edocgugabac, ga madec yogo hegilelu ofe hikedamec. Ailu hatacmac hefaliyelu yela mi haudamec.”**

<sup>26</sup> Inguc mime alengti dacineholec tapiliwabenang aukwelu edepackeme wafame ofelu hikeme, madec ye homaicne ingucne fawec. Fame ngic yenge yogo nganilu biyac homagac miibong. <sup>27</sup> Inguc mibong Yesudi moleina bame hatacmac fangkewec.

<sup>28</sup> Aime Yesu ye macka feme mic-tengtengfocine yenge yengilangkac yeholec ngiyelu yanguc uwacnoibong, “Nonge wenucte aleng yogo yebiyenangte aibibiyegabeleng?”

<sup>29</sup> Inguc mibong yedi yanguc edocebawec, **“Aleng ingucne mimilocti sugu nalic yebiyedaingte.”**

*Yeicne homacte hatacmac miwec*

*Mat 17:22-23; Luk 9:43-45*

<sup>30-31</sup> Yesu nga mic-tengtengfocine yenge mac yogo hegilelu Galili prowins falockelu hikeibong. Aime ye iwa hikelu mic-tengtengfocine weduyelewecte yanguc ngagewec, **“Yawa gagabeleng, yogo ngic-ngigac mi ngagedaing.”** Inguc ngagelu weduyelelu yanguc edocebawec, **“Monicti Ngicte Madec balu ngic yengele molewa lodaicte, yogolec dameng bangkalegac. Lome yengi ye balu wehomadaingte. Wehomabong hadeng habackang motome, homackacni hatacmac gboliyelu fangkedaicte.”** <sup>32</sup> Inguc mime yenge yogo mi ngage-motolu yowa yogolec funginele hatacmac uwacnoningte hangocce-bawec.

*Micne gaga*

*Mat 18:1-5; Luk 9:46-48*

<sup>33</sup> Aime Yesu ye Kapeneam taonka hike sulumelu macka felu mic-tengtengfocine yanguc uwayelewec, **“Ngenge yefewa oma wiyacte mingagec aibiyeng?”** <sup>34</sup> Inguc uwayeleme yenge waickelu ngiyeibong. I yangucte, yenge yefewa yengelacni madi feicne gagac, yogolec mingagec aibibong.

<sup>35</sup> Yesu ye ngiyelu mic-tengtengfocine 12 wacebame welebong yanguc edocebawec, **“Monic ye micne ganogale ngagelu, ye agofocine sasawa, yengele lobewa galu yengele mole-bafic aidaic.”**

<sup>36</sup> Inguc milu madec hakic monic balu yengele hewacka lolu moleine elecina lolu yanguc edocebawec, <sup>37</sup> **“Monic ye madec yangucne nale wacka ye hefolegac, ye na hefolecngac. Nga monic ye na hefolecngac, ye na sugu mi hefolecngac, miyac. Ye Wapong na salecnuwec, ye inguchac hefolegac.”**

*Aka mi holedaing*

*Luk 9:49-50*

<sup>38</sup> Aime Yoanedi Yesu yanguc edowec, “Wewedu, ngic monic ye gale wacka aleng yebicebame nganibeleng. Ailu ye nongilengkolec mi gagacte kpatalacnobeleng.”

<sup>39</sup> Inguc mime Yesudi yanguc miwec, **“Monicti nale wacka bole monic pasi damuineholec badaicte, ye nale wac biyac mi suledaicte. Ilec ngenge mi kpatalacnodaing. <sup>40</sup> Iyangucte, monic ye nongileng ngaba mi aigac, yedi agononggeng aigac. <sup>41</sup> Foinac, monic ye ngageme ngenge Kristole aling gagaing, yogolec ailu misa ngeleme nodaingte, ye wiyac yogolec fuline badaicte, yogo noine edocngebagabac.”**

*Lokwesac haicine monic-monic*

*Mat 18:6-9; Luk 17:1-2*

<sup>42</sup> **“Entacka gocne yengi ngic monic balu balinga sugucne ubeina ubeecnolu kiwacka wickebong haudaictewa, yele umacine efeckedaicte. Aime adu-madec kpisicne monicti na ngagesingnulu game, ngic yogodi adu-madec ingucne aicnome bikic bafuwadaictewa, Wapongti ye ameine haducnodaicte, yogo umactowaineholec. <sup>43</sup> Aime mologone monicti sowacne aigeleme bikic bafuwadamectewa, ga yogo helockelu wickeengka hikedaicte. Mologone yaeckangkolec galu dac-sanang piscic-pisicne mikac, iwa haudameckale, ga mole-sofong galu gaga-sanangka feengka madickedaicte.**

<sup>44</sup> **[‘Dacka haulu umbengngineng mi homadaicte. Ailu dac yogo mi pisickedaicte. ]†**

9:26: Mrk 1:26 9:30-31: Mrk 8:31; 10:32-34; Yoa 7:1 9:32: Luk 9:45 9:35: Mat 20:25-27; Mrk 10:43-44; Luk 22:24 9:37: Mat 10:40 9:40: Mat 12:30; Luk 11:23 9:41: Mat 10:42 9:43: Mat 5:30 † 9:44: Hibi esecne Mareko kwelengkewec, yogo yakuc mi fagac. Aime esecne hibi yogo nganilu iwacni kwelengkebong kwelengkebong ofewec, yengelacni gocne 9:44 nga 9:46 iwa mi fagac. Ilec ngic-ngigac yenge hibi kwelengkeicne yogo wosaelu nganibong Marekodi 9:48 iwa sugu kwelengkewec, 9:44 nga 9:46 yogo miyac mecne.

45 **Ailu higegone monicti sowacne aigeleme bikic bafuwadamectewa, yogo welockelu wickeengka hikedaic. Higegone yaeckangkolec galu dac-sanangka haudameckale, hige-sofong galu gaga-sanangka feengka madickedaicte.**

46 [**Dacka haulu umbengngineng mi homadaicte. Ailu dac yogo mi pisickedaicte.**]

47 **Me dongegone monicti sowacne aigeleme bikic bafuwadamectewa, ga yogo hamoctolu wickeengka hikedaic. Gacgu dongegone yaeckangkolec galu dac-sanangka haudameckale, dongegone moniyang sugu galu Wapongte nganidamongte kwelina feengka madickedaicte.**

48 **'Dacka haulu umbengngineng mi homadaicte. Ailu dac yogo mi pisickedaicte.'**  
(Yes 66:24)

49 **"Ngic-ngigac kiwec holelu nocaigaing, ingucnehac ngic-ngigac sasawa lokwesacka felu dac ingucne sowacnengineng lobeyackeme noinengineng sugu gadaingte. 50 Kiwec yogo wiyac madicne. Aime yogodi angacine miyac aidaictewa, ngenge wenuc aibong hatacmac angacineholec nalic aidaicte? Yogo nalic mi aidaicte. Nenge kiwec angacine ingucne ngage-ngage madicne kwelengingame fame kwele-moniyang ainagudabiyeng."**

## 10

*Ngawe-ngigac gocnedi hegilecnagucaigaing*

*Mat 19:1-12; Luk 16:18*

1 Yesu ye himong yogo hegilelu, Yudeya himongka Yodan misa nebocina hikewec. Hikeme ngic-ngigac habutowadi yela hatacmac hikelu kpatuleibong. Kpatuleibong ye aibabaine balaibelu yowa edocebalu weduyelewec. 2 Aime Farisaio gocne yengi ye kwe-sackenigte ngagelu yanguc uwacnoibong, "Ngc monic ye ngigacine nalic hegiledaicte, yogolec yefe fagac me miyac?"

3 Inguc mibong yedi yanguc edocebawec, **"Mosesdi yogolec ung-yowa wenuc ngelewec?"**

4 Mime yengi yanguc miibong,

"Mosesdi yanguc nalic ainangte miwec, 'Ngc monic ye ngigac hegilenogale milu, ye hibi lacnolu hegileme hikedaic.'"  
(Yef 24:1-4)

5 Inguc mibong Yesudi yanguc edocebawec, **"Nenge ngic kwelengingeng fongke-icne. Ilec ailu Mosesdi ung-yowa yogo kwelengkewewec. 6 Ailu molic-molicka Wapongti ngic nga ngigac silic ganicte, inguc bafuwacepawec.**  
(Fike 1:27; 5:2)

7 **'Ilec ailu ngic ye nenggac-mamackecine hegilecepalu ngigacineholec wetackelu 8 yeholec soc moniyang aidabiyecte. Inguc aigacte yeke hatacmac yaeckang mi aigaic, yeke soc moniyang aigaic.'**

9 **Ilec ailu Wapongti wetacepawec, yogo ngicti mi welockedaic."**  
(Fike 2:24)

10 Aime yenge macka hatacmac felu mic-tengtengfocine yengi yogolec uwacnobong,

11 Yesudi yanguc edocebawec, **"Ngc monic ye ngigacine hegilelu ngigac monic bagac, ye selo-boic aibaba ailu ngigacine esecne kwele-umac lacnogac. 12 Aime ngigac monicti ngaweine hegilelu ngic monic bagac, ye selo-boic aibaba aigac."**

*Adu-madec mimi-madic milu edocebawec*

*Mat 19:13-15; Luk 18:15-17*

13 Ngic-ngigac gocne yenge Yesudi adu-madecfocngineng moledi oiyacebanale yela bacebalu kwesihibong. Kwesihibong mic-tengtengfocine yengi ngelengkelu edocebaibong,

14 Inguc aibong Yesu ye yogo nganilu kwele-dac ngageyelelu yanguc edocebawec, **"Adu-madec kpisicne yenge nala nalic kwesining, ngenge aka mi holeyelening. Wapongte ngani-damong yogo adu-madec kpisicne yangucne yengele. 15 Foinac, adu-madec kpisicne yenge Wapongte ngani-damong hefolecaigaing. Aime monic ye yenge ingucne mi aidaictewa, ye iwa nalic mi fedaicte, yogo noine edocngebagabac."**

16 Inguc milu adu-madecfocngineng bacebalu moleinedi feingingang lolu mimi-madic milu edocebawec.

*Moneng ngic monic*

*Mat 19:16-30; Luk 18:18-30*

17 Yesu ye hikenogale hikeme, ngic monicti yela gasacke hikelu yele haicka ketadi holelu yanguc uwacnowec, **"Wewedu madicne, na wenuc aibe Wapongti baficnume gaga-sanang badacte?"**

<sup>18</sup> Inguc mime Yesudi yanguc edowec, “**Ga omale madicne wacnugic? Wapong moniyangti sugu madicne gagac.** <sup>19</sup> **Ga ung-yowa biyac ngageing, ‘Ga ngic-ngigac mi wehomacebadamec. Selo-boic aibaba mi aidamec. Hise mi badamec. Micka lolo mi aidamec. Ngic yengele wiyac monic mi ewalicebadamec. Nenggac-mamackecgone yeke alang bayetedamec.’**” (*Wah 20:12-16; Yef5:16-20*)

<sup>20</sup> Inguc mime yedi bafaliyelu yanguc edowec, “Wewedu, ga migic, yogo sasawa na socbolihac galu balaibelu aiibadi aicaigabachac.”

<sup>21</sup> Inguc mime Yesudi yela donge hilalu kweledi yele angac ngagelu yanguc edowec, “**Ga wiyac moniyangte sugu aibibiyegic. Ga hikelu woc-wiyacgone sasawa fagac, yogo salelu moneng balu ngic-ngigac waweweine gagaing, yogo yeledamec. Inguc aiyengka wiyac madicne honocmengka fikegeledaicte. Aime welelu na balaibecnudamec!**”

<sup>22</sup> Inguc mime ngic ye moneng nga woc-wiyacine bocyac facnowecte, ngagelu kweleine umaleme hikewec.

<sup>23</sup> Hikeme Yesu ye mic-tengtengfocine nganicebalu yanguc edocebawec, “**Ngic-ngigac moneng nga woc-wiyacngingcolek yenge Wapongte ngani-damong kwelina fenogale aidaingte, yogo boleine sugucnehac.**”

<sup>24</sup> Inguc mime mic-tengteng yenge yowa yogo ngagelu kwatackeibong,\* Aime hatacmac yanguc edocebawec, “**Madecfocne ngagegac, monic ye Wapongte ngani-damong kwelina fenogale aidaicte, yogo boleine sugucnehac.** <sup>25</sup> **Kameldi bungic yefina fedaicte, yogo boleine sugucne. Nga moneng nga woc-wiyackolek yedi Wapongte ngani-damongka fenogale aidaicte, yogodibac holetowaine sugucnehac.**”

<sup>26</sup> Inguc mime yenge kwatackelu medecebame yanguc miibong, “Inguc aime madi nalic wasecne aidaicte?”

<sup>27</sup> Inguc mibong Yesudi dongeine yengela hilalu yanguc miwec, “**Ngic-ngigac yengileng aibabangengte ailu yogowa aibibiyelu hegiledaingte. Nga Wapongtibac wiyac sasawa yogo nalic aidaicte. Ailu wiyac monicte ngageme mi kpungkedaicte.**”

<sup>28</sup> Inguc mime Pitadi yanguc miwec, “Ngagegic, nonge woc-wiyacnonggeng sasawa hegilelu ga balaibecgulu gagabeleng.”

<sup>29</sup> Inguc mime Yesudi yanguc miwec, “**Foinac, na noine edocngebagabac. Monic ye macine, me hae-gbaine nga yeme-kwaine, me nenggac-mamacine, me adu-madecfocine, me mac boleine, yogo nale nga Siduc Madicnele ailu hegilewec,** <sup>30</sup> **ye ameinele mi kpungkegac. Ailu ye wiyac hegilewec, yogolec ameine 100 hatacmac badaicte. Ngic-ngigac yenge dameng yagowahac ameine yogo mac nga hae-gha ailu yeme-kwa, ailu nenggac-nasi, nga adu-madecfocine ailu mac boleine lacnodaingte. Aime Yesu balaibecaigacte ngaba aicnolu weyebic aicnoebongka wiyac balu gadaicte. Aime lobewa himong silicine monicte kwesidaicte, iwa Sugucnedi gaga-sanang inguchac lacnodaicte.** <sup>31</sup> **Aime ngic molic-molic gacaigaing, yengelacni homacnedi lobeine aidaingte. Nga lobeine gacaigaing, yengelacni homacnedi molic-molic aidaingte.**”

*Homanale mime alecine habackang aiwec*

*Mat 20:17-19; Luk 18:31-34*

<sup>32</sup> Aime yenge Yerusalem yefewa hikelu Yesu ye molickeme mic-tengtengfocine yenge ye balaibelu hikeibong. Hikelu Yerusalem iwa Yesu badaingkale kwatackeibong. Aime gocne ye balaibeibong, yenge hangocebawec. Aime Yesudi mic-tengtengfocine 12 yengilangkac mengoceba-lelu wiyac fikecnodaicte, yogolec yowa yanguc edocebawec, <sup>33</sup> “**Ngagegac, nongileng Yerusalem hikegabeleng. Hikelu fenoga iwa ngic yengi Ngicte Madec balu depec-baba ngic micne, nga Wapongte yefe-yowale wewedu ngic, yengele molewa lobong, yengi ye homanale mimoctodaingte. Mimoctobong ye Israel yengele alingacni miyac, yengele molewa lodaingte.** <sup>34</sup> **Lobong, yengi yowa kwekwe aicnolu sofockelu muc-hududi welu wehomadaingte. Aime hadeng habackang aimebac ye hatacmac gboliyelu fangkedaicte.**”

*Honocmengte ngiye-ngiye*

*Mat 20:20-28*

<sup>35</sup> Aime Sebedi madeckecine, Yakobos nga Yoane, yeki Yesula lelu yanguc miiboc, “Wewedu, noke wiyac monicte uwagabelec yogo ainotecte ngagegabelec.”

\* **10:24:** Dameng iwa ngic-ngigac yanguc ngageibong. Wapongti ngic nganime madickewec, ye woc-wiyacine lacnowec. Ilec ngic woc-wiyacineholec aigac, ye Wapongte haicka ngic madicne aigac, yenge inguc ngageibong.

**10:31:** Mat 20:16; Luk 13:30      **10:32:** Mrk 8:31; 9:31

<sup>36</sup> Inguc miboc uwayetewec, “**Na oma wiyac aingetebele ngagegabiyeec?**”

<sup>37</sup> Uwayeteme yanguc miiboc, “Gacgu wac feicnegona ngiyeengka nokelacni monicti folegonapec nga monicti kanagonapec ngiyedabelecte, yogolec mipangkenotec.”

<sup>38</sup> Inguc miboc, Yesudi yanguc edocepawec, “**Ngeke wiyac uwagabiyeec, yogolec fungine mi ngage-motogabiyeec. Na doicte kwenoc kap iwa nodacte, ngeke yogo inguchac momoc nonicte migabiyeec, me? Ailu doicka locnudaingte, yogowa ngeke-holec momochac iwa locnubadabiyengte, me?**”

<sup>39</sup> Inguc mime yeki yanguc miiboc, “Oc, nalic aidabelecte.”

Inguc miboc Yesudi yanguc edocepawec, “**Na kwenoc kap iwa nodacte, yogo ngeke inguchac nodabiyeecte. Nga doicka locnudaingte, yogowa inguchac ngekeholec momochac locnubadabiyengte.** <sup>40</sup> **Aimebac madi folena me kanana ngiyedaicte, yogolec noinebac nani nalic mi mimoctodacte. Mac ngiye-ngiye yogo ngic weni yogo yekele bamockeicne fagac, yeki sugu iwa ngiyedabiyeecte.**”

<sup>41</sup> Aime mic-tengtengfocine 10 yengi yogo ngagelu, Yoane nga Yakobos yekele kwele-dac ngageyeteibong. <sup>42</sup> Inguc ngagebong Yesudi wacebame welebong yanguc edocebawec, “**Israel yengele alingkacni miyac yengele micnefocngineng wacebaicne gagaing, yenge ngic-ngigac yengele ngagebong wawaine aicaigac. Ailu yengileng ngagebong feicne aigac. Aime sugucnefocngineng yenge tapili fayelegacte ngic-ngigacfoingeng yenge yowangineng balaibeccaigang, ngenge yogo ngagegac.** <sup>43</sup> **Aime ngengela aibaba ingucne mi fikedaic, miyac. Ngengelacni monicti feicne ganogale ngagelu, ye ngengele hewacka mole-baficngineng gadaic.** <sup>44</sup> **Ailu ngengele hewackacni monicti molic-molic ainogale aicnome, ye sasawa yengele kwelec kwekwe gadaic.**

<sup>45</sup> **I yangucte, ngic-ngigac yengi Ngicte Madec bafickenyengte mi wawec, miyac. Yebac yenge baficebalu ngic-ngigac homacne yengele ailu gagaine hegilelu fuli bacebanale wawec.**”

*Batimeus*

*Mat 20:29-34; Luk 18:35-43*

<sup>46</sup> Yesu nga mic-tengtengfocine yenge Yeriko taonka hike sulumeibong. Iwa hikebong ngic-ngigac habutowa yenge momoc hatacmac Yeriko taon hegilelu hikeibong. Hikebong ngic donge-pisic monic wacine Batimeus, yogolec fungine Timeusle madec, ye yefe mecina ngiyelu woc-wiyacte milocelebalu gawec. <sup>47</sup> Milocelebalu game yengi yowa yanguc miibong, “Yesu Nasaret-hocni, yedi kwesilu hikegac.”

Ye yogo ngagelu sanangnehac aukwelu yanguc miwec, “Yesu, Dawidile fikesaweckacni, ga nale kwelegone sowalena.”

<sup>48</sup> Ye sanangnehac inguc wackeme ngic-ngigac bocyac yengi ye waickelu ngiyenale kpatalacnoibong. Aime ye sanangnehac hatacmac wackewec, “Dawidile fikesaweckacni, ga nale kwelegone sowalena.”

<sup>49</sup> Wackeme Yesu ye domalu yanguc miwec, “**Ngenge ye wackebong nala welena.**”

Inguc mime ngic yengi ngic donge-pisic wackelu miibong, “Ye wacgugac, ga kwelegone madickeme fangkelu lenong.” <sup>50</sup> Inguc mibong ngic ye ngakpi daleine wickeme ngiyeme biyac fangkelu Yesula lewec.

<sup>51</sup> Leme Yesudi yanguc uwacnowec, “**Na oma wiyac aigelebele ngagegic?**”

Inguc mime ngic donge-pisicti yanguc miwec, “Wewedu, dongene hilanogale ngagegabac.”

<sup>52</sup> Inguc mime Yesudi yanguc edowec, “**Ngage-ngagesinggonedi bamadicgugacte nalic hikenong!**” Inguc mime ye yogowahac dongeine hilalu Yesu balabelu yengeholec yefe hikeibong.

## 11

*Donggi feina ngiyewec*

*Mat 21:1-11; Luk 19:28-40; Yoa 12:12-19*

<sup>1</sup> Aime yenge hikegacgu Yerusalem taon bangkalelu Oliwa kupicka Betfage nga Betani mac-himong ngiyeibocka iwa hikelu sulumeibong. Hike sulumelu Yesudi mic-tengtengkecine yaeckang salecepalu <sup>2</sup> yanguc miwec, “**Ngeke dondonne hikelu macaling yefe molic-molicka ngiyegac, iwa felu donggi madecine monic ngicti feina mi ngiyeicne. Donggi yogo witickebong domagac, ngeke yogo bafuwalu mucine lukelu balu kwesinic.** <sup>3</sup> **Lukeboc entacka monicti yanguc uwangetedaicte, ‘Ngeke wenuc ainicte aigaic?’ Inguc uwame yanguc edodabiyeec. ‘Sugucne ye yagodi bole banogale migac. Bole motome yenge donggi yogo biyac balu kwesidaingte.’**”



<sup>4</sup> Inguc mime yeke hikelu donggi madecine yefewa mac nuina mucti witickeicne domawec, yogo nganilu lukeiboc. <sup>5</sup> Lukeboc ngic gocne iwa domaibong, yengi nganicepalu yanguc miibong, “Ngeke donggi madecine wenuc ainicte lukegaic?” <sup>6</sup> Inguc mibong yeke Yesudi yowa edocepawec, yogo edocebaboc, yenge yowa yogo ngagelu yeke hegilecepabong hikeiboc. <sup>7</sup> Hikelu donggi Yesula balelu ngakpinginec dalicne hemoctolu donggi madecinele feiwa lumackeboc Yesu ye yogolec feina ngiyewec. <sup>8</sup> Ngiyewec ngicngigac bocyacti ngakpingineng dalicne hemoctolu yefewa lumackeibong. Nga gocnedi bole mecinacni yoc mangngine welockelu yefewa lumackeibong.

<sup>9</sup> Aime ngic-ngigac molickelu hikeibong nga lobeina balaiibeibong, yengi aukwelu yanguc miibong.

“Asec, ngic Sugucnele wacka welegac, ye mimi-madicineholec. (Mige 118:26)

<sup>10</sup> Ngambononggeng Dawidile ngani-damong welegac, yogo mimi-madicineholec. Sawawa wilini wacine feicne mitengkegaing, asec.”

<sup>11</sup> Yesu ye Yerusalem inguc felu, Wapongte Ibu-macka fewec. Felu ngani-ngagac aiyackeme motome mac aweleme, mic-tengtengfocine 12 bacebame Betani macka hikeibong.

*Fik yoc saweckewec*

*Mat 21:18-19*

<sup>12</sup> Mac saeme yenge Betani mac hegile walu Yesu nosingte homawec. <sup>13</sup> Homalu dalicka hilalu fik yoc monic hekengngine sabaineholec nganiwec. Nganilu ngageme noineholec ingucne aime yoc fungina hikelu hekengngine sugu nganiwec. Fik noinele dameng mi aiwecte inguc aiwec. <sup>14</sup> Aime ye noine basackelu yoc yanguc edowec, “**Monicti gale noinegone hatacmac mi nodaic.**” Inguc mime mic-tengtengfocine yenge yowa yogo ngageibong.

*Woc-wiyac salelu gabong yebicebawec*

*Mat 21:12-17; Luk 19:45-48; Yoa 2:13-22*

<sup>15</sup> Yesu ye Yerusalem hike sulumelu Wapongte Ibu-macte oda kwelina fewec. Felu ngic wiyac salelu gaibong, yenge yogowacni yebicebawec. Ye ngic monengngineng lanacganac aibong, yengele tebo bafaliyewec. Ailu tudiling nango saleibong, yengele mac ngiye-ngiye bafaliyewec. <sup>16</sup> Ailu Wapongte Ibu-mac kwelina wiyac ingucne mi bafeningte kpatalayelewec. <sup>17</sup> Kpatalayelelu weduyelelu yanguc edocebawec, “**Yowa yanguc kwelengkeicne fagac,**

**‘Nale Ibu-mac yogo himongne himongne ngic-ngigac sasawa yengele mimilocte mac, wacine inguc wackenoga.’**

(Yes 56:7)

**Aime ngengibac yogo bafaliyebong,**

**‘Hise-baba ngic yengele sangke-sangke mac aigac.’**

(Yer 7:11)

<sup>18</sup> Inguc mime habu sasawadi yele weweduinele ngagebong wiyac feicne aiwec. Ilec ailu depec-baba ngic micne, nga Wapongte yefe-yowale wewedu ngic yengi yele hangocebawec. Aime yele yowa yogo ngagelu ye wehomanogale yefe basackeibong. <sup>19</sup> Aime mac aweleme Yesu nga mic-tengtengfocine yenge taon hegilelu hikeibong.

*Fik yoc yowa edowec*

*Mat 21:20-22*

<sup>20</sup> Mac saeme yenge yefewa hikelu nganibong, fik yoc hekengngine nga godocine yogo ululuwelu domawec. <sup>21</sup> Domame Pita ye yogo nganilu ngagesilu Yesu yanguc edowec, “Wewedu ga nganic, ga fik yoc saweckemec, yogo biyac homanogale ululuwelu domagac.”

<sup>22</sup> Inguc mime Yesudi yanguc edowec, “**Ngenge Wapong ngagesingkedaing.** <sup>23</sup> **Foinac, monic ye kweleina ngageboc mikac galu wiyac monicte me monicte milu yogolec noine fikenale ngagesingkedaicewa, ye kupic edi fangkelu kiwecka haunale mime yogo fikedaicte, yogo noine edocngebagabac.** <sup>24</sup> **Na ilec ailu yanguc edocngababab, ngenge wiyac yogolec me yogolec ngagesilu badabelengte, inguc ngagelu ngagesingkelu milockebong, wiyac yogo fikengeleidaicte.**

<sup>25</sup> **“Aime ngenge domalu milockecaigaing, dameng iwa monicte ngaba me wiyac ingucne balu gagaingka bikicine yogo hegiledaing. Inguc aibong honocmeng Mamacnginengti ngengele bikic inguchac hegiledaicte. <sup>26</sup> [Nga ngenge ngic yengele bikic mi hegiledaingtewabac, honocmeng Mamacnginengti ngengele bikic inguchac mi hegiledaicte.]”\***

11:13: Luk 13:6    11:17: Yes 56:7; Yer 7:11    11:18: Mrk 14:1    11:23: Mat 17:20    11:24: Mat 7:7    11:25: Mat 6:14-15    \*    11:26: Hibi esecne Mareko kwelengkwec, yogo nganilu iwacni kwelengkeibong kwelengkeibong ofewec, yengelacni gocne 11:26 iwa mi fagac. Ngic-ngigac yenge hibi kwelengkeicne yogo wosaelu nganibong Marekodi mi kwelengkwec mecne.

*Wapongti Yesu bole-yowa micnowec*

*Mat 21:23-27; Luk 20:1-8*

<sup>27</sup> Yesu mic-tengtengfocine yengeholec hefaliyelu Yerusalem feibong. Felu Yesu ye Wapongte Ibu-mac kwelina lolickeemewa, depec-baba ngic micne, nga Wapongte yefeyowale wewedu ngic, ailu Yuda ngic-ngigac yengele damongfocngineng, yenge yela kwesilu yanguc uwacnoibong, <sup>28</sup> “Ga oma bole-yowa tapiliineholec yago bagamec? Ailu madi bole yogo banogale bole-yowa tapiliineholec gelewec?”

<sup>29</sup> Inguc mibong Yesudi yanguc edocebawec, “**Na yowa monic uwangelebe ameine edocnubong, na inguchac bole-yowa tapiliineholecte fungine yogo edocngedadacte.** <sup>30</sup> **Yoanedi misa-lowac bole balu gawec, bole-yowa tapiliineholec yogo honocmengkacni me ngickacni, nenge yogo edocnubong ngagebe.**”

<sup>31</sup> Inguc mime yenge yengilangkac mingagec ailu yanguc miibong, “Nongileng wenuc midabelengte? ‘Yogo honocmengkacni’ inguc midabelengtewa, ye yanguc uwanoledaacte, ‘Inguc ngagelubac nenge omale ye mi ngagesingkeibong?’ <sup>32</sup> Me ‘ngickacni’ midabelengtewabac wenuc aidabelengte?” I yangucte, ngic-ngigac sasawa yenge Yoane ye Wapongte siduc-mimi ngic noine, inguc ngagegaing. Aime ngic micne yenge ngic-ngigac habu yengele ailu hangocebawec.

<sup>33</sup> Ilec yengi bafaliyelu Yesu yanguc edoibong, “Yogo mi ngagegabeleng.”

Inguc mibong Yesudi yanguc edocebawec, “**Inguc migaingte, na inguchac male bole-yowa tapiliineholec balu gagabac, yogo nalic mi edocngedadacte.**”

## 12

*Waing bolele damong*

*Mat 21:33-46; Luk 20:9-19*

<sup>1</sup> Yesudi hatacmac nangeng yowa holelu yanguc edocebawec, “**Ngic monicti waing bole gbolicne monic duwelu oda hefewec. Hefelu waing hesoc-hesoccte long faliwec. Falilu damong yengele donge hila-hilale mac-dale monic bawec. Inguc bame motome waing bole damongkeningte ngic gocne bafuwacebalu, yengeholec yowa milu hefewec. Ailu yeicnebac himong dalicka hikewec.** <sup>2</sup> **Hikelu gaemewa waing noine babale dameng aiwec. Aime noine nebocine banogale kwelec kwekwe ngic monic saleme bole-damong yengela hikewec.** <sup>3</sup> **Hikeme bole-damong yengi kwelec kwekwe ngic yogo nganilu balu dobo welu mocbenang salebong hikewec.** <sup>4</sup> **Hikeme bole fileinedi kwelec kwekwe ngic monic hatacmac yengela saleme hikeme, yengi ye hodocina welu misofoc aicnoibong.**

<sup>5</sup> “**Inguc aicnobong, bole fileine ye sanangkelu hatacmac kwelec kwekwe ngic monic saleme yengela hikeme, ye wehomaibong. Wehomabong, bole fileine ye kwelec kwekwe ngic bocyac salecebame hikeibong. Hikebong bole-damong yengi kwelec kwekwe gocne dobo wecebaibong, nga gocnebac wehomacebaibong.**

<sup>6</sup> “**Motome, bole fileine ye madecine moniyang gawecte, kweleinedi yele angac ngagewec, ye yanguc ngagelu salewec, ‘Yenge madecnebenangbac alang hacnodaingte.’**

<sup>7</sup> “**Inguc ngagelu saleme bole-damong yengi madecine nganilu mingagec ailu yanguc miibong, ‘Yedi gagcu bole yago bame yeicne bingec aidaicte. Ilec nenge kwesibong wehomabong, yele himong nga mole-damac yago nongileng aidaic.’** <sup>8</sup> **Yenge inguc milu bole fileinele madecbenang yogo balu wehomalu, kponggbongine yogo waing bole lobina wickebong haulu fawec.**

<sup>9</sup> “**Aime bole fileine ye wenuc aidaicte? Ye kwesilu waing bolele damong yogo wehomacebadaicte. Ailu waing boleine yogo bole-damong aling gocne yengele molewa lodaicte.**

<sup>10</sup> “**Wapongte hibiwa yowa yanguc kwelengkeicne fagac, ‘Mac-baba ngic yengi posa monic sowacne milu wickeibong. Aime posa yogodi macte posa-bosing sanangne ailu domadaicte.** <sup>11</sup> **Aime pasi yogo Sugucne yeuctihac bame ngicti ngani-angac aigabeleng.’** (Mige 118:22-23)  
Nenge yowa yogo wafe-ngagec mi aicaigaing, me?”

<sup>12</sup> Aime Yesu ye micne yengele ngagelu nangeng yowa yogo holelu miwec, yenge yogo biyac ngage-motoibong. Ailu yenge ye banogale yefe basackeibong. I yangucte, yenge ngic-ngigac yengele hangocebawecte ailu hegilelu hikeibong.

*Takesle yowa*

*Mat 22:15-22; Luk 20:20-26*

<sup>13</sup> Ngic micne yengi Yesu kwesackebong yowa lilome balu yowawa lonogale ngagelu yanguc aihbong. Yenge Farisaio nga Herodele alingcacni ngic gocne salecebong yela hikeibong. <sup>14</sup> Hikelu yengi Yesu yanguc uwacnoibong, “Wewedu, ga yowa noine milu ngic feicne me waicne yengele mi ngagesicaigic. Ga ngic-ngigac aling wiyac sockahac aiyelecaigic, yogo ngagegabeleng. Aime ga Wapongte yefe noima ngic-ngigac edocebalu weduyelelu gagic. Inguc aime nongileng ngictau Sisa takes lacnodabelengte, me mi lacnodabelengte, yogolec yefe dondonne wenuc fagac? Nongileng ngictau Sisa takes nalic lacnodabelengte, me miyac?”

<sup>15</sup> Inguc mibong Yesudi kwesac-aibabangineng ngage-motolu yanguc edocebawec, **“Ngege omale lokwesacka locnugabiyeng? Ngege moneng monic bafuwalu edal-icnubong nganibe.”** <sup>16</sup> Inguc mime yenge moneng monic lacnobong ye yogo nganilu yanguc uwayelewec, **“Iluc nga hibi yago male?”**

Uwayeleme miibong, “Yogo Sisale.”

<sup>17</sup> Inguc mibong Yesudi yanguc edocebawec, **“Ilec ngege Sisale wiyac, yogo Sisa lacnodaing. Nga Wapongte wiyac, yogo Wapong lacnodaing!”** Inguc edocebame ngagelu kwatackebong.

*Homackacni gboliyelu fangke-fangke*

*Mat 22:23-33; Luk 20:27-40*

<sup>18</sup> Sadyusi aling yenge homackacni gboliyelu fangke-fangke yogo mi fagac, inguc micaigaing. Aime yengelacni ngic gocne yengi Yesula kwesilu yanguc uwacnoibong, <sup>19</sup> “Wewedu, Mosesdi yefe-yowa monic yanguc kwelengkenolewec. Ngic monic ye ngigac balu gboli monic mi kwefickelu moc gacgu homadaictewa, ngigac ye gaemewa gbainedi haeinele hosec yogo balu gboli kwefickeme haeinele wac bafangkedaic.”

<sup>20</sup> “Dameng monicka hae-gba 7 yenge gaibong. Aime haengineng molic-molicti ngigac monic balu gboli mikac moc gacgu homawec. <sup>21</sup> Homame gbainedi ngigac yogohac balu ye inguchac gboli mikac gacgu homawec. Homame gbaine monicti aibaba yogohac aiwec. <sup>22</sup> Aime ngic hae-gba 7 yenge ngigac yogohac balu gbolifocngineng mikac gacgu homayackebong. Homayackebong lobebac hosecngineng ye galu homawec. <sup>23</sup> Homame ngic 7 yenge ngigac yogohac baibongte ailu, gacgu homackacni gboliyelu fangkedaingte, dameng iwa ngigac yogo ye male ngigacbenang aidaicte?”

<sup>24</sup> Inguc mibong Yesudi bafaliyelu yanguc edocebawec, **“Ngege yowa Wapongte hibiwa fagac, nga Wapongte tapili, yogo mi ngage-motogaing. Ilec ailu yowa mibong lilogac. <sup>25</sup> Gacgu homaibong yenge homackacni gboliyelu fangkedaingte, dameng iwa ngic-ngigac yenge mi banagudaingte. Aime mamac monicti ‘Na adune ngic lacnodacte,’ yogo nalic mi midaicte. Honocmengte angelo yenge ngawe-ngigac mi banagucaigaing, yenge ingucnehac ngawe-ngigac mi banagudaingte. <sup>26</sup> Aime homackacni gboliyelu fangke-fangke migabac, ngege yowa yogo Mosesle hibiwa wafe-ngagac mi aicaigaing, me? Mosesdi yoc kpicicna dac-ubilang fikeme nganilu iwa leme Wapongti yanguc edowec, ‘Na Abraham nga Aisak ailu Yakobo, yengele Wapong gagabachac.’** (Wah 3:6)

<sup>27</sup> **Ailu ye ngic homaicne yengele Wapong miyac. Ye ngic gbolicne gagaing, yengele Wapong.\* Ngege yefe hocyachenang lilolu gagaing.”**

*Ung-yowa feicne*

*Mat 22:34-40; Luk 10:25-28*

<sup>28</sup> Aime Yesu yowa milu uwacnobong yedi ameine madicne bafaliyeyelewec. Aime Wapongte yefe-yowale wewedu ngic yengelacni monicti yogo nganilu Yesula welelu yanguc uwacnowec, “Ung-yowa weni yogodi molic-molicine aigac?”

<sup>29</sup> Inguc uwacnome Yesudi yanguc miwec, **“Ung-yowale molic-molic yogo yanguc fagac,**

**‘Israel ngic-ngigac, ngege ngagening, Sugucne Wapongnonggeng ye moniyangti sugu Sugucne gagac. <sup>30</sup> Aime ga kwelegone, nga ilucgone, ailu ngage-ngagegone, nga tapiligone sasawa, yogo buchach Sugucne Waponggonele kwelegoned i angac ngagecnolu gadamec.’** (Yef 6:4-5)

<sup>31</sup> **Ailu monic yanguc,**

**‘Gageicne aigelecaigac, silicine ingucnehac ngic-ngigac gale emewa gagaing, yengele kwelegoned i ago aiyelelu angac ngageyelelu gadamec.’** (Dep 19:18)

**12:17:** Rom 13:7    **12:18:** Sale 23:8    **12:19:** Yef 25:5-10    \* **12:27:** Abraham, Aisak, nga Yakobo homabong dameng dalicne leemewa Moses fikewec. Ilec ailu Yesule yowa yago yegena edalicnubagac, Mosesle damengka ngic yenge biyac gboliyelu gagaing.    **12:28:** Luk 10:25-28

**Ung-yowa monicti yogo yeke mi ewalicepagac.”**

<sup>32</sup> Inguc mime Wapongte yefe-yowale wewedu ngic yedi bafaliyelu yanguc edowec, “Wewedu, ga noinebenang migic. Wapong ye moniyang sugu, monicti ye ingucne mi gagac. <sup>33</sup> Aime kwelegone sasawa, nga ngage-ngagegone bucbuchac, ailu tapiligone sasawa yeke kwelegone angac ngagecnodamec. Ailu geicne aigelecaigac, silicine ingucnehac ngic-ngigac gaholec emegona gagaing, yengele kwelegone ago aiyelelu angac ngageyelelu gadamec. Wiyac yogodi hocne Wapongte hasoc hole-hole, nga depec haicine monic-monic yogo ewaligac.”

<sup>34</sup> Ngic yogo ye madicnebenang bafaliyeme, Yesudi ngagelu yanguc edowec, “**Ga Wapongte ngani-damong yogo emeina gagamec.**” Inguc mime yenge Yesu hatacmac uwacnongte hangocebame hegileibong.

*Yesudi Mesiale uwayelewec  
Mat 22:41-46; Luk 20:41-44*

<sup>35</sup> Yesudi Wapongte Ibu-macka yowa weduyelevu yanguc uwayelewec, “**Wapongte yefe-yowale wewedu ngic yenge Mesia ye Dawidile fikesaweckacni inguc omale micaigaing?** <sup>36</sup> **Dawidi ye Tili Asudi haefekeme yeuctihac yanguc miwec, ‘Sugucnedi nale Sugucne† yanguc edowec, ‘Ga folenapec ngiyeengka ngabafocgone yenge higecone bageina locebadacte.’**” *(Mige 110:1)*

<sup>37</sup> **Dawidi yeuctihac Mesia ‘Nale Sugucne’ wackewec. Aime Mesia ye wenucka Dawidile fikesaweckacni aigac? Ye Dawidile Sugucne.”**

Inguc mime ngic-ngigac habutowa yenge yowaine ngage-angac aibong.

*Wapongte yefe-yowale wewedu ngic yengele miwec  
Mat 23:1-36; Luk 11:37-54; 20:45-47*

<sup>38</sup> Inguc aibong Yesu ye taockelu yowa yanguc edocebalu weduyelevu, “**Ngenge Wapongte yefe-yowale wewedu ngic yengele ngani-motolu gadabiyeng. Yenge angacningente ngakpi dalicne holelu gabong, ngic-ngigac yengi wenac-madic edocebaningte, sobeng sugucna hike-kwesic aicaigaing.** <sup>39</sup> **Ailu kpakpaduc macka nga noba-nosing nonole damengka molic-molic ngiye-ngiyewa ngiyenogale angaceba-caigac.** <sup>40</sup> **Ailu yenge ngigac-hosec yengele mac ewalicebacaigaing. Ailu ngagemadicebaningte mimiloc dalicnehac milockecaigaing. Yenge kwesac-aibaba ingucne aicaigabiyengte ameine sugucnehac badaingte.”**

*Ngigac-hosecte ibu  
Luk 21:1-4*

<sup>41</sup> Aime Yesu ye Ibu-macte ibu katapa nebocina ngiyelu nganime, ngic-ngigac bocyacti moneng iwa lobong haume, ngic-ngigac bocyacti moneng woc-wiyackolec kwesilu moneng bocyac lobong hauwec. <sup>42</sup> Haume ngigac-hosec monic waweweine ye inguchac kwesilu moneng hakic kpisicne sasacnehac yaeckang lome hauwec.

<sup>43</sup> Lome Yesudi mic-tengtengfocine wacebame welebong yanguc edocebawec, “**Foinac, ngigac-hosec waweweine yagodi moneng logac, yogodi ngic-ngigac sasawa ibu logabiyeng, yenge ewalicebagac, yogo noine edocnebagabac.** <sup>44</sup> **I yangucte, ngic-ngigac sasawa, yenge woc-wiyactowangineng wakelu fagac, yogowacni ibungineng logabiyeng. Nga ngigac yebac wiyac facnogac, yogo hocne sasawa loyackelu mochebanang gagac.”**

**13**

*Wapongte Ibu-mac sowaledaicte  
Mat 24:1-2; Luk 21:5-6*

<sup>1</sup> Aime Yesu ye Wapongte Ibu-mackacni walu leemewa, mic-tengtengfocine yengelacni monicti yanguc edowec, “Wewedu, Ibu-macte posa madicne madicne nga macine madicne madicne falegac, yogo nganic.”

<sup>2</sup> Inguc mime Yesudi yanguc edowec, “**Mac sugucne sugucne ngiyegaing yogo nganicebagic, yogo gacgu dameng monic kwesidaicte, yogowa ngic yengi yogo sasawa hembalackebong hikeyackedaicte. Hikeyackeme posa monicti monicte feiwa mi hegileibong ngiyedaicte.”**

**12:32:** Yes 45:21 **12:33:** Yef 4:35; 1Sm 15:22; Hos 6:6 † **12:36:** Miti Geewa Hibru yowawa Sugucnele wac yaeckangi fagaic. Molic-molic Hibru yowawa wacine yogo “Yawe” fagac. Nga yogolec lobeina, “Sugucne” inguc fagac. Mareko iwa Grik yowawa Sugucnele wac moniyang sugu bafaliyeicne fagac. “Nale Sugucne” yogo Mesia. **12:43:** 2Kor 8:12 **13:2:** Luk 19:44

*Umac haicine monic-monic**Mat 24:3-14; Luk 21:7-19*

<sup>3</sup> Yesu ye Oliwa kupicka ngiyelu dongeine Wapongte Ibu-macka nganilu ngiyewec. Ngiyeme Pita nga Yakobos ailu Yoane nga Endru, yengi sugu yeholec galu yanguc uwac-noibong, <sup>4</sup> “Ga Ibu-macte yowa migic, yogo ma damengka fikedaicte? Ailu dameng iwa maaine wenuc fikemebac, yowa sasawa yogolec noine yegengkedaicte? Ilec edoc-nubanong.”

<sup>5</sup> Inguc mibong Yesudi yanguc edocebawec, “**Monicti kwesacngebadaickale, ngenge ngani-motolu gadabiyeng.** <sup>6</sup> **I yangucte, ngic bocyac yengi kwesilu nale wac wack-elu yanguc midaingte, ‘Na Mesia.’** Inguc milu ngic-ngigac bocyac kwele basifuc ayeledaingte.

<sup>7</sup> “**Hudu sugucnele siducti himong bangkacka, nga himong dalickacni kwesime ngenge yogo ngagelu mi kwatackedaing.** Foinac, aibaba ingucne fikedaicte. Aime dameng moto-motoinebac yogowahac biyac mi kwesidaicte. <sup>8</sup> **Himong gocne yengi himong monickacni gocne yengeholec hudu wenagulu gadaingte.** Ailu ngictau monicte alingti ngictau monicte aling yengeholec ngaba ainagudaingte. Aime memeya yenge himongne himongne badaingte. Ailu nosingte loloc-dameng fikelu hikedaingte. Aime aibaba ingucne, yogo wiyac gbolicne fikenogale aiyemewa, ngigac molickelu gado hicaigac, ingucnehac aidaicte. <sup>9</sup> **Ilec ngenge ngengungtihac damongnagulu gadabiyeng.** Ngic yengi yowawa locngebadaingte. Ailu kpakpaduc macka muc-hududi wecgebadaingte. Ailu yenge nale ailu ngictau nga gawana yengela yowawa locngebabong, ngenge iwa domalu nale Siduc Madicne mibong yegengkelu hikedaicte.

<sup>10</sup> “**Molickelu ngenge Siduc Madicne edocebalu weduyelebong himongne himongne sasawa hikeme ngic-ngigac ngageyackedaingte.** <sup>11</sup> **Aime ngenge bacnge-balu ngic gocne yengele molewa locngebabong yowawa domadaingte, ngenge dameng iwa, ‘Yowa wenuc minoga?’** milu ngageboc monic mi aidabiyeng. Tili Asudi dameng yogowahac yowa micnginang lodaicte yogo midaing. Ngenge dameng iwa ngengung-yowa mi midaingte, miyac. Yogo Tili Asulacni midaingte. <sup>12</sup> **Aime haedi gbaine ngic micne yengele molewa lome yengi homacka lodaingte.** Aime mamac monicti madecinele ingucnehac aidaicte. Aime adu-madec yengi nenggac-mamacfocngineng yowa kwekwe ayelelu ngic gocne yengele molewa locebabong homacka locebadaingte. <sup>13</sup> **Aime ngic-ngigac sasawa yenge nale wacte ailu ngenge kweledi wicngebadaingte.** Aime monic ye sanangnehac gacgume damengine motodaicte, ye wasecne aidaicte.”

*Wiyac sowacnebenang**Mat 24:15-28; Luk 21:20-24*

<sup>14</sup> Aime monic ye yowa yago wafedaicte, ye yogo ngage-motodaic. “**Wiyac monic sowacnebenang memengaine aigac, yogodi ngiyelu wiyac gbagbacne\*** basowaleme wonongkolec ailu mac-bala ingucne aidaicte. Wiyac sowacne yogodi Ibu-mac kweline gbagbacne iwa domalu Ibu-mac basowaleme ngenge nganidaingte. Aibaba yogo fikeme ngic-ngigac Yudeya himongka gagaing, ngenge hangoc hikelu tikiwa fedaing. <sup>15</sup> **Aime monic ye mac feina ngiyedaictewa, ye haulu wiyac monic banogale mac kwelina mi fedaic.** Ye momoc hangoc hikedaic. <sup>16</sup> **Nga monic ye nosing-bolewa domadaictewa, ye ngakpi dalicne banogale macka mi hefaliyelu hikedaic.** Ye momoc hangoc hikedaic. <sup>17</sup> **Ailu dameng iwa ngigac gobeholec gagaing, nga nenggac kogoc amuc gumecebalu gagaing, mee, yenge medecbadaic.**

<sup>18-19</sup> “**Dameng iwa doic sugucnehac silicine monichenang fikedaicte.** Wapongti molickelu himong sasawa bafuwawec, yogowacnihac ofecgu yakumac gagabeleng, dameng yogolec kwelina doic sugucnehac ingucne monic mi fikewec. Ailu lobewa hatacmac nalic mi fikedaicte. Ilec ailu ngenge wiyac yogo tilo-gbelong damengka mi fikenale milockedaing. <sup>20</sup> **Sugucnedi dameng yogo mi bangkalenale mideck-abac, monicti wasecne nalic mi aidec.** Ngic-ngigac bawosaecebaicne, yengele ailu dameng yogo biyac welockeme bangkalelu fagac.

*Mesia kwesacine*

<sup>21</sup> “**Dameng iwa yowa yanguc fikedaicte, ‘Nganining, Mesia yawa fikegac,’ me, ‘Ye ediwa fikegac.’** Ngic-ngigac inguc mibong ngenge mi ngagesingkedaing. <sup>22</sup> I

13:9: Mat 10:17-20    13:11: Luk 12:11-12    13:12: Mat 10:21    13:13: Mat 10:22; Yoa 15:21    \* 13:14: Yogo mac gbagbacne. (Daniel 9:27; 11:31; 12:11-13)    13:15: Luk 17:31    13:17: Luk 23:29    13:18-19: Dan 12:1; Miye 7:14

yangucte, ngic fikelu kwesac ailu midaingte, 'Na Mesia.' Yenge nga siduc-mimi ngic kwesacine yenge fikelu ngic-ngigac kwele basifuc aiyeledaingte. Ailu ngic-ngigac kwesacebalu pasile maa nga pasi mi ngani-nganiine badaingte. Ailu yenge yefe monic bafuwadaingtewa, ngic-ngigac bawosaecebaicne inguchac kwesacka bace-badaingte, aime yefe ingucne monic mi fagac. <sup>23</sup> Aibaba sasawa yogo mi fikeemewa yogo biyac edocnegabagac. Ngenge yogo ngagelu ngani-motolu gadabiyeng.

*Ngicte Madec yegengkedaicte*

*Mat 24:29-31; Luk 21:25-28*

<sup>24</sup> "Aime doic yogo motodaicte, dameng iwa

'Wenac-dongeine kundung kweme, tamacne angocine mi angoledaicte. <sup>25</sup> Aime asocmeng yenge sawawacni motolu wabong sawawa wiyac sasawa yengele tapili yogo teng-teng kwedaingte.' *(Yes 13:10; 34:4)*

<sup>26</sup> Dameng iwa yenge Ngicte Madec nganibong ye tapili nga hibi-angoctowaineholecti kaguwa kwelina kwesidaicte. <sup>27</sup> Kwesilu angelofocine salecebame himong nga honocmeng mecine nehoc nga nehoc motogac, iwa hikelu yeuctihac ngic-ngigac bawosaecebawec, yenge kpaducebadaingte.

*Fikyoc nganilu ngage-ngage banoga*

*Mat 24:32-35; Luk 21:29-33*

<sup>28</sup> "Fik yocte fungine nganilu ngenge yogo ngage-motodaing. Manggina gidecine ofeme hekengngine fosome ngic ngenge yanguc ngagecaing, wenac dameng aigac. <sup>29</sup> Aime ngenge wiyac migabac, yogo fikeme nganilu inguchac yanguc ngagedaing, Ngicte Madec damengngine biyac bangkale kwesilu nu lobina domagac. <sup>30</sup> Foinac, ngic-ngigac aling yanguctihac gagaing, ngenge mi homaebongkahac, wiyac sasawa yogo fikedaicte, yogo noine edocnegabagac. <sup>31</sup> Foinac, himong nga sawa yeke gagu miyac aidabiyecte. Nga nale yowabac mi miyac aidaicte.

*Yesule kwesi-kwesi dameng*

*Mat 24:36-44*

<sup>32</sup> "Aime aibaba yogo ma damengka ailu hadeng edomengka fikedaicte, yogo monicti nalic mi ngagedaicte. Honocmengte angelo yenge yogo mi ngagedaingte. Ailu Madec ye inguchac mi ngagedaicte. Mamacti sugu dameng yogo ngagegac. <sup>33</sup> Ngenge dameng mi ngagegailingte damong balu deboc-gboli gadabiyeng.

<sup>34</sup> "Yogowa aibaba ingucne fikedaicte, ngic monic ye macine hegilelu himong monicka hikenale ngagewec. Inguc ailu ye kwelec kwekwefocine macka wiyac damongkeningte bole-yowa heuckelu edocebawec. Ailu nu damong ye nuwa donge hilalu deboc-gboli domanale edowec. <sup>35</sup> Mac fileine ye deboleme me deboc hewacina, me mac sae-saele, me ubiyacte hefaliyelu kwesidaicte, yogo ngenge mi ngagegailing. Ilec ailu ngenge deboc-gboli gadabiyeng. <sup>36</sup> Ngenge gung faebongka kwesilu nganicngabadaikale, <sup>37</sup> yowa yago ngenge nga ngic-ngigac sasawa edocnegabagac. Ngenge yogo ngagelu deboc-gboli gadabiyeng."

## 14

*Yesu wenogale yowa hefeibong*

*Mat 26:1-5; Luk 22:1-2; Yoa 11:45-53*

<sup>1</sup> Ewalicebaicnele hombang, aime bret yis mikac nocaigaing, yogolec hombangte hadeng yaeckang fawec. Faemewa depec-baba ngic micne, nga Wapongte yefe-yowale wewedu ngic, yenge Yesu sangke-sangke balu webong homanale yefe basackeibong. <sup>2</sup> Basackelu yanguc miibong, "Ngic-ngigac yenge ngaba nga hendolong sugucne aidaingkale ailu, ye hombang damengka mi badabeleng."

*Sanda hoineholecti sotiyeme Yesu hodocina wawec*

*Mat 26:6-13; Yoa 12:1-8*

<sup>3</sup> Aime Yesu ye Betani macka gawec, iwa ngic monic esecne waic-sanangkolec, wacine Saimon, yele macka nosing nolu ngiyewec. Nolu ngiyeme, ngigac monicti alabastros kilung\* monic sanda hoine madicneholec yogo bawelewec. Daling wacine narda yogolec misainedi baicne, ailu fuline feicnebenang. Ngigac ye yogo hocne kilungkolec bawelelu kilung ubeine balockelu Yesu hodocina sotiyewec. <sup>4</sup> Sotiyeme ngic gocne iwa ngiyebong, yengi yogo nganilu miwa-heduc ailu yanguc minaguibong, "Ye omale wiyac fuline feicne

13:22: Miye 13:13    13:24: Yol 2:10,31; 3:15; Miye 6:12-13    13:26: Dan 7:13; Miye 1:7    13:27: Mat 13:41; Mrk

13:32    13:35: Luk 12:38    \* 14:3: Alabastros kilung yogo posadi baicne, ailu ubeine dalicne nga tapaine mikac.

14:3: Luk 7:37-38

inguc kwondongkegac? <sup>5</sup> Sanda hoine madicne ingucnedi hifa moniyangte bole-fuli,† yogodi salelu moneng sugucnehac balu ngic-ngigac waweweine yelebeng madickedec.” Inguc milu ngigac yowa dacineholec aicnoibong.

<sup>6</sup> Inguc aibong Yesudi yowangineng ngagelu yanguc edocebawec, “**Ngenge omale ngigac yele inguc milu kwele-umac bafuwagaing? Ngenge aibaba yogo hegilingen. Ye aibaba madicnebenang ainelegac.** <sup>7</sup> Ngic waweweine yenge damengsoc ngengeholec gabong, ngengi yenge baficebanogale aingeleme nalic baficebalu gadaing. Nga nanibac ngengeholec damengsoc mi gadacte. <sup>8</sup> Ngigac yagodi socne sanda hoineholecti sotingkeneleme, kpongghongne longkedaingte. Ilec ailu ye molickelu baefecnugac. Ye hole banale ngagewec, yogo bagac. <sup>9</sup> Foinac, ngic-ngigac yenge Siduc Madicne himongsoc ngic-ngigac edocebalu weduyeledaingte, dameng iwa ngigac yagodi aibaba aigac, yogolec siduc inguchac milu ngagebong fadaicte, yogo noine edocngebagabac.”

*Yesu mudockenogale ngagewec*

*Mat 26:14-16; Luk 22:3-6*

<sup>10</sup> Aime mic-tengtengfocine 12 yengelacni monic wacine Yudas Iskariot, yedi Yesu baningte milu depec-baba ngic micne yengela hikewec. <sup>11</sup> Hikeme yenge beliyelu moneng lacnoningte mipangkeibong. Inguc mibong Yudas ye dameng madicne monicka Yesu mudockelu balu yengele molewa lonale, yogolec donge hilalu wangec gawec.

*Ewalicebaicnele nosing*

*Mat 26:17-25; Luk 22:7-14,21-23; Yoa 13:21-30*

<sup>12</sup> Bret yis mikacte hombang iwa molickelu Ewalicebaicnele hombangte lama madicine welu lobecaigaing. Dameng iwa Yesu mic-tengtengfocine yengi Yesu yanguc uwacnoibong, “Nonge mac wenuwa hikelu Ewalicebaicnele hombangte lama madicine bamockelu lobelu nonangte ngagegic?”

<sup>13</sup> Inguc uwacnobong yedi mic-tengteng yaeckang yanguc milu salecepawec, “**Ngeke taonka felu ngic monic misa-hebecine tengkelu weledaicte. Weleme yeholec luwelu ye balaibedabiyec.** <sup>14</sup> Balaibe hikelu ye mac fedaicte, ngeke mac yogowa fedabiyec. Felu mac fileine yanguc edodabiyec, ‘Wewedudi yanguc uwagegac, ‘Mac kweline monic wenuwa mimoctoengka na mic-tengtengfocne yengeholec Ewalicebaicnele hombangte lama madicine nodabelengte?’” <sup>15</sup> Inguc miboc yedi mac sawawa kweline sugucne monic, iwa wiyac biyac bamockeicne fayackegac, **yogo edalicngepame ngeke iwa wiyac sasawa yogo bamockedabiyec.**”

<sup>16</sup> Inguc mime mic-tengteng yeke mac hegilelu taonka feiboc. Felu Yesudi edocepawec, silic yogohac bafuwayackelu Ewalicebaicnele hombangte lama madicineholec nosing lobelu bamockeiboc.

<sup>17</sup> Aime mac deboleme, Yesu ye mic-tengtengfocine 12 yengeholec hikeibong. <sup>18</sup> Hike sulumelu nosing nongiyelu Yesudi yanguc miwec, “**Foinac, ngengelacni monicti na ngaba yengele molewa lochnudaicte, ye hocne naholec nosing nogac, yogo noine edocngebagabac.**”

<sup>19</sup> Inguc mime mic-tengteng yenge ngagebong umaleme, filesoc filesoc yanguc uwacnoibong, “Ga yogo nale migic, me?”

<sup>20</sup> Inguc mibong yedi yanguc miwec, “**Yogo mic-tengtengfocne 12 ngengelacni monicti, ailu ye naholec pelewa bret kpomuluckelu ngiyegac.** <sup>21</sup> Ngicte Madec ye hegilecngelalu hikedaicte, yogo nale ngagelu biyachac kwelengkeicne fagac. Ngic ye Ngicte Madec mudockeme badaingte, ye ameine baducnodaicte. Mee, ye medeckedaic. Ye nenggacinele gobe kwelinacni mi fikedec, yogodibac madicne aidec.”

*Tiwa noibong*

*Mat 26:26-30; Luk 22:15-20; 1Kor 11:23-25*

<sup>22</sup> Aime nolu ngiyebongka, Yesudi bret monic balu Wapong kwele-madic micnolu bret yogo bauckelu mic-tengtengfocine yanguc milu yelewec, “**Ngenge yago balu noning, yogo soc-biucne.**” <sup>23</sup> Inguc milu kap monic balu Wapong kwele-madic micnolu yeleme yenge sasawadi noibong. <sup>24</sup> Nobong yanguc edocebawec, “**Nale sac yogodi dodofic gbol-icne, yogo ngic-ngigac bocyac baficebanale ailu sotingkeicne.** <sup>25</sup> Foinac, na waing noinele misaine hatacmac mi nolu gaebewa, Wapongte ngani-damongte kwelina waing gbol-icne nodacte, yogo noine edocngebagabac.” <sup>26</sup> Aime yenge Wapongte gee holeibong. Holelu taon hegilelu Oliwa kupicka feibong.

† 14:5: Ye 300 denarius miwec. 14:7: Yef 15:11 14:8: Yoa 19:40 14:12: Wah 12:6 14:18: Mige 41:9

14:24: Wah 24:8; Sek 9:11; 1Kor 10:16; Hib 9:20

*Pitadi Yesu bisockedaicte*

*Mat 26:31-35; Luk 22:31-34; Yoa 13:36-38*

<sup>27</sup> Felu Yesudi yanguc edocebawec, “**Ngenge sasawadi nale ngage-sowac ailu hegilec-nundaingte, yogolec yanguc biyachac kwelengkeicne fagac, ‘Na lama-damong webe, lama yenge sasawadi singsalolong kwedaingte.’ (Sek 13:7)** <sup>28</sup> **Aime na homackacni gboliye fangkelubac molickengelelu Galili prowinswa hikedacte.”**

<sup>29</sup> Inguc mime Pitadi yanguc miwec, “Ngic-ngigac sasawadi ngage-sowac ailu hegilecgu-daingtewa, nanibac yogo nalic mi aidacte.”

<sup>30</sup> Inguc mime Yesudi yanguc edowec, “**Foinac, yakumac debocka kokolec ngicne hiyame alecine yaeckang mi aiyemewa, gagi na biyac bisocnung dameng habackang aidacte, yogo noine edocgugabac.”**

<sup>31</sup> Inguc mime Pita ye sanangnehac yanguc miwec, “Na gaholec homadactewa, ga nalic mi bisocgadacte.” Inguc mime mic-tengtengfocine yenge sasawadi inguchac miibong.

*Getsemane bolewa*

*Mat 26:36-46; Luk 22:39-46*

<sup>32</sup> Yesu nga mic-tengtengfocine yenge bole himong monic wacine Getsemane, iwa hikeibong. Hike sulumelu, yedi mic-tengtengfocine yanguc edocebawec, “**Ngenge yawa ngiyebongka na milockedacte.”** <sup>33</sup> Inguc milu ye Pita nga Yoane ailu Yakobos yenge sugu bacebame leibong. Lelu kweleine umalebenangkeme kwele-sowac ngagelu <sup>34</sup> yanguc edocebawec, “**Kwele-ilucnedi umale-benangkeme homanogale ainelegac. Ilec ailu ngenge yagowa deboc-gboli galu nganidaing.”** <sup>35</sup> Inguc milu lelu himongka wafalu yanguc milockewec, “**Ga ngageng nalic aigacka dameng yogodi ewalicondaic.”** <sup>36</sup> Inguc milockelu yanguc miwec, “**O Mamac, Mamacne, wiyac sasawa yogo nalic aidamecte. Ga doicte kap yago baickenong. Ailu nale angacti mi sanangkedaic, miyac. Gale angac nga ngage-ngage yogodi sanangkedaic.”**

<sup>37</sup> Inguc milockeme motome, hefaliyelu mic-tengtengfocine yengela welelu nganice-bame yenge gung faibong. Fabong Pita yeuckelu yanguc edowec, “**Saimon, ga gung falu gagic. Ga nalic deboc-gboli kpisicnemas ngiyedengka, me?** <sup>38</sup> **Ailu lokwesacka felu wawadaingkale, ngenge deboc-gboli galu milockening. Asunginengti efeckegac. Nga socnginengtibac umalegac.”**

<sup>39</sup> Ye inguc milu hatacmac lelu mimiloc yogohac milockewec. <sup>40</sup> Milockelu wele nganice-bame yenge hatacmac gung faibong. I yangucte, yenge dongenginengti gungte aime gung faibong. Aime ye yowa mime yenge ameine bafaliyenogale kpungkeibong.

<sup>41</sup> Aime ye hefaliye weleme alecine habackang aime nganicebalu yanguc miwec, “**Ngenge gung falu gagainghac, me? Yakumac motogac, aime dameng biyac welegac. Ngagegaing, ngic yenge Ngicte Madec mudockelu bikic-baba yengele molewa lodaingte.** <sup>42</sup> **Ngagegaing, mudoc ngic welegacte ailu ngenge fangkebong yengela hikenang!”**

*Yesu baibong*

*Mat 26:47-56; Luk 22:47-53; Yoa 18:3-12*

<sup>43</sup> Aime Yesu ye inguc milu domaemewa, mic-tengtengfocine 12 yengelacni monic, wacine Yudas, ye kwesime habu sugucnedi hudu-babale fitec nga gbalucngingekolec ye balaibeibong. Ailu yenge depec-baba ngic micne, nga Wapongte yefe-yowale wewedu ngic, ailu Yuda ngic-ngigac yengele damongfocngineng salecebabong, yengela kwesii-bong.

<sup>44</sup> Aime mudoc ngicti maaine yanguc biyac milu edocebawec, “Na ngic muduckedacte, ngenge ye hocne hobalu badabiyeng. Balu damongkelu hikedaing.” <sup>45</sup> Kwesibong Yudas ye kwesilu Yesula biyac lewec. Lelu “Wewedu” milu muduckewec. <sup>46</sup> Muduckeme yenge Yesu moleine neboc nga neboc sanangnehac baibong. <sup>47</sup> Babong mic-tengteng yengelacni monictibac hudu-babale fitec fuluckelu kwelec kwekwe ngic monic hedecine neboc wekwackeme wawec. Ngic yogo ye depec-baba ngic yengele damong sugucne, ye le kwelec kwekwe ngic.

<sup>48-49</sup> Welockeme Yesudi yanguc edocebawec, “**Na hadengsoc ngengeholec galu Ibu-macka yowa edocnebalu wedungeleiba. Aime ngenge dameng yogowabac mi bacnuibong. Aime yakumabac kindololo ngic bacebacaigaing, ngenge silicine ingucnehac hudu-babale fitec, nga gbaluc balu bacnuningte kwesigaing. Aimebac Wapongte hibiwa yowa kwelengkeicne fagac, yogo sasawa noine fikeyackedaic. I yangucte, ngenge kindololo ngic ingucne bacnugaing.”**



<sup>50</sup> Yesu ye inguc mime yeicne alingfocine yenge sasawadi ye hegilelu hangoc hikeibong.  
<sup>51</sup> Aime soc-gboli madec monic ye kpoluc madicnebenang monic, yogo sugu kwelu ye momoc Yesu balaibelu hikeme baibong. <sup>52</sup> Babong, ye kpolucine gbelengkelu wame senggangti hangoc hikewec.

*Yesu ngic sugucnele macka balu hikeibong*

*Mat 26:57-68; Luk 22:54-55,63-71; Yoa 18:13-14,19-24*

<sup>53</sup> Aime yenge Yesu balu depec-baba ngic yengele damong sugucne yela balu hikeibong. Balu hikeibong depec-baba ngic micne sasawa nga damongfocngineng, ailu Wapongte yefe-yowale wewedu ngic, yenge kpatulelu kwesiibong. <sup>54</sup> Aime Pita ye lobenginang dadalisuchac Yesu balaibelu hikewec. Hikelu depec-baba ngic yengele damong sugucne ye le macte oda kwelina fewec. Felu iwa mac-damong yengeholec dac folalu ngiyewec.

<sup>55</sup> Aime depec-baba ngic micne, nga Yuda ngic-ngigac yengele Tutumangtowale memba sasawa yenge yowa mingagec ailu hefeibong. Ailu Yesudi pasi sowacne wenuc aiwec, yogolec yowa milu hefeibong. Ailu yowa noine mikac aime wehomanogale ngagebong kpungkwec. <sup>56</sup> Aime ngic bocyacti ye le socka kwesac ailu yowa miibong. Aime kwesac-yowanginengti moniyanghac mi aiwec.

<sup>57</sup> Aime ngic gocne yengi yengele haicka felu domalu kwesac-yowa yanguc milu kpolick-eibong, <sup>58</sup> "Ye yowa monic yanguc mime ngageibong. 'Na Ibu-mac yago ngicti moledi baicne, yogo hembalackelu hadeng habackangte kwelina, ngicti moledi mi baicne yogo badacte.'" <sup>59</sup> Aime kpokpolic yowangineng yogo inguchac silicine moniyanghac mi aiwec.

<sup>60</sup> Aime depec-baba ngic yengele damong sugucnedi fangkelu hewacnginang domalu Yesu yanguc uwacnowec, "Ga yowa migaing, yogolec nebocine monic mi bafaliyedamecte, me?" <sup>61</sup> Inguc mime Yesu ye waickelu domawec, ailu yowa ameine monic mi bafaliyewec.

Aime depec-baba ngic yengele damong sugucnedi hatacmac uwacnowec, "Ga Mesia, Wapong mimitengineholecte madec, me?"

<sup>62</sup> Inguc mime Yesudi yanguc miwec, "**Na gagabachac.†Aime ngenge Ngicte Madec ye Tapilitowa fileine, ye le mole-foleinapec ngiyelu honocmengte kaguwa kwelina kwesime ngandaingte.**"

<sup>63-64</sup> Inguc mime depec-baba ngic yengele damong sugucne ye ngageme Wapong fecnowecte aalickeme ngakpi daleine basulackelu yanguc miwec, "Ye Wapong fecnolu mime biyac ngagegacing. Ilec wenuc ainoga? Ye inguc mime monicti sowacneine nganiwec, nongileng ngic ingucne hatac mi basackedabelengte." Inguc mime yenge sasawadi ye bikickolec milu homanale mimoctoibong.

<sup>65</sup> Inguc mimoctobong ngic gocne yengi sofockelu dongeine kpolucti ebeckelu moledi kinkpung holelu yanguc miibong, "Madi wecgugac, ga siduc-yowa yogo minong!" Mibong damong yengi balu weibong.

*Yesu bisockewec*

*Mat 26:69-75; Luk 22:56-62; Yoa 18:15-18,25-27*

<sup>66</sup> Aime Pita ye oda kwelina mac-sobengka ngiyeme, depec-baba ngic yengele damong sugucnele kwelec-adu monic ye iwa welewec. <sup>67</sup> Welelu nganime Pita ye dac folalu ngiyeme, dongeine yela hilalu yanguc miwec, "Ga inguchac Yesu Nasaret-hocni, yeholec gaing."

<sup>68</sup> Inguc mime Pita ye bisockelu miwec, "Ye mi ngagegabac. Ailu yowa migic, yogo mi ngage-motogabac." Inguc milu oda nuinele mecina leme kokolec ngicne hiyawec.

<sup>69</sup> Hiyame kwelec-adu ye Pita nganilu hatacmac ngic emeina domaibong, yenge edo-cbalu miwec, "Yengelacni ngic monic yago." <sup>70</sup> Inguc mime Pita ye hatacmac bisockewec.

Aime damong mi daliweme ngic iwa domaibong, yengi hatacmac yanguc miibong, "Foinac, monicngineng ga hocne. Ga Galili prowinswacni."

<sup>71</sup> Inguc mibong ye yeuctihac sanangkelu yowa yanguc miwec, "Ngenge ngic migaing, ye mi ngagegabac. Na yowa kwesacngagegabacka Wapongte aalicti bagewa gadac."

<sup>72</sup> Inguc mime yogowahac kokolec ngicne hiyame yaeckang aiwec. Aime Pita ye Yesudi yowa biyachac edowec, yogo ngagesiwec, "**Kokolec ngicne hiyame alecine yaeckang mi aiyemewa, gagi biyac na bisocnung alecine habackang aidaicte.**" Pita ye yowa yogo ngagesilu kwele-sowac sugucnehac ailu hiyawec.

## 15

*Yesu Pailatla bahikeibong*

*Mat 27:1-2,11-14; Luk 23:1-5; Yoa 18:28-38*

14:58: Yoa 2:19-21 † 14:62: "Na gagabachac," yogo Wapongte wac monic, Wahikeicne 3:14 iwa Moses edowec.

14:62: Mige 110:1; Dan 7:13 14:63-64: Dep 24:16; Yoa 19:7

<sup>1</sup> Ubiyactebenang depec-baba ngic micne, nga Yuda ngic-ngigac yengele damongfocngi-neng, ailu Wapongte yefe-yowale wewedu ngic, nga Yuda ngic-ngigac yengele Tutumang-towale memba sasawa, yenge yowa hefeibong. Hefelu Yesu moleine dodockelu Pailatla bahikelu yele molewa loibong.

<sup>2</sup> Balu hikebong Pailatdi Yesu yanguc uwacnowec, "Ga Yuda ngic-ngigac yengele ngictau, me?"

Ingc mime bafaliyelu yanguc edowec, "**Yogo hocne gageuc migic.**"

<sup>3</sup> Aime depec-baba ngic micne yenge Yesu yowawa lolu fungineine bocyac miibong. <sup>4</sup> Inguc mibong Pailatdi hatacmac uwacnowec, "Yenge gale yowa bocyachenang migaing, yogo ngagelu ameine monic mi bafaliyegic, me?" <sup>5</sup> Inguc mime Yesu ye ameine hatacmac mi bafaliyecnome, Pailat ye kwatackewec.

*Yesu wehomaningte mimoctoibong*

*Mat 27:15-26; Luk 23:13-25; Yoa 18:38; 19:16*

<sup>6</sup> Aime Ewalicebaicnele hombangte damengsoc yanguc ailu gawec. Ngic monic muc-macka ngiyeme, Yuda ngic-ngigac yengi yele wac wackebong, Pailat ye ngic yogo lukecnolu muc-mackacni hegileme wahikecaigac, inguc ailu gawec. <sup>7</sup> Aime ngic gocne esecne ngic-ngigac kwele fangke-fangke aibaba, ailu ngic gocne wehomacebabong muc-macka loce-baibong, yengelacni ngic monic wacine Barabas. <sup>8-10</sup> Aime depec-baba ngic micne yenge Yesu moc hasowac aicnolu Pailatle molewa lonogale bahikeibong, ye yogo biyac ngagewec. Inguc ngagelu habutowa yenge kwesilu Pailat ye aibaba ailu gawec, yogo ingucnehac ainale uwacnoibong. Uwacnobong yedi ameine yanguc bafaliyelu uwayelewec, "Yuda ngic-ngigac ngengele ngictau lukengelebele ngagegaing, me?"

<sup>11</sup> Inguc mime depec-baba ngic micne yengi habu kpafengebabong, yenge Yesu hegilelu Barabas lukecnonale miibong.

<sup>12</sup> Inguc mibong Pailat ye hatacmac bafaliyelu yanguc uwayelewec, "Aime na Yuda ngic-ngigac ngengele ngictau migaing, yele wenuc aidacte?"

<sup>13</sup> Uwayeleme yengi aukwelu wackelu miibong, "Ga ye malicpongka weng homana."

<sup>14</sup> Inguc mibong Pailatdi hatacmac uwayelewec, "Aime ye oma sowacne aiwec?"

Inguc mime yengi hatacmac dacineholec aukwelu wackelu miibong, "Ye malicpongka weng homana!"

<sup>15</sup> Inguc mibong Pailat ye habu yengele ngage-ngage balaibenogale ngagelu, Barabas lukecnome yengela hauwec. Aime yengi Yesu socine muc-hududi welubac, malicpongka weningte hudu-baba ngic yengele molewa lolu hegileyewec.

*Mife-miwa aicnoibong*

*Mat 27:27-31; Yoa 19:2-3*

<sup>16</sup> Aime hudu-baba ngic yenge Yesu balu gamang yengele macte oda kwelina felu mi-bong, hudu-baba ngic sasawadi kpaduckeibong. <sup>17</sup> Kpaduckeyackelu misulec aiconingte ngictaule ngakpi dalicne ingucne monic mondo-sasac holecnobong hauwec. Haume ngictaule duu ingucne muc-somang monic patiyelu hingoc ingucne hodocina holecnobong hauwec. <sup>18</sup> Haume alang bacno-bacnole silic ingucne ailu wackelu yanguc edoibong, "Ohec, Yuda ngic-ngigac yengele ngictau." <sup>19</sup> Milu yasudi hodocina welu sofockelu higeina ketadi holecnolu milockeibong. <sup>20</sup> Ailu yenge misulec aicnobong motome, ngakpi dalicne mondo-sasac yogo hemoctocnolu yeicne ngakpiine hatacmac holecnobong haume, malicpongka wengale balu lobina hikeibong.

*Malicpongka weibong*

*Mat 27:32-44; Luk 23:26-43; Yoa 19:17-27*

<sup>21</sup> Aime Sairini taonkacni ngic monic wacine Saimon, ye Aleksanda nga Rufus yekele mamacnginec, ye nosing-bolewacni yefewa welewec. Weleemewa hudu-baba ngic yengi Yesule malicpong tengkenale dogbac aicnobong tengkeme hikeibong. <sup>22</sup> Hikebong yenge himong bulilicine monic wacine Goligata, yogolec fungine Hodoc-luwe, iwa Yesu balu hikeibong. <sup>23</sup> Bahikelu marasing monic wacine mira,\* yogo waingkolec lalickelu lacnoibong. Aime ye yogo hegilewec.

<sup>24</sup> Aime yenge ye malicpongka welu ngakpi-kpolucine botoc balu woc-wiyacine badaingte, yogolec loling aiibong. <sup>25</sup> Yenge ubiyacte 9 kilok Yesu malicpongka weibong. <sup>26</sup> Welu ye yowawa loibong, yogolec fungine tafe kpisicna yanguc kwelengkeibong, "Yuda ngic-ngigac yengele ngictau." <sup>27</sup> Ailu yenge kindololo ngic yaeckang, monic foleinapec

15:1: Luk 22:66    15:5: Yes 53:7; Mrk 14:61    15:11: Sale 3:13-14    15:21: Rom 16:13    \* 15:23: Mira yogo

yoc monic, sopinedi wiyac bocyac bacaigaing. Monic yogodihac waingkolec lalickelu nobong socka doic weme wadaicte.

15:24: Mige 22:18

nga monic kanainapec yeholec malicpongka momoc wecepaibong. <sup>28</sup> [Inguc aibong yowa Wapongte hibiwa kwelengkeicne fagac yogo noine fikewec, “Ye bikic-baba yengele alingngineng, inguc ngageibong.”]† (Yes 53:12)

<sup>29</sup> Aime ngic-ngigac iwa lec-welec aibong, yenge Yesu misulec aicnolu hodocngineng dudalingkelu yanguc miibong, “Kwele-sowac aigelegabeleng, gageicne Ibu-mac hembalack-elu hadeng habackangte kwelina hatacmac banogale miing. <sup>30</sup> Gageuctihac baficnagulu malicpongkacni fotockelu wanong!”

<sup>31</sup> Aime depec-baba ngic micne, nga Wapongte yefe-yowale wewedu ngic, yenge inguchac ye misulec aicnolu mingagec ailu yanguc miibong, “Ye ngic-ngigac gocne bafice-bacaigac. Nga yeicnebac nalic mi baficnagudaicte. <sup>32</sup> Ye Mesia, Israel nongileng ngictau gadecka, yakumac malicpongkacni wana. Inguc nganilu ngagesingkedabelengte.” Aime ngic yaeckang malicpongka inguchac wecepaibong, yeke inguchac yowa kwekwe aicnoiboc.

*Yesu homawec*

*Mat 27:45-56; Luk 23:44-49; Yoa 19:28-30*

<sup>33</sup> Wenac hewac-hewac 12 kilok aiyemewa, mac kundung kweme kundungti himong someckelu falu game 3 kilok mac awelewec. <sup>34</sup> Aime dameng iwa Yesu ye malac sugucnehac wackelu yanguc miwec,

**“Eloi, Eloi, lema sabaktani.”** Yogolec fungine yanguc bafaliyeicne, **“Wapongne Wapongne, ga omale hegilecnguc?”** (Mige 22:1)

<sup>35</sup> Ye inguc wackeme ngic-ngigac emeina domaibong, yengelacni gocnedi yowa yogo ngagelu yanguc miibong, “Ngagegailing, ye Wapongte siduc-mimi ngic wacine Elaiya wacke-wasic aicnogac.”

<sup>36</sup> Inguc mibong monicti gasacke lelu spans<sup>‡</sup> monic balu waing hobecineholecka kpomuluckelu kpingka lolu Yesule micka lome feme yanguc miwec, “Wangec domalu nganinang, Elaiyadi kwesilu bamoctodaicte me miyac!”

<sup>37</sup> Inguc mime domabong, Yesu ye malac sugucnehac hatacmac wackeme asuine ofewec. <sup>38</sup> Ofeme Ibu-macte kpoluc sugucne<sup>§</sup> yogo hewacka yefe wilengkacni fouckelu wame yaeckang aiboc.

<sup>39</sup> Aime hudu-baba ngic yengele damong ye Yesule haicka domawec. Ailu Yesudi wackewec ailu homawec, silicine inguc nganilu ngagelu yanguc miwec, “Foinac, ngic yago ye Wapongte madec hocne.”

<sup>40</sup> Aime ngigac gocne yenge inguchac dalicka domalu pasi fikewec, yogo nganiibong. Yengele hewackacni Maria, wacine monic Magadalen. Nga Maria, ye Yakobos kpicicne nga Yosefe yekele nengacnginec. Ailu Salome, yenge yengilangkac domaibong. <sup>41</sup> Yesu ye Galili prowinswa game ngigac yogo yengi hocne ye balaibelu mole-bafic aicnolu gaibong. Ailu ngigac gocne bocyac, yenge Yerusalem iwa yeholec hikelu ye nganilu gaibong.

*Yesu longkeibong*

*Mat 27:57-61; Luk 23:50-55; Yoa 19:38-42*

<sup>42</sup> Mac biyac aweleme, hombangte wiyac bamockenogale dameng bangkale weleme, Sabatle dameng bangkalewec. <sup>43</sup> Bangkaleme ngic monic wacine Yosefe, Arimateahocni, ye iwa kwesiwec. Ngic ye wactowaineholec, Yuda ngic-ngigac yengele Tutumangtowa, yogolec memba monic. Ailu ye Wapongte ngani-damongte wangec gawec. Yedi hangoc mikac Pailatla hikelu Yesule kponggbong banogale uwacnowec. <sup>44</sup> Uwacnome Pailat ye Yesu biyac homagac, yogo ngagelu kwatackelu hudu-baba ngic yengele damong wackelu Yesu biyac homagac me miyac, yogolec uwacnowec. <sup>45</sup> Uwacnome Yesu biyac homagac mime, Yesule kponggbong yogo Yosefedi banale micnowec.

<sup>46</sup> Micnome Yosefe ye kpoluc madicnebenang monic fulu balu Yesule kponggbong malicpongkacni bamoctolu kpolucti wabungkelu dongesiwa balu hikewec. Dongesi yogo posa henebe gufuicna fawec, iwa kponggbong lolu posatowa monic kpalundungkeme yefine hedickewec. <sup>47</sup> Aime Maria Magadalen, nga Maria Yosefe nengacine, yeke Yesule kponggbong lowec, mac yogo nganiiboc.

† 15:28: Hibi esecne Mareko kwelengkewec, yogo nganilu iwacni kwelengkebong kwelengkebong ofewec, yengelacni gocne 15:28 iwa mi fagac. Ngic-ngigac yenge hibi kwelengkeicne yogo wosaclu nganibong Marekodi mi kwelengkewec mecne. 15:29: Mige 22:7; 109:25; Mrk 14:58 ‡ 15:36: Spans yogo materes ingucne misa kpomuluckecaigaing.

15:36: Mige 69:21 § 15:38: Kpoluc yogo mac gbagbacne, nga mac gbagbacnebenang, yekele hewacka loicne.

15:40: Luk 8:2-3

## 16

*Yesu homackacni gboliyelu fangkewec*

*Mat 28:1-8; Luk 24:1-12; Yoa 20:1-10*

<sup>1</sup> Sabat dameng motome, iwa Maria Magadalen, nga Maria Yakobosle nenggac ailu Salome, yenge hikelu Yesule kponggbong heloc hoineholecti hosocnoningte fuli baihong.

<sup>2</sup> Fuli balu Sonda ubiyacte mac saeme molickelu dongesiwa hikeebongka wenac ofewec.

<sup>3</sup> Aime yenge hikelu yengungtihac mingagec ailu yanguc miibong, “Madi henebe yefina posa yogo igockelu kpalundungkenoledaacte?”

<sup>4</sup> Inguc milu donge hilalu nganibong posatowa yogobac biyac igockelu kpalundungke-icne domawec. Ailu posa yogo sugucnebenang. <sup>5</sup> Nganilu dongesiwa felu nganibong, madec monic ngakpiine dalicne kwalac-kwalac holewec, yedi folewapec ngiyeme nganilu kwatackelu medecebawec.

<sup>6</sup> Inguc aibong yedi yanguc edocebawec, “Ngenge mi hangocgebana. Yesu Nasaret-hocni malicpongka weibong, ngenge ye nganinogale kwesigaing. Aimebac ye biyac gboliyelu fangkegac, yawa mi fagac. Lobong fawecka, mac fafaine yogo nganing.

<sup>7</sup> Ngenge hikelu mic-tengtengfocine nga Pita yanguc edocebaning, “Ye molickengelelu Galili prowinswa hikegac. Aime ngenge iwa hikelu ye bafuwadaing, yogo yeuctihac biyachac edocgebawec, inguc fikegac.”

<sup>8</sup> Inguc edocbame yenge kwatackelu dengdengbame dongesiwacni walu hikeibong. Ailu yenge hangocebame ngic monic mi edocebawong.

*Maria Magadalen fikecnowec*

*Mat 28:9-10; Yoa 20:11-18*

<sup>9</sup> [Yesu ye Sondawa fangkewec, dameng iwa molickelu Maria Magadalen fikecnowec. Ye esecne aleng 7 yelacni yebicebawec, ngigac yogo hocne fikecnowec. <sup>10</sup> Fikecnome Maria ye hikelu agofocine yeholec momoc gaibong, yenge kwele-sowac ngagelu hiyalu gaebongka yanguc edocebawec, <sup>11</sup> “Yesu biyac fangkelu gagac, na nganigabac.” Inguc mime yenge yeleyowa mi ngagesingkeibong.

*Mic-tengteng yaeckang fikeyetewec*

*Luk 24:13-35*

<sup>12</sup> Aime yogolec lobeina mic-tengteng yaeckang yeke mac monicka hikenogale hikee-bocka, ye ngani-nganiine monic ailu fikeyetewec. <sup>13</sup> Fikeyeteme yeke hefaliye hikelu agofocnginec gocne edocebaiboc. Aime yenge yekele yowa mi ngagesingkeibong.

*Bole baningte milu edocebawec*

*Mat 28:16-20; Luk 24:36-49; Yoa 20:19-23*

<sup>14</sup> Aime mic-tengtengfocine 11 yenge nosing nolu ngiyebongka, Yesu ye yengela fikewec. Aime ye gboliyelu fangkeme gocne yengi nganilu edocebaibong, yogo mi ngagesingkeibong. Aime kwelengineng fongkewecte ailu ngaba silicka yowa edocebawec.

<sup>15</sup> Edocbalu yowa yanguc miwec, “**Ngenge himongsoc hikelu ngic-ngigac sasawa yenge Siduc Madicne edocbalu weduyeledaing.**

<sup>16</sup> “**Aime monic ngagesingkelu misa lowadaictebac, Wapongti ye bikickacni bamoctome wasecne aidaicte. Nga monic ye mi ngagesingkedaicte, yebac mimoc-todaicte.** <sup>17</sup> **Aime ngagesingkedaingte, yengela pasile maaine yanguc fikedaicte, yenge nale wacka aleng yebicebadaingte ailu yowa gbolicne midaingte.** <sup>18</sup> **Yenge hema moledi balu mi sowaledaingte. Ailu homacte marasing nodaingtewa, yogodi mi basowalecebadaicte. Ailu yenge ngic-ngigac huckolec yengela mole lobong, yenge madickedaingte.**”

*Honocmengka fewec*

*Luk 24:50-53; Sale 1:9-11*

<sup>19</sup> Sugucne Yesu ye yowa inguc milu edocebame motome, Wapongti bame honoc-mengka fewec. Aime yeke mole-foleinapac ngiyelu gagac. <sup>20</sup> Aime mic-tengteng yenge neboc nga nebocka hikelu Siduc Madicne ngic-ngigac edocbalu weduyelebong. Aime Sugucnedi yengeholec game yenge bole babong pasile maaine fikewec, yogodi yowaine basanangkewec.]\*

16:7: Mat 26:32; Mrk 14:28    16:14: 1Kor 15:5    16:15: Sale 1:8    16:16: Sale 2:38    16:17: Sale 2:4; 8:7

16:18: Luk 10:19; Sale 28:3-6    16:19: Sale 1:9-11; 2:33-34    16:20: Sale 14:3; Hib 2:3-4    \* 16:20: Hibi esecne

Mareko kwelengkewec, yogo nganilu iwacni kwelengkebong kwelengkebong ofewec, yengelacni gocne 16:9-20 iwa mi fagac. Ngic-ngigac yenge hibi kwelengkeicne yogo wosaelu nganibong Marekodi mi kwelengkewec mecne.

## Lukadi Yesule Siduc Madicne Kwelengkewec

### *Mimi-yegeng yowa*

Luka ye Grik ngic monic, ye Yesule mic-tengteng miyac. Ye dota bole balu gawec. Ye dongenedi Yesu mi nganiwec. Ye ngic-ngigac Yesu ngani-ngagec aicnoibong, yenge uwayeleme Yesule siduc edolu weducnoibong.

Yesu homalu homackacni gboliyelu fangkeme hifa 30 ngama ingucne motome, Lukadi hibi yago kwelengkewec. Grik ngic-ngigac yenge gaga dondonne yogolec ngagebong wiyac feicne aiwec. Ilec ye Grik ngic-ngigac yengele ngagelu Yesule siduc alingkelu Yesu ye ngic dondonnebenang, siduc ingucne kwelengkeyelewec. Yogolec lobeina ye Salecebaicne Yengele Siduc momoc kwelengkeyelewec.

### *Yowa yago hibi nebocina fagac*

1:1–4 Molic-molic yowa

1:5–2:52 Yoane misa-lowac nga Yesu yeke fikeiboc

3:1–20 Yoane misa-lowac ye bole bawec

3:21–4:13 Yesu misa lowame Aleng Sugucnenginengti kwesacka lowec

4:14–9:50 Yesudi Galili iwa lolickelu bole bawec

9:51–19:27 Yesudi Yerusalem hikenale hikelu bole bawec

19:28–23:56 Yesudi Yerusalem iwa bole balu weduyelewec

22:47–24:53 Yesu balu webong homalu fangkewec

### *Lukadi Yesule siduc Tiofilusle kwelengkewec*

<sup>1-3</sup>Tiofilus sugucnene, hewacnonggang wiyac noine fikewec, yogo kwelengkegelegabac. Ngic-ngigac yenge funginacnihac ofelu dongenginang wiyac fikewec, yogo nganilu yenge Siduc Madicnele kwelec kwekwe aiibong. Yenge wiyac fikewec, yogolec siduc edocnubaibong. Aime homacnedi yogo nganilu molickelu kwelengkeibong. Na yogolec ailu siduc edocnubaibong, ailu kwelengkeibong, yogo wosaelu funginacnihac fike-ofewec yogo yegena alingkelu kwelengkegelebe nalic ainale ngagesiiba. <sup>4</sup>Ga yowa yago wafelu, yowa wedugeleibong, yogolec noine aigac, yogo nalic ngagedamecte.

### *Angelo monicti Sekariya fikecnowec*

<sup>5</sup>Abiyale bole alingkacni depec-baba ngic monic gawec, wacine Sekariya. Ye Yudeya himongte ngictau monic Herode, yeke damengka gawec. Yele ngigacine, wacine Elisabet, ye Aronte fikesawec, iwacni. <sup>6</sup>Aime ngic-ngigac yogo yeke Wapongte haicka dondonnebenang gaiboc. Ailu Sugucnele ung-yowa nga yefe-yowa sasawa balaibelu sowacnenginec mikac gbagbacne gaiboc. <sup>7</sup>Ailu yeke hufing. Ilec Elisabet ye gboli mikac game yeke gagcu ngic-ngigac dandang aiiboc.

<sup>8</sup>Aime dameng hewac iwa Sekariya ye Wapongte haicka bole alingfocine yengeholec bole baibong. <sup>9</sup>Dameng iwa yenge aibabangineng balaibelu madi hasoc hoine madicne yogo holenogale wacngineng kwelengke-lolu baibong. Balu nganibong, Sekariyale wac fikewec.\* Hasoc hoine madicne yogo holenogale damengine kwesime, ye Ibu-mac kwelina fewec. <sup>10</sup>Feme ngic-ngigac habutowadi Ibu-mac yogolec lobeina Wapong milockelu domaibong.

<sup>11</sup>Inguc aibong Sugucnele angelo monicti hasoc hole-holele alata iwa, Sekariya fikecnolu alata foleinapec iwa domame, <sup>12</sup>ye yogo nganilu kwatackelu hangoc sugucne aiwec. <sup>13</sup>Inguc aime angelodi yanguc edowec, "Sekariya, ga mi hangocguna! Wapongti mimilocgone biyac ngagegeleyec. Ilec ailu ngigacgone Elisabet ye madec monic gobeelu bageledaicte. Aime gboligone ye wacine Yoane wackedamec! <sup>14</sup>Madecgonedi gale kwele-madic nga belic-belic aidaicte. Aime ngic-ngigac homacnedi ye fikenale ailu inguchac beliyedaingte. <sup>15</sup>I yangucte, yedi Sugucnele haicka sugucne aidaicte. Ailu waing nga misa sanangne monic mi nodaic. Ye nenggacte gobe kwelina ngiyeemewa, Tili Asudi biyac kweleine wakeicnele ailu, <sup>16</sup>Israel ngic-ngigacfocine bocyac mengocebame yenge kwelengineng Sugucne Wapongngineng, yela hefaliyedaingte. <sup>17</sup>Ailu madec ye mamac mengocebame kwelengineng hefaliyeme adu-madecfocngineng yengele angac ngagedaingte. Ailu yowa kwekwe ngic yenge ngage-ngage dondonne bafuwayelenale

**1:1-3:** Sale 1:1 \* **1:9:** Wahikeicne 30:1-8 hasoc hole-holele alatale yowa fagac. Yoc yogo goldi somekeicne. Adeceine yogo 50 cm ingucne, nga feina dalicneine yogo 90 cm ingucne. Depec-baba ngic monic ye ubiyacte nga awelemesoc hasoc hoine madicne lobeme Wapongta felu gawec, yogo ye sic me nosingti depec mi lobelu gawec. **1:15:**

bole badaicte. Ailu yedi Sugucnele haicka gacgu Elaiyale aibaba nga tapiliwa ingucne bagidaicte. Inguc bagacgu ngic-ngigac baefecbame yenge Sugucnele haicka efeckelu yele ngic-ngigacocine ailu gadaingte.”

<sup>18</sup> Inguc mime Sekariyadi angelo yanguc edowec, “Naneicne ngic dandangngine. Nga ngigacne inguchac, ye hifaine bocyac biyac aiicne. Aime gale yowa wenucka ngagebec noine aidaicte?”

<sup>19</sup> Mime angelodi yanguc miwec, “Na Gabrieldi, Wapongte haicka domacaigabac. Ailu ye yeuctihac ga yowa edocgubele salecnume welelu Siduc Madicne yago milu edocgube yegengkegac. <sup>20</sup> Ngagegic, yowa migabac, yogolec damengngine kwesime wiyac noine fikedaicte. Ga yowane mi ngagesingkegamecte, yowagone mikac aidamecte. Aime gacgu wiyac migabac yogo, damengngine kwesi fikeme, hadeng yogowabac ga yowagoneholec hatacmac aidamecte.”

<sup>21</sup> Aime ngic-ngigac aling yenge Sekariyale wangec domabong ye Ibu-macka dameng dalicnebenang domame ngageboc aibong. <sup>22</sup> Inguc aibong, ye lobina walu yowaine mikac aime, yowa edocebanale aibibiyeme yenge biyac ngage-motoibong, “O, ye Ibu-macka felu yowa gung-didicka ingucne nganigac.” Iwa domalu yowa monic mi milu moledi sugu sosoc aiwec.

<sup>23</sup> Aime Sekariyale depec-babale bole-dameng motome, ye walu macina hefaliye hikewec. <sup>24</sup> Hikeme dameng mi daliweme, ngigacine Elisabet ye gobeholec ailu tamacne 5 sangke-sangke galu yanguc ngagewec, <sup>25</sup> “Yago Sugucnele aibaba monic, yedi nale ngagesilu dameng yagowahac gamene basawelenale, aibaba yago ainelegac. Ilec ngic-ngigac yenge na yowa kwekwe hatacmac mi aineledaingte.”

#### *Angelo monicti Maria fikecnowec*

<sup>26</sup> Aime Elisabet ye tamacneine 6 aime, Wapongti angelo monic wacine Gabriel, ye saleme taon monic wacine Nasaret, Galili prowins iwa hikewec. <sup>27</sup> Hikelu ngigac-neleweng monic ngickolec mi faicne, wacine Maria, ye fikecnowec. Aime Maria ye ngic monic, wacine Yosefe, yeholec bingeca gaiboc. Aime Yosefe ye Dawidile fikesaweckacni. <sup>28</sup> Aime angelodi Mariale yanguc miwec, “Asec, Sugucnedi gaholec gagac. Ailu kwele-madicinedi gala fagac!”

<sup>29</sup> Inguc mime Maria ye yogo ngagelu ngageboc sugucne aiwec, “Angelodi omale inguc edocnugac,” yogo ngagelu dabiyelu ngage-ngage bole bocyac bawec.

<sup>30</sup> Ngage-ngage bole badomame, angelodi yanguc edowec, “Maria, Wapongti gale ngageme madickecaigacte mi hangocguna. <sup>31</sup> Ailu ngagegic, ga gboli monic gobelu badamecte. Ga madec yele wacine Yesu wackedamec! <sup>32</sup> Madec yogo ye feicne aidaicte. Ye Wapong Feicnetowanonggeng yele madec, yele wacine inguc wackedaingte. Aime Wapong Sugucnedi ye ngamboine Ngictau Dawidile bole ingucnehac lacnome iwa damongkedaicte. <sup>33</sup> Damongkelu yedi Yakobole gbolifocine yengele ngictau ailu damengngine fafa-sanang fagidaicte. Ailu mac-himongine damongkelu, miyac-miyacine mikac gaginowagac.”

<sup>34</sup> Mime Mariadi angelo yanguc edowec, “Ngickolec monic mi facaigabac. Aime yogo wenucka fikenelenale migic?”

<sup>35</sup> Inguc uwacnome miwec, “Tili Asudi gala wame Wapong Feicnetowale tapilidi gale folalac ailu somecgudaicte. Ilec ailu gboligone gbagbacnebenang fikedaicte, yele wacine Wapongte Madec wackedaingte. <sup>36</sup> Ngagegic, gale aling moniyang Elisabet, ye ngigac-dandangngine ailu sifu ye madec gobewec. Ye hufing gacaigac mibong, ye gobeholec aime tamacneine 6 biyac aigac. <sup>37</sup> I yangucte, Wapongte aibaba yogo kpungke-kpungkeine mikac.”

<sup>38</sup> Inguc mime Mariadi miwec, “Ngagegic, na Sugucnele kwelec-adu. Ilec yowa migic, yogo nalic fikeneledaic.” Mime, angelo ye hegilelu hefaliye hikewec.

#### *Mariadi Elisabet nganinogale hikewec*

<sup>39</sup> Dameng mi daliweme Maria ye efeckelu taon monic Yuda yengele sifec himongka fawec, iwa biyac hikewec. <sup>40</sup> Hikegacgu Sekariyale macka fewec. Felu Elisabet wenac-madic micnowec. <sup>41</sup> Micnome Elisabet Mariale yowa ngageme, gboli gobaina ngiyewec, yogodi kwatackelu uc fific aiwec. Aime Tili Asudi Elisabetla wakeme, <sup>42</sup> ye sugucnehac aukwelu miwec, “Ngigac hewacnonggang gagic, ga mimi-madicgoneholec. Nga gboli gobegona ngiyegac, ye mimi-madicneholec. <sup>43</sup> Nale Sugucnele nenggacinedi nala kwesime aibaba yogo fikenelegac, yogo wiyac sugucne. <sup>44</sup> Ngagegic, wenac-madic yowagone miyengka hedecnedi ngagebe, gboli gobena ngiyegac, ye beliyelu uc fific aigac. <sup>45</sup> Ngigac,

ga, Sugucnedi yowa edocguwec, yogo noine fikedaicte, inguc ngagesingkeing, ngigac ingucne ga kwele-angackolec.”

*Maria ye Wapong mitengkewec*

<sup>46-48</sup> Mime Mariadi miwec,

“Wapong, ga nganicnulu ngageng na kwelec-adugone wawainebenang ailu gaiba. Ilec ailu kwele-ilucnedi Sugucne asec-asec aigelebe, Asunedi Wapong, asa-babane gale ailu angackeme beliyegac.

Ngic-ngigac fikesawec ainowagaing, yengi ngagenelelu, ‘ye kwele-angackolec’ inguc mi-nowagaing.

<sup>49</sup> Sugucne Tapilitowa Fileinedi aibaba sugucnebenang ainelewec.

Aime yele wacine gbagbacnebenang.

<sup>50</sup> Fikesaweckacni fikesawec, yele alang bacnocaigaing, yele kwele-sowacti yengele feiwa fagidaicte.

<sup>51</sup> Aime yenge yengileng kwele ngage-ngagengineng yogo ngagebong feicne aigac, yengela pasi tapiliineholec balu moleine sungkelu bagi-locebame singsalolong kwecaigaing.

<sup>52</sup> Ailu yedi damong ngic bolenginangkocni baicebawec.

Nga ngic-ngigac wawaine gaibong, yenge bafangebawec.

<sup>53</sup> Aime ngic nosingte homalu gagaing, yenge yeicne wiyac madicne yelevu bawakeyelewec.

Ailu mafatowanginengkolec, yengebac molenginang wiyac monic mi lolu moc salecebame hikeibong.

<sup>54-55</sup> Wapong ye ngambononggeng Abrahamtacni fikesawec aiofeibong.

Nga aifenowagaingte yowaine edocebawec, yogo mi ngigeckewec.

Ye bole-ngicfocine Israel yengele kwele-sowac ailu baficebawec.”

<sup>56</sup> Milu Maria ye tamacne habackang inguc Elisabetkolec gacgu hatacmac macina hefaliye hikewec.

*Yoane fikewec*

<sup>57</sup> Hikeme Elisabet ye gboli fike-fike damengngine bangkaleme madec fikewec. <sup>58</sup> Fikeme macfocine nga yeicne alingfocine yengi Sugucnedi kwele-sowac aicnowec, yogo ngagelu yeholec momoc beliyeibong.

<sup>59</sup> Aime hadeng 8 aiyemewa yenge madec yogo soc tofaine helockeningte welelu yele wacine Sekariya, mamacinele wase baningte inguc miibong. <sup>60</sup> Inguc mibong nenggacine Elisabet yedi kpatalalu miwec, “Miyac, yele wacine Yoane wackenoga.”

<sup>61</sup> Mime yengi yanguc miibong, “Gale alingfocgone yengelacni wac ingucne monic mi wackeibong fagac.” <sup>62</sup> Inguc milu moledi sosoc ailu mamacine uwacnoibong, madec wacine ma wackenoga.

<sup>63</sup> Uwacnobong Sekariyadi hibi kweleng-kwelengte tafe, yogo moledi sosoc ayeleme lacnobong yanguc kwelengkewec, “Madec yele wacine Yoane.” Inguc kwelengkeme yenge sasawadi ngageboc aiibong. <sup>64</sup> Aime dameng iwahac Sekariya beluine hefaliyeme ye hatacmac yowa mimi ailu Wapong mitengkelu gawec. <sup>65</sup> Game macfocine yenge sasawadi hangocebawec. Aime ngic-ngigac Yudeya sifec himongka gaibong, yenge aibaba fikewec, yogolec mingagec ailu gaibong. <sup>66</sup> Aime Sugucnele tapilidi gboliholec gawecte ailu ngic-ngigac yenge siduc yogo ngagelu, yenge yowa yogo ngage-ngagenginang lolu yanguc ngagelu uwayeleibong, “Gboli yogodi gacgu wenuc ainowagac?”

*Sekariyadi siduc-yowa miwec*

<sup>67</sup> Aime Tili Asudi gboli mamacine Sekariyale kwelewa wakeme, yedi siduc-yowa yanguc miwec,

<sup>68</sup> “Sugucne Israel yengele Wapong yedi ngic-ngigacfocine nongileng wele fuli bac-nubawec.

Ilec ye mitengkenang.

<sup>69-70</sup> Ailu ye esecnebenang Wapongte siduc-mimile bingec yengele micka yowa lolu miwec, yogo balaibelu bole-ngicine Dawidi, yele fikesaweckacni Asa-baba ngic sanangne fikewec.

<sup>71</sup> Fikeme yedi ngabafocnonggeng gagaing, nga kweledi wicnubacaigaing, yengele molewacni bamoctocnubadaicte.

72-73 Aime Wapongti ngambononggeng Abrahamta mimipang sanangne miwec, yogo nga-gesilu dodoficnonggeng gbagbacne balaibelu ngambofocnonggengte kwele-sowac aiyelecaigac.

74-75 Nonge ngabafocnonggeng yengele molewacni baicnubadaicte.

Ailu gaga-damengnonggeng fagacsoc hangoc mikac yele haicka gbagbacne nga dondonne ailu afeelu kwelec kwekwe gadabengte.

76 Aime nale gboli, gagi molickelu Sugucnele yefe bamadickelu yefe hole-wenengkecte yanguc wacgudaingte, ga Wapong Feicnetowanonggeng yele siduc-mimi ngic.

77 Ga ngage-ngage yanguc weduyeledamecte, yele ngic-ngigacfocine aibaba bikicngi-nengkolec hegilelu, Asa bacebame wasecne aidaingte.

78 Aime Wapongnonggeng, angacine nga kwele-sowac feicnebenang ainolecaigac, inguc fikedaicte.

Aime yele angactowainele tapilidi wenac ingucne nongilang wadaicte.

79 Walu kundung kwelina nga homacte folalacka gagaing, yenge bacebame angoledaingte. Ailu nongileng kwele-mogungte yefewa ganangte damongnubalu yefe yogo edalic-nubadaicte.”

80 Aime madec ye socine suguleme, kwele ngage-ngageine sanangkewec. Ailu himong kisiwa misaine mikacka gacgu Israel ngic-ngigac yengele haicka fikelu yegengkenale damengnginele wangec gawec.

## 2

### *Yesu madec fikewec*

#### *Mat 1:18-25*

1-2 Aime Roma himongte ngictau monic, wacine Sisa Agustus, yedi himongne himongne wac-alingngineng kwelengkeningte yowa lome hikeyackewec.\* Dameng iwa ngic monic, wacine Kwirinius, yedi Siria himongte gawana galu molic-molic boleine wac-aling bawec. 3 Aime ngic-ngigac sasawadi wac-alingngineng kwelengkeningte macngineng fawecsoc hikeyackeibong.

4 Aime Yosefe ye Nasaret taon Galili prowins iwa gawec. Ye Dawidile fikesaweckacni. Ilec ailu hegilelu Yudeya himong Dawidile taon kpisicne, wacine Betelehem, iwa hikewec. 5 Hikeme ngigac-bingecine Maria ye gobeholec aiwec. Ailu yeke momoc wacnginec wac-alingka kwelengkeningte hikeiboc. 6 Yeke iwa hike sulumboc kogoc fike-fike dameng kwesiwec. 7 Kwesime molic-molic madecnginec fikewec. Aime mac ngiye-ngiye sawaine monic mi fawecte, Mariadi kpolucti ebeckelu lama-bulumaka yengele duwacka iwa lome haulu fawec.

#### *Angelodi lama-damong siduc edocebawec*

8 Aime deboleme lama-damong gocne yenge Betelehem kpanjangewa lamafocngineng damongebalu gaibong. 9 Inguc gacgubong Sugucnele angelo monicti iwa fikeyewec. Fikeme Sugucnele tapili nga hibi-angocti baangolecebame yenge hangoc sugucne aiibong. 10-11 Aime yedi yanguc edocebawec, “Ngenge hangoc mi aining! Ngagegaing, yakumacbenang ngengele ailu Dawidile taon kpisicna Mesia Sugucne fikegac, ye bikicte ameinele Asababa ngic. Ngic-ngigac sasawadi yele ailu beliye-benangkedaingte, na Siduc Madicne yogo mibe yegengkenglegac. 12 Gboli yogo ngenge wenuc bafuwaningte maa yago ngelegabac, ngenge hikelu lama-bulumaka yengele duwacka kogoc monic kpolucti ebeckeicne fame bafuwadaingte.”

13 Ye inguc milu domaemewa iwahac honocmengte angelo habu sugucne, yenge fikelu yeholec domalu Wapong mitengkulu yanguc miibong.

14 “Wapong, wac feicne, wileng honocmengka fadaic.

Aime himongka yengela kwele-mogung fadaic.

Wapongti ngic kwele-efec aiyelegac.”

15 Aime angelo yenge honocmengka hefaliye febong, lama-damong yenge yengilangkac mingacac ailu miibong. “Betelehem taonka wiyac yogo fikeme Sugucnedi edocnubagac, ilec biyac hikelu yogo nganinang.”

16 Inguc milu yenge biyac hikelu Maria nga Yosefe ailu gbolinginec duwac kwelina fawec, yogo biyac bafuwacebalu nganicebaibong. 17 Nganicebalu angelodi gboli yele yowa miwec, yogo edocebabong ngageyackeibong. 18 Aime lama-damong yenge siduc miibong, yogo ngic-ngigac sasawadi ngagelu mimedec aiyaackeibong. 19 Mariadibac aibaba fikecnolu gawec, yogo kweleina lolu ngagesilu gawec. 20 Aime angelodi lama-damong



edocebawec, yogo sasawa noine nganilu ngageibongte ailu, yenge hefaliyelu Wapong wacine bafelu mitengkelu hikeibong.

*Yesu madec wac lacnoibong*

<sup>21</sup> Aime hadeng 8 motome yenge kogoc soc tofaine helockeningte damengngine kwesime ye wacine Yesu wackeibong. Wac yogo ye nenggacine mi gobeemewa angelodi biyachac wackewec.

*Simeon nga Anna yeke Yesu madec Ibu-macka nganiiboc*

<sup>22</sup> Gacgu Wapongte yefe-yowa Mosesdi kwelengkewec, yogo balaibelu suwe-suwe damengngine yogo motome yenge kogockahac Sugucnele haicka fikenale Yerusalem bafeiboc. <sup>23</sup> Yogolec Sugucnele yefe-yowawa yanguc kwelengkeicne fagac, "Molic-molic madec fikedaingtesoc, yenge Sugucne yeicne sugu aidaingte." <sup>24</sup> Aime yeke suwe-suwe dameng iwa depecte sic alingkacni tudiling nango yaeckang, me gomoc-gomoc madecine yaeckang locepanoga, yogo Sugucnele yefe-yowawa fagac, yeke yogo balaibelu bahikeiboc.

<sup>25</sup> Hei, dameng iwa ngic monic Yerusalem gawec, wacine Simeon. Ye ngic dondonne, ailu ye Wapong alang bacnolu Tili Asuholec gawec. Ye Israel ngic-ngigac yengela mibasanang aiyelenale wangec gawec. <sup>26</sup> Ailu ye mi homame Sugucnele Mesia fikeme nganinogale Tili Asudi esecne biyachac mifikecnowec. <sup>27</sup> Aime Yesule nenggac-mamac yekele yefe-yowa fawec, yogo balaibelu gbolinginec Ibu-macka bafeiboc. Bafeboc Asudi Simeon kweleina biyac wakeme Ibu-mac kwelina fewec. <sup>28</sup> Felu kogoc moleina hoba-domalu yedi Wapong mitengkelu yanguc miwec,

<sup>29-30</sup> "Sugucnene, na kwelec kwekwegone, dongenedi Asa-baba ngicgone nganibele miing, yogo biyac nganigabac.

Ilec ga ngageng nalic aime kwele-mogungkolec gagane hegilelu hikedacte.

<sup>31</sup> Aime ngic-ngigac sasawadi ye nganiyebongka ga yefe yogo biyac bamadickeng.

<sup>32</sup> Gboli yago yedi Israel yengele alingkacni miyac, yenge bacebame yegengkebong yogodi angocngineng aidaicte.

Ailu Israel ngic-ngigacfogone yenge wac feicne yeledamecte."

<sup>33</sup> Aime gboli yogo nenggac-mamacine yeke yeke yowa yogo ngagelu mimedec aiiiboc.

<sup>34</sup> Inguc aime Simeonti mimi-madic milu edocebawec. Ailu gboli yogo nenggacine Maria yowa yanguc edowec, "Ngagegic, Israel ngic-ngigac homacnedi madec yago yeke ailu wawedaingte. Nga homacnedibac yeke ailu fangkelu domadaingte, aibaba inguc fikenalae Wapongti mimotowec. Nga bocyac yengi maaine nganilu ngaba ailu yowa kwekwe aidaingte. <sup>35</sup> Inguc aime ngic-ngigac bocyac yengele ngage-ngage sangkelu fawec, yogo yegena fikedaicte. Aime Maria, ga doicti kwelegona hudule fitec ingucnedi helockedaingte."

<sup>36</sup> Aime Wapongte siduc-mimi ngigac monic gawec, wacine Anna, ye inguchac Ibu-macka gawec. Ye Fanuel aduine. Ailu ye Asele fikesaweckacni. Ye ngic balu yeholec hifa 7 gacgume ngaweine homawec. <sup>37</sup> Homame ye hosec gacgume hifaine 84 aiwec. Ailu ye Ibu-mac mi hegilelu deboc hadeng nosing-sawe galu milockelu Wapong afeulu kwelec kwekwe gawec. <sup>38</sup> Gacgu dameng yogowahac Annadi Maria ngama yengele emewa wele domalu Wapong mitengkwec. Yerusalem ngic-ngigac yenge fulu bacebanale wangec gaibong, gboli yogolec siduc yenge milu edocebame yegengkewec.

*Nasaret hefaliye hikeibong*

<sup>39</sup> Aime Yosefe nga Maria yeke Sugucnele yefe-yowadi migac, yogo sasawa balaibelu aiyackeboc motome, yenge Galili prowinswa hefaliyelu Nasaret taonnginang hikelu gaibong.

<sup>40</sup> Gacgu madec yogo suguleme Wapongte kwele-madicti yela fame, ye tapili nga ngage-ngage-motoc wakeicne fikecnowec.

*Yesu ye madec hakicti Ibu-macka fewec*

<sup>41</sup> Aime Yesule nenggac-mamac yeke Ewalicebaicnele hombang ngagesilu hifasoc Yerusalem iwa hikelu gaiboc. <sup>42</sup> Ailu yenge hombangte aibaba balaibelu, Yesu ye hifaine 12 aiyemewa yenge momoc hombangte hikeibong. <sup>43</sup> Hikela iwa gacgubong hombang dameng yogo motome yeke hefaliye welebocka, Yesu ye Yerusalem iwa ngiyewec. Aimebac nenggac-mamacine yeke mi ngagelu welelu <sup>44</sup> yanguc ngageiboc, "Ye ngic-ngigac habu yengeholec yefewa gagac." Inguc ngagelu yeke hadeng moniyang yefewa hikelu Yesu monic mi bafuwaiboc. Inguc aime yeke ye basackelu agofocngineng nga alingfocngineng yengela lolicke hikelu basackeiboc. <sup>45</sup> Basackelu monic mi bafuwaibocte, yeke

hatacmac hefaliyelu Yerusalem taonka basackenicta hatac hikeiboc. <sup>46</sup> Hike basackeboc hadeng habackang motome, Ibu-mac kwelina felu Yesu bafuwaiboc. Bafuwaboc ye Ibu-mac kwelina wewedu yengele hewacka ngiye ngageyelu mi-uwac aiyelewec. <sup>47</sup> Aime Yesudi ngage-ngageholec ngic-ngigac sasawa yowangineng ameine bafaliyewecte, yenge mimedec ailu yanguc ngageibong, yogo wiyac feicne aigac. <sup>48</sup> Aime nenggac-mamac yeke ye nganilu kwatackelu nenggacinedi yanguc edowec, "Madec, ga omale aibaba ingucne ainotegic? Aime mamacgoneholec noke gale ngageboc ailu ga basacgulu gagabelec."

<sup>49</sup> Inguc mime yedi yanguc edocepawec, "**Ngeke omale basacnugabiyec? Na mamac-nele macka gagabac, yogo mi ngagegabiye, me?**" <sup>50</sup> Inguc mime yeke yowa yogolec dabiyeiboc.

<sup>51</sup> Ailu ye nenggac-mamacine yekeholec hatac hefaliyelu Nasaret macka hikelu yowanginec balaibelu gawec. Game nenggacinedi aibaba sasawa fikewec, yogo ngage-ngageina lolu gawec. <sup>52</sup> Aime Yesule ngage-ngage-motoc nga socine sugule-sanangkeme, Wapong nga ngic-ngigac yenge momoc ngage-madickecnoibong.

### 3

#### *Yoanedi boleine fungkewec*

*Mat 3:1-12; Mrk 1:2-8; Yoa 1:19-28*

<sup>1</sup> Ngictau Sisa Tiberias, ye hifa 15 dameng inguc biyac gawec. Dameng iwa ngic monic, wacine Pontius Pailat, yedi Yudeya himongte gawana gawec. Gaemewa Herode ye Galilile damong gawec. Nga gbaine, wacine Filip, yedi Ituraia nga Trakoniti himongte damong gawec. Nga Lisania ye Abilenele damong, inguc gaibong. <sup>2</sup> Inguc gaebongka Annas nga Kaifas yeke depec-baba ngic yengele damong sugucne gaiboc. Dameng yogowahac Sekariyale madec Yoane, ye himong kisiwa misaine mikacka gacgume Wapongte yowadi yela kwesiwec. <sup>3</sup> Kwesime Yoane ye Yodan misa nebec nga nebocka himong falegac, iwa lolickewec. Ailu kwelengineng hefaliyeme bikicngineng miyac aime misa lowaningte edocebalu weduyelewec. <sup>4</sup> Yowa yogo Wapongte siduc-mimi ngic Yesaiyadi miwec, yele hibiwa yanguc kwelengkeicne fagac,

"Himong kisiwa misaine mikacka wawac monic yanguc fikegac, 'Sugucnele yefe wesackelu hole-wenengkening. <sup>5</sup> Lumo sasawa someckeyackening. Nga tiki nga kupic sasawa yogo hole-wenengkening. Ailu yefe adec adec bamadickebong dondonne aidaic. Nga yefe hauc-ofecineholec hemusungkening. <sup>6</sup> Aime Wapongti aibaba yogo balu bikicte amenonggeng baickedaicte, yogo ngic-ngigac sasawadi nganiy-ackedaingte.'" (Yes 40:3-5)

<sup>7</sup> Inguc aime ngic-ngigac homacnedi Yoanela hikelu misa lowayelenale edobong, Yoanedi yanguc miwec, "Hema gbolifocine, madi ung-yowa yanguc edocngebawec, ngenge Wapongti aalicine badungelenale aidaicte, yogolec hangoc hikedaingte? <sup>8</sup> Ilec ngenge kwele-hefaliyecte silicka pasi noine bafuwadabiyeng. Ailu yanguctihang gageicnele yanguc mi ngagedamec, 'Abraham ye ngambone aigacte wasecne aidaicte.' Wapong ye posa yago nalic mime Abraham ngambofocine fikedaingte, yogo noine edocngebagabac.\* <sup>9</sup> Aime naka yoc fungina biyac loicne fagac. Aime yoc gocne noine madicne mi aicaigaing, yogo sasawa weyackelu dacka wickedaingte."

<sup>10</sup> Inguc mime ngic-ngigac yengi uwacnoibong, "Inguc aime nonge wenuc aidabelengte?"

<sup>11</sup> Mibong yowangineng bafaliyelu yanguc edocebawec, "Monicti ngakpiine yaeckang balu gagac, ye monicine hemoctolu monic ngakpiine mikac gagac, ye bafickedaic. Nga monic ye noba-nosingkolec gagac, ye aibaba yogohac aidaic."

<sup>12</sup> Mime takes-baba gocne yengi inguchac welelu misa lowayelenale miibong, "Wewedu, nonge wenuc aidabelengte?"

<sup>13</sup> Mibong yanguc edocebawec, "Ngenge moneng baningte edocngebaine, moneng yogolec silicina badaing. Moneng ewalilu mi badaing."

<sup>14</sup> Mime hudu-baba ngic gocne yengi inguchac Yoane uwacnoibong, "Aime nonge wenuc aidabelengte?"

Mibong yanguc miwec, "Ngenge ngaba aibaba me kwesacka ailu migbedicka monick-acni moneng mi badaing. Ngenge bolenginengte fuli bacaigaing, yogo sugu ngagebong andoine aidaic."

2:51: Luk 2:19    2:52: 1Sm 2:26; Ynn 3:4    3:3: Sale 13:24    3:7: Mat 12:34; 23:33    \* 3:8: Bocyac yengi yanguc ngagelu gaibong, "Abraham ye ngambononggeng, ilec gaga-sanang badabelengte." Aime Yesudi yanguc edocebawec, "Yogo nalic mi aigac."    3:8: Yoa 8:33,39    3:9: Mat 7:19    3:12: Luk 7:29

<sup>15</sup> Aime ngic-ngigac yenge Mesiale wangep gaibongte ailu “Yoane ye hocne Mesia mecne,” kwelenginang inguc ngegebong. <sup>16</sup> Inguc ngegebongte Yoanedi yowangineng yanguc bafaliyewec, “Na misa lowangelegabac. Ngic nale lobewa kwesidaicte, yedibac Tili Asu nga dac lowangeledaicte. Ailu yele tapilidi nale tapili ewaligac, na waweweine ingucnedi yele hige-ebecte mucine lukebe nalic mi madickedaicte. <sup>17</sup> Ye moleina yafole fok balu welelu wit yafoineholec baic-baicte sobengka fame, yogo filalu yafoine baickedaicte. Baickelu noine bakpaduc ailu nosing-macina lolu, yafoine pelengkelu dac piscic-piscine mikac, iwa wickeme lobedaicte.” <sup>18</sup> Yoane ye yowa silicine ingucne bocyac milu ngic-ngigac yowa sanangne milu Siduc Madicne edocebalu gawec.

*Herodedi Yoane muc-macka lowec*

<sup>19</sup> Aime ngictau Herodedi gbainele ngigac wacine Herodias, hise balu aibaba sowacne gocne bocyac aicnolu gawec. Aime Yoanedi aibaba sowacne yogolec Herode ngelengkelu edowec. <sup>20</sup> Edome Herodedi aibaba sowacne hatacmac taockelu, Yoane ngaba aicnolu muc-macka lowec.

*Yoane ye muc-macka mi feluhac Yesu misa lowacnowec*

*Mat 3:13-17; Mrk 1:9-11*

<sup>21</sup> Aime ngic-ngigac sasawadi misa lowaebongka, Yesu ye inguchac misa lowawec. Lowalu Wapong milockelu domaemewa, honocmeng angkeme <sup>22</sup> Tili Asudi tudiling nangole silic ingucne ailu Yesula wawec. Wame honocmengkacni mic-yowa monic yanguc fikeme ngagewec, “Ga nale madec, kwelenedi gale angac ngegebabac, na ga ngani-angac aigelegabac.”

*Yesu ngesa-ngambofocine yengele wac-aling*

*Mat 1:1-17*

<sup>23</sup> Yesu ye hifaine 30 aiyemewa boleine fungkewec. Aime ngic-ngigac yengi yanguc ngegebong, ye Yosefele madec. Nga

Yosefe ye Helile madec nga

<sup>24</sup> Heli ye Matatle madec.

Matat ye Liwaile madec nga

Liwai ye Melkile madec.

Melki ye Yanaile madec nga

Yanai ye Yosefele madec.

<sup>25</sup> Yosefe ye Matatiale madec nga

Matatia ye Amosle madec.

Amos ye Nahumte madec nga

Nahum ye Esilile madec.

Esili ye Nagaille madec nga

<sup>26</sup> Nagai ye Mahatale madec.

Mahata ye Matatiale madec nga

Matatia ye Semengte madec.

Semeng ye Yosekle madec nga

Yosek ye Yodale madec.

<sup>27</sup> Yoda ye Yonangte madec nga

Yonang ye Resale madec.

Resa ye Serubabelle madec nga

Serubabel ye Sialtielle madec.

Sialtiel ye Nerile madec nga

<sup>28</sup> Neri ye Melkile madec.

Melki ye Adile madec nga

Adi ye Kosamte madec.

Kosam ye Elimadamte madec nga

Elimadam ye Erile madec.

<sup>29</sup> Eri ye Yosuwale madec nga

Yosuwa ye Eliesale madec.

Eliesa ye Yorimte madec nga

Yorim ye Matatale madec.

Matata ye Liwaile madec nga

<sup>30</sup> Liwai ye Simeonte madec.

Simeon ye Yudale madec nga

Yuda ye Yosefele madec.

Yosefe ye Yonamte madec nga  
 Yonam ye Eliakimte madec.  
<sup>31</sup> Eliakim ye Meleale madec nga  
 Melea ye Menale madec.  
 Mena ye Matatale madec nga  
 Matata ye Natante madec.  
 Natan ye Dawidile madec nga  
<sup>32</sup> Dawidi ye Yesile madec.  
 Yesi ye Obedele madec nga  
 Obede ye Boasle madec.  
 Boas ye Salmonte madec nga  
 Salmon ye Nasongte madec.  
<sup>33</sup> Nasong ye Aminadapte madec nga  
 Aminadap ye Adaminte madec.  
 Adamin ye Ramte madec nga  
 Ram ye Hesorongte madec.  
 Hesorong ye Peresle madec nga  
 Peres ye Yudale madec.  
<sup>34</sup> Yuda ye Yakobole madec nga  
 Yakobo ye Aisakle madec.  
 Aisak ye Abrahamte madec nga  
 Abraham ye Terale madec.  
 Tera ye Nahorle madec nga  
<sup>35</sup> Nahor ye Serukle madec.  
 Seruk ye Reule madec nga  
 Reu ye Pelekle madec.  
 Pelek ye Eberile madec nga  
 Eberi ye Selale madec.  
<sup>36</sup> Sela ye Kainante madec nga  
 Kainan ye Arpaksatle madec.  
 Arpaksat ye Siemte madec nga  
 Siem ye Noale madec.  
 Noa ye Lamekte madec, nga  
<sup>37</sup> Lamek ye Metuselale madec.  
 Metusela ye Enokte madec nga  
 Enok ye Yaretle madec.  
 Yaret ye Mahalalelle madec nga  
 Mahalalel ye Kenante madec.  
<sup>38</sup> Kenan ye Enosile madec nga  
 Enosi ye Setle madec.  
 Setdi Adamte madec nga  
 Adam yedi Wapongte madec.

## 4

*Aleng Sugucnenginengti Yesu lokwesacka lowec*  
*Mat 4:1-11; Mrk 1:12-13*

<sup>1</sup> Aime Tili Asudi Yesu kweleine bawakeme Yodan misawacni hefaliye ofeemewa, yedi himong kisiwa misaine mikacka mengockeme hikeiboc. <sup>2</sup> Yesu ye iwa hikegacgume hadeng 40le kwelina, Aleng Sugucnenginengti iwa lokwesacka lowec. Dameng iwa Yesu ye nosing mikac game hadeng 40 motome ye nosingte homawec.

<sup>3</sup> Nosingte homame Aleng Sugucnenginengti yanguc edowec, “Ga Wapongte Madec noine gagicka posa yago miyengka bafaliyelu bret aina!”

<sup>4</sup> Inguc mime Yesudi bafaliyecnolu yanguc miwec, “**Hibiwa yowa yanguc kwelengke-icne fagac,**

**‘Ngicti nosingka sugu mi gadaicte.’”**

*(Yef 8:3)*

<sup>5</sup> Mime yedi Yesu himong hewac monicka mengocke fewec. Felu himongtowa himong gamangninengkolec edaliwec, yogo folo-folo bapilackeme nganiwec. <sup>6</sup> Nganime yanguc miwec, “Himong yagolec wac feicne nga bole-yowa tapiliineholec sasawa damongkenogale esecne neleibong. Aime na monic me monic yogo lacnobebe bole-yowa

tapiliineholec fanelegac. <sup>7</sup> Ilec na ketadi holenelelu afenuengka, yogo sasawa hegilebe gale aiyakenale angacnugac.”

<sup>8</sup> Inguc mime Yesudi bafaliyelu yanguc edowec, “**Hibiwa yowa yanguc kwelengkeicne fagac,**

**‘Sugucne Waponggone, ye moniyang sugu afeelu kwelec kwecnodamec!’ ” (Yef 6:13)**

<sup>9</sup> Mime yedi hatacmac mengockeme Yerusalem hikelu Ibu-mac feina wilinibenang, iwa lome domawec. Domame edolu yanguc micnowec, “Ga Wapongte Madec noine gagicka gageuctihac yagowacni wintackelu haunong! <sup>10</sup> Yowa yanguc kwelengkeicne fagac, ‘Ye gale ailu angelofocine bole-yowa yeleme yengi ga damonggudaingte. <sup>11</sup> Ailu yengi molengineng feina sesegubong, posa monicti higegone nalic mi helockedaicte.’ ” (Mige 91:11-12)

<sup>12</sup> Inguc mime Yesudi yanguc miwec, “Yowa yanguc miicne fagac,

‘Ga Sugucne Waponggone lokwesacka mi lonong!’ ”\* (Yef 6:16)

<sup>13</sup> Mime Aleng Sugucnenginengti lokwesac sasawa aibibiyeme motome, hegile hikelu dameng monicte wangec gawec.

*Nasaret yenge Yesule takicebawec*

*Mat 4:12-17; 13:53-58; Mrk 1:14-15; 6:1-6*

<sup>14</sup> Aime Tili Asule tapilidi Yesula wakeicne fame, ye Galili prowinswa hatacmac hefaliye hikeme, mac-gogoc falegac sasawadi siducine ngageyackeibong. <sup>15</sup> Aime yedi kpakpaduc macnginang felu weduyeleme ngic-ngigac sasawadi wacine bafeibong.

<sup>16</sup> Aime Yesu ye nosugulec macine Nasaret, iwa hatac hikewec. Hikelu, kpakpaduc macka fecaigac, aibaba yogo balaibelu Sabat damengka iwa fewec. Felu Wapongte hibi wafenale domame, <sup>17</sup> yengi Wapongte siduc-mimi ngic Yesaiyale hibi kpadidiweicne yogo lacnobong. Lacnobong bafilamelu hibiwa Mesiale yowa yanguc fawec, yogo bafuwawec. <sup>18</sup> “**Waweweine yenge Siduc Madicne mibe yegengkeyelenale Sugucnedi bawosaec- nume, yele Asudi naholec gagac.**

**Ailu mucka gagaing, yenge mucngineng mikac aidaingte. Nga donge-pisicti donge hilaningte edocebabele yedi salecnuwec.**

**Salecnume kwesi umackolec gagaing, yenge umacngineng ewalicebalu baickedacte.**

<sup>19</sup> **Ailu Sugucnelacni dameng madicne welengelegac, yogo inguchac edocebalu weduyeledacte.**” (Yes 61:1-2)

<sup>20</sup> Yesu ye hibi yogo wafelu hatacmac kpadidiwelu hibi-damong lacnolu wangiyewec. Wangiyeme kpakpaduc macka ngic-ngigac ngiyeibong, yenge sasawadi dongengineng ye nganiibong. <sup>21</sup> Nganibong yedi yanguc edocebawec, “**Wapongte hibiwa wafebe ngagegagang, yogolec noine yakumac fikengelegac.**”

<sup>22</sup> Aime yele mickacni yowa miwec, yogodi kwele-efec nga yowa tapiliineholec aiwecte ailu, ngic-ngigac sasawadi yele ngage-madickelu mimedec ailu yele uwanaguibong, “Ngic yago ye Yosefele madecti inguc migac!”

<sup>23</sup> Inguc mibong edocebalu miwec, “**Yowa monic yanguc micaigaing. Aime ngenge yogo biyac edocnunogale yanguc migaing, ‘Dota, gageuc bamadicnaguc!’ Ailu hatacmac yanguc edocnunogale aigaing, ‘Ga Kapeneam macka bole baengka siduc-gone ngagecagabeleng, yogo himonggona yawa inguchac baengka nganinang!’ ”†**

<sup>24</sup> Milu hatacmac yanguc taockelu miwec, “**Foinac, Wapongte siduc-mimi ngic monic, ye yeicne himongka hikeme ngic-ngigac yengi ye nalic mi hefoledaingte, yogo noine edocngebagabac.** <sup>25</sup> Aime yowa noine yanguc edocngababe, Elaiya gawec, dameng iwa Israel himongka ngigac-hosec homacnedi gaibong. Gacgubong Wapongti ngageme mac mi kwewec. Aime hifa habackang, nga tamacne 6 himong iwa loloc fikewec. <sup>26</sup> Fikeme Wapongti Elaiya saleme Israel ngigac yengela mi hikewec. Aime Sarepat macka Saidon himongka ngigac-hosec monic gawec, yelabac saleme hikewec. <sup>27</sup> Nga Wapongte siduc-mimi ngic Elisadi Israel himongka gawec, dameng iwa ngic-ngigac homacnedi waic-sanangkolec gaibong, yengelacni monicti mi madickewec. Aime Siriahocni ngic monic wacine Naman, yedi sugubac madickewec, yogo foinachenang.”‡

\* **4:12:** Entacka Yesudi Aleng Sugucnenginengte yowa balaibedec, Yesu ye Wapong lokwesacka lodec. **4:12:** 1Kor 10:9 **4:13:** Hib 2:18; 4:15 **4:22:** Luk 3:23; Yoa 6:42 † **4:23:** Yenge yanguc ngageibong, Yesu ye pasi mac monicka balu gawec, aime Yesaiyadi kwelengkewec, yogo nganidaingtewa, yenge yanguc ngagedaingte, Yesu ye Mesia. **4:24:** Yoa 4:44 **4:25:** 1Ngt 17:1,7 **4:26:** 1Ngt 17:8-16 ‡ **4:27:** Elaiya nga Elisa yekele damengka Israel ngic-ngigac yenge yanguc ngagenaguibong, “Nonge Wapongte aling.” Ailu yenge sifu Wapongte yowa mi balaibeibong. Ilec ailu Wapong ye aling monic baficepawec. **4:27:** 2Ngt 5:1-14

<sup>28</sup> Aime ngic-ngigac sasawa kpakpaduc macka ngiyebong, yenge yogo ngagelu kwe-lengineng aalic <sup>29</sup> fikeme Yesu igockelu baickelu taon lobina hauibong. Haulu macngineng kupicka ngiyewecka dengge monic domawec, iwa hikelu wickebong haunale ngagelu mengocke hikeibong. <sup>30</sup> Hikebong, yebac ngic-ngigac hewacnginang kwegi-locebalu hikewec.

*Yesudi aleng wonongkolec yebiyewec*

*Mrk 1:21-28*

<sup>31</sup> Yesu ye Galili prowinsle taon monic, wacine Kapeneam, iwa haulu Sabat damengka ngic-ngigac Wapongte yowa weduyelewec. <sup>32</sup> Weduyelewec, yogo ngic bolele hibi ba-caigaing, yengele silic ingucne bole-yowa tapiliineholec weduyelewec. Ilec ailu yenge yowa weduyeleme ngagelu kwatackebong.

<sup>33</sup> Aime kpakpaduc macka ngic monic gawec. Ye aleng wonongkolec kweleina ngiyeme gawec, yedi yowa tapiliineholec aukwelu miwec, <sup>34</sup> “Aa, Yesu Nasaret-hocni, ga nongela wenuc ainogale ngagegic? Ga basowalecnubanogale kwesigic, me? Na ngagegabac, ga Wapongte bingec.”

<sup>35</sup> Inguc mime Yesu ye aleng yowa sanangne aicnolu yanguc edowec, **“Ga waickelu ngickacni ofelu hikebong!”** Inguc mime aleng ye ngic wewackeme hewacnginang waweme, yelacni ofelu hikewec. Ailu ye ngic yogo monic mi basowalewec.

<sup>36</sup> Aime ngic-ngigac sasawadi yogo nganilu mimedec ailu, mingagec ailu yanguc mi-ibong, “Ye oma yowa balu gagac? Ngic yago ye bole-yowa sasawa tapiliineholec nga wac sugucneholec gagac, yedi aleng wonongkolec mic-yowainedi yebicebame ofelu hikegaing.” <sup>37</sup> Inguc fikeme siducinedi himong iwa macsoc neboc nga nebocka hikelu saweyackewec.

*Yesudi ngic-ngigac bamadicebawec*

*Mat 8:14-17; Mrk 1:29-34*

<sup>38</sup> Aime Yesu ye kpakpaduc mackacni walu Saimonte macka hikewec. Aime Saimon sefengngine ye soc-dac sugucne aicnome fawec. Fame Yesudi ye bamadickenale mic-noibong. <sup>39</sup> Micnobong Yesu ye domalu ngigac fame nganilu, soc-dac yowa sanangne edolu kpatalacnome, hucine miyac aiwec. Aime ye dameng yogowahac fangkelu nosingka baficebawec.

<sup>40</sup> Aime wenac-dongeine haunale aiyemewa, ngic-ngigac sasawadi agofocngineng huc haicine monic-monicti bacebaicne, yenge bacebalu Yesula kwesiibong. Kwesi-bong, Yesudi moleine hucnginengkolec sasawa fenginang lolu bamadicebayackewec. <sup>41</sup> Bamadicebame aleng yenge ngic-ngigac bocyac yengelacni ofelu yanguc wackebong, “Ga Wapongte Madec.” Aime ye Mesia, yogo ngageibongte ailu yenge yowa yogo midaingkale, mimacebawec.

<sup>42</sup> Aime mac saeme, Yesu ye taon hegilelu mac monic ngic mikacka hikewec. Hikeme, ngic-ngigac yenge ye basackebong. Basackelu bafuwabong, yengeholec game mac monicka mi hikenale kpatalacnoibong. <sup>43</sup> Inguc mibong yanguc edocebawec, **“Mac-himong gocne ngiye-hikegac, iwa inguchac hikelu Wapongte ngani-damongte Siduc Madicne mibe yegengkeyedaicte. I yangucte, Wapongti yogolec hocne salec-nuwec.”** <sup>44</sup> Inguc milu Yudeya himongka kpakpaduc macngineng falewec, iwa hikelu Wapongte yowa edocebalu weduyelelu gawec.

## 5

*Yesu ye molickelu mic-tengtengfocine bacebawec*

*Mat 4:18-22; Mrk 1:16-20*

<sup>1</sup> Dameng monicka Yesu ye lifuc, wacine Genesaret, mecina domaemewa ngic-ngigac yenge kwesilu Wapongte yowa ngagelu igocnagulu hewalingkebong, ye hewacnginang domawec. <sup>2</sup> Domalu donge hilalu nganime gomba yaeckang lifuc mecina domaiboc. Aime misa-sic baba ngic yenge gombangineng lobong fame uficngineng suwelu gaibong. <sup>3</sup> Aime Yesu ye gomba monic, yogo Saimonte gomba, iwa fengiyelu Saimon micnome yedi gomba kpicisnema igockeme lifucka feme, ngic-ngigac edocebalu weduyelewec.

<sup>4</sup> Weduyeleme motome Saimon yanguc edowec, **“Misa-sic banogale lifucka misa gbolongne fagacka, iwa hikelu uficngineng wickelu misa-sic baning.”**

<sup>5</sup> Inguc mime Saimonti yowaine bafaliyecnolu yanguc miwec, “Sugucnene, nonge awecnac debocka doic-bole balu gabeng mac saeme sic monic mi bagabeleng. Aime gagi migicte sifu hikelu ufic wickedacte.”

<sup>6</sup> Mime yenge ufcngineng iwahac wickelu sic homacnebenang baibong. Babong ufcngineng wakelu lokenogale aiwec. <sup>7</sup> Inguc aime yenge agofocngineng gomba monicka ngiyeibong, yenge moleiyac holeyelebong welelu baficebaibong. Baficebalu sic gomba yaeckangka lobong wakelu gomba yeke misawa haunicta aiiboc.

<sup>8</sup> Saimon Pita ye aibaba yogo nganilu Yesule higewa ketadi holelu alang bacnolu yanguc miwec, "Sugucne, na bikickolec aigabacte ga hegilecnulu hikec!" <sup>9</sup> Inguc mime Saimonkolec gaibong, yenge sic homacnebenang baibongte ailu mimedec aiibong, yogolec ailu inguc miwec. <sup>10</sup> Aime Sebedi madeckecine, Yakobos nga Yoane, yeke Saimonkolec misawa sic baiboc, yogo nganilu mimedec aiiboc.

Aime Yesudi Saimon edolu yanguc miwec, "**Ga mi hangocguna! Ga misawa sic babadi, yakumac ngic-baba bole badamecte.**" <sup>11</sup> Aime yenge gombangineng balu mecina lolu wiyac sasawa hegilelu Yesu balaibeibong.

*Yesudi ngic monic waic-sanangkolec bamadickewec*

*Mat 8:1-4; Mrk 1:40-45*

<sup>12</sup> Aime Yesu ye taon monicka gacgume ngic monic waic-sanangti socine wakeme sowale-benangkeicne, ye iwa gawec. Galu Yesu nganilu ketadi holecnolu haicine himongka heluluckelu dogbac aicnolu miwec, "Sugucne, ga ngageng angacgugacka, na nalic bamadincung gbagbackedacte."\*

<sup>13</sup> Inguc mime Yesudi moleine sungkelu ngic bauwalu yanguc edowec,† "**Madicckecte angacnugac.**" Inguc mime iwahac ngic yela waic-sanang fawec, yogo miyac aiwec.

<sup>14</sup> Miyac aime Yesudi mimackelu miwec, "**Ga socgona pasi fikegac, yogolec monic mi edodamec. Ga depec-baba ngic yela hikelu socgone gbagbacne aigac, yogo edaliyengka, Mosesdi ibule miwec, yogolec silicina balaibelu lacnodamec! Ga inguc lacnoengka yenge ibugone nganilubac ngage-motodaingte.**"

<sup>15</sup> Aime Yesule siducti sugulelu sawelu hikeme, ngic-ngigac habutowa homacnedi yenge yeke yowa ngageningte, ailu yedi ngic-ngigac huckolec bamadicebanale kwesiibong. <sup>16</sup> Inguc aibong Yesu ye dameng homacne hegilecebalu himong kisiwa misaine mikacka hikelu Wapong milockelu gawec.

*Yesudi ngic monic hige-moleine homaicne bamadickewec*

*Mat 9:1-8; Mrk 2:1-12*

<sup>17</sup> Gacgu dameng monicka Yesu ye Wapongte yowa edocebalu weduyelewec. Weduyeleme Farisaio nga Wapongte yefe-yowale wewedu ngic gocne Galili nga Yudeya macaling sasawa ailu Yerusalem taon, iwacni kwesilu ngiyeibong. Aime Sugucnele tapilidi Yesula fawecte huckolec bamadicebawec. <sup>18</sup> Inguc fawecte ngic gocne yengi ngic monic hige-moleine homaicne dembengka lolu tengkelu hikeibong. Hikelu mac kwelina Yesule haicka loningte ngaeibong. <sup>19</sup> Ngageibong, ngic-ngigac bocyacti kwedickelu domaibong. Ilec ailu yenge ye Yesule haicka loningte yefe basackelu ngic yogo mac feina tengke feibong. Felu mac bubuine nebocina basulumelu, iwa yefe ngic hewacnginang Yesule emewa dembengkolec lobong hauwec.‡

<sup>20</sup> Haume Yesudi ngage-ngagesingnineng nganilu yanguc edowec, "**Ngic ga, bikicgone biyac hegilegelegabac.**"

<sup>21</sup> Inguc mime Wapongte yefe-yowale wewedu ngic nga Farisaio yenge yengilangkac yanguc ngageibong, "Ngic yogo ma ngicti Wapong fecnogac? Wapong moniyangti sugu bikic nalic hegiledaicte."

<sup>22</sup> Yesu ye kwelenginang ngagesiibong, yogo nganilu yanguc edocebawec, "**Ngenge omale ngage-ngage ingucne kwelenginang inguc ngagesigaing? <sup>23</sup> Weni yogodi efecne aigac? Yele yanguc minoga, 'Bikicgone biyac hegilegelegabac', me yanguc minoga, 'Ga fangkelu hikec.'**" <sup>24</sup> Aime Ngicte Madec ye himongka bikic hegilenale bole-yowa tapilineholec facnogac, **ngengi yogo ngageningte ailu yanguc mibe.**" Ye inguc milu ngic-puling yanguc edowec, "**Na edocgugabac, ga fangkelu dembenggone balu macgona hikec.**"

<sup>25</sup> Mime iwahac ngic ye ngic-ngigac sasawa yengele haicka fangkelu dembengine fa-caigac, yogo balu Wapong wacine bafelu macina hikewec. <sup>26</sup> Hikeme ngic-ngigac sasawadi yogo nganilu kwatackelu mimedec ailu Wapong wacine bafeibong. Ailu yanguc miibong, "Nonge aibaba ingucne mi ngani-nganiine yakumac dongenonggengti nganigabeleng."

5:11: Mat 19:27 \* 5:12: Monic waic-sanangkolec, ye socine wonongkolec milu gaibong. Ngic homacnedi huc ingucne gacgu badaingkale, waic-sanangkolec yenge taon lobina gaibong. Yogo Wapongte yefe-yowawa kwelengkeicne fagac. † 5:13: Ngic monic ye ngic waic-sanangkolec oiyalu ye wonongkolec aidaicte. 5:14: Dep 14:1-32 ‡ 5:19: Dameng iwa mac feina ye wenengine. Aime liti mac feina domame fec-wac ailu gaibong. 5:20: Luk 7:48; Yes 43:25 5:24: Yoa 5:8

*Yesudi Liwai wackewec*

*Mat 9:9-13; Mrk 2:13-17*

<sup>27</sup> Inguc mibong Yesu ye iwacni walu hike takes-baba ngic monic, wacine Liwai, ye takes-baba macka ngiyeme nganilu yanguc edowec, “**Ga wele na balaibecnuc!**” <sup>28</sup> Inguc mime ye fangkelu wiyac sasawa hegilelu Yesu balaibelu hikewec.

<sup>29</sup> Aime Liwai ye Yesule ailu macina nosing sugucne lobeme takes-baba ngic nga ngic-ngigac homacnedi yengeholec ngiyelu nosing noibong. <sup>30</sup> Inguc aibong Farisaio nga yengele Wapongte yefe-yowale wewedu ngic yenge ngagebong nalic mi aime, Yesu mic-tengtengfocine yengele yowa kwelu yanguc miibong, “Ngenge omale takes-baba nga bikic-baba yengeholec nosing misa nogaing?”

<sup>31</sup> Mibong Yesudi yanguc miwec, “**Ngic-ngigac hucngineng mikac gagaing, yenge dotale mi aieylecaigac. Nga hucnginengkoklec, yengibac dotale aieylecaigac.**” <sup>32</sup> **Aime na ngic-ngigac dondonne wacebabe nala weleningte mi waiba, miyac. Nabac bikic-baba ngic wacebabe kwelengineng hefaliyenale waiba.**”

*Yesudi nosing-sawe ganogale nangeng yowa miwec*

*Mat 9:14-17; Mrk 2:18-22*

<sup>33</sup> Aime ngic-ngigac gocne yengi Yesu yanguc uwacnoibong, “Yoane mic-tengtengfocine nga Farisaio yengele mic-tengtengfocngineng yenge dameng homacne nosing-sawe galu mimiloc bole bacaigaing. Nga gale mic-tengtengfocgone yengebac nosing misa no-caigaing.”

<sup>34</sup> Inguc mibong Yesudi yanguc edocebawec, “**Baba-tumangte ngicti agofocine yengeholec ngiyeme yenge nosing-sawe nalic gadaingte, me? Yogo miyac.**” <sup>35</sup> **Aime Gacgu dameng monicka ngic yengi baba-tumangte ngic agofocine yengelacni baickedaingte, dameng yogowabac nosing-sawe gadaingte.**”

<sup>36</sup> Yesu ye taockelu nangeng yowa yanguc edocebawec, “**Monicti ngakpi gbolicnacni sindacine helocke balu esecna nalic mi lolu gbododaicte. Inguc aidaictewa, ngakpi gbolicne sowaledaicte. Aime gbolicne nga esecne wetulecepame nalic mi aidaicte.**”

<sup>37</sup> **Me monicti waing gbolicne bokong sic socine esecnedi baicne, iwa nalic mi kweme haudaicte, miyac. Waing gbolicnedi siwinelu bokong esecne kwouckeme yeke momochac sowaledabiyecte.** <sup>38</sup> **Ilec ailu waing gbolicne yogodi bokong gbolicna socne kweme haudaicte.** <sup>39</sup> **Aime monicti waing esecne biyachac nowec, yedi waing gbolicne nonale angac nalic mi ngagedaicte. Yanguc sugu midaicte, ‘Waing esecne, yogo madicnebenang.’**”

## 6

*Yesudi Sabatle yowa miwec*

*Mat 12:1-8; Mrk 2:23-28*

<sup>1</sup> Yesu ye Sabat dameng monicka wit bole hewacina yefe balaibelu leme, mic-tengtengfocine yenge wit noine bamocotolu socine litolu noibong. <sup>2</sup> Nobong Farisaio gocne yengi nganicebalu yanguc uwayeleibong, “Ngenge omale Sabat damengka aibaba mi aiaine yogo aigaing?”

<sup>3</sup> Uwayelebong Yesudi yanguc edocebawec, “**Dawidi nga bole-ngicfocine yenge nosingte homalu aibaba aiiibong, ngenge yogo wafe-ngagec mi aicaigaing, me?**” <sup>4</sup> **Ye Wapongte Ihu-macka fewec. Felu bret Wapongte ibu loicne, yogo banolu bole-ngicfocine inguchac gumecebawec. Nga bret yogo depec-baba ngic yengi sugu nalic nodaingte, ngicbenang yengibac miyac. Aimebac Wapongti yengele mi ngagesowalewec.**”

<sup>5</sup> Milu yanguc edocebawec, “**Ngicte Madec ye Sabatle Sugucne gagac hocne, ye aibaba madicne nga sowacnele nalic midaicte.**”

*Yesu Sabat damengka ngic monic moleine homaicne bamadickewec*

*Mat 12:9-14; Mrk 3:1-6*

<sup>6</sup> Aime Sabat dameng monicka Yesu ye kpakpaduc macka felu Wapongte yowa weduwelewec, iwa ngic monic mole-foleine homaicnedi yengeholec ngiyewec. <sup>7</sup> Aime Wapongte yefe-yowale wewedu ngic nga Farisaio, yenge Yesu yowawa lonogale ngagesibong. Ailu ngic yogo Sabat damengka bamadickedaicte me miyac, yogolec nganibiyebong. <sup>8</sup> Aime Yesudi ngage-ngagengineng nganilu ngic moleine homaicne yanguc edowec,



**“Ga fangkelu nongele hewacka domac!”** Inguc mime ngic ye fangkelu hewacng-inang domaemewa, <sup>9</sup> Yesudi yanguc edocebawec, **“Yowa monic uwangelebe, Sabat damengka aibaba weni yogo nalic ainoga, aibaba madicne me sowacne ainoga? Ailu homanogale aigaing, yengele agong holenoga me basowalecebanoga?”**

<sup>10</sup> Inguc milu dongedi lengani-welengani ailu ngic yanguc micnowec, **“Ga molegone sungkec!”** Inguc mime ngic ye moleine sungkelu madickewec. <sup>11</sup> Madickeme yenge aalic sugucnebenang ngagelu yengungtihac Yesu wenuc aicnoningte mingagec aiibong.

*Yesudi mic-tengtengfocine 12 bawosaecebaawec*

*Mat 10:1-4; Mrk 3:13-19*

<sup>12</sup> Yesu ye dameng iwa milockenale kupicka felu debocka yeicnac Wapong milockelu gawec. <sup>13</sup> Gacgu mac saeme mic-tengtengfocine hadutowa wacebame hikeibong. Hikebong yengele kwelinacni mic-tengtengfocine 12 bawosaecebalu wacngineng Salecebaicne wacebawec. Aime Salecebaicne yengele wacngineng yanguc:

<sup>14</sup> Saimon, wacine monic Pita wackewec. Nga

ngic hae-gbaine Endru. Ailu

Yakobos nga

Yoane. Ailu

Filip nga

Batolomeu. Ailu

<sup>15</sup> Mataio nga

Tomas. Ailu

Alfaiusle madec Yakobos. Nga

Saimon, ye Selot wackebong.\*

<sup>16</sup> Ailu Yakobos madecine Yudas. Nga

Yudas Iskariot, yedi gacgu Yesu mudockeme badaingte.

*Yesudi ngic-ngigac homacne bamadicebaawec*

*Mat 4:24-25; Mrk 3:7-12*

<sup>17</sup> Aime Yesu ye kupicka mic-tengtengfocine 12 yengeholec walu himong wenengngine monicka mic-tengteng alingfocine homacne yengeholec domawec. Aime ngic-ngigac homacnedi Yudeya himong neboc nga nebockacni, nga Yerusalemkocni ailu Tair nga Saidon kiwecnginacpec mac-himong falegac, iwacni kwesiibong. <sup>18</sup> Kwesilu Yesule yowa ngageningte, nga yedi hucngineng bamadicebanale kwesiibong. Ailu aleng wonongkolec ngic yenge inguchac momoc kwesilu madickeibong. <sup>19</sup> Aime ye le tapilidi yengela falockeme ngic-ngigac sasawadi madickeibong. Yogolec ailu yenge sasawadi ye oiyaningte ngeaibong.

*Yesudi ngic kwele-sowackolec yengele miwec*

*Mat 5:1-12*

<sup>20</sup> Inguc aibong Yesu ye dongeine mic-tengtengfocine yengela hilalu miwec,

**“Waweweine gagaing, ngenge kwele-angackolec.**

**I yangucte, Wapongte ngani-damong yogo ngengele hocne.**

<sup>21</sup> **Nga yakumac nosingte homagaing, ngenge kwele-angackolec.**

**I yangucte, ngenge gacgu nosing nolu gebecgebadaicte.**

**Ailu hii kwele-sowackolec yakumac gagaing, ngenge kwele-angackolec.**

**I yangucte, ngenge gacgu gouwedaingte.**

<sup>22</sup> **Nga Ngicte Madeckolec gagaingte ailu kweledi wicngebalu misofoc aingeledaingte.**

**Ailu lobina locngebalu wac sowacne wacngebadaingte, yogo ngenge kwele-angackolec.**

<sup>23</sup> **“Ngagegailing, fulingineng sugucne honocmengka lowec fagac. Ilec ngenge dameng iwa kwele-madic ngagelu wintacke fec-wac ailu beliyeidaing. I yangucte, yengele ngambofocngineng yengi esecne Wapongte siduc-mimi ngic yengela aibaba yogohac aiyeleibong.”**

*Yesudi moneng-mafaholec gagaing yengele miwec*

<sup>24</sup> **“Nga moneng-mafaholec gagabiyeng, mee, ngenge medecngebadaic.**

**I yangucte, ngenge wiyac angacineholec ngengilangkac biyac habong motowec.**

<sup>25</sup> **Nosing nogebec yakumac aicaigaing, mee, ngenge medecngebadaic.**

**I yangucte, ngenge gacgu nosingte homadaingte.**

\* **6:15:** Selot aling yenge Israel ngic-ngigac Roma yengele muckacni bamoctoceanoga. **6:21:** Miye 7:16-17; Mige 126:5-6; Yes 61:3 **6:22:** Yoa 15:19; 16:2; 1Pi 4:14

**Nga yakumac gouwelu gagabiyeng, mee, ngenge medecngbadaic.**

**I yangucte, ngenge gacgu kwele-sowac ngagelu hiyadaingte.**

<sup>26</sup> **Ailu ngic-ngigac yengi ngengele madicne milu gagaing, mee, ngenge medecngbadaic.**

**I yangucte, yengele ngambofocngineng esecne siduc-mimi ngic kwesacine inguchac yengele madicne milu gaibong.**

*Ngabafocgone yengele angac ngagedamec*

*Mat 5:38-48*

<sup>27</sup> **"Ailu yowanele hedec kwecaigaing, ngengebac yanguc edocngebabac, ngenge ngabafocngineng kweledi angac ngageyeledabiyeng. Ailu kweledi wicngeba-caigaing, yenge aibaba madicne aiyelelu gadaing. <sup>28</sup> Ailu sawec-yowa edocngeba-caigaing, yenge mimi-madic milu edocebalu gadabiyeng. Ailu basowalecngeba-caigaing, yengele ailu milockelu gadabiyeng. <sup>29</sup> Aime monicti munggungone nehoc wedaictewa, ga nehocgone ingucnehac sungkecnodamec.† Nga monicti ngakpigone feina badaictewa, ga ngakpigone kwelina ingucnehac hegilecnodamec. <sup>30</sup> Aime gala wiyac monicte uwagelebong, yenge wiyac yogo yeledamec. Ailu monicti geicne wiyac ewaligulu badaictewa, hatacmac bafaliyegelenale mi micnodamec. <sup>31</sup> Ngic-ngigac yengi oma aibaba aingelenogale ngagesicaigabiyeng, wiyac ngagesicaigabiyeng, yogo ngengi ayeledabiyeng.**

<sup>32</sup> **"Ailu ngic-ngigac yengi ngenge kweledi angac ngagengelebong, ngengi yenge ingucnehac kweledi angac ngageyeledabiyengtewa, ngengele kwele-madic yowa homacne mi minoga. Bikic-baba aling yenge kweledi angac ngagecaigaing, yenge inguchac kweledi angac ngageyeledaing. <sup>33</sup> Nga aibaba madicne aingelecaigaing, yenge aibaba madicne ayeledaingtewa, ngengele kwele-madic yowa mi minoga. Bikic-baba aling yenge inguchac yogo aicaigaing. <sup>34</sup> Ailu yanguc ngagening, ngengelacni tofa aibong ameine badaingtewa, ngengele kwele-madic yowa mi minoga. Ngic bikicnginengkolec yenge inguchac bikickolec agofocngineng wiyacngineng ameineholec yelecaigaing. Ailu ngagebong amengineng yogo hatac bafaliyedaingte. <sup>35</sup> Ailu ngenge ngabafocngineng yengele kweledi angac ngagelu aibaba madicne ayeledaing. Ailu amengineng hegilebong, yengela fadaic, badungeleningte mi ngagesidaing. Inguc aidaingtewa, aibaba madicnele fulingineng sugucne fadaicte. Aime Mamacngineng Wapong Feicnetowanonggeng ye le adumadecfocine aidaingte. Ye ngic-ngigac kpaomaine nga wac sowacneholec ailu ngic kindololoholec aibaba madicne ayelecaigac. <sup>36</sup> Ngenge Mamacnginengti kwele-sowac aingelecaigac, silicine ingucnehac ngengi yenge kwele-sowac ayelegadaing.**

*Yesudi ngage-wosaecte yowa miwec*

*Mat 7:1-5*

<sup>37</sup> **"Ngenge ngic-ngigac yengele aibaba ngage-wosaec mi ayeledaing. Inguc aidaingtewa, Wapongti inguchac ngage-wosaec mi aingeledaicte. Ailu ngenge ngic-ngigac ngage-wosaec aiyelelu umacngineng mi mimoctodaing. Inguc aidaingtewa, Wapongti ngenge inguchac wosaecngembali umacngineng mi mimoctodaicte. Ngenge sowacnengineng hegiledaing, aime ye inguchac ngengele sowacne hegiledaicte. <sup>38</sup> Ngenge wiyacngineng balu ngic-ngigac yeledaing. Inguc aidaingtewa, Sugucnedi wiyacngineng ameine kweme haume kpendaelu kpung kwedaicte. Ailu hatacmac kweme wakelu sotingkelu nehocine tabunginang wame badaingte. I yangucte, ngenge wiyac umacine wosaelu ngic-ngigac yelecaigaing, aime umacine silicine ingucnehac wosaelu ameine ngledaicte."**

<sup>39</sup> **Aime Yesudi hatacmac nangeng yowa yanguc edocehawec, "Donge-pisic monicti donge-pisic agoine monic nalic mengockedaicte, me? I miyac, yogo yekilec momochac longka haudabiyecte. <sup>40</sup> Nga hibi-mac madec monicti weweduinele feicne mi aidaicte. Wewedu ye madecfocine weduyeleyackeme motome ye le silic ingucnehac aiyackedaingte.**

<sup>41</sup> **"Aime ga wenucte ngic hae-gbagonele dongewa gochakic fagac, yogo nganicagac. Nga geicne dongewa yoc hewacine fagac, yogobac mi ngani-motogic, me? Aibaba ingucnedi mi madickegac. <sup>42</sup> Gageicne dongewa yoc hewacine faemewa mi ngani-motolubac, ngic hae-gbagonele yanguc milu gagic, 'Ngic hae-gba, ga nalic ngageengka dongegona gochakic ngiyegac, yogo baickebe.' Kwesac-ngic, gageicne**

† 6:29: Israel ngic-ngigac yenge munggungka webong gameebalu gawec. 6:31: Mat 7:12 6:37: Mat 6:14  
6:38: Mrk 4:24 6:39: Mat 15:14 6:40: Mat 10:24-25

**dongewa yoc hewacine fagac, yogo baickelubac ngic hae-gbagonele dongewa gocha-kic ngiyegac, yogo nalic ngani-motolu baickedamecte.**

*Yesudi ngic nongileng fungine yocka soc holelu miwec  
Mat 7:16-20; 12:33-35*

<sup>43</sup> **“Yoc monic madicnaci noine sowacne nalic mi fikedaicte, me yoc sowacnaci noine madicne nalic mi fikedaicte.** <sup>44</sup> **Aime yoc haicine monic monic yenge noinenginengti funginengineng bayegengkecaigac. Ngenge muc somangineholec iwacni fik noine nalic mi badaingte. Ailu waing noine yogo tambong-tambongkacni nalic mi badaingte.** <sup>45</sup> **Ngic madicne yele kwelewa wiyac madicne facnogac, iwacni wiyac madicne bame fikecaigac. Nga ngic kindololoholec, yele kwelewa wiyac sowacne facnogac, iwacni wiyac sowacne bame fikecaigac. I yangucte, wiyac kwele ngage-ngageina wakelu fagac, yogo hocne micti mime yegengkedaicte.**

*Yesudi ngage-ngagesingte yowa miwec  
Mat 7:24-27*

<sup>46</sup> **“Ngenge omale ‘Sugucnene, Sugucnene,’ wacnucaigaing, ailu sifu yowane hegilelu mi balaihecnucaigaing? <sup>47</sup> Aime monicti welelu yowane ngagelu yogo balai-bedaictewa, ye ngic weningucne, yogo edalicngebadaicte.** <sup>48</sup> **Aime ngic monic ye mac banale milu himong falime fapacladeng fikeme yogolec kwelina bosingngine wickeme hauwec, ngic yogo ye ingucne. Ye mac sanangne bawecte mac lumongtowa kwesilu mi basowalewec.** <sup>49</sup> **Aime monic ye yowane ngagelu mi balai-bedaictewa, ye ngic monic ye mac banale milu bosingngine himong pelecne iwa falime hauwec, ye ingucne. Aime mac kweme misa sugulelu lumongti kwesilu mac yogo kweme fuwangke walu kwososockewec.”**

## 7

*Yesudi hudu-baba ngic yengele damongte kwelec kwekwe bamadickewec  
Mat 8:5-13*

<sup>1</sup> Aime Yesu ye yowa yogo ngic-ngigac edocebayackeme ngagebong motome, Kapeneam macka hikewec. <sup>2</sup> Iwa hikeme hudu-baba ngic yengele damong monicte kwelec kwekweinedi homanogale ailu fawec. Ye ngic madicne, sugucneine alang bacnocaigac.\*

<sup>3-4</sup> Inguc aime hudu-baba ngic yengele damongti Yesule siduc ngagewec. Ngagelu Yuda ngic-ngigac yengele damongfocngineng gocne Yesula salecebame hikelu yanguc edoibong, “Ga hudu-baba ngic yengele damongte kwelec kwekweine monic bamadickedamecte. Ilec biyac welec. Damong yogo ye ngic madicne, ga nalic welelu ye bafickenong! <sup>5</sup> Ye ngic-ngigac aling nongileng angac ngagecaigac. Ailu yedi molickeyeleme kpakpaduc macnonggeng baibong.”

<sup>6-7</sup> Edobong Yesu ye yengeholec hikelu mac bangkaleme, hudu-baba ngic yengele damongti agofocine gocne salecebame yanguc edoningte hikeibong, “Sugucnene, dameng-gone homacne mi hegilenong. Ailu na oma ngic madicnele macne kwelina fudamecte, na ingucnedi gala nalic mi fudacte. Ilec ga iwa domalu yowa sugu miyengka bole-madecne madickena. <sup>8</sup> I yangucte, na ngic tapilinginengkolec yengele bagewa gagabac. Aime nale bagewa hudu-baba ngicfocne gagabiyeng. Yengelacni monicte ‘hikec’ mibe ye hikedaicte. Nga yengelacni monicte ‘welec’ mibe ye weledaicte. Nga kwelec kwekwe ngic monicte ‘bole yogo banong’ mibe ye yogo badaicte. Na ngagegabac, ga tapiligoneholec gagic.”

<sup>9</sup> Inguc mime Yesu ye yogo ngagelu kwatackewec. Ailu hefaliyelu habu ye balai-beibong, yenge yanguc edocebawec, **“Na yanguc edocngebabe, Israel himongka ngic-ngigac ngage-ngagesingnineng sanangne yangucne monic mi nganiibawa, ngic yago yela nganigabac.”** <sup>10</sup> Aime ngic salecebawec, yenge damongte macka hefaliye hikelu ngani-bong kwelec kwekweine ye hucne miyac aiwec.

*Yesudi ngigac-hosec monicte madec homaicne bagboliyewec*

<sup>11</sup> Aime Yesu ye mac monic, wacine Nain, iwa hikeme mic-tengtengfocine nga ngic-ngigac homacnedi ye balaibeibong. <sup>12</sup> Balaibe hikelu taonte odale nu sugucna domame, madec monic homawec, yele kponggbong tengkelu waibong. Madec yogo ye ngigac-hosec monicte madec moniyang sugu. Aime ngic-ngigac homacnedi ye balaibelu taonkacni waibong. <sup>13</sup> Inguc wabong Sugucne ye ngigac yogo nganilu kweleine sowaleme yanguc miwec, **“Ga mi hianong!”**

**6:46:** Mat 7:21 \* **7:2:** Hudu-baba ngic yengele damong yele bagewa hudu-baba ngic 100 ingucti gaibong. Hudu-baba ngic nga damongngineng yenge himong monickacni.

<sup>14</sup> Inguc milu lelu katapa yogo oiyame madec tengkeibong, yenge hegilelu domabong Yesudi miwec, “**Madec, edocgugabac, ga fangkec!**”<sup>15</sup> Mime madec homaicnedi fangkeli yowa miwec. Aime Yesudi madec yogo hatacmac nenggacine lacnowec.

<sup>16</sup> Lacnome ngic-ngigac yenge yogo nganilu kwatackelu homacne hangocebame, Wapong wacine bafelu yanguc miibong, “Wapongte siduc-mimi ngic sugucne monicti nongilang fikelu gagac.” Aime “Wapongti ngic-ngigacfocine nongileng yugucnubalu gagac.”<sup>17</sup> Aime siduc yogodi Yudeya himongka nga mac-gogoc emeina ngiyeibong, iwa hikeme sasawadi siduc yogo ngageyackeibong.

*Yoanedi mic-tengtengkecine yaeckang Yesula salecepawec*  
*Mat 11:2-19*

<sup>18-19</sup> Aime Yoanele mic-tengtengfocine yenge siduc yogo edobong, Yoanedi mic-tengtengkecine yaeckang wacepame weleiboc. Weleboc yeke Sugucnela hikelu yanguc milu uwacnolicti salecepawec,<sup>†</sup> “Ngic kwesinolenogale miicne, yogo ga, me nonge ngic monicti wangec gadabelengte?”

<sup>20</sup> Inguc milu salecepame yeke Yesula hike sulumelu yanguc milu uwacnoiboc, “Ngic kwesinolenogale miicne, yogo ga, me nonge ngic monicti wangec gadabelengte? Yoane misa-lowacti yogo uwagelelu ngagenogale gala salecnupagac.”

<sup>21</sup> Aime dameng iwahac Yesu ye ngic-ngigac hucnginengkolec nga tapili-wawa, ailu alengkolec aling homacne bamadicebawec. Ailu donge-pisic homacne bamadicebame dongengineng hilaibong. <sup>22</sup> Ilec edocepalu yanguc miwec, “**Ngeke hikelu wiyac ngani-ngagac aigabiyec, yogolec siduc Yoane edodabiyec!** Ngic-ngigac donge-pisic yenge dongengineng hilagaing. Nga hige-sowac yenge yefe hikegaing. Ailu ngic-ngigac waic-sanangkolec yenge socngineng madickeme gagaing. Hedec-fong yenge yowa ngagelu gagaing. Nga homaicne yenge gboliye fangkeli gagaing. Ailu ngic waweweine yenge Siduc Madicne ngagebong yegengkeyeleme gagaing. <sup>23</sup> Aime monicti nale ngagelu kweleine mi wadaicte, ye kwele-angackolec.”

*Yesudi Yoanele fungine mime yegengkeyelewec*

<sup>24</sup> Aime Yoanele mic-tengtengkecine yeke hikeebocka, Yesudi Yoanele fungine milu habu sugucne yanguc edocebawec, “**Ngeenge himong kisiwa misaine mikacka oma wiyac nganinogale hikeibong? Ngic monic komba ingucne gbelongti weme le-welec aiwec, ngeenge yogo nganinogale hikeibong, me? Yogo miyac.** <sup>25</sup> Aime ngeenge oma wiyac nganinogale hikeibong? Ngic monic ngakpi-kpolucine hibiine-holeca, me? Yogo miyac. Ngagegaing, ngic ngakpi-kpolucingineng hibine madicne holecaigaing, nga himongte angacka gagaing, yenge ngictau yengele macka sugu gacaigaing. <sup>26</sup> Ngeenge Wapongte siduc-mimi ngic monic nganinogale hikeibong, me? Ye hocne Wapongte siduc-mimi ngic gocne sasawa ewalicebagac, inguc hocne edocngebagabac. <sup>27</sup> Yele hocne hibiwa yanguc kwelengkeicne fagac, ‘Ngagegic, na mic-yowa mimine salebe yedi molickegelelu yefegone bamadick-egeleidaicte.’

(Mal 3:1)

<sup>28</sup> **Na yanguc edocngebabe, ngic-ngigackacni fike-ofeibong, yengelacni monicti Yoane nalic mi ewalidaicte, miyac. Nga monicti Wapongte ngani-damongte kwelina waweweine gagac, yedibac Yoanele feicne aigac.**”

<sup>29</sup> Aime ngic-ngigac sasawa yenge yogo ngagelu, takes-baba yengeholec momoc, esecne Yoanela hikelu misa lowaibongte ailu yanguc miibong, “Wapong ye yowa noine nga dondonnele fileine,” inguc miibong. <sup>30</sup> Aime Farisaio ailu Wapongte yefe-yowale ngage-ngage ngic, yengibac Wapongti yefe esecne milu edocebawec, yogo lobe holecnolu Yoanela hikelu misa monic mi lowaibong.

<sup>31</sup> Aime Yesudi miwec, “**Ngic-ngigac aling yanguctihac gagaing, yenge aibabangi-neng yanguc.** <sup>32</sup> Adu-madec yengi sobengka ngiyelu, yengungtihac yanguc milu wacnagucaigaing, ‘Nonge kpeng fitobeng ngeenge gee mi weibong. Nga kwele-sowac gee holebeng, ngeenge monic mi hiyaibong.’ <sup>33</sup> I yangucte, Yoane misa-lowacti kwesilu bret nga waing misa monic mi nome ngeenge yogo nganilu yanguc miibong, ‘Ye alengkolec.’ <sup>34</sup> Nga Ngicte Madecti kwesilu nosing nga waing misa nomebac ngeenge ye nganilu yanguc micaigaing, ‘Nganigaing, ye nosing nga waing misa efec mi nocaigac. Ailu ye takes-baba ngic nga bikic-baba ngic yengele agongineng.’

7:15: 1Ngt 17:23; 2Ngt 4:36      7:16: Luk 1:68      † 7:18-19: Dameng iwa Yoane ye muc-macka ngiyelu gawec.  
7:18-19: Mige 40:7; Mal 3:1; Miye 1:8      7:22: Yes 35:5-6; 61:1; Luk 4:18      7:26: Luk 1:76      7:29: Luk 3:12  
7:30: Mat 21:32      7:34: Luk 15:2

**35 Aime Wapongte ngage-ngage-motocine yogo noine aigac. Ilec adu-madecfocine yengele aibabadi Wapong yeicne bayegengkedaicte.”**

*Bikic-baba ngigac monicti Yesule hige suwewec*

<sup>36</sup> Farisaio ngic monic, wacine Saimon, ye Yesuholec nosing nonale macina micnome yele macka feme ngiyeboc. <sup>37</sup> Aime gocne yengi yanguc miibong, “Yesu ye Saimonte macka ngiyegac.” Inguc mibong bikic-baba ngigac monic ye taon iwa gawec, yedi ngagelu kilung monic, wacine alabastros posadi baicne, yogo sanda hoine madicneholec yogo bawelewec. <sup>38</sup> Bawelelu Yesu lobeinahaic, higeina domalu hiyame donge-misainedi walu Yesule higewa holeme, ye hodoc-dowecinele susucinedi suwecnolu higeine muduckewec. Ailu sanda hoine madicne yogodi higeine hosocnowec.

<sup>39</sup> Inguc aime Farisaio ngic Yesu wackewec, yedi nganilu yeicnac yanguc ngagewec, “Ngigac welegac, ye bikickolec. Ilec ailu ngic yago ye Wapongte siduc-mimi ngic noine aigacka, ye bikic-baba ngigacti bauwalu aibaba aigac, yogo nalic ngagedecka.”

<sup>40</sup> Inguc ngageme Yesudi yanguc edowec, “**Saimon, yowa monic edocgunogale ngage-gabac.”**

Inguc mime miwec, “Oc, wewedu, minong.”

<sup>41</sup> Mime yanguc edowec, “**Ngic yaeckang yeke moneng-damong monic yelacni tofa aiiboc, monicti moneng 500 nga monicti moneng 50 inguc baiboc.**” <sup>42</sup> **Aime yeke ameine yogo haducnonicte aibibiyelu gaehocka, ye amengicne hegilewec. Hegileme yekelacni weni yogodi moneng-damongte angac homacnehac felu ngagedaicte?”**

<sup>43</sup> Uwacnome Saimonti ameine bafaliyelu yanguc edowec, “Moneng homacne hegilecnowec, yedi, inguc ngagegabac.”

Mime Yesudi miwec, “**Ngage-wosaec ailu yowa noine migic.”**

<sup>44</sup> Aime ngigacta haic hefaliyelu Saimon yanguc edowec, “**Ga ngigac yago nganic! Na macgona ofebe higenele misa monic mi nelegic. Yedibac donge-misainedi higenesuwelu yeicne hodoc-susucinedi higenes bakelengkegac.**” <sup>45</sup> **Aime na macgona ofebe, wenac-madicte mi muducnugic. Nga yedibac ofegabac, iwacnihac higena muduckegac.** <sup>46</sup> **Ailu hodocne helocti monic mi hosonelegic. Yedibac higenes sanda hoineholocti kwenelegac.** <sup>47</sup> **Ilec edocgube ngagec. Ye angacine homacne edalic-nugacte bikicine homacnehac hegilecnobe miyac aiyackegac. Monic ye bikicine kpisicnemac hegilecnocne, yedibac, angac kpisicnemac facnogac.”**

<sup>48</sup> Inguc milu ngigac yanguc edowec, “**Bikigone yogo biyac hegilegelegac.**” <sup>49</sup> Mime ngic-ngigac gocne yeholec ngiyebong, yenge yengungthac mingagec ailu yanguc miibong, “Yago ma ngic? Ye bikicngineng inguchac hegileyelegac.”

<sup>50</sup> Aime Yesudi ngigac yanguc edowec, “**Ngage-ngagesinggonele ailu bikigone baickebe wasecne aigamec. Kwele-mogungkolec hikec!”**

## 8

*Ngigac homacnedi Yesu balaiibeibong*

<sup>1</sup> Inguc aime Yesu ye taon nga mac-alingka lolicke hikelu, Wapongte ngani-damongte Siduc Madicne mime yegengkeyeleme gawec. Aime mic-tengtengfocine 12, <sup>2-3</sup> ailu ngigac gocne alengkolec nga hucnginengkolec bamadicebawec, yenge yeholec momoc hikeibong. Aime ngigac yenge monengngineng Yesu nga mic-tengtengfocine baficebalu gaibong. Ngigac homacnedi inguc aiibong, yengelacni monic wacine Maria, wacine monic Magadalen, yelacni aleng 7 yebiyewec. Nga monic Yoana, ngaweine Kusa, ye Herodele moneng-damong, ailu monic wacine Susana.

*Wasec wicke-wickele nangeng yowa*

*Mat 13:1-9; Mrk 4:1-9*

<sup>4</sup> Aime ngic-ngigac yenge taon falewecsoc, iwacni Yesula welelu habu sugucne aibong, yedi nangeng yowa yanguc edocebawec, <sup>5</sup> “**Wasec wicke-wicke ngic monicti huc-wasec wickenale holewa hikewec. Hikelu wasec wickeme wasec gocnedi walu yefewa holebong ngic yengi feina edeibong. Ailu nango yengi kwesilu nowackeibong.**” <sup>6</sup> **Nga gocnedi posa tolowa holeibong. Holelu wasec yogo kwac kwodubong himong misaine mikac aiwecte ululuwelu homaibong.** <sup>7</sup> **Nga wasec gocnedi kpinding kwelina holeibong. Holelu kwac kwodubong kpindingti sugulelu hole-homacebawec.** <sup>8</sup> **Nga**

**7:37:** Mat 26:7; Mrk 14:3; Yoa 12:3    **7:41:** Moneng yogo Grik yowawa wacine “denarius”. Ngic yenge hadeng moniyangte bole babong, denarius moneng moniyang yeelu gaibong.    **7:46:** Israel ngic-ngigac yenge yanguc ngageibong, ngigac aibaba ingucne aiwec, yogo aibaba madicne.    **7:50:** Luk 8:48; 18:42    **8:2-3:** Mat 27:55-56;

Mrk 15:40-41; Luk 23:49

**wasec gocnedi himong guwecineholecka holelu kwacine kwodulu noine madicne aibong. Monicte hucine yogo 100 aibong.”**

Inguc milu sugucnehac yanguc wackelu edocebawec, **“Monic ye hedeckolecti yowa yago aneng ngagedaic.”**

*Yesudi nangeng yowale fungine edocebawec*

*Mat 13:10-23; Mrk 4:10-20*

<sup>9</sup> Mime mic-tengtengfocine yenge nangeng yowale fungine yogolec uwacnobong <sup>10</sup> yanguc edocebawec, **“Wapongte ngani-damongte ngage-ngage sangkeicne, yogo ngengi sugu ngageningte biyac ngeleicne.**

**‘Aimebac ngic-ngigac gocne yenge dongenginengti wiyac monic nganilu nalic mi ngani-motogaing.**

**Nga hedeenginengti yowa monic ngagelu, sifu nalic mi ngage-motogaing.’** (*Yes 6:9*)  
**Ilec ailu nangeng yowa edocebacaigabac.**

<sup>11</sup> **“Nangeng yowale fungine yogo yanguc, wasec yogo Wapongte yowa. <sup>12</sup> Aime wasec yefewa holeibong, yogo gocne yenge yowaine ngagedaingte. Ngagebong Aleng Sugucneningti welelu yengi Sugucne ngagesingkelu wasecne mi ainingte yowa yogo kwelenginangkocni baickeyelecaigac. <sup>13</sup> Wasec posa tolowa holeibong, yogo ngic gocnedi Wapongte yowa ngagelu kwelenginang biyac beliyelu sebilelu badaingte. Ailu kwelenginang godocine monic mi baicnele, dameng kpiscinemac ngagesingkebong lokwesac dameng kwesime yenge wawedaingte. <sup>14</sup> Aime wasec kpindingka holeibong, yogo gocnedi Wapongte yowa ngagedaingte. Yenge socte gagale ngageboc, nga moneng-mafale lokwesacka galu himongte ngani-angac ailu gadaingte. Yogodi yowa hole-homacebame noinengineng madicne mi aidaingte. <sup>15</sup> Aime wasec himong guwecineholecka holeibong, yogodibac ngic gocne yenge Wapongte yowa ngagelu kwelenginang lolu yefe dondonne nga madicne balu gadaingte. Inguc bagacgu tatakic mikac noine bafuwadaingte.**

*Hifa kwendangkelu mi someckenoga*

*Mrk 4:21-25*

<sup>16</sup> **“Aime monicti hifa kwendangkelu hebeci hemackelu mi heluluckedaicte, me mac ngiye-ngiyeinele bagewa lome mi ngiyedaicte. Yogo miyac, ye ngiye-ngiyeina lome ngiyeme ngic-ngigac macka ofedaingte, yenge hifa angocine yogo nganiy-ackedaingte. <sup>17</sup> Aime wiyac sasawa sangke-sangke fagac, yogo yegengkeadaingte. Nga wiyac ebecineholec fagac, yogo gacgu ngageyackedaingte. Yogo sangkeicne mi fagidaicte. <sup>18</sup> Aime monic ye ngage-ngage gocne facnogac, ye ngage-ngage hatacmac lacnodaicte. Nga monic ye ngage-ngage mi facnogac, yelacni ngage-ngage facnogac ingucne ngagesigac, yogo ewalidaicte. Ilec ailu nenge yowa ngagegabiyeng, yogo ngagelu ngage-motolu gadahiyyeng.”**

*Yesule nenggac gbafocine*

*Mat 12:46-50; Mrk 3:31-35*

<sup>19</sup> Aime Yesule nenggac gbafocine yenge yela hikebong, ngic-ngigac homacnedi hedickeibongte ailu nalic mi nganiibong. <sup>20</sup> Inguc aibong gocne yengi Yesula yanguc mibong fewec, **“Nenggac gbafocone yenge kwesilu nganicguningte lobina domagaing.”**

<sup>21</sup> Mibong Yesudi yanguc miwec, **“Wapongte yowa ngagelu balaibecaigaing, yengi nenggac gbafocne aigaing.”**

*Dibong gbelong yeki Yesule yowa ngageiboc*

*Mat 8:23-27; Mrk 4:35-41*

<sup>22</sup> Dameng monicka Yesu ye mic-tengtengfocine yengeholec gombawa felu yanguc edocebawec, **“Nongileng lifuc nebocina hikenang.”** Inguc mime iwa hikeebongka, <sup>23</sup> Yesu ye gung fame gbelong sugucne welelu misa lifucka wewec. Aime dibongti gomba kwelina haulu bamungkenogale aime yenge haunogale aibong. <sup>24</sup> Aime mic-tengtengfocine yenge Yesula lelu yeuckelu yanguc miibong, **“Sugucne, Sugucne, nongileng misawa haulu homanogale aigabeleng!”**

Mibong Yesudi fangkelu gbelong nga dibong ngelengkelu kpatalayetelu edocepame, gbelong miyac aime lifuc ye kalong kwelu fawec. <sup>25</sup> Fame mic-tengtengfocine yengele miwec, **“Nenge ngage-ngagesinggineng mikac mecne.”**

Aime mic-tengteng yenge hangocbame kwatackebong. Ailu yengungtihac ngani-welec ailu miibong, **“Ye oma ngic, aime ye gbelong nga dibong yowa edocepame yele yowa ngagegabiyec.”**

*Yesudi ngic monictacni aleng yebicebawec*

*Mat 8:28-34; Mrk 5:1-20*

<sup>26</sup> Aime Yesu nga mic-tengtengfocine yenge lifuc falockelu Gerasa ngic-ngigac yengele himongka hikeibong.\* Himong yogo Galili lifuc nebocina. <sup>27</sup> Hike sulumbong, Yesu ye gombawacni walu taon yogowacni ngic monic alengfocineholec bafuwawec. Ngic yogo ye dameng dalicne biyachac senggang galu macka aneng mi ngiyelu dongesiwa ngiye-fac ailu gawec. <sup>28-29</sup> Game dameng dalicne aicnome ngic yengi balu senti hige-moleine hefelu damongkebong ngiyelu, ye sen welockeme aleng wonongkolecti mengockelu himong kisiwa misaine mikacka hikelu gawec. Aime Yesudi ngic yelacni aleng yebiyeme ofelu hikenale sanangne edowec. Inguc edome ngic yedi Yesu nganilu dacineholec aukwelu Yesule emewa wafalu yanguc wackewec, “Yesu, Wapong Feicnetowale Madec, ga nala wenuc ainogale ngagegic? Na yowa milu wasicgugabac, ga doicka mi locnudamec!”

<sup>30</sup> Aime Yesudi yanguc uwacnowec, **“Ga wacgone ma?”**

Uwacnome miwec, “Na wacne Habutowa.” Aleng homacnedi yele kwelewa haulu gaibongte ailu yedi wacine inguc miwec. <sup>31</sup> Aime yenge Yesu dogbac ailu yanguc micnoibong, “Ga long sugucnebenang iwa salecnubang mi haunang!”

<sup>32</sup> Mime himong iwa bec-habu sugucnedi fegengka sulukwelu gaibong. Gaebongka aleng yenge yebicebame becka hauningte Yesu dogbac aicnobong, yedi inguc ainingte ngageyewec. <sup>33</sup> Ailu yenge yebicebame baickelu bec-habu yengela haubong bec yenge fegengkacni gasackelu lifucka haulu misa nolu homayackeibong.

<sup>34</sup> Homabong bec-damong yenge aibaba fikewec, yogo nganilu hangoc hikelu taonka nga mac-gogocka hikelu pasi fikewec, yogolec siduc milu edocebaibong. <sup>35</sup> Edocebabong ngic-ngigac yenge yogo ngagelu aibaba fikewec, yogo nganingte Yesula kwesiibong. Kwesilu ngic alengkolec gawec, ye nganibong, yedi ngage-motolu ngakpi-kpoluc holelu Yesule higewa ngiyewec. Inguc ngiyeme yenge nganilu hangocebawec. <sup>36</sup> Ailu ngic dongenginengti pasi fikeme nganiibong, yengi ngic alengfocineholec gawecti wenucka madickewec, siduc yogo ngic-ngigac edocebaibong. <sup>37</sup> Edocebabong Gerasa ngic-ngigac yengele himong filefocine sasawadi homacnebenang hangocebawec. Ilec ailu Yesu ye himong yogo hegilenale edoibong. Edobong Yesudi hefaliyelu hikenale gombawa feme <sup>38</sup> ngic aleng yebiyecnowec, yedi Yesuholec hikenale dogbac aicnolu edowec. Edome Yesudi salelu yanguc edowec, <sup>39</sup> **“Ga macgona hefaliye hikelu Wapongti pasi sugucne aigelegac, yogo miyengka yegengkena.”** Inguc mime ngic ye hikelu Yesudi yela pasi sasawa bawec, yogo taonka ngic-ngigac sasawa milu edocebayackewec.

*Yesudi ngigac yaeckang bamadicepawec*

*Mat 9:18-26; Mrk 5:21-43*

<sup>40</sup> Yesu ye lifuc nebocinacni kwesiyemewa, ngic-ngigac yenge yele wangec gaibongte ailu ye hefoleibong. <sup>41-42</sup> Aime kpakpaduc macte damong monic, wacine Yairus, ye welewec. Ye aduine moniyang sugu, hifaine 12 aiyemewa homanogale aiwecte ailu ngic ye welelu Yesule higewa wafalu macina hikenogale dogbac aicnowec. Aicnome yenge hikeebongka, ngic-ngigac habu sugucnedi hewalingkelu feine feine hikeibong.

<sup>43</sup> Aime ngigac monic ye sac-dale aicnome gaemewa hifa 12 biyachac aiwec. Inguc aimebac monicti ye bamadickenale yefe mi bafuwawec. <sup>44</sup> Ye habu yengele hewacka Yesule lobewa yefe lelu ngakpi daleinele muc susucine oi yawec. Oiyame iwahac sacine kelengkeme <sup>45</sup> Yesudi yanguc uwawec, **“Madi oiycnugac?”**

Mime yenge “mi ngagegabeleng” mibong Pitadi yanguc edowec, “Sugucne, ngic-ngigac homacnedi wabunggulu hedicgugaing!”

<sup>46</sup> Mime Yesudi yanguc miwec, **“Monicti oiycnume tapili monicta leme ngagegabac.”**

<sup>47</sup> Inguc mime ngigac ye biyac ngagewec, “Na bafuwacnugac hocne.” Inguc ngagelu sangke-sangke hikenogale aibibiyelu dengdengkeme welelu Yesule higewa wangiye wec. Ailu Yesu oi yawec, nga wenucka biyachenang madickewec, yogo ngic-ngigac yengele haicka mime yegengkewec. <sup>48</sup> Miyackeme Yesudi yele yanguc miwec, **“Ngigac, ngage-ngagesinggonedi bamadigugac. Ga kwele-mogungkolec hikenong!”**

<sup>49</sup> Aime Yesu ye yowa milu domaemewa kpakpaduc macte damong, yele mackacni ngic monicti yowa yanguc bawelewec, “Adugone biyac homagac, ga wewedu hatacmac umac mi lacnoci!”

<sup>50</sup> Mibong Yesudi yogo ngagelu Yairus edolu yanguc miwec, **“Ga kwele-umac mi ngagenong! Ga ngage-ngagesingka sugu domaengka ye gagaine hatacmac kwesidaicte.”**

\* 8:26: Gerasa yenge Israel ngic-ngigac miyac. 8:48: Luk 7:50

<sup>51</sup> Inguc milu macka lekwesilu monicti macka mi feningte kpatalayewec. Kpatalayelelu Pita nga Yoane ailu Yakobos nga adu nenggac-mamackecine, yengi sugu feningte miwec. <sup>52</sup> Aime ngic-ngigac nebocine yenge adule hisonggong aibong Yesudi yanguc edocebawec, **“Ngenge hii hegilening. Adu ye mi homagac, ye gung fagac.”**

<sup>53</sup> Inguc mime yenge adu ye biyac homawec, inguc ngeaibongte ailu gouwecnoibong. <sup>54</sup> Aime Yesudibac adule molewa balu wackelu miwec, **“Adu, ga fangkec!”** <sup>55</sup> Inguc mime asuine hatacmac hefaliye weleme iwahac gboliyelu fangkelu ngiyeme, Yesudi nosing lacnoningte edocebawec. <sup>56</sup> Edocebame nenggac-mamackecine yeke kwatackelu ngani-angac aiiboc. Aime Yesudi ngic monic mi edonicti mimacepawec.

## 9

*Yesudi mic-tengtengfocine 12 bole baningte salecebawec  
Mat 10:5-15; Mrk 6:7-13*

<sup>1</sup> Aime Yesu ye mic-tengtengfocine 12 wacebame weleyackebong. Welebong ngic-ngigac yengelacni aleng sasawa yebicebaningte, nga huc haicine monic monicti bacebaicne yogo bamadicebaningte bole-yowa nga tapili sasawa yelewec. <sup>2</sup> Yelelu Wapongte ngani-damongte yowa edocebaningte, nga huckolec bamadicebaningte <sup>3</sup> yanguc edocebalu salecebawec, **“Ngenge yefele wiyac monic mi balu hikedaing. I yangucte, hiye nga nosing ailu yasu me moneng monic mi badaing. Me ngakpi yaeckang mi balu hikedaing. <sup>4</sup> Nga mac monicka hike sulumbong, yenge mac holengelebong ngenge mac yogowahac sugu ngiye-fangkec aidaing. Aibong motome taon monicka hikedaing. <sup>5</sup> Nga taon monicte ngic-ngigac yenge mi hefolecngebabong, ngenge taon yogo hegilelu higenginangkocni lube webong wadaic. Aime ngic yenge yogo nganilu Wapongti aminengineng baduyeleadaicte, yogo ngage-motodaingte.”** <sup>6</sup> Mime yenge mac-aling falegac, iwa lolicke hikelu Siduc Madicne mibong yegengkeme galu hucdoickolec bamadicebalu gaibong.

*Herodedi Yesule fungine ngagenale aiwec  
Mat 14:1-2; Mrk 6:14-16*

<sup>7</sup> Inguc aime ngictau Herode yedi wiyac sasawa fikewec, yogolec Yesule siduc ngageme gocne yenge yanguc miibong, “Yoane misa-lowacti homackacni gboliye fangkelu gagac.” Inguc miibongte ailu ngagelu medeckewec. <sup>8</sup> Mibong gocnedi yanguc miibong, “Elaiyadi fikelu gagac.” Nga gocne yengi miibong, “Wapongte siduc-mimi ngic esecne gaibong, yengelacni monicti welegac.” <sup>9</sup> Aime Herodedi yanguc miwec, “Nani mibe Yoane ubeine welockebong. Nga yagobac ma ngicte siduc ngagegabac.” Milu Yesu nganinale milu gawec.

*Yesudi ngic 5 taosen nosing gumecebawec  
Mat 14:13-21; Mrk 6:30-44; Yoa 6:1-13*

<sup>10</sup> Aime salecebaicne yenge hefaliye hikelu bole baibong, yogolec siduc Yesu edoyackebong. Edobong motome, yedi mic-tengtengfocine 12 yenge sugu bacebalu mengocebame yengilangkac ngiyenogale taon monic, wacine Besaida, iwahaic hikeibong. <sup>11</sup> Hikebong habutowa yenge yogo ngagelu ye balaiibeibong. Balaiibeibong, yedi mac hohyelelu Wapongte ngani-damongte mime yegengkeme huckolec yenge bamadicebawec.

<sup>12</sup> Mac aweleme mic-tengtengfocine 12 yengi Yesula lelu yanguc miibong, “Himong yago ngicine mikacka gaebengka mac awelegac. Ilec ailu habu salecebong mac-gogoc nga mac-aling falegac, iwa hikelu nosing bafuwa nolu iwa fadaing.”

<sup>13</sup> Mibong yanguc miwec, **“Ngenge nosing yelebong noning!”**

Mime yanguc miibong, “Nonge bret 5 nga misa-sic yaeckang sugu balu gagabeleng. Nga yenge habu sugucnehac, ilec nonge nosing fuli nalic mi badabelengte.” <sup>14</sup> Ngic yogo yengele dzalengineng 5 taosen ngama ingucti gaibong. Ilec ailu inguc miibong.

Mibong Yesudi mic-tengtengfocine edocebalu yanguc miwec, **“Ngenge ngic-ngigac edocebabong, yenge habu 50 habu 50 inguc kpaduckelu ngiyening.”** <sup>15</sup> Mime mic-tengteng yenge ngic-ngigac inguc ainingte edocebabong sasawadi wangiyebong. <sup>16</sup> Wangiyebong Yesudi bret 5 nga misa-sic yaeckang, yogo balu dongeine hilame honocmengka feme Wapong kwele-madic micnolu bauckewec. Bauckelu ngic-ngigac botoc balu yeleningte, mic-tengtengfocine yelewec. <sup>17</sup> Yeleme yengi botoc balu ngic-ngigac yelebong sasawadi nogebec aibong. Aibong nosing tofaine notiwa aibong ngiyewec, yogo kpaduckebong haulu damba 12 wakewec.



*Pitadi Yesule fungine mime yegengkeyelewec*

*Mat 16:13-19; Mrk 8:27-29*

<sup>18</sup> Yesu ye dameng monicka yeicnakac Wapong milockelu gaemewa mic-tengtengfocine yeholec gaibong. Gabong yenge uwayelewec, “**Ngic-ngigac yenge nale ma micaigaing?**”

<sup>19</sup> Mime miibong, “Gocne yengi Yoane misa-lowac micaigaing. Nga gocne yengi Wapongte siduc-mimi ngic wacine Elaiya micaigaing. Aime gocne yengibac Wapongte siduc-mimi ngic monic esecne, yedi gboliyelu gagac micaigaing.”

<sup>20</sup> Inguc mibong miwec, “**Aime ngenge ngengung nale ma micaigaing?**”

Uwayeleme Pitadi miwec, “Ga Mesia Wapongtacni.” <sup>21</sup> Mime, yenge yowa yogo ngic monic mi edocebaningte mimacebawec.

*Yesu homalu homackacni hatacmac gboliyelu fangkenale edocebawec*

*Mat 16:20-28; Mrk 8:30-9:1*

<sup>22</sup> I yangucte miwec, “**Ngicte Madec ye doic homacne ngagedaichte. Aime Yuda ngic-ngigac yengele damongfocngineng nga depec-baba ngic micne, ailu Wapongte yefeyowale wewedu ngic, yenge ye kweledi wickelu webong homadaichte. Aime homame hadeng habackang aiyemewa hatacmac gboliyelu fangkedaichte.**”

*Yesudi yeicne balaibenogale yowa miwec*

<sup>23</sup> Ailu yenge sasawa yanguc edocebawec, “**Monic ye na balaibecnunogale ngagegacka, ye yeicne soc-kweleinele angac bawalu hadengsoc umacte malicpongine bafangke tengkelu balaibecnudaic.** <sup>24</sup> Monic ye yeicne gagaine sebilenale ngagelu boleine badaichte, ye gagaine yogo sangkecnodaichte. Nga monic ye nale ailu gagaine hegiledaichte, yebac gagaine fikcnodaichte. <sup>25</sup> Ilec monicti himongtowa yagolec wiyac sasawa bafuwanale ailu gagaine wickeme sangkedaichte, wiyac yogo yengi ngic yogo nalic bafickedaingte, me? Yogo miyac! <sup>26</sup> Aime monicti nale ngageme gameineholec aidaichte, ailu nale yowale ngageme gameineholec aidaictewa, yela yanguc fikedaichte. Ngicte Madec ye yeicne tapili nga hibi-angocineholec, ailu Mamac nga yeicne angelo yengele tapili nga hibi-angocnginengkolec kwesidaingte. Dameng iwa yedi ngic yogolec inguchac ngageme gameineholec aidaichte. <sup>27</sup> Nga ngic-ngigac yago domagaing, ngengelacni gocne yenge mi homaebongkahac Wapongte ngani-damong weleme nganidaingte, yogo noinebanang edocngebabac.”

*Yesule soc hefaliyelu haic monic aiwec*

*Mat 17:1-13; Mrk 9:2-13*

<sup>28</sup> Aime yowa miwec, yogolec Sonda moniyang ingucne motoemewa, Yesudi Pita nga Yakobos ailu Yoane mengocebame milockeningte tikiwa feibong. <sup>29</sup> Felu milockeemewa haic-mesuinedi hefaliyelu silicine monic aime ngakpiine angolelu pilatac ingucnebanang aiwec. <sup>30</sup> Hei, inguc aiyemewa iwahac ngic yaeckang, Moses nga Elaiya, yeke fikelu yeholec mingagec aiiboc. <sup>31</sup> Yeke tapili nga hibi-angockolecti fikelu, Yesudi Yerusalem hikelu gagaine bamoctolu hegilecebalu fedaichte, yogolec mingagec aiibong. <sup>32</sup> Aime Pita nga agokecine, yenge gung-kwomoc faibong. Faibongkacni gboliye fangkelu Yesu tapili nga hibi-angocineholec ailu ngic yaeckang yeholec domaboc nganicebaibong. <sup>33</sup> Aime ngic yaeckang yeke Yesu hegilelu hikeebocka Pitadi Yesu yanguc edowec, “Sugucnene, nongileng yagowa gabeng madickegacte fale habackang banang. Gale monic, Mosesle monic, nga Elaiyale monic.” Ye wiyac monic mi ngagelu moc miwec.

<sup>34</sup> Yowa milu domaemewa kaguwa monicti fikelu walu somecebame hangocebame kaguwa kwelina domaibong. <sup>35</sup> Domaebongka kaguwa kwelinacni yowa-malac monic yanguc wackelu miwec, “Yogo nale Madec bawosaeicne. Ngenge yele yowa ngagedaing!” <sup>36</sup> Mime malac miyac aime yenge donge hilalu Yesu yeicnakac domame nganiibong. Nganilu mic-tengteng yenge yowa mikac ailu domaibong. Aime dameng iwa wiyac nganiibong, yogolec ngic monic mi edoibong.

*Yesudi madec monic alengkolec bamadickewec*

*Mat 17:14-21; Mrk 9:14-29*

<sup>37</sup> Mac saeme Yesudi mic-tengtengfocine habackang yengeholec tikiwacni hauebongka habu sugucnedi bafuwacebaibong. <sup>38</sup> Aime habu yengele hewackacni ngic monicti Yesu wackelu miwec, “Wewedu, ga welelu madecne nganic, na madecne moniyang sugu. <sup>39</sup> Aleng monicti madecne bame ye aukweme alengti balu wepackelu socine

bakutungkulu bame micinacni sofololoc ofeцаigac. Ailu aleng yogodi madec basowale-benangkelu dameng moniyang moniyang sugu hegileцаigac. <sup>40</sup> Aime mic-tengtengfocgone yengi aleng yebiyeningte edocebabe, yenge ngagebong kpungkeme hegilegabayeng.”

<sup>41</sup> Inguc mime Yesudi bafaliyelu yanguc edowec, **“Dameng yagolec ngic-ngigac aling yago, nenge ngage-ngagesingnineng mikacbenang, ailu nenge aibabangineng kosa-balasaine. Na dameng dalicne ngage-ngagesing mikac ngic-ngigac nenge-heolec hatacmac ganogale takicnugac. Ga madecgone bawelec!”**

<sup>42</sup> Mime madec yogo emeina balu leemewa, aleng wonongkolecti madec wepackeme himongka wawelu socine teng-teng kweme, Yesudi aleng kpatalacnolu madec bamadickelu mamacine hatacmac lacnowec.

*Yesu weningte fungine yeuctihac miwec*

*Mat 17:22-23; Mrk 9:30-32*

<sup>43</sup> Lacnome ngic-ngigac yenge Wapong tapilitowaine ingucne nganilu ngani-welec ailu ngagebong wiyac feicne aiwec. Ailu yenge Yesule bole sasawa nganilu ngani-welec aibong. Inguc aiyebongka ye mic-tengtengfocine yanguc edocebawec, <sup>44</sup> **“Nenge hedec lolu yowa yago aneng ngagening! Monicti Ngicte Madec balu ngic yengele molewa lodaiacte, yogolec dameng bangkalegac.”** <sup>45</sup> Mime mic-tengtengfocine yenge yowa yogo mi ngage-motoningte kwele nga ngage-ngagening fongkewec. Fongkeme yenge Yesule yowa mi ngage-motolu yowa yogolec funginele hatacmac uwacningte hangocebawec.

*Feicne gagale yowa*

<sup>46</sup> Aime mic-tengteng yengelacni madi feicne aidaiacte, yogolec yengungtihac yowangineng fec-wac aiwec. <sup>47</sup> Inguc aibong Yesudi kwele ngage-ngagening fawec, yogo biyac nganiwec. Inguc nganilu madec hakic monic balu yeicneholec lome domame <sup>48</sup> yanguc edocebawec, **“Monic ye madec yangucne nale wacka hefolegac, ye na inguchac hefolecngac. Nga na hefolecngac, ye Wapong na salecnuwec, ye inguchac hefolegac. Ilec ailu nengele hewackacni monic ye bawacnagulu gadaicte, yedibac feicne aigac.”**

<sup>49</sup> Inguc mime Yoanedi yanguc miwec, “Sugucne, ngic monic ye gale wacka aleng yebicebame nganibeleng. Ailu ye nongilengkolec mi gagacte kpatalacnobeleng.”

<sup>50</sup> Mime yedi yanguc miwec, **“Monic ye nongileng ngaba mi aigac, yedi agononggeng aigac. Ilec ailu mi kpatalacnodaing.”**

*Yesu ye Yerusalem fenogale hikewec*

<sup>51</sup> Yesu ye honocmenga fenogale damengngine bangkale weleme, ye ngage-ngageine Yerusalem iwa lolu hikewec. <sup>52</sup> Hikeme ye ngic gocne salecebame yenge molickelu noba-nosing nga mac fale bamockeningte Samaria yengele mac-aling monicka hikelu sulumeibong.\* <sup>53</sup> Hike sulumelu Yesu ye Yerusalem hikedaiacte, inguc ngageibongte Yesu hekecnoibong. <sup>54</sup> Inguc aibong mic-tengtengkecine, Yakobos nga Yoane, yeke yogo nganilu yanguc miiboc, “Sugucne, nalic mibeng honocmengkacni dac walu ngic yago lobecebayaackena, yogo nalic aidabelengte, me?”

<sup>55</sup> Miboc Yesudi hefaliyelu ngelengkeyetelu yanguc edocepawec, [**“Ngeke kwelenginac fikegac, yogolec fungine mi ngage-motogaic. Ngicte Madec ye ngic mi basowale-becanogale kwesiwec. Ye bacebame wasacne ainingte kwesiwec.”**]<sup>†</sup> Inguc ailu mic-tengtengfocine yengeheolec mac-aling monicka hikeibong.

*Yesu balaibe-balaibele yefe*

*Mat 8:19-22*

<sup>57</sup> Yefewa hikelu ngic monicti edolu yanguc miwec, “Ga iwa me iwa hikedametesoc na balaibecgulu gaholec hikenogale ngagegabac.”

<sup>58</sup> Mime Yesudi bafaliyelu yanguc edowec, **“Kate-hoda yenge himong kwelina mac fafanginengkolec. Nga sawawa nango yenge selengninengkolec. Nga Ngicte Madec yebac mac fafaine mikac, inguc gacaigac.”**

<sup>59</sup> Milu ngic monic yanguc edowec, **“Ga welelu na balaibecnuc!”**

Mime ngic yedi miwec, “Sugucne, ngageneleangka hikelu mamacne homame longkelubac ga balaibecgudacte.”

9:44: Luk 9:22 9:45: Luk 18:34 9:46: Luk 22:24 9:47: Mat 10:40 9:50: Mat 12:30; Luk 11:23 \* 9:52:

Samaria ngic-ngigac yenge Gerasim kupicka Wapong mitengkelu gaibong. Nga Israel ngic-ngigac yenge Yerusalem iwa Wapong mitengkelu gaibong. Ilec ailu Samaria ngic-ngigac yenge Israel ngic-ngigac yengeheolec ngiye-domac mi ailu gaibong. 9:54: 2Ngt 1:9-16 † 9:56: Hibi esecne Lukadi kwelengkewec, yogo nganilu iwacni kwelengkebong kwelengkebong ofowec, yengelacni gocne hewacine 55-56 iwa nebocine mi fagac. Ngic-ngigac yenge hibi kwelengkeicne yogo wosaclu nganibong Lukadi mi kwelengkewec mecne.

<sup>60</sup> Inguc mime bafaliyelu yanguc edowec, “**Ga homaicne hegilecebaengka yenge yengutihac longnaguning. Nga gabac hikelu Wapongte ngani-damongte yowa miyengka yegengkena.**”

<sup>61</sup> Mime monicti yanguc miwec, “Sugucne, balaiyecgunogale ngagegabac. Aimebac na hikelu alingfocne edocebalubac weledacte, yogo nalic, me?”

<sup>62</sup> Mime Yesudi yanguc edowec, “**Monic ye ngage-ngageine biyac salelubac hefaliyeganic aidaicte, ngic ingucnedi Wapongte ngani-damongtesoc mi aigac.**”

## 10

*Yesudi ngic 72 salecebawec*

<sup>1</sup> Yogo motome Sugucne ye ngic 72\* bawosaecebalu yaeckang yaeckang heucebame, yengileng taon nga mac-kpiscina hikenogale ngagesiwec. Taon iwa yenge molic-molic salecebalu yanguc edocebame hikeibong, <sup>2</sup> “**Ngic-ngigac yenge nosing noine ingucne homacnedi houwelu fagaing. Aime bole-ngicti sugu efecnemac gagaing. Ilec ailu ngenge Sugucne nosing fileine milockelu yanguc edodabiyeng, ‘Ga bole-ngic salecebang yengi hikelu nosing noine bakpaduc aidabiyeng.’** <sup>3</sup> Ngagegabieng, ngenge lama macedinedi kate-hoda yengele hewacka gacaigaing, na silicine yogolecsoc salecngabagabac. Ngenge yakumac iwa hikedaing! <sup>4</sup> Ngenge moneng-ebec me hiye nga hige-ebec mi balu hikedaing. Ailu yefewa ngic monic bafuwalu wenac-madic yowa mi midaing.

<sup>5</sup> “**Nga mac iwa me iwa fenogale ngenge felu ‘Kwele-mogung ngengela fadaic!’ Inguc milu fedaing.** <sup>6</sup> Inguc mibong kwele-mogung ngic monic iwa ngiyedaictewa, ngengele kwele-mogungti yela fadaicte. Nga mi ngiyedaictewa, kwele-mogung yogo hatacmac ngengilang hefaliyegaledaicte. <sup>7</sup> Bole-ngic yenge holengenengte bole-fulingineng bafuwadaingte, yogodi madickedaicte. Ilec mac ngeledaicte, iwahac ngiyehongka nosing nga misa ngeledaicte, yogo nodaing. Mac-boneng monic mi hikedaing.

<sup>8</sup> “**Ailu taon monicka hikebong mac holengelelu, ngenge wiyac monic noningte ngelebong, yogo nodaing.** <sup>9</sup> Nga taon iwa hucnginengkolec yenge bamadicebalu ngic-ngigac yanguc edocebadaing, ‘Wapongte ngani-damongti ngengela biyac bangkalegac.’ <sup>10</sup> Aime taon monicka febong yenge mi hefolecngabong, ngenge mac yefengalang lelu yanguc edocebadaing, <sup>11</sup> ‘Ngengele macnginengte lubedi higenonggeng bakatackeme, nonge yogo inguchac webeng wagac. Inguc aime yogodi sowacnengineng edalicngabadaicte. Ailu ngenge sifu yanguc ngagedaing! Wapongte ngani-damongti yawa biyac bangkalegac.’ <sup>12</sup> Aime yanguc edocngababe, wowosae damengka taon yogolec ngic-ngigac yengele umacti Sodom ngic-ngigac yengele umac ewalidaicte.†

*Kwele mi hefaliyegaing, yengele yowa*

*Mat 11:20-24*

<sup>13</sup> “**Korasin nga Besaida ngic-ngigac, mee, ngenge medecngabadaic. Ngengela pasi damuineholec homacne biyac fikewec. Pasi ingucne Tair nga Saidon taonka fikedec midec,‡ ngic-ngigac yenge bikicnginengte ailu kwele-sowacte ngakpi wambac biyac holedabong. Ailu defe lowa ngiyelu kwele-hefaliyec aidabong.** <sup>14</sup> Aime wowosae damengka ngengele umacti Tair nga Saidon ngic-ngigac yengele umac ewalidaicte. <sup>15</sup> Ailu Kapeneam ngic-ngigac, ngenge honocmengka fedaingte, inguc ngagecaigabiyeng, yogo miyachbenang. Ngenge Wangec-macka balu waingebame haudaingte.

<sup>16</sup> “**Na salecngababe, monicti hedecine ngengela logac, ye hedecine nala logac. Nga ngenge lobe holengelegac, ye na lobe holenelegac. Ailu Wapong na salecnuwec, ye inguchac lobe holcngac.”**

*Ngic 72 salecebawec yenge hefaliye kwesiibong*

<sup>17</sup> Aime ngic 72 yenge belic-belicka hefaliyelu miibong, “Sugucne, nonge wacgone wackebeng aleng yenge inguchac yowanonggeng ngagelu hikegabieng.”

9:61: 1Ngt 19:20 \* 10:1: Hibi esecne Lukadii kwelengkewec, yogo nganilu iwacni kwelengkebong kwelengkebong ofewec, yengelacni gocne 70 inguc fagac, nga gocne 72 inguc fagac. 10:17 iwa dzale yaeckang ingucnedi fagaic. 10:1: Mrk 6:7 10:3: Mat 10:16 10:4: Mat 10:7-14; Mrk 6:8-11; Luk 9:3-5 10:7: 1Kor 9:6-14; 1Tim 5:18 10:8: 1Kor 10:27 10:11: Sale 13:51; 18:6 † 10:12: Sodom taon siducine Fike-fike 19 iwa fagac. Monicti Wapongte yowa mi edocebawec. Ilec lobewa amesine efecnemac badaingte. 10:12: Fike 19:24-25; Mat 10:15; 11:24 ‡ 10:13: Tair nga Saidon taon yeke Israel alingcakni miyac. Basowalecepaicne siducinginec Yesaiya 23 iwa fagac. Yenge aibaba sowacne bocyac ailu gaibong. 10:16: Mat 10:40; Luk 9:48; Yoa 5:23

<sup>18</sup> Mibong Yesudi bafaliyelu yanguc edocebawec, “**Satangti pilatac ingucne honoc-mengkacni walu holeme nganiiba.** <sup>19</sup> **Aime ngenge hema nga wame-wame feng-inang edesocebadaingte. Ailu ngabangineng nga yele alingfocine sasawa yenge ngengele bagewa gadaingte. Bole-yowa tapiliineholec yogo biyac ngeleiba, yogo balu gagaing, inguc ngagedaing. Aime wiyac monicti nalic mi basowalecnged-badaicte.** <sup>20</sup> **Nga alengti yowangineng ngagel hikegabiyeing, yogolec bocyac mi beliyedaing. Wac-alingngineng honocmengka kwelengkeicne fagac, yogolecbac homacnebenang beliyedaing.”**

*Yesudi Wapong mitengkewec  
Mat 11:25-27; 13:16-17*

<sup>21</sup> Aime dameng iwahac Tili Asudi Yesu aicnome belic-belicta angacti bawakeme yowa yanguc miwec, “**Mamac, ga honocmeng nga himong fileine. Ngic-ngigac aling ngage-ngage-motocnginengkolec gacaigaing, gagi yenge wiyacgone sasawa yago mi nganingte balu sangkeing. Ailu adu-madec-gogoc kpisicne ingucne, yenge sugu wiyac yogo baangka yegengkeyelewec. Ilec mitenggugabac. Oc, Mamac, ga yogo ngagelu kwelegone madickegac.**

<sup>22</sup> “**Mamacnedi wiyac sasawa neleme na yogo damongkelu gagabac. Aime monicti Madecte fungine nalic mi ngagegac, Mamacti sugu ngagegac. Ingucnehac monicti Mamacte fungine nalic mi ngagegac, Madecti sugu ye ngagegac. Ailu Madecti ngic-ngigac bawosaecebalu edalicebagac, yengi sugu Mamac ngagegaing.”**

<sup>23</sup> Aime Yesu ye mic-tengtengfocine yengela hefaliyelu yengele sugu yanguc milu edocebawec, “**Ngenge aibaba fike-ofegac dongenginengti nganigaing, ngenge kwele-angackolec.** <sup>24</sup> **Wapongte siduc-mimi ngic nga ngictau homacnedi esecne gai-bong, ngengi yenge wiyac nganicaigaing, yogo nganinogale angac ngagelu sifu mi nganiibong. Ailu ngenge yowa hedecnginengti ngagecaigaing, yenge yogo hedecti ngageningte aiyelewec, yogo inguchac mi ngageibong. Yogo edocngebabac.”**

*Samaria ngicti ngic monic bafickewec*

<sup>25</sup> Hei, Wapongte yefe-yowale ngage-ngage ngic monicti welelu Yesu lokwesacka lonale ngagelu yanguc uwacnowec, “**Wewedu, na wenuc aibe Wapongti baficnume gaga-sanang badacte?”**

<sup>26</sup> Inguc mime Yesudi bafaliyelu yanguc edowec, “**Yefe-yowale hibiwa kwelengkeicne fagac, ga hibi yogowa wenuc wafe-ngagec aicaigic?”**

<sup>27</sup> Mime ngic yedi bafaliyelu yanguc edowec,  
“**Ga kwelegone, ilucgone nga tapiligone ailu ngage-ngagegone sasawa bucbuchac Sug-ucne Wapong ago aicnolu angac ngagecnolu gadamec!**” *(Yef 6:5)*

Ailu,

‘**Gageicne aigelecaigac, silicine ingucnehac ngic-ngigac gale emewa gagaing, yengele kwelegonedi ago aiyelelu angac ngageyelelu gadamec!**’ *(Dep 19:18)*

<sup>28</sup> Mime Yesudi yanguc edowec, “**Yowa dondonne milu bafaliyenelegic. Ga inguc ailu, gaga badamecte.”**

<sup>29</sup> Aime Yesule haicka ngic yeuctihac dondonne ainale uwacnolu miwec, “**Aime monic nale emewa gagac, yogo mabenang?”**

<sup>30</sup> Uwacnome Yesudi bafaliyelu yanguc edowec, “**Ngic monicti Yerusalemkocni Yeriko taonka haunale hauwec. Haume hise ngic yengi balu ngakpi-kpolucine hemoctoibong. Hemoctolu webong homanogale aime wickebong fame hikeibong.**

<sup>31</sup> “**Faemewa depec-baba ngic monicti inguc yefe haulu ngic fawec, ye nganilu kwegegengkelu nebocina yefe hikewec.** <sup>32</sup> **Hikeme Liwai ngic monicti inguchac iwa hauwec. Haulu ngic yogo nganime fame ye inguchac kwegegengkelu nebocina yefe hikewec.** <sup>33</sup> **Aime Samaria ngic monicti yefe yogohac balaibelu haulu ngic fawec, ye nganilu yele kweleine sowaleme,** <sup>34</sup> **yela lelu heloc nga waing misaine kweme waic sackolecka haume ebeckewec. Ebeckelu yeicne donggi feina lolu yowa-macka bahikelu ngani-damong aicnowec.**

<sup>35</sup> “**Aime mac saeme siliwa moneng yaeckang yowa-mac damong lacnolu yanguc edowec, ‘Ga ngic yago ngani-damong aicnolu gadamec! Na hatacmac hefaliyelu moneng gocne wickedamecte, yogolec ameine geledacte.’”**

<sup>36</sup> Inguc milu Yesudi Wapongte yefe-yowale ngage-ngage ngic yanguc uwacnowec, **“Ga wenuc ngagegic? Hise ngic yengele molewa sowalewec, ngic habackang yengelacni weni yogodi yele emewa galu aibaba madicne aicnowec?”**

<sup>37</sup> Inguc uwacnome yedi bafaliyelu miwec, “Yele kwele-sowac ngagelu bafickewec, yedi.”<sup>§</sup>

Inguc mime, Yesudi yanguc edowec, **“Ga hikelu ye aiwec, ingucnehac aidamec!”**

*Yesudi Mata nga Maria yugucyepawec*

<sup>38</sup> Aime Yesu nga mic-tengtengfocine yenge hikegacgu mac-aling monicka sulumeibong. Aime ngigac monic wacine Mata, yedi Yesu macina fenale hefolewec. <sup>39</sup> Hefoleme Mata kwaine monic, wacine Maria, yedi Sugucnele higewa wangiyelu yowaine ngagewec. <sup>40</sup> Ngageemewa Matadibac lec-welec ailu yekeholec mi ngiyewec. Ailu wele domalu Yesu yanguc edowec, “Sugucne, ga nale ngageboc mi aigic. Na neicnac ngani-damong bole banogale aigabac. Kwane hegilecnugac, ye edoengka baficnuna.”

<sup>41</sup> Mime Sugucnedi bafaliyelu yanguc edowec, **“Mata, Mata, ga wiyac homac-nele ngageboc ailu umac bagic.** <sup>42</sup> **Ga wiyac moniyang sugu yogobac baengka madickedaihte. Maria ye wiyac madicne wosaelu balu gagac, yogo monicti yelacni nalic mi baickedaihte.”**

## 11

*Mimilocte yefe*

*Mat 6:9-15; 7:7-11*

<sup>1</sup> Yesu ye dameng monicka hikelu hewacine monicka milockewec. Milockeme motome mic-tengtengfocine yengelacni monicti yanguc miwec, “Sugucne, Yoane ye mic-tengtengfocine wenuc milockeningte weduyelewec. Ga inguchac wedunolenong!”

<sup>2</sup> Mime Yesudi miwec, **“Ngenge yanguc milu milockedaing.**

**‘Mamac, ga wacgone gbagbacne fadaic.**

**Aime ngani-damonggone welenoledaic.**

<sup>3</sup> **Ga hadengsoc nosing socnonggeng noledamec.**

<sup>4</sup> **Nonge ngic yengele bikic hegilegabeleng.**

**Ilec gagi inguchac bikicnonggeng hegilenolenong.**

**Ga lokwesacka mi locnubadamec.’”**

*Sanangke galu milockenoga*

<sup>5</sup> Milu yanguc edocebawec, **“Ngengelacni monicti deboc hewacina agoine monicte macka lelu yanguc midaicte, ‘Agone, ga bret ebec habackang baficnunong. Ameine lobewa geledacte.** <sup>6</sup> **Na agone monicti debocka yefe dalickacni kwesilu macna welegac, aime nosingne mikac. Aime oma gumenogale kpungkegabac.’**

<sup>7</sup> **“Ye inguc mime agoine mac kwelina ngiyelu midaicte, ‘Ga umac mi nelenong! Adu-madecfocne yenge naholec gung fabong nunonggeng biyac holegabac. Ilec nalic mi fangkelu bageledacte.’** <sup>8</sup> **Na yanguc edocngebabe, ye agoinele ailu bret mi lacnodaickale milu, ye dogbac ailu uwacnodaicte. Inguc aime ye fangkelu bret lacnodaicte.**

<sup>9</sup> **“Ilec ailu yanguc migabac, milockening, aime yedi wiyac ngeledaicte. Nga basackening, ailu bafuwadaingte. Nga nuwa holening, aime ye nu laliyedaicte.** <sup>10</sup> **I yangucte, monic ye milockelu gagac, yedi wiyac badaicte. Nga monic ye basackelu gagac, yedi wiyac bafuwadaicte. Ailu nuwa holelu gagac, ye nu laliyecnodaicte.**

<sup>11</sup> **“Aime ngengele hewackacni mamac monicte madecinedi misa-sicte uwacnome, hema sowacne nalic mi lacnodaicte.** <sup>12</sup> **Nga kokolec hucinele uwacnome, wame-wame nalic mi lacnodaicte.** <sup>13</sup> **Ngenge ngic aibabangineng sowacneholec gacaigaing. Ailu sifu adu-madecfocgineng kwele-madictie wiyac madicne yelenogale ngage-motogaing. Ilec ngenge yanguc ngagedaing, Honocmeng Mamac-nginengte aibabadi ngengele aibaba madicne yogo ewaliyackegac. Ngenge yela Tili Asule uwacnobong yedi taockelu Tili Asu ngeledaicte.”**

*Yesu ye male tapiliwa aleng yebicebacaigac?*

*Mat 12:22-30; Mrk 3:20-27*

<sup>14</sup> Aime Yesu ye dameng monicka aleng monic yowaine mikac, yogo ngickacni yebiyewec. Yebiyeme aleng ngickacni ofelu hikeme ngic yowaine mikac gawec, yedi yowa mime ngic-ngigac yenge ngagelu kwatackeibong. <sup>15</sup> Aime ngic-ngigac gocne yengibac yanguc miibong, “Ye aleng yengele micne Belsebul, yele tapiliwa bole balu ngic-ngigac

<sup>§</sup> 10:37: Israel ngic-ngigac yenge Samaria ngic-ngigac yengele takicebawec. Ilec wacngineng mi wackecaigaing.

10:39: Yoa 11:1; 12:2-3      10:42: Mat 6:33

yengelacni aleng yebicebacaigac.”<sup>16</sup> Aime gocne yengibac Yesu tapiliine lokwesacka loningte ngagelu pasile maa monic honocmengkacni banale edoibong.

<sup>17</sup> Edobong Yesudi ngage-ngagenginang biyac ngagelu yanguc edocebawec, **“Himong monicte ngic-ngigac yenge ngaba ainagulu siyeckedaingtewa, himong yogo kisi kwedaicte. Ailu golowac monicte siyeckelu ngaba ainagudaingtewa, yenge wawebong miyac aidaicte.** <sup>18</sup> Nga Satang yeuctihac siyeckedaicte, ye habu yaeckang aime yele ngani-damong sanangne nalic mi fadaicte. Aime ngengibac sifu nale migaing, ‘Ye Belsebuldi aicnome yele tapiliwa aleng yebicebacaigac, yogodi nalic mi aigac.’ <sup>19</sup> Nani Belsebul yele tapiliwa aleng yebicebadaba midec, ngengileng madecfocngineng yenge inguchac yele tapiliwa aleng yebicebadabong. Inguc aime ngenge madecfocnginengtihac ngengele yowa wosaelu mimoctodaingte. <sup>20</sup> Aime nani Wapongte tapiliholec aleng yebicebagabacka, ibac Wapongte ngani-damongti ngengela biyac weleyec fagac.

<sup>21</sup> **“Ngic tapiliineholec monicte hudule woc-wiyacine balu macinele damong gae-mewa woc-wiyacine madicne fadaicte.** <sup>22</sup> Aime ngic monic tapiliholec hatacmac yela welelu yeholec wenagulu ewalidaicte, yedi ngic yele hudule woc-wiyac ewaliyackedaicte. Ewalime mac fileinedi hudule wiyacne tapiliwa sanangne gawec, yogo miyac aime ngic tapiliine sugucnedi yele woc-wiyacine hise balu heuckelu ngic-ngigac gocne yeledaicte.

<sup>23</sup> **“Inguc aime monic ye nale ago miyac ye na lobenugac. Nga monicte naholec bakpaduc bole mi bacaigac, yedi nale wiyac basowaleme singsalolong kwenale bole bacaigac.**

*Aleng hatacmac hefaliyecaigac*

*Mat 12:43-45*

<sup>24</sup> **“Aleng wonongkolec yedi ngickacni ofelu himong misaine mikac, iwa hikelu ye mac ngiye-ngiyeine basackelu lolickelu gacaigac. Gacgu mac ngiye-ngiyeine monic mi hafuwalu, yeuctihac yanguc migac, ‘Macne esecne ngiyelu hegileiba, iwa hatacmac hefaliyelu hikenogale ngagegabac.’** <sup>25</sup> Inguc milu hikelu mac yogo biyac pelengkelu hamadickeicne nganigac. <sup>26</sup> Nganilu hatacmac hikelu aleng 7 mengocebame kwesigaing. Aleng yogo yengi ye ewalilu sowacnebenang aigaing, yenge bacebame hikelu mac iwa gagaing. Inguc aibong ngic ye molic-molic sowacne gawec, ye yogo ewalilu sowacnebenang gagac.”

*Aling weni yenge kwele-angackolec aigaing*

<sup>27</sup> Yesu ye yowa inguc miyemewa ngigac monicte habu yengele hewackacni wackelu miwec, “Ngigac bacgulu kogocka damongguwec, ye kwele-angackolec.”

<sup>28</sup> Inguc wackeme Yesudi yogolec ailu yanguc miwec, **“Wapongte yowa ngagelu bal-aibeccaigaing, yengebac kwele-angackolec.”**

*Pasile maaine monic fikeme nganidaingte*

*Mat 12:38-42; Mrk 8:12*

<sup>29</sup> Aime ngic-ngigac habu sugucne yenge homacnehac welelu fabong, Yesudi yowa taockelu yanguc miwec, **“Ngic-ngigac aling yanguctihac gagaing, ngenge aling sowacnebenang. Ngenge pasile maa nganinogale uwalu gagaing. Aimebac ngenge pasile maa monic mi ngeleicne, miyac. Yonala pasile maa fikewec, ngenge yogo sugu nganidaingte.** <sup>30</sup> I yangucte, Yonala maa fikewec, yogo Niniwe taonte ngic-ngigac yengi nganiibong. Yonala fikewec, silicine ingucnehac Ngicte Madecta fikeme nganidaingte. <sup>31</sup> Aime Seba himongte ngigac-taudi Solomonte ngage-ngage-motoc banogale himong mecine sautkacnipec kwesiwec. Aime ngagegaing, yakumac monicte Solomon ewaligac. Ilec ailu ngigac-taudi wowosae damengka ngic-ngigac aling yanguctihac gagaing, ngengeholec fangke domalu aibabangineng wosaelu ngengele sowacne mimoctodaicte. <sup>32</sup> Aime Niniwe taon sugucnele ngic yengi Yonale yowa ngagelu kwele-hefaliyec aibong. Aime ngagegaing, yakumac monicte Yona ewaligac. Ilec ailu ngic-ngigac aling yanguctihac gagaing, ngenge wowosae damengka Niniwe ngic-ngigac yengeholec fangkelu domaebongka aibabangineng wosaelu ngengele sowacne mimoctodaingte.

*Socnginengte angoc*

*Mat 5:15; 6:22-23*

<sup>33</sup> “Monicti hifa kwendangkelo sangke-sangke me pakec bageina nalic mi lo-daicte. Ye hifa yogo mac ngiye-ngiyeina lome ngiyeme angocina ngic-ngigac yenge ofelu angocine nganidaingte. <sup>34</sup> Aime dongegonedo socgonele hifa aigac. Aime dongegonedo madicne fame socgone sasawa bame angoleyackegac. Nga ga dongeheloc me donge-sowac balu gadamecte, me dongegone sowaledaictewabac, soc-kwelegone kundung kweyackedaicte. <sup>35</sup> Ilec ailu ga angocgone fagac, yogo kundung kwedaickale ailu, damongkelu balu gadamec! <sup>36</sup> Aime soc-kwelegonedo kundung mikac angockolec sasawa fadaictewa, socgone angocti sawelu fadaicte. Yogo hifa monic angoctowaineholecti bacgume angolecaigac, yogo ingucne.”

*Yesu ye Farisaio nga yefe-yowale wewedu ngic yengele fungine miwec  
Mat 23:1-36; Mrk 12:38-40; Luk 20:45-47*

<sup>37</sup> Aime Yesu ye yowa mime Farisaio monicti yeholec nosing nonale micnome yele macka feme ngiyeiboc. <sup>38</sup> Ngiyelu ye moleine mi suwelu nosing moc nonogale aime, Farisaio yedi yogo nganilu kwatackemebac, <sup>39</sup> Sugucnedi yanguc edowec, “Farisaio, ngenge pele nga kapngineng lobine sugu suwecaigaing. Ailu ngengebac kwelenginengti ngani-angac aibong aibaba sowacne ngengela wakeicne fagac. <sup>40</sup> Ngenge kapaine! Lobine wiyac bawec, yedi kwelinele inguchac bawec. <sup>41</sup> Ngenge ilec ailu waweweine kweledi doficebalu yeledaing! Ngagegaing, inguc aibong wiyacngineng sasawa gbagbacne aidaicte.

<sup>42</sup> “Mee, Farisaio, ngenge medecnegebadaic. Ngenge lomboc nga gime ailu mendangngineng sasawa yogowacni 10kacni moniyang botoc balu Wapong lacno-caigaing. Ailu aibaba dondonne nga Wapong ago balu angac ngagecnolu gaga, yogobac kpaoma ailu hegilecaigaing. Ngenge aibabangineng madicne yogo nalic balaihegabiyeing. Ailu tofaine migabac, yogo inguchac mi hegiledaing.

<sup>43</sup> “Mee, Farisaio, ngenge medecnegebadaic. Ngenge kpakpaduc macka molic-molic ngiye-ngiyewa ngiyenogale angelecaigac. Nga sobeng sugucna wenac-madic mingeleningte angac ngagecaigaing.

<sup>44</sup> “Mee, ngenge medecnegebadaic. Dongesi maaine mikac ngic yenge mi ngagelu moc sugu feina lec-welec aicaigaing, ngenge dongesi yogo ingucne gagaing.”

<sup>45</sup> Inguc mime Wapongte yefe-yowale ngage-ngage ngic yengelacni monicti yanguc edowec, “Wewedu, ga inguc milu nonge inguchac misowalecnubagic.”

<sup>46</sup> Mime Yesudi yowa ameine bafaliyelu yanguc edowec, “Wapongte yefe-yowale ngage-ngage ngic, mee, ngenge medecnegebadaic! Ngenge ngic yengele lobenginang mafa ngicti babalesoc miyac, yogo locaigaing. Aime ngengileng umacngineng efecne aidaicte, wiyac monic baficebaningte mole monic mi yelecaigaing.\*

<sup>47</sup> “Mee, ngenge medecnegebadaic. Ngambofocngineng yenge Wapongte siduc-mimi ngic esecne wehomacebabong homaibong, yogo yengele dongesiwa simeng bayelecaigaing. <sup>48</sup> Yengi Wapongte siduc-mimi ngic wehomacebaibong. Ailu ngengi dongesingineng bacaigaing, yogo ailu yanguc mibong yegengkegac, ‘Nonge aibabanonggang kwele-moniyang gagabeleng.’ <sup>49</sup> Ngengele ailu Wapong ngage-ngage-motocineholecti biyachac miwec, ‘Wapongte siduc-mimi ngic nga salecebaicne, yengela salecebabe kwesidaingte. Aime yengi gocne wehomacebadaingte. Nga gocne welu yebicebadaingte.’ <sup>50</sup> Ilec ailu himong funginacnihac ofegacgu Wapongte siduc-mimi ngic wehomacebabong sacngineng wawec. Aime yogolec ameine ngic-ngigac aling yanguctihac gagaing, ngengelacnidi baduyeleadaingte. <sup>51</sup> Ameine yogo Abel wehomabong yele sackacni molickelu ofegacgu Sekariyale sacka ofegac. Yengi alata nga Ibu-mac kweline hewacnginac Sekariya wehomabong. Oc, ngic-ngigac aling yanguctihac gagaing, ngenge sac yogolec ameine yogo baduyackedaing, yogo edocnegebabac.†

<sup>52</sup> “Wapongte yefe-yowale ngage-ngage ngic, mee, ngenge medecnegebadaic. Ngenge Wapong ngagecnoningte ki, yogo baickeibong.‡ Ailu ngenge ngengileng iwa mi feibong. Aime ngic-ngigac yenge fenogale aiyeibongkabac, aka biyac locaigaing.”

<sup>53</sup> Aime Yesu ye hegilelu lobina hauwec. Haume Wapongte yefe-yowale wewedu ngic nga Farisaio, yengi yele ngage-sowalelu uuwa haicine monic-monic uwacnoibong. <sup>54</sup> Aime yowaine gocne lilome banang milu yele damong balu gaibong.

11:33: Mrk 4:21; Luk 8:16 \* 11:46: Yefe-yowa gocne taockelu weduyeleibong, yogo mafa ingucnehac. † 11:51: Aling yago yenge Yesule damengka gaibong. ‡ 11:52: Ki yogo Wapongte yefe-yowa. Yenge yefe-yowa gocne hedickeibong.

## 12

*Wiyac sangkeicne yegengkenale yowa*

*Mat 10:26-27*

<sup>1</sup> Aime ngic-ngigac homacnebenang, 10 taosen ngama ingucnedi kpaduckelu yengungti-hac feine feine domaibong. Inguc aibong Yesudi mic-tengtengfocine yengele sugu ngagelu molickelu yanguc miwec, “**Ngenge Farisaio yengele kwesac-aibabangineng yogolec ngani-motolu gadabiyeng, yogo yisdi bret bame sawecaigac ingucne.** <sup>2</sup> Aime wiyac monic ebecineholec fagac, yogo gagu yegengkedaicte. Nga wiyac sangkelu fagac, yogo ngageyackedaingte. <sup>3</sup> Ilec ailu ngenge kundungka yowa sasawa micaigaing, yogo angocina ngagedaingte. Nga mac kwelina hedecnginang sangicka migaing, yogo mac feina domalu edocebalu weduyeledaingte.

*Ngic yengele hangoc mi aidaing*

*Mat 10:28-31*

<sup>4</sup> “**Ailu agofocne, ngagegaing, gocne yengi socngineng wehomalu hatacmac basowalecngebaningte tapili basackecaigaing, ngenge yengele mi hangocngebadaic, yogo edocngebabac!** <sup>5</sup> Ngenge monictebac hangocngebadaic! Wapongti wehomacngobalu dac-sanangka wicngebame hauningte bole-yowa tapiliineholec balu gagac, oc, yelebac hangocngebadaic, yogo edocngebabac! <sup>6</sup> Ailu nango hakic 5 maketka lobong peni sasacne yaeckangti fulu bacaigaing, Wapongti nango yogo yengelacni monic nalic mi ngigekedaicte. <sup>7</sup> Ailu ngengele hodoc-dowecngineng edomeng, yogo inguchac wafelu ngagegac. Ngenge Wapongte haicka nango gogoc homacne yengele feicne aigaing. Ilec ailu ngenge mi hangocngebadaic.

*Yesule mibong yegengkedaic*

*Mat 10:32-33; 12:32; 10:19-20*

<sup>8</sup> “**Monicti ngic-ngigac yengele haicka nale mime yegengkedaicte, ‘Na yele aling.’ Aime Ngicte Madecti Wapongte angelofocine yengele haicka yele inguchac yanguc mime yegengkedaicte, ‘ye nale ngic.’** <sup>9</sup> Nga monic ye ngic-ngigac yengele haicka nale wac bisockedaicte, nani Wapongte angelofocine yengele haicka ngic yele wac inguchac bisockedaicte. <sup>10</sup> Ailu monic ye Ngicte Madecte wac milu sulelu yowa midaicte, yele bikic nalic mi hegiledaicte. Nga monicti Tili Asu misulec aicnodaictewa, yele bikic nalic mi hegiledaicte, miyac. <sup>11</sup> Ailu ngic yengi bacngobalu kpakpaduc macka nga gamangte damong nga ngic sugucne gocne, yengele haicka locngebadaingte. Aime ngenge dameng iwahac, ‘Ameine wenuc bafalienenoga?’ me ‘Oma yowa minoga?’ milu yogolec ngageboc mi aidaibiyeng! <sup>12</sup> I yangucte, Tili Asudi dameng yogowahac yowa midaingte, yogo micnginang lodaicte.”

*Moneng-mafaholec ngic yengele yowa*

<sup>13</sup> Aime ngic-ngigac habu yengele hewackacni ngic monicti Yesu yanguc micnowec, “Wewedu, haene ye mamacte mole-damoc yeicnac balu gagac. Ilec micnoengka nebcocine botoc balu nelena.”

<sup>14</sup> Mime Yesudi bafaliyelu yanguc edowec, “**Ngic, ngekele woc-wiyac botoc banogale damong, me ngage-wosaecte ngic monicti mi locnuwec.**” <sup>15</sup> Inguc milu taockelu yengele yanguc miwec, “**Ngagelu gadaing! Ngenge hane aibaba haicine monic-monic mi ainingte gagangineng damongkedabiyeng. Moneng-mafatowa yogodi gagangineng mi hasanangkedaic!**”

<sup>16</sup> Milu nangeng yowa monic yanguc edocebawec, “**Ngic monic moneng-mafatowaholecti boleina nosing noine homacne aiwec.**” <sup>17</sup> Aime nosingngine mac wenuwa lonogale ngage-bibiyelu <sup>18</sup> yanguc ainale ngagewec, “**Nosing-macne kpicicne gocne domagac, yogo hembalackelu sugucnehac badacte. Balu nosing nga wiyacne madicne sasawa kpaduckelu iwahac kpatulecebadacte.**” <sup>19</sup> Kpatulebe motome neicne kwelena yanguc ngagedacte, ‘**Hifa homacnelesoc wiyac madicne kpaduckegabac. Ilec gagane baefeckelu bagabac, ailu belic-belicka gadacte.**’

<sup>20</sup> “**Mime Wapongti yele yanguc miwec, ‘Ga ngic-kapa, deboc yagowahac ga iluc-gone ewalicgube homadamecte. Aime wiyacgone bakpaduc ailu gagic, yogo gocne yengi badaingte.’**”

<sup>21</sup> Milu Yesudi hatacmac taockelu yanguc miwec, “**Monic ye yeicnele ailu himongte wiyac madicne bakpaduc aidaicte, ye Wapongte haickabac wiyac madicne mikac gagac, yele gaga yogolecsoc aidaicte.**”



*Mimedec mi ainingte yowa*

*Mat 6:25-34*

<sup>22</sup> Ilec ailu Yesudi mic-tengtengfocine yanguc edocebawec, “Na yanguc edocngebab, ngenge noba-nosingte milu gaganginengte mi medecngebadaic, ‘Nonge oma nosing nolu ganoga?’ Me socnginengte ngagelu, ‘Oma ngakpi-kpoluc holelu ganoga?’<sup>23</sup> Ngagegaing, gagadi nosing ewaligac, ailu socti ngakpi-kpoluc ewaligac.<sup>24</sup> Ngenge aoc-aoc nganicebaning! Yenge hole-duwenoc me luwang mi fayelegacte, Wapongti sifu nosing moc yelegaigac. Aime Wapongte haicka ngenge nango yengele feicne aigaing.<sup>25</sup> Aime ngengelacni monicti mimedec ailu game yogodi gaga-damengngine kpiscinemas hatacmac nalic mi hame daliwedaicte, miyac.<sup>26</sup> Ngenge wiyac kpiscine ingucnele aibibiyelu tofaine gocnele inguchac ngagehoc mi ailu gadaing!

<sup>27</sup> “Ngenge daling moc siyeckecaigaing nganicebaning! Yenge muc mi yumulu boletowa mi balu sifu sugulecaigaing. Aime ngictau Solomon ye esecne ngakpiine hibine madicne holelu gawec, yele hibi-angoctowadi sifu daling yengele hibi keleng angacine mi ewaliwec, yogo edocngebabac.<sup>28</sup> Aime daling aliine kpanggewa moc siyeckecaigaing, yogo yakucte sugu fikegaing. Nga saemebac helockelu dacka wickedaingte. Aime Wapongti dalingbenang ingucne ngakpi holeyedaictewa, ye ngic-ngigac ngage-ngagesingngine kpiscinemas fagac, ngenge inguchac ngakpi-kpolucngineng taockelu ngeledaicte.

<sup>29</sup> “Ilec ngenge, ‘oma nosing nonoga nga misa wenuwacni fila nolu ganogale’ micaigaing, ngenge mimedec yogo hegiledaing!<sup>30</sup> Ngic-ngigac aling Wapong mi ngagegaing, yenge socte wiyac sasawadi baningte ngage-ngagenging iwa lobong fadaicte. Aime Mamacnginengti ngenge socte wiyac kpungkecaigaing, yogo biyac ngagedaicte.<sup>31</sup> Ngenge Wapongte ngani-damong bafuwanogale bole sugucnehac badabiyeng. Ngenge inguc aibong yedi socte wiyac yogo hocne ingucnehac taockelu ngeledaicte.

*Wiyac madicne honocmengka balu ganoga*

*Mat 6:19-21*

<sup>32</sup> “Habu-hakic, Mamacngineng ye ngani-damongngine ngelenale ngageme madickecaigacte, ngenge mi hangocngebadaic!<sup>33</sup> Ngenge mafangineng salebong ngic-ngigac yengi fuli bayackebong moneng yogo balu waweweine gagaing, kwele-madicka wiyac yeledaing. Ilec ailu ngenge moneng-ebec nalic mi lokenale bafuwadaing. Yogo wiyacngineng madicne tapiliine mi wanale honocmengka kpaduckedaing. Iwa hise ngicti mi weledaingte, nga unedi mi basowaledaingte.<sup>34</sup> Ngenge wiyacngineng madicne bakpaduc aicaigaing, iwa kwele-angacngineng ingucnehac fadaicte.

*Ngicte Madec kwesidaicte*

*Mat 24:42-44*

<sup>35</sup> “Ngenge kpolucngineng sanangne kwelu hifangineng kwendangkelu efeckelu gadaing.<sup>36</sup> Ngic sugucne ye baba-tumang mackacni welelu nuwa holedaicte. Holeme kwelec kwekwefocine yengi yele wangep gacgu nu biyac laliyedaingte, ngenge efeckelu ingucnehac gadaing.<sup>37</sup> Aime sugucnginengti welelu kwelec kwekwefocine yenge deboc-gboli gabong bafuwacebadaicte, yenge kwele-angackolec. Foinac, ye yengele kwelec kwenale yeuctihac kpolucine bangkacne kwelu ‘ngiyebongka’ mime ngiyebong nosing bawelelu yeleme nodaingte, yogo noine edocngebabac.<sup>38</sup> Ye deboc hewac-hewac me mac sae-saele deboc-gboli gabong welelu nganicebadaicte, kwelec kwekwe yogo yenge kwele-angackolec.

<sup>39</sup> “Aime hise-baba ngic ye mac heuckelu fecaigac. Aime mac fileine monic ye hise ngic ma damengka kwesidaicte, yogo ngagedaictewa, ye macine damongkelu hise ngic yogo aka holecnodaicte.<sup>40</sup> Ilec ngenge inguchac efeckelu gadabiyeng. Ngicte Madecte dameng yogo ngenge mi ngageebongka kwesidaicte.”

*Bole-madec madicne ingucne gadabiyeng*

*Mat 24:45-51*

<sup>41</sup> Aime Pitadi miwec, “Sugucne, nangeng yowa migamec, yogo nongele me sasawa yengele migic?”

<sup>42</sup> Inguc mime Sugucnedi yowaine bafaliyelu yanguc edowec, “Mac-damong madicne monicti ngage-ngage-motockolec galu sugucneinele yowa balaibecaigac. Aime sugucneinedi ye kwelec kwekwe ngic agofocine yengele damong ailu nosing

damengka botoc balu yelenale micnodaicte. <sup>43</sup> Ye bole yogo bayackeme sugucneine kwesilu nganime nalic aidaictewa, sugucneine ye kweleine angackedaicte. <sup>44</sup> Foinac, na yanguc edocngebabe, ye sugucneinedi wiyacine sasawa damongkenale micnodaicte. Ilec ailu ngenge silicine yogolec soc gadabiyeng. <sup>45</sup> Aime bole-ngic, yebac yeuctihac yanguc ngagesidaicte, 'Na sugucneine dameng dalicne gaguhac kwesidaicte.' Inguc milu bole-ngic ye agofocine wecebalu nosing nga misa sanangne nolu kwele-sifuc aidaicte. <sup>46</sup> Inguc ailu kwelec kwekwe ngic ye sugucneinele hadeng yogo mi ngageemewa sugucneine kwesidaicte. Kwesilu kwelec kwekwe ngic yogo weloc-kwalockelu ngage-ngagesing mikac yengeholec lodaicte.

<sup>47</sup> "Aime kwelec kwekwe monic ye sugucneinele yowa ngagelu mi efeckelu gadaicte, ye hudu sugucnehac wedaicte. <sup>48</sup> Nga kwelec kwekwe monic ye sugucneinele bole-yowa mi ngagelu hudu hii-hiile aibaba gocne aidaictewa, ye hudu efecnemac wedaicte. Ilec monic ye wiyac sugucne lacnome balu game fikedaicte, ye micnome sugucnehac lacnodaicte. Nga wiyac homacne damongkenale bole-yowa lacnome damongkedaicte, ye uwacnome wiyac sugucnehacbenang lacnome damongkedaicte.

*Kwele-moniyang mi fikedaicte*

*Mat 10:34-36*

<sup>49</sup> "Na himongka dac habune habune fitobe lobenale waiba. Aime dac yogo biyac lobeme kwelene madickedaidicte. <sup>50</sup> Aime molickelu doicti somecnudaicte. Ailu yogo ngagebe kwelenedi umaleme gagu bolene yogo motome kwelene madickedaidicte. <sup>51</sup> Na himongka kwele-mogung bafuwanogale waiba, ngenge inguc ngagegaing, me? Yogo miyachenang, na heucebanogale waiba, yogo edocngebagabac. <sup>52</sup> I yangucte, yakumac nga galu fenoga, iwa mac kwelina ngic-ngigac 5 yenge siyeckelu gadaingte. Habackang yengi yaeckang yekeholec ngaba aidabiyengte. Nga yaeckang yeki habackang yengeholec ngaba-ngaba ainagudaingte. <sup>53</sup> Aime mamacti siyeckelu madeckolec ngaba aidaicte. Nga madecti mamackolec ngaba aidaicte. Ailu nenggac ye aduineholec ngaba aidaicte. Nga adudi nenggacineholec ngaba ainagudabiyecte. Nga yengau ye yengauneholec siyeckelu ngaba ainagudabiyecte."

*Dameng ngani-wosaecte miwec*

*Mat 16:2-3*

<sup>54</sup> Aime Yesudi inguchac habu sugucne yengele yanguc miwec, "Ngenge wenac hauhaina kaguwa monic nganilu yanguc biyac micaigaing, 'Mac sugucne kwedaicte.' Inguc mibong mac kwecaigac. <sup>55</sup> Nga gbelong laiwapec weme nganilu yanguc micaigaing, 'Himong dacine aidaicte.' Mibong inguc aicaigac. <sup>56</sup> Kwesac-ngic, ngenge himongka nga sawawa wiyac fikecaigac, yogo nganilu wosaecaigaing. Aime yakumac dameng gagabeleng, ngenge yogo nganilu sifu mi ngage-motocaigaing.

*Yowa wosaenoga*

*Mat 5:25-26*

<sup>57</sup> "Ngenge omale aibaba weni yogodi dondonne aigac, yogo ngengung mi wosaecaigaing? <sup>58</sup> Ngabagone monicti yowawa locgunale bacgume ngeke momoc yefewa hikelu, ga iwahac ngabagoneholec yowanginec miboc madickenale hole badamec! Inguc mi aidamectewa, ngabagoneidi ngage-wosaec ngic yela locgume yedi lebe-ngic yengele molewa locgume muc-macka locgudaingte. <sup>59</sup> Na yanguc edocgugabac, ga muc-macka ngiyecgu ngabagonele tofa sasawa hucbuchac baducnoyackelu wadamecte."

## 13

*Bikic hegilelu kwele-hefaliyec ainoga*

<sup>1</sup> Dameng iwahac ngic gocne yengi Yesu siduc yanguc edocnoibong, "Galili ngic gocne yengi depecnginengte sic lobelu Wapong hasoc holecnolu gaibong. Gabong Pailat yedi mime ngicfocine yengi hikelu Galili ngic wehomacebalu sacngineng yogo depecnginengte sic sacineholec kpatulebong atang aiwec."

<sup>2</sup> Mibong Yesudi yanguc uwayelewec, "Ngc homaibong, yengele bikicti Galili ngicngigac sasawa, yengele bikic ewaligac inguc fikeyelegac, ngenge inguc ngagesigaing, me? <sup>3</sup> Yogo miyachenang! Aime yanguc edocngebabe, ngengebac kwelengineng mi hefaliyedaingte, ngenge sasawadi yenge homaibong, ingucnehac

homayackedaingte. <sup>4</sup> Nga Siloam mac-daledi heliyelu ngic-ngigac 18 feingingan walu wehomacebawec. Ilec ngenge wenuc ngagegaing, yengele bikicte umacti Yerusalem ngic-ngigac sasawa gagaing, yengele ewaligac, me? <sup>5</sup> Yogo miyachenang! Aime yanguc edocngehabe, ngenge kwelengineng mi hefaliyedaingtewa, ngenge sasawadi yenge homaibong, ingucnehac homayackedaingte.”

*Fik yocti noine monic mi aiwec, yogolec nangeng yowa*

<sup>6</sup> Aime Yesudi nangeng yowa monic yanguc edocebawec, “Ngc monic ye fik yoc monic waing bole kwelina duweme domawec. Aime ye hiekcgu noine basackelu <sup>7</sup> waing bolele damong edolu yanguc miwec, ‘Yoc yogolec noine basackelu gabe hifa habackang biyac aigac. Ailu ye omale moc domalu himong helocine nowackegac? Ilec ga yoc yogo welockelu wickedamec!’

<sup>8</sup> “Mime waing bolele damongti miwec, ‘Sugucnene, hegileng hifa yago inguchac domaemewa fungina heuckelu himong gocne helockolec lodacte. <sup>9</sup> Inguc aibebac lobewa noine madicne aidaicte mecne. Nga noine mi aidaictewabac, ga nalic helockelu wickedamec!’”

*Sabat damengka Yesudi ngigac lobe-ngosoc bamadickewec*

<sup>10</sup> Aime Sabat dameng monicka Yesu ye kpakpaduc mac monicka felu wewedu bole bawec. <sup>11</sup> Hei, ngigac monic iwahac ngiyewec, ye hucte aleng monicti lobeina bakat-ackeme ye lobe-ngosoc gacgume hifaine 18 biyac aiwec. Aime lobeine nalic mi bame dondongkedaicte. <sup>12</sup> Aime Yesudi ye nganilu wackeme yela weleme yanguc miwec, “Ngcigac, ngagegic, hucgone haickebe miyac aigac.” <sup>13</sup> Milu moleine feina loemewa ngigac ye lobeine biyac dondongkeme fangke domalu Wapong wacine bafewec.

<sup>14</sup> Aime kpakpaduc macte damong yedibac Yesudi Sabat damengka huc bole bawecte aalic ngagelu ngic-ngigac edocebalu yanguc miwec, “Hadeng 6 fagac, iwa bole banoga. Ilec ngenge dameng iwa kwesibong bamadincgebadaic. Nga Sabat damengkabac miyac.”

<sup>15</sup> Mime Sugucnedi yowaine bafaliyelu yanguc edowec, “Kwesac-ngic, ngenge sasawa hulumaka nga donggicfocngineng misa yelenogale Sabat damengka luke-cebacaigaing. Lukecebalu macnginangkocni walu bacebalu hikecaigaing, yogo madicne. <sup>16</sup> Aime ngigac yago Abrahante gholiwacni, ye Satangti hifa 18 biyachac hefeme gacgume Sabat damengka lukenogale aigabac, yogo ngagebong mi madickegac, me?”

<sup>17</sup> Aime Yesudi ngabafocine ameine inguc bafaliyeyeleme yenge gameebawec. Aime ngic-ngigac nebocine yengebac pasi feicne sasawa bame nganiibong, yogolec beliyeibong.

*Mastet hucinele nangeng yowa miwec*

*Mat 13:31-32; Mrk 4:30-32*

<sup>18</sup> Aime Yesudi miwec, “Na oma wiyacka nangeng yowa mibe ngenge Wapongte ngani-damongte silicine nalic ngage-motodaingte? <sup>19</sup> Yogo mastet hucine ingucne.\* Ngic monicti mastet hucine balu boleina duweme, yogodi sugulelu yoc bangkacne aime sawawa nango yengi kwesilu mangngina yafo holelu ngiyeibong.”

*Yiswa nangeng yowa miwec*

*Mat 13:33*

<sup>20</sup> Inguc milu Yesudi hatacmac yanguc miwec, “Wapongte ngani-damong, yogo oma wiyacka yefe soc holebe ngagening? <sup>21</sup> Yogo yis ingucne, aime ngigac monicti flawa umacine 20 kilo balu yisholec lalickelu bame atang aiboc sugulewec.”

*Nu kpisicnele yowa*

*Mat 7:13-14,21-23*

<sup>22</sup> Aime Yesu ye taonka nga mac-alingka lolickelu ngic-ngigac yengela wewedu bole balu Yerusalem hikenogale hikewec. <sup>23</sup> Hikeemewa ngic-ngigac gocne yengi uwacnolu yanguc miibong, “Sugucne, ngic-ngigac efecnemac yengi sugu wasecne aidaingte, me?”

Mibong Yesudi bafaliyelu yanguc edocebawec, <sup>24</sup> “Ngc-ngigac homacne yenge Wapongte ngani-damongka fenogale aibibiyedaingte, yogo edocngebagabac. Ilec ailu ngenge nu kpisicna fenogale bole sanangne badabiyeng! <sup>25</sup> Aime mac fileinedi fangkelu nu holeme ngenge lobina domalu nuwa holelu midaingte, ‘Sugucne, nu laliyenoleengka funang!’

“Mibong bafaliyengelelu yanguc midaicte, ‘Ngenge wenuwacni? Na mi ngagec-gebagabac!’

<sup>26</sup> “Inguc mime ngengi midaingte, ‘Nonge gaholec nosing misa noibeng. Ailu gagi nongele yefewa domalu yowa edocnubalu wedunoleing.’

<sup>27</sup> “Mibong, yedi hatacmac edocngebadaicte, ‘Nenge wenuwacni? Na mi ngagec-ngebagabac! Nenge aibaba sowacne aicaigaing. Ilec nenge nale haicka baicken-ing!’

<sup>28</sup> “Aime Abraham, Aisak nga Yakobo ailu Wapongte siduc-mimi ngic sawa Wapongte ngani-damongka ngiyebong nganicebadaingte. Dameng iwa ngegebac lobina wicnegebabong haudaingte. Nenge iwa hiyalu micngineng hisalangkeli gadaingte. <sup>29</sup> Aime wenac ofe-ofeinacni nga hau-hauinacni, nga not ailu sautkacni ngic-ngigac yenge kwesilu Wapongte ngani-damongka ngiyelu noba-nosing nodaingte. <sup>30</sup> Ngagegaing, gocne yakumac lobeine gacaigaing, yengi molic-molic aidaingte. Nga molic-molic gacaigaing, yengibac lobeine aidaingte.”

*Yesudi Yerusalemte kwele-sowac aiwec*

*Mat 23:37-39*

<sup>31</sup> Dameng iwahac Farisaio gocne yengi welelu Yesu yanguc milu edoibong, “Herodedi ga wehomacgunogale migac. Ilec ga himong yago hegilelu hikenong!”

<sup>32</sup> Inguc mibong Yesudi bafaliyelu yanguc edocebawec, “Nenge hikelu kate-hoda yogo yanguc edoning, ‘Ngagegic, yakumac nga saeme aleng yebicebalu huckolec bamadicebadacte. Nga fangkelu holene motodaicte.’” <sup>33</sup> Aime Wapongte siduc-mimi ngic, yenge himong gocna nalic mi wehomacebadaingte, yenge Yerusalem iwa sugu wehomacebadaingte, inguc fagac. Ilec ailu yakumac nga saeme ailu fangkelu hikedacte.

<sup>34</sup> “O, Yerusalem, Yerusalem, ga siduc-mimi ngic wehomacebayackeing. Nga ngic gala salecebaicne, yenge posadi holecebaing. Kokolec nenggacinedi adu-madecfocine kwegecine bageina ekongebacaigac, na dameng homacne adu-madecfocgone ingucnehac kpadocebano-gale ngageiba. Aime ngengibac yogolec takicngebawec.” <sup>35</sup> Ngagegaing, ngengileng mac fale yogo ngic mikac ailu mac kisi kwedaicte. Na yanguc edocngebabe ngagening, yanguctihac molickelu nenge hatacmac mi nganicnudaingte. Aime gafecgu yanguc midaingte, “Sugucnele wacka ngic welegac, ye mimi-madicineholec.”

*(Mige 118:26)*

Inguc midaingte, dameng iwa nenge hatacmac nganicnudaingte.”

## 14

*Sabat damengka Yesudi ngic soc bokungkolec bamadickewec*

<sup>1</sup> Yesu ye Sabat dameng monicka Farisaio yengele micne monicte macka nosing nonale feme Farisaio yenge ye aibabaine ngani-ngagec ailu ngiyebong. <sup>2</sup> Hei, iwahac ngic monic socine bokungkolec ailu siwineicne, ye welelu Yesule haicka domawec. <sup>3</sup> Aime Yesudi Wapongte yefe-yowale ngage-ngage ngic nga Farisaio yanguc uwayelewec, “**Sabat damengka ngic bamadicebanogale yefe monic fagac me miyac?**” <sup>4</sup> Mime yenge ameine monic mi bafaliyeibong. Ilec ailu Yesudi ngic yogo moledi balu bamadickelu saleme hikeme <sup>5</sup> yanguc edocebawec, “Nngengelacni monicte madec me bulumaka monic Sabat damengka misa long monicka edetantangkeli haume, ye sifu biyac hikelu fuluckeme ofedaicte.” <sup>6</sup> Inguc mime yenge yowa yogolec ameine bafaliyenogale aibibiyeibong.

*Ngic monic ye bawacnagudaic*

<sup>7</sup> Aime iwahac ngic gocne wacebame, yenge ngiye-ngiye molic-molicka wosaelu iwa ngiyebong. Ngiyebong Yesudi nganicebalu yowa nangengngine yanguc milu edocebawec, <sup>8</sup> “Hatacmac baba-tumangte nosingka wacgume, ga nosingte mac ngiye-ngiye molic-molicka iwa biyac mi ngiyedamec. Gacgu wacngebagac, ngengelacni ngic sugucne monic weledaicte. <sup>9</sup> Weleme ngic wacngepagac, yedi welelu yanguc edocgudaicte, ‘Ga haicke-waengka ngic yagodi ngiyena.’ Inguc mime gamegume ngiye-ngiye motomotoinabenang hike ngiyedamecte. <sup>10</sup> Wacgume ga hikelubac, ngiye-ngiye motomotoina ngiyedamec. Aime ye wele nganicgulu yanguc midaicte, ‘Agone, ga ngiye-ngiye molic-molicka felu ngiyec!’ Inguc mime ngic-ngigac biyac ngiyegaing, yengele haicka yedi wac feicne geledaicte. <sup>11</sup> I yangucte, monic ye yeicne ngageme feicne aicaigac, ye wacine bawadaicte. Nga monic ye yeicne ngageme wawaine aicaigac, ye wacine hafedaicte.”

13:27: Mige 6:8    13:28: Mat 8:11-12    13:29: Mige 107:3    13:30: Mat 19:30    † 13:32: Dameng gocna yowa yogo hadeng habakangte miyac. Yogo soc holelu hadeng gocnele miwec.    ‡ 13:34: Adu-madec yogo yenge Yerusalem ngic-ngigac.    14:3: Luk 6:9    14:5: Mat 12:11; Luk 13:15    14:8: Ynn 25:6-7    14:11: Mat 23:12; Luk 18:14

<sup>12</sup> Aime Yesu ye ngic wackewec, yele yowa monic inguchac yanguc miwec, “**Ga wenacka me aweleme nosing nonole aling gočne wacebanogale ngagegic. Dameng iwahac agofocgone, me ngic hae-gba, me alingfocgone me moneng-mafanginengkolec gale emewa gagaing, yenge mi wacebadamec. I yangucte, yenge gagu ameine hat-acmac badugelebong, yogo mi madickedaicte.** <sup>13</sup> **Ga wacebanogale noba-nosing bamockedamecte, dameng iwa ngic waweweine nga pulingngine ailu hige-sowac nga donge-pisic wacebadamec!** <sup>14</sup> **Yenge ameine nalic mi badugeledaingte. Ilec ailu ga kwele-angacka gadamecte. Aime nosing yogolec ameine, ngic-ngigac don-donne homaibong, yenge gboliyelu fangkedaingte, dameng iwa hocne ameine badamecte.”**

*Yesudi nosingte tutumangka hike-hikele nangeng yowa miwec  
Mat 22:1-10*

<sup>15</sup> Inguc mime yenge nosing nongiyelu yowaine ngagelu yengelaicni monicti Yesu yanguc edowec, “Monic ye Wapongte ngani-damongka felu nosing nolu ngiyedaicte, ye kwele-angackolec.”

<sup>16</sup> Inguc mime Yesudi ameine bafaliyelu yanguc edowec, “**Ngic monicti noba-nosing sugucne bamockenale ngagelu ngic-ngigac homacne yengele yowa lolu wacebawec.** <sup>17</sup> **Wacebame nosing nonole dameng weleme, ye kwelec kwekweine saleme yedi ngic-ngigac molic-molic biyachac wacebawec, yenge edoceanale hikelu miwec, ‘Ngenge kwesining, wiyac sasawa biyac bamockeicne ngiyegac.’**

<sup>18</sup> “**Inguc mime ngic-ngigac sasawadi migbedic ailu ngic molic-molic yedi yanguc miwec, ‘Na himong monic fuli babac, yogo hikelu nganinogale ngagegabac. Ilec ailu ngageng mi sowalena.’**

<sup>19</sup> “**Aime monicti miwec, ‘Na bafalo 10 holele ailu fuli bacebabac, yogo hikelu bolewa esoicebanogale ngagegabac. Ilec ailu ngageng mi sowalena.’**

<sup>20</sup> “**Inguc mime monicti miwec, ‘Na ngigac babac. Ilec ailu nalic mi fudacte.’**

<sup>21</sup> “**Aime kwelec kwekwe ye hikelu yowa yogo sasawa sugucneine edowec. Edome sugucneinedi aalic ngagelu kwelec kwekwe yanguc edowec, ‘Ga taon yefeina nga yefe-gogocka biyac hikenong. Hikelu ngic-ngigac waweweine nga pulingngine ailu donge-pisic nga hige-sowac, yenge mengocephalu kwesinong.’**

<sup>22</sup> “**Inguc mime kwelec kwekwedi hikelu yowa miwec, ingucnehac ailu hefaliyelu yanguc edowec, ‘Sugucneine, ga migic, yogo biyac aiyackegabac. Aime mac kwelin-abac sawaine fagachac.’**

<sup>23</sup> “**Inguc mime sugucneinedi miwec, ‘Ga yefe sugucna nga macte yefe gogoc fayackegac, iwa hikenong. Hikelu ngic-ngigac nganicebaengka kwesiningte sanangnehac milu mengocephang kwesilu, yengi macne kweline yago wakening.** <sup>24</sup> **Ngic esecne wacebabe hegileibong, yengelaicni monicti nosingne lobeicne yogo nalic mi nolu ngagedaicte, yogo edocngebagabac.’ ”**

*Yesu balaibenogale yowa  
Mat 10:37-38*

<sup>25</sup> Yesu hikeme ngic-ngigac habutowadi ye balaibelu hikeibong. Hikebong hefaliye nganicebalu yanguc miwec, <sup>26</sup> “**Monic ye wele balaibecnunogale ngagesigac, ye yeicne nenggac-mamac, nga ngigac adu-madecfocine, ailu ngic hae-gba nga sengfocine, ailu yeicne gagaine inguchac lobe mi holedaictewa, ye nale mic-tengteng nalic mi aidaicte.** <sup>27</sup> **Ailu monic ye malicngine tengkelu na mi balaibecnudaicte, ye nale mic-tengteng nalic mi aidaicte.**

<sup>28</sup> “**Ngengelaicni monicti donge hila-hilale mac-dale monic banogale ngagegac, ye mac nalic bayackedaicte me miyac. Ye waicke ngiyelu molickelu woc-wiyac fuline wafelu alingkedaictewa, madickedaicte.** <sup>29</sup> **Aime ye molickelu inguc mi ailu moc fungine sugu fungkelu badaicte. Aime mac tofaine mi badickedaictewa, ngic-ngigac yenge yogo nganilu tapiliine bawadaingte.** <sup>30</sup> **Ailu yanguc midaingte, ‘Ngic yogo ye mac banogale ailu tapiliine monic mi fawecte, mac bole mi bamoctowec.’**

<sup>31</sup> “**Me ngictau monicti ngicfocine 10 taosen moc bacebame hikelu ngictau monic ye ngicfocine 20 taosen welebong, yengeholec wenagudaingte, yogo mi madickedaicte. Ye wangiyelu yanguc ngage-wosaec aidaicte, nale ngicfocne 10 taosen, yenge ngabafocne kwesidaingte nalic wecebadaingte me miyac.** <sup>32</sup> **Yogo nalic mi aidaictewa, yenge dalickahac gaebongka yedi kwelec ngic gočne kwele-moniyang wenuc fikenale salecebame hikedaingte.** <sup>33</sup> **Ilec ngengelaicni monicti yeicne wiyac sasawa mi hegiledaictewa, ye nale mic-tengteng nalic mi aidaicte.**

<sup>34</sup> “**Kiwec yogo wiyac madicne. Aime yogodi angacine miyac aidaictewa, ngenge wenuc aibong hatacmac angacineholec nalic aidaicte?** <sup>35</sup> **Kiwec ingucnedi nosing feina lobeng angacine mi aidaicte. Ailu himong helocine nosing-bolewa fadaicte, yogodi kpatulebengka silicine ingucnehac mi aidaicte. Yogo moc wickecaigaing. Monic ye hedeckolecti yowa yago aneng ngagedaic.”**

## 15

*Lama sangkeicnele nangeng yowa*

*Mat 18:12-14*

<sup>1</sup> Takes-baba ngic nga bikic-baba sasawa yenge Yesule yowa ngagenogale yele emewa hikeyackebong. <sup>2</sup> Ailu Farisaio nga Wapongte yefe-yowale wewedu ngic yenge yowa kwelu damongsoc yanguc milu gaibong, “Ngic yago ye bikic-baba sebicebalu yengeholec nosing nocaigac.”

<sup>3</sup> Inguc mibong Yesudi nangeng yowa monic holelu yanguc edocebawec, <sup>4</sup> “**Ngengelacni monic ye lamafocine 10 bacebalu game, iwacni monic sangkeme ye wenuc aidaicte? Ye lama 99 hegilecebame himong kisiwa misaine mikacka domabong, hikelu lama moniyang yogo basackegacgu bafuwadaicte.** <sup>5</sup> **Bafuwalu beliyelu aticina lolu atickelu hikedaicte.** <sup>6</sup> **Hikelu macina sulumewec. Sulumelu ngic agofocine ailu soc tofafocine emeina gagaing, yenge wacebalu yanguc edocebadaicte, ‘Na lamane sangkewec, yogo bafuwagabacte, ngenge kwesibong naholec beliyenang.’** <sup>7</sup> **Aime yanguc edocngebab, pasi ingucne ngic bikickolec moniyangti sugu kwelehefaliyec aime, belic-belic silicine ingucnehac honocmengka fikedaicte. Nga ngicngigac 99 yenge dondonec biyachac galu kwelehefaliyecte yefe mi ngagelu gagaing, yengele ailu belic-belic ingucne mi fikedaicte.**

*Moneng sangkeicnele nangeng yowa*

<sup>8</sup> “**Me ngigac monic ye siliwa monengngine 10 bagacgume monicine sangkedaictewa, ye wenuc aidaicte? Ye hifaine kwendangkelu mac pelengkelu sanangnehac basackegacgu bafuwadaicte.** <sup>9</sup> **Bafuwalu ngigac agofocine ailu soc tofafocine emeina gagaing, yenge wacebalu yanguc edocebadaicte, ‘Na monengne wickebe sangkewec, yogo bafuwagabac. Ilec ailu ngenge kwesibong naholec beliyenang.’** <sup>10</sup> **Aime yanguc edocngebab, ngic bikickolec monicti kweleine hefaliyeme, Wapongte angelo yenge yengungtihac silicine ingucnehac beliyedaingte.”**

*Madec sangkeicnele nangeng yowa*

<sup>11</sup> Yesudi yowa taockelu yanguc miwec, “Ngic monic ye madeckecine yaeckang gaiboc. <sup>12</sup> **Aime madecine kpsicnedi mamacine yanguc edowec, ‘Mamac, ga monengmafa gocne heuckelu nale nebocine neleng nanec balu gadacte.’ Inguc mime mamacnginecti woc-wiyacine heuckelu madeckecine yetewec.**

<sup>13</sup> “**Yeteme dameng mi daliweme madec dicine ye monengmafaine kpaduckeyackelu balu himong dalicka hikewec. Hikelu iwa himongte gagawa monengmafatawaine balu gawec, yogo wickeyackewec.** <sup>14</sup> **Wickeyackeme miyac aime himong iwa loloc fikeme ye nosing nga wiyac sasawale kpungkelu.** <sup>15</sup> **Kpungkelu himong yogolec fileine monic yela hikeme hole-madec bame yedi becine damongkenale bec-odawa saleme lewec.\*** <sup>16</sup> **Lelu bec yengi nosing socine noibong, yogo nonale aicnowec. Aime monicti nosing monic mi gumelu gaibong.**

<sup>17</sup> “**Inguc aime ye yeuctihac gagaine ngani-motolu miwec, ‘Mamacte bole-madefocine yenge nosing nogebac aicaigaing. Aime nanibac yawa nosingte homalu homanogale aigabac.** <sup>18</sup> **Ilec na fangkelu mamacnela hikelu yanguc edodacte, ‘Mamac, na honocmengte aling yenge ailu gale haicka momoc bikic bafuwaiba.** <sup>19</sup> **Ilec hatacmac madecgone wacnudaingte, yogodi mi madickedaicte. Ga sifu bacnung bole-madecfocgone yengelacni monic ingucne ailu gadac,”** inguc ngagelu hikewec.

<sup>20</sup> “**Aime madec ye dalickahac leemewa mamacinedi biyac ngani-motolu yele kweleine sowalewec. Sowaleme yela gasacke hike hobalu mimuduc aicnowec.** <sup>21</sup> **Aicnome madecinedi yanguc miwec, ‘Mamac, na honocmengte aling yenge ailu gale haicka momoc bikic bafuwaiba. Ilec madecgone hatacmac wacnudaingte, yogodi mi madickedaicte.’**

15:2: Luk 5:30    15:4: Esek 34:11,16; Luk 19:10  
aicaigac. Ilec ailu bec mi damongkelu nocaigabiyeng.

\* 15:15: Israel aling yenge bec yogo ngagebong wonongkolec  
15:18: Mige 5:14

<sup>22</sup> “Aimebac mamacti kwelec kwekwefocine yanguc biyac edocebawec, ‘Ngenge biyachenang hikelu ngakpi dalicne madicnebenang balu kwesi holecnobong hauna. Ailu gbongte ling holecnolu hige-ebec higeina holecnobong hauna. <sup>23</sup> Ngenge hikelu bulumaka madecine buweicnehac, yogo bawelebong welu nongileng momoc no-angac ainang. <sup>24</sup> Madecne yago ye biyac homawec, inguc ngageibeng. Aimebac ye gagaine hatacmac hafuwagac. Ye sangkeweckacni hatacmac hafuwagabeleng.’ Inguc mime yenge no-angac aibong.

<sup>25</sup> “Inguc aibong madecine sugucnedi nosing-bolewa gacgu, iwacni kwesilu mac bangkalewec. Ailu gee holelu wewong fawecte ucine ngagelu <sup>26</sup> bole-ngic monic wackeme weleme uwacnowec, ‘Yogo omale inguc fikegac?’

<sup>27</sup> “Inguc mime bole-ngicti ameine bafaliyelu yanguc edowec, ‘Gbagone wesipilic mikac gacgu macka hatacmac madicne hefaliyegacte ailu, mamacgonedi mime bulumaka madecine buweicnehac wegabeleng.’

<sup>28</sup> “Inguc mime haeine ye aalic ngagelu macka fenale mi aicnome lobina domawec. Domame mamacinedi walu macka fenale dogbac aicnome, <sup>29</sup> haenedi mamacine yanguc edowec, ‘Ngagegic, na hifa edomeng gale kwelec bole bagalu ung-yowagone monic mi hegileiba. Inguc balu gabe agofocne yengeholec noning madecine monic nonogale mi noleing, miyac. <sup>30</sup> Aime madecgone yogo ye woc-wiyacgone yefe-ngigackolec galu wickeyackelu kwesime, gagibac yele ailu bulumaka madecine buweicne sugucnehac wegic.’

<sup>31</sup> “Inguc mime mamacinedi miwec, ‘Madecne, ga damengsoc naholec gacaigic. Nga nale wiyac sasawa yogo gale hocne. <sup>32</sup> Aime nongileng yakumac beliyelu no-angac aidabeleng. Gbagone yogo ye biyac homawec, inguc ngageibeng. Aimebac ye hatacmac gagaine hafuwagac. Ye sangkeweckacni hatacmac hafuwagabelengte, inguc ainang.’”

## 16

*Yesudi ame badu-badule yowa miwec*

<sup>1</sup> Yesudi mic-tengtengfocine yowa yanguc edocebawec, “Ngic monic moneng-mafaholec yedi moneng-damong ngic monic bawec. Bame ye yeholec galu yele moneng-mafa damongkelu gawec. Damongkelu game gocne yengi yele yanguc milu edoibong, ‘Moneng-damonggone yogo ye moneng-mafagone mi damongkelu kosa locaigac.’

<sup>2</sup> “Inguc aime yedi moneng-damongngine wackeme weleme yanguc edowec, ‘Ga aibabagone sowacne mibong ngagecaigabac. Ilec moneng-damong hatacmac nalic mi gadamecte. Ga ilec moneng-mafale nga bolegonele siduc sasawa kwelengkelu nelec.’

<sup>3</sup> “Inguc mime moneng-damong yeuctihac yanguc ngagewec, ‘Ngic sugucnedi moneng-damong bole nalacni baickedaiacte. Aime na mac bole-babale lokawedacte. Ailu tapiline mi fagacte, milockenoc ngic ainogale gamenugac. Ilec wenuc aidacte? <sup>4</sup> O, yakumac ngagegabac. Bolewacni baicnubong miyac aidacte. Ilec gocne yengi macnginang wacnungte aibaba monic aidacte.’

<sup>5</sup> “Inguc ngagelu ngic sasawa sugucnele ame balu gaibong, yenge filesoc filesoc wacebawec. Wacebame ngic molic-molic fewec, ye uwacnowec, ‘Ga sugucnene yelacni tofa edomeng aiing?’

<sup>6</sup> “Inguc mime bafaliyelu yanguc edowec, ‘Oliwa helocine dram 100.’\*’

“Inguc mime yanguc edowec, ‘Ga tofale hibigone biyac balu wangiyele dram 50 sugu kwelengkec.’

<sup>7</sup> “Milu ngic monic uwacnowec, ‘Nga ga tofa edomeng aiing?’

“Uwame bafaliyecnolu miwec, ‘Wit be 800, yogolecsoc.’†

“Inguc mime edolu miwec, ‘Ga tofale hibigone balu 640 sugu kwelengkec.’

<sup>8</sup> “Inguc aigacgu moneng-damong sowacne ye ngage-wosaec ailu aiwecte, moneng-mafa fileinedi mitengkewec. Ilec himongte aling yengi angocete aling ewalicebalu umacnehac baficnagucaigaing.‡

*Yesudi moneng-mafale yowa miwec*

<sup>9</sup> “Na yanguc edocngebagabac, moneng-mafa yogo dondonne miyac, ngenge wiyac yogo balu ngic baficebabong agofocngineng fikedaing. Inguc aibong moneng-mafale dameng miyac aidacte, iwa fafa-sanang macka bacngebadaingte.

15:24; Efs 2:1,5 \* 16:6; Dram monic ye 35 lita ngama ingucne. † 16:7; Be yogo ye kofi be ingucne. ‡ 16:8; Himongte aling yenge Wapongte yefe mi balaibeccaigaing. Nga angocete aling yenge Wapongte ngani-damongka gacaigaing.

<sup>10</sup> “Monic ye wiyac kpisicnemac madicne damongkecaigac, ye wiyac sugucne inguchac nalic damongkelu gadaicte. Nga monic ye kwesac ailu wiyac kpisicnemac dondonne mi damongkecaigac, ye kwesac ailu wiyac sugucne inguchac dondonne nalic mi damongkedaicte. <sup>11</sup> Aime ngenge yowa mi balaihelu himongte moneng-mafa sowale-sowaleine dondonne mi damongkedaingtewa, monicti wiyac noine dondonne damongkeningte molenginang nalic mi lodaicte. <sup>12</sup> Ailu ngenge yowa mi balaihelu ngic monicte moneng-mafa madicne mi damongkedaingtewa, ye ngenge wiyac mimoctolu ngelenale ngage-lilickedaicte.

<sup>13</sup> “Kwelec kwekwe moniyangti ngic sugucne yaeckang yekele kwelec nalic mi kwelu gadaicte, miyac. Ye monicte angac ngagelu monic lobe holecnodaicte, me monicta wetackelu monic hegiledaicte. Ngenge Wapong nga moneng-mafa yekele kwelec momochac nalic mi kwedaingte.”

*Yesudi Farisaio ngic yengele miwec*

<sup>14</sup> Yesudi yowa yogo mime Farisaio yenge hiye-monengte angac sugucne fayelewecte ailu, yogo ngagelu midelec aicnoibong. <sup>15</sup> Aibong Yesudi yanguc edocebawec, “Ngc yengi dondonne wacngabaningte, ngenge yogo yengele haicka aibaba dondonne aicaigaing. Aime Wapongtibac wiyac kwelenginang fagac, yogo ngageyackegac. I yangucte, ngic yenge wiyac monicte ngagebong feicne aicaigac, yogo Wapongti nganime aibaba sowacnebenang memenguine aigac.

<sup>16</sup> “Wapongte yefe-yowa Mosesdi kwelengkewec, ailu Wapongte siduc-mimi ngic yengele yowadi mibong yegengkeme ofecgu Yoane fikewec, dameng iwa motogac. Aime iwacni ofecgu ngic-ngigac yenge Wapongte ngani-damong mibong yegengkegac. Mibong yegengkeme ngic-ngigac yenge sanangkelu iwa fegaing. <sup>17</sup> Himong nga sawa baickebec miyac aidaicte, yogo doicneholec. Nga Wapongte yefe-yowa yogowacni sisine tofaine nalic mi miyac aidaicte, miyachenang. <sup>18</sup> Ngic monic ye ngigacine hegilelu ngigac monic badaicte, ye selo-boic aibaba aidaicte. Nga monic ye ngigacine hegileicne badaicte, ye inguchac selo-boic aibaba aidaicte.”

*Lasaros nga mafa-ngic yekele nangeng yowa*

<sup>19</sup> Aime Yesudi hatacmac yanguc miwec, “Moneng-mafaholec ngic monic gawec, ye gic-ngakpiine kpoluc madicnedi baicne. Ailu ngakpiine feina hibine mondo-sasac, madicne holewec. Holelu hadengsoc noba-nosingtowaholec nogebac ailu angac feina gawec. <sup>20</sup> Aime yele mac-yefewa, oda lobina ngic monic waweweine gawec, wacine Lasaros. Ye socine waicti wakeyackeicne, aime ngic yengi iwahac lobong falu gawec. <sup>21</sup> Fame ngic moneng-mafaholec yele tebowacni nosing kapucine walu gawec, ye yogo nonogale ailu gawec. Aime hoda yengi kwesilu waicine nobolickelu gaibong.

<sup>22</sup> “Gacgu ngic waweweine ye homame angelo yengi ye bahikelu Abrahamte emewa lobong gawec. Game ngic moneng-mafaholec ye inguchac homame longkeibong. <sup>23</sup> Longkeibong ye Wangec-macka galu iwa doic sugucne ngagewec. Inguc ngagecgu donge hilalu nganime Abraham dalickabenang ngiyewec. Ailu Lasaros nganime yele emewa ngiyewec. <sup>24</sup> Inguc nganilu wackelu micnowec, ‘Abraham ngambone, na yawa dac kwelina doic sugucne ngagegabac. Ilec ailu ga nale kwelegone sowaleme, Lasaros saleengka hikelu mole-gbongngine susucinedi misawa kpomulucke welelu beluna lome mogungkena.’

<sup>25</sup> “Inguc mime Abrahamtibac yanguc miwec, ‘Ngambone, ga wiyac monic nga-gesigamec. Ga himongka gaengka ngic-ngigac yengi woc-wiyac madicne madicne gelebong balu gaengka, Lasarosbac wiyac sowacne sugu lacnoibong. Yakumac Lasaros yagowa basanangkegaing. Aime gabac doic ngagegic. <sup>26</sup> Ailu hatacmac taockelu migabac, hewacnonggang lumotowa loicne fagac. Inguc aime monicti yawacni falockelu gala fudaicte, me iwacni yawa wele-wele, yogo aibibiyenoga.’

<sup>27</sup> “Inguc mime moneng-mafaholecti yanguc milu edowec, ‘Mamac, inguc aime ga Lasaros mimiloc aicnolu saleengka mamacte macka hikenana. <sup>28</sup> Na ngic haegbafocne 5 iwahac gagaing, yenge doic yagowahac weledaingkale, ye hikelu sawang-yowa milu edocebadaic.’

<sup>29</sup> “Inguc mime Abrahamti yanguc miwec, ‘Yenge Moses nga Wapongte siduc-mimi ngic yengele yowa ngagegacgu ngagesingkedaing.’

<sup>30</sup> “Inguc mime moneng-mafaholec gawecti miwec, ‘Abraham ngambone, yogo miyac. Monicti homackacni gboliyelu hike edocebamebac kwele-hefaliyec aidaingte.’



<sup>31</sup> “Inguc mime Abrahamti yanguc miwec, ‘Yenge Moses nga Wapongte siduc-mimi ngic yengele yowa ngagelu takicebadaictewa, monicti homackacni gboliyelu mime yenge yogo inguchac nalic mi balaibedaingte.’ ”

## 17

*Bikicte yowa*

*Mat 18:6-7,21-22; Mrk 9:42*

<sup>1</sup> Aime Yesudi mic-tengtengfocine yengele yanguc miwec, “Ngic-ngigac okac ingucne kwopocebame bikicka wawecaigaing, yogodi himongka fikedaicte. Nga monicti ngic-ngigac agofocine lokwesac ingucne ayeledaicte, mee, ye medeckedaic. <sup>2</sup> Entacka gocne yengi ngic monic balu balinga sugucne ubeina ubeecnolu kiwecka wickebong haudaictewa, yele umacine efeckedaicte. Aime ngic yogodi adu-madec kpisicne monic aicnome bikic bafuwadaictewa, Wapongti ye ameine baducnodaicte, yogo umactowaineholec. <sup>3</sup> Ngenge ngengileng damongnagulu gadabiyeng. Ngic hae-gbagone monicti bikic bafuwadaickale, ga ngelengkelu micnodamec. Nga ye kweleine hefaliyeme, bikicine hegiledamec. <sup>4</sup> Aime ye hadeng moniyangte kwelina alecine 7 ngama ga basowalec gudaicte. Ailu dameng 7 inguchac gala hat-acmac hefaliye welelu yanguc midaicte, ‘Bikic yogo aibacte kwelene hefaliyegac.’ Inguc midaictewa, bikicine hegiledamec.”

*Ngage-ngagesingte yowa*

<sup>5</sup> Aime Salecebaicne yenge Sugucnele miibong, “Ga ngage-ngagesingnonggeng basugulenolec.”

<sup>6</sup> Inguc mibong Sugucnedi bafaliyelu yanguc edocebawec, “Ngage-ngagesingnineng kpisicne mastet hucine ingucne fangeledecka midec, ngenge yoc monic noineholec\* yogo ye yeuctihac godocine fuluckelu kiwecka haulu domanale edodaingte. Aime ye yowangineng ngagelu nalic haulu domadaicte.

<sup>7</sup> “Aime ngengelacni monicti kwelec kwekweine bame bolewa himong heuckelu gadaicte, me lama-bulumaka damongkedaicte, yedi bolewacni kwesilu macka ofedaicte. Ofeme sugucnedi wangiyelu nosing nonale mi midaicte. <sup>8</sup> Yebac yanguc sugu edodaicte, ‘Ga ngakpigone holelu nosingne bamockelu damongnulu wangep domac. Wangep domaengka na nobe motome ga nosing misa nalic nodamecte.’ <sup>9</sup> Sugucnedi kwelec kwekwe bole-yowa inguc lacnome, ye yowaine ngagelu bole bayackedaicte, yogolec kwele-madic yowa mi edodaicte. <sup>10</sup> Ngenge inguchac wiyac ainingte edocngebaicne, yogo bamoctoyackelu yanguc midaing, ‘Nonge kwelec kwekwe sugu ailu holenonggeng moc bagabeleng.’ ”

*Ngic waic-sanangkolec 10 yenge madickeibong*

<sup>11</sup> Yesu inguc milu Yerusalem hikenogale yefe balaibelu Samaria nga Galili hewacnginac hikewec. <sup>12</sup> Hikelu mac-aling monicka felu ngic 10 waic-sanangnginengkolec yefewa wabong bafuwacebawec. Aime yenge dadalisuc edi domalu <sup>13</sup> wackelu miibong, “Yesu, Sugucne, ga nongele kwelegone sowalena.”

<sup>14</sup> Inguc mibong Yesudi nganicebalu yanguc edocebawec, “Ngenge hikelu depebaba ngic fikeyelelu socngineng edalicebaning.” Mime yenge yefewa hikeebongka socngineng madickewec.

<sup>15</sup> Aime madickeibong, yengelacni monicti socine madickeme nganilu hefaliye wele dacineholec aukwelu Wapong wacine bafewec. <sup>16</sup> Bafelu Yesule higewa haic-mesuinedi heluluckelu wawe falu yele kwele-madic yowa miwec. Nga ngic yogo ye Samaria ngic.

<sup>17</sup> Ye inguc aime Yesudi yanguc uwacnowec, “Na ngagebe ngic 10 yenge madickegaing. Aime ngic 9 yenge weni? <sup>18</sup> Ngic yago ye aling monickacni, yengele hewackacni yedi sugu Wapongte wac bafenale hefaliye kwesigac. Nga gocne yenge nalic inguchac aibong madickedec.” <sup>19</sup> Milu Yesudi yele yanguc miwec, “Ga fangkelu hikenong, ngage-ngagesinggonedi bamadicgugac.”

*Farisaio yenge Wapongte ngani-damongte Yesu uwacnoibong*

*Mat 24:23-28,37-41*

<sup>20</sup> Farisaio gocne yengi Wapongte ngani-damong ma damengka kwesidaicte, yogolec Yesu uwacnobong bafaliyelu yanguc edocebawec, “Wapongte ngani-damong kwesime ngenge yogo dongedi nalic mi nganidaingte. <sup>21</sup> Ailu yanguc nalic mi midaingte, ‘Ngenge nganing, ye ya, me ngenge nganing, ye edi.’ Ngagegaing, Wapongte ngani-damong yogo hewacnginang fagac.”

<sup>22</sup> Inguc milu mic-tengtengfocine yengele yanguc miwec, “**Gagcu dameng monic kwesime ngenge Ngicte Madecte hadeng moniyang sugu nganingte aingeledaecte. Ailu nalic mi nganidaingte.** <sup>23</sup> **Aime ngic-ngigac yengi ngengele yanguc midaingte, ‘Ngenge nganing, ye edi,’ me ‘Ngenge nganing, ye ya.’** Inguc mibong mi balai-becebadaing. Ailu iwa biyac mi hikedaing. <sup>24</sup> **I yangucte, sawawa pilatac bame angocti nebockacni nebocka hikaigac, Ngicte Madecte kwesi-kwesi damengka silicine ingucnehac fikelu yegengkedaecte.** <sup>25</sup> **Molickelubac ngic-ngigac aling yanguctihac gagaing, yengi ye lobe holecnobong, doic homacne ngagedaecte.**

<sup>26</sup> **“Noale damengka aibaba fikewec, Ngicte Madecte kwesi-kwesi damengka aibaba silicine ingucnehac fikedaecte.** <sup>27</sup> **Ngic-ngigac yenge nosing misa noibong. Ailu ngic yenge ngigac bacebaibong. Nga mamac yenge yanguc miibong, ‘Na adune ngic lacnodacte.’** Inguc ailu gaebongka, Noa wagewa feme misa sugulelu wiyac sasawa someckeyackeme sowalelu miyac aiyackewec. <sup>28</sup> **Aime Lotile damengka aibaba ingucnehac fikewec. Ngic-ngigac yenge nosing misa nolu woc-wiyac fuli balu salelu bole hole-duwec ailu mac balu gaibong.** <sup>29</sup> **Aime hadeng monicka inguc ailu gaebong Loti ye Sodom taon hegilewec. Hegileme hadeng iwahac Wapongti ngageme honocmengkacni dac nga salfa-posa yenge mac ingucnedi walu wiyac sasawa lobeyackeme miyac aiyackewec.** <sup>30</sup> **Aime Ngicte Madec fikelu yegengkenale damengngina aibaba ingucnehac aidaingte.**

<sup>31</sup> **“Dameng iwa monic ye mac feina ngiyedaictewa, ye haulu woc-wiyacine banogale mac kwelina mi fedaic. Ye hangoc hikedaic. Nga monic ye nosing-bolewa domadaictewa, ye wiyac monic banogale macna mi hefaliyelu hikedaic. Ye momoc hangoc hikedaic.** <sup>32</sup> **Loti ngigacinele aibaba fikewec, ngenge yogo ngagesidaing.** <sup>33</sup> **Monic ye gagaine sebilenale bole balu gadaecte, ye gagaine yogo sangkecnodaecte. Nga monic ye gagaine hegiledaecte, ye gagaine fikecnodaecte.** <sup>34</sup> **Aime yanguc edocngebabe, deboc yogowahac ngic-ngigac yaeckang yeke mapic moniyang feina faebocka, yekelacni monic balu monicbac hegileme fadaecte.** <sup>35</sup> **Nga ngigac yaeckang yeke momochac flawa masingka lalickelu gaebocka, yekelacni monic balu monic hegileme domadaecte.** <sup>36</sup> **[Nga ngic yaeckang yeke nosing-bolewa hike-boc, yekelacni monic balu monicbac hegileme bolewa gadaecte.]”**<sup>‡</sup>

<sup>37</sup> Inguc mime mic-tengtengfocine yengi yanguc uwacnoibong, “Sugucne, aibaba yogo wenuwa fikedaecte?”

Uwacnobong Yesudi bafaliyelu yanguc edocebawec, “**Aoc-aoc nango yenge sic kpeleckeicne fagaing, yenge iwa tumanecaigaing.**”<sup>§</sup>

## 18

*Ngigac monic ngage-wosaec ngicte bafickenogale miwec*

<sup>1</sup> Mic-tengteng yenge damengsoc tatakic mikac mimilic bole balu ganingte Yesudi nangeng yowa monic yanguc holelu edocebawec, <sup>2</sup> **“Yowa ngage-wosaec ngic monic ye taon monicka gawec. Ye Wapongte hangoc mi ailu gawec. Nga ngic-ngigac yengele alang-baba monic mi ailu gawec.** <sup>3</sup> **Aime taon yogowahac ngigac-hosec monic gawec, ye damengsoc yela kwesilu yanguc milu gawec, ‘Ngabafocne yengi basowalecnunogale ailu gagaingte, nale yowa dondonne milu baficnudamec.’**

<sup>4</sup> **“Ngigac ye inguc milu game ngage-wosaecti bafickenale yowaine mi ngagelu gawec. Aimebac lobeina ngigac yele takickeme ngage-wosaec ngic yeuctihac yanguc ngagewec, ‘Na Wapongte hangoc mi ailu gagabac. Nga ngic yengele alang-baba monic mi ngagabac.** <sup>5</sup> **Aime ngigac-hosec yago ye damengsoc nala kwesilu hataenelelu gagac. Ilec ailu yowaine bamadickebe. Inguc mi aidactewa, ye damengsoc kwesime takicnu-benangkedaecte.’”**

<sup>6</sup> **Aime Sugucnedi yanguc miwec, ‘Ngenge yowa ngage-wosaec ngic yedi aibaba dondonne mi balaibewec, yedi yowa miwec, yogo ngagesidaing.** <sup>7</sup> **Wapongti ngic-ngigacfocine bawosaecngewec, ngengele ailu ngage-yaec mi aigac. Ngenge deboc hadeng ye baficngibanale hinginengti yela hikeme ye ngengele ailu aibaba dondonna hocne baficngebadaecte.** <sup>8</sup> **Ailu yanguc edocngebabe, dameng mi daliweme aibaba dondonne fikengelenale bole biyac badaecte. Aime Ngicte Madecti**

<sup>17:23:</sup> Mrk 13:21; Luk 21:28    <sup>17:28:</sup> Fike 18:20; 19:25    <sup>† 17:29:</sup> Salfa-posa yogo posa monic dagec-dagec. Dacka lobeme dacine ucineholec aicaigac.    <sup>17:31:</sup> Mat 24:17-18    <sup>17:32:</sup> Fike 19:26    <sup>17:33:</sup> Luk 9:24    <sup>‡ 17:36:</sup> Hibi esecne Lukadi kwelengkwec, yogo nganilu iwacni kwelengkebong kwelengkebong ofewec, yengelacni gocne hewacine 36 yogowa mi fagac. Ngic-ngigac yenge hibi kwelengkeicne yogo wosaelu nganibong Lukadi mi kwelengkwec mecne.

<sup>§ 17:37:</sup> Nangeng yowa yogolec fungine yanguc, wiyac mi sangkedaecte, yogo fikelu yegengkedaecte.    <sup>18:1:</sup> Kol 4:2; 1Tim 5:17

**kwesidaicte, iwa ngic-ngigac ye ngagesingkegailing, ngic-ngigac yogo bafuwacebadacte, yenge homacne gagaing me miyac.”**

*Takes-baba nga Farisaio yekele siduc*

<sup>9</sup> Ngic gocne yenge yengileng dondonne ngagepangnagulu gocne lobe holeyelelu gagaing. Aime Yesudi yengele ngagelu nangeng yowa monic holelu yanguc miwec, <sup>10</sup>“**Ngic yaeckang, Farisaio monic nga takes-baba monic, yeke Wapong milockenogale Ibu-macka feiboc.** <sup>11</sup> Felu Farisaiodi domalu yeicnele kweleina ngagelu yanguc milu milockewec, ‘Wapong, na ngic gocne, hise ngic nga aibaba sowacne me selo-boic aicaigaing, yenge ingucne miyac. Ailu takes-baba ngic edi, na ye ingucne miyac. Ilec kwele-madic edocgugabac. <sup>12</sup> Ailu Sondasoc hadeng yaeckang nosing-sawe gacaigabac. Ailu wiyac sasawa balu gagabac, yogo 10kacni botoc balu moniyang gelecaigabac.’

<sup>13</sup>“**Aime takes-baba ngic yedi Farisaio nebocina dadalicne edi domawec. Domalu honocmengka hilame fenale aibibiyelubac, ngosockelu mondacina welu yanguc sugu milu milockewec, \* ‘Wapong, na bikic-baba, ga nale kwelegone sowalena.’**

<sup>14</sup>“**Aime yanguc edocngebab, takes-baba ngic yedi aibabaine inguc ailu miwecte Wapongte haicka ye ngic dondonne ailu macina hikewec. Nga Farisaio yebac miyac. Monic ye yeicnele ngageme feicne aicaigac, ye wacine bawadaicte. Nga monic ye yeicnele ngageme wawaine aicaigac, ye wacine bafedaicte.”**

*Yesudi adu-madec yengele miwec*

*Mat 19:13-15; Mrk 10:13-16*

<sup>15</sup> Ngic-ngigac gocne yenge Yesudi sabacfocngineng moledi oiyacebanale yela bacebalu kwesiibong. Kwesiibong mic-tengtengfocine yengi nganicebalubac ngelengkelu edocebair-bong. <sup>16</sup> Edocebabong Yesudibac adu-madec wacebame welebong mic-tengtengfocine yanguc edocebawec, “**Adu-madec kpisicne yenge nala nalic kwesining, ngenge aka mi holeyeling. Wapongte ngani-damong yogo adu-madec kpisicne yangucne yengele.** <sup>17</sup> Foinac, adu-madec kpisicne yenge Wapongte ngani-damong hefolecaigaing. Aime monic ye yenge ingucne mi aidaictewa, ye iwa nalic mi fedaicte, yogo noine edocngebabac.”

*Ngic mafaholecti Yesuholec yowa miwec*

*Mat 19:16-30; Mrk 10:17-31*

<sup>18</sup> Ngic micne monicti Yesu uwacnowec, “Wewedu madicne, na wenuc aibe Wapongti baficnume gaga-sanang badacte?”

<sup>19</sup> Inguc mime Yesudi bafaliyelu yanguc edowec, “**Ga omale madicne wacnugic? Wapong moniyangti sugu madicne gagac.** <sup>20</sup> **Ga ung-yowa yago biyac ngageing, ‘Ga selo-boic aibaba mi aidamec. Ngic-ngigac mi wehomacebadamec. Hise mi badamec.**

**Micka lolo mi aidamec.**

**Ailu nenggam-mamackecgone yeke alang bayetedamec.’ ” (Wah 20:12-16; Yef 5:16-20)**

<sup>21</sup> Inguc mime ngic yedi bafaliyelu yanguc miwec, “Ga migic, na yogo sasawa soc-gbolihac galu balaibelu aiibadi aicaigabachac.”

<sup>22</sup> Inguc mime Yesudi yogo ngagelu yanguc edowec, “**Ga wiyac moniyangte sugu aibibiyegic. Ga hikelu woc-wiyacgone sasawa fagac, yogo salelu moneng balu ngic-ngigac waweweine gagaing, yogo yeledamec. Inguc aiyengka wiyac madicne honocmengka fikegeledaicte. Aime welelu na balaiabcnudamec.”**

<sup>23</sup> Inguc mime ngic ye moneng nga woc-wiyacine bocyac facnowecte, yowa yogo ngagelu kweleine umale-benangkeme hikewec.

<sup>24</sup> Yesudi ngic ye nganime kwele-umac bame yanguc miwec, “**Ngic-ngigac moneng nga woc-wiyacnginengkolec yenge Wapongte ngani-damong kwelina fenogale aidaingte, yogo boleine sugucnehac.** <sup>25</sup> **I yangucte, Kameldi bungic yefina fedaicte, yogo boleine sugucne. Nga moneng nga woc-wiyackolec yedi Wapongte ngani-damongka fenogale aidaicte, yogodibac boletowaine sugucnehac.”**

<sup>26</sup> Inguc mime ngic-ngigac yenge yowa yogo ngagelu uwacnoibong, “Inguc aime madi nalic wasecne aidaicte?”

<sup>27</sup> Inguc mibong Yesudi yanguc miwec, “**Ngic-ngigac yengileng aibabanginengte ailu yogowa aibibiyelu hegilecaigaing, yogo Wapongtibac nalic aidaicte.”**

<sup>28</sup> Inguc mime Pitadi yanguc miwec, “Ngagegic, nonge woc-wiyacnonggeng sasawa hegilelu ga balaibecgulu gagabeleng.”

<sup>29-30</sup> Inguc mime Yesudi yanguc miwec, “**Foinac, monic ye Wapongte ngani-damongte ailu macine me ngigacine me adu-madecfocine nga ngic hae-gbafocine ailu nenggac-mamac hegilecebalu gagac, yela yanguc fikedaicte. Ye molic-molic mac, nga ngic hae-gbafocine yengeholec gawec, yogo ewalilu dameng yagowa hatacmac homacnehac badaicte. Aime motome himong silicine monicti kwesidaicte, iwa Sugucnedi gaga-sanang ingucnehac lacnodaicte, yogo noine edocngebagabac.**”

*Yesu yeicne homalu fangkanale miwec*

*Mat 20:17-19; Mrk 10:32-34*

<sup>31</sup> Aime Yesudi mic-tengtengfocine 12 yenge sugu mengoceba lelu yanguc edocebawec, “**Ngagegaing, nongileng Yerusalem hikegabeleng. Hikelu fenoga iwa Wapongte siduc-mimi ngic yengi molickelu Ngicte Madecte yowa, hibinginang kwelengkeibong, yogolec noine fikedaicte.** <sup>32</sup> **Aime ngic yengi ye balu Israel yengele alingkacni miyac, yengele molewa lobong yengi yowa kwekwe nga mife-miwa aicnolu sofokedaingte.** <sup>33</sup> **Ailu yengi muc-hududi welu wehomadaingte. Aime hadeng habackang aiyemewa, hatacmac gboliyelu fangkedaicte.**”

<sup>34</sup> Inguc mime mic-tengteng yenge yowa yogo ngagelu monic mi ngage-motoibong. Yowa yogolec fungine yogo yengela sangke-sangke fame Yesudi yowa miwec, yogo monic mi ngage-motoibong.

*Yesudi donge-kpisc ngic monic bamadickewec*

*Mat 20:29-34; Mrk 10:46-52*

<sup>35</sup> Yesu Yeriko taon bangkaleme, ngic donge-pisc monicti yefe mecina ngiyelu woc-wiyacte milocebalu gawec. <sup>36</sup> Ailu ngageme ngic-ngigac habutowadi ewalilu lec-welec aibong uwawec, “Yogo wenuc aigaing?”

<sup>37</sup> Uwame yanguc edoibong, “Yesu Nasaret-hocni, yedi welelu hikegac.”

<sup>38</sup> Inguc mibong yedi aukwelu wackelu yanguc miwec, “Yesu, Dawidile fikesaweckacni, ga nale kwelegone sowalena.”

<sup>39</sup> Inguc wackeme ngic-ngigac haicina hikeibong, yengi ye waickelu ngiyenale kpatalacnoibong. Aime ye sanangnehac hatacmac wackewec, “Dawidile fikesaweckacni, ga nale kwelegone sowalena.”

<sup>40</sup> Wackeme Yesudi domalu donge-pisc yela baleningte edocebame yenge emeina balebong Yesudi yanguc uwacnowec, <sup>41</sup> **“Na oma wiyac aigelebele ngagegic?”**

Mime bafaliyelu yanguc edowec, “Sugucne, dongene hilanogale ngagegabac.”

<sup>42</sup> Inguc mime Yesudi yanguc edowec, **“Ngage-ngagesinggonedi bamadicugacte, ga yakumac dongecne hilanong.”** <sup>43</sup> Inguc mime ngic ye yogowahac dongeine hilalu Yesu balaibelu Wapong wacine bafeme, ngic-ngigac sasawa yenge yogo nganilu Wapong mitengkeibong.

## 19

*Sakiasdi Yesu nganinogale aiwec*

<sup>1</sup> Yesu Yeriko falockelu leemewa <sup>2</sup> takes-baba ngic yengele micne monic moneng-mafatowaineholec, wacine Sakias, ye iwahac gawec. <sup>3</sup> Yedi Yesu ye ngic weningucne milu nganinogale ngagewec. Ailu ye ngic bangkacnele ailu, ngic-ngigac homacne yengele hewacka domalu Yesu nalic mi nganiwec. <sup>4</sup> Inguc aime Yesudi yefe lenogale lewec, ye ngic-ngigac yengele hewackacni iwa molickelu gasacke lelu fik yoc monic domawec, yogowa felu donge hilalu ngiyewec.

<sup>5</sup> Ngiyeme Yesu ye yogowa lelu dongeine hilame feme yanguc edowec, **“Sakias, na yakumac macgona fulu ngiyenogale ngagegabac. Ga biyac wanong.”** <sup>6</sup> Inguc mime Sakiasdi yockacni biyac walu Yesu belic-belicka hobalu mengockeme macina hikeiboc.

<sup>7</sup> Hikeboc ngic-ngigac sasawa yenge yogo nganilu nagebong nalic mi aime yanguc miibong, “Yesu ye bikic-baba ngic yele macka omale hikegac?”

<sup>8</sup> Inguc mibong Sakiasdi iwahac domalu Sugucnele miwec, “Sugucne, ngagenong. Mafane balu gagabac, yogowacni nebocine ngic-ngigac waweweine yeledacte. Nga gocne kwesac aiyelulu wiyac baiba, yengele ameine 4 hatacmac balu yeledacte.”

<sup>9</sup> Inguc mime Yesudi yanguc miwec, **“Wapongti yakumac mac kweline yagolec filefocine bikicte ameine bacebame wasecne aigaing. Ngic yago ye inguchac**

**Abrahamte fikesaweckacni. <sup>10</sup> I yangucte, Ngicte Madec ye ngic-ngigac sangkeicne basacebalu kpaducebanale ailu, bikicte ameine bame wasecne ainingte wawec."**

*Kwelec kwekwe ngic 10 moneng baibong, yogolec nangeng yowa*

*Mat 25:14-30*

<sup>11</sup> Ye inguc milu hike Yerusalem taon bangkaleme, yenge yanguc ngageibong, "Wapongte ngani-damong yogo dongenonggang biyac yegengkedaicte."

Inguc ngageibongte ailu Yesudi yowa nangengngine monic holelu taockelu yanguc edocebawec, <sup>12</sup> "Ngic monicti ngic sugucnele alingcakni fikelu, yedi yanguc ngagewec, 'Na himong dalicka hikebe, yengi ngictau wac nelebong hefaliyelu himong yagolec ngictau aidacte.'" <sup>13</sup> Aime ye hikenogale milu kwelec kwekwefocine 10 wacebawec. Wacebalu moneng 10 wacine mina botoc balu filesoc filesoc yelulu miwec, 'Na hikebewa ngenge moneng yagodi lanagulu moneng bole babong kwesilu noine nganidac.'\*

<sup>14</sup> "Aime ngic yele mac moniyangfocine, yengibac ye kweledi wickeibong. Inguc ailu ngic gocne yanguc milu edocebalu salecebabong hikeibong, 'Yedi nongele ngictau ganale angac mi ngagegabeleng.'

<sup>15</sup> "Aime ye iwa game yengi ngictau wac lacnobong gacgu hatacmac hefaliyelu himonggina kwesiwec. Kwesilu kwelec kwekwefocine moneng yelewec, yogo noine wenuc basuguleibong, yogo ngagenale wacebawec.

<sup>16</sup> "Wacebame kwelec kwekwe molic-molic yedi welelu miwec, 'Sugucne, na moneng neleing, yogo basugulelu moneng 10 hatacmac bafuwaiba.'

<sup>17</sup> "Inguc mime ngictaudi yanguc miwec, 'Ga kwelec kwekwe madicne ailu bole madicne baing. Ga yowa miiba, yogo balaihelu wiyac kpisicne madicne damongkingte ailu, taon 10 damongebacte hole-yowa tapiliineholec gelegabac.'

<sup>18</sup> "Aime yogolec lobeina kwelec kwekwe monic yedi welelu miwec, 'Sugucne, moneng neleing, yogowacni moneng 5lesoc hatacmac basuguleiba.'

<sup>19</sup> "Inguc mime ngictaudi miwec, 'Ga taon 5 yogolec damong locgugabac.'

<sup>20</sup> "Aime kwelec kwekwe monicti welelu yanguc miwec, 'Sugucne, monenggone yogo kpoluc kwelina sangkebe ngiyewec, yago nganic. <sup>21</sup> Ga ngic dacine ailu gocne yengi kpakpaduc bolele moneng lobong sifu yengelacni bacaigic. Nga gocne bolewa hole-duwec aihong sifu yengelacni noine kpaduckecaigic. Ilec ailu gale hangocnume inguc aiiba.'

<sup>22</sup> "Inguc mime ngictaudi miwec, 'Ga kwelec kwekwe sowacnebenang, yowagone bafaliyeha yagodi hicgudaicte. Na ngic dacine ailu kpakpaduc bolele moneng mi lolu sifu bacaigabac. Nga bolewa hole-duwec mi ailu sifu noine kpaduckecaigabac, yogo biyac ngagegic. <sup>23</sup> Aime ga omale monengne yago moneng bengka mi loing? Inguc aidengkabac na hefaliyelu monengne yogo nebocineholec badaba.'

<sup>24</sup> "Inguc milu ngic-ngigac gocne iwahac domaibong, yengele yanguc miwec, 'Ngenge yelacni moneng ewalilu kwelec kwekwe monengngine 10 facnogac, ye lacnoning.'

<sup>25</sup> "Inguc mime yengi yanguc miibong, 'Sugucne, ye monengngine 10 biyac fagac.'

<sup>26</sup> "Inguc mibong bafaliyelu yanguc edocebawec, 'Ngic monic wiyac gocne facnogac, ye wiyac fagac, yogo ewalidaicte, yogo edocngebagabac. <sup>27</sup> Aime ngabafocne yago yenge nani ngictaungineng galu damongebabele takicebawec, ngenge ngic yogo yawa baceba kwesilu nale haicka wehomacebaning.'"

*Yesudi ngictau ingucne ailu Yerusalem fewec*

*Mat 21:1-11; Mrk 11:1-11; Yoa 12:12-19*

<sup>28</sup> Yesu yowa inguc mime motome ye molickelu Yerusalem fewec. <sup>29</sup> Felu kupic wacine Oliwa, yogolec emewa kwesilu Betfage nga Betani mac-himong bangkalewec. Bangkalelu mic-tengtengkecine yaeckang yanguc milu salecepawec, <sup>30</sup> "Ngeke dondonne hikelu mac-aling yefe molic-molicka ngiyegac, iwa felu donggi madicine monic ngicti feina mi ngiyeicne. Donggi yogo witickebong domagac, ngeke yogo bafuwalu mucine lukelu balu kwesinic. <sup>31</sup> Aime entacka monicti yanguc uwangetedaicte, 'Ngeke wenuc ainicte lukegac?' Inguc uwame yanguc edodabiyec, 'Sugucne ye yagodi bole banogale migac.'"

19:9: Sale 16:31; Luk 13:16      19:10: Luk 15:4; Yoa 3:17; 1Tim 1:15  
yogolec bole-fuli.      19:17: Luk 16:10      19:26: Mat 13:12; Luk 8:18

\* 19:13: Mina moniyang yogo hadeng 100

<sup>32</sup> Yesudi inguc milu ngic salecepame hikelu ye miwec, yogo sasawa bafuwaiboc. <sup>33</sup> Bafuwalu donggi madecine lukeboc filefocine yengi yanguc uwayeteibong, “Ngeke donggi madecine wenuc ainicte lukegaic?”

<sup>34</sup> Inguc mibong yeki miiboc, “Sugucne ye yagodi bole banogale migac.”

<sup>35</sup> Inguc milu yeke donggi madecine yogo Yesula balu hikeiboc. Ailu Yesudi felu ngiyenale yeke ngakpinginec dalicne hemoctolu donggi madecinele feiwa lumackelu Yesu fenale bafickeiboc. <sup>36</sup> Bafickeboc ye felu ngiyeme hikeemewa, iwa ngic-ngigac yenge ngakpinginec dalicne hemoctolu yefewa lumackeibong.

<sup>37</sup> Aime Yerusalem emeina Oliwa kupicte yefe haugac, iwa yele mic-tengtengfocine habu sugucne yenge pasi damuineholec nganilu gaibong. Ilec ailu kwele-madic ngagelu beliyelu uc sugucneholec Wapong mitengkelu yanguc miibong,

<sup>38</sup> “Ngictau Sugucnele wacka welegac, ye mimi-madicineholec. (Mige 118:26) Honocmenga kwele-mogung fame sawawa wilini wacine feicne fadaic.”

<sup>39</sup> Wackelu mitengkebong Farisaio gocne habu yengele hewacka domaibong, yengi Yesu yanguc uwacnoibong, “Wewedu, ga mic-tengtengfocgone ngelengkeyelelu miyengka waickening.”

<sup>40</sup> Inguc mibong Yesudi bafaliyelu yanguc edocebawec, “**Na yanguc edocngebabe, yenge waickebong posa yengi aukwedaingte.**”

<sup>41</sup> Yesu Yerusalem bangkalelu taon yogo nganilu ngic-ngigac yengele hiyalu <sup>42</sup> yanguc miwec, “**Ngenge yanguctihac kwele-mogungkolec ganingte yefe ngani-motobong madickededeka. Aime yefe yogobac yakumac haicnginang mi yegengkelu sangke-sangke fagac.** <sup>43</sup> Ngengele dameng monic kwesidaicte, yogowa ngabafocngineng yenge neboc nga nebocka hewalingnebalu himong heuckelu habuwebong feme igocngebadaingte. <sup>44</sup> Igocnebalu yengi basowalecnggebadaingte. Ailu adu-madefocngineng ngengele hewacka gagabiyeng, yenge wehomacebayackebong himongka fadaingte. Ailu ngengele kwelina mac nga odale posa monicti monicte feiwa mi hegilebong ngiyedaicte. I yangucte, Wapongti welegac, ngenge yogo mi ngani-motogaing.”

*Yesudi Ibu-macka wiyac salebong yebicebawec*

*Mat 21:12-17; Mrk 11:15-19; Yoa 2:13-22*

<sup>45</sup> Ailu Yesudi Wapongte Ibu-macte oda kwelina felu ngic yengi wiyac salelu gaibong, yenge yebicebalu <sup>46</sup> yanguc edocebawec, “**Yowa yanguc kwelengkeicne fagac, ‘Nale Ibu-mac yagodi mimilocne mac, wacine inguc wackenoga.’** (Yes 56:7)

**Aime ngengibac yogo bafaliyebong,**

**‘Hise-baba yengele sangke-sangke mac aigac.’**”

(Yer 7:11)

<sup>47</sup> Aime Yesudi hadengsoc Ibu-macka wewedu bole balu gawec. Gaemewa depec-baba ngic micne nga Wapongte yefe-yowale wewedu ngic, ailu habu yengele micnefocngineng yenge Yesu wehomanogale aibibiyelu gaibong. <sup>48</sup> Aime ngic-ngigac yenge yele yowa ngagepangkelu gaibong. Ailu yowaine monic hegilingentge mi ngegebong. Ilec ailu ngaba yenge ye baickeningte yefe monic mi bafuwaibong.

## 20

*Madi Yesu bole-yowa lacnowec*

*Mat 21:23-27; Mrk 11:27-33*

<sup>1</sup> Yesu ye dameng monicka Ibu-macka Siduc Madicne ngic-ngigac edocebalu weduyelelu mime yegengkewec. Mime depec-baba ngic micne nga Wapongte yefe-yowale wewedu ngic, ailu Yuda ngic-ngigac yengele damongfocngineng yengi Yesula kwesilu <sup>2</sup> uwacnolu yanguc miibong, “Edocnubac, ga oma bole-yowa tapiliineholec yogo bagamec? Ailu madi bole-yowa tapiliineholec yogo gelewec?”

<sup>3</sup> Mibong bafaliyelu yanguc edocebawec, “**Aime na inguchac uwangelebe edocnuning.** <sup>4</sup> **Yoanedi misa-lowac bole balu gawec, bole-yowa tapiliineholec yogo honocmengkacni me ngickacni?”**

<sup>5</sup> Inguc mime yenge yengilangkac mingagec ailu yanguc miibong, “Nongileng wenuc midabelengte? ‘Yogo honocmengkacni’ inguc midabelengtewa, ye yanguc uwanoledaicte, ‘Inguc ngagelubac ngenge omale ye mi ngagesingkeibong?’ <sup>6</sup> Me ‘ngickacni’ inguc midabelengtewa, ngic-ngigac yenge posadi wickelu holecnubabong homadabelengte. I yangucte, Yoane ye Wapongte siduc-mimi ngic, inguc kwelengingntge ngagepangkegaing.”

<sup>7</sup> Ilec yengi bafaliyelu yanguc edoibong, “Nonge bole yogo wenuwacni welegac, yogo mi ngagegabeng.”

<sup>8</sup> Inguc mibong Yesudi yanguc edocebawec, **“Inguc migaingte, na inguchac male bole-yowa tapiliineholec balu gagabac, yogo nalic mi edocngebadacte.”**

*Waing bolele damong sowacne  
Mat 21:33-46; Mrk 12:1-12*

<sup>9</sup> Inguc milu Yesudi yowa nangengngine ngic-ngigac yanguc edocebawec, **“Ngic monicti waing bole gbolicne duwewec. Duweme motome ye waing bole damongkeningte ngic gocne bafuwacebalu yengeholec yowa milu hefewec. Ailu yeicnebac dameng dalicne himong monicka ganale hikewec.**

<sup>10</sup> **“Hikelu gacgume waing noine babale dameng weleme, kwelec kwekwe ngic monic saleme bole-damong yengela waing noine nebocine ye lacnoningte hikewec. Hikeme bole-damong yengi kwelec kwekwe yogo dobo welu mochenang salebong hikewec. <sup>11</sup> Hikeme bole fileinedi inguc nganilu hatacmac kwelec kwekwe monic salewec. Saleme hikeme bole-damong yengi ye inguchac dobo welu misofoc aicnolu mochenang salebong hikewec. <sup>12</sup> Aime hatacmac kwelec kwekweine monic saleme hikeme alecine habackang aime, ye inguchac dobo webong sacine wame yebiyebong hikewec.**

<sup>13</sup> **“Inguc aime bole fileinedi miwec, ‘Na wenuc aidacte? O, madecnebenang kweleinedi angac ngagecnocaigabac, ye salebe hikeme ye alang bacnodaingte mecne.’**

<sup>14</sup> **“Milu saleme bole-damong yengi ye nganilu yengilangkac mingagac ailu yanguc miibong, ‘Yedi gacgu bole yago bame yeicne aidaicte. Nongileng ye wehomabeng yele himong nga mole-damoc yago nongileng aidaic.’ <sup>15</sup> Inguc milu bole fileinele madechenang yogo balu fuluckelu wickebong waing bole lobina haume balu wehomaibong.”**

**“Aime bole fileine yedi bole-damong yenge wenuc ayeledaicte? <sup>16</sup> Ye kwesilu waing bolele damong wehomacebalu, waing bole yogo bole-damong aling gocne yengele molewa lodaicte.”**

Mime yenge yogo ngagelu yanguc miibong, “Inguchenang mi fikedaic.”

<sup>17</sup> Inguc mibong Yesudi nganicebalu yanguc miwec, **“Fungine omale yanguc kwelelengkeicne fagac, yogo ngagedaing.**

**‘Mac-baba ngic yenge posa yogo hegilelu wickeibong, posa yogodi mac unggulucinele posa-bosing sanangne aiwec domagac.’** *(Mige 118:22)*

<sup>18</sup> **Ngic-ngigac sasawa yenge posa yogolec feiwa wawedaingte, yenge socngineng lokeyackedaicte. Nga posa yogodi yengele feiwa wawecebadaicte, yogo fasosocame kapuc kwedaingte.”**

<sup>19</sup> Aime Wapongte yefe-yowale wewedu ngic, nga depec-baba ngic micne, yenge Yesudi yengele ngagelu nangeng yowa yogo holelu miwec, yenge yogo biyac ngage-motoibong. Aime yenge ye biyac banogale yefe basackeibong. Ailubac ngic-ngigac yengele hangocebame aibibiyelu hegileibong.

*Yesu takesle uwacnoibong  
Mat 22:15-22; Mrk 12:13-17*

<sup>20</sup> Ilec yenge Yesu nganibiyelu ngicfocngineng salecebabong, yenge yowaine ngagegaing silic yela hikeibong. Hikelu oma yowa wenuc mime ngagelubac prowinsle gawana bole-yowa tapiliineholec yele molewa loningte ngageibong. <sup>21</sup> Ailu ngic yogo yenge Yesule miibong, “Wewedu, yowa migic nga wiyac wedunolegic, yogo sasawa dondonne. Ailu Wapongte yefe noine, yogo sugu ngic-ngigac edocebalu weduyelegaigic. Ailu feicne waicnele yowa mi micaigic, gale inguc ngagecaigabeleng. <sup>22</sup> Ilec edocnubac, nongileng ngictau Sisa takes lacnodabelengte, me mi lacnodabelengte, yogolec yefe dondonne wenuc fagac?”

<sup>23</sup> Inguc mibong Yesudi kwesacngineng ngani-motolu yanguc edocebawec, <sup>24</sup> **“Ngenge moneng monic edalicnubong nganibe! Iluc nga hibi yago male?”**

Uwayeleme miibong, “Yogo Sisale.”

<sup>25</sup> Inguc mibong yedi yanguc edocebawec, **“Ilec ngenge Sisale wiyac, yogo Sisa lacnodaing. Nga Wapongte wiyac, yogo Wapong lacnodaing!”**

<sup>26</sup> Inguc mime yenge kwatackelu ngic-ngigac yengele haicka micka lolo aicnolu ye banogale aibibiyebong yowangineng ameine inguc bafaliyewec. Ilec kwatackelu yowa monic mi miibong.

*Homackacni gboliyelu fangke-fangke yogolec uwacnoibong  
Mat 22:23-33; Mrk 12:18-27*

<sup>27</sup> Aime Sadyusi yenge homackacni gboliyelu fangke-fangke monic mi fagac, inguc micaigaing, yengelacni gocnedi Yesula wele uwacnolu miibong, <sup>28</sup> “Wewedu, Mosesdi yowa yanguc kwelengkenolewec.

‘Ngc monic ye ngigac balu gboliine mikac gacgu homame, ngic ye le gbainedi haeinele hosec balu gbolihocec ailu haeinele wac bafangkelu gadaicte.’ (Yef25:5-10)

<sup>29</sup> Dameng monicka hae-gba 7 gaibong. Aime haengineng molic-molicti ngigac balu gboli mikac moc gacgu homawec. <sup>30</sup> Homame gbainedi haeinele hosec balu <sup>31</sup> moc gacgu homawec. Aime gbanginecti hosec yogo balu inguchac gboli mikac gacgu homawec. Homame hae-gba 7 yenge ngigac yogohac balu gbolifocngineng mikac gacgu homayack-eibong. <sup>32</sup> Homayackebong ngigac ye inguchac homawec. <sup>33</sup> Homame ngic 7 yenge ngigac yogohac baibongte ailu, gacgu homackacni gboliyelu fangkedaingte, dameng iwa ngigac yogo ye male ngigacbenang aidaicte?”

<sup>34</sup> Inguc mibong Yesudi bafaliyelu yanguc edocebawec, “**Himong yagolec gaga damengka ngicti ngigac bagaing. Nga mamac yenge migaing ‘Na adune ngic lacnodacte.’** <sup>35</sup> Aime ngic-ngigac yenge homackacni gboliyelu fangke-fangke, nga gaganang banogale aidaingte, dameng yogowa ngic-ngigac yenge mi banagudaingte. Aime mamac monicti ‘Na adune ngic lacnodacte,’ yogo nalic mi midaicte. <sup>36</sup> Yenge homackacni gboliyelu fangke-fangke, yagolec fungine aigaing. Yenge Wapongte adu-madecfocine ailu angelo ingucne galu hatacmac nalic mi homadaingte. <sup>37</sup> Aime homackacni gboliyelu fangke-fangke fagac, yogo Mosesdi inguchac kwelengkelu mime yegengkeyelewec. I yangucte, yoc kpisicna dac-ubilang fikeme nganilu yogowa lelu Sugucnele yanguc miwec,

‘**Ga Abraham nga Aisak ailu Yakobo yengele Wapong gagichac.**’ (Wah 3:6)

<sup>38</sup> Ailu ye ngic homaicne yengele Wapong miyac. Ye ngic gbolicne gagaing, yengele Wapong. **Ye le ngage-ngagewa sasawadi gaganginengkolec aigaing.**”

<sup>39</sup> Aime Wapongte yefe-yowale wewedu ngic gocne yengi yanguc miibong, “Wewedu, yowa madicnebanang migic.” <sup>40</sup> Aime yagolec lobeina hatacmac uwacnongte hangocebame hegileibong.

*Yesu Dawidile gboli miibong*

*Mat 22:41-46; Mrk 12:35-37*

<sup>41</sup> Inguc aime Yesudi miwec, “**Ngenge yowa yanguc ngagesidaing, ailu yowa yanguc fagac, ‘Mesia ye Dawidile fikesaweckacni.’** <sup>42</sup> Aime Dawidi ye yeuctihac Miti geewa yanguc miwec fagac,

‘**Sugucnedi nale Sugucne edowec,\* “Ga folenapec ngiyeengka <sup>43</sup> gacgu ngabafoc-gone locebabe higegone bageina muki ingucne aidaingte.”**’ (Mige 110:1)

<sup>44</sup> **Ilec Dawidi ye Mesia ‘Nale Sugucne’ wackewec. Aime Mesia ye wenucka Dawidile fikesaweckacni aigac? Ye Dawidile Sugucne.”†**

*Yesudi Wapongte yefe-yowale wewedu ngic yengele sawang-yowa miwec*

*Mat 23:1-36; Mrk 12:38-40; Luk 11:37-54*

<sup>45</sup> Aime Yesu ye ngic-ngigac sasawa yengele haicka mic-tengtengfocine yanguc edocebawec, <sup>46</sup> “**Ngenge Wapongte yefe-yowale wewedu ngic yengele ngani-motolu gadabiyeng. Yenge angacnginengte ngakpi dalicne holelu gabong, ngic-ngigac yengi wenac-madic edocebaningte sobeng sugucna hike-kwesic aicaigaing. Ailu kpakpaduc macka nga noba-nosing nonole damengka molic-molic ngiye-ngiyewa ngiyenogale angacebaigac.** <sup>47</sup> Ailu yenge ngigac-hosec yengele mac ewaliceba-caigaing. Ailu ngage-madicebaningte mimiloc dalicnehac milockecaigaing. Yenge kwesac-aibaba ingucne aicaigabiyengte ameine sugucnehac badaingte.”

## 21

*Ngigac-hosec monicti ibu lowec*

*Mrk 12:41-44*

<sup>1</sup> Aime Yesu ye donge hilalu nganime moneng-mafaholec yenge ibungineng Ibumacte katapawa lobong hauwec. <sup>2</sup> Haume ngigac-hosec waweweine monicti moneng hakic kpisicne sasacnehac yaeckang lome hauwec. Haume nganilu <sup>3</sup> yanguc miwec, “**Ngigac-hosec waweweine yagodi moneng logac, yogodi ngic-ngigac sasawa ibu**

\* **20:42:** Miti Geewa Hibru yowawa Sugucnele wac yaeckangti fagaic. Molic-molic Hibru yowawa wacine yogo “Yawe” fagac. Nga yagolec lobeina, “Sugucne” inguc fagac. Luka iwa Grik yowawa Sugucnele wac moniyang sugu bafaliyeicne fagac. “Nale Sugucne” yogo Mesia. † **20:44:** Mesia ye Dawidile fikesaweckacni, ailu ye Sugucneine aigachac.



**logabiyeng, yenge ewalicebagac, yogo noinebenang edocngebagabac. <sup>4</sup>I yangucte, ngic-ngigac sasawa yenge woc-wiyactowangineng wakelu fagac, yogowacni ibungineng logabiyeng. Nga ngigac yebac wiyac facnogac, yogo hocne sasawa loyackelu mochenang gagac.”**

*Ibu-mac sowaledaichte*

*Mat 24:1-2; Mrk 13:1-2*

<sup>5</sup> Aime gocne yenge Wapongte Ibu-mac hibine madicnedi baicne, yogo nganilu siduc miibong. I yangucte, ibu nga wiyac haicine monic monicti Ibu-macka Wapong kwele-madicka lacnolu gaibong, yogodi Ibu-mac hibineholec ainale lesoine lolu gaibong. Inguc mibong Yesudi yanguc edocebawec, <sup>6</sup>“**Mac yogo ngani-angac homacne aigaing. Dameng monic kwesidaichte, yogowa sasawa hembalackebong hikeyackedaichte. Hikeyackeme posa monicti monicte feiwa mi hegilebong ngiyedaichte.”**

*Yesu kwesinale yowa*

*Mat 24:3-14; Mrk 13:3-13*

<sup>7</sup> Inguc mime yengi uwacnoibong, “Wewedu, ga Ibu-macte yowa migic, yogo ma damengka fikedaichte? Ailu dameng iwa maaine wenuc fikemebac, yowa sasawa yogolec noine yegengkedaichte?”

<sup>8</sup> Inguc mibong Yesudi yanguc miwec, “**Monicti kwesacngebadaickale, nenge ngani-motolu gadabiyeng. I yangucte, ngic bocyac yengi kwesilu nale wac wackelu midaingte, ‘Na Mesia,’ ailu ‘Dameng biyac bangkalegac.’** Inguc mibong mi bal-aibecebadaing! <sup>9</sup> Aime hudu sugucne fikedaichte. Nga ngic-ngigac aalic ngagelu hudu wedaingte, yogolec siduc ngagelu medecgebame hangoc mi aidaing! I yangucte, wiyac ingucne molickelu fikedaichte. Nga dameng moto-motoinebac yogowahac biyac mi miyac aidaichte, miyac.”

<sup>10</sup> Ailu hatacmac taockelu yanguc miwec, “**Himong gocne yengi himong monick-acni gocne yengeholec hudu wenagulu gadaingte. Ailu ngictau monicte alingti ngictau monicte ailing yengeholec ngaba ainagudaingte.** <sup>11</sup> Aime memeya sugucne yenge himongne himongne badaingte. Ailu nosingte loloc-dameng fikelu hikedaingte. Ailu huc sugucne himong monicka nga monicka inguchac fikelu hikedaingte. Nga sawawa maa silicine haicine monic monic, hangoc-hangocine fikebong nganidaingte.

<sup>12</sup> “**Aibaba ingucne mi fikeemewahac yenge nale wacte ailu weyebic aingelelu bacngobalu kpakpaduc macte damong yengele molewa locngabadaingte. Aime yengi muc-macka locngabadaingte. Ailu ngictau nga gawana yengela bacngobalu hikedaingte.** <sup>13</sup> Inguc aibong nenge dameng yogowahac nale Siduc Madicne mibong yegengkelu hikedaidaichte. <sup>14-15</sup> Yogowa nani ngage-ngage-motoc ngelelu yowa micnginang lodacte. Inguc aibe ngabafocngineng yengele hewackacni yowa ngeledacte, yogo monicti nalic mi bawadaichte, me wedaichte. Ilec ailu nenge yengele haicka yowa minang milu ngageboc monic mi aidabiyeng. <sup>16</sup> Aime nenggac-mamac nga ngic hae-gbafocngineng, ailu sac-tofafocngineng nga agofocngineng yengi ngaba yengele molewa locngabadaingte. Ailu ngengelacni gocne wehomacebadaingte. <sup>17</sup> Aime nale wacte ailu sasawadi kweledi wicngebabong <sup>18</sup> ngengele hodoc-dowecngineng monictibac nalic mi sifuwedaichte.\* <sup>19</sup> Nenge sanangnehac domadaingtewa, ngengileng gaganginengte gaga-sanang badaingte.

*Yerusalem sowaledaichte*

*Mat 24:15-21; Mrk 13:14-19*

<sup>20</sup> “**Aime hudu-baba ngic-habu yenge Yerusalem hewalingkedaingte, dameng iwa yanguc biyac ngagedaingte, taon sowalenale dameng biyac welegac.** <sup>21-22</sup> **Dameng yogo ame badu-badule dameng, aime yowa sasawa kwelengkeicne fagac, yogolec noine fikedaichte. Ilec ailu Yudeya himongka gagaing, yenge dameng yogowa hikelu tikiwa fedaing. Nga Yerusalem kwelina gagaing, yenge hikelu lobina haudaing. Nga lobina gagaing, yenge Yerusalem kwelina mi fedaing!** <sup>23</sup> **Himong yagowa umac sugucne fikeme ngic-ngigac ngaba aalicineholec aiyeledaingte. Ilec ailu dameng iwa ngigac gobeholec gagaing, nga nenggac kogoc amuc gumecebalu gagaing, mee, yenge medecebadaic.** <sup>24</sup> **Aime ngaba yengi hudule fitecti ngic gocne wehomacebalu, gocne witicebalu himongne himongne ngic-ngigac sasawa yengela baceba hikelu**

21:3: 2Kor 8:12    21:6: Luk 19:44    21:14-15: Luk 12:11-12; Sale 6:10    21:16: Mat 10:21-22    \* 21:18: Hodoc-dowec yogo gagangineng ingucne, aime mi miyac aidaingte.    21:21-22: Hos 9:7; Yer 5:29; 46:10

locebadaingte. Aime Israel yengele aling kacni miyac yengi kwesilu Yerusalem higenginengti edesockelu gaebongka yengele dameng yogo motome hikedaingte.

*Ngicte Madec hatacmac kwesidaicte*

*Mat 24:29-31; Mrk 13:24-27*

<sup>25</sup> “**Dameng iwa wenac nga tamacne ailu asocmeng yengela maa fikedaicte. Aime himongne himongne yenge kwele-umac balu dingongka domalu kiwec dibongte uc ngagelu ngageboc ailu kauc badaingte.** <sup>26</sup> **Aime sawawa wiyac sasawa yengele tapili yogo teng-teng kwedaingte. Ilec ngic-ngigac yenge umac yogodi himongka fikenale ngagelu ngageboc nga hangoc ailu homa-gbolic aidaingte.** <sup>27</sup> **Aime ngagedaingte, dameng iwa yenge Ngicte Madec ye tapili nga hibi-angocineholecti kaguwa kwelina kwesime nganidaingte.** <sup>28</sup> **Aibaba yogo fikenale aiyemewa bikicte mucakni lukecngabahong feningte dameng bangkalegac. Ilec ailu fangkelu hodocngineng bafangkelu nganilu domadaingte.**”

*Yesudi damengte yocka nangeng yowa holelu miwec*

*Mat 24:32-35; Mrk 13:28-31*

<sup>29</sup> Aime Yesu ye nangeng yowa monic yanguc edocebawec, “**Ngenge fik yoc nga yoc sasawa nganilu ngagedaing.**† <sup>30</sup> **Yoc yenge hekengngineng fosedaingtewa, wenac dameng bangkalegac, inguc ngengung biyac ngagedaingte!** <sup>31</sup> **Ngenge wiyac sasawa migabac, yogo fikeme nganilu inguchac yanguc ngagedaing, Wapongte nganidamong biyac bangkalecnubagac.**

<sup>32</sup> “**Foinac, ngic-ngigac aling yanguctihac gagaing, ngenge mi homaebongkahac, wiyac sasawa yogo fikedaicte, yogo noine edocngebabagac.** <sup>33</sup> **Aime himong nga sawa yeke gagcu miyac aidabiyecte. Nga nale yowabac mi miyac aidaicte.**

<sup>34</sup> “**Aime kwele-sifuc nga misa-nonole ailu himongte ngageboc yogodi bacngebame umaledaingkale, nga hadeng yogodi biyac fikengledaickale, ngenge damong balu gadaing!** <sup>35</sup> **I yangucte, subadi sic wecaigac, ingucnehac hadeng yogodi himongne himongne ngic-ngigac sasawa yengela fikedaicte.** <sup>36</sup> **Ilec ngenge damengsoc deboc-gboli galu mimiloc bole balu gadaing. Bagacgu wiyac sasawa yogo fikenangale aigac, yogo ewalilu tapili balu Ngicte Madec, yele haicka sanangkelu domadaingte.**”

<sup>37</sup> Aime dameng yogowahac Yesu ye hadengsoc Ibu-macka wewedu bole balu gawec. Balu gacgume mac aweleme kupic monic wacine Oliwa, iwa hikeme deboleme ngiyelu gawec. <sup>38</sup> Aime mac saeme ngic-ngigac sasawa yenge Ibu-macka yele yowa hatacmac ngageningte hikelu gaibong.

## 22

*Yudasdi Yesu baningte mipangkewec*

*Mat 26:1-5,14-16; Mrk 14:1-2,10-11; Yoa 11:45-53*

<sup>1</sup> Hombang monic, bret yis mikac nocaigaing, wacine monic Ewalicebaicnele hombang micaigaing, hombang yogo bangkalewec. <sup>2</sup> Aime depec-baba ngic micne nga Wapongte yefe-yowale wewedu ngic, yenge Yesu homacka lonogale yefe monic bafuwanogale ngagesilu ngic-ngigac yengele hangocebame aibibiyeibong. <sup>3</sup> Mic-tengtengfocine 12 yengelacni monic Yudas, wacine monic Iskariot, ye Satangti yele kwele ngage-ngine hawec. <sup>4</sup> Haume yedi hikelu depec-baba ngic micne nga Ibu-macte lebe-ngic yengele damong yengeholec ngiyewec. Ngiyelu Yesu yefe wenuc balu yengele molewa lonale yowa mingagac aibong. <sup>5</sup> Aime yenge beliyelu moneng gocne lacnoringte milu yowa hefeibong. <sup>6</sup> Yudasdi yengeholec kwele-moniyang aiwec. Ailu yefe wenuc bafuwalu habu yenge yeholec mi gaebongka, ye sangke-sangke gawec. Galu Yesu yengele molewa lonale, yogolec donge hilalu wangec gawec.

*Ewalicebaicnele hombangte lama madecineholec nosing lobelu bamockeiboc*

*Mat 26:17-25; Mrk 14:12-21; Yoa 13:21-30*

<sup>7</sup> Gaemewa bret yis mikacte hombang iwa Ewalicebaicnele hombangte lama madecine welu lobecaigaing, dameng yogo welewec. <sup>8</sup> Weleme Yesudi Pita nga Yoane yanguc milu salecepawec, “**Ngeke hikelu Ewalicebaicnele hombangte lama madecineholec nosing lobelu nonangte wiyac bamockenic!**”

<sup>9</sup> Inguc mime uwacnolu miiboc, “Wenuwa bamockenacte ngagesigic?”

<sup>10</sup> Miboc bafaliyelu yanguc edocepawec, “**Ngagegaic, ngeke hikelu taonka fedabiyecte, yogowa ngic monic misa-hebecine tengkelu weledaicte. Weleme yeholec**

luwelu ye balaibedabiyec. Balaibe hikelu ye mac fedaicte, ngeke mac yogowa fedabiyec.\* <sup>11</sup> Felu mac fileine yanguc edodabiyec, ‘Wewedudi yanguc uwagelegac, “Mac kweline monic wenuwa mimoctoengka na mic-tengtengfocne yengeholec Ewalicebaicnele hombangte lama madecine nodabelengte?”’ <sup>12</sup> Inguc miboc yedi mac sawawa kweline sugucne monic, iwa wiyac biyac bamockeicne fayackegac, yogo edalicngepame ngeke iwa wiyac sasawa yogo bamockedabiyec.”

<sup>13</sup> Aime yeke hikelu Yesudi edocepawec, silic yogohac bafuwayackelu Ewalicebaicnele hombangte lama madecineholec nosing lobelu bamockeiboc.

*Ewalicebaicnele hombangte nosing noibong*

*Mat 26:26-30; Mrk 14:22-26; 1Kor 11:23-25*

<sup>14</sup> Aime nosing-nono dameng weleme Yesudi Salecebaicne yengeholec nosing nonogale ngiyelu <sup>15-16</sup> yanguc edocebawec, “Ewalicebaicnele hombangte nosing yogo ngengeholec nonogale homacne ainelegac. Na nosing yago hatacmac mi nolu gaebewa Wapongte ngani-damong kwelina hombangte fungine fikedaicte, yogo nolubac doicka fedacte. Yogo noine edocngembangac.”†

<sup>17-18</sup> Inguc milu kap monic balu Wapong kwele-madic micnolu miwec, “Na yanguc edocngembangac, na waing noinele misaine hatacmac mi nolu gaebewa, Wapongte ngani-damong weledaicte. Ilec ngenge wiyac yago balu ngengung lanagulu noning.”

<sup>19</sup> Inguc milu bret monic balu Wapong kwele-madic micnolu bret yogo bauckelu yanguc milu yelewec, “Yago soc-biucne, yogo ngengele ailu loicne. Ngenge yogo nolu nale ngagesilu inguc nolu gadaing!”

<sup>20</sup> Nosing nobong motome, silicine ingucnehac ye kap balu yanguc miwec, “Kap yago sacnele dodofic gbolicne, yogo ngengele ailu sotingkeicne.

<sup>21-22</sup> “Nga Ngicte Madec ye Wapongti yefe micnowecka hikedaicte hocne. Ngagegaing, ngic mudockeme badaingte, ye nosing tebowa momoc ngiyegabeleng. Mee, ngic yogo yebac medeckedaic.” <sup>23</sup> Inguc mime mic-tengtengfocine yengungtihac uwanaguibong, “Madibac nongileng hewackacni aibaba yogo aidaicte?”

*Madi feicne aigac*

<sup>24</sup> Aime mic-tengteng yenge yengileng hewackacni madi feicne gagac, yogolec yowangineng fec-wac aiwec. <sup>25</sup> Aime Yesudi edocebalu yanguc miwec, “Israel yengele alingkaicni miyac, yengele ngictaungineng yenge ngic-ngigac yengele ngagebong waicne aicaigac. Ailu yengileng ngagebong feicne aigac. Aime sugucnefocngineng yenge tapili fayelegacte ngic-ngigacfcngineng yenge yowangineng balaibebong micaigaing, ‘Nonge habaficngineng gagabeleng.’

<sup>26</sup> “Ngengibac inguc mi aidaing! Monic ye feicne aigac, ye waicne aidaic. Nga micngineng gagac, yedi mole-baficngineng ingucne aidaic. <sup>27</sup> Madi feicne aigac? Nosing moc ngiyelu nodaicte, me bole-madec nosing holelu gagac? Nosing moc ngiyelu nodaicte, yedi ingucne. Aime nanibac ngengele hewacka bole-madec ingucne gagabac. <sup>28</sup> Aime na lokwesac kwelina gaebewa ngenge na mi hegilecnulu gaibong. <sup>29</sup> Mamacnedi ngani-damongte tapili molena lowec, ingucnehac nani ngani-damongte tapili molenginang lodacte. <sup>30</sup> Lobewa ngenge naholec galu ngani-damongte nosing nga misa nolu ngiyedaingte. Ngenge inguchac ngictaule bole balu Israel yengele ngambofocngineng 12 fagaing, yengele aibabangineng wosaelu mimoctodaingte.

*Yesu ye Pitadi bisockenale mime yegengkewec*

*Mat 26:31-35; Mrk 14:27-31; Yoa 13:36-38*

<sup>31</sup> “Saimon, Saimon, ga ngagenong. Satang ye ngic yengi wit yafoine wabong wanale kpendaecaigaing, silicine ingucnehac madicnacni bafaliyecngembame sowaleningte biyac alingkelu milockeneleyec. <sup>32</sup> Aime Saimon, nani gale ailu biyac mimiloc bole yanguc babac. Ga ngage-ngagesinggone wickeengka mi wadaic. Ailu ga kwelegone hefaliyeme nala hatacmac welelu ngic hae-gbafocgone basanangebadamec!”

<sup>33</sup> Aime Pitadi miwec, “Sugucne, gaholec muc-macka haunogale nga homanogale biyac efeckebac.”

\* 22:10: Dameng iwa misa kukuwec aigaing, yogo ngigac yengele bole. Ilec ngic ye bole ingucne bame yeke nalic nganidabiyecte. † 22:15-16: Yesu ye Ewalicebaicnele hombangte fungine, ye lama madecine ingucne. 22:21-22: Mige 41:9; Yoa 13:21-22 22:24: Luk 9:46 22:25: Mat 20:25-27; Mrk 10:42-45 22:26: Mat 23:11; Mrk 9:35 22:27: Yoa 13:12-15 22:30: Mat 19:28 22:32: Yoa 17:15

<sup>34</sup> Mime Yesudi edowec, “**Pita, na yowa edocgube ngagec. Yakumac deboc yagowa-hac kokolec ngicne mi hiyaemewa, ga bisocnugn alecine habackang aidaicte.**”

*Yesudi mic-tengtengfocine wiyac balu ganingte edocebawec*

<sup>35</sup> Aime Yesudi edocebalu yanguc miwec, “**Molic-molic salecngebabe hikeibong, dameng iwa moneng-ebec me hiye me hige-ebec mi balu gaibong. Ailu wiyac monicte waweibong me?**”

Mime yengi miibong, “Miyac.”

<sup>36-37</sup> Mibong Yesudi miwec, “**Hibiwa yanguc kwelengkeicne fagac, yogo nala noine fikedaicte, ilec edocngebabagac. I yangucte, ‘Yengi ye yefe-yowa wewele ngic micnoibong.’**” (Yes 53:12)

**Nale ngagel yowa miibong fagac, yogo yakumac noine fikeyackegac. Ilec ailu yakumachac yanguc migabac, monic ye moneng-ebec kolec me hiyeineholec gagac, ye yogo badaic. Ailu hudule fitec mikac gagac, ye ngakpiine sugucne salelu moneng balu yogodi hudule fitec fuli badaic.**”

<sup>38</sup> Mime mic-tengtengfocine yengi yanguc miibong, “Sugucne, nganic. Nonge hudule fitec yaeckang balu gagabeleng.”

Mibong miwec, “**Yogo andoine.**”

*Yesu ye Getsemane bolewa Wapong milockewec*

*Mat 26:36-46; Mrk 14:32-42*

<sup>39</sup> Milu Yesu ye inguc ailu gawec. Ailu mac hegilelu Oliwa kupicka hikeme mic-tengtengfocine balaibelu hikeibong. <sup>40</sup> Hike sulumebong edocebalu miwec, “**Ngenge lokwesacka felu wawedaingkale, milockelu sanangkening!**” <sup>41</sup> Inguc milu ye mic-tengtengfocine hegilecebalu sawaine kpisicnemac loceba lelu ketadi holelu yanguc milu Wapong milockewec, <sup>42</sup> “**Mamac, ga ngageng nalic aigacka, ga doicte kap yago baickenong. Ailu nale angacti mi sanangkedaic, miyac. Gale angac nga ngage-yogodi sanangkedaic.**”<sup>‡</sup> <sup>43</sup> [Inguc milockelu domame angelo monicti honocmengkacni walu basanangkewec. <sup>44</sup> Aime Yesu ye ngageme umale-benangkeme sanangnehac milockeme sengilangnginedi sac ingucne ailu himongka wawec.]<sup>§</sup>

<sup>45</sup> Milockeme motome fangkelu hefaliyelu mic-tengtengfocine yengela welelu nganicebame yenge kwele-sowac ailu gung faibong. <sup>46</sup> Fabong yanguc edocebawec, “**Ngenge omale gung fagaing? Ngenge lokwesacka felu wawedaingkale, fangke milockelu sanangkening!**”

*Ngaba yengi Yesu baibong*

*Mat 26:47-56; Mrk 14:43-50; Yoa 18:3-11*

<sup>47</sup> Aime Yesu ye inguc milu domaemewahac, ngic-habu gocne yengi yela kwesiibong. Aime mic-tengtengfocine 12 yengelacni monic, wacine Yudas, yedi molickeyelelu Yesu emaina muduckenale yela leme <sup>48</sup> Yesudi micnowec, “**Yudas, ga Ngicte Madec muduckelu ngaba yengele molewa locnugic, me?**”<sup>\*\*</sup>

<sup>49</sup> Mime Yesu mic-tengtengfocine habu balu domaibong, yenge aibaba sowacne yogo fikenogale aime nganilu uwacnolu miibong, “Sugucne, nonge hudule fitecti wecebanang, me?”

<sup>50</sup> Aime yengelacni monicti kwelec kwekwe ngic monic welu hedecine foleinapec wekwackeme wawec. Ngic yogo ye depec-baba ngic yengele damong sugucne, yele kwelec kwekwe ngic. <sup>51</sup> Wekwackemebac Yesudi miwec, “**Ngenge aibaba yogo hegilening!**” Inguc milu kwelec kwekwe ngic hedecine bauwalu bamadickewec.

<sup>52-53</sup> Aime Yesu banogale kwesiibong, yogo depec-baba ngic micne nga Ibu-macte lebe-ngic micne, ailu Yuda ngic-ngigac yengele damongfocngineng, yengele yanguc miwec, “**Na hadengsoc Ibu-macka ngengeholec gaiba. Aime ngenge dameng yogowabac mi bacnuibong. Aime yakumachac kindololo ngic bacebacaigaing, ngenge silicine ingucnehac hudu-babale fitec, nga gbaluc balu bacnuningte kwesigaing. Aime yakumachac kundungte tapilidi ngengele dameng aigac.**”

*Pitadi Yesu bisockewec*

*Mat 26:57-58,69-75; Mrk 14:53-54,66-72; Yoa 18:12-18,25-27*

<sup>54</sup> Inguc aime yenge Yesu balu depec-baba ngic yengele damong sugucnele macka mengockelu hikeibong. Aime Pita ye lobenginang dadalisuchac balaibecebalu hikewec.

**22:35:** Luk 9:3; 10:4    † **22:42:** Kap yogo nangeng yowa. Yogo umac lobeina fikedaicte ingucne.    § **22:44:** Hibi esecne Lukadi kwelengkwec, yogo nganilu iwacni kwelengkebong kwelengkebong ofewec, yengelacni gocne 43-44 iwa mi fagac. Ngic-ngigac yenge hibi kwelengkeicne yogo wosaelu nganibong Lukadi mi kwelengkwec mecne.    \*\* **22:48:** Israel yengele pasi ingucne, ngic agoine nganilu mikokoc ainagulu gaibong.    **22:54:** Mige 31:11

<sup>55</sup> Hikeme ngic gocne yenge macte oda kwelina sobeng hewacina dac fitobong lobeme folalu ngyebong, Pita yengeholec ngyewec. <sup>56</sup> Aime kwelec-adu monicti Pita dacka ngyieme, dongeine yela hilalu nganilu yanguc miwec, "Ngic yago ye Yesuholec gawec."

<sup>57</sup> Inguc mime Pitadi bisockelu miwec, "Ngigac, ga ngic migic yogo, na ye mi ngagegabac."

<sup>58</sup> Inguc mime dameng mi daliweme ngic monicti Pita nganilu miwec, "Ga hocne yengelacni monic."

Inguc mime Pitadi miwec, "Ngic, ga ngagegic, na miyac."

<sup>59</sup> Aime 60 minit ngama ingucne domaemewa, ngic monicti hatacmac sanangkelu miwec, "Noinebenang, ngic yago ye Galili prowinswacni, ye hocne yele alingka gacaigac."

<sup>60</sup> Inguc mime Pitadi bafaliyelu yanguc edowec, "Ngic, ga migic, yogo na mi ngagemotogabac." Inguc miyemewa kokolec ngicne hiyawec. <sup>61</sup> Hiyame Sugucne ye hefaliyelu Pita nganiwec. Nganime, Pita ye Sugucnedi yowa biyachac edowec, yogo ngagesiwec, "**Kokolec ngicne deboc yagowa mi hiyaemewa, gagi biyac na bisocnung alecine habackang aidaicte.**" <sup>62</sup> Aime Pita ye yowa yogo ngagesilu oda lobina haulu kwele-sowac sugucne ngagelu hii sugucnehac hiyawec.

*Damong yengi Yesu migoi aicnolu weibong*

*Mat 26:67-68; Mrk 14:65*

<sup>63</sup> Ngic Yesule damong gaibong, yengi Yesu migoi aicnolu welu <sup>64</sup> dongeine kpolucti ebeckelu yanguc miibong, "Madi wecgugac, yogolec siduc-yowa minong!" <sup>65</sup> Milu yenge aibaba haicine monic-monic aicnolu misulec aicnoibong.

*Yesu ye Yuda ngic-ngigac yengele Tutumangtowawa domawec*

*Mat 26:59-66; Mrk 14:55-64; Yoa 18:19-24*

<sup>66</sup> Aime mac saeme Yuda ngic-ngigac yengele damongfocngineng, yogo depec-baba ngic micne nga Wapongte yefe-yowale wewedu ngic, yenge momochac kpatuleibong. Aime Yuda ngic-ngigac yengele Tutumangtowawa Yesu balelu <sup>67</sup> yanguc uwacnoibong, "Ga edocnubanong. Ga Mesia, me?"

Mibong bafaliyelu yanguc edocebawec, "**Na edocngebabe nalic mi ngagesingkedaingte.**" <sup>68</sup> **Nga uuwa uwangedacte, ameine nalic mi bafaliyedaingte.** <sup>69</sup> **Yakumac nga gafenowagabeleng, iwa Ngicte Madec ye Wapong Tapilitowa fileine yele mole-foleinapac ngyedaicte.**"

<sup>70</sup> Mime yengi miibong, "Inguc aime ga Wapongte Madec, me?"

Mibong yedi miwec, "**Yowa migaing, yogo noine. Na gagabachac.**"<sup>††</sup>

<sup>71</sup> Inguc mime yengi yanguc miibong, "Yeuctihac mibasanang ainagugac. Ilec monicti sowacneine nganiwec, nongileng ngic ingucne hatac mi basackedabelengte. Yeicne micti biyac mime ngagegabeng."

## 23

*Yesu Pailatla bahikeibong*

*Mat 27:1-2,11-14; Mrk 15:1-5; Yoa 18:28-38*

<sup>1</sup> Milu kpatulelu ngyeibong, yenge sasawadi fangkelu Yesu balu Pailatla bahikeibong. <sup>2</sup> Hikelu yowawa lobong domame kpolickelu yanguc miibong, "Ngic ya, ye ngicngigacfocongngeng yengela yefengineng basifuwelu takes Sisa lacnoningte kpatalayelegac. Ailu yeicnele yanguc micaigac 'Na Mesia, ngictau monic,' inguc micaigac."

<sup>3</sup> Inguc mibong Pailatdi uwacnolu miwec, "Ga Yuda ngic-ngigac yengele ngictau, me?"

Mime bafaliyelu miwec, "**Yogo hocne gageuc migic.**"

<sup>4</sup> Aime Pailatdi depec-baba ngic micne nga habu yengele miwec, "Ngic yagodi mimipang yowa monic mi ewaliwec, sowacneine basackegabac."

<sup>5</sup> Mime yengebac sanangkelu miibong, "Ye ngic-ngigac weduyeleme kwelengineng fangkecaigac. Yogo Galilihocnihac fangkelu aiyeleme kwesicgu Yudeya himongka sawelu Yerusalem iwa motogac."

*Yesu Herodela bahikeibong*

<sup>6</sup> Inguc mibong Pailat ye yogo ngagelu yanguc uwayelewec, "Ngic yago Galilihocni, me?" <sup>7</sup> Ailu ye Yesule mac Herodedi himong yogo damongkegac, ye iwacni, inguc ngagewec. Ngagelu Herode ye dameng iwahac Yerusalem gawecte Yesu saleme yela hikewec.

<sup>8</sup> Aime Herode ye Yesule siduc biyac ngagewecte Yesudi pasile maa gocne bame nganinogale wangec gawec. Inguc ngagelu dameng dalicne Yesu basackelu gawecte ailu, Yesu yela bahikeibong beliyewec. <sup>9</sup> Beliyelu Yesu uuwa homacne uwacnowec. Aime yedibac uuwa ameine monic mi bafaliyecnawec. <sup>10</sup> Aime depec-baba ngic micne, nga

Wapongte yefe-yowale wewedu ngic yengi wele domalu yele fungine sanangnehachenang miibong. <sup>11</sup> Herode nga hudu-baba ngicfocine yenge ye lobe holecnolu migoi aicnolu ngakpi monic hibineholec holecnobong haume, Pailatla hatacmac salecebame ye balu hikeibong. <sup>12</sup> Aime Herode nga Pailat yeke esecne ngaba-ngaba gaiboc, hadeng iwahac yeke ago-ago aiiboc.

*Pailatdi Yesu homanale mimoctowec*

*Mat 27:15-26; Mrk 15:6-15; Yoa 18:38-19:16*

<sup>13</sup> Aime Pailat ye depec-baba ngic micne nga damong gocne ailu ngic-ngigac wacebame weleyackebong. <sup>14</sup> Welebong yanguc milu edocebawec, "Ngic yago ye ngic-ngigacfocnonggeng kwelengineng kwefangkecaigac, inguc milu bawelegabieng. Ngagegaing, wiyac nganilu yowawa logaing, yogo nani ngengele haicka uwacnobe miyac aigac. Aime sowacneine basackegabac. <sup>15</sup> Nga Herode ye inguchac ngagelu moc bafaliyeme balu welegaing. Inguc aime, ngic yagodi sowacne monic mi aiyecka nani homacka lololesoc mi aigac, yogo ngage-motodaing. <sup>16</sup> Inguc aime ye webating gocne aicnolu hegilebe hikenale ngagegabac."

<sup>17</sup> [Ailu Ewalicebaicnele hombang damengka gawanadi ngic moniyang muc-mackacni lukecnocaigac, aibaba yogo fawec.]\* <sup>18</sup> Ilec ailu habutowa sasawadi aukwelu yanguc miibong, "Ye wehomalu Barabas lukenolec!" <sup>19</sup> Barabas ye molic-molic taonka ngic-ngigac yenge kwele fangke-fangke aibaba ailu ngic wehomawecte, muc-macka loibong.

<sup>20</sup> Nga Pailat yedibac Yesu lukecnome hikenale ngagelu ngic-ngigac yengela hatacmac sanangkelu miwec. <sup>21</sup> Mime yenge aukwelu miibong, "Malicpongka weng homana! Malicpongka weng homana!"

<sup>22</sup> Aukwebong dameng habackang aime, Pailatdi edocebalu miwec, "Ngic yago ye oma sowacne aiwec? Na sowacneine monic mi bafuwagabacte homacka lololesoc mi aigac. Inguc aime webating aicnolu hegilebe hikenale ngagegabac."

<sup>23</sup> Mime yengi malicpongka homanale sanangkelu dacineholec aukwelu Pailatle yowa ewalilu hendolong bafuwaibong. Inguc aibong <sup>24</sup> Pailat ye yengele yowa ngageyelelu Yesu mimoctowec. <sup>25</sup> Ailu ngic ye kwele fangke-fangke aibaba aigacgu ngic wehoyame muc-macka lobong ngiyewec, ye lukecnoningte miibong. Inguc mibong ye lukecnolu Yesubac molenginang lome ngage-ngagengineng balaibeningte hegileyelewec.

*Yesu malicpongka weibong*

*Mat 27:32-44; Mrk 15:21-32; Yoa 19:17-27*

<sup>26</sup> Hegileme hudu-baba ngic yengi Yesu bahikelo nganibong ngic monic Sairini taonkacni, wacine Saimon, ye nosing-bolewacni yefewa welewec. Weleemewa bafuwalu yedi Yesule malicpong tengkenale dogbac aicnobong tengkelu Yesu balaibewec.† <sup>27</sup> Aime ngic-ngigac habong sugucnedi balaibeibong, yengele hewackacni ngigac homacne yenge yeke mihiyac ailu kwele-sowac sugucne aiibong. <sup>28-30</sup> Inguc aibong Yesudi hefaliyelu yanguc edocebawec, "**Dameng monic weleme, iwa ngic-ngigac yenge yanguc midaingte, 'Ngigac hufing nga kogoc mi baibong, ailu amuc mi gumecebaibong, yenge kwele-angackolec.'**

**'Dameng iwa ngic-ngigac yenge tikile midaingte, "Feinonggang walu famacnubac!"**  
**Nga kupicte yanguc midaingte, "Siyeckelu somecnubac!"**" (Hos 10:8)

**Ilec ailu Yerusalemkocni ngigac-adu, ngenge nale mi hiyaning! Ngenge ngengileng nga adu-madecfocngineng, yengele ailubac hiyaning!** <sup>31</sup> **Yoc sabaineholec domaemewa yela aibaba ingucne aigaing. Nga yoc ye biyac homaicne, ibac sowalebenangkedaingte.**"‡

<sup>32</sup> Aime kindololo ngic yaeckang yeke Yesuholec momochac wecepaningte bacepalu hikeibong. <sup>33</sup> Hikelu himong monic wacine Hodoc-luwe, iwa Yesu malicpongka weibong. Aime yeholec kindololo ngic yaeckang, monic foleinapec nga monic kanainapec yeholec wecebabong domaiboc. <sup>34</sup> Wecebabong Yesudi yanguc miwec, "**Mamac, bole bagaing, yogo mi ngage-motolu aigaingte ailu, ga bikicngineng hegilenong!**" Ailu yenge ngakpi-kpolucine loling monic ailu lanac-ganac aiibong.

<sup>35</sup> Ngic-ngigac yenge wiyac fikewec, yogo ngani domaibong. Domaebongka Yuda ngic-ngigac yengele damongfocngineng, yenge inguchac misulec aicnolu yanguc miibong, "Ye

\* **23:17:** Hibi esecne Lukadi kwelengkewec, yogo nganilu iwacni kwelengkebonng kwelengkebonng ofewec, yengelacni gocne 17 iwa mi fagac. Ngic-ngigac yenge hibi kwelengkeicne yogo wosaclu nganibong Lukadi mi kwelengkewec mecne.

† **23:26:** Ngic malicpongka wedaingte, ye malicpongine tengkelu wedaingte mac iwa hikedaicte. Yesu tapili mikac aime Saimonti bafickenaile aicnobong tengkewec. **23:28-30:** Luk 21:23; Miye 6:16 ‡ **23:31:** Ngic gocne yanguc ngagegaing, yoc sabaineholec yogo Yesu ingucne. Nga yoc homaicne, yogo Israel ngic-ngigac ingucne. Lobeina yengele

umacti Yesule umac ewalidaicte. **23:34:** Yes 53:12; Mige 22:18

Wapongte Mesia bawosaecine aigacka, ye ngic-ngigac gocne baficebawec, ingucnehac yeicne baficnaguna.”

<sup>36</sup> Aime hudu-baba ngic yenge inguchac midelec aicnolu yele emewa welelu waing hobecineholec Yesule micka lobong feme<sup>S</sup> <sup>37</sup> yanguc miibong, “Ga Yuda ngic-ngigac yengele ngictau gagickabac geicne baficnaguc!”

<sup>38</sup> Aime yele hodoc feina yowa yanguc kwelengkeicne domawec, “Yago Yuda ngic-ngigac yengele ngictau.”

*Kindololo ngic yaeckang Yesuholec wecepaibong*

<sup>39</sup> Nga kindololo ngic yaeckang yekelacni monic domawec, yedi Yesu misulec aicnolu miwec, “Ga Mesia aigicka geicne baficnagulu noke inguchac baficnupac!”

<sup>40</sup> Inguc mime agoinedi ngelengkelu yanguc miwec, “Ga ye ameine bagac ingucnehac bagamec, Wapongte mi hangocgugac, me? <sup>41</sup> Nokilec kindololo ngicte ameine aibaba dondonne inguc ainotegaing. Nga ngic yago yebac sowacne monic mi bafuwawec.”

<sup>42</sup> Inguc milu Yesule miwec, “Yesu, ga ngani-damonggona hike sulumelu ngictaule bole balu na ngagesicnudamec!”

<sup>43</sup> Mime Yesudi yanguc miwec, “**Foinac, yakumac hocne naholec Wapongte mac madicnebenang iwa gadabelecte, yogo noine edocgugabac.**”

*Yesu homawec*

*Mat 27:45-56; Mrk 15:33-41; Yoa 19:28-30*

<sup>44</sup> Aime wenac hewac-hewac 12 kilok aime iwahac mac kundung kweme kundungti himong someckelu falu game 3 kilok mac awelewec. <sup>45</sup> Aime wenac-dongeine kundung kwewec, dameng iwahac Ibu-macte kpoluc sugucne<sup>\*\*</sup> yogo fouckeme yaeckang aibob.

<sup>46</sup> Aime Yesudi malac sugucnehac wackelu miwec,

**“Mamac, asune molegona logabac!”**

*(Mige 31:5)*

Inguc mime asuine ofewec.

<sup>47</sup> Aime hudu-baba ngic yengele damongti inguc nganilu Wapongte wacine bafelu yanguc miwec, “Ngic yago ye dondonne, yogo noine.” <sup>48</sup> Aime ngic-ngigac sasawa yenge aibaba fikewec, yogo ngani-ngagec ainogale kwesibong. Kwesibong yenge aibaba yogo fikeme nganilu mondacngineng welu hiyalu macnginang hikeibong.<sup>††</sup> <sup>49</sup> Aime Yesu alingfocine sasawa nga ngigac gocne Yesu balaibelu Galilihocni kwesibong, yengebac welelu dalicka domalu aibaba fikewec, yogo nganiibong.

*Yesu henebewa lobong fawec*

*Mat 27:57-61; Mrk 15:42-47; Yoa 19:38-42*

<sup>50-51</sup> Aime Yuda himongka taon monic Arimatea iwacni ngic monic, wacine Yosefe. Ye Yuda ngic-ngigac yengele Tutumangtowa yogolec memba monic. Ye<sup>##</sup> ngic ulucne nga aibabaine dondonne ailu Wapongte ngani-damongte wangec gawec. Aime ye agofocine yengi yowa miibong nga aibaba aibong, yogolec ngageme mi madickewec. <sup>52</sup> Mi madickeme ye Paillatla hikelu Yesule kponggbong banale uwacnowec. <sup>53</sup> Uwacnome nalic mime ye Yesule kponggbong bamocotolu kpoluc madicnebenang yogodi wabungkelu bahikelu dongesi monic gbolicne, iwa loibong. Dongesi yogo posa henebe gufuicna fawec. Ailu yogo gbolicne, ngic monic iwa mi longkeicne. <sup>54</sup> Aime hadeng yogo Sabatle efec-tafec dameng aime, Sabat dameng fungkenogale aiwec.

<sup>55</sup> Aime Galili prowinswacni ngigac gocne Yesu balaibelu gaibong, yenge Yosefe balaibelu dongesiwa hikelu Yesule kponggbong loibong, yogo ngani-ngagec aibong. <sup>56</sup> Ailu hatacmac hefaliyelu macnginang hikelu kponggbong yogolec heloc hoine madicne bamockeibong. Ailu Sabatle ung-yowa fagac, yogo balaibelu bole mikac macka moc ngiyeibong.

## 24

*Yesu homackacni gboliye fangkewec*

*Mat 28:1-10; Mrk 16:1-8; Yoa 20:1-10*

<sup>1</sup> Sonda ubiyacte mac sae-saele ngigac yenge heloc hoine madicne bamockeibong, yogo balu dongesiwa hikeibong. <sup>2</sup> Hikelu nganibong posatowa dongesi yefeine hedickeicne

**23:35:** Mige 22:7-8 **S** **23:36:** Bole-madec nga hudu-baba ngic yengi waing hobecineholec yogo nocaigaing. Ngictau yenge waing ingucne mi nocaigaing. **23:36:** Mige 69:21 **\*\*** **23:45:** Kpoluc yogo Kweline Gbagbacne, nga Kweline Gbagbacnebenang, yekele hewacka loicne. **23:45:** Luk 8:2-3 **††** **23:48:** Israel ngic-ngigac yenge kwele-sowac ailu mondacka wecaigaing. **##** **23:50-51:** Tutumangtowa iwa yowa hefelu Yesu wehomaibong. **23:56:** Wah 20:10; Yef 5:14

yogo biyac balu igockebong kpalundungkeicne. Aime dongesi nuine moc angkelu domame,<sup>3</sup> ngigac yenge dongesi kwelina felu Sugucne Yesule kponggbong basackebong.<sup>4</sup> Ailu yenge oma wiyac fikegac, yogolec ngagebong kpungkeme domaiibong. Hei, iwahac ngic yaeckang ngakpinginec kwalacnebenang angocineholec, yeki welelu haicnginang fikelu domaiiboc.<sup>5</sup> Domaboc ngigac yenge hangocebame ngosockelu haicnginang himongka heluluckelu ngiyeebongka, ngic yaeckang yeki yanguc edocebaimboc, "Ngenge ngic gagaineholec omale dongesiwa basackegaing?"<sup>6</sup> Ye hocne biyac gboliyelu fangkegac, yawa mi fagac. Aime ye Galili hikeebongka yowa edocngebawec, yogo ngagesidaing.<sup>7</sup> **'Ngicte Madec ye bikic-baba yengele molewa lobong, yengi balu malicpongka webong homadaicte,' yogo fikenale miwec. 'Aime hadeng habackang aime, hatacmac gboliyelu fangkedacte.'**"<sup>8</sup> Mime ngigac yenge yedi yowa yogo biyac miwec, yogo ngagesiibong.

<sup>9</sup> Ngagesilu dongesiwacni hatacmac hefaliye hikeibong. Hikelu salecebaicne 11, nga agofocngineng aibaba sasawa fikewec, yogo edocebayackebong.<sup>10</sup> Ngigac hikeibong, yenge wacngineng yanguc, Maria, wacine monic Magadalen, nga Yoana. Ailu Maria Yakobos nenggacine, ailu ngigac gocne yenge momoc hikeibong, yenge siduc yogohac salecebaicne edocebaimbong.<sup>11</sup> Aime ngigac yenge yowa miibong, yogo yenge ngagebong sisifucine aime yowangineng mi ngagesingkeibong.<sup>12</sup> Inguc aime Pita ye sifu fangke gasackelu dongesiwa hikewec. Hikelu dongesiwa fakanelu nganime, kpoluc madicnebenang wabungkeibong, yogodi sugu ngiyewec. Ye inguc nganilu ngage-ngage bole balu hatacmac hefaliye hikewec.

*Mic-tengteng yaeckang yeke Emeus yefewa Yesu nganiiboc*

*Mrk 16:12-13*

<sup>13</sup> Aime hadeng iwahac mic-tengteng yaeckang yeke mac-aling monic, wacine Emeus, iwa hikenogale hikeiboc. Mac-aling yogo Yerusalemkocni dalicneine 11 kilomita, ingucne ngiyewec.<sup>14</sup> Aime yeke aibaba sasawa fikewec, yogolec mingagec ailu hikeiboc.<sup>15</sup> Yeke yowa yogolec mingagec ailu ngage-ngage bole balu hikebocka, Yesu yeicne hikelu yekela fikeyeteme yekeholec hikeibong.<sup>16</sup> Ailu donge basifuc aiyeteme yeke ye nalic mi nganimotoiboc.

<sup>17</sup> Inguc aime Yesudi uwayetelu miwec, **"Ngeke yefewa oma wiyacte ngekilackac mingagec aigac?"**

Mime yeke kwele-sowac silic ailu waickelu domaiiboc.<sup>18</sup> Domalu monic wacine Kleopas, yedi uwacnolu yanguc miwec, "Ga kwilic-ngic moniyangti sugu Yerusalem gaebongka, Sonda yagolec kwelina wiyac fike ofeyec, yogo mi ngagegic, me?"

<sup>19</sup> Mime yedi miwec, **"Oma wiyac fikeyec?"**

Inguc mime yeki edolu miiboc, "Yesu Nasaret-hocni yela wiyac fikeyec. Ye Wapongte siduc-mimi ngic monic. Ailu Wapong nga ngic-ngigac yengele haicka yowa miwec, nga wiyac sasawa aiwec, yogo tapiliineholecbebang aiwec.<sup>20</sup> Aime depec-baba ngic micne nga micnefocnonggeng, yengi ye homanale milu gamang yengele molewa lobong, yengi malicpongka webong homawec.<sup>21</sup> Aime ye hocne Israel ngic-ngigac nonge muckacni lukecnubanale wangec gaibeng. Aimebac wiyac fikewec, yogolec hadeng yakumac habackang aigac.<sup>22-23</sup> Aime ngigac gocne nongele alingcacni, yenge yakumac ubiyactebebang dongesiwa hikelu kponggbongine basackegaing. Basackelu hefaliye welelu yanguc edocnubagaing, 'Angelo yaeckang yeki fikenolelu yanguc migaic, "Yesu biyac gboliye fangkelu gagac!"' Inguc edocnubabong kwatackegabeleng.<sup>24</sup> Nongelacni ngic gocne yengi dongesiwa hikelu ngigac yenge migaing, ingucbebang bafuwagaing. Ailu yeicnebac mi nganigaing."

<sup>25</sup> Miboc Yesudi yanguc edocepawec, **"Ngeke ngage-ngagenginec mikac, ailu kwelelenginec mi fangkegac. Aime Wapongte siduc-mimi ngic yengi esecnehac yowa sasawa miibong, yogo biyac mi ngagesingkecaigac. <sup>26</sup> I yanguc fikenale miibong, 'Mesia ye doic ngageme motome wac-bingec feicne nalic badaicte.'**"<sup>27</sup> Aime yeicne siduc Wapongte hibiwa kwelengkeicne fayackegac, yogolec fungine mime yegengkeyetewec. Siduc yogo Mosesle hibiwacni molickelu hikecgu Wapongte siduc-mimi ngic sasawa yengi yele siduc kwelengkeibong.\*

<sup>28</sup> Aime mac-aling hikenogale hikeiboc, yogo bangkalelu Yesu ye mochac hikenogale silic ingucne aime,<sup>29</sup> yeki kpatalacnolu miiboc, "Mac aweleme kundung kwenale aigac, ga nokeholec hikenang!" Inguc miboc yekeholec macka felu ngiyeibong.

24:6: Luk 9:22    24:21: Luk 19:11; Sale 1:6    24:24: Yoa 20:3-10    24:26: Luk 9:22    \* 24:27: Mosesle hibi yenge Wapongte hibi molic-molic yogo 5: Fike-fike, Wahikeicne, Depec-babale bole, Himong kisiwa, nga Yefe-yowa.  
24:27: Mige 22:1-21; Yes 53



<sup>30</sup> Yesu ye yekeholec ngiyelu nosing nonogale bret balu Wapong kwele-madic mic-nolu bauckelu yetewec. <sup>31</sup> Yeteme dongenginec lokeme Yesu ngani-motoeboxa, ye iwahac mime aockeme <sup>32</sup> yekilackac mingagec ailu miiboc, "Noinebenang, yefewa Wapongte hibile fungine edocnupalu wedunotelu mime yegengkeme kwelenonggetti fangke-benangkegac."

<sup>33</sup> Aime yeke fangkelu iwahac hefaliyelu hatacmac Yerusalem hikeiboc. Hikelu salecebaicne 11, agofocngineng yengeholec kpatulelu ngiyeebongka bafuwacebaiboc. <sup>34</sup> Bafuwacebaboc yengi edocepalu yanguc miibong, "Sugucne ye noine homackacni gboliyelu fangkegac, ye Saimon fikecnogachac!" <sup>35</sup> Mibong yeke yefewa yekela wiyac fikewec, ailu Yesudi bret bauckeme ngani-motoiboc, yogolec siduc edocebaiboc.

*Yesudi alingfocine fikeyelewec*

*Mat 28:16-20; Mrk 16:14-18; Yoa 20:19-23*

<sup>36</sup> Edocebaboc yenge yowa yogo ngagelu ngiyeebongka, Yesu yeicne hewacnginang domalu yanguc edocebawec, "**Kwele-mogung ngengela fana.**"

<sup>37</sup> Inguc mime yenge kwatackelu hangocebame yanguc ngageibong, "Ngic ilucine nganigabeleng."

<sup>38</sup> Inguc ngagebong miwec, "**Ngenge omale mimedec ailu ngageboc aigaing?** <sup>39</sup> **Ibac naneuc gagabac, ngenge hige-molene nganing. Iluc yengebac luwe-biuc mikac. Ilec wele oiycanulu ngagening, nabac luwe-biuckolec.**"

<sup>40</sup> Inguc milu hige-moleine edalicebame <sup>41</sup> yenge kwatackebong. Ailu beliyelu sifu mi ngagesingkeibong. Aime yedi uwayelelu yanguc miwec, "**Ngenge nosing monic lobong ngiyegac, me?**" <sup>42</sup> Mime yenge misa-sic lobeicnele nebocine lacnobong <sup>43</sup> balu dongenginang nowec.

<sup>44</sup> Nolu yanguc edocebawec, "**Ngengeholec gaibawa yanguc biyac edocngebaiba. Wiyac sasawa nale ngagelu Wapongte yefe-yowa Mosesdi kwelengkewec, nga Wapongte siduc-mimi ngic yengele hibiwa, ailu Miti geewa kwelengkeicne fagac, yogo sasawa noine fikedaic.**"

<sup>45</sup> Inguc milu yedi iwahac mime ngage-ngagengineng yegengkeme, Wapongte hibi ngage-motoibong. <sup>46</sup> Ailu yanguc taockelu miwec, "**Ilec ailu yanguc kwelengkeicne fagac. Mesia ye doicka webong homame hadeng habackangka hatacmac gboliyelu fangkedaicte.** <sup>47</sup> **Aime yenge yele wacka kwelengineng hefaliyebong, bikic hegileyelenale yefe yogo Yerusalem mackacni fungkelu ngic-ngigac himongne himongne sasawa yowa edocebalu weduyelebong hikedaicte.** <sup>48</sup> **Aime ngengela aibaba yogo hocne dongenginang fikegac, yogo mibong yegengkedaic.** <sup>49</sup> **Ngagegaing, Mamacnedi mipangkelu miwec, nani yogo salengelebe badaing. Ailu ngenge taon yago mi hegileebongka wilengkaicni tapili ngededaicte, yogo noine.**"

*Yesu honocmengka fewec*

*Mrk 16:19-20; Sale 1:9-12*

<sup>50</sup> Aime Yesu ye molickeyeleme taon hegilelu lobina Betani mac-kpiscna hikelu iwa moleine bafangkelu mimi-madic milu edocebawec. <sup>51</sup> Inguc milu gaemewa, Wapongti bame honocmengka fewec. <sup>52</sup> Feme yenge afeelu beliyebenangkelu Yerusalem hatacmac hefaliye hikelu, <sup>53</sup> damengsoc Ibu-macka galu Wapong mitengkelu gaibong.

## Yoanedi Yesule Siduc Madicne Kwelengkewec

### *Mimi-yegeng yowa*

Yesu homalu homackacni gboliyelu fangkeme hifa 50 ngama ingucne motome, Yoanedi hibi yago kwelengkewec. Yoane yogo ye Yesule mic-tengteng monic, ye Yoane misalowac miyac. Dameng iwa ngic ye kwelengkelu yeicnele "na" me "nonge" mi milu kwelengkewec. Ye ngic monic ingucne "ye" me "yenge" milu kwelengkewec. Yoane ye aibaba yogo balaibewec. Aime dameng gocna yeicne ngagelu "Yesudi mic-tengteng angac nagecnoaigac" inguc kwelengkewec.

Mataio, Mareko, nga Luka, yenge molickelu Yesule siduc kwelengkeibong. Aime lobaina Yoanedi Yesule siduc kwelengkewec, yowa gocne mi kwelengkeibong, yogo kwelengkewec. Yesule fungine yegengkenale hibi yago kwelengkewec. Ailu 20:31 iwa hibi fungine yanguc kwelengkewec, "Yesu ye Mesia, ailu ye Wapongte Madec, nenge yogo ngagesingkelu yele wacka gaga baningte hibi yago kwelengkeicne fagac."

### *Yowa yago hibi nebocina fagac*

1:1-18 Molic-molic yowa: Yesu fungineinele siduc

1:19-10:42 Yesu yowaine nga aibabainedi yeicne fungine bayegengkewec

11:1-12:50 Homac nga gagale siduc, ailu Yesu ye ngictau nga kwelec kwekwe doicine-holec yogo bayegengkewec

13:1-20:31 Yesu yeicne malicpongka homalu gboliyelu fangkewec, yogolec fungine bayegengkewec

21:1-25 Yesudi mic-tengtengfocine hatac fikeyeleme Yoanedi yowa moto-motoine kwelengkewec

### *Wapongte Yowadi ngic fikewec*

<sup>1</sup> Esecne fungina molickelu, monic wacine Yowadi gawec. Nga Yowa ye Wapongkolec gawec. Ailu Yowa yeuctihac Wapong. <sup>2</sup> Ailu ye hocne esecne fungina molickelu Wapongkolec gawec. <sup>3</sup> Aime Wapongti mime Yowadi wiyac sasawa kwefickeyackewec. Wiyac sasawa fikelu fayackegac, yogo yengungtihac monic mi fikeibong. <sup>4</sup> Yowa yela hocne gaga fawec. Aime gaga yogodi ngic-ngigac yengele Angoc ailu Wapongte yefe noine edalicebawec. <sup>5</sup> Aime Angocti kundung kweme angoleme, kundungti Angoc yogo someckenale aibibiyelu hegilewec.

### *Yesu ye Gaga nga Angocte fungine*

<sup>6</sup> Wapongti ngic monic saleme kwesiwec, yele wacine Yoane. <sup>7</sup> Yedi Angoc yogolec mime yegengkeme, Angoc yogodi ngic-ngigac bacebame angoleningte kwesiwec. Ye kwesilu ngic-ngigac sasawadi Angoc yogo ngagesingkeningte miwec. <sup>8</sup> Ye yeicnebac Angoc yogo miyac. Yebac Angoc yogo mime yegengkenale kwesiwec.

<sup>9</sup> Aime Angoc yogo noinebenang, ye himongka kwesilu ngic-ngigac sasawa bacebame angolecaigaing. <sup>10</sup> Wapong ye Angocti himong nga wiyac sasawa bayackeme, Angoc yogodi himongka game ngic-ngigac yenge ye mi ngani-motoibong. <sup>11</sup> Ye yeicne alingfocine yengela kwesime yengi mac mi holecnoibong. <sup>12</sup> Aimebac ngic-ngigac mac holecnolu wacine ngagesingkeibong, yenge nalic Wapong adu-madecfocine ainingte miwec. <sup>13</sup> Yele adu-madec yogo yenge ngic sackacni, me socte angackacni me ngic monicte angackacni monic mi fikeibong, miyac. Yenge Wapong yeuctihac mime fikeibong.

<sup>14</sup> Aime Yowadi ngic soc-biuckolec ailu hewacnonggang gawec. Madec moniyang yedi hocne galu Mamactacni wac feicne balu gawec, wac feicne yogo hocne nganiibeng. Yogo kwele-madicte wiyac nga yowa noine wakeyackeicne fagac.

### *Yoane ye Yesule yefe baba*

<sup>15</sup> Yoanedi yele fungine mime yegengkeme wackelu yanguc miwec, "Na yele hocne yanguc edocngebaiba, 'Ngic lobena kwesilu gagac, ye na mi fikeebewa yedi biyachac gawecte na ewalicnugac.'" <sup>16-17</sup> Yefe-yowadi Mosesla kwesime baibeng. Nga kwele-madic ailu yowa noine yogobac Yesu Kristoholec kwesiwec. Ailu ye kwele-madic bucbuchac facnogac, yogodi nongilang moto-motoine mikac kwesinolecaigac. <sup>18</sup> Monicti Wapong monic mi nganiwec, miyac. Madecine moniyang sugudi Mamacine emeina wetackelu gacaigac, ye Wapong. Yedi Mamacte fungine mime yegengkenolewec.

**1:1:** Yoa 17:5; 1Yoa 1:1-2; Miye 19:13    **1:3:** 1Kor 8:6; Kol 1:16-17; Hib 1:2    **1:4:** Yoa 5:26    **1:5:** Yoa 3:19

**1:6:** Mat 3:1; Luk 1:13-17,76    **1:9:** Yoa 8:12    **1:13:** Yoa 3:3-6; Filp 2:7; Yoa 2:11; 1Pi 1:23    **1:16-17:** Wah 34:28;

Rom 6:14    **1:18:** Wah 33:20; Yoa 6:46; 1Tim 6:16

*Yoane boleinele fungine**Mat 3:1-12; Mrk 1:7-8; Luk 3:15-17*

<sup>19</sup> Yuda ngic Yerusalem taonka gaibong, yengi depec-baba ngic nga Liwai aling gocne salecebabong Yoanela hikelu yanguc uwacnoibong, “Ga ma ngic?”

<sup>20</sup> Uwacnobong, ye yeicne fungineine mi hesongkeyelewec. Ye edocebalu yanguc mime yegengkewec, “Na Mesia miyac.” Yoane ye inguc mime yegengkewec.

<sup>21</sup> Inguc mime yengi hatacmac uwacnoibong, “Aime Elaiya hatac kwesidaicte, ga ye, me?”

Uwacnobong yedi miwec, “Na ye miyac.”

Mime miibong, “Aime Wapongte siduc-mimi ngicbenang kwesinale miicne, ga ye, me?”

Mibong “miyac” miwec.

<sup>22</sup> Inguc mime yanguc miibong, “Aime ga maa? Nonge ngic salecnubagaing, yengela yowa ameine wenuc bahikelu edocebadabelengte? Gageicnele wenuc migic?”

<sup>23</sup> Inguc mibong Yoanedi yanguc edocebawec,

“Himong kisiwa misaine mikacka yowa-malac monic fikegac, yogo nani hocne yanguc wackegabac, ‘Nenge Sugucnele yefe hole-wenengkening.’ (Yes 40:3)

Siduc-mimi ngic Yesaiyadi nale inguc miwec.”

<sup>24</sup> Aime ngic hikeibong yengele alingkacni Farisaio gocne yengi <sup>25</sup> Yoane yanguc uwacnoibong, “Ga Mesia miyac, nga Elaiya miyac, ailu Wapongte siduc-mimi ngic miyac. Aime ga omale ngic-ngigac misa lowayelegaigic?”

<sup>26</sup> Inguc mibong Yoanedi bafaliyelu yanguc edocebawec, “Na misa lowangelecaigabac. Aimebac Yuda ngic-ngigac ngengele hewacka ngic monic gagac, nenge ye mi ngagegaing. <sup>27</sup> Ye nale lobewa kwesilu gagac, ye feicne aigacte na waweweine ingucnedi yele hige-ebecte mucine lukebe nalic mi madickedaicte.” <sup>28</sup> Yoane ye Betani macka Yodan misa nebocina misa lowayelelu gawec, iwa wiyac yogo fikewec.\*

*Yesule fungine*

<sup>29</sup> Mac saeme Yoane ye domame Yesudi yela weleme nganilu ngic-ngigac yanguc edocebawec, “Nganing, yogo Wapongte lama madecine†, ye himongtowa yagolec ngic-ngigac sasawa yengele bikic baickedaicte. <sup>30</sup> Yele hocne ngagelu yanguc miiba, ‘Ngic monic lobena kwesilu gagac, ye na mi fikeebewa yedi biyachac gawecte na ewalicnugac. <sup>31</sup> Na ye mi ngage-motoiba. Aime Israel ngic-ngigac nenge yedi yegengkenale na kwesilu misa lowangeleiba.’”

<sup>32</sup> Yoanedi yanguc mime yegengkewec, “Na Tili Asu nganibe, ye tudiling nangole silic ingucne honocmengkacni walu yele feiwa ngiyewec, yogo nganiiba. <sup>33</sup> Aime na ye mi ngage-motoebewa Wapongti salecnuwec, ye misa lowangelebele, ailu yanguc edocnuwec, ‘Asudi walu ngic yela ngiyeme nganidamecte, yedibac Tili Asudi lowangedaicte.’ <sup>34</sup> Na yogo hocne nganilu yanguc biyachac mibe yegengkewec, ngic yedi Wapongte Madec.”

*Yesu mic-tengtengfocine*

<sup>35</sup> Aime mac saeme, Yoane ye mic-tengtengfocine yengelacni mic-tengteng yaeckang yekeholec mac iwa hatacmac domaibong. <sup>36</sup> Domaebongka Yesu hikeme nganilu mic-tengtengkecine yanguc edocepawec, “Nganinic, yogo Wapongte lama madecine.”

<sup>37</sup> Inguc mime ngagelu mic-tengtengkecine yeke Yesu balaibelu hikeiboc. <sup>38</sup> Hikeboc Yesudi hefaliye nganicpalu yanguc uwayetewec, “**Ngeke oma wiyacte aingetegac?**”

Inguc uwayeteme miiboc, “Rabai,” (yogolec fungine wewedu bafaliyeicne) “ga mac wenuwa gagic?”

<sup>39</sup> Inguc miboc yanguc edocepawec, “**Ngeke welelu nganinic.**” Inguc mime yenge momoc hikelu mac gawec yogo nganiiboc. Aime hadeng iwa dameng 4 kilok biyac aiwecte ailu yeholec ngiyeiboc.

<sup>40</sup> Aime Yoanele yowa ngagelu Yesu balaibeiboc, yekelacni monic Endru, ye Saimon Pita gbaine. <sup>41</sup> Yedi Yesu nganilu hatacmac molickelu hefaliye hikelu haeine Saimon bafuwalu yanguc edowec, “Noke Mesia bafuwagabelec.” (Mesia yogolec fungine Kristo bafaliyeicne.)

<sup>42</sup> Inguc milu Saimon mengockeme Yesula hikeboc, Yesudi ye nganilu yanguc miwec, “**Ga Saimon Yoane monicte madec, yogo noine. Aimebac gale wacgone gbolicne Kefas minoga.**” (Yogolec fungine posa, nga Griik yowawa Pita.)

1:21: Yef 18:15,18; Mat 11:14    1:27: Yoa 1:15    \* 1:28: Betani yogo mac yaeckang yekele wac. Monic Yerusalem emeina, nga monic Yodan emeina inguc faiboc.    † 1:29: Israel ngic-ngigac yenge bikicngineng miyac ainale lama madecine depec lobelu gaibong.    1:29: Yes 53:6-7; 1Pi 1:18-19    1:30: Yoa 1:15    1:32: Mat 3:16    1:34: Mat 3:17    1:36: Yoa 1:29    1:40: Mat 4:18-20    1:42: Mat 16:18

<sup>43</sup> Mac saeme Yesu ye Galili prowinswa hikenogale ngagelu hikelu, ngic monic wacine Filip, ye bafuwalu yanguc edowec, “**Ga wele na balaibecnuc.**” <sup>44</sup> Filip nga Endru ailu Pita yenge Besaida taonkacni.

<sup>45</sup> Aime Filip ye ngic monic wacine Natanael, ye bafuwalu yanguc edowec, “Mosesdi yefe-yowale hibiwa kwelengkewec, nga siduc-mimi ngic yengi inguchac kwelengkeibong, nonge ngic yogo bafuwagabeleng. Yogo Yesu hocne, Yosefele madec, Nasaret taonkacni.”

<sup>46</sup> Inguc mime Natanaeldi yanguc miwec, “Nasaret mac yogo mac omame. Aime mac iwa wiyac madicne monic nalic fikedaicte, me?”

Inguc mime Filipdi miwec, “Ga welelu nganic.” Mime hikeiboc.

<sup>47</sup> Hikeboc Yesudi Natanael nganime yela leme yanguc miwec, “**Nganining, ngic yago Israel ngic noine, yela lokwesac nga kwesac-aibaba monic mi fagac.**”

<sup>48</sup> Inguc mime Natanaeldi yanguc uwacnowec, “Ga yefe wenucka ngagecngucig?”

Inguc mime Yesudi yanguc edowec, “**Filip ye ga mi wacume welegabiye, dameng iwa fik yoc fungina ga geicnac ngiyeengka biyac nganicugabac.**”

<sup>49</sup> Inguc mime Natanaeldi yanguc edowec, “Wewedu, ga Wapongte Madec, Israel nonge Ngictau.”

<sup>50</sup> Inguc mime Yesudi bafaliyelu yanguc edowec, “**Ga fik yoc fungina ngiyeengka nganicugabac inguc edocngabacte ngagesingnugic, me? Gacgu pasi yangucne hatacmac ewalilu sugucnehac fikeme nganidamecte.**” <sup>51</sup> Foinac, honocmeng angkeme Ngicte Madec ye honocmengte liti ingucne aime, Wapongte angelofocine yela edelu fecwac aibong nganicebadaingte, yogo noinebenang edocngabagabac.”

## 2

### *Misadi waing aiwec*

<sup>1</sup> Hadeng yaeckang motome, Galili prowinswa Kana taonka baba-tumang fikewec. Aime Yesu nenggacine iwa hikeme, <sup>2</sup> Yesu nga mic-tengtengfocine yenge iwa momoc hikeningte wacebaibong. <sup>3</sup> Aime yenge waing misangineng miyac aime, nenggacinedi Yesu yanguc edowec, “Waing misangineng miyac aigac.”

<sup>4</sup> Inguc mime Yesudi yanguc edowec, “**Ngigac, ga wiyac migic, yogo nale miyac, nale dameng yakuhuc mi aigachac.**”

<sup>5</sup> Inguc mime nenggacinedi bole-ngic yanguc edocebawec, “Ye wiyac monic ainingte edocngabame ngenge yowaine sasawa balaibedabiyeng.”

<sup>6</sup> Aime Yuda ngic-ngigac yenge suwe-suwe aibabangineng balaibelu hebec misaineholec lobong ngiyecaigac. Ilec ailu hebec posadi baicne 6 inguc iwa biyac ngiyeicne. Hebec moniyang moniyang yogo yenge 100 lita, ingucti ngiyeibong.

<sup>7</sup> Aime Yesudi bole-ngic yanguc edocebawec, “**Ngenge misa filalu hebecka kwebong haulu wakeyackena.**” Inguc mime yenge misa filalu kwebong haulu wakeyackewec.

<sup>8</sup> Kwebong haulu wakeme, yedi yanguc edocebawec, “**Ngenge yakumac misa yogo filalu nosing-damongta balening.**”

Inguc mime yenge filalu balu leibong. <sup>9</sup> Balu leibong misadi hefaliyelu waing misa aime, nosing-damongti waing misa nganilu wenuwacni bagaingte ngageme kpungkewec. Aime bole-ngic misa filalu baleibong, yengi sugu ngageibong. Inguc nganilu nosing-damongti molewa babacte ngic ye micnome welewec. <sup>10</sup> Weleme edolu yanguc miwec, “Aiba-banonggeng yanguc fagac, molickelu waing misa madicne ngic-ngigac gumecebabeng nocaigaing. Ailu kwelengineng sifuweme waing misa angacine kpisicnemac gumece-bacaigabeleng. Aime gagibac waing misa madicne sangkeng fayec. Aime yakumachac bafuwagic.”

<sup>11</sup> Yesu ye Galili prowinswa Kana taon iwa galu ngagesingkeningte pasile maaine yogo molickelu bawec. Balu yeicne wacine feicne inguc bayegengkeme mic-tengtengfocine yenge yogo nganilu ye ngagesingkeibong.

### *Woc-wiyac salebong Yesudi yebicebawec*

*Mat 21:12-13; Mrk 11:15-17; Luk 19:45-46*

<sup>12</sup> Gaebongka motome Yesu nga nenggac gbafofocine ailu mic-tengtengfocine yenge momoc Kapeneam taonka haulu iwa hadeng gocne gaibong. <sup>13</sup> Gaebongka Yuda ngic-ngigac yengele Ewalicebaicnele hombangte dameng bangkale weleme, Yesu ye Yerusalem taonka fewec. <sup>14</sup> Felu nganime ngic yenge Wapongte Ibu-macte oda kwelina depecte lama-bulumaka nga tudiling nango lolu saleibong. Nga gocne yenge ngiyelu himong monickacni yengele moneng yogo bafaliyelu yengileng ibule moneng yelelu gabong nganicebawec. <sup>15</sup> Nganicebalu indulu monic mideckeicne balu yogodi ngic sasawa

lama-bulumakafocnginengkolec Ibu-mackacni weyebic aiyeleme hauibong. Hauyackebong ngic moneng lanac-ganac gaibong, yengele moneng sotiyewec, ailu tebongineng bafaliyewec. <sup>16</sup> Bafaliyelu ngic tudiling nango saleibong, yenge yanguc edocebawec, **“Ngenge wiyacngineng yogo haickening! Ngenge Mamacnele mac yago aibong wocwiyac sale-salele mac mi aidaic.”**

<sup>17</sup> Aibaba yogo fikeme mic-tengtengfocine yenge yowa monic Wapongte hibiwa yanguc kwelengkeicne fawec, yogo ngagesiibong,

“Gale macte ailu sanangnehac dogbac ailu gadacte.”

(Mige 69:9)

<sup>18</sup> Yesudi inguc aime Yuda ngic yengi bafaliyelu yanguc edoibong, “Ga aibaba yogo aigamecte, pasile maaine weningucne baengka nganilu tapiligone fagac, inguc ngagedabelengte?”

<sup>19</sup> Inguc mibong Yesudi bafaliyelu yanguc edocebawec, **“Ngenge ibu-mac yago hem-balackebong, na hadeng habackangte kwelina yogo bafangkedacte.”**

<sup>20</sup> Inguc mime Yuda ngic yengi yanguc miibong, “Ngic yenge Ibu-mac yago hifa 46 inguc bagacgu badickeibong. Aime gagibac hadeng habackangte kwelina nalic bafangkedamecte migic, me?” <sup>21</sup> Yesubac yeicne socte ibu-macka nangeng yowa holelu miwec. <sup>22</sup> Gacgu Wapongti homackacni bagboliyeme fangkeme, mic-tengtengfocine yenge Yesudi yowa inguc miwec, yogo ngagesiibong. Ngagesilu Wapongte hibiwa yowa kwelengkeicne fagac nga Yesule yowa momoc ngagesingkeibong.

<sup>23</sup> Aime Yesu ye Yerusalem iwa Ewalicebaicnele hombangte damengka iwa galu pasile maaine bame, ngic-ngigac bocyacti nganilu wacine ngagesingkeibong. <sup>24</sup> Aime Yesu yeuctihac ngic-ngigac ngage-ngagengineng ngani-motoyackewec. Ilec ailu yengele angac mi balaibewec. <sup>25</sup> I yangucte, ye yeuctihac ngic-ngigac yengele kwelewa wiyac sasawa fawec, yogo biyac ngagewecte ailu, ngic monicte fungine uwalu ngagenogale mi aiwec.

### 3

#### Nikodemus

<sup>1</sup> Farisaio ngic monic wacine Nikodemus, ye Yuda ngic-ngigac yengele ngic micne monic gawec. <sup>2</sup> Aime ye debocka Yesula kwesilu yanguc miwec, “Wewedu, ga Wapongti salecgume wewedu bole balu gagic, yogo ngagegabeleng. Ga pasile maaine bacaigic, bole ingucne monicte Wapong mikac galu nalic mi badaicte.”

<sup>3</sup> Inguc mime Yesudi bafaliyelu yanguc edowec, **“Foinac, monic ye hatacmac gbolicne mi fikedaicte, ye Wapongte ngani-damongte kwelina nalic mi gadaicte, yogo noinebenang edocgugabac.”**

<sup>4</sup> Inguc mime Nikodemusdi miwec, “Ngic biyac suguleicnedi wenucka hatacmac fikedaicte? Ye nenggacinele gobe kwelina nalic mi fedaicte. Ailu hatacmac nalic mi fikedaicte.”

<sup>5</sup> Aime Yesudi bafaliyelu yanguc edowec, **“Foinac, monic ye misa Asuholecka gbolicne mi fikedaicte, ye Wapongte ngani-damongka nalic mi fedaicte, yogo noinebenang edocgugabac.** <sup>6</sup> Aime ngic soc-biuckoleckacni fikedaicte, ye ngic soc-biuckolec silichac. Nga Asuwacni fikedaicte, ye Asu silichac. <sup>7</sup> Ga hatac gbolicne fikecte edocgube mi kwatackenong. <sup>8</sup> Gbelong ye yeicne angac balaibelu weme ucine ngagecaigic. Aime ye wenuwacni welecaigac ailu wenuwa hikecaigac, yogo mi ngagegic. Ngic-ngigac Asuwa fikedaingte, yenge sasawadi silicngineng ingucnehac.”

<sup>9</sup> Inguc mime Nikodemusdi yanguc edowec, “Yowa sasawa migic, yogo yefe wenucka fikedaicte?”

<sup>10</sup> Inguc mime Yesudi bafaliyelu yanguc edowec, **“Ga Israel ngic-ngigac yengele wewedudi wiyac yogo wenucka mi ngage-motogic, me?”** <sup>11</sup> Foinac, nonge ngagecaigabeleng, yogo micaigabeleng. Nga nganicaigabeleng, yogo mibeng yegengkecaigac, yogo noinebenang edocgugabac. Aime ngenge yowa yogo mi ngagepangkecaigaing. <sup>12</sup> Na himongte wiyacka gbolicne fikeningte yowa milu edocngebabengenge mi ngagesingkeibong. Aime honocmenngte wiyacte edocngabadactewa, ngenge yogo wenucka ngagesingkedaingte? <sup>13</sup> Monicte honocmengka mi fewec. Ngicte Madec honocmengkacni wawec, ye moniyangti sugu honocmenngte wiyacte edocngabadactewa.

14 “**Mosesdi himong kisiwa misaine mikacka hema moledi baicne bafangkelu kpembengkeme domawec,\* ngic yenge aibaba silicine ingucnehac Ngicte Madec bafangkebang domadaicte.** 15 **Ilec ailu ngic-ngigac ye ngagesingkegang, yenge sasawadi gaga-sanang badaingte.”**

16 I yangucte, Wapongti himongtowale ngic-ngigac yengele kwele-angac sugucnehac ngagewecte ailu, Madecine moniyang sugu lome himongka wawec. Ilec monicti ye ngagesingkegac, ye mi homadaicte, ye gaga-sanang bagac. 17 Wapongti Madecine himongtowale ngic-ngigac bikicngineng wosaclu mimoctonale mi saleme wawec, miyac. Ye himong ngic-ngigac yengele bikicte ameine bame wasecne ainingte himongka saleme wawec. 18 Aime monicti Madecine ngagesingkeme, ye yowawa mi logac. Nga monic ye Wapong Madecine moniyangte wac mi ngagesingkegacka, yebac yowawa biyachac mimoctowec.

19 Yowa mimoctowecte fungine yogo yanguc, Angocti himongka kwesime, ngic-ngigac aibabangineng sowacnele ailu kundungte angac ngagelu Angoc hegileibong. 20 Ngic-ngigac aibaba sowacne aicaigaing, yenge aibabangineng sowacne yegena mi fikenale ailu, sasawadi Angoc lobe holecnolu Angocka mi kwesigaing. 21 Aime monic ye aibaba noine aicaigac, ye Wapongte tapiliwa boleine bacaigac, yogo yegengkenale Angocka kwesigac.

*Yoanedi Yesule mime yegengkewec*

22 Gacgu Yesu ye mic-tengtengfocine yengeholec Yudeya himongka hikelu iwa galu ngic-ngigac misa lowayelewec. 23 Dameng iwa Salim mac emeina mac monic wacine Aion, iwa misa bocyac fawec. Ilec Yoane ye inguchac iwa game ngic-ngigac yenge yela hikebong, yedi inguchac misa lowayeclu gawec. 24 Aibaba yogo Yoane muc-macka mi loebongka fikewec.

25 Aime Yoane mic-tengtengfocine nga Yuda ngic monic, yenge Yuda yengele suwe-suwe aibabanginengte ailu yowanginengti fec-wac aiwec. 26 Aime mic-tengteng yenge Yoanela lelu yanguc edoibong, “Wewedu, ngic gaholec Yodan nebocina game gagi yele fungine miyengka yegengkeme edocnubaing, ye hocne ngic-ngigac misa lowayeleme sasawadi yela hikeyackegaing.”

27 Inguc mibong Yoanedi yanguc edocebawec, “Wapong honocmengka gagac, yedi ngic monic wiyac mi lacnodaictewa, ye yogo nalic mi badaicte. 28 Na Mesia miyac. Nabac ye yefe molickecnebele Wapongti bole-yowa yogo neleme kwesiiba. Yogolec hocne biyachac edocngebaiba. Aime ngenge ngageibong, yogo hocne mibong yegengkegac. 29 ‘Ngic ye ngigac bingecineholec ye ngigac badaicte. Aime ngic agoinedi yele siduc ngagelu beliyedaicte.’ Aime na ingucnehac yakumac belic-belicti kwelene wakegac. 30 Yele siducti suguleme naleidi wadaic.”

31 Wilengkacni wawec, ye wiyac sasawale feicnetowangineng aigac. Aime ngic himongkacni fikeicnehac, ye himongkacni. Ilec ailu himongte yowa micaigac. Nga honocmengkacni wawecti wiyac sasawale feicne aiwec gagac. 32 Ailu ye wiyac wilini fagac, yogo ngani-ngagec ailu gawec, yogolec mime yegengkeme, monicti yele yowa mi sebilelu gagac. 33 Aime monic ye yowa yogo balu sebilegac, ye Wapongti yowa noine micaigac, yogo mime sanangkegac.

34 Wapongti ngic salewec, ye Wapongte yowa migac. I yangucte, Wapongti Tili Asu heuckelu nebocine sugu mi yelegac, miyac. 35 Mamac ye kweledi Madecinele angac ngagelu wiyac sasawa moleina lowec. 36 Ilec monic ye Wapongte Madec ngagesingkegac, ye gaga-sanangkolec gagac. Nga monicti Madecine lobe holecnogac, ye Wapongte aalicti yele feiwa feme gagac.

## 4

### *Samaria ngigac*

1 Farisaio yenge Yesule siduc yanguc ngageibong, “Yedi mic-tengtengfocine bacebalu misa lowayelegac. Aime yele mic-tengtengfocine yengi Yoanele mic-tengtengfocine yengele dzale ewaligac.” 2-3 Yesu ye yowa inguc ngagelu Yudeya himong hegilelu Galili prowinswa hatacmac hefaliye hikewec. Yudeya himong iwa Yesu yeuctihac ngic-ngigac misa mi lowayelewec, mic-tengtengfocine yengi sugu ngic-ngigac misa lowayecluibong.

4 Iwa hikelu Samaria himong falockenogale ailu, 5 Samaria yengele mac monic wacine Sika, iwa hikewec. Sika mac yogo Yakobodi madecine Yosefele himong mimoctocnowec,

\* **3:14:** Hemale siduc yogo Himong Kisiwa 21:6-9 iwa kwelengkeicne fagac. Hema hiecbame ilucine kpembengkeicne yogo nganilu mi homalu gaibong. **3:14:** Him 21:9; Yoa 8:28; 12:32 **3:15:** Yoa 20:31 **3:16:** Yoa 3:36; 10:28; Rom 5:8; 8:32; 1Yoa 4:9-10 **3:17:** Luk 19:10 **3:18:** Yoa 5:24 **3:19:** Yoa 1:5,9; 8:12 **3:22:** Yoa 4:1-2 **3:28:** Yoa 1:20; Mat 11:10 **3:31:** Yoa 8:23 **3:32:** Yoa 3:11 **3:35:** Mat 11:27; Yoa 5:20 **3:36:** Yoa 3:16-18; 1Yoa 5:12 **4:1:** Yoa 3:22

yogolec emeina ngiyewec. <sup>6</sup> Aime Yesu ye Yakobole misa long monic faliicne ngiyewec, iwa yefe hikecgu tapiliine mikac aime misa long yogolec emeina walu ngiyewec. Dameng iwa 12 kilok ingucne aime ngiyewec.

<sup>7-8</sup> Ngiyeme mic-tengtengfocine yenge nosing fuli banogale macka hikeibong. Hikeibong Samaria ngigac monic ye misa filanogale kwesime, Yesudi yanguc micnowec, “**Misa baweleng nobe.**”

<sup>9</sup> Inguc mime ngigac yedi miwec, “Ga Yuda ngicti wenucka Samaria ngigac nala misale migic?” Yuda ngic-ngigac yenge Samaria ngic-ngigac yengeholec nogumecngineng mi fawecte ngigac yedi inguc miwec.

<sup>10</sup> Inguc mime Yesudi yanguc edowec, “**Ga Wapongti wiyac gelenogale aigac, nga madi misale uwagelegac, ga yele fungine ngage-motolu uwacnodengka, ibac yedi misa gagaineholec geledec.**”

<sup>11</sup> Inguc mime ngigac yedi miwec, “Sugucne, ga pakec mikac. Nga misa long yogo dalicne. Aime misa gagaineholec yogo wenuwacni filadamecte? <sup>12</sup> Ngambononggeng Yakobodi\* misa long yago nolowec. Ga ye ewaligic, me? Ye yeicne nga madecfocine ailu lamabulumakafocine, yenge misa yagowacni nolu gaibong.”

<sup>13</sup> Inguc mime Yesudi bafaliyelu yanguc edowec, “**Ngic-ngigac misa yago nocaigaing, yenge sasawadi misale hatacmac aiyeledaicte.** <sup>14</sup> Aime monic ye nani misa lacnobe nodaicte, ye misale hatacmac mi aicnodaicte. Aime misa lacnodacte, yogodi yela misa dongeine ingucne fikelu gaga-sanang bafuwacnodaicte.”

<sup>15</sup> Inguc mime ngigac yedi miwec, “Sugucne, na misale hatacmac mi aineleme misa filanogale yagowa hatacmac mi kwesidac. Ilec ga misa yogo neleng nobe.”

<sup>16</sup> Inguc mime Yesudi bafaliyelu yanguc edowec, “**Ga hikelu ngawegone micnoengka kwesinic.**”

<sup>17</sup> Inguc mime ngigac yedi miwec, “Na ngawene mikac.”

Mime Yesudi yanguc edowec, “**Na ngawene mikac migic, ga yowa yogo noine migic.** <sup>18</sup> **Ga ngic 5 biyachac bacebaing. Aime ngic yanguctihac baengka ngeke momoc gagabiyec, ye gale ngawe miyac. Yogo foinac migic.**”

<sup>19</sup> Inguc mime ngigac yedi miwec, “Sugucne, ga siduc-mimi ngic, yogo yakumac ngagemotogabac. <sup>20</sup> Ngambofocnonggeng yenge kupic yagowa Wapong afeelu gaibong. Aime Yuda ngengebac yanguc micaigaing, ‘Ngic-ngigac sasawadi Yerusalem iwa sugu Wapong afeedaing.’”

<sup>21</sup> Inguc mime Yesudi yanguc edowec, “**Ngigac, ga yowane ngagesingkec, dameng monic kwesidaicte, iwa ngic-ngigac ngenge kupic yagowa me Yerusalem iwa sugu Wapong hatacmac mi afeedaingte.** <sup>22</sup> **Ngenge yele fungine mi ngage-motolu moc afeecaigaing. Bikicte ame baba nga wasecne ainogale tapili, yogo Yuda ngic-ngigac nongelacni fikewec. Aime Wapong ngage-motolu afeelu gagabeleng.**

<sup>23</sup> “**Dameng yogo kwesilu gagac, yogo biyac kwesigac. Yogowabac ngic-ngigac noine afeecaigaing, yenge asuwa nga pasi noina Mamac afeedaingte. Mamacti ngic-ngigac aling ingucne yengele ngageme madickedaicte.** <sup>24</sup> **Wapong ye Asu. Ilec ailu ngic-ngigac afeenogale milu, asuwa nga pasi noina afeedabiyeng.**”

<sup>25</sup> Inguc mime ngigac yedi miwec, “Mesia, wacine monic Kristo micaigaing, ye fikenale miicne yogo ngagegabac. Yedi kwesilu wiyac sasawa mime yegengkenoledaicte.”

<sup>26</sup> Inguc mime Yesudi yanguc edowec, “**Yogo na hocne yowa edocgugabac.**”

*Yesule nosing*

<sup>27</sup> Inguc milu domame, mic-tengtengfocine yenge mackacni hefaliye kwesiibong. Kwesilu nganibong, Yesu ye ngigac yeholec yowa mingagec aiboc nganilu kwatackeibong. Aimebac monicti yanguc mi uwacnowec, “Ngigac, ga oma wiyacte uwacnogenic?” Me monicti Yesu yanguc mi uwacnowec “Ga ngigac yeholec oma wiyacte migabiyec?”

<sup>28</sup> Aime ngigac ye Yesule yowa ngagelu hebecine hegilelu macka hefaliye hikelu macfocine edocebalu yanguc miwec, <sup>29</sup> “Ngenge welelu nganining. Ngic monic nale aibaba esecne gaiba yogo ninic mifickenelegac. Ye Mesia mecne?” <sup>30</sup> Inguc mime yenge taon hegilelu Yesula kwesiningte kwesiibong.

<sup>31</sup> Kwesiyeibongkahac mic-tengtengfocine yengi nosing nonale yanguc micnoibong, “Wewedu, ga nosing noc.”

<sup>32</sup> Inguc micnobong yedi yanguc edocebawec, “**Nale nosing fagac, yogo ngenge mi ngagegaing.**”

4:5: Fike 33:19; Yos 24:32    4:9: Esr 4:1-5    4:10: Yoa 7:37-38; Miye 21:6    \* 4:12: Yakobo ye Samaria ngic-ngigac nga Yuda ngic-ngigac, yengele ngambo aiwec.    4:12: Yoa 8:53    4:14: Yoa 6:35    4:20: Yef 12:5-14; Mige 122:1-5  
4:22: 2Ngt 17:29-41; Yes 2:3; Rom 9:4-5    4:24: 2Kor 3:17; Rom 12:1; Filip 3:3    4:26: Mrk 14:61-62

<sup>33</sup> Inguc mime mic-tengtengfocine yengungtihac mingagec ailu yanguc miibong, “Monicti nosing bawelelu lacnome nogac mecne.”

<sup>34</sup> Inguc mibong Yesudi yanguc edocebawec, **“Salecnuwec, yele yowa balaibelu boleine bagacgu bamoctodacte, yogodi nale nosing aigac.** <sup>35</sup> **Ngenge yanguc micaigaing, ‘Nosing duwebeng tamacne 4 motome nosing noine aidaicte.’ Na yowa monic edocngebabe ngagening, ngenge dongengineng hilalu bolewa nganing, nosing biyac noine ailu houwelu fagac.** <sup>36</sup> **Inguc aime nosing noine duwe-duwe ngic, nga noine baba ngic yeke momochac beliyedabiyecte. I yangucte, noine baba ngicti boleinele fuli balu gaga-sanangte noine inguchac balu kpaduckedaicte.**

<sup>37</sup> **“Aime, ‘Monicti nosing duweme, monicti noine balu kpaduckedaicte.’ Yowa inguc micaigaing, yogolec noine fikegac.** <sup>38</sup> **Ngic gocne yengi bole biyachac duweibong. Aime bole yogolec noine fikewec. Nga bole yogo ngengi mi duweibong. Aime nani bole iwa salecnegebabe hikelu noine balu kpaduckeibong. Ngenge yengele bole taockelu balu gagaing.”**

*Samaria ngic-ngigac yengi Yesu ngagesingkeibong*

<sup>39</sup> Samaria ngigac yedi Yesule yanguc milu edocebawec, “Ye nale aibaba esecne gaiba, yogo ninic mifickenelegac.” Inguc miwecte ailu mac yogowacni Samaria ngic-ngigac bocyacti Yesu ngagesingkeibong. <sup>40</sup> Ilec ailu Samaria ngic-ngigac yenge Yesula kwesilu yedi yengeholec hikelu ganale micnoibong. Aime ye hikelu hadeng yaeckang yengeholec gawec.

<sup>41</sup> Yesu ye iwa game ngic-ngigac bocyachenangti ye yowainele ailu ngagesingkelu <sup>42</sup> ngigac yanguc edoibong, “Nonge molickelu gale siducte ailu ngagesingkeibeng. Nga yakumacbac nongungtihac yele mickacni yowaine ngagelu ngagesingkegabeng. Aime yedi hocne himongtowale ngic-ngigac sasawa nongileng Asa-baba ngic. Ye bikicte amenonggeng badaicte, yogo foinac ngagegabeng.”

*Kiyale madec bamadickewec*

<sup>43</sup> Aime hadeng yaeckang motome, Yesu ye Samaria himong hegilelu Galili prowinswa hikewec. <sup>44</sup> Aime yeicnele biyac ngagelu yanguc miwec, **“Wapongte siduc-mimi ngic monic ye yeicne himongka game, ngic-ngigac yenge ye alang mi bacnodaingte.”**

<sup>45</sup> Aime Galili ngic-ngigac yenge Ewalicebaicnele hombangte damengka Yerusalem taonka hikebong, Yesudi pasi sasawa bame nganiibongte ailu ye Galili prowinswa hikeme, macfocine yenge ye hefoleibong.

<sup>46</sup> Aime Yesu ye Galili prowinswa Kana taonka misa bafaliyeme waing misa aiwec, iwa hatacmac hefaliye hikewec. Hikeme iwa ngictaule kiya monic kwesiwec, yele madec Kapeneam taonka huc bame fawec. <sup>47</sup> Aime kiya ye Yesu Yudeya himongkacni hefaliyelu Galili prowinswa kwesilu gagac, inguc ngagelu yela hikelu madecine bame madickenale micnowec. Aime madec yogo ye biyac homanogale aiwec.

<sup>48</sup> Inguc mime Yesudi yanguc edowec, **“Ngenge pasile maaine nga pasi mi nganiganine mi nganidabongka, nalic mi ngagesingkedabong.”**

<sup>49</sup> Inguc mime kiyadi miwec, “Sugucne, madecne homadaickale ga biyac wanong.”

<sup>50</sup> Inguc mime Yesudi yanguc edowec, **“Ga hikenong. Madecgone biyac madickelu gagac.”**

Inguc mime ngic ye Yesule yowa ngagesingkelu hefaliye hikewec. <sup>51</sup> Hefaliye hi-keemewa, kwelec kwekwefocine yengi kwesilu yefewa bafuwalu yanguc edoibong, “Madecgone biyac madickelu gagac.” <sup>52</sup> Inguc edobong, ye madickeyec, yogolec damengte uwayeleme yengi yanguc edoibong, “Awecnahac 1 kilok awelilicte, iwa socine mongkeyec.”

<sup>53</sup> Inguc edobong mamacine ye ngagewec, “Yesu ye dameng yogowahachenang salecnulu miyec, ‘Madecgone ye biyac madickelu gagac.’” Inguc ngagelu siduc edocebame ye nga golowacfocine yenge Yesu ngagesingkeibong. <sup>54</sup> Yesu ye Yudeya himongkacni hefaliyelu Galili prowinswa kwesilu, ngagesingkeningte pasile maaine iwa bame alecine yaeckang aiwec.

## 5

*Betesda lifucka*

<sup>1</sup> Yogolec lobeina Yuda ngic-ngigac yengileng hombang monic kwesime Yesu ye Yerusalem fewec. <sup>2</sup> Felu Yerusalem taonka nu sugucne monic wacine Lamale nu, yogolec nebocine lifuc monic fawec. Yogo Hibru yowawa Betesda wackecaigaing, yogolec mecina



dakec 5 faibong. <sup>3</sup> Aime dakec yogolec kwelina ngic-ngigac hucnginengkolec, yogo dongepisic nga hige-sowac, ailu puling ingucne bocyacti falu gaibong. [Yenge misa yogodi uc fific ainale wangec facaigaing. <sup>4</sup> I yangucte, dameng gocna Sugucnele angelo monicti misa iwa kwesicaigac. Kwesime misa yogo uc fific aime, monic ye molickelu misawa haudaicte, ye hucine sasawa miyac aiyackedaicte.]\*

<sup>5</sup> Aime ngic-ngigac falu gaibong, yengele hewackacni ngic monic puling game hifaine 38 biyachac aiwec, ye iwa falu gawec. <sup>6</sup> Aime dameng dalicne iwa gawecte ailu Yesudi ye biyac nganilu ngagewecte ailu yanguc uwacnowec, **“Ga madickenogale aigelegac, me?”**

<sup>7</sup> Inguc mime puling yedi bafaliyelu yanguc edowec, “Sugucnene, misa uc fific aimebac na ma ngicti baficnulu lifucka locnudaicte? Na haunogale aibe gocne yengi hepacnulu haucaigaing.”

<sup>8</sup> Inguc mime Yesudi yanguc edowec, **“Ga fangkelu dembenggone balu hikenong!”**

<sup>9</sup> Inguc miyemewa ngic ye dameng yogowahac socine madickeme fangkelu dembenggone balu hikewec.

Aime wiyac yogo Sabat damengka aiwec. <sup>10</sup> Aime Yuda ngic yenge ngic madickewec ye nganilu yanguc edoibong, “Yakumacbac dembenggone balu hikegic, bole yogo Sabat damengka baengka mi madickegac.”

<sup>11</sup> Inguc mibong bafaliyelu yanguc edocebawec, “Ngic bamadicnugac yedi salecnulu migac, ‘Ga dembenggone balu hikenong.’”

<sup>12</sup> Inguc mime uwacnoibong, “Ma ngicti ‘dembenggone balu hikenong’ migac?” <sup>13</sup> Aime ngic madickewec ye ma ngicti bamadickewec, yogo mi ngagewec. I yangucte, ngic-habutowadi domaibongte ailu Yesu ye kwelinginang hike sangkewec.

<sup>14</sup> Aime yogolec lobeina Yesudi ngic yogo Ibu-mac kwelina bafuwalu yanguc edowec, **“Ga sogone biyac madickegac. Aime umac monic sugucnehac fikegeleadaickale ailu, bikic hatacmac mi bafuwadamec.”**

<sup>15</sup> Inguc mime ngic ye hikelu Yuda ngic edocebalu yanguc miwec, “Yesudi hocne na bamadicnugac.”

#### *Yesulacni gaga*

<sup>16</sup> Yesu ye Sabat damengka bole ingucne balu gawecte ailu Yuda ngic yengi ngaba sanangnehac aicnolu gaibong. <sup>17</sup> Aime Yesudi bafaliyelu yanguc edocebawec, **“Mamacne ye babaficte boleine bacaiagac, ailu yanguctihac balu gagachac. Ilec na inguchac bole balu gagabachac.”** <sup>18</sup> Inguc ailu Yesu ye Sabatle yefe-yowa fagac yogo mi bal-aibewec. Ailu yogo sugu miyac, ye taockelu Wapongte Mamacne milu ye Wapong ingucnehac aiwec. Ilec ailu Yuda ngic yenge kwelenginang aalic fikeme, Yesu wehomanogale aibong.

<sup>19</sup> Inguc aibong Yesudi bafaliyelu yanguc edocebawec, **“Foinac, Mamacti bole monic bame, Madec ye yogo nganilu yeuctihac bole yogo bagac. Ye yeicne ngage-ngagewa bole mi badaicte, yogo noinebenang edocngebagabac. Mamac ye bole balu gagac, Madec ye bole silicne yogohac balu gagac.”** <sup>20</sup> I yangucte, Mamac ye Madecinele kwele-angac ngagecnolu bole balu gagac, yogo sasawa edalilu balu gagac. Aime bole sasawa bame nganicaigaing, yogolec feicne gocne sugucnehac edalime ye bole yogo bame, ngenge yogo nganilu medecngebadaicte. <sup>21</sup> Mamacti ngic-ngigac homackacni bagholiyecebame fangkebong gaga yelecaigac, ingucnehac Madecti bawosaacebanogale yeicne angacine balaibelu gaga yeledaicte. <sup>22-23</sup> Mamacti ngic-ngigac aibabangineng wosaclu mi mimoctodaicte, miyac. Ngic-ngigac sasawadi Mamac alang bacnoicaigaing, ingucnehac Madec alang bacnoningte yedi mimocto-mimoctole bole yogo Madecinele molewa loyackewec. Aime monic ye Madecine alang mi bacnolu gagac, ye Mamacti Madecine salewec, ye inguchac alang mi bacnolu gagac.

<sup>24</sup> **“Foinac, monic ye nale yowa ngagelu Mamac salecnuwec, ye ngagesingkegac, ye gaga-sanang bagac. Ailu mimocto-mimoctole damengka yowawa mi fedacte, yogo noinebenang edocngebagabac. Ye homac hegilelu gagawa biyachac fewec.”** <sup>25</sup> Foinac, ngic-ngigac kwelengineng homaicne, yenge Wapongte Madecte yowamalac ngagelu gaga badaingte. Dameng yogo kwesidaicte. Nga yakumac biyac kwesiyeec, yogo noinebenang edocngebagabac. <sup>26</sup> Mamac yeicna gaga fagac, silicine ingucnehac yedi Madec gaga lacnome, Madecta gaga ingucnehac fagac. <sup>27</sup> Aime

\* **5:4:** Hibi esecne Yoane kwelengkewec, yogo nganilu iwacni kwelengkebong kwelengkebong ofewec, yengelacni gocne 5:3b-4 iwa mi fagac. Ngic-ngigac yenge hibi kwelengkeicne yogo wosaclu nganibong Yoanedi mi kwelengkewec mecne. **5:8:** Mat 9:6 **5:10:** Neh 13:19; Yer 17:21 **5:18:** Mat 26:4; Yoa 7:1; 10:30 **5:19:** Yoa 5:30 **5:22-23:** Yoa 5:27; Sale 10:42; Filp 2:10-11; 1Yoa 2:23 **5:24:** Yoa 3:15-18

**Madecine ye Ngicte Madec. Ilec ailu Mamacti ngic-ngigac wosaecebalu mimoctoceanale bole-yowa tapillineholec lacnowec.**

<sup>28-29</sup> “Ngenge yowa yogolec mi medecnegebadaic. I yangucte, ngic-ngigac dongesiwa fagaing, yenge sasawadi dameng monic kwesime yowa-malacine ngagelu dongesiwacni gholiyelu fangkedaingte. Aibaba madicne aigacgu homaibong, yenge gaga banogale gholiyelu fangkedaingte. Nga aibaba sowacne aigacgu homaibong, yenge wosaecebalu mimoctoceanale fangkedaingte. <sup>30</sup> Na wiyac monic neicne kwelele nalic mi badacte, miyac. Na wiyac hedecnedi ngagelu ngagecaigabac, yogolec silicina aibabangineng wosaelu mimoctodacte. Naneicne angac mi bal-aibecaigabac, miyac. Salecnuwec yele angac balaiibecaigabac. Ilec ailu nale mimocto-mimoctole bole yogo dondonne aigac.

*Yesule fungine mibong yegengkeyelewec*

<sup>31</sup> “Naneuctihac funginene mibe yegengkedactewa, yowane hatac mibe mi ngagedaingte, miyac. <sup>32</sup> Monicti nale fungine mime yegengkecaigac. Aime ngagebe yele yowa yogodi noinebanang aigac.

<sup>33</sup> “Aime ngenge ngic gocne salecebabong Yoanela hikebong, yedi yowa noine yogo mime yegengkewec. <sup>34</sup> Monicti nale siduc mime yegengkeme yowaine nalic mi ngagesidacte, miyac. Ngenge bikicte ameine babe wasecne ainingte Yoanele yowa edocnegebagac. <sup>35</sup> Yoane ye silicine yangucne, hifa monicti lobeme angole-caigaing, ye silicine ingucnehac aiwec. Angoleme ngenge dameng bangkacnemac angoc yogolec beliyelu yele angocka gaibong.

<sup>36</sup> “Wiyac nale fungine edalincgebagac, yogodi Yoanele yowa yogo ewaligac. Aime Mamacti boleine balu bamoctobele nelewec. Aime bole balu gagabac, yogodi Mamacti salecnuwec yogo mime yegengkedactewa. <sup>37-38</sup> Ailu Mamac salecnuwec, yedi hocne funginene biyachac mime yegengkewec. Ye ngic saleme ngenge ye mi ngagesingkecaigaing. Ailu Mamacte yowa-malac mi ngagelu yeicne weningucne yogo mi nganiibong. Aime yowainedi kwelenginang mi fagac. <sup>39</sup> Wapongte hibi-bidi gaga-sanang bafuwangedaictewa, ngenge inguc ngagesingkelu hibi yogo wafengagec ailu gacaigaing. Hibi yogodi hocne nale fungine mime yegengkecaigac. <sup>40</sup> Aime ngengibac nala kwesilu gaga baningte mi aingelegac.

<sup>41</sup> “Na ngic-ngigac yenge nale wac feicne wacnugaing, yogo hanogale mi ainelegac.

<sup>42</sup> Aime ngenge Wapongte angac yogo kwelenginang mi fagac, yogo ngagegabac.

<sup>43</sup> Aime na Mamacnele wacka kwesibe, ngenge na mi bacnulu sebicnugaing. Nga monicti yeicne wacka kwesidaictewa, ngenge ye biyac balu sebiledaingte.

<sup>44</sup> “Ngenge ngengungtihac wac feicneholec ainogale aibong, Wapong moniyang yelacni wac feicne kwesicaigac, yogolec mi aingelegacka, ngenge na wenucka ngagesingnugaing? <sup>45</sup> Nani gacgu ngenge Mamacte haicka yowawa locnebadacte, ngenge inguc mi ngagedaing. Ngenge Mosesdi baficnegebanale wangep gabong, aime sifu yedi yowawa locnegebagac. <sup>46</sup> Mosesdi nale ngagelu yowa kwelengkewec. Ilec ailu ngenge yogo ngagesingkedabongka, na inguchac ngagesingnudabong. <sup>47</sup> Ngenge Mosesle hibi mi ngagesingkegaingka, nani yowa migabac, yogo wenucka ngagesingkedaingte? Yogo nalic mi ngagesingkedaingte.”

## 6

*Nosing gumecebabawec*

*Mat 14:13-21; Mrk 6:30-44; Luk 9:10-17*

<sup>1</sup> Yogolec lobeina Yesu ye Galili lifuc, yogolec wacine monic Tiberias, yogo falockelu nebocina edi fewec. <sup>2</sup> Ailu ye huckolec yengela pasile maaine bame, ngic-ngigac yenge yogo nganiibongte ailu ngic-ngigac habitowadi ye balaiibebong. <sup>3</sup> Aime Yesu ye mic-tengtengfocine yengeholec kupicka felu ngiyeibong. <sup>4</sup> Aime Yuda ngic-ngigac yengele Ewalicebaicnele hombangte dameng bangkalewec.

<sup>5</sup> Aime Yesu ye donge hilalu nganime ngic-ngigac habitowadi yela kwesiibong, nganicebalu Filip yanguc uwacnowec, “**Nongileng nosing wenuwacni fuli balu ngic-ngigac habitowa yago yelebeng nodaingte?**” <sup>6</sup> Ye pasi banale ngagelu Filip lokwesac aicnolu uwacnowec.

<sup>7</sup> Uwacnome Filipdi bafaliyecnolu yanguc miwec, “Entacka moneng 200\* yogolecsocti nosing fuli balu kpisic-kpisic heuckelu filesoc yelebeng yengelesoc mi aidaicte!”

5:28-29: Dan 12:2; Mat 16:27; Sale 24:15      5:30: Yoa 5:19; 6:38      5:36: Yoa 3:2; 14:11      5:37-38: Mat 3:17;

Yoa 5:32; 8:18      5:39: Luk 24:27      5:46: Sale 3:22      \* 6:7: Moneng wacine denarius. Aime denarius 200 yogo bulumaka 6 yengele fulingineng yogolecsocti aigac.

<sup>8</sup> Inguc mime mic-tengtengfocine yengele hewackacni Saimon Pita gbaine Endrudi miwec, <sup>9</sup> “Madec hacic monic yago domagac, ye bret 5 bali hucinedi flawa baicne, † ailu misa-sic yaeckang balu gagac. Aime yogodi habutowa yago wenucka yelebeng andoebadaicte?”

<sup>10</sup> Inguc mime Yesudi yanguc miwec, “**Ngenge ngic-ngigac edocebabong wangiyeing.**” Inguc mime edocebabong kpinding fawec, iwa wangiyeibong. Ngic ngiyeibong, yengele dzalengineng yogo 5 taosen ngama ingucne. <sup>11</sup> Ngiyeibong Yesudi bret yogo balu Wapong kwele-madic micnolu, botoc balu ngic-ngigac iwa ngiyeibong, yenge yelewec. Yeleme motome misa-sic inguchac balu botoc balu yeleme angacnginenge balu noibong.

<sup>12</sup> Nobong gebecebame Yesudi mic-tengtengfocine yanguc edocebawec, “**Nosing to-faine notiwa aibong ngiyelu sowaledaickale, ngenge yogo kpaduckeyackebong dambawa hauyackena.**” <sup>13</sup> Inguc mime yenge bret 5 nobong gebecebawec, yogolec tofaine kpaduckeyackebong haulu damba 12 wakewec.

<sup>14</sup> Wakem, ngic-ngigac yenge yedi pasile maaine bawec, yogo nganilu yanguc miibong, “Foinac, ngic yago hocne siduc-mimi ngic himongka kwesinale miicne.” <sup>15</sup> Aime ngic-ngigac yenge kwesilu Yesu balu ngictaungineng lonogale mibong, Yesu ye biyac ngageyelelu yeicnac baickelu hatacmac kupicka fewec.

*Lifuc feina edela edela hikewec*

*Mat 14:22-33; Mrk 6:45-52*

<sup>16</sup> Feme mac kundung kweme mic-tengtengfocine yenge misa lifuc mecina haubong. <sup>17</sup> Haubong mac kundung kwewec, dameng iwa Yesu ye yengeholec mi hikewec, yengilangkac gombawa felu misa lifuc falockelu Kapeneam hikenogale hikeibong.

<sup>18</sup> Hikeebongka gbelong sugucnedi weme lifucka dibong sugucnehac fangkewec. <sup>19</sup> Aime yenge 5 me 6 kilomita yogolecsoc puli welu misa lifuc hewacina hikeibong. Hikeebongka Yesu ye lifuc feina edela edela hikelu gomba emeina leme, yenge ye nganilu hangocbawec. <sup>20</sup> Inguc aibong Yesudi yanguc edocebawec, “**Nani welegabac. Ngenge mi hangocgebana.**” <sup>21</sup> Inguc mime ngagelu yenge Yesu gombawa fenale ngageebongkabac, gombadi himong hikenogale ngageibong, iwa biyacbenang hike sulumeibong.

<sup>22</sup> Mac saeme ngic-ngigac habutowa yenge lifuc nebocina edi domalu yanguc miibong, “Awecnac gomba moniyangti sugu yago fame nganibeleng. Aime Yesu ye mic-tengtengfocine yengeholec gomba iwa mi feyec, mic-tengtengfocine yenge yengilangkac felu hikebiyeng.” <sup>23</sup> Inguc milu domaebongka, gomba gocne Tiberias taonkacni hikelu, Sugucnedi Wapong kwele-madic micnolu ngic-ngigac bret gumecebawec, mac iwa bangkalelu kwesibong. <sup>24</sup> Kwesibong yenge Yesu nga mic-tengtengfocine iwa mi nganicebaibongte ailu habutowadi Yesu basackelu gombawa felu Kapeneam taonka hikeibong.

*Honocmengte nosing*

<sup>25</sup> Basackelu lifuc nebocina hikelu bafuwalu yanguc uwacnoibong, “Wewedu, ga ma damangka yawa kwesimec?”

<sup>26</sup> Inguc mibong Yesudi yanguc edocebawec, “**Foinac, nani pasile maaine babe nganibiyeng, yogolec ailu mi basacnugaing. Ngenge nosing nogebac aibiyengte ailu basacnugaing, yogo noinebenang edocngebabac.**” <sup>27</sup> Nosing peleckelu miyac aidaicte, ngenge yogolec boletowa mi badabiyeng. Ngicte Madecti gaga-sanangte nosing ngeledaicte, yogolec boletowa badabiyeng. **I yangucte, yele feiwa Wapong Mamacti yeicne tapili yela lowec.**”

<sup>28</sup> Inguc mime yengi yanguc uwacnoibong, “Wapongte bole banangte milu oma bole babeng madickedaicte?”

<sup>29</sup> Inguc mibong ameine bafaliyelu yanguc edocebawec, “**Wapongte bole yanguc fagac, Wapongti ngic saleme kwesiwec, ngenge ye hocne ngagesingkening.**”

<sup>30</sup> Inguc mime yengi yanguc miibong, “Nonge ga nganicgulu ngagesinggunangte gagi oma pasile maaine monic badamecte? Ailu oma bole nalic badamecte?”

<sup>31</sup> Ngambofocnonggeng yenge himong kisiwa misaine mikacka mana nosing nolu gaibong, yogolec yanguc kwelengkeicne fagac,

‘Ye honocmengkacni nosing yeleme noibong.’” (*Wah 16:4; Neh 9:15; Mige 78:24*)

<sup>32</sup> Inguc mibong yanguc edocebawec, “**Foinac, Moses ye yeuctihac honocmengte nosing mi balu ngelewec. Mamacnedi honocmengte nosing noine ngelecaigac, yogo noinebenang edocngebabac.**” <sup>33</sup> Wapongte nosing, yogo ngic ye hocne honocmengkacni walu himongtowale ngic-ngigac yengele gaga bafuwayelewec.”

<sup>34</sup> Ye inguc mime yanguc miibong, “Sugucne, ga nosing yogo damengsoc nolelu gadamec.”

† 6:9: Bali flawa yogo wit flawa ingucne. Bali fuliine waicne, nga wit fuliine feicne. 6:15: Yoa 18:36 6:27: Yoa 6:48-58 6:29: 1Yoa 3:23 6:30: Mat 16:1; Yoa 2:18 6:31: Him 11:7-9

<sup>35</sup> Inguc mibong Yesudi yanguc edocebawec, “Naneutihac nosing gagaineholec. Ilec monic ye nala weledaichte, ye nosingte mi homadaichte. Nga monic ye na ngagesingnudaichte, ye misale hatacmac mi aicnodaichte. <sup>36</sup> Na yanguc biyachac edocngebaiba, ngenge na biyachac nganicnubong, ailu sifu mi ngagesingnucaigaing. <sup>37</sup> Mamacnedi ngic-ngigac nale molewa locebawec, yenge sasawadi nala kwesibong na mi yebicebadacte, yogo miyac. <sup>38</sup> Naneicne angacnele honocmengkacni mi waiba. Salecnuwec yele angac balaibenogale waiba. <sup>39</sup> Aime salecnuwec, yele angac nga ngage-ngage yogo yanguc, ye yeutihac ngic-ngigac nale molewa locebawec, yengelacni monic mi hegiledacte. Aime gacgu dameng moto-motoina yenge yeucebabe fangkeyackedaingte. <sup>40</sup> Mamacnele ngage-ngage yogo yanguc, ngic-ngigac yenge Madecine nganilu ngagesingkedaingte, yenge sasawadi gaga-sanang badaingte. Aime dameng moto-motoina nani yeucebabe fangkeyackedaingte.”

<sup>41</sup> Aime yedi yanguc biyachac miwec, “Naneutihac nosing noine ailu honocmengkacni waiba.”

Ilec ailu Yuda ngic-ngigac yenge yowa kwekwe aicnolu <sup>42</sup> yanguc miibong, “Ngic yago Yesu, Ye Yosefele madec. Aime nongileng nenggac-mamackecine ngagecepagabeleng. Aime ye wenucka yanguc migac, ‘Na honocmengkacni waiba.’”

<sup>43</sup> Inguc mibong Yesudi yanguc miwec, “Ngenge yowa kwelu mi minaguning. <sup>44</sup> Mamacnedi ngic monic mi wackelu fuluckedaictewa, ye nala nalic mi weledaichte. Mamac salecnuwec, yedi ngic-ngigac wacebalu fulucebawec, yogo yenge nani dameng moto-motoina yeucebabe fangkedaingte.

<sup>45</sup> “Siduc-mimi ngic yengele hibiwa yowa yanguc kwelengkeicne fagac, ‘Wapongti ngic-ngigac sasawa weduyeledaichte.’” (Yes 54:13)

Ilec ailu ngic-ngigac yenge Mamacte yowale hedec lolu yelacni ngage-ngage bai-bong, yenge sasawa nala weleyackegaing. <sup>46</sup> Monicti Mamac mi nganiwec, miyac. Ngic moniyangti Wapongkolec gawec, yedi sugu Mamac nganiwec. <sup>47</sup> Foinac, monicti ye ngagesingkegac, ye gaga-sanangkolec aigac, yogo noinebenang edocngebagabac.

<sup>48</sup> “Naneutihac gagale nosing. <sup>49</sup> Ngambofocnonggeng yenge himong kisiwa misaine mikacka mana nosing noibong, yenge homayackebong. <sup>50</sup> Nosing yago hocne honocmengkacni wawec, monic yogo nolu mi homadaichte. <sup>51</sup> Naneuc nosing gagaineholec ailu honocmengkacni waiba. Monic ye nosing yogo nogacka ye gaga-sanang bafuwalu wagingowagac. Nosing yogo soc-biucne. Himongtowale ngic-ngigac yengi gaga bafuwaningte yeledacte.”

<sup>52</sup> Inguc mime Yuda ngic-ngigac yenge yowangineng fec-wac aime yanguc miibong, “Ngic yago ye wenucka soc-biucine noleme nonangte migac?”

<sup>53</sup> Inguc mibong Yesudi yanguc edocebawec, “Foinac, ngenge Ngicte Madecte sac nga soc-biuc mi nogaingka, gaga ngengela mi fagac, yogo noinebenang edocngebagabac. <sup>54-55</sup> I yangucte, nale soc-biuc, yogo nosing noine nga nale sac, yogo misa noine. Ilec ailu monic ye sacne nga soc-biucne nogacka, ye gaga-sanangkolec aigac. Aime nani dameng moto-motoina ye bagboliyebe fangkedaichte. <sup>56</sup> Aime monic ye nale sac nga soc-biuc nogac, ye nale kwele kwelina gagac. Aime nani yele kwele kwelina gagabac. <sup>57</sup> Mamac salecnuwec, yedi gaga fileine. Aime na yele ailu gaga balu gagabac. Aime monic ye soc-biucne nogac, ye nale ailu inguchac gaga balu gadaichte. <sup>58</sup> Nosing yagodi honocmengkacni wawec gagac, yogo ngambofocnonggeng nosing nolu homaibong, ingucnehac miyac. Monicti nosing yago nogac, ye galu gaga-sanang badaichte.” <sup>59</sup> Yesu ye yowa yogo Kapeneam iwa kpakpaduc macka ngic-ngigac edocebalu weduyelewec.

*Yesu hegilelu hikeibong*

<sup>60</sup> Inguc mime ngagelu mic-tengtengfocine yengelacni bocyacti yanguc miibong, “Yowa edocnubalu wedunolegac, yogo umacnebenang, monicti yogo ngagelu nalic mi bal-aibedaichte.”

<sup>61</sup> Inguc mibong Yesudi edocebalu weduyeleme, mic-tengteng yenge yowa kwekwe aibongte ailu, yeutihac kweleina ngageyelelu yanguc edocebawec, “Yowa yogodi heesicne aingelegac, me?” <sup>62</sup> Aime Ngicte Madec ye esecne gawecka hatacmac hefaliye feme, ngenge yogo nganilu wenuc aidaingte? <sup>63</sup> Asudi gaga bafuwacaigac. Nga soc-biuc yogo habaficine mikac. Na yowa edocngebagabac, yogo asu nga gaga. <sup>64</sup> Aime ngengele hewackacni gocne yengibac yowane mi ngagesingkegaing.” I yangucte, ngic-ngigac weni yenge ye mi ngagesingkegaing. Aime ma ngicti Yesu mudockelu

balu ngaba yengele molewa lodaicte, Yesu ye yogo biyachac ngagewec. <sup>65</sup> Inguc ailu yanguc taockelu miwec, “**Ngic-ngigac gocne ngenge mi ngagesingkegaing. Ilec ailu molickelu yanguc biyachac edocngebaiba, Mamacti monic mi bawosaedaicte, ye nala nalic mi weledaicte.**”

<sup>66</sup> Inguc mime mic-tengtengfocine bocyacti Yesu hegilelu macnginang hikeibong, ailu yeholec hatacma mi lolickeibong.

<sup>67</sup> Hikeibong Yesudi mic-tengtengfocine 12 yanguc uwayelewec, “**Ngenge inguchac na hegilecnulu hikenogale aingelegac, me?**”

<sup>68</sup> Inguc mime Saimon Pitadi bafaliyelu yanguc edowec, “Sugucne, ma ngicta hiked-abelengte? Gaga-sanangte yowa noine yogo gala fagac. <sup>69</sup> Nonge biyac ngage-motolu ngagesinggabeleng, ga hocne Wapongte bingec ngic.”

<sup>70</sup> Inguc mime Yesudi yanguc miwec, “**Na mic-tengtengfocne 12 bawosaecngebaiba. Aime ngengelacni monictibac aleng aigac.**” <sup>71</sup> Ngic yogo mic-tengtengfocine 12 yengelacni. Aime yedi gacgu Yesu mudockeme badaingte, yele ngagelu miwec. Yele wacine Yudas, ye Saimon Iskariot madecine.

## 7

### *Falewa Ngiye-ngiyele Hombangte hikewec*

<sup>1</sup> Yogolec lobaina Yuda ngic-ngigac Yudeya himongka gaibong, yengele micnefocngineng yengi Yesu wehomanogale ngageibong. Ilec ailu ye iwa mi hikelu lolickelu gawec, ye Galili prowinswa sugu lolickelu gawec. <sup>2</sup> Aime Yuda ngic-ngigac yengele Falewa Ngiye-ngiyele Hombang yogo bangkale kwesiwec.\* <sup>3</sup> Aime Yesu gbafofocine yengi yanguc edoibong, “Ga himong yago hegilelu Yudeya himongka hikelu, pasigone yogo iwa baengka mic-tengtengfocine yenge nganidaingte. <sup>4</sup> Monic ye habu yengele haicka fikelu yegengkenogale ngagelu, ye sangke-sangke galu bole mi badaic. Ga pasigone yogo baengka himongtowale ngic-ngigac yenge pasigone ngani-motoningte, yegena galu badamec.” <sup>5</sup> Aime gbafofocine yenge inguchac ye mi ngagesingkeibong.

<sup>6</sup> Inguc aibong Yesudi yanguc edocebawec, “**Nale dameng mi kwesigachac. Nga ngengele dameng, yogo damengsoc fadaicte. <sup>7</sup> Himongtowale ngic-ngigac yenge kweledi nalic mi wicngabadaingte. Nga nanibac aibabangineng sowacne mifickeyelebe yegengkecaigacte kweledi wicnucaigaing. <sup>8</sup> Ngenge hombangte hikedaing. Nga nabac biyac mi hikedacte. I yangucte, nale damengbenang mi aigac.**” <sup>9</sup> Ye inguc milu hegilelu Galili prowinswa ngiyewec.

<sup>10</sup> Ngiyeme gbafofocine yenge hombangte hikeibong. Aime ye yengele lobewa inguchac hikelu sangke-sangke gawec. <sup>11</sup> Inguc aime Yuda ngic-ngigac micnefocngineng yenge hombangka Yesu basackelu uwanaguibong, “Ngic yogo wenuwa?”

<sup>12</sup> Uwanagubong ngic-ngigac habutowa bocyacti yele mingagec ailu gocnedi yanguc miibong, “Ye ngic madicne.”

Inguc miibong, gocne yengi yanguc miibong, “Miyac, ngic yogodi ngic-ngigac habutowa kwesac aiyelecaigac.” <sup>13</sup> Aime Yuda ngic-ngigac micnefocngineng yengele hangocebame, monicti Yesule yowa yegena mi miwec.

### *Hombangka yowa edocebalu weduyelewec*

<sup>14</sup> Aime hombang yogo biyac hewacina aime, Yesu ye Ibu-macka felu ngic-ngigac yowa edocebalu weduyelewec. <sup>15</sup> Weduyeleme ngagelu, Yuda ngic-ngigac yenge kwatackelu yanguc miibong, “Ngic yogo ye hibi-mac monicka ngage-ngage monic mi bawecti, wenucka Wapongte hibiwa yowa kwelengkeicne fagac, yogo ngage-motogac?”

<sup>16</sup> Inguc miibong Yesudi yanguc edocebawec, “**Na yowa wedungelegabac, yogo neicne yowa miyac. Yogo salecnuwec, yele yowa. <sup>17</sup> Na yowa wedungelegabac, yogo Wapongtacni me na neicnacni migabac, yogo monicti Wapongte yowa balai-benogale ngagegac, yedi sugu ngage-motodaicte. <sup>18</sup> Monic ye yeicne yowa mi-caigac, ye yeicne wac feicne bafenogale ngagesilu yogo midaicte. Nga monic ye ngic salewec, yele wac feicne bafenogale bole bacaigac, ye ngic noine, yela pasi dondonne fagac. Yela sowacne monic mi fagac.**

<sup>19</sup> “**Mosesdi yefe-yowa ngelewec, foinac. Aime ngengelacni monictibac yogo mi balai-becaigac. Ailu ngenge omalec wehomacnunogale ngagegaing?**”

6:64: Yoa 13:11    6:65: Yoa 6:44    6:68: Mat 16:16    7:1: Yoa 5:18    \* 7:2: Mosesle damengka Wapongti himong kisiwa misaine mikacka hifa 40 damongebame kpoluc-falengineng balu gaibong. Ilec yenge hombang yogo ngagesilu kpoluc-fale hatac balu hadeng 7ka kpoluc-falewa ngiyecaigaing.    7:2: Dep 23:34    7:5: Sale 1:14  
7:15: Mat 13:54; Luk 2:47    7:16: Yoa 12:49; 14:10    7:18: Yoa 8:50    7:19: Sale 7:53; Rom 2:21-24

<sup>20</sup> Inguc mime habutowa yengi bafaliyelu yanguc miibong, “Madi wehomacgunogale migac? Angenti ngage-ngage yogo gelegac hocne.”

<sup>21</sup> Inguc mibong Yesudi yanguc edocebawec, **“Na pasi monic babe ngenge yogo nganiibongte, sasawadi medecnebagac.** <sup>22</sup> Ngagegaing, Mosesdi ngenge soc tofangineng, yogo helockeningte bole-yowa ngelewec. Moses ye yeuctihac bole yogo mi bafuwawec, yele ngambofocine yengi bafuwaibong. Ilec ailu ngenge pasi yogo balaibelu Sabat damengka bole yogo bacaigaing. <sup>23</sup> Ailu ngenge Wapongte yefeyowa Mosesdi kwelengkewec, yogo balaibenogale Sabat damengka ngic yengele soc tofangineng helockecaigaing. Ngenge aibaba ingucne balu gacaigaing. Aime nani Sabat damengka ngic monic socine bucbuchac hamadickebe, ngenge omale ngaba ainelegaing? <sup>24</sup> Ngenge dongenginengti socka nganilu mi wosaelu midaing. Ngenge yowa dondonne ngage-wosaec ailu midaing.”

*Yesu ye Mesia, me?*

<sup>25</sup> Inguc mime Yerusalem taonkacni ngic-ngigac gocne yenge uwanagulu yanguc miibong, “Ngic yogo wehomanogale mibiyeng, me? <sup>26</sup> Aimebac ngic ye yengele haicka yowa mime, omale yowa ameine monic mi bafaliyegaing? Ngic micne ye Mesia, yogo hocne biyac ngage-motogaing mecne. <sup>27</sup> Aime Mesia kwesidaictewa, ye wenuwacni kwesidaicte, yogo ngic monicti mi ngagedaicte. Aime ngic yagobac ye macine, yogo ngageyackegabeleng.”

<sup>28</sup> Inguc mibong Yesu ye Ibu-mac kwelina weduyelelu yogo ngagelu wackelu yanguc edocebawec, **“Ngenge na wenuwacni kwesiiba, yogo ngagegaing. Naneicne ngagenagewa mi kwesiiba. Salecnuwec ye noine, aime ngenge ye mi ngagegaing.** <sup>29</sup> Aime na salecnuwec, ye ngagegabac. I yangucte, na yelacni hocne kwesiiba.”

<sup>30</sup> Inguc mime yenge balu muc-macka lonogale ngageibong. Aime damengngine mi kwesiwecte ailu monicti ye mi bawec. <sup>31</sup> Aime habutowa yengelacni ngic-ngigac bocyacti ye ngagesingkelu yanguc miibong, “Ngic yagodi pasile maaine bocyac bacaigac. Aime Mesyadi kwesilu pasile maaine badaicte, yogo yele pasi ewalilu badaicte, me? Yogo miyac.”

<sup>32</sup> Habutowa yenge inguc milu sangicka yowa mingagec aiibong. Aime Farisaio yenge yogo ngagelu depec-baba ngic micnefocngineng yengeholec kpaduckelu Yesu balu muc-macka lonogale lebe-ngic salecebabong leibong.

<sup>33</sup> Inguc aibong Yesudi yanguc miwec, **“Na dameng bangkacnema ngengeholec gadacte. Gacgu salecnuwec, yela hatacmac hefaliyelu fedacte.** <sup>34</sup> Ngenge na basacnulu nalic mi bafuwacnudaingte. Ailu na hikedacte, iwa ngenge nalic mi fudaingte.”

<sup>35</sup> Inguc mime Yuda ngic yengungtihac mingagec ailu yanguc miibong, “Ngic yago ye wenuwa hikeme basackelu mi nganinanngte migac? Ye alingfocnonggeng Grik himongka singsalolong kwelu gagaing, iwa hikelu Grik ngic-ngigac yowa edocebalu weduyeleldaicte mecne. <sup>36</sup> Ngenge na basacnulu nalic mi bafuwacnudaingte. Ailu na hikedacte, iwa ngenge nalic mi fudaingte. Yowa yogolec fungine mi ngage-motogabeleng.”

<sup>37</sup> Falewa Ngiye-ngiyele Hombang moto-motoine yogolec hadeng sugucna, Yesudi domalu wackelu yanguc miwec, **“Monic ye misale homalu, ye nala kwesilu nodaic.** <sup>38</sup> Aime monicti na ngagesingnudaicte, yele hocne Wapongte hibiwa yowa yanguc kwelengkeicne fagac, ‘Yele kwelewacni gagale misa dongeine ofelu hikedacte.’” <sup>39</sup> Ngic-ngigac ye ngagesingkelu gagaing, yenge Tili Asu lobewa badaingte, yogolec misa ingucne miwec. Yesu ye dameng iwa honocmengka mi felu wac feicne mi bawecte ailu, Asu yogo mi kwesiwec.

<sup>40</sup> Aime ngic-ngigac habutowa yenge yele yowa yogo ngagelu gocnedi yanguc miibong, “Ngic yago ye hocne siduc-mimi ngicbenang kwesinale miicne.”

<sup>41</sup> Aime gocne yengi miibong, “Ngic yogo ye Mesia.”

Nga gocne yengi miibong, “Miyac, Yesu ye Galili prowinswacni kwesiwec. Aime Mesia ye Galili prowinswacni mi kwesidaicte. <sup>42</sup> Wapongte hibiwa yowa yanguc kwelelengkeicne fagac, ‘Mesia ye ngictau Dawidile fikesaweckacni ailu Betelehem mac-alingka fikedaicte, yogo Dawidile machenang.’” <sup>43</sup> Ngic yenge inguc milu Yesule ailu siyeckeibong. <sup>44</sup> Siyeckelu gocne yengi ye balu muc-macka lonogale miibong. Aime monicti yele socka moledi mi bawec.

*Yesu mi ngagesingkeibong*

<sup>45</sup> Aime lebe-ngic yenge depec-baba ngic micne nga Farisaio yengela moc hefaliye hkeibong yengi yanguc uwayeleibong, “Ngenge omale Yesu mi balu kwesigaing?”

<sup>46</sup> Uwayeleibong lebe-ngic yengi yanguc miibong, “Monicti esecne yowa ingucne monic mi mime ngageibeng.”

<sup>47</sup> Inguc miibong Farisaio yengi bafaliyelu yanguc miibong, “Ngenge inguchac ye le kwesacka wawegaing, me? <sup>48</sup> Ngic micne nga Farisaio nongele hewackacni monicti ye mi ngagesingkeibong, miyachenang. <sup>49</sup> Aime habu yogo Yesu balaibegaing, yenge yefe-yowa mi ngage-motogaing, yenge Wapongti biyachac mimoctocebawec.”

<sup>50</sup> Inguc miibong, Farisaio yengelacni monic wacine Nikodemus, ye esecne Yesula hikewec, yedi yanguc miwec, <sup>51</sup> “Yefe-yowanonggengti yanguc migac, ‘Ngic monicte yowa nga aibabaine ngani-ngagec aibong motome wosaelu mimoctonoga.’ Aime ye biyac mimoctogabiyeng.”

<sup>52</sup> Inguc mime ameine bafaliyelu yanguc edoibong, “Ga inguchac Galili prowinswacni, me? Wapongte hibiwa yanguc wafelu nganic, siduc-mimi ngic monicti Galili prowinswacni nalic mi fikedaicte.”

<sup>53</sup> [Inguc milu fangkelu macnginangsoc hikeyackeibong.

## 8

### *Selo-boic ngigac*

<sup>1</sup> Yesu ye Oliwa kupicka felu ngiyewec. <sup>2</sup> Ngiyeme mac saenogale aime, iwacni walu hatacmac Wapongte Ibu-macte sobengka fewec. Feme ngic-ngigac yenge yela kwesiibong. Aime iwa ngiyelu Wapongte yowa weduyelewec. <sup>3</sup> Weduyeleme Wapongte yefe-yowale wewedu ngic, nga Farisaio yenge ngigac monic selo-boic aibaba aime nganilu Yesula bakwesilu haicnginang lobong domawec.

<sup>4</sup> Domame Yesu yanguc uwacnoibong, “Wewedu, ngigac yago ye selo-boic aibaba aime nganilu balu kwesigabeleng. <sup>5</sup> Aime yefe-yowawa Mosesdi ngigac ingucne posadi wickelu holebeng homanale ung-yowa yogo edocnubawec. Ga yakumac wenuc migic?” <sup>6</sup> Yenge Yesudi yowa monic wenuc mime ngagelu yowawa lonogale milu lokwesacka loibong.\*

Inguc aibong Yesu ye ngosockelu gbongnginedi himongka kwelengkewec. <sup>7</sup> Kwelengkelu domame yenge uwacnoluhac domabong, yanguc edocebawec, “**Nngelacni ngic monic bikicine mikac gagac, yedi molickelu posa wickeme wickedaing.**” <sup>8</sup> Inguc milu hatacmac ngosockelu himongka kwelengkewec. <sup>9</sup> Aime yenge Yesule yowa yogo ngagelu hifanginengte silicka sugucnedi molickelu Yesu hegilelu hikeyackebong, gocne yenge lobe hkeibong. Aime ngigac ye yeicnac domawec.

<sup>10</sup> Domame Yesudi fangke nganilu yanguc uwacnowec, “**Ngigac, ngic yago yenge wenuwa hikegaing? Ga sowacneholec milu yowawa locgunogale monic mi doma-gaing, me?**”

<sup>11</sup> Uwacnome miwec, “Sugucnene, miyac.”

Inguc mime Yesudi yanguc edowec, “**Na inguchac ga sowacne baba milu mi mimoc-togudacte. Ga hikelu bikic hatacmac mi bafuwadamec.**”†

### *Yesu yeuctihac fungineine mime yegengkewec*

<sup>12</sup> Aime yogolec lobeina Yesu ye hatacmac yowa taockelu ngic-ngigac yanguc edocebawec, “**Na himongtowale ngic-ngigac ngengele angoc. Monic ye na balaibec-nudaicte, ye kundungte yefe monic mi balaibedaicte. Ye gagale angoc badaicte.**”

<sup>13</sup> Inguc mime Farisaio yengi yanguc edoibong, “Gageuctihac funginegone miyengka yegengkegac, yogo yefe mi fagac. Yowagone yogo nalic mi ngagedabelengte.”

<sup>14</sup> Aime Yesudi bafaliyelu yanguc edocebawec, “**Naneuctihac fungineine mibe yegengkegacka, yogo noine aigac. Na wenuwacni kwesiiba, ailu wenuwa hikedacte, yogo naneuc ngagegabac. Ngenge na wenuwacni kwesiiba nga wenuwa hikedacte, yogo mi ngagegaing.** <sup>15</sup> Ngenge himong-ngic silicnginang ngic-ngigac aibabangineng wosaelu funginengineng micaigaing. Nga nabac ngic monic wosaelu fungineine mimile bole mi gabagac. <sup>16</sup> Na neicnac bole yogo mi balu gabagac. Mamac

7:46: Mrk 1:22 7:48: Yoa 12:42 7:51: Yoa 3:1-2 7:52: Yoa 7:41-42 8:5: Dep 20:10; Yef

22:22-24 \* 8:6: Dameng iwa Roma yenge Israel ngic-ngigac damongebaibong. Aime Roma yengi sugu ngic sowacne nalic mimoctolu wehomadaingte. Ilec Yesudi mime posadi wickelu holedabongka, Roma yenge ngaba aidabong. Aime Yesu ye mime hegiledabongka, Mosesle yefe-yowa mi sanangkeme Yuda ngic micne yenge ngaba aidabong. 8:7: Yef 17:7 † 8:11: Hibi esecne Yoane kwelengkewec, yogo nganilu iwacni kwelengkeibong kwelengkeibong ofewec, yengelacni gocne 7:53-8:11 iwa mi fagac. Ngic-ngigac yenge hibi kwelengkeicne yogo wosaelu nganibong Yoanedi mi kwelengkewec mecne. 8:11: Yoa 5:14 8:12: Yes 49:6; Yoa 1:4-9; 9:5; 12:46 8:14: Yoa 5:31-32; 7:28 8:15:

Yoa 12:47

salecnuwec, yeholec bole balu gagabelec. Ilec nani mimocto-mimoctole bole bagabacka, yogo noine aigac. <sup>17</sup> Yefe-yowanginang yowa yanguc kwelengkeicne fagac, 'Ngic yaeckangti yowa miminginec moniyanghac aime yowanginec noine aigac.' <sup>18</sup> Naneuctihac miyegengnagube, Mamacne salecnuwec, yedi inguchac baficnulu miyegengnugac. Ilec ailu nale yowa noine aigac."

<sup>19</sup> Inguc mime Farisaio yengi yanguc uwacnoibong, "Gale mamac ye wenuwa gagac?"

Mibong Yesudi bafaliyelu yanguc edocebawec, "Ngenge na mi ngagecnuaging, ailu Mamacne inguchac mi ngagegaign. Ngenge na ngagecnuadabongka midec, ibac Mamacne inguchac ngagedabong." <sup>20</sup> Yowa yogo, Ibu-macte kweline monicka ibu katapa ngiyelu gawec, iwa ngic-ngigac edocebalu weduyelewec. Aime ngic monicti balu muc-macka mi lowec. I yangucte, ye inguc aicnoningte dameng fawecliac.

<sup>21</sup> Aime Yesudi hatacmac yanguc edocebawec, "Na hikebe ngenge basacnulu bikicnginengkolec galu homadaingte. Nga na hikedacte, iwa ngenge nalic mi fudaingte."

<sup>22</sup> Inguc mime Yuda ngic-ngigac yengi yanguc miibong, "Na hikedacte, iwa ngenge nalic mi fudaingte.' Ye omale inguc migac? Yeuctihac wehomanaganuale migac, me?"

<sup>23</sup> Inguc mibong yanguc edocebawec, "Ngenge dumeng himongkacni, nga nabac himongkacni miyac, na wilengkacni. <sup>24</sup> Ilec ailu biyac edocngabagabac, ngenge bikicnginengkolec galu homadaingte. Ngenge na gagabachac, †yogo mi ngagesingkedaingtewa, bikicngineng falu gamehac homadaingte."

<sup>25</sup> Inguc mime yanguc uwacnoibong, "Aime ga maa?"

Mibong yedi yanguc edocebawec, "Na funginene biyachac edocngebaiba. <sup>26</sup> Na ngengele aibabangineng bocyac ngani-ngagac ailu wosaclu nalic mimoctodacte. Aime salecnuwec, ye yowa noinele fileine, ailu yelacni wiyac ngagegabac, yogo sugu himongtowale ngic-ngigac yengela mibe yegengkedacte."

<sup>27</sup> Yesu ye Mamacinele ngagelu inguc edocebame yenge kauc baibong. <sup>28</sup> Kauc babong Yesudi yanguc edocebawec, "Ngenge Ngicte Madec bafangkebong domadaicte, dameng iwa ngenge 'na gagabachac,' yogo ngage-motodaingte. Naneuctihac wiyac monic mi balu gacaigabac, Mamacnedi wedunelewec, yogo migabac. <sup>29</sup> Salecnuwec, yedi naholec gagac. Na yele angac balaihelu bole balu gagabac. Ilec ailu ye hegilecnume neicnac mi gadacte." <sup>30</sup> Yesu ye yowa inguc milu domaemewa ngic-ngigac bocyacti ye ngagesingkeibong.

#### *Abrahamtacni fikesawec*

<sup>31</sup> Yuda ngic-ngigac yenge Yesu ngagesingkeibong, yenge yanguc edocebawec, "Ngenge nale yowa balaihelu gagaingka, nale mic-tengtengfocne noine aigaing. <sup>32</sup> Inguc ailu yowa noine ngage-motodaingte aime yowa noinedi muckacni lukecngabadaicte."

<sup>33</sup> Inguc mime yowaine bafaliyecnolu yanguc edoibong, "Nonge Abrahamte fikesaweckacni, monicti kwelec kwekwe mi bacnubawec. Aime madi kwelec kwekwe bacnubawecte, gagibac lukecnubanogale migic?"

<sup>34</sup> Inguc mibong Yesudi yanguc miwec, "Foinac, monic bikic bacaigac, ye bikic yogolec kwelec kwelu gagac, yogo noinebenang edocngabagabac. <sup>35</sup> Aime kwelec kwelkewine bame gacaigac, ye mac yogolec kwelina mac-fung nalic mi gadaicte. Madectibac mac yogolec kwelina mac-fung gaginowagac. <sup>36</sup> Ilec Madecti lukecngabadaictewa, ngenge mucngineng mikac gadaingte, yogo foinac. <sup>37</sup> Ngenge Abraham gbolifocine, yogo ngagegabac. Aimebac nale yowa ngengele kwelewa mi fagacte, wehomacnunogale aigaing. <sup>38</sup> Na Mamacnele emewa galu wiyac ngani-ngagac aiiba, yogo hocne edocngabagabac. Aime ngengebac mamacnginengtacni aiiba nga wiyac ngagecaigaing, yogo hocne ailu gagaing."

<sup>39</sup> Inguc mime yanguc miibong, "Nonge mamacnonggeng Abraham."

Mibong Yesudi bafaliyelu yanguc edocebawec, "Ngenge Abraham adu-madecfocine aidabongka midec, yele gaga nga aiiba balaibedabong. <sup>40</sup> Na ngic monicti Wapongtacni yowa noine ngagelu edocngababe ngenge omale wehomacnunogale aigaing? Abraham ye aiiba ingucne monic mi ailu gawec. <sup>41</sup> Ngenge mamacnginengte gaga nga aiiba balaibeccaigaing."

Inguc mime yengi yanguc miibong, "Nonge selo-boic aiiba iwacni monic mi fikeibeng, miyachenang. Nonge Mamacnonggeng moniyang, yogo Wapong."

#### *Aleng Sugucnenginenge fikesawec*

8:16: Yoa 5:30; 8:29    8:17: Yef 19:15    8:18: 1Yoa 5:9    8:20: Yoa 7:30    8:21: Yoa 7:34; 13:33    8:23: Yoa 3:31    † 8:24: Wahikeicne 3:14 iwa Wapongti Mosesholec mingagac ailu yeicne wacine wackelu "na gagabachac" miwec.    8:28: Yoa 3:14    8:33: Mat 3:9    8:34: Rom 6:16,20    8:39: Mat 3:9    8:41: Yes 63:16



<sup>42</sup> Inguc mibong Yesudi yanguc miwec, “**Na Wapongtacni kwesiiba, ailu neicne angacnele mi kwesiiba. Yedi hocne salecnuwec. Ilec ngenge Wapong mamacngineng aidecka midec, kweledi nale angac ngagedabong.** <sup>43</sup> **Aime ngenge omale nale yowa mi ngage-motogaing? Ngenge nale yowa hedec kwelu nalic mi ngagedaingte.** <sup>44</sup> **Aime Aleng Sugucnengineng, yedi hocne ngengele mamacngineng aime yele angacka aibaba fagac, ngenge yogo ainogale aingelecaigac. Ye esecnehac ngicwewe gacaigac. I yangucte, yele ngage-ngagewa aibaba noine mi fagac, ye kwesacngic ailu ye kwesacka wawelu gagac. Ilec ailu ye kwesacte mamac ailu yowa kwesacine milu gacaigac.** <sup>45</sup> **Aime na yowa noine edocngebagabacte, ngenge nale yowa mi ngagesingkegaing.** <sup>46</sup> **Ngengelacni madi nale bikicte umac monic ngagewecka mifickena? Ailu na yowa noine migabac, aime ngenge omale mi ngagesingnugaing?** <sup>47</sup> **Wapongte alingfocine yenge yowaine ngagecaigaing. Nga ngengebac Wapongte alingfocine miyac. Ilec ailu yele yowa mi ngagecaigaing.”**

*Abrahamte molic-molic*

<sup>48</sup> Aime Yuda ngic-ngigac yengi bafaliyelu yanguc edoibong, “Ga Samaria ngic hocne, ailu ga alengkolec gagic. Yowa yogo noine migabeleng, me?”

<sup>49</sup> Inguc mibong Yesudi bafaliyelu yanguc edocebawec, “**Na aleng mikac. Na Mamacne alang bacnocaigabac. Nga ngengibac na alang monic mi banelecaigaing.** <sup>50</sup> **Naneicne wac feicne banogale bole mi bacaigabac. Aime monictibac wosaelu gagac, ye nale wac feicne bafenale bole bacaigac.** <sup>51</sup> **Foinac, monic ye nale yowa balaibelu gagacka, ye mi homadaicte, yogo noinebenang edocngebagabac.”**

<sup>52</sup> Inguc mime Yuda ngic-ngigac yengi yanguc miibong, “Ga alengkolec gagic, nonge yakumac ngagecugabeleng. Abraham ye homawec, aime siduc-mimi ngic yenge inguchac homaibong. Aime gagibac migic, ‘Monic ye nale yowa balaibelu gadaictewa, ye mi homadaicte.’ <sup>53</sup> Aime ga ngambongngeng Abrahamte feicne aigic, me? Ye homawec, aime siduc-mimi ngic yenge inguchac homaibong. Aime gageicnele ngageng feicne aigac, yogodi nalic aigac, me? Yogo miyac.”

<sup>54</sup> Inguc mibong Yesudi yanguc edocebawec, “**Naneuctihac wacne bafedacte, yogodi wiyac omane aidaicte. Aime Mamacne ngengele Wapongngineng gagac, ngengi yele inguc micaigaing, yedibac wacne bafegac.** <sup>55</sup> **Aime ngenge ye mi ngagegaing, naneuc ye ngagegabac. Na ye mi ngagegabac, yogo midacte, ibac ngic kwesacine ailu ngenge ingucne aidaba. Na ngagegabacte ailu yowaine balaibelu gagabac.** <sup>56</sup> **Ngambongineng Abraham ye nale dameng yogo fikeme nganinogale beliyewec. Fikeme nganilu angac ngagewec.”**

<sup>57</sup> Inguc mime Yuda ngic-ngigac yengi yanguc miibong, “Ga hifagone 50 mi aiwecti Abraham nganiing, me? Yogo nalic mi aigac.”

<sup>58</sup> Inguc mibong Yesudi yanguc miwec, “**Foinac, Abraham mi fikeemewa ‘naneuctihac inguc gagabachac,’ yogo noinebenang edocngebagabac.**” <sup>59</sup> Inguc mime yenge posa balu holenogale aibong, ye sangkelu Ibu-mac lobina hauwec.

## 9

*Ngic donge-pisic bamadickewec*

<sup>1</sup> Yesu ye yefewa hikelu ngic monic donge-pisic fikeicne nganiwec. <sup>2</sup> Aime mic-tengtengfocine yengi uwacnoibong, “Wewedu, ngic yogo male bikicte ailu donge-pisic fikewec? Yeicne me nenggac-mamackecine yekele bikicte?”

<sup>3</sup> Inguc mibong Yesudi yanguc edocebawec, “**Ngic yeicne me nenggac-mamackecine yeki bikic mi bafuwaiboc, miyac. Yogo Wapongte bole yela fikeme nganiningte ingucne fikewec.** <sup>4-5</sup> **Nongileng na salecnuwec, yele bole wenacka balu gadabeleng. Na himongka gagabac, dameng iwa himongtowale angoc aigabac. Aime mac debolelu kundung kweme monicti bole nalic mi badaicte.”**

<sup>6</sup> Inguc milu himongka sofockelu himong yogo balu lalickeme nolac fikeme, ngic donge-pisic yele dongewa hosowec. <sup>7</sup> Hosolu yanguc edowec, “**Ga Siloam misa lifucka hikelu dongegone suwenong.**” (Siloamte fungine yogo “Salebong hikewec.”) Inguc mime hikelu dongeine suwelu hilalu hefaliye kwesiwec.

<sup>8</sup> Inguc ailu hefaliye kwesime, macfocine nga ngic-ngigac gocne esecne woc-wiyacte milocnebalu game nganiibong, yengi yanguc miibong, “Ngic yagodi ngiyelu woc-wiyacte milocnebalu gawec, me?”

<sup>9</sup> Inguc mibong gocne yengi miibong, “Yogo ye hocne.”

Aime gocne yengibac miibong, “Yogo ye miyac, yogo ye ingucne ngic monicti.”

Aime yeuctihac yowa milu edocebalu gawec, “Ngc yago na hocne.”

<sup>10</sup> Inguc mime uwacnoibong, “Ga wenuc ailu dongegone hilagic?”

<sup>11</sup> Inguc mibong yedi yanguc miwec, “Ngc monic wacine Yesu, yedi nolac lalickelu dongena hosolu salecnulu migac, ‘Ga hikelu Siloam lifucka dongegone suwenong.’ Inguc mime na hikelu lifucka dongene suwelu hilagabac.”

<sup>12</sup> Inguc mime yanguc uwacnoibong, “Aime ngic yogo weni?”

Inguc mibong yedi miwec, “Na mi ngagegabac.”

*Dongeine madickewec, yogolec uwaibong*

<sup>13</sup> Inguc mime yenge ngic esecne donge-pisic gawec, yogo Farisaio yengela mengockelu hikeibong. <sup>14</sup> Aime Yesu ye nolac lalickelu ngic dongeina hosolu bame dongeine hilawec, yogo Sabat damengka inguc aicnowec. <sup>15</sup> Aime Farisaio yengi inguchac ngic yogo nganilu uwacnoibong, “Ga wenuc ailu dongegone hilagamec?”

Mibong miwec, “Ye nolacti dongena hosome dongene suwelu hilagabac.”

<sup>16</sup> Inguc mime Farisaio gocne yengi yanguc miibong, “Ngc yogo ye Sabat ngiyecaigabeleng, yogolec yefe mi balaibegac. Ilec ye Wapongtacni miyac.”

Inguc mibong gocnedi miibong, “Ngc bikickolecti wenucka pasile maaine ingucne badaicte?”

Inguc milu yengungtihac siyeckeibong. <sup>17</sup> Siyeckelu donge-pisicti dongeine hilawec, ye hatacmac uwacnoibong, “Ga ngic dongegone bame hilagamec, yele wenuc migic?”

Inguc mibong yedi miwec, “Ye siduc-mimi ngic monic.”

<sup>18</sup> Inguc mime Yuda ngic yengi ngic yogo donge-pisic gaweckacni dongeine madickeme hilawec, yogo mi ngagesingkeibong. Mi ngagesingkelu nenggac-mamackecine wacepalu <sup>19</sup> yanguc uwayeteibong, “Ngc yago ye ngekele madec, me? Ye dongeine pisickeicne fikewec, inguc migabiyec, me? Aime ye wenucka yakumac dongeine hilagac?”

<sup>20</sup> Inguc mibong nenggac-mamackecine yeki yanguc miiboc, “Ngc yago nokele madec. Ye dongeine pisickeicne fikewec, yogo ngagegabelec. <sup>21</sup> Aime wenucka yakumac dongeine hilagac, ailu madi dongeine bamadickegac, yogo noke mi ngagegabelec. Ye biyac suguleicne. Ilec yeicne uwacnobong, yeuctihac fungineine edocngebana.” <sup>22</sup> Yeke Yuda ngic-ngigac micnefocngineng yengele hangocepame inguc miiboc. Yuda ngic-ngigac micnefocngineng yenge yowa monic biyachac yanguc milu hefeibong, “Monicti ‘Yesu ye Mesia hocne’, inguc mime yegengkedaictewa, ye kpakpaduc macka nalic mi fedaicte.” <sup>23</sup> Ilec ailu nenggac-mamackecine yeki yanguc miiboc, “Ye biyac suguleicne. Ilec yeicne uwacnong.”

<sup>24</sup> Inguc miboc yenge ngic donge-pisic gawec, ye alecine yaeckang hatacmac wackelu edoibong, “Ga Wapongte haicka yowa noine minong. Ngic yogo, ye bikickolec, inguc ngagegabeleng.”

<sup>25</sup> Inguc mibong, yedi bafaliyelu yanguc edocebawec, “Ngc yogo bikickolec me miyac, yogo na mi ngagegabac. Aime na wiyac moniyang sugu ngagegabac, na esecne donge-pisic gaibadi, yakumac dongene hilagabac.”

<sup>26</sup> Inguc mime hatacmac yanguc uwacnoibong, “Ye oma wiyac aigelegac? Ailu ye silicine wenucka dongegone bamadickegac?”

<sup>27</sup> Inguc mibong yedi bafaliyelu yanguc edocebawec, “Na yogo biyac edocngebayackegabac. Aime ngenge nale yowale hedec mi logabiyeng. Ngenge omale hatacmac ngagenogale aigaing? Ngenge inguchac yele mic-tengtengfocine ainogale ngagesigaing, me?”

<sup>28</sup> Inguc mime yenge misulec aicnolu yanguc miibong, “Ga hocne ngic yogolec mic-tengteng, nga nongebac Mosesle mic-tengtengfocinedi gagabeleng. <sup>29</sup> Wapongti Moses edome yowaine miwec, yogo ngagegabeleng. Aime ngic yago ye wenuwacni, yogo nonge mi ngagegabeleng.”

<sup>30</sup> Inguc mibong bafaliyelu yanguc edocebawec, “Ngc yogo dongene bamadickegac. Aime ye wenuwacni kwesiwec, yogo ngenge mi ngagegaing. Na ilec welecnebagabac. <sup>31</sup> Nongileng yanguc ngagegabeleng, Wapongti bikic-baba yengele yowa nalic mi ngageyedaicte. Aime ngic monicti ye alang bacnolu yowaine balaibecaigac, Wapongti ye sugu ngagegac. <sup>32</sup> Biyachac esecnebenang molickelu gaibengka, ‘Monic donge-pisic fikelu game ngic monicti dongeine bame madickewec,’ siduc monic ingucne mi ngageibong. <sup>33</sup> Ngic yogo Wapongtacni mi kwesidecka, ye bole monic ingucne nalic mi badec.”

<sup>34</sup> Inguc mime bafaliyelu yanguc edoibong, “Ga bikickacni fikelu gaingti yowa wadunolegic, me?” Inguc milu yebiyebong wawec.

*Ngage-ngageningeng mikac, yenge donge-pisic ingucne*

<sup>35</sup> Aime Yesudi ngic yebiyebong wawec, yele siduc yogo ngagelu basackelu bafuwalu yanguc edowec, **“Ga Ngicte Madec ngagesingkegic, me?”**

<sup>36</sup> Inguc mime ngic yogodi miwec, “Sugucnene, ye maa? Edalicnung nganilu ye ngagesingkebe.”

<sup>37</sup> Inguc mime Yesudi yanguc edowec, **“Ga biyac nganigic. Ngic yogodi hocne gaholec yowa migac.”**

<sup>38</sup> Inguc mime miwec, “Sugucne, na ngagesinggugabac.” Inguc milu ye ketadi holecnolu afeewec.

<sup>39</sup> Aime Yesudi yanguc miwec, **“Na aibabangineng wosaenogale himongka waiba. Aime ngic donge-pisicti dongengineng hiladaingte. Nga dongengineng hilalu gagaing, yenge donge-pisic aidaingte.”**

<sup>40</sup> Yesu ye yowa inguc mime Farisaio gocne yeholec domaibong, yenge yowa yogo ngagelu yanguc miibong, “Nonge inguchac donge-pisic, me?”

<sup>41</sup> Inguc mibong Yesudi yanguc miwec, **“Ngenge donge-pisic midaingka, ibac bikicnginengte umac mikac aidec. Aime ngenge yakumac migaing, ‘Nonge donge hilalu gagabeleng.’ Ilec ailu ngenge bikicnginengte umac fagachac.”**

## 10

*Lama-damong madicne*

<sup>1</sup> **“Foinac, ngic monicti lama yengele oda kwelina fenogale milu, oda nuine hegilelu monicka yefe fedaicte, ye hise ngic ailu kindololo ngic aidaicte, yogo noinebenang edocngebagabac. <sup>2</sup> Ngic nuwa yefe fecraigac, ye lama yengele damong. <sup>3</sup> Aime nule damongti yele ailu oda nuine nalic laliyedaicte. Laliyeme lama yenge yowa-malacine ngagebong, yeuctihac lama wacnginang wacebame kwesibong molickeyeleme yenge momoc lobeina haudaingte.**

<sup>4</sup> **“Ye lamafocine mengocebame lobeina hauyackebong, molickeyeleme lamafocine yenge yele yowa-malacine ngagegaingte ailu ye balaibedaingte. <sup>5</sup> Aime yenge ngic fulune nalic mi balaibedaingte. Yenge yele yowa-malac mi ngagegaingte hangoc hikeyackedaingte.” <sup>6</sup> Yesudi nangeng yowa yogo holelu mime yenge yowa yogolec dabiyeibong.**

<sup>7</sup> Dabiyeibong, Yesudi hatacmac yanguc edocebawec, **“Foinac, nani lama yengele nu aigabac, yogo noinebenang edocngebagabac. <sup>8</sup> Ngic gocne yenge na mi fikeebewa kwesiibong, yenge hise ngic ailu kindololo ngic. Aime lama yengi yengele yowale hedec mi loibong. <sup>9</sup> Naneuctihac odale nu aigabac. Monic ye nala yefe felu oda kwelina fedaictewa, Wapongti ye bikicte ameine bame wasecne aidaicte. Ailu ye nuwa yefe fec-wac ailu noba-nosing bafuwadaicte. <sup>10</sup> Hise-baba ngic ye wiyac hise balu wehomacebalu basowalecebanale kwesicaigac. Aime nani hatacmac gaga babong wangeleme ganingte kwesiiba.**

<sup>11</sup> **“Naneicne lama-damong madicne. Damong madicnedi lama yengele ailu gagaine hegiledaicte. <sup>12</sup> Aime monic ye monengte ailu bole bagalu ngic monicte lama-damong gagac, ye lama yengele filengineng mi ailu gadaicte. Inguc ailu kate-hoda kwesime nganilu hegilecebalu hikedaicte. Hikeme kate-hodadi lama hilu nocebalu yebicebadaicte. <sup>13</sup> Ngic yogo ye bolele fuli banogale ailu lama yengele ngageboc mi aidaicte. <sup>14-15</sup> Naneuc lama-damong madicne. Mamacne ye na ngagecnugac. Aime nani inguchac Mamac ngagegabac, ingucnehac neuctihac lamafocne ngagecebagabac. Aime lamafocne yenge na ngagecnugac. Na lama yengele ailu gagane hegiledaicte.**

<sup>16</sup> **“Ailu lamafocne gocne gagaing, yenge oda yagowacni miyac. Aime nani yenge mengocebabe yowa-malacne ngagedaingte. Aime nale lama habu biyac migabac, yengeholec taocebabe lama habu moniyang aibong yengele damong moniyang sugu nani aidacte. <sup>17</sup> Na gagane hatacmac banogale ailu hegilegabac. Ilec ailu Mamacti nale angac ngagedaicte. <sup>18</sup> Monicti nale gaga nalic mi baickedaicte, naneuctihac gagane hegiledaicte. Aime gagane hegilelu hatacmac badacte, yogolec bole-yowa tapiliineholec na neicna fagac. Yogo Mamacnedi inguc aibeale ung-yowa edocnuwec.”**

<sup>19</sup> Yowa yogolec ailu Yuda ngic-ngigac yenge hatacmac siyeckeibong. <sup>20</sup> Siyeckelu ngicngigac bocyac yengi yanguc miibong, “Ye alengcolek gagacte kweleine sifuwegac. Ngenge omale yele yowale hedec logaing?”

<sup>21</sup> Aime ngic-ngigac gocne yengi yanguc miibong, “Yowa ingucne ngic alengkolec yengele yowa miyac. Ngic alengkolecti ngic donge-pisic dongengineng nalic bame madickedaingte, me? Yogo miyac.”

*Yesu mi ngagesingkeibong*

<sup>22</sup> Yerusalem iwa tilo dameng aime, Ibu-mac hatacmac mimoctoibong, yogolec hom-bangte dameng ngagesiibong.\* <sup>23</sup> Dameng iwa Yesu ye Ibu-macte sobeng mecina dakec monic fawec, wacine Solomonte Dakec, iwa lec-welec aiwec. <sup>24</sup> Inguc aime Yuda ngic-ngigac yengi hewalingkelu yanguc edoibong, “Ga ma damengka funginegone miyengka yegengkeme ngagelu hatacmac kauc mi badabelengte? Ga Mesia gagamecka yogo miyengka yegengkeme ngagenang.”

<sup>25</sup> Inguc mibong Yesudi yanguc miwec, “**Yogo biyachac edocngebaiba. Aime ngegebac mi ngagesingnugaing. Na Mamacnele wacka bole balu gagabac, yogodi naneicne fungine bame yegengkecaigac.** <sup>26</sup> Aime ngenge nale lama habu-focne, yengelacni miyac. Ilec ailu na mi ngagesingnugaing. <sup>27</sup> Lamafofocne yenge nale yowa ngagecaigaing. Aime na ngageyelebe yenge balaiibecnulu gagaing. <sup>28</sup> Balaiibecnubong nani gaga-sanang yelebe yengelacni monicti nalic mi homadaicte. Ailu monicti nale molewacni nalic mi bamoctocebadaicte. <sup>29</sup> Mamacnedi yenge nale molewa locebawec, ye wiyac sasawa yengele feicne. Ilec Mamacnele molewacni monicti yenge nalic mi bamoctocebadaicte. <sup>30</sup> Na nga Mamac noke moniyang.”

<sup>31</sup> Inguc mime Yuda ngic-ngigac yengi posadi holeningte ailu posa hatacmac baibong. <sup>32</sup> Inguc aibong Yesudi yanguc edocebawec, “**Mamactacni bole madicne bocyac edal-icngebaiba. Aime fungine weni yogolec ngenge ngaba ailu posadi holecnunogale aigaing?**”

<sup>33</sup> Inguc mime Yuda ngic-ngigac yengi yanguc edoibong, “Bole madicnele ailu posadi holecgunogale mi aigabeleng. Ga himong ngicti geicnele Wapong milu Wapong fecnogic. Yogolec ailubac posadi holecgunogale aigabeleng.”

<sup>34</sup> Inguc mibong Yesudi yanguc miwec, “**Yefe-yowanginang yowa yanguc kwelengke-icne fagac, yogo mi ngagegaing, me? Wapong yeuctihac ngic micne bawosaece-bawec, yengele yanguc miwec,**

**‘Na yanguc migabac, ngenge sasawadi wapong.’**

*(Mige 82:6)*

<sup>35-36</sup> **Wapongte yowa yeicne hibiwa kwelengkeicne fagac, yogo hefaliyelu silicine monic mi aigac. Aime nani yanguc migabac, ‘Na Wapongte Madec.’ Aime ngic Wapongte yowa biyachac ngagelu gaibong, yengele Wapongti miwec, ‘Ngenge wapong gagaing.’ Ilec ngenge omale yanguc migaing, ‘Ga Wapong fecnogic?’ Wapongti ngic yeicne bingec bawosaelu saleme himongka wawec, yogo na hocne.**

<sup>37</sup> **‘Bole balu gagabac, yogo Mamacnelacni mi aigacka, ngenge mi ngagesingnud-abiyeng. <sup>38</sup> Aime Mamacnele bole balu gabe, ngenge mi ngagesingnugaing. Ailu sifu bole tapillineholec balu gagabac, bole yogo ngagesingkedaing. Inguc ailu Mamacnedi nala gagac nga nani yela gagabac, yogo ngagelu ngage-motodaingte.’**

<sup>39</sup> Inguc mime yenge hatacmac banogale aibong, ye yengele molewacni fotockelu hikewec.

<sup>40</sup> Aime Yesu ye Yodan misa falockelu nebocina Yoane misa-lowacti molickelu bole balu misa lowayelewec, mac iwa hikelu gawec. <sup>41</sup> Iwa gaemewa ngic-ngigac bocyacti yela hikelu yanguc miibong, “Yoane ngagesingkenangte pasile maaine monic mi balu gawec. Aime ye ngic yagolec fungine miwec, yogobac noine aiyackegac.” <sup>42</sup> Inguc mibong himong iwa ngic-ngigac bocyacti Yesu ngagesingkeibong.

## 11

*Lasaros homawec*

<sup>1</sup> Ngic monic wacine Lasaros, ye Betani mac-alingka hucti bame fawec. Aime Maria nga yemeine Mata yeke mac iwa gaiboc. <sup>2</sup> Aime Maria yedi hocne Sugucnele higewa heloc hoine madicnedi sotiyelu hosocnolu yeicne hodoc-dowecinele susucinedi keleng bacnowec. Aime Maria yele sengngine Lasaros ye hocne hucti bawec.

<sup>3</sup> Huc bame sengkecine yeki Yesula yowa loboc hikeme yanguc miiboc, “Sugucne ngagegic, ngic kwelegoned i angac ngagecnocagic, ye hucti bame fagac.”

\* **10:22:** Dameng monicka Grik ngictau ye Wapongte Ibu-mac basowaleme wonongkolec aiwec. Hifa habackang motome Wapongte haicka gbagbacne ainale boleine baibong. Babong motome gbagbacne aiwec. Yogolec hombang ngagesiibong. Gbagbacne aiwec, dameng iwa hifa 134 motome Yesu fikewec. **10:28:** Yoa 3:16; 6:39 **10:33:** Dep 24:16 **10:38:** Yoa 14:10-11 **10:40:** Yoa 1:28 **11:1:** Luk 10:38-39 **11:2:** Yoa 12:3

<sup>4</sup> Inguc milu yowa loboc hikeme Yesu ye yowa yogo ngagelu yanguc miwec, “**Ye homanale huc mi bagac. Huc yogo Wapongte wac feicne yegengkenale fikegac. Fikeme Wapong Madecinele wac feicne inguchac fikelu yegengkedaicte.**” <sup>5</sup> Aime Yesu ye Mata kwaينهolec, ailu Lasaros yengele kweleinedi angackelu gawec.

<sup>6</sup> Aime ye siduc yogo ngagelu hadeng yaeckang himong iwa hatacmac taockelu gawec. <sup>7</sup> Iwa galu mic-tengtengfocine yanguc edocebawec, “**Nongileng Yudeya himongka hat-acmac hefaliyelu hikenang.**”

<sup>8</sup> Inguc mime mic-tengtengfocine yengi yanguc miibong, “Wewedu, Yuda ngic yogowa gagaing, yenge posadi holecgulu wehomacgunogale aibong. Aime dameng mi daliweme ga hatacmac iwa hikenogale aigic, me?”

<sup>9</sup> Inguc mibong Yesudi yanguc miwec, “**Hadeng moniyangte kwelina dameng 12 fagac. Aime ngic monic ye wenacka yefe hikecaigac, ye nalic mi kwopockeme wawedaicte. I yangucte, ye himongtowale angoc nganidaicte.** <sup>10</sup> Aimebac monic ye kundungka hikecaigac, ye kwopockeme wawedaicte. I yangucte, yela angoc monic mi fagac.”

<sup>11</sup> Inguc milu yowa hatacmac yanguc taockelu edocebawec, “**Nongileng agononggeng Lasaros ye gung fagac, nani yeuckebe fangkenale ailu iwa hikedac.**”

<sup>12-13</sup> Yesu ye Lasaros homawecte mime, mic-tengtengfocine yengibac ngagebong ye gungbenang fawec. Yenge inguc ngagelu yanguc miibong, “Sugucne, ye gung fagacka madickelu fangkedaicte.”

<sup>14</sup> Ilec ye yegena mifickelu yanguc edocebawec, “**Lasaros ye biyac homagac.** <sup>15</sup> Aime ngengi ngagesingkeningte ailu na yeholec iwa mi gaibale kwele-madic ngagegabac. Aime yakumac ngenge welebong yela hikenang.”

<sup>16</sup> Inguc mime Tomas wacine monic Didimus\* yedi mic-tengteng agofocine yanguc edocebawec, “Ye wehomanogale aigaingte nongileng inguchac Yesu bafickelu yeholec homanogale hikenang.”

#### *Homackacni gboliyelu fangke-fangke*

<sup>17</sup> Yesu ye Betani macka hikelu ngageme yanguc miibong, “Lasaros dongesiwa lobong biyac hadeng 4 inguc aigac.” <sup>18</sup> Yerusalem nga Betani hewacnginac 3 kilomita yogolecsoc, eme-eme ngiyeboc. <sup>19</sup> Ilec Yerusalemkocni Yuda ngic-ngigac bocyacti yekela sengnginecte ailu kwele-mogung bafuwayetenogale milu, Mata nga Maria yekela kwesilu ngiyebong. <sup>20</sup> Ngiyebongka Yesu kwesigac, inguc mibong Mata ye yogo ngagelu yefewa bafuwanale hikeme, Maria ye macka ngiyewec.

<sup>21</sup> Ngiyeme Mata ye hikelu Yesu yanguc edowec, “Sugucne, ga nongeholec yagowa gadengka, ibac sengne mi homadec. <sup>22</sup> Aime yakumac ga wiyac monicte Wapong uwac-noengka ye nalic geleadaicte, inguc ngagegabac.”

<sup>23</sup> Inguc mime Yesudi yanguc edowec, “**Senggone ye homackacni gboliyelu fangkedaicte.**”

<sup>24</sup> Inguc mime Matadi yanguc miwec, “Ye dameng moto-motoina homackacni gboliyelu fangkedaicte, yogobac ngagegabac.”

<sup>25</sup> Inguc mime Yesudi yanguc edowec, “**Homackacni gboliyelu fangke-fangke nga gaga, yogo na hocne. Monic ye na ngagesingnudaicte, ye socinedi homadaicte, ailu ye sifu gaga badaicte.** <sup>26</sup> Aime monic ye galu ngagesingnugac, ye mi homabenangkedaicte, miyac. Yogo ngagesingkegic me miyac?”

<sup>27</sup> Inguc mime yedi yanguc miwec, “Oc, Sugucne, ga Mesia, Wapongte Madec himongka kwesinale miicne, yogo biyac ngagesinggugabac, yogo ga hocne.”

<sup>28</sup> Inguc milu hefaliye hikelu kwaine Maria wackeme leme sangicka edolu miwec, “Wewedudi kwesi ngiyelu gale uwagac.” <sup>29-30</sup> Aime Yesu ye mac-alingka mi kwesilu sulumewec, ye Matadi molickelu hike bafuwalu hegile kwesiwec, mac yogowahac domaemewa Maria ye Matala yowa yogo ngagelu biyac fangkelu hikewec. <sup>31</sup> Aime Yuda ngic-ngigac yenge yele macka ngiyelu kwele-mogung aiyeteibong, yenge Mariadi dacineholec fangkelu hikeme nganilu ye dongesiwa hiyanale hikegac, inguc milu ye balaibeibong.

<sup>32</sup> Aime Maria ye Yesu domawec, iwa hikelu Yesule higewa wafalu yanguc edowec, “Sugucne, ga yawa gadeng, ibac sengne nalic mi homadec.”

<sup>33</sup> Inguc milu hii-songgong ailu hiyame Yuda ngic-ngigac yeholec kwesiibong, yenge momochac hiyaibong. Hiyaibong Yesudi yenge nganicebalu kwele-sowackolecti ngagesowalelu asuine baumaleme ngage-hobebelelu <sup>34</sup> miwec, “**Wenuwa haic loibong?**”

Inguc mime miibong, “Sugucne, wele nganic.”

<sup>35</sup> Aime Yesu ye donge misaine wawec.

<sup>36</sup> Wame Yuda ngic-ngigac yengi nganilu miibong, “Nganining, ye Lasarosle kweleinedi angac sugucnehac ngegaigac.”

<sup>37</sup> Aime yengelacni gocnedi yanguc miibong, “Ye molickelu donge-pisic dongenginang bame hilaibong. Aime Yesu ye ngic yago madicne damongkedecka midec, ye mi homadec.”

*Lasaros homackacni bagbolyeme fangkewec*

<sup>38</sup> Yesu ye hatacmac ngage-sowalelu dongesiwa hike sulumewec. Dongesi yogo posa henebewa posa monicti yefeine hediceicne. <sup>39</sup> Fame hike sulumelu yanguc edocebawec, **“Ngenge posa yogo baickening.”**

Inguc mime ngic homawec, yele sengngine Matadi miwec, “Sugucne, ye homame lobeng yakumac hadeng 4 aime biyac hoineholec aigac.”

<sup>40</sup> Inguc mime Yesudi yanguc edowec, **“Ga ngagesingkedamectewa, Wapongte wac feicne nganidamecte, yogo biyac edocgugabac.”**

<sup>41</sup> Inguc mime yenge posa yogo baickebong, Yesu ye donge hilame feme nganilu, yanguc miwec, **“Mamac, ga yowane biyac ngagegic. Ilec gale kwele-madic migabac. <sup>42</sup> Ga damengsoc mimilicne ngegaigic, yogo biyac ngagegabac. Aime ga na salectnuing, yogo ngic-habu yago domagaing, yengi ngagesingkeningte inguc edocgugabac.”**

<sup>43</sup> Inguc milu Yesudi sanangnehac wackelu miwec, **“Lasaros, ga fangkelu lobina wanong.”** <sup>44</sup> Inguc mime ngic homaicne hige-moleine nga haic-mesuine kpolucti someckelu wabungkeicnedi fangkelu wawec.

Wame Yesudi yanguc edocebawec, **“Ngenge kpoluc lukecnolu hegilebong hikena.”**

*Yesu webong homanale yowa hefeibong*

*Mat 26:1-5; Mrk 14:1-2; Luk 22:1-2*

<sup>45</sup> Yuda ngic-ngigac Maria nganinogale kwesiibong, yenge Yesudi bole bawec, yogo nganilu bocyacti ye ngagesingkeibong. <sup>46</sup> Mariala kwesiibong, yengelacni gocnedibac Farisaio yengela hikelu Yesudi pasi bawec, yogolec siduc edocebaibong.

<sup>47</sup> Edocebabong depec-baba ngic micnefocngineng ailu Farisaio, yenge Tutumangtowale mamba wacebabong kwesi kpaduckeibong. Kpaduckelu yanguc miibong, “Ngic yogo, ngic-ngigac yengi ye ngagesingkeningte pasile maaine bocyac bagac. Ilec nongileng wenuc ainang?” <sup>48</sup> Ye hegilebong galu pasi ingucne taockelu badaictewa, ngic-ngigac sasawadi ye ngagesingkedaingte. Inguc aime Roma yengele hudu-baba ngic yengi kwesilu Ibu-macnonggeng nga ngic-ngigacnonggeng basowalecebadaingte.”

<sup>49</sup> Inguc mibong yengelacni ngic monic wacine Kaifas, ye hifa iwa depec-baba ngic yengele damong sugucne gawec, yedi yanguc edocebawec, “Ngenge wiyac monic mi nge-motogaing. <sup>50</sup> Ngic-ngigac aling sasawa mi miyac ainingte, ngic moniyangti sugu yengele ailu homamebac yenge gadaingte, yogodi madickedaiacte, ngenge yogo mi ngage-motogaing, me?”

<sup>51</sup> Yowa yogo yeicne kweleinele ngagelu mi miwec. Yedi hifa iwa depec-baba ngic yengele damong sugucne gawec. Yogolec ailu siduc-mimi ngic ingucne yowa miwec. Yesudi Yuda ngic-ngigac yengele ailu homanale inguc miwec. <sup>52</sup> Ye yengele sugu homanale mi wawec. Ye Wapongte adu-madecfocine singsalolong kweibong gagaing, yenge kpaducebame aling moniyang ainingte Kaifasdi inguc miwec. <sup>53</sup> Inguc mime hadeng yogowahac Yesu webong homanale molickelu yowa hefeibong.

<sup>54</sup> Inguc hefebong Yesu ye yogo ngagelu Yuda ngic-ngigac yengele hewacka hatacmac yegeni mi lolickelu gawec. Aime himong kisiwa misaine mikac, yogolec emeina taon monic wacine Efaraim iwa fawec. Ye iwa hikelu mic-tengtengfocine yengeholec gawec.

<sup>55</sup> Yuda ngic-ngigac yengele Ewalicebaicnele hombang dameng bangkaleme, ngic-ngigac bocyacti Wapongte haicka suwenagulu gbagbacne ainingte macngineng hegilelu Yerusalem hikeibong. <sup>56</sup> Hikelu Ibu-mac kwelina domalu Yesu basackelu yengungtihac yanguc uwanaguibong, “Ye hombangnonggang kwesidaiacte, me wenuc?”

<sup>57</sup> Aime depec-baba ngic micnefocngineng nga Farisaio yengi ngic-ngigac yanguc sanangnehac edocebaibong, “Yesu wenuwa gagac, yogo monicti bafuwalu ngama edocnubabong, hikelu badabeleng.”

## 12

*Yesu heloc hoineholec hosocnowec*

*Mat 26:6-13; Mrk 14:3-9*

<sup>1</sup> Ewalicebaicnele hombang yogolec hadeng 6 faemewa, Yesu ye Lasarosle mac Betani, iwa hikewec. Yesudi ngic ye hocne homackacni bagbolyeme fangkewec. <sup>2</sup> Yenge mac

iwa Yesule ailu nosing madicine lobeibong. Aime Matadi nosing yogo lome noibong. Aime ngic Yesuholec ngiyelu nosing noibong, Lasaros yengeholec momoc ngiyelu nowec. <sup>3</sup> Ngiyeebongka, yogowahac Mariadi socte sanda 1 kilo nebocine efecnemac, umacine yogolecsoc balu Yesule higewa kweme wame hosocnowec. Sanda yogo daling wacine narda, yogolec misainedi baicne ailu yogolec fuline feicnebenang. Hosocnolu hodoc-dowecinele susucinedi higeine keleng bacnowec. Inguc aime heloc yogolec hoinedi fitolu mac yogolec kwelina sawelu fawec.

<sup>4</sup> Aime mic-tengtengfocine yengele hewackacni mic-tengteng monic wacine Yudas Iskariot, yedi hocne lobewa gagu Yesu mudockeme badaingte, yedi yanguc miwec, <sup>5</sup> “Nongileng omale sanda yogo hifa moniyangte bolele fuli\* mi salegabeleng? Salelu moneng yogo balu ngic-ngigac waweweine yelebeng madickedec.” <sup>6</sup> Yudas ye ngic-ngigac waweweine yogo yengele ngagesilu mi miwec, miyac. Ye hise-baba ngicte ailu hiye-monengngineng damongkelu moneng hise balu nolu gawec. Ilec ailu inguc miwec.

<sup>7</sup> Inguc mime Yesudi yanguc miwec, **“Ga ngigac ye hegilonng. Ye sanda yogo moc lome faemewa gagu homadacte, dameng iwa moc longnudaing kale ailu, hosonelegac. <sup>8</sup> Ngic-ngigac waweweine yenge damengsoc ngengeholec gagidaingte. Nga nanibac ngengeholec damengsoc mi gadacte. Ilec ngigac ye aibaba madicine aigac.”**

<sup>9</sup> Aime Yuda ngic-ngigac bocyacti Yesu ye Betani macka gagac, inguc ngagelu Yesu nganinogale sugu mi hikeibong. Yenge Yesudi Lasaros homackacni bagboliyeme fangkewec, ye momoc nganinogale hikeibong. <sup>10-11</sup> Inguc fikeme Yuda ngic-ngigac bocyacti Lasarosle ailu micne yengele yowa hegilelu Yesu ngagesingkeibong. Ilec depec-baba ngic micne yenge Lasaros inguchac webong homanale yowa-bole baibong.

*Yesudi donggi feina Yerusalem hikewec*  
*Mat 21:1-11; Mrk 11:1-11; Luk 19:28-40*

<sup>12</sup> Mac saeme ngic-ngigac habutowadi hombangte ailu Yerusalem hikeibong. Hikelu ngagebong, Yesu ye biyac Yerusalem bangkalegac, inguc ngagelu ngic-ngigac yenge <sup>13</sup> yoc monic homu hengngine ingucnedi lesu badulu yefewa Yesu fuluckeningte hikeibong. Hikelu yanguc wackeibong, “Asec, ngic Sugucnele wacka welegac, ye mimi-madicineholec. (Mige 118:26) Yedi Israel nongileng Ngictau.”

<sup>14</sup> Inguc wackebong Yesu ye donggi madecine monic bafuwalu feina felu ngiyewec. Yogolec ailu yanguc kwelengkeicne fagac,

<sup>15</sup> “Sion aduine,<sup>†</sup> ga mi hangocguna. Nganic, ngictaugone donggi madecinele feina ngiyeme welegac.” (Sek 9:9)

<sup>16</sup> Pasi fikewec dameng iwa mic-tengtengfocine yenge yogolec fungine mi ngage-motoibong. Gacgu Yesu ye wac feicneholec aiwec<sup>‡</sup>, dameng yogowabac aibaba aicnoibong. Nga yowa yele ngagelu kwelengkeicne fagac, yogo ngage-motoibong.

<sup>17</sup> Aime ngic-ngigac habu yenge Yesuholec hikelu Lasaros dongesiwa homackacni wackel- elu bagboliyeme fangkeme nganiibong, yengi siduc yogo mibong sawewec. <sup>18</sup> Ye pasile maaine yogo bawecte ailu habutowadi ye nganinogale hikeibong. <sup>19</sup> Inguc aibong Farisaio yenge yengilangkac mingagec ailu yanguc miibong, “Ngagegaing, nongilengti wiyac monic ainogale silic mi aigac. Himongtowa yagolec ngic-ngigac sasawadi ye balaibelu hikeyack-egaing.”

*Yesu nganinogale kwesibong*

<sup>20</sup> Aime ngic-ngigac hombangte Wapong afeenogale Yerusalem hikeibong, yengele hewacka Grik ngic-ngigac gocne momoc Wapong afeenogale hikeibong. <sup>21</sup> Galu Filipa kwesilu miibong, “Ngic sugucne, nonge Yesu nganinogale ngagegabeleng.” Aime Filip ye Galili prowinswa taon monic wacine Besaida, iwacni. <sup>22</sup> Inguc mibong Filip ye kwesilu Endru edome, yeke momochac hikelu Yesu edoiboc.

<sup>23</sup> Edoboc Yesudi bafaliyelu yanguc edocepawec, **“Ngicte Madec ye wac feicneholec ainale damengngine welegac. <sup>24</sup> Foinac, wit hucine monic homalu himongka mi haudaictewa, yogo yeicnakac sugu gadaicte, yogo foinachenang edocngebagabac. Nga homalu himongka haudaictewa, yogobac noine bocyac bafuwadaicte. <sup>25</sup> Monic ye socte gagale angac ngageaigac, ye gagaine sangkecnodaicte. Nga himong**

**12:2:** Luk 10:40    **12:3:** Luk 7:37-38    \* **12:5:** Ye denarius 300 miwec.    **12:8:** Yef 15:11    **12:10-11:** Yoa 11:45  
**12:13:** Yoa 1:49    † **12:15:** Sion aduine yogo Yerusalem ngic-ngigac yengele nangeng yowa.    ‡ **12:16:** Yesu yeicne homalu homackacni gboliyelu fangkewec, dameng iwa ye wac feicneholec aime ngage-motoibong.    **12:16:** Yoa 2:22  
**12:23:** Yoa 13:31-32; 17:1    **12:24:** 1Kor 15:36

**yagowa socte gagale kweleinedi lobe holecnolu gacaigac, ye gagaine bagacgu gaganang bafuwadaicte.** <sup>26</sup> **Aime monic ye mole-baficne ainogale ngagegacka, ye na balaibecnudaic. Aime na gadacte, iwa ye inguchac naholec gadaicte. Nga monic ye nale mole-bafic aidaictewa, Mamacnedi ye mitengkedaicte.**

<sup>27</sup> **“Yakumachac kwelene umale-benangkeme wenuc midacte? Mamac, ga dameng yagowacni baicnunong, inguc midacte, me? Yogodi nalic mi aigac, ye na dameng yagolec hocne ailu kwesiiba.** <sup>28</sup> **Mamac, ga wacgone feicne basugulenong.”**

Inguc milu domame, honocmengkacni yowa-malac monic yanguc fikewec, “Na wacne feicne biyachac basuguleiba, ailu hatacmac basuguledacte.”

<sup>29</sup> Yowa inguc fikeme ngic-ngigac habutowadi yele emewa domaibong, yenge yowa-malac yogo ngagelu yanguc miibong, “Gbululungti holecac.”

Aime gocnedi yanguc miibong, “Angelo monicti yeholec yowa migac.”

<sup>30</sup> Inguc miibong Yesudi yanguc miwec, **“Yowa-malac yogo nale ailu mi fikegac, miyac. Yogo ngenge baficngebanale ailu fikegac.** <sup>31</sup> **Yakumachac Wapongti himongtowa yagolec ngic-ngigac mimoctocebadaicte. Ailu himongtowa yagolec ngictau baickedaicte.** <sup>32</sup> **Aime ngic yengi himongkacni bafangnudaingte, dameng iwa, na ngic-ngigac sasawa kpaducebabe nala kwesiyackedaingte.”** <sup>33</sup> **Yeicne silicine wenucka homadaicte, yogolec mime yegengkenale inguc miwec.**

<sup>34</sup> Inguc mime ngic-ngigac habutowadi yele yowa bafaliyelu yanguc miibong, “Yefe-yowawa yanguc miibong ngagecagabeleng, ‘Mesia fikelu damengngine motomotoine mikac gaginowagac.’ Aime ga wenucte migic, ‘**Ngic yenge Ngicte Madec bafangkedaingte.**’ Aime Ngicte Madec yogo maa?”

<sup>35</sup> Inguc miibong Yesudi yanguc miwec, **“Angoc ye dameng bangkacnemac ngengeholec gadaicte. Aime kundungte tapilidi somecnegebadaickale, ngenge angoc fangeleme angockolec gadabiyeng. Monic ye kundungka hikedaicte, ye yefe wenuwa hikegac, yogo nalic mi ngage-motodaicte.** <sup>36</sup> **Ilec ailu ngenge angocni ngengeholec fame angoc yogo ngagesingkedaing. Inguc aigacgu angocte adu-madecfocine aidaingte.”** Yesu ye inguc milu yenge hegilecebalu baickelu sangkewec.

#### *Yesu mi ngagesingkeibong*

<sup>37</sup> Yesu ye pasile maaine bocyac yengele haicka bame, yengibac ye mi ngagesingkeibong.

<sup>38</sup> Aime siduc-mimi ngic Yesaiyale yowa yogo noine fikewec,

“Sugucne, nonge siduc mibeng yegengkewec, ngic weni yengi ngagesingkeibong? Ailu Sugucnele bole sanangne yogo mala fikewec?” (Yes 53:1)

<sup>39</sup> Yogolec ailu yenge nalic mi ngagesingkeibong. Ailu Yesaiyadi yowa monic yanguc taockelu miwec,

<sup>40</sup> “Yenge dongenginengti nganidaingkale ailu, dongengineng bame kundung kwewec. Ailu kwelenginengti ngage-motolu hefaliyeme bamadicebadaickale ailu, kwelengineng basifuwewec.” (Yes 6:10)

<sup>41</sup> Yesaiya ye Yesule wac feicne nganiwecte yele ngagelu yowa yago miwec.

<sup>42</sup> Aime ngic micne yengele hewackacni bocyacti Yesu ngagesingkeibong. Aimebac Farisaio yengi gacgu ngic micne kpakpaduc macka mi fedaingkale milu, yenge ngagenagesing yogo mi miibong yegengkewec. <sup>43</sup> Ngic micne yenge ngic-ngigac yengi wacngineng bafeningte angac sugucnehac fayelewec, yenge Wapongti wacngineng bafenale mi ngagelu gaibong.

<sup>44</sup> Aime Yesudi dacineholec wackelu yanguc miwec, **“Monic na ngagesingnugac, ye na sugu mi ngagesingnugac, miyac. Ye na salecnuwec, ye momochac ngagesingkegac.**

<sup>45</sup> **Ailu monic ye na nganicnugac, ye na salecnuwec ye momochac nganigac.** <sup>46</sup> **Aime ngic-ngigac ngagesingnugaing, yenge sasawadi kundungka hatacmac mi ganingte, himongka nani angoc waiba.**

<sup>47</sup> **“Monic ye yowane ngagelu mi balaibedaictewa, nani ye aibabaine mi wosaelu mimoctodacte, miyac. Na himongte ngic-ngigac aibabangineng wosaelu mimoctonogale mi waiba. Nabac ngic-ngigac yengele bikicte ameine babe wasecne ainingte waiba.** <sup>48</sup> **Aime monic ye na lobe holecnulu yowane mi balaibedaictewa, wiyac monicti yele aibabaine wosaelu mimoctodaicte. Yowa migabac, yogodi hocne dameng motomotoina aibabaine wosaelu mimoctodaicte.** <sup>49</sup> **Naneicne kwelenele**



**yowa mi micaigabac, miyac. Mamac salecnuwec, ye yeuctihac ung-yowaine minogale salecnuwec.** <sup>50</sup> **Yele ung-yowa yogo gaga-sanangineholec, na yogo ngagegabac. Ilec ailu Mamac yowaine edocnuwec, yogohac micaigabac."**

### 13

*Mic-tengtengfocine higengineng suwewec*

<sup>1</sup> Ewalicebaicnele hombang bangkaleme deboc moniyang sugu fawec. Fame Yesu ye himongtowa yago hegilelu Mamacta hefaliye fenale damengngine bangkalewec, yogo biyac ngagenaguwec. Inguc ngagelu yele ngic-ngigacfocine himongtowa yagowa gagaing, yengele kweleinedi angac ngagelu gawec. Gacgu gagainele dameng motonogale aime kweleinedi angac ngagelu aiyelewec. <sup>2</sup> Yenge awellicte nosing nolu ngiyeibong. Aime Aleng Sugucnenginengti ngage-ngageine Yudas Iskariot, ye Saimon macedine, yele kwelewa yanguc biyac lowec, yedi gacgu Yesu mudockeme ngaba yengi badaing.

<sup>3</sup> Aime Mamacti wiyac sasawa Yesule molewa biyachac lowec. Nga ye Wapongtacni walu hatacmac hefaliye feidaicte, ye yogo biyachac ngagewec. <sup>4</sup> Ngagelu mac ngiye-ngiyeine hegile fangkelu ngakpi dalicne hemoctolu keleng-baba monic balu hewacina hefewec. <sup>5</sup> Hefelu duwacka misa sotingkeme haume, mic-tengtengfocine yengele hige suweyelelu keleng-baba hewacina hefewec, yogodi higengineng bakelengkeyelewec.

<sup>6</sup> Inguc ailu Saimon Pitala leme, Pitadi yanguc uwacnowec, "Sugucnene, ga wenucte higene suwedamecte?"

<sup>7</sup> Inguc mime Yesudi yanguc edowec, "**Na pasi aigabac, yogo ga yakumac yogolec fungine mi ngage-motogic. Nga lobewabac yogolec fungine ngage-motodamecte.**"

<sup>8</sup> Inguc mime Pitadi miwec, "Miyacbenang, ga nale hige mi suwedamecte."

Mime Yesudi bafaliyelu yanguc edowec, "**Na higegone mi suwedactewa, ga naholec mi taockelu gadamecte.**"

<sup>9</sup> Inguc mime Saimon Pitadi miwec, "Sugucne, ga higene sugu mi suwedamecte, hodocne nga molene momoc suwenelec."

<sup>10</sup> Inguc mime Yesudi yanguc miwec, "**Monic ye misa biyachac lowalu socine buchuchac gbagbackewecka, hatacmac mi lowadaic, higeline sugu suwedaic. Nenge gbagbacne biyachac aibong, aime yogo sasawa nengele mi migabac.**" <sup>11</sup> I yangucte, ma ngicti ye mudockeme badaingte, yogo biyac ngagewec. Ilec ailu yanguc miwec, "**Na sasawa nengele mi migabac.**"

<sup>12</sup> Yesu ye higengineng suweyackeme motome, ngakpi dalcine holelu hatacmac wangiyelu yanguc uwayelewec, "**Na ngengela pasi bagabac, yogolec fungine ngage-motogaing, me?**" <sup>13</sup> Nenge na Wewedu nga Sugucne wacnucaigaing, yogo nalic micaigaing, na yogo hocne. <sup>14</sup> Na Sugucne nga Wewedunginengti kwelec kwekwe ingucne ailu higengineng suwegabacte, nenge ngengungtihac inguchac higengineng suwenagudaing. <sup>15</sup> Na pasi madicne edalicngebahu aingelegabac, silicine ingucne-hac balaibelu ngengungtihac badabiyeng. <sup>16</sup> Foinac, kwelec kwekwe ngic monicti sugucneinele feicne mi aidaicte. Nga ngic yowa bahikegac, yedi ngic ngiyelu saleme hikegac, yele feicne mi aidaicte, yogo noinebenang edocngegabac. <sup>17</sup> Nenge yogo ngagelu balaibedaingtewa, nenge kwele-angackolec gadaingte.

*Yudasdi Yesu baningte mime yegengkewec*

*Mat 26:20-25; Mrk 14:17-21; Luk 22:21-23*

<sup>18</sup> "**Na sasawa nengele mi migabac. Bawosaecngebaiba, nenge ngagecngabagabac. Ailu yowa Wapongte hibiwa kwelengkeicne fagac, yogo noine fikenale yowa yago kwelengkeicne,**

**'Ngic naholec nosing nogac, ye biyac ngaba ainelenale aigac.'** (*Mige 41:9*)

<sup>19</sup> Aibaba yogo fikedaicte. Aime nenge 'Na gagabachac,' yogo ngagesingkeningte ailu, yakumac aibaba yogo mi fikeemewa yogolec silicine edocngegabac.

<sup>20</sup> Foinac, nani ngic me ngigac monic salebe kwesime monicti hefolegac, ye na hefolecngac. Nga monic ye na hefolecngac, ye Wapong na salecnuwec, ye momochac hefolegac, yogo noinebenang edocngegabac."

<sup>21</sup> Yesu ye yowa yogo mime, kweleine umaleme yowa yanguc milu edocebawec, "**Foinac, ngengelacni monicti na ngaba yengele molewa locnudaicte, yogo noinebenang edocngegabac.**"

<sup>22</sup> Inguc mime mic-tengtengfocine yenge yengungtihac dongedi nganinagulu miibong, "Yogo male migac?" Inguc milu ngagebong kpungkewec. <sup>23</sup> Aime mic-tengtengfocine

yengele hewackacni Yesudi mic-tengteng monicte kweleinedi angackelu gawec, yedi Yesule emewa ngiyewec.

<sup>24</sup>Inguc ngiyeme Saimon Pitadi ye hodocti sosoc aicnolu miwec, “Ga uwacnoc, yogo male migac?”

<sup>25</sup>Inguc mime mic-tengteng yogo Yesule mondacka holelu yanguc uwacnowec, “Sugucne, ga yogo male migic?”

<sup>26</sup>Inguc mime Yesudi yanguc miwec, “**Na bret nebocine yago hulungka kpomu-luckelu ngic monic lacnodacte, ngic yogo hocne.**” Inguc milu bret balu hulungka kpomuluckelu Yudas Iskariot, Saimon madecine lacnowec.

<sup>27</sup>Bret lacnome bame Satang, yedi kweleina hauwec. Haume Yesudi yanguc edowec, “**Ga bole banogale ngagegic, yogo hikelu biyac badamec.**” <sup>28</sup>Inguc mime mic-tengtengfocine ngiyeibong, yenge ye oma wiyacte migac, yogo mi ngage-motoibong. <sup>29</sup>I yangucte, Yudas ye moneng balu gawecte ailu, yembangte wiyac monic fuli banale micnogac, me ngic-ngigac waweweine wiyac monic yelenale micnogac, inguc ngageibong. <sup>30</sup>Aime Yudas ye bret nebocine balu iwahac fangkelu hauwec. Dameng iwa mac debolewec.

*Pitadi Yesu bisockedaicte*

*Mat 26:31-35; Mrk 14:27-31; Luk 22:31-34*

<sup>31</sup>Yudas haulu hikeme Yesudi yanguc miwec, “**Yakumachac Ngicte Madec ye wac feicneholec yegengkedaicte. Yegengkeme ngic-ngigac yenge Ngicte Madecte boleinele ailu Wapongte wac feicne ngagedaingte.**” <sup>32</sup>Ngic-ngigac yenge Madec nganilu Wapongte wac feicne ngagedaingtewa, Mamacti yeicnele ailu Madecinele wac feicne yogo ngic-ngigac yengela bayegengkedaicte, yogolec dameng bangkalegac. <sup>33</sup>Adu-madecfocne, na dameng bangkacnemas ngengeholec galubac hikebe nenge na basacnudaingte. Aime Yuda ngic-ngigac edocebaiba, yogohac yakumac nenge edocngebagabac. Na hikedaicte, iwa nenge nalic mi fudaingte, miyac. <sup>34</sup>Ungyowa gbolincine monic yanguc ngelegabac, nenge ago ainagulu kwele-angacka gadabiyeng. Na nenge ago aingelelu kwele-angacka gacaigabac, silicine ingucnehac ngengi kwele-angacka ainagulu gadabiyeng. <sup>35</sup>Nenge filesoc filesoc ago ainagulu kwele-angacka gadaingtewa, ngic-ngigac sasawadi nganilu nenge nale mic-tengtengfocne gagaing, yogo ngagedaingte.”

<sup>36</sup>Inguc mime Saimon Pitadi yanguc uwacnowec, “Sugucne, ga wenuwa hikedaicte?”

Inguc mime Yesudi yanguc miwec, “**Ga yakumac na hikedaicte, iwa nalic mi balaiibecnulu hikedaicte, gacgu lobewabac balaiibecnulu fudamec.**”

<sup>37</sup>Inguc mime Pitadi hatacmac uwacnowec, “Sugucne, na omale yakumac nalic mi balaiibecgudacte? Na ga baficgunogale nalic gagane hegiledacte.”

<sup>38</sup>Inguc mime Yesudi bafaliyelu yanguc edowec, “**Ga nalic nale ailu gagagone hegiledamec, inguc migic, me? Foinac, kokolec ngicne mi hiyaemewa, gagi na bisocnung alecine habackang aidaicte, yogo noinebenang edocugabac.**”

## 14

*Mic-tengtengfocine basanangebawec*

<sup>1</sup>“**Nenge kwelengineng mi umaledaic. Nenge Wapong ngagesingkelu, na inguchac ngagesingnudabiyeng.**” <sup>2</sup>Nale Mamacte macka mac kweline bocyac fagac. Yogo mi fadecka midec, na yanguc mi edocngebadaba, ‘Na nengele mac kweline bamockenogale hikedaicte.’ <sup>3</sup>Ailu nengele mac kweline bamockenogale hikedaicte, hatacmac hefaliye kwesilu mengocngebadacte. Na gadacte, iwahac nongileng momochac ganangte ngagegabac. <sup>4</sup>Ailu yefe wenuwa hikedaicte, nenge yogo biyac ngagegagang.”

*Honocmengte yefe*

<sup>5</sup>Aime Tomasdi yanguc uwacnowec, “Sugucne, ga wenuwa hikedaicte, yogo mi ngagegabeng. Yefe yogo wenuc ngage-motodabelengte?”

<sup>6</sup>Uwacnome Yesudi yanguc miwec, “**Na hocne yefe nga yowa noine ailu gaga. Monicte na mikacka Mamacta hikedaicte yogolec yefe monic mi fagac.**” <sup>7</sup>Nenge na ngagecnudaingtewa, Mamac inguchac ngagedaingte. Ailu nenge yakumac ye nganilu ngagegagang.”

<sup>8</sup>Inguc mime Filipdi yanguc miwec, “Sugucne, ga Mamac edalicnubaengka nganilu ngagebeng andoine aime gadabelengte.”

<sup>9</sup> Inguc mime Yesudi yanguc edowec, “**Filip, na dameng dalicne ngengele hewacka gabe ga mi ngagencugic, me? Monic ye na nganicnugac, ye Mamacne momoc nganigac. Aime ga wenucte Mamac edalicngebabe nganiningte migic?** <sup>10</sup> Na Mamacte kwelewa gagabac nga Mamacti nale kwelewa gagac. Ga yogo mi ngagesingkegic, me? Yowa edocngebacaigabac, yogo neicne kwelele mi micaigabac, miyac. Mamacti nale kwelewa galu bole yogo balu gagac. <sup>11</sup> Ngenge yowane yago ngagesingkening, na Mamacte kwelewa gagabac nga Mamacti nale kwelewa gagac. Inguc mibe ngagebong kpungkeme, bolene bacaigabac, yogo ngagesingkening.

<sup>12</sup> “**Foinac, monic ye na ngagesingnudaicte, ye na bole bacaigabac, ingucnehac badaicte, yogo noinebenang edocngebabac. Ailu na Mamacta hikenogale bole balu gaiba, ye yogo ewalilu hatacmac sugucnehac badaicte.** <sup>13</sup> Madecti Mamacte wac feicne bafuwacnonale ailu ngenge wiyac sasawa nale wacka uwacnobong, yogo aidacte. <sup>14</sup> Ailu wiyac monicte nale wacka uwaneleadaingtewa, na yogo aidacte.

*Tili Asu saledaicte*

<sup>15</sup> “**Ngenge kwelenginengti nale angac ngagelu gadaingtewa, ung-yowane balaibedaingte.** <sup>16</sup> Aime nani Mamac uwacnobe yedi na ingucnehac ngic-hewac monic bafincgebanale ngeleme yedi ngengeholec damengsoc gagaicte. <sup>17</sup> Ailu ye yowa noinele Asu. Aime himongtowale ngic-ngigac yenge ye mi nganicaigaing. Ailu ye mi ngagegaingte nalic mi badaingte. Nga ngengibac ye ngagegaing, ye ngengele hewacka gacaigac, ailu kwelenginang hocne gadaicte. <sup>18</sup> Aime na hegilecnegebabe ngenge buwenac ingucne mi gadaingte, miyac. Na ngengele kwesidacte. <sup>19</sup> Dameng bangkacnemac motome himongtowa yagolec ngic-ngigac yenge na hatacmac mi nganicnudaingte. Nga ngengibac nganicnudaingte. I yangucte, na gagabacte ailu ngenge gadaingte. <sup>20</sup> Na Mamacnele kwelewa gagabac. Aime ngenge nale kwelewa gagaing. Nga nani ngengele kwelewa gagabac, ngenge dameng iwa yogo ngagemotodaingte.

<sup>21</sup> “**Monic ye nale ung-yowa ngagepangkelu balaibecaigac, ye kweleinedi nale angac ngagedaicte. Aime monic ye kweleinedi nale angac ngagedaicte, Mamacnedi inguchac yele angac ngagencodaicte. Aime nani yele angac ngagelu edalibe yegengkedaicte.**”

<sup>22</sup> Inguc mime Yudas Iskariot waseinedi Yesu yanguc uwacnowec, “Sugucne, ga nonge sugu fikenolenogale ngagesigic. Nga himongtowa yagolec ngic-ngigac yengelabac mi fikedamecte, yogo wenucte?”

<sup>23</sup> Inguc mime Yesudi bafaliyelu yanguc edowec, “**Monic ye kweleinedi nale angac ngagedaicte, ye mic-yowane balaibedaicte. Balaibeme Mamacti yele angac ngagecnome, noke yela kwesilu yeholec gadabelecte.** <sup>24</sup> Nga monic ye kweleinedi nale angac mi ngagecaigac, ye mic-yowane mi balaibedaicte. Aime na yowa mibe ngagecaigaing, yogo nale yowa miyac, yogo Mamac salecnuwec yele yowa hocne.

<sup>25</sup> “**Na ngengeholec galu yowa yogo edocngebabac.** <sup>26</sup> Aime Mamacti ngic-hewacngineng yogo Tili Asu nale wacka saleme wadaicte. Walu yedi wiyac sasawa wedungelelu yowa edocngebaba, yogo kwelenginang kwefangkeme ngagesidaingte. <sup>27</sup> Na kwele-mogungka locngebalu hikedacte. Aime kwele-mogungne logabac, yogodi ngengela fagidaicte. Himongtowa yagolec ngic-ngigac yengi kwele-mogung yelecaigaing, kwele-mogungne yogo ingucne miyac. Ilec ngenge kweleumac mi badaing. Ailu hangoc mi aidaing.

<sup>28</sup> “**Na Mamacta hikelu hatacmac ngengela hefaliye kwesidacte, inguc mibe ngagegaing. Ailu ngenge kweledi nale angac ngagegaingka, ibac beliyedaingte. I yangucte, Mamac ye hocne nale feicne.** <sup>29</sup> Aime hikedacte yogolec noine lobewa fikedaicte, wiyac yogo noine mi fikeemewa, ngengi ngagesingkeningte ailu siducine yakumac edocngebabac.

<sup>30</sup> “**Himongtowa yagolec ngictau kwesigacte na ngengeholec yowa dameng dalicne hatacmac mi midacte. Ngictau yogo yele tapili monic nale kwelewa mi fagac.** <sup>31</sup> Aimebac na Mamacte angac ngagecaigabac. Ailu yedi bole-yowa banogale milu edocnuwec, yogolec silicina bole bacaigabac. Himongtowa yagolec ngic-ngigac yenge yogo ngagemotoning.

“**Fangkebong hikenang.**”

## 15

*Yesu ye waing muc*

<sup>1</sup> “Na waing muc noine. Nga Mamacti waing bolele fileine. <sup>2</sup> Muc mangngine gocne nala falu noine mi aibong, ye yogo sasawa welockelu wicebacaigac. Nga mangngine gocne noine aicaigaing, yogo sasawa noine bocyac ainingte, ye yogo bamadicebame madickedaingte. <sup>3</sup> Na mic-yowa edocngebacaigabacte ngenge biyac ghabacne aibong gagabiyeng. <sup>4</sup> Ailu ngenge naholec wetackelu gadabiyeng. Inguc aibong nani ngengeholec wetackelu gadacte. Waing muc mangnginedi mucina mi bakatackedaictewa, ye noine nalic mi aidaicte. Ingucnehac ngenge naholec mi wetackelu gadaingtewa, noine monic mi aidaingte.

<sup>5</sup> “Naneuc waing mucine, aime ngengibac mangngine. Monic ye naholec wetackelu game, nani yeholec inguchac wetackelu gabe, ye noine bocyac aidaicte. Ngenge na mikac bole monic nalic mi badaingte. <sup>6</sup> Monic ye naholec mi wetackelu gadaictewa, ye ngicti mangngine helockelu wickebong homacaigac, yogo ingucnehac ye helockelu wickedaingte. Aime mangngine ingucne kpaduckelu dacka wickebong lobedaicte. <sup>7</sup> Ngenge naholec wetackelu gadaingte. Aime nale yowa ngengela wetackelu fadaictewa, wiyac monicte aingeleme uwabong, yogo fikengeledaicte. <sup>8</sup> Ailu ngenge noine bocyac bafuwalu mic-tengtengfocne yegengkegaingte Mamacti aihaba yogolec wac feicnehac bagac.

<sup>9</sup> “Mamacti kweleinedi nale angackeme aicaigac, silicine ingucnehac nani kweleinedi ngengele angacnume aicaigabac. Ngenge nale kwele-angac kwelina wetackelu gadabiyeng. <sup>10</sup> Na Mamacnele ung-yowa balaibelu yele kwele-angac kwelina wetackelu gacaigabac. Yogo ingucnehac ngengi nale ung-yowa balaibedaingtewa, nale kwele-angacte kwelina wetackelu gadaingte. <sup>11</sup> Nale belic-belicti ngengela fagac. Aime kwelengineng sasawa belic-belicti fangelenale yowa yago edocngegabac.

<sup>12</sup> “Nale ung-yowa yanguc, na ngenge ago aingelelu kwele-angacka gacaigabac, silicine ingucnehac ngenge ago ainagulu kwele-angacka gadabiyeng. <sup>13</sup> Monic ye agofocine yengele ailu gagaine hegiledaicte, yele kwele-angac yogo feicnebenang. <sup>14</sup> Aime na ung-yowa ngelecaigabac, yogo balaibegaingka ngenge nale agofocne aigaing.

<sup>15</sup> “Kwelec kwekwe ye sugucneinedi wiyac aicaigac, yogo mi ngagedaicte. Ilec ailu na ngengele kwelec kwekwe madec hatacmac mi midacte, miyac. Na ngengele agofocne migabac. I yangucte, na Mamacnelacni yowa ngageiba, yogo sasawa biyachac edocngebayackeiba. <sup>16</sup> Ngengi na mi bawosaecnuiabong, miyac. Ngenge noine bafuwaningte ailu nani bawosaecngebalu bolewa locngebaiba. Noine bafuwabong yogodi fafa-sanang faginowagac. Ilec ailu ngenge wiyac monicte nale wacka Mamac milockebong, yedi wiyac yogo ngeledaicte. <sup>17</sup> Aime na ung-yowa yanguc ngelegabac, ngenge ngengileng ago ainagulu kwele-angacka gadabiyeng.

*Mic-tengtengfocine kweledi wicebaibong*

<sup>18</sup> “Himongtowa yagolec ngic-ngigac yengi kweledi wicnghebagaingka, ngenge yanguc ngagedaing, molickelu na inguchac kweledi wicnuiabong. <sup>19</sup> Ngenge himongtowa yagolec ngic-ngigac gadabongka, yenge yengileng ayelecaigac, silicine ingucnehac ngengele angac ngagedabongka. Nga ngengebac himongtowa yagowacni miyac, nani ngenge biyachac bawosaecngebalu himongtowa yagolec ngic-ngigac yengelacni baicngebaiba. Ilec ailu yengi ngenge kweledi wicnghebadaingte. <sup>20</sup> Na yowa molickelu edocngebaiba, yogo mi ngigecngebadaic, kwelec kwekwe ngic monicti sugucneinele feicne mi aidaicte. Ilec ailu ngic-ngigac yengi weyebic aineleibongka, yenge silicine ingucnehac ngenge weyebic aingeledaingte. Aime nale yowa balaibeibongka, ngengele yowa ingucnehac balaibedaingte. <sup>21</sup> Yenge salecnuwec, ye mi ngagegaing. Ilec yenge nale wacte ailu ngenge inguc aingeledaingte.

<sup>22</sup> “Na walu yengela yowane mi midackabac, yenge bikicnginengte umac mikac gadabong. Aime yakumachac walu mibe bikicnginengte ailu migbedic ainogale yefe monic mi fagac. <sup>23</sup> Monic ye na kweleinedi wicnugac, ibac ye Mamacne inguchac kweleinedi wickegac. <sup>24</sup> Na bole balu gagabac yogo monicti pasi tapiliineholec ingucne biyachac esecne monic mi bawec, pasi ingucne yogo yengele hewacka mi badacka, ibac yenge bikicnginengte umac mikac gadabong. Aime yenge pasine yogo yakumac nganilubac Mamacneholec noke kwelenginengti wicnupagaing. <sup>25</sup> Aime yowa yanguc fagac,

'Yenge fungine mikacka kwelenginengi mochenang wicnuibong.' (*Mige 35:19; 69:4*) Yogo yefe-yowanginang kwelengekeicne fagac. Aime yogo sasawa noine fikenale inguc aibong.

<sup>26</sup> "Ngic-hewacngineng kwesidaicte, ye Mamactacni salengelebe kwesidaicte. Ailu yedi hocne yowa noinele Asu. Aime yedi kwesilu nale mime yegengkedaicte. <sup>27</sup> Aime ngenge molickelu naholec gaibong. Ilec ngengi inguchac nale mibong yegengkedaic."

## 16

<sup>1</sup> "Ngenge ngage-ngagesing yogo mi hegileningte yowa yago biyachac edocngebaiba. <sup>2</sup> Ngic yengi kpakpaduc macte aka holengelelu lobina locngებადაingte. Aime dameng monic kwesidaicte, iwa yenge wehomacngებადაingte. Dameng iwa ngagebong aibaba yogolec Wapong afeelu kwelec kwecnodaingte. <sup>3</sup> Yenge Mamac nga na mi ngagecnupagaingte inguc aidaingte. <sup>4</sup> Na molickelu dameng iwa ngengeholec gaibale ailu yowa yogo mi edocngებაiba. Aime yengele dameng kwesime basowalecngებადაingte, iwa na yengele yowa edocngებაiba, nale yowa yogo mi ngigecngებადაicte.

*Tili Asule bole*

<sup>5</sup> "Na salecnuwec, yela hatacmac hefaliye hikedacte, yogolec dameng bangkale welegac. Aime ngengelacni monicti yanguc mi uwanelegac, 'Ga wenuwa hikedamecte?' <sup>6</sup> Na yowa yago edocngებაბე ngenge kwelengineng umalegac. <sup>7</sup> Na yowa noine yanguc edocngებაბე, na hikedacte, ibac ngengela madickedaicte. Entacka na mi hikedacte, ibac ngic-hewacngineng nalic mi kwesidaicte. Na hikedactewa, ye salebe ngengela kwesidaicte. <sup>8</sup> Yedi kwesilu himongtowa yagolec ngic-ngigac yengele bikicnginengte umac, nga aibaba dondonne ailu mimocto-mimoctole bole, yogo bayegengkeme ngagebong noine aidaicte. <sup>9</sup> Bikicte fungine yogo yanguc, yenge na mi ngagesingnugaing. <sup>10</sup> Nga aibaba dondonnele fungine yogo yanguc, na Mamacta hikebe ngenge mi nganicnudaingte. <sup>11</sup> Nga mimocto-mimoctole fungine yogo yanguc, himongtowa yagolec ngictau ye yowawa biyachac wawewec.

<sup>12</sup> "Aime na ngenge yowa bocyac edocngებანოგალე აიგაბაც. Aime ngenge yakumachac yowa yogo ngagelu balaibelu gagalesoc mi aigac. <sup>13</sup> Yowa noinele Asu wadaicte, yedibac bacngებალუ yowa noina mengocngებაბე hikedaingte. Ailu ye yeicne kweleinele yowa mi midaicte. Ye Wapongtacni yowa ngagecaigac, yogo midaicte ailu pasi lobewa fikedaicte, yogolec momoc edocngებადაicte. <sup>14</sup> Yedi nale fungine mime yegengkedaicte, ailu wac feicne neledaicte. I yangucte, ye neicne kwelewa yowa fagac, yogo balu mime yegengkedaicte. <sup>15</sup> Mamacta wiyac sasawa fagac, yogolec fileine na. Ilec ailu yanguc migabac, wiyac sasawa Asudi balu mime yegengkegedaicte, yogo nalacni. <sup>16</sup> Dameng bangkacnemac fagac, iwa mi nganicnudaingte. Ailu dameng bangkacnemac fagac, yogowabac hatacmac nganicnudaingte."

*Belic-belic*

<sup>17</sup> Inguc mime mic-tengtengfocine gocne yengungtihac yanguc uwanaguibong, "Ye omale yanguc migac? 'Dameng bangkacnemac fagac, iwa mi nganicnudaingte. Ailu dameng bangkacnemac fagac, yogowabac hatacmac nganicnudaingte.' Ailu hatacmac yanguc migac, 'Na Mamacta hikedacte.'" <sup>18</sup> Aime yenge ngagebong kpungkeme yanguc mingagec aibong, "Dameng bangkacnemac fagac, yogolec fungine wenuc? Nongileng yowa yogolec fungine mi ngagegabeleng."

<sup>19</sup> Mic-tengtengfocine yengi uwacnongte aibong, Yesudi yengele kwelewa biyac ngageyelelu yanguc edocebawec, "Dameng bangkacnemac fagac, iwa mi nganicnudaingte. Ailu dameng bangkacnemac fagac, yogowabac hatacmac nganicnudaingte. Ngenge yowa yogolec ngengungtihac uwanagugaing, me? <sup>20</sup> Foinac, ngenge hii-songgong nga kwele-sowac sugucne aiyebongka himongtowa yagolec ngic-ngigac yenge beliyedaingte, yogo noinebenang edocngებაგაბაც. Aime ngenge kwele-sowac aibong kwele-sowacngineng yogodi bafaliyeme ngenge belic-belic hatacmac bafuwadaingte. <sup>21</sup> Ngigac monic ye madec-baba damengngine bangkale weleme, doic sugucnehac ngagem kogoc fikedaicte. Ye kogoc himongka biyac fikegac. Yogolec ailu beliyegacte ailu doic yogo ngigeckegac. <sup>22</sup> Silicine ingucnehac

ngenge yakumac kwele-sowackolec gagaing. Aime hatacmac nganicngebacte, dameng iwa ngenge naholec kwelenginengti beliyedaingte. Aime monicti aingeleme kwele-sowac nalic mi aidaingte, ngenge belic-belickolec gadaingtehac.

<sup>23</sup> “Aime dameng iwa ngenge wiyac monicte mi uwaneledaingte, miyac. Foinac, ngenge wiyac monicte nale wacka Mamac milockebong, yedi wiyac yogo ngeledaicte, yogo noinebenang edocngebagabac. <sup>24</sup> Ngenge esecne nale wacka wiyac monicte mi milockelu gaibong. Aime ngenge kwelenginang belic-belicti wakenale, wiyacte milockelu badabiyeng.

<sup>25</sup> “Na nangeng yowawa yowa edocngebalu gaiba. Gabe damengngine kwesime na nangeng yowa ngengela hatacmac mi midacte, miyac. Na Mamacte yegenabenang milu edocngehabe yegengkedaicte. <sup>26</sup> Dameng iwa ngenge nale wacka milockedaingte. Aime na yanguc mi migabac, nani ngengele ailu Mamac milockedaicte. <sup>27</sup> Ngenge kwelenginengti nale angac ngagelu gagaing. Ailu na Mamactacni kwesiiba, yogo ngagesingkelu gagaing. Ilec Mamac yeuctihac kweleinedi ngengele angac ngagegac. Ilec ailu na inguc mi migabac. <sup>28</sup> Na Mamactacni himongtowa yagowa kwesiiba. Ailu hatacmac himongtowa yago hegilelu Mamacta hefaliye hikedacte.”

<sup>29</sup> Inguc mime mic-tengtengfocine yengi yanguc miibong, “Ngagegic, ga yakumac nangeng yowa mi holelu migic, ga yegena migic. <sup>30</sup> Ailu wiyac sasawa ngageyackegic, yogo yakumac ngagegabeleng. Ailu ngic-ngigac yenge ngagelu uwageleningte aibong, ga yengele kwelewa biyac ngagegic. Ilec ailu ga Wapongtacni kwesiing, yogo ngagesingkegabeleng.”

<sup>31</sup> Inguc mibong Yesudi mic-tengtengfocine yanguc edocebawec, “Ngenge yakumac ngagesingkegailing, me? <sup>32</sup> Ngagegailing, dameng monic kwesigac ailu biyac bangkale welegac, iwa ngenge na hegilecnulu siyeckelu singsalolong kwelu macnginangsoc hikedaingte. Aime na neicnac mi gadacte, Mamacti naholec gadaicte. <sup>33</sup> Ngenge nala kwele-mogungkolec ganingte yowa yago edocngebagabac. Aime ngenge himongtowa yagowa doic sugucnehac ngagelu gadaingte. Aime nabac himongtowa yagolec tapili biyachac ewaliiba. Ilec ngenge kwelenginengte tapili mi wadaic.”

## 17

### *Yesudi yeicnele milockewec*

<sup>1</sup> Yesu ye yowa yogo milu dongeine hilame honocmengka feme yanguc milockewec, “Mamac, dameng biyac welegac. Madecti gale wac feicne yogo bame yegengkenale ga Madecgonele wac feicne yogo baengka yegengkena. <sup>2</sup> Ailu yele ngic-ngigac aling milu lacnoing yogo yenge yedi gaga-sanang yelenale ngic-ngigac sasawa yenge yele bagewa ganingte bole-yowa tapiliineholec ye lacnoing. <sup>3</sup> Aime ga Wapong moniyangti noine gagic. Ailu saleng wawec, yogo Yesu Kristo, yenge inguc nalic ngagecnpagaing, yogo gaga-sanangte fungine. <sup>4</sup> Na bole babele neleing, yogo bamoctoiba. Aime gale wac feicnedi himongka bole yogo bame angoleibong. <sup>5</sup> Mamac, himong nga sawa yeke mi fikebocka na wac feicneholecti gaholec gaiba, ga wacne feicne gaholec fawec, yogo nelenong.

### *Mic-tengtengfocine yengele milockewec*

<sup>6</sup> “Mamac, gageuc himongtowa yagowacni ngicfocgone bawosaecbaing. Yenge gale ngic gabong, gagi yenge nale molewa locebang wacgone bayegengkeyelebe yowagone balaiibelu gaibong. <sup>7-8</sup> Ailu mic-yowa neleing, yogo biyac yelebe baibong. Ilec wiyac sasawa gagi neleing, yogo galacni, yakumac yenge inguc ngagegailing. Aime galacni kwesiiba, yogo noinebenang ngage-motogaing. Ailu gagi noinebenang salecning kwesiiba, yogo inguchac ngagesingkegailing.

<sup>9</sup> “Ilec yengele ailu milocugabac. Himongtowa yagolec ngic-ngigac yengele mi milocugabac, miyac. Na gagi ngic nale molewa locebaing, yengele ailu milocugabac, yenge hocne gale aling, <sup>10</sup> aime nale wiyac sasawa yogo gale, nga gale yogo nale. Aime na yengele gagawa wac feicne balu gagabac. <sup>11</sup> Himongtowa yagowa gaga damengne motonogale aigac. Aime yenge himongtowa yagowa gaebongka na gala fudacte. Mamac ga gbagbacne, nokilec moniyang, yogo ingucnehac yenge moniyang ainngte gagi wacgone neleing, yogo alingka ngani-damong aidamec. <sup>12</sup> Na yengeholec gaiba, dameng iwa wacgone neleing, wac yogowa damongebalu

gabe monicti mi sangkewec, sasawadi wasecne aibong. Yengelacni moniyang sug-  
audi, dac-sanangte madec ailu sowalewec. Wapongte hibiwa yowa kwelengkeicne  
fagac, yowa yogo sasawa noine ainale inguc fikewec.

<sup>13</sup> “Aime nale belic-belicti yengela sawenale ailu yowa sasawa yago himongtowa  
yagowahac mibe yegengkeme, yakumac gala fudacte. <sup>14</sup> Na mic-yowagone yeleiba.  
Ailu kwilic kwesilu yagowa gagabacte ailu, himongtowa yagolec ngic-ngigac yenge  
kweledi wicnuibong. Aime silicine ingucnehac yenge kwilic kwesilu gagaingte  
ailu himongtowa yagolec ngic-ngigac yengi yenge kweledi wicebaibong. <sup>15</sup> Ga  
hiongkacni baicebacte mi milocgugabac, miyac. Kindololo fileinedi basowale-  
cebadaickale ailu, gagi asa bacebadamec. Yogolec ailu milocgugabac. <sup>16</sup> Na  
hionggtowa yagowacni miyac. Aime yenge ingucnehac himongtowa yagowacni  
miyac. <sup>17</sup> Gale yowa yogo noine, aime yowa yogodi bacebame gale bingec aidaing.  
<sup>18</sup> Aime gagi na himongtowa yagowa salecnuing, ingucnehac nani yenge himong-  
towa yagowa salecebaiba. <sup>19</sup> Yenge yowa noine iwa galu gale bingec ainingte  
naneuctihac yengele ailu gale bingec aigabac.

*Ngage-ngagesingkolec yengele milockewec*

<sup>20</sup> “Ailu na yengele sugu mi milocgugabac. Yengi mic-yowagone mibong ngic-  
ngigac yenge yowa yogo ngagelu ngagesingnudaingte, ngic-ngigac yogo yengele  
momoc milocgugabac. <sup>21</sup> Mamac, ga nale kwelewa gagic. Aime nani gale kwelewa  
gagabac, silicine ingucnehac yenge sasawa moniyang ainingte ailu nokilec kwelewa  
ganingte yengele milocgugabac. Ilec ailu gagi salecnuing, yogo ngic-ngigac hi-  
mongtowa yagowacni yengi ngagesingkeningte ailu milocgugabac. <sup>22</sup> Nokilec  
moniyang gagabelec, silicine ingucnehac yenge moniyang ganingte ailu gagi wac  
feicne neleing, yogo biyachac yeleiba. <sup>23</sup> Yenge moniyangbenang ganingte nani  
yengele kwelewa gabe, gagi nale kwelewa gadamecte. Inguc fikeme himongtowa  
yagolec ngic-ngigac yenge gagi na salecnuing waiba, yogo ngage-motodaingte. Aime  
ga kwelegonedi nale angac ngagelu ainelegic, silicine ingucnehac kwelegonedi  
yengele angac ngagelu aiyelegic, yogo ngage-motodaingte.

<sup>24</sup> “Mamac, himong nga sawa mi fikeebocka, ga nale biyachac angacguwec, aime  
wac feicne neleing. Aime ngic-ngigacfocne nale molewa locebaing, yenge nale  
wac feicne yogo nganingte na gadacte, iwahac nonge momoc ganangte ainel-  
egac. <sup>25</sup> Aibaba dondonnele Mamac, himongtowa yagolec ngic-ngigac yenge ga  
mi ngagecgubong, nani ga biyachac ngagecguiba. Aime gagi na salecnuing waiba,  
nale ngic-ngigacfocne yenge yogo ngagegaing. <sup>26</sup> Gagi kwelegonedi nale angac  
ngagelu aineleing. Kwele-angac yogodi yengele kwelewa fanale ailu na yengele  
kwelewa ganogale, nani gale wac biyachac mibe yegengkeme ngageibong. Ailu  
mibe yegengkeme ngagedaingte.”

## 18

*Yesu baibong*

*Mat 26:47-56; Mrk 14:43-50; Luk 22:47-53*

<sup>1</sup> Milockeme motome, Yesu ye mic-tengtengfocine yengeholec hikelu Kidrong misa  
falockelu nebocina edi-haic yufu-bole monic fawec, iwa feibong.

<sup>2</sup> Aime Yesu ye mic-tengtengfocine yengeholec dameng bocyac yufu-bole iwa kpatulelu  
gaibong. Ilec Yudas, Yesu mudockeme badaingte, ye inguchac yufu-bole yogo ngagegac.

<sup>3</sup> Ye inguc ngagelu depec-baba ngic micne nga Farisaio yengele lebe-ngic, ailu Roma  
yengele hudu-baba ngic bacebame kwesiibong. Yenge hifa nga angoc ailu hudule wiyac  
gocne momoc balu kwesiibong.

<sup>4</sup> Aime Yesu ye pasi fikecnodaicte, yogo biyac ngageyackewecte ailu, yengele emewa lelu  
yanguc uwayelewec, “**Ngenge ma basackegaing?**”

<sup>5</sup> Uwayeleme yengi yanguc miibong, “Yesu Nasaret-hocni, ye basackegabeleng.”

Inguc miibong Yesudi yanguc miwec, “**Yogo na hocne, na gagabachac.**”<sup>\*</sup> Aime Yudas  
ye Yesu mudockenale, yengele hewacka domawec. <sup>6</sup> Aime Yesudi miwec, “**Yogo na hocne,  
na gagabachac,**” dameng iwahac yenge lobe-lobe lelu himongka waweibong.

<sup>7</sup> Welu fabong hatacmac uwayelewec, “**Ngenge ma basackegaing?**”

Mime miibong, “Yesu Nasaret-hocni.”

<sup>8</sup> Inguc miibong Yesudi bafaliyelu yanguc edocebawec, “**Na biyac edocngebagabac,  
yogo na hocne, na gagabachac. Ngenge na basacnugaingka, mic-tengteng yago**

<sup>17:12:</sup> Yoa 6:39; 13:18    <sup>17:15:</sup> Mat 6:13; 2Tim 3:3    <sup>17:18:</sup> Yoa 20:21    <sup>17:22:</sup> Sale 4:32    <sup>\*</sup> <sup>18:5:</sup> Wahikeicne  
3:14 iwa Wapongti Mosesholec mingagec ailu yeicne wacine wackelu “na gagabachac” miwec.

**yenge nalic hegilecebabong hikedaing.”** <sup>9</sup> Aime Yesudi yowa monic biyachac yanguc miwec,

**“Ga ngic nale molewa locebaing, yengelacni monic mi hegilebe sangkewec.”** (Yoa 6:39)

Yogo sasawa noine ainale inguc miwec.

<sup>10</sup> Aime Saimon Pita ye hudule fitec monic macineholec balu gawec, yogo fuluckelu fitec yogodi kwelec kwekwe ngic monic welu hedecine foleinapec wekwackeme wawec. Ngic yogo ye depec-baba ngic yengele damong sugucne, yele kwelec kwekwe ngic, wacine Malakus.

<sup>11</sup> Wekwackeme Yesudi Pita yanguc edowec, **“Ga hudu-babale fitecgone macina loengka hauna. Mamacti doicte aibaba nale milu alingkewec, yogo nelewec, yogo ngageng nalic hegiledacte, me? Miyac, yogo balaibedacte.”**

*Yesu Annasla bahikeibong*

<sup>12</sup> Aime Roma yengele hudu-baba ngic nga yengele damong sugucne, ailu Yuda ngic micne yengele lebe-ngic yenge Yesu balu moleine hefeibong. <sup>13</sup> Hefelu molickelu Annasla balu hikeibong. Aime Annas ye Kaifas kwegaine ye hifa-dameng iwa depec-baba ngic yengele damong sugucne gawec. <sup>14</sup> Aime “ngic moniyangti ngic-ngigac yengele ailu homamebac yenge gadaingte, yogodi madickedaicte,” yogo Kaifasdi Yuda ngic biyachac milu edocebame ngagebong fawec.

*Yesu bisockewec*

*Mat 26:69-70; Mrk 14:66-68; Luk 22:55-57*

<sup>15</sup> Yenge Yesu balu hikeibong, Saimon Pita nga mic-tengteng agoine monic, yeke Yesu balaibelu hikeiboc. Hikelu depec-baba ngic yengele damong sugucne, yele macka sulumeboc. Aime mic-tengteng agoine nga depec-baba ngic yengele damong sugucne yeke ngagenagugaicte, ye Yesu balaibelu oda kwelina fewec. <sup>16</sup> Feme Pita ye oda nuinele lobina domawec. Domame mic-tengteng agoine nga depec-baba ngic yengele damong sugucne yeke ngagenagugaicte ailu, yedi walu ngigac nule damong domawec, ye edolu Pita mengockeme oda kwelina feiboc.

<sup>17</sup> Feboc kwelec kwekwe ngigac nu damong domawec, yedi Pita nganilu yanguc uwacnowec, “Ga inguchac ngic bawelegabiyeng, yele mic-tengteng, me?”

Mime Pitadi miwec, “Na miyac.”

<sup>18</sup> Aime mac tiloine aiwecte kwelec kwekwe ngic nga lebe-ngic yenge kwesilu dac kpaduckelu fitobong ubilangkewec. Ubilangkeme socngineng babong dacine aime domai-bong. Domaebongka Pita ye inguchac socine bame dacine ainale welelu hewacnginang domawec.

*Yesu yeicne funginele uwacnowec*

*Mat 26:59-66; Mrk 14:55-64; Luk 22:66-71*

<sup>19</sup> Aime depec-baba ngic yengele damong sugucnedi Yesu mic-tengtengfocine yengele nga yeicne wewedu boleinele mi-uwac aicnowec.

<sup>20</sup> Inguc uwacnome Yesudi bafaliyelu yanguc edowec, **“Na damengsoc himongtowa yagolec ngic-ngigac yowane edocebalu gacaigabac. Galu kpakpaduc macnginang nga Ibu-macnginang milu gaiba. Aime Yuda ngic-ngigac sasawa kpaduckecaigaing, mac iwa yowa sangke-sangke monic mi milu gaiba.”** <sup>21</sup> **Aime ga omale na uwanelegic? Ngic-ngigac yowa mibe ngageibong, yenge uwayelenong. Na yowa miiba, yogo yengi ngagegaing.”**

<sup>22</sup> Inguc mime lebe-ngic yengelacni monicti yele emewa domawec, yedi Yesu wepatangkelu yanguc edowec, “Ga omale depec-baba ngic yengele damong sugucnele yowa ameine alang mi bacnolu inguc bafaliyecnogic?”

<sup>23</sup> Inguc mime Yesudi bafaliyelu yanguc edowec, **“Na yowa sowacne monic miga-backa, yogo mifickeengka yegengkana, me noine migabacka omale wecnugic?”**

<sup>24</sup> Inguc mime Annasdi† Yesu muciti hefeicne mucineholec saleme depec-baba ngic yengele damong sugucne Kaifas, yela balu hikeibong.

*Yesu hatacmac bisockewec*

*Mat 26:71-75; Mrk 14:69-72; Luk 22:58-62*

---

**18:9:** Yoa 17:12    **18:11:** Mat 26:39    **18:14:** Yoa 11:49-51    † **18:24:** Depec-baba ngic yengele damong sugucne moniyang sugu gacaigac. Molickelu Annas ye depec-baba ngic yengele damong sugucne gawec. Galu ye bole yogo hegilewec. Hegileme Kaifas yedi bole yogo bawec. Aime sifu dameng gocna yenge Annas damong sugucne wackelu gaibong. Ilec 15 yogowacni 23 iwa Annas ye depec-baba ngic yengele damong sugucne wackelu gaibong.



<sup>25</sup> Aime Saimon Pita ye dacka socine bame dadaweme domaemewa, yengi nganilu uwacnoibong, “Ga mic-tengtengfocine yengele alingkacni monic ga, me?”

Inguc mibong, yedi bisockelu yanguc miwec, “Na miyac.”

<sup>26</sup> Inguc mime depec-baba ngic yengele damong sugucnele kwelec kwekwe ngic monic, ye Pitadi hedecine wekwackewec, yele alingkacni ngic monic yedi miwec, “Ga yufu-bolewa yeholec gaengka na nganicugabac, me?”

<sup>27</sup> Inguc mime Pita ye hatacmac bisockeme, iwahac kokolec ngicne hiyawec.

*Pailatle haicka domawec*

*Mat 27:1-2,11-31; Mrk 15:1-20; Luk 23:1-5,13-25*

<sup>28</sup> Mac saeme ubiyacte, yenge Yesu Kaifasle mackacni bahikelu gawana nga hudu-baba ngic yengele macte oda kwelina gacaigaing, iwa bahikeibong. Aime depec-baba ngic yenge Wapongte haicka wonongnengkolec ailu Ewalicebaicnele hombangte lama madecine mi nodaingkale, milubac yenge oda kwelina mi feibong. <sup>29</sup> Inguc aibong gawana Pailat ye oda lobina walu yanguc uwayelewec, “Ngenge ngic yago fungine omale yowawa logaing?”

<sup>30</sup> Inguc mime yengi ameine bafaliyelu yanguc edoibong, “Ye aibaba sowacne mi aidecka midec, nonge ye gala nalic mi balu kwesidabeng.”

<sup>31</sup> Inguc mibong Pailatdi yanguc edocebawec, “Inguc aime ngenge bahikelu ngengileng yefe-yowangineng balaibelu aibabaine wosaelu mimoctoning.”

Inguc mime Yuda ngic yengi yanguc miibong, “Nonge ngic monic webeng homadaicte yogolec Roma gamangti kpatalanoleme gagabeleng.” <sup>32</sup> Yesu ye esecne yecne yefe wenuc ailu homanale miwec, yogo sasawa noine ainale aibaba yogo fikewec.‡

<sup>33</sup> Aime Pailat ye oda kwelina hatacmac felu Yesu wackelu yanguc uwacnowec, “Ga Yuda ngic-ngigac yengele ngictau, me?”

<sup>34</sup> Inguc mime Yesudi ameine bafaliyelu yanguc edowec, “**Ga yowa yogo gageuc migic, me gocne yengi nale fungine edocubiyengte migic?**”

<sup>35</sup> Inguc mime Pailatdi ameine yanguc edowec, “Na Yuda ngic, me? Yogo miyac. Gage-icne ngic-ngigacfogone ailu depec-baba ngic micne yengi ga nale molewa locgugabiyeng. Aime ga oma wiyac aimec?”

<sup>36</sup> Inguc mime Yesudi ameine bafaliyelu yanguc miwec, “**Nale ngani-damong yogo himongtowa yagowacni miyac. Yogo yagowacni aidecka midec, na Yuda ngic yengele molewa nalic mi locnudabong. Aime mic-tengteng yengi nale ailu yengeholec wenagudabong. Ilec nale ngani-damong yogo himongtowa yagowacni miyac.**”

<sup>37</sup> Inguc mime Pailatdi miwec, “Foinac, ga ngictau monic, me?”

Inguc mime Yesudi ameine bafaliyelu yanguc miwec, “**Gagi nale ngictau monic migic. Oc, na fikelu yowa noinele bole balu yogolec mibasanang aieyelu mibe yegengkenale himongtowa yagowa waiba. Aime ngic-ngigac monic ye yowa noine balaibelu gagac, yedi nale yowa ngagedaicte.**”

<sup>38</sup> Inguc mime Pailatdi miwec, “Aime yowa noine weni yogodi aigac?” Inguc milu hatacmac Yuda ngic yengela hefaliye haulu yanguc edocebawec, “Na yele sowacne monic mi bafuwagabac. <sup>39</sup> Na ngic moniyang Ewalicebaicnele hombangte muc-mackacni baickebe wacaigac, ngengele aibaba yogo fagacte ngic yago Yuda ngic-ngigac ngengele ngictau lukengelebele ngagegaing, me?”

<sup>40</sup> Inguc mime yengi hatacmac dacineholec aukwelu yanguc miibong, “Ngic ye miyac, Barabasbac loengka wana.” Nga Barabas yebac kindololo ngic.

## 19

*Yesu malicponga weningte mimoctowec*

<sup>1</sup> Aime Pailatdi mime hudu-baba ngic yengi muc-hududi Yesu welu socine weloc-kwaloc weibong. <sup>2</sup> Welu ngictaule duu ingucne muc-somang monic patiyelu hingoc ingucne hodocina holecnobong hauwec. Ailu yenge ngictaule ngakpi dalicne ingucne mondo-sasac holecnobong hauwec. <sup>3</sup> Inguc ngagelu emeina welelu midelec aicnolu yanguc milu gaibong, “Ohec, Yuda ngic-ngigac yengele ngictau.” Inguc milu wepatangkelu gaibong.

<sup>4</sup> Aime Pailat ye hatacmac lobina walu yanguc miwec, “Ngagegaing, na ngic yele sowacne monic mi bafuwagabacte ailu, mengockelu wagabac.” <sup>5</sup> Inguc mime Yesu ye ngakpiine mondo-sasac ailu duuine somangineholec yogo socina holelu walu domame, Pailatdi yanguc miwec, “Ngenge ngic yago nganing.”

18:27: Yoa 13:38      18:31: Yoa 19:6-7      ‡ 18:32: Yuda ngic yenge ngic sowacne wehomanogale posadi holecbabong homalu gaibong. Aime Roma ngic yenge ngic sowacne wehomanogale malicponga wecebabong homalu gaibong.      18:32: Yoa 3:14; 12:33      18:35: Yoa 1:11      19:2: Luk 23:11

<sup>6</sup>Inguc mime depec-baba ngic micne nga lebe-ngic yengi ye nganilu yanguc wackeibong, "Malicpongka weng homana! Malicpongka weng homana!"

Inguc mibong Pailatdi yanguc miwec, "Na yele sowacne monic mi bafuwagabacte ailu, ngengung mengocke hikelu malicpongka webong homana."

<sup>7</sup>Inguc mime Yuda ngic yengi ameine bafaliyelu yanguc miibong, "Ye yeicne socine bafelu na Wapongte Madec miwec. Ilec ailu nonge yefe-yowanonggeng fagac, yogo balaibelu ye homanale migabeleng."

<sup>8</sup>Inguc mibong Pailat ye yowa yogo ngagelu esecne hangockewec, yogo ewalilu hangockebenangkewec. <sup>9</sup>Hangockeme ye oda kwelina hatacmac felu Yesu uwacnowec, "Ga wenuwacnibenang?" Inguc mime Yesu ye ameine monic mi bafaliyelu edowec. <sup>10</sup>Inguc aime Pailatdi hatacmac uwacnowec, "Ga omale nale yowa ameine mi bafaliyegic? Na nalic mimoctobe hikedamecte. Ailu nalic malicpongka wecgudacte, yogolec bole-yowa nga tapili nala fagac. Ga yogo mi ngagegic, me?"

<sup>11</sup>Inguc mime Yesudi ameine bafaliyelu yanguc edowec, "**Ga tapili yogo wilengkacni mi geledecka, ga nale tapili nalic mi bawadeng. Ilec yanguc aigac, na gale molewa locnugac, \* yele bikicte amedi gale bikicte ame ewaligac.**"

<sup>12</sup>Inguc mime Pailat ye iwahac Yesu wenuc lome hikenale ngagesime Yuda ngic yengi wackeibong, "Ga ngic yogo hegileng hikedaiactewa, Sisale ago mi gadamecte. Monic ye yeicne wac bafelu yanguc midaicte, 'Na ngictau,' ye Sisale ngaba."

<sup>13</sup>Inguc mibong Pailat ye yowa yogo ngagelu Yesu wenuc hegileme hikenale yefe basackewec. Basackelu Yesu mengockeme mac lobina walu mac monic wacine Posadakec, iwa mimocto-mimoctole mac ngiye-ngiye yogo Posadakec feina fawec, iwa felu ngiyewec. Mac yogo, Hibru yowawa wacine Gabata.

<sup>14</sup>Aime Ewalicebaicnele hombang damengte efec-tafec ailu nosing kpakpaducte dameng aiwec. Aime 12 kilok bangkaleme, Pailatdi Yuda ngic-ngigac yanguc edocebawec, "Ngenge ngictaungineng nganining."

<sup>15</sup>Inguc mime yengi aukwelu yanguc wackeibong, "Baickenong, baickelu malicpongka weng homana!"

Inguc wackebong yanguc edocebawec, "Na ngictaungineng malicpongka webe homanale ngagegaing, me?"

Inguc mime depec-baba ngic micne yengi bafaliyelu yanguc miibong, "Nongele ngictau monic mi gagac, Sisadi sugu gagac."

*Yesu malicpongka weibong*

*Mat 27:32-44; Mrk 15:21-32; Luk 23:26-43*

<sup>16</sup>Inguc mibong Pailatdi malicpongka weningte yengele molewa lolu hegileyeleme, Roma yengele hudu-baba ngic yengi baibong. <sup>17</sup>Babong Yesu yeuctihac malicpongngine tengkeme himong bulilicne monic, wacine Hodoc-luwe wackeicne, nga Hibru yowawa Goligata, iwa balu hikeibong. <sup>18</sup>Yogowa hikelu Yesu malicpongka weibong. Aime yeholec ngic yaeckang neboc nga neboc wecepabong domaiboc. Aime Yesudi hewacnginac domawec, inguc wecebaibong.

<sup>19</sup>Aime Pailat ye sowacneine yanguc kwelengkelu malicpongka lome domawec, "Yesu Nasaret-hocni, ye Yuda ngic-ngigac yengele ngictau." <sup>20</sup>Aime Yesu malicpongka weibong, himong-hakic yogo taon emeina fawecte ailu, Yuda ngic-ngigac bocyacti kweleng yogo wafeibong. Kweleng yogo Hibru yowawa nga Latin yowawa, ailu Grik yowawa kwelengkeicne domawec. <sup>21</sup>Inguc kwelengkeicne domame Yuda ngic-ngigac yengele depec-baba ngic micnefocngineng yengi Pailat yanguc edoibong, "Ye Yuda ngic-ngigac yengele ngictau', inguc mi kwelengkec. 'Ngic yago yeuctihac miwec, na Yuda ngic-ngigac yengele ngictau,' ga inguc kwelengkenong."

<sup>22</sup>Inguc mibong Pailatdi yanguc miwec, "Yowa biyac kwelengkegabac, yogo andoine."

<sup>23</sup>Aime hudu-baba ngic yengi Yesu malicpongka webong domame, ngakpi-kpolucine botoc babong habu 4 aime, sasawadi baibong. Aime ngakpi daleine monic yogo susucine mi gbodoicne, <sup>24</sup>yenge yogo nganilu mingagac ailu yanguc miibong, "Nongileng yago mi basulackenang. Ngakpi yago madi badaicte, yogolec loling monic ainang."

Wapongte hibiwa yowa yanguc kwelengkeicne fagac, "Yenge ngakpi-kpoluc botoc balu ngakpi dalene banogale loling monic aiibong." (*Mige 22:18*)

Yogo sasawa noine fikenale hudu-baba ngic yenge inguc aiibong.

**19:9:** Mat 27:12 \* **19:11:** Gocne yenge yanguc ngagegaing, yogo Kaifasle migac. Nga gocne yengi yanguc ngagegaing, yogo Yuda ngic-ngigac yengele migac. **19:11:** Yoa 10:18; Sale 2:23; Rom 13:1 **19:12:** Luk 23:2; Sale 17:7

<sup>25</sup> Aimebac Yesu nenggackecine, nga Kolopas ngigacine Maria, wacine monic Magadalen, yenge Yesule malicpong emeina lelu domaibong. <sup>26</sup> Domaebongka Yesudi mic-tengteng angac ngagecnolu gawec, ye nganime nenggacineholec domame, nenggacine yanguc edowec, “**Ngigac, yogo gale madec aidaic.**” <sup>27</sup> Inguc milu mic-tengteng yogo inguchac yanguc milu edowec, “**Nganic, yogo gale nenggac aidaic.**” Inguc mime dameng iwahac mic-tengteng ye Yesu nenggacine damongkelu macina gawec.

*Yesu homawec*

*Mat 27:45-56; Mrk 15:33-41; Luk 23:44-49*

<sup>28</sup> Inguc milu Yesu ye ngagelu boleine bamoctowec. Inguc ngageme yowa Wapongte hibiwa kwelengkeicne fagac, yogo sasawa noine fikenale yanguc miwec, “**Na misale ainelegac.**” <sup>29</sup> Inguc mime misa bokong monic waing hobecineholecti wakeicne domawec, yenge yogo balu spans monic balu waingka kpomuluckelu hisop yoc mangngina hefelu lobong Yesule micka fewec. <sup>30</sup> Feme Yesu ye waing yogo nolu yanguc miwec, “**Na bolene biyac bamoctogabac.**” Inguc milu ubeine patickeme asuine hegileme ofelu hikeme homawec.

<sup>31</sup> Hadeng yogowa Ewalicebaicnele hombangte efec-tafec dameng aiwec. Aime Yuda ngic-ngigac yenge ngic malicpongka wecebaibong, yengele kponggbong yogo Sabat damangka malicpongka mi domaningte ngageibong. (Sabat dameng yogo hombang sugucnebanang.) Ilec ailu hudu-bakong ngic yenge malicpongka ngic higengineng welockelu bamoctoceanogale Pailat uwacnoibong. <sup>32</sup> Uwacnobong hudu-baba ngic yengi kwesilu ngic Yesuholec malicpongka wecepaibong, molickelu monicte hige weduibong, ailu monicte inguchac weduibong. <sup>33</sup> Weducepalubac Yesula lelu nganibong, ye biyac homawec, inguc aime higeine mi weduibong. <sup>34</sup> Aime hudu-baba ngic monictibac sangal-adi Yesule magocka kweme sac nga misadi inguc yefe waiboc. <sup>35</sup> Ngenge inguchac aibaba fikewec, yogo ngagesingkeningte ailu na dongenedi nganiiba ailu yogo milu kwelengkebe yegengkegac. Ailu na wiyac mibe yegengkegac, yogodi noine aigac, yogo ngagegabac.

<sup>36</sup> “Yenge luweine monic mi wedudaingte.” (Wah 12:46; Him 9:12; Mige 34:20)

Yowa yogodi Wapongte hibiwa yowa kwelengkeicne fagac, yogo sasawa noine ainale inguc fikewec.

<sup>37</sup> Wapongte hibiwa yowa monic yanguc fagac, “Ngic kwembalackeibong, yengi dongenginengti nganidaingte.” (Sek 12:10)

*Yesu longkeibong*

*Mat 27:57-61; Mrk 15:42-47; Luk 23:50-56*

<sup>38</sup> Yogo motome ngic monic wacine Yosefe, Arimateahocni, yedi Pailatla hikelu Yesule kponggbong malicpongkacni bamoctonogale uwacnowec. Uwacnome Pailatdi mimoc-tome, Yosefe ye hikelu Yesule kponggbong bamoctowec. Ye Yesule mic-tengteng gawec. Ailu ye Yuda ngic-ngigac micnefocngineng yengele hangockeme yegena mi fikelu gawec. <sup>39</sup> Nga Nikodemus, ye esecne debocka Yesuholec mingagec aiboc, yedi tokic hoine madicne wacine mira nga heloc gocne wacngineng aloi, yogodi lalickeicne, yengele umacine 30 kilo-lesoc, yogo balu kwesiwec. <sup>40</sup> Yeke yogo bakwesilu Yuda ngic-ngigac yengele kponggbong longke-longke aibaba yogo balaibelu Yesule kponggbong balu kpoluc madicnebanangti heloc hoine madicne yogoholec wabungkeiboc. <sup>41</sup> Aime yeke Yesu malicpongka weibong, mac yogolec emeina bole monic fawec, bole yogolec kwelina henebe monic gbolicne ngicti baicne domawec. Aime esecne ngic monic iwa mi loicne, iwa loiboc. <sup>42</sup> Yuda ngic-ngigac yenge dameng iwa hombangte efec-tafec aibong. Aime dongesi yogo eme-eme fawecte, yeke Yesule kponggbong iwa loiboc.

## 20

*Yesu homackacni gboliyelu fangkewec*

*Mat 28:1-8; Mrk 16:1-8; Luk 24:1-12*

<sup>1</sup> Sonda ubiyactebenang kundung-kundung fame Maria, wacine monic Magadalen, yedi dongesiwa hikelu nganime dongesi nuinele posatowa, yogo baickeicne domawec. <sup>2</sup> Inguc nganilu hatacmac hefaliye hikewec. Hikelu Saimon Pita nga mic-tengteng monic, Yesudi yele kweleinedi angackelu gawec, yeke yanguc edocepawec, “Yenge Sugucne dongesiwacni baickelu wenuwa logabiyeng, yogo mi ngagegabeleng.”

<sup>3</sup> Inguc mime Pita nga mic-tengteng agoine yeke momochac dongesiwa hikenogale gasacke hikelu, <sup>4</sup> yefewa mic-tengteng agoinedi dacineholec gasackelu Pita ewalilu yedi dongesiwa biyac hike sulumewec. <sup>5</sup> Hikelu fakanelu nganime, kpoluc madicnebanang

wabungkeibong, yogodi sugu ngiyewec. Ailubac ye kwelina mi fewec. <sup>6</sup> Saimon Pita ye lobe hikelu dongesi kwelina felu nganime, kpoluc yogo ngiyewec. <sup>7</sup> Kpoluc susucine hodocina nga haic-mesuina wabungkeibong, yogo yeicnac ngiyewec. Nga kpoluc tofaine wedulu loicne yogoholec mi ngiyeme nganiwec. <sup>8</sup> Inguc nganilu domame mic-tengteng agoine molickelu dongesiwa hikewec, ye inguchac dongesi kwelina felu nganime Yesu homackacni gboliyelu fangkeme ngagesingkwec. <sup>9</sup> Aime Yesu homackacni gboliyelu fangkedaic, yogolec Wapongte hibiwa kwelengkeicne fagac, yeke yogo molickelu mi ngage-motoiboc, <sup>10</sup> ailu hefaliyelu macnginac hikeiboc.

*Maria Magadala iwacni yedi Yesu nganiwec*

*Mat 28:9-10; Mrk 16:9-11*

<sup>11</sup> Aime Maria ye dongesi lobina domalu hiyawec. Hiyalu fakanelu dongesi kwelina donge hilame feme nganiwec. <sup>12</sup> Nganime angelo yaeckang yeke ngakpinginec dalic-nedi kwalac-kwalac nganicepawec. Nganicepame Yesule kponggbong fawecka, monicti hodocinapec, nga monicti higeinapec, inguc ngiyeiboc.

<sup>13</sup> Ngiyelu yanguc uwacnoiboc, “Ngigac, ga omale hiyagic?”

Inguc uwacnoboc Mariadi ameine bafaliyelu yanguc miwec, “Yenge nale Sugucnele kponggbong baickelu wenuwa lobiyengte basackelu hiyagabac.” <sup>14</sup> Inguc milu hefaliye nganime Yesu ye lobeina domawec. Domame Yesudi domagac, yogo mi ngage-motowec.

<sup>15</sup> Aime Yesudi yanguc uwacnowec, “**Ngigac, ga ma basackelu hiyagic?**”

Mime ye yanguc ngagewec, “Bole fileinedi uwanelegac.” Inguc ngagelu yanguc miwec, “Sugucnene, gagi Yesule kponggbong baickelu monicka lomeckabac, edocnung hikelu babe.”

<sup>16</sup> Inguc mime Yesudi yanguc miwec, “**Maria.**”

Inguc mime hefaliyelu “Rabonai” milu bawec. (Hibru yowawa Rabonai, yogolec fungine wewedu.)

<sup>17</sup> Aime Yesudi yanguc edowec, “**Mamacnela biyac mi fegabacka, ga mi bacnunong. Ga hikelu gbafocne yanguc edocebanong, ‘Nale Mamac nga ngengele Mamac, ye nale Wapong nga ngengele Wapong, yela hocne fedacte.’**”

<sup>18</sup> Inguc mime Maria, wacine monic Magadalen, ye mic-tengteng yengela hikelu yanguc miwec, “Na Sugucne nganigabac!” Inguc milu Yesudi yowa edome ngagewec, yogo edocebawec.

*Mic-tengtengfocine fikeylewec*

*Mat 28:16-20; Mrk 16:14-18; Luk 24:36-49*

<sup>19</sup> Hadeng yogo Sonda, aime hadeng yogowa mac biyac debolewec. Deboleme Yesu mic-tengtengfocine yenge Yuda ngic-ngigac micnefocngineng yengele hangocebame macngineng nu sanangne holelu ngiyeibong. Ngiyeibongka Yesu ye kwesilu hewacnginang domalu yanguc edocebawec, “**Kwele-mogung ngengela fana.**” <sup>20</sup> Ye inguc milu moleine nga magocine edalicebawec. Edalicebame mic-tengtengfocine yenge Sugucne nganilu beliyeibong. <sup>21</sup> Aime Yesudi hatacmac yanguc edocebawec, “**Kwele-mogung ngengela fana. Mamacnedi salecnum kwesilu gagabac. Aime nani ingucnehac ngenge salecngabagabac.**” <sup>22</sup> Ye inguc milu mic asuine fitoyelelu yanguc miwec, “**Ngenge Tili Asu kweledi baning.**” <sup>23</sup> **Ngenge ngic yengele bikic hegilebong yengele bikic miyac aidaicte. Nga ngenge bikicngineng mi hegiledaingtewa, yengele bikic fadaictehac.**”

*Kwele-yaec mi ainoga*

<sup>24</sup> Mic-tengtengfocine 12 yengele hewackacni monic wacine Tomas, wacine monic Didimus wackeibong, ye Yesudi mic-tengtengfocine fikeylewec, dameng iwa ye mi ngiyewec. <sup>25</sup> Ilec mic-tengteng agofocine yengi yanguc edoibong, “Nonge Sugucne nganigabeleng.”

Mibong Tomasdi yanguc miwec, “Na dongenedi biling maaine weibong, yogo mi nganibac. Ailu gbongnedi biling yefine yeke molewa ngiyegac, iwa mi lobac. Ailu magocina molenedi mi lobe feyec. Na inguc mi aigabacka, yogo mi ngagesingkedacte.”

<sup>26</sup> Inguc mime hadeng 8 motome, Yesu mic-tengtengfocine nga agongineng Tomas yenge momoc hatacmac felu ngiyeibong. Yenge nungineng sanangne holelu ngiyeibongka, Yesu ye hatacmac fikelu hewacnginang domalu yanguc miwec, “**Kwele-mogung ngengela fana.**” <sup>27</sup> Inguc milu Tomasle yanguc miwec, “**Tomas, gbonggone sungkeng molene yefina fena, aime dongegonedni nganic. Ailu molegone sungkeng magocna fena, kwele-yaec hegilelu ngagesingkenong.**”

<sup>28</sup> Inguc mime Tomasdi miwec, “Ga Sugucnene ailu Wapongne.”

<sup>29</sup> Inguc mime Yesudi yanguc edowec, “**Ga dongedi nganicnulu ngagesingkegic. Aime monic ye dongedi mi nganilu ngagesingkedaicte, ye kwele-angackolec.**”

<sup>30</sup> Yesudi mic-tengtengfocine yengele haicka pasile maaine bocyac bawec, aime yogo sasawa hibi yagowa mi kwelengkegabac. <sup>31</sup> Aime Yesu ye Mesia, ailu ye Wapongte Madec, ngenge yogo ngagesingkelu yele wacka gaga baningte hibi yago kwelengkeicne fagac.

## 21

### *Misa-sic bocyac*

<sup>1</sup> Yogolec lobeina Yesu ye Galili lifucka\* mic-tengtengfocine hatacmac fikeyeledaicte. Yogowa yanguc fikewec, <sup>2</sup> Saimon Pita ailu Tomas, wacine monic Didimus wackelu gaibong. Ailu Natanael, ye Kana taonkacni, taon yogo Galili prowinswa fawec. Ailu Sebedi madeckecine, ailu Yesule mic-tengtengfocine 12 yengelacni ngic yaeckang, yenge momoc ngiyeibong. <sup>3</sup> Ngiyelu Saimon Pitadi agofocine yanguc edocebawec, “Na misawa sicte hikenogale ngagegabac.”

Inguc edocebame yengi yanguc miibong, “Nonge gaholec momoc hikedabelengte.” Inguc milu yenge momoc gombawa felu hikelu gaibong. Ailu deboc iwa sic monic mi baibong.

<sup>4</sup> Moc gabong mac saewec, aime Yesu ye lifuc mecina domawec. Domame yenge Yesudi domawec, yogo mi ngani-motoibong.

<sup>5</sup> Aime Yesudi yanguc uwayelewec, “**Agofocne, ngenge sic monic bagabiyeng, me miyac?**”

Mime yengi “miyac” miibong.

<sup>6</sup> Inguc mibong yedi yanguc edocebawec, “**Ngenge uficngineng gomba folewapec wickebong haume sic gocne badaingte.**” Inguc mime yenge ye miwec, yogo balaibelu uficngineng wickebong haume misa-sic bocyacbenangti uficka haubong, fuluckenogale aibibiyelu ufickolec hegileibong.

<sup>7</sup> Aime mic-tengteng Yesudi yele kweleinedi angackelu gawec, yedi Pita yanguc edowec, “Yogo Sugucnedi hocne.”

Inguc mime Saimon Pita ye yogo ngagelu soc sugu domawecte ngakpiine holelu gombawacni wintackelu lifucka haulu molickelu dingongka fewec. <sup>8</sup> Feme mic-tengtengfocine gocne yenge lifucka dingong bangkacne, dalicne miyac, 100 mitalesoc gaibongte, yenge gombawa domalu uficngineng misa-sickolec fuluckela fuluckela dingongka feibong.

<sup>9</sup> Mecina felu nganibong bret gocne ailu misa-sic dacka faibong. <sup>10</sup> Aime Yesudi yanguc miwec, “**Ngenge misa-sic gocne yakumac bagabiyeng, yogo bawelening.**”

<sup>11</sup> Aime Saimon Pita ye yeinac gombawa felu ufic fuluckeme mecina fewec. Uficka misa-sic sugucne sugucnedi wakelu faibong, dzalengineng 153 yogolecsoc aiwec. Ailu sifu ufic mi lokewec. <sup>12</sup> Aime Yesudi yanguc edocebawec, “**Ngenge welelu banoning.**” Inguc mime mic-tengtengfocine yenge hangocebame yengelacni monicti “Ga ma” milu mi uwacnoibong. Yogo Sugucnedi hocne, yenge inguc biyac ngageibong. <sup>13</sup> Aime Yesu ye dac emeina welelu bret balu yelewec. Ailu misa-sic inguchac balu yelewec. <sup>14</sup> Yesu ye homackacni gboliyelu fangkewec, dameng iwa mic-tengtengfocine fikeyeleme, alecine habackang aiwec.

### *Yesudi Pita basanangkewec*

<sup>15</sup> Aime nosing nobong motome, Yesudi Saimon Pita yanguc uwacnowec, “**Saimon Yoane madecine, ga nale kwelegonedi angac ngagegic, yogo alingfocgone yago yengele angac ewaligac, me?**”

Inguc mime Pitadi miwec, “Oc, Sugucne, na kwelenedi gale angac ngagegabac, yogo biyac ngagegic.”

Inguc mime Yesudi yanguc miwec, “**Ga nale lama madecne nosing gumecebadaamec.**”

<sup>16</sup> Milu Yesu ye hatacmac mime alecine yaeckang aiwec, “**Saimon, Yoane madecine, ga kwelegonedi nale angac ngagegic, me?**”

Mime Pitadi miwec, “Oc, Sugucne, na kwelenedi gale angac ngagegabac, yogo biyac ngagegic.”

Inguc mime Yesudi yanguc miwec, “**Ga lamafocne yengele damong gadamec.**”

<sup>17</sup> Milu Yesudi hatacmac uwacnowec alecine habackang aiwec, “**Saimon, Yoane madecine, ga kwelegonedi nale angac ngagegic, me?**”

20:29: 1Pi 1:8    20:31: Yoa 3:15; Rom 1:17; 1Yoa 5:13    \* 21:1: Grik yowawa Galili lifuc, yogolec wacine monic Tiberias kwelengkewec.    21:3: Luk 5:4-7    21:7: Yoa 13:23; Mat 14:29    21:11: Luk 5:6    21:14: Yoa 20:19,26  
21:16: Sale 20:28

Yesudi uwacnome alecine habackang aime, Pita ye ngageme umalemebac Yesu yanguc edowec, “Sugucne, ga wiyac sasawa ngageyackegic. Na kwelenedi gale angac ngagegabc, yogo biyac ngagegic.”

Inguc mime Yesudi yanguc edowec, **“Ga lamafozne bacebalu nosing gumecebadamec. <sup>18</sup> Foinac, ga soc-gholi galu geuctihac besac hefelu angacgone balaibelu hike-kwesic aicaigic. Aime ga hikecgu ngic sugucnebenang aidamecte, dameng iwa molegone bafangkeng, monicti hefegelelu mac mi hikenogale ngagegic, iwa bacgulu hike locgudaicte, yogo noinebenang edocgugabac.”** <sup>19</sup> Pita ye homacina silic wenuc homalu Wapong wacine bafedaicte, Yesudi yogolec ngagelu miwec. Ailu edolu miwec, **“Ga wele na balaibecnuc.”**

<sup>20</sup> Yesudi inguc mime, Pita ye hefaliyelu nganime, Yesudi mic-tengteng monicte kweleinedi angackelu gawec, yedi yeke balaibecepawec. Ngic balaibecepawec, yedi hocne molickelu nosing noibong, dameng iwa Yesule mondacka holelu madi mudockeme badaingte yogolec uwacnowec. <sup>21</sup> Aime Pitadi mic-tengteng yogo nganilu Yesu yanguc uwacnowec, “Sugucne, yela wenuc fikedaicte?”

<sup>22</sup> Inguc mime Yesudi yanguc edowec, **“Na angacnume ngama ye gaemewa hatacmac hefaliye kwesidacte, yogo gale wiyac miyac. Ga moc welelu balaibecnuc.”**

<sup>23</sup> Inguc mime ngic hae-gbafocine yengi ngagelu yanguc miibong, “Mic-tengteng yogo ye mi homadaicte.” Aime Yesu ye mi homanale ngagelu mi miwec, miyac. Ye yanguc sugu miwec, **“Na angacnume ngama ye gaemewa, hatacmac hefaliye kwesidacte, yogo gale wiyac miyac.”**

*Yowa moto-motoine*

<sup>24</sup> Yesudi mic-tengtenginele kweleinedi angackelu gawec, yogo na hocne. Na siduc yagolec mibasanang ailu mibe yegengkeme kwelengkeiba. Aime yowane yogo noine, yogo ngagegabeleng. <sup>25</sup> Yesu ye aibaba gocne bocyac aiwec. Aime ngagebe aibaba yogolec yowa sasawa hibiwa kwelengkedabongka, ibac himongtowa yagowa hibi yogo lolole sawaine monic mi fadec.

## Lukadi Salecebaicne Yengele Siduc Kwelengkewec

### *Mimi-yegeng yowa*

Luka ye Grik ngic monic, ye donginedi Yesu mi nganiwec. Ye salecebaicne uwayeleme Yesule siduc nga yengele bole weducnolu edoibong. Ailu ye salecebaicne yengeholec lolickelu gaibong. Ilec dameng gocna yengeholec gawecte ailu “nonge” kwelengkewec, yogo fengngineng 16-28 iwa fagac.

Molickelu Luka ye Yesule Siduc kwelengkewec. Yesu homalu homackacni gboliyelu fangkeme hifa 33 ngama ingucne motome, Lukadi hibi yago kwelengkewec. Hibi yagowa siduc yanguc kwelengkewec. Salecebaicne yenge bole balu lolickelu Yesule Siduc Madicne mibong yegengkewec. Ailu Yesule habu basuguleibong. Ailu Tili Asudi bole balu gawec. Luka ye siduc yogo kwelengkewec.

### *Yowa yago hibi nebocina fagac*

1:1–26 Yesule siduc mibong yegengkenale Yesudi mibasanang ayelewece

2:1–8:3 Yerusalem iwa Yesule habu Siduc Madicne edocebaibong

8:4–12:25 Yudeya nga Samaria iwa Yesule habu Siduc Madicne edocebaibong

13:1–21:16 Poldi lolickelu Siduc Madicne edocebawec

21:17–28:31 Pol balu muc-macka lobong ngiyeme Roma balu hikeibong

### *Yenge Tili Asu badaingte*

<sup>1</sup> O Tiofilus, na esecne yowa kwelengkegeleiba, yogo Yesudi fungkelu bole bawec ailu mic-yowaine wedunolewec. <sup>2</sup> Ye boleine bagacgu damengngine bangkale welewece. Dameng yogowa salecebaicne esecne bawosaecbawec, yenge Tili Asule tapiliwa bole-yowa edocebalu honocmengka\* fewec, yogolec siduc esecne hocne kwelengkegeleiba.

<sup>3</sup> Ye doic sugucne ngagelu homackacni hatacmac gboliye fangkewec. Fangkulu hadeng 40le kwelina yeuctihac fike-sang ayelelu pasi haicine monic-monic bawec. Balu Wapongte ngani-damongte fungine edocebalu weduyelelu gawec. Inguc ayeleme yenge pasi yogo nganilu ye foinac gagac, inguc ngage-motoibong. <sup>4</sup> Ailu yengeholec ngiye-fangkec ailu yowa sanangne yanguc edocebawec, **“Nenge Yerusalem biyac mi hegiledaing. Mamacne mimipang yowa edocngebabe ngageibong, yogolec noine fikenale wangec gadabiyeng. <sup>5</sup> I yangucte, Yoane ye misa lowayelewec. Nga ngengibac, dameng mi daliweme Wapongti Tili Asu lowangedaictē.”**

<sup>6</sup> Aime kpaduckelu ngiyeibong, yengi yanguc uwacnoibong, “Sugucne, ga yakumac dameng yagowahac Israel ngic-ngigac hatacmac kpaducnubang nongileng himongte ngictauholec ailu ganoga, me?”†

<sup>7</sup> Inguc mibong yanguc edocebawec, **“Mamac ye bole-yowa tapiliineholecti hifa nga wenac ailu dameng haicine monic-monic lowec fagac. Dameng yogo yeuc sugu ngagegac. Yogolec damengte ngage-ngage mi ngeleicne. <sup>8</sup> Ngagegaing, Tili Asudi ngengele kwelewa haulu tapili ngeleme nenge na widecnudaingte. Aime nenge Yerusalem yawa ailu Yudeya‡ nga Samaria prowins, ailu himong mendengine sasawa hikelu siducne milu gabong saweyackedaictē.”**

### *Yesu honocmengka fewec*

*Mrk 16:19-20; Luk 24:50-53*

<sup>9</sup> Yesu ye inguc edocebame Wapongti ye dongenginang balu fewec. Feme kaguwadi ye hedickeme mi nganibong fewec.

<sup>10</sup> Feme yenge basackelu sawawa nganilu domaibong. Hei, ngic yaeckang ngakpinginec kwalac-kwalachenangti biyac iwahac fikelu domaiboc. <sup>11</sup> Domalu yanguc edocebaiboc, “Galili prowinswacni ngic, nenge omale dongengineng sawawa hilalu domagaing? Wapongti Yesu bame nenge hegilecnglobalu honocmengka fegac. Ailu ye feme ngani-gaing, ye gagcu silicine ingucnehac hocne kwesidaictē.”

1:1: Luk 1:3 \* 1:2: Honocmeng yogo Wapongte mac. 1:2: Mrk 16:19; Luk 24:49-51 1:3: Luk 24:36-49; Sale 10:41 1:4: Luk 24:49; Yoa 14:16-17; Sale 2:33 1:5: Mat 3:11 1:6: Luk 24:21 † 1:6: Dameng iwa Israel ngic-ngigac yenge Roma yengele bagewa gaibong. Ngic-ngigac bocyac yenge Roma hegilecebalu yengilangkocni ngic monicti damongebanale ngagelu gaibong. Yenge yowa miibong, yogo Mesiadi bole yogo banale miibong. 1:7: Mrk 13:32 ‡ 1:8: Yerusalem taon yogo Yudeya himong kwelina ngiyegac. 1:8: Mat 28:19; Luk 24:48 1:11: Mat 26:64; Luk 21:27

*Ngic monic Yudasle ame bafuwaibong*

<sup>12</sup> Aime salecebaicne yenge Oliwa kupickacni hefaliye walu Yerusalem hikeibong. Yefe yogo ye 1 kilomita ngama ingucne. <sup>13</sup> Yerusalem hikelu mac kweline monic feina ngiye-fangkec ailu gaibong, iwa felu ngiyeibong. Ngiyeibong, yengele wac-aling yanguc:

Pita,  
Yoane,  
Yakobos,  
Endru,  
Filip,  
Tomas,  
Batolomeu,  
Mataio,  
Yakobo Alfaiusle madec,  
Saimon ye Selot wackeibong, nga  
Yudas Yakobole madec.

<sup>14</sup> Ngic yogo yenge hocne kwele-moniyang ailu mimiloc bole damengsoc balu gaibong. Inguc aiyeibongka Yesule nenggac Maria, nga ngigac Yesu balaibelu gaibong, ailu Yesu gbafofcine, yenge ngic yogo yengeholec momoc galu mimiloc bole balu gaibong.

<sup>15</sup> Hadeng gocna ngic hae-gbafofcine 120 ngama ingucnedi kpaduckelu ngiyeibongka, Pitadi hewacnginang domalu yanguc edocebawec, <sup>16</sup> "Ngic hae-gbafofcine, ngenge ngagen-ing. Yudasdi ngic mengocebame hikecgu Yesu baibong. Ngic yele hocne Tili Asudi biyachac Dawidile micka yowa lome Wapongte hibiwa kwelengkewec, yogo noine fikewec, yogolec inguc aiwec. <sup>17</sup> Yudas esecne salecebaicne nongileng aling ailu gawec, ye nongileng momoc Sugucnele bole banangte miwec." Pitadi inguc miwec.

<sup>18</sup> (Ngic yedi aibaba sowacnele moneng balu bole himong monic fuli bawec, iwa hikelu hehomame hodocti hau kweme gobeine fouckeme hahungngine himongka wayackewec. <sup>19</sup> Aime yogolec siduc Yerusalem ngic-ngigac sasawadi ngageibong, himong yogolec wacine yowanginang yefe Akeldama wackeibong, fungine yanguc, Himong sac wawecka.)§

<sup>20</sup> Aime Pitadi taockelu yanguc miwec, "Miti Geewa Yudasle yowa yanguc kwelengkeicne fagac,

'Ye mac-himongine kisi ailu fame monicti iwa mi ngiyedaic.'

(Mige 69:25)

Ailu hatacmac yanguc,

'Monicti yele ameine damong bole badaic.'

(Mige 109:8)

<sup>21-22</sup> Ilec ngic monic yele ameine bawosaedabeleng. Yoanedi Sugucne Yesu misa lowacneme boleine fungke balu nongilengkolec lec-welec ailu gawec. Gacgu Wapongti bame honocmengka fewec, dameng iwa ngic nongilengkolec gaibong. Ngic yogo yengele hewackacni ngic monic bawosaewec, yedi nongilengkolec momoc galu Yesu homackacni gboliyelu fangkewec, yogolec siduc momoc mime yegengkeidaicte."

<sup>23</sup> Pitadi inguc mime ngic yaeckang bafuwacepaibong. Monic wacine Yosefe Basabas wackelu gaibong, ye wacine monic Yastus, ailu agoine Matias. <sup>24</sup> Bafuwacepalu yanguc milu milockeibong, "O, Sugucne kwelewa ngani-ngani fileine, ga ngic yaeckang yago yekelacni weni yogo bawosaelu edalicnubang nganinang. <sup>25</sup> Nganibeng yedi salecebaicne bole balu Yudasle ameine bole badaicte. Yudas ye bole yogo hegilelu yeicne yefe monicka hikewec." <sup>26</sup> Inguc milu milockelu bawosaecpanogale wac kwelengkelu lobong, Matiasle wac fikeme salecebaicne 11 yengeholec taockeibong.

## 2

*Tili Asu wawec*

<sup>1</sup> Pentikos ngiye-ngiye dameng bangkaleme yengung sugu mac monicka kpaduckelu momoc ngiyeibong.\* <sup>2</sup> Ngiyeibongka honocmengkacni uc sugucne monic gbelong sugucne wecaigac, yogolec ucine ingucnedi iwahacbenang fikelu wawec. Walu mac ngiyeibong, yogolec kwelina wakeme <sup>3</sup> yenge silicine yanguc nganiibong. Dac-ubilang ingucnedi fikelu ngic-ngigac hodocnginangsoc siyeckelu ngiyeiyackewec. <sup>4</sup> Aime Tili Asudi kwelenginang

**1:12:** Luk 24:50-53    **1:13:** Mat 10:2-4    **1:16:** Mige 41:9    **1:18:** Mat 27:3-8    § **1:19:** Hewacine 18-19 yogowa Pitadi yowa nebocine miwec, me yowa fungine gocne Lukadi taockelu kwelengkewec, yogo mi ngage-motogaing.

**1:21-22:** Mat 16:19; Mrk 1:9; Yoa 15:27    \* **2:1:** Ewalicebaicnele hombangka Yesu ye homawec. Hombang yogolec lobeina hadeng 50 motome Pentikos ngiye-ngiye dameng fikecaigac. Yogo Yuda yengele hombang monic aicaigac. Yogolec yagowa kwelengkeicne fagac: Wah 23:16; Dep 23:15-16; 34:22; Him 28:26-31; Yef 16:9-12.    **2:3:** Mat 3:11



haułu wakeme yowa haicine monic-monic miibong. Asudi filesoc inguc ainingte ayeleme yowa miibong.

<sup>5</sup> Aime Yuda ngic-ngigac<sup>†</sup> homacnedi himong monickacni monickacnidi kwesilu Yerusalem taonka ngiyebong, yenge Wapongte yowa balabelu gaibong. <sup>6</sup> Nga uc sugucne fikeme habu homacnedi yogo ngagelu kwesi kpaduckelu mimedec aibong. I yangucte, Tili Asuholec yenge ngic-ngigac yengele yowanginang yefe filesoc filesoc mibong ngageibong. <sup>7</sup> Ngagelu mimedec ailu welecebalu yanguc miibong, “Ngagegaing, ngic yago yowa migaing, yenge sasawadi Galili ngic. <sup>8</sup> Aime yenge wenucka nongileng yowanonggangbenang filesoc filesoc mibong ngagegabeleng? <sup>9</sup> Nonge yago

Patia ngic nga

Midia ngic ailu

Elam ngic. Nga

Mesopotamia himongkacni nga

Yudeya himongkacni ailu

Kapadosia himongkacni. Nonge

Pontus himongkacni nga

Asia prowinswacni. <sup>10</sup> Ailu

Frigia himongkacni nga

Pamfilia himongkacni ailu

Isip himongkacni. Nga

Libia himongka Sairini mac haicine monic monic, yogowacni. Ailu

Roma taonkacni kwesiicne. <sup>11</sup> Yogo yenge Yuda ngic-ngigac nga Israel yengele alingkacni miyacti Yuda ngic-ngigac yengeholec taockelu gaibong. Ailu

Krit ngic nga

Arebia ngic.

Nongileng inguchac galu yowanonggangsoc Wapong pasitowainele yowa haicine monic-monic mibong ngagegabeleng.” <sup>12</sup> Inguc milu mimedec ailu ngage-bibiyelu mingagec ailu yanguc miibong, “Pasi fikegac, yogo wiyac silicine monichenang, yogo mi ngagemotogabeleng.”

<sup>13</sup> Gocne yengibac yowa kwekwe ailu yanguc miibong, “Yenge waing misa homacne nolu kwelengineng sifuwegac.”

#### *Pitadi Tili Asule fungine edocebawec*

<sup>14</sup> Inguc mibong Pita ye salecebaicne 11 yengeholec domalu sanangnehac wackelu yanguc edocebawec, “Yuda ngic-ngigac ailu ngic-ngigac sasawa Yerusalem gagabiyeng, na pasi yagolec fungine mibe yegengkengeme ngagening. <sup>15</sup> Ngeenge ngic yogo nganicebalu yanguc ngagesigaing, ‘Waing misa nolu kwelengineng sifuwegac.’ Inguc mi ngagedaing. Yakumac ubiyacte 9 kilok aigac, yenge waing misa mi nogaing, miyac. <sup>‡</sup> <sup>16</sup> Nga pasi yogolec hocne Wapongte siduc-mimi ngic Yoeldi yowa yanguc miwec,

<sup>17</sup> Wapongti yanguc miwec, dameng motonogale aiyemewa na Asune sotiyebe wame ngic-ngigac sasawadi bayackedaingte. Ailu adu-madecfocngineng yenge siduc-yowa midaingte. Ailu soc-gboli madecfocngineng gung-didicka wiyac nganidaingte. Ailu ngic sugucnefocngineng gungka wiyac nganidaingte. <sup>18</sup> Ailu dameng iwahac na kwelec kwekwefocne, ngic nga ngigac, yengela Asune sotiyebe wame yenge siduc-yowa midaingte. <sup>19</sup> Ailu mibe wilini sawawa pasi mi ngani-nganiine fikedaicte. Nga himongka dumeng maaine fikedaicte. I yangucte, sac nga dac ailu hasoc sugucne fikedaicte. <sup>20</sup> Wenac-dongeine bafaliyelu kundung kwedaicte. Nga tamacne sac ingucne aidaicte. Yogo motome Sugucnele damengtowa tapiliine nga wacine feicne fikedaicte. <sup>21</sup> Aime ngic-ngigac yenge Sugucnele wac wackebong, yedi bikicte ameine bame yenge sasawa wasecne aidaingte.” (Yol 2:28-32)

<sup>22</sup> “Israel ngic-ngigac, na edocngebabe ngagening. Yesu Nasaret-hocni, ye Wapongti bayegengkelu nenggac ngiyecnome hewacnginang pasi damuineholec nga pasi mi ngani-nganiine ailu pasile maaine gocne bawec. Yogo biyac ngage-motolu fungine nganimotodaingte. <sup>23</sup> Yele hocne Wapongti biyachac ngageme fawec, yogolec yefe mimoctolu ngengele molewa lowec. Ngeni sanangnehac milu wackelu, ngic Wapongte yefe-yowa mi ngagegaing, yengele molewa lolu edocebabong yengi ye malicpongka webong homawec. <sup>24</sup> Aime homacte tapilidi ye nalic mi bawecte Wapongti homacte doickacni baickelu homackacni bagboliyeme fangkewec. <sup>25</sup> Dawidi yedi yele mic balu yanguc miwec,

**2:4:** Sale 4:31; 10:44-46; 19:6; Mrk 16:17    <sup>†</sup> **2:5:** Esecne Yuda ngic-ngigac gocne himongne himongne hike galu fikesawec ailu mac-yowa haicine monic-monic ngagelu milu gaibong. Ailu Yuda ngic-ngigac yogo yenge Yerusalem kwesiibong.    <sup>‡</sup> **2:15:** Israel ngic-ngigac yenge ubiyacte waing misa mi nocaigaing.

'Na damengsoc dongene Sugucnela hilabe; ye folenapec gagacte kwelene nalic mi wadaicte. <sup>26</sup> Ilec kwelena kwele-madic ngagelu micnedi belic-belic yowa milu socnedi ingucnehac wangec gadacte. <sup>27</sup> Ga kwele-ilucne hegileng Wangec-macka nalic mi gadaicte. Ga ngicgone gbagbacne ye hegileangka mi kpeleckelu howacine aidaicte. <sup>28</sup> Gagi gagale yefe weduneleing. Gale haicka gaebewa belic-belic sugucnebenang aineledamecte.' (Mige 16:8-11)

Yowa yogo Dawididi mime yegengkewec.

<sup>29</sup> "Ngic hae-gbafocne, ngambononggeng Dawidile fungine hangoc mikac yanguc milu nalic edocgebabe, ye homame longkeibong. Aime dongesiine fawec, yakumac fagac. <sup>30</sup> Ye Wapongte siduc-mimi ngic gawecka yanguc ngagewec.

'Wapongti yele ngambofocine yengele alingkacni madecine monic bawosaeme yedi ngic-taule ngiye-ngiyewa lome ngiyenale mimipang sanangne mipangkewec.' (Mige 132:11)

<sup>31</sup> Yogo nganilu ngageme Mesia homackacni gboliyelu fangkenale yanguc miwec,

'Wapongti hegileme Wangec-macka nalic mi gadaicte. Nga socine mi kpeleckelu howacine aidaicte.' (Mige 16:10)

<sup>32</sup> Aime Yesu ye hocne Wapongti homackacni yeuckeme fangkeme nonge dongenonggengti noine nganiibeng. <sup>33</sup> Wapongti bafangkeme felu mole-foleina domawec. Nga Mamacinedi esecne Tili Asu lacnonale mipangkewec, ye yogo balu saleme wawec yogo yakumac hocne ngani-ngagac aigaing. <sup>34</sup> Dawidi ye honocmangka Yesu fewec ingucnehac mi fewec, miyac. Yedibac yowa yanguc sugu miwec,

'Sugucnedi nale Sugucne yanguc edowec, § "Ga tapiline balu folenapec ngiyeangka <sup>35</sup> ngabafocgone higegonele bageina locebabe gagi yenge damongebadamecte.'" (Mige 110:1)

<sup>36</sup> Ilec ailu Israel ngic-ngigac sasawa, ngenge yanguc ngage-benangkedaing. Ngenge Yesu malicpongka weibong, ngic yogo hocne Wapongti Sugucne nga Mesianonggeng lowec gagac."

#### *Ngic-ngigac kwelengineng hefaliyeibong*

<sup>37</sup> Pita ye ngic-ngigac yowa inguc edocebame yenge kwelengineng fangkeme hangocebawec. Hangocebame yeicne nga salecebaicne alingfocine yanguc uwayeibong, "Ngic hae-gbafocnonggeng, nonge wenuc aibeng, bikicnonggeng miyac aidaicte?"

<sup>38</sup> Inguc mibong Pitadi yanguc edocebawec, "Bikicnonggeng hegilenale ngenge filesoc filesoc Yesu Kristole wacka kwelengineng hefaliyeme misa lowaning. Inguc aibong Wapongti kwele-madicte Tili Asu ngeledaicte. <sup>39</sup> Ailu Asu ngelenale mipangkewec, yogo ngengileng nga adu-madecfocnonggeng gagaing, ailu dalickacni gagaing, yenge Sugucne Wapongnonggengti wacnebalu hefolecngebadadicte. Ngenge nga yenge momochac nalic badaingte."

<sup>40</sup> Pita ye sawang-yowa inguc milu yowa homacne taockelu dogbac ailu yanguc miwec, "Ngic-ngigac yakumac galu sowaledaingte, yengeholec sowalelu miyac aidaingka, ngenge kwelengineng hefaliyedaicte. Hefaliyeme Sugucnedi yengelacni baicngebame wasecne aidaingte!" <sup>41</sup> Aime hadeng iwahac ngic-ngigac 3 taosen ngama ingucnedi yenge Pitale yowa ngagesingkelu misa lowalu Yesule habuwa taockeibong.

#### *Kwele-moniyang gaibong*

<sup>42</sup> Aime salecebaicne yengi Siduc Madicne weduyelebong yogo ngagelu yengileng yefe basanangkelu gaibong. Ailu kwele-moniyangka momoc galu bret badulu nolu <sup>\*\*</sup> mimiloc bole balu gaibong. <sup>43</sup> Nga salecebaicne yengela pasi mi ngani-nganiine nga pasile maaine fikeme ngic-ngigac sasawadi mimedec aibong. <sup>44</sup> Aime Yesu ngagesingkeibong, yenge kwele-moniyangka wiyac sasawangineng yogo balu gaibong. <sup>45</sup> Ailu yenge himong nga hiye-mafangineng salelu moneng balu agofocnonggeng nosing woc-wiyacte kpungkeibongsoc botoc balu yelelu gaibong. <sup>46</sup> Nga ngic-ngigac hadengsoc Ibu-macka kwele-moniyang ailu kpaduckelu gaibong, yenge kwele-moniyangka macsoc macsoc bret badulu noibong. Nolu nosingngineng yogo kwele-madicka botoc balu yengileng ngageboc mi ailu gaibong.

2:29: 1Ngt 2:10    2:30: 2Sm 7:12; Mige 89:3-4; 132:11    2:33: Sale 5:32; 7:55-56    § 2:34: Miti Geewa Hibru yowawa Sugucnele wac yaeckangti fagaic. Molic-molic Hibru yowawa wacine yogo "Yawe" fagac. Nga yogolec lobaina, "Sugucne" inguc fagac. Salecebaicne iwa Griik yowawa Sugucnele wac moniyang sugu bafaliyeicne fagac. "Nale Sugucne" yogo Mesia.    2:36: Sale 5:30-31    2:39: Yes 57:19    2:41: Sale 2:47; 4:4    \*\* 2:42: Ewalicebaicnele hombangte Yesudi salecebaicne yengeholec bret nga waing nowec. Yenge damengsoc socine nga sacine yogo ngagesilu bret badulu nolu gaibong.    2:42: Sale 20:7    2:44: Sale 4:32-35

<sup>47</sup> Inguc ailu Wapong mitengkelu gabong ngic-ngigac sasawa habutowadi yenge ngagemadickeyeleibong. Aime Sugucnedi hadengne hadengne ngic-ngigac yengele bikicte ameine bame wasecne ailu yengileng alingka taockeibong.

### 3

#### *Pitadi ngic hige-sowac bamadickewec*

<sup>1</sup> Hadeng monicka mac awelelu 3 kilok aime mimiloc dameng aiwec. Aime Pita nga Yoane yeke Ibu-macka feiboc. <sup>2</sup> Aime ngic monic hige-sowac nenggacte gobe kwelinacni ingucne fikewec, ye Ibu-macte odale nu monic wacine Nusalic, iwa hadengne hadengne tengke felu lobong ngiyelu gawec. Ye ngic-ngigac Ibu-macka fec-wac ailu gaibong, yenge kwele-madicka monengte milocelebu gawec. <sup>3</sup> Ngic yogodi Pita nga Yoane yeke Ibu-macka fenogale aiboc nganicepalu kwele-madicka monengte inguchac milocepawec. <sup>4</sup> Milocepame yeke ye ngani-lilickeiboc. Ngani-lilicckelu Pitadi yanguc edowec. "Ga nganic-nupaci!" <sup>5</sup> Inguc mime ngagewec, "Yeke wiyac monic nelenicte migabiyec." Inguc ngagelu donge hilalu nganicepawec.

<sup>6</sup> Nganicepame Pitadi yanguc edowec, "Na monengne mikac. Aime wiyac moniyang fanelegac, yogo sugu baficgube! Yesu Kristo Nasaret-hocni, yele wacka fangkelu hikec." <sup>7</sup> Inguc milu mole-foleine balu bafangkeme iwahac higeine nga dikilikicne sanangkewec. <sup>8</sup> Sanangkeme tapiliineholec wintacke fe-wac domalu yekeholec Ibu-macka momoc feibong. Felu yeuctihac fec-wac nga yefe lec-welec ailu Wapong mitengkwec. <sup>9</sup> Wapong mitengkelu lec-welec aiyemewa ngic-ngigac gocne yengi nganilu miibong, <sup>10</sup> "Ye hocne Ibu-macte nu wacine Nusalic, iwa monengte milocelebu gacaigac." Inguc milu nganimotolu kwatackelu medecabawec.

#### *Pitadi Yesule fungine edocebawec*

<sup>11</sup> Ngic ye Pita nga Yoane yeke bakatacepawec. Aime ngic-ngigac homacnedi Ibu-macte sobeng mecina dakec monic fawec, wacine Solomonte Dakec, iwa yekela hikelu kpaduckelu mimedec aibong. <sup>12</sup> Aibong Pitadi nganicebalu ngic-ngigac yanguc edocebawec, "Israel ngic-ngigac, ngenge ngic yago nganilu mimedec mi aidaing. Ailu ngenge noke mi nganicnupadabiyeng. Pasi yogo nokele tapiliwa mi fikegac. Nga noke yogo Sugucnele haicka madicne gagabelec yogo mi ngagedaing. <sup>13</sup> Yogo miyac, ngambofocnonggeng Abraham nga Aisac ailu Yakobo, yengele Wapong ye hocne bole-madecine Yesu wacine bafewec. Ngengebac ye lobe holecnolu Israel yengele alingcakni miyac, yogo yengele molewa loibong. Foinac, Pailatdi yowaine wosaelu lukenogale mimoctowec. Aime ngengibac hegileibong. <sup>14</sup> Ye hocne ngic gbagbacne nga pasi dondonne balu gagac.\* Nga ngengibac ye lobe holecnoibong. Ailu kindololo-ngicti ngic monic weme homawec, ngenge ye hocne lukengelenale sanangne mibong <sup>15</sup> gagale fileine wehomaibong. Aime Wapongti ye homackacni bagholiyeme fangkwec, noke yogo nganiibecte migabelec. <sup>16</sup> Nga noke Yesule wac wackelu ngagesingkegabelecte ngic yago nganigabiyeng, ye tapiliineholec aigac. Nga Yesule wacka ngage-ngagesingkolec gagabelec. Ilec ailu ye madicbenangkegac. Ngenge sasawadi pasi yogo nganigabiyeng.

<sup>17</sup> "Ngic hae-gbafocne, na ngagegabac, ngenge Yesule fungine mi ngage-motolu inguc aibong. Nga damongfocngineng yenge ingucnehac aibong. <sup>18</sup> Foinac, Wapongti Mesia mimoctowec, ye doic sugucne ngagecgu homanale Wapongte siduc-mimi ngic sasawa yengele micka yowa lome miibong. Aime yogo sasawa Wapong miweckasoc fikeyackewec. <sup>19</sup> Ilec ngenge bikicngineng miyac ainale kwelengineng hefaliyeme Wapongta hikedaing. Inguc aidaingtewa, Sugucnedi kwelengineng basanangebadaicte. <sup>20</sup> Ailu Mesia biyachac bawosaengelewec, ye salengeleadaicte, yogo Yesu hocne. <sup>21</sup> Ye honocmengka felu gamewa, damengine weleme kwesilulu wiyac sasawa bamadicebadaicte. Ilec yowa Wapongti esenebenang siduc-mimile bingec yengele micka lome mibong yegengkewec. <sup>22</sup> Mosesdi yanguc miwec,

'Sugucne Wapongnginengti ngengele alingcakni siduc-mimi ngic monic na ingucnehac bafuwangeleadaicte. Yedi yowa sasawa midaicte, yogo ngagedabiyeng. <sup>23</sup> Aime monicti siduc-mimi ngic yogolec yowa ngagelu mi balaibedaictewa, ye yengileng alingcakni baickelu wehomadaicte.'

<sup>24</sup> "Dameng yagowa wiyac fikegac, yogo Samuellaicni Wapongte siduc-mimi ngic sasawa galu ofeibong, yengi biyachac mibong yegengkewec. <sup>25</sup> Wapongti ngambofocnonggeng yengeholec dodofic balu Abraham yanguc edowec,

2:47: Sale 6:7; 11:21    3:4: Sale 14:9    3:6: Sale 4:10; 16:18    3:13: Wah 3:6,15; Luk 23:13-25; Sale 2:23

\* 3:14: Yuda ngic-ngigac yenge Mesiale wac monic yogo wackelu gaibong.    3:17: Luk 23:34; 1Tim 1:13    3:19: Sale 2:38

'Ngambogone bole badaicte, yefe iwa himongne himongne ngic-ngigac mimi-madic milu edocebadacte.'

(*Fike 22:18; 26:4*)

Israel, ngenge dodoficnonggeng yogo nga Wapongte siduc-mimi ngic yengele yowa miicne yogolec noine ngengileng balu gagaing. <sup>26</sup> Molickelu ngengele hocne ngagesilu Wapongti bole-madecine saleme walu fikewec, yogo ngenge sasawa mimi-madic milu edocngabanale kindololo yefewacni baicngabadaicte."

## 4

### *Pita nga Yoane muc-macka locepaibong*

<sup>1</sup> Pita nga Yoane yeki ngic-ngigac yowa inguc edocebalu domaiboc. Domaeboccka, depec-baba ngic ailu Ibu-macte lebe-ngic micne nga Sadyusi yenge momoc yekela lelu iwahac domaibong. <sup>2</sup> Aime Yesu ye homackacni gboliyelu fangkeme homaicne yenge momoc gboliyelu fangkedaingte. Yeke yowa-siduc yogo ngic-ngigac edocebaboc yegengkewecte, micnefocngineng yenge yekele aalic ngagelu ngaba aiyeteibong. <sup>3</sup> Inguc aiyetelu bacepalu mac biyac awelewecte muc-macka locepaibong ngiyeboc mac saewec. <sup>4</sup> Aime habutowadi Pita yowa mime ngageibong, yengelacni homacnedi yogo ngagesingkelu Yesule habuwa taockeibong. Aime ngic esecne nga gbolicne dzalengineng 5 taosen ngama ingucne aiwec.

### *Pitadi Yesule fungine mime yegengkewec*

<sup>5</sup> Saerne Yuda ngic-ngigac yengele damong nga micnefocngineng ailu Wapongte yefewale wewedu ngic, yenge Yerusalem iwa kpatuleibong. <sup>6</sup> Kpatuleibong depec-baba ngic yengele damong sugucne, wacine Annas, ye iwa momoc gawec. Nga Kaifas ailu Yoane nga Aleksanda, yenge depec-baba ngic micne ailu gocne gaibong, yengele alingfocngineng sasawa yenge momoc kpatulelu gaibong. <sup>7</sup> Galu Pita nga Yoane bacepalu wele haicnginang locepaibong. Locepalu yanguc mi-uwac aiyeteibong, "Ngeke oma tapiliwa nga male wacka pasi yogo babiyec?"

<sup>8</sup> Uwayetebong Pita ye Tili Asudi kweleina wakeme yanguc edocebawec, "Israel damong-focnonggeng nga micnefocnonggeng, mibe ngagening. <sup>9</sup> Ngenge ngic hige-sowac ye wenuc madickeyec, ailu yela pasi madicne wenuc fikecnoyecte uwanotegaing. <sup>10</sup> Ngenge nga Israel ngic-ngigac sasawa ngageningte yowa yanguc mibe, ngenge Yesu Kristo Nasaret-hocni malicpongka webong homame Wapongti ye homackacni bagboliyeme fangkewec gagac. Aime yele wacka ngic yogo madickelu dongenginang domagac.

<sup>11</sup> 'Ye hocne mac-baba ngic yengi posa monic sowacne milu wickeibong. Aime posa yogodi macte posa-bosing ingucne sanangne ailu domagac.\*

(*Mige 118:22*)

<sup>12</sup> Ngic monicta wetackebeng yedi bikicte ame nalic mi bame wasecne ainangte yefe monic mi fagac, miyac. Himongne himongne nongileng Yesule wacka gabeng yedi bikicte ameine bame wasecne aidabelengte."

<sup>13</sup> Aime Pita nga Yoane yeke hibi-mac sugucna monic mi feibocti hangoc mikac yowa miboc yenge yogo ngagelu mimedec aiibong. Ailu yeke Yesuholec gaiboc, yogo nganicepaibong. <sup>14</sup> Aime ngic higeine madickekewec, yedi yekeholec domame nganilu yowa bafaliyenogale ngagebong kpungkekewec. <sup>15</sup> Kpungkeme Tutumangtowa iwacni aiyeteibong sobengka walu domaeboccka yengilangkac yowa mingagec ailu yanguc miibong, <sup>16</sup> "Nongileng ngic yaeckang weninguc aiyetenangte ngagebong kpungkegac. Yengi ngagesingkeningte yeke pasile maaine baboc Yerusalemkocni ngic-ngigac yengi siducnginec biyac ngageyackeibong, yogolec nalic mi bisockedabelengte. <sup>17</sup> Aime yowa yogo macsoc hikeme ngagedaingkale, yeke Yesule wacka yowa hatacmac mi edocebalu weduyelenicte kpatalayetenoga."

<sup>18</sup> Inguc milu wacepalu yanguc mimacepaibong, "Ngeke Yesule wacka ngic-ngigac hatacmac mi edocebalu weduyeledabiyec."

<sup>19-20</sup> Inguc miibong Pita nga Yoane yeki yowa yanguc bafaliyeyeleiboc, "Wiyac dongenonggengti nganiibong, ailu hedecnonggengti ngageibong, yogo nalic mi bisockedabelengte. Ngenge ngengung aibaba weni yogodi dondonne yogo ngagelu wosaecnaguning, ngengele yowa me Wapongte yowa balaibenoga? Weni yogodi Wapongte haicka madickekac?"

<sup>21</sup> Inguc miboc yenge yowa hatacmac mihangoc-hangocineholec aiyetelu moc locepaibong hikeiboc. I yangucte, pasi fikeme ngic-ngigac sasawadi Wapong wacine bafeibong. Ilec salecebaicne wenuc aiyelenoga, yogolec kpungkeibong. <sup>22</sup> Nga ngic pasile maaine higeina fikeme madickekewec, ngic ye hifaine 40 ingucne aiicne, aime yenge salecebaicne moc hegilecepaibong hikeiboc.

**3:26:** Sale 13:46    **4:4:** Sale 2:41    **4:10:** Sale 3:6,13-16    \* **4:11:** Yuda ngic-ngigac yenge mac-himongka balu posa-bosing ingucne lolu gaibong.    **4:12:** Mat 1:21    **4:18:** Sale 5:28    **4:19-20:** Sale 5:29

*Wapongti tapili yelenale milockeibong*

<sup>23</sup> Hikeboc Pita nga Yoane yeke alingfocngineng yengela hefaliye hikeiboc. Hikelu depece-baba ngic micne ailu damongfocngineng yowa miibong, yogolec yowa-siduc edocebaboc ngageibong. <sup>24</sup> Ngagelu yenge kwele-moniyang ailu Wapong wackelu milockelu yanguc miibong, “Tapilitowa fileine Wapong, ga sawa nga himong ailu kiwec nga wiyac sasawa haicne monic-monic fayackegac, yogo bafuwaing. <sup>25</sup> Gagi biyachac Tili Asu edoengka yedi ngambonngeng ailu bole-madecgone Dawidi, yele micka lome yedi yowa yanguc miwec. Foinac, himongne himongne ngic-ngigac sasawa aalicebawec. Ailu ngicne ngicne yenge aibaba sowacne ainogale yowa mingagec ailu ngage-ngage bole balu aibibiyelu lonaguibong. <sup>26</sup> Himongte ngictau nga damong yenge kpatulelu sanangnehac domalu Sugucne nga Mesia wenogale ngaba aiyeteibong.” (Mige 2:1-2)

<sup>27</sup> Yowa yogo noine fikewec, yogo ga bole-madecgone gbagbacne, yogo Yesu Kristo hocne Mesia bawosaeing. Aime taon iwa hocne ngictau Herode nga damong Pontius Pailat, yeki Israel yengele alingkacni miyac nga Israel ngic-ngigac yengeholec kpatulelu Yesu ngaba aicnoibong. <sup>28</sup> Ailu esecne geicne tapiliwa nga micgonedi miing, yogolecsoc inguc aicnoyackeibong. <sup>29</sup> O Sugucne, yogo milu yowangineng ngani-ngagec ailu kwelec kwekwefocgone tapili baficnubalu domaengka yowagone hangoc mikac mibeng yegengkedaic. <sup>30</sup> Mibeng molegone sungkeng socka madickeningte nga ngagesingkeningte pasile maaine ailu pasi mi ngani-nganiine yogo bole-madecgone gbagbacne Yesu, yele wacka fikelu hikedaic.”

<sup>31</sup> Inguc milockebong motome macka kpaduckelu ngiyeibong, mac yogowa memeya ingucne bame Tili Asudi kwelenginang wakeme Wapongte yowa hangoc mikac mibong yegengkeyelewec.

*Yesule habu kwele-moniyangka baficnaguibong*

<sup>32</sup> Yesu ngagesingkeibong, habu yogo yenge kwele-moniyang ailu wiyac fayelewec, yogolec nale gale mi miibong walecngineng balu gaibong. <sup>33</sup> Salecebaicne yenge Sugucne Yesu homackacni gboliyelu fangkewec, siduc yogodi basanangebanale ailu tapiliineholec mibong yegengkeme gaibong. Aime Wapongti kwele-madic sugucne aiyelewec. <sup>34</sup> Yengele hewacnginang monicti wiyac monicte mi kpungkwec, miyac. Ngic-ngigac sasawa mac-himongnginengkolec gaibong, yenge mac-himongngineng yogo salelu moneng balu <sup>35</sup> salecebaicne yengela lolu gaibong. Lolu gabong, yengi ngic-ngigac nosing woc-wiyacte kpungkeibongsoc botoc balu yeletu gaibong.

<sup>36</sup> Aime ngic monic gawec wacine Yosefe, salecebaicne yengi wacine monic Banabas wackeibong, yogolec fungine yanguc, mibasanang aiyelenale madec. Ye Liwaile alingkacni Saiparus nucka fikewec. <sup>37</sup> Ngic ye himongngine monic salelu moneng balu salecebaicne yengela bahikelu loyackewec.

**5***Ananaias nga Safaira*

<sup>1</sup> Aime ngic monic yengeholec gawec, wacine Ananaias, ye ngigacine Safaira yeke himongnginec monic nebocine salelu moneng baihoc. <sup>2</sup> Balu moneng nebocine baickelu lome ngiyenale ngigacine edome ngageme kwele-moniyang aiiboc. Ailu nebocine salecebaicne yengela bahikelu lowec.

<sup>3</sup> Lome Pitadi yanguc edowec, “Ananaias ngagegic, Satangti kwelegona haume ga Tili Asu kwesac aicnolu himonggone nebocinele fuli nebocine sangkeengka ngiyegac. <sup>4</sup> Mac-himonggone nebocine fagelenele milu fageledec, me salelu moneng balu yogodi inguc me inguc aibe milu aideng. Ga kwelegonedi kwesacgume inguc aigic, yogo nalic mi aigac. Ngagegic, ga kwesac aigic, yogo ngic nonge mi ainolegic, miyac. Ga Wapong kwesac aicnogic.”

<sup>5</sup> Inguc mime Ananaias ye yowa yogo ngagelu iwahac lodingke wawelu homawec. Aime yenge sasawadi pasi fikewec, yogolec siducine ngagelu damuebame hangoc sugucne aiibong. <sup>6</sup> Aime ngic-madec yenge fangkelu kponggbongine ebeckelu tengke hikelu longkeibong.

<sup>7</sup> Longkebong 180 minit ngama ingucne motome ngigacine ye ngaweinela aibaba fikewec, yogo mi ngagelu welewec. <sup>8</sup> Weleme Pitadi yanguc uwacnowec, “Himong nebocinele moneng babiyec, yogo sugu me?”

Uwacnome yedi miwec, “Oc, yogo sugu.”

<sup>9</sup> Inguc mime Pitadi yanguc edowec, “Foinac, ngeke Sugucnele Asu lokwesacka lonogale mingagec ailu kwele-moniyang aigabiyec. Ngagegic, ngawegone longkelu wele nu lobina domagaing, yenge ga inguchac tenggulu hike longgudaingte.”

<sup>10</sup> Inguc edome ye iwahac higeina lodingke wawelu homawec. Homame ngic-madec yenge mac kwelina felu ye biyac homawec, inguc nganilu kponggbongine tengke hikelu ngaweine fawec, yogolec mecina longkeibong. <sup>11</sup> Aime Yesule habu sasawa nga ngic-ngigac sasawa yenge siducnginec ngagelu damuebame hangoc sugucnebenang aibong.

*Salecebaicne yengi pasi tapiliineholec baibong*

<sup>12</sup> Salecebaicne yenge ngic-ngigac yengi ngagesingkeningte pasile maaine nga pasi mi ngani-nganiine, yogo homacne ngic-ngigac yengela balu gaibong. Aime Yesule habu sasawa yenge Ibu-macka Solomonte Dakec, iwa kwele-moniyang ailu kpatulelu gaibong. <sup>13</sup> Kpatulebong ngic-ngigac yenge hangoc ailu yengela mi taockeibong. Ailu yenge sifu alang bayelelu gaibong. <sup>14</sup> Inguc aibongte ngic-ngigac homacnedi Sugucne ngagesingkelu yengela taockelu gabong Yesule habu sugulewec. <sup>15</sup> Salecebaicne yenge pasi tapiliineholec babong nganiibongte ailu yenge huckolec mapicka nga dembengkolec yefewa locebalu gaibong. Inguc ailu yanguc ngageibong, Pita ye lec-welec aime ilucinedi hedicebame hucngineng miyac aidaic. <sup>16</sup> Ailu Yerusalem taon emeina taon gocne falegac, yogowacni ngic-ngigac homacnedi huc-doickolec ailu aleng wonongkolecti basowalecebaicne, yenge baceba hikebong sasawadi madickelu gaibong.

*Angelodi muc-mackacni baicebawec*

<sup>17</sup> Pasi ingucne fikeme depec-baba ngic yengele damong sugucne nga alingfocine Sadyusi ngic-habu, yenge hasowac aigacgu <sup>18</sup> salecebaicne bacebalu muc-macka locebai-bong. <sup>19</sup> Locebabong deboc yogowahac Sugucnele angelo monicti nu laliyelu mengoceba walu yanguc edocebawec, <sup>20</sup> “Ngenge Ibu-macka fedomalua gaga gbolicnele fungine ngic-ngigac sasawa edocebadabiyeng.”

<sup>21</sup> Inguc edocebame ngagelu mac sae-saele Ibu-macka felu ngic-ngigac edocebalu weduyeleibong.

Damong iwa depec-baba ngic yengele damong sugucnedi alingfocine yengeholec kwe-siibong. Kwesilu Yuda ngic-ngigac yengele Tutumangtowa, yogolec memba, nga Israel ngic-ngigac yengele micnefocngineng wacebame kwesilu kpaduckeibong. Kpaduckelu salecebaicne baceba kwesiningtel muc-macka yowa lobong hikewec. <sup>22</sup> Hikeme lebe-ngic yenge hike sulumelu muc-macka basacebalu hefaliye welelu yanguc edocebaibong, <sup>23</sup> “Nonge hikelu nu panggala sanangnebenang baicne, yogo nganibeng damong yenge nuwa domagaing. Aime nu laliye felu ngic basacebalubac monic mi nganigabeleng.” <sup>24</sup> Yowa yogo mibong Ibu-macte lebe-ngic micne nga depec-baba ngic micne, yenge pasi fikewec, yogolec ngage-bibiyeibong.

<sup>25</sup> Inguc aibong monicti welelu yanguc edocebawec, “Ngagegaing, ngic muc-macka locebabiye, yenge Ibu-macka ngic-ngigac yowa milu weduyelelu domagaing.” <sup>26</sup> Inguc mime lebe-ngic micnengineng yedi lebe-ngic bacebame hikeibong. Aime ngic yengi posadi wickelu holecebadaingkale, hangocebame salecebaicne ulucne mengocebalu weleibong.

*Salecebaicne yenge mi hangocebawec*

<sup>27</sup> Ailu Yuda ngic-ngigac yengele Tutumangtowa, yogolec memba tutumangka locebabong domaibong. Domabong depec-baba ngic yengele damong sugucnedi yowa yanguc uwayelewec, <sup>28</sup> “Ngenge Yesule siduc ngic-ngigac mi edocebalu weduyeleningte milu kpatalacngeleibong. Ngagegaing, ngengebac Yerusalem ngic-ngigac sasawa yengela hat-acmac mibong yegengkeyelegac. Ailu ngic yogolec sacte bikicte ameine, yogo nonge feiwa lonogale migaing.”

<sup>29</sup> Inguc mibong Pita nga salecebaicne yengi bafaliyelu yowa yanguc edocebaibong, “Wapongte yowa hegilelu ngic-yowa balaibenoga, yogo nalic mi aidabelengte.” <sup>30</sup> Ngengi Yesu molenginengti malicpongka welu wehomabong ngambofocnonggeng yengele Wapongti ye homackacni bagboliyeme fangkewec. <sup>31</sup> Fangkeme Wapongti balu damongnonggeng ailu Asa bacnubame madickenangte gunungkeme mole-foleina domagac. Ailu Israel ngic ngenge kweleningeng hefaliyeme bikicngineng hegilenale inguc aiwec. <sup>32</sup> Wapongte yowa balaibeibong Tili Asu yelecaigac. Aime Tili Asu nga nonge Yesule siduc yogo nongileng bucnehac nganilu mibeng yegengkegac.”

*Gamalieli mime salecebaicne hegilecebaibong*

<sup>33</sup> Yowa inguc edocebame kwelenginang bame salecebaicne wehomacebanogale mibong. <sup>34</sup> Inguc mibong Tutumangtowanang Farisaio ngic monic ngiyewec, wacine

Gamaliel, ye Wapongte yefe-yowale wewedu ngic gawec. Ilec ngic-ngigac yenge ye alang bacnoaigaing. Yedi miwec, “Ngenge ngic yago mac-sobengka baceba haulu domaebong.”<sup>35</sup> Inguc mime baceba haubong micne alingfocine yanguc edocebawec, “Israel ngic, ngenge ngic yago funginengineng nage-motolu aibaba yogo aiyeledaing.”<sup>36</sup> Esecne dameng monicka ngic monic wacine Teudas yeuctihac fikelu miwec, ‘Na ngic sugucne.’ Inguc mime ngic 400 ingucti yeholec wetackeibong. Aime ye yeicne hudu hilu homame alingfocine singsalolong kwebong bolengineng miyac aiwec.<sup>37</sup> Ye miyac aime wac-aling babale dameng fawec, iwa Galili prowinswacni ngic monic wacine Yudas, ye ngic gocne kwelengineng kwefangkeme Roma yengele gamang baickeningte yenge yeholec wetackeibong. Yudas yeicne inguchac webong miyac aime alingfocine siyeckelu hikeibong.<sup>38</sup> Ilec ailu yanguc edocngebabe, ngenge ngic yago hegilecebabong hikening. Yenge bole yogo ngic nage-ngagewa bagaingka, yogo ngic yekele bole miyac aiwec, inguc miyac aidaiacte.<sup>39</sup> Nga Wapongti tapili yeleme bagaingka, ngeni nalic mi kpatalayeledaingte. Gacgu Wapong aka holecnodaingkale migabac.”

<sup>40</sup> Inguc edocebame nage-ngagenineng hefaliyeme salecebaicne wacebabong weleibong. Welebong lebe-ngicti muc-hududi wecebaningte edocebaibong. Aime wecebabong motome yenge Yesule wacka yowa hatacmac mi miningte mimacebalu salecebaibong.

<sup>41</sup> Salecebabong Wapongti ngageme madickenale yenge Yesule wacte wecebalu gamegameine nalic aiyeleibong. Yogolec beliyelu Tutumangtowa iwacni walu hikeibong.<sup>42</sup> Aime yenge hadengne hadengne Ibu-macka nga macne macne, iwa Yesu ye Mesia, yogolec Siduc Madicne mibong yegengkeme weduyelelu gaibong. Ailu bole yogo mi hegileibong.

## 6

### *Salecebaicne yengele babafic ngic bawosaecebaibong*

<sup>1</sup> Dameng iwa mic-tengtengfocine sawelu hikewec. Sawelu hikeemewa Yuda ngic-ngigac Hibru yowa micaigaing, yenge hadengsoc noba-nosing botoc balu gaibong. Ailu Yuda ngic-ngigac Grik yowa micaigaing, yengelacni hosec gocne nosing mi balu gaibongte ailu yowa miibong.<sup>2</sup> Inguc aibong salecebaicne 12 yengi mic-tengteng wacebalu yanguc edocebaibong, “Nonge nosing heuc-heucte bole yogo balu Wapongte yowa mimile bole hegilebeng fame mi madickedaicte.”<sup>3</sup> Ngic hae-gbafocnonggeng, ilec ailu ngenge ngic 7 ngengileng hewackacni bawosaecebaidaing. Ngic Tili Asudi kwelengineng wakeme nage-ngagemotoc nga aibabangineng madicne nganicebacaigaing, ngic ingucne bawosaecebaidaing. Aime nonge nosing heuc-heucte bole yogo yelebeng badaingte.<sup>4</sup> Nonge nongungbac bole yogo hegilelu Wapongte yowa mimi sugu ailu mimiloc bole badabelengte.”

<sup>5</sup> Yowa inguc mibong habutowa yenge nagebong madickewec. Aime ngic yanguc bawosaecebaibong,

Stifen, ye nage-ngagesingtowaineholec ailu Tili Asu kweleina wakeyackeicne facnowec. Ailu

Filip nga

Porokorus ailu

Nikanor. Ailu

Timon nga

Pamenas ailu

Nikolas.\* Nikolas ye Antiok taonkacni ailu ye Israel yengele alingkacni miyacti Yuda ngic-ngigac yengeholec taockewec.

<sup>6</sup> Yenge ngic yogo salecebaicne yengele emewa locebabong domabong, salecebaicne yengi yengele milockelu molengineng socnginang loibong.

<sup>7</sup> Aime Wapongte yowadi Yerusalem iwa sugulelu sawelu hikeme mic-tengtengfocine yengela damengsoc taockelu hikeme sugulewec. Suguleme depec-baba ngic, yengelacni homacnedi Siduc Madicne ngagesingkelu balaibeibong.

### *Stifen yowawa loibong*

<sup>8</sup> Stifen ye Wapongte kwele-madic nga tapili yogo homacne facnowec. Ilec ailu yedi ngic-ngigac hewacnginang galu Sugucne ngagesingkeningte pasi mi ngani-nganiine nga pasile maaine homacne balu gawec.<sup>9</sup> Aime Yuda ngic-ngigac yengele kpakpaduc macngineng

5:36: Sale 2:33-34; Efs 1:20; Hib 2:10; 12:2      5:40: Sale 4:18      5:41: Mat 5:10-12; Ipi 4:13      6:1: Sale 4:35

\* 6:5: Wac yogo yenge Grik yowawa wackeicne. Ilec Yuda ngic-ngigac yogo yengi nosingte ngaba aibongte yengelacni gocnedi nosing heuc-heucte bole baibong.      6:7: Sale 2:41; 16:5

monic wacine Yengungtihac Damongnagudaingte<sup>†</sup> wackelu gaibong. Yengelacni ngic gocne yengi fangkelu Stifenkolec yowanginengi fec-wac aiwec. Ngic yogo yenge Sairini nga Aleksandia taonkacni ailu Silisia nga Asia prowins sugucnacni. <sup>10</sup> Aime Stifen ye Tili Asule tapiliwa yowa ngage-motolu mime yenge yowa ameine bafaliyenogale aibibiyebong.

<sup>11</sup> Aibibiyelu ngic gocne kpfungebabong, yengi Stifente yanguc miibong, “Ngic ye Moses nga Wapong misulec aiyeteme ngageibeng.”

<sup>12</sup> Inguc mibong ngic-ngigac habutowadi ailu Yuda ngic-ngigac yengele damongfocngineng nga Wapongte yefe-yowale wewedu ngic, yengele kwele kwefangkeibong. Kwefangkeibong yenge Stifen balu hobalu Yuda ngic-ngigac yengele Tutumangtowa iwa bahikeibong. <sup>13-14</sup> Iwa domame kwesac-ngic locebaibong, yengi sanangnehac yanguc miibong, “Ngic yago ye nongileng ailu yefe-yowanonggeng nga Wapongte mac gbagbacnele<sup>‡</sup> damengsoc mime sowalecaigac. Yedi yowa yanguc mime ngageibeng, ‘Yesu Nasareth-hocni, yedi mac yago basowalelu yefe-yowa Mosesdi mifickenolewec, yogo hegilelu yowa gbolocne bafuwanolegac.’ ”

<sup>15</sup> Aime Yuda ngic sasawa Tutumangtowaningang ngiyebong, yengi Stifen nganililickelu nganibong haic-sogeine angelo yengele ngani-ngani ingucne aiwec.

## 7

### *Israel ngambofocngineng yengele siduc Stifenti miwec*

<sup>1</sup> Aime depec-baba ngic yengele damong sugucnedi Stifen yanguc uwacnowec, “Yowa migaing, yogo noine, me?”

<sup>2</sup> Inguc mime Stifenti yanguc miwec, “Mamacfocne nga ngic hae-gbafocne, yowa mibe ngagening. Ngambononggeng Abraham ye Haran taonka mi hikelu Mesopotamia himongka gawec. Gacgume Wapong tapili nga hibi-angoc fileine, yedi fikecnolu yanguc edowec.

<sup>3</sup> ‘Ga mac-himonggone nga alingfocgone hegilecebaengka nani himong monic edalicgudacte, iwa hikelu gadamec.’ (Fike 12:1)

<sup>4</sup> “Aime ye yowa inguc ngagelu Kaldia yengele himong<sup>\*</sup> hegilelu Haran taonka hikelu gawec. Iwa gacgume mamacine homawec. Homame Wapongti himong yakumac nongileng galu Israel wackegabeleng, Abraham saleme yawa kwesiwec. <sup>5</sup> Mengocke kwesilu himong monic mi hegilecnome bawec, miyachenang. Ye nga ngambofocine yengele himong baningte mipangkewec, yogo adu-madec mikac gaemewa edowec. <sup>6</sup> Ailu Wapongti yowa monic yanguc miwec,

‘Ngesa-ngambofocgone yenge hifa 400 aiyemewa ngic gocne yengele himongka kwilic gadaingte. Ailu yowangineng balaiabelu bole doic feina balu ganowagaing. <sup>7</sup> Ngic wenidi Abraham ngambofocine kwelec kweningte bacebadangte, nani ngic yogo yenge yowawa locebalu ameine yeledacte. Ailu ngambofocine locebaibong, himong yagowahac hefaliye kwesilu afenulu nale kwelec kwekwe gadaingte.’ (Fike 15:13-14)

<sup>8</sup> Wapongti Abraham dodoficnonggeng lacnolu soc tofaine helockeningte Wapongti Abraham edowec. Inguc edome madecine Aisak kwefickeme fikeme hadeng 8 aiyemewa madecinele soc tofaine helockewec. Aime Aisakti Yakobo inguc aicnome Yakobodi ngambofocnonggeng 12 inguc aiyelewec.

<sup>9</sup> “Ngambofocnonggeng yenge gbangineng Yosefe hasowac aicnolu Isip himongka lobong ngic gocne yengi fuli balu bahikeibong. Iwa gaemewa Wapongti yeholec gawecte ailu <sup>10</sup> doickacni baickelu kwele-madicka gaga bafuwacnowec. Yedi Yosefe kwele-madic aicnolu ngage-ngage-motoc lacnowec. Lacnome Isip ngictau Faraodi ngage-ngageine yogo nganime madickewec. Madickeme yeicne mac mafaine nga Isip ngic-ngigacfocine momoc damongbalu ganale ngic sugucne lowec.

<sup>11</sup> “Lome gaemewa Isip nga Kenan himongka loloc fikeme umac sugucne bafuwaibong. Inguc fikeme ngambofocnonggeng yenge noba-nosingte homalu gaibong. <sup>12</sup> Gacgubong Isip himongka nosing fagac, inguc mibong ngagelu Yakobo ye madecfocine salecebame

† **6:9:** Kpakpaduc mac yogolec memba yenge esecne umacka gaibong. Yenge ngic sugucne moniyang moniyang yengele kwelec kwekwe gaibong. Gacgu yengungtihac moneng kpatulelu fuli banagubong ngic sugucne yengi yogo hegilecebalu gaibong. **6:10:** Luk 21:15 † **6:13-14:** Ibu-mac Yerusalem iwa ngiyewec yogo mac gbagbacne wackeibong. Yuda ngic-ngigac yengele yefe-yowa yogo Wapongti Moses lacnowec. **7:2:** Fike 11:31 \* **7:4:** Kaldia yengele himong yogo Mesopotamia kwelina fagac. **7:4:** Fike 11:31-12:5 **7:5:** Fike 12:7; 15:18; 17:8; 48:4 **7:6:** Wah 12:40 **7:7:** Wah 3:12 **7:8:** Fike 17:9-14; 21:4 **7:9:** Fike 28:1-3; 37:11; 39:1-3,21-23 **7:10:** Fike 41:37-44 **7:11:** Fike 41:54; 42:1-2



iwa hikeibong. <sup>13</sup> Gacgu dameng monicka hatacmac hikeibong Yosefedi hae-gbafocine yengela fungineime mime yegengkewec. Yegengkeme Farao ye Yosefe yeicne nga alingfocine yengele fungine ngage-motowec. <sup>14</sup> Inguc aime Yosefedi haefocine edocebame galu mamacngineng Yakobo nga alingfocngineng sasawa biyac wacebame kwesiibong. Aime ngic-ngigac kwesiibong, yengele dzalengineng 75 aiwec. <sup>15</sup> Aime Yakobo ye Isip himongka hikegacgu homawec. Nga madecfocine yenge ngambofocnggeng, yenge inguchac iwa homayackeibong. <sup>16</sup> Homabong kpongngineng Sekem macca baceba kwesiibong. Kwesilu Abrahamti Sekem mackacni ngic monic Hamor yele madecfocine yengelacni himong monic dongesile ailu siliwa moneng goctedi fuli bawec, iwa locebaibong.

*Mosesle siduc Stifenti miwec*

<sup>17</sup> "Wapongti himong Abraham lacnonale biyachac mipangkewec, yogo noine fikenale dameng bangkalewec. Bangkaleme Yakobo ngesafocine nga ngambofocine yenge Isip himongka homacne fikewec aibong. <sup>18</sup> Inguc ailu gacgubong Isiple ngictau gbolicne monic fikewec, ye Yosefele fungine mi ngagewec. <sup>19</sup> Aime ngictau ye hocne ngambofocnggeng mife-miwa aiyelelu basowalecebawec. Basowalecebalu yanguc edocebawec, 'Ngenge sabacfocngineng hegilecebabong homayackedaing.'

<sup>20</sup> "Dameng iwa Moses ye fikeme Wapongti kogoc yogo ngame madickewec. Aime ye mamacinele macca tamacne habackang game damongkeibong. <sup>21</sup> Inguc ailu bahikelu mac lobaina dadalicna lobong fawec. Faemewa Farao aduinedi bafuwalu yeicne madec ingucne balu bagame sugulewec. <sup>22</sup> Suguleme Farao ngicfocine yengi Isip ngic-ngigac yengele aibaba nga ngage-ngage-motoc weducnobong ngage-motolu gawec. Galu wiyac aiwec nga miwec yogo tapiliineholec.

<sup>23</sup> "Game hifaine 40 aime ye Israel ngic hae-gbafocine ngani-ngagec aiyelenale kweleine efeckeme hikewec. <sup>24</sup> Hikeme Isip ngic monicti Israel ngic monic moc weme Mosesdi nganilu agoine bafickelu ameine bafaliyelu Isip ngic weme homawec. <sup>25</sup> Welu yanguc ngagewec, 'Na ngic hae-gbafocine Faraole molewacni bamoctoceanogale milu Wapongti bole inguc nelewec, yogo ngage-motogaing mecne.' Ye inguc ngagewec, aime Israel ngic-ngigac yengebac yogo mi ngage-motoibong. <sup>26</sup> Aime mac saeme hatacmac hikelu Israel ngic yaeckang moc wenaguboc bafuwacepalu asa bacepanogale aiyetelu yanguc edocepawec, 'Ngic yaec hegilenic. Neke ngic hae-gbadi wenagugaic, yogo mi madickegac.'

<sup>27</sup> "Inguc mime ngic agoine wewecti Moses wepackelu yanguc miwec, 'Madi nongele mimocto-mimocto ngic me damong locguwec? <sup>28</sup> Ga awecnahac Isip ngic monic wehomamec, inguchac na wehomacnunogale aigic, me?' (Wah 2:14)  
<sup>29</sup> Inguc mime Moses ye yowa yogo ngagelu iwahac hangoc Midian himongka kwilic hikelu gawec. Iwa gacgu ngigac balu madec yaeckang kweficepawec.

<sup>30</sup> "Aime hifa 40 Midian himongka game motome Sinai tikiwapec himong kisiwa misaine mikacka hikelu gawec. Gacgume angelo monicti yoc-kpiscinele mangngina dac-ubilang kwelina fikeme nganiwec. <sup>31</sup> Nganilu kwatackelu ngani-motonogale leme Sugucnele yowa yanguc fikewec, <sup>32</sup> 'Na ngambofocgone yengele Wapong. Na Abraham nga Aisak ailu Yakobo, yengele Wapong gagabachac.' Fikeme Moses ye dengdengkeme nganinogale hangockeme dongeine sangkelu ngosockelu domawec.

<sup>33</sup> "Domaemewa Sugucnedi yanguc edowec, 'Himong domagic, yogo naneicne himong gbagbacne. Ilec hige-ebecgone hemoctoc. <sup>34</sup> Na ngic-ngigacfocine Isip himongka sowacne aiyelebong nganicebagabac. Ailu hiyabong ngagegabac. Yogo bacebabe kwesiningte yakumac wagabac. Ilec Isip himongka salecgube biyac hikedamec.'

<sup>35</sup> "Ngic yenge Mosesle yowa hegilelu yanguc miibong, 'Madi nongele mimocto-mimocto ngic me damong locguwec?' (Wah 2:14)  
Wapongti ngic ye hocne Israel ngic yengele damong ailu ngaba yengele molewacni bacebanale miwec. Milu angelo saleme yoc kpiscina dac-ubilang fikeme yogolec kwelina fikecno domalu bole-yowa yogo milu edowec. <sup>36</sup> Inguc ailu Wapongti Moses saleme hikelu baceba kwesiwec. Ye Isip himongka nga Kiwec Sasacna ailu himong kisiwa misaine mikacka pasile maaine nga pasi mi ngani-nganiine homacne balu gacgume hifa 40 aiwec.

<sup>37</sup> "Ailu Mosesdi hocne Israel ngic-ngigac yanguc edocebawec, 'Wapongti alingfocngineng yengele hewackacni siduc-mimi ngic monic na ingucnehac bafuwangedaictc.' (Yef 18:15)

<sup>38</sup> Ailu yedi hocne himong kisiwa misaine mikacka ngambofocnonggeng yengeholec kpatule galu Sinai tikiwa felu angelole mickacni yowa gagaineholec ngagelu walu edocnubawec.

<sup>39</sup> “Aime ngambofocnonggeng yenge yele yowale takicebame yowaine hegileibong. Hegilelu Isip himongka hefaliye hikenogale kwelengineng salelu <sup>40</sup> Aron yanguc edoibong, ‘Ga siduc-gbong gocne banoleengka siduc-gbong yogo yengi molickenoledaingte. Mosesdi Isip himongkacni mengocnubalu kwesiwec, yedi mecne biyac sangkeme miyac aiwec.’ (Wah 32:1)

<sup>41</sup> Inguc milu dameng iwahac siduc-gbong monic bulumaka madecinele ngani-ngani ingucne balu depec bacnoibong. Yenge molenginengti iluc balu yogo milu afeelu mitengkeibong. <sup>42</sup> Inguc aibong Wapongti lobe holeyelelu sawawa aleng nga iluc afeebalu kwelec kweyeleningte hegilecebawec. Wapongte siduc-mimi ngic yengele hibiwa yowa yogolec yanguc biyachac kwelengkeicne fagac.

‘Israel ngic-ngigacfocine, ngenge hifa <sup>40</sup> himong kisiwa misaine mikacka galu sicte depec balu me depecte hasoc gocne monic mi lobeneleibong, miyac. <sup>43</sup> Ngenge siduc-gbong Molekte kpoluc-fale tengkecaigaing. Nga siduc-gbong Refan, yele asocmeng ilucine balu gaibong. Wiyac yogo hocne afeepaibongte ailu na himong dalicka Babilon iwa locngebadaacte.’ (Amo 5:25-27)

#### *Wapongte kpoluc-falele fungine Stifenti miwec*

<sup>44</sup> “Ngambofocnonggeng yenge himong kisiwa misaine mikacka iwa Wapongte dodofic katapale kpoluc-fale baibong. Aime Wapongti Moses edalilu milockecnowec, yogolec silicina baicne. <sup>45</sup> Yosuwadi molickeyeleme ngambofocnonggeng kpoluc-fale yogo hocne bayelelu iwa Israel yengele alingkacni miyac yengele himongka hikelu balu ngiyeibong. Ngiyeebongka Wapongti Israel yengele alingkacni miyac yenge gaibong, yogo weyebic aiyelewec. Aiyeleme ngambofocnonggeng yenge himong yogo balu Wapongte kpoluc-fale himong iwa taockeme taoc balu gabong Dawidi fikewec. <sup>46</sup> Wapongti Dawidi kwele-madic aicnome yedi Yakobole Wapong, yele mac monic banale milockewec. <sup>47</sup> Foinac, yogo yeuctihac mi bawec, Solomonti Ibu-mac yogo bawec.† <sup>48</sup> Wapong Feicnetowanonggeng yebac ngic yengi mac monic moledi baicne, iwa ngiye-fangkec mi aicaigac. Wapongte siduc-mimi ngic monicti mic-yowa yanguc miwec,

<sup>49</sup> ‘Sugucnedi yanguc migac, “Ngictaule ngiye-ngiyene yogo honocmeng. Nga himong yogo hige ede-edene. Ilec ngengi oma mac baneledaingte? Me oma mapicka ngiye-ngagac aidacte? <sup>50</sup> Foinac, na molenedi wiyac sasawa bayackeiba.”’ (Yes 66:1-2)

<sup>51</sup> “Ngic-ngigac linggangne ngenge kwele-hedecngineng fongkeyackeicne, ngambofocnonggeng yenge Tili Asu mife-miwa aicnolu gaibong, ngenge yenge ingucne aigaing. <sup>52</sup> Ngambofocnonggeng yenge Wapongte siduc-mimi ngic sasawa weyebic aiyeleibong. Siduc-mimi yenge pasi dondonnele fileine fikenale siduc-yowa miibong. Aime ngengele ngambofocnonggeng yenge hocne yengungtihac siduc-mimi ngic yogo wecebaibong. Gacgu Ngic Madicne yeicne fikeme ngengi hocne doc balu ye wehomaibong. <sup>53</sup> Ngenge angelole mickacni yefe-yowa baibong. Ailu sifu yogo hegileibong.”

#### *Stifen wehomaibong*

<sup>54</sup> Stifenti yowa inguc edocebame ngagebong kwelenginang bame, yenge aalic sugucne ngagelu ye hila nganilu micngineng hisalangkelu dodomangineng sowalewec. <sup>55</sup> Stifen ye Tili Asudi kweleina wakeme honocmengka hilame fewec. Feme Wapongtipili nga hibi-angocineholec nga Yesu ye Wapongte mole-foleinapoc domame nganilu yanguc miwec, <sup>56</sup> “Ngagegaing, na honocmeng angkeme Ngicte Madec ye Wapongte mole-folewapec domame nganigabac.” <sup>57</sup> Inguc mime yenge sasawadi hendolong sugucne ailu hedecngineng kwedickelu yela gbulucke lelu igockela igockela hikeibong. <sup>58</sup> Hikelu taon lobaina haulu posadi wickelu holeibong. Inguc ailu ngic wiyac ngani-ngagac ailu miibong, yenge ngakpingineng dalicne hemoctolu ngic-madec monic wacine Sol, yele higewa habuwei-bong.

<sup>59</sup> Habuwelu Stifen posadi wickelu holeebongka yedi yanguc milu milockewec, “O Sugucne Yesu, ga asune banong.” <sup>60</sup> Inguc milu ketadi holelu aukwelu wackelu miwec, “Sugucne, ga bikicngineng yogo hegileyenong.” Inguc milu homawec.

## 8

1 Homame Sol ye aibaba yogolec ngagem madickewec.

*Yesule habu weyebic aiyeleibong*

Aime dameng yogowahac Yesule habu Yerusalem iwa gaibong, yenge molickelu weyebic aiyeleibong. Aiyeleibong siyeckelu Yudeya nga Samaria himongka hikeyackeibong. Salecebaicne yengi sugu Yerusalem iwa gaibong. <sup>2</sup> Aime ngic gocne Sugucne alang bacnolu gaibong, yengi Stifen balu hisonggong sugucnebenang aicnolu longkeibong. <sup>3</sup> Aime Sol ye Yesule habu weyebic aiyeleale macsoc macsoc felu ngic-ngigac fulucke-bac aiyelelu mucmacka locebalu gawec.

*Filip Samaria taonka hikewec*

<sup>4</sup> Inguc aime yenge siyeckelu hangoc macsoc hike galu ngic-ngigac Wapongte mic-yowa mibong yegengkeme ngagelu gaibong. <sup>5</sup> Inguc aibong Filip ye Samaria ngic yengele taonka hikelu Mesiale yowa-siduc edocebalu weduyelewec. <sup>6</sup> Milu ngagesingkeningte pasile maaine momoc bame nganilu yowainele hedec kwelu ngageibong. <sup>7</sup> I yangucte, ye aleng wonongkolec homacne yebicebame ngic kwelewacni ofelu aukwelu hikeibong. Ailu ye puling haicne monic-monic homacne bamadicebawec. <sup>8</sup> Inguc aime taon iwa ngic-ngigac yenge beliyebenangkeibong.

<sup>9</sup> Aime taon iwa ngic monic gawec, wacine Saimon, ye kpanggec bole balu game Samaria ngic-ngigac yenge ye nganibong damuineholec aiwec. Aime ye yeicnele ngageme feicne aiwec. <sup>10</sup> Aime feicne waicne yenge momoc yele ngageibong feicne aime alang bacnolu yanguc milu gaibong, “Ye hocne Wapongte tapili sugucne.” <sup>11</sup> Ye kpanggec bole bame kwatackelu dameng dalicne ye balaibelu hedec kwelu gaibong. <sup>12</sup> Aime Filipdi Wapongte ngani-damongte siduc nga Yesu Kristole fungine mime yegengkeme ngic-ngigac sasawadi momoc ngagesingkelu misa lowaibong. <sup>13</sup> Inguc aibong Saimon ye inguchac Yesu ngagesingkelu misa lowalu Filip emeina gawec. Filipdi pasile maaine nga pasi damuineholec bame Saimon ye yogo nganilu kwatackelu ngage-ngage bole homacne bawec.

*Pita nga Yoane yeke Samaria hikeiboc*

<sup>14</sup> Samaria ngic-ngigac yenge Wapongte yowa ngage-angac aiibong, yogolec siduc Yerusalem iwa salecebaicne yengela hikeme ngageibong. Ngagelu Pita nga Yoane salecepabong hikeiboc. <sup>15-16</sup> Esecne yengela Tili Asu monic mi wawec, yenge Sugucne Yesule wacka sugu misa lowaibong. Ilec ailu yeke hikelu yenge Tili Asu baningte Sugucne milockeiboc. <sup>17</sup> Aime salecebaicne yeke molenginecti socnginang loboc yenge Tili Asuholec aiibong.

*Tili Asu nalic mi fuli banoga*

<sup>18</sup> Salecebaicne yeke ngic yengele socka molenginec loboc Tili Asuholec aiibong. Inguc aibong Saimon yogo nganilu moneng yetenale bawelelu <sup>19</sup> yanguc edocepawec, “Ngeke bole-yowa tapiliineholec yogo na momoc neleboc na ingucnehac ngic socnginang molene lobe Tili Asuholec aidang.”

<sup>20</sup> Inguc mime Pitadi yanguc edowec, “Wapongti Tili Asu moc gelegac, yogo monengti fuli banogale ngageiboc, me? Monengoneholec ngeke momoc dac-sanangka fedabiyecte! <sup>21</sup> Wapongti kwelegona kwesacgone nganigacte tapili yago monic mi balu mocbenang gadamecte. <sup>22</sup> Ga sisipilic aibabagone yogo hegilelu kwelegone hefaliyeme Sugucne milockeng kwelegona angac kwesacne hegilecguna. <sup>23</sup> Na nganibe, ngage-ngage sowacnedi ga basowalecgume bikicti muc ingucne hefecgugac.”

<sup>24</sup> Inguc mime Saimonti miwec, “Wiyac migabiyec, yogo mi fikeneledaic. Ilec ngeke ngekuhuc nale ailu Sugucne milockenic.”

<sup>25</sup> Aime salecebaicne yeke Sugucnele yowa ngic-ngigac yengela miyebocka yegengkeme edocebalu weduyeleiboc. Weduyelelu Yerusalem hefaliye hikenogale milu, Samaria ngic-ngigac yengele mac-aling gocne falegacsoc yogowa Siduc Madicne miboc yegengkeme hikeiboc.

*Filipdi Afrika ngic Siduc Madicne edowec*

<sup>26</sup> Sugucnele angelo monicti Filip yanguc milu edowec, “Ga efeckelu Yerusalemkocni yefe Gasa taonka haugac, iwa hikedamec. Yefe yogo himong kisiwa misaine mikacka fagac.” <sup>27</sup> Inguc milu edome Filip efeckelu hikewec. Hei, Etiopia himongka ngigac-tau monic gawec, wacine Kandasi. Aime ngic sugucne monic\* gawec. Ngigac yele hiye-moneng damongkelu gawec, ye Yerusalem iwa Sugucne afeenale ngagelu hikewec. <sup>28</sup> Afeeme motome hefaliyelu keleta feina ngiyelu Wapongte siduc-mimi ngic Yesaiyale hibi wafelu hikewec. <sup>29</sup> Inguc aime Asudi Filip yanguc edowec, “Ga biyac keleta emeina edi lenong.”†

**8:3:** Sale 9:1,13; 22:4; 26:9-11    **8:17:** Sale 19:6    \* **8:27:** Ngic yogo ye hucine baicne.    † **8:29:** Ga inguchac Yefe-yowa 23:1 nga Yesaiya 56:3-7 wafenong. Esecne ngic ingucne yenge Yuda yengeholec nalic mi wetackelu gaibong.

<sup>30</sup> Inguc mime Filip ye yela gasacke lelu ngageme ngic ye Wapongte siduc-mimi ngic Yesaiya, yele hibi wafeme ngagelu yanguc uwacnowec, “Yowa wafegic, yogolec fungine ngage-motogic, me?”

<sup>31</sup> Uwacnome miwec, “Monicti mi mime yegengkeme, naneuc nalic mi ngage-motodacte.” Inguc milu Filip keletawa feme yeke momoc ngiyenicta sanangne micnowec.

<sup>32</sup> Wapongte hibi wafewec, yogo yanguc,  
 “Lama monic weheduc ainogale bahikebong mi hiyacaigac, me lama madecinedi dowec baloc-baloc ngic yela waickelu facaigac. Silicine ingucnehac ngic monic wehomanogale bahikebong yowa monic mi miwec. <sup>33</sup> Yenge yowawa tapiline bawalu yele yowale noine mi milu himongka gagaine baickeibong. Aime ye ngesa-ngambo mikac. I yangucte, yenge gagaine himongkacni baickeibong.” (Yes 53:7-8)

<sup>34</sup> Inguc wafelu ngic sugucnedi Filip yanguc milu uwacnowec, “Wapongte siduc-mimi ngic ye male inguc miwec, ye yeicne me ngic monicte miwec?” <sup>35</sup> Uwacnome Filipdi ameine bafaliyelu Wapongte hibi yogowacni taockelu Yesule Siduc Madicne yogolec fungine mime yegengkewec.

<sup>36</sup> Inguc ailu hikecgu misa monicka hike sulumelu ngic sugucnedi yanguc miwec, “Nganic, misa yago fagac. Aime omadi yefene hedickeme misa mi lowagabac? Ga nalic misa lowaneledeng, me?”

<sup>37</sup> [Inguc mime Filipdi miwec, “Kwelegone bucbuchac ngagesingkeengka nalic aidacte.” Mime yowaine bafaliyelu yanguc edowec, “Yesu Kristo ye Wapongte madec, yogo ngagesingkegabac.”]† <sup>38</sup> Inguc milu keleta hefeme domame Filip nga ngic sugucne yeke momoc misawa haulu Filipdi misa lowacnowec. <sup>39</sup> Aime misawacni ofeebocka Sugucnele Asudi Filip iwahac baickelu hikeme ngic sugucne ye Filip mi nganilu beliyelu hikewec. <sup>40</sup> Aime Asudi Filip Asotus taonka lome gagac inguc nganiwec. Ailu iwacni molickelu macsoc Siduc Madicne mime yegengkeme hikecgu Sesarea taonka bamoctowec.

## 9

### *Sugucnedi Sol fikecnowec* *Sale 22:4-16; 26:9-18*

<sup>1</sup> Solle kwelewa kwele-dac sugucne fawecte Sugucnele mic-tengtengfocine ngaba aiyelelu webac aiyelenale milu depec-baba ngic yengele damong sugucne yela hikewec. <sup>2</sup> Hikelu yanguc edowec, “Ngic me ngigac monic Damasko taonka Yesule yefe balaibeigaing, yenge bafuwacebalu bacebalu molenginang dodocebacte. Dodocebalu Yerusalem taonka bacebalu kwesibele Damasko kpakpaduc macte micne, yengele hibi kwelengkelu nelec.”

<sup>3</sup> Lacnome ye hikelu Damasko bangkalenale aiyemewa honocmengkacni angoc monicti iwa walu kwenggalangkewec. <sup>4</sup> Kwenggalangkeme ye himongka lodingke wawelu fame, yowa malac monic yanguc fikeme ngagewec, “**Sol, Sol, ga omale weyebic ainelelu gacaigic?**”

<sup>5</sup> Inguc mime Soldi uwacnowec, “Sugucne, ga maa?”

Inguc mime miwec, “**Weyebic ainelecaigic, na hocne Yesu.** <sup>6</sup> **Ilec ga fangkelu taonka hikec! Iwa gaengka wenuc aidamecte, yogolec yowa edocgudaicte.**”

<sup>7</sup> Aime ngic yeholec hikeibong, yenge yowangineng mikac aime moc sugu dagewelu domaibong. I yangucte, yenge yowa sugu ngageibong. Ailu ngic monic mi nganiibong. <sup>8</sup> Aime Sol ye fangkelu donge hilame dongeine kundung kweme ngicfocine yengi moleina balu Damasko bahikeibong. <sup>9</sup> Bahikebong iwa hadeng habackang dongeine kundung kweme nosing misa monic mi nolu ngiyewec.

### *Ananiasdi Sol bafuwawec*

<sup>10</sup> Damasko taonka mic-tengteng ngic monic gawec, wacine Ananias, ye Sugucnedi gung-didicka ingucne fikecnolu wackewec, “**Ananias.**”

Wackeme miwec, “Sugucne, na ya.”

<sup>11</sup> Mime Sugucnedi yanguc edowec, “**Ga fangkelu yefe monic wacine Dondonne wackecaigaing, iwa hikelu Yudasle macka felu ngic monic wacine Sol, Tasas taonkacni, ye basackelu bafuwadamec. Ngagegic, ye milockelu ngiyegac.** <sup>12</sup> **Ye gung-didicka ingucne yanguc nganigac. Ngic monic wacine Ananias, yedi yela hikelu dongeine hilanale milu moleine socina logac.**”

8:36: Sale 10:47 † 8:37: Hibi esecne Lukadi kwelengkewec, yogo nganilu iwacni kwelengkebong kwelengkebong ofewec, yengelacni gocne hewacine 37 iwa mi fagac. Ngic-ngigac yenge hibi kwelengkeicne yogo wosaelu nganiibong Lukadi mi kwelengkewec mecne. 8:40: Sale 21:8 9:1: Sale 8:3

<sup>13</sup> Inguc mime miwec, “Sugucne, ngic yele homacne mibong ngagecaigabac. Ye Yerusalem iwa ngic-ngigac gale bingec webac homacne aiyelecaigac. <sup>14</sup> Nga iwa inguchac wacgone wackelu mitenggucaigabeleng, nonge sasawa witicnubalu bacnubadaicte. Ilec depec-baba ngic micne yengi bole-yowa tapilinginengkolec yogolec hibi lacnobong, balu kwesilu gagac.”

<sup>15</sup> Inguc mime Sugucnedi yanguc edowec, “**Ga hikec. Na ngic ye hocne bole-ngicne bawosaeiba. Ye Israel yengele alingcakni miyac, ngic-ngigac yogo yenge, nga ngictaufocngineng ailu Israel ngic-ngigacfocine yengela siducne mime suguledaicte.** <sup>16</sup> **Aime nale wacte ailu ye doic nga umac haicne monicte feina gadaicte, yogo edalilu weducnodacte.”**

<sup>17</sup> Inguc mime Ananaias ye hikelu mac miwec, iwa felu Solle socka moleine lolu miwec, “Ngic hae-gbane Sol, fangkec. Sugucne Yesudi yefewa fikegelewec, yedi hocne salecnugac. Ga dongegone hilaengka Tili Asu kwelegona wakenale welegabac.” <sup>18</sup> Inguc miyemewa ye iwahac dongeinacni wiyac monic sekec ingucne wame dongeine hilalu fangke misa-lowac aiwec. <sup>19</sup> Ailu nosing nolu sanangkewec.

*Soldi Yesule siduc mime yegengkeyelewec*

Sol ye mic-tengtengfocine Damasko gaibong, yengeholec hadeng gocne gawec. <sup>20</sup> Iwahac galu Yuda ngic-ngigac yengele kpakpaduc macka felu Yesule fungine yanguc edocebalu weduyelewec, “Yesu ye Wapongte madec.”

<sup>21</sup> Inguc edocebame yenge ngagelu kwatackelu yanguc miibong, “Ngic yedi hocne Yerusalem taonka Yesule wac yogo alang bacnolu gabong, weyebic aiyelelu gawec. Yawa inguchac witicebalu depec-baba ngic micne yengela bacebalu hikenogale kwesigac. Ngic yogo, me?”

<sup>22</sup> Inguc mibong Sol ye yanguc milu gawec, “Foinac, Yesu ye Mesia.” Ye yogolec fungine mime yegengkeyeleme Yuda ngic-ngigac Damasko gaibong, yenge yowa yogo tapiliineholec ngagelu kwatackelu yowaine ameine mi bafaliyeibong.

<sup>23</sup> Ye hadeng homacne inguc ailu game Yuda ngic-ngigac yenge Sol wenogale yowa hefeibong. <sup>24</sup> Ailu ye weningte milu taonte oda nuina deboc hadeng damong locebabong domaibong. Yele yowa milu hefeibong, yogo yeuctihac biyac ngagewec. <sup>25</sup> Aime Sol mic-tengtengfocine, yengi debocka ye uficka umengkelu taonte oda yefina yefe lobong lobina haulu hikewec.

<sup>26</sup> Hikelu Yerusalem sulumelu mic-tengtengfocine yengeholec taockenale yowaine mime yenge sasawadi hangoc aiibong. Aime ye mic-tengteng noine aiwec, yogo mi ngagesingkeibong. <sup>27</sup> Aime Banabadi Sol balu salecebaicne yengela mengocke hikelu yanguc edocebawec, “Sugucnedi Sol yefewa fikecnolu yowa edowec. Inguc aime ye Damasko taonka hangoc mikac Yesule fungine mime yegengkewec.” <sup>28</sup> Aime Sol ye yengeholec Yerusalem ngiye-fangkec ailu yowa hangoc mikac Sugucnele wacka edocebalu weduyelelu hike-kwesic aiwec. <sup>29</sup> Ailu Sugucnele wacka sanangnehac domalu ngic Siduc Madicne hangoc mikac edocebawec. Edocebame Yuda ngic-ngigac Grik yowa milu gaibong, yengeholec yowangineng fec-wac aiwec. Aime ngic yogo yenge ye webong homanale aiibong. <sup>30</sup> Inguc aibong ngic hae-gbafocngineng yengi yogo ngagelu Sesarea taonka mengocke haulu lobong hikegacgu Tasas taonka hikewec.

<sup>31</sup> Aime Yesule habu Yudeya nga Galili ailu Samaria prowins iwa gaibong, yengela kwelemogung fikewec. Fikeme gaebongka Yesule habu sugulelu Sugucne alang bacnolu kweledi dofickelu afeibong. Aime Tili Asudi mibasanang aiyelewec.

*Pitadi ngic puling monic bamadickewec*

<sup>32</sup> Pita ye macne macne falegacsoc, iwa lolickelu hikegacgu Wapongte bingec Lida taonka gaibong, yengela hikewec. <sup>33</sup> Hikelu iwa ngic monic nganiwec, wacine Ainions, ye puling ailu mapicka falu game hifa 8 biyac aiwec. <sup>34</sup> Aime Pitadi yanguc edowec, “Ainions, Yesu Kristodi bamadickugacte fangkelu mapigone geuc wedunong.” Mime ye iwahac fangkelu domawec. <sup>35</sup> Inguc aime ngic-ngigac Lida taon nga Saron himongcakni yenge ye nganilu kwelengineng hefaliyeme Sugucneholec wetackeibong.

*Pitadi Tabita bagbolyewec*

<sup>36</sup> Yopa taonka mic-tengteng ngigac monic gawec, wacine Tabita, Grik yowawa wacine monic Dokas. Ye ago babaficte aibaba madicne ailu waweweine baficebalu gawec. <sup>37</sup> Aime dameng iwa Tabita ye huc fikecnome homawec. Homame yenge kponggbongine misa lowacnolu mac kweline monic feina bafelu lobong fawec. <sup>38</sup> Aime Pita ye Lida taonka dadalicne ngiyewec, inguc ngagelu mic-tengtengfocine yenge Yopa taoncakni ngic

yaeckang salecebabong yela hikeiboc. Hikelu yanguc edolu dogbac aicnolu miiboc, “Ga nongela biyac welec!”

<sup>39</sup> Miboc Pita ye ngageme efeckeme yekeholec hikeibong. Hike sulumelu kponggbong fawecka mengockelu feiboc. Febong ngigac-hosec sasawa yenge lolickelu hii kwele-sowac aibong. Ailu Dokas gbolicne galu ngakpi-kpoluc gbodoyelelu gawec, yogo edaliyackeibong.

<sup>40</sup> Aime Pitadi yenge salecebame hauyackebong, ye ketadi holelu milockewec. Milockeme motome kponggbong fawecka hefaliyelu yanguc edowec, “Tabita, ga fangkec.” Mime ye dongeine hilalu Pita nganilu fangke ngiyewec. <sup>41</sup> Ngiyeme Pitadi moleina balu bafangkeme fangkelu domawec. Domame Wapongte bingec nga ngigac-hosec yenge Tabita gboliye fangkewec, yogo nganiningte wacebawec. Wacebame welebong Tabita gboliyelu fangkewec, yogo edalicebawec. <sup>42</sup> Aime yenge siduc yogo mibong, Yopa taonka sawelu hikeme homacnedi Sugucne ngagesingkeibong. <sup>43</sup> Aime Pita ye ngic monic wacine Saimon, bulumaka socine bacaigac, yele macka dameng dalicne inguc ngiye-fac gawec.

## 10

### *Angelodi Konelius fikecnowec*

<sup>1</sup> Sesarea taonka ngic monic gawec, wacine Konelius. Ye hudu-baba ngic yengele damongte aling tofaine, wacine Itali, yengelacni ngic 100, yengele sugucnenging gawec. <sup>2</sup> Ye yeicne nga golowacocine sasawa, yenge kweledi Wapong ago balu alang bacnolu gai-bong. Konelius ye kwele-madicka wiyac homacne ngic-ngigac waweweine yeelu gawec. Ailu Wapong hadengsoc milockelu gawec. <sup>3</sup> Hadeng monicka Konelius ye awelilicte 3 kilok ingucne aiyemewa Wapongte angelo monicti gung-didicka ingucne yela fikelu yanguc edowec, “Konelius.”

<sup>4</sup> Inguc mime kwatackelu hangockeme donginedi sanangne nganilu miwec, “Sugucne, oma wiyac?”

Mime yedi miwec, “Mimilocgone nga kwele-madicgonele wiyac ngic-ngigac waweweine yelecaigic, yogo ibu ingucne Wapongta feme ye yogolec ngageme madickecaigac. <sup>5</sup> Ilec ga yakumac Yopa taonka ngic salecebang hikelu ngic monic, wacine Saimon, wacine monic Pita, ye mengocke kwesidabiyeng. <sup>6</sup> Ye ngic monic bulumaka socine bacaigac, wacine Saimon, yele macka ngiyegac. Macine yogo kiwec mecina ngiyegac.”

<sup>7</sup> Angelo yowa yogo edolu hikewec. Hikeme Konelius ye macinele kwelec kwekwekecine nga hudu-baba ngic monic ye Wapong alang bacnocaigac, yenge wacebame welebong yowa edocebawec. <sup>8</sup> Ailu Yopa taonka salecebame hikeibong.

### *Pitadi gung-didicka ingucne nganiwec*

<sup>9</sup> Ngic yenge hikecgu yefewa fabong saeme hatacmac hikegacgu mac bangkaleibong. Aime Pita ye wenac hewac-hewac milockenale mac feina mac-dakec ingucne fawec, iwa fewec. <sup>10</sup> Felu nosingte homalu mime nosing lobebong ye gung-didicka ingucne yanguc nganiwec. <sup>11</sup> Honocmeng angkeme wiyac gocne nganiwec. Yogo kpoluc ingucne mecine neboc nga neboc balu himongka lobong wanale ingucne aiwec. <sup>12</sup> Yogolec kwelina bec-sic sugucne kpisicne ailu hema nango haicine monic-monic fabong nganiwec. <sup>13</sup> Nganime yowa malac monic yanguc fikewec, “**Pita, ga fangkelu wecebalu nocebac.**”

<sup>14</sup> Inguc fikeme Pitadi yanguc miwec, “Sugucne, yogo nalic mi nocebadacte! Na wiyac wonongkolec ailu Sugucnedi aka lowec, yogo monic mi noibawa nalic mi nodacte.”

<sup>15</sup> Inguc mime alecine yaeckang aime miwec, “**Wapongti aka yogo haickegac, yogo wonongkolec mi midamec.**”

<sup>16</sup> Aime yowa mime habackang aime iwahac kpoluckolec fuluckeme honocmengka hatacmac fewec.

<sup>17</sup> Feme Pita ye gung-didicka ingucne nganiwec, yogolec ngage-ngage bole balu ngiyeme Konelius ngicfocine yenge Yopa taonka hikeibong. Hikelu Saimonte macte uwala uwala hikecgu oda nuina domalu <sup>18</sup> wackelu uwaibong, “Saimon wacine monic Pita, ye mac yawa gagac, me?”

<sup>19</sup> Aime Pita ye gung-didicka ingucne nganiwecte ngage-ngage bole balu gaemewa Asudi yanguc edowec, “Ngagegic, ngic habackang yenge kwesilu ga basacgugaing. <sup>20</sup> Ilec ga fangke haulu yengeholec hikenogale milu ngageboc mi aidamec. Ngic yogo yenge nani salecebabe kwesigaing.”

<sup>21</sup> Inguc mime Pita yengela haulu miwec, “Ngagegaing, ngic basackegaing, yogo na hocne. Ngenge omale kwesigaing?”

<sup>22</sup> Inguc mime ngic yengi yanguc miibong, “Hudu-baba ngic yengele damong ye Wapong alang bacnolu aibaba dondonne balaibeccaigac. Aime Yuda ngic-ngigac sasawa yenge ye ngagebong madickecaigac, ye hocne angelo gbagbacne monicti fikecnolu yanguc miyec, ‘Ye baengka macgona weleme micinacni yowa ngagecte edodamec.’” <sup>23</sup> Inguc mibong Pitadi yenge bacebalu macka aneng aiyeleme faibong.

*Pitadi Koneliusle macka hikewec*

Fabong mac saeme fangkelu ye nga ngic yogo yenge hikenogale aibong ngic haebafocngineng gozne Yopa gaibong, yenge momoc hikeibong. <sup>24</sup> Yenge yefewa deboc monic falu mac saeme fangkelu hikegacgu Sesarea sulumeibong. Konelius ye alingfocine nga agofocine wacebame wangep gabong hike sulumeibong. <sup>25</sup> Hikelu Pita ye macka fenogale aime Koneliusdi wele emeina ketadi holecnolu afeewec. <sup>26</sup> Afeeme Pitadi balu bafangkelu yanguc edowec, “Fangkec, na mi afenuc, na ngic agogone.”

<sup>27</sup> Inguc mime mingagec ailu ye mac kwelina felu ngic-ngigac homacne kpaduckelu ngiyebong, yenge nganicebalu <sup>28</sup> yanguc edocebawec, “Ngenge Yuda ngic nongele aibaba ngagegaing. Nonge Israel yengele alingkacni miyac ngengeholec ago ailu nganinagulu gaga inguc mi ainangte aka-yowa sanangne fagac. Aimebac ngenge ngic wonongkolec miyac, ailu Sugucnedi aka mi lowec, yogolec Wapongti edocnume yegengkenelewec. <sup>29</sup> Yogolec hocne hefolecubong welenogale milu mi kpungkebac. Aime biyac hefolecngaing, yogolec fungine mibong ngagebe.”

<sup>30</sup> Inguc mime Koneliusdi yanguc edowec, “Hadeng 4 motome aweleme 3 kilok ingucne aiyemewa milockeiba. Ailu ngic monic ngakpiine angocineholecti nala fikelu <sup>31</sup> yanguc edocnuwec, ‘Konelius, ngagec. Wapongti mimilocgonele nga kwele-madicgonele wiyac ngic-ngigac waweweine yeleaicaig, yogolec ngage-madickegac. <sup>32</sup> Ilec ga Yopa taonka ngic salecbang hikelu Saimon, wacine monic Pita, ye mengocke kwesidabiyeing. Ye ngic monic bulumaka socine bacaigac, wacine Saimon, ye le macka ngiyegac. Macine yogo kiwec mecina ngiyegac.’” <sup>33</sup> Yowa inguc mime na yogolec hocne dacineholec salecebabe gala fuibong. Fubong ga yowane ngagelu kwesigicte ngagebe madickegac. Aime Sugucnedi yowa edocguwec, yogo ninic miyengka ngagenogale Wapongte haicka nongileng momoc kpaduckelu ngiyegabeleng.”

*Pitadi Siduc Madicne edocebawec*

<sup>34</sup> Inguc mime Pitadi yanguc milu edocebawec, “Wapongti ngic-ngigac nganicebalu monic ago balu angac ngagecnolu monic mi hegiledaicte, yogo foinac ngage-motobenangkegabac. <sup>35</sup> Ngic himongne himongne alang bacnolu aibaba dondonne aicaigaing, yengele ngageme madickecaigac. <sup>36</sup> Foinac, Wapongti Yesu Kristo moniyang, ngic-ngigac sasawa nongileng Sugucne hocne saleme wawec. Yedi kwele-mogung yowa madicne Israel ngic-ngigac nongela mime yegengkenolewec, yogo ngenge ngagegaing. <sup>37</sup> Ailu Galili prowinswa molickelu wiyac fikeme Yudeya himong sawelu hikewec, yogo ngenge ngagegaing. Yogo yanguc, Yoane ye ngic misa-lowacte yowa edocebawec. <sup>38</sup> Aime Wapongti Yesu Nasaret-hocni tapili nga Tili Asu locnome yedi himongka lolickelu hikekwesic gawec. Inguc ailu ngic-ngigac bafuwacebalu bamadicebalu gawec. Nga Aleng Sugucnenginengte tapilidi ngic-ngigac gagangineng basowaleicne, yogo yenge bamadicebayackewec. Wapongti nenggac ngiyecnome ye bole yogo bawec.

<sup>39</sup> “Aime Yesu ye Yuda ngic-ngigac nongele himongka nga Yerusalem iwa bole bawec, yogo ngani-ngagec aiyackeibeng. Inguc ailu gacgume yengi ye malicpongka webong homawec. <sup>40</sup> Homalu faemewa hadeng habackang aime Wapongti ye bagboliyeme fangkelu ngic-ngigac fikeyeleme nganiibong. <sup>41</sup> Ngic-ngigac sasawa yengela mi fikewec, miyac. Wapongti esecne widec ngic-ngigacfocine bawosaecubawec, nongela sugu fikewec. Ye homackacni gboliyelu fangkeme nonge hocne nosing misa yeholec noibeng. <sup>42</sup> Aime Wapongti sanangne edocnubame ngic-ngigac weduyelelu yanguc edocebadabeleng. ‘Ngic ye hocne gbolicne nga homaicne aibabanonggeng mimoctonale Wapongti bawosaewec.’” <sup>43</sup> Aime Wapongte siduc-mimi ngic sasawa yenge yowa yanguc mibong yegengkwec, ‘Ye ngagesingkebong, ye le wacka bikicnginengte ameine hegiledaicte.’”

*Tili Asudi Israel yengele alingkacni miyac yengela wawec*

<sup>44</sup> Pita ye yowa inguc milu domaemewa ngagelu ngiyebong Tili Asudi yengela walu kwelenginang wakewec. <sup>45-46</sup> Wakeme Tili Asudi ngageboc mikac Israel yengele alingkacni miyac yengela wame yowa haicne monic-monic milu Wapong wacine bafelu afeieibong.

Aime Pitaholec hikeibong, yenge ngic soc tofangineng helockeicnedi Yesu ngagesingkeibong, yenge yogo ngagelu medecebawec.

Inguc aibong Pitadi yanguc miwec, <sup>47</sup> “Nongileng Tili Asuholec aibeng, pasi yogo ingucnehac ngic yago yengela fikeyeleme misa nalic mi sebileyelenoga.” <sup>48</sup> Inguc milu yenge Yesu Kristole wacka misa lowaningte milu edocebawec. Ailu yengeholec hadeng gocne ngiyenale uwacnoibong.

## 11

*Pitadi wiyac sasawa fike-ofewec, yogolec siduc edocebawec*

<sup>1</sup> Salecebaicne nga ngic hae-gbafocngineng Yudeya himongka gaibong, yengi siduc yanguc ngageibong. Israel yengele alingcakni miyacti Wapongta yowa ngage-angac ailu ngagesingkeibong. <sup>2</sup> Aime Pita ye Yerusalem iwa hefaliye hikeme soc tofangineng helockeicne, yengi miwa-heduc aicnolu <sup>3</sup> yanguc edoibong, “Ga omale soc tofangineng mi helockeicne, yengele macka felu yengeholec nosing nocaigic?”

<sup>4</sup> Inguc mibong Pitadi aibaba funginacnihac fike-ofewec, yogolec yanguc edocebawec, <sup>5</sup> “Na Yopa taonka milockelu gabe dongene balockeme gung-didicka ingucne yanguc nganiiba. Wiyac monic kpoluc sugucne ingucnedi mecine nebec nga nebocka badomalulu honocmengkacni nala lobong wawec, ingucne aiwec. <sup>6</sup> Wame yanguc nganiiba, bec-sic sugucne kpisicne nga sic gocne micnginengkolec ailu hema nango haicine monic-monic fawec. <sup>7</sup> Inguc nganicebabe nala yowa malac monic yanguc fikewec, **‘Pita, ga fangkelu wecebalu nocebac.’**

<sup>8</sup> “Inguc mime yanguc miiba, ‘Sugucne, yogo nalic mi nocebadaicte! Na wiyac wonongkolec nga Sugucnedi aka lowec, yogo micti mi noibawa nalic mi nodacte.’

<sup>9</sup> “Inguc mibe honocmengkacni yowa monic fikeme alecine yaeckang aime miwec, **‘Wapongti aka yogo baickegac, yogo wonongkolec mi midamec.’** <sup>10</sup> Aime yowa mime habackang aime woc-wiyac yogo kpoluckolec fuluckeme honocmengkac hatacmac fewec.

<sup>11</sup> “Aime ngagebeng, dameng iwahac Sesarea taonkacni ngic habackang salecebabong nala kwesilu mac ngiyeiba, iwa domaibong. <sup>12</sup> Domabong Asudi yanguc edocnuwec, ‘Ga yengeholec hikenogale milu ngageboc mi aidamec.’ Inguc mime hikebe ngic hae-gbafocne <sup>6</sup> naholec yago domagaing, yenge balaibecnubong hikelu hudu-baba ngic yengele dameng yele macka feibeng. <sup>13</sup> Aime yedi yowa-siduc yanguc milu edocnubawec. ‘Na angelo monicti fikenelelu yanguc edocnuwec, “Ga Yopa macka ngic salecebang hikelu Saimon, wacine monic Pita, ye mengocke kwesidabiyeng. <sup>14</sup> Yedi yowa edocgume ga nga golowacfocgone nenge yowa yogo ngagelu balaibelu wasecne aidaingte.”’

<sup>15</sup> “Inguc mime na Siduc Madicne edocebaebewa molic-molic nongilang Tili Asu walu kwelenggang wakewec, ingucnehac yengela wawec. <sup>16</sup> Na yogo nganilu Sugucne Yesudi esecne yowa yanguc miwec, yogo ngagesiiba, **‘Yoane ye misa lowayelewec. Nga ngengibac, Wapongti Tili Asu lowangedaicte.’** <sup>17</sup> Ailu nongileng Sugucne Yesu Kristo ngagesingkebeng, Wapongti ngageboc mikac tapili nolewec. Silicine ingucnehac yakumac ngageboc mikac yenge tapili yelewecte, na ingucnedi Wapong aka nalic mi holecnodacte.”

<sup>18</sup> Pita ye yowa inguc milu edocebame yenge ngagelu kwelengineng wame Wapong wacine bafelu yanguc miibong, “Foinac, Wapongti Israel yengele alingcakni miyac kwelengineng hefaliyeme gaga-sanang baningte inguc hocne ayelegac.”

*Antiock taonka Grik ngic-ngigac yengi ngagesingkeibong*

<sup>19</sup> Ngic-ngigac yenge Stifen welu Yesule habu gocne yenge momoc weyebic ayelelebong siyeckelu gocnedi Fonisia himongka hikeibong. Nga gocne yengi Saiparus nucka hikeibong. Nga gocne yengi Antiock taonka hikelu gaibong. Ailu yenge Yuda ngic-ngigac sugu Siduc Madicne milu edocebabong yegengkewec. <sup>20</sup> Aime Yesule habu hewacnginang, Saiparus nuckacni nga Sairini himongkacni ngic gaibong, yenge Antiock taonka hikeibong. Hikelu Grik ngic-ngigac yengeholec inguchac mingagec ailu Sugucne Yesule Siduc Madicne mibong yegengkewec. <sup>21</sup> Mibong Sugucnedi tapili yeleme ngic-ngigac habu sugucne yenge kwelengineng Sugucnela lolu ngagesingkeibong.

<sup>22</sup> Yogolec yowa-siduc Yerusalem iwa Yesule habu gaibong, yengele hedecka haume yenge yogo ngagelu Banabas salebong Antiock taonka hikewec. <sup>23</sup> Hikelu nganime Wapongti moc bamadicebawec, ye yogo nganilu beliyelu kwelenginengti Sugucne ngagesingkeningte kwelengineng kwefangkewec. <sup>24</sup> Ye ngic madicne ailu ye kweleina Tili Asu nga ngage-ngagesing wakeicne facnowecte ngic-ngigac homacnedi yogo nganilu Sugucnela taockeibong.



<sup>25</sup> Aime Banabas ye Sol basackelu bafuwanogale Tasas hikewec. <sup>26</sup> Hike bafuwalu mengockeme Antiok taonka kwesilu Yesule habu yengeholec hifa moniyang galu ngic-ngigac homacne Wapongte mic-yowa edocebalu weduyeleiboc. Aime Antiok taonka molickelu ngic-ngigac yengi mic-tengtengfocine, yengele wac Kristole aling wacebaibong.

*Kwele-madicté moneng loibong bahikeiboc*

<sup>27</sup> Dameng iwahac Wapongte siduc-mimi ngic gocne Yerusalem hegilelu Antiok taonka waibong. <sup>28</sup> Yengelacni agongineng monic wacine Agabus. Asudi edome ye fangkeli himong sasawa loloc fikenale mime yegengkewec. Aime loloc yogo Roma ngictau Sisa Klodius gawec, dameng iwa fikewec. <sup>29</sup> Aime mic-tengtengfocine yenge yowa yogo ngagelu Yudeya himongka ngic hae-gbafocngineng gaibong, yenge baficebanogale ngageibong. Ilec ailu moneng fayelewecoc kpatulelu yengela lobong hikenale mipangkeibong. <sup>30</sup> Mipangkeli moneng loibong, yogo Banabas nga Sol yetebong yeki bahikeli Yesule habu Yerusalem iwa damongfocngineng gaibong, yenge yeleibong.

## 12

*Yakobos wehomalu Pita muc-macka loibong*

<sup>1</sup> Dameng iwa ngictau Herodedi Yesule habu gaibong, yengelacni ngic-ngigac gocne wecebalu basowalecebanale ngagelu bacebalu muc-macka locebawec. Inguc aiyelelu, yogolec lobaina yowawa locebalu ngaba aiyelelu wecebanogale ngagewec. <sup>2</sup> Ailu yedi mime Yoane haeine Yakobos hudu-baba fitecti welockebong homawec. <sup>3</sup> Inguc ailu nganime Yuda ngic-ngigac yenge yogo nganilu angac ngageibong. Ailu ye bret yis mikacte hombang, dameng iwa mime Pita inguchac hobalu muc-macka loibong. <sup>4</sup> Lolu hudu-baba ngic 16 yengelacni ngic aling 4 ingucti habu 4 heucke domalu damongkeibong. Inguc aime ye Ewalicebaicnele hombang motome\* Pita Yuda ngic-ngigac yengele haicka yowawa lonogale ngagesiwec.

<sup>5</sup> Inguc aibong Pita ye muc-macka ngiyeemewa Yesule habu yenge Pitale ailu sanangnehac Wapong milockelu gaibong.

*Angelo monicti Pita lukecnowec*

<sup>6</sup> Aime Herode ye mac saeme Pita yowawa lonogale miwec, dameng yogo bangkaleme deboc iwahac hudu-baba ngic yaeckang yeke Pita nga yekilec momochac sen yaeckangti witicnagulu loboc hewacnginac fawec. Faebongka hudu-baba ngic gocne yenge nu lobina damong domaibong. <sup>7</sup> Hei, yenge mac kwelina inguc fabong Sugucnele angelo monicti yogowahac biyac fikeli domame mac kweline yogo angoleyackewec. Angoleme angelodi Pita magocina bauwalu yeuckelu miwec, "Ga biyac fangkec." Mime iwahac sen Pitale molewacni fotockelu wame <sup>8</sup> angelodi miwec, "Ga umbikagone hefeli hige-ebecgone holeng hauna." Yogo aiyackeme edolu miwec, "Ngakpigone dalicne holeng haume bal-aibecnuc." <sup>9</sup> Inguc mime Pita fangkeli angelo balaibelu hikewec. Hikeli angelodi pasi yela bawec, yogolec ngageme gung-didicka ingucne aiwec. <sup>10</sup> Aime yeke nu yaeckangte damong domaiboc, yogo ewalicepalu hike aen nu sugucne taonka haic bangkaleboc, yogo yeuctihac angkeme hauiboc. Haulu yefewa hikeli angelo ye iwa aockewec.

<sup>11</sup> Inguc aime Pita ye ngage-ngageine dulungkeme yanguc miwec, "Yakumac foinac ngage-motogabac. Sugucnedi angeloine saleme Herodele molewacni nga Yuda ngic-ngigac yenge ngagesiiibong, yogowacni baicnugac."

<sup>12</sup> Inguc ngage-motolu Mariale macka hikewec. Maria ye Yoane wacine monic Mareko, yele nenggac. Iwa homacnedi kpaduckelu milockelu ngiyeibong. <sup>13</sup> Ngiyebongka Pita ye mac odale nuina hike domalu nuwa kpong-kpong holeme kwelec-adu monic, wacine Roda, uc yogo ngagelu wawec. <sup>14</sup> Wame Pitadi yowa mime malacine ngagelu beliyewec. Ailubac ye nu mi laliyecnowec. Ye moc mac kwelina felu miwec, "Pita kwesilu odale nuwa domagac." Inguc milu edocebawec.

<sup>15</sup> Edocebame yenge ngagelu miibong, "Kwelegone sifuwegac, me?"

Mibong, ye sanangnehac miwec, "Foinacbenang, yedi domagac."

Mime yengi miibong, "Yogo angeloine mecne."

<sup>16</sup> Aime Pita ye holeluhac domame yenge nu laliyelu yeicne nganilu kwatackeibong. <sup>17</sup> Kwatackeibong ye mole balang baduyelelu mimacebalu Sugucnedi muc-mackacni lukecnome wawec, yogolec yowa-siduc aiyelelu miwec, "Ngenge siducne yago Yakobos nga ngic hae-gbafocnonggeng edocebadaing." Inguc milu baickelu mac monicka hikewec.

*Herode ye sowacnele ameine bawec*

<sup>18</sup> Mac saeme hudu-baba ngic yenge Pita basackelu miibong, “Ye wenuc hikegac?” Milu kwatackelu dabiyeibong. <sup>19</sup> Aime Herode ye Pita bafuwaningte mime basacke-bibiyeibong. Basackebong mi-uwac aiyeleme miyac aime ye hudu-baba ngic damongkeibong, yenge wehomacebaningte mimoctowec. Ailu yeicne Yudeya himong hegilelu Sesarea haulu gawec.

<sup>20</sup> Herode ye Tair nga Saidon taonte ngic-ngigac yengele aalic ngageyelelu gawec. I yangucte, yenge noba-nosingngineng Herodedi himong damongkelu gawec, iwacni balu gaibong. Ilec ailu yenge kpaduckelu ngaba miyac aime kwele-mogung fikenale yela hikelu uwacnoibong. Yenge molic-molic Herodele bole-ngic monic wacine Blastus, ye Herodele gung-fafa mac damongkelu gawec, ye hikelu nganibong yedi yengeholec inguc ainingte mudockeibong.

<sup>21</sup> Herodedi yowa yogo ngagelu yogolec ameine bafaliyeyelenogale dameng edocebawec. Dameng iwa ye ngictau ngakpiine holelu ngictaule ngiye-ngiyeina wangiyele yowangineng edocebawec. <sup>22</sup> Edocebame ngic yenge sasawadi aukwelu yanguc miibong, “Yowa yogo ngic-yowa miyac, yogo wapong monicte yowa.” <sup>23</sup> Aime Herode ye Wapongte wac mi bafewec, aime dameng yogowahac Sugucnele angelodi ye weme umbengti hilu nome homawec.

<sup>24</sup> Aime Wapongte yowa sugulelu hikewec.

<sup>25</sup> Aime Banabas nga Sol yeke Yerusalem iwa bole yogo bayackeboc motome, hefaliyele Antiok hikenogale Yoane wacine monic Mareko mengockeboc yenge momoc hikeibong.

## 13

### *Banabas nga Sol yeke Wapongte bolele hikeiboc*

<sup>1</sup> Yesule habu Antiok gaibong, yengele hewacka Wapongte siduc-mimi ngic nga wewedu momoc yangucti gaibong.

Banabas nga

Simeon, wacine monic Niger, ailu

Lukius, ye Sairini mackacni. Nga

Sol ailu

Manain. Manain ye Herodeholec momoc galu suguleiboc.\*

<sup>2</sup> Aime yenge dameng monicka kpaduckelu nosing-sawe galu Sugucne afelelu kwelec kwec-nolu gaibong. Gabong Tili Asudi yowa yanguc edocebawec, “Banabas nga Sol yeke nale bole banicte wacepalu bole-yowa yeteiba, yeke bole yogo banicte mimoctocepadaing.”

<sup>3</sup> Inguc mime yenge nosing-sawe galu molengineng socnginac lolu milockelu locepalu salecepabong hikeiboc.

### *Kpanggec ngic monic Elimas*

<sup>4</sup> Tili Asudi inguc milu salecepame yeke Selusia taonka hauiboc. Iwa haulu lac-wagewa felu hikegacgu Saiparus nucka feiboc. <sup>5</sup> Felu Salamis taon iwa hikelu Yuda ngic-ngigac yengele kpakpaduc macngineng ngiyegacsoc, iwa felu Wapongte yowa miboc yegengkewec. Ailu hikeboc Yoane yekeholec momoc hikelu baficewapong.

<sup>6</sup> Aime nuc yogowa higedi falocke hikegacgu Pafos macka hikeibong. Iwa hike sulumelu Yuda ngic monic kpanggec bole balu gawec, ailu siduc-mimi ngic kwesacine gawec, wacine Bara-Yesu, ye bafuwaiboc. <sup>7</sup> Ngic yeke agoine kiya monic wacine Segius Polus. Kiya yogo ye ngage-ngage-motockolec ailu Wapongte yowa ngagenogale aicnome Banabas nga Sol wacepawec. <sup>8</sup> Wacepame kpanggec ngic, Grik yowawa Elimas wackelu gaibong, yedi kiya ye Sugucne ngagesingkedackale ailu, Elimasdi yekele yowa kpatalayetewec.

<sup>9</sup> Inguc aime Tili Asudi Sol, wacine monic Pol, yeke kwelewa wakeme Elimas donginedi ngani-lilickelu yanguc edowec, <sup>10</sup> “Aleng Sugucnenginengte madec, ga Sugucnele yefe dondonne fagac, yogolec ngaba sanangne ailu gaengka kwelegona kwesac nga sowacnedi wakeyackeicne. Ga Sugucnele yefe dondonne faemewa basowalecaigic, dameng dalicne inguc gacaigac. Aibaba yogo mi hegiledamecte, me?” <sup>11</sup> Ilec yakumac Sugucnele tapili gala fikeme nganidamec. Dongegone kundung kweme dameng hewac yago wenac angocine mi nganilu gadamecte.”

Inguc mime iwahac wiyac kundung nga kaguwa ingucnedi dongeine ebeckeme dongeine kundung kweme moledi bangang-tangang ailu moleina babong lec-welec ainale miwec. <sup>12</sup> Aime kiya ye pasi yogo fikeme nganilu Sugucnele Siduc Madicne weducnong ngagelu mimedec ailu ngagesingkwec.

**12:18:** Sale 5:22-24    **12:23:** Dan 5:20    **12:24:** Yes 55:11    **12:25:** Sale 11:29-30; 15:37    \* **13:1:** Herode nengac-mamackecine yeke mac-aling monicte damong. Yeki Manain hole-gumec aicnolu bagaboc sugulewec. Herode yogodi Yoane wehomawec. Siducine Luka 9:7-9 iwa fagac.    **13:2:** Sale 9:15    **13:3:** Sale 6:6    **13:5:** Sale 12:12; 15:39    **13:11:** Sale 9:8

*Pisidia nga Antiok taonka Poldi Yesule siduc mime yegengkeyelewec*

<sup>13</sup> Pol nga ngicfocine yenge Pafos taon iwa hegilelu lac-wagewa hatamac felu hikegacgu Pamfilia himongka Pega taon iwa hike sulumeibong. Sulumelu Yoanedi yeke iwa hegile-  
cepalu Yerusalem iwa hefaliye hikewec. <sup>14</sup> Aime yeke Pega hegilelu hikegacgu Pisidia  
himongka Antiok taon waseine, iwa hikeiboc. Iwa gaboc Sabat dameng aime yeke Yuda  
ngic-ngigac yengele kpakpaduc macka felu ngiyeiboc. <sup>15</sup> Ngieyeboc kpakpaduc macte  
damong yenge Wapongte yefe-yowa nga Wapongte siduc-mimi ngic yengele hibi nebocine  
gocne wafeibong. Wafebong motome yanguc edocepaibong, "Ngic hae-gbakecnonggeng,  
ngeke mibasanang yowa monic ngagegabiyecka yowa yogo miboc ngagening."

<sup>16</sup> Inguc miboc Pol ye fangke domalu moledihac waicke ngiyeningte aiyelelu yanguc  
edocebawec, "Israel ngic-ngigac, ngenge nga habu gocne Wapong alang bacnocaigaing,  
ngenge edocngebabe ngagening!" <sup>17</sup> Israel ngic-ngigac nongileng Wapongti ngambofoc-  
nonggeng bawosaecabame yenge Isip himongka kwilic gacgubong Wapongti baficebame  
saweibong. Ailu ye tapilitowaineholecti yogowacni mengocebalu kwesilu <sup>18</sup> himong  
kisiwa misaine mikac dingong suguwa locebalu ngani-damong aiyelewec. Ailu babibiye-  
cebalu gacgume hifa 40 motowec. <sup>19</sup> Motome ye Kenan himongka mac-himong 7te ngic-  
ngigac wendongebalu ngambofocnonggeng himong yogo yeleme filesoc ailu gaibong.  
Yenge inguc lollicke gabong hifangineng 450 motowec.

<sup>20</sup> "Motome Kenan himongka gacgubong yeuc mimocto-mimocto ngic bafuwace-  
bame damongebame galu ofecgubong Wapongte siduc-mimi ngic Samuel fikewec.  
<sup>21</sup> Ngictaunonggeng monic fikena mibong, Wapongti Benyaminte alingkacni Kis madecine,  
wacine Sol, ye bafuwayeleme hifa 40 ngictaunineng ailu gawec. <sup>22</sup> Gacgume ye baickelu  
ngictaunineng Dawidi lowec. Ailu yele fungine yanguc mime yegengkewec, 'Na Dawidi,  
Yesule madec, ye nganilu kwelene madickeme ye bawosaebac. Yedi hocne nale yowa  
sasawa badaicte.'

<sup>23</sup> "Aime yowa yanguc miwec fagac, 'Israel ngic-ngigac nongileng Asa-baba ngic monic  
yogo Dawidile aling yengelacni fikedaicte.' Wapongti yogo mipangkenolewec, yogolec  
noine yogo Yesu hocne fikewec. <sup>24</sup> Aime mi fikeemewa Yoane ye Israel ngic-ngigac  
sasawa kwelengineng hefaliyeme misa-lowac ainingte mime yegengkeme edocebawec.  
<sup>25</sup> Edocebalu boleine bamotome motonogale aiyemewa yanguc edocebawec, 'Ngenge  
ngic ngagegaing yogo, na ye miyac. Ngagegaing, nale lobewa kwesigac, na waweweine  
ingucnedi yele hige-ebecte mucine lukebe nalic mi madickedaicte.'

<sup>26</sup> "Israel ngic hae-gbafocne, ngambononggeng Abraham ailu ngic-ngigac gocne Wapong  
alang bacnocaigaing, ngenge yowane mibe ngagening. Bikicte ame babale yefe fagac.  
Ailu wasecne ainogale, yowa yogo nongileng lowec fagac. <sup>27</sup> Nga Yerusalem ngic-ngigac  
gagaing, ailu damongfocngineng, yenge Yesu mi ngani-motolu ye weningte mimoctoibong.  
Sabat ngiyecaigaingka damengsoc Wapongte siduc-mimi ngic yengele siduc-yowa yanguc  
wafe-ngagec aicaigabeleng, yowawa lolu mimoctoibong, yogo noine fikewec. <sup>28</sup> Foinac,  
yenge Yesu bikicine basackebibiyelu moc osiyelu Pailatle molewa lobong, yedi mimoctome  
wehomaningte miibong. <sup>29</sup> Aime Wapongte hibiwa yowa-siducine kwelengkeicne fagac,  
yenge yogo sasawa aicnolu malicpongkacni bamoctolu dongesiwa bahikeibong. Bahikelu  
henebe ngicti baicne iwa felu lobong fawec. <sup>30</sup> Aime Wapongti homackacni bagbolyeme  
fangkewec. <sup>31</sup> Fangkeme ngic-ngigac yeholec Galili prowinswacni Yerusalem taonka  
hikeibong, yenge momoc hadeng homacne fikeyelewec. Fikeme nganiibong, yenge hocne  
ye wideckelu Israel ngic-ngigac edocebaibong gagaing.

<sup>32-33</sup> "Aime Wapongti ngambofocnonggeng molickelu wiyac yelenale mipangkeyelewec,  
yogo yakumac mimipang yogo adu-madecfocngineng nongilang noine fikewec. I yan-  
gucte, Yesu bagbolyewec, yogolec mimipangte Siduc Madicne edocngebagabeleng. Yo-  
golec hocne Miti Gee fengngine yaeckang iwa yowa yanguc kwelengkeicne fagac,  
'Na yakumac mibe yegengkeme edocgugabac, ga nale Madec, nga na gale Mamac.' (*Mige*  
2:7)

<sup>34</sup> Ye Yesu bagbolyeme fangkewec. Aime ye lobewa homalu kpelec-kpelec yogo yela  
hatacmac mi fikedaicte. Yowa yogolec Wapongti yanguc miwec,  
'Na Dawidila mimipang sanangne miiba, yogolec noine mimi-madic gbagbacne milu  
geledacte.' (*Yes* 55:3)

<sup>35</sup> Ailu Miti Gee monicka yowa yanguc fagac,  
'Ga ngicgone gbagbacne ye hegileengka mi kpeleckelu howacine aidaicte.' (*Mige* 16:10)

<sup>36</sup> “Dawidile yanguc ngagegabeleng, Wapongti ye bole micnowec, yogo ngicfocine yengela bamoctolu homawec. Homame ngambofocine locebaibong, iwa longkebong howacine ailu miyac aiwec. <sup>37</sup> Aime Wapongti ngic bagboliyewec, yedibac howacine mikac.

<sup>38</sup> “Ngic hae-gbafocne yanguc edocngebabe ngagening, Yesu ngagesingkebon Wapongti bikicnginenge ameine hegiledaicte, yowa yogodi ngengela kwesiwec. <sup>39</sup> Aime Wapongte yefe-yowa Mosesdi kwelengkwec, yogodi bikicnginenge ameine baickeme nalic mi miyac aidaicte. Yesu ngagesingkebon bikicnginenge ameine baickeme miyac aidaicte, yogo sugu fagac. <sup>40</sup> Wapongte siduc-mimi ngic yengi yowa yanguc miibong, yogo ngengela sanangkenale ung-yowa edocngebagabac.

<sup>41</sup> ‘Ngic-ngigac Wapongte yowa midelec aicaigaing, ngenge nganidaing. Na dameng iwa pasi fulune babe, ngenge yogo nganilu kwatackelu homadaingte. Monicti edocngebame pasi yogo nalic mi ngagesingkedaingte.’ ” (Hab 1:5)

<sup>42</sup> Inguc milu Pol nga Banabas yeke kpakpaduc mackacni wanogale aiiboc. Aime ngic-ngigac yenge Sabat dameng monicka yeke yowa yogohac edocebanicte sanangne milu edocepaibong. <sup>43</sup> Tutumang motome walu Yuda ngic-ngigac nga Israel yengele alingcacni miyac homacnedi Yuda ngic-ngigac yengeholec taockelu Wapong afeelu gaibong, yenge momochac Pol nga Banabas balaibecepaibong. Aime yeki Wapongte kwele-madicka ganingte mibasanang aiyeleiboc.

<sup>44</sup> Aime Sabat dameng hatacmac aime taon yogolec ngic-ngigac yenge Sugucnele yowa ngageningte homacnedi kwesiibong. <sup>45</sup> Aime Yuda ngic yenge yogo nganiccebalu Pol nga Banabas hasowac aiyetebong Poldi yowa mime yenge yeholec yowangineng fec-wac aime yowaine hegilelu misulec aicnoibong.

#### *Poldi Yuda ngic-ngigac hegilecebowec*

<sup>46</sup> Inguc aibong Pol nga Banabas yeke yowa sanangnehac hangoc mikac yanguc edocebaiboc, “Molickelu Yuda ngic-ngigac ngengela Wapongte yowa mibec yegengkelewec. Aime yakumachac ngenge ngengung hegilelu gaga-sanang mi banogale ngagesigaingte noke hegilecnebalu Israel yengele alingcacni miyac, yengela hikedabelecte. <sup>47</sup> Sugucnedi bole-yowa yanguc milu notewec,

‘Israel yengele alingcacni miyac, yengele angoc ingucne nani locgube bole balu himong sasawa bahikelu yanguc milu gadamec, bikicte ameine babe wasecne aidaingte.’ ” (Yes 49:6)

<sup>48</sup> Inguc mibong Israel yengele alingcacni miyac, yenge yogo ngagelu beliyelu Sugucnele yowa bafelu ngage-angac aiibong. Ailu aling gaga-sanang baningte Wapongti bawosaecebaawec, yogo yenge Sugucne ngagesingkeibong.

<sup>49</sup> Aime mac-himong iwa Sugucnele yowadi sawelu hikewec. <sup>50</sup> Taon yogolec ngigac sugucne gocne yenge Yuda ngic-ngigac yengela taockelu Wapong afeelu gaibong. Yuda ngic yengi mac-damong nga ngigac feicne gocne yogo hung-kwefang aiyelelu baceba hikeibong. Hikebong yengi Pol nga Banabas weyebic aiyetelu himongningeng sebilelu yebicepabong hikeiboc. <sup>51</sup> Hikenogale ailu higenginackocni lube weboc wawec. Yogo aibabangineng sowacne edalicebanogale ailu hegilecebalu Aikoniam taonka hikeiboc. <sup>52</sup> Aime mic-tengtengfocine yengele kwelewa Tili Asudi wakeme beliyebong.

## 14

### *Pol nga Banabas yeke Aikoniam taonka hikeiboc*

<sup>1</sup> Yeke Aikoniam taonka hikelu iwa inguchac Yuda ngic-ngigac yengele kpakpaduc macka felu Siduc Madicne tapiliineholec miboc yegengkwec. Aime Yuda ngic-ngigac nga Grik ngic-ngigac homacnedi Yesu ngagesingkeibong. <sup>2</sup> Yuda ngic-ngigac gocne yenge yowa yogo hegilelu Israel yengele alingcacni miyac yogo yenge kpafengebaibong. Inguc ailu yengi ngic hae-gbafocngineng ngage-ngagesingkolec aalic ngageyeleibong. <sup>3</sup> Aime yeke sanangkelu dameng dalicne taon iwa galu hangoc mikac Sugucnele yowa tapiliineholec milu gaiboc. Aime Sugucne yeuctihac kwele-madicinele yowa basanangkenale ailu nenggac ngiyeyeteme yeke ngagesingkeningte pasile maaine nga pasi mi ngani-nganiine homacne balu gaiboc.

<sup>4</sup> Inguc aiiboc taon yogolec ngic-ngigac siyeckelu gocne yengi Yuda ngic-ngigac yengeholec domaibong. Nga gocne yengi salecebaicne yekeholec domaibong. <sup>5</sup> Aime Israel yengele alingcacni miyac nga Yuda ngic-ngigac gocne yenge damongfocngineng yengeholec salecebaicne kindololo aiyetelu posadi wickelu holecepanogale yowa hefeibong. <sup>6</sup> Hefebong yeke yogo ngagelu hangoc Likonia himongka hikeiboc. Hikelu iwa Lista nga

Debe nga mac-himong gocne bangkacne fahikewecka <sup>7</sup> Siduc Madicne miboc yegengkeme gaiboc.

*Lista taonka pasi tapiliineholec baiboc*

<sup>8</sup> Lista taonka ngic monic ngiyewec, ye higekecine yaeckang sowaleicne. Ye nenggacte gobe kwelinacni ingucne fikelu lec-welecine mikac moc ngiyelu gawec. <sup>9</sup> Ngiyeme Poldi Siduc Madicne edocebame ngic ye ngagelu ngiyeme dongeine yela dondonne hila nganilu yanguc ngagewec, “Ngic yogo ye madickenale ngagesingkegac.” <sup>10</sup> Inguc ngagelu yowa tapiliineholec yanguc edowec, “Ga fangkelu hong domac.” Inguc mime ngic ye fangke wintackelu lec-welec aiwec.

<sup>11</sup> Aime ngic-habutowadi yenge Poldi pasi bawec, yogo nganilu Likonia yowanginang yefe sugucnehac wackelu yanguc miibong, “Wapong gocne yenge ngic nongileng ingucne ailu hewacnonggang walu gagaing.” <sup>12</sup> Inguc milu Banabas ye wapong monic wacine Hemes wackeibong. Nga Pol ye yowa mimi ngic. Ilec ailu wapong monic wacine Hemes wackeibong. <sup>13</sup> Aime wapong monic Sus ye ibu-macine taon emeina ngiyewec. Yele depec-baba ngicti mime yenge bulumaka ngicne gocne nga daling ayangineholec baibong. Balu taon mecinele oda nuina felu ngic yaec alang bayetelu depec bayetenogale aibong.

<sup>14</sup> Depec bayetenogale aibong salecebaicne yeke yogo ngagelu kwelenginec umalewec. Umaleme ngakpinginec balockelu mac hegilelu habu yengele hewacka hikelu yanguc wackeiboc, <sup>15</sup> “Ngic-ngigac yago, ngenge oma wiyac ainogale aigaing? Noke ngicbenang ngenge ingucnehac. Ngenge siduc-gbhongngineng babaficine mikac gagaing, yenge lobe holeyelening. Noke Wapong gagaineholecte Siduc Madicne mibec yegengkengel-egac. Yedi sawa nga himong ailu kiwec nga wiyac sasawa haicne monic-monic fay-ackegac, yogo bafuwawec. <sup>16</sup> Himongne himongne ngic-ngigac esecne gaibong, yenge ngageyeme angacnginengte gaga haicne monic-monic, yogolec aka mi holeyeleme gaibong. <sup>17</sup> Gaofebong ye kpaoma monic mi ayelewec, miyac. Ye kwele-madicka gagangi-nengte ailu mime sawawacni mac nga wenac damengnginec fikecaigac. Ailu ye noba-nosing damengngine mime fikecaigac. Ailu nosingngineng homacne fikengeleme angac feina gagaing.” <sup>18</sup> Ngic yaec yeke inguc milu yowa-bole sugucnehac bagacgu miweloc ayeleboc depec bayetenogale aibong, yogo hegileibong.

*Pol posadi wickelu holeibong*

<sup>19</sup> Aime Yuda ngic Antiok nga Aikoniam taonkacni kwesilu yekele bole basowaleibong. Ailu ngic-ngigac kwelenginec kwefangkebong, yenge momoc Pol posadi wickelu holei-bong. Holelu ngageibong, “Ye biyac homagac.” Inguc milu taon lobina fulucke haulu lobong fawec. <sup>20</sup> Faemewa mic-tengtengfocine yenge kwesilu lolicke domabong fangkelu taonka fewec. Aime mac saeme ye Banabasholec Debe taonka hikeiboc.

*Macsoc lolickelu Antiok taonka hikeiboc*

<sup>21</sup> Hikelu iwa Siduc Madicne miboc yegengkeme ngic-ngigac homacnedi Yesu ngagesingkeibong. Aime yeke hatacmac hikeibocka yefe hefaliyelu Lista nga Aikoniam ailu Antiok taon yogo yengela hikeiboc. <sup>22</sup> Hikelu iwa macsoc mic-tengtengfocine kpaduce-balu ngage-ngagesingkolec ganingte mibasanang ayeleiboc. Ayelelu yanguc sanangne edocebaiboc, “Nongileng Wapongte ngani-damongka fenogale aibong, doic haicne monic-monic fikenoleme ilec kwelina gadabelengte.” <sup>23</sup> Ailu taon moniyangka moniyangka Yesule habu gaibong, yengele damongfocngineng bawosaecebaiboc. Ailu ngic-ngigac Yesu ngagesingkeibong, yengele ailu nosing-sawe galu milockelu Sugucnele molewa locebaiboc.

<sup>24</sup> Inguc ailu yeke Pisidia himong falockelu hikegacgu Pamfilia himongka hikeiboc. <sup>25</sup> Iwa hikelu Pega taonka yowa edocebalu Atalia taonka hauiboc. <sup>26</sup> Haulu lac-wagewa felu Antiok iwa hefaliye hikeiboc. Taon iwa hocne Yesule habu yengi molickelu Wapongte molewa locepabong bole milu edocepawec, yogo iwa hikelu bamoctoiboc. <sup>27</sup> Iwa kwesi sulumelu Yesule habu kpaducebaboc Wapongti molenginac pasi bame bole baiboc. Aime Israel yengele alingkacni miyac, Wapongti yengele yefe bayeleme Yesu ngagesingkei-bong, yogolec siduc edocebayackeiboc. <sup>28</sup> Ailu yeke Antiok iwa dameng dalicnehac mic-tengtengfocine yengele hewacka gaiboc.

## 15

*Yowale Yerusalem feibong*

<sup>1</sup> Yudeya himongkacni ngic gocne yengi Antiok taonka haulu ngic hae-gbafocngineng yangcu weduyeleibong, “Ngenge Mosesle yowa hegilebong soc tofangineng mi helockedaingtewa, bikicte ameine bame wasecne nalic mi aidaingte.” <sup>2</sup> Inguc milu Pol nga Banabas yekeholec yowangineng fec-wac aime kwele-moniyang mi aiibong. Inguc aigacgu Yesule habu yengi Pol nga Banabas ailu ngic gocne bawosaecebaibong. Bawosaecebabong Yerusalem iwa hikelu habu yengele damongfocngineng nga salecebaicne yengeholec yowa yogo madickenale miibong. <sup>3</sup> Ailu Yesule habu yenge yefele wiyac yelevu salecebabong hikeibong. Hikelu Fonisia nga Samaria prowinswa hike sulumelu ngic hae-gbafocngineng iwa gaibong, yenge yanguc edocebaibong, “Israel yengele alingkacni miyac homacnedi kwele-hefaliyec aigaing.” Inguc mibong, yenge yogo ngagelu beliyebebangkeibong. <sup>4</sup> Aime yenge hikegacgu Yerusalem sulumbong Yesule habu nga salecebaicne ailu Yerusalem habu yengele damongfocngineng, yengi macka locebaibong. Aime Pol nga Banabas yeke Wapongti molenginac pasi bame bole baboc noine fikewec, yogolec siduc bayeleiboc.

<sup>5</sup> Aime Farisaio yengele alingkacni gocne yengi Yesu ngagesingkeibong, yengi fangkeli yangcu miibong, “Israel yengele alingkacni miyac yenge soc tofangineng helockedaing. Ailu Wapongte yefe-yowa Mosesdi kwelengkewec, yogo balaibedaing.”

*Pitadi ngage-ngagesingte yowa edocebawec*

<sup>6</sup> Inguc mibong salecebaicne nga damong yengi sugu kpaduckelu yowa yogo yengilangkac mingagec aiibong. <sup>7</sup> Migacgu Pitadi fangkeli yangcu miwec, “Ngic hae-gbafocne, Israel yengele alingkacni miyac, yenge nale mickacni Siduc Madicne ngagelu ngagesingkeibong. Yogolec Wapongti esecnehac nongileng hewackacni bawosacnuwec, yogo ngagegaing. <sup>8</sup> Wapong ye kwelewa ngani-nganidi esecne Tili Asu nolewec, yogo ingucnehac Israel yengele alingkacni miyac, yengele angackewecte yelewec. <sup>9</sup> Nongileng ngagesingkeibong, ingucnehac yenge ngagesingkeibongte Wapongti kwelengineng suweyackewec. <sup>10</sup> Aime ngenge omale Wapong kwesackelu yefe-yowaine yogo mic-tengtengfocine yengele feiwa lonogale aigaing? Yogo nalic mi aidaingte. Ngambocfocngeng nga ngesafocnongeng ailu nongileng yogo aibibiyelu kpungkeibong. <sup>11</sup> Ailu yanguc ngagesingkegabeng, ‘Sugucne Yesudi kwele-madic ailu Yuda ngic-ngigac nga Israel yengele alingkacni miyac, nongileng momoc bikicte ameine bame wasecne aidabelengte.’”

<sup>12</sup> Inguc mime habu sugucne yenge moc sugu ngagelu ngiyeibong. Aime Pol nga Banabas yeke Wapongti molenginac pasile maaine nga pasi mi ngani-nganiine bawec, yogolec siduc aiiboc. Israel yengele alingkacni miyac yengi ngagesingkeningte ailu, bole baboc pasi haicine monic-monic fikewec.

*Yakobosdi umacte yowa edocebawec*

<sup>13</sup> Siduc aiyeleboc motome Yakobosdi yowa yanguc edocebawec, “Ngic hae-gbafocne, mibe ngagening. <sup>14</sup> Wapongti molickelu Israel yengele alingkacni miyac, yengelacni ngic-ngigac bacebame yele aling aningte yefe bafuwawec.\* Yowa yogolec Saimonti mime yegengkeme ngageibong. <sup>15</sup> Aime yele yowadi Wapongte siduc-mimi ngic yengele yowaholec andohac aiiboc. Ngagegaing, Wapongte hibiwa yowa yanguc kwelengkeibong fagac,

<sup>16</sup> “Nani lobewa gacgu hefaliyelu Dawidile mac-bala<sup>†</sup> hatacmac bagboliyelu basanangedacte. <sup>17</sup> Aime ngic gocne yengi Sugucne na wacke-basac ainelelu ngagecnudaingte. Aime Israel yengele alingkacni miyac, yenge inguchac alingfocne aidaingte.” <sup>18</sup> Sugucne ye esecnebenang yowaine inguc miwec.’ (Amo 9:11-12)

<sup>19</sup> “Ilec ailu yanguc mimoctogabac, Israel yengele alingkacni miyac, yenge kwelengineng hefaliyelu Wapongta lobong, umac mi yelenoga. <sup>20</sup> Yanguc sugu mipangkeli hibi kwelengkeyelenoga, ngic-ngigac yenge siduc-gbongnginengte depec milu sic wecebacaigaing, sic ingucne yogo wonongkolec, hegiledaing. Ailu selo-boic aibaba mi aidaing. Nga besic ubeina mucti fuluckebong asuine kwedickeme homaicine, yogolec biucine mi nodaing. Ailu sac mi nodaing. <sup>21</sup> Yenge Mosesle yowa yogo biyachac ngageibong. Nga yogo esecne biyachac Yuda yenge molickelu taonsoc edocebalu weduyeleibong. Ailu yanguctihac Sabat damengka kpakpaduc macnginangsoc wafe-ngagec aicaigaing.”

*Israel yengele alingkacni miyac, yengele hibi*

**15:1:** Gal 5:2    **15:2:** Gal 2:1    **15:4:** Sale 14:27    **15:7:** Sale 10:1-43    **15:8:** Sale 10:44; 11:15    **15:10:** Mat 11:30; Gal 3:10    **15:11:** Gal 2:16; Efs 2:5-8    **15:13:** Gal 2:9    \* **15:14:** Yefe yogo Koneliusle macka molickelu fikewec.    † **15:16:** Dawidile mac-bala yogo Dawidi gbolifocine yengele migac.

<sup>22</sup> Aime salecebaicne nga damongfocngineng ailu Yesule habu sasawa, yenge ngagebong yogo nalic aiwec. Aime ngic hae-gbafocngineng yengelacni ngic micne yaeckang bawosaecepaibong, monic wacine Yudas, yele wacine monic Basabas, ailu Sailas. Bawosaecepaibong yeke Pol nga Banabas yekeholec momoc Antiok taonka hikenogale salecepaibong. <sup>23</sup> Ailu hibi monic yanguc milu kwelengkelu yetebong hikeiboc.

Nonge salecebaicne nga ngic hae-gbafocngineng ngage-ngagesingkolec yengele damongfocnginengti hibi yago kwelengkegabeleng. Yogo Israel yengele alingkacni miyac, ngenge Antiok nga Siria ailu Silisia himongka gagaing, agofocngineng ngage-ngagesingkolec ngengele hibi yago longelegabeleng.

Wenac-madic.

<sup>24</sup> Nongelacni ngic gocne yenge nongi mi salecebabeng ngengela fulu yowa edocngebalu ngage-ngageningeng basifuwebong ngageboc aibong, siducngineng ngagegabeleng. <sup>25</sup> Nonge yogo ngagelu kwele-moniayang ailu ngic yaeckang bawosaecepaibong. Ailu Banabas nga Pol yekele kwelenongngenti angac ngagelu, yekeholec salecepaibong fugabiyec. <sup>26</sup> Ngic yeke hocne Sugucnenongngeng Yesu Kristo, yele ailu gaganginecte ngageboc mi ailu gaiboc. <sup>27</sup> Nonge Yudas nga Sailas bawosaecepaibong, yeki fulu yowa yogo micnginackocni miboc yegengkengeme ngagedaing. <sup>28</sup> Tili Asudi nongeholec gagacte ailu umac gocne feinginang mi lonogale ngagebong madickekac. Ngenge yefe-yowa yago sugu balaibebong madickedacte. <sup>29</sup> Ngic-ngigac yenge siducgongfocngineng yengele depecte sic wecaigaing, ngenge yogo hegiledaing. Ailu bec-sic ubeina mucti fuluckebong asuine kwedickeme homaicne, yogolec biucine mi nodaing. Ailu sac mi nodaing. Ailu selo-boic aibaba mi aidaing. Ngenge yogo sasawa hegileyackebong madickedacte.

Ailu ngenge kwele-madicka gadaing.

*Yudas nga Sailas yeke mibasanang ayelelu hefaliye hikeiboc*

<sup>30</sup> Aime habu yenge ngic yogo salecebabong Antiok hikeibong. Hike sulumelu Yesule habu Antiok gaibong, yenge kpaducebalu hibi yogo yeleibong. <sup>31</sup> Yelebong yenge babasanang hibi yogo nganilu wafelu beliyeibong. <sup>32</sup> Ailu Yudas nga Sailas yeke Wapongte siduc-mimi ngic galu yowa homacne milu ngic hae-gbafocngineng kwelengineng kwe-fangkelu mibasanang ayelelu gaiboc. <sup>33</sup> Inguc aigacgu damengngineng motome ngic hae-gbafocngineng yengela hikenogale aiboc kwele-mogung yowa ameine aiyetebong hikeiboc. <sup>34</sup> [Aime Sailas dibac iwa ganogale ngagewec.]<sup>‡</sup>

*Pol nga Banabas yeke siyeckeiboc*

<sup>35</sup> Pol nga Banabas yeke Antiok taonka bolenginec hatacmac taockelu balu gaiboc. Aime ngic homacnedi yeke baficepaibong Sugucnele yowa ngic-ngigac edocebalu weduyeletu Siduc Madicnele fungine mibong yegengkewec. <sup>36</sup> Gacgu Poldi Banabas yanguc edowec, "Nokilec hatacmac hefaliye hikelu ngic hae-gbafocngineng Sugucnele yowa taonka esecne mibec yegengkeme ngageibong, yenge wenuc gagaing, yogo hikelu ngani-ngagac aiyelenac." <sup>37</sup> Inguc mime Banabas ye Yoane, wacine monic Mareko, ye momoc hikeningte miwec. <sup>38</sup> Mareko ye molic-molic yekeholec Pamfilia himongka hikecgu bole hegilelu hikewecte ailu Poldi yeholec hikeningte ngageme mi madickewec. <sup>39</sup> Inguc ailu Banabasholec yowanginec fec-wac aime hegilelu siyeckeiboc. Banabas ye Mareko bame hikelu lac-wagewa felu Saiparus nucka hikeiboc. <sup>40</sup> Nga Pol ye Sailas bame hikenogale miboc, ngic hae-gbafocngineng yengi "Sugucnele kwele-madicti ngekela fadaic" mibong hikeiboc. <sup>41</sup> Yeke Siria nga Silisia himongka lolickelu Yesule habu mibasanang ayeleiboc.

## 16

*Poldi Timoti bame hikeibong*

<sup>1</sup> Pol ye hikecgu Debe nga Lista taonka hikelu sulumewec. Aime Lista iwa mic-tengteng ngic monic gawec, wacine Timoti. Ye nenggacine Yuda ngigacti Yesu ngagesingkelu gawec. Nga mamacine ye Grik ngic. <sup>2</sup> Aime ngic hae-gbafocngineng Lista nga Aikoniam taonka gaibong, yengi Pol yanguc edoibong, "Timoti ye aibabaine madicne." <sup>3</sup> Inguc edobong Poldi yeke momoc hikenicte micnome nalic miwec. Aime Yuda ngic-ngigac himong iwa gaibong, yenge Timoti mamacine ye Grik ngic, yogo ngageyackegaing. Ilec

**15:28:** Mat 23:4 † **15:34:** Hibi esecne Lukadi kwelengkewec, yogo nganilu iwacni kwelengkebong kwelengkebong ofewec, yengelacni gocne hewacine 34 iwa mi fagac. Ngic-ngigac yenge hibi kwelengkeicne yogo wosaeltu nganibong Lukadi mi kwelengkewec mecne. **15:37:** Sale 12:12,25 **15:38:** Sale 13:13; Kol 4:10 **16:1:** Sale 14:6; 2Tim 1:5 **16:2:** Filip 2:19-22

Timoti madicne ngagecnoningte Poldi soc tofaine helockewec.\* <sup>4</sup> Aime yenge taon sasawa lolickelu hikeibong. Hikelu salecebaicne nga habu yengele damongfocngineng yefe-yowa Yerusalem iwa milu hefeibong, yowa yogo balaibeningte Yesule habu edocebala edocebala hikeibong. <sup>5</sup> Yenge bole inguc babong Yesule habu yengele ngage-ngagesing sugulewec. Aime damengsoc ngic-ngigac yenge habu yengela hikelu taockebong homacne aibong.

*Masedonia ngic gung-didicka ingucne nganiwec*

<sup>6</sup> Yenge Asia prowinswa yowa mibong yegengkedaidackale, Tili Asudi kpatalayeleme Frigia nga Galata himong mochac falockelu hikeibong. <sup>7</sup> Hikelu Misia himong nga Asia prowins hewacnginac domalu Bitinia himongka hikenogale mibong, Yesule Asudi aka holeyelewec. <sup>8</sup> Ilec yenge Misia himong ewalilu hikegacgu Toas taonka hauibong. <sup>9</sup> Iwa haulu deboc yogowahac Poldi yowa gung-didicka ingucne yanguc nganiwec. Masedonia ngic monicti yela fike domacnolu yanguc edolu dogbac aicnogac, "Ga kiwec falockelu Masedonia prowinswa kwesilu baficnubanong." <sup>10</sup> Pol ye wiyac yogo nganilu Wapongti nonge Masedonia prowinswa hikelu Siduc Madicne mibong yegengkenale wacnubagac. Inguc ngage-motolu Toas hegilelu hikenogale efeckeibeng.

*Lidia golowacfocine ngagesingkeibong*

<sup>11</sup> Aime nonge lac-wagewa felu Toas hegilelu falocke hikecgu Samotres nucka sulumeibeng. Mac saeme yogowacni hikegacgu Neapolis taonka sulumeibeng. <sup>12</sup> Nonge iwa lac-wagewacni walu hige-yefe hikegacgu Filipai taonka sulumeibeng. Yogo Masedonia prowins sugucne yogolec taon sugucne. Roma ngic† yengi esecne himong yogo balu gaibong.

Aime taon iwa hadeng gocne gaebengka <sup>13</sup> Sabat dameng aiwec. Aime taonte odale nu emeina misa monic fawec, iwa yanguc milu hauibeng, "Yuda ngic-ngigac milockecaigaing, yengele lamed monic misa mecina fagac me miyac, yogo haulu nganinang." Inguc milu haulu ngigac kpaduckelu gaebongka bafuwacebalu iwa yengeholec wangiyelu yowasiduc aibeng. <sup>14</sup> Yengele hewackacni ngigac monic Taiataira taonkacni wacine Lidia, ye kpoluc mondo-sasac ingucne fulu balu salecaigac. Ye Wapong afeecaigac, aime Sugucnedi kweleine bafaliyeme Polle yowa hedec kwelu ngagewec. <sup>15</sup> Ailu yeicne nga golowacfocine yenge momoc misa-lowac aibong. Ailu yanguc milu edocnubawec, "Ngenge ngagebong na Sugucne foinac ngagesingkegabacka, nale macka ofelu naholec ngiye-fac aining." Inguc milu dogbac aime feibeng.

*Pol nga Sailas muc-macka locepaibong*

<sup>16</sup> Dameng monicka milockelu gaibeng, iwa hatacmac haubeng kwelec-adu monicti yefewa bafuwacnubawec. Adu ye alengkolecti galu ngic-ngigac yengela wiyac lobewa fikeyedaicte, yogo edocebalu gawec. Ye bole yogo inguc balu game sugucnefocine yenge moneng sugucne bafuwayelevu gawec.‡ <sup>17</sup> Adu yedi bafuwacnubalu Pol ngama nonge balaibecnubalu wackelu aukwelu yanguc miwec, "Ngic yago yenge Wapong Feicnetowa, yele kwelec kwekwe aigaing. Ailu bikicte ameine bame wasecne ainingte miwec, yenge yefe yogo edocngebacaigaing." <sup>18</sup> Ye aibaba yogo hadengsoc ainolelu game Pol ye yogolec soc sisis aicnome hefaliyelu aleng yanguc edowec, "Na Yesu Kristole wacka sanangne edocgugabac, ga adu yago hegilelu hikec." Inguc mime ye adulacni ofelu hikewec.

<sup>19</sup> Hikeme adu sugucnefocine yenge moneng balu gadaingte, yogo ngagebong miyac aiyedaicte. Ilec ailu Pol nga Sailas kiya yengele mac-sobengka yowawa locepanogale fulucepalu hikeibong. <sup>20</sup> Hikelu kiya yengela locepalu yanguc miibong, "Yeke Yuda ngic macnonggang fofoc bafuwalu ngiye-ngiyenonggeng basowalecaigabiyeec. <sup>21</sup> Ailu aibaba gocne fulune Roma ngic nongilengti mi ainangte aka-yowa miicne fagac, aibaba yogo hocne balu ganangte edocnubalu gagabiyeec."

<sup>22</sup> Inguc mibong ngic-habu sugucnedi aalic sugucne ngageibong. Ailu kwele-moniyang aiyebongka kiya yengi mibong ngakpinginec dacineholec hemoctoibong. Hemoctolu hududi wecepaibong. <sup>23</sup> Muc-hududi homacne weloc-kwalocephalu muc-macka locepai-bong. Ailu damongti nu sanangne holelu madicnebenang damongepanale sanangne edoibong. <sup>24</sup> Yowa sanangne inguc milu edoibongte ailu ye muc-mac kweline monicka locepalu higenginec yoc heuckeicna lome hifidacepame ngiyeiboc.

*Muc-mac damong misa-lowac aiwec*

\* **16:3:** Timoti nenggacine ye Yuda ngigac. Ilec Timoti Yuda ngic aigac, yengele aibaba inguc fagac. Yuda ngic monicti soc tofaine mi helockedaicte, Yuda ngic-ngigac sasawa yele ngage-sowaledaingte. **16:4:** Sale 15:23-29 **16:6:** Sale 18:23 † **16:12:** Roma gamang ye tapiilineholecte ailu himong homacne damongebalu gawec. ‡ **16:16:** Ngicti bec-hoda fulu bacaigabeleng ingucne adu yogo fulu baibong. Dameng iwa yengela aibaba ingucne fawec. **16:17:** Mrk 1:24 **16:20:** Mrk 13:9 **16:22:** 2Kor 11:25; 1Tim 2:2



<sup>25</sup> Deboc hewacina Pol nga Sailas yeke gee holelu Wapong milockeiboc. Inguc aiboc muc-macka ngic gocne hedec kwelu ngageyeteibong. <sup>26</sup> Ngageyeteibongka, iwahac memeya sugucne tapiliineholecti balu muc-mac yogo kpendaeme nuine angkeyackewec. Ailu ngic-ngigac sasawa molenginang sen fotockeyackewec. <sup>27</sup> Aime muc-macte damong ye gungkacni kwatacke fangkelu nganime nu angkeyackelu domame yanguc ngagewec, "Muc-macka ngic hikeyackegaing." Inguc ngagelu hudule fitecine fuluckelu kwenanganale aime, <sup>28</sup> Poldi sugucnehac wackelu miwec, "Ga socgone mi sibilickek, nonge sasawadi ngiyegabeleng."

<sup>29</sup> Inguc mime damong ye alingfocine edocebame hifa lacnobong balu hangoc-hangocka mac kwelina felu Pol nga Sailas yekele higewa wawelu fawec. <sup>30</sup> Ailu fangkelu mac kwelinacni mengocepa haulu uwayetewec, "Ngic yaec sugucnekecne, na wenuc ailu wasecne aidacte?"

<sup>31</sup> Inguc mime yeki yanguc edoiboc, "Ga nga golowacfocgone nenge Sugucne Yesu Kristo ngagesingkebong yedi bikicte ameine bame wasecne aidaingte." <sup>32</sup> Inguc milu Sugucnele yowa yogo ye nga golowacfocine edocebaiboc. <sup>33</sup> Aime deboc yogowahac damong ye macka fangke felu socnginec welockeibong, yogo suwe-ebec aiyetewec. Dameng yagowahac yeicne nga alingfocine yenge misa-lowac aiyackeibong. <sup>34</sup> Lowabong motome yeicne mac kwelina locepalu mime nosing madicne lobelu yetebong noiboc. Aime ye nga golowacfocine yenge Wapong ngagesingkeibongte kwelengineng madickeme belic-belici aibong.

#### *Muc-mackacni locepaibong waiboc*

<sup>35</sup> Mac saeme kiya yengi ngic yaeckang lukeyeteningte muc-mac damong yela lebe-ning salecebaibong. <sup>36</sup> Salecebabong damongti yowa yogo ngagelu Pol yanguc edowec, "Na locngepabe hikenicte kiya yengi yowa lobong kwesigac. Ilec ngeke wahikelu kwele-mogungkolec gadabiyec."

<sup>37</sup> Inguc mime Poldi yanguc edowec, "Noke Roma ngic-ngigac yengele alingka taockelu gabec, yenge funginengec mi ngagelu ngic-ngigac haicka moc hududi wecnupalu muc-macka locnupabiyeng. <sup>§</sup> Aime yabac sangke-sangke salecnupaningte ngagegabiyeng, me? Yogo miyabenang! Yenge yengung kwesilu mengocnupabong hikedabelec."

<sup>38</sup> Aime Pol ye yowa inguc mime lebe-ngic yenge hefaliye hikelu kiya yowa yanguc edocebaibong, "Ngic yeke Roma ngic-ngigac yengele alingkacnidi gagabiyec." Inguc mibong yenge siduc yogo ngagelu damuebame hangoc aibong. <sup>39</sup> Ailu ngic yaec yekela welelu mibakoloc aiyetelu muc-mackacni mengocepa waibong. Walu taon hegile hikenicte sanangnehac edocepaibong. <sup>40</sup> Inguc mibong yeke muc-mackacni walu Lidia yele macka felu ngic hae-gbafocngineng nganicebalu mibasanang aiyelelu hikeiboc.

## 17

#### *Tesalonika taonka hikeiboc*

<sup>1</sup> Pol nga Sailas yeke Amfipolis nga Apolonia taon falockelu Tesalonika taonka hikeiboc. Aime iwa Yuda ngic-ngigac yengele kpakpaduc mac monic ngiyewec. <sup>2</sup> Aime Pol ye Sabat damangka aibaba aicaigac, inguc ailu kpakpaduc macnginang felu Sabat dameng habackang yengeholec Wapongte hibiwa yowa fagac, yogolec mingagec aibong. <sup>3</sup> Inguc ailu Wapongte hibiwa yowa yanguc fagac, yogo mime yegengkeme nganibong yanguc miwec, "Mesia ye doic sugucne ngagegacgu homalu hatacmac gboliyelu fangkedaicte, yogo Wapongte hibiwa miicne fagac. Mesia yogo ye Yesu hocne, yogo mibe yegengkecaigac." <sup>4</sup> Ye inguc sanangne mime Yuda ngic-ngigac gocne yenge ngage-motolu Pol nga Sailas yekela taockeibong. Aime Grik ngic-ngigac Wapong afeelu gacaigaing, ailu ngigac sugucne yenge homacnedi yekela taockeibong.

<sup>5</sup> Aime ngic homacnedi Siduc Madicne ngagebong Yuda ngic yenge hasowac aiyelelu maket sobangka hikelu kindololo ngic wacebaibong. Wacebalu taonka kwele-dac bafuwayelebong hendolong sugucne fikeme Yesonte macka Pol nga Sailas yeke ngiyecaigaic, mac iwa kpaduckeibong. Ailu ngic yaec bacepalu yengele molewa locepanogale miibong. <sup>6</sup> Milu basacepalu Yeson nga ngic hae-gbafocngineng gocne fulucebalu macte ngic micne yengele haicka bacebalu hikeibong. Hikelu yanguc milu aukwela aukwela hikeibong, "Hi-mongne himongne ngic kwele-dac kwefangkeyelelu gagaing, ngic yago hocne nongilang ingucnehac kwesigaing. <sup>7</sup> Aime Yesonti mac holeyeleme ngiyegabiyeng. Yenge Ngictau Sisale yefe-yowa welu ngictau fulune monic wacine Yesu, milu gagabiyeng." <sup>8</sup> Yenge yowa inguc milu ngic-ngigac ailu ngic micne kwelengineng kwefangkeibong. <sup>9</sup> Inguc

**16:27:** Sale 12:18-19    **16:30:** Sale 2:37    **§ 16:37:** Ngic monic ye Roma ngic gagacka yenge moc welu muc-macka mi lodaingte. Roma yengele yefe yogo fawec.    **17:7:** Luk 23:2; Yoa 19:12

aime damong yenge Yeson nga agofocine aiyelobong socnginengte ailu monengti asa balu moneng lobong hegilecebabong hikeibong.

*Berea taonka hikeiboc*

<sup>10</sup> Mac deboleme ngic hae-gbafocngineng yenge iwahac Pol nga Sailas Berea taonka salecebabong hikeiboc. Hikelu iwa Yuda ngic-ngigac yengele kpakpaduc macka felu Siduc Madicne miiboc. <sup>11</sup> Miboc taon yogowacni Yuda ngic-ngigac yenge aibabangineng nga gagangineng madicne gaibong. Nga Tesalonika yengele aibaba ingucne miyac. Yogolec mic-yowa kwele-efecka homacnehac ngagelu angacebawec. Ailu yowanginec kwesacine me noine milu hadengne hadengne Wapongte hibiwa wafelu ngage-wosaec ailu gaibong. <sup>12</sup> Ilec ailu Yuda ngic-ngigac yengelacni homacnedi Yesu ngagesingkeibong. Aime Grik ngic-ngigac sugucne homacnedi yekela taockeibong.

<sup>13</sup> Taockebong Poldi Berea taonka Wapongte yowa mime yegengkeme siduc yogodi hikeme Yuda ngic-ngigac yenge Tesalonika iwa galu ngageibong. Ngagelu Berea hikelu habu sugucne yogo misowalecebalu kwelengineng kwefangkeibong. <sup>14</sup> Inguc aibong ngic hae-gbafocngineng yenge iwahac Pol dingongka salebong hauwec. Aime Sailas nga Timoti yeke Berea iwa gaiboc. <sup>15</sup> Aime ngic yenge Pol mengocke yewanginec Atens taonka loibong. Lobong ye Sailas nga Timoti yeke biyac kwesinictedececebaime ngic yenge hefaliye hikeibong.

*Atens taonka Wapongte fungine mime yegengkeyelewec*

<sup>16</sup> Pol ye Atens taonka yekele wangec gawec. Aime siduc-gbongti wakeicne ngiyelogaing, ye yogo ngranilu kwele-sowac sugucne ngagewec. <sup>17</sup> Ailu ye Yuda ngic-ngigac yengele kpakpaduc macka fewec. Felu Yuda ngic-ngigac yengileng nga Grik ngic-ngigac gocne Yuda ngic-ngigac yengela taockelu Wapong afeelu gaibong, yogo yenge momoc Siduc Madicne mingagec aibong. Aime ye inguchac hadengne hadengne maket sobengka hikelu ngic ngiyebong, yengeholec Siduc Madicne mingagec ailu gawec.

<sup>18</sup> Aime taon iwa gagale fungine ngage-ngage ngic-habu yaeckang gaibong, wacnginec Epikurus nga Stoik.\* Ngic yogo yenge Polholec yowanginengti fec-wac ainaguibong. Aime Pol ye Yesule siduc nga homackacni gboliyelu fangke-fangkele yowa yogo mime yegengkwec. Ilec gocne yengi Polle yanguc miibong, "Ngic yogo ye hocne yeuctihac yowa minogale aicaigac, yogo mi ngagegabeleng."

Inguc miibong gocne yengi yanguc miibong, "Ye wapong fulune gocne yengele yowa micaigac." <sup>19</sup> Inguc milu sobeng sugucne monic wacine Areopagus iwa mengocke felu miibong,† "Ga yowa fulune micaigac, yogo nalic edocnubadamecte. <sup>20</sup> Yowa yogo hedec-nonggang fulune ngagegabeleng. Ilec ga fungineholec miyangka ngagenangte ainolegac." <sup>21</sup> Atens mac-file ngic-ngigac nga kwilic ngic-ngigac sasawadi, yenge yowa-siduc fulune ngagelu yowa yogo sugu mingagec ailu siduc homacne milu gaibong.

<sup>22</sup> Inguc aime Pol ye Areopagus tutumang hewacnginang fangke domalu ngic yanguc edocebawec, "Atens ngic, na wiyac sasawa ngranilu funginengineng yanguc nganimotogabac. Nenge siduc-gbong haicine monic-monic homacne alang bacebalu aibaba haicine monic-monic bagagaing. <sup>23</sup> Na taonnginang hikelu siduc-gbongfocngineng nganicebaiba. Yogowa alata monicka hibi yanguc kwelengkeicne domame nganiiba, 'Wapong monic mi ngagegabeleng, yeke alata.' Aime wapong yogo mi ngagelu afecaigaing, yakumac ye fungine mibe yegengkengeme ngagenang.

<sup>24</sup> "Wapong ye hocne himongtowa himong nga wiyac sasawa fayackegac, yogo bayackelu feina loyackewec, yedi himong nga honocmeng yogolec fileine gagac. Ye ibu-mac ngicti moledi baicne, iwa mi gacaigac. <sup>25</sup> Ailu ye wiyac monicte basackeme ngicti bole balu bafickenangte miyac. Ye yeuctihac gaga nga asu ailu wiyac sasawa ngic yelcaigac. <sup>26</sup> Ailu ngic moniyang bafuwalu mime yelacni ngic himongne himongne nga habune habune fikesawec ganingte miwec. Ailu dameng nga himong maaine, yogo yedi milu edocebawec. <sup>27</sup> Inguc aime ngic yenge yengung kwelenginengti Wapong yeicne basackelu bafuwaningte, ye yogo ngagesilu inguc aiwec. Foinac, ye dalicka mi gagac, ye ngic nongileng hewacka gagac. <sup>28</sup> Ailu ye hocne gaganonggenge fungine, nongileng yeke tapiliwa galu wiyac sasawa aicaigabeleng. Aime ngengele ngage-ngage ngic gocne yengi yanguc miibong, 'Nongileng Wapongtacni fikelu adu-madecfocine ailu gagabeleng.'

17:17: Sale 18:19

\*

17:18: Epikurus habu yenge yanguc ngagelu gaibong, gaga fungine i yanguc, angac madicne bafuwalu doic nga hangoc hegiledaing. Stoik habu yenge yanguc ngagelu gaibong, ngic yenge himongte wiyac sasawa fayackegac, yogolec kwele-moniyang ailu yengileng angac bawalu ngage-ngage madicna sanangkelu gadaing.

† 17:19: Areopagus sobeng iwa kpatulelu yowa haicine monic-monic mingagec aibong.

17:24: 1Ngt 8:27; Sale

7:48 17:25: Mige 50:12 17:27: Mige 145:18; Yer 23:23

<sup>29</sup> “Aime nongileng Wapongti bacnubawec. Ilec ailu ngic nongileng Wapong, ye gol nga siliwa nga posadi mole-hibi bacaigabeleng, ingucne aigac, yogo mi ngagedabeleng. Wapong ye tapili sugucne fileine. <sup>30</sup> Ngege esecne wiyac yogo mi ngage-motoibongte Wapongti nganilu ilec yowa mi miwec. Yakumacbac himongne himongne ngic-ngigac sasawa kwelengingeng hefaliyenale sanangne edocebalu gagac. <sup>31</sup> Ye biyachac dameng monic miwec, fagac. Dameng iwa himongne himongne ngic-ngigac funginengongeng don-donne mimoctolu ameine bafaliyenoledaicte. Ailu ngic monic ye bole yogo hocne banale micnowec, Wapong ye ngic yogo edalincubanale homackacni bagboliyeme fangkewec. Inguc fangkeme ngegebong noine aiwec.”

<sup>32</sup> Aime Pol ye homackacni gboliyelu fangke-fangke, yogolec yowa mime gocne yengi tapili-wawa yowa miibong. Nga gocne yengi miibong, “Yowa yogo dameng monicka hatacmac miyengka ngagedabeleng.” <sup>33</sup> Inguc mibong Pol ye hegilecebalu hikewec. <sup>34</sup> Aime ngic gocne yengibac Polholec wetackelu Yesu ngagesingkeibong. Yogo yengelacni mimocto-mimocto ngic sugucne monic wacine Dionisius, ye Areopagusle memba monic. Nga ngigac monic wacine Damaris, ailu ngic-ngigac gocne.

## 18

### *Poldi Wapongte yowa Korin taonka miwec*

<sup>1</sup> Pol ye boleine bamoctolu Atens hegilelu Korin taonka hikewec. <sup>2</sup> Iwa Yuda ngic monic bafuwawec, wacine Akwila, ye Pontus himongka fikewec. Aime ye ngigacine Prisila yeholec Itali himongka hikelu gaiboc. Gaboc ngictau Sisa Klodiusdi edome Yuda ngic-ngigac Roma taonka gaibong, yenge salecebame Roma hegilelu hikeyackeibong. Ilec yeke Roma hegilelu Korin taonka gbogbolibenang kwesilu gaiboc. Aime Pol yekela hikewec. <sup>3</sup> Pol ye seli-mac baba ngic, nga Akwila ye bole yogohac balu gawecte yeke macka ngiyefac ailu bafickeme yeke momoc moneng banogale bole yogo balu gaiboc. <sup>4</sup> Bagalu Pol ye Sabat damengka Yuda ngic-ngigac yengele kpakpaduc macka felu Yuda ngic-ngigac nga Griik ngic-ngigac yengeholec yowa mingagec ailu mime yegengkelu gawec.

<sup>5</sup> Aime Sailas nga Timoti yeke Masedonia prowinswacni kwesiboc, Pol ye seli-mac babale bole yogo hegilelu Siduc Madicne sugu sanangnehac milu gawec. Ailu Yuda ngic-ngigac yowa yanguc mime yegengkeme edocebalu gawec, “Yesu ye Mesia hocne.” <sup>6</sup> Ye inguc milu game yenge yowaine suleibong. Suleibong ye hegilecebalu ngakpiine weiyangkeme lube wame yanguc edocebawec, “Ngege ngengileng bikicnginengte ameine yogo nale mi aidaicte, yogo ngengileng aidaicte. Ilec yakumac hegilecnggebalu Israel yengele alingcacni miyac, yengela hikedacte.”

<sup>7</sup> Pol ye inguc milu Yuda ngic-ngigac yengele kpakpaduc mac hegilelu ngic monic wacine Titius Yastus, yeke macka felu ngiyefac aiwec. Ngic yogo ye Israel yengele alingcacni miyacti Wapong afeelu gawec. Yele mac yogo Yuda ngic-ngigac yengele kpakpaduc mac yogolec mecina ngiyewec. <sup>8</sup> Aime Yuda ngic-ngigac yengele kpakpaduc macte damong wacine Krispus, ye nga golowacfocine yenge Yesu ngagesingkeibong. Aime Korin ngic-ngigac homacnedi Polle yowa ngagelu Sugucne ngagesingkelu misa lowaibong.

<sup>9-10</sup> Aime deboc monicka Sugucnedi Pol gung-didicka ingucne yowa yanguc edowec, “**Na damonggadacte. Ilec ga hangocgume micgone mi hidickedamec. Ga sanangke galu mic-yowane midamec. Nale ngic-ngigac habu sugucne taon iwa gagaingte ailu, ngic yengi webac mi aigeledaingte.**” <sup>11</sup> Inguc mime Pol ye hifa moniyang nga tamacne 6 Korin taonka iwa galu Wapongte yowa ngic-ngigac edocebalu weduyelewec.

### *Pol kiyala bahikeibong*

<sup>12</sup> Galio ye Akaia prowinswa kiya sugucne gawec. Dameng iwa Yuda ngic yengilangkac kwele-moniyang ailu Pol ngaba aicnolu yowawa loningte bahikeibong. <sup>13</sup> Kiyala bahikelu kpolickele yanguc miibong, “Ngic yago ye yefe-yowa hegilecaigac. Ye yefe monic balaibelu Wapong afeeningte ngic weduyelecaigac.”

<sup>14</sup> Edobong Pol ye micine efeckeme yowa minogale aiyemewa Galiodi Yuda ngic yanguc edocebawec, “O Yuda ngic, ngic ye sowacne umac sugucne me kpicicne gocne bafuwadecka ingucne, yowangineng nalic ngagedacka. <sup>15</sup> Aime ngengebac ngengileng yowangineng nga wac haicine monic-monic nga yefe-yowangineng yogolec yowangi-nengti fec-wac aigacte ngengung mimoctodaing. Yowa ingucne nani nalic mi mimoctodacte, yogo nale bole miyac.” <sup>16</sup> Inguc milu yowangineng welockelu ayeleme waibong. <sup>17</sup> Walu yenge kwele-moniyang ailu kpakpaduc macte damong, wacine Sostenes, kiyale haicka webong kiya ye yogo nganilu kpaoma aiwec.

*Siria prowinswa hikeibong*

<sup>18</sup> Pol ye Korin gacgu ngic hae-gbafocngineng kwele-madic yowa edocebalu Siria prowinswa hikenale Kenkeria taonka hauwec. Haulu Wapongkolec mimipang miwecte hodoc-dowecine balockelu fodewec.\* Aime Prisila nga Akwila yeke momoc hauibong. Fodeme lac-wagewa felu hikeibong. <sup>19</sup> Yenge Efesas taonka hikelu Pol ye Akwila nga Prisila hegilecepawec. Ailu Yuda ngic-ngigac yengele kpakpaduc macka felu yengeholec Wapongte mic-yowa mingagec aibong. <sup>20</sup> Aime Yuda ngic-ngigac yenge Pol yengeholec ganale uwacnobong ye hegilewec. Ailu yengeholec yowa yanguc mingagec aiwec. <sup>21</sup> "Entacka Wapongti hatacmac ngengela kwesibele ngagemebac na hefaliye kwesidacte." Inguc milu Efesas taon hegilelu lac-wagewa hatacmac felu hikewec. <sup>22</sup> Hikegacgu Sesarea taonka sulumelu Yesule habu Yerusalem iwa gabong yengela felu yengeholec yowa mingagec ailu Antiok taonka hikewec.

<sup>23</sup> Dameng gocna Pol ye Antiok iwa gawec. Gacgu taon yogo hegilelu Galata nga Frigia himongka lolickelu mic-tengtengfocine mibasanang aiyelelu gawec.

*Apolos ye Efesas nga Korin taonka hikewec*

<sup>24</sup> Dameng iwa Efesas taonka Yuda ngic monic kwesiwec, wacine Apolos. Ye Aleksandia taonka fikelu hibi-mac sugucne bamoctolu Wapongte hibiwa yowa kwelengkeicne fagac, yogolec fungine ngage-motoyackewec. <sup>25</sup> Yengi Sugucnele yefe weducnobong ngagewec. Ailu ye Yoanele misa-lowac, yogo sugu ngagelu gawec. Ailu ye Yesule yefe nebocine sugu dondonne dacinoholec milu weduyelewec.† <sup>26</sup> Ye Yuda ngic-ngigac yengele kpakpaduc macka Siduc Madicne hangoc mikac edocebawec. Ailu iwa Siduc Madicne mime Prisila nga Akwila yeke yowaine ngagelu macka mengocke lelu Wapongte yefe dondonnele miboc yegengkecnowec.

<sup>27</sup> Aime Apolos ye Akaia prowinswa hikenogale mime ngic hae-gbafocngineng yengi mibasanang aicnoibong. Aicnolu mic-tengtengfocine Akaia gaibong, yengele hibi yanguc kwelengkeibong, "Ngic yogo ye ngengela fume ngenge mac holecnodaing." Inguc kwelengkelu lacnobong balu hikewec. Hikelu iwa Wapongti ngic-ngigac kwele-madic aiyelme Yesu ngagesingkeibong, yengela hikelu homacnehac baficebalu gawec. <sup>28</sup> Ye yowa sugucne dondonnebenang Yuda ngic ameine bafaliyeyelelu yanguc mime yegengkewec, "Yesu ye hocne Mesia." Wapongte hibiwa yowa yogo milu edalicebame kwelenginenge tapili wawec.

## 19

*Poldi Efesas taonka weduyelewec*

<sup>1</sup> Apolos ye Korin taonka gaemewa Pol ye sifecka-yefe falocke hikecgu Efesas taonka sulumelu mic-tengtengfocine gocne bafuwacebalu <sup>2</sup> uwayelewec, "Ngenge Yesu ngagesingkelu Tili Asuholec aibong, me miyac?"

Inguc mime yengi miibong, "Miyac, Tili Asu gagac, siduc ingucne monic mi ngageibong."

<sup>3</sup> Inguc mibong hatacmac uwayelewec, "Aime ngenge oma misa lowaibong?"

Mime yanguc miibong, "Nonge Yoanele misa-lowac aibong."

<sup>4</sup> Inguc mibong Poldi yanguc edocebawec, "Yoanedi ngic kwelengineng hefaliyeningte misa-lowac aiyelelu yanguc edocebawec, 'Ngic lobena kwesilu gagac, ngenge ye ngagesingkedaing.' Ye yowa yogo Yesule ngagelu miwec." <sup>5</sup> Ngic yenge yowa yogo ngagelu Sugucne Yesule wacka misa-lowac aibong. <sup>6</sup> Misa-lowac aibong Poldi moleine socnginang lome Tili Asudi yengela wawec. Walu kwelengineng wakeme yenge yowa haicne monic nga siduc-yowa miibong. <sup>7</sup> Ngic inguc aibong, yengele dzalengineng 12 ingucne aiwec.

<sup>8</sup> Pol ye Yuda ngic-ngigac yengele kpakpaduc macka tamacne habackang hangoc mikac felu Siduc Madicne mime yegengkeme edocebalu gawec. Ailu ye Wapongte nganidamongte fungine yengeholec mingagec ailu edocebawec. <sup>9</sup> Inguc aime ngic gocne yenge kwele-sanang ailu Yesule yefe madicne yogo ngic-ngigac habu sugucne yengele haicka lobe holecnolu suleibong. Aime Pol ye yenge hegilecebawec. Hegilecebalu mic-tengtengfocine sugu kpaducebalu hadengsoc ngic monic wacine Tiranus, yele wewedu macka ngiyelu Siduc Madicne milu weduyelelu gawec. <sup>10</sup> Ye hifa yaeckang inguc ailu

\* **18:18:** Yuda ngic-ngigac yengele yefe-yowa balaiabelu Wapongta mipangkewecte ailu, hodoc-dowecine mi balockewec. Mimipang balaiabeme motome, hodoc-dowecine balockelu fodewec. Aibaba yogolec fungine Himong Kisiwa 6:1-21 iwa fagac. **18:18:** Him 6:18; Sale 21:24 † **18:25:** Ngic-ngigac yenge Yesule mic-tengteng aingale Wapong Mamac nga Madec ailu Tili Asu yengele wacka misa-lowac aidaing. Yoanele misa-lowac yogo andoine mi aiwec. Apolos ye yogo mi ngage-motowec. **18:28:** Sale 9:22 **19:1:** 1Kor 3:6 **19:2:** Sale 8:16 **19:4:** Mat 3:11 **19:6:** Sale 8:17; 10:44,46

gacgume Asia prowinswa Yuda ngic-ngigac nga Grik ngic-ngigac sasawadi Sugucne Yesule yowa ngageyackebong.

<sup>11</sup> Ailu Wapongti Pol moleina pasi haicine monic-monic damuineholec bame fikewec. <sup>12</sup> Pol ye bolele kpulucine nga haicte keleng babaine balu gawec, ngic-ngigac yenge yogo balu huckolec yengela bahikebong yenge yogo bauwalu madickelu gaibong. Aime aleng yenge kwelenginangkocni ofelu hikelu gaibong.

#### *Alengti ngic 7 basowalecebawec*

<sup>13</sup> Yuda ngic gocne himong gocna lolickelu aleng yebicebalu gaibong. Yengelacni ngic gocne yengi ngic-ngigac alengkolec yengele socka Sugucne Yesule wacka kwesac ailu wackelu bole baibong. Inguc balu yanguc milu gaibong, "Yesu wacine Poldi edocebalu weduyelecaigac, ga ngic yele wacka hikedamec." <sup>14</sup> Ailu Yuda ngic monic wacine Skewa, ye depec-baba ngic micne gawec. Aime ye madecfocine 7 yenge inguc hocne ailu gaibong. <sup>15</sup> Dameng monicka inguc mibong alengti yowa yanguc bafaliyewec, "Yesu ngagegabac. Nga Pol inguchac ngagegabac. Aime ngenge ma?" <sup>16</sup> Inguc milu ngic alengkolecti aalic ngagelu dacineholec fangkewec. Fangkelu madec sasawa hobacebalu ngakpingineng basulackelu wecebalu socngineng balockewec. Balockeme yenge sac lowalu senggang senggang fangkelu mackacni walu hikeibong.

<sup>17</sup> Aime Efesas taonka Yuda ngic-ngigac nga Grik ngic-ngigac yenge ngic alengkolecte siduc ngagelu tapilingineng wame homacnehac hangocebawec. Inguc ailu Sugucne Yesu afeulu mitengkeibong. <sup>18</sup> Mitengkeibong ngic-ngigac Yesu ngagesingkeibong, yengelacni homacnedi kwesilu aibabangineng sowacne ailu gaibong, yogo yegena mifickeyackebong. <sup>19</sup> Yogo mifickebong, ngic-ngigac homacnedi esecne dinac-kpanggec aibaba balu gaibong, yogolec hibingineng kpaduckeyackelu ngic yengele haicka lobong dacka lobewec. Kpaduckelu lobong lobewec, hibi yogolec fuline, 50 taosen siliwa moneng dzaline yogolecsoc aiwec.\* <sup>20</sup> Aime yenge inguc aibong Sugucnele yowa-siducti nebec nga nebocka sawelu tapiliineholec hikewec.

#### *Poldi Yerusalem iwa hikenogale miwec*

<sup>21</sup> Pol ye bolele yogo bamoctoyackelu yanguc miwec, "Asudi kwelena ngage-ngage nelegac. Ilec na Masedonia nga Akaia prowins falockelu Yerusalem iwa hikedacte. Hikelu gabe motome Roma taonka hikedacte." <sup>22</sup> Inguc milu mole-bafickecine Timoti nga Erastus salecepame Masedonia prowinswa molickelu hikeiboc. Aime yeicnebac Asia prowinswa hatacmac kpiscnemac taockelu gawec.

#### *Gbong Artemis*

<sup>23</sup> Dameng iwa Efesas taonka Yesule yefe-yowale ailu hasowac sugucne fikewec. <sup>24</sup> I yangucte, siliwadi mole-hibi baba ngic monic gawec, wacine Demitius. Yedi Artemis siduc-gbong yogolec ibu-macte siduc-gbong kpisc-kpisc siliwadi balu game ngic yengi fuli balu gaibong. Fuli babong ye nga bole-ngic agofocine moneng homacne balu gaibong. <sup>25</sup> Aime Demitiusdi bole-ngic agofocine nga mole-hibi baba ngic sasawa kpaducebalu yanguc edocebawec, "Agofocne, bolenonggeng yagodi moneng-mafa bafuwanolecaigac, yogo ngenge ngagegabieng." <sup>26</sup> Aime ngic monic kwesilu gagac, wacine Pol, yele fungine ngagegaing. Ye Efesas taonka nga Asia prowins iwacni ngic homacne kpaducebalu kwele basifuc aiyelegac. Ailu yanguc edocebalu gagac, 'Siduc-gbong ngic-moledi baicne, yogo wiyac noine miyac.' <sup>27</sup> Ye inguc aime bolenonggengte tapiliine wadaicte. Ailu yogo sugu miyac. Gbongnonggeng sugucne Artemis yele ibu-mac yogo wiyac omane aidaicte. Ailu Artemis yeicne siducinele tapiliine wayackedaicte. Aime Asia prowinswacni nga himong nebec nga nebockacni ngic yenge momoc Artemis afecaigaing. Aime siducine wenuc miyac aidaicte, yogodi kpungke-kpungkeine aigac."

<sup>28</sup> Demitius ye yowa inguc edocebame yenge aalic sugucne ngagelu aukwelu yanguc miibong, "Efesas nongileng Artemis ye feicnetowa!" <sup>29</sup> Inguc mibong ngic homacnedi yengela taockelu taon wakelu aalic sugucne ngagelu kpaducad sobengka sasawadi kpaduckelu momochac gasacke hikeibong. Ailu Masedonia-hocni ngic yaeckang Polholec gacaigaic, wacnginec Gaius nga Aristakus, yeke bacepalu fulucepa hikeibong. <sup>30</sup> Aime Pol ye inguc ngagelu ngic kpatulelu sobengka hikeibong, yengeholec hikenogale mime, mic-tengtengfocine yengi sebileibong. <sup>31</sup> Ailu Asia prowinsle ngic sugucne gocne yenge Pol agofocinedi gaibong, yengi inguchac Pol kpaducad sobengka mi hikenale kpatalacnolu yowa sanangne lobong hikewec.

**19:11:** Sale 14:3    **19:12:** Sale 5:15    **19:17:** Sale 5:11    \*    **19:19:** Siliwa moneng monic, yogo hadeng moniyangte bole-fuli.    **19:21:** Sale 23:11; Rom 1:13    **19:23:** 2Kor 1:8    **19:29:** Sale 20:4; 27:2; Kol 4:10; Film 24

<sup>32</sup> Aime kpaduckeibong, iwa ngic-ngigac yenge yowa hendolong homacne aibong yowa sifuweyackewec. Sifuweme ngic gocne homacnedi yanguc ngageibong, “Fungine omale nongileng yawa kwesilu domagabeleng?” Inguc milu ngagebong kpungkewec. <sup>33</sup> Kpungkeme domabong Yuda ngic-ngigac agongineng monic wacine Aleksanda, ye ngic-habu sugucne yengele hewacka fedomawec. Domalu yowa milu edocebanale ailu ngic mole balang baduyelewec. <sup>34</sup> Aime ngic yenge ye Yuda ngic, inguc biyac ngani-motolu yengileng momochac 120 minit ngama, yogolec kwelina aukwelu yanguc miibong, “Efesas nongileng Atemis ye feicnetowa!”

<sup>35</sup> Inguc ailu gaebongka Efesas taonte hibi kweleng-kweleng ngicti kwesilu yanguc edocebawec, “Ngeenge waickelu ngiyening! Efesas ngic ngeenge ngagening, Atemis-towanonggeng ilucine nga ibu-macine damongkecaigabeleng. Ailu yele iluc sawawacni wawec, yogo himongtowa himongte ngic-ngigac sasawadi ngageyackegaing. <sup>36</sup> Ilec ngeenge kwelengineng wana, aibaba kosa mi aining. <sup>37</sup> Aime ngeenge ngic yaeckang bacepalu kwesigaing, yeke siduc-gbongnonggengte ibu-mackacni wiyac monic hise mi bagabiyec, me Atemis fecfec ailu mi sulegabiyec. <sup>38</sup> Entacka Demitiusle bole-ngic agofocine yenge ngic monicte ngagebong sowaleme ye yowawa lodabiyeng. Aime yowawa lolole dameng fagac ailu kiya gagaing. Umacngineng yogo yengela bahikelu yowawa locebadabiyeng. <sup>39</sup> Me entacka ngengileng yowa monic fagacka damong yengele yowale damengka bahikebong mimoctodaing. <sup>40</sup> Umacnonggeng yago fagac, ngeenge yakumac wiyac aigaing, ailu Roma yengele damong yengi yowawa locnubadaingkale damong balu gadabeleng. Entacka ngic sugucne weledaingtewa ingucne, wiyac fungine minogale kpungkedabelengte.” <sup>41</sup> Hibi kweleng-kweleng ngicti yowa inguc milu salecebame hikeibong.

## 20

### *Poldi Masedonia nga Akaiia prowinswa hikewec*

<sup>1</sup> Yowa hendolong miyac aime Pol ye Yesule mic-tengtengfocine hefolecebame kwesibong. Kwesibong yowa edocebalu mibasanang aiyelelu molenginang balu Masedonia prowinswa hikewec. <sup>2</sup> Hike prowins yogo falockelu Yesule habu ngiye-hikegaingsoc, yengele ngage-ngage hole-gboliyelu mibasanang yowa homacne aiyelela hikewec. Hikegacgu Grik himongka hikelu <sup>3</sup> iwa tamacne habackang gawec. Gacgu kiwecka haulu lac-wagewa yefe Siria prowinswa hikenogale miwec. Mime Yuda ngic-ngigac yengi ngaba aicnolu yowaine hefebong ngagelu ye Masedonia prowinswa yefe hikenale ngagelu hefaliyewec.

<sup>4</sup> Aime ngic yangucti yefewa Pol balaiheibong.

Pirus madecine Sopate Bereahocni, ailu

Aristakus nga

Sekundus yeke Tesalonika taonkacni. Ailu

Gaius Debe-hocni nga

Timoti. Ailu

Tikikus nga

Tofimus, yeke Asia prowins mesuinacni.

<sup>5</sup> Ngic yogo yenge molickelu Toas taonka wangecnonggeng gaibong. <sup>6</sup> Wangec gacgubong nongebac bret yis mikacte hombang, yogolec dameng motome Filipai-hocni lac-wagewa feibong. Felu hadeng 5 hikegacgu Toas taonka hikelu iwa hadeng 7 gaibong.

### *Toas taonka Yutikus homame bagboliyewec*

<sup>7</sup> Aime nonge Sondawa bret badulu nonogale kpaduckebeng, Pol ye mac saeme hikenogale ngagelu Wapongte mic-yowa edocebalu gawec. Edocebalu game deboc hewac aime <sup>8</sup> mac kweline monic feina ngiyeibeng, iwa hifa homacne lobewec. <sup>9</sup> Aime Pol ye yowa-dale mime madec monic wacine Yutikus, ye gungte tulic ngiyecgu ngigeckeme gbelong nuwa yefe kpolotockelu falocke himongka haulu wehomame fawec. Aime bafangkulu nganibong homaicne aiwec. Ye mac kweline habackang feina wilini, iwacni wawewec. <sup>10</sup> Waweme Pol ye haulu madec feina famacke falu ngic-ngigac yanguc edocebawec, “Madec ye gbolincne fagacte ngeenge mi hiyaning.” <sup>11</sup> Inguc milu mac kwelina felu bret badulu yengeholec momoc noibong. Nobong motome yengeholec Siduc Madicnele mingagec ailu gacgume mac saeme hegilecebalu hikewec. <sup>12</sup> Ngic yengi sugu madec gboliyeme macina mengocke hikelu kwelengineng basanangkeibong.

### *Miletus taonka hikeibong*

<sup>13</sup> Aime gocne nonge Polholec Asos taonka hikenangte salecnubame lac-wagewa felu hikebeng yeicnebac hige-yefe fuwec, ye ngage-ngage inguc ngagewec. <sup>14</sup> Kwesi iwa bafuwacnubalu lac-wagewa ofeme nonge momoc hikegacgu Mitalini taonka sulumeibeng. <sup>15</sup> Iwacni hikegacgu saeme Dzintacka Kios nucka hikelu kiwec falockelu Mituwacka Samos nucka hikeibeng. Iwacni Lolowingka Miletus taonka hike sulumeibeng. <sup>16</sup> Pol ye Pentikos

ngiye-ngiye damengka Yerusalem iwa biyac hike ngiyenale ngagesiwec. Ailu ye Asia prowins mesuina ngiyeemewa dameng ewalidaickale, Efesas moc falockelu hikegacgu Miletus hikewec.

*Poldi Efesas ngic yengele sawang-yowa miwec*

<sup>17</sup> Hike iwa domalu yowa lome Efesas hikeme Yesule habu yengele damong yenge kwe-siibong. <sup>18</sup> Kwesibong Poldi yowa yanguc edocebawec, “Na Asia prowinswa fulu ngengela bolene wenuc milockelu balu gaiba, yogo funginacnihac ngagegabyeng. <sup>19</sup> Naneicne bawacnagulu Sugucnele kwelec kwekwe gabe Yuda ngic-ngigac yengi ngaba ainelelu lokwesacka locnubong ngengele kwele-sowac ailu hiyalu gaiba. <sup>20</sup> Ailu yowa minogale mi hangocnume hegilebe fawec. Ailu ngenge madickenigte yowa homacne ngic-ngigac mac-sobengningan nga macnginangsoc wedungelelu gaiba.

<sup>21</sup> “Na Yuda ngic-ngigac nga Grik ngic-ngigac momochac yanguc mibe yegengkeyelewec. Yenge kwele-hefaliyec ailu Wapongta hikelu Sugucnenonggeng Yesu ngagesingkening. <sup>22</sup> Ngagegacing, yabac Asudi kwelena dogbac aineleme Yerusalem iwa hikedacte. Hikebe wiyac monic weningucne iwa fikeneleidaicte, yogo mi ngage-motogabac. <sup>23</sup> Na yanguc sugu ngagecaigabac, muc-mac nga doic Yerusalem iwa wangecne fagac. Yogolec macsoc hikebe Tili Asudi mime yegengkegac. <sup>24</sup> Inguc mime naneicne gaganele ngagebe feicne mi aicaigac. Na moc yefe milockeneleme balaibe hikenogale ainelecaigac. Ailu Wapongti wiyac moc kwele-madic aicaigacte Siduc Madicne mibe yegengkenale Sugucne Yesudi edocnuwec. Edocnume kwelenedi bole yogo bagacgu bamoctonogale aigac.

<sup>25</sup> “Ailu yanguc mibe ngagening. Na Wapongte ngani-damongte yowa-siduc ngic-ngigac hewacnginang edocngebalu wedungelebe ngagelu gaibong, ngenge lobewa gacgu haic-mesune hatacmac mi nganidaingte. <sup>26-27</sup> Wapongti ngage-ngageine sasawa edocnuwec, yogo sasawa yegen a edocngebaiba, yogowacni yowa monic hegilelu mi hesongkebe fawec. Ilec yakumac hedec hesulumec aingelebe ngagening, ngengelacni monicti kweleine mi hefaliyedaicte, yele bikicte ameine nala mi fadaicte.

<sup>28</sup> “Wapongte habu yeicne sacti fulu bacnubawec. Ailu Tili Asudi habu yengele damong ganingte bawosaecngebawec. Ilec ailu ngenge ngengileng damongnagulu, lama-damong madicne ingucne Wapongte habu ngani-damong aiyeledabiyeng. <sup>29</sup> Na yanguc ngagegabac, ngenge hegilecngelalu hikebe kate-hoda micineholecti ngengela kwesilu lama basowalecngabanogale aidaingte. <sup>30</sup> Ailu ngengileng hewackacni ngicti fikelu kwesac-yowa ailu mic-tengtengfocine gocne biyac bacngabanogale aidaingte. <sup>31</sup> Ngenge yogolec deboc-gboli gadaing. Na hifa habackang deboc hadeng hii kwele-sowackolec galu sawang-yowa filesoc edocngebalu gaiba, yogo hegilebong mi wadaic. Ilec ngenge bolene yogo ngagesilu gadabiyeng.

<sup>32</sup> “Na Wapongte molewa locngebagabac. Ailu kwele-madicinele yowa yogowa locngebagabac. Yogodi tapili baningte basananggebame ngenge ngic-ngigac gbagbacne gaga baibong gagaing, yogo yengeholec momoc gaga-sanang badaingte. <sup>33</sup> Aime na ngengeholec galu ngakpi-kpoluc me hiye-monengte andac mi aingeleiba. <sup>34</sup> Nga molenedi bole babe moneng fikeme woc-wiyacnonggeng fulu balu naneicne nga ngicfocne baficebaiba, ngenge yogo biyac ngageibong. <sup>35</sup> Bolene sasawa balu gaiba, iwa yanguc wedungeleiba, ngenge waweweine baficebanogale bole sugucne badaing. Sugucne Yesudi yowa yanguc miwec, **‘Ga kwele-madicka agogone wiyac monic lacnodamecte, yogolec kwele-angac sugucne gala fikedaicte. Nga kwele-madicka agogonedi wiyac monic geleidaicte, yogolec kwele-angac efecnemac gala fikedaicte.’** Yowa yogo mi ngigecngebadaic.”

<sup>36</sup> Pol ye yowa inguc mimoctolu yengeholec ketadi holelu milockewec. <sup>37</sup> Milockeme motome ngagelu yenge kwele-sowac ailu hiyalu Pol hobalu muduckeibong. <sup>38</sup> Ye esecne yowa monic yanguc edocebawec, “Ngenge haic-mesune hatacmac mi nganidaingte.” Ilec ailu yenge kwele-sowac sugucne ngagelu mengocke hikelu lac-wagewa lobong felu hikewec.

## 21

*Pol lac-wagewa felu Tair taonka hikewec*

<sup>1</sup> Nonge hegilecebalu lac-wagewa felu Kos nucka hikeibeng. Hikebeng saeme Rodes nucka hikelu Patara taonka sulumeibeng. <sup>2</sup> Iwa lac-wage monic Fonia himongka hikenale efeckeme bafuwalu iwa felu hikeibeng. <sup>3</sup> Hikegacgu Saiparus nuc kanawapec ngiyeme nganilu ewalilu Siria prowins sugucnapec hikeibeng. Hikelu lac-wagedi Tair taonka mafa iwa lonale hikeibeng. <sup>4</sup> Hikelu lome nonge macka felu mic-tengtengfocine

bafuwacebalu yengeholec hadeng 7 gaibeng. Gaebengka Asudi bacebame yenge Poldi Yerusalem iwa mi hikenale sawang-yowa miibong. <sup>5</sup> Aime gabeng damengnonggeng bangkaleme ngic-ngigac adu-madecfocnginengkolec yengi mengocnubabong nonge momoc taon yogo hegilelu kiwec mecina hauibeng. Haulu dingongka ketadi holelu milockeibeng. <sup>6</sup> Milockebeng motome molewa babac ailu lac-wagewa febung yenge macka hefaliye hikeibong.

*Agabusdi Polle sawang-yowa miwec*

<sup>7</sup> Tair-hocni hikegacgu Tolemes taonka hikelu lac-wagewacni walu taon iwa gaibeng. Galu ngic hae-gbafocngineng iwa gaibong, yengeholec hadeng moniyang felu ngiyeibeng. <sup>8</sup> Mac saeme lac-wagewa felu hikegacgu Sesarea sulumelu haulu Filip bafuwaibeng. Filip ye mole-bafic ngic 7 locebaibong, yengele hewackacni monic ye hocne. Ailu ye Yesule Siduc madicne milu edocebacaigac. Nonge ye bafuwalu yele macka feibeng. <sup>9</sup> Ye adufocine 4, yenge ngigac-neleweng gaibong, yenge Wapongte siduc-yowa milu gaibong.

<sup>10</sup> Iwa hadeng gocne gaebengka Yudeya himongkacni Wapongte siduc-mimi ngic monic, wacine Agabus, ye nongela kwesiwec. <sup>11</sup> Kwesi sulumelu Polle umbika balu yogodi yeicne hige-moleine hefewec. Hefelu yanguc miwec, "Tili Asudi yanguc migac, 'Umbika yagolec fileine ye Yerusalem iwa hikeme Yuda ngic yengi yanguc hocne aicnodaingte. Aicnolu Israel yengele alingkacni miyac, yengele molewa lodaingte.' "

<sup>12</sup> Yowa inguc mime nonge nga mac-filefocine nonge sasawadi Pol Yerusalem iwa mi fenale sanangne milu sebilebeng <sup>13</sup> yedi yanguc miwec, "Ngenge homacne hiyalu hungkwefang mi ainelening. Na Yerusalem iwa mucka fedacte, yogo sugu miyac. Na Sugucne Yesule wacka homanogale efeckegabac."

<sup>14</sup> Yowa edobeng mi ngageme hegilelu yanguc miibeng, "Sugucne ngagegac, inguc yogo fikecnodaic."

*Pol Yerusalem iwa fewec*

<sup>15</sup> Hadeng gocne motome Yerusalem iwa fenogale efeckebeng. <sup>16</sup> Efeckelu Sesarea-hocni Yesule mic-tengtengfocine gocne yengi mengocnubalu ngic monic, wacine Nason, yele macka locnubaibong. Aime Nason ye Saiparus nucka fikewec. Ailu biyachac molickelu kwele-hefaliyec aiwec.

<sup>17</sup> Aime hikegacgu Yerusalem iwa hike sulumeibeng, iwa ngage-ngagesingkolec ngic hae-gbafocnonggeng yengi ago ainolelu kwele-madic ngageibong. <sup>18</sup> Aime mac saeme Poldi Yakobosle macka mengocnubame feibeng. Felu ngiyeibeng micnefocngineng yenge kwesiibong. <sup>19</sup> Kwesiyaekbong Poldi yenge molenginang bacebawec. Ailu Wapongti moleina pasi bame Israel yengele alingkacni miyac, yengela bole bame noine sasawa fikeyackewec, yogolec yowa-siduc ayeleyackewec.

*Gbagbacne ainogale hasoc holeningte miibong*

<sup>20</sup> Pol ye yowa-siduc ayeleme Wapong wacine bafebeng motome Pol yanguc edoibong, "Ngic hae-gbanonggeng, ga ngagegic, Yuda ngic-ngigac taosen homacne ewaligac, habu sugucnedi Yesu ngagesingkelu gagaing. Ailu yenge sasawadi Wapongte yefe-yowa yogo mamang hidulu sanangne balu gacaigaing. <sup>21</sup> Aime gale yowa-siduc yanguc kwesime ngagecaigaing. Yuda ngicti Israel yengele alingkacni miyac, yengele hewacka gagaing, yenge yanguc milu edocebacaigac, 'Ngenge Mosesle yowa hegiledaing. Ailu sabacfocngineng yengele soc tofangineng mi helockedaing. Ailu Yuda ngic-ngigac aibabanonggeng hegiledaing.' Yenge yowa inguc edocebaengka ngagecaigaing. <sup>22</sup> Aime ngic yenge gale inguc ngagelu aalicebadaicte, yogolec wenuc aidabelengte. Ga Yerusalem yawa kwesimec, yogolec siduc ngagedaingte.

<sup>23</sup> "Pec nonge yowa monic edocgubeng balaibedamec. Nongela ngic 4 gagaing, yenge Wapongkolec mimipang milu hodoc-dowecngineng mi balockeicne gagaing. <sup>24</sup> Ga yengela taockelu aibaba gbagbacne fagac, yogo balaibelu yengeholec hasoc hole-holeningte wiyac fuli badaingte. Balu hodoc-dowecngineng balockelu fodedaingte. Ga inguc aiyengka nganicgulu gale yanguc ngagedaingte, 'Yowaine kwesime ngageibeng, yogo noine miyac. Ye yeicne Wapongte yefe-yowa balaibecaigac.' Ga inguc aiyengka Yuda ngic-ngigac Yesu ngagesingkegaing, yenge gale ngaba mi aidaingte. <sup>25</sup> Aime Israel yengele alingkacni miyac yogo yengi Yesu ngagesingkegaing, yengele esecne yefe-yowa miibeng, yogolec yowa-siduc hibiwa biyachac yanguc kwelengkelu yeicne. Ngic-ngigac yenge siduc-gbongfocngineng yengele depecte sic wecaigaing, ngenge yogo hegiledaing. Ailu bec-sic ubeina mucti fuluckebong asuine kwedickeme homaicne, yogolec biucine mi nodaing. Ailu sac mi nodaing. Ailu selo-boic aibaba mi aidaing."



<sup>26</sup> Inguc miibong Pol ye yowangineng ngagelu mac saeme ngic 4 yengela taockelu yenge momoc aibaba gbagbacne molickelu aibong. Aime Ibu-macka felu gbagbacne ainogale dameng motome ibungineng lolu hasoc filesoc holenogale mime yegengkewec.

*Ibu-macka feme baibong*

<sup>27</sup> Aibaba gbagbacne yogolec hadeng 7 motonogale aiyemewa, Pol ye Ibu-macka felu gawec. Game Asia prowinswacni Yuda ngic-ngigac yengi ye nganilu ngic-ngigac habutowa kwelengineng kwefangkebung Pol ngaba aicnoibong. Aicnolu hobalu <sup>28</sup> aukwelu yanguc wackelu miibong, "Oe Israel ngic-ngigac, ngenge wele baficnubabong banang! Ngic yagodi himongsoc hike galu Yuda ngic-ngigac nongileng nga yefe-yowanonggeng ailu Ibu-macnonggeng, yogolec ngaba ainogale, ngic yagodi edocebalu gagac. Ailu Ibu-macnonggang Grikngic mengocebame ofelu macnonggeng gbagbacne yago wonong holeibong."\* <sup>29</sup> Aime Pol ye Efesas ngic monic wacine Tofimus yeholec taonka moc hike-kwesic aiboc nganicepalu gaibongte ailu yanguc ngagesilu miibong, "Ye Ibu-macka mengockeme yeke momoc feiboc." Inguc moc ngagesibong, yeke mi feiboc. <sup>30</sup> Ilec macfocine yenge aukwebong ngagelu fangke gbululuckelu wele kpaduckeibong. Kpaduckelu ngic gocne yengi Pol hobalu Ibu-mackacni fuluckebong wame, iwahac nu holeyackeibong.

*Pol ngic yengele molewacni bamoctowec*

<sup>31</sup> Ngaba yengi Pol balu wehomanogale aibong, Roma hudu-baba ngic yengele damong sugucnela yowa yanguc hikeme ngagewec, "Yerusalem ngic-ngigac sasawa yenge yengutihac ngaba ainagulu hendolung sugucne aigaing." <sup>32</sup> Yowa inguc ngagelu iwahac hudu-baba ngic feicne waicne bacebame gasackelu ngic-ngigac habu yengela hauibong. Haulu nganibong ngic yenge Pol welu gabong hudu-baba ngic nga damongngineng yenge kwesibong, nganicebalu akikic hegileibong.

<sup>33</sup> Aime hudu-baba ngic yengele damong sugucnedi kwesilu mime hudu-baba ngicfocine yenge Pol balu sen yaeckangti hefeibong. Hefebong ngic-ngigac uwayelewec, "Pol ye ma ngic, ailu ye oma wiyac aiwec?" Yogolec uuwa bole bawec. <sup>34</sup> Aime ngic yenge aunne aunne aibong hendolonga yowa fungine ngagenale aibibiyewec. Aibibiyelu mime hudu-baba ngic yengi Pol balu yengileng bole-macka hefaliye hikeibong. <sup>35</sup> Aime Pol ye litiwa fenogale aime ngic yengi lolickelu sanangne igockebong hudu-baba ngic yengi Pol bafangkelu feibong. <sup>36</sup> Inguc aibong ngic-habutowadi balaibecebalu aukwela aukwela hikelu yanguc miibong, "Ngic ye webeng homana!"

<sup>37</sup> Inguc milu Pol mac kwelina bafenogale aiyebongka, yedi hudu-baba ngic yengele damong sugucne uwacnowec, "Na nalic yowa edocgudacte, me?"

Mime damongti miwec, "Ga Grik yowa ngagegic, me?" <sup>38</sup> Esecne Isip ngic monicti ngaba bafuwanale ngic sowacne 4 taosen mengocebame himong kisiwa misaine mikacka hikeibong. Ga ngic yogo, me ga ngic monic?"

<sup>39</sup> Uwacnome Poldi yanguc edowec, "Na Yuda ngichenang, ailu Silisia himongka Tasas taon wacine sugucne fagac, yogowacni. Ga nalic ngageneleengka ngic-ngigac yowa kpisicne edocebabe."

*Poldi Yuda ngic-ngigac yowa edocebawec*

<sup>40</sup> Inguc mime ngagecnome Pol ye litiwa domalu ngic-ngigac mole balang baduyelewec. Baduyeleme yowa mikac ailu waickelu domabong, Hibru yowanginang yefe yanguc edocebawec,

## 22

<sup>1</sup> "Sugucnefocne nga ngic hae-gbafocne, naneicne fungine edocngebabe ngagening."

<sup>2</sup> Milu Pol ye Hibru yowawa yefe mime ngagelu uc mikac aiyaickebong.

Aime ye hatac taockelu yanguc edocebawec, <sup>3</sup> "Na Yuda ngic, Silisia himongka Tasas taon iwa fikeiba. Ailu Yerusalem yawa galu suguleiba. Wewedu Gamaliel yele bagewa gabe yedi ngambocnonggeng yengele yefe-yowa sasawa weduneleme ngageyackeiba. Aime ngenge yanguctihac aibaba aigaing, yogo ingucnehac Wapongti ngage-madickenelenale milu yowa yogo mamang hidulu sanangne balu gacaigabac. <sup>4</sup> Ailu ngic-ngigac Yesule yefe balaibeibong, yenge weyebic ayelelu witicebalu muc-macka locebalu gaiba. Ailu wehomacebanogale miiba. <sup>5</sup> Yogo depec-baba ngic yengele damong sugucne nga Yuda ngic-ngigac yengele Tutumangtowale damongfocngineng yenge nale aibaba yogolec fungine yogo edocngებადაingte. Yengi hocne hibi monic ngic hae-gbafocnonggeng Damasko gagaing, yengela bahikenogale kwelengkelu neleibong. Yogo silicine yanguc, ngic-ngigac

21:26: 1Kor 9:20 \* 21:28: Wapong Ibu-macine wonongkolec nganilu ngaba aidaickale, yenge yowa yogo miibong. Israel yengele alingacni miyac, yenge iwa mi feningte aka holeyeleicne. 21:29: Sale 20:4 21:36: Luk 23:18  
21:38: Sale 5:36-37 22:3: Sale 5:34 22:4: Sale 8:3

Yesule yefe balaibebong nani bafuwacebadacte, yogo witicebalu Yerusalem baceba kwesidacte. Aime ameine weboting aiyeledaingte.

<sup>6</sup> “Inguc milu yefe hikegacgu wenac hewac-hewac ingucne Damasko mac bangkalebe, iwahac honocmengkacni angoc sugucnedi biyac walu kwenggalanguwec. <sup>7</sup> Kwenggalangnume himongka lodingke wawelu fabe, yowa malac monic yanguc fikeme ngageiba, **‘Sol, Sol, ga omale weyebic ainelelu gacaigic?’**

<sup>8</sup> “Inguc ngagelu yanguc miiba, ‘Sugucne, ga maa?’

“Mibe yanguc edocnuwec, **‘Weyebic ainelecaigic, na hocne Yesu Nasaret taonkacni.’** <sup>9</sup> Ngic naholec gaibong, yenge angoc sugucne yogo nganiibong. Nga yowa edocnuwec, yogolecbac kauc baibong.

<sup>10</sup> “Aime nani uwaiba, ‘Sugucne, oma wiyac ainogale minelegic.’

“Mibe Sugucnedi yanguc edocnuwec, **‘Ga fangkelu Damasko hikeengka wiyac aicte miiba, yogo monicti edocgudaicte.’** <sup>11</sup> Aime hibi-angocineholecti dongena kwenggalangkewecte hilabe dongene kundung kwewec. Inguc aibe ngicfocne yengi molena balu Damasko bacnulu hikeibong.

<sup>12</sup> “Iwa ngic monic gawec, wacine Ananaias, ye yefe-yowa ninic balaibelu game Yuda ngic-ngigac taon iwa gaibong, yenge sasawadi yele ngagebong madickelu gawec. <sup>13</sup> Ngic yedi hocne nale emewa kwesi sulumelu yanguc edocnuwec, ‘Ngic hae-gbane Sol, ga dongegone hilanong.’ Inguc mime iwahac dongene hilalu ye nganiiba.

<sup>14</sup> “Inguc milu yowa yanguc edocnuwec, ‘Ngambofocnonggeng yengele Wapong, yedi boleine bacte milu edalicgugac. Aime ga Aibaba Dondonnele Fileine nganiyengka yele mickacni yowa ngagecte bawosaecguwec. <sup>15</sup> Ga ye wideckelu wiyac ngani-ngagec aigic, yogolec siduc himongsoc ngic edocebalu hikedamec. <sup>16</sup> Ngagegic, ga dameng mi wickenong! Fangkelu misa-lowac ailu Yesule wang wackeengka bikicigona suwena.’

<sup>17</sup> “Inguc mime hefaliyelu Yerusalem iwa Ibu-macka felu milockelu gung-didicka ingucne Sugucne nganiiba. <sup>18</sup> Nganibe yowa yanguc edocnuwec, **‘Mac yagolec ngic-ngigac yenge gale mickacni nale siduc miyengka ngagelu hegiledaingte. Ilec ailu ga Yerusalem hegilelu biyac hikenong.’**

<sup>19</sup> “Inguc mime yowa yanguc bafaliyeiba, ‘Sugucne, ga ngagesinggubong, nani kpakpaduc macnginangsoc felu witicebalu fuluceba walu hududi wecebalu gaiba, yogo ngagegaing. <sup>20</sup> Ailu widecgone Stifen sackolec webong homanale ailu ngakpingineng dalicne hemoctobong nani damongkebe webong ngagebe madickewec, yenge yogo ngageyackegaing. Yogolec yowa mibe ngagedaingte.’

<sup>21</sup> “Inguc mime Sugucnedi yanguc edocnuwec, **‘Miyac, na himong dalicka Israel yengele alingkacni miyac, yengela salecgube hikedamecte. Ilec ga biyac efeckelu hikenong.’**”

<sup>22</sup> Ngic yenge hedec kweebongka miwec. Aime Pol ye Sugucnele yowa yogo edocebame yenge dacineholec aukwelu yanguc miibong, “Ngic ingucne yogo gagaine miyac aidaic. Ye game nalic mi aidaicte.” <sup>23</sup> Inguc milu aukwelu aalicebame ngakpingineng dalicne hemoctolube filabong feme balu wickeibong.

#### *Pol hududi mi wenogale aibong*

<sup>24</sup> Aibong damong sugucnedi mime hudu-baba ngic yengi Pol bole-macnginang balu feibong. Ailu ngic yenge omale homacne aukwegaing, yogolec indingkelu muc-hududi webong sowacneine mifickeme ngagenale mimoctoyelewec. <sup>25</sup> Mime yenge muc-hududi wenogale mucti hige-moleine hefelickeibong. Aime Pol ye hudu-baba ngic yengele damong yanguc milu uwacnowec, “Nenge ngic monic Roma ngic-ngigac yengele alingka taockelu game, ye yowawa mi lolu nalic muc-hududi wedaingte, me? Ngic ye yowawa lolubac nalic hududi wedaingte.”

<sup>26</sup> Inguc mime damongnginengti damong sugucnela lelu yanguc edowec, “Wenuc ainoga? Ngic ye Roma ngic-ngigac yengele alingka taockewec gagac.”

<sup>27</sup> Inguc mime damong sugucnedi Pol uwacnonale hikelu miwec, “Minong, ga foinac Roma ngic-ngigac yengele alingka taockeing gacaigic, me?”

Mime Poldi miwec, “Aime foinac, na Roma ngic-ngigac yengele alingkacni.”

<sup>28</sup> Inguc mime yedi miwec, “Na moneng homacne lobe monengti hilocnume Roma ngic aiba.”

Inguc mime Poldi miwec, “Nabac Roma ngic-ngigac yengele alingka fikeiba.”

<sup>29</sup> Inguc mime yenge iwahac Pol indingkelu wenogale miibong, yogo hegileibong. Hudubaba ngic yengele damong sugucne yedibac yanguc ngagewec, “Pol ye Roma ngic. Aime

nani ngic edocebabe ye senti witickegailing, yogo nalic mi aigac!" Ye inguc ngagelu hangockewec.

<sup>30</sup> Mac saeme hudu-baba ngic yengele damong sugucnenginengti Yuda ngic yenge Pol fungine omale yowawa loibong, yogolec funginebenang ngagenogale aiwec. Ilec depec-baba ngic micne nga Yuda ngic Tutumangtowanginengte memba sasawa mime kpaduckeibong. Ailu Pol lukecnolu mengocke walu kpaduckeibong, yengele haicka lowec.

## 23

### *Poldi ngic micne yowa edocebawec*

<sup>1</sup> Poldi Yuda ngic-ngigac yengele Tutumangtowanginengte memba yengela donge hilalu yowa sanangnehac yanguc edocebawec, "Ngic hae-gbafocne, mibe ngagening. Wapongte haicka kwelenedi ngage-wosaec ainagube madicne aime gaofecgu yakumac gagabac."

<sup>2</sup> Inguc mime depec-baba ngic yengele damong sugucne monic wacine Ananaias, yedi Polle emewa ngic domaibong, yenge yanguc milu edocebawec, "Ngenge mesuina wening."

<sup>3</sup> Inguc mime Poldi yanguc edowec, "Wapongti wecgudaicte! Ga haigone madicne, nga kwelegona aibaba sowacnedi wakeicne. Ga yefe-yowa balaibelu yowane wosaelu mimoctocnunogale bole bagic. Ailu yogo hegilelu wecningte sanangne migic. Inguc ailu yefe-yowa fagac, yogo ewaligic."

<sup>4</sup> Inguc mime ngic domaibong, yengi yanguc edoibong, "Ga Wapongte depec-baba ngic yengele damong sugucne tapiliine bawalu misulec-yowa ingucne mi minong!"

<sup>5</sup> Inguc mibong Poldi yanguc miwec, "Ngic hae-gbafocne, ye depec-baba ngic yengele damong sugucne gagac, yogo mi ngagelu yowa yefeina mi migabac. Wapongte hibiwa yanguc kwelengkeicne fagac,

'Ga micnefocgone mi misowalecebadamec.'

(Wah 22:28)

<sup>6</sup> Aime ngic micne gocne yenge Sadyusi aling kacni, nga gocne yenge Farisaio aling kacni ingucti gaibong. Gacgubong Poldi yogo ngagelu kweleine fangkeme Tutumangtowa iwa yanguc edocebawec, "Ngic hae-gbafocne, na Farisaio ngic, ailu yengele aling kacni fikeiba. Aime homackacni gboliyelu fangke-fangke yogo fagac. Ilec wangep gabe, yogolec yowawa locnugabiyeng."

<sup>7</sup> Yowa inguc mime Farisaio ngic nga Sadyusi ngic yenge yengungtihac siyeckelu tutumangningang fulucnaguibong. <sup>8</sup> Sadyusi ngic yengi yanguc micaigaling, "Homackacni gboliyelu fangke-fangke nga angelo ailu asu, yogo mi fagac." Nga Farisaio ngic yengi yanguc mibong yegengkecaigac, "Yogo foinac fayackegac."

<sup>9</sup> Aime yogolec tutumangningang hendolong aibong. Aibong Farisaio yengele aling kacni Wapongte yefe-yowale wewedu ngic gocne yengi fangkelu yowa dacineholec yanguc miibong, "Nonge ngic yagolec bikic basackegabeleng. Angelo me asu monicti yowa edowecka, nonge yogolec yowa monic mi midabelengte." <sup>10</sup> Milu yowanginengti fulucnagubong hudu-baba ngic yengele damong sugucnedi gacgu Pol fuluckelu socine balockedaingkale, hangockewec. Ailu hudu-baba ngic edocebame yengi haulu Pol ngic hewacningangkocni fulucke walu bole-macnginang baleibong.

<sup>11</sup> Balebong deboc iwahac Sugucnedi Pol fikecnolu yanguc edowec, "**Ga ngageboc mikac sanangne domadamec. Ga Yerusalem yawa nale pasile ailu fungine miyengka yegengkwec, yogo ingucnehac Roma taonka miyengka yegengkedaic.**"

### *Pol wehomanogale miibong*

<sup>12</sup> Mac saeme Yuda ngic gocne yenge yowa mingagec ailu yengungtihac yanguc miibong, "Nongileng nosing misa mi nono gacgu Pol wehomalubac nosing misa nodabeleng. Nga inguc mi aidabelengtewa, Wapongte aalict bagewa gadabelengte." <sup>13</sup> Ngic yenge kwelemoniyang ailu yowa hefeibong, yengele dzalengineng 40 ewaliwec. <sup>14</sup> Ngaba yogo yenge hocne depec-baba ngic micne nga Yuda ngic-ngigac yengele damongfocngineng yengela hikelu yanguc edocebaibong, "Nonge nosing misa mi nono gacgu Pol wehomalubac nosing misa nodabelengte. Wiyac yogo mi aidabelengtewa, Wapongte aalict bagewa gadabelengte. <sup>15</sup> Ilec ngengi Tutumangtowale memba yengeholec hudu-baba ngic yengele damong sugucnela yowa yanguc lobong hikedaic, 'Ga Pol nongele Tutumangtowawa saleengka kwesilu yowaine hatacmac mihomana.' Aime yowangineng ngagelu inguc aime nonge yefewa sangkelu Pol balu webeng homadaicte."

### *Pol bengecinedi yowa ngagelu edowec*

<sup>16</sup> Inguc mibong Pol bengecinedi yowa yogo ngagelu hudu-baba ngic yengele bole-macka felu anicne edowec.

<sup>17</sup> Edome Poldi hudu-baba ngic yengele micne yengelacni monic wackelu yanguc edowec, “Ga madec yago hudu-baba ngic yengele damong sugucnela mengocke lenong. Yedi yowa monic edodaicte.”

<sup>18</sup> Inguc mime ngic yedi madec yogo hudu-baba ngic yengele damong sugucnela mengocke lelu yanguc edowec, “Muc-macka ngic Pol yedi wacnulu edocnume madec yago mengockelu welegabac. Yedi yowa gocne edocgudaicte.”

<sup>19</sup> Inguc milu edome damong sugucnedi madec moleina balu baicke lelu yekilackac domalu uwacnowec, “Ga oma yowa balu kwesigic, miyengka ngagebe.”

<sup>20</sup> Uwacnome madec yogodi yanguc edowec, “Yuda ngic yenge gala yowa lobong kwesinale mingagec aigaing. Kwesibong gagi Pol Tutumangtowanginang mengockelu hikeengka yele fungineine ninic ngageningte, uuwa lobong kwesidaicte. <sup>21</sup> Kwesime mi ngagedamec. Ngic dzalengineng 40 ewaligac, yenge yefewa sangkelu Pol wehomanogale yanguc migabiyeng, ‘Nonge nosing misa mi nono gacgu Pol wehomalubac nosing nodabelengte. Nga inguc mi aidabelengtewa, Wapongte aalitse bagewa gadabelengte.’ Aime yenge yowa inguc mipangkulu biyac efeckelu gale yowale wangec gagabiyeng.”

<sup>22</sup> Madec ye yowa inguc mime damong sugucnedi yowa yanguc edolu mimackelu salewec, “Ga yowa-siduc yogo kwesilu yegena edocnugic, yogo ngic monic mi edodamec.”

#### *Pol Sesarea macka bahikeibong*

<sup>23</sup> Aime hudu-baba ngic yengele damong sugucnedi hudu-baba ngic yengele damong yaeckang wacepalu yanguc edocepawec, “Ngeke hikelu yanguc aidabiyec, hudu-baba ngic 200 ingucti yenge higedi yefe hikedaing. Nga becovic feina ngiyecaigaing, yenge 70 ailu sangala-baba 200, ingucti efeckelu debocka 9 kilok aiyemewa Sesarea bahikedaing.

<sup>24</sup> Ailu Polle becovic monic bafuwacnolu satel holecnodabiyeng. Ailu ngenge ye akikic damongkelu gawana Feliksla bahikedaing.”

<sup>25</sup> Inguc milu gawanale hibi monic yanguc milu kwelengkewec,

<sup>26</sup> Na Klodius Lusias, nani gawana ngic sugucne Feliks, gale hibi yago kwelengkegabac. Wenac-madic.

<sup>27</sup> Hudu-baba ngic yengi ngic monic balu fugaing, Yuda ngic yengi balu wehomanogale aigaing. Aime nani ye Roma ngic-ngigac yengele alingacni, yele inguc ngagelu hudu-baba ngic yengeholec hikelu ngaba yengele molewacni baiheng. <sup>28</sup> Balu yowawa lobong, yogolec fungine ngagebe milu Yuda ngic-ngigac yengele Tutumangtowanginang bahikeiba. <sup>29</sup> Bahikeba yefe-yowangineng balaibelu ganingte ailu yowawa loibong, yogo bafuwaiba. Yogolec ailu yanguc ngageiba, “Ye yowawa loibong, yogo wehomanogale me muc-macka lonogale silicine mi aigac.” <sup>30</sup> Ngic gocne yenge wele yefewa sangkelu Pol balu wehomaningte yowa milu hefeibong. Aime ngagelu gala biyac salebe fugac. Ailu Pol yowawa logabiyeng, ngic yogo inguchac salecebabe gala fulu yowaine edocgudabiyeng.

<sup>31</sup> Inguc kwelengkelu yeleme hudu-baba ngic yenge damongnginengte yowa balaibelu Pol debockahac mengocke hikegacgu Antipatris taonka hikeibong. <sup>32</sup> Mac saeme hudu-baba ngic gocne yenge macka hefaliyeibong. Aime becovicca ngiyebong, yengi sugu Pol mengockelu Sesarea hikeibong. <sup>33</sup> Hikelu gawana hibi lacnolu Pol inguchac yele molewa loibong. <sup>34</sup> Lobong gawanadi hibi wafelu Pol uwacnowec, “Ga himonggone wenuwacni?”

Mime Poldi miwec, “Na Silisia himong sugucnacni.”

<sup>35</sup> Inguc mime gawanadi yanguc edowec, “Ga yowawa locguibong, yengi kwesi fikenelebong gale yowa minoga.” Ye inguc milu Pol Herodele macka lolu damongkeningte edocebawec.

## 24

#### *Pol yowawa loibong*

<sup>1</sup> Hadeng 5 motome depec-baba ngic yengele damong sugucne Ananias, nga Yuda ngic-ngigac micnefocngineng gocne yenge Sesarea macka haubong. Ailu Roma ngic yengele yefe-yowale ngage-ngage ngic monic wacine Tetulus, ye yengeholec hauwec. Haulu gawanala Polle yowa mingte fikencnoibong. <sup>2</sup> Fikencnobong gawanadi Pol micnome weleme Tetulusdi yele yowa milu gawana yanguc edowec, “Gawananggeng Feliks, ga madicne damongnubaengka kwele-mogungkolec gagabeleng. Ailu gale ngage-ngagele ailu gagananggeng bafaliyeme madicne gabeng <sup>3</sup> macsoc nongela woc-wiyac sasawa madickelu ofegac. Yogolec gale kwele-madic ngagecaigabeleng. <sup>4</sup> Ailu yowa mibe bole-dameng wickedameckale, bawosaelu ngage-ngagesingnele yowa bangkacnemac sanangne edocgube kwele-efecta ngagedamec.

<sup>5</sup> “Polle aibaba yanguc nganiibeng, ye mife-miwa ainolecaigac, yogo Yuda ngic-ngigac himongsoc gagabiyeng, yenge sasawa ngaba kosa bafuwayelecaigac. Ailu Nasaret habu monic yengele micne hocne gagac. <sup>6</sup> Ye Ibu-mac yogo wonong holenogale aime baibeng. [Balu yefe-yowanonggeng iwa wiyac aiconangte aibeng. <sup>7</sup> Aibeng hudu-baba ngic yengele damong Lisias, ye nga hudu-baba ngicfocine yenge momoc kwesiibong. Kwesilu dacineholec nongileng molewacni ewalincubaibong. <sup>8</sup> Ailu yele fungine miibong, ngic yogo yenge gala kwesilu fikeningte edocebawec.]<sup>\*</sup> Aime nonge yele yowa edocgugabeleng, yogo gageuc mi-uwac aicnolu yowawa logabeleng, yogolec fungine sasawa bafuwacnodamec.”

<sup>9</sup> Yowa inguc mime Yuda ngic yenge bafickelu yowaine basanangkeibong.

*Feliksle haicka yowa miwec*

<sup>10</sup> Aime gawana ye Poldi yowa minale moledihac sosoc aicnome yedi yowa bafaliyelu yanguc edowec, “Ga himong yagowa ngic-ngigac yengele mimocto-mimocto ngic hifa homacne gacaigic, yogo ngagesilu kwele-madicka mibe. <sup>11</sup> Na Yerusalem iwa Wapong afeenogale milu felu gabe hadeng 12 sugu aiwec, ga yowa yogo ngage-motonogale milu ngic uwayeleengka edocguning. <sup>12</sup> Na Ibu-mac kwelina ngic gocne yengeholec yowane fec-wac mi aiwec. Me kpkapaduc mac gocna me mac-sobengka wiyac gocne aibe kpaduckeningte monic mi aiiba. Me aibaba gocne monic aibe mi nganiibong. <sup>13</sup> Ngic yago yenge kpolicnulu fungine milu edocgugaing, yowa yogo noine monic nalic mi bafuwadaingte. <sup>14</sup> Ailu monic mifickegelebe ngagec. Yesule yefe yogo gocne yengi habu monic micaigaing, yogo balaibecaigabac. Yefe yogowa ngambofocnonggeng yengele Wapong, ye hocne afeelu kwelec kwecnoicaigabac. Ailu Wapongte yefe-yowa nga siduc-mimi ngic yengi yowa milu kwelengkeibong, yogo ngagesingkecaigabac. <sup>15</sup> Ailu ngic yago yakumac kpolicnugaing, yenge nga na, nonge momoc wangec gagabeleng. I yangucte, Wapongti ngic-ngigac dondonne nga dondonne miyac, yenge homackacni bacebame gboliyelu fangkedaingte, yogolec dameng bangkalegac. <sup>16</sup> Inguc wangec galu Wapongte haicka nga ngic yengele haicka kwelenedi ngage-wosaec ainagube madicne aime ganogale bole sanangne balu gacaigabac.

<sup>17</sup> “Na hifa gocne himong dalicka gacgu ngic alingfocne gocne waweweine kwele-madicka wiyac gocne yelenogale, nga Wapongte ibu lonogale Yerusalem taonka kwesiiba. <sup>18</sup> Aime gbagbacne galu aibaba gbagbacne ailu Ibu-macka felu ibu nga wiyac gocne lolu gabe bafuwacnuibong. Iwa ngic-habu sugucne me hendolongkolec mi gaiba. <sup>19</sup> Asia prowinswacni Yuda ngic-ngigac gocne, yengi sugu hendolong sugucne inguc aiibong. Yengi hocne bikickolec wiyac monic balu gagabac milu gala kwesilu nale yowa edocgudabong. <sup>20</sup> Me ngic yago domagaing, na Tutumangtowawa domabe nale sowacne monic bafuwaibongka, mifickening. <sup>21</sup> Na hewacnginang domalu yowa moniyang sugu yanguc aukwelu miiba, ‘Homackacni gboliyelu fangke-fangke yogo fagac.’ Yowa yogolec yakumac gale haicka bacnulu kwesi yowawa locnugabiyeng.”

<sup>22</sup> Aime gawana Feliks ye Yesule yefele siduc ngageyackegacte welockelu yanguc sugu edocebawec, “Hudu-baba ngic yengele damong sugucne Lisiasdi Yerusalemkocni wame yowangineng mimoctodacte.” Inguc milu yowangineng fanale milu salecebawec. <sup>23</sup> Ailu ye hudu-baba ngic yengele damong yanguc edolu miwec, “Ngenge Pol damongkeibong lolickedaic. Aime agofocine yenge nalic kwesilu ngani-bafic aicnodaing.”

*Pol hifa yaeckang muc-macka ngiyewec*

<sup>24</sup> Hadeng gocne gacgu Feliks yeicne nga ngigacine, wacine Drusila, ye Yuda ngigac, yeke momochac kwesiiboc. Kwesilu Feliksdi Pol micnome ofelu Kristo Yesule ngage-ngagesingte fungine edocepame ngageiboc. <sup>25</sup> Ngagebocka yanguc edocepawec, “Aibaba dondonne balaibenoga. Ailu kwele nga soc madicne damongkenoga. Ailu mimocto-mimoctole dameng welegac.”

Inguc mime Feliks hangockeme Pol yanguc edolu salewec, “Nalic ga hikec, gacgu dameng monicka sawaine monic fikeneleme hatacmac wacgube kwesidamec.” <sup>26</sup> Gawana ye hikelu yanguc ngagesiwec, “Pol muc-mackacni hegilebe wanale moneng gocne nelena.” Ye ngage-ungngine inguc fawecte damengsoc wackeme yeholec yowa mingagec ailu gaiboc.

<sup>27</sup> Gaeboccka hifa yaeckang motome, kiya monic wacine Pokius Festus, yedi kwesilu gawana Feliksle mac balu bole bawec. Aime Feliks ye Yuda ngic-ngigac kwele-madic ngagecningte Pol muc-macka ngiyeme hegilelu hikewec.

**24:5:** Sale 17:6    **24:6:** Sale 21:28-30    **\* 24:8:** Hibi esecne Lukadi kwelengkwec, yogo nganilu iwacni kwelengkeibong kwelengkeibong ofewec, yengelacni gocne hewacine 6b-8a yogowa mi fagac. Ngic-ngigac yenge hibi kwelengkeicne yogo wosaelu nganibong Lukadi mi kwelengkwec mecne.    **24:15:** Yoa 5:28-29    **24:18:** Sale 21:12-28    **24:21:** Sale 23:6    **24:22:** Sale 23:26

## 25

*Pol ye Sisadi yowaine ngagenale miwec*

<sup>1</sup> Festus ye Yudeya himong iwa hike sulumelu gawana bole molickelu bawec. Bame hadeng habackang motome Sesarea hegilelu Yerusalem fewec. <sup>2</sup> Feme depec-baba ngic micne nga Yuda ngic sugucne yengi yela kwesilu Polle yowa mibong yegengkeme <sup>3</sup> sanangne micnolu yanguc miibong, "Ga nonge baficnubalu yowa loengka hikeme Pol ye Yerusalem iwa kwesidaic." Yenge yefewa sangke domalu Pol wehomaningte ngagelu inguc miibong.

<sup>4</sup> Edobong Festusdi yanguc edocebawec, "Pol ye Sesarea iwa muc-macka ngiyeme na yawa kpisicnemac ngiyelu hatacmac hefaliye hikedacte. <sup>5</sup> Hikebe ngenge Pol yowawa lonogale milu ngengelacni ngic sugucne gocne yenge naholec haulu bikic monic bafuwawecka ingucne, yengi yele yowa yogo mifickedaing."

<sup>6</sup> Inguc milu hadeng 8 me 10 ngama ingucne Yerusalem iwa gagcu Sesarea hikewec. Hikelu mac saeme mimocto-mimocto macka fengiyelu yanguc miwec, "Ngenge Pol balu ofening!" Mime balu feibong. <sup>7</sup> Balu feibong Yerusalemkocni Yuda ngic yengi ye hewalingke domalu yowa gocne haicne monic-monic homacne kpolicckelu sanangnehac milu domaibong. Ailu yenge yowa yogolec noine bafuwaningte kpungkeibong.

<sup>8</sup> Aime Poldi yowangineng ameine bafaliyelu fungine yanguc miwec, "Na Yuda ngic-ngigac yengele yefe-yowangineng me Ibu-mac me ngictau Sisa, yenge monic mi basowale-cebaiba."

<sup>9</sup> Inguc mime Festus ye Yuda ngic-ngigac yengi kwele-madic ngegecnoningte Pol yanguc uwacnowec, "Ga Yerusalem iwa nalic felu iwa yowagone mimoctodacte, me?"

<sup>10</sup> Inguc mime Poldi bafaliyelu yanguc edowec, "Mac yago domagabac, yago ngictau Sisa yele mimocto-mimoctole mac hocne, ilec nale yowa yagowahac mimoctonoga. Na Yuda ngic-ngigac aibaba sowacne monic mi aiyeleiba, yogo gageuc ngagegic. <sup>11</sup> Na bikicte umactowa monic bafuwadaba ingucne, wehomacnunogale miyengka na socne nalic mi sebicnagudaba. Aime yenge kwesacka kpolicnulu fungine migaing, yogolec moniciti yengele molewa nalic mi locnudaicte. Ilec ailu Roma ngictau Sisadi yowaine mimoctonale migabac."

<sup>12</sup> Inguc mime Festus yedi mole-baficfocine yengeholec mingagec ailu Pol yanguc edowec, "Ga ngictau Sisala hikenogale migicte yela hikedamec."

*Festusdi Polle siduc Agripa edowec*

<sup>13</sup> Hadeng gocne motome ngictau Agripa ye kwaine Benaisiholec Sesarea haulu Festus kwele-angacka nganiiboc. <sup>14</sup> Ailu yeke hadeng gocne yeholec ngiye-fac aiboc, Festusdi Polle yowa-siduc ngictau Agripa yanguc edowec, "Felixsdi ngic monic muc-macka lome hauwec ngiyegac. <sup>15</sup> Aime Yerusalem iwa fesulumebe Yuda ngic-ngigac yengele depec-baba ngic micne nga damongfocngineng yenge kpaduckelu nala kwesilu ngic ye webong homanale edocnuibong. <sup>16</sup> Edocnubong nani yowa ameine yanguc bafaliyeiba, 'Ngic monic fungine mikacka weboting aicno-aicnole yefe, yogo Roma ngic nongela monic mi fagac. Ngic yowaholec nga ngabaine yowawa lodaicte, yeke momoc fangkelu domaebocka yowa noine minoga.'

<sup>17</sup> "Tumaneibong iwa inguc bafaliyebe, iwahac mac saeme na mimocto-mimoctole macka fengiyelu Pol bakwesiningte miiba. <sup>18</sup> Inguc milu Pol yowawa loibong, yengi yele aibaba sowacne monic mifickebong ngagedacte mibe yenge mi miibong. <sup>19</sup> Yengileng habunginengte yefe fagac, yogolec fungine sugu miibong. Milu ngic monic wacine Yesu, yele yanguc miibong, 'Ye biyac homawec.' Aime Poldi yanguc mime yegengkewec, 'Ye gbolicne gagac.' Ye inguc sugu miwec. <sup>20</sup> Aime na yowa yogo ngage-motonogale aibibiyelu yanguc uwacnoiba, 'Nalic Yerusalem iwa felu gale yowa iwa mimoctonoga, me?'

<sup>21</sup> "Edobe Pol ye ngictau Sisadi yowaine mimoctonale miwec. Inguc mime, Pol ye muc-macka wangep ngiyeme gagcu yefe monic bafuwalubac Roma ngictau Sisala lobe hikenale mimoctoiba."

<sup>22</sup> Festusdi inguc milu edome Agripadi miwec, "Naneuc ngic yeicne mickacni yowaine ngagenogale ainelegac."

Inguc mime Festusdi miwec, "Saeme nalic ngagedamecte."

*Agripa nga Benaisi yeke Pol nganiiboc*

<sup>23</sup> Mac saeme Agripa nga Benaisi yeke ngakpi hibine madicne holelu tutumang macka feiboc. Aime hudu-baba ngic yengele damong sugucne nga mac yogolec ngic micne yenge momoc balaibecepalu feibong. Aime Festusdi mime Pol momoc balu feibong. <sup>24</sup> Balu feibong Festusdi yanguc edocebawec, "Ngictau Agripa nga ngic-ngigacfocne yakumac

naholec ngiyegaing, ngenge edocngebabe ngagening. Ngic yago domagac, yele ailu Yuda ngic-ngigac sasawa yawa nga Yerusalem iwa wacnulu hataenelelu yanguc miibong, 'Ye nalic mi gadaicte.' <sup>25</sup> Aime yeuctihac Roma ngictau Sisadi yowaine mimoctonale miwecte yela salebe hikedaicte. Nga nanibac ye homanale bikic monic mi bafuwaiba. <sup>26</sup> Ailu yowa noine basackelu ngictau Sisale hibi kwelengkenogale milu kwelengkedacte. Ilec ailu ngic yago ye ngengelela nga ngictau Agripa gala lobe domame ngenge fungineine ngagelu noine bafuwabong hibi kwelengkelu lobe hikedaic. <sup>27</sup> Aime nani ngic monic mugac-mackacni bikicinele hibi mi kwelengkelu Roma taonka moc salebe hike-hikele ngegebe nalic mi aigac."

## 26

### *Pol yeuctihac fungineine miwec*

<sup>1</sup> Agripadi Pol yanguc edowec, "Gageuc funginegone miyengka ngagenang."  
Inguc mime Pol ye moleine bafangkelu yeicne fungineine yanguc edocebawec, <sup>2-3</sup> "Ngictau Agripa, gagi Yuda ngic nongele aibaba nga yowa miminonggeng fagac, yogo ngageyackegic, yogo noine. Ilec kwele-angacka Yuda ngic yengi yowawa locnugabiyeng, yogolec ameine gala midacte. Ilec ailu ngagenelelu uc mikac ngiyeengka yowane minogale uwagelegabac.

<sup>4</sup> "Na madecnahac mac-himongnele ngic-ngigac yengeholec gaiba, ailu Yerusalem iwa gaiba. Dameng iwa aibabane ailu gaofeiba, yogolec fungine Yuda ngic-ngigac yenge ngageyackegaing. <sup>5</sup> Aime Farisaio yefengineng dondonne balaibecaigaing, yengelacni monic na hocne esecne gaiba. Ailu fungine ngani-ngagec aiiba, yogolec miyengka nalic edocgudaingte. <sup>6</sup> Wapongti yowa yogo ngambofocnonggeng biyachac mipangkelu edocebawec, 'Yowa yogo noine fikedaicte.' Yogolec wangep gacaigabacte yakumac yowawa domagabac. <sup>7</sup> Israel habu 12 yenge damengsoc Wapongti wiyac mipangkeyelewec, yogo fikeyackenale wangep galu deboc hadeng Wapong afeelu kwelec kwekwe gaibong. Oc, ngictau Agripa, yogo na momoc wangep gabe Yuda ngic yengi yowawa locnugabiyeng. <sup>8</sup> Aime ngenge omale Wapongti homaicne bagboliyecebadaicte, yogo ngegebong mi fikedaicte ingucne aicaigac. Na homackacni gboliye fangke-fangke yogo ngagesingkegabac.

<sup>9</sup> "Ailu na esecne Yesu Nasaret-hocni, yele siducine yogo yefe haicine monic-monicka basowalenogale milu inguc aiiba. <sup>10</sup> Aime depec-baba ngic micne yengi bole-hibi neleibong, yogo balu gaiba. Galu Wapongte bingec homacnebenang muc-macka locebabe yowawa domabong wehomacebanogale mibong, na yogo nalic ainingte ngagelu gaiba. Yogo Yerusalem iwa inguc ailu gaiba. <sup>11</sup> Ailu na dameng homacne Yuda ngic-ngigac yengele kpakpaduc macnginangsoc feiba. Felu kwele-hefaliyec weboting aiyelelu Yesu misulec aicnoningte weyebic aiyelelu gaiba. Ailu aalic sugucnebenang ngageyeleiba. Ailu yogo Israel kwelina yawa sugu mi aiiba. Na himong gocne yengele taonka inguchac hikelu weyebic aiyelelu gaiba.

<sup>12</sup> "Inguc aibe depec-baba ngic micne yengi bole-yowa tapiliineholec nelelu mibong Damasko iwa bole inguchac banogale locnubong hikeiba. <sup>13</sup> Oc, ngictaune, na yefewa hikebe dameng 12 kilok aiwec. Dameng iwa honocmengkacni angoc sugucne monicti w-nacte angoc ewaligac, ingucnedi wawec. Walu na nga alingfocne kwenggalangnubawec. <sup>14</sup> Kwenggalangnubame nonge himongka lodingke wawelu fabeng, Hibru yowawa yowa malac monic yanguc fikeme ngegeiba, '**Sol, Sol, ga omale weyebic ainelelu gacaigic? Ga kwele-sanang inguc aigacgu yasune micineholec yogo gageuc weengka hicgume doic ngagedamecte.**'<sup>\*</sup>

<sup>15</sup> "Inguc ngagelu yanguc miiba, 'Sugucne, ga maa?'"  
"Mibe yanguc edocnuwec, '**Weyebic ainelecaigic, na hocne Yesu.** <sup>16</sup> **Ga fangkelu domac. Yakumac nale bole-madec aidamecte yogolec fikegelegabac. Ilec wiyac yakumac nganigic, nga lobewa edaligube nganidamecte, yogolec na widc-nudamecte.** <sup>17</sup> **Na yakumac alingfocgone nga Israel yengele alingacni miyac, yengele molewacni bamococgudacte. Ailu nani yengela salecgube hikelu** <sup>18</sup> **ngic-ngigac dongengineng balockeengka kundung lobe holecnolu angocina gadaingte. Ailu Satangte tapili hegilelu yenge Wapongta hefaliye hikedaingte. Inguc aibong bikicnginengte ameine hegileme na Sugucne inguc ngagesingnubong gaga gbagbacne yeieicne, yengele habuwa locebadaicte.'**

<sup>19</sup> "Ngictau Agripa, na gung-didicka ingucne honocmengkacni wame nganiiba, yogo mi hegileiba. <sup>20</sup> Na molickelu Damasko hikeiba. Iwacni hefaliyelu Yerusalem nga Yudeya

26:5: Filp 3:5-6    26:6: Sale 23:6; 28:20    26:9: Sale 8:3    \*    26:14: Dameng iwa yenge bulumakingeng oda kwelina locebanogale yasu yogodi kwelu igocebalu gaibong. Poldi Wapongte angac yogo yasu micineholec ingucne welu gawec.    26:18: Yes 42:16; Efs 2:2; Kol 1:13

himongka hikeiba. Iwacni Israel yengele alingcacni miyac, yengela hikelu inguc ailu gaiba. Dameng iwa yenge kwelengineng hefaliyelu Wapongta hikelu kwele-hefaliyecte aibaba madicne bafuwaningte edocebalu gaiba.

<sup>21</sup> “Na inguc ailu gabe Yuda ngic yengi Ibu-mackacni bacnulu wehomacnunogale aibong. <sup>22</sup> Aime Wapongti damongnulu game mic-yowaine milu gaiba, ailu yakumac migabac. Na ngic feicne waicne ngenge momoc ngiyeebongka yago domalu mibe yegengkegac. Wapongte siduc-mimi ngic nga Moses yengi wiyac fikenale milu kwelengkeibong, yogo hocne milu gagabac. <sup>23</sup> Mesia ye doic sugucne ngagegacgu homadaicte. Ailu homaicne yenge molickeyelelu gboliyelu fangkedaicte. Fangkelu Yuda ngic-ngigac nga Israel yengele alingcacni miyac yenge momochac angocte yowa mime yegengkedaicte. Yowa yogo hocne Moses nga Wapongte siduc-mimi ngic yengi kwelengkeibong.”

<sup>24</sup> Pol ye fungineine inguc milu edocebame Festusdi aukwecnolu yanguc miwec, “Ga ngage-ngagetowagonedi kwele-sifuc bafuwageleme kapaine aigic.”

<sup>25</sup> Inguc mime Poldi yowa bafaliyelu yanguc edowec, “Gawana Festus, na kapaine mi aigabac. Na yowa noine nga dondonne migabac. <sup>26</sup> Yowa migabac, yogolec fungine ngictau Agripa ye ngageyackegacte yela efecne migabac. Yowa migabac, yogo sangke-sangke mi fikewec. Ngictau, ga ngage-ngage monicte mi kpungkeing. <sup>27</sup> Ngictau Agripa, ga Wapongte siduc-mimi ngic yenge yowa ngagesingkegic, me? Na ngagegabac, ga ngagesingkegic.”

<sup>28</sup> Inguc mime Agripadi yanguc edowec, “Uc mikac ngiyebe mi daliweme, na Kristole aling aibele edocnugic, me? Yogo miyac.”

<sup>29</sup> Inguc mime Poldi yanguc edowec, “Dameng dalicne me bangkacne, yogo mi midacte. Ga nga ngic gocne yakumac yowa yago mibe ngagegacing, ngenge nale ngage-ngagesing ingucnehac aimingte Wapong milockegabac. Ailu senti na ingucnehac mi witicngabaningte migabac.”

<sup>30</sup> Inguc mime ngictau Agripa nga Festus ailu Benaisi nga gocne ngiyeibong, yenge fangke <sup>31</sup> Ielu mingagec ailu yanguc miibong, “Ngic yogo yedi homadaicte, me muc-macka ngiye-ngiyele yefe monic mi fikegac.”

<sup>32</sup> Aime Agripadi Festus yanguc edowec, “Ngic yago ye ngictau Sisadi yowaine mimoc-tonale mi midecka ingucne, ga nalic lukecnoengka hikelu gadece.”

## 27

### *Pol Roma taonka hikenogale bahikeibong*

<sup>1</sup> Aime hudu-baba ngic yengele damong monic wacine Yulius, ye Sisale habu yogowacni hudu-baba ngic 100 inguc damongebalu gawec. Aime Itali himongka hikenogale dameng bangkalewec. Bangkaleme ngictaudi mime Pol nga muc-macka ngic gocne Yulius yele molewa locebaibong. Aime yedi bacebame yenge momoc lac-wagewa feibong. <sup>2</sup> Nga lac-wage yogo Adamitium taonkacni, ailu Asia prowins mesuina balaibelu taon falegackasoc, iwa hikenogale aime feibong. Ailu Tesalonika taon Masedonia prowins, iwacni ngic monic wacine Aristakus, yeholec nonge momoc hikeibeng.

<sup>3</sup> Mac saeme lac-wage Saidon taonka hike sulumelu iwa domaibeng. Domabeng Yuliusdi Pol ago aicnolu ngagecnome taonka hikelu agofocine nganicebame ngani-bafic aicnoibong. <sup>4</sup> Aime lac-wagewa hatacmac felu taon yogo hegileibeng. Hegileibeng gbelongti kwesilu hedicnubame yefe lilolu Saiparus nuc nga Asia prowins hewacnginac hikeibeng. <sup>5</sup> Hikelu Lisisia nga Pamfilia prowins falockelu hikegacgu Lisia himongka Maira taon iwa hike sulumelu hauibeng. <sup>6</sup> Aime iwa Aleksandia taonkacni lac-wage monic domalu Itali himongka hikenogale aiwec. Aime hudu-baba ngic yengele damongti lac-wage yogo nganilu iwa bacnubame feibeng. <sup>7</sup> Felu hadeng gocne uneng-uneng doic-bole bahikecgu Nidus taon ngiyewecka-haic hikeibeng. Hikebeng gbelongti wecnubame Krit nucka-haic hikeibeng. Hikegacgu nuc yogolec mesuine monic wacine Salmone falockeibeng. <sup>8</sup> Falockelu Lasea bangkalelu kiwec madecna monic fawec, wacine Wage Nalic Domadaingte, nonge doic-bole bagacgu iwa hauibeng.

### *Poldi sawang-yowa edocebawec*

<sup>9</sup> Kiwecka dameng dalicne gabong mac-gbelong dameng bangkalewec. Bangkaleme basowalecnubadaickale, Poldi sawang-yowa yanguc miwec, <sup>10</sup> “Ngic, ngenge ngagening, yago nganilu ngagegabac. Entacka hikedabelengtewa, nongileng basowalebenangkebeng woc-wiyac homacnehachenangti kiwecka hauyackedaingte. Lac-wage nga mafa sugudi mi haudaingte. Ngic nongileng momoc kiwecka haudabelengte, ingucne aigac.” <sup>11</sup> Inguc edocebame hudu-baba ngic yengele damong yedibac Polle yowa mi ngagesingkewec. Ailu ye wagele damong nga wage fileine yekele yowa ngagelu balaibewec.



<sup>12</sup> Ailu kiwec macedna yogo nganibong lac-wagedi iwa mac-gbelongkolec dodomalesoc mi aiwec. Inguc aime yenge yogo hegilelu Krit nucka macedna monic fawec, wacine Finiks, iwa nalic haulu domaebongka mac-gbelong dameng miyac ainale homacnedi miibong. Iwa lai gbelong sanangnedi mi wecaigac, yafaladi sugu efecnemac wecaigac.

*Lac-wage kiwecka haunogale aiwec*

<sup>13</sup> Aime kiwecka gbelong gbelong madicne weme lac-wage ngic yengi miibong, "Nalic hikedabelengte." Milu angga fuluckebong ofeme Krit nuc kwegegengkelu hikeibeng. <sup>14</sup> Hikebeng dameng mi daliweme lai gbelong sugucnedi nuc falockelu lac-wage magocina sanangnehac wewec. <sup>15</sup> Welu lac-wage igockeme aibibiyelu hegilebeng gbelongte angacka hikeme hikeibeng. <sup>16</sup> Hikegagcu nuc kpisicne monic wacine Kauda, yogolec siyacina hikebeng dinggi kiwecka haunogale aiwec. <sup>17</sup> Aime doic-bole bagacgu dinggi lac-wage feina fuluckebong ofeme hefebong fawec.

Fame lac-wage siyeckedaickale, mucti basanangkelu wapiyeibong. Wapiyelu hefebong Siriti dingong faticna\* iwa fedabelengkale, hangocebawec. Hangocebame lac-wage gumoinele kpoluc sugucne fuluckebong wame gbelongti fitolingnubame hikeibeng. <sup>18</sup> Hikebeng gbelong tapiliineholec welu fame basowalecnubadaickale, mac saeme mafa gocne kiwecka wickebong hauwec. <sup>19</sup> Haume deboc hadeng habackang aime lac-wagele bolele woc-wiyac wickebong hauwec. <sup>20</sup> Haume deboc hadeng homacne gbelong sugucnedi welu fawec. Fame nonge wenac me asocmeng monic mi fikeme nganilu ngagenngesingnonggeng fongkeme wasecne mi gadabelengte, inguc ngageibeng.

*Ngic mibasanang aiyelawec*

<sup>21</sup> Aime ngic yenge dameng dalicne nosing misa hegilelu gacgubong Poldi lelu hewacnginang domalu yanguc edocebawec, "Ngic, nenge nale yowa ngagedabong, ibac nongileng Krit nuc mi hegiledabeng. Ailu foinac, lac-wage mi sowaleme mafa nalic mi wicebadabeng. <sup>22</sup> Aime yanguc edocngababe, nongileng hewackacni monicti mi miyac aidaicte. Ilec kwelengineng mi wadaic. Lac-wagedi sugubac kwsockedaicte. <sup>23</sup> Awecnahac debocka na Wapongne afeulu kwelec kwekwe gagabac, yeke angelo monicti nala kwesi domalu <sup>24</sup> yanguc edocnuyec, 'Pol, mi hangocguna. Ga Roma ngictau Sisa yeke haicka domadamec, yogo fikedaicte.' Ngagegic, Wapongti gale mimilote ailu yanguc migac, 'Ngic yago nenge lac-wagewa gagaing, ngengelacni monicti mi miyac aidaicte.' <sup>25</sup> Ilec ngic yago nenge kwelengineng madickena. Wapongti yowa edocnugac, inguc fikedaicte, yogo ngagesingkegabac. <sup>26</sup> Aime lac-wagedi sugu nuc monicka feme hegilebeng kwsockedaic."

<sup>27</sup> Inguc mime Adaria kiwecka† fabeng iyongnubame gaebengka deboc hadeng 14 aiwec. Aime deboc hewac-hewac lac-wagele ngic yenge himong gacgubong, inguc ngageibong. <sup>28</sup> Ngagelu dingong sawaine bangkalegac milu maaine wickebong haume mitaine 37 aiwec. Aime hikelu maaine hatacmac wickebong haume mitaine 27 aiwec. <sup>29</sup> Aime posa feina fedaingkale milu, hangocebame wage haina angga 4 wicebabong haubong mac saenale milockeibong. <sup>30</sup> Milockebong lac-wagele bole-ngic yenge wage hegilelu hikenogale ngagesilu wage dinggiine lobong haume kwesac ailu yanguc miibong, "Nonge lac-wage mesuina angga monic wickebong haudaicte." <sup>31</sup> Inguc mibong Poldi hudubaba ngic yengele damong nga ngicfocine yanguc edocebawec, "Entacka wagele ngic hieyackedaingte, ibac nenge wasecne mi aidaingte." <sup>32</sup> Inguc edocebame hudubaba ngic yenge dinggile muc helockebong dinggi sugudi kiwecka hauwec.

<sup>33</sup> Haume mac sae-saele Poldi ngic yenge nosing noningte sanangnehac yanguc edocebawec, "Nenge umacka nosing hegilelu gacgubong, yakumac hadeng 14 aigac. <sup>34</sup> Gobengineng nosingte aime nosing mi nono gacgu homadaingkale, sanangnehac migabac. Nenge kwele-yaec mi aining, nenge sasawa wasecne aidaingte." <sup>35</sup> Inguc mime yenge sasawadi nganibong dongenginang bret monic balu Wapong kwele-madic micnolu bauckelu nowec. <sup>36</sup> Nome yenge yogo nganilu kwelengineng madickeme yenge inguchac nosing noiibong. <sup>37</sup> Ngic-ngigac lac-wagewa gaibeng, nongele dzalenonggeng 276. <sup>38</sup> Aime nosing nobong gebecebame lac-wage efeckenale milu wit homacnedi wagewa fawec, yogo kiwecka wickebong haume wage efeckewec.

*Lac-wage sowalewec*

<sup>39</sup> Mac saeme himong nganiibong. Ailu himong yogo mi ngage-motoibong. Ailu kiwec macedna monic posa mikac dingong sugu fame yenge yogo nganilu wage iwa nalic haunale miibong. <sup>40</sup> Inguc mibong ngic yenge angga mucngineng helocebabong kiwecka hauyackeibong. Haubong dingongka haunale lac-wagele puli mucngineng lukelu kpoluc

\* 27:17: Siriti dingong faticne yogo Afrika himongka fahikegac. 27:24: Sale 23:11 27:26: Sale 28:1 † 27:27: Adaria kiwec yogo Mediteranean kiwec nebocine. Ye Grik himong nga Itali himong hewacnginac fagac.

kpisicne hefelu fuluckebong fewec. Feme gbelongti kpolucka weme kiwec heuckeme dingongka hikeibong. <sup>41</sup> Hikelu kiwec hewacka dingong monic ofelu fawec, iwa felu lac-wage mesuine hifidackeme sanangkewec. Sanangkeme dibong sugucnedi lac-wage haine weme siyeckeyackelu kpisic-kpisic ainogale aiwec.

<sup>42</sup> Lac-wage siyeckeme muc-macte ngic yenge fifiyac balu hikedaingkale, hudu-baba ngic yenge muc-macte ngic wehomacebanogale miibong. <sup>43</sup> Inguc mibong hudu-baba ngic yengele damongnginengti Pol agong holecnonale ngagewec. Inguc ngagelu yenge kpatalayelelu yanguc edocebawec, "Fifiyac babaine ngenge kiwecka molickelu wintacke haulu fifiyac balu dingongka fedaing. <sup>44</sup> Aime gocne nonge katapa feina falu ilungkedabelengte, nga gocnedi lac-wage siyeckegacte sindacinele feina falu ilungkedaing." Nonge nongileng momochac inguc ailu sasawadi dingongka feyackeibeng. Aime nongelacni monicti mi sowalewec.

## 28

### *Malta nucka feibong*

<sup>1</sup> Nonge kiwec dingongka madicne felu domaiibeng. Domalu ngageibeng, nuc yago wacine Malta wackecaigaing. <sup>2</sup> Aime nuc yogolec ngic-ngigac yengi bacnubalu mac-gbelong damengte ailu dac sugucne fitobong lobeme ngiyeibeng. Ailu aibaba madicne gocne ingucne homacnehac ainoleibong. <sup>3</sup> Aime Poldi dac kwililiine kpaduckelu dodocke welelu dacka lome lobewec. Lobeme hema monic socine dacine aime ngagelu dac kwililiine kwelinacni ofelu Pol moleina hilu kpetiyangkelu domawec. <sup>4</sup> Inguc domame nuc yogolec ngic-ngigac yenge yogo nganilu mingagec ailu yanguc miibong, "Ngic yogo ye ngic wehomacebaicag, ye kiwecka haulu mi homagac, yogo noine. Ailu ye dingongka yawa ofeemewa ameine welecnogac homadaicte." <sup>5</sup> Inguc mibong Pol ye hema wepackeme motolu dacka fewec. Aime socina wiyac monic mi fikewec. <sup>6</sup> Yenge yogo nganilu yanguc miibong, "Hema micine higacka iwa suguledaicte, me ye wawelu homadaicte." Inguc milu wangep domabong socina umac monic mi fikeme yenge yogo ngani-ngagec ailu yanguc miibong, "Ngic ye wapong monic."

### *Poldi huckolec bamadicebawec*

<sup>7</sup> Nuc yogolec ngic sugucne monic wacine Publius, ye mac-himongngine eme-eme fawec. Ilec yedi mac holenolelu locnubame hadeng habackang yeholec ngiye-fac aiibeng. <sup>8</sup> Aime Publius mamacine ye macka soc-dac huc, nga haa wicwic aicnome fawec. Fame Poldi macina felu moleine socina lolu milockelu ngic bamadickewec. <sup>9</sup> Bamadickeme madick-eme nuc yogolec ngic-ngigac yenge siduc yogo ngagelu huckolec yenge homacnehac kwesiyaekbong inguchac bamadicebawec. <sup>10</sup> Bamadicebame ngic-ngigac yenge kwele-madictowa ngagenolelu hike-hikele dameng bangkalewec. Bangkaleme yefele noba-nosing nga moneng-mafa baficnubalu nolelu lac-wagewa locnubaibong.

### *Pol Roma taonka hike sulumewec*

<sup>11</sup> Lac-wage monic mac-gbelong damengte iwa domalu gawec. Aime tamacne habackang motome nonge wagewa felu hikeibeng. Lac-wage yogo Aleksandia taonkacni, aime mesuina siduc-gbong monic domawec, wacine Kasto nga Polukis. Kasto nga Polukis yeke fucseneng. <sup>12</sup> Hikecgu Sirakus taonka hike sulumeibeng. Ailu iwa haulu hadeng habackang gaibeng. <sup>13</sup> Ailu hatacmac lac-wagewa felu taon yogo hegilelu Regium taonka hikelu ngiyeibeng. Yogowa ngiyebeng saeme lobenonggang yefe yafala gbelong weme hadeng monic motowec. Motome Puteoli taonka hikeibeng. <sup>14</sup> Hike sulumelu iwa haulu ngic hae-gbafocnonggeng gocne bafuwacebabeng sanangne sebicnubabong hadeng 7 yengeholec ngiye-fac aiibeng. Ailu iwacni hige-yefe Roma hikenogale hikeibeng. <sup>15</sup> Hikebeng ngic hae-gbafocnonggeng Roma taonka gaibong, yenge siducnonggeng biyac ngageibongte ailu, gocne yengi kwesicgu Apius yengele kpakpaduc sobengka bafuwacnubaibong. Nga gocne yengi mac monic wacine Yowa-mac Habackang, iwa bafuwacnubaibong. Bafuwacnubabong Poldi yenge nganicebalu Wapong kwele-madic micnolu angac ngagelu tapiliholec aiwec.

### *Poldi Yuda ngic-ngigac yowa edocebawec*

<sup>16</sup> Roma taonka hike sulumebeng Pol muc-macka mi loibong. Ye mac monicka ngiyenale nalic micnoibong. Ye iwa ngiyelu gagcu hikedaicckale, hudu-baba ngic monicti ye damongkelu gawec. <sup>17</sup> Ye inguc ngiyeme hadeng habackang aime Yuda ngic-ngigac yengele damongfocngineng wacebawec. Wacebame kwesilu yeholec momoc ngiyebong yowa yanguc edocebawec, "Ngic hae-gbafocne, na Yuda ngic-ngigacfocnonggeng yengele

wacngineng mi bawaiiba. Me ngambofocnonggeng yengele yefe-yowa nga aibangi-nengte mife-miwa mi aiiba, yogo foinac. Aime yenge Yerusalem iwa moc bacnulu Roma ngic yengele molewa locnuibong. <sup>18</sup> Locnubong Roma ngic yengi fungine mi-uwac ainelelu fungine mikacka wehomacnunogale miibong. Ailu bikicnele umac basackelu lukenelenogale miibong. <sup>19</sup> Inguc milu Yuda ngic yengi yowa yogolec guling bacnubong welockeyelelu ngictau Sisadi yowane mimoctonale miiba. Nani Yuda ngic-ngigac yengele yowa monic yawa bakwesilu minogale mi kwesiiba. <sup>20</sup> Na yogo hocne ngagelu ngengeholec mingagec ainangte wacngebabe kwesigaing. Israel ngic-ngigac nongileng Wapong mimipangnginele noine fikedaicte, yogolec wangec ganangte ailu, sen yago molena witicnubong gagabac.”

<sup>21</sup> Inguc mime yanguc miibong, “Yudeya himongkacni gale hibi monic mi lobong kwesime nganiibeng. Me ngic hae-gba monic salebong kwesilu gale bikicte yowa monic mi edocnubame ngageibeng. <sup>22</sup> Ilec wiyac ngagegic, yogo gageuc miyengka ngagebeng nalic aigac. Ga habu monic migic, yogo macsoc lobe-yowa aibong ngagelu gagabeleng.”

<sup>23</sup> Inguc milu tutumangte dameng monic miibong, dameng yogo weleme Yuda ngic-ngigac homacnedi Pol mac ngiyewecka tumaneibong. Tumanebong, yedi Wapongte ngani-damongte fungine mime yegengkeyelewec. Ailu ye Wapongte yefe-yowa Mosedi kwelengkewec, nga Wapongte siduc-mimi ngic yengele yowa, yogo wafeme yenge yengileng ngage-ngagengineng hegilelu Yesu ngagesingkeningte milu edocebame yegengkelu gawec. Ye ubiyactehac molickelu inguc milu gagume mac debolewec.

<sup>24</sup> Ngic gocne yenge yogo ngage-motolu yeholec kwele-moniyang aibong. Nga gocne yengi mi ngagesingkeibong. <sup>25</sup> Aime Yuda ngic-ngigac yenge yengungtihac yowanginengti fec-wac aime, Poldi yowa moniyang sugu yanguc edocebawec, “Tili Asudi Wapongte siduc-mimi ngic Yesaiyale micka lome ngambofocnonggeng yengele yowa yanguc miwec.

<sup>26</sup> Ngic-ngigac hedecti ngagecaigaing, yenge yogo ngagelu nalic mi ngage-motodaingte.

<sup>27</sup> Ngic-ngigac aling yago yenge kwelengineng fongkecaigac. Nga hedecnginengti yowa ngageningte hedecngineng fongkecaigac. Ailu dongenginengti wiyac nganinogale kundung kwecaigac.

Yenge dongenginengti wiyac monic nganidaingkale, nga hedecnginengti ngagedaingkale ailu, ngage-ngagenginengti wiyac monic ngage-motodaingkale,

Ilec yogo yenge kwelengineng wenucka hefaliyeme bamadicebadaba.’ *(Yes 6:9-10)*

Yesaiyadi ngambofocnonggeng inguc edocebawec, ngenge yenge ingucnehac. <sup>28</sup> Ilec edoc-ngebabe ngagening, Wapongti bikicte ameine babale yefe bafuwawec, yogo Israel yengele aling kacni miyac, ngic-ngigac yogo yengele aling hocne aigac. Yengi yowane ngagelu wasecne aidaingte.” <sup>29</sup> [Pol ye inguc mime ngagelu yenge hegilelu hikeibong. Hikelu yefewa Yuda ngic-ngigac yengungtihac yowanginengti fec-wac ainagume hikeibong.]\*

*Roma taonka hifa yaeckang gawec*

<sup>30</sup> Pol yeuctihac mac kwilic fuli balu hifa yaeckang iwa game ngic-ngigac yenge yela hike-kwesic ailu gaibong, yogo yenge macka locebalu gawec. <sup>31</sup> Locebalu hangoc mikachenang galu Wapongte ngani-damongte edocebalu weduyelewec. Ye Sugucne Yesu Kristole fungine weduyelelu game monicti boleine monic mi welockecnowec.

Salecebaicne yengele siduc yogo sugu motogac.

## **Poldi Roma Habu Yengele Hibi Kwelengkewec**

### *Mimi-yegeng yowa*

Yesu homackacni gboliyelu honocmengka feme hifa 25 ngama ingucne motome, Pol ye Korin taonka gawec. Dameng iwa Pol ye Roma taonka mi hikeluhac hibi yago kwelengkewec.

Roma yogo taon sugucnebenang Itali himongka ngiyegac, ngic-ngigac himong bocyac yengelacni iwa hike-kwesic gaibong. Roma gamang ye himong gocne damongkelu gawec, Roma iwa damong sugucnengineng Sisa wackebong gawec.

Aime ngic-ngigac gocnedi Yesu ngagesingkelu Roma iwa gaibong. Gocne yenge Yuda ngic-ngigac, wacnigineng monic Israel ngic-ngigac. Nga gocne yenge Grik ngic-ngigac, ailu ngic-ngigac gocne himong gocnacni. Poldi hibi yago kwelengkeli ngigac monic wacine Fobe, ye lacnome bahikelu ngic-ngigac yogo yelewec.

### *Yowa yago hibi nevocina fagac*

1:1-17 Mimi-madic yowa nga hibile fungine

1:18-3:20 Ngic-ngigac sasawa sowacnebenang ailu bolengineng madicnele yefe balaibegaing, yenge gaga-sanang mi badaingte

3:21-4:25 Kristo ngagesingkegaing, yogo yengi sugu Wapongte haicka dondonne aigaing

5:1-8:39 Yesuholec wetackelu gagaing, yengi gaga gbolicne balaibegaing

9:1-11:36 Israel ngic-ngigac yenge Wapong hegileibong. Lobewa wacebame hefaliyelu ngagesingkedaingte

12:1-15:13 Ngic-ngigac ngage-ngagesingkelec yenge yefe gbolicne balaibedaing

15:14-16:27 Yowa moto-motoine nga wenac-madic yowa

### *Hibile molic-molic yowa*

<sup>1</sup> Na Poldi hibi yago kwelengkegabac. Na Kristo Yesule kwelec kwekwe ngic. Wapongti bawosaecnulu wacnume na salecebaicne bole balu yeicne Siduc Madicne mibe yegengkeadaic. <sup>2</sup> Yedi Siduc Madicne yogo hocne esecne siduc-mimi ngic yengeholec yowa hefelu kwesinale mime yenge yowa yogo Wapong yeicne hibiwa sugu kwelengkeibong fagac. <sup>3</sup> Siduc yogo yanguc, Wapongte Madec, ye soctepecka Dawidile fikesaweckacni ngic fikewec. <sup>4</sup> Aime asu gbagbacnelepecka yele yanguc mime yegengkewec, ye hocne homackacni gboliyelu fangkwec. Yogodi yanguc edalicnubagac, ye Wapongte Madec tapiliholecbebang. Yogo Sugucnenonggeng Yesu Kristole Siduc Madicne. <sup>5</sup> Wapongti kwele-madic moc ainolelu salecebaicne bole nolewec. Noleme nonge Kristole wac sugulenal Israel yengele alingacni miyac, yengele hewacka yowaine mibeng yegengkewec. Aime yenge yele yowa ngagesingkelu balaibedaingte. Ilec nonge bole yogo balu gagabeleng. <sup>6</sup> Aime Wapongti ngenge inguchac wacngembame Yesu Kristole aling aigaing.

<sup>7</sup> Wapong alingfocine kwele-angacine Roma taonka nenge wacngembame yele bingec gagaing, ngengele kwelengkegelegabac. Aime Mamacongngeng Wapong nga Sugucnenonggeng Yesu Kristo, yekele kwele-madic nga kwele-mogungtowadi ngengela fadaic.

### *Poldi yugucebawec*

<sup>8</sup> Molickelu ngic-ngigacfocine ngengele ngagesilu Yesu Kristole wacka Wapongne milockelu kwele-madic edolu gagabac. I yangucte, ngengele ngage-ngagesingte yowasiduc yogo himongne himongne ngic-ngigac yengela hikeme edonagulu ngageibongte inguc milockecaigabac. <sup>9-10</sup> Na milockecaigabac, iwa damengsoc ngengele ngagesilu milockecaigabac. Wapong ye yogo ngagecaigac. Aime afeelu kwelec kwecnolu yeicne Madicinele Siduc Madicne mibe yegengkecaigac. Ailu na damengsoc asunedu Wapong milockecaigabac. Ilec ailu ye ngageme nalic aime naneicne ngengela biyac fudacte.

<sup>11</sup> Fudacte dameng iwa ngengeholec momoc galu asule kwele-madicta wiyac yogo ngengi sanangkeningte ngengela bayackedacte, yogolec homacne ainelegac. <sup>12</sup> Na yanguc ngagelu yogo migabac, na ngengela fube nongileng ngage-ngagesingnonggeng sanangnehac domame nongileng momochac basanang-nagudabeleng. <sup>13</sup> Ngic hae-gbafocne, yanguc ngageningte ainelegac. Na Wapongte bolele noine yogo Israel yengele alingacni miyac, yengele hewackacni bacebacaigabac. Silicine ingucnehac ngengela fudacte, iwa

Wapongte bolele noine gocne bacebadacte. Ailu yogolec dameng homacne funogale aibe wiyac gonedid hefecnulu gagac.

<sup>14</sup> Na Grik ngic-ngigac nga himong monickacni ngic-ngigac, yenge Siduc Madicne milu edocebabe yegengkedaidacte. Ailu ngic ngage-ngageholec nga ngage-ngagengineng mikac, yengela Siduc Madicne mamang hidulu mibe yegengkeme bolene yogodi ameine baduyeledaidacte. <sup>15</sup> Ilec ailu Roma taonka ngic-ngigac gagaing, ngengela inguchac Siduc Madicne mibe yegengkenale kwelene efeckecaigac.

*Ngage-ngagesingte yefewa dondonne gaga*

<sup>16</sup> Siduc Madicne yogo Wapongte tapili. Yogodi ngic-ngigac sasawa ngagesingkecaigaing, yenge bikicte ameine bame wasecne aidaingte. Ilec ailu na Siduc Madicnele ngagebe gameineholec mi ainelecaigac. Yowa yogo Yuda ngic-ngigac yengela molickelu hikegacgu Grik\* yengele alingka momoc hikewec. <sup>17</sup> Siduc Madicne iwa yanguc fikelu yegengkecaigac, Wapongti ngic-ngigac dondonne wacebacaigac, yogo ngage-ngagesingka sugu. Ailu yowa yanguc biyachac kwelengkeicne fagac, “Monic ye ngage-ngagesingkelec, Wapongti dondonne wackeme gaga-sanang gadaidacte.”

(Hab 2:4)

*Wapongte aalic honocmengkacni wadaidcte*

<sup>18</sup> Ngic-ngigac yenge Wapongte pasi nga yowa lobe holecnolu yefe ewalicaigaing. Ailu sowacnenginengti yowa noine hedickecaigac. Ngic-ngigac yogo yengele ameine Wapongti aalicineholec honocmengkacni baduyelecaigac, yogo momoc fikelu yegengkegac. <sup>19</sup> Wapong yeuctihac wiyac sasawaine iwa fungineine ngic-ngigac yogo yengele hewacka bawec, aime yegengkeme nganicaigaing. <sup>20</sup> Ailu molickelu himongtowa bafuwaweckacnihac ofegacgu yanguctihac gagabeleng, iwa yeicne mole-hibile silicine fikeyeleme nganicaigaing. Yeicne dongedi mi nganiicne, yogo tapili fileine motomotoine mikac gawecti gagingawagac. Ailu ye Wapong silicine, yenge yogo ngani-motolu gacaigaing. Ilec monicti yowa monic migbedic ailu yanguc nalic mi midaidcte, “Wapong mi ngage-motogabac.”

<sup>21</sup> Yenge Wapong ngagegaing, ailu wacine mi bafecaigaing. Ailu ye Wapong yogo ngagegaing, ailubac yenge ye kwele-madic mi micaigaing. Yengebac ngage-ngagengineng kwesacine, yogodi pasi bame donge-pisic ailu kwelengineng fongkeme, kundungti kwele ngage-ngagengineng someckecaigaing. <sup>22</sup> Yenge inguc galu yanguc micaigaing, “Nonge ngage-ngage-motockolec.” Inguc milu sogekpepeng ailu dabiyelu gacaigaing. <sup>23</sup> Ailu yenge Wapong homacine mikac gagaineholec, yele wac feicne hegileibong. Hegilelu ngic homacaigaing, yengele ngani-ngani ingucne moledi balu nango nga bec-sic ailu hema yengele ngani-ngani ingucne gocne momoc moledi bacaigaing. Yogodi Wapongte silic ingucne aime balu lobong domame alang bacebacaigaing.

<sup>24</sup> Inguc aicaigabiyengte ailu Wapongti hegilecebame yengileng kwelenginengte angacka yenge gaga kosaine aigacgu aibaba gameineholec socnginengti ainagucaigaing.

<sup>25</sup> Wapongti wiyac sasawa mime fikeibong, yela mimitengti mimiteng fafegidaic, yogo foinac. Aime yengebac Wapongte yowa noine hegilelu kwesac-yowa balaibeccaigaing. Aime wiyac sasawa mime fikeibong, ngic-ngigac yenge ye alang bacno-bacno pasi yogo hegilelu yele bagewa mi gacaigaing. Yedi mime wiyac sasawa fikeibong, yenge wiyac sasawa yogo afeebalu yengele kwelec kwecaigaing. <sup>26</sup> Ilec ailu Wapongti hegilecebame yenge kwele fangke-fangke aibaba gocne gameineholec aicaigaing. I yangucte, ngigac ngickolec yengi aibong ngagecaigabeleng, yenge yefe yogo hegilelu aibaba gocne ngigactihac mi aicaigaing, yogo yenge ngigac yengungtihac inguc ailu gacaigaing. <sup>27</sup> Aime ngic yenge yefe yogohac ngigackolec gaga gabong ngagecaigabeleng, yenge yogo hegilelu ngicti ngic agofocngineng gocne yengeholec selo-boic aibaba gameineholec ainogale kwelengineng kwefangkeme inguc ailu gacaigaing. Ngic-ngigac inguc aicaigaing, yenge yengungtihac aibabangineng gameineholec ailu gabong, yogolecsoc ameine gaganginang aibaba dondonne balabelu baduyelecaigac.

<sup>28</sup> Ngic-ngigac yenge Wapongte ngagebong wiyac omane aime, ye lobe holecnolu hegilecaigaing. Ilec ailu Wapongti inguchac hegilecebacaigac. Hegilecebame yenge yengileng angacngineng balabelu aibaba ngicti mi aicaigaing, yenge yogo ailu gacaigaing. <sup>29</sup> Aime yengele kwelewa aibaba sowacne haicine monic monicti wakeyackeicne fagac. I yangucte, yenge ngic-ngigac dondonne miyac. Yenge ngabaholec galu hane nga sisipilic aibaba

**1:13:** Sale 19:21 \* **1:16:** Dameng gocna Israel yengele alingcakni miyac yogo yenge “Grik ngic-ngigac” wacebalu gaibong. **1:16:** Mrk 8:38; 1Kor 1:18-24; Sale 13:46 **1:17:** Rom 3:21-22 **1:19:** Sale 14:15-17; 17:24-28 **1:20:** Yop 12:7-9; Mige 19:1 **1:21:** Efs 4:17-18 **1:22:** Yer 10:14; 1Kor 1:20 **1:23:** Yef 4:15-19; Mige 106:20 **1:27:** Dep 18:22; 20:13; 1Kor 6:9

ailu gacaigaing. Yenge hasowac ailu ngic wecebabong homacaigaing. Ailu ngabawa yuwenac aicaigaing. Ailu yenge kwesacka nga ngabawa ngic basowalecebaicaigaing. Ailu lobe-yowa kwecaigaing. <sup>30</sup> Ailu yenge micka lolo nga Wapongte takecebabenangkeme kweledi wickelu gacaigaing. Ailu yengungtihac ngagebong feicne aime galu soc bafefe aibaba nga yowadi yengileng feicne milu gacaigaing. Ailu aibaba sowacne gbolicne bafuwalu nenggac-mamacfocngineng yengele yowa welu gacaigaing. <sup>31</sup> Ailu yenge ngage-ngagengineng mikac galu yengileng yowangineng hegilecaigaing. Yenge ngic-ngigac agofocngineng yengele angac monic mi ngagecaigaing. Ailu ngic-ngigac yengele kwelesowac monic mi ngagecaigaing.

<sup>32</sup> Ngic-ngigac aibaba sowacne ingucne aicaigaing, yenge homadaingte hocne. Wapongti yefe dondonne inguc migac, yogo ngagegaing. Ailubac sifu aibaba ingucne aicaigaing. Ailu yogo sugu miyac, gocne yengi aibaba sowacne ingucne ailu gabong, yenge yogo nganicebalu madicne micaigaing.

## 2

### *Madicne nga sowacnele wowosae*

<sup>1</sup> Ilec ailu, ngic me ngigac, ga ngagegic. Ga ngic-ngigac gocne yengele aibabangineng wosaelu yenge bikicnginengkolec inguc midamecte, dameng iwa gageicne yenge ingucnehac bikicgoneholec aigic, yogo mifcngadumecte. Ailu yenge ngani-wosac aiyelelu, "Ngege bikicnginengkolec," inguc migicte, gageicne inguchac mifcngaguc. I yangucte, gageicne aibabagone yogo yenge aicaigaing, silicine ingucnehac aicaigic. <sup>2</sup> Aime ngic-ngigac aibabangineng ingucne aicaigaing, yenge Wapongti yefe noine iwa wosaecebalu bikicnginengte ameine yeledaicte, yogo ngagegabeleng. <sup>3</sup> Aime ngic me ngigac, ga wenuc ngagesigic? Ngic-ngigac gocne aibaba ingucne ailu gacaigaing, ga yengele aibaba wosaelu bikicnginengkolec aigaing micaigic. Aime gageicnebac aibaba ingucnehac ailu gaengka Wapongte wowosae damengka migbedic yowa gocne milu hikenogale ngagegic, me? Yogo miyacbenang. <sup>4</sup> Me Wapongti babafic ulucnebanang aigelelu tatacic mikac wangecgone dameng dalicne gacaigac, yogo lobe holecnogic, me? Yogo mi madickegac. Aime kwelegone hefaliyenale Wapongti madicneineholec baficgucaigac, ga yogo mi ngage-motogic, me? <sup>5</sup> Aime ga kwelegone fongkelu mi hefaliyeme gagicte bikicgone bakpaduc ailu Wapongte aalic badamecte. Aime aalicine badu-badule damengtowa kwesime ameine dondonne badugeledaicte. <sup>6</sup> I yangucte, "Wapongti ngic-ngigac filesoc filesoc aibabangineng ngani-ngagec aiyelelu ameine baduyeledaicte." (Mige 62:12; Ynn 24:12)

<sup>7</sup> Monic ye mamang hidulu aibaba madicne bagacgu wac feicne nga alang-baba ailu gaga-sanang banogale aicnome bole sugucne balu gagac, Wapongti ye gaga moto-motoine mikac lacnodaicte. <sup>8</sup> Aimebac monic ye yeicnele sugu ngagelu yowa noine mi balaibecaigac. Ailu yefe dondonne hegilelu sowacne balaibecaigac, Wapongti yefe aalickeme bikicte ameine lacnodaicte. <sup>9</sup> Aime ngic-ngigac aibaba sowacne ailu gacaigaing, yenge sasawadi doic nga kwele-umac bafuwadaingte. Yogo Yuda ngic-ngigac yengi molickelu bafuwabong, Grik ngic-ngigac yenge momoc ingucnehac bafuwadaingte. <sup>10</sup> Ngic-ngigac aibaba madicne ailu gacaigaing, yengebac sasawadi wac feicne nga alang-baba ailu kwele-mogung bafuwadaingte. Yogo Yuda ngic-ngigac yengi molickelu bafuwabong, Grik ngic-ngigac yenge momoc ingucnehac bafuwadaingte. <sup>11</sup> Aime Wapongta feicne wacne monic mi fagac.

### *Silic moniyang ainagucaigaing*

<sup>12</sup> Ngic-ngigac Wapongte yefe-yowa yengela mi loicne fagac, yenge bikic bafuwabong, Wapongti yefe-yowa mikac yenge sasawa sowacnele aling mimoctocebame homadaingte. Aime ngic-ngigac yefe-yowale bagewa galu bikic bafuwagaing, yenge yefe-yowadi yowawa locebayackeme bikicnginengkolec gacgu homadaingte. <sup>13</sup> Aime ngic-ngigac aibabanginengti yefe-yowa balaibedaingte, yenge Wapongti nganicebalu dondonne wacebadaicte. Nga ngic-ngigac yefe-yowa hedecti sugu ngagecaigaing, yenge dondonne mi wacebadaicte, miyac.

<sup>14</sup> Aime Israel yengele alingcacni miyac, gocne yenge yefe-yowa kwelengkeicne fagac, yogo mi balu gagaingti sifu yowaine ngage-ngagenginang fagac, yenge yowa yogo balaibelu yefe-yowa balaibecaigaing. Yenge yengungtihac yefe-yowale fileine aicaigaing. <sup>15</sup> Aime yefe-yowadi wiyac ainogale migac, yogo ngic-ngigac kwelenginang biyachac kwelengkeicne fagac, yogo edalicebacaigac. Ailu kwele ngage-ngagengineng yogodi

basanangkecaigac. Kwelengineng nga ngage-ngagengineng yeke momochac wosaecnag-ulu yowawa aibabangineng bafuwayelelu madicnengineng me sowacnengineng miflick-eyelecaigac. <sup>16</sup> Yogo Wapongte wowosae damengka fikelu yegengkeme nganidaingte. Na Siduc Madicne Yesu Kristodi nelewec, yogo yanguc mibe yegengkecaigac. Aime Wapongti dameng moto-motoina ngic-ngigac yengele ngage-ngage sangkeicne fawec nga fagac, yogo wosaelu mimoctodaicte.

*Nalic ngage-motodamecte*

<sup>17</sup> Ga Yuda ngic milu yanguc micaigic, “Na Yuda ngic, yefe-yowadi damongnume gacaigabac.” Ailu ga Wapong ngagegic yeke ngageng feicne aicaigac. <sup>18</sup> Aime yefe-yowadi yefe wedugeleme ga Wapongte ngage-ngage nga angac biyachac ngagelu aibaba wenidi madicne, yogo wosaelu nalic ngage-motodamecte. <sup>19</sup> Ailu yanguc ngagepangkecaigic, “Ngc-ngigac donge-pisic yenge yefe edalicebanogale ngic yogo na. Ailu kundung kwelina hikecaigaing, yengele angoc, yogo na.” <sup>20</sup> Aime yefe-yowawa ngage-ngage nga yowale noine sasawa fagacte ga ngage-ngagengineng kpungkecaigaing, yengele yanguc ngage-caigic, “Na yengele yefe madicnele wewedu ngic.” Ailu ngic-ngigac kwelengineng kogoc kwele ingucne balu gagaing, yengele yanguc ngagecaigic, “Na yengele wewedu.”

<sup>21</sup> Ga inguc ailu gocne edocebalu weduyelelu, geicne mi wedunagucaigic, me? Ailu “hise mi banoga,” inguc edocebacaigic, ailu gageicnebac hise bacaigic, me? <sup>22</sup> Ailu “selo-boic aibaba mi ainoga,” inguc milu gageicne selo-boic aibaba aicaigic, me? Aime ga siduc-ghong lobe holeyelecaigic. Ailu gageicnebac siduc-ghong macnginang felu yengele wiyac hise bacaigic, me? <sup>23</sup> Ailu Wapongte yefe-yowa bagalu gageicnele ngageng feicne aime, ga hocne yefe-yowa welu Wapong gamewa locaigic, me? <sup>24</sup> Wapongte hibiwa yowa yanguc kwelengkeicne fagac, “Ngenge inguc ainagulu gagaingte, Israel yengele alingkaicni miyac, yenge Wapongte wac milu sulecaigaing.”

(Yes 52:5; Esek 36:22)

*Soc tofangineng heloc-helocte yowa*

<sup>25</sup> Ga yefe-yowa balaibedamectewa, socgone tofaine helockeicne, yogo nalic baficgudaicte. Nga yefe-yowa hegiledamectewabac, socgone tofaine helockeicnedi sifu socgone tofaine mi helockeicne ingucne aidamecte. <sup>26</sup> Aime ngic monic ye soc tofaine mi helockeicne, ye aibabainedi yefe-yowale yefe dondonne balaibecaigac. Yele Wapongti yanguc ngagesigac, ye socine tofaine helockeicne silic ingucne aigac. <sup>27</sup> Aime ga socgone tofaine helockeicnedi galu yefe-yowale hibi bagacgu yefe-yowa hegilelu gagic. Inguc gaengka, ngic monic ye soc tofaine mi helockeicne ye yefe-yowa balaibelu aibabagone wosaelu “ga bikicgoneholec” midaicte. <sup>28</sup> Ngic ingucne ye sockapec Yuda ngic aigac, ye Yuda ngic noine mi aigac, miyac. Aime soc tofaine helockeicne yogo socka sugu mi aigac, miyac. <sup>29</sup> Monic ye kwele ngage-ngageina Yuda ngic aigac, yedi Yuda ngicbenang. Wapongte Asudi kweleina soc tofaine heloc-helocte bole bame Wapongti ngic-ngigac aling ingucne yenge mitengebacaigac, yogo ngicte bole miyac. Aime yefe-yowale hibidi ngage-ngageina soc tofaine heloc-helocte bole, yogo nalic mi badaicte.

### 3

*Yowawa locebadaicte*

<sup>1</sup> Ilec wenuc minoga, Yuda ngic-ngigac gagaing yogodi madickegac, me? Ailu soc tofangineng helockeicne gaebongka, aibaba yogodi baficebacaigac, me? <sup>2</sup> Oc, yenge bucbuchac baficebacaigac. Molic-molic yogo Wapongti yengele ngageme madickec, yeicne yowa damongkeningte yengele hewacka lowec fagac. <sup>3</sup> Wapong ye yowa mimi-ine balaibecaigac. Aime gocne yenge ngage-ngagesingnineng mikac gaibong, yogodi Wapongte pasi mimipangineholec baickedaicte, me? <sup>4</sup> Yogo miyacbenang. Yowa yanguc kwelengkeicne fagac,

“Gagi yowa migic, yogo dondonne fikelu yegengkedaicte. Ailu ga ngic funginengineng wosaelu yowangineng dondonne mimoctodamecte.”

(Mige 51:4)

Yowa yanguc mibeng sanangne fadaic, “Wapong ye noine. Nga ngic-ngigac sasawa nongilengtibac kwesacongngengkolec.”

<sup>5</sup> Ilec ailu ngic-ngigac gocne yanguc micaigaing, “Aibabanonggeng sowacnedi bole madicne aigac, yogo Wapongte pasi dondonne bayegengkedaicte. Ilec Wapongti sowacnenonggengte aalicne wedunoleme, yogodi dondonne mi aidaicte, me?” Yowa yogo noine mi aigac, yogo miyacbenang. Na ngic ngage-ngage balaibelu yowane inguc migabac. <sup>6</sup> Entacka Wapongte pasidi dondonne mi aidecka midec, himongtowa yagolec ngic-ngigac nalic mi wosaecbalu mimoctocebadece, yogo noine hocne.

<sup>7</sup> Aime gocne yenge yanguc migaing, “Nale kwesac-yowadi Wapongte yowa noine bayegengkeme yeicne wacine feicne aigacka, omale ye bikickolec wacnudaicte?” <sup>8</sup> Aime gocne yengi yanguc micaigaing, “Wiyac madicne fikenale nongileng aibaba sowacne aidabeleng.” Aime gocne yengi micka lolo ainolelu nongileng yanguc micaigaing, “Ihocne wedunolecaigaing.” Ngic-ngigac yowa ingucne micaigaing, yenge Wapongti bikicnginenge ameinele silicka yeledaicte, yogodi dondonne aigac.

#### *Ngic dondonne*

<sup>9</sup> Ilec wenuc minoga, Yuda ngic-ngigac nongilengtibac Grik ngic-ngigac ewalicebaga-beleng, me? Yogo miyachenang. Yuda ngic-ngigac nga Grik ngic-ngigac nongileng yowa yanguc biyac migabac, “Nongileng momochac sasawadi bikicte bagewa gagabeleng.”

<sup>10</sup> Ilec yanguc kwelengkeicne fagac,

“Monicti dondonne mi gagac, yogo miyachenang.

<sup>11</sup> Ailu monicti ngage-ngage-motockolec mi gagac.

Nga monicti Wapong mi basackecaigac, miyac.

<sup>12</sup> Yenge sasawadihac Wapongte yefe madicne lobe holecnolu yengileng momochac sowaleicne.

Monicti aibaba madicne monic mi aicaigac, yogo miyachenang.” (Mige 14:1-3; 53:1-3; Ngag 7:20)

<sup>13</sup> “Yenge mic-malacngineng yogo dongesi angkeicne ingucne.” (Mige 5:9)

“Ailu yenge micnginengti kwesac aicaigaing.

Ailu micnginang hemale marasing balu gagaing.” (Mige 140:3)

<sup>14</sup> “Yenge micti sawec-yowa mibong, ngage-sowac kwelenginangkocni dac lobelu ofecaigac.” (Mige 10:7)

<sup>15</sup> “Ailu yenge ngic-ngigac wecebabong sacngineng wanale biyac hikecaigaing.

<sup>16</sup> Ailu yenge yefe hikecaigaing, iwa mac-himong basowalelu ngic-ngigac umacka loceba-caigaing.

<sup>17</sup> Ngic-ngigac yogo yenge kwele-mogungkolec gagale yefe mi ngagegailing, miyac.” (Yes 59:7-8)

<sup>18</sup> “Ailu yenge Wapongte haicka domalu hangocebame alang bacnoningte monic mi ngagesicaigaing.” (Mige 36:1)

<sup>19</sup> Nongileng yanguc ngagegabeleng, yefe-yowa yogodi ngic-ngigac yefe-yowale bagewa gagaing, yenge sowacnengineng edalicebame ngani-motogaing. Ilec ailu micngineng wedickeme migbedic mi aidaing. Aime himongtowa yagolec ngic-ngigac sasawa nongileng Wapongte haicka sowacneholec aigabelengte ailu yowaine migac.

<sup>20</sup> Monic ye yefe-yowa balaibelu Wapongta kwesidaicte, ye Wapongti yanguc nalic mi micnodaicte, “Ngc yogo ye dondonne.” Yefe-yowa yogodi bikicnonggeng mime yengkenoleme ngagegabeleng.

#### *Dondonne wacnubadaicte*

<sup>21</sup> Aime yanguctihac Wapongti ngic-ngigac dondonne wacnubacaigac, ye yefe yogo yegena lome nganicaigabeleng. Yefe yogo yefe-yowa nga siduc-mimi ngic yengi mibasanang aicaigaing. Ailu yogodi yefe-yowale yefewa mi aigac, miyac. Yogo yefe gbolicne ailu silicine monichenang. <sup>22</sup> Wapongti Yesu Kristo nolewec. Aime ngic-ngigac ye ngagesingkegailing, yenge sasawa dondonne wacebagac. Aime ngic-ngigac nongileng ngani-nganinonggeng haicine monic-monic mi aigac, <sup>23</sup> nongileng sasawadi bikickollecte ailu Wapongta wac feicne facaigac, yogolec maaine banangte lilolu gaga-beleng. <sup>24</sup> Lilobeng Wapongti kwele-madic ainolenale ailu Kristo Yesule yefewa bikicte muckacni lukecnubalu dondonne wacnubagac. Inguc fikenolenale nongungtihac bole monic mi baibeng. <sup>25</sup> Wapong yeicne kwelewa ngagelu Yesule sac ngani-motolu ngic-ngigac nongileng Yesu ngagesingkegailing, bikicnonggenge ameine badu-badule fulu yedi aiwec. Yefe iwa Wapong ye yeicne dondonne, yogo edalicnubanale ngageme madickewec. I yangucte, ye esecne ngic-ngigac pasi ulucne aiyelelu bikicnginengte ameine biyac mi baduyelewec, <sup>26</sup> ye dameng dalicne tatakic mikac wangecngineng gawec. Ye dameng yagolec ngic-ngigac Yesu ngagesingkelu gagabeleng, nongileng dondonne wacnubagac. Ye yeicne dondonne, yogo edalicnubanale ngagesilu Yesule bolele ailu dondonne wacnubagac.



<sup>27-28</sup> Ilec wenuc ailu socnonggeng bafedabelengte? Yefe monic mi fagac, miyac. Nongileng yefe-yowa wenuc balaibebeng ye dondonne wacnubadaicte? Yogo bolele yefe-yowa, me? Yogo miyac. Nongileng yanguc ngagelu sanangne badabeleng, Wapongti ngic-ngigac dondonne wacnubagac, yogo ngage-ngagesingnonggengte ailu wacnubagac, yogo yefe-yowale bole miyac. <sup>29</sup> Aime Wapong ye Yuda ngic-ngigac yengele Wapong sugu, me? Yogo miyac, ye Israel yengele alingkacni miyac, yengele Wapong momochac gagac, yogo foinac. <sup>30</sup> Wapong moniyangti hocne gagac. Ailu ye soc tofangineng helockeicne, yenge ngage-ngagesingnonggengte ailu dondonne wacebadaicte. Ailu soc tofangineng mi helockeicne, yenge inguchac ngage-ngagesingnonggengte ailu dondonne wacebadaicte. <sup>31</sup> Ilec ailu ngage-ngagesingnonggengti yefe-yowa baickegabeleng, me? Yogo miyachenang. Nongileng ngage-ngagesingti yefe-yowa basanangkegabeleng.

## 4

### *Abrahamte fungine*

<sup>1</sup> Ilec wenuc minoga? Abraham ye soctepecka ngambononggeng, ye fungineine dondonne wenucka bafuwawec? <sup>2</sup> Gocne yengi yele yanguc micaigaing, “Wapong ye aibabainele ailu ye ngic dondonne wackewec.” Yogo noine miyac. Aime yogodi noine aidecka, ye socine nalic bafedec. Nga Wapongte haickabac yogo miyac.

<sup>3</sup> Nongileng Wapongte hibiwa yanguc wafecaigabeleng, “Abraham ye Wapong ngagesingkewecte ailu, ye ngic dondonne wackewec.” (*Fike 15:6*)  
<sup>4</sup> Ngic monic ye bole bacaigac, yele bolele fuli yogodi kwele-madicte wiyac mi aigac, yogo bole bawec yogolec ameine aigac. <sup>5</sup> Aime ngic monic ye bolele yefe hegilelu Wapong ngagesingkegac, yele yanguc fikegac. Wapongti ngic-ngigac sowacne dondonne wacebacaigac, ye ngic yogo ngage-ngagesingte ailu boleine mikac kwele-madicka ngic dondonne wackegac. <sup>6</sup> Aime Wapongti ye ngic dondonne wackegac, yogo aibabainele miyac. Ngic ingucne ye kweleina angackegac. Yengele Dawididi biyachac yogolec yanguc miwec,

<sup>7</sup> “Ngic-ngigac gocne yenge yefe-yowa welu gacgubong Wapongti sowacneningeng hegileyelelu bikicngineng baickewecka, yenge kwele-angackolec. <sup>8</sup> Aime entacka Sugucnedi ngic monicte bikicte ameine mi lacnodaictewa, ngic yogo ye kwele-angackolec.” (*Mige 32:1-2*)

### *Soc tofangineng helockeicne*

<sup>9</sup> Abraham yebac ngagesingkewecte ailu Wapongti ngic dondonne wackewec, nongileng inguc hocne ngagelu migabeleng. Ilec kwele-angac yowa yanguc ngagening, yogo ngic soc tofangineng helockeicne me ngic soc tofangineng mi helockeicne yengele miicne?  
<sup>10</sup> Abraham ye soc tofaine helockemebac Wapongti ye ngic dondonne wackewec, me? Yogo miyac, ye soc tofaine mi helockemewa Wapongti ye ngic dondonne wackewec.  
<sup>11</sup> Abraham ye ngagesingkeme Wapongti yanguc wackewec, “Ngic yogo ye ngic dondonne.” Inguc milu soc tofaine heloc-helocet maa yogo mimipangte maa Abraham lacnowec. Ye socine mi helockelu biyachac ngagesingkewec. Ilec ailu ngic sasawa soc tofangineng mi helockelu ngagesingkecaigaing, Wapongti yengele ngic dondonne wacebanogale yenge Abraham gbolifocine, inguc wacebawec. <sup>12</sup> Aime Abraham ye ngic soc tofangineng helockeibong, yengele ngambongineng aigac. Ailu Abrahamte ngage-ngagesingte hige-yefe balaibelu Sugucne ngagesingkecaigaing, Abraham ye inguchac yengele ngambongineng aigac. Ngage-ngagesingka ngambongineng Abraham, ye molickelu soc tofaine mi helockeluhac biyachac ngagesingkewec, ye ingucnehac aigaing.

### *Wapongti yowa milu mipangkewec*

<sup>13</sup> Wapongti Abraham nga ngambofocine yengeholec yowa yanguc milu mipangkewec, “Himong sasawa yago ngengele mole-damoc ainale ngeledacte.” Aime yogo Abrahamti yefe-yowa balaibewecte mi miwec, miyac. Yenge ngagesingkeibongte ailu Wapongti ngageyelelu dondonne wacebawec, yogolec feina yowa milu mipangkewec. <sup>14</sup> Aime ngic-ngigac yenge yefe-yowa balaibelu mole-damocngineng badabongka ingucne, ngage-ngagesingkolec gaga yogo tapiliine mikac aidec. Aime Wapongti wiyac yelenale mipangkewec, yogo inguchac noine mikac aidec. <sup>15</sup> Yefe-yowadi bikicte aalic bafuwadaicte. Nga yefe-yowa monic mi fadaictewa, yefe-yowa wewe yogo mi fikedaicte.

<sup>16</sup> Abraham ye Yuda ngic-ngigac yefe-yowa balaibecaigaing, yengele mamacngineng. Ailu ngic-ngigac ngage-ngagesingningeng yele ingucne fayelegac, ye ngic ingucne yengele mamac. Ilec ailu Abraham ngambofocine sasawa yenge yowa milu mipangkeicne yogo kwele-madicté bagewa fame badaingte. Yogo ngage-ngagesingningengete ailu nalic noinebenang badaingte. <sup>17</sup> Aime Abrahamte ngagesilu yanguc kwelengkeicne fagac, “Na locgube ga himong homacne ngic-ngigac yengele mamacngineng aidamecte.” (*Fike 17:5*)

Aime Wapongti ngic homaicne bagbolyecebacaigac. Aime wiyac monic mi fagac, ye wiyac yogo wacine milu wackeme fikecaigac.

Ilec ailu Wapongte haicka nga ngage-ngagesingte yefewa, Abraham ye nongileng mamacnonggeng. <sup>18</sup> Ye gboliholec ainale silicka mi gawec, miyac. Ye Wapong ngagesingkwecte ailu wangec galu himong homacne ngic-ngigac yengele ngambongineng aiwec. Ilec hocne yowa yanguc biyachac miicne fawec,

“Ngesa-ngambofocgone yenge dzalengineng bocyachenang fikedaingte.”\* (*Fike 15:5*)

<sup>19</sup> Abraham ye hifaine 100 ingucne aime socine dokongkelu fuluckeme homanogale ailu ngagewec. Aime ngigacine Sara ye hifa bocyac ewalime, kogoc nalic babale silic mi aiwec. Aime sifu Abraham ye ngage-ngagesingngine sanangne fawecte, ye tapiliine monic mi wawec. <sup>20</sup> Ye Wapongti wiyac lacnonale mipangkewec, yogolec ngageboc monic mi aiwec. Ailu sifu sanangne ngagesingkelu Wapong wacine bafelu gawec. <sup>21</sup> Aime Wapongti yowa mipangkecnowec yogo banogale tapili yogo andoine facnowec, Abraham ye inguc ngagemotolu ngagepangkewec. <sup>22</sup> Ilec ailu yanguc fagac, “Wapongti ye ngagesilu ngic dondonne wackewec.”

<sup>23</sup> Aime yowa yogo Abrahamte sugu ngagelu mi kwelengkeicne fagac, miyac. <sup>24</sup> Yogo nongilengte momochac kwelengkeicne fagac. Wapongti Sugucnenonggeng Yesu homackacni bagbolyewec, yogo nongilengte ailu bole yogo bawec. Ye ngagesingkebeng yedi inguchac dondonne wacnubadaicte. <sup>25</sup> Aime nongileng bikicte ailu ngic-ngigac yenge Yesu webong homawec. Aime Wapongti dondonne wacnubanale Yesu homackacni hatacmac bagbolyeyeme fangkwec.

## 5

### *Wapongta kwele-mogung fagac*

<sup>1</sup> Inguc ailu Wapongti ngage-ngagesingnonggeng nganilu dondonne wacnubame, Sugucnenonggeng Yesu Kristole madicté ailu yeholec kwele-mogungka gagabeleng. <sup>2</sup> Yedi yefe bafuwanoleme Wapongte kwele-madic kwelina yanguctihac gagabeleng. Aime Wapongte tapili nga hibi-angocineholec lobewa fikenoledaicte, yogo wiyac feicne, inguc ngagelu wangec galu beliyelu gagabeleng. <sup>3</sup> Ailu yogo sugu miyac, nongileng inguchac doic feina galu yogolec ngagebeng feicne aime beliyelu gagabeleng. Doic ngagecaigabeleng yogodi kwelenonggeng basanangkecaigac. <sup>4</sup> Basanangkeme tatakic mikac galu sanangne domacaigabeleng. Domalu tapili hibi-angocineholec noine fikenale wangec gagabeleng. <sup>5</sup> Wangec inguc galu mi gamenubacaigac. I yangucte, Wapongti Tili Asu nolelu kwele-angacine kwelenonggang sotiyewec fagac.

### *Kristodi kwele-angacka bacnubawec*

<sup>6</sup> Nongileng kosa gaebengka Wapongti dameng bawosaewec, iwa Kristo kwesilu nongileng ameine yedi balu homawec. Nongileng waweweine gaebengka, yedi inguc ainolewec. <sup>7</sup> Monicti ngic dondonne monic bafickelu homanale ngagesidaicte, siduc ingucne mi ngagecaigabeleng. Aime monic ye aibabaine madicne aidaicte. Aime monicti ye hangoc mikac nalic bafickelu homadaicte mecne. <sup>8</sup> Aime sifu Wapongti kwele-angacine edalicnubalu Kristole mime, yedi ngic-ngigac nongileng bikickolec gaebengka nongilengte ailu hocne homawec. <sup>9</sup> Aime yele sacte ailu Wapongti ngic-ngigac dondonne wacnubame yanguctihac gagabeleng. Ilec ye inguchac aalic badu-badule damengka yowanonggeng mime wasecne aidabelengte yogo ngagepangkulu gagabeleng. <sup>10</sup> Aime nongileng Wapongte ngaba gaebengka Madecinele homacti ngaba yogo baickeme Wapongkolec kwele-moniyang fikenolewec. Ailu yogo sugu miyac. Kwele-moniyang fikenoleme nongileng Madecinele gagale ailu inguchac wasecne aidabelengte, yogo hocne ngagepangkulu gagabeleng. <sup>11</sup> Ailu yogo sugu miyac. Sugucnenonggeng Yesu Kristodi bikicnonggeng baickelu Wapongkolec kwele-moniyang bafuwanolegac. Ailu nongileng yanguctihac Wapongte ngagebeng wiyac feicne aime beliyelu gagabeleng.

\* **4:16:** Gal 3:7    **4:18:** Asocmeng yengele dzalengineng ingucne fikedaingte.    **4:19:** Fike 17:17    **4:22:** Fike 15:6    **4:25:** Yes 53:4-5    **5:3:** Yak 1:2-3; 1Pi 1:5-7    **5:8:** Yoa 3:16; 1Yoa 4:10    **5:9:** Rom 1:18; 2:5

*Adamti homac bafuwame Yesudi gaga bafuwawec*

<sup>12</sup> Yogo yanguc fikewec, ngic moniyangte sugu ailu bikicti himongtowa yagowa fikelu homac bafuwawec. Aime ngic-ngigac sasawa bikic bafuwaibongte ailu homacti ngic-ngigac sasawa bacebawec. <sup>13</sup> Yefe-yowa himongtowa yagowa mi fikewec, dameng iwa bikicti biyachac kwesiwec. Aime sifu yefe-yowa monic mi fawecte ailu, Wapongti bikicngineng mi ngagesiwec. <sup>14</sup> Aime Adamtacni ofegacgu Mosesle damengka homacti ngic-ngigac aling sasawa damongebawec. Adam ye Wapongte yowa hegilelu bikic bafuwawec. Aime gocne yenge ye bikic bafuwawec ingucne mi bafuwaibong, aime homacti sifu yenge bacebawec. Adam ye ngic monic kwesinale miicne, yele silic ingucnehac.

<sup>15</sup> Ngic moniyangti sugu bikicka wawewecte, ngic-ngigac bocyac yenge homayackeibong. Aime Wapongti ngageboc mikac ailu kwele-madictte wiyac ngic-ngigac moc yelesaigac, yogo ngic-ngigac bocyacbenang yenge umacnebenang yelewec. Yogo ngic moniyangte sugu, Yesu Kristole kwele-madictte ailu inguc fikelu fawec. Ilec yefe lilolile bikic yogo silicine monic aigac. Nga kwele-madictte wiyac moc yelegac, yogo silicine monic, yogo foinac. <sup>16</sup> Ngic moniyangti sugu molickelu bikic bafuwawec. Aime Wapongti yogolec ailu ngageboc mikac ngic-ngigac homacne wiyac yelesaigac, wiyac yogo yeke silicngineng moniyang inguc mi ngagedabeleng, miyac. Ngic moniyang sugudi bikic molickelu bafuwame, Wapongti ame badu-badule pasi molickelu bawec. Bame ngic-ngigac bocyac yenge yefe lilolu bikickolec aiibong. Aibong Wapongti inguc nganilu kwele-madictte wiyac yogo bikicngineng bocyac yogolec ameine baickelu dondonne wacebawec.

<sup>17</sup> Ngic moniyangti sugu molickelu yefe lilome yele bikictte ailu homacti ngic-ngigac damongebawec. Ilec ailu Wapongti ngic-ngigac kwele-madic aiyelelu kwele-madicka dondonne wacebagac. Wacebame yenge ngic moniyang ailu Yesu Kristoholec momochac gagale alingka galu wiyac bocyac damongkedaingte. Wapongte kwele-madictte wiyac yogodi homac ewali-benangkegac.

<sup>18</sup> Inguc aime ngic moniyangti sugu yefe lilome, Wapongti ngic-ngigac sasawa bikicngineng mimoctowec. Aime ngic moniyangti sugu inguchac aibaba dondonne aiwecte, ngic-ngigac sasawa bikicnginengte ameine baickewec. Baickeme Wapongti ngic-ngigac dondonne wacebame yogodi gaga-sanang bafuwayelewec. <sup>19</sup> Aime ngic moniyangti sugu yowa madicne hegileme, ngic-ngigac bocyac yenge bikicnginengkolec aiyaackeibong. Aime ingucnehac ngic moniyangti sugu yowa madicne balaibewecte ailu, Wapongti ngic-ngigac bocyac yenge dondonne wacebadaicte.

<sup>20</sup> Aime yefe-yowa kwesiwec, yogo bikicngineng sugucnehac ainale kwesiwec. Aime bikicngineng sugucnebenang aime yele kwele-madictowadi bikicngineng ewali-benangkelu fikelu fawec. <sup>21</sup> I yangucte, bikicti damongebalu homac bafuwawec, ingucnehac kwele-madicedi damongnonggeng aime, Wapongti Sugucnenonggeng Yesu Kristole ailu dondonne wacnubalu gaga moto-motoine mikac noledaicte.

## 6

*Kristole fangke-fangkewa taockeicne*

<sup>1</sup> Ilec wenuc minoga? Wapongte kwele-madicti sugulenale nongileng bikicka hatacmac taockelu gadabeleng, me? <sup>2</sup> Yogo miyachenang. Ailu bikickacni biyachac homaibeng, inguc ngagelu nongileng hatacmac iwa mi taockelu gadabeleng. <sup>3</sup> Nongileng Kristo Yesuholec wetackeibengte misa lowanoleibong. Lowanolebong Yesule homacka momoc wetackeibeng, ngenge yogo mi ngagegaing, me? <sup>4</sup> Ilec misa lowalu Kristoholec homabeng, Wapongti yeholec longnubawec. Mamac ye tapili nga hibi-angoctowainedi Yesu homackacni bagboliyeme gaga gbolicna fewec. Aime nongileng inguchac gaga gbolicna felu ganangte yeholec taoctubawec.

*Yesuholec wetackelu gaga*

<sup>5</sup> Yesu ye homawec, yogolec silicina yeholec taockelu homaibeng. Aime ye homackacni gboliyelu fangkewec, nongileng inguchac yeholec taockeibengte gboliyelu fangkedabelengte, yogo ngagepangkegabeleng. <sup>6</sup> Bikictte tapilidi soc-kwelenonggang bole balu gagac, yogo miyac ainale kwelenonggeng esecne malicpongka Yesuholec weicne, yogo ngagegabeng. Bikicti filenonggeng ingucne hatacmac mi ganale inguc aiwec. <sup>7</sup> I yangucte, ngic homadaicte, ye bikicti hatacmac mi hefedaicte.

<sup>8</sup> Aime nongileng Kristoholec biyachac homaibeng milu yeholec inguchac gadabelengte, yogo ngagesingkegabeleng. <sup>9</sup> Aime Wapongti Kristo homackacni bagboliyeme fangkewec.

Aime ye fangkewec yogo hatacmac mi homadaicte, inguc hocne ngagegabeleng. Ye hatacmac homacte tapillile bagewa mi gagac. <sup>10</sup> Yele homacti ngic-ngigac bikicnggengte ailu alecine moniyang sugu homame motowec. Ailu gaga yanguctihac gagac, yogo Wapongte ailu angacka gagac. <sup>11</sup> Ilec ngenge ngengileng momoc yanguc ngagedaing, bikickacni biyachac homaicne, aime yogolec bagewa hatacmac mi gagaing. Aime yanguctihac Kristo Yesuholec wetackel Wapongte ailu angacka gagaing.

### *Bikite angac*

<sup>12</sup> Ilec ailu bikicti fulucngebame socte angac haicine monic monicti bacnggebadaickale, ngenge bikic aibaba kwele esecna facaigac, yogo hegiledaing ailu mi balaibedaing. <sup>13</sup> Ailu hodoc, donge-hedec nga hige-molengineng yogodi aibaba sowacne ailu bikicte kwelec kwekwe mi aidaic, miyac. Ngenge molickelu homacka gaibong, yakumacbac ngenge gaga noina gagaing. Ilec ngengungtihac efeckelu Wapongkolec wetackelu hodoc, donge-hedec nga hige-molengineng mimoctobong yogo yengi yele kwelec kwelu aibaba dondonne aidaing. <sup>14</sup> Ngenge yefe-yowale bagewa gaga, yogo biyachac hegilelu Wapongte kwele-madictte bagewa gagaing. Ilec ailu bikicti sugucnengineng mi aidaic.

### *Wapong kwelec kwekwefocine*

<sup>15</sup> Ilec wenuc ngagenoga? Nongileng yefe-yowale bagewa mi galu kwele-madictte bagewa gagabeleng. Ilec bikic bafuwadabeleng, me? Yogo miyachenang! <sup>16</sup> Ngenge ngenung ngic monicte bagewa kwelec kwekwe aling ganingte, ngenge yele kwelec kwekwe aling galu yele yowa balaibedabiyeng, yogo ngagegagang. Inguc ailu ngenge bikicte kwelec kwekwe aling galu yowaine balaibedaingtewa, homac bafuwadaingte. Me Wapongte yowa balaibelu yele kwelec kwekwe gadaingtewa, gaga dondonne bafuwadaingte.

<sup>17-18</sup> Aime ngenge molickelu bikicte kwelec kwekwe aling gaibong, yogo biyachac hegilebong motowec. Aime Wapongti wewedu-yowainele emewa locngebame kwelengineng bucbuchac iwa lolu balaibeibong. Aime bikicte muckacni biyachac lukecngebame yakumac dondonne gagale kwelec kwekwe aling ailu gagaing. Inguc aibong Wapong mitengkelu kwele-madic micnogabac.

<sup>19</sup> Ngenge socte ngage-ngageningnti yegena mi aidaickale ailu, kwelec kwekwele nangeng yowa migabac. Ngenge molickelu hodoc, donge-hedec nga hige-molengineng mimoctobong kwele wonongkolec gaga, nga yefe-yowa wewele bagewa kwelec kwekwe aling gaibong. Inguc galu yefe-yowa hegilelu aibaba ingucna sugulelu gaibong. Ngenge silicine ingucnehac yakumac hodoc, donge-hedec nga hige-molengineng mimoctobong gaga dondonne bagewa kwelec kwekwe aling gadabiyeng. Galu gaga gbagbacna sugulelu sanangkedabiyeng.

<sup>20</sup> Ailu ngenge bikicte kwelec kwekwe aling gaibongka, dondonne gagale yowadi mi damonggebawec, miyac. <sup>21</sup> Ngenge iwa bikicte noine balu gaibong yogodi gagangineng basowalewec. Aime ngenge yanguctihac yogo ngagelu gamengebacagac. Aibabangineng ingucnedi homac bafuwadaicte. <sup>22</sup> Ngenge yakumacbac bikicte muckacni lukecngebaicne. Aime Wapongte kwelec kwekwe aling gagaing, yogolec noine bagaing. Balu ngenge gaga gbagbacne galu sugulelu sanangkelu gadaingte. Ilec ailu gaga-sanang badaingte. <sup>23</sup> I yangucte, bikicte fuli yogo homac banoga. Nga Wapongte kwele-madictte wiyac yogobac Sugucnenonggeng Kristo Yesule ailu gaga-sanang fuline mikac moc noledaicte.

## 7

### *Yefe-yowa nga Asule bolewa*

<sup>1</sup> Ngic hae-gbafocne, ngenge yefe-yowa ngagegagang, yogo ngagegabac. Ngic-ngigac mi homalu gaibongka yefe-yowadi sugucnengineng ailu damongebacaigac, yogo mi ngagegagang, me? <sup>2</sup> I yanguc, ngigac monic ye ngaweineholec gamemewa, ngic ye ngigacti yeholec gagacte yeke doficnagulu gadabiyecte. Yefe-yowale yefewa inguc fagac. Gacgu ngaweine homadaictewa, yefe-yowadi ngigac ngickolec witicepame gaiboc, yogo miyac aidaicte. <sup>3</sup> Aime ye ngaweine gbolicne gaemewa ngigac ye ngic monickolec gadaictewa, ye seloboic ngigac wackedaingte. Nga ngaweine homadaictewabac ngigac yogo ye yefe-yowadi hatacmac mi witickedaicte. Ye dameng iwa ngic monicte ngigac aidaictewabac ye seloboic ngigac mi aidaicte. <sup>4</sup> Ngic hae-gbafocne, silicine ingucnehac ngenge Kristole socbiuckolec homaibong. Ilec ngenge yefe-yowale bagewa hatacmac mi gagaing. Ngenge ngic homackacni gboliyelu fangkewec, yeholec taockel ganingte ailu, nongileng Wapongte bolele noine ainangte ye inguc aiwec.

<sup>5</sup> Nongileng molickelu kwele esecna gaebengka yefe-yowadi bikicte angac sowacne kwelenonggang kwefangkeme homacte noine bafuwalu gaibeng. <sup>6</sup> Aime yefe-yowadi bacnubame iwacni biyachac homaibeng. Ailu yanguctihac lukecnubaicne gagabeleng. Inguc ailu yefe-yowa iwacni homalu bole esecne kwelec mi kwecnolu Asule gaga gbolicna felu kwelec kwelu domagabeleng.

*Bikic edalicnubadaicte*

<sup>7</sup> Ilec wenuc minoga? Yefe-yowa yeuctihac bikic aigac, me? Yogo miyachenang! Aime yefe-yowadibac bikicte silicine edalicnume ngage-motogabac.

"Ga ngani-angac mi aidamec."

(Wah 20:17; Yef 5:21)

Yefe-yowadi inguc mi midecka, na ngani-angacte silicine nalic mi ngage-motodacka. Aime sifu yefe-yowadi inguc mime ngani-angac bafuwaiba. <sup>8</sup> Aime bikic ye ung-yowawa yefeine bafuwalu ngani-angac haicine monic-monic kwelene kwelina kwefangkeme bikic bafuwaiba. Nga yefe-yowa mi fadecka, bikic ye homaicne aidec. <sup>9</sup> Na\* molickelu Wapongte yefe-yowa mikac gaiba. Galu ung-yowaine kwesime ngageiba, yogowabac bikic ye gagaineholec ailu bole bame <sup>10</sup> homaiba. Iwa yanguc nganiiba, ung-yowa ye gaga bafuwanaile loicne fagac, yogodi hocne homac bafuwanelewec. <sup>11</sup> Bikicte ung-yowawa yefe bafuwalu kwesacka mengocnulu wehomacnuwec. <sup>12</sup> Ilec yanguc fagac, yefe-yowa yogo yeicne gbagbacne. Aime ung-yowa yogo inguchac gbagbacne nga dondonne ailu madicne. <sup>13</sup> Aime wiyac madicne yogodi homacka locnuwec, me? Yogo miyachenang! Bikicte fungine fikelu yegengkenale bikictibac homacka locnuwec. Aime bikic ye wiyac madicne balu yogodi nala homac bafuwawec. Inguc aime ung-yowadi bikic bafuwame bikic ye wiyac sowacnebenang, yogo fikelu yegengkewec.

*Kwele esecne nga gbolicne wenagucaigac*

<sup>14</sup> Yefe-yowa yogo Asulacni, yogo ngagegabeleng. Aime nabac kwele esecna gabe bikicte kwelec kwekwe hacnume, bikicte bagewa gacaigabac. <sup>15</sup> Aime aibaba ailu gacaigabac, yogo wenucte ailu gacaigabac, yogo mi ngage-motogabac. Na wiyac monic ainogale ngagesicaigabac, yogo mi ailu gacaigabac. Aime aibaba kwelenedi mi ainogalebenang ngagecaigabac, yogobac ailu gacaigabac. <sup>16</sup> Aime aibaba gocne mi angacnucaigac. Aime sifu aicaigabac, yogo mi angacnudaictewa, yogodi yanguc edalicnudaicte, yefe-yowa yogo madicne, aime yefe-yowaholec kwele-moniyang aigabac. <sup>17</sup> Inguc aime naneuctihac aibaba yogo mi ailu gacaigabac, miyac. Bikic nale kwele kwelina fagac, yogodi aibaba yogo aicaigac. <sup>18</sup> Nale kwelewa wiyac madicne monic mi fagac, inguc ngagegabac, yogo kwele esecnele migabac. I yanguc, na aibaba madicne ainogale ngagecaigabac. Ailubac aibaba madicne ainogale ngagebe kpungkecaigac. <sup>19</sup> Foinac, aibaba madicne ainogale ngagecaigabac, yogo mi ailu gacaigabac. Aime aibaba sowacne hegilenogale ngagecaigabac, yogobac ailu gacaigabac. <sup>20</sup> Na aibaba gocne mi ainogale ainelecaigac, yogo aicaigabacka, naneuctihac aibaba yogo mi aigabac, miyac. Bikic nale kwelewa fagac, yogodi aibaba yogo bafuwame aicaigabac.

<sup>21</sup> Aibaba madicne ainogale ngagebe, aibaba sowacnedibac kwelena biyac facaigac, yogo bikicte yefe-yowa yogo nganicaigabac. <sup>22</sup> Ailu ngage-ngagena Wapongte yefe-yowale kwele-madic ngagecaigabac. <sup>23</sup> Aime angac monicte yefe-yowadibac socna fikeme nganicaigabac, yogodi ngage-ngagena yefe-yowa fagac, yeholec wenagulu gagabiyec. Wenaguboc bikicte yefe-yowadi socne witickelu boleine balu gagac.

<sup>24</sup> Na ngic waweweine kwele-sowackolec galu socneholec homacte bagewa gabe, madi iwacni baicnudaicte? <sup>25</sup> Yesu Kristo Sugucnenonggeng yedi bamotocnudaicte. Ilec Wapong mitengkelu kwele-madic micnogabac. Naneicne ngage-ngagenedi Wapongte yefe-yowale bagewa galu kwelec kwecnolu gagabac. Aime kwele esecnacac bikicte yefe-yowale kwelec kwecnolu gagabac.

## 8

*Asuwa gaga*

<sup>1</sup> Aime yanguctihac ngic-ngigac Kristo Yesuholec wetackelu gagaing, yenge bikicte ameine mi badaingte. <sup>2</sup> Ga Kristo Yesuholec wetackelu gaengka, Asu gagaineholecte\* yefe-yowadi bikic nga homacte yefe-yowale muckacni lukecguwec. <sup>3</sup> Kwele esecne ye yefe-yowale tapili bawanogale aime yefe-yowa ye wiyac ainogale kpungkewec. Kpungkeme Wapongti bikicte bole yogo yanguc bawec, ye Madecbenangngine saleme nongileng bikicte soc yogolec silic ingucne ailu himongka wawec. Aime Wapongti yele socka

7:6: Rom 8:2; 6:4 \* 7:9: Poldi ngic-ngigac gocne yengele ngagelu "na" miwec. 7:11: Fike 3:13 7:12: 1Tim 1:8 7:15: Gal 5:17 7:23: Gal 5:17; 1Pi 2:11 7:25: 1Kor 15:57 \* 8:2: Asu gagaineholec yogo Tili Asule migac.

bikicnonggeng mimoctolu baickeme miyac aiwec. <sup>4</sup> Ilec ailu yefe-yowale aibaba don-donne gaganonggang fikelu yegengkecaigac. Nongileng kwele esecnele yefewa gaga yogo hegilelu Tili Asuholec wetackelu gacaigabeleng.

<sup>5</sup> Aime ngic-ngigac kwele esecnele angac nga ngage-ngage balaibeccaigaing, yenge ngage-ngageningeng kwele esecnele wiyacka locaigaing. Nga ngic-ngigac Asule angac nga ngage-ngage balaibeccaigaing, yenge ngage-ngageningeng Asule wiyacka locaigaing. <sup>6</sup> Aime kwele esecnele ngage-ngage yogo homacineholec. Nga Asule ngage-ngage yogo gagaine-holec ailu kwele-mogungkolec. <sup>7</sup> Ngic kwele esecna ngage-ngageinedi Wapong ngaba aicnocaigac. Ailu Wapongte yefe-yowa mi balaibeccaigac. Ailu yefe-yowa balaiibenogale ngageme kpungkecaigac. <sup>8</sup> Aime ngic-ngigac kwele esecnele angac nga ngage-ngage balaibeccaigaing, yenge Wapongte kwele-angac bafuwanogale kpungkelu gagaing.

<sup>9</sup> Aime Wapongte Asudi ngengele kwelewa gagacte ngenge Asu balaibeccaigaing, yogo kwele esecna miyac. Nga monic ye Kristole Asu mi balu gagacka, ye Kristole alingkacni miyac. <sup>10</sup> Aime Kristodi ngengele kwelewa gagacka, socngineng yogo bikicnnginengte ailu homawec. Nga asunginengtibac dondonne gagale ailu gagaineholec aiwec. <sup>11</sup> Wapong ye Yesu homackacni bagboliywec. Aime Wapongte Asudi ngengele kwelewa gagacka, yedi socngineng homacte bagewa gagac, yogo inguchac Asuinedi bagboliyedaicte.

#### *Wapong adu-madecfocine*

<sup>12</sup> Ngic hae-gbafofocne, ngagegasing, nongileng amainenonggengkolec gagabeleng aime yogo kwele esecna miyac. Asudi biyachac bagboliyecnubawec. Ilec ailu kwele esecna ganangte ameine monic mi fanolegac. <sup>13</sup> Ngenge kwele esecnele angac nga ngage-ngage balaiibelu gadaingtewa, homadaingte. Nga Asule tapiliwa kwele esecnele aibaba wehomadaingtewabac, gaga-sanang gadaingte. <sup>14</sup> Wapongte Asudi ngic-ngigac aling mengocebacaigac, yenge sasawadi Wapong adu-madecfocine. <sup>15</sup> Gaga monicti kwelekwekwec bacgebame hangocka hatacmac ganingte ailu gaga ingucne mi ngelewec, miyac. Ngengileng gaga silicine monic gabong Wapongti hole-gumec aingeleme adu-madecfocine aiibong. Aime Asu yogodi baficnubame Wapongte yanguc wackelu milu gagabeleng, "Mamacne, Mamacne." <sup>16</sup> Nongileng Wapong adu-madecfocine gagabeleng, yogo hocne Wapongte Asu yeuctihac asunonggengkolec wideckelu miboc yegengkeme gagabeleng. <sup>17</sup> Aime yele adu-madecfocine gagabelengte, yele mole-damoc babale aling momoc ailu Kristoholec aling moniyang galu mole-damoc badabelengte. Nongileng yeholec doic ngagegabelengte tapili nga hibi-angocineholec aidabelengte.

#### *Wiyac madicne fikenale wangec gagabeleng*

<sup>18</sup> I yanguc ngagesigabac, tapili nga hibi-angocineholec lobewa nongilang fikelu yegengkedaicte, yogo wiyac feicnebenang. Nga yanguctihac umac fikenolelu gagac, yogo wiyac kpisicne. <sup>19</sup> Wapongti mime wiyac sasawa fikeyackeibong, yogo Wapongte adu-madecfocine nongileng yeuctihac mime yegengkenangte wiyac yogo yenge sasawadi mamang hidulu wangec gagaing.

<sup>20</sup> Aime Wapongti wiyac mime fikeyackeibong, yogo yengungtihac bole babong madickenale mi aigaing. Yogo yengele wiyac miyac. Ilec yenge umac baiibong. Wapong yeuctihac lobewa madickenale inguc lome wangec gagaing. <sup>21-22</sup> Ailu yanguc ngagegabeleng, Wapongti mime wiyac sasawa fikeyackeibong, iwacnihac ofegacgu yakumac gagabeleng. Aime yenge inguchac gado hiecbame homalu howacine aigaing, yogolec muc hemoctolu Wapong adu-madecfocine yengela taockenngingte aieyedaicte. Dameng iwa gaga mucine mikac, ailu yogo tapili nga hibi-angocineholec.

<sup>23</sup> Aime yogo sugu miyac. Wapongti molickelu Asu nolawec. Inguc nolame nongileng inguchac socnonggengkolec himong yago hegilelu, adu-madecfocine nongileng soc gbol-icne nolegac. Noleme mac ngiye-ngiyenonggang biyac fenangte gobenonggeng hime damengnginele wangec gagabeleng. <sup>24</sup> Ailu wasecne aiibong, dameng iwa nongileng wiyac noine fikenale ngagepangkelu wangec gagabeleng. Monic ye noine biyac fikeme nganiwec, yogo ngagepangkelu wangec mi gacaigac. Aime madi wiyac biyac nganiwecte wangec gacaigac? Monicti inguc mi aiwec. <sup>25</sup> Aime wiyac mi ngani-nganiine yogo banogale ngagegagabeleng, inguc ngagepangkelu wangec gadabelengtewa, tatakic mikac mamang hidulu wangec gadabeleng.

#### *Mimiloc bole banoga*

<sup>26</sup> Inguc gaebengka tapilinonggeng waicnele ailu Asudi kwesilu baficnubagac. Inguc me inguc milockebeng madickedaicte, yogo mi ngage-motogabeleng. Ilec ailu Tili Asudi

nongileng ailu yowa mikac malac sugu milockeme Wapongta fecaigac. <sup>27</sup>Feme ngic-ngigac kwelengngeng nganicaigac. Ailu ye Tili Asule ngage-ngage inguchac ngagecaigac. Asu ye Wapongte ngage-ngage balaibelu Wapongte bingec nongilengte ailu mimiloc bole balu gacaigac.

*Boleine nongilang balu gagac*

<sup>28</sup>Aime yanguc ngagegabeleng, Wapongti alingka lolu ngic-ngigac ngageyelelu wacebame yenge ye le alingfocine gagaing. Ngic-ngigac kweledi ye le angac ngagecaigaing, yenge gagangiang wiyac sasawa fikelu baficebame madicke-benangkecaigaing. <sup>29</sup>I yangucte, Wapongti ngic-ngigac ye ngagesingkedaingte, yenge biyachac ngageyelewec. Ngageyelelu bawosaecebame sugulelu sanangkebong yeicne Madecine ingucne ainingte mimoctocebawec. Madecinedi kwa-gbafocine bocyac yengele molic-molic haengineng ainale inguc alingkwec. <sup>30</sup>Alingkelu ngic-ngigac molic-molic biyachac bawosaecebawec, yenge inguchac wacebawec. Aime yenge wacebalu ngic-ngigac dondonne wacebawec. Aime yenge dondonne wacebalu wacngineng inguchac bafewec.

*Sugucnele angacka gaga*

<sup>31</sup>Ilec ailu yogolec wenuc minoga? Wapongti nongilengkolec gagacka, madi yefenonggeng nalic hedickelu bacnuba wadaicte? Wiyac monicti nalic mi bacnuba wadaicte. <sup>32</sup>Wapong ye Madecbenangngine nongilengte ailu mi sebilewec, ye nongileng sasawale ailu ngaba yengele molewa lolu hegilewec. Aime nongileng hegilewecte ailu, ye kwele-madecinele wiyac sasawa inguchac Madecineholec taockelu noledaicte. <sup>33</sup>Wapongti bawosaecebawec, nongileng madi yowawa locnubadaicte? Yogo monicti mi locnubadaicte. Wapongti nongileng yowa milu ngic-ngigac dondonne wacnubadaicte. <sup>34</sup>Aime bawosaecebawec, nongileng madi bikicnonggengkolec midaicte? Yogo monicti mi midaicte. Kristo Yesu ye hocne homawec. Homame Wapongti ye homackacni inguchac bagbolyeme fangkewec. Fankelu Wapongta fewec foleinapec ngiyelu nongilengte ailu milockelu gagac.

<sup>35</sup>Kristo ye kweleinedi nongileng angacka ainolecaigac. Ilec madi Kristole angackacni nalic baicnubadaicte? Doic, me kwele-umac, me weyebic ainoleadaicte. Me nobanosingte nobe homabe, me ngakpi-kpoluc mikac senggang ganoga. Me sowalenogale aidabelengte, me hudule fitecti wehomacnubadaicte. Wiyac ingucne monicti nongileng nalic baicnubadaicte, me? Yogo miyachenang. <sup>36</sup>Wapongte hibiwa yowa yanguc biyachac kwelengkeicne fagac,

“Gale aling aigabelengte ailu, yenge ubiyactehac gagcu aweleme homacka locnuba-caigaing.

Yenge nonge nganicnubabong lama wehomacaigaing, yenge ingucne aigabeleng.” (*Mige 44:22*)

<sup>37</sup>Yogo sasawa fikenoleme sifu Kristo ye kweledi angacka ainoleme nongileng yeholec galu yogo ewali-benangkelu gbelong ailu gagabeleng. <sup>38-39</sup>Aime Wapong ye kweledi angacka ainoleme nongileng Sugucnenonggeng Kristo Yesuholec wetackelu gaebangka wiyac monicti nalic mi baicnubadaicte, yogo ngagepangke-benangkegabac. Yogo homac me gaga, me angelo me aleng, me wiyac gocne yakumac fagaing me wiyac lobewa fikedaingte. Me wiyac gocne tapilinginengkolec wilengkacni me wiyac gocne tapilinginengkolec dumengkacni. Me wiyac gocne Wapongti mime fikeibong, yenge sasawadi ye le angackacni nalic mi baicnubadaicte.

## 9

*Poldi Yuda ngic-ngigac yengele kwele-sowac ngagewec*

<sup>1</sup>Na Kristoholec wetackelu yowa noine migabac, kwesac mi aigabac. Aime Tili Asudi kwele ngage-ngagene yeuckeme, yogodi damongnume yowa noine yanguc migabac. <sup>2</sup>Na damengsoc alingfocne yengele ailu kwele-sowac sugucnehac ailu kwele-umac ngagelu gabac. <sup>3</sup>Aime nani yengele ame balu Wapongte aalicta bagewa gabe, Kristolacni baicnume dac-sanangka haulu gabe yenge wasec ainingte, ngagegabac. Ngic hae-gbafocne, yenge nale sac-tofafocne aigaing. <sup>4</sup>Ailu yenge Israel ngic-ngigac, yenge Mamacte adumadecbenang aigaing. Aime tapili nga hibi-angocine edalicebalu gagac. Yenge dodofic nga yefe-yowaholec galu Wapongte Ibu-macka felu afeelu kwelec kwecnoicaigaing. Ailu Wapongti mimipangngine edocebawec, yogo yengela fagachac. <sup>5</sup>Aime yenge ngambofocngineng ngagecebagaing. Aime Kristo ye soctepecka yengele fikesaweckacni ngic silic ailu

fikewec. Kristo yedi Wapong hocne, wiyac sasawale feicne. Yela mimitengti mimiteng fagidaic, yogo foinac.

*Wapong adu-madecfocine*

<sup>6</sup> Wapong yowainele mimipang mi fikedaicte, nenge inguc mi ngagedaing. I yangucte, Israel ngic-ngigac yenge ngic wacine Israel yele fikesaweckacni, yengelacni gocnebac Israelbenang mi aigaing. <sup>7</sup> Aime Abraham ngambofocine gocne yenge ngambofocinebenang mi aigaing. Ilec yanguc kwelengkeicne fagac,

“Aisakte fikesaweckacni yengi gale ngesa-ngambofocgonebenang aidaingte.” (*Fike 21:12*)

<sup>8</sup> Socte alingka fikegaing, yenge Wapong adu-madecfocine, inguc mi migac. Yowa milu mipangkeicnele bagewa fikecaigaing, yengi Abraham ngambofocinebenang aigaing.\* Wapongti inguc ngagesigac. <sup>9</sup> Ye Abraham nga Sara yekeholec yowa yanguc milu mipangkewec,

“Na dameng miiba hifa moniyang iwa kwesibe, Sara yela madec monic fikedaicte.” (*Fike 18:10,14*)

*Angacinele alingka bawosaecnubadaicte*

<sup>10</sup> Aime yogo sugu miyac, Rebeka ye ngambononggeng Aisak yeholec falu fucsengeng gobeepawec. <sup>11-12</sup> Aime madec yeke mi fikelu gaeboccka yeke aibabanginec madicne me sowacne monic mi fikewec. Dameng iwa Wapongti yekele ailu Rebeka yanguc biyachac edowec,

“Haedi gbale kwelec kwedaicte.”

(*Fike 25:23*)

Wapong ye ngic monic boleinele ailu mi bawosaedaicte, ye angacine nga ngage-ngageinele ailu ngic-ngigac wacebacaigac, yogo sanangnehac domanale ye inguc aiwec. <sup>13</sup> Ilec yanguc kwelengkeicne fagac,

“Na Yakobole angacnugac. Nga Esaulebac takicnugac.”

(*Mal 1:2-3*)

<sup>14</sup> Ilec ailu wenuc minoga? Wapong ye yefe dondonne lilocaigac, me? Yogo miyachebang. Ye yowaine madicne micaigac. <sup>15</sup> Yedi Moses yanguc edowec,

“Na monicte kwele-sowac aiconogale ngagelu, ye kwele-sowac aiconodacte. Nga monicte umac bafickenogale ngagelu, ye bafickedacte.”

(*Wah 33:19*)

<sup>16</sup> Inguc aime Wapong ye yeicne kwele-sowacinele ailu ngic bawosaedaicte, yogo ngic ye yeuctihac angac bafuwanale me boletowa bawecte ailu inguc mi fikedaicte. <sup>17</sup> Wapongte hibiwa yowa yanguc kwelengkeicne fagac, yowa yogodi Isip yengele ngictau Farao yanguc edowec,

“Na tapiline gala lobe himongne himongne ngic-ngigac yenge nale tapili nganidaingte.

Ailu wacne mibong yegengkelu hikeme ngageyackeningte ailu, ga ngictau locgube nganicgudaingte.”

(*Wah 9:16*)

<sup>18</sup> I yangucte, Wapong ye ngic monic kwele-sowac aiconogale ngagegacka, ye yogo aiconodaicte. Ailu ngic monicte kweleine hefeme kwele-sanang ainogale ngagegacka, ye yogo kweleine hefeme kwele-sanang aidaicte.

*Hebec-baba ngic*

<sup>19</sup> Ilec ga nale yowa yogo ngagelu yanguc midamecte mecne, “Wapongte angac nga ngage-ngage hegilenogale yefe mi fagac. Aime yefe ingucne mi fadecka midec, yedi nongileng omale bikickolec wacnubacaigac?” <sup>20</sup> Himong-ngic, ga ngagegic, ga ngic sugu, inguc milu Wapongte yowa ameine omale bafaliyecnodamecte? Mole-hibi fileinedi wiyac monic bame wiyac moledi baicne, yogodi fileine nalic yanguc uwacnodaicte, me?

“Ga omale na inguc bacnugic?”

(*Yes 29:16; 45:9*)

Yowa inguc mi uwacnodaicte.

<sup>21</sup> Me hebec kudi-baba ngic ye angacinele bole nalic badaicte, ye himong gbakitic balu yogodi hebec monic bole madicnele badaicte. Nga hebec monic bole gocnele nalic badaicte, me? Oc, ye nalic badaicte.

<sup>22-23</sup> Hebec gocne yenge tapili nga hibi-angocnginengcolec ainingte Wapongti molickelu kwele-sowac aiyelelu bamadicebawec. Ngic-ngigac yenge yele tapili nga hibi-angocineholec nganiningte, ye angacinele inguc aiwec. Ye pasiine aalicka ngic-ngigac edalicedadaicte. Aime yenge yele tapili nganiningte hebec gocne yenge hesocebame dangkeningte alingka biyachac locebaicne domagaing. Aime yengele ailu tatakic mikac dameng dale wangecngineng gacaigac, ye nalic angacine balaihelu inguc hocne aidaicte.

<sup>24</sup> Yogo nongileng hocne yele tapili hibi-angocineholec nganinangte wacnubawec. Yogo

\* **9:8:** Abraham ye ngigac monickolec game kogoc fikewec, wacine Ismael. Aisak sugodi Wapongte mimipangka fikewec. Yogolec lobeina ngigac monic balu adu-madec gocne kweficebawec. Ilec ailu Ismael nga adu-madec gocne yenge ngambofocinebenang mi aigaing. **9:8:** Gal 4:23 **9:16:** Efs 2:8 **9:21:** Yer 18:6



Yuda ngic-ngigac sugu miyac, ye Israel yengele aling kacni miyac nongileng momoc wacnubawec. <sup>25</sup> Ye siduc-mimi ngic Hoseale hibiwa inguchac yanguc migac,

“Ngc-ngigac aling gocne yenge molickelu nale ngic-ngigac mi gaibong, yenge nale ngic-ngigac, inguc wacebadacte. Aime ngic-ngigac gocne yengele mi angacnuwec, na ngic-ngigac yogo yengele angacnudaicte.” (Hos 2:23)

<sup>26</sup> “Aime Wapongti yengele yanguc miwec, ‘Ngenge nale ngic-ngigac miyac.’ Ailu himong iwahac yanguc wacebadaicte, ‘Ngenge Wapong gagaineholec yele adu-madecfocine.’” (Hos 1:10)

<sup>27</sup> Yesaiyadi Israel yengele ngagelu yanguc wackelu miwec,

“Israel ngic-ngigac yenge dzalengineng sugucnehacbenang yogo kiwecte dingong ingucne aidaictewa, na sifu yengelacni nebocine efecnemac olocebabe wasecne aidaingte.

<sup>28</sup> Sugucnedi himongka ngic-ngigac yowangineng biyachenang wosaelu mimoctolu boleine bamoctodaicte.” (Yes 10:22-23)

<sup>29</sup> Aime Yesaiyadi wiyac lobewa fikenale yowa yanguc biyachac miwec,

“Sugucne Tapilitowa Fileine, yedi ngesa-ngambofocnonggeng nebocine gocne olocebame wasecne mi aidabongka midec, nongileng Sodom nga Gomora yenge ingucne miyac aidabeng.” (Yes 1:9)

*Ngage-ngagesingnineng hegileibong*

<sup>30</sup> Ilec wenuc minoga? Israel yengele aling kacni miyac, yenge dondonne ganingte bole sanangne monic mi baibong. Ailu gacgu gaga dondonne bafuwaiwong. Yenge ngagesingkeibong. Ilec ailu Wapongti dondonne wacebawec. <sup>31</sup> Aime Israel ngic-ngigac yengebac yefe-yowadi gaga dondonna locebanale bole sanangne balu gaibong. Bagalu yefe-yowawa yefe gaga dondonne mi bafuwaiwong. <sup>32</sup> Omale mi bafuwaiwong? Yenge aibabanginengte ngagesilu ngage-ngagesingte noine yogobac hegileibong. Yenge posa kwopocebame wawecebawec, yogo Kristole silic ingucne. <sup>33</sup> Ilec Kristole yanguc kwelengkeicne fagac,

“Ngagegaing, na Sion kupicka<sup>†</sup> posa monic lobe ngiyeme yenge iwa edebong kwopocebame wawelu ngage-sowac bafuwadaingte. Aime monic ye ngagesingkedaictewa, ye mi gameedaicte.” (Yes 8:14; 28:16)

## 10

*Kwele-madicte yefe lowec*

<sup>1</sup> Ngic hae-gbafozne, Wapongti Yuda ngic-ngigacfozne bikicte ameine bame wasecne aidaingte, yogolec kwele-angacka ngagepangkelu ye milockegabac. <sup>2</sup> Aime na yengele mibasanang ailu yanguc migabac, yenge Wapongte kwelec kwenogale dogbac sanangnehac aicaigaing. Aime ye kwelec wenuc kwecnodaingte, yogolec ngage-ngage-motoc mi fayelegac. <sup>3</sup> Ailu yenge yengungtihac yefe dondonne bafuwanogale boleine bacaigaing. Aime Wapongti yefe monic bafuwalu ngic-ngigac dondonne wacebacaigac, yefe yogo mi ngagegaing. Inguc ailu yenge Wapongtacni gaga dondonne fagac, yogolec bagewa ganingte hegileicaigaing. <sup>4</sup> Kristo ye yefe-yowale boleine bamoctowec. Ilec ailu ngic-ngigac ye ngagesingkeicaigaing, yenge sasawadi gaga dondonne bafuwadaingte.

*Kristo ye madicnenonggeng*

<sup>5</sup> Mosesdi yefe-yowale yefe dondonne gaga yogolec yanguc kwelengkewec fagac, “Monic ye yefe-yowa sasawa balaibedaicte, ye yefe iwa gagaineholec ailu gadaicte.” (Dep 18:5)

<sup>6</sup> Aimebac Wapongti ngage-ngagesingnonggengte ailu dondonne wacnubadaicte, yefe yogodi yanguc migac,

“Gageuctihac kwelegonedi yanguc mi uwanagudamec, madi honocmengka fedaicte?” (Yef 30:12)

Yogo Kristo honocmengkacni bawanogale ngagelu migac. <sup>7</sup> Me yanguc,

“Madi long sugucnebenang iwa haudaicte?” (Yef 30:13)

Yogo Kristo homackacni balu ofenogale ngagegac. Inguc monic mi ngagedaing.

<sup>8</sup> Ilec gale yowa yanguc miicne fagac,

“Wapongte yowa yogo emenginang, nga micnginang, ailu kwelenginang fagac.” (Yef 30:14)

Aime ngage-ngagesingte yowa yogo hocne edocebalu weduyelecaigabeleng. <sup>9</sup> I yangucte, ga micgonedi Yesu ye Sugucne, yogo miyengka yegengkedaictewa, nga Wapongti

<sup>†</sup> 9:33: Sion kupic yogo Yerusalem iwa domagac. Ilec ailu dameng gocna Yerusalem ngic-ngigac yengele ngagelu Sion kwelengkeibong.

Yesu homackacni bagbolyiwec, yogo kwelewa ngagesingkedamectewa, Wapongti bikicte ameine bame wasecne aidamecte. <sup>10</sup> Nongileng kwelenonggengti ye ngagesingkebeg, yedi dondonne wacnubadaicte. Ailu micnonggengti yele mibeng yegengkeme, yedi bikicte ameine bame wasecne aidabelengte. <sup>11</sup> Wapongte hibidi yogolec yanguc migac,

“Monicti ye ngagesingkedaicte, ye mi gameedaicte.” (Yes 28:16)

<sup>12</sup> Aime Yuda ngic-ngigac nga Grik ngic-ngigac yeke silicnginec monic-monic mi aigac. Sugucne ye sasawa nongileng Sugucnenonggeng. Aime ngic-ngigac yenge yedi baficebanale wackecaigaing, yenge kwele-madicka wiyac haicine monic-monic nalic yeledaicte.

<sup>13</sup> Aime

“Ngic-ngigac yenge Sugucnele wac wackebong, yedi bikicte ameine bame yenge sasawa wasecne aidaingte.” (Yol 2:32)

<sup>14-15</sup> Monic saleibongka yedi Wapongte yowa nalic edocebalu weduyeledaicte. Aime Wapongte yowa edocebalu weduyelewecka nalic ngagedaingte. Aime ngageibongka nalic ngagesingkedaingte. Aime ngagesingkeibongka yenge Sugucnele wac nalic wackelu wasecne aidaingte. Ilec yanguc kwelengkeicne fagac,

“Ngic yogo yenge Siduc Madicne balu kwesibong, ngic-ngigac yengi yengele hige ucine kwele-madicka ngagedaingte.” (Yes 52:7)

*Israel yenge Siduc Madicne ngagelu hegileibong*

<sup>16</sup> Aime Israel ngic-ngigac yenge Siduc Madicne ngageibong, yengelacni bocyacti mi balaibeibong. Yesaiyadi yanguc miwec,

“Sugucne, nonge siduc mibeng yengkewec, ngic weni yengi ngagesingkeibong? Yengelacni efecnedi sugu ngagesingkeibong.” (Yes 53:1)

<sup>17</sup> Inguc ailu Kristole yowa mibeng yegengkeme, yenge yowaine ngagecaigaing. Ailu yowa yogo ngagelu ngagesingkedaingte.

<sup>18</sup> Aime Israel yengebac yowaine hedecnginengti mi ngageibong, me? Inguc miyac, yenge biyachac ngageibong. Wapongte yowa yanguc kwelengkeicne fagac,

“Yowa-malacine yogo himongka hikeyackewec. Yenge yowanginengti himongtowa yagowa nebec nga nebec moto-motoina hikeyackewec.” (Mige 19:4)

<sup>19</sup> Ilec ailu hatacmac mibe, Israel ngic-ngigac yenge yowaine kwelenginengti ngagemotoibong, me? Mosesdi Wapongte mic balu yogolec yanguc miwec,

“Na ngengela pasi babe ngenge ngic-ngigac aling monic himong monickacni yengele hasowac aidaingte. Ailu aling monic ngage-ngage-motocngineng mikac, ngenge yengele aalic ngagedaingte.” (Yef 32:21)

<sup>20</sup> Yesaiyadi Wapongte mic balu hangoc mikac yogolec taockelu himongne himongne ngic-ngigac yengele yowa yanguc miwec,

“Ngic-ngigac yenge na mi basacnulu moc bafuwacnuibong. Ailu nale mi uwalu gaibong, yengela fikeiba.” (Yes 65:1)

<sup>21</sup> Aime hatac Wapongte mic balu Israel ngic-ngigac yengelebac yanguc miwec,

“Ngic-ngigac aling monic yowane mi balaibecaigaing, ailu yowa kwekwe gacaigaing, yenge nala kwesiningte ailu, hadengsoc molene sungkecaigabac.” (Yes 65:2)

## 11

*Wapongti Israel bacebadaicte*

<sup>1</sup> Ilec ailu yanguc ngagelu uwagabac, Wapongti Israel ngic-ngigac focine biyachac hegilecebawec, me? Yogo miyac! Naneicne Israel ngic Benyaminte alingacni, ailu ngambononggeng Abraham yelacni. <sup>2</sup> Wapong ye ngic-ngigac focine biyachac bawosaecebalu mi hegilecebawec, miyac. Aime Elaiya ye Israel ngic-ngigac amengineng badunale Wapongte haicka yanguc milu milockewec, yogo Wapongte hibiwa kwelengkeicne fagac,

<sup>3</sup> “Sugucne, yenge gale siduc-mimi ngicfocgone wehomacebaibong. Ailu gale alatagone hembalackeibong. Aime na moniyangti sugu gabe wecubong homabele ngagegaing.” (1Ngt 19:10,14)

<sup>4</sup> Ye inguc milu milockeme Wapongti ameine bafaliyelu yanguc edowec,

“Na ngicfocne 7 taosen biyachac sebicebalu bacebaiba gagaing. Ailu yenge siduc-gbong wacine Bael ye ketadi monic mi holecnoibong.” (1Ngt 19:18)

<sup>5</sup> Silicine ingucnehac Wapongti dameng yagowa Israel yengelacni nebcine kwele-madic aiyelelu bawosaecebame yeicne habu-hakic monic ailu gagaing. <sup>6</sup> Yedi bawosaecebalu

kwele-medicine yelewec, yogo yengileng aibabangineng madicnele ailu mi bawosaecebawec, miyac. Ye yengileng aibabangineng madicnele ailu bawosaecebadecka, ibac kwele-medicine yogo kwele-madic noine mi aidec.

<sup>7</sup> Ilec ailu yanguc fagac, Israel yenge wiyac banogale boletowa bagacgu yogolec noine monic mi bafuwaibong. Aime Wapongti ngic-ngigac yengele hewackacni bawosaecebawec, yengi sugu wiyac yogo bafuwaibong. Aime Israel nebocine yenge kwele-sanang nga kwele-fong ailu gaibong. <sup>8</sup> Yengele yowa monic yanguc kwelengkeicne fagac, "Wapongti pasi bame yenge asungineng gung kwomochenang fagac ingucne gaibong. Ailu dongenginengti wiyac monic mi nganiibong. Nga hedecnginengti wiyac monic mi ngageibong. Yenge ingucne gaibongti yakumac gagainghac." (*Yef 29:4; Yes 29:10*)

<sup>9</sup> Aime Dawididi yanguc miwec,

"Nosing nonogale aibabangineng aicaigaing, yogodi suba nga ufc ingucne bacebame bikicnginengte ameine aidaic. <sup>10</sup> Wiyac monic mi nganingengte yenge dongengineng pisickedaic. Ga damengsoc aiyeleengka lobengineng ngosockeicne gadabiyeng." (*Mige 69:22-23*)

<sup>11</sup> Na yanguc taockelu uwagabac, Israel yenge wawelu sowaleibong, me miyac? Yogo miyachenang. Yenge Wapongte yowa hegileibongte ailu Wapongti Israel yengele alingkacni miyac, yenge bikicte ameine bame wasecne aibong. Aime Israel ngic-ngigac yenge nganicebalu hasowac ainingte inguc aiwec. <sup>12</sup> Aime Israel yenge Wapongte yowa hegileibong, aibaba yogodi kwele-madicte wiyac bocyac bafuwame himongne himongne ngic-ngigac yengela hikeyackewec. Aime Israel yenge Wapongte yefe hegilelu waweibong, yogodi Israel yengele alingkacni miyac, yenge wiyac madicne bocyachenang bafuwayelewec. Gacgu, Israel ngic-ngigac homacnedi ngagesingkedaingte, dameng iwa kwele-madicte wiyac feicnebenang fikedaicte.

#### *Israel yengele alingkacni miyac*

<sup>13-14</sup> Aime Israel yengele alingkacni miyac gagaing, ngengele yanguc migabac, naneicne socte alingfocne Israel yenge ngengele hasowac aidaingte. Ailu gocne yenge yefe iwa ngenge ingucne bikicte muckacni lukecebame wasecne aidaingte. Inguc fikenale ngagelu nani ngengele salecebaicne aiiba. Ailu hole balu gagabac, yogolec ngagebe feicnebenang aigac. <sup>15</sup> Wapong ye Israel lobe holecebalu hegilecebawec, yogolec himong sasawa ngic-ngigac yenge Wapongkolec kwele-moniyang bafuwaibong. Inguc fadaicetewa, Wapongti Israel hatacmac bacebame, homaicne yenge gboliyelu gaga badaingte.

#### *Oliwa yoc*

<sup>16</sup> Ngenge nosing molickelu nebocine balu Wapong lacnodaingtewa, nosing sasawa fagac yogo momochac yele bingec aidaicte.\* Ailu yoc godocine yele bingec aidaicetewa, mangngine sasawa yenge inguchac yele bingec aidaingte.

<sup>17</sup> Wapongti oliwa noinele mangngine gocne welockelu baickekewec yogo Israel ngic-ngigac nebocine. Yogolec macina, ga kate oliwa mangnginebenang aigamec, yogo Israel yengele alingkacni miyac ingucne. Aime mangngine kpisicne monic welocgulu oliwa noina taocguwec. Aime ga mangngine noine yengeholec gagicka yanguc aidaicte, ga yoc godocineholec taocke-galu helocgone iwacni fuluckelu gadamec. <sup>18</sup> Inguc aigacte, ga soc bafefe ailu mangngine nebocine yengele yanguc mi ngagedamec, "Nani yenge ewalicebagabac." Ga soc bafefe aidamecetewa, yanguc ngagedamec, ga yoc mangngine sugu, gagi yoc godocine mi ailu domagamec, yoc godocinedi domame ga domagic. <sup>19</sup> Inguc mibe gagi yanguc midamecne mecne, "Ye na hocne yocka taocnunogale mangngine gocne welockewec." <sup>20</sup> Entacka yanguc midamecne, "Yenge mi ngagesingkeibongte ailu welocebawec." Aime ga ngagesingkeicte ailu sanangne domacaigichac. Ilec ngage-ngagegona soc bafefe mi aidamec. Ailu hangocgume gadamec. <sup>21</sup> Wapongti yoc noinele mangngine mi olocebawecka, ga inguchac nalic mi ologudaicte.

<sup>22</sup> Ga Wapongte pasi madicne nga pasi dacine sanangnehac fagac, yogo momochac ngani-motodamec. Ye ngic-ngigac ngage-ngagesingngineng mikacte waweibong, yenge dacineholec sanangnehac aiyelewec. Nga gabac pasi madicne aigelewec. Ga yele pasi madicnele bagewa mi gadamecetewa, ga inguchac welocgudaicte. <sup>23</sup> Aime mangngine tofaine ngage-ngagesingngineng mikac, yenge hefaliyelu ngage-ngagesingkolec aidaingtewa, ye yocka hatacmac taocebadaicte. Yogo yanguc, Wapong ye yocka hatacmac taocebanale nalic mi kpungkedaicte. <sup>24</sup> Ga katele oliwa mangngine kpisicne, yogo helocgulu oliwa yoc noine monic gale aling mi aigac, yeholec taocgunale mi umaledaicte.

**11:6:** Gal 3:18    **11:11:** Sale 13:46    \*    **11:16:** Ye brette migac. Yogolec yowa yagowa fagac, Himong kisiwa 15:17-21. Nosing fuli balu Wapongte ibu lonoga, yogolec yowa yagowa fagac: Wahikeicne 23:19; 34:22; Depec-baba 2:12,14; 23:10,17,20; Himong kisiwa 18:12; 28:26; Yefe-yowa 26:2,10.    **11:17:** Efs 2:11-19    **11:22:** Yoa 15:2,4

Ilec ailu oliwa yoc noine yeicne mangngine hatacmac taockenale bole yogo wiyac efecnebenang aidaicte.†

*Wasec aidaingte*

<sup>25</sup> Ngic hae-gbafocne, nenge ngengileng ngagebong feicne aidaickale ailu, yowa monic sangke-sangke fagac, yogo ngageningte ngagegabac. I yanguc, Israel nebocine yengele kwele ngage-ngageningte yogo fongkelu faemewa, Israel yengele alingkacni miyac, nenge dzalengineng miwec yogo fecgu bafuwadaingte. Dzale yogo aimebac, Israel ngic-ngigac tofaine inguchac felu taockedaingte. <sup>26</sup> Inguc aime Sugucnedi Israel sasawa yenge bikicte muckacni lukecebame wasecne aidaingte. Ilec yowa yanguc kwelengkeicne fagac, “Asa-baba ngic ye Sionkocni wame, Yakobole aling sasawa yenge Wapong lobe holecno-caigaing, yengele aibaba sowacne sasawa yogo baickedaicte.”

<sup>27</sup> “Aime nale dodofic yengeholec fagac. I yangucte, nani bikicngineng baickedacte.” (Yes 59:20-21; 27:9; Yer 31:33,34)

<sup>28</sup> Siduc madicne kwesime Israel yenge Wapongkolec ngaba ailu gagaingte nenge yefe bafuwaibong. Aime Wapongti yenge bawosaecbalubac Abraham ngambofocine yengele mipangkwecte ailu kwele-angac aiyelelu gagac. <sup>29</sup> Wapongti ngic-ngigac wacebalu kwele-madicte wiyac yelelu, hatacmac mi ewalicebacaigac, ye pasi yogo mi facnogac, miyac. <sup>30</sup> Ailu Israel yengele alingkacni miyac, nenge molickelu Wapongte yowa wewe gaibong. Aime yakumachac Israel yengi yele yowa wewe gaibongte ailu, Wapongte kwele-sowac ngengele fikewec fagac. <sup>31</sup> Yenge molickelu Wapongte yowa weibongte nenge Wapongte kwele-sowac baibong. Aime Wapongti yanguc lowec, nenge kwele-sowac yogo bapongka yenge inguchac yogo badaingte.

<sup>32</sup> Wapongti lobewa ngic-ngigac sasawa kwele-sowac aiyelenale ngic-ngigac sasawa yowa wewengineng yogolec mucka locebayackewec.

*Wapongte wac mitengkedabeleng*

<sup>33</sup> Oc, Wapongte aibaba madicne lifuc ingucne fagac. Aime ngage-ngage-motocine nga ngage-ngageine yogo sugucnehac ailu gbolongne.

Aime yelemimocno-mimocnole fungine nga pasiine yogo nongileng ngage-ngage ewaligac.

<sup>34</sup> “I yangucte, madi Sugucnele ngage-ngage ngagewec?

Ilec monicte ye ngage-ngage nalic mi lacnodaicte.”

(Yes 40:13)

<sup>35</sup> “Ailu monicte molickelu Wapong wiyac monic lacnowecka, ye yogolec ameine baducnodaicte, me?

Yogo miyachenang.”

(Yop 41:11)

<sup>36</sup> Wapong ye yeuctihac wiyac sasawa bafuwayackewec.

Yogo yeicne tapiliwa fayackegac, ailu yeicne angacka fikenale loicne.

Yela wac feicne nga mimi-madic yogo inguc fafegidaic, yogo foinac.

## 12

*Asule bole balu ganoga*

<sup>1</sup> Inguc aime ngic hae-gbafocne, Wapongti kwele-sowac sugucnehac aingelewecte mibe yegengkeme yowa sanangne yanguc edocngebagabac. Nenge Wapong haicina afeelu kwelec kwecnolu socnginengti depec ingucne lodabiyeng, yogodi gagaineholec Wapongte bingec aime ye ngageme madickedacite. <sup>2</sup> Nenge dameng yagolec ngic-ngigac yengeholec momochac aibabangineng silicine moniyang mi aidaic. Wapongti kwele ngage-ngageningte hole-gboliyengeleme nenge Wapongte angac ngage-wosaec aidaing. Ailu yedi wiyac dondonne bucbuchac nga madicnebenang yogo ngageme madickegac, yogolec silicina nalic ngage-motudang.

*Kwele-madicka wiyac ayeledaing*

<sup>3</sup> Wapongti kwele-madic aineleme, na yogolec silicina nenge sasawa moniyang moniyang yowa yanguc edocngebagabac. Gageicne wosaechagulu gocne ewalicebacte mi ngagedamec. Ailubac gageicne dondonne wosaecnagudamec. Wapongti ngageningesingte maaine gelewec, yogolec silicina balaibedamec.

<sup>4</sup> Soc ye bucbuchac moniyang aigac, yogolec kwelina hodoc donge-hedec, nga higemolenonggeng fagaing. Ailu yenge bolengineng moniyang sugu mi bacaigaing, miyac.

<sup>5</sup> Silicine ingucnehac nongileng bocyac ailu Kristoholec wetackelu soc moniyang aiyackegabeleng. Ailu nongileng sasawadi filesoc filesoc ngic-ngigac yengele agofocngineng aigabeleng.

† 11:24: Yoc noine hucineholec yogo didimang yengi yefe iwa balu taockecaigaing. 11:33: Yes 55:8-9 11:34: 1Kor 2:16 11:36: 1Kor 8:6 12:1: Rom 6:11,13; 1Pi 2:5 12:3: 1Kor 12:11; Ef 4:7 12:4: 1Kor 12:12,27

<sup>6</sup> Wapongti kwele-medicine nolewec, yogolec silicina kwele-madicté wiyac silicine monic-monic nolewec, yogo fanolegac. Wapongti kwele-medicinele ailu monic Wapongte siduc-yowa minogale lacnowecka, ye ngage-ngagesing facnogac, yogolec silicina balaibelu midaic. <sup>7</sup> Aime Wapongti ngic me ngigac monic baficebanale kwele-madicté wiyac lacnowecka, ye babaficte bole hocne badaic. Nga monic ye kwele-madicté wiyac wewedu bolele facnogacka, ye yogolec silicina ngic-ngigac weduyeledaic. <sup>8</sup> Monic ye ngage-ngagengineng kwefangkeli mibasanang aiyelenale kwele-madicté wiyac facnogacka, ye boleine yogolec silicina balu gadaic. Nga monic ye kwele-madicté ngic-ngigac wiyac haicine monic-monic moc yelecaigacka, ye wiyac yogo umacnehac yeledaic. Nga ngic-ngigac micne galu bole yogo bacaigacka, ye sanangkelu boleine yogo badaic. Nga kwele-sowac ngagelu ngic-ngigac waweweine baficebanale bole bacaigacka, ye kwele-madicka nga angacka ngic-ngigac baficebadaic.

*Aibaba madicne aiyeledabiyeng*

<sup>9</sup> Ngenge kweledi angac ngagenagugabiyeng, yogo kwesac mi ainagudabiyeng. Ngenge aibaba sowacne kweledi wickelu lobe holecnolu aibaba madicne sanangkelu ailu gadaing. <sup>10</sup> Aime ngenge ngic hae-gbafocngineng yengele kwelenginengti angac ngageyelebong yenge ngengele feicne ainingte ngagelu alang bayeledabiyeng. <sup>11</sup> Ailu ngenge tatakic mikac bole sanangne banogale gabong Asudi kwelengineng kwefangkeme, ngenge Sugucnele kwelec kwelu gadabiyeng. <sup>12</sup> Aime Wapongti wiyac fikengelenale miwec, yogo fikengeledaicté, ngenge inguc ngagelu beliyelu wangec gadaing. Aime doicte damengka galu sanangne domalu damengsoc mamang hidulu milockelu gadabiyeng. <sup>13</sup> Ailu Wapongte bingec yenge wiyac monicte kpungkebong, ngenge umacngineng ngagelu wiyac yeledabiyeng. Nga mac monicacni ngic-ngigac gocne yengi kwesibong, ngenge hefolecebalu macka locebalu damongebanogale aingeledaic.

<sup>14</sup> Ailu ngic-ngigac yengi weyebic aingelebong, ngengi yenge mimi-madic milu edocebadabiyeng! Ngenge mimi-madic milu edocebalu monic mi sawecebadabiyeng. <sup>15</sup> Ngic-ngigac beliyelu gacaigaing, ngenge yengeholec beliyedabiyeng. Ailu ngic-ngigac hiyacaigaing, ngenge yengeholec hiyadabiyeng.

<sup>16</sup> Ngenge kwele-moniyang gadaing. Ailu ngage-ngagengineng feicne ainale mi aingeledaic. Ngenge ngic-ngigac waweweine yengeholec gadabiyeng. Ngenge ngengileng ngage-ngagetowanginengkolec inguc mi ngagenagudabiyeng. <sup>17</sup> Ailu ngic-ngigac sowacne aingelebong, ngenge sowacne ameine mi baduyeledaing. Ngenge ngic-ngigac sasawa yengele hewacka aibaba madicne aiyeleningte ngagelu gadabiyeng. <sup>18</sup> Ngenge kwele-mogungkolec gagale tapili fangelegac yogo monicmi mi hedicngebagacka, kwele-mogungte yefewa ngic-ngigac sasawa yengeholec gadabiyeng. <sup>19</sup> Agofocne kwelenedi ngengele angac ngagegabac, aibaba sowacne aingelebong, yogolec ameine mi baduyeledabiyeng. Aime Wapongti aalicine baduyelenale sawaine loebongka, yeuctihac sowacnele ameine baduyeledaic. Ilec yanguc kwelengkeicne fagac,

“ ‘Sowacnele ameine badu-badu, yogo nale bole,’ Sugucnedi inguc migac.” (Yef 32:35)

<sup>20</sup> Ngengebac yanguc aidabiyeng,

“Ngabagone nosingte homame gagi nosing lacnodamec. Ailu misale aicnome gagi misa gumedamec. Ga inguc aiyengka, ye aibabaine sowacnele gameedaicte.” (Ynn 25:21-22)

<sup>21</sup> Ga gacgu sowacnedi bacgu wadaickale, sawaine mi locnodamec, ga aibaba madicne aiyengka, sowacnele tapili wadaic.

## 13

*Gamangte bole*

<sup>1</sup> Gamangfocnonggeng nga sugucnecfocnonggeng gagaing, nongileng sasawa yengele bagewa galu yowangineng ngagelu gadabeleng. Bole-yowa tapiliineholec sasawa yogo Wapong yeuctihac yelecaigac, yenge yengungtihac mi fikeibong. <sup>2</sup> Ilec monic ye gamangfocnonggeng yengele yowa hegilegac, ye Wapongti yowa alingkelu lowec, yogo inguchac hegilegac. Aime ngic-ngigac yowa hegilecaigaing, ingucne yenge yengungtihac aibabanginengte ameine umac badaingte. <sup>3</sup> Aime gamangte bole-ngic yenge ngic-ngigac aibaba madicne aicaigaing, yenge hangoc mi bafuwayelecaigaing, miyac. Ngic-ngigac aibaba sowacne aicaigaing, yenge sugu hangoc bafuwayelecaigaing. Aime ga gamangte bole-ngic yengele hangoc mikac ganogale ngagegicka, aibaba madicne aiyengka, gamangte bole-ngic yengi ga mitenggudaingte.

<sup>4</sup> Ga madicne gacte ailu yenge Wapongte bole-ngic gagaing. Ailu yenge hudule fitec moc mi balu gagaing, ga aibaba sowacne aidamectewa, hangocgudaic. Yenge Wapongte mole-bafic ngicfocine galu Wapongte aalic bikic-baba yengela baduyeledaingte. <sup>5</sup> Aime aalic badu-badule bole yogo sugu miyac. Ngengungtihac kwelenginengti ngage-wosaec ainagubong gbagbacne aime yengele bagewa gadabiyeng. <sup>6</sup> Gamangfocnonggeng yenge Wapongte bagewa gamangte bole yogo hocne balu gacaigaing. Aime ngenge yogolec hocne takes lobong bacaigaing. <sup>7</sup> Ngenge takes-baba yenge takes yeledabiyeng. Ailu moneng-mafale takes mibong yogo yeledabiyeng. Ailu sugucnefocngineng yengele alang sugucnehac bacebalu micnefocngineng yenge alang bacebadabiyeng. Aime tofagonele ameine me alang-baba aiyelenogale miicne fagac, yogo sasawa aiyackedabiyeng!

*Yefe-yowa sasawa*

<sup>8</sup> Aime ngenge amengineng monic fagacka, yogo biyac badudabiyeng. Ngenge kweledi ago ainagulu angac ngagenagulu gadabiyeng, aibaba yogolec ameinebac moto-motoine mikac fagidaicte. Monic ye ngic-ngigac monicte kweleinedi ago aicnolu angac ngagecnolu gadaicte, ye yefe-yowa sasawa kpatulelu balaibedaicte. <sup>9</sup> Ung-yowa gocne yanguc fagac, "Ga selo-boic mi aidamec.

Ngic-ngigac mi wehomacebadamec.

Hise mi badamec.

Ngani-angac mi aidamec."

(Wah 20:13-15,17; Yef 5:17-19,21)

Ung-yowa yogo nga yefe-yowa gocne tofaine, yogo yowa moniyangte kwelina yanguc kpatuleicne fagac,

"Gageicne aigelecaigac, silicine ingucnehac ngic-ngigac gale emewa gagaing, yengele kwelegonedi ago aiyelelu angac ngageyelelu gadamec."

(Dep 19:18)

<sup>10</sup> Aime monic ye ngic-ngigac monic kweleinedi ago aicnolu angac ngagecnolu gadaictewa, ye nalic mi basowaledaicte. Inguc ailu kwele-angacka gaga yogodi yefe-yowa sasawa kpatulelu balaibedaicte.

*Damengtowa bangkalegac*

<sup>11</sup> Ngenge aibaba yogo bagalu dameng yagolec ngagelu efeckelu gadabiyeng! I yangucte, nonge molickelu Sugucne ngagesingkelu gaibeng, yogowa ngagesingkebang dameng dalicne ingucne fawec. Yakumacbac wasecne aidabelengte, yogolec dameng bangkalegac ngenge gungkacni gboliyelu fangedabiyeng. <sup>12</sup> Deboc biyac miyac ainale aigac, aime mac saenale aigac. Ilec nongileng kundungte aibaba hegilelu angocte maleku holelu gadabeleng. <sup>13</sup> Ailu wiyac wenacka aiaaine madicne, yogo balaibedabeleng. Nongileng misa sanangne nolu kwelengonggeng sifuweme gee wecaigabeleng, yogo mi aidabeleng. Nga selo-boic aibaba ailu aibaba kosaine haicine monic-monic, yogo mi aidabeleng. Ailu yuwenac nga hasowac ainagulu gaga yogo hegileyackedabeleng. <sup>14</sup> Kwele esecnele angacti ngengela fangkedaickale, ngenge socnginengte angac mi balaibedabiyeng. Ngenge Sugucnenonggeng Yesu Kristo maleku ingucne holelu gadabiyeng.

## 14

*Ngage-ngage yaeckangka ganogale yowa*

<sup>1</sup> Monic ye ngage-ngagesingkolec galu aibaba gocne wenuc ainale kwele-yaec ngage-caigac. Ngenge ngic yeicne ngage-ngage wosaelu mi mimoctodaing, miyac. Ngenge ye hefolebong hewacnginang game ye le angacngabadaic. <sup>2</sup> Gocne yenge Sugucne ngagesingkelu nalic nosing sasawa nocaigaing. Nga gocnedibac Sugucne ngagesingkelu kwele-yaec ailu yenge bole-kpiliwacni nosing sugu nocaigaing. <sup>3</sup> Ngic monic ye wiyac sasawa nocaigac, yedi monic nosing gocne mi nocaigacte ailu, ye ngage-sowac mi aicnodaic. Ailu monic ye nosing gocne mi nocaigac, yedi monic wiyac sasawa nocaigacte ailu, yogolec wosaelu mi mimoctodaic. Wapongti ye biyachac hefoleme angackewec. <sup>4</sup> Gagi ngic monicte kwelec kwekwe ngic ye le aibaba wosaelu mimoctocte tapili geleicne, me? Yogo miyac. Ye aibabainedi wosaeme wawedaicte, me sanangne domadaicte yogo sugucneinedibac nalic wosaedaicte. Ailu ngic yogo ye Wapongte kwelec kwekwe ngic sanangne domaemewa, Sugucnedi yogolec tapili lacnonale mi kpungkedaicte.

<sup>5</sup> Monic ye hadeng sasawa yengelacni hadeng monicte ngageme feicne aicaigac. Aime monictibac hadeng sasawa yogolec ngageme silicine moniyang aicaigac. Ngic-ngigac sasawa yenge filesoc filesoc yenge yengileng kwelenginengti ngage-motolu weni yogodi nalic aigac, yogo ngagepangkelu gadaingte. <sup>6</sup> Moniciti hadeng monicte ngageme feicne

aicaigac, ye Sugucne ngagesilu inguc aicaigac. Nga monic ye nosing sasawa nocaigac, ye Sugucne ngagesilu Wapong kwele-madic edolu nosing nocaigac. Aime monicti nosing gocne hegilecaigac, ye inguchac Sugucne ngagesilu Wapong kwele-madic edolu aicaigac. <sup>7</sup> Nongilangkocni monicti yeicne gagainele ngageme yogo yeicne hingec aigac, inguc mi fagac. Aime monicti yeicne ailu homadaicte, yogo monic mi fagac. <sup>8</sup> Nongileng gbolicne gadabelengtewa, yogo Sugucnele ailu ganoga. Nga homadabelengtewa, yogo Sugucnele ailu homanoga. Homadabelengte me gbolicne gadabelengte, yogo Sugucne yeicne aling gadabelengte. <sup>9</sup> Kristo ye gbolicne gagabeleng nga homaibong, sasawa nongileng Sugucne ganogale ailu homalu hatacmac gboliyelu gaga bawec.

<sup>10</sup> Ga omale ngic hae-gbagone aibabaine wosaelu mimoctodamecte? Me ga omale ngic hae-gbagone ngage-sowac aicnolu tapiliine bawadamecte? Yogodi nalic mi aigac. I yangucte, nongileng sasawa Wapongti yowawa locnubame domadabelengte. <sup>11</sup> Wapongte hibiwa yowa yanguc biyachac kwelengkeicne fagac,

“Sugucnedi yanguc migac, ‘Na gaga fileine. Ilec ngic-ngigac sasawa yenge nale haicka ketadi holeneledaingte. Ailu sasawadi Wapong gagac, yogo micti mibong yegengkedaicte.’”

(Yes 45:23)

<sup>12</sup> Inguc aime nongileng sasawadi domalu aibabanonggeng himongka aibeng, yogolec siduc filesoc Wapong milu edodabelengte. <sup>13</sup> Ilec ailu nongileng ngic hae-gbafocnonggeng yengele aibaba wosaelu mi mimoctodabeleng. Ailu nongileng ngic hae-gbafocnonggeng kwopocebame ngage-ngagesingka wawedaingkale, gagale yefewa aibaba yogo yoc me okac ingucne monic mi lodabeleng, nongileng yogo wosaelu ngagedabeleng.

#### *Ngic hae-gbafocnonggeng yengele angacngebadaic*

<sup>14</sup> Aime Sugucne Yesuholec wetacke galu ngagepangke-benangkelu yanguc ngagegabac, nosing me wiyac monic yogo yeuctihac wonongkolec mi aigac. Aime sifu monicti wiyac monicte ngageme wonongkolec aigac, inguc ngagesidaicte, ngic yela nosing me wiyac yogo wonongkolec aigac. <sup>15</sup> Aime gagi nosing monic noengka, ngic hae-gbagone monicti yogolec kwele-umac bafuwagacka, ga kwelegonedi angac yefeine mi balaibegic. Kristo ye ngic hae-gbagone yele ailu homawec, ye ga nosing nocaigic. Ilec ailu wawelu sowaledaickale, ga nosing yogo hegiledamec. <sup>16</sup> Ilec ailu ngenge Wapongte wiyac noine yogo madicne damongkelu gadaingtewa, gocne yengi ngengele wiyac madicne fagac, yogo yowa milu mi suledaingte. <sup>17</sup> I yangucte, nosing misa yogodi Wapongte ngani-damongte noine mi aigac. Kwele-mogung, nga gaga dondonne, ailu belic-belic Tili Asudi nolcaigac, yogodibac Wapongte ngani-damongte noine aigac.

#### *Kwele-moniyangka ganoga*

<sup>18</sup> Aime monic ye Wapongte ngani-damongte yefe yogo balaibelu Kristole kwelec kwelecaigac, ye Wapongti ngagecnome madickedaicte. Aime ngic-ngigac yengi inguchac ye nganilu ngagebong nalic aidaicte. <sup>19</sup> Ilec nongileng kwele-mogung aibabawa baficnagulu basugulebeng sanangkenale baficnagudabeleng. <sup>20</sup> Ilec ga nosingte ailu Wapongte bole mi heuckedamec. Nosing nga wiyac sasawa yogo gbagbacne, yogo noine. Ailu nosing-nono aibabagone ingucnedi ngic hae-gbagone aicnong wawegacte ailu, ga aibaba sowacne aigic. <sup>21</sup> Ga sic me waining misa nocaigic yogodi ngic hae-gbagone kweleine basowaleme wawedaickale ailu, yogo hegilelu gaengka madickedaicte. Me aibabagonedi monic kweleine basowaleme wawedaickale ailu, ga aibaba yogo hegileng madickedaicte.

<sup>22</sup> Ailu ga wiyac gocne ngage-ngagegona ngageengka nalic aime, yogo ga geicnac Wapongte haicka ngageengka nalic aidaic. Aime ngic monic ye yeicne wosaecnagulu mi mimoctocnagugac, ye kwele-angackolec. <sup>23</sup> Ngic monic ye kwele-yaec ailu sifu nodaicte, ye yeicne wosaecnagulu mimoctocnagudaicte. I yangucte, ye nosing gocne ngage-ngageina ngageme nalic mi aidaicte. Aibaba gocne ngage-ngageina ngageme nalic mi aicaigac, yogo sasawa bikickolec.

## 15

#### *Kwele-moniyangka Wapong mitengkedabeleng*

<sup>1</sup> Ngic-ngigac Sugucne ngagesingkelu sanangne gagabeleng, nongileng ngic-ngigac kwele-yaec gagaing, yengele umac sanangkelu tengkedabeleng. Nongileng sugu madickenangte angac yogo mi ngagelu gadabeleng. <sup>2</sup> Ailu ngic-ngigac nongileng emewa gagaing, yenge madickelu Sugucne ngagesingkelu sanangne ganingte yengele angac balaibelu bamadicebadabeleng. <sup>3</sup> Kristo ye inguchac yeicne angacine balaibelu madickenale bole mi bawec, miyac. Ye pasi aiwec yogolec yanguc kwelengkeicne fagac,

“Hasowac aling yengi Wapong ga misulec aigeleibong, yogodi nale feiwa fewec.” (*Mige 69:9*)

<sup>4</sup> Wapongte hibiwa molickelu wiyac sasawa kwelengkeyackeibong, yogo nongileng edocnubalu wedunoleningte kwelengkeicne fagac. Yowa ngagebeng yogodi tatakic mikac basanangnubame domalu, wiyac fikenoleidaicte, yogo ngagepangkelu wangec gagabeleng. <sup>5</sup> Ailu Wapong ye tatakic mikac ngenge sanangkelu mibasanang aingelecaigac, yedi bafic-ngebame Kristo Yesule ngage-ngage balaibeibong ngage-ngagengineng moniyang aidaic. <sup>6</sup> Inguc ailu ngenge kwele-moniyangka ngengileng mic-walecka Sugucnenonggeng Yesu Kristole Wapong, nga Mamac wacine bafedaingte. <sup>7</sup> Aime Kristodi ngenge hefolecngelalu angackewecte ngenge inguchac hefolecngagulu angacngebadaic. Inguc aibong Wapong wac feicne badaicte.

<sup>8</sup> Na yanguc edocngebabagabac, Wapongti molickelu ngambofocnonggeng yengeholec yowa mipangkelu miwec. Aime Kristodi Wapongte yowa noine basanangkenogale soc tofangineng helockeicne yengele mole-bafic ngic aiwec gagac.

<sup>9</sup> Ailu Israel yengele alingkacni miyac, yenge Wapong kwele-sowacinele ailu wacine bafenogale Kristodi Israel yengele bole-ngic aiwec gagac. Ilec yowa yanguc kwelengkeicne fagac,

“Ilec na Israel yengele alingkacni miyac, yengele hewacka mitenggulu, geewa wacgone afeelu holedacte.” (*2Sm 22:50; Mige 18:49*)

<sup>10</sup> Ailu hatacmac yanguc migac,

“Israel yengele alingkacni miyac, ngenge yele ngic-ngigac alingfocine yengeholec momochac kpatulelu beliyedabiyeng.” (*Yef 32:43*)

<sup>11</sup> Ailu yowa monic hatac yanguc,

“Israel yengele alingkacni miyac, ngenge sasawadi Sugucne fendongkelu mitengked-abiyeng. Ngic-ngigac sasawa ngenge Sugucne afeedabiyeng.” (*Mige 117:1*)

<sup>12</sup> Aime Yesaiyadi taockelu yanguc miwec,

“Yesile fikesaweckacnidi gidec monicti fikedaicte. Fikelu Israel yengele alingkacni miyac, yengele ngictaungineng ailu damongebame yenge ye ngagesingkelu wangec gadaingte.” (*Yes 11:10*)

<sup>13</sup> Na yanguc milockegabac, Wapongti gaga-sanangte mimipang lowec, ye ngagesingke-bong yele belic-belic nga kwele-mogung bucbuchac bawakengeleidaic. Yogo bawakengeleme Tili Asule tapilidi basananggebame gaga-sanangte mimipangti kwele ngageningang saweyackeme wangec gadaing.

#### *Boleinele fungine*

<sup>14</sup> Ngic hae-gbafočne, ngenge ngengungtihac aibaba madicne nga ngage-ngage sawa yogodi wakengeleme ngengileng sawang-yowa nalic ngic-ngigac weduyelegaing. Aibabangineng ingucne fagac, yogo ngagepangke-benangkegabac. <sup>15</sup> Na inguc ngagelu hangoc mikac galu kwelenginang kwefangkebe yowa biyachac ngageibong, yogo gocne kwelengkegabac, yogo Wapongti kwele-madic nelewecte kwelengkegabac. <sup>16</sup> Inguc ailu Kristo Yesule bole-ngic gagac. Galu Israel yengele alingkacni miyac yengele hewacka Wapong yeicne bole balu yele Siduc Madicne mibe yegengkegac. Ilec ailu Tili Asudi Israel yengele alingkacni miyac yenge Wapongte bingec aibong depec ingucne fikeme yengele ngageme madickegac.

<sup>17</sup> Na Wapongte haicka Kristo Yesuholec wetackelu bole balu gagabac, yogo ngagebe feicnebenang aime migabac. <sup>18</sup> Kristodi bole neleme nani Israel yengele alingkacni miyac, yengela hikelu yele yowa milu boleine babe yowaine balaibeibong, yogo sugu mibe yegengkeyelegac. <sup>19</sup> Yogo Wapongte Asu yele tapiliwa fikewec, yele tapiliwa pasile maaine nga pasi mi ngani-nganiine nganilu yowaine balaibeibong. Na pasi ingucne Yerusalem nga Ilirikum prowins hewacnginac Kristole Siduc Madicne bahikelu lolickelu mibe yegengkelu saweyackewec.

<sup>20</sup> Monicti bosing biyachac wickewec, yogolec feina bole banogale mi ainelegac. Ilec ailu mac-himong gocna Kristole siduc mi ngageibong, yengela Siduc Madicne mime yegengkeme gaiba, yogolec ngagebe madickegac. <sup>21</sup> Ilec yowa biyachac yanguc kwelengkeicne fagac,

“Yele siduc monic mi mibong yegengkewec, aling yogo yenge ngani-motodaingte. Ailu ngic-ngigac hedecnginengti yele siduc mi ngageibong, yenge ngage-motodaingte.” (*Yes 52:15*)



*Roma ngic nganicebadaicte*

<sup>22</sup> Ilec ailu dameng bocyac bole yogodi yefena aka holeme ngengela mi fuiiba. <sup>23</sup> Aime yakumachac mac-himong nebec nga nebec iwa bolene biyachac bamoctobe motowec. Ailu hifa bocyac ngengela funogale biyachac angacnuwec. <sup>24</sup> Ilec Sepein himongka hikenogale fudacte, dameng iwa nganicngebangale ngagesilu gagabac. Ailu ngenge nganicngebalu ngengeholec iwa angacka gadabelengte. Motome iwacni Sepein himongka hikenogale mibe, ngengi na baficnuningte ngagelu gagabac.

<sup>25</sup> Aime dameng yakumachac Yerusalem hikelu Wapongte bingec iwa gagaing, yenge baficebalu wiyac yelenogale aigabac. <sup>26</sup> Wapongte bingec Yerusalem iwa gagaing, yengelacni gocne waweweine gagaing. Aime Masedonia nga Akaia habu yengi yengele kwele-sowac ngagelu kwele-moniyangte wiyac gocne baficebanogale kpaduckelu lonogale mi-bong. <sup>27</sup> Yenge inguc ainingte aiyelewec. Yerusalem habu yenge Asule wiyac madicne Israel yengele alingacni miyac, yengela botoc balu yeleibong. Aime yengele ame yogo fagachac. Ilec ailu yenge yengileng socte babafic, yogo baficebadaingte. <sup>28</sup> Inguc aime kwele-madicnginengte moneng yogo Yerusalem iwa bahikelu yeluru yefe yogo basanangkedacte. Yogo motome ngengela yefe fulu Sepein himongka hikedacte. <sup>29</sup> Aime ngengela fudacte, dameng iwa Kristole mimi-madic bucbuchac nala fame, yogoholec ngengela fudacte, yogo ngagepangkegabac.

*Yele milockeningte edocebawec*

<sup>30</sup> Ngic hae-gbafocne, nonge Sugucnenonggeng Yesu Kristoholec wetackebeng Asudi kwele-angacka gaga bafuwanolectaigac. Ilec ailu yanguc sanangne edocngebagabac, ngenge sanangnehac baficnulu Wapong yanguc milockedaing. <sup>31</sup> Yudeya himongka aling gocne Yesu mi ngagesingkecaigaing, yengele molewacni yedi na olcunuale milockedaing. Ailu na yenge baficebanogale wiyac gocne balu hikebe, Wapongte bingec Yerusalem iwa gagaing, yenge yogo nganilu kwelengineng madickedaicte, yogolec momochac milockedaing. <sup>32</sup> Inguc aibong Wapongti ngagem madickeme ngengela kwesi sulumelu belic-belicka ngiye-ngagelu nongileng momochac basanang-nagudabelengte.

<sup>33</sup> Wapong kwele-mogung fileinedi sasawa ngengeholec gadaic, yogo foinac.

**16***Fobe*

<sup>1</sup> Yeme-kwanonggeng Fobe, ye ngigac madicne yele yowa gocne migabac. Ye Yesule habu Kenkeria taonka gagaing, yengele mole-bafic aigac. <sup>2</sup> Ngenge Wapongte bingec aibabanonggeng balaibelu Sugucneholec wetackeningte ye hefolelu mac holecnodaing. Ailu yedi wiyac monicte kpungkeme, ngenge yogo bafuwalu lacnodaing. Ye ngic-ngigac bocyac baficebalu na inguchac baficnuwec.

*Wenac-madic yowa*

<sup>3</sup> Prisila nga Akwila yeke naholec nonge Kristo Yesule bole momochac bacaigabeleng. Nale wenac-madic yogo yekela lobe fume edocepadabiyeng. <sup>4</sup> Gocne yengi na wehomacnudaingkale aibong, yeke na baficnulu gaganginecte ngageboc mi aiiboc. Na kwele-madicne yekela logabac, yogo nani sugu miyac. Yesule habu sasawa Israel yengele alingacni miyac gagaing, yenge inguchac kwele-madicngineng logaing.

<sup>5</sup> Aime Yesule habu yekele macka kpaduckecaigaing, yengela inguchac nale wenac-madic yogo lobe fume edocepadabiyeng.

Aime kwelenedi Epenetus yele angac ngagegabac, ye inguchac nale wenac-madic lobe fume edodabiyeng. Yedi Asia prowinswa molickelu Kristoholec wetackewec.

<sup>6</sup> Ailu nale wenac-madic Mariala lobe fume edodabiyeng. Ye ngengele ailu bole sugucnehac balu gawec.

<sup>7</sup> Aime ngic-ngigac yaeckang, Andronikus nga Yunias, yeke nonge himongnonggeng moniyang, yekela nale wenac-madic lobe fume edocepadabiyeng. Yeke na ingucnehac muc-macka locepaibong. Aime salecebaicne hewacnginang gaboc yenge ngagebong yeke wacnginec feicne aime gagaing. Aime na Kristoholec mi wetackeiba, dameng iwa yeke yeholec biyachac wetackeiboc.

<sup>8</sup> Aime Ampliatu kwelenedi yele angac ngagegabac, ye Sugucneholec wetackegac, yela nale wenac-madic lobe fume edodabiyeng.

<sup>9</sup> Ailu Ubanus ye nongeholec Kristole bole bawec. Ailu Satakus kwelenedi yele angac ngagegabac, yekela nale wenac-madic lobe fume edocepadabiyeng.

- <sup>10</sup> Aime Apeles ye Kristole ngic noine inguc yegengkewec, yela nale wenac-madic lobe fume edodabiyeng.  
 Ailu Aristobulus golowacfocine yengela nale wenac-madic lobe fume edocebadabiyeng.  
<sup>11</sup> Ailu Herodion ye noke himongnonggec moniyang.  
 Ailu Nakisus golowacfocine Sugucneholec wetackelu gagaing, yengela nale wenac-madic lobe fume edocebadabiyeng.  
<sup>12</sup> Ailu Trifaena nga Trifosa, ngigac yeke Sugucnele bole balu gagabiyec, yekela nale wenac-madic lobe fume edocepadabiyeng.  
 Ailu Pesis kwelenedi yele angac ngagegabac, ngigac ye Sugucnele bole homacne ba-caigac. Nale wenac-madic yela lobe fume edodabiyeng.  
<sup>13</sup> Ailu Rufus ye Sugucnedi ngic yogo bawosaewec, ailu ye nenggacine momochac, yekela nale wenac-madic lobe fume edocepadabiyeng. Ailu yele nenggacti na nenggac ingucne ainelewec.  
<sup>14</sup> Ailu Asingkitus nga Felegon ailu Heremes nga Patobas, nga Heremas ailu ngic haegbafocnonggeng gocne yengeholec kpaducebalu gacaigaing, yengela nale wenac-madic lobe fume edocebadabiyeng.  
<sup>15</sup> Ailu Filologus nga Yulia ailu Nereus nga sengngine ngigac, ailu Olimpas nga Wapongte bingec sasawa yengeholec kpaducebalu gacaigaing, yengela nale wenac-madic lobe fume edocebadabiyeng.  
<sup>16</sup> Ngeenge sasawadi gbagbacne gagawa muducnagulu wenac-madic minagudaing.  
 Kristole habu sasawa, yenge wenac-madicngineng lobong ngengela fugac.

*Sawang-yowa*

<sup>17</sup> Ngic haegbafocne, ngic gocne yenge gulu-bauc ailu okac ingucne locaigaing, ngeenge ingucne yengele damong balu gadaing. Ailu ngeenge wewedu-yowa biyachac baibong, yogo yengi gacgu basowaledaingkale, yengeholec mi gadabiyeng. Yogo sanangnehac milu edocngabagabac. <sup>18</sup> Aling ingucne yenge Sugucnenonggeng Kristole kwelec monic mi kwecaigaing. Yenge socte angac nga ngage-angacngineng fikenale ngic-ngigac gocne ngage-wosaec mikac kwesacebagaing. I yangucte, yenge kwelengineng basifuwelu yowa madicne milu mic-holoc aiyelegaing. <sup>19</sup> Aime ngeenge yowa balaiibelu gagaing, ngic-ngigac sasawa yengi yogo biyachac ngagengeleibongte beliyegebac. Aime ngeenge aibabangineng madicne ngage-motoningte ailu, aibaba sowacne maikac gbagbacne ganingte ainelecaigac. <sup>20</sup> Wapong, ye kwele-mogung fileine, yedi dameng mi daliweme, Satang bawalu higengineng bageina lome edesockedaingte. Sugucnenonggeng Yesule kwele-madicti ngeengeholec fadaic.

*Wenac-madic yowa*

<sup>21</sup> Timoti, nale bole moniyangti wenac-madicine ngengela lome fugac. Aime Lukius nga Yasong ailu Sosipate yenge himong moniyangfocne, yengi inguchac wenac-madicngineng ngengela lobong fugac.

<sup>22</sup> Na Tetius, nani hibi yagowa Polle yowa kwelengkegabac. Na Sugucneholec wetacke gacaigabacti ngengela wenac-madicne lobe fugac.

<sup>23</sup> Gaiusdi Yesule habu sasawa nga na Pol, nonge momochac macina locnubacaigac, yedi ngeengele wenac-madic inguchac lome fugac. Ailu taonte moneng-damong Erastus, nga ngic haegbanonggeng Kwatus, yeke inguchac kwele-madicngineng loboc fugac.

<sup>24</sup> [Sugucnenonggeng Yesu Kristole kwele-madicti sasawa ngeengeholec fadaic. Yogo foinac.]\*

*Ngage-ngage-motoc fileine*

<sup>25</sup> Nongileng sasawadi Wapong wac feicne lacnodabelengte. Wapongti iwa hocne basananggebame sanangne domaningte yela tapili ingucne facnogac. Na Yesu Kristole Siduc Madicne mibe yegengkeme edocebalu gagabac. Aime Siduc yogo molickelu esecnehac sangke-sangke falu gawec. <sup>26</sup> Falu game, himongne himongne ngic-ngigac sasawa, yenge ye ngagesingkelu yowaine balaibening. Ilec ailu Wapong gaga-sanang fileinedi yeicne Siduc yogo milu siduc-mimi ngicfocine yeleme Wapongte hibiwa kwelengkeibong, Siduc yogo mibong yegengkewec. Yegengkeme yenge sasawa yowaine nalic ngagemotodaingte. <sup>27</sup> Wapong moniyangti ngage-ngage-motoc fileine. Aime nongileng Yesu Kristoholec wetackelu mimiteng nga wac feicne Wapongta lobong fagidaic, yogo foinac.

**16:13:** Mrk 15:21 **16:16:** 1Kor 16:20; 1Pi 5:14 **16:17:** Mat 7:15; Tit 3:10 **16:18:** Filp 3:19; 2Pi 2:3 **16:19:** Rom 1:8; 1Kor 14:20 **16:20:** Fike 3:15 **16:21:** Sale 16:1-2; 19:22; 20:4 **16:23:** Sale 19:9; 1Kor 1:14 \* **16:24:** Hibi esecne Poldi kwelengkewec, yogo nganilu iwacni kwelengkebong kwelengkebong ofewec, yengelacni gocne 16:24 iwa mi fagac. Ngic-ngigac yenge hibi kwelengkeicne yogo wosaelu nganibong Poldi mi kwelengkewec mecne. **16:25:** Efs 1:9; 3:5,9; Kol 1:26; Rom 1:5

## **Poldi Korin Habu Yengele Molic-molic Hibi Kwelengkewec**

### *Mimi-yegeng yowa*

Korin yogo taon sugucne monic wacineholec fawec. Taon yogo himong monic wacine Akaia nga Grik iwa fawec. Roma ngic-ngigac homacne nga Yuda ngic-ngigac gocne iwa gaibong. Ngic-ngigac bocyacti lec-welec ailu lanac-ganac ailu gaibong.

Molickelu Poldi Korin iwa Yesule Siduc Madicne mime yegengkeme ngic-ngigac gocne yenge Yesu ngagesingkeibong. Ye hifa moniyang nga nebocine inguc edocebalu weduyelewec (Salecebaicne 18:1-17). Yogolec lobeina lolickelu Efesas iwa hikelu gawec. Galu Pol ye ngageme Korin ngic-ngigac Yesu ngagesingkeibong, yenge ngaba ainagulu gocne socte ngani-angac balaibeibong. Ilec ailu Poldi hibi yago kwelengkewec. Yesu homackacni gboliyelu honocmengka feme hifa 26 ngama ingucne motome, hibi yago kwelengkewec.

### *Yowa yago hibi nebocina fagac*

1:1-9 Molic-molic yowa

1:10-4:21 Ngaba ainaguibongte kwelengkewec

5:1-6:20 Himongte aibaba sowacne ngagelu aibong

7:1-40 Ngawe-ngigacte yowa

8:1-11:1 Ngage-yaec mi ailu Kristo sugu ngagesingkeidaing

11:2-14:40 Ngic-ngigac ngage-ngagesingkolec yengele aibaba madicne

15:1-58 Kristo homackacni gboliyelu fangkewecte fungine

16:1-24 Yerusalemte ibu kpaduckenoga nga yowa moto-motoine

### *Hibile molic-molic yowa*

<sup>1</sup> Wapongti na Pol ngagenelelu Kristo Yesule salecebaicne wacnuwec, aime ngic haebanonggeng Sostenes, noki ngengele hibi yago lobec fugac. <sup>2</sup> Wapongti Korin taonka yeicne habu gagaing, ngenge Kristo Yesule ailu wacnebalu yeicne bingec bacngebame gagaing, Wapongte bingec ngengele hibi yago kwelengkulu longelegabelec. Ailu ngic-ngigac himong sasawa gagaing, yenge Sugucnenonggeng Kristo Yesule wac wacke-caigaing, yenge momoc Wapongti yeicne bingec bacebawec. Yesu ye yenge nga nonge momochac Sugucnenonggeng aigac. <sup>3</sup> Mamaconggeng Wapong na Sugucnenonggeng Yesu Kristo, yekele kwele-madic nga kwele-mogungtowadi ngengela fadaic.

### *Wapongte kwele-madic*

<sup>4</sup> Wapongti Kristo Yesule ailu kwele-madic ainglewec. Yogolec ailu na damengsoc ngengele ngagelu Wapongne kwele-madic edolu gagabac. <sup>5</sup> Ngenge yeholec wetackelu gaebongka yedi wiyac sasawa bucbuchac ngelewec. Yowa mimi nga ngage-ngage-motoc gbolongne, yogo sasawadi fangelegac. <sup>6</sup> Kristole siduc mibeng yegengkeme edocngebaibeng, yogolec noine gaganginang fikeme nganilu gaibong. <sup>7</sup> Ilec ailu ngenge Sugucnenonggeng Yesu Kristo yegena fikelu yegengkenale wangep galu, kwele-madicte wiyac sasawa, yogolec monic mi kpungkecaigaing. <sup>8</sup> Ye yeuctihac basananggebame gaga dalicne gagaing. Gaebongka dameng motome, ngenge Sugucnenonggeng Yesu Kristole damengka kpokpolic mikac domabong yowawa nalic mi locngedaicte. <sup>9</sup> Wapongti Madicine Sugucnenonggeng Yesu Kristoholec kwele-moniyangka momochac taocngabanale wacnegebawec. Ailu ye yowa mimiine balaibegac.

### *Habu siyeckeibong*

<sup>10</sup> Ngic hae-gbafocne, na Sugucnenonggeng Yesu Kristole wacka ngage-ngagengineng sanangne yanguc edocngabagabac, ngenge sasawadi ngage-ngagengineng hole-ngagac ailu kwele-moniyang galu habu mi siyeckedaing. <sup>11</sup> Ngic hae-gbafocne, Kaloele mackacni yengi ngengele yanguc edocnubong ngagebe yegengkewec, "Yenge hewacnginang siyeckelu yowanginengi fena wana ainagulu gagaing." <sup>12</sup> I yangucte, ngengelacni ngic gocne yengi yanguc micaigaing, "Na Polle ngic." Nga gocnedi yanguc micaigaing, "Na Apolosle ngic." Nga gocnedibac yanguc micaigaing, "Na Pitale\* ngic." Nga gocnedibac yanguc micaigaing, "Na Kristole ngic." Ngenge filesoc inguc micaigaing.

**1:8:** 1Tim 3:13; 5:23    **1:9:** 1Yoa 1:3; 1Tim 5:24    **1:10:** Filp 2:2    \* **1:12:** Grik yowawa Pita wacine monic Kefas fagac.    **1:12:** 1Kor 3:4; Sale 18:24-28

<sup>13</sup> Kristo heuckebong yaeckang aiwec, me? Yogo miyac! Yengi ngengele ailu Pol malicpongka weibong, me Polle wacka misa monic lowangeleibong, me? Yogo miyachebang. <sup>14</sup> Na ngengelacni monic misa mi lowacnoiba. Ilec ailu Wapong kwele-madic micnogabac. Krispus, nga Gaius yeke sugu lowayeteiba. <sup>15</sup> Ilec ailu monicti yanguc mi midaic, "Na Polle wacka misa lowaiba." <sup>16</sup> (Stefanas nga golowacfocine yengebac misa noine lowayeiba. Ailu taockelu gocne lowayeiba me miyac, yogo monic mi ngagegabac.) <sup>17</sup> Kristodi misa lowayelenogale mi salecnuwec, miyac. Yebac ngic-ngigac Siduc Madicne mime yegengkeme weduyelenogale salecnume kwesiiba. Ailu Kristole malicpongte yowa yogo tapili-wawa aidaickale, yowa yogo ngicte tapiliwa me ngic ngage-ngage-motocka mi midacte.

*Kristo ye Wapongte tapili nga ngage-ngage-motoc*

<sup>18</sup> Ngic-ngigac dac-sanangte yefewa hikegaing, yenge malicpongte yowa yogo ngagelu midelec yowa aicaigaing. Ailu Wapongti bikicte ameine bame wasecne aidabelengte, yogolecbac nongileng yanguc ngagesilu gagabeleng, malicpongte yowa yogo Wapongte tapili. <sup>19</sup> Wapongte yowa yanguc kwelengkeicne fagachac,

"Na ngic ngage-ngage-motocnginengkolec yengele ngage-ngage-motoc yogo welockebe miyac aidaicte. Ailu ngic ngage-ngageholec yengele ngage-ngage baickedacte." (Yes 29:14)

<sup>20</sup> Ngic ngage-ngage-motocine miyac aiwecte ye oma wiyac aidaicte? Nga yefe-yowale wewedu ngic yeke ngage-ngage miyac aiwecte ye oma wiyac aidaicte? Ailu ngic ye dameng yagolecte yowa bafac-tafalic balu micaigac, ye oma wiyac aidaicte? Wapongti himong yagolec ngage-ngage-motoc bafaliyelu kwele-sifucine bame yegengkewec. Ilec ngic ingucne yenge yowangineng mikac aigaing. <sup>21</sup> Aime Wapongte ngage-ngage-motoc ailu ngic-ngigac yenge himongte ngage-ngage-motockolec galu Wapong ngagecningte aibibiyeibong. Aibibiyelu Siduc Madicne misowalelu yowa yogolec kwele-sifuc yowa micaigaing. Wapongti ngic-ngigac ngage-ngagesingkolec yengele bikicte ameine bame wasecne ainingte miwec, yowa yogolec kwele-sifuc yowa miibong, ye pasi yogolec ngagem madickewec.

<sup>22</sup> Yuda ngic-ngigac yenge pasile maainele uwacnolu gagaing. Aime Grik ngic-ngigac yenge ngage-ngage-motoc gbolongne bafuwanoigale ayeleme gagaing. <sup>23</sup> Aime nongileng Kristo malicpongka webong homawec, yowa yogo edoebalu weduyelegabeleng. Aime Yuda ngic-ngigac yenge yogo ngagebong kwelenginang mi holeme okac ingucne kwopocebame wawecaigaing. Aime Grik ngic-ngigac yengi ngagebong yogo kwele-sifuc yowa aicaigac. <sup>24</sup> Aime Wapongti Yuda ngic-ngigac nga Grik ngic-ngigac wacebagac, yengelabac Kristo ye Wapongte tapili nga ngage-ngage-motockolec gagac. <sup>25</sup> Wapongte kwele-sifuc yowa ingucnedi ngic-ngigac yengele ngage-ngage-motoc ewalilu ngage-ngagetowaholec aigac. Nga Wapongte tapili-wawaine ingucnedi ngic-ngigac yengele tapilingineng ewalilu tapilitowaineholec aigac.

*Ngic-ngigac wacebaicne yogo bawosaecebawec*

<sup>26</sup> Ngic hae-gbafocne, ngenge silicine weningucne gacgubong, Wapongti wacgebawec, ngenge yogolec silicine ngagesidaing. Ngengelacni ngic sockapec ngage-ngage-motocnginengkolec yogo bocyac miyac. Ailu ngic-ngigac feicne yogo bocyac miyac. Ailu aling wac bingecnginengkolec yogo bocyac miyac. <sup>27</sup> Ngic-ngigac ngage-ngage-motocnginengkolec ngagenagugaing, yenge Wapongti gamewa locebanogale ngagewec. Inguc ngagelu ngic-ngigac yengele haicka himongte wiyac kwele-sifucineholec ayelecaigac, ngic-ngigac yogo bawosaecebawec. Ailu ngic-ngigac tapilinginengkolec ngagenagugaing, yenge Wapongti gamewa locebanogale ngagewec. Inguc ngagelu ngic-ngigac yengele haicka himongte wiyac tapili-wawa ayelecaigac, ngic-ngigac yogo bawosaecebawec. <sup>28</sup> Aime wiyac gocne feicne aigac micaigabeleng, yogo miyac ainale ye yanguc bawosaecebawec. Ngic-ngigac yengele haicka himongte wiyac wawaine aicaigac, nga wiyac yafoine micaigabeleng, ailu wiyac mikac monic mi fagac micaigabeleng, Wapongti yogo hocne bawosaecebawec.

<sup>29</sup> Aime monicti Wapongte haicka domalu yeicnele mime feicne aidaickale, ye inguc aiwec. <sup>30</sup> Wapongti ngagengelelu ngenge Kristo Yesuholec wetacgebame gagaing. Yedi Yesu saleme Wapongte ngage-ngage-motoc hewacnonggang balu kwesiwec. Balu kwesime nongileng Wapongte haicka dondonne nga yeicne bingec ainangte ye bikicte muckacni lukecnubawec. <sup>31</sup> Yogolec yowa yanguc kwelengkeicne fagac,

“Monic ye mime feicne aidaicte, ye Sugucnele mime feicne aidaic.”

(*Yer 9:24*)

## 2

### *Yesu Kristole siduc mime yegengkeyelewec*

<sup>1</sup> Ngic hae-gbafocne, naneicne ngengela fulu Wapongte ngage-ngage-motoc sangke-sangke fagac, yogo mibe yegengkewewec. Inguc milu yowa mime bafelu me ngage-ngagetowaholecte silicka yowa monic mi edocngebalu wedungeleiba, miyac. <sup>2</sup> Na ngengeholec galu yanguc sugu ngagesilu mibe sanangkewec, “Korin taonka galu Yesu Kristole siduc mibe yegengkedaicte, ailu ye wenucka malicpongka webong homawec, yogo sugu mibe yegengkedaicte.” <sup>3</sup> Na ngengela gaiba, iwa tapiline wame hangocnume dengdengnuwec. <sup>4-5</sup> Ngengele ngage-ngagesing yogo ngic ngage-ngage-motockacni lobong fame mi madickedaicte. Wapongte tapilidi sugu ngage-ngagesingninginang lobong fadaic. Ilec ailu Wapongte yowa mibe yegengkeme yowane angacineholec me ngage-ngage-motockolecti mi ewalicngewawec, miyac. Tili Asule pasile tapilidi yowane basanangkeme ngenge yogo nganilu ngegebong.

### *Wapongte ngage-ngage-motoc*

<sup>6</sup> Ilec ailu gocne ngenge biyachac sugule-sanang aibong, ngenge yowa ngage-ngage-motockolec edocngebaibeng. Aime yowa miibeng, yogo dameng yagolec ngage-ngage-motoc miyac, me dameng yagolec micne yengele ngage-ngage-motoc miyac. I yangucte, lobewa yogo gacgu miyac aiyackedaingte. <sup>7</sup> Aime Wapong ye himong mi fikeemewa ngage-ngage-motocine sangke-sangke yogo biyachac lome fawec. Fame ngage-ngage-motoc yogo nongele wac feicne bawosaewec, yogo hocne mibeng yegengkegac. <sup>8</sup> Dameng yagolec micne yengelacni monicti yele ngage-ngage-motocine yogo mi ngegebong, miyac. Yengele yogo ngagedabongka midec, yenge wac feicnele Sugucne, ye malicpongka nalic mi wedabong. <sup>9</sup> Yagolec yanguc kwelengkeicne fagac,

“Wapongti wiyac dongedi mi ngani-nganiine, nga hedecti mi ngage-ngageine, ailu ngic kwelewa mi ngage-ngageine, yogo alingkwec. Ailu ngic-ngigac weni yengi yele kwelengingti angac ngagegaing, wiyac yogo yengele bamockewec.” (*Yes 64:4*)

<sup>10</sup> Wapongti wiyac yogolec hocne ngagesilu Asuine saleme nongilang mime yegengkenoleme ngegebeng. Yedi wiyac sasawa ngani-ngagec ailu Wapongte ngage-ngage-gbolongne momoc ngani-ngagec aicaigac. <sup>11</sup> Gagi ngic monicti ngage-ngageina nalic mi ngagedamecte, miyac. Ngic yeicne asudi sugu yogo ngagedaicte, silicine ingucnehac monicti Wapongte ngage-ngagewa nalic mi ngagedaicte, miyac. Wapong yeicne Asudi sugu wiyac yogo ngagelu gagac. <sup>12</sup> Wapongti wiyac haicine monic-monic kwele-madicka nolewec. Aime nongileng yogo ngage-motonangte Asuine noleme baibeng. Himong yagolec gaga monic mi baibeng, miyac. <sup>13</sup> Aime Wapong wiyac nolewec, yogo hocne mibeng yegengkecaigac. Yowa yogo ngic ngage-ngage-motockacni mi milu gacaigabeleng, yogo Asule ngage-ngagewacni hocne balaibelu migabeleng. Nonge Asule yowa yogo Asule tapiliwa mibeng yegengkedaicte.

<sup>14</sup> Wapongte Asulacni Asule wiyac, yogo ngic monic ye himongte gagawa galu nalic mi badaicte. Yogo yedibac ngageme kwele-sifuc aibaba aigac. Asule wiyac yogo asuwa ngani-ngagec aigabeleng. Ilec ailu himongte gagawa gagac, ye Asule wiyac yogo nalic mi ngagedaicte. <sup>15</sup> Ngic monic Wapongte Asuholec gagac, ye wiyac sasawa ngani-wosaec aigac. Aime ngic monicti ngic yogo nalic mi ngani-wosaec aicnodaicte.

<sup>16</sup> Yowa yanguc kwelengkeicne fagac,

“Madi Sugucnele ngage-ngage ngagewecte ailu Sugucne weducnodaicte?” (*Yes 40:13*)  
Aimebac nongileng Kristole ngage-ngageholec gagabeleng.

## 3

### *Kwele esecnele gaga*

<sup>1</sup> Ngic hae-gbafocne, molickelu ngengela kwesiiba, iwa ngic Tili Asuholec gagaing, yenge yowa edocebacaigabac, ngenge yowa ingucne nalic mi edocngebaiba. Ngenge Kristoholec wetackelu dameng dalicne inguc gagaing. Aime sifu kogoc yengele silic ingucne gaebongka ngic-ngigac kwele esecne balaibebong edocebacaigabac, silicine ingucnehac ngenge yowa edocngebaiba. <sup>2</sup> Ngenge dameng iwa nosing sanangne nonolesoc mi aibongte, amuc sugu gumecngebaiba. Aime ngenge yakumac nosing sanangne nonolesoc mi aigainghac. <sup>3</sup> Ngenge kwele esecnele silicka gagainghac. I yangucte, ngenge hasowac ainagulu yowanginengti ngaba silicka yowa kwekwe ainagucaigaing. Ngenge inguc ailu kwele esecna galu ngicbenang yengele silicka gagaing, me? <sup>4</sup> Monicti yanguc midaicte,

“Na Polle ngic.” Aime monicti midaiacte, “Na Apolosle ngic.” Ngenge inguc mibong ngegebhe ngenge ngic yengele aibaba balaibegaing, me?

*Apolos nga Pol*

<sup>5</sup> Apolos ye maa? Nga Pol ye maa? Noke mole-bafic sugu aigabelec. Sugucnedi bole noteme noke yogolec silicka bole balu gagabelec. Balu gabec ngenge yowanonggec balaibelu ye ngagesingkeibong. <sup>6</sup> Nani wasec duwebe, Apolosdi wasec feina misa lowac-nowec. Aime Wapongti bole yogo balu basugulewec. <sup>7</sup> Ngic nosing duwecaigac, ye ngic omane. Nga nosing feina misa lowacnocaigac, ye inguchac ngic omane. Wapongti wiyac basugulecaigac, yeuc sugu feicne aigac. <sup>8</sup> Aime ngic wiyac duwecaigac nga ngic misa feina lowacnocaigac, yeke bolenginecte fungine moniyang aigac. Lobewa gagcu yeke bolenginecte fuli filesoc badabiyecte.

<sup>9</sup> Noke Wapongkolec bole balu gagabelec. Aime ngenge Wapongte nosing-bole ailu yele mac aigaing. <sup>10</sup> Wapongti kwele-madic ainelelu mac-babale ngage-ngage neleme yogolec ngic aiiba. Inguc ailu na yogolec silicina simeng-bosing alingkelu wickebe hauwec. Aime yogolec feina ngic gocne yengi taockelu mac bacaigaing. Ailu mac-baba ngic yenge bolengineng wenuc bagalu simeng feina mac taockelu bacaigaing, yogo filesoc filesoc wosaelu badaing. <sup>11</sup> Wapongti Yesu Kristo biyachac gunungkeme simeng-bosing ingucne domagac. Aime monicti yele mecina bosing monic wickeme haunale yefeine monic mi fagac.

<sup>12</sup> Aime monicti simeng yogolec feina taockelu Wapongte bole balu gadaicte, ye gol me siliwa me posa basufaleicne silicine madicne, me yoc me gimpodu, me langtedi badaicte. <sup>13</sup> Inguc badaictewa boleinele fungine yogo Sugucnele damengtowa iwa yegengkedaicte. Dameng iwa dacti bolenonggengte fungine filesoc filesoc esoickelu bame yegengkedaicte. <sup>14</sup> Monic ye mac bame dacti boleine yogo mi lobeme sanangne domadaictewa, ye bole yogolec fuli badaicte. <sup>15</sup> Nga monicte bole lobedaictewa, wiyacine yogo lokelu miyac aidaicte. Aime yeicnebac Wapongti dackacni baickeme wasecne aidaicte.

*Wapongte ibu-mac yogo yeicne bingec*

<sup>16</sup> Ngenge yanguc mi ngagegaing, me? Ngenge Wapongte ibu-mac, aime Wapongte Asudi ngengele kwele kwelina gagac. <sup>17</sup> Aime monicti Wapongte ibu-mac basowaleme, Wapongti ye inguchac basowaledaicte. Wapongte ibu-mac yogo yeicne bingec, aime ibu-mac yogo ngenge hocne.

<sup>18</sup> Monic yeuctihac mi kwesacnagudaic. Ngengele hewackacni monicti yeicnele ngagesilu dameng yagolecte ngage-ngage-motoc balu gadaictewa, ye himongte ngic yengele haicka kwele-sifucineholec aidaic. Inguc ailubac ngage-ngage-motoc noine bafuwadaicte. <sup>19</sup> Himong yagolec ngage-ngage-motoc yogo Wapongte haicka kwele-sifucineholec. Yogolec yowa yanguc kwelengkeicne fagac, “Wapong ye ngic ngage-ngage-motocngineng bafaliyeme yenge yengileng yowadihac hefecebadaicte.” (Yop 5:13)

<sup>20</sup> Ailu monic yanguc,

“Ngic-ngigac ngagebong ngage-ngage-motocolec gagabeleng, Sugucnedi yengele kwelewa ngage-wosaec yogo ngageyackegac. Ailu ngageme yengele ngage-ngage yogo boleine mikac aigac.” (Mige 94:11)

*Kristole ngic-ngigac*

<sup>21</sup> Ilec ngenge ngic monicte wac wackelu yeholec taockelu soc bafefe mi aidaing. I yangucte, wiyac sasawa yogo ngengele biyachac aiwec. <sup>22</sup> Yogo Pol me Apolos me Pita\* me himongtowa, me gaga, me homac, me wiyac monic biyachac loicne fagac, me lobewa fikedaicte, yogo sasawa ngengele babaficte wiyac. <sup>23</sup> Ailu ngenge ngengileng Kristole ngic-ngigac. Nga Kristo ye Wapongte ngic.

## 4

*Haicine monic-monic bayegengkedaicte*

<sup>1</sup> Nongileng Kristole bole-madecfocine. Aime yedi Wapongte ngage-ngage sangkeicne, yogo damongkenogale bole-yowa noleme bole yogo balu gagabeleng, ngic-ngigac yenge inguc ngagesidaing. <sup>2</sup> Monic ye damong bole balu gagac, ye bole-yowa balaibelu yefe mi lilodaic.

<sup>3</sup> Aime naneicne yanguc mibe, ngengi me ngic gocne yengi yowawa locnulu yowane wosaedaingte, yogolec ngagebe wiyac feicne mi aigac. Aime naneuc inguchac nalic mi wosaecnagulu noine midacte. <sup>4</sup> Kwele ngage-ngagena bikic basackelu noine monic mi bafuwagabac. Aime na bikicne mikac, yogo nalic mi midacte. Sugucnedi funginene ngani-ngagec ailu yowane wosaedaicte. <sup>5</sup> Ilec ailu wowosae dameng mi fikeemewahac ngenge ngic monicte yowa mi wosaedaing. Sugucne yeutihac kwesilu wiyac kundungka sangkelu fagac, yogo bayegengkelu ngic-ngigac ngage-ngagenginengte fungine lome yegengkedaicte. Ailu Wapong ye dameng iwa ngic-ngigac filesoc filesoc madicnengineng edocebame ngagedaingte.

*Soc bafecaigaing*

<sup>6</sup> Ngic hae-gbafocne, ngenge yowane ngage-motoningte yagowahac ngengele ailu neicne nga Apolos nokilac soc holelu edocngebabe ngagedaing. Ngenge ngage-ngage yago banogale ngagegaing. Ngenge ngic monicte soc bafelu monicte soc bawadaingkale, yowa Wapongte hibiwa kwelengkeicne fagac, ngenge yogo mi ewalidaing. <sup>7</sup> Ga monicte feicne aigic, me? Yogo miyac. Ailu ga wiyac sasawa balu gagic, iwacni monic mi geleicne balu gagic, me? Aime Wapongti wiyac yogo moc gelewec. Ilec ailu socgone mi bafedamec.

*Kristole ailu bawacnagulu gaga*

<sup>8</sup> Ngenge ngagebong mafatowanginengkolec biyachac ailu gebecngabame gagaing. Ailu nonge mi baficngebabeng ngenge ngictau aigaing, me? Aime noinebenang, ngenge ngictau noine aidabongka ingucne, angacne sugucnehac aidecka. Aime ngenge ngictau aidabongka ingucne, nonge ngengeholec momochac galu ngictau aidabeng.

<sup>9</sup> Na yanguc ngagegabac, Wapongti salecebaicne locnubame ngic-ngigac yengele aling moto-motoina domagabeleng. Yenge kpakpaduc sobengka kindololo ngic wehomacebaningte mimoctowec, silicne ingucne locnubame nganicnubagaing. Aime himongtowa sasawale ngic-ngigac nga angelo momochac yengele haicka gameineholec nganicnubabong gagabeleng. <sup>10</sup> Nonge Kristole ailu bawacnagulu kwele-sifuc ingucne aibeng, ngengibac socngineng bafelu migaing, "Nonge Kristoholec wetackelu fitilelu gagabeleng." Inguc micaigaing, me? Aime nonge tapili-wawa gaebngaca ngenge tapilinginengkolec gagaing, me? Aime ngic-ngigac yengi ngenge alang bacngobalu nongebac sowacne milu hegilecnubacaigaing, me? <sup>11</sup> Aime nonge dameng yangutihac inguchac nosingte homalu misale ainoleme ngakpi-kpoluc lokeicne holelu gabeng, ngic-ngigac yengi wecnubacaigaing. Ailu macnonggeng madicne miyac, kwilic ingucne galu <sup>12</sup> nongungtihac molenonggengti boletowa bacaigabeleng. Ngic yengi sulecubabong nongi yenge mimi-madic milu edocebacaigabeleng. Ailu weyebic ainolebong kwelenonggeng mi wacaigac, sanangnehac gacaigabeleng. <sup>13</sup> Aime ngic-ngigac yengi misulec ainolebong yenge yowa milu mibasanang aiyelecaigabeleng. Nonge yangutihac himongka yafu ingucne aibeng ngic-ngigac yengi wicnubabong gagabeleng.

*Kristoholec wetackelu gaga*

<sup>14</sup> Yowa gameineholec edocngabanogale yowa yago mi kwelengkenggelegabac, miyac. Na adu-madecfocne kwelenedi ngengele angac ngagelu sawang-yowa yago kwelengkenggelegabac. <sup>15</sup> Ngenge Kristoholec wetackelu gaebongka, damongfocngineng 10 taosen, yengi yowa madicne edocngabacaigaing. Aime ngenge sifu macnngineng moniyang sugu gagac. Nani hocne macnngineng fikelu Siduc Madicne edocngababe Kristo Yesuholec wetackeibong. <sup>16</sup> Inguc ailu ngage-ngagengineng kwefangkulu edocngabagabac, ngenge na wenuc aibe nganilu balaibecnulu aigabac ingucnehac aidaing. <sup>17</sup> Ilec ailu yakumac Timoti salebe ngengela fudaicte. Madecne kwelenedi yele angac ngagegabac, aime Sugucneholec wetackelu ye yowa balaibelu monic mi lilodaicte. Na Kristo Yesuholec wetackelu wenuc gacaigabac, yowa yogo Yesule habu sasawa fagaing, yenge edocebalu weduyelecaigabac. Aime Timoti ye ngengela fulu yowa yogo hocne hatacmac edocngabadaicte.

<sup>18</sup> Ngengelacni ngic gocne yengi nale ngagelu yanguc micaigaing, "Ye nongela mi kwesidaicte." Yenge inguc ngagelu socngineng bafecaigaing. <sup>19</sup> Aime Sugucnedi ngageme madickedaicte, dameng mi daliweme na ngengela fudacte. Ailu soc bafefe aling yenge yowangineng sugu mi ngagedacte. Fulu tapilingineng wenuc fagac, tapili yogo ngani-ngagec aidacte. <sup>20</sup> Wapongte ngani-damong yogo yowawa yefe mi yegengkedaicte, miyac. Yogo Tili Asule tapiliwa fikelu yegengkedaicte. <sup>21</sup> Aime ngenge nale wenuc aingelegac, yogo edocnuning. Yasu-huduholec funogale aingelegac, me kwele-angacka nga kwele-uluicka funogale aingelegac?

## 5

*Habu kwelina aibaba sowacne*

<sup>1</sup> Ngengele selo-boic aibaba fagac, yowa inguc mibong ngegeiba. Selo-boic aibaba monic ngic-ngigac Wapong mi ngegegaing, yengele hewacka mi fagachac, yogo hocne ngengele hewacka fagac. I yangucte, ngic monicti mamacinele ngigackolec facaigabiyec. <sup>2</sup> Aibaba ingucne fame, ngengebac socngineng bafecaigaing, yogodi madicne mi aigac. Ngenge yogolec kwele-sowac ngagelu ngic aibaba yogo aicaigac, ye habu hewacnginangkocni baickedaingte, yogodibac madickedaiacte. <sup>3</sup> Na socnedibac dalicka gagabac, yogo noine. Nga asunedibac ngengeholec gagabac. Na ngengeholec sockolecti gagabac silicine ingucne galu ngic yele aibabaine wosaelu sowacneine biyac mimoctobac. <sup>4</sup> Ngenge nga na, nongileng asuwa Sugucnenonggeng Yesule wacka kpaduckelu gaebangka, Sugucnenonggeng Yesule tapilidi nongilengkolec fame, <sup>5</sup> nongileng ngic yogo Satangte molewa lodabeleng. Inguc aime socinedi sowaleme asunedibac Sugucnele damangka wasecne aidaic.

*Suwe-suwele bole*

<sup>6</sup> Soc bafefe aibabangineng yogodi mi madickegac. Ngenge yis kpisicnemacti bretka lobong bret sasawa bame sugulecaigac, aibabangineng yogo yis ingucne, ngenge yogo mi ngegegaing, me? <sup>7</sup> Aime Kristo ye Ewalicebaicnele hombangte lama madicine, yengi depec yogo biyac webong homalu suwecnubawec. Ilec ngenge bret gbolicne yis mikac ainingte bret esecne yisholec baickeyackedaing. <sup>8</sup> Ilec ailu nongileng bret esecne yisholec, yogolec sisipilicte yowa nga aibaba wosaelu ngenge hagedabeleng. Ailu aibaba gbagbacne, nga yowa noineholecte, bret yis mikac yogo balu hombang yogo ngagedabeleng.

<sup>9</sup> Ngic-ngigac selo-boic aibaba aicaigaing, ngenge ngic-ngigac yogo yengeholec wetackelu mi gadabiyeng. Ilec ailu hibiwa biyachac kwelengkengelaiba. <sup>10</sup> Aimebac himongka ngic-ngigac Yesu mi ngegegaing, yengele ngagelu mi migabac. Ngic-ngigac Yesu mi ngegegaing, yenge selo-boic aibabanginengkolec me hane aibaba, me ngic kwesac aiyelelu ngic-ngigac yengele woc-wiyacngineng ewalicebacaigaing. Me siduc-gbong alang bayelecaigaing, ngenge yenge sasawa hegilecebaningte mi edocngebagabac, yogo miyac. Ngenge yogo aidaingtewa, ngenge himongtowa yogo hegilelu hikedaingte. <sup>11</sup> Ngenge ngic hae-gbafocngineng wacebacaigaing, yengele ngagelu yanguc kwelengkeiba. Ngic hae-gbafocngineng yenge selo-boic aibaba aicaigaing, me hane aibaba, me siduc-gbong alang bayelecaigaing. Me ngic-ngigac gocne yowa kwekwe aiyelecaigaing, me misa sanagne nolu kwele-sifuc aicaigaing, me ngic-ngigac kwesac aiyelelu wiyacngineng ewalicebacaigaing. Aibaba ingucne aicaigaingka, ngenge ngic-ngigac yogo yengeholec wetackelu mi gadabiyeng. Ailu ngenge yengeholec nosing inguchac mi nodaing.

<sup>12</sup> Ngic-ngigac Yesule habuwa mi gagaing, yenge ngege-wosaec aiyeledacte, me? Yogo nale bole miyac. Ngenge Yesule habu hewacnginang gagaing, yenge sugu ngani-wosaec aiyelelu sowacnengineng mimoctodaing. <sup>13</sup> Aime Wapongti ngic-ngigac yele habuwa mi gagaing, yengele aibabangineng wosaelu sowacnengineng mimoctodaicte.

“Ngenge ngic sowacnebenang ngengele hewacka gagac, ye baickedabiyeng.” (Yef 17:7; 24:7)

## 6

*Yowawa mi locebadaibiyeng*

<sup>1</sup> Nngelacni ngic monicti agoine ngaba aicnolu ngic dondonne miyac, yengela hangoc mikac hikelu agoine yowawa locaigac, ailubac ngic-ngigac Wapongte bingec yengela hikeme mi wosaecaigaing. Aibabangineng yogo mi madickedaiacte. <sup>2</sup> Wapongte bingec ngenge galu himongtowale ngic-ngigac ngege-wosaec aiyeledaingte. Ngenge yogo mi ngegegaing, me? Ngenge ngengungtihac himongtowale ngic-ngigac wosaecbadaingtewa, ngengung yanguctihac wiyac kpisicnema inguchac wosaecnagudaing. Yogodibac madickegac. <sup>3</sup> Ailu ngenge lobewa angelo ngege-wosaec aiyeledaingte, ngenge yogo mi ngegegaing, me? Ingucnele ailu ngenge aibaba gocne hewacnginang fagac, yogo nalic wosaedaingte. <sup>4</sup> Yakumachac yowa monic hewacnginang fikeme ngenge yefe lilolu Yesule habu ngegebong ngic gocne wawaine gagaing, yenge bawosaecbalu yowangineng mimoctonogale locebacaigaing. <sup>5</sup> Ngenge gamengebanale ngagelu yowa yogo migabac. Aime ngengele hewackacni ngic monicti ngege-motolu galu ngic hae-gbafocine yengele umacte yowa wosaelu mime madickedaiacte, ngic ingucne mi gagac, me? Yedi sugu galu nalic aidaicte. <sup>6</sup> Aime yanguctihac ngengebac inguc mi aicaigaing. Ngenge ngic



hae-gbafocngineng baceba hikelu ngage-ngagesingnineng mikac, yogo yengele haicka yowawa locebacaigaing!

<sup>7</sup> Ngenge yowawa locebacaigaing, aibaba iwa ngenge wawebebangkegaing. Aime ngic hae-gbafocngineng yenge sowacne aingelelu, me woc-wiyacngineng ewalicebacaigaing, ngenge yogo moc hegilebong fame madickedacte. <sup>8</sup> Aime ngengebac ngic hae-gbafocngineng sowacne aiyelelu woc-wiyacngineng ewalicebacaigaing.

<sup>9</sup> Ngic-ngigac dondonne miyac, yenge Wapongte ngani-damongte mole-damoc nalic mi badaingte, ngenge yogo mi ngagegaing, me? Ngenge kwesac mi ainagudabiyeng. Selo-boic aibaba aicaigaing, me siduc-gbong alang bayelecaigaing, me yefe-ngigac yengeholec gacaigaing. Me ngic gocne yenge ngic alingfocngineng yengeholec falu ngigackolec gaga ingucne gacaigaing, ailu ngic agoineholec fanogale aka monic mi holecaigac. <sup>10</sup> Me hise-baba, me hane aibaba, me misa sanangne nolu kwele-sifuc aicaigaing. Me yowa kwekwe aicaigaing, me kwesac ailu hiye-moneng ewalicebacaigaing. Aling ingucne yenge sasawadi Wapongte ngani-damongte mole-damoc nalic mi badaingte. <sup>11</sup> Aime ngengelacni ngic-ngigac gocnedi esecne inguc ailu gaihong. Inguc gacgubong Sugucne Yesu Kristodi yeicne wacka, nga Wapongnonggengte Asu yele tapiliwa suwecngbalu dondonne wacngbalu Wapongte bingec locngewawec.

### *Selo-boic aibaba mi ainoga*

<sup>12</sup> Gocne yengi yanguc micaigaing, “Na aibaba haicine monic-monic sasawa nalic aidacte, yogolec aka monic mi fagac.” Aime nanibac yanguc migabac, “Wiyac sasawa gocne yogo babaficine mikac. Wiyac sasawa nalic aidacte, noine. Aime wiyac monicti damongnunale aime yogo hegilelu mi balaibedacte.” <sup>13</sup> Nosing yogo gobenonggengte ailu fagac. Nga gobenonggengti nosingte ailu fagac. Aime gacgu Wapongti baicepame miyac aidabiyecte. Socnonggengti Sugucnele ailu fagac, yogo selo-boic aibaba ainogale ailu mi fagac. Nga Sugucne ye socnonggeng damongkegac. <sup>14</sup> Aime Wapong tapilitowainedi Sugucne bagboliyeme fangkewec, gacgu ye nongileng ingucnehac bagboliyecnubame fangkedelengte.

<sup>15</sup> Aime socngineng yogo Kristole socte tofaine aigac, ngenge yogo mi ngagegaing, me? Ilec na Kristole socte tofaine yefe-ngigackolec kpatulebe, me? Yogo miyachenang! <sup>16</sup> Me ngic monicti yefe-ngigackolec fadaictewa, ye yeholec soc moniyang aigaic, ngenge yogo mi ngagegaing, me?

“Ngic-ngigac yaeckang yeke soc moniyang aidabiyecte.”

(*Fike 2:24*)

Yowa yogo miicne fagac. <sup>17</sup> Aime monic ye Sugucneholec wetackelu gagac, ye yeholec asu moniyang aigabiyec.

<sup>18</sup> Ngenge selo-boic aibaba yogolec hangoc hikedaing! Nga monic ye bikic gocne aicaigac, yogo yeicne socte lobina ailu gagac. Nga monic ye selo-boic aicaigac, yebac yeicne socinele bikic bafuwacnolu basowalecnagugac. <sup>19</sup> Wapongti Tili Asu ngeleme balu gagaing, ye kwelenginang gagacte, socngineng yogo yele ibu-mac. Ilec ngenge ngengungtihac soc-kwelenginengte fileine mi aigaic, yogo mi ngagegaing, me? <sup>20</sup> Ngenge fulingineng baicne, aime Sugucnedi fuli yogolecs lowec. Ilec ngenge socnginengti Wapong wac feicne lacnodaing.

## 7

### *Ngawe-ngigacte yowa*

<sup>1</sup> Ngenge hibinginang yanguc uwanelegaing, “Ngic monic ye ngigackolec fadaicte, yogo madicne me miyac.” Ilec yanguc mibe ngagening, <sup>2</sup> selo-boic aibaba sugulegacte ailu ngic monic ye yeicne ngigacineholec aidaic. Nga ngigac monic ye yeicne ngaweineholec aidaic. <sup>3</sup> Aime ngic ye socine yogo ngigacinele angac balaibelu ameine lacnodaic. Nga ngigacti ingucnehac socine ngaweinele angac balaibelu ameine lacnodaic. <sup>4</sup> Ailu ngigac ye yeuctihac socinele fileine mi aigac, miyac, ngaweinedi yele socte fileine aigac. Aime ingucnehac ngaweine ye yeuctihac socinele fileine mi aigac, miyac. Ngigacinedibac yele socte fileine aigac. <sup>5</sup> Ilec ngawe-ngigac ngeke ngekuctihac socngineng mi sebicnagudabiyec. Ngeke dameng gocna sugu mimiloc bole banogale kwele-moniyang ailu dameng milu nalic sebicnagudabiyecte. Aime ngekuctihac socngineng damongkenicte tapili mi fangeteme, Satangti lokwesacka locngepadaickale, ngeke dameng kpisicnemac moc galu hatacmac wetacnagudabiyec. <sup>6</sup> Aime yogodi ung-yowa monic mi aigac. Ngeke wenuc nalic aidabiyecte yogolec migabac. <sup>7</sup> Naneicne angacbac yanguc, ngic-ngigac ngenge na ngigac

mikac gagabac ingucnehac gabong madickedacte. Aime Wapongti ngageboc mikac kwele-madicte wiyac nolecaigac, yogo ngic-ngigac filesoc noleme balu gagabeleng. Ye ngic monic tapili monic lacnodaicte, ailu monic ye tapili monic lacnodaicte.

*Moc ganoga me ngawe-ngigackolec ainoga*

<sup>8</sup> Ngic gocne ngenge ngigac mi balu moc gagaing, ailu ngigac-hosec ngengele yanguc mibe ngagening. Ngenge na ingucne moc ganingte ngagebe madickegac. <sup>9</sup> Ngenge ngen-gungtihac damongnaguningte tapili mi fangeleme, ngawe-ngigacte angacti kwelenginang ofeme sowaledaingkale, ngawe-ngigackolec aibong madickedacte.

*Ngawe-ngigac gocne hegilecnagucaigaing*

<sup>10</sup> Aime ngawe-ngigac ngengele yowa yago sanangne edocngebabe balaibedaing. Ngigac monicti ngaweine mi hegiledaic. Yogo nale yowa miyac, yogo Sugucnele yowa. <sup>11</sup> Aimebac ngigac monic ye ngaweine hegilelu hikedaictewa, yanguc aidaic, ye moc gadaic, me ngaweine esecne gawec, yela hatacmac hikelu yeholec kwele-moniyang bafuwalu ngawe-ngigac hatacmac aidabiyec. Aime ngic ye ngigacine mi hegileme hikedaic.

<sup>12</sup> Ailu ngic-ngigac nebocine ngengele yowa yanguc migabac, yogo Sugucnele mickacni mi baiba. Ngic hae-gba monicte ngigacti Yesu mi ngagesingkelu ngaweineholec ganogale ngagegacka, ngic ye ngigacine mi hegiledaic. <sup>13</sup> Me ngigac monicte ngaweinedi Yesu mi ngagesingkelu ngigacineholec ganogale ngagegacka, ngigac ye ngaweine mi hegiledaic. <sup>14</sup> Ngigac monic ye ngaweine ngage-ngagesing mikac gagac, ye ngaweine bame Wapongte bingec ingucne gagac. Nga ngic monic ye ngigacine ngage-ngagesing mikac gagac, ye ngigacine bame Wapongte bingec ingucne gagac. Yogodi noine mi aidecka midec, adu-madecfocnginec yenge ngawe-ngigac momochac mi ngagesingkegaic, yekele adu-madec ingucne gadabong. Aime adu-madec yengebac yanguctihac Wapongte bingec ingucne gagaing. <sup>15</sup> Aime monicti Yesu mi ngagesingkegac, ye ngawe me ngigacine ngage-ngagesingkelec hegilenale ngagesime aka mi holecnodaic. Wiyac ingucnedi ngic me ngigac ngage-ngagesingkelec ye nalic mi hefedaicte. I yangucte, Wapongti kwele-mogungkelec ganangte wacnubawec. <sup>16</sup> Ngigac, gagi ngawegone bafickeng Wapongti bikicte ameine bame wasecne aidaicte mecne, yogo mi ngagegic, me? Ingucnehac, ngic, gagi ngigacgone bafickeng Wapongti bikicte ameine bame wasecne aidaicte mecne, ga yogo mi ngagegic, me?

*Wapongti wacngebawec, gaga yogowa gadabiyeng*

<sup>17</sup> Sugucnedi ngic-ngigac gaganginengte silicina moniyang moniyang botoc bame yowa Wapongti wacngebalu hefolecngabame, ngenge gaga yogolec silicina gadabiyeng. Aime Yesule habu sasawa ngenge aibaba yogo balaibeningte edocngabacaigabac. <sup>18</sup> I yangucte, ngic monic ye soc tofaine helockeicnele alingka gacgume, Wapongti ye wackelu hefoleemewa, ye ngage-ngage yogo balu soc tofaine hatacmac taockenale bole mi badaic. Aime ngic monic ye soc tofaine mi helockeicnedi gaemewa Wapongti wackedaictewa, ye soc tofaine mi helockedaic. <sup>19</sup> Soc tofaine helockeicne, me mi helockeicne, yogodi wiyac feicne mi aigac. Nga Wapongte ung-yowa balaibenoga, yogodi sugu wiyac noinebenang aigac. <sup>20</sup> Aime ngic moniyang moniyang ngenge gaga silicine wenuc gaebongka Wapongti wacngebalu hefolecngabawec, ngenge gaga silicine ingucnehac gadabiyeng.

<sup>21</sup> Ga ngic sugucnegonele kwelec kwekwe gaengka Wapongti wacguwecka, yogolec ngageboc monic mi aidamec. Aime ga kwelec kwekwele muc lukenogale yefe fikegeleme, yogo balaibedamec. <sup>22</sup> Monic ye kwelec kwekwe gaemewa, Sugucnedi wackelu hefolewecka, ye dameng iwa sifu Sugucnele ngic-ngigac mucine mikac aigac. Aime monic ye mucine mikac gaemewa wackeme, ye yefe yogowa Kristole kwelec kwekwe aime Kristodi yele sugucneine aigac. <sup>23</sup> Sugucnedi fulingineng biyachac bawec. Ilc ngenge ngic yengele bagewa kwelec kwekwe aling mi aidabiyeng. <sup>24</sup> Ngic hae-gbafocne, ngenge domacaigaing silicine ingucnehac domaebongka Sugucnedi moniyang moniyang wacngebalu hefolecngabawec, ngenge silicine ingucnehac Wapongte haicka gadabiyeng.

*Ngawe-ngigac gagadi sowacne mi aigac*

<sup>25</sup> Ngigac gocne ngenge ngic mikac moc gagaing, ngengele ngagelu Sugucnelacni ung-yowa monic mi fanelegac. Aime Sugucnedi kwele-sowac ainelewec, yogolec silicina yowa noine mibe ngenge ngageboc mikac galu yowane ngagedaing. <sup>26</sup> Dameng yagowa umac sugucne fikelu fagacte ailu, ngenge yanguctihac gagaingka, gagangineng ingucnehac ngawe mikac moc gabong madickedacte, inguc ngagegabac. <sup>27</sup> Ga ngigacgoneholec biyachac hefecngapaiacne, aime hegilenogale mi ngagesidamec. Aime ngic monic ga ngigac mikac galu ngigac banogale mi aidamec. <sup>28</sup> Ailu ga sifu ngigac monic badamectewa,

bikic mi bafuwagic. Aime ngigac monic ye moc galu ngic badaictewa, ye inguchac bikic mi bafuwagic. Ngawe-ngigac aicaigaing, yengele gagawa umac haicine monic-monic fikecaigac, na ingucne mi fikenale ngagegabac.

*Himongte wiyacti mi hefcnggebadaic*

<sup>29</sup> Ngic hae-gbafofocne, dameng bangkacnemac fagac, inguc migabac. Ilec ailu ngic ngigackolec gagaing, ngenge ngigacfcngineng mikac, ingucne gadaing.\* <sup>30</sup> Nga ngic-ngigac hiyalu gagaing, ngenge mi hiyagaing ingucne gadaing. Nga ngic-ngigac belic-belicka gagaing, ngenge mi beliyegaing ingucne gadaing. Ailu woc-wiyac fuli bacaigaing, ngenge woc-wiyacngineng mikac ingucne gadaing. <sup>31</sup> Ailu ngic-ngigac himongtowa yagolec wiyacte bole balu gagaing, ngenge wiyacngineng efecnemac fangelegac, ingucne gadaing. Aime himongtowa yago yakumac fagac, yogo miyac ainowagac.

<sup>32</sup> Himongte umacti mi fikengelenale angacnugac. Ngic ngigac mi bawec, ye Sugucnele wiyacte ngage-ngageine sugucnehac facnocaigac. Ailu ye wenuc aime Sugucnedi ngagecnome madickenale bole bagac. <sup>33</sup> Aimebac ngic monic ye ngigac biyachac bawec, yedibac himongte wiyacte ngage-ngageine sugucnehac facnogac. Ailu ye ngigacine aibaba wenuc aicnome ngigacnedi ngagecnome madickedacte. <sup>34</sup> Inguc ailu ngage-ngageine siyeckelu yaeckang ailu gagac. Aime ngigac-adu, me ngigac ngic mikac ye Sugucnele wiyacte ngage-ngageine sugucnehac facnogac, ye yanguc ngagegac, "Na wenuc gabe socne nga asune Wapongte bingec aidaicte." Aimebac ngigac monic ye ngic biyachac bawec, ye himongte wiyacte ngage-ngageine sugucnehac facnogac, ye ngaweine aibaba wenuc aicnome ngaweinedi ngagecnome madickenale bole momochac bagac.

<sup>35</sup> Ngenge baficngehanogale ailu yowa yago migabac, yogo ngenge aka mi holengelenogale migabac. Ngenge gaga silicina galu Sugucnele bole damengsoc balu gabong himongte wiyacti ngage-ngageingeng mi basifuwedaic, inguc ngagegabac.

*Ngic monicte adu*

<sup>36</sup> Ngigac monic ye ngickolec gagale damengngine ewalime, sifu ngic banogale aicnome mamacinedi molickelu welockecnodaicte. Ailu lobeinabac ngageboc ailu nalic midaicte, ye bikic mi bafuwagic. Aime aduine nalic ngic badaicte. <sup>37</sup> Nga mamac monic ye ngageboc mi ailu, aduine nalic damongkeme macina ngiyedaic, yogo ngage-ngageine damongkelu kweleina biyac ngagepangkelu ye aibabaine madicne aigac. <sup>38</sup> Ilec ailu ngic monic ye aduine ngicka logac, ye aibabaine madicne aigac. Me ngic ye aduine ngicka mi logac, ye aibabaine madicnebenang aigac.†

*Ngigac-hosec*

<sup>39</sup> Ngigac monic ye ngaweine gbolicne gagac, ye ngaweine gaemewa yeholec wetackelu gadabiyec. Gacgu ngaweine homame ye umacine mikac ailu ngic monic banogale milu angac ngagelu nalic badaicte. Ailu ye ngic Sugucne ngagesingkegac ye sugu badaicte. <sup>40</sup> Aime ye ngic mi balu moc ganogale ngagegacka, yele kwele-angac yogo sugucnehac. Nale ngage-ngage inguc ngelegabac. Aime na inguchac Wapongte Asuholec gagabac, yogo ngagesilu migabac.

## 8

*Siduc-gbong yengele depec*

<sup>1</sup> Ngic-ngigac yenge sic welu siduc-gbong yengele depec lolu nocaigaing, yogolec fungine minogale ngagegabac. Nongileng sasawadi ngage-ngageholec gagabeleng, yogo ngage-gabeleng. Ailu yanguc ngagegabeleng, "Ngage-ngagedi nongileng soconggeng bafegac." Aimebac kweledi angacka ngagenagucaigaing, gaga yogodi ngic-ngigac kwelengingang kwefangkeme sanangnehac domagaing. <sup>2</sup> Entacka moniciti yanguc ngagelu gadaicte, "Na ngage-ngageneholec," ye ngage-ngage-motoc mikac gagac. <sup>3</sup> Aime monic ye kweleinedi Wapongte angackeme, Wapongti ye ngagecnolu gagac.

<sup>4</sup> Ilec ailu siduc-gbongte depec yogo nonoga me miyac, yogolec yanguc biyac ngagemotogabeleng. Wapong moniyangti sugu gagac. Nga himongtowa yagowa siduc-gbong yogo yenge wiyac noine miyac. <sup>5</sup> Ngic-ngigac yenge siduc-gbongfcngineng sawawa me himongka gagaing, yengele wacngineng wapong wacebacaigaing. Sugucne nga wapong ingucne bocyac gagaing. <sup>6</sup> Inguc gaebongka nongele ailu Wapong ye moniyang sugu hocne,

\* **7:29:** Ngic ngigac mikac, ye Wapongte bole homacnehac nalic badaicte. Ilec ngic ngigackolec aigac, ye silicine ingucnehac aidaic. **7:31:** 1Yoa 2:17 † **7:38:** Hewacine 36-38 yogowa Wapongte yowale ngage-ngage ngic yenge Grik yowawa wafelu yogolec funginele kwele-yaec ailu gagaing. Ilec bafaliyenogale yefe yaeckang balaibeibong. Buk Baibel nga Miti gocne iwa yefe monic bafaliyeicne yanguc fagac, yogo mactame mi bafaliyeicne. Yogo ngiciti ngigac-bingecine badaicte me miyac. **7:39:** Rom 7:2-3 **8:1:** Sale 15:29 **8:2:** Gal 6:3 **8:4:** Gal 4:8; Yef 4:39; 6:4

ye Mamac, yelacni wiyac sasawa fikeyackewec, nongileng yele ailu gagabeleng. Sugucne moniyang, yogo Yesu Kristo, aime yele feiwa wiyac sasawa nga nongileng gagabeleng.

<sup>7</sup> Siduc-gbong yenge noine miyac, ngage-ngage yogo ngic-ngigac ngage-ngagesingkolec gocne yengele kwelewa mi fagac. Yenge siduc-gbongte ngagelu wiyac noine micaigaing. Ilec yengele depec nocaigaing, iwa kwele-ngage-ngageingentge tapili wame yafoineholec aicaigac. <sup>8</sup> Aime nosing-nono yogodi Wapongte emewa mi locnubadaicte, miyac. Nosing nodabelengtewa, ingucne, yogodi yele haicka feicne mi aigac. Nga mi nonogawa ingucne yogodi yele haicka feicne mi aigachac.

<sup>9</sup> Gocne ngengebac ngagebong depecte nosing nalic nocaigaing. Inguc ngagebong efekeme nobong, alingfocngineng tapili-wawa gagaing, yenge nosingte ailu lokwesakka locebabong wawedaingkale, ngenge damong balu gadabiyeng. <sup>10</sup> Ga ngage-ngage-motocgoneholec. Ailu gagi siduc-gbongte ibu-macka ngiyelu nosing nodamectewa, agogone monic ye kwele ngage-ngageinele tapili waicnedi iwa gadaicte. Inguc galu aibabagone ngranilu kweleine kwefangkeme ye siduc-gbongte depec inguchac nolu kwele-yaec bafuwadaicte. <sup>11</sup> Ga inguc aigacgu ngage-ngage-motocgonedi ngic hae-gbagone ngage-ngagesingngine waicne ye basowalecnodamecte. Aime Kristo ye ngic hae-gbagone yele momochac homawec. <sup>12</sup> Ailu ngenge ngic hae-gbafocngineng yengele kwele ngage-ngageingineng basowalelu yengela bikic bafuwadaingtewa, Kristola inguchac bikic bafuwadaingte. <sup>13</sup> Ilec ailu yanguc migabac, na nosing nolu ngic hae-gbane umacka lobe wawedaickale, sic hatacmac mi nodacte. Ngic hae-gbane aicnobe bikic bafuwame mi madickedaicte.

## 9

### *Bole ngic-ngigac wiyac yelenoga*

<sup>1</sup> Na ngic monicti aka mi holenelegac, me? Ailu na salecebaicne, me? Sugucnenonggeng Yesu dongedi nganiiba, me? Na bole balu gabe, ngenge bole yogolec noine kwelenginang fikeme Sugucneholec wetackegaing, me? <sup>2</sup> Foinac, ngic-ngigac gocne yengi nale yanguc ngagegaing, "Ye salecebaicne miyac." Inguc ngagebong na sifu salecebaicne bole bagabac, ngengi inguc ngagegaing. Ailu Sugucnele salecebaicne gagabac, ngengi hocne Yesu ngagesingkeibong yogolec maaine aigaing.

<sup>3</sup> Gocne yenge nale lobe-yowa milu gacaigaing, yogolec ameine bafaliyelu yanguc edo-cebagabac, <sup>4</sup> Habu yengi salecebaicne nonge nosing nolebong nalic nodabelengte, yogolec yefe madicne aigac, me? <sup>5</sup> Ailu nonge ngigacfocnonggeng inguchac ngage-ngagesingkolec gagabiyeng, yenge yefewa nalic bacebalu kwesidabelengte, yogo madicne aigac, me? Salecebaicne gocne nga Sugucnele gbafofine ailu Pita,\* yenge ngigacfocnginengkolec hike-kwesic aicaigaing. <sup>6</sup> Ailu salecebaicne gocne yenge bole mi babong baficebacaigaing. Aimebac Banabasholec noki sugu gaganonggete wiyac fikenale bole molenonggeti balu gagabelec, ngenge inguc ngagesicaigaing, me? <sup>7</sup> Hudu-baba ngic monicti hudu bole balu yeuctihac boleinele fuli moneng nalic mi lanagudaicte. Nga monic ye waing duweme noine aime yeuctihac noine balu nodaicte. Aime monicti lama-bulumaka yengele damong gacaigac, ye yengelacni amuc balu nocaigac.

<sup>8</sup> Na ngic yengele ngage-ngage balu yowa yago mi migabac, miyac. Yefe-yowadi yogolec inguchac migac, me? <sup>9</sup> Mosesdi yefe-yowawa yanguc kwelengkewec fagac, "Ngicti wit socine litonogale ngagelu bulumaka bole sugucnehac lacnome wit feina edelu lolickecaigac. Ilec mesuine mi hefebong ye bole bagacte fuline nodaic." (*Yef 25:4*) Wapongti bulumaka yengele ngagelu inguc mi miwec, miyac. <sup>10</sup> Foinac, ye ngic-ngigac nongilengte ngagelu inguc miwec. Yogo nongileng ngagelu ngic ye boleinele noine bame madickegac, inguc kwelengkeicne fagac. Ngic himong holelu gagac nga ngic wit socine litolu gagac, yeke noinele dameng kwesime bole yogolec noine nebocine banicte ngagesilu bole balu gagaic.

### *Aka holeibeng*

<sup>11</sup> Aime Wapongte Asule noine ngengela wickeibengte ailu ngengelacni inguchac socte babafic badabelengte, yogo wiyac umacne, me? Babafic yogo nalic badabelengte. <sup>12</sup> Aime ngic gocne yenge ngengelacni wiyac gocne nalic badaingtewa, nongi yogo taockelu hatacmac badabelengte, me? Aime nalic badabelengte. Aime sifu nonge Kristole Siduc Madicnele aka holedabelengkale, ngengelacni wiyac nalic banogale ngagecaigabeleng,

**8:6:** Efs 4:5,6    **8:9:** Rom 14:13-15; Gal 5:13    **8:11:** Rom 14:15,20    **8:13:** Rom 14:21    **9:1:** Sale 22:17-18; 26:16; 1Kor 15:8-9    **9:2:** 2Kor 3:2-3    **9:4:** Luk 10:8    **9:5:** Grik yowawa Pita wacine monic Kefas fagac.    **9:9:** 1Tim 5:18    **9:10:** 2Tim 2:6    **9:11:** Rom 15:27

yogo ngengelacni mi bacaigabeleng. Nonge wiyac banogale socte umac haicine monic-monic balu gagabeleng.

<sup>13</sup> Ngic Wapongte Ibu-macka bole bacaigaing, yenge nosingngineng Ibu-macka bafuwalu nocaigaing. Nga alatawa kwelec bole bacaigaing, yenge alatale ibuwacni tofaine bacaigaing, nenge yogo mi ngagegaing, me? <sup>14</sup> Aime silicine ingucnehac gocne yenge Siduc Madicne bayegengkecaigaing, yenge yefe yogowacni gaganginengte nosing yeledaing, Sugucnedi yefe yogo lowec.

<sup>15</sup> Naneicnebac babafic ingucne monic mi balu gaiba. Ailu ngengi wiyac monic neleningte ngagelu hibi yago mi kwelengkegabc, miyac. Naneutihac nosing bafuwadacte, yogolec ngagelu wacne bafebe madickedacte. Aime monicti nosing baficnudaictewa, na wacne bafebe nalic mi madickedacte. Inguc fikeme wacne nalic mi bafedacte, yogodi nale homac ewaligac. <sup>16</sup> Wapongti igocnulu kpafengnume Siduc Madicne ngic-ngigac edocebalu weduyelelu gagabc. Ailu Siduc Madicne mi mibe yegengkedecta, ibac na medecnume gadaba. Ilec naneuc bole madicne balu gagabc milu wacne nalic mi bafedacte. <sup>17</sup> Ailu neicne angac balaibelu bole banogale uwabe nalic mibong bole yago badacka, yengi bolele ameine nelebong badaba. Aime Sugucne yeutihac bole yago banogale nelawec, yogo yele angac balaibelu damong bole balu gagabc. <sup>18</sup> Aime ameinele silicine yanguc aigac, na Siduc Madicne mibe yegengkeme wiyac banogale miicne, yogo hegilelu moc sugu nalic mibe yegengkedacte.

#### *Ngic-ngigac yengele bagewa gaga*

<sup>19</sup> Ngic monicti nale aka mi lowec, miyac. Aime nabac ngic-ngigac bocyac kpaducebabe Kristoholec wetackeningte ngagelu, yengele bagewa nalic kwelec kwekwe ngicngineng ailu gacaigabc. <sup>20</sup> Na Yuda ngic-ngigac kpaducebabe Kristoholec wetackeningte ailu yengeholec galu Yuda ngic-ngigac yengele silic ingucne ailu gacaigabc. Naneicnebac Yuda yengele yefe-yowale bagewa mi gacaigabc, yogo noine. Aime ngic-ngigac yefe-yowale bagewa gacaigaing, yenge kpaducebanogale yengeholec galu yenge ingucne yefe-yowale bagewa gacaigabc. <sup>21</sup> Aime ngic-ngigac gocne yenge yefe-yowale bagewa mi gacaigaing, yenge kpaducebabe Kristoholec wetackeningte yengeholec galu yefe-yowa mikac yenge ingucne gacaigabc. Aime naneuc Wapongte yefe-yowa lobe holecnolu mi gacaigabc, nabac Kristole yefe-yowaholec gacaigabc. <sup>22</sup> Galu ngic-ngigac tapilingineng waicne kpaducebabe Kristoholec wetackeningte yenge ingucne yengeholec tapiline waicne ingucne ailu gacaigabc. Ailu ngic-ngigac haicine monic-monic gacaigaing, yengelacni gocne bikicte ameine bame wasecne ainingte yengeholec gacaigabc. Galu gaga haicine monic-monic balaibelu yenge ingucnehac gacaigabc. <sup>23</sup> Na Siduc Madicnele ailu bolene sasawa bacaigabc, gagcu neicne yogolec noinele ameine nebocine banogale ngagesilu gagabc.

#### *Gbelong ainogale yefe*

<sup>24</sup> Gagasacte ngic loringte sobengka kucte ainogale gasackecaigaing, yenge sasawadi gasackebong moniyangti sugu gbelongte kap badaicte, nenge yogo mi ngagegaing, me? Nenge ngengileng kapngineng banogale gasackedaing. <sup>25</sup> Ngic loringka wacngineng locaigaing, yenge sasawadi socongineg bucbuchac efeckenale doic-bole balu alingkecaigaing. Ngic yenge gbelongte maaine lobewa miyac aidacite, yogo ubeeyeleningte inguc aidaingte. Aime nongileng gbelongte maaine fafegidaicte, yogo ubeenolenogale, doic-bole balu damongnagugabeleng. <sup>26</sup> Na kosa mi gasackecaigabc. Ailu hudu banogale molene sawaina moc mi wickecaigabc. <sup>27</sup> Nabac yanguc aicaigabc, ngic-ngigac tofaine yengela Siduc Madicne edocebalu weduyelelu gabe, ngani-wosaec damengka wawedackale, socne welu gagabc. Na socnedi yowane balaibelu kwelec kwenogale inguc ailu gagabc.

## 10

#### *Yuda ngesa-ngambofocongineg yengele siduc ngagelu sawang-yowa ngagesidaing*

<sup>1</sup> Ngic hae-gbafocne, nenge Yuda ngambofocongineg yengele yowa-siduc ngagemotoningte ngagegabc. Yenge Isip hegile hikelu kaguwadi somecebame yenge sasawadi yogolec bagewa hikeibong. Hikegagcu yenge sasawadi kiwec falockeibong. <sup>2</sup> Kaguwa nga kiwec yeki misa-lowac ingucne aiboc, yenge sasawadi Mosesholec taockenogale misa lowaibong. <sup>3</sup> Ailu yenge sasawadi Asule nosing silicine moniyang nolu hikeibong.\* <sup>4</sup> Aime Asule fapacladeng yogowacni misa wame yenge sasawadi Asule misa silicine

**9:12:** Sale 20:34; 2Kor 11:9    **9:13:** Yef 18:1-3    **9:14:** Mat 10:10; Luk 10:7; Gal 6:6    **9:16:** Yer 20:9    **9:20:** Sale 21:20-26    **9:22:** 2Kor 11:29    **9:25:** Filp 3:14; 2Tim 4:7-8; 2:4-5    **9:27:** Rom 8:13; 13:14    **10:1:** Wah 13:21-22; 14:22-29    \* **10:3:** Wahikeicne 16:35 siduc iwa fagac. Wapongti nosing monic wacine mana yeleme nolu gaibong.

moniyang nolu hikeibong. Aime fapacladeng yogo Kristo hocne, yedi balaiবেচবawec.  
<sup>5</sup> Aime Wapongti ngesa-nambofocnonggeng yengele hewackacni bocyac yengele aiba-  
 banginengte ailu kweleine mi madickewec. Mi madickeme yenge homayackeibong, aime  
 kponggbongngineng himong kisiwa misaine mikacka kosa singsalolong kwelu fayackei-  
 bong.

<sup>6</sup> Yenge aibaba sowacnele angacebame ailu gaibong, yogo nongilang ingucne mi fikenale  
 siduc yogo nongilengte ailu loicne fagac. <sup>7</sup> Ailu hatacmac yanguc mibe, ngenge yenge  
 ingucnehac siduc-gbong alang mi bayeledabiyeng. Yenge inguc aibong siduc yanguc  
 kwelengkeicne fagac,

“Ngc-ngigac yenge ngiyelu nosing misa nolubac fangkelu gee welu gaibong.” (*Wah 32:6*)

<sup>8</sup> Ailu nongileng selo-boic aibaba mi aidabeleng. Yengelacni ngic-ngigac gocne yenge  
 selo-boic aibaba ailu gaibongte, Yuda ngic-ngigac 23 taosen yenge hadeng moniyangte  
 kwelina homayackeibong. <sup>9</sup> Ailu gocne yenge Sugucne lokwesacka lobong, hema yengi  
 hiebabong homayackeibong. Aime nongileng inguchac Kristo lokwesacka mi lodabe-  
 leng. <sup>10</sup> Aime ngic-ngigac gocne yenge lobe-yowa aibong, ngic-wewe angelodi kwe-  
 silu wecebame homayackeibong. Nongileng silicine ingucnehac lobe-yowa mi aidabe-  
 leng. <sup>11</sup> Aibaba yengela fikewec, yogodi nongileng edalicnubame akanonggeng aidaic.  
 Nongileng yanguctihac dameng moto-motoina gagabeleng, nongileng ailu yowa yogo  
 Wapongte hibiwa kwelengkeicne fagac. <sup>12</sup> Ilec monicti yanguc midaicte, “Na sanangne  
 domagabac.” Ye gacgu wawedaickale, damongnagudaic. <sup>13</sup> Aime lokwesacti ngic-ngigac  
 sasawa yengela fikecaigac, silicine ingucnehac ngengela fikengelecaigac. Aime Wapong  
 ye yowaine milu balaibegac. Lokwesac fikengeleme ngenge umac yogo nalic tengkelu  
 gagaing. Aime umac yogodi tapilingineng mi ewalinala Wapongti lokwesac sugucnehac  
 yogo aka holecnogac. Lokwesac fikengeleme yedi yogowacni wenuc hikeningte yefe  
 bafuwangeleme lokwesacti tapilingineng mi bawame domadaingte.

#### *Sugucnele tiwa nga siduc-gbong yengele tiwa nono*

<sup>14</sup> Agofocne kwelenedi ngengele angac ngagegabac, ngenge siduc-gbong yenge alang  
 mi bayeledabiyeng. Baickelu hikedabiyeng. <sup>15</sup> Ngenge ngic-ngigac ngage-ngage-  
 motocnginengkolec. Ilec ailu ngengele yanguc mibe, ngenge ngengungtihac yowane  
 ngagelu wosaedabiyeng. <sup>16</sup> Kap kwele-madicineholec yogo kwele-madic micaigabeleng,  
 nongileng yogo nolu Kristo yeicne sacineholec wetackelu yeholec sac moniyang aigabe-  
 leng, me? Nga bret baducaigabeleng, yogo nolu Kristo yeicne sockolec taockelu yeholec  
 soc moniyang aigabeleng, me? <sup>17</sup> Bret yogo ebec moniyang. Yenge ebec moniyang sugu  
 yogo balu yogowacni botoc balu nolecaigabiyeng. Nolebong nongileng sasawadi yogo  
 nocaigabelengte, nongileng ngic-ngigac bocyacti galu soc moniyang aigabeleng.

<sup>18</sup> Ngenge Israel ngic-ngigac nganicebalu ngagesidaing. Ngic-ngigac Wapongte depecte  
 wiyac lobelu nebocine nocaigaing, yenge Wapongte alataholec kpatulecaigaing, me?  
 Aime, yenge kpatulecaigaing. <sup>19</sup> Ilec wenuc migabac? Siduc-gbongte depec yogodi wiyac  
 feicne aigac, me? Ailu siduc-gbong yeicne inguchac wiyac feicne aigac, me? Yogo miyac!  
<sup>20</sup> Aime ngic-ngigac Wapong mi ngagegaing, yenge depec yogolec wiyac locaigaing, yogo  
 Wapongte mi locaigaing. Yengebac aleng yengele depec lobelu kpatulecaigaing. Aime  
 ngenge aleng yengeholec kpatulebong mi madickedaicte. <sup>21</sup> Ngenge Sugucnele kap nga  
 aleng yengele kap momochac bacepalu nodaingte, yogo nalic mi aidaicte. Aime ngenge  
 Sugucnele nosing nga aleng yengele nosing momochac kpatulecepadaingte, yogo nalic mi  
 aidaicte. <sup>22</sup> Ailu nongileng tapilidi Sugucnele tapili ewaligac, me? Nongileng Sugucnele  
 kwelewa aalic bafuwadabelengkale, inguc mi aidabeleng.

#### *Kwelengngengti ye le angacnubadaic*

<sup>23</sup> Gocne yengi yanguc micaigaing, “Nosing nga wiyac haicine monic-monic sasawa  
 ainangte aka monic mi fagac.”

Aime nanibac yanguc migabac, “Aibaba gocne yogodi alingfocgone yenge mi bafice-  
 badaicte. Wiyac sasawa ainangte aka monic mi fagac, yogo noine. Ailu aibaba gocnedibac  
 mi bacnubame sanangedabelengte.” <sup>24</sup> Monic ye madicne yeicna fikenale ngagelu  
 aibabaine madicne mi aidaic, miyac. Ngenge ngic-ngigac yengela madicne fikenale  
 ngagesilu aibabangineng madicne aidaing.

<sup>25-26</sup> “Himongtowa nga wiyac sasawa himongka fagac, yogo Sugucnele.” (*Mige 24:1*)

Ilec ngic-ngigac yenge sic maketka salebong, ngenge kwelenginengti yogolec depecte fungine ngage-wosaec ainogale mi uwadabiyeng, ngenge yogo moc sugu fuli balu nodabiyeng.

<sup>27</sup> Aime ngic-ngigac Sugucne mi ngagesingkecaigaing, yengelacni monicti macina hiken- ingte wacngebame ngenge yanguc aidaing. Ngenge yele macka fenogale ngagebong nalic aime yele macka hikedaing. Hikelu ngigac yengele ngenge ngeleme ngenge kwelenginengti yogolec fungine ngage-wosaec ainogale mi uwadaing, yogo nalic moc nowackedaing. <sup>28-29</sup> Aime entacka monicti yanguc milu edocngebadaicte, “Yago siduc-gbong yengele depecte sic nebocine.” Yogowabac nosing yogo mi nodaing. Aime gale ngage-ngagegonele mi migabac, miyac. Yogo agogone kweleinedi ngage-wosaec aime mi madickedackale, nga ngic nosingte edocgugac, yele ngage-ngagele ailu nosing yogo hegiledaing. Na aka mikac gagabac, yogo noine. Aimebac ngic monicte kweleinedi ngage-wosaec aicnome mi madickegac. <sup>30</sup> Aime na ngic-ngigac yengeholec nosing nolu Sugucnele kwele-madic midactewa, yengele woc-wiyacte biyac kwele-madic migabac, yogolec misulec ainelebong mi madickegac.

<sup>31</sup> Ilec ngenge nosing misa nocaigaing me wiyac monic aicaigaingka, ngenge Wapong ngagesibong wac feicne badaic. <sup>32</sup> Yuda ngic-ngigac nga Grik ngic-ngigac ailu Wapongte habu wosaecngებადაინკალე, aibabangineng damongkedaing. <sup>33</sup> Aime ngic-ngigac bocyac bikicte ameine bame wasecne aibong yengela madicne fikenale ailu bole yogo balu gagabac. Na neicna madicne fikenale mi balu gagabac.

## 11

<sup>1</sup> Na Kristole aibaba balaibecaigabac. Aime ngenge silicine yogohac nale aibaba nganilu balaibecnudabiyeng. <sup>2</sup> Nga ngenge nale wiyac sasawa ngagesigaing. Ailu yowa edocngebalu ngeleiba, yogo bacaigaing, yogolec mitengngebagabac.

### *Hodocnonggengte maa*

<sup>3</sup> Ngic moniyang moniyang sasawa yengele hodocngineng yogo Kristodi aigac. Nga ngigac moniyang moniyang yengele hodocngineng yogo ngicti aigac. Aime Kristole hodoc yogo Wapongti aigac, ngenge yogo ngage-motoningte ngagegabac. <sup>4</sup> Aime ngic monic ye hodocine someckelu milockedaictewa, me Wapongte siduc-yowa midaictewa, ye yeicne hodocine gamewa lodaicte. <sup>5</sup> Aime ngigac monicti hodocine mi someckelu milockedaictewa, me Wapongte siduc-yowa midaictewa, ye yeicne hodocine gamewa lodaicte. Yogo ngigac monicti hodocine fodome kpandec aigac ingucne. <sup>6</sup> Ailu ngigac monic ye hodocine mi someckedaictewa, ye hodoc-dowecine balockeme bangkacne aidaic. Aime ngigac ye hodocine inguc balockedaicte me fodedaicte, aibaba yogodi gameineholec aigacka, ye hodocine someckelu gadaic.

<sup>7</sup> Ngic ye Wapongte silic ingucne. Ailu yele wac feicne bayegengkegac. Ilec ailu ye hodocina wiyac monic mi lolu someckedaic. Ngigactibac ngicte wac feicne bayegengkegac. <sup>8</sup> I yangucte, Wapongti ngic ngigackacni mi bafuwawec, yebac ngigac ngickacni bafuwawec. <sup>9</sup> Ailu ngic ye ngigacte ailu mi bafuwawec, ngigactibac ngicte ailu bafuwawec. <sup>10</sup> Ilec ngigac ye monicte tapilile bagewa gagac, yogolec maa ingucne wiyac monicti hodocina holelu someckedaic. Ye angelo yengele ailu inguc aidaic.\*

<sup>11</sup> Ngigac ye yeicnac gaga yogo mi fagac. Nga ngic ye inguchac yeicnac gaga yogo mi fagac. Ngic nga ngigac ngenge kwele-moniyang gadabiyeng, Sugucnele gaga inguc fagac. <sup>12</sup> Ngigac ye ngickacni bafuwacne, ingucnehac ngic ye ngigackacni fikeicne, aime wiyac sasawa yogo Wapongtacni fikeicaing.

<sup>13</sup> Ngenge ngengungtihac aibaba yogo wosaedaing. Ngigac monicti hodocine mi someckelu Wapong milockedaicte, yogo madickedacite, me? <sup>14</sup> Aime ngic monic ye hodoc-sabaine sugucnehac balu gadaicte, me hodoc-dowecine hefedaicte, aibaba yogodi alangbaba mi aidaicte. Ngic nongileng aibabanonggengti yogo wedunoledaicte, me? <sup>15</sup> Aime ngigac monic ye hodoc-dowecine sugucnehac facnodaictewa, yogo yele ngani-nganiine madicne aidaicte. Yogo nalic ailu madicne, I yangucte, ye hodoc-sabainedi hodoc-luweine someckenale yogo balu gadaicte. <sup>16</sup> Monicti yowa yagolec mife-miwa ainale ngagegacka, ye yanguc ngagedaic. Nongela someckeicnele aibaba ingucne monic mi fagac. Nga Wapongte habu yengele hewacka aibaba monic ingucnehac mi fagac.

**10:28-29:** 1Kor 8:7    **10:30:** 1Tim 4:4    **10:31:** Kol 3:17    **10:32:** Rom 14:13    **10:33:** 1Kor 9:20-22  
**11:1:** 1Kor 4:16    **11:2:** 1Kor 1:10-12    **11:3:** Fike 3:16; Efs 5:23    **11:7:** Fike 1:26-27    **11:8:** Fike 2:18-23

\* **11:10:** Angelo yenge Wapongte bagewa galu yele yowa balaibelu gagaing. Ilec yenge nganibong ngigac monic ye Wapong milockenogale yeicne hodocinele yowa mi balaibegacte ailu, yenge ngagebong mi madickegac.

*Sugucnele tiwa**Mat 26:26-29; Mrk 14:22-25; Luk 22:14-20*

<sup>17</sup> Yowa taockelu yanguc sanangne edocngebabe, yogo mimi-madic yowa mi migabac. Ngenge tutumangngineng madicne mi ailu ngengungtihac basowalecaigaing. <sup>18</sup> Aime molickelu yowa yagolec migabac, Yesule habu ngenge kpaducke ngiyelu yowanginengti fena wana aime siyeckecaigaing, yogo ngameiba. Yowa yogolec ngamebe noine ingucne aigac mecne. <sup>19</sup> Aime Wapongti ngic-ngigac weni yenge aibabangineng noine nganilu hewacnginang gadaicte, yogo dondonne yegengkeningte siyeckegaing mecne. <sup>20</sup> Ilec ngenge kpaduckelu Sugucnele tiwa nonogale mic-walec nosing nocaigaing, yogodi Sugucnele tiwa noine mi aicaigac. <sup>21</sup> Ailu ngenge nosing bakwesilu nosing-nono damengka ngic-ngigac ngengungtihac nosingngineng filesoc filesoc nowackebong, gocnedibac nosingte homacaigaing. Nga gocne ngengibac misa bocyacbenang nolu kwe-lengineng sifuwecaigaing. <sup>22</sup> Ngenge macnginang ngiyelu nosingngineng mikac aigaing, me? Ngenge Wapongte habu lobe holeyelecaigaing. Ailu alingfocngineng gocne woc-wiyacngineng mikac gagaing, yenge game-gameine aieyelecaigaing, me? Ngenge macnginangsoc nodaing. Inguc aicaigabiyengte wenuc mibe? Mitengngebadaicte, me? Yogodi kpungke-kpungkeine aigac.

<sup>23</sup> Sugucnedi yowa yago edocnume ngameiba. Aime yowa yogo esecne biyachac edocngebaba. I yangucte, Yudasdi Yesu doc bawec, deboc yogowahac yanguc fikewec, Yesudi bret monic balu <sup>24</sup> Wapong kwele-madic micnolu bret yogo bauckelu yanguc milu yelewec, **“Yago soc-biucne, yogo ngengele ailu loicne. Ngenge yogo nolu nale ngagesilu inguc nolu gadaing.”** <sup>25</sup> Nosing nobong motome, silicine ingucnehac ye kap balu yanguc miwec, **“Kap yago sacnele dodofic gbolicne. Ngenge yogo nodaingtesoc nale ngagesilu inguc nolu gadaing.”** <sup>26</sup> Ngenge bret nga kap yago nodaingtesoc, dameng iwa Sugucne homacinele mibong yegengkedaicte. Damengsoc inguc mibong yegengkeme gaebongka ye kwesidaicte.

<sup>27</sup> Ilec monic ye Sugucnele bret nga kapka moc nodaicte, yedi Sugucnele sac nga biucka bikicte ameine bafuwadaicte. <sup>28</sup> Inguc aime ngic-ngigac filesoc filesoc ngenge ngengungtihac wosaecnagulu, bret nga kap yogowa nodaing. <sup>29</sup> Monic ye Sugucnele sac-biucine mi ngagesilu moc sugu nodaicte, yogowa ye bikicte ameine bafuwacnodaicte. <sup>30</sup> Aibabangineng ingucne ailu hewacnginang ngic-ngigac bocyac yenge tapili-wawa nga hucnginengkolec aigaing. Ailu gocne yenge biyachac hegilecnglobalu homaibong. <sup>31</sup> Aime nongileng filesoc filesoc funginenonggenge aibaba noine ngani-wosaec aidabelengtewa, bikicte ameine nongilang mi weledaicte. <sup>32</sup> Wapongti lobewa himongtowa mimoctolu basowalelu baickedaicte, gacgu nongileng himongkolec momoc sowaledabelengkale, Sugucne ye wosaelu batingnubagac.

<sup>33</sup> Ngic hae-gbafocne, ilec ailu yanguc aidaing, ngenge Sugucnele tiwa noningte kpatulelu weledaingte, dameng iwa ngic-ngigac agofocngineng yengi molickelu baringte wangec aidaing. <sup>34</sup> Aime Wapongti tutumangnginang bikicte amengineng mimoctodaickale, ngic monic nosingte homadaicte, ye macina ngiyelu nosing nolubac kwesidaic. Ailu yowane tofaine fagac, yogo ngengela fulubac taockelu edocngebadaicte.

**12***Tili Asule bole*

<sup>1</sup> Ngic hae-gbafocne, Asule bole fagac, ngenge yogolec wiyac ngageningte ngagegabac. <sup>2</sup> Ngenge Wapong mi ngagesingkelu gaibong, dameng iwa gocne yengi siduc-gbong yowangineng mikac, yengela mengocnglobalu hikeibong. Hikeibong ngenge moc sugu balaibecebalu hikeibong, ngenge yogobac ngagegaing. <sup>3</sup> Ilec ailu yanguc mibe ngagedaig, Wapongte Asudi ngic monic bame ye yanguc monic mi midaicte, “Yesu ye Wapongte aalite bagewa gadaic.” Aime Tili Asudi ngic monic bame yedi “Yesu ye Sugucne” inguc nalic midaicte. Nga Tili Asudi yela bole mi badaicte, ye inguc minogale kpungkedaicte.

<sup>4</sup> Asudi kwele-madicte wiyac haicine monic-monic nolecaigac, yogo sasawa Asu moniyang, yelacni kwesicaigac. <sup>5</sup> Aime Sugucnedi bole haicine monic-monic nolecaigac, yogo sasawa Sugucne moniyang, yelacni kwesicaigac. <sup>6</sup> Ailu Wapongti yefe haicine monic-monic iwa tapiliine botoc balu nolecaigac, yogo sasawa Wapong moniyang, yelacni kwesicaigac.

<sup>7</sup> Asudi ngic-ngigac baficnubanale alingfocine filesoc filesoc bacnubalu gaganongngag tapiliine bayegengkegac. <sup>8</sup> Ailu Asudi ngic-ngigac bacnubame monicti yowa ngage-ngagemoctokolec migac. Nga monicti yowa gbolongne migac. Aime Asu moniyangti nongela



bole yogo bagac. <sup>9</sup> Monicti Asu yogowacni ngage-ngagesing sanangne bagac. Nga monicti kwele-madicté tapili yogo huc bole haicine monic-monic bagac, yogo Asu moniyang iwacni. <sup>10</sup> Asu yogowacnihac monic ye pasi haicine monic-monic damuineholec banale ngage-ngage lacnogac. Nga monic ye siduc-yowa minogale ngage-ngage lacnogac. Ailu monic ye asu haicine monic-monic wosaecebanale ngage-ngage lacnogac. Nga monic ye yowa gocne haicine monic-monic minogale ngage-ngage lacnogac. Ailu monic ye yowa yogolec fungine bafaliyenogale ngage-ngage lacnogac. <sup>11</sup> Asu ye moniyang. Ailu ye hocne bole sasawa bagalu ngage-ngageine nga angacine balaibelu tapiliine yogo alingfocine filesoc filesoc botoc balu yelegac.

*Soc moniyangte nebocine bocyac*

<sup>12</sup> Socnonggeng yogo moniyang, aime yogolec nebocine bocyac fagac. Nebocine yogo sasawa kpatulebong, soc moniyang aigac. Aime Kristola silicine ingucnehac fagac. <sup>13</sup> Asu moniyangti kpatulecnuhalu misa-lowac ingucne bacnubame soc moniyang aibeng. Nongileng Yuda ngic-ngigac, me Grik ngic-ngigac, me kwelec kwekwe aling, me mucnonggeng mikac gagabeleng, nongileng sasawadi Asu moniyang balu misa ingucne noibeng.

<sup>14</sup> Socnonggeng yogolec nebocine bocyac fagac, yogo wiyac haicine monic-monic fagaing. <sup>15</sup> Aime entacka higedi yanguc midaicte, "Na mole miyac. Ilec ailu soc nebocine monic mi aigabac." Inguc midaictewa, ye sifu soc nebocine mi aidaicte, me? <sup>16</sup> Aime entacka hedecti yanguc midaicte, "Na donge miyac. Ilec soc nebocine monic mi aigabac." Inguc midaictewa, ye sifu soc nebocine mi aidaicte, me? <sup>17</sup> Aime soc ye bucbuchac donge sugu aidecka midec, ye yowa wenuc ngagedaicte? Ye aibibiyedaicte. Me soc bucbuchac hedec sugu aidecka midec, ye wiyac hoine wenuc ngagedaicte? Ye aibibiyedaicte. <sup>18</sup> Yakumachac yanguc aigac, Wapongti ngage-ngageine nga angacine balaibelu soc nebocine sasawa filesoc filesoc soc moniyangka alingkelu taocebawec. <sup>19</sup> Aime soc nebocine sasawadi silicine moniyang sugu aidabongka midec, yenge kpatulelu soc moniyang bucbuchac wenuc aidaingte? <sup>20</sup> I yangucte, soc ye moniyang nga soc nebocine bocyac yogo nongileng.

<sup>21</sup> Aime dongedi molele yanguc nalic mi midaicte, "Na gale miyac, na neicnac nalic gadacte." Aime hodocti higele inguchac yanguc nalic mi midaicte, "Na ngekele miyac, na neicnac nalic gadacte." <sup>22</sup> Yogo miyac, soc nebocine gocne tapilingineng waicne micaigabeleng, yengi hocne socnonggang boletowabenang bacaigaing. <sup>23</sup> Aime soc nebocine gocne yenge ngagebeng alang-babaine mikac, yenge alang bacebalu hatacmac bisocebacaigabeleng. Ailu soc nebocine gocne nganicebanogale ngagebeng gameineholec aicaigac, yogo aibaba madicne balaibelu bisocebacaigabeleng. <sup>24-25</sup> Ailu socnonggeng nebocine gameine mikac aigaing, yenge bisoceanangte mi ngagecaigabeleng. Ailu socnonggeng nebocine gocne yengungtihac baficnaguningte, Wapongti socnonggeng alingkewec. Aime socnonggeng nebocine gocne yengele ngagebeng waicne aicaigac, yengebac alang bayelewec. Aime soc yengungtihac damongnaguningte inguc aiwec. <sup>26</sup> Aime soc nebocine monicti doic ngagedaicte, socine nebocine gocne yenge sasawa momochac bafickelu doic ngagegaing. Nga soc nebocine monic wac feicne badaictewa, soc nebocine sasawa yenge momochac beliyegaing.

<sup>27</sup> Aime ngengibac yanguctihac Kristole soc ailu filesoc filesoc soc nebocine aigaing.

<sup>28</sup> Aime Wapongti habuwa ngic-ngigac gocne yanguc locebawec.

Molic-molic salecebaicne locebawec.

Nga yengele lobeina siduc-mimi ngic locebawec.

Ailu yengele lobeina wewedu locebawec.

Inguc locebame, gocne yenge pasi damuineholec baningte locebawec.

Nga ngic-ngigac gocne yenge huc bole haicine monic-monic baningte Asudi yogolec kwele-madicté tapili yelewec.

Ailu aling gocne yenge ngic-ngigac baficebaningte locebawec.

Ailu ngic-ngigac gocne yenge wiyac damongkeningte locebawec.

Nga gocne yenge yowa haicine monic-monic miningte locebawec.

<sup>29</sup> Aime nongileng sasawadi salecebaicne aigabeleng, me? Me sasawadi siduc-mimi ngic aigabeleng, me? Yogo miyac. Ailu sasawadi wewedu aigabeleng, me? Me sasawadi pasi damuineholec banangte ngage-ngage balu gagabeleng, me? <sup>30</sup> Ailu huc bole haicine monic-monic banangte Asudi yogolec kwele-madicté tapili nongileng sasawa nolewec, me? Nga sasawadi yowa gocne haicine monic-monic migabeleng, me? Ailu sasawadi yowa yogolec fungine bafaliyegabeleng, me? Yogo miyac.

<sup>31</sup> Aime ngenge Asudi kwele-madicté wiyac nolecaigac, yogolec madicneinebenang banogale sanangkeli balu gadabiyeng. Ailu yefe monic taockeli edalicngebacte, yogodi kwele-madicté wiyac sasawa ewalicebagac.

## 13

### *Ago bacebalu yengele kwelenginengi angacka aiyeledabiyeng*

<sup>1</sup> Na Asule tapiliwa ngic-ngigac nga angelo yengele yowa haicine monic-monic midacte, ailu ngic-ngigac yengele kwelenedi mi angacnudaictewa, yogowabac na gonggong ingucne aukwedacte, me tambaling ingucne ucine sugu ailu gadacte. <sup>2</sup> Ailu siduc-mimile yowa milu gadactewa, me ngage-ngage sangkeicne sasawa ngage-motodacte. Ailu ngage-ngageneholec gadacte, me kupic baickenogale ngage-ngagesingne yogolecsoc faneledacte. Ailu ngic-ngigac yengele kwelenedi mi angacnudaictewabac, na ngic omane aidacte. <sup>3</sup> Nga hiye-monengne sasawa botoc balu ngic-ngigac yeledactewa, me socne bafelu\* homacka lodacte, ailu ngic-ngigac yengele kwelenedi mi angacnudaictewabac, na noine monic mi bafuwadacte, miyac.

### *Kweledi ngic-ngigac yengele angac ngagelu gagac, yogodi wiyac sasawa ewalicebagac*

<sup>4</sup> Kweledi angac ngageyelelu gaga, aibaba yogo monicti agoine monicte mi takickegac, yela aibaba madicne aigac. Ailu ye hasowacine mikac galu yeicne aibabainele yowa bocyac mi migac. Ailu soc bafefe mi aigac. <sup>5</sup> Ye pepeicne mi ailu yeicne sugu mi ngagesicnagugac. Ye aalic biyac mi ngagelu sowacnele ameine ngage-ngageina mi logac. <sup>6</sup> Ye aibaba sowacnele ailu mi beliyegac, miyac. Ye aibaba noinelebac beliyegac. <sup>7</sup> Ailu ye wiyac sasawa mibasanang aiyelegac. Ailu wiyac sasawale Wapong ngagesingkegac. Ailu wiyac sasawa fikenale ngagesilu wangec gagac, yogolec tapili-wawa mi aigac. Ailu wiyac haicine monic-monic fikecnome sanangne domagac.

<sup>8</sup> Kweledi angac ngageyelelu gaga, yogo nalic mi miyac aidaicte. Wapongte siduc-yowanonggeng yogobac miyac aidaicte. Ailu yowa monicka yefe mimi yogo miyac aidaicte. Nga ngage-ngagenonggeng gbolongne, yogo inguchac miyac aiyackedaicte. <sup>9</sup> Ngage-ngagenonggeng ailu Wapongte siduc-yowanonggeng yogo wiyac nebocine sugu noleicne. <sup>10</sup> Nga wiyac bucbuchac fagac, yogo Wapongtacni kwesimebac wiyac nebocine noleicne, yogo miyac aiyackedaicte. <sup>11</sup> Na madec galu madec kpisicnele aibaba yogolec silicka ngagesilu yowa milu gaiba. Ailu madec kpisicnele silicka ngage-ngagene wosaelu alingkelu gaiba. Gacgu ngic aibe adu-madec gaga baickeme, sugucne aibabale yefewa gacaigabac.

<sup>12</sup> Aime yanguctihac wiyac nganicaigabeleng, yogo wiyac kaguwa ingucnedi hedickeme nganicaigabeleng. Lobewa gacgu yegena haicti haic nganidabelengte. Yanguctihac wiyac nebocine ngagecaigabac. Wapongti bucbuchac ngagenelewec, na yogo ingucnehac damengi iwa, wiyac bucbuchac ngageyackedacte. <sup>13</sup> Aime wiyac habackangti faginowagac, yogo ngage-ngagesing, nga wangeckeli gaga, ailu kwele-angacka gaga. Aime wiyac habackang yengelacni wiyac moniyangti sugu feicne aigac, yogo kweledi angac ngagelu aiyelelu gaga.

## 14

### *Wapongte siduc-yowa nga yowa monicka yefe mimi*

<sup>1</sup> Ngenge kweledi angac ngageyelelu gagale gagasac bole badabiyeng. Ailu ngenge Asule bole banogale angac sugucnehac ngagedaing. Ailu ngenge Wapongte siduc-yowa banogale ngagebong feicnebenang aidaic. <sup>2</sup> Monic ye yowa monicka yefe migac, ye ngic nongilngkolec yowa mi migac, miyac. Ye Asudi yowa sangkeicne bafickeme Wapong edome, monicti yogo nalic mi ngage-motodaicte. <sup>3</sup> Aime monic ye Wapongte siduc-yowa migac, ye ngic-ngigac kwelengineng yeuckeli basanangebalu bakolocbame domagaing. <sup>4</sup> Aime ngic yowa monicka yefe migac, ye yeicne baba-sanang ainagugac. Nga Wapongte siduc-yowa migac, yedibac Yesule habu basanangebagac. <sup>5</sup> Aime ngenge sasawadi yowa monicka yefe miningte ngagebe madickegac. Ailu ngenge siduc-yowa miningte angacne sugucnehac aigac. Monicti yowa monicka yefe milu yowaine mi bafaliyedaictewa, ye ngic siduc-yowa migac, yele wamicne aigac. Nga Yesule habu basanangebanogale, ibac ye yowa monicka yefe bafaliyedaic.

**12:31:** 1Kor 14:1 **13:2:** Mat 17:20 \* **13:3:** Hibi esecne Poldi kwelengkewec, yogo nganilu iwacni kwelengkebong kwelengkebong ofewec, yengela yowa haicine monic-monic aime kweleng monicti baucyepame yaeckang aiboc. Monic yogo "socne bafedacte" nga monic yogo "dacka lobedacte". Ilec Miti gocna yowa monic-monic nganidaingte. **13:6:** Rom 12:9 **13:7:** 1Pi 4:8 **13:13:** 1Tim 1:3 **14:1:** 1Kor 12:31; 14:39

<sup>6</sup> Ngic hae-gbafocne, ngengela fulu yowa sangkeicne mibe yegengkedec, me yowa gbolongne gocne edocngedadaba, me siduc-yowa midaba, me wewedu-yowa gocne midaba midec, yogodi baficngedadec. Na ngengela fulu yowa monicka yefe sugu midaba midec, yogo babaficne mikac aidec.

<sup>7</sup> Yogo inguchac noine yanguc aigac, kpeng nga gita yeke gaganginec mikac, ailu yeke sifu ucngineckolec. Ga kpeng yogo moc kosa fitolu gita weng ucine silicine madicne mi fikedaictewa, ngic-ngigac yenge kpeng me gita yogolec hiinele kpungkedaingte.

<sup>8</sup> Ailu hudu-babale kpeng yogodi ucine madicne mi fikeme, ngic yenge hudule nalic efeckedaingte, me? <sup>9</sup> Ga inguchac yanguc ngagedamec, kwelegona yowa dondonne midamectewa, ngic-ngigac yenge yowagone nalic ngage-motodaingte. Ga kosa nga hendolongkolec midamectewa, yenge yowagone ngage-motodaingte, me? Yenge kpungkebon, yowagone sawawa moc midamecte.

<sup>10</sup> Yowa haicine monic-monic himongtowa yagowa fagac. Nga yowa monic fungine mikac, yogo mi fagac. <sup>11</sup> Na ngic monicte yowa silicine madicne mi ngage-motodactewa, yedi yowa mime yeke haicka kwilic-ngic aigabac. Aime ye inguchac nale haicka kwilic-ngic aigac. <sup>12</sup> Ngenge Asule bole banogale bocyac aingelecaigacte, ngenge Asule boledi Yesule habu basanangebacaigac, yogo banogale inguchac mamang hidabiyeng.

<sup>13</sup> Ilec monic ye yowa monicka yefe migac, ye yowa yogo nalic bafaliyenogale Wapong milockedaic. <sup>14</sup> Na yowa monicka yefe milockegabacka, asune ye milockegac, yogo noine. Nga ngage-ngagenedibac noine monic mi bafuwagac.

*Yowa monicka yefe alingkolec minoga*

<sup>15</sup> Inguc aime wenuc ainoga? O, na asunedi mitengkedacte, ailu ngage-ngagenedi inguchac mitengkedacte. Na asunedi mimiteng gee holedacte, ailu ngage-ngagenedi inguchac mimiteng gee holedacte. <sup>16</sup> Aime asugone sugudi yowa monicka yefe Wapong mitengkegacka ngicbenang yenge gale mimiteng taockelu, “yogo noine” minogale kpungkegaing. Yenge yowagone monic mi ngage-motogaing. <sup>17</sup> Aime gageuctihac Wapong mitengkegac yogo madickegac. Ailu yowagone dibac ngic agofocgone mi basanangebagac. <sup>18</sup> Na yowa monicka yefe bocyachenang milu ewalicngebabagabac. Ilec Wapong kwele-madic micnogabac. <sup>19</sup> Naneicne angacte migabac, ailu Yesule habu yengele hewacka weduyelebele yowane 5 yegena midacte, yogodi yowane monicka yefe 10 taosen ewaligac, yogo ngagegabac. <sup>20</sup> Ngic hae-gbafocne, ngenge ngage-ngagenengnti adu-hadec ingucne mi gadabiyeng. Ngenge sisipilic aibaba gegecne ingucne gadabiyeng. Nga ngage-ngageningang sugucne ingucne gadabiyeng.

*Wapongte siduc-yowa nga yowa monicka yefe mimile bole*

<sup>21</sup> Yefe-yowawa yowa yanguc kwelengkeicne fagac, “Sugucnedi yanguc migac, Kwilic ngic-ngigac yowangineng silicine monic micaigaing, nale yowa yengele micka lobe Israel ngic-ngigac yengela midaingte. Aime yefe yogowa ngic-ngigac yenge nale yowale hedec mi kwedaingte.” (Yes 28:11-12; Yef 28:49)

<sup>22</sup> Yowa monicka yefe yogo Wapongte maa monic, ailu ngic-ngigac ngage-ngagesing mikac gagaing, yengele ailu loicne fagac. Ngic-ngigac ngage-ngagesingkolec gagaing, yengele ailu mi loicne fagac. Aime Wapongte siduc-yowa yogo ngic-ngigac ngage-ngagesingkolec yengi ainingte loicne fagac. Yogo ngic-ngigac mi ngagesingkegaing, yengele miyac. <sup>23</sup> Ilec ailu Yesule habu sasawa kpaducke ngiyelu yowa monicka yefe mibong, gocne ngage-ngage-motocngineng mikac me gocne ngage-ngagesingngineng mikacti ngengele hewacka ofelu yogo nganicngedadangte. Nganicngedalu yanguc midaingte, “Ngenge kwelengingeng sifuwegac.” Yenge inguc midaingte, me? <sup>24</sup> Ailu ngenge sasawadi Wapongte siduc-yowa milu ngiyeebongka monic ngage-ngage-motocine mikac, me monic ngage-ngagesing mikacti ngengela ofedaicte. Ofeme yowanginengti ye kweleina bame yeicne bikicine nganime yogodi yowawa lodaicte. <sup>25</sup> Lome ye kwele ngage-ngageina ngage-ngage sangkelu fagac, yogo dondonne yegengkedaicte. Inguc fikelu yegengkeme, ye wafalu haic-mesuine sangkelu Wapong afeelu yanguc edodaicte, “Foinac, Wapongti ngengele hewacka gagac!”

*Alingka mitengkenoga*

<sup>26</sup> Ngic hae-gbafocne, yanguc nalic ainoga. Ngenge kpaduckelu ngiyedaingte, dameng iwa yanguc aidaing. Moniciti Wapongte gee monic holedaic. Nga moniciti yowa edocngedalu wedungeleadaic. Ailu moniciti yowa sangkeicne mime yegengkedaic. Nga moniciti yowa monicka yefe midaic, aime moniciti yogo bafaliyedaic. Ngenge yowa sasawa yogo Yesule habu basanangebanogale midaing. <sup>27</sup> Ailu gocnedi yowa monicka yefe minogale,

yaeckang me habackangti sugu midaing. Ailu yogo alingka mibong, monicti yowa fungine yogo bafaliyedaic. <sup>28</sup> Aime yowa monicka yefe yogolec bafaliye-bafaliye ngic monic iwa mi ngiyedaictewa, yowa monicka yefe mimi ngic yogo, ye tutumangnginang waicke ngiyelu yeicne kweleina sugu Wapongkolec mingagec aidaic.

<sup>29</sup> Aime Wapongte siduc-mimi ngic yaeckang me habackangti sugu siduc-yowa midaing. Inguc mibong gocne yenge ngengele siduc-yowa ngagelu wosaedaing. <sup>30</sup> Aime monicti molickelu yowa mime, yowa sangkeicne monicti ngic waickelu ngiyegac yela kwesidaictewa, ngic molickelu yowa migac, ye waickeme agoinedi midaic. <sup>31</sup> Wapongte siduc-yowa ngenge sasawadi nalic midaing. Ailu minogale milu, moniyang moniyangti alingka yowa yogo midaing. Inguc aibong ngic-ngigac sasawa yenge ngage-ngage badaingte. Ailu kwelengineng yeuckelu basanangkedaingte. <sup>32</sup> Siduc-mimi ngicte ngage-ngage yogo asuine damongkeme micaigac. <sup>33</sup> Wapong ye wiyac kosainele Wapong miyac, ye boleine alingka bame kwele-mogung bafuwacaigaing.

Yesule habu sasawa Wapongte bingec, yogolec kwelina <sup>34</sup> ngigac yenge yowa mikac waickelu ngiyecaigaing, silicine yogo ingucnehac ngengela aidabiyeng. Ngigac yenge yowa mikac waicke ngiyelu, Yesule habu yengele ngage-ngage balaibedabiyeng. Yefeyowadi yogolec inguc migac. <sup>35</sup> Yenge wiyac monicti fungine ngagenogale aiyeleme, macnginang hikelu ngawefocngineng uwayeledabiyeng. Ngigac monicti Yesule habu yengele hewacka yowa midaicte, yogo aibaba gameineholec.

<sup>36</sup> Wapongte yowa yogo ngengelacni molickelu fikewec, me? Me yogo ngengela sugu fagac, me? Yogo miyac! <sup>37</sup> Ngengelacni monicti yeicne yanguc ngagegac, "Na siduc-mimi ngic, ailu na Asule ngage-ngageholec gagabac." Ye inguc ngagelu nani hibi kwelengkecaigabac, yogo ngani-ngagec ailu yogo Sugucnele ung-yowa, inguc biyac ngage-motodaic. <sup>38</sup> Aime monic ye yowa yago wafelu hegileme ngenge ye inguchac hegiledaing.

<sup>39</sup> Ilec ngic hae-gbafocne, ngenge Wapongte siduc-yowa miningte bocyac aingeledaic. Ailu yowa monicka yefe mimi yogo mi hedickedaing. <sup>40</sup> Aime ngenge wiyac sasawa alingka nga silicina aidabiyeng.

## 15

### *Kristo ye homalu fangkewec*

<sup>1</sup> Ngic hae-gbafocne, na Siduc Madicne mibe yegengkengeme ngenge yogo ngagelu ngagepangkelu sanangne baibong gagaing. Ailu yogo hatacmac kwelengineng holegboliyengelenogale ngagesigabac. <sup>2</sup> Aime yowa mibe yegengkengeme ngagelu ngagenagesingngineng sanangne iwa fadaictewa, yogodi bikicte ameine bame wasecne aigaing. Ailu ngenge yogo hegiledaingte, ngagenagesingngineng yogo boleine mikac aidaicte. <sup>3</sup> Na molickelu Sugucnelacni yowa feicne yanguc balu ngeleiba, Kristodi nongileng bikicnonggengte ailu homawec. Wapongte hibiwa biyachac kwelengkeicne fawec, yogo fikewec. <sup>4</sup> Homame longkebong hadeng habackang aime, Wapongti bagboliyeme fangkewec. Wapongte hibiwa biyachac kwelengkeicne fawec, yogo fikewec. <sup>5</sup> Ailu ye Pita\* fikecnolu lobeina mic-tengtengfocine 12 fikewelewec.

<sup>6</sup> Yogolec lobeina ngic hae-gbafocnonggeng dzalengineng 500 ewaligac, yenge momoc ngiyeebongka ye yengele haicka fikeme nganiibong. Aime yengelacni gocne biyachac homaibong. Nga bocyacti yanguctihac gagainghac. <sup>7</sup> Ye yogolec lobeina Yakobos fikecnolu salecebaicne sasawa fikewelewec. <sup>8</sup> Ailu yogolec lobeina na fikeneleme motowec. Sabac monicti fike-fike damengine faemewa hewacina fikedaicte, na silicine ingucne aigacgube yedi sifu fikenelewec. <sup>9</sup> Aime na Wapongte habu weyebic aiyelelu gaibale ailu, na salecebaicne aiialesoc miyac. Ailu nabac salecebaicne yengele wamicne ailu gagabac. <sup>10</sup> Aime Wapongte kwele-madicti ailu ye wenucka locnume na ingucnedi yakumac gagabac. Gaebewa kwele-madicine moc mi fawec. Na yenge sasawa ewalicebalu bole bocyac baiba. Aime yogo neicne tapiliwa miyac, Wapongte kwele-madicti naholec fawec, yogodi bole yogo bawec. <sup>11</sup> Ilec ailu na me yenge, nonge yogo hocne edocngebalu wedungelecaigabeleng. Aime ngenge yogo balaibelu ngagesingkeibong.

### *Kristo fangkewec, yogo fungineholec*

<sup>12</sup> Wapongti Kristo bagboliyeme homackacni fangkewec gagac, yogo edocngebalu wedungelecaigabeleng. Inguc aime ngengelacni gocnedibac omale yanguc micaigaing, "Homackacni gboliyelu fangke-fangke yogo mi fagac." <sup>13</sup> Homackacni gboliyelu fangke-fangke monic mi fadecka midec, Kristo ye inguchac homackacni nalic mi gboliyelu

fangkedec. <sup>14</sup> Aime Wapongti Kristo mi bagbolyeme fangkedecka midec, nonge yowa edocngebalu wedungelecaigabeleng, yogo boleine mikac aidec. Aime ngengele ngage-ngagesingnineng yogo inguchac boleine mikac aidec. <sup>15</sup> Homackacni gboliyelu fangke-fangke mi fadecka midec, Wapongti Kristo mi bagbolyedec. Aime "Wapongti Kristo bagbolyewec," yogo kwesacka mibeng sanangkedecka, ibac Wapong wideckelu kwesacngic aidabeng.

<sup>16</sup> Na hatacmac mibe, homackacni gboliyelu fangke-fangke mi fadecka midec, Kristo ye homackacni nalic mi gboliyelu fangkedec. <sup>17</sup> Aime Kristodi homackacni mi gboliyelu fangkedecka midec, ngengele ngage-ngagesing yogo boleine mikac aidec, aime ngenge bikicnginengkolec gadabong. <sup>18</sup> Aime ngic-ngigac gocne yenge Kristoholec wetacke galu biyachac homaibong, yenge biyac sangkelu miyac aidabong. <sup>19</sup> Aime nongileng yakumac galu Kristole ailu himongte gaga sugu moc ngagesilu wangec galu gaga-sanang mi badabengka, ngic-ngigac yenge nongileng kwele-sowac nalic ngagedabongka. Aime nongileng kwele-sowacti ngic-ngigac sasawa yenge ewalicebalu gadabeng.

#### *Kristole ailu gboliyenoga*

<sup>20</sup> Foinac, Kristo ye homackacni gboliyelu fangkewec gagac. Ye homackacni gboliyelu fangke-fangke yogolec noine ngic-ngigac homaicne yenge molickeyelelu homackacni gboliyelu fangkewec. <sup>21</sup> Ngic moniyangti homacte yefe bawecte homac fikewec. Silicine ingucnehac ngic moniyangti yefe bame homaicne yenge homackacni gboliyelu fangkedaingte. <sup>22</sup> Ngic-ngigac sasawadi Adamte ailu homaibong, yenge sasawadi ingucnehac Kristole ailu gboliyedaingte. <sup>23</sup> Aime ngic-ngigac nongileng filesoc filesoc alingka fangkedabelengte. Yogolec noine Kristodi molickelu fangkewec. Ailu ye gacgu hatacmac kwesidaicte, dameng iwa yele alingfocine yenge gboliyelu fangkedaingte. <sup>24</sup> Inguc fikeemewa dameng motodaicte. Ye dameng iwa, gamang nga wiyac sasawa bole-yowa tapilinginengkolec himongka nga sawawa gagaing, yenge baicebame miyac aibong, nganidamongngine Wapong Mamacte mowela lodaicte. <sup>25</sup> Sugucne ye ngictau gaemewa Wapongti ngabafocine sasawa yele higeinele bagewa locebadaicte.

<sup>26</sup> Inguc locebalu dameng moto-motoinele ngaba homac, yogo baickeme miyac aidaicte. <sup>27</sup> Aime

"Wapongti wiyac sasawa yele higeinele bagewa loyackewec." (Mige 8:6)  
Ailu "wiyac sasawa" yogo yele higeinele bagewa lowec, yogo mime nongileng yanguc ngage-motonang, Wapong ye yeicne Kristole bagewa mi gagac. <sup>28</sup> Yedi wiyac sasawa Madecinele bagewa lome, Madecti Mamacte bagewa lonagulu gadaicte. Aime Mamacti wiyac sasawa Madecinele bagewa loyackewec. Ilec ailu Wapong yeuctihac galu wiyac sasawa yengele hodocngineng aidaicte.

#### *Sanangkelu ganoga*

<sup>29</sup> Gocne yenge ngic-ngigac biyac homaicne ngagesicebalu baficebanogale yengele mac balu misa lowacaigaing. Homackacni gboliyelu fangke-fangke monic mi fadecka midec, yenge pasi yogo omale aicaigaing? <sup>30</sup> Bolenonggengte ailu ngic yenge damengsoc wecnubanogale aicaigaing. Aime homackacni gboliyelu fangke-fangke yogo mi fadecka midec, bolenonggeng omale umacineholec balu gagabeleng? <sup>31</sup> Sugucnenonggeng Kristo Yesule ailu hadengsoc ngagebe wehomaacnunogale ainelecaigaing, yogo noine. Ailu Kristole ailu ngic haegbafocne ngengele wac bafelu micaigabac, yogo noine. <sup>32</sup> Na socte gagawa Efesas taonka ngic kate-sic ingucne yengeholec wenaguibeng, iwa babaficine wenucka bafuwadacka? Homackacni gboliyelu fangke-fangke yogo mi fadaictewa, socte angac balaibedabelengka. Yogolec yanguc kwelengkeicne fagac,

"Saeme homanangte ailu yakumac noba-nosing nga waing misa nodabeleng." (Yes 22:13)  
<sup>33</sup> Ngic yengi kwesacngabadaingkale, ngenge ngani-motolu gadabiyeng. Sowacne baba ngic ngengeholec gagaingka, yogodi aibabangineng madicne basowaledaingte. <sup>34</sup> Ngenge kwele-sifuc ngage-ngage hegilelu yefe dondonne balabelu bikic monic mi bafuwadabiyeng. Ngengeleacni gocnedi Wapong mi ngagegaing, yogo gameineholec aime edocngegabac.

#### *Wiyac gbolicnedi ofedaicte*

<sup>35</sup> Monicti yanguc uwadaicte mecne, "Homaicne yenge wenuc gboliyelu fangkedaingte? Ailu soc weningucne balu fangkedaingte?"

<sup>36</sup> Ga kwele-sifuc ngichenang. Wiyac kelengkeicne mi duwecaigic, yogo mi kwodulu ofedaicte, miyac. Wases homacine duweicne yogodi kwacine kwodulu ofelu gagaineholec aidaicte. <sup>37</sup> Ailu wiyac duwecaigic, yogo nosing noine mi duwecaigic. Yogo wit wases

me wasec gocne duwecaigic. <sup>38</sup> Aime Wapongti angacine balaibelu wasec moniyang moniyangte silicina balaibelu soc ngani-nganingineng haicine monic-monic bacaigac. <sup>39</sup> Soc sasawadi ngani-nganiine moniyang mi aigaing, miyac. Ngic nongileng socnonggeng yogo ngani-nganiine monic, nga sic sasawa yengele soc yogo ngani-nganiine monic. Ailu nango yengele soc yogo ngani-nganiine monic, nga kiwec-sic yengele soc yogo ngani-nganiine monic. <sup>40</sup> Aime honocmengte soc nga himongte soc, yeke ngani-nganinginec monic-monic aigaic. Honocmengte soc yogo yeicnac ngani-nganiine madicne, nga himongte soc yogo yeicnac ngani-nganiine madicne monic. <sup>41</sup> Wenacte angoc madicne yogo yeicnac ngani-nganiine monic, nga tamacnele angoc madicne yogo yeicnac ngani-nganiine monic. Ailu asocmeng yengele angoc madicne yogo ngani-nganingineng monic aigaing. Ailu asocmeng yenge angocngineng yogo ngani-nganiine monic filesoc filesoc aigaing.

<sup>42</sup> Homackacni gboliyelu fangke-fangke, yogolec silicine inguc hocne fagac. Ngic socngineng himongka locaigabeleng, yogo peleckelu dangkelu miyac aidaicte. Aime Wapongti yogo hatacmac bagboliyecaigac, yogodibac fafa-sanang faginowagac. <sup>43</sup> Soc ye howacine ailu hoine fitome himongka longkegabeleng, yogodi silicine madicne ailu gboliyelu fangkecaigac. Wiyac tapili mikac aime himongka longkeicne, yogodi tapiliholec gboliyelu fangkecaigac. <sup>44</sup> Ngic socngineng longkecaigabeleng, yogo himongte soc. Aime Wapongti socngineng bagboliyecaigac, yogo honocmengte soc. Himongte soc fagacka, honocmengte soc ye inguchac fagac. <sup>45</sup> Yogolec yowa yanguc kwelengkeicne fagac, "Adam molic-molic, ye kwele-ilucineholec ailu gagaineholec fikewec." (*Fike 2:7*) Fikeme Adam moniclobeina<sup>†</sup> fikewec, yedibac asu gagaineholec nolewec. <sup>46</sup> Honocmengte soc ye molickelu mi kwesiwec, miyac. Himongte soc yogodibac molickelu kwesimebac, honocmengte soc ye lobeina kwesiwec. <sup>47</sup> Ngic molickelu kwesiwec, ye himong lubedi baicnele himongkacni fikewec. Aime ye lelobewa kwesiwec, yebac honocmengkacni kwesiwec. <sup>48</sup> Ngic himong lubedi baicnele, himongte ngic-ngigac ye ingucnehac gagaing. Aime ngic honocmengkacni kwesiwecte, honocmengte ngic-ngigac ye ingucnehac gagaing. <sup>49</sup> Nongileng himong lubedi ngic baicne ye le silic baibeng, silicine ingucnehac honocmengkacni ngic ye le silic balu gadabelengte.

#### *Honocmengte silic ailu honocmengka ganoga*

<sup>50</sup> Ngic hae-gbafocne, soc sac-biuckolecti Wapongte ngani-damongte mole-damoc nalic mi badaicte, miyac. Wiyac peleckelu dangkedaicte, yogodi wiyac fafa-sanang faginowagacte mole-damoc inguchac nalic mi badaicte, inguc hocne edocngembangabac. <sup>51</sup> Yowa monic sangke-sangke fagac, yogo mibe yegengkeme ngagening. Nongilangkocni gocne yenge mi homaebongkahac, Sugucnedi nongileng ngic-ngigac homaicne yengeholec momochac bafaliyecnubame silicine monic aiyackedabelengte. <sup>52</sup> I yangucte, dameng moto-motoina kpeng monicti hiyame wiyac sasawa biyachenang pilatac bacaigac, me donge-balang baducaigabeleng, silicine yogo ingucne fikedaicte. Yedi ngic-ngigac biyachac homaibong, yenge bagboliyeebame yenge fangkelu gaga dongke-dongkeine mikac badaingte. Inguc fikeme nongileng inguchac bafaliyecnubame silic monic aidabelengte. <sup>53</sup> Wapongti wiyac howacine ailu homaicne ye gaga dongke-dongkeine mikac ngakpi ingucne holecnodaic. <sup>54</sup> Aime Wapongti wiyac howacine nga homaicne gaga dongke-dongkeine mikac ngakpi ingucne holecnodaicte. Yowa yago Wapongte hibiwa kwelengkeicne fagac, yogo noine fikedaicte, "Gagadi gbelong ailu homac gbokeme miyac aiwec." (*Yes 25:8*)

<sup>55</sup> "Homac, ga gbelong aidamecte, me? Yogo miyac! Sangalagone yogo weni?" (*Hos 13:14*)

#### *Yesuholec wetackelu gbelong aidabelengte*

<sup>56</sup> Homacte sangala yogo bikic. Aime Wapongte yefe-yowa ngagelu mi balaibegabiyengtewa, bikic yogo tapili lacnogac. <sup>57</sup> Aimebac Wapongti yefe bafuwanoleme nongileng Sugucnenonggeng Yesu Kristole ailu gbelong aicaigabeleng. Ilec nongileng Wapong kwele-madic micnogabeleng. <sup>58</sup> Ngic hae-gbafocne kwelenedi ngengele angac ngagegabac, ngenge Sugucnele bole bacaigaing, yogo noineholec aicaigac, ngenge yogo ngagegagang. Ilec ngenge mi tulickedabiyeng, ngenge damengsoc sanangne domalu Sugucnele bole basuguledabiyeng.

## 16

### *Wapongte bingec yengele babafic*

<sup>1</sup> Wapongte bingec Yerusalem gagaing, yengele ailu hiye-moneng yanguctihac kpaduck-egabeleng, yogolec yowa yanguc mibe, na Galata habu yowa edocebalu weduyeleiba, ngenge yogohac aidaing. <sup>2</sup> Ngenge Sondasoc monengngineng filesoc filesoc bacaigaing, yogowacni tofaine heuckelu macnginang lobong ngiyedaic. Inguc aibong na fudacte, dameng iwa kpkapducte boletowa mi banoga. <sup>3</sup> Ngenge inguchac ngic gocne bawosae-cebadaing. Aime nani fulu hibi kwelengkelu kwele-madicta moneng momoc yelelu salecebabe Yerusalem iwa hikedaingte. <sup>4</sup> Aime na ngagebe nalic yengeholec hikenogale silic aidaictewa, na momochac hikedaicte.

*Sugucnedi ngageme nani fudacte me Timotidi fudaicte*

<sup>5</sup> Na Masedonia yefe hikenogale ngagelu Masedonia falockelubac ngengela fudacte. <sup>6</sup> Fulu ngengeholec ngiyebe motome, baficnubong nebocka me nebocka hikedaicte. Aime ngengeholec dameng dalicne gadacte mecne. Entacka gadacte ingucne, ibac tilo-gbelong damengka ngengeholec gadacte. <sup>7</sup> Na yanguctihac ngengela yefe moc falockelu hikenogale mi ainelegac. Sugucnedi ngageneledaictewa, ingucne, iwa fulu dameng dalicne ngengeholec ganogale ngagesigabac. <sup>8</sup> Ailu Efesas himongka gabe Pentikos dameng motome hatacmac hefaliyelu hikedaicte. <sup>9</sup> Yanguctihac bole sugucnebenang noineholec banogale yefe fikelu fagac. Aime yanguctihac ngabafocne bocyac gagaing.

<sup>10</sup> Timoti ye ngengela fudaictewa, ngengileng hewacka lobong galu hangoc mi aidaic. Ye na ingucnehac Sugucnele bole balu gagac. <sup>11</sup> Nngengelacni monicti ye lobe mi holecnodaic. Ye hatacmac nala hefaliye kwesinala mime, ngenge yefeine bafuwalu kwele-mogungka salebong kwesidaic. Na ye nga ngic hae-gbafocnonggeng gocne yengele wangec gagabac.

<sup>12</sup> Ngic hae-gbanonggeng Apolos funale nani bocyac kpfafengkelu yanguc ngageiba, yedi ngic hae-gba yengeholec ngengela fudaicte. Aime ye biyac funale mi aicnowec. Ye galu sawaine monic fikeme nalic fudaicte, Yele inguc migabac.

*Mibasanang yowa*

<sup>13</sup> Ngenge deboc-gboli galu damongnagulu efeckelu ngagesingkelu sanangne domadaing. Ngenge hangoc mikac galu sanangne gadabiyeng. <sup>14</sup> Ailu ngenge wiyac sasawa ainogale kweledi angac ngagenagulu aidaibiyeng.

<sup>15</sup> Stefanas nga golowacfocine yenge Akaia himongka\* molickelu bole yogolec noine kwele-hefaliyec aibong. Yenge kwele-hefaliyec ailu molickelu Wapongte bingec baficebabong, ngenge ngic-ngigac yogo ngagecebaibong. Ngic hae-gbafocne, kpfafenggebalu yanguc migabac, <sup>16</sup> Ngic-ngigac ingucne nga gocne yengeholec galu boletowa balu gacaigaing, ngenge yengele yowa balaibedaing. <sup>17</sup> Stefanas nga Fotunatus ailu Akaikus, ngic yogo yengi ngengele ameine nala kwesiibongte ailu beliyegabac. <sup>18</sup> Ailu yenge nale asu nga ngengele asungineng momochac yeuckebong madickeibeng. Ilec ngenge ngic ingucne yengele madicnengineng yogolec mibong yegengkedaic.

<sup>19</sup> Asia prowins kwelina Yesule habu gagaing, yenge wenac-madicnengineng lobong ngengela fugac. Ailu Akwila nga Prisila, nga ngic-ngigac yekele macka Yesule habu kpaduckecaigaing, yenge Sugucnele wacka wenac-madicnengineng lobong ngengela fugac. <sup>20</sup> Ailu ngic hae-gbafocnonggeng sasawadi wenac-madicnengineng lobong ngengela fugac. Ngenge Wapongte bingec gagaingte aibabaine balaiibelu molewa babac ainagulu<sup>†</sup> wenac-madic minagudaing.

<sup>21</sup> Na Poldi wenac-madic yowa yago neicne molenedi kwelengkegabac.‡ <sup>22</sup> Monic ye Sugucnele kweleinedi mi angackedaictewa, ye Wapongte aalicta bagewa gadaic. O Sugucne, ga welec.

<sup>23</sup> Sugucnenonggeng Yesule kwele-madicti ngengeholec fadaic. <sup>24</sup> Ngic-ngigac Kristo Yesuholec wetackelu gagaing, nale kwele-angacti sasawa ngengela fadaic.

Yogo foinac.

**16:1:** Rom 15:25-26; 2Kor 8:1-9    **16:5:** Sale 19:21    **16:6:** Rom 15:24    **16:9:** Sale 19:8-10; 2Kor 2:12    **16:10:** 1Kor 4:17    **16:11:** 1Tim 4:12    **16:12:** 1Kor 3:6    \* **16:15:** Akaia himong yogo Roma prowins monic, nga Korin taon, yogo Akaia himong yogolec kapital.    **16:16:** 1Kor 1:16    **16:19:** Sale 18:2,18,26    † **16:20:** Polle damengka yenge molewa babac ainogale ngagelu bafaliyelu yanguc kwelengkewec, "muducnagudaing."    ‡ **16:21:** Poldi hibi kwelengkenogale mime ngic monicti yele yowa ngagelu kwelengkelu gawec. Aime moto-motoine sugu yeuctihac kwelengkeme ngic-ngigac yenge ngagebong hibi yago noine Poldi kwelengkewec ingucne aiwec.    **16:22:** Gal 1:8-9

## **Poldi Korin**

### **Habu Yengele Hibi Monic Hatacmac Kwelengkewec**

#### *Mimi-yegeng yowa*

Korin yogo taon sugucne monic wacineholec fawec. Taon yogo himong monic wacine Akaia me Grik iwa fawec. Roma ngic-ngigac homacne nga Yuda ngic-ngigac gocne iwa gaibong. Ngic-ngigac bocyacti lec-welec ailu lanac-ganac ailu gaibong.

Molickelu Poldi Korin iwa Yesule Siduc Madicne mime yegengkeme ngic-ngigac gocne yenge Yesu ngagesingkeibong. Ngagesingkelu yogolec lobaina aibaba sowacne aibongte, Poldi hibi sanangne monic kwelengkeyelelu saleme hikewec. Hikeme balu wafeibong. Ailu gocne kwelengineng hefaliyeibong. Nga gocne yenge yele yowale takicebawec. Ilec ailu hibi yago kwelengkeyelewec. Yesu homackacni gboliye fangkelu honocmengka feme hifa 27 ngama ingucne motome, hibi yago kwelengkewec.

Dameng gocna Poldi bole-moniyangfocine yengeholecte ngagelu “nongele” milu kwelengkewec. Nga dameng gocna yeicnele sugu ngagelu yowa ingucne “nongele” milu kwelengkewec. Ailu dameng gocna yeicne nga Korin ngic-ngigac yengeholecte ngagelu yowa ingucne “nongele” milu kwelengkewec.

#### *Yowa yago hibi nebocina fagac*

1:1–11 Wenac-madic yowa nga mimitengte yowa

1:12–2:13 Korin ngic-ngigac yengi aibongte ailu Pol ye kwele-umackolec aiwec. Ailu sifu Poldi yengeholec kwele-moniyang ainogale ngagewec

2:14–6:10 Polle bole noine yogo yanguc, Wapongti dodofic gbolicne ngic-ngigac yengeholec bawec, yogo mime yegengkewec

6:11–7:16 Poldi Korin ngic-ngigac yengele wenuc ngagewec, yogo mime yegengkewec

8:1–9:15 Ibu lonogale bamockedaing

10:1–12:21 Salecebaicne noine yenge bolengineng maaineholec bagaing, yogo mime yegengkewec

13:1–13 Poldi ngage-ngageine nga yowaine sanangne milu wenac-madicine edocebawec

#### *Molic-molic yowa*

<sup>1</sup> Na Pol, Wapongti bawosaecnume Kristo Yesule salecebaicne aigabac. Na nga ngic hae-gbanonggeng Timoti, noki hibi yago Wapongte habu Korin taonka gagabiyeng, ailu Wapongte bingec sasawa Akaia prowinswa gagaing, ngengela logabelec. <sup>2</sup> Mamacnonggeng Wapong nga Sugucnenonggeng Yesu Kristo, yekele kwele-madic nga kwele-mogungtowadi ngengela fadaic.

#### *Wapong ye baba-sanangte fileine*

<sup>3</sup> Sugucnenonggeng Yesu Kristo yele Mamac Wapong, ye mimitengineholec. Yedi Mamacnonggeng ailu ye nongileng kweleine sowalecaigac. Ailu ye Wapongnonggeng ailu baba-sanang sasawa, yogolec fileine. <sup>4</sup> Nonge umackolec gabeng yedi basanangnubacaigac. Yogodi basanangnubame nonge yele baba-sanang balu ngic-ngigac umacnginengkolec yengela hikelu nalic basanangebadabelengte. <sup>5</sup> Kristo ye doic ngagewec, nonge doic silicine ingucne umacnehac ngagecaigabeleng. Ilec Wapongti Kristole ailu umacnehac basanangnubagac. <sup>6</sup> Doic ngagecaigabeleng, yefe iwa ngenge basananggebame wasecne aigaing. Ailu Wapongti basanangnubacaigac, yefe iwa ngenge basananggebabeleng. Inguc basananggebabeng ngenge doicka sanangne domagaing. Ngengele doic nga nongele doic, yogo silicnginec moniyang aigaic. <sup>7</sup> Nongileng momochac doic ngagecaigabeleng, ingucnehac baba-sanangnonggeng bagabeleng. Yogo noine ngagepangkegabeng.

#### *Homacte alingcacni bamoctocnubawec*

<sup>8</sup> Ngic hae-gbafocne, Asia prowinswa nongela umac fikeme doic ngageibeng, ngenge yogolec mi kpungkeningte ngagelu edocngebagabeleng. Umactowadi tapilinonggeng welu bawame nalic mi domalu kwelenonggang yanguc ngageibeng, “Nonge homadabelengte hocne.” <sup>9</sup> Aime Wapongti ngic-ngigac homackacni bagboliyecebacaigac, ye ngagepangenangte yedi homacte alingcacni baicnubawec. Nongele tapili yogo andoine miyac, ye yogo edalicnubanale inguc aiwec. <sup>10</sup> Wiyac gocnedi wehomacnubanogale aibong yedi baicnubawec. Ailu ye lobewa gacgu ingucnehac homackacni baicnubadaicte.



Ailu baicnubanowagac, nonge yele inguc ngagesingkelu wangep gagabeleng. <sup>11</sup> Ailu yogo fikennale ngenge mimilocka baficnubadabiyeng. Aime Wapongti kwele-madicté wiyacine noledaicté, yogo fikeme ngic-ngigac bocyacti yenge yogo nganilu nongele ngagelu Wapong mitengkedaingte.

*Polle fungine*

<sup>12</sup> Ngic-ngigac yengele haicka nga ngengele haicka momochac Wapongte aibaba madicne nga gaga gbagbacne gagabeleng. Ailu kwele ngage-ngagenonggeng mime yegengkeme himong yagowa inguc galu ngagebe feicne aicaigac. Aime kwele esecnele ngage-ngage-motoc balaibelu ngengele hewacka mi gagabeleng, miyac. Wapongte kwele-madicti yefe edalicnubame balaibelu gagabeleng. <sup>13-14</sup> Yowa kwelengkecaigabeleng, ngenge yogo sasawa wafelu ngage-motogaing. Wiyac kpungke-kpungkeine monic mi kwelengkecaigabeleng. Yanguctihac ngenge nebeyang ngagecnubaihong. Aime na ngagebe lobewa ngengi bucbuchac ngage-motodaingte. I yangucte, ngenge nongele ailu nalic ngagesilu wacnonggeng bafegaing. Aime Sugucnenonggeng Yesule damengka nongi ingucnehac ngengele ngagesilu wacngineng bafedabelengte.

*Yesule habu Korin iwa mi yugucebawec*

<sup>15-16</sup> Na molickelu yogo ngagesilu yanguc ngageiba, na ngengela yefe fulu falockelu Masedonia prowinswa hikedacte. Hikelu hatacmac ngengela hefaliyelu kwesidacte. Kwesibe ngengi baficnulu Yudeya himongka salecnudaingte. Na inguc aidactewa, molickelu ngengela fulu hatacmac hefaliyebé, ngengi nale ailu alecine yaeckang kwele-madic ngagedaingte. Aime sifu inguc mi aiiba.

<sup>17</sup> Na yogo molickelu alingkelu lobeina moc kosa hegileiba, me? Ailu na kwele esecna yefe bolene damongkelu “oc, oc,” milu hefaliyelu “miyac, miyac,” yogo dameng moniyangkahac micaigabac, me? Yogo miyac! <sup>18</sup> Foinac, Wapong ye yowa mimiine balaibecaigac. Aime nonge ingucnehac yowa edocngebacaigabeleng, iwa “oc” nga “miyac” nalic mi kpatulecepadabelengte. <sup>19</sup> Ailu na nga Sailas ailu Timoti, nonge Yesu Kristo Wapong yeicne Madecine yogo edocngebalu wedungeleibeng, ye “oc” nga “miyac” mi kpatulewec, miyac. Yela “oc” yowa sugu fagac. <sup>20</sup> Wapongti wiyac nolenale mipangkewec, ye Madecinele ngagesilu “oc” miwec. Inguc mime Madecinele ailu mimipangngine noine fikewec, ailu fikelu hikedacte. Fikelu hikeme “yogo foinac” mitengkebeng Wapongti wac feicnehac bagac. <sup>21</sup> Wapong yeuc ngenge nga nonge momochac bawosaecnubalu Kristola wetacnubame domagabeleng. <sup>22</sup> I yangucte, yele ainangte Tili Asu kwelenonggang lowec. Aime yogodi Wapongte maa aigac.

<sup>23</sup> Aime Korin taonka mi fuiba, yogolec fungine yanguc, na ngengele hewacka yowa sanangnehac midackale ailu, hegilelu mi fuiba. Yowane yogo Wapong yeuctihac widecnucaigac. Na kwesac aigabacka wecnudaic. <sup>24</sup> Aime ngenge wenuc ngagesingkegaing, yogo mi milu yoingngebalu gagabeleng, miyac. Ngenge Sugucne ngagesingkelu sanangne domalu gagaing. Inguc domalu beliyeningte ngenge nga nonge momochac bole balu gagabeleng.

## 2

<sup>1</sup> Ilec ngage-ngagenedi yanguc ngagesigabac, na hatacmac kwele-umac bafuwangedackale ailu, mi fudacte. <sup>2</sup> Na molickelu kwele-umac bafuwangedactewa, ngen-gelacni madi belic-belic bafuwaneledaicté? Kwele-umackolec ngengi sugu belic-belic bafuwaneledaingte. <sup>3</sup> Aime ngengela fube gocne ngengi belic-belic bafuwanelecaigaing, yogolec ngagebe madickegac. Ngenge kwele-umac bafuwangedackale ailu, hibi monic kwelengkengeleiba. Na ngengele yanguc ngage-benangkegabac, belic-belic nala fadaictewa, ngenge sasawadi beliyedaingte. <sup>4</sup> Na kwelenedi ngengele aineleme kwele-umac sugucne balu hiyalu hibingingng kwelengkengeleiba, yogodi umac ngelenogale mi kwelengkeiba, miyac. Na kwelenedi ngengele homacnehac angacnugac, yogo ngageningte hibi yogo kwelengkeiba.

*Monicte bikic hegilenoga*

<sup>5</sup> Ngic kwele-umac bafuwawec, ye kwele-umac na sugu mi bafuwanelewec, miyac. Ye ngenge sasawa kwele-umac bafuwangelewec. Yogolec bocyac mi midacte, yogo efecnemac migabac. <sup>6</sup> Aime ngenge bocyacti ngic yogo bikicinele ailu mibating biyac aicnoibong, yogo sugu andoine. Aime yanguctihac ingucne hatacmac mi aicnodabiyeng. <sup>7</sup> Ye kwele-umacine sugucnebenang yogoholec galu umacti baumaledaickale, ngenge bikicine hegilelu mibasanang aicnodabiyeng. <sup>8</sup> Inguc ailu kwele-angacngineng edalilu

basanangkedabiyeng, yogo sanangne milu edocnggebagabac. <sup>9</sup> Ngenge sasawadi yowane balaibecaigaing me miyac, yogo ngagenogale hibine kwelengkengleiba. <sup>10</sup> Ailu ngenge ngic monicte bikic hegiledaingtewa, nani inguchac yele bikic hegiledacte. Nga nani bikic monic hegileiba, yogo Kristole haicka ngengele ailu yele bikic hegileiba. <sup>11</sup> Aime Satangti kwesacnubame wawedabelengkale, inguc aidabeleng. Ye ngage-ngageine alingkecaigac, yogo ngagegabeleng.

<sup>12</sup> Aime Toas taonka fuiba, dameng iwa Kristole Siduc Madicne edocebalu weduyelenogale Sugucnedi yefeine biyac bafuwaneleyec. <sup>13</sup> Fulu ngic hae-gbane Titus basackelu asuned i kwele-mogung mi bafuwame wenac-madic milu locebalu Masedonia prowinswa hikeiba.

*Salecebaicne yengele bole hoine madicne*

<sup>14</sup> Aime Wapongti hudu ewalime nonge Kristoholec wetackelu gabeng bacnubame damengsoc yeicne alingka mengocnubame nganibong yogodi feicne aigac. Inguc aime macsoc hikebeng, Yesule siduc yogo hoine madicne ailu yogodi bolenonggang fikelu hikecaigac. Ilec Wapongte kwele-madic micnogabeleng! <sup>15-16</sup> Kristoholec wetackelu gabeng hoinonggang madicne Wapongta fecaigac. Ngic-ngigac wasecne aidaingte, yengele hewacka yogodi hoine madicne gagaineholec ailu gaga yelegac. Nga dac-sanangte yefe balaibecaigaing, yogo yengele hewacka howac hoine fitolu yogodi homac yelegac. Ma ngicti bole yogo nalic badaicte? Ngic Kristoholec wetackelu gagac, yedi sugu nalic badaicte.

<sup>17</sup> Ngic homacne yenge hiye-monengtowa bafuwaningte ngagelu Wapongte yowa micaigaing. Nonge yenge ingucne mi aicaigabeleng, miyac. Wapongti salecnubame Kristoholec wetackelu gabeng kwelenonggang dondonne faemewa Wapongte haicka yele yowa mibeng yegengkecaigac.

### 3

*Poldi bolele fungine miwec*

<sup>1</sup> Nonge wacnonggang hatacmac bafegabeleng, me? Me ngic-ngigac gocne yenge nongele fungine kwelengkebung balu ngelenoga, me hibi ingucne ngengelacni banoga, me? Yogo miyac! <sup>2</sup> Ngenge ngengungtihac nongele hibi aigaing. Aime Kristodi hibi yogo kwelenonggang kwelina biyachac kwelengkewec. Aime ngic-ngigac sasawa yenge hibi yogo wafe-ngagec ailu gacaigaing. <sup>3</sup> Aime nonge ngengela bole babeng ngengi Kristole hibi aigaing, yogo yegena biyachac fikewec. Ailu hibi yogo pen-misainedi mi kwelengkeicne, miyac. Wapong gagaineholec yele Asudi hibi yogo kwelengkewec. Ailu ye tafe posadi baicne, iwa mi kwelengkewec, miyac. Yogo tafe ingucne ngic-ngigac kwelengingang kwelengkeicne fagac.

*Dodofic gbolicne*

<sup>4</sup> Kristoholec wetacke galu yanguc ngagesigabeleng, Wapongti boleina locnubalu yogo damongkedaicte. <sup>5</sup> Ailu nonge yogo ngagelu yanguc nalic mi midabelengte, "Nonge nalic nongungtihac bole yogo banogalesoc aigabeleng." Miyac. Bole banangte tapili, yogo Wapongtacni kwesicaigac. <sup>6</sup> Yedi baficnubame dodofic gbolicnele mole-bafic gagabeleng. Dodofic yogo posawa kwelengkewec, yogo ingucne miyac. Asudi dodofic yogo kwelenonggang kwelengkewec. Aime yowa yogo posawa kwelengkeicnedi dondonne nalic mi balaibebong homacka locebagac. Aime Asudibac bagbolyecnubagac.

<sup>7</sup> Wapongti yowa yogolec hibi posawa kwelengkewec, yowa yogodi homac bafuwayelewec. Aime yowa yogo wac feicne angocineholec kwesiwec. Mosesle haic-mesudi angoleme Israel ngic-ngigac yenge haic-mesuina donge hilaningte aibibiyeibong. Yogolec lobeinabac angoc tapiliine wawec. <sup>8</sup> Mosesle bole yogo wac feicne angocineholecti molickeweckacni tapiliine wawec. Aime Tili Asule bolele wac feicne angocineholecti wiyac yogo hatacmac ewaligac. <sup>9</sup> Mosesle boledi yowawa locnubalu sowacnenonggang mimoctocaigac, yogodi wac feicne angocineholec aiwec. Ailubac Asule bolele yefe bafuwanoleme dondonne aigabeleng, yogolec wac feicne angocineholecti hatacmac feicnehac ailu ewaligac. <sup>10</sup> Inguc aime wac feicne angocineholec gbolicne yogodi, wac feicne angocineholec esecne fawec yele wac bawagac. <sup>11</sup> Wiyac wac feicne angocineholec esecne kwesiwec, yogolec angocine biyachac wame miyac aiwec, noime. Aime wiyac fafeginowagac, yogolec wac feicne angocineholecti wiyac esecne ingucne hatacmac ewaligac.

*Sugucnele tapili nga wac feicne*

<sup>12</sup> Aime wiyac fafeginowagac, yogo ngagesilu hangoc mikac bole balu wangep gagabeleng. <sup>13</sup> Moses haic-mesuinele angocine, yogolec tapiliine waemewa, ye yanguc ngagewec, "Israel ngic-ngigac yenge pasi yogo mi nganidaing." Ilec haic-mesuine kpolucti someckewec. Aime nongibac inguc mi aicaigabeleng, miyac. <sup>14</sup> Yengele ngage-ngage fongkewec. Aime yanguctihac wewedufocngineng dodofic esecnele yowa wafeyelecaigaing, dameng iwa wiyac kpoluc ingucne sanangne domalu ngage-ngagengineng hedickelu gagac. Aime ngic-ngigac yenge Kristoholec wetackegaingka, wiyac yogo baickeme gagaing. <sup>15</sup> Oc, yanguctihac wewedufocngineng yenge Mosesle yowa wafeyelebung, wiyac kpoluc ingucne yogodi kwelengineng hedickelu gagac. <sup>16</sup> Aime monic ye kwele-hefaliyec ailu Sugucne-holec wetackegacka, wiyac kpoluc ingucne yogo baickeme miyac aigac. <sup>17</sup> Sugucne ye Asu, ailu Sugucnele Asudi ngic monickolec game ngic ye mucine mikac gagac. <sup>18</sup> Aime nongileng sasawa haic-mesononggeng mi someckelu gabeng, Sugucnele wac feicne angocineholec dongenonggeng iluc nganicka nganicaigabeleng. Silicine ingucne kwelu bafaliyeme ye ingucnehac aicaigabeleng. Aime yele wac feicnedi gaganonggang sugulelu sawegac. Sugucne ye Asu, aime Asudi boleine bame pasi yogo fikegac.

#### 4

##### *Kristo yegena mibong yegengkedaicte*

<sup>1</sup> Wapongti kwele-sowac ailu Asule bole yogo nolewec. Ilec ailu tapili-wawa mi aicaigabeleng. <sup>2</sup> Nonge aibaba sangkeicne gameineholec sasawa biyachac hegileibeng, yogo micheloc nalic mi aingeledabelengte. Ailu Wapongte yowa bafac-tafalic ailu nalic mi edocngedabelengte, miyac. Yowa noine ailu dondonne fikelu yegengkenale, nonge Wapongte haicka yowaine mibeng ngic-ngigac sasawadi wosaecnubalu kwele ngage-ngagenginang nalic ngage-motogaing. <sup>3</sup> Aime Siduc Madicne micaigabeleng, yogo ngagebung ngage-ngagengineng hedickegacka, yenge dac-sanangte yefewa gagaingte, yengela inguc hedickegac. <sup>4</sup> Aime dameng yagolec wapong, yogo Aleng Sugucengineng, yedi ngic-ngigac bacebame ngage-ngagesinggineng mikac gagaing. Ailu yenge Kristole wac feicnele Siduc Madicnedi bacebame yegengkecaigaing, yogo mi nganiningte ngage-ngagengineng hedickegac. Ailu Kristo ye Wapong edalicnubagac. <sup>5</sup> Aime yowa yanguc edocebalu weduyelecaigabeleng, Yesu Kristo ye Sugucne. Nonge nongileng siduc mi micaigabeleng, miyac. Yesule ailu ngengele kwelec kwekwe ailu gagabeleng. <sup>6</sup> Wapongti yanguc miwec, "Kundungkacni angoc fikena."

(*Fike 1:3*)

Wapong ye hocne kwelenonggeng bame angolelu gagac. Ailu Kristo ye Wapongte wac feicne angocineholec yogo ngage-motonoga. Ngage-ngage-motoc yogodi yele haic-mesuwacni kwesilu kwelenonggeng bame angolegac.

##### *Tapilitowa feicne iwa fedabeleng*

<sup>7</sup> Nongileng sanangne miyac, yogo hebec ingucne gagabeleng. Aime Wapongte wac feicne yogolec tapili feicnebenang. Ailu yogo moneng-mafa ingucne kwelenonggang loicne fagac. Tapilitowa yogo yelacni kwesicaigac, yogo nongelacni miyac. Aime ngic-ngigac yengi yogo ngage-motoningte yedi yogo kwelenonggang lowec. <sup>8</sup> I yangucte, umac haicine monic-monicti nebec nga nebockacni kwesilu fikenolecaigac, yogodi mi hefecnubacaigac. Aime ngage-yaec aigabeleng, aimebac tapilinonggeng mi wawebenangkegac. <sup>9</sup> Ngic yengi welu yebicnubabong, Sugucnedi mi hegilecnubacaigac. Yenge wecnubabong wawelu sifu mi miyac aicaigabeleng. <sup>10</sup> Yesule gagadi socnonggang fikelu yegengkenale ailu, Yesu homawecte doic yogo socnonggang ingucnehac fikeme gagabeleng. <sup>11</sup> Yesule gagadi himong-socnonggang fikelu yegengkenale ngic-ngigac yenge damengsoc Yesule ailu nonge gbolicne gaebengka socnonggang homacka logaing. <sup>12</sup> Ilec ailu homac ye nongela bole inguc balu game, gagadi ngengela inguchac boleine balu gagac.

<sup>13</sup> Yowa monic yanguc kwelengkeicne fagac, "Na ngage-ngagesingkolec gaibale ailu miiba."

(*Mige 116:10*)

Aime nonge inguchac kwelenonggang ngage-ngagesingkolec galu ngagesingkelu yowa milu gagabeleng. <sup>14</sup> Wapongti Sugucne Yesu homackacni bagboliyewec. Aime yedi hocne homackacni bagboliyecnubalu Yesuholec taocnubame nonge ngengeholec momochac bacnubadaicte. Ailu yeicne emewa locnubame domadabelengte, yogo ngagegabeleng. <sup>15</sup> Umac sasawa yogo baficngabanogale ailu fikecaigac. I yangucte, Wapongte kwele-madicti taockeme taoc ngic-ngigac yengela kwesime ngic-ngigac bocyac yenge kwele-madic sugucnehac ngagelu Wapong mitengkebong wac feicne badaicte.

*Homalubac gagawa hikenoga*

<sup>16</sup> Ilec nongileng kwelenonggeng mi wagac. Socnonggengi tapili-wawa ailu miyac ainogale aiyemewa, Wapongti sifu hadengsoc kwelenonggeng bame gboliyelu gagac. <sup>17</sup> Aime umac nga doic ngagecaigabeleng, yogo dameng bangkacnemac fadaicte, yogodi wiyac sugucne mi aigac. Yogodi yefenonggeng bame gaga-sanangte tapili nga wac feicne sugucnehac ewalime balu gagabeleng. <sup>18</sup> Wiyac dongedi nganicaigabeleng, yogo damengngine kwesime miyac ainowagac. Aime wiyac dongedi mi ngani-nganiine, yogodi fafa-sanang fadaicte. Ilec wiyac dongedi mi ngani-nganiine, nongileng dongenonggeng yogowa hilalu gagabeleng. Nga wiyac dongedi nganicaigabeleng yogo hegilegabeleng.

## 5

*Honocmengte soc holenoledaicte*

<sup>1</sup> Aime nonge yanguc ngagegabeleng, himongte soc yogo fale ingucne. Fale yago heliyelu musungkeme, Wapongti socnonggeng gbolicne, yogo mac ingucne monic moledi mi baicne honocmengka biyachac lowec fanolegac. Mac yogodibac fafa-sanang faginowagac. <sup>2</sup> Inguc aime nongileng yanguctihac falewa malacnonggeng gogoweme gaebengka, angacnonggengi honocmengte mac holenoleme haunangte ainolegac. <sup>3</sup> Foinac, yedi yogo holenoleme haudaictewa, asunonggeng someckeme senggang mi domadabelengte. <sup>4</sup> Aime nongileng fale yagowahac malacnonggeng gogoweme gabeng, umac ainoleme fale yogo baickelu moc ganogale mi ainolegac. Gagadi homac gbokenale ngagelu, ye mac gbolicne feina holeme haunale ainolegac. <sup>5</sup> Wapong yeuctihac soc yogo banangte bacnubame madickeibeng, yedi hocne Tili Asu nolewec, aime yogodi mimipangte noine aigac.

<sup>6</sup> Ilec ailu socti macnonggeng aime iwa kwilic galu Sugucnele macka mi gagabeleng, nongileng inguc ngagelu ngegebocka mi gagabeleng. <sup>7</sup> Nongileng yanguctihac ngagenagesingte yefe balaibelu wiyac dongedi ngani-nganiine mi balaibecaigabeleng. <sup>8</sup> Inguc galu ngageboc mikac gagabeleng. Aime yefeine monic fadecka midec, nonge himong-socnonggeng yago nalic hegilelu Sugucnela hikelu macnonggeng gbolicna gadabeng. <sup>9</sup> Yogolec yanguc sanangne ngagegabeleng, yagowa me honocmengka yeholec gabeng kweleine madickenale nongileng boleine balu gagabeleng. <sup>10</sup> Nongileng sasawa Kristole wowosaele damengka fedabelengte. Febeng yedi dameng iwa aibabanonggeng madicne nga sowacne ailu gaibeng, yogolec ameine filesoc badunoledaicte.

*Sugucnele habuwa gaga*

<sup>11</sup> Sugucne ye damuineholec, nonge yogo ngagegabelengte hangocnubame alang bacnocaigabeleng. Ilec ailu ngic-ngigac ngagesingkegaing, yogowa kpfungebanogale bole balu gagabeleng. Aime Wapongtibac funginenonggeng dondonne biyac nganilu ngagegac. Aime na ngagebe ngenge inguchac kwele ngage-ngageningang funginenonggeng ngagemotolu gagaing. <sup>12</sup> Nonge wacnonggeng hatacmac mi bafegabeleng, miyac. Gocne yengi kwesilu wiyac dongedi nganicaigaing, yogolec socngineng bafecaigaing. Nga kwelengingte noinebac mi bafecaigaing. Ngic ingucne yengi kwesilu wacnonggeng bawabong nalic yanguc edocebadaingte, "Nonge Pol nga bole-moniyangfocine yengele ngagebeng feicne aigaing." <sup>13</sup> Nonge ngic haicka kwele-sifuc aigabelengka, yogo Wapongte ngagelu aigabeleng. Nga ngage-ngage-motockolec gagabelengka, yogo ngengele ngagelu, ailu gagabeleng.

<sup>14</sup> Ngic moniyangti ngic-ngigac sasawa yengele ame balu homawec. Aime yefe yogowahac sasawadi homayackebong, inguc wosaelu ngagegabeleng. Ilec ailu Kristo ye kweledinedi angac ngagegac, yogo bacnubayackeme bole balu gagabeleng. <sup>15</sup> Kristodi ngic-ngigac sasawa yengele ailu homawec. Aime ngic-ngigac gbolicne gagaing, yengileng gagale ngagelu hatacmac mi gadaing, miyac. Yenge Sugucnele ngagelu gadaing. I yangucte, yedi yengele ailu homame Wapongti ye hatacmac bagboliyeme fangkewec.

*Kwele-moniyang bafuwawolewec*

<sup>16</sup> Ilec ailu yanguctihac doma felu kwele esecnele aibaba balaibelu ngic-ngigac mi wosaecaigabeleng. Ailu esecne molickelu kwele esecna ngage-ngage ingucna Kristo wosaebeng. Nga yanguctihac miyac. <sup>17</sup> Ilec ailu monic ye Kristoholec wetackelu gagacka, Wapongti ye bafickeme gbolicne fikelu gagac. Gaga esecnele wiyac yogo biyachac miyac aiwec. Hei, gaga gbolicne yogodi fikelu fagac hocne. <sup>18</sup> Yogo sasawa Wapongtacni kwesicaigac. Kristodi amenonggeng badume, yefe yogowa Wapongti nongilengkolec kwele-moniyang bafuwawec. Bafuwame kwele-moniyangte yowa mibeng yegengkenale

bole noleme gagabeleng. <sup>19</sup> I yangucte, Wapongti Kristoholec game himongtowa yagolec ngic-ngigac yeholec kwele-monyang ainingte aibaba inguc aiwec. Aime ye ngic-ngigac yengele bikic hegilelu hatacmac mi ngagesiwec. Hegileme ngic-ngigac yeholec kwele-monyang ainingte, kwelenonggang yowa yogo hocne lome mibeng yegengkecaigac.

<sup>20</sup> Ilec nonge Kristole mic-yowa babeng, Wapongti micnonggeng basanangkeme Kristole ailu ngic-ngigac yanguc edocebacaigabeleng, "Ngege Wapongkolec kwele-monyang ainingte." <sup>21</sup> Kristo ye bikic mikac. Aime Wapongti nongileng bikic lacnome bikicte ameine yogowa fewec. Feme nongileng yeholec wetackelu Wapongte ngic-ngigac dondonne ailu nalic gagabeleng.

## 6

### *Bolele umac nga kwele-madic*

<sup>1</sup> Nonge Wapongkolec momoc bole balu ganangte yanguc sanangne edocngebabagabeleng, ngege Wapongte kwele-madic baibong, yogo moc wickedaingkale ailu, edocngebabagabeleng. <sup>2</sup> Wapongti yogolec yanguc miwec,

"Dameng madicne aime na hedec kwelu mimilogone ngegeiba. Ailu na bikicte ameine baiba, dameng iwa baficguiba." (Yes 49:8)

Ngagegaing, yakumac dameng madicne aigac, aime ye yanguctihac bikicte ameine bame wasecne aigabeleng.

<sup>3</sup> Aime ye bole noleme ngic-ngigac yenge yogo mibong sowaleme kwelenginengti hegiledaingkale ailu, nonge yengele yefewa okac mi locaigabeleng. <sup>4</sup> Ailu Wapongte mole-baficfocine gagabeleng, yogo aibabanonggeng sasawa ngic-ngigac edalicebalu fangkelu feina sanangnehac gagabeleng. Nonge doicka sanangke-benangkelu umac haicine monic-monic bafuwabeng, umacti hefecubame gacaigabeleng. <sup>5</sup> Ngic yengi hududi wecnubacaigaing, ailu muc-macka locnubacaigaing, ailu nongele ailu aalic hendolongkolec bafuwacaigaing. Nonge boletowa balu deboc-gboli galu nosing-sawe aicaigabeleng. <sup>6</sup> Nonge gbagbacne domalu ngage-ngage-motockolec galu, ulucne ailu ngic-ngigac baficebagabeleng. Ailu Tili Asuholec wetackebeng kwelenonggengti angac kwesacine mikac ngagelu gagabeleng. <sup>7</sup> Ailu yowa noine milu Wapongte tapili balu gagabeleng. Gaga dondonne yogodi hudule wiyac ingucne, yogo mole-folenonggeng nga kananonggengti\* balu damongkecaigabeleng.

<sup>8</sup> Gocne yengi wac feicne nolecaigaing. Nga gocne yengi nongele sowacne micaigaing. Ailu gocne yengi lobe-yowa ainolecaigaing. Nga gocne yengi mitengnubacaigaing. Nga gocne yengi nongele yowale kwesac-yowa micaigaing. Aime sifu nonge yowa noine migabeleng. <sup>9</sup> Bocyacti nonge ngic omane wacnubacaigaing. Ailu sifu bocyacti ngagecnubagaing. Nonge homanogale ailu sifu gbolicne gagabeleng. Ngic yengi hududi wecnubabong sifu mi homacaigabeleng. <sup>10</sup> Ailu ube-hobec ngagelu sifu damengsoc beliyelu gagabeleng. Nonge waweweine galu sifu ngic-ngigac baficebabeng yenge kwelele wiyac madicneholec aigaing. Wiyacnonggeng mikacbenang gagabeleng. Ailu sifu Wapongte wiyac sasawa fanolegac. Silic ingucne gabeng ngic-ngigac yenge funginenonggeng nalic ngage-motodaingte.

### *Kweledi angac ngagenagulu ganoga*

<sup>11</sup> Ngic-ngigac Korin taonka gagaing, ngegele ngagelu yowa yegenaga migabeleng. Ailu nonge yengele kwelenonggengti angac sugucnehacbenang ngagegabeleng. <sup>12</sup> Aime ngege nongele ngagelu kwelengineng hefegaing. Nga nongibac ngegele ailu sifu kwelenonggeng mi hefegabeleng, miyac. <sup>13</sup> Adu-madecfocne, na yakumac ngegele yanguc migabac, nongi ngegele aicaigabeleng, silicine ingucnehac ngengi hefaliyelu kwelenginengti nongele angac sugucnehacbenang aingeledaic.

### *Kandung nga angoc*

<sup>14</sup> Ngege ngic-ngigac gocne ngage-ngagesing mikac, yengeholec mi wetackedabiyeng. Gaga dondonne nga yefe-yowa wewe yeke yowa nalic hefedabiyecte, me? Yogo miyac! Nga angoc nga kundung yeke kwele-monyang nalic aidabiyecte, me? <sup>15</sup> Kristodi Aleng Sugucnengineng† yeholec kwele-monyang nalic aidaicte, me? Nga ngic-ngigac

**5:18:** Rom 5:10    **5:19:** Rom 3:23-25    **5:21:** Hib 4:15    **6:5:** 2Kor 11:23-27    **6:6:** 1Tim 4:12

\* **6:7:** Folenonggeng, yogolec yanguc ngagecaigabeleng, yogodi tapiliholec wenagunoga. Kananonggeng, yogolec yanguc ngagecaigabeleng, yogo hudule wiyac damongkebang asa-baba ingucne ailu bole badaicte.    **6:9:** 2Kor 4:10

**6:13:** 1Kor 4:14    **6:14:** Efs 5:11    † **6:15:** Grik yowawa Aleng Sugucnengineng wacine monic Belial kwelengkeicne. Wac yogolec fungine yogo "wiyac omane" me "basowalecaigac".

ngage-ngagesingkolec yenge ngic-ngigac ngage-ngagesing mikac, yengeholec ngage-ngagening moniyang nalic aidaingte, me? <sup>16</sup> Ailu Wapongte ibu-mac nga siduc-gbong yekele hewacka yowa nalic hefenoga, me? Yogo miyac! I yangucte, nongilengti Wapong gagaineholec, yekele ibu-mac. Ilec ngenge ngic-ngigac gocone ngage-ngagesing mikac, yengeholec mi wetackedabiyeng. Wapongti yogolec yanguc miwec,

“Na macne yengela balu yengeholec galu hewacnginang lec-welec aidacte. Galu yengele Wapong aibe yengi ngic-ngigac focne aidaingte.” (*Dep 26:12; Yer 32:38; Esek 37:27*)

<sup>17</sup> Ailu Sugucnedi yanguc migac,

“Ngenge yengele hewacka galu wiyac monic wonongkolec bakpaduc mi aidabiyeng, ngenge yenge hegilecebalu baickelu ngengilangkac hikelu gadabiyeng. Ngenge inguc aidaingtewa, na ngengele angacnume bacngebadaacte.” (*Yes 52:11; Esek 20:24,41*)

<sup>18</sup> “Ailu na ngengele Mamacngineng aibe, ngengi nale adu-madecfocne aidaingte, Sugucne Tapilitowa Fileinedi inguc migac.” (*2Sm 7:14*)

## 7

<sup>1</sup> Agofocne kwelenedi ngengele angac ngagegabac, Wapongti inguc mipangkewec. Ilec nongileng wiyac sasawadi asunonggeng nga socnonggeng hedickeme wonongkolec aicaigac, yogo suweyackelu gbagbacne aidabeleng. Ailu Wapongte hangocnubame alang bacnogabelengte ailu angacnubame molickelu Wapongte bingec ganangte, yogo bamoc-toyackelu sugulelu sanangedabeleng.

### *Kwele-madic yowa*

<sup>2</sup> Ngenge kwelengineng basugulelu angac ngagenoledabiyeng. Nonge ngic me ngigac monic aibaba sowacne mi aicnoibeng. Ailu monic mi basowaleibeng. Ailu kwesacka wiyacngineng monic mi ewalicebaibeng. <sup>3</sup> Ngengele yowa mimocnongale mi midacte, miyac. Ngenge nongele kwele kwelina gagaing, yogo biyachac edocngebaiba. Ailu homadabelengte me gadabelengte, yogo ngenge nga nonge momochac aiyackedabelengte. <sup>4</sup> Na hangoc mikac yowa edocngebalu ngengele ngagebe feicne aime micaigabac. Ailu nonge umac haicine monic-monicta feina gaebengka ngengi nonge basanangnubaibong. Ilec belic-belic sugucnehac ngagegabac.

### *Titusdi siduc balu kwesiwec*

<sup>5</sup> Foinac, nonge Masedonia prowinswa hike sulumbeng, umac haicine monic-monicta fikenoleme ngiye-domacnonggeng madicne monic mi fikewec. Ngic-ngigac yengi weyebic ainoleibong, aime kwelengngengti hangocnubame gaibeng. <sup>6</sup> Aime Wapong ye ngic-ngigac kwele-umackolec gabong basanangebacaigac, yeuctihac Titus saleme nongela kwesiwec, yogodi basanangnubawec. <sup>7</sup> Ailu Titus kwesiwec, yogo sugu miyac, ngengi wenucka mibasanang aicnoibong, ye yowa yogo edocnulu basanangnume ngageiba. Ailu ngenge nganicnunogale angac ngageibong. Aime umac yogolec ailu ubengineng hobeleme kwele-sowac ngageibong. Ailu ngenge wenucka nale angac sugucnehac ngageibong, ye yogo momochac edocnume beliyeba.

### *Siyeckelu gaibong*

<sup>8</sup> Hibine kwelengkeiba, yogodi kwele-sowac bafuwangelewec. Na yogo ngagelu dameng bangkacnemac ngageboc aiba. Nga yanguctihacbac ngageboc mi aigabac. <sup>9</sup> Na ngengele kwele-madic ngagelu beliyegabac. I yangucte, ngenge kwele-sowac sugu ngagedabong yogo mi beliyedaba. Ngenge kwele-sowac ngagelu kwele-hefaliyec aibong. Ngenge Wapongte angac nga ngage-ngage balaibebong kwele-sowac bafuwangelewec. Inguc ainingte yanguctihac molickelu nongele hibile ailu umacngineng fikewec, yogo biyachac miyac aiwec. <sup>10</sup> I yangucte, Wapongti kwele-sowac bafuwangeleme kwele-hefaliyec ailu wasecne aidaingte, yogo kwelenginengti ngageboc mi aigaing. Himongte kwele-sowac, yogodibac homac bafuwangedaicta.

<sup>11</sup> Ngagegasing, Wapongti kwele-sowac ingucne bafuwangeleme yogodi ngengela noine yanguc fikengelewec, ngenge tatakic mikac aigaing. Ailu aibaba bikicineholecte hangocngebame, yogowacni baickegasing. Ailu yenge bikic yogolec aibong ngenge aalicngebagac. Ailu mibating aingeleningte mimedec aigaing. Ailu nganicnunogale aingelecaigac. Ailu nale dogbac aicaigaing. Ailu ngicti bikic aiwec, ye mibating aicnoibong. I yangucte, gagangineng yogodi bucbuchac gbagbacne fikeme nganicaigabeleng. <sup>12</sup> Ilec na molickelu hibi kwelengkengleiba, yogo ngic monicta agoine basowalewec, Ngic yogo me agoine,

yekele ailu hibi yogo mi kwelengkeiba, miyac. Ngenge Wapongte haicka nongele kwelengingti angac ngagecaigaing, yogo fikelu yegengkeme ngengungtihac yogo nganimotoningte ailu inguc kwelengkengelaiba. <sup>13</sup>Yogodi basanangnubame gagabeleng.

### *Titus hefoleibong*

Galu taockelu yanguc ngageibeng, ngenge sasawadi Titusle kwele nga asuine yogo bamogungkelu tapili gbolicne bafuwacnoibong. Nonge yogo ngagelu belic-belic sugucnehac ngagebeng yogodi basanangnubawec. <sup>14</sup>Na Titusle haicka ngenge mitenggebalu yanguc edoiba, ye ngengela fulu nganicngabame na mi gamenuwec. Nonge ngengela fulu yowanonggeng sasawa yogo noine miibeng, silicine ingucnehac Titusle haicka mitenggebabeng noine fikewec. <sup>15</sup>Ye ngengele ngagelu kweleinedi angac sugucnehac ngagegac. Ye ngengela fume ngengi mac holecnolu hangoc ailu dengdengngabame yowaine ngageibong, ye yogo mi ngigeckewec. <sup>16</sup>Ngenge sanangne gagaingte na ngageboc mikac belyegabac.

## 8

### *Yerusalem yengele babafic*

<sup>1</sup>Ngc hae-gbafocne, Wapongti Masedonia habu gagaing, yenge kwele-madic wenucka aiyeleme gagaing, yogo edocngabanogale ngagegabeleng. <sup>2</sup>I yangucte, yenge umac feina doic ngagelu waweweinebenang galu sifu belic-belic homacnehac ngagelu ibu umacnehac loibong.\* <sup>3</sup>Yenge wiyac fayelewecsoc yogo loibong. Aime loibong, yogo sugu miyac, yenge wiyac sugucnehac ewalilu loibong. Inguc nganilu mibe yegengkegac. Aime nani aibe yenge mi loibong. Yenge yengungtihac inguc ngagelu loibong. <sup>4</sup>Yenge sanangne mikpafeng ainolelu yanguc edocnubaibong, "Nonge inguchac yengeholec kwele-madicte aibaba taockelu Wapongte bingec yenge baficebanogale ngagegabeleng." <sup>5</sup>Inguc miibong yanguc ngageibeng, yenge molickelu moneng ngagesilu lodaingte. Aimebac yenge molickelu Wapongte ngage-ngage nga angac balaibelu yengileng Sugucnele molewa lonagui-bong. Silicine ingucnehac nongela taockelu inguchac ainoleibong.

<sup>6</sup>Inguc aibong, Titus ye kwele-madicte ibule bole yogo lonogale ngengela fungkewec, ye bole yogo bamoctonale mipangkelu sanangne edoibeng. <sup>7</sup>Ngengela wiyac sasawa umacnehac fagac. I yangucte, ngage-ngagesing nga yowa madicne mimingineng fangelegac. Ailu ngage-ngage-motoc nga bolele angac ailu nongele kwele-angacngineng fangelegac. Inguc fagacte ngenge inguchac kwele-madicte wiyac sugucnehac lodaing.

<sup>8</sup>Na yowa yago ung-yowa mi edocngebababac, miyac. Masedonia habu yenge bole yogo banogale angacngineng fagac. Aime yenge ingucne ngenge ngic-ngigac yengele kwelengingti angac noine ngagegaing me miyac, yogolec lokwesacka locngebababac. <sup>9</sup>Ngenge Sugucnenonggeng Yesu Kristo yele kwele-madic ngagegaing. Ye honocmengka wactowaineholec galu ngengilengte ailu macine hegilelu waweweinebenang ailu gawec. Ye waweweine aiwecte ngengileng kwelele wiyactowanginengkolec aibong.

<sup>10</sup>Ngenge hifa bageina bole yogo sugu molickelu mi baibong, miyac. Ngenge molickelu angac biyachac ngagelu mipangkeibong. Ilec ngenge ibu loningte nale ngage-ngage taockebe yogodi baficngebadaic. <sup>11</sup>Ngenge molickelu efeckelu bole yogo kwele-angacka baibong, ingucnehac mamang hidulu yanguctihac bolengineng nalic aime yogo bamoctodain. <sup>12</sup>Aime ngenge efeckelu wiyacngineng fangelegacsoc ibu lodaingte, yogo Wapongte haicka madickegac. Nga wiyacngineng mi fangeledaictewa, yogolec yowaine mikac. <sup>13</sup>Ngc-ngigac gocne yenge umacngineng mikac gadaingte. Nga ngen-gibac baficebanogale ibu lolu umackolec gadaingte. Aibaba ingucnedi mi madickegac, miyac. Ngenge gagangineng silicine moniyang ailu ganingte migabac. <sup>14</sup>I yangucte, dameng yanguctihac ngengela wiyac bocyac fagac, wiyac yogolec nebocine ngic-ngigac wiyac monicte kpungkecaigaing, yenge baficebadain. Aime lobewa gacgu ngenge wiyac monicte kpungkedaingtewa, iwa yengela wiyac bocyac fadaicte, yogodi ngenge inguchac baficngebadaingte. Ngenge inguc ailu gagangineng silicine moniyang gadaingte. <sup>15</sup>Yogolec Wapongte hibiwa yanguc kwelengkeicne fagac, "Ngc nosing bocyac bawec, yele nosing andoine aicnowec. Nga efecnemac bawec, yebac ingucnehac nosing andoine aicnowec." (Wah 16:18)

### *Hiye-moneng madicne damongkenoga*

**8:1:** Rom 15:26; 2Kor 9:1-2 \* **8:2:** 1 Korin 16:1 iwa Poldi ibu yogolec kwelengkewec. Yesule habu Yerusalem iwa umackolec gaibong. Ilec ibu yogo yenge yeleadaicte. **8:7:** 1Kor 16:1-2 **8:9:** Mat 8:20; Filip 2:6-7 **8:12:** Mrk 12:43-44

<sup>16</sup> Aime nonge ngengela kwele-madicka bole bacaigabeleng, silicine ingucnehac Wapongti Titusle kwele kwefangkeme ye ngengela boleine kwele-madicka balu gawec. Yogolec Wapong mitengkegabac. <sup>17</sup> Ye ngengela bole banale mikpafeng aicnobeng kweleine biyachac lolu yeicne mibasanang ainagulu angac sugucnehac ngagelu efeckelu ngengela fudaicte.

<sup>18</sup> Aime ngic hae-gbanonggeng monic, ye Siduc Madicne mime Yesule habu sasawa gagaing, yenge yele mibong madickecaigac, ye salebeng Titusholec momoc fudabiyecte. <sup>19</sup> Sugucnedi wac feicnehac banale ailu baficebanogale edalicebalu nonge kwele-madicte ibu kpaduckelu gagabeleng. Yesule habu yengi ngic yogo bawosaeibong, ye nongeholec momochac ibu yogo balu hikenoga. <sup>20</sup> Aime ibu sugucne yogo wenuc damongkelu gagabeleng, monicti yogolec lobe-yowa midaickale, nongileng momochac balu hikenangte angacnubagac. <sup>21</sup> Sugucnele haicka sugu miyac, ngic-ngigac yengele haicka momochac aibaba madicne aibeng madickegac. <sup>22</sup> Ailu nonge ngic hae-gbanonggeng monic salebeng yekeholec fudaingte. Ngic yogo ye bole haicine monic-monicti angacine sugucnehac ngagecaigac, nonge dameng bocyac yogo nganilu kwelenonggeng madickewec. Ailu ye ngengele ngageme feicne aigac.

<sup>23</sup> Aime ngic yogo nga ngic hae-gbanonggeng monic yeke Yesule habu yengele salecebaicne galu bolenginac Kristole wac bafecaigabiyec. Aime na Titusle yanguc miibe ngageibong, ye bole agone aime noke momoc ngengela fulu bole bacaigabelec. <sup>24</sup> Ilec ngenge Yesule habu yengele haicka angacngineng edalicebalu kwelenginengti yengele angacngabadaic. Aime nonge ngengele ngagelu yowa madicne miibeng, yogodi kwesac mi aidaic.

## 9

### *Ibule yowa*

<sup>1-2</sup> Aime na Wapongte bingec yenge baficebanogale kwelengkengelegabac. Ngenge bole yogo banogale biyachac efeckebong yogo ngagegabac, hibi yagowa yowa yogo nalic hegiledackalesoc. Aime Masedonia yengele haicka ngengele yanguc mitengngabacaigabac, "Ngic hae-gbafocnonggeng Akaiia gagaing, yenge bole yogo banogale hifa bageina biyachac efeckebong."\* Ailu ngengi wiyac yeleningte kwele-efec bafuwaibong, homacne yenge ngengele siduc yogo ngagelu kwelengineng fangkeme yenge inguchac ainogale ngagesibong.

<sup>3</sup> Aime nongi mitengngabaibeng, yogodi noine mikac aidaickale, ngic hae-gbafocnonggeng yogo salecebabeng fugabiyeng. Ailu yowa biyachac miibeng, ngenge yogo ingucnehac Wapongte bingec baficebanogale efeckelu gadabiyeng. <sup>4</sup> Aime gacgu funogale mibe, Masedonia ngic gocne yenge naholec fulu nganicngababong ngenge ibule bole yogowa mi efeckedaingtewa, ibac nonge nga ngenge momochac gamenubadaicte. <sup>5</sup> Ilec ailu nani ngic hae-gbafocnonggeng sanangne edocebabe yenge molickelu ngengela funingte ngagegabac. Yenge fulu baficngababong ngenge kwele-madicte wiyac lobong hikenogale biyachac mipangkeibong, yogo bamockelu kpaduckelu lolu gadabiyeng. Aime ngenge kwele-umacka ibu lodaingale ailu, ibungineng kwele-madicka lonogale ngic hae-gbafocnonggeng salecebabeng fugabiyeng.

### *Kwele-madicka wiyac yelenoga*

<sup>6</sup> Monic ye nosing efecnemac bolewa duwedaicte, ye noine efecnemac badaicte. Nga monic ye nosing bocyac duwedaicte, ye noine umacnehac badaicte, ngenge yogo ngagesidaing. <sup>7</sup> Silicine ingucnehac monic ye kwele-madicka ngic-ngigac wiyac yeleme, Wapongti yele kwele-angac ngagecnodeaicte. Ilec ngenge ngagebocka me ngic-ngigac gocne yengi kpafengngababong ngic-ngigac wiyac yeledaingte, yogodi mi madickedaicte. Ngenge kwelenginang filesoc wiyac monic biyac ngagepangkeibong, yogo yeledaing. <sup>8</sup> Inguc aibong Wapongti kwele-madicka nalic baficngabalu game wiyac fangeledaicte, aime ngenge damengsoc woc-wiyacte mi kpungkedaingte. Inguc ailu ngenge bole madicne balu nalic baficebadaingte. <sup>9</sup> Yogolec yanguc kwelengkeicne fagac, "Ye angacine balaibelu wiyac homacnehac botoc balu ngic-ngigac waweweine yelegac.

Yele pasi dondonne, yogo damengsoc faginowagac." (Mige 112:9)

<sup>10</sup> Wapongti wasacne bafuwame bole fileinedi wasac yogo duwegac. Ailu nosingngine inguc bafuwacaigac, ye ngengele wasac ingucnehac bafuwalu noba-nosingngineng bocyac bame sawedaicte. Aime ngenge aibabangineng dondonne, yogolec noine bocyac taockeme taoc ailu hikedaicte.

8:24: 2Kor 7:13-14

\* 9:1-2: Korin taon yogo Akaiia prowins iwa fawec.

9:1-2: 2Kor 8:1-7

9:6: Ynn 11:24-25

9:10: Yes 55:10



*Yesule habu yengele babafic*

<sup>11</sup> Ngenge kwele-madicka baficebalu wiyac yelenogale aibong ngengela wiyacngineng bocyac fikedaicte. Inguc aime nonge kwele-madicta wiyac yogo ngic-ngigac yeleheng yenge Wapong kwele-madic micnodaingte. <sup>12</sup> Ngenge babafic bole balu, yogodi Wapongte bingec yenge wiyac monicte kpungkecaigaing, yogo baficebadaingte. Yogodi socngineng sugu mi baficebadaingte, miyac. Yogo Wapongta inguchac kwele-madic homacnehac micnodaingte. <sup>13</sup> Ngenge yowa balaibelu ngic-ngigac babaficte bole yogo bacaigaing, yenge yogo nganidaingte. Inguc nganibong ngenge Kristole Siduc Madicne mibong yegengkeme, yenge nga ngic-ngigac sasawa momochac baficebacaigaing, yogo ngagelu Wapongte wac bafedaingte. <sup>14</sup> Aime Wapongte kwele-madic sugucnehac ngengela fagacte yenge ngengele angacebame ngengele milockedaingte. <sup>15</sup> Wapongti kwele-madicka wiyac nolewec, yogo Yesu hocne. Yele funginele yowa wenuc minogale kpungkegabeleng. Yogolec mitengkenang.

## 10

*Salecebaicne aibabangineng*

<sup>1</sup> Ngic-ngigac gocne yengi nale yanguc micaigaing, "Pol ye nongilengkolec yawa galu hangocka yowa ulucne micaigac. Nga dalicka hikelu yowa sanangne hangoc mikac kwelengkelu lome hikecaigac." Kristo ye ulucne. Ailu ye kwele-efecka yefe yogo balaibegac. Ilec na aibaba ingucne kpafengebanogale aineleme <sup>2</sup> foloineholec edocngebagabac. Na ngengela fulu hangoc mikac yowa sanangne edocngebanogale mi ainelegac. Ilec aibabangineng aidaingtewa, yowa sanangne mibele mi aidaing. Aimebac na ngengela fube ngic gocne yengi nale yanguc micaigaing, "Pol ye kwele esecnele aibaba balaibelu boleine balu gagac," yenge yowa sanangne yogo hangoc mikac nalic edocebadacte.

<sup>3</sup> Nonge soctepecka gagabeleng, yogo noine. Aimebac hudu yuwenac yogo kwele esecnele aibaba mi balaibegabeleng, miyac. <sup>4</sup> Lebe-maleku nga hudule wiyac balu gagabeleng, yogo sockacni miyac. Yogo Wapongtacni ailu yogo tapiliineholec. Aime nonge yogo balu sowacnedi oda ingucne aigac yogo hembalackelu kwesac ngage-ngage baickegabeleng. <sup>5</sup> Aibaba nga ngage-ngage feicne sasawa yogodi Wapongte ngage-ngage gbolongne yogo wecaigac, nonge yogo momochac baickegabeleng. Baickelu ngage-ngage yogo Kristole yowa balaibeningte hefelu bageina logabeleng. <sup>6</sup> Aime ngenge nongele yowa balaibebong yegengkegac, dameng iwa gocne yowa kwekwe aigaing, yogolec ameine sasawa badunangte efeckelu gagabeleng.

<sup>7</sup> Aime moniciti yanguc ngagedaicte, "Na Kristole ngic gagabac." Ye yeuctihac inguc ngagepangkedaictewa, nonge Kristole ngic ye ingucnehac gagabeleng. Yogo inguchac yeuctihac ngagesidaic. Ngenge inguc ngagesibong, ye nga nonge aibabanonggengiti ngengela fikelu yegengkecaic. <sup>8</sup> Sugucnedi bole-yowa tapiliineholec nolewec, yogo ngenge basowalecnebanogale mi nolewec, miyac. Ye ngenge basanangnebanogale tapili nolewec. Na tapiline yogolecsoc fagac, ailu yogo ngagebe feicne aigac. Inguc taockelu migabacte ailu, yogolec mi gamenudaicte. <sup>9</sup> Ailu hibi kwelengkecaigabac, yogodi hangoc sugucne fikengelenale mi ngagesicaigabac. <sup>10</sup> Aime gocne yengi yanguc micaigaing, "Polle hibi yogo yowa dacine nga umacineholec. Aimebac ye kwesilu nongilengkolec galu sockapec tapili-wawa galu yowa mime, ngic-ngigac yenge yowa omane milu hegilegaing." <sup>11</sup> Ngic-ngigac inguc micaigaing, yenge yanguc ngagesidaing, nonge dalicka galu yowa dacineholec hibiwa kwelengkecaigabeleng. Aime iwa fulu ngengeholec galu aibabanonggeng aicaigabeleng. Nga hibiwa kwelengkeicne yogo silicine moniyang aiboc gagabeleng.

*Bole-yowa silicina balaibenoga*

<sup>12</sup> Gocne yengibac yanguc micaigaing, "Nani nongileng hewacka sugucne gagabac." Yenge yogo mingagec ailu wosaenagucaigaing. Ngic ingucne yenge yengileng sugu wosaecnagulu maaine locaigaing, yenge wiyac monic mi ngage-motolu yefe lilo-gaing. Aime nonge domalu madi nongileng feicne gagac, yogo nalic mi midabelengte. <sup>13</sup> Wapongti bawosaecnubalu bole-yowa nolame nonge yogo balaibelu ngengela inguchac fuibeng. Aime nonge Wapongte maa yogo sugu balaibelu bafelu midabelengte. Maa yogo ewalilu socnonggeng nalic mi bafelu midabelengte. <sup>14</sup> Nonge molickelu ngengela fulu Kristole Siduc Madicne edocngebaibeng, yogo Wapongte maa mi ewaliwec. Nga ngengela mi fudabengka, bolenonggengte yowa-siduc yogodi maaine ewalime soc bafefe aidecka. <sup>15</sup> Aime gocne yenge bole biyachac baibong, nonge iwahac hikelu nongi molic-molic ailu feicne ainangte milu monic mi bacaigabeleng, miyac. Nonge yanguc ngagelu

wangec gagabeleng, ngengele ngage-ngagesingti sugulelu sanangkeemewa, nongele bole yogo ngengele inguchac sugulelu sanangkedaicte.

<sup>16</sup> Aime ngenge ngage-ngagesingka sugulelu sanangkebung, nonge ngengele lobewa mac-himong gocne falegac, iwa inguchac hikelu Siduc Madicne mibe yegengkeyeledaicte. Inguc ailu iwa ngic monicte bolele molic-molic ailu feicne aigabeleng mi midabelengte.

<sup>17</sup> Aime

“Monic ye mime feicne aidaicte, ye Sugucnele mime feicne aidaic.”

(Yer 9:24)

<sup>18</sup> Sugucnedi ngic monic bafegac, yele ngageme ngic madicne aigac. Nga monic ye yeuctihac socine bafegac, yedibac ngic madicne mi aigac.

## 11

### *Salecebaicne kwesacine*

<sup>1</sup> Ngenge ngageebongka na kwele-sifuc yowa monic mibe tatakic mikac ngageningte aigabac. <sup>2</sup> Wapongti wiyac yeicne sugu ainale bocyac aicnocaigac, silicine ingucnehac nani ngengele bocyac ainelecaigac. I yangucte, ngigac monic ye ngic bingecne biyachac micnoibong gacaigac, nani silicine ingucnehac Kristola ngenge ngigac-bingecne gbagbacne locongobabe ganingte ngagesigabac. <sup>3</sup> Ngenge Kristo ngagepangkelu gbagbacne galu kweledi yele sugu angac ngagegaing. Aime hemadi Ewa kwesackelu lokwesacka lowec. Silicine ingucnehac monic gagacka, gagangineng gbagbacne nga Kristole angac sugu ngagecaigaing, yogolec ngage-ngage ewalicngebadaickale, hangocnugac. <sup>4</sup> Na aibabangineng monic nganicaigabac, yogo nalic mi aigac. Nongi Yesule siduc milu edocngobalu wedungeleibeng. Aime monicte kwesilu yogo hegilelu Yesu silicine monicte siduc milu edocngobalu wedungelecaigac. Me ngenge yele yowa mi wosaelu moc sugu kwele-madicka ngagecaigaing. Ailu ngenge Asu biyachac baibong, yogo hegilelu asu silicine monic ngic yengelacni kwele-madicka bacaigaing. Me nonge Siduc Madicne milu edocngobalu wedungeleibeng. Ailu yogo hegilelu siduc madicne silicine monic mime, ngenge yogo inguchac mi wosaelu moc sugu kwele-madicka ngagecaigaing.

<sup>5</sup> Naneuc yanguc ngagesigabac, ngic yenge salecebaicne feicnebenang wacebagaing, na yengele bagewa mi gagabac, miyac. <sup>6</sup> Yowa mimile tapili yenge ingucne nala bocyac mi fagac, yogo noine. Aimebac ngage-ngage-motoc yogo andoinebenang fanelegac. Nonge ngage-ngage-motoc yogo yefe haicine monic-monicka ngengele biyachac bafuwabeng nganiibong.

<sup>7</sup> Ngengi feicne ainingte bawacnaguiba. Na hiye-monenngte ailu Wapong yeicne Siduc Madicne mi mibe yegengkengeme gaiba.\* Ilec ngagebung na bikickolec aigabac, me? Yogo miyac! <sup>8</sup> Aime na ngengele bole babele Yesule habu gocne yengi hiye-moneng neleibong. Nelebong yenge mi baficebalu hise ngic ingucne balu ngenge baficngebaiba, yogo noine. <sup>9</sup> Ailu na ngengeholec galu wiyac gocnele kpungkeiba. Kpungkelu umacne yogo ngengelacni ngic monic mi lacnoiba, miyac. Ngic hae-gbafocnonggeng Masedonia prowins iwacni kwesiibong, yengibac woc-wiyacte kpungkeiba, yogo sasawa baficnuyackeibong. Inguc aibong na umac monic mi ngeleiba. Ailu monic mi ngededacte. <sup>10</sup> Aime ngic-ngigac Akaiia prowinswa gagaing, yengelacni wiyac monic mi balu naneicne aibaba feicnele mibe yogo nalic mi hedickedaingte. Foinac, Kristole yowa noine nala fagacte yowa noine migabac. <sup>11</sup> Na omale babafic monic neleningte mi ainelegac? Na kwelenedi ngengele angac mi ngagegabac, ngenge inguc ngagegaing, me? Na kwelenedi ngengele angacnugac, yogo Wapongti ngagegac. <sup>12</sup> Ngenge ngic gocne wiyac yelebong, yenge nongeholec soc moniyang ainingte ailu socngineng inguchac bafenogale aidaingte. Yenge inguc midaingkale, na aka yogo holelu hiye-monenngte aibaba weni yogo aicaigabac, yogohac ailu gadacte.

<sup>13</sup> Aime ngic ingucne yenge kwesac ailu salecebaicne ingucne aicaigaing. Ailu bole noine monic mi balu silicnginenngti hefaliyeme Kristole salecebaicne yengele silic ingucne ailu gacaigaing. <sup>14</sup> Aibaba ingucne aibong ngenge mi kwatackedaing. Satang ye ingucnehac yeicne silicine bafaliyeme angocne angelo, yogo ingucne aicaigac. <sup>15</sup> Ye inguc aime, yele mole-baficfocine yenge inguchac silicnginenng bafaliyebong aibaba dondonnele molebafic, ingucnehac aicaigaing. Aime yogo wiyac efecne aigac. Ailu yenge gacgu dameng moto-motoina aibabangineng yogolec ameine badaingte.

### *Kwele-sifuc yowa ingucne*

**10:17:** 1Kor 1:31    **10:18:** 1Kor 4:4    **11:2:** Efs 5:26-27    **11:3:** Fike 3:4,13    **11:4:** Gal 1:8-9    **11:5:** 1Kor 15:10; 2Kor 12:11    **11:6:** 1Kor 2:1,13    \*    **11:7:** Ngic ye hiye-monenngte ailu bole bacaigac, yele bole yogo wiyac feicne aigac, Korin ngic-ngigac yenge inguc ngagelu gaibong. Ilec gocne yenge ngagebung Polle bole yogo wiyac omame aiwec.    **11:7:** 1Kor 9:18    **11:8:** Filp 4:15-16; 2Kor 12:13

<sup>16</sup> Aime monic ye nale yanguc mi ngagedaic, “Ye kweleine sifuwegac.” Yogo hatacmac edocngebagabac. Ailu ngenge nale inguc ngagegaingka, ngenge kwele-sifuc ngic bacebagaing, ingucnehac na bacnubong ngic ingucne ailu mibe ngagedaing. Inguc aime na inguchac neicne wacne bafelu yowa kpisicnemas midacte. <sup>17</sup> Ailu yowa yago migabac, yogo Sugucnele mic balaibelu mi migabac, yogo kwele-sifuc yowa ingucne naneuc milu wacne bafelu migabac. <sup>18</sup> Ngic bocyac yenge socte ngage-ngage balaibelu yengileng wacngineng bafeningte yowa micaigaing. Ilec ailu na inguchac neicne wacne bafelu yowa gocne minogale ngagegabac. <sup>19</sup> Aime ngenge ngengungtihac ngage-ngage-motockolec gagabeleng inguc ngagegaing. Ailu ngenge kwele-sifuc yowale aka monic mi holelu angacka ngagecaigaing, aibabangineng yogobac nganilu gagabac. <sup>20</sup> Ngic gocne yengi kwelec kwekwe bacngebagaing, me woc-wiyacngineng ewalicngebagaing. Me ngengi baficebaningte kwesacngebagaing, me wacngineng bafegaing, me we-wepatang aingelegaing. Yenge inguc aibong ngenge yogo nganilu ngengi aka monic mi holeyelecaigaing, miyac. <sup>21</sup> Nonge aibaba ingucne ainogale tapilinonggeng mi fagac, na yowa ingucne minogale gamenugac.

### *Polle fungine*

Aime ngic gocne yenge hangocngineng mikac galu wacngineng bafecaigaing, na ingucnehac hangoc mikac kwele-sifuc yowa milu wacne bafebe ngagegaing. <sup>22</sup> Yenge Hibruc ngic, me? Oc, na inguchac Hibruc ngic. Yenge Israel ngic, me? Oc, na inguchac Israel ngic. Yenge Abraham ngambocfocine, me? Oc, na inguchac yele ngambo hocne aigabac. <sup>23</sup> Aime yenge Kristole mole-baficfocine aigaing, me? Na yengele feicne aigabac. Ailu hatacmac kwele-sifuc yowa ingucne taockelu migabac. Na Kristole bole ewalicebalu balu gagabac. I yangucte, ngaba yengi dameng bocyac muc-macka locnubong ngiyeiba. Ngiyebe yenge dameng bocyac muc-hududi umacnehac wecnuibong. Aime dameng bocyac homanogale ailu gaiba.

<sup>24</sup> I yangucte, alec 5 Yuda ngic yengi umbikadi wecnuibong. Aime 5 yogolec kwelina moniyang moniyang hibe alecine 39 aiwec.† <sup>25</sup> Ailu dameng habackang Roma yengele hudu-baba ngic yengi hududi wecnuibong. Ailu dameng moniyang posadi holecnuibong. Nga dameng habackang lac-wagewa hikebe lac-wage kiwecka haume hauiba. Haulu dameng monicka deboc moniyang nga hadeng moniyang kiwec feina faiba. <sup>26</sup> Na dameng bocyac himongne himongne lolicke hikelu misa sugucne falockebe wecnume sowalenogale aiiba. Aime kindololo ngic yengi yefewa basowalecnunogale aiibong. Ailu neicne alingfocne yengi basowalecnunogale aiibong. Ailu Israel yengele alingkacni miyac, yengi basowalecnunogale aiibong. Nga taon gocna ngic yengi basowalecnunogale aiibong. Ailu himong kisiwa misaine mikacka, nga kiwecka galu umac bafuwaiba. Aime ngic haeba ingucne kwesacnulu basowalecnunogale aiibong.

<sup>27</sup> Inguc ainelebong sifu bole sugucnehac doickolec balu gaiba. Bagacgu dameng bocyac gung-gboli galu nosing nga misale homalu gaiba. Ailu nosing-sawe gaiba. Aime dameng bocyac ngakpi-kpolucte basackelu aiibiyelu tilodi homacne bacnume gaiba. <sup>28</sup> Ailu umac yogo sugu miyac, na hadengsoc Yesule habu sasawa damongebanogale ngagelu ngageboc ailu bole umacnehac balu gagabac. <sup>29</sup> Habu yengelacni monicti tapili mikac aime, na yogolec inguchac tapiline wacaigac. Aime yengelacni monicti agoine monic fuluckeme bikic bafuwame, yele umac yogo nganibe kwelena dac ingucne lobecaigac.

<sup>30</sup> Na soc bafefele mi ainelegac. Aimebac wacne bafenogale mibe, wiyac gocnedi tapiline bawawecte ngagelu bafelu midacte. <sup>31</sup> Na yowa kwesacine mi migabac, yogo Sugucnenonggeng Yesu Kristo yele Mamac nga Wapong, yedi ngagegac. Yela mimitengti mimiteng fagidaicte. <sup>32</sup> Na Damasko taonka gabe ngictau Aretasle gawanadi na bacnuningte taonte odale nuina damongfocine locebawec. <sup>33</sup> Locebame alingfocne yengi na baficnulu uficka umengnulu taonte odale gbelong nuwa yefe locnubong oda lobina haulu yele molewacni hangoc hikeiba.

## 12

### *Poldi wiyac nganiwec*

<sup>1</sup> Funginene gocne taockelu wacne bafebe, yogodi ngenge nalic mi baficngebadaicte. Ailu sifu yogo migabachac. Sugucnedi gung-didicka edalicnulu yowa sangkeicne milu

**11:21:** Filp 3:5    **11:23:** Sale 16:23    † **11:24:** Grik yowawa yowa yanguc fagac, “40 yogowacni moniyang sugu hegileibong.” Aibaba yogolec fungine Yefe-yowa 25:2-3 iwa migac, hudu 40 nalic wedaingte. Aime Yuda ngic yenge yefe-yowa mi hegiledaingkale ngagelu moniyang hegilelu 39 sugu wecebalu gaibong.    **11:25:** Sale 16:22; 14:19  
**11:26:** Sale 9:23; 14:5    **11:32:** Sale 9:23-25

edocnuwec, yogo minogale aigabac. <sup>2</sup> Ngic monic Kristoholec wetackelu gagac, ye ngagegabac, ye honocmeng habackang,\* Wapongti iwa fuluckeme fewec. Aime yakumac gabeng hifaine 14 aigac. Ailu ye sockolec fewec me socine hegilelu fewec, yogo mi ngagegabac, Wapongtibac yogo ngagegac. <sup>3</sup> Na ngic yogo ngagegabac. Ailu ye sockolec me socine mikac fewec, yogo mi ngagegabac, Wapongti ngagegac. <sup>4</sup> Ngic yogo ye fuluckeme felu Wapongte mac madicnebenang iwa galu yowa gocne ngicti mimilesoc miyac. Ailu mi minogale akayowaineholec fagac, yogo ngagewec. <sup>5</sup> Na ngic yogolec wacine bafedacte. Naneicne wacne mi bafedacte, miyac. Na tapiline waicne. Ilec ailu funginene bafelu migabac.

<sup>6</sup> Naneicne soc bafenogale angacne fadecka, yogo kwele-sifuc yowa mi aidec, yowa noine midacte.† Ailu ngic yenge yogo ngagelu mimiteng ainelelu socne bafedaingkale, hegilegabac. Ngic-ngigac nganicnucaigaing, me siducne ngagecaigaing, yefe yogowa sugu nale fungine ngagesicaigaing.

#### *Wiyac monic*

<sup>7</sup> Wiyac feicne sangkebenangkeicne milu edocnuwec. Yogolec ailu socne bafebele Wapongti mi ngagewec. Ilec na wiyac monic somang ingucne socna fikewec fagac, yogo Satangte bolele aleng monicti doic nelecaigac. <sup>8</sup> Neleme wiyac yogo socnaci baikenale Sugucne sanangne milockebe alecine habackang biyachac aiwec. <sup>9</sup> Aime Sugucnedi yanguc edocnuwec, "**Nale kwele-madicti ga andocgulu fadaicte. I yangucte, nale tapilidi tapili-wawa yogolec gagawa bucbuchac yegengkegac.**" Inguc miwecte yanguc ngagegabac, Kristole tapilidi somecunale tapiline waicne yogo bafelu midacte. <sup>10</sup> Ilec ailu na tapili-wawa nga umacka gabe midelec ainelelu weyebic ainelebong kwele-umac ngagecaigabac. Inguc ainelebong Kristole ailu umac yogolec angacnugac. I yangucte, na tapiline waicne galu yogowahac tapiliholec aicaigabac.

#### *Pol ye salecebaicne noine*

<sup>11</sup> Ngengi kpfengnuibongte ailu kwele-sifuc ngic ingucne aigabac. Nenge ngengungti-hac nale bole edalicebabong madickedecta. I yangucte, na ngic omanc gaibawa, sifu salecebaicne ngic feicnetowa wacebaibong, yogo yengele wamicne monic mi gacaigabac. <sup>12</sup> Na nengele hewacka bolene umackolec balu sanangne gaiba. Yogo ngengi ngagesingkeningte pasile maaine haicine monic-monic, nga pasi mi ngani-nganiine ailu pasi damuineholec fikengelewec. Salecebaicne yengele bolele maa yogo babe fikelu yegengkeme nganiibong. <sup>13</sup> Ailu Yesule habu gocne yengele hewacka bole baiba, yogo ngengeholec galu silicine monic baiba, nenge inguc ngagegaing, me? Wiyac moniyang sugu fagac, na moneng-mafale ailu umac monic mi bafuwangeleiba. Yogo nganiibong sowacne aibawa, nenge nale sowacne yogo hegiledaing.

#### *Hikenogale efeckeicne*

<sup>14</sup> Ngagegaing, ngengela hatacmac funogale efeckegabac, fube alecine habackang aidaicte. Fulu socte babaficte umac mi ngeledacte. Adu-madec yengi nenggac-mamac yengele wiyac mi bakpaduc aidaingte, miyac. Nenggac-mamac yengibac adu-madecfocngineng yengele wiyac bakpaduc aidaingte. Ilec na woc-wiyacngineng banogale mi fudacte, miyac. Na nengele ailu fudacte. <sup>15</sup> Ailu ngengi gagangineng madickenale ailu na moneng-mafa fanelegac, yogo kwele-madicka nalic baficngebalu longeledacte. Ailu yogo sugu miyac, naneicne gaga inguchac bucbuchac nengele kwele-ilucte ailu nalic hegiledacte. Na nengele kwelenedi ago bacngebalu angac sugucne ngagegabacka, nenge omale nale angac kpisicnemas ngagegaing?

<sup>16</sup> Na umac monic mi bafuwangeleiba, nenge yogo yakumac hocne ngagegaing. Aime na kwesac-ngic, mic-heloc ailu wiyacngineng ewalicngebaiba, nenge inguc ngagegaing, me? <sup>17</sup> Ailu ngic salecebabe fuibong, yengi nale ngagesilu wiyac monic ewalicngebaibong, me? Yogo miyac. <sup>18</sup> Ailu nani Titus ngengela funale sanangne edobe ngic hae-gbanonggeng monic yeholec momoc salecepabe fuiboc. Fulu Titusdi inguchac wiyac monic ewalicngebawec, me? Yogo miyac. Noke asu moniyang balaiabelu gagabelec, me? Oc, noke aibaba moniyang balaibeibec.

#### *Ngagebocte yowa*

<sup>19</sup> Nonge funginenonggeng mibeng madickenale migaing, nenge inguc ngagesigaing, me? Yogo miyac. Agofocne kwelenedi nengele angac ngagegabac, nongebac Kristoholec

\* **12:2:** Polle damengka ngic gocne yengi ngagelu yanguc milu gaibong, honocmeng habackang fagac. Monic yogo sawawa kaguwa nga nango gagaing. Nga monic yogo sawawabenang asocmeng nga tamacne gagaing. Nga monic yogo Wapongte mac ngiye-ngiye fagac. Ilec honocmeng habackang wackelu gaibong. † **12:6:** Yowa noine, yogo Pol yeicnele ngagelu ngic monic miwec. **12:7:** Yop 2:6 **12:9:** Filip 4:11-13 **12:11:** 2Kor 11:5 **12:12:** Rom 15:19 **12:13:** 2Kor 11:9 **12:18:** 2Kor 8:6,16-18

wetacke galu Wapongte haicka yowa migabeleng. Ailu nenge locngebabeng sugulelu sanangkeningte bole sasawa bagabeleng. <sup>20</sup> Na ngengela fulu ngebe nenge nale angac mi balaibedaingte. Ailu nenge inguchac nale mi angacgebadaicte. Ilec ailu hangocnugac. Nenge yowangineng mife-miwa nga hasowac ailu, aalic ngagelu bonec nono galu, sulecebalu, gube kwelu, socngineng bafelu, kwele-moniyang mi gabong, nenge silincngineng ingucne nganicngedadackale, hangocnugac. <sup>21</sup> Aime fulu ngengelacni ngic-ngigac bocyac yenge bikic bafuwalu aibaba wonongkolec, nga selo-boic aibaba ailu gaibong. Ailu gaga kosa gaibong, aibaba sasawa yogo mi hegileibong. Yogo yenge nganicebalu hii kwele-sowackolec aibe, Wapongti nengele haicka bacnu wadaickale, hangocnugac.

## 13

### *Kristo ye tapiliineholec gagac*

<sup>1</sup> Na hatacmac ngengela funogale ngagegabac, iwa fube dameng habackang aidaicte. Yowa yanguc kwelengkeicne fagac, “Ngc yaeckang me habackang yenge yowanginengti moniyang aidaictewa, nenge bikic-baba ngicte yowa nalic wosaelu noine midaingte.” (Yef19:15)

<sup>2</sup> Inguc aime na fube alecine yaeckang aiwec, iwa bikic-baba nga Yesule habutowa nenge sawang-yowa milu yowa edocngebaiba. Aime yakumac yowa yogo dalicka galu hatacmac kwelengkengelegabac. Ilec ailu na hatacmac ngengela hefaliye fudacte, dameng iwa ngic-ngigac gocne nenge bikickacni kwele-hefaliyec mi aibong, nenge mibating sanangnehac aingeledacte. <sup>3</sup> Kristole bole yogo ngengela tapiliine mi wacaigac, miyac, ye bole tapiliineholec bacaigac. Aime micna yowaine noine micaigabac me miyac, yogolec ngengi uwaibong. Na ngengela hefaliye fulu yowa mibating aingelebe yele tapiliwa yowaine micaigabac, yogo ngage-motodaingte. <sup>4</sup> Aime ye socine tapili mikac ingucne aime, malicpongka webong homawec. Homame Wapongti ye bafangkeme fangkelu yakumac yele tapiliwa gagac. Nonge ye ingucnehac yeholec wetackelu tapili-wawa gagabeleng. Aime yeholec wetackebeng, Wapongti locnubame yele tapiliwa, ngengela bole balu gbol-icne gadabelengte.

### *Gagangineng ngani-wosaec aidabiyeng*

<sup>5</sup> Aime nenge ngage-ngagesingkolec gagaing me miyac, yogolec ngengungtihac filesoc filesoc wosaecnagulu lokwesacka lonagudaing. Aime Kristo Yesu ye kwelegona gagac, yogo mi ngage-motogic, me? Ga lokwesacka wawedengka, ibac ngage-motodeng. <sup>6</sup> Inguc aibong nonge momochac lokwesacka mi wawegabeleng, nenge yogo bafuwaningte ngagesigabac. <sup>7</sup> Nenge aibaba sowacne monic mi aidaingte. Nonge yogolec ailu Wapong milockelu gagabeleng. Nonge lokwesacka sanangne domagabeleng, ngic-ngigac yogo nganiningte ailu mi ngagegabeleng. I yangucte, nonge lokwesacka wawegabeleng, gocne yengi inguc ngagegaingka, yogo nalic aigac. Aimebac nenge aibaba madicne ailu gagaing, yogodi feicne aigac. <sup>8</sup> Nonge yowa nga aibaba noine nalic mi hekecnodabelengte, nonge yowa nga aibaba noine bafickekabeleng. <sup>9</sup> Nonge tapili-wawa gaebengka nenge tapilinginengkolec gabong beliyegabeleng. Ailu nenge Kristoholec wetackelu sugulelu sanangkeningte inguchac milockelu gagabeleng. <sup>10</sup> Sugucnedi bole-yowa yago nelema na ngic-ngigac ngage-ngagesingkolec sugulelu sanangkeningte bole-yowa tapiliineholec yago balu gagabac. Nga nenge basowalecngabanogale monic mi miwec, miyac. Ilec na dalicka galu nengele hibi yago kwelengkegabac. Gacgu ngengela fudacte, dameng iwabac sugule-sanang aidabiyengtewa, mibating yowa sanangne nalic mi midacte.

### *Yowa moto-motoine*

<sup>11</sup> Ngic hae-gbafocne, na yowa mimocotolu yanguc migabac, nenge beliyelu Kristoholec wetackelu sugule-sanangkedabiyeng. Ailu kwelengineng basanangkelu ngage-ngage moniyangka galu kwele-mogung bafuwadabiyeng. Inguc aibong Wapong, kwele-angac nga kwele-mogung fileinedi, nengeholec gadaicte. <sup>12</sup> Nenge Wapongte bingec gagaingte aibaba madicne balaibelu molewa babac ainagulu\* wenac-madic minagudaing. Wapongte bingec sasawa yenge wenac-madicngineng salebong ngengela fugac. <sup>13</sup> Sugucnenonggeng Yesu Kristole kwele-madic, nga Wapongte kwele-angac, ailu Tili Asule kwele-moniyang, yogodi ngic-ngigac sasawa ngengela fagidaic.

Yogo foinac.

## **Poldi Galata Habu Yengele Hibi Kwelengkeyelewec**

### *Mimi-yegeng yowa*

Galata yogo prowins monic. Poldi lolickelu taon bocyac iwa Yesule siduc edocebame ngagesingkebong Yesule habu gocne fikeibong. Pol lolickelu hikeme lobaina wewedu gocne lolickelu yowa yanguc taockelu edocebaibong, “Wapongte gaga banogale Yesu sugu ngagesingkebong andoine mi aigac. Ngage-ngagesing yogo yanguc taockedaing, Yuda ngic-ngigac yengele yefe-yowa nga aibaba momoc balaibedaing.” Poldi kwesac-yowa ingucne fikewecte ngagelu ung-yowa yago kwelengkeyelewec. Yesu homalu homackacni gboliyelu fangkeme hifa 16 ngama ingucne motome, Poldi hibi yago kwelengkeyelewec.

### *Yowa yago hibi nevocina fagac*

1:1-5 Wenac-madic yowa

1:6-2:21 Ngeenge wewedu kwesacine yengele yowa mi ngagedaing

3:1-4:31 Ngage-ngagesingte yefewa sugu Wapongte gaga badaingte, aibabale yefewa miyac

5:1-6:10 Kristodi baficngebame Tili Asule yowa ngagelu gaga gbolicne gadaingte

6:11-18 Yowa moto-motoine

### *Kwele-madic yowa*

<sup>1</sup> Na Salecebaicne Pol. Ngic yengi bole-yowa yago mi neleibong. Me ngic monicti bole yagolec yefe mi bafuwanelewec, miyac. Yogo Wapong Mamacti, Kristo homackacni bagholiyewec, ye nga Yesu Kristo yeki yefe yago bafuwaneleibocte bole yago balu gagabac.

<sup>2</sup> Na nga ngic hae-gbafocne momoc gagabeleng, nongi Yesule habu Galata prowinswa gagaing, ngeengele hibi yago longelegabeleng.

<sup>3</sup> Mamacnonggeng Wapong nga Sugucnenonggeng Yesu Kristo, yekele kwele-madic nga kwele-mogungtowadi ngengela fadaic. <sup>4</sup> Ye Mamacnonggeng Wapongte ngage-ngage nga angacine balaibelu nongileng bikicte ailu yeicne gagaine hegilewec. Inguc ailu kindololo dameng yanguctihac gagabeleng, yogowacni baicnubanale gagaine hegilewec. <sup>5</sup> Ilec ailu yela wac feicne moto-motoine mikac fafegidaic, yogo foinac.

### *Kristole Siduc Madicne sugu fagac*

<sup>6</sup> Kristodi kwele-madic aingeleme nenge balaibeningte Wapongti wacngebawec. Aimebac ngeenge ye biyachenang hegilelu hikegacgu Siduc Madicne yogo silicine monicte hedec lolu balaibecaigaing, yogo nganibe wiyac sowacnebenang aime kwatackegabac. <sup>7</sup> Ilec ailu siduc yogo Siduc Madicne miyac. Ngeenge Kristole Siduc Madicnele yefe balaibeningte aingeleme, ngic gocnedibac nenge kwele basifuc aingelelu Kristole siduc taockelu basowalecaigaing. <sup>8</sup> Ailu Siduc Madicne nonge biyachac edocnglobalu wedungeleibeng, yogobac nonge me honocmengkacni angelo monicti, yogo basifuwelu silicine monic mime yegengkengedaictewa, ye Wapongte aalicta bagewa gadaic. <sup>9</sup> Aime yowa biyachac miibeng, ailu yogohac hatacmac migabac. Ngeenge Siduc Madicne biyachac ngagelu angacngabawecka, monicti yogo basifuwelu silicine monic mime yegengkengedaictewa, ye Wapongte aalicta bagewa gadaic.

<sup>10</sup> Aime na yakumac yowa migabac, yogo ngic-ngigac yengi na ngage-madickeneleningte mi migabac. Yogo Wapongti ngage madickenale ailu migabac. Na ngic-ngigac yengi nale ngagebong madickenale bole badaba midec, Kristole kwelec kwekwe nalic mi gadaba.

### *Polle bolele fungine*

<sup>11</sup> Ngic hae-gbafocne, Siduc Madicne mibe yegengkecaigac, ngage-ngage yogo ngic mimiwacni miyac, yogo edocngebabe ngagegaing. <sup>12</sup> Ngic monicti mi mime ngageiba, me monicti mi wedunelewec, yogo miyachenang. Yesu Kristo yeuctihac hocne yogo bayegengkulu wedunelewec. <sup>13</sup> Na esecne Yuda ngic-ngigac yengele ngage-ngagewa galu aibaba aiiba, ngeenge yogobac ngagegaing. Na Wapongte habu homacnehad weyebic aiyelelu basowalecebaiba. <sup>14</sup> Ailu Yuda ngic-ngigac nonge yefe-yowa nga aibabawa ngage-ngagenedi sugulegacgu Yuda ngic-ngigac agofocne yenge homacne ewalicebaiba. Ailu ngesa-ngambofocne yengele yefe balaibelu mamang hidulu gaiba.

<sup>15</sup> Nenggacte gobe kwelina ngiyeebewa Wapong yeuctihac kwele-madic moc ainelelu bawosaecnulu ngageboc mikac wacnuwec. <sup>16</sup> Ailu yeicne angacine balaibelu yeuctihac

madecine edalicnume nganilu Madecinele siduc yogo Israel yengele alingkacni miyac, yengela mibe yegengkenale inguc ainelewec. Aime na dameng yogowahac gaggu wenuc ainogale ngic gocne mi-uwac monic mi aiyeleiba. <sup>17</sup> Ailu ngic molickelu salecebaicne aii-bong, yenge nganicebanogale Yerusalem iwa mi hikeiba, miyac. Nabac Arebia himongka sugu hike galu hatacmac Damasko hefaliye kwesiiba.

<sup>18</sup> Iwa gabe hifa habackng motome, Pita\* nganinogale Yerusalem hikelu hadeng 15 yeholec gaiba. <sup>19</sup> Aime iwa gaggu salecebaicne monic mi nganicebaiba. Na Sugucne Yesule gbaine Yakobos sugu nganiiba. <sup>20</sup> Ngagegasing, yowa kwelengkegabac, yogo kwesac miyac, yogo Wapongte haicka foinac migabac.

<sup>21</sup> Aime yogolec lobeina Siria nga Silisia prowins iwa hikelu lolickeiba. <sup>22</sup> Aime Yudeya himongka Kristole habu gaibong, yengi na monic mi nganicnui-bong. <sup>23</sup> Yenge nale yowasiduc yanguc sugu ngagelu gaibong, “Ngic yedi esecne weyebic ainolewec, ye ngage-ngagesingte Siduc Madicne basowalewec, yogo yakumac ngic-ngigac milu edocebame yegengkecaigac.” <sup>24</sup> Yenge inguc ngagelu nale ailu Wapong wacine bafeibong.

## 2

### *Kwele-moniyang aibong*

<sup>1-2</sup> Aime hifa 14 motome Wapongti mime yegengkeme salecnume na hatacmac Yerusalem iwa hikeiba. Dameng iwa Banabasholec noke Titus mengockebec nonge momoc hikeibeng. Iwa hikebeng ngic micne gaibong, yenge Siduc Madicne Israel yengele alingkacni miyac, yenge edocebalu weduyelevu gaiba, yogolec siduc yenge filesoc filesoc mibe yegengkeyelewec. Na esecne miiba, nga yakumac milu gagabac, bolene yogodi sifuwelu noine mikac aidaickale, yowa yogo mibe yegengkeyelewec.\* <sup>3</sup> Aime kwele-moniyang aibong Titus ye Grik ngicti naholec kwesiwec, ye soc tofaine helockenngte Yesule habu yengele micnefocngineng yengi monic mi miibong. <sup>4</sup> Ngic gocne yenge nongileng agofocnonggeng ingucne kwesac ailu gaibong, yengi sugu Titusle soc tofaine helockenngte inguc miibong. Kwesac-ngic yogo yengi akikik kwesilu hewacnonggang galu Kristo Yesudi yefe-yowale muckacni bacnubawec, yogolec nganibiyecnubai-bong. Inguc ailu Yuda ngic-ngigac yengele yefe-yowadi hefecnubanogale aibong. <sup>5</sup> Yogolec Siduc Madicnele yowa noine ngengela sanangne fanale nonge damengmac bangkacne kwesac-ngic ingucne yengele yowale bagewa monic mi gaibeng, miyac.

<sup>6</sup> Ailu bole balu ganogale milu ngic micne yengi iwa wiyac monic taockelu ainogale mi edocnuibong, miyac. Ailu yenge esecne wenuc gaibong, yogo nalic mi ngagesidacte. Wapong ye ngic socine nganilu ngic-ngigac mi bawosaecebadaicte. <sup>7</sup> Yengebac yanguc nganiibong, Wapongti Pita ngic soc tofangineng helockeicne yengela Siduc Madicne mime yegengkenale bole-yowa lacnome damongkewec. Ingucnehac na ngic soc tofangineng mi helockeicne, yengela Siduc Madicne mibe yegengkenale bole-yowa neleme damongkegabac. <sup>8</sup> Wapongti Pita bole tapiliineholec banale ailu saleme ye ngic soc tofangineng helockeicne, yengele hewacka salecebaicne bole bawec. Nga na ingucnehac bole tapiliineholec banogale salecnume Israel yengele alingkacni miyac, yengele hewacka salecebaicne bole balu gagabac.

<sup>9</sup> Aime Yesule habu yengi ngic sugucnefocngineng ngani-motocebaibong, yogo Yakobos nga Pita† ailu Yoane. Yenge Wapongte kwele-madicti nala fawecte, yogo ngani-motolu yenge na nga Banabas nokeholec kwele-moniyang ailu molenonggac baibong. Balu yanguc miibong, “Ngeke Israel yengele alingkacni miyac, yengela Siduc Madicne miboc yegengkeyeledaic. Nga nongibac ngic soc tofangineng helockeicne, yengela Siduc Madicne mibeng yegengkedaicte.” <sup>10</sup> Inguc milu yowa moniyang sugu yanguc taockelu miibong, “Ngeke ngic-ngigac waweweine, yengele umac nganilu baficebadabiyec.” Inguc miibongte na yogo hocne ngagelu mamang hidulu bole sanangne balu gaiba.

### *Pitale yowa*

<sup>11</sup> Aime Pita ye Antiok iwa kwesilu sowacne ailu yefe lilowec. Ilec ailu nani domalu sowacne aiwec, yogo mifickelu edoiba. <sup>12</sup> Yakobosle aling yenge mi kwesiyebongka ye Israel yengele alingkacni miyac yengeholec nosing nolu gawec. Aime Yakobosle alingkacni ngic soc tofangineng helockeicne gocnedi kwesiibong. Dameng yogowabac Pitadi yengele hangockeme Israel yengele alingkacni miyac yengeholec hatacmac mi ngiyelu gawec. <sup>13</sup> Sowacne inguc aiwecte Yuda ngic-ngigac nebocine yenge inguchac yeholec kwesac-aibaba aibong. Aime Banabas ye inguchac kwesac-aibabangineng yogo balaibelu yefe

\* 1:18: Grik yowawa Pita wacine monic Kefas fagac. 1:18: Sale 9:26 1:21: Sale 9:30 2:1-2: Sale 15:2

\* 2:1-2: Grik yowawa, Poldi gasac-gasacte nangeng yowa miwec. 2:4: Gal 1:7; 5:1,13 2:7: Sale 22:21 † 2:9:

Grik yowawa Pita wacine monic Kefas fagac. 2:10: Sale 11:29-30 2:12: Sale 11:3

lilowec. <sup>14</sup> Aime nganicebabe, yenge Siduc Madicnele yowa noine yogolec aibaba mi balaibeibong. Inguc ailu na ngic-ngigac sasawa yengele haicka Pita yanguc edoiba, "Ga Yuda ngic hocne. Ailu Israel yengele aling kacni miyac, yengele aibaba balaibecaigic. Aime Israel yengele aling kacni miyac yenge omale aiyeeleangka Yuda ngic-ngigac aibabanonggeng balaibeningte aigaing? Inguc aiyangka mi madickegac."<sup>‡</sup>

*Yesu ngagesingkelu wasecne ainoga*

<sup>15</sup> Nonge Yuda ngic, nonge Yuda ngic-ngigackacni fikeibeng. Nonge Israel yengele aling kacni miyac, bikic-baba aling yengelacni mi fikeibeng. <sup>16</sup> Ngic monic ye Kristo Yesu ngagesingkeme Wapongti ye ngic dondonne wackedaict, yogo ngagegabeleng. Nga monic ye yefe-yowa balaibelu gagacka, Wapongti ye ngic dondonne mi wackedaict, miyac. Aime Wapongti ngage-ngagesingnonggengte ailu ngic dondonne wacnubanale nongileng yefe-yowa hegilelu Yesu ngagesingkelu gagabeleng. I yangucte, ngic-ngigac yefe-yowa balaibecaigaing, Wapongti yenge ngic-ngigac dondonne nalic mi wacedaict, miyac. Ye ngic-ngigac Yesu ngagesingkelu gagabiyeng, yenge sugu dondonne wacedaict.

<sup>17</sup> Gocne yengi nongileng yanguc micaigaing, "Yenge Kristole ngage-ngage dondonne bafuwanogale ailu bikickolec aigaing." Inguc fadecka midec, Kristodi bikicte yefe bafickedec ingucne aidecka, yogo miyachenang! <sup>18</sup> Na yefe-yowa yogo biyachac hegilelu baickeiba, yogo hatacmac aidacte, ibac bikic bafuwadacte. Ilec ailu na hatacmac aibaba esecne mi aidacte, miyac. <sup>19</sup> Aime yefe-yowadi bikicne edalicnume Wapongkolec ganogale ailu homalu yefe-yowa yogo hegileiba. Na Kristoholec malicpongka momoc wecupabong domaibec.

<sup>20</sup> Ilec ailu naneuctihac hatacmac gaga yago mi gagabac. Kristodi nale kwele kwelina gagac. Ilec yanguctihac sockolec galu Wapongte Madec ngagesingkebe yedi gagana aibaba madicne bame wakenledaict. Yedi hocne kwele-angacka ago ainelelu nale ailu yeicne gagaine hegilewec. <sup>21</sup> Wapongte kwele-madic kwelena mi hegiledacte. Monic ye yefe-yowa balaibecaigac, Wapongti ye ngic dondonne yogo nalic mi wackedaict, miyac. Yogolec ailu Kristo ye malicpongka homawec. Aime yefe-yowadi tapiliineholec fadecka Kristole homac yogo wiyac omane aidec.

### 3

*Ngagesingkelu noine bafuwanoga*

<sup>1</sup> Galata ngic-ngigac, nenge ngage-ngage-motocngineng mikachenang. Yesu Kristo malicpongka webong domawec, nenge yogo ngage-motoningte haicnginang yowa andoine wedungeleibeng. Aime ma ngicti kwesacnglobalu ngage-ngagingeng basifuweme nenge inguchac gagaing? <sup>2</sup> Wiyac moniyang sugu uwangelebe bafaliyening, nenge oma yefewa Asu baibong? Yefe-yowa balaibeibongka, me Siduc Madicne ngagelu ngagesingkeibongte ailu Asu baibong? Ngagegaing, nenge ngage-ngagesingka Asu baibong. <sup>3</sup> Nenge Asuholec gaganginengti molickeweckacni yakumachac socnginengte gagawa hatacmac gagaing, me? Nenge aibaba kapainebenang ailu gagainghac, me? <sup>4</sup> Nenge esecne Yesule ailu doic moc ngageibong, me? Aime yakumachac yogolec noine akicic hegilegaing. <sup>5</sup> Wapongti Asuine ngelelu pasi damuineholec hewacnginang balu gagac. Aime yefe-yowa balu gabong, me Siduc Madicne ngagelu ngagesingkeibong pasi yogo fikegac? Ngagegaing, nenge ngagesingkegaingte ailu pasile maaine balu gagac.

*Ngage-ngagesingte yowa*

<sup>6</sup> Yogo yanguc fikewec,

"Abraham ye Wapong ngagesingkewecte ailu, ye ngic dondonne wackewec." (*Fike 15:6*)  
<sup>7</sup> Ilec ailu ngic-ngigac Wapong ngagesingkelu gagabeleng, nongileng Abraham gbolifocine aigabeleng, nenge yogo ngage-motodaing. <sup>8</sup> Ailu Wapongti Israel yengele aling kacni miyac, yenge ngage-ngagesingte ailu ngic-ngigac dondonne wacedaict. Ye Siduc Madicne yogo lobewa fikenale esecnehac Abraham edowec. Aime yogo Wapongte hibiwa yanguc kwelengkeicne fagac,

"Himongka ngic-ngigac habutowa gagaing, yenge sasawa gale madicte aimadick-eyeledacte."  
*(Fike 12:3; 18:18; 22:18)*

<sup>9</sup> Abraham ye Wapongte yowa ngagesingkewec, ingucnehac ngic-ngigac yenge Wapongte yowa ngagesingkedaingte, yenge Abrahamkolec momoc mimi-madic milu edocebadaict.

<sup>‡</sup> **2:14:** Poldi Pitale yowa mime motowec, yogo ngic gocne yenge kwele-yaec ailu yanguc ngagecaigaing. Aling 14 me 17 me 21 yogowa Pitale yowa motowec. **2:16:** Sale 15:10-11; Rom 3:20-28; Gal 3:11 **2:20:** Gal 1:4 **3:6:** Fike 12:3; Rom 4:3,16



<sup>10</sup> Ngic-ngigac yenge Wapongte yefe-yowa balaibecaigaing, yenge sasawadi Wapongte aalichte bagewa gagaing. Wapongte hibiwa yogolec yowa monic yanguc kwelengkeicne fagac,

“Ngc-ngigac yenge Wapongte yefe-yowawa yowa kwelengkeicne fagac, yogo sasawa balaibelu yogowacni monic hegiledaingte, yenge Wapongte aalichte bagewa gagaing.” (Yef 27:26)

<sup>11</sup> Wapongte hibidi inguchac yanguc migac,

“Monic ye ngage-ngagesingkeic, Wapongti dondonne wackeme gaga-sanang gadaicte.” (Hab 2:4)

Aime wackedaicte, iwacni monic ye Wapongte yefe-yowa balaibecaigac, Wapongti ye le dondonne mi wackedaicte, miyac. <sup>12</sup> Wapongte yefe-yowadi ngage-ngagesingte yowa mi bayegengkedaicte. Aime yowa monic yanguc sugu mimiine fagac,

“Monic ye yefe-yowa sasawa balaibedaicte, ye yefe iwa gagaineholec ailu gadaicte.” (Dep 18:5)

<sup>13</sup> Nonge yefe-yowa sasawa mi balaibelu Wapongte aalichte bagewa gabeng Yesudi amenonggeng balu fuli bacnubawec. Ailu yowa yanguc kwelengkeicne fagac,

“Ngc-ngigac sasawa yocka gbedicebabong domacaigaing, yenge Wapongte aalichte bagewa gagaing.” (Yef 21:23)

Kristodi malicpongka Wapongte aalichte bagewa gawecte yefe-yowale umackacni bacnubawec. <sup>14</sup> Wapongti Abraham mimi-madic milu lacnowec, yogodi Yesule ailu Israel yengele alingcakni miyac, yengela hikeyackenale Kristo Yesudi fuli bacnubawec. Inguc aime Wapongti yowa mipangkewec, yogo balaibelu nongileng Yesu ngagesingkebeng Asu nolewec.

#### *Wiyac moc noledaicte*

<sup>15</sup> Ngic hae-gbafofocne, na ngic aibabanonggeng fagac, yogolec silicina edocngebabe ngagegaing. Monicti dodofocite yowa mime monicti yogo nalic mi hegiledaicte, me yowa monic yogolec feina mi taockedaicte. <sup>16</sup> Wapongti Abraham nga ngamboine yeke wiyac gocne yetenale yowa mipangkewec, yogo ye ngambofocine homacne yengele mi miwec. Ye ngic moniyangte sugu yanguc miwec, “Ngambogone.” Ngic ye hocne Kristo.

<sup>17</sup> Na ilec ailu yanguc migabac, Wapongti Abrahamkolec dodofic balu mipangkewec, yogo gacgu hifa 430 motome, hatacmac Moseholec yefe-yowa miwec, yogodi mimipang esecne nalic mi ewalidaicte me baickedaicte. <sup>18</sup> Aime yefe-yowa balaibegac Wapongti gagale wiyac nalic mi lacnodaicte, Wapongte mimipangka sugu gagale wiyac nalic badaicte. Aime Wapongti Abraham moc bamadickelu mipangkelu gagale wiyac lacnowec, yogodi mimipang mipangkeicnele gagale wiyac bawec aigac. Ye yefe-yowawa nalic mi badaicte.

<sup>19</sup> Inguc fikedecka midec, omalebac yefe-yowa loicne fagac? Yogo aibaba sowacne aibong yefe-yowadi edalicebadaicte. Wapongte yefe-yowa famehac gacgu Abrahamte gbolile mipangkewec, ye fikewec.

Aime kwele-moniyang fikenalale angelo yengi yefe-yowa balu ngic hewacngineng Moses lacnoibong. <sup>20</sup> Ngic hewacine yedi aling moniyangte yowa mi midaicte. Aime Wapong ye moniyang ailu yeicne mimipang yowa sugu midaicte.\*

<sup>21</sup> Wapongti Abrahamta yowa mipangkewec, yogo yefe-yowadi welockegac, me? Yogo miyachenang. Wapongti yefe-yowa nolewec, yogodi gaga-sanang nalic mi noledaicte, miyac. Ilec ailu ye yefe-yowale ailu ngic-ngigac dondonne nalic mi wacnubadaicte, miyac. <sup>22</sup> Ngic-ngigac Yesu Kristo ngagesingkebong Abrahamte yowa mipangkewec, yogo yeledaicte. Inguc fikenalale Wapongte yefe-yowale hibidi yanguc edalicnubawec, ngic-ngigac sasawa nongileng bikicti witicnubame bageina gaibeng.

<sup>23</sup> Ngage-ngagesing mi fikeemewa nongileng muc-macka ngiyebeng yefe-yowadi damongnubawec. Aime ngage-ngagesing fikeme umac yogo miyac aiwec. <sup>24</sup> Aime yefe-yowadi damongnubalu wedunoleme gacgu Wapongti ngage-ngagesingte ailu dondonne wacnubanale Kristo lome fikewec. <sup>25</sup> Aime dameng yagowa ngage-ngagesingte yefe dondonna gaga yogo biyac fikewec. Ilec ailu yefe-yowale bagewa hatacmac mi wedunoleme gagabeleng.

<sup>26</sup> Ngenge sasawadi ngage-ngagesingka Kristo Yesuholec wetackelul Wapongte adu-madecfocine aigaing. <sup>27</sup> Nga ngic-ngigac Kristoholec misa-lowac aibong, ngenge sasawa silicngineng yanguc, Kristodi ngakpi-kpolucngineng ingucne aime ngenge ye socnginang

3:11: Gal 2:16    3:13: Rom 8:3    3:16: Fike 12:7,9; 13:15; 24:7    3:17: Wah 12:40    3:18: Rom 4:14    3:19: Rom 5:20; Sale 7:38    \* 3:20: Ilec ailu Wapongti Abrahamta mipangkewec, yogodi Mosesle yowa ewaligac.    3:21: Rom 8:2-4    3:23: Gal 4:3    3:24: Rom 10:4    3:26: Yoa 1:12

holebong hauwec. <sup>28</sup> Yogo Yuda ngic-ngigac me Grik ngic-ngigac, me kwelec kwekwe me damongngine, me ngic me ngigac, ngenge aling monic-monic mi aigaing. Ngenge sasawadi Kristo Yesuholec wetackelu aling moniyang aigaing. <sup>29</sup> Aime Kristoholec wetackegaing, ngenge Abraham ngambofocine galu Wapongte mimipang bagaing.

## 4

### *Wapong adu-madecfocine*

<sup>1</sup> Na yanguc ngagelu migabac, madec monicti mamacine homawecte mole-damocine yeicne ainale ngagedaicte. Ailu ye madec hakicte ailu yogolec wangec gagac, ye wacine mikac galu kwelec kwekwe ingucne gadaicte. <sup>2</sup> Ye yeicne hole-gumec mamacine nga ngic mole-damoc moc damongkegac, yekele bagewa gaemewa mamacinedi dameng miwec, dameng yogo kwesime mafaine bame yeicne aidaicte. <sup>3</sup> Nongileng inguchac inguc gaibeng. Adu-madec gaebengka himongte aleng yengi kwelec kwekwe bacnubabong yengele bagewa gaibeng. <sup>4</sup> Gaebengka dameng miicne, yogo kwesime Wapongti yeicne Madecine saleme wawec. Ye yefe-yowale bagewa ngigacta fikewec. <sup>5</sup> Fikelu ngic-ngigac yefe-yowale bagewa gagabeleng, nongileng iwacni fuli bacnuba ofelu yeicne madecine ingucne hole-gumec ainolenale lowec.

<sup>6</sup> Ngenge adu-madecfocine aigaing, yogolec ailu Wapongti Madecinele Asu saleme kwelenggang galu nongeholec yanguc aukwelu hiyalu gagac, "O Mamacne." <sup>7</sup> Ilec ailu, ga hatacmac kwelec kwekwe mi aidamecte. Ga Wapongte madecte mac ngiye-ngiye baengka yedi mimipangine miwec, yogo geledaicte.

### *Poldi Galata yengele ngageboc aiwec*

<sup>8</sup> Aime ngenge esecne Wapong mi ngageebongka siduc-gbong nga aleng yengi kwelec kwekwe bacngebaibong. Aime yogo yenge Wapongte silic ingucne miyac. <sup>9-10</sup> Ngenge yanguctihac ngage-motolu Wapong ngagegaing, me yanguc nalic mibe, Wapongti ngenge biyachac ngagecngabawec gagaing. Ailu ngenge hadeng gocna nga tamacne gocna ailu gungka dameng nganicaigaing. Nganilu hifale dameng silicine haicine monic monicte ngagebong noine aime yogo balaibelu gacaigaing. Inguc ailu ngenge omale hatacmac hefaliyelu himongte aleng waweweine nga tapilingineng mikac, yengela hatacmac hikelu yengele kwelec kwekwe aling ainingte ngagegaing? Aibabangineng yogodi kpungke-kpungkeine aigac. <sup>11</sup> Na boletowa ngengela baiba, yogo noine mikac aidaickale ailu, ngageboc aigabac.

### *Wiyac fikeyeledaicte*

<sup>12</sup> Ngic hae-gbafocne, na ngenge ingucne gaiba. Ilec ngenge na ingucnehac ainingte dogbac ailu edocngabagabac.\* Na ngengi monic mi basowalecnuibong. <sup>13</sup> Socnedi huckolec aiwecte dameng iwa molickelu Siduc Madicne mibe yegengkengewec, yogobac ngagegaing. <sup>14</sup> Ailu socne huckolecte ailu ngenge umac ngeleiba. Aime ngenge mi ngagesowalenelelu hegilecnuibong, miyac. Ngenge Wapongte angelo monic, me Kristo Yesudi kwesime damongkedabongtesoc na ekongnulu damongnuibong. <sup>15</sup> Aime yakumacbac kwele-angacngineng yogo wenuwa fagac? Ngenge molickelu angac homacne ngagelu donge-hucngineng bamocotolu nelenogale silic aibong, ngengele aibaba madicne yogo mibasanang ailu mibe yegengkegac. <sup>16</sup> Na ung-yowa noine edocngabagabacte ngenge ngaba aigaing, me? Na yogolec ngagebe kpungke-kpungkeine aigac.

<sup>17</sup> Ngic yenge mudocngabanogale aicaigaing, ngenge yengeholec taockelu domaningte dacineholecbehang micaigaing. Ailu yenge ngengele madicne monic mi ngagesicaigaing, miyac. Ngengi yengele yowale angac ngagelu hegilecnubalu yengela taockeningte, yenge yogolec sugu aiyelegac. <sup>18</sup> Ngenge aibaba madicne balaibeningte bole bagaing, yogo madicne. Aime nani ngengeholec gagabac, yogowa sugu miyac. Aibaba madicne balaiben- ingte, bole yogo damengsoc sanangkelu balu gadaing. <sup>19</sup> Adu-madecfocne, na ngengele ailu hatacmac doic gado ingucne hicnulu gagac, inguc ailu gabe Kristole aibabadi ngengele kwelewa fike-benangkeidac. <sup>20</sup> Na ngengele ngagelu wenuc aidaicte, yogo kpungke-benangkelu ngage-ngage bole balu gagabac. Ailu ngengeholec yanguctihac gadaba midec, sawang-yowane sanangne nalic hegilelu yowa ulucne mibe ngenge yogo balaibedabong.

### *Dodofic yaeckang*

3:27: Rom 6:3    3:28: Rom 10:12    3:29: Rom 4:13    4:3: Kol 2:20    4:4: Yoa 1:14; Rom 1:3    4:6: Rom 8:15-17    4:9-10: Rom 14:5; Kol 2:16    \* 4:12: Galata ngic-ngigac yenge Israel yengele alingkacni miyac. Ilec ailu esecne Yuda yengele yefe-yowa mi balaibeibong. Pol ye inguchac Yuda yengele yefe-yowa mi balaibewec.

<sup>21</sup> Aime yefe-yowale bagewa ganogale angacngebacaigacte, ailu ngenge hedec lolu yefe-yowa ngegaigaing, me? <sup>22</sup> Abraham ye madeckecine yaeckang, yowa inguc yefe-yowawa kwelengkeicne fagac. Aime madec monicti ngigacinebenang, yelacni nga monicbac kwelec kwekwe ngigac yelacni. <sup>23</sup> Aime kwelec kwekwe ngigac yelacni madecine ye socte gagale alingkacni fikewec. Nga ngigacbenangngine yelacni fikewec, ye Wapongti Abraham nga Sara mipangkeyetewec, yogowacni fikewec.

<sup>24</sup> Na nangeng yowa monic yanguc holelu migabac. Ngigac yaeckang yeke dodofic yaeckangte sosocine aigaic. Dodofic monic yogo Arebia himong iwa Sinai tikiwa yefe-yowa milu hefeicne yogolec adu-madecfocine yenge kwelec kwekwe gagale bagewa fikelu gacaigaing, yogo Hagadi aigac. <sup>25</sup> Ailu Haga ye Sinai tiki ingucne aigac. Nga Yerusalem yakumac fagac, yogo Hagale sosoc aigac. Yerusalem ye yakumac yeicne nga adu-madecfocine yengeholec kwelec kwekwe mucineholec ailu gagabiyeng. <sup>26</sup> Aime Yerusalem monic honocmengka wilini mucine mikac, Sara yogo nongileng nenggac-nonggengbenang. Ailu Sara nongilengkolec mucine mikac. <sup>27</sup> Aime yeke yowa yanguc kwelengkeicne fagac,

“Ngigac hufing kogocgone mikac, ga belic-belicka ganong. Nga ngigac gado monic mi hicguwec, ga tapiliholec belyelu aukwenong. Ngigac hufing gale adu-madecfocine yenge homacnehac sawedaingte. Ailu ngigac ngaweineholec yeke adu-madecfocine ewalicebagaing.”  
(Yes 54:1)

<sup>28</sup> Ngic hae-gbafocne, Wapongti Abrahamkolec yowa mipangkeme Aisak fikewec, ingucnehac Wapongti Yesule ailu yowa mipangkeme yeicne adu-madecfocine fikeibeng. <sup>29</sup> Madec socte aibabale alingkacni fikewec, yedi dameng iwa madec Asule aibabale alingkacni fikewec, ye weyebic aicnowec, silic ingucnedi yakumac fagac.† <sup>30</sup> Aime Wapongte hibidi yogolec ngagesilu yanguc migac,

“Ga kwelec kwekwe ngigac madecineholec welu yebicepaengka hikedabiyec. I yangucte, kwelec kwekwe ngigac yeke madecti ngigacbenangngine yeke madeckolec mole-damoc nalic mi badabiyecte, miyac.”  
(Fike 21:10)

<sup>31</sup> Ngic hae-gbafocne, ilec nongileng kwelec kwekwe ngigac yelacni miyac, nongileng ngigacbenangngine yelacni.

## 5

### *Kristodi lukecnubawec*

<sup>1</sup> Nongileng muc mikac ganangte Kristodi yefe-yowale muckacni lukecnubawec. Ilec ngenge sanangkulu domadabiyeng. Ngenge hatacmac yefe-yowale kwelec kwekwe longebabong gadaingkale, ngani-motolu gadabiyeng.

<sup>2</sup> Ngagegaing, ngenge soc tofangineng helockedaingte, ibac Kristolacni babafic monic mi badaingte, na Poldi inguc edocngebabac. <sup>3</sup> Ngic soc tofangineng helockedaingte, yenge Wapongte yefe-yowa sasawa ngagelu balaibeyackedaing, yogo sanangnehac hatacmac edocngebabac. <sup>4</sup> Nga ngic Wapongte haicka dondonne domalu yefe-yowa balaibeningte ngagegaing, ngenge Kristolacni hatacmac baicngebabong Wapongte kwele-madic hegilelu lobina gagaing. <sup>5</sup> Aime Asudi bacnubame nongileng ngage-ngagesingka gabeng Wapongti dondonne wacnubadaicte, yogolec wangec gagabeleng. <sup>6</sup> Nongileng Kristo Yesuholec wetackelu gadabelengte, ibac soc tofangineng helockeicne me mi helockeicne, yogolec ngagebeng wiyac feicne mi aidaicte. Ngage-ngagesingnonggeng balaibelu kwele-angacka ago aiyelulu balu gadabelengte, yogodi sugu feicne aigac.

### *Sawang-yowa*

<sup>7</sup> Ailu ngenge Yesule ngage-ngagesingte yefewa gasackebong ma ngicti yefengineng hedickeme yowa noine hegilelu gagaing? <sup>8</sup> Ngic yogo yengele yowadi Wapong wacngebawec, yelacni mi welegac. <sup>9</sup> Yis kapucine kpisicnemacti sawecaigac, ingucnehac ngic yengele kwesacti sawecaigac. <sup>10</sup> Na Sugucneholec wetackelu ngengele ngagesilu yanguc ngagelu gagabac, ngenge nale ngage-ngage yogo balaibe galu ngage-ngage gocne hegiledaingte. Aime monic ye ngageboc bafuwangelelu gagac, ye bikicte ameine badaicte. <sup>11</sup> Ngic hae-gbafocne, soc tofangineng helockeicnele yefe yogo mi edocebalu weduyelegabac, yefe yogo biyachac hegileiba. Malicpongte yowa mibe ngic yengi weyebic ainelelu gagaing. Ngic yogo yenge soc tofangineng helockeningte weduyeledaba midec, ngic-ngigac yenge malicpongte yowale ngaba mi aidabong. <sup>12</sup> Aime ngic gocnedi

4:22: Fike 16:15; 21:2    4:23: Rom 9:7-9    4:26: Hib 12:22; Miye 21:2,10    4:28: Rom 9:7    4:29: Yoa 8:35    † 4:29: Dameng iwa Yuda ngic yenge yefe-yowa balaibelu gaibong, yenge yanguc miibong, “Ngic-ngigac Yesu ngagesingkegaing, yenge yefe-yowa inguchac balaibedabiyeng.”    5:6: 1Kor 7:19; Gal 6:15    5:9: 1Kor 5:6    5:10: Gal 1:7; 2Kor 11:15

yowanonggeng kwelu ngengele ngage-ngage basifuwelu gagaing, na yengele kwele-dac ngagegabac. Ailu ngagebe ngic yogo yenge socngineng bucbuchac helockelu baickebong madickedaiecte.

*Asu nga socte gaga*

<sup>13</sup> Ngic hae-gbafocne, ngenge yefe-yowale mucngineng mikac ganingte Wapongti wac-ngebawec. Ngenge muc mikac gaga yogo gagaingte migbedic yowa milu socnginengte gaga balaibebong mi madickedaiecte. Yogo mi fikenale ngenge angacka kweledi doficnagulu kwelec kwekwe ngic ingucne kwelec kwedabiyeng. <sup>14</sup> I yangucte, yefe-yowadi yogolec momoc kpatuleicne yanguc fagac, "Gageicne aigelecaigac, silicine ingucnehac ngic-ngigac gale emewa gagaing, yengele kwelegonedi ago aiyelelu angac ngageyelelu gadamec." (Dep 19:18)

<sup>15</sup> Aime ngenge ngengileng, gocnedi micti minagulu ngaba ainagulu basowalecnagudaingkale, damongngineng balu gadaing.

<sup>16</sup> Na yanguc migabac, ngenge Tili Asudi molickeme hikedaing. Inguc ailubac ngenge socnginengte gagale angac yogo hegiledaingte, ailu mi balaibedaingte. <sup>17</sup> Socnginengte gagadi Asule gaga wecaigac. Nga Asudi socnginengte gaga wecaigac. Yeke ngaba ainagucagabiyec. Ilec ngenge wiyac madicne ainogale ngagecaigaing, yogo hegilecaigaing. <sup>18</sup> Nga Asudi molickeme hikedaingtewa, yefe-yowale bagewa mi gadaingte.

<sup>19</sup> Aime socnginengte gagale aibaba yogo yanguc yegengkedaiecte, selo-boic aibaba nga aibaba wonongkolec ailu kosa gagadi wakeicne. <sup>20</sup> Siduc-gbhong alang bacnolu gaga nga hefec-dinac aibaba. Ailu ngabaholec gaga nga ngenge yowanginengti ngaba silic aicaigaing. Nga hasowac ailu aalicka wiyac ainoga. Nga bonec nono aibaba, gulu-kwouc ailu habu kwesacine haicne monic-monic fagac. <sup>21</sup> Ailu hasowac nga misa sanangne nobong kwele basifuc aiyelecaigac, ailu aibaba gocne ingucne. Esecne edocngebaiba, ailu yakumac hatacmac ung-yowa milu edocngebagabac. Ngic-ngigac aibaba ingucne balaibecaigaing, yenge Wapongte ngani-damongte gaga nalic mi badaingte.

<sup>22</sup> Asule gaga noine yanguc ainoga. Kwele-angacka dodofic ailu ganoga, nga belic-belic, ailu kwele-mogungkolec. Nga aibaba ulucne, nga babafic ainagulu, nga aibaba madicne. Ailu ngage-ngagesingkolec, <sup>23</sup> nga uluwelu gaga, ailu aibaba damongkenoga. Yefe-yowadi aibaba ingucne sasawale aka monic mi holec. <sup>24</sup> Aime Kristo Yesule ngic-ngigac yenge socnginengte gaga yogolec kwele fangke-fangke nga angac-holoc, yogo biyachac malicpongka webong homawec.

<sup>25</sup> Asudi gaganonggeng bafuwanolelu, damongkenoleme nongileng ye balaibedabeleng. <sup>26</sup> Balaibelu soc bafefe me kwele kwefang ainagulu me hasowac ainagulu mi aidabeleng.

## 6

*Sanangne domalu baficebanoga*

<sup>1</sup> Ngic hae-gbafocne, ngengelacni monicti bikic bafuwame ngic Asuholec gagaing, ngengi ngic yogo ingucne kwele-ulucka bafickelu edo-bamadic aicnodaing. Ailu ngengileng ingucnehac lokwesacka wawedaingkale, damongnagulu gadabiyeng. <sup>2</sup> Ngenge hewacnginang ngic-ngigac umacnginengkolec ngani-bafic aiyelelu gadabiyeng. Inguc ailu Kristole yefe-yowa balaibedaingte. <sup>3</sup> Monic ye feicne mi ailu yeicnele ngageme feicne aidaicte, yebac yeuctihac kwesac ainagudaicte. <sup>4</sup> Ngenge filesoc filesoc aibabangineng ngani-wosaec aidaing. Aime monic ye nganime yeicne aibabaine nalic aime, yogolec kwele-madic yeicna fadaic. Inguc facnodaictewa, gocne yengele aibaba yogo nganilu mi wosaedaicte. <sup>5</sup> Ngic yenge bolengineng filesoc filesoc badaingte.

<sup>6</sup> Wewedufocngineng Wapongte yowa wedungelecaigaing, ngenge yengele ngagesilu wiyacngineng madicne heuckelu wewedufocngineng nebocine yeledaing.

<sup>7</sup> Aime gageuctihac kwesacnagulu yanguc mi ngagedamec, "Na Wapong kwesackegabac." Ga Wapong nalic mi kwesackedamecte. Yogolec ngic monic ye nosing monic duwedaicte, ye nosing noine silicine ingucnehac fuluckedaiecte. <sup>8</sup> Monic ye socte gagawa wiyac duwecaigac, ye socte gagawacni noine fuluckeme sowaledaicte. Nga monic ye Asule gagawa wiyac duwecaigac, ye yogolec noine, gaga-sanang badaicte. <sup>9</sup> Ilec ailu aibaba madicnele tapili-wawa mi aidabeleng. Nongileng tatakic mikac galu aibaba madicne ailu gaebengka damengtowa kwesime nosing noine madicne badabelengte. <sup>10</sup> Nongileng damengnonggeng fagachac, iwa ngic-ngigac sasawa aibaba madicne aiyeledabeleng. Ailu agofocngineng yenge Sugucnenonggeng ngagesingkelu gagabiyeng, yenge madicne homacnehac aiyeledabeleng.

*Kwele-efec nga mimi-madic yowa*

<sup>11</sup> Nganining, naneuc molenedi kweleng sugucnebenang kwelengkegabac.\* <sup>12</sup> Ngic sasawa yengi soc tofangineng helockeningte kpafengngebalu micaigaing, yenge socnginengte gagale silicka feicne ainingte ailu inguc micaigaing. Ailu yenge Kristole malicpongte ailu weyebic aiyeledaingkale, inguc aingelecaigaing. <sup>13</sup> Ngic soc tofangineng biyac helockeibong, yenge yengileng yefe-yowa mi balaibecaigaing. Nga yengebac ngengele ngagelu yengileng wac bafeningte ailu ngengele soc tofangineng helockeningte homacnehac aiyeledaicte. <sup>14</sup> Aime nani wiyac monicte ngagelu wacne mi bafedacte, miyachenang. Sugucnenonggeng Yesu Kristole malicpongte wac sugu bafedacte. Yogolec ailu himongte gaga yogo webong nala homame naneicne himongte gagawa wecnubong homaiba, ingucne ngegegabac.

<sup>15</sup> Ngic soc tofangineng helockeicne me mi helockeicne, yogodi wiyac feicne mi aigac. Wapongti mime ngic-ngigac gbolicne fikeibong, yogodi sugu feicne aigac. <sup>16</sup> Aime ngic-ngigac yefe yogo gaganginang balaibecaigaing, yenge Wapongti yengela kwele-mogung nga kwele-sowac lodaicte, yogo yengi Wapongte aling gbolicne aigaing.

<sup>17</sup> Ailu yanguc mimoctogabac, Yesule bole babe wecnubong yele lofoc socna balu gagabacte, monicti na kwele-umac hatacmac mi neledaic.

<sup>18</sup> Ngic hae-gbafocne, Sugucnenonggeng Yesu Kristole kwele-madicti asunginang fadaic. Yogo foinac.

---

\* **6:11:** Poldi hibi kwelengkenogale mime ngic monicti yele yowa ngagelu kwelengkulu gawec. Ilec ailu Galata hibi yago 1:1-6:10 Poldi mime ngic monicti ngagelu kwelengkeme motowec. Motome 6:11-18 Ibac Pol yeuctihac kwelengkewec. Ilec ailu Galata ngic-ngigac nganilu yanguc ngegeibong, ngic monicti hibi yogo mi saleme baibong. Poldi sugu kwelengkulu saleme baibong. **6:15:** Gal 5:6; 2Kor 5:17 **6:17:** 2Kor 4:10

## **Poldi Efesas Habu Yengele Hibi Kwelengkewec**

### *Mimi-yegeng yowa*

Pol ye Yesule siduc mac nga taon fagacsoc minogale mac lolickelu gawec. Efesas yogo taon sugucne monic Asia prowins iwa fagac. Ye alecine yaeckang Efesas iwa hikewec. Hikelu dameng bangkacnemac galu Yesule yowa weduyelewec (Salecebaicne 18:19-21). Iwacni Yerusalem hatac hikewec. Gacgu alecine habackang aime Efesas taonka hatac hikelu hifa habackang iwa galu weduyelewec (Salecebaicne 19-20). Galu iwacni hefaliyelu Yerusalem kwesiwec. Yerusalem game Roma ngic yengi muc-macka loibong. Dameng iwa Roma gamang yenge Roma taon nga Israel himong fagaingsoc damongebawec. Ye Roma bahikebong iwa muc-macka ngiyewec (Salecebaicne 21, 28). Muc-macka ngiyelu hibi yago kwelengkelu Tikikus lacnome bahikelu Yesule habu Efesas iwa gaibong yenge yelewec.

Pol ye Israel alingkacni. Israel ngic-ngigac yenge Abraham madecine Aisak, yele fike-saweckacni. Yenge Wapongte yefe-yowa balaibelu gaibong. Efesas ngic-ngigac homacne yenge Israel yengele alingkacni miyac.

### *Yowa yago hibi nebcina fagac*

1:1-2 Mimi-madic yowa

1:3-3:21 Wapongti wacnubame Kristo ngagesingkebeng habu moniyang kpaducnubame Yesule habu gbagbacne gagabeleng

4:1-6:9 Gaga gbolicnele aibaba balaibelu ganoga

6:10-20 Nongileng Kristole tapiliwa sowacne ewalidabelengte

6:21-24 Poldi wenac-madic nga kwele-madic yowa kwelengkelu edocnubawec

### *Mimi-madic yowa*

<sup>1</sup> Na Pol, Wapongti bawosaecnume Kristo Yesule salecebaicne aigabac. Ngic-ngigac Wapongte bingec Efesas taonka Kristo Yesu ngagesingkecaigaing, ngengele hibi yago longelegabac. <sup>2</sup> Mamacnonggeng Wapong nga Sugucnenonggeng Yesu Kristo, yekele kwele-madic nga kwele-mogungtowadi ngengela fadaic.

### *Kristole kwelele wiyac madicne sasawa nolewec*

<sup>3</sup> Wapong ye Sugucnenonggeng Yesu Kristo yele Mamac, ye mimitengineholec. Ye aling gbagbacne nongileng Kristoholec wetackelu ganangte ailu yedi kwele-ilucte mimi-madic sawawa fayackegac, yogo sasawa nolewec. <sup>4</sup> Mimi-madic yogo yanguc, ye hocne biy-achacbenang molickelu himong nga sawa yeke mi fikeebocka, yele haicka gbagbacne nga sowacne mikac ganangte Kristole ailu bawosaecnubawec. <sup>5</sup> Ailu yeicne adu-madecfocine bacnubanale ye angacine nga ngage-ngageine balaibelu Yesu Kristole ailu esecnehac ngage-motocnubawec. <sup>6</sup> Ailu ye angac Madecine nga yeicne wac feicnele ailu kwele-madic ainolewec. Ilec nongileng ye mitengkegabeleng.

### *Yesule sacti suwecnubawec*

<sup>7</sup> Wapongte kwele-madic yogo wakelu fagacte Kristole sacti fuli bacnubalu bikicte muckacni luकेcnubalu bikicnonggeng hegilewec. <sup>8</sup> Ilec ngage-ngage-motoc nga ngage-ngage noine sasawa yogo momochac homacnebenang bamadickenolewec. <sup>9</sup> Wapongte kwelewa ngage-ngage angacine sangke-sangke fagac, yogo Kristole ailu mipangkelu yanguc mime yegengkenolewec, <sup>10</sup> "Na Kristo salebe himongka walu wiyac sasawa himongka nga honocmengka fagaing, yogo kpatulecebalu yogo damongebadaicte. Ailu ngage-ngage bole balu alingkeiba ailu damengtowaine ngameiba, iwa noine fikedaicte."

<sup>11</sup> Wapong ye esecnehac ngage-ngageine alingkelu ngagesilu ngage-motowecte Kristole ailu ngage-wosaec ainolelu bacnubawec. Ye wiyac sasawa kweleina alingkelu ngageme fawec, yogo noine inguc fikenale aiwec. <sup>12</sup> Ilec Israel ngic-ngigac nongilengti molickelu Kristo ngagesingkelu wangep gagabeleng. Aime Wapongte wac feicnedi hikelu game mitengkelu afeedabelengte. <sup>13</sup> Israel yengele alingkacni miyac, ngenge inguchac yowa noine ngagebong bikicte ameine bame wasacne ainingte Yesule Siduc Madicne balu ngagesingkeibong. Ngagesingkeibong ngenge yele ainingte ailu Tili Asu ngelenale miwec, ye yogo kwelenginang lolu mipangkelu ngelewec. <sup>14</sup> Mole-damocnonggeng fagac, yogo nongileng noledaicte. Mole-damocte mimipangine yogo Tili Asu nolewec. Yogo balu

gadabelengtewa, Wapongti bikicte muckacni lukecubalu bacnubadaicte. Ilec Wapongte wac feicne mitengkegabeleng.

*Siduc Madicnedi sawelu fanoledaic*

<sup>15</sup> Aime ngenge Sugucne Yesu ngagesingkecaigaing. Ailu ngic-ngigac Wapongte bingec sasawa yenge kweledi angac ngageyebong yowa-siduc yogo ngageiba. <sup>16</sup> Ilec ailu damengsoc ngengele ngagesilu Sugucne milockelu kwele-madic edocaigabac. <sup>17</sup> Milu yanguc milockecaigabac, Sugucnenonggeng Yesu Kristo yele Wapong, ye wac feicnetowaholecti Mamac gagac. Ailu ye ngage-ngage-motoc nga wiyac sangke-sangke fagac yogo bame fikelu yegengkenale Asu hegeleme, Wapong kweledi bucbuchac ngagedaingte. <sup>18</sup> Aime yedi kwelenginang angoleme wiyac honocmengka ngengele wangec fagac, yogo ngage-motodaingte. Wapongti ngenge yogo baningte wacnegebawec. Wiyac yogo tapili nga wac feicneholecti wakeyackeicne fagac. Ye ngic-ngigacfocine Wapongte bingec mole-damocine yogo ngelenale lowec fagac. <sup>19</sup> Ailu ngage-ngagesingkolec, nongileng yele tapilitowa feicnedi bole balu gagac, yogolec fungine inguchac ngage-motodabelengte.

<sup>20</sup> Aime yeicne tapiliine feicne, yogodi Kristola bole bame homackacni gboliye fangkelu sawawa feme foleinapec lowec ngiyegac. <sup>21</sup> Ailu sawa hewacka damong nga aling bole-yowa tapilinginengkolec ailu tapili haicine monic-monic nga sugucne-aling gocne gagaing, ailu wac sasawa wackecaigaing. Yogo yengele feicnetowangineng lowec ngiyegac, yogo dameng yagolec sugu miyac, yogo inguc fafeginowagac. <sup>22</sup> Inguc ailu Yesule habu baficebanale Wapongti wiyac sasawa yele bagewa kpaducebawec. Kpaducebame hodocngineng ailu wiyac sasawa yogolec sugucnengineng aiwec gagac. <sup>23</sup> Aime habu yenge Kristole noi-hewacine nga hige-moleine aibong, yedi habu nga wiyac sasawa bafuwayelelu bame wakeyegac.

## 2

*Esecne sowacneholec gaibeng*

<sup>1</sup> Ngenge esecne Wapongte yefe ewalilu bikickolec galu homaicne ailu, <sup>2</sup> himongte gagawa nga aleng yengele ngictau tapiliineholec balaibeibong. Ailu yakumac yowa wewe ngic gagaing, yengele ngictau yogolec bole balu gagaing. <sup>3</sup> Ngenge nga nonge momochac nongileng esecne yengele alingka galu socnonggengte gagale angac nga ngage-ngage sasawa balaibelu gaibeng. Aime nongileng yenge ingucne Wapongte aalicti feimonggang fewec.

*Wapongti bagboliyecnubalu ngage-ngagesingka locnubawec*

<sup>4-5</sup> Nongileng Wapongte yefe ewalilu gabeng asunonggeng homaicne gaibeng. Aime Wapongti sifu kwele-sowac sugucnehac ainolelu kwele-angactowa ngagenolewecte nongileng momoc Kristoholec bacnubalu bagboliyecnubawec. Aime Wapongti kwele-madic aingelewec, yogodi bikicte ameine bame wasecne aidaingte. <sup>6-7</sup> Ye Kristo Yesule madicnele ailu kwele-madic ailu yeholec taocnubawec. Yogolec dameng lobewa fikeme baba-madictowaine mime yegengkenale Kristo Yesuholec bagboliyecnubalu honocmengka locnubawec. <sup>8</sup> I yangucte, ngenge Yesu ngagesingkeibongte yedi kwele-madic aingelewec, yogodi bikicte ameine bame wasecne aibong. Aime Wapong ye ngagehoc mi ailu ngage-ngagesinggineng yogo ngelewec, yogo ngengelacni miyac. <sup>9</sup> Wasecne aibong, yogo ngengileng aibabale miyac. Ilec monicti yeicne ngageme wiyac feicne mi aidaic. <sup>10</sup> Nongileng Wapongte mole-hibi ailu Kristo Yesuholec wetackelu gaibeng, Wapongti aibaba madicne wasecnehac alingkelu milockenlewec. Ailu yedi aibaba yogo balaibelu ganangte bacnubawec.

*Yesule emewa wetackelu ganoga*

<sup>11</sup> Ilec ngenge wiyac yago ngagebong fadaic. Ngenge esecne Israel yengele alingkacni miyac galu himong-socte alingka gaibong. Inguc gaebongka, Israel ngic yengi soc tofangineng helockeibongte ngengele yanguc miibong, "Ngenge soc tofangineng mi helockeicne ailu Wapongte alingkacni miyac." Soc tofaine heloc-heloc yogo ngicti socka moc aaicne. <sup>12</sup> Dameng iwa ngenge Kristo mikac galu Israel ngic yengele alingka taockenogale kpatalangelebong gaibong. Aime Wapongti mimipang sanangnele yowa hefelu Israel ngicngigac weduyelewec, yogolec lobeina gaibong. Ngenge himong yagowa Wapong mikac gaibong, aime gaga madicne monic fikengeledaicte, yogo mi ngagelu wangec gaibong.

<sup>13</sup> Ngenge esecne inguc dalicka gaibong. Ailu yanguctihac Kristo Yesuholec kpatulelu gagabiyeng. Aime Kristole sacti sotiyeme Wapongte emewa kwesilu gagabiyeng.

*Yesudi ngaba baickeme aling moniyang sugu aibeng*

<sup>14</sup> Kristo ye yeuctihac kwele-moniyang ainolewec. Nonge Israel ngic-ngigac nga ngenge Israel aling kacni miyac, hewacnonggang ngabadi aka fawec, yogo yedi heuckelu baickeme miyac aiwec. Ailu ye yeicneholec kpatulec nubame habu moniyang aibeng. <sup>15</sup> Yesudi himong-socine homacka lowec, yogodi Wapongte yefe-yowale kwelina ung-yowa fagac, yogo noine mikac aiwec. Inguc aime ngenge nga nonge momochac ngic gbolicne moniyang fikebeng kwele-moniyang fikewec. <sup>16</sup> Ye habu yaeckang ngabaholec siyeckelu gaebengka malicpongka homalu domawec, yogodi nongileng kpatulec nubame ngaba miyac aime soc moniyang aibeng. Aibeng Wapongta kpatulec nubalu locnubame yeholec kwele-moniyang aibeng. <sup>17</sup> Yedi kwesilu ngenge dalicka nga nonge bangkacka momochac emeina ganangte kwele-moniyangte yowa madicne mime yegengkenoleme ngageibeng. <sup>18</sup> Asu moniyangti bacnubame ngenge nga nonge kpatulelu Mamacte emewa nalic hikelu domanoga.

*Wapongte mac*

<sup>19</sup> Ilec dameng yanguctihac Israel yengele aling kacni miyac, ngenge kwilic mi gagaing. Ngenge ngic-ngigac Wapongte bingec yengeholec kpatulelu mac fileine aibong. Ailu yanguctihac Wapongte alingfocine gagaing. <sup>20</sup> Ngenge nongeholec Wapongte mac bacngebaincne. Kristo Yesu yeuctihac posa-bosing sanangne aigac. Aime salecebaicne nga Wapongte siduc-mimi ngic yenge mac yogo bosing ingucne kwesingkelu Yesuholec domagaing. <sup>21</sup> Yele ailu nongileng sasawadi yele feiwa mac yogo taockeme taoc felu Sugucnele ibu-mac gbagbacne fikelu sugulegabeng. <sup>22</sup> Ngenge inguchac yela basugulecnglobalu taocngabame ngenge Wapongte mac fikebong Asudi kwelengingag gagac.

### 3

*Poldi yowa sangkeicne mime yegengkewec*

<sup>1</sup> Ilec ailu na Poldi hocne ngengele ailu Israel yengele aling kacni miyac, ngengela Kristo Yesule bole babe muc-macka locnubong ngiyegabac.

<sup>2</sup> Ngenge nale fungine biyac ngagegaing. Wapongti kwele-madicne ngengela balu hikenogale bole-yowa milu nelewec. <sup>3</sup> Nelelu ngage-ngage sangkeicne dondone edocnume yegengkewec, yowa yogo hocne bangkacne kwelengkegabac. <sup>4</sup> Kristole yowa sangkeicnele fungine biyac ngageiba, yogo wafelu ngage-motodaingte. <sup>5</sup> Yowa sangkeicne yogo Asudi salecebaicne nga siduc-mimi ngicfocine Wapongte bingec gagaing, yengela mime yegengkewec. Esecne ngic gaofebong, yengela ingucne monic mi miwec. <sup>6</sup> Yowa sangkeicne yogo yanguc, Israel ngic nongileng Kristo Yesuholec wetackelu gagabeleng. Ailu Wapongti biyachac nongilengte ailu yowa mipangkewec. Israel yengele aling kacni miyac nga nongileng mole-damoc yogo momochac banangte Siduc Madicne yogodi milu edocebame soc moniyang aigabeleng. Yowa sangkeicne yogo mibe yegengkegac. <sup>7</sup> Na Siduc Madicne yogolec mole-bafic ngic ganogale Wapongti ngageboc mikac bole nga pasi damuineholec ailu kwele-madicne nelewec, yogo yeicne tapiliwa nelewec.

<sup>8</sup> Wapongti kwele-madic aineleme Kristole wiyac madicnebenang fafa-sanang fagac, yogolec siducine Israel yengele aling kacni miyac, yengela mibe yegengkenale bole yogo naneicne milu nelewec. Na ngic-ngigac Wapongte bingec sasawa yengelacni waweweinemac, aime yedi sifu inguc ainelewec. <sup>9</sup> Aime yowa sangkeicne mibe yegengkenale yowa yanguc milu nelewec. Wapongti wiyac sasawa mime fikeibong, ye ngage-ngage sangkeicne yeicne kweleina esecnehac fungkelu ngagelu gawec. <sup>10-11</sup> Ye Wapongte ngage-ngagetowa yogolec fungine yogo esecnehac Kristo Yesu Sugucnenonggeng yela alingkewecte, yakumac yogo noine aigac. Yesule habu yengi Wapongte ngage-ngage-motoc mibong yegengkeme, bole-yowa tapiliholec haicine monic-monic nga sawawa Sugucnele aling gagaing, yenge yogo ngage-motodaingte. <sup>12</sup> Aime Kristodi yefe bafuwanoleme ye ngagesingkelu hangoc nga kwele-yaec mikac Wapongte emewa nalic fikelu gadabelengte. <sup>13</sup> Ilec yanguc edocngababe ngagening, na ngengele ailu doicka gagabac, ilec ngenge kwelenging mi wadaic, miyac. Na inguc aibe ngenge wac feicne badaingte.

*Efesas ngic yengele milockewec*

**2:13:** Kol 1:20    **2:14:** 1Kor 12:13    **2:15:** Kol 2:14    **2:16:** Sek 9:10; Kol 1:20,22    **2:17:** Yes 57:19    **2:19:** Efs 3:6    **2:20:** 1Kor 3:11    **2:21:** 1Kor 3:16    **2:22:** 1Pi 2:5    **3:1:** Filp 1:7,13    **3:2:** Kol 1:25    **3:3:** Efs 1:9-10; Kol 1:26    **3:6:** Efs 2:13,16-19    **3:7:** Kol 1:25    **3:8:** 1Kor 15:9-10    **3:12:** Yoa 14:6; Rom 5:2



<sup>14</sup> Ilec ailu Mamacnonggeng ketadi holecnolu milockegabac. <sup>15</sup> Yedi habufocine sasawa himongka nga honocmengka gagaing, nongileng momochac gaga noleme gagabeleng. Ngengele ngagelu yela yanguc milockegabac,

<sup>16</sup> Wapong, ga tapili nga wacgone feicnedi Asugonele tapili yogodi baficebaengka kwele-ilucnigeningi sanangkedaic. <sup>17</sup> Aime yenge Kristo ngagesingkebong Kristodi yengele kwelewa gadaic. Ailu kwele-angacka gaga-sanangne ganingte basanangebadamec. <sup>18</sup> Inguc aiyengka yenge ngic-ngigac sasawa gbagbacne gagaing, yengeholec Kristole kwele-angacine fungine yogo wileng fegac, nga ediwa hikeyackegac, ailu nebec nga nebocka hikeyackegac, ailu dumengka hauyackegac, yogolec efeckel elu ngage-motodaing. <sup>19</sup> Ailu Kristo ye kweleinedi nongileng angackecaigac, yogo ngic ngage-ngage sasawa ewaliyackelu fagac, yogo inguchac ngageningte milocugabac. Inguc aiyengka Wapong gala kwelele nosing wakeyackeicne, ingucnehac wakeyelenana.

#### *Kwele-madic yowa*

<sup>20</sup> Wapong tapilitowainedi nongilang bole balu gagac, ye hocne bole haicine monicmonic feicnebenang banogale tapili facnogac. Ailu yele boledi mimilocnonggeng, nga ngage-ngagenonggeng homacnehac ewaliyackegac, ailu yogo moto-motoine mikac. <sup>21</sup> Kristo Yesu nga habufocine yengele hewacka Wapongte wac feicne moto-motoine mikac fafegidaic, yogo foinac.

## 4

### *Yesu noi-hewacine nongileng kwele-moniyang ganang*

<sup>1</sup> Ilec na Sugucnele ailu muc-mac ngicti yowa sanangne milu yanguc edocngebabe, ye gaga silicine monicka wacngabawec, yogolec silicka gadabiyeng. <sup>2</sup> Gaga yogolec silicine yanguc, nenge bawacnagulu ulucne galu ngic-ngigac yengele mi takicngebadaic. Ailu kwele-madicka wangec galu kwele-angacka baficnagulu gadabiyeng. <sup>3</sup> Aime kwele-mogungti muc ingucne dodocngabame Asule kwele-moniyang aibong. Aime nenge yogo helockedaingkale, sanangke-benangkelu gadabiyeng. <sup>4</sup> Noi-hewacine\* nongileng moniyang. Nga Asu ye moniyang. Ingucnehac Wapongti wacngabame wiyac madicne silicine moniyang fikengelenale wangec gagaing. <sup>5</sup> Sugucne ye moniyang. Nga ngage-ngagesing yogo moniyang. Ailu misa-lowac yogo moniyang. <sup>6</sup> Wapong moniyang, ye Mamac walecnonggeng moniyang ailu feicnetowanonggeng. Ailu ye ngic-ngigac sasawa hewacnonggang nga kwelenonggang gagac.

<sup>7</sup> Aime Kristo yeuctihac baba-madictowaine, yogo heuckelu kwele-madicté wiyac filesoc filesoc nolowec, yogo balu gagabeleng. <sup>8</sup> Ilec ailu yowa monic yanguc kwelengkeicne fagac, "Ye wilinibenang felu bikicte multu hefecebaicne yogo bacebame yeicne alingka hikeibong. Aime ye ngic-ngigac kwele-madicka wiyacine yelewec." (Mige 68:18)

<sup>9</sup> Ye wilini fewec. Yogo moc mi miicne, ye molickelu himongka waweckacni fewec. <sup>10</sup> Ngic wawec, ye mac sasawa yeuctihac sawelu ganogale hefaliyelu honocmengka fewec. <sup>11</sup> Ailu ye hocne bole yanguc nolowec. Gocne yenge salecebaicne aidaingte. Nga gocne yenge Wapongte siduc-mimi ngic aidaingte. Nga gocne yenge Siduc Madicne milu edocebadaingte.† Nga gocne yenge Yesule habu yengele damong nga wewedu aidaingte, bole filesoc inguc nolowec. <sup>12</sup> Ngic-ngigac Wapongte bingec nongileng baficnagunogale bole balu Kristole hige-moleine nga noi-hewacine basugulebeng sanangkenale bole yogo nolowec. <sup>13</sup> Noleme Wapong madecinele fungine ngagesingkenangte kwele-moniyang ailu gadabelengte. Ailu sugule-sanangkelu Kristo ingucne aidabelengte.

<sup>14</sup> Ilec ailu nongileng kogoc gaga hatacmac mi gadabeleng, miyac. Kogoc yenge yanguc aicaigaing, kwesac-ngic yengi kwesac-yowawa yefe lololu socka lolole-yowa haicine monic-monic weduylebong lekwe wele-kwe aicaigaing. <sup>15</sup> Aime nongileng kwele-angacka damongnagulu yowa noine midabeleng. Inguc aibeng aibabanonggeng sasawa Kristo ingucne fikeme sugulebeng hodocnonggeng Kristoholec wetackelu noine badabelengte. <sup>16</sup> Ye kwelenonggang filesoc filesoc babeng, hige-mole nga wiyac sasawa taockeme domalu noi-hewacine moniyang fikelu suguledabelengte. Yogo kweledi angac ngagenagubeng aibabanonggang fikedaicte.

3:17: Yoa 14:23; Kol 1:23; 2:7    4:1: Kol 1:10    4:2: Kol 3:12-13    4:3: Kol 3:14-15    \* 4:4: Yesule habu yenge noi-hewacine ingucne aigaing. Efesas 1:23 iwa inguc miwec.    4:6: 1Kor 12:6    4:7: Rom 12:3,6    4:9: Yoa 3:13    † 4:11: Salecebaicne yenge Kristole bole-yowa babong salecebame hikeibong. Wapong ye siduc-mimi ngic yengela yowa yeleme ngic-ngigac milu edocebaibong. Nga gocne yenge Siduc Madicne mibong yegengkeme ngic-ngigac kwelengnang holeme kwele-hefaliyec aibong.    4:11: 1Kor 12:28    4:14: Kol 1:28    4:15: Kol 1:18; 2:19

*Kwele-iluc gbolicne*

<sup>17</sup> Na Sugucnele haicka sawang-yowa milu edocngebabe ngagening, ngenge, Israel yengele aling kacni miyac, yenge ingucne hatacmac mi gadabiyeng. Yenge ngage-ngageningeng sifuweme gagaing. <sup>18</sup> Ailu yenge ngage-ngage-motocngineng mi fagacte kundung kwelina kwele-sanang sowacneholec gagaing. Galu Wapongte gaga mi gabong ngage-ngageningengti hac aka ingucne domame gagaing. <sup>19</sup> Yenge aibaba madicne lobe holecnolu game mikac selo-boic aibaba nga gaga kosaine balaibelu kweleningeng wonongkolec taockeme taoc gacaigaing.

<sup>20</sup> Aime ngenge gaga ingucne galu Kristole yefe monic mi ngagegaing, miyac. <sup>21</sup> Yesule yowa noine ngagelu wedungeleibong, yogo ngagegaing. <sup>22</sup> Yanguc wedungeleibong, ngani-angacningeng sowacnedi soc-kweleningeng esecne basowalewec. Ngenge aibaba ingucne esecne balaibelu gaibong, yogo hegiledaing. <sup>23</sup> Wapongti kwele ngage-ngageningeng bagboliyengele daic. <sup>24</sup> Ailu soc-kweleningeng gbolicne bafuwangeleme Wapong yeicne ingucne noine dondone nga gbagbacnebenang gagaing, ngenge ngakpi ingucne yogo holebong haudaic.

*Aibaba madicne aidabeleng*

<sup>25</sup> Ilec ailu nongileng soc moniyangte donge-hedec nga hige-moleine galu baficebalu ganangte, ngenge sasawa aibaba kwesacine hegiledabiyeng.

"Ailu yowa noine ngic-ngigac emewa gagaing, yengeholec mingagec ailu gadabiyeng." (*Sek 8:16*)

<sup>26</sup> "Ngenge kweleningang aalic ngagedaingte, dameng iwa bikic mi bafuwadabiyeng." (*Mige 4:4*)

Ailu ngenge aalic ngagelu gabong wenac-dongeine mi haudaic. <sup>27</sup> Ngenge Aleng Sugucningeng mac mi locnodaing. <sup>28</sup> Hise-baba ngic ye hise hegilelu moleinedi bole balu boleinele nosing madicne bafuwalu ngic gocne soctepecka waweweine gagaing baficebadaic.

<sup>29</sup> Ngenge micnginangkocni yowa sowacne monic mi ofedaic, miyac. Yowa madicne micnginangkocni ofeme ngic-ngigac yenge yowangineng ngagelu umacningengsoc baficebame sugulelu sanangkeningte basanangebadaibiyeng. <sup>30</sup> Wapongti bikicte muckacni lukecngabanale dameng lowec, iwa domaningte mimipangine Tili Asu longelewec. Ilec ngenge Wapongte Tili Asu kwele-umac mi lacnodaing. <sup>31</sup> Hewacnginang kwele-hobec mi ngagedaing. Ailu ngenge aibaba dacineholec nga aalic hegiledaing. Ailu ngenge misulec-yowa nga lobe-yowa mi aidaing. Ngenge agofocngineng sipilicebanogale ngage-ngage ingucne sasawa hegileyackedaing. <sup>32</sup> Ngenge aibaba madicne ainagulu kwele-sowac ngagelu baficnagulu gadaing. Wapongti Kristole ailu bikicningeng hegilewec, ingucnehac ngenge ngengileng sowacningineng hegiledabiyeng.

**5***Kwele-angacka gaga*

<sup>1</sup> Ilec ailu Wapongti adu-madecfocine ngengele ailu kweleinedi angac ngagegac. Ilec ngenge ye ingucnehac ailu yele aibaba balaibelu gadabiyeng. <sup>2</sup> Kristo ye inguchac kweleinedi ngengele angac ngagelu ago aingelelu yeicne socine nongileng ailu mimoc-tolu depec yogo Wapongta bahikelu homawec. Ibu yogodi depecte hoine madicne ailu Wapongta fewec. Aime ngenge ye aiwec ingucnehac balaibelu kweledi angac ngagenagulu baficnagudabiyeng.

<sup>3</sup> Aime ngengileng hewacka selo-boic aibaba, ailu gaga kosaine wonongkolec silicine haicine monic-monic, ailu hane aibaba, ngenge aibaba yogo sasawa hegilelu mibenang aidaing, miyac. Ngic-ngigac ngenge Wapongte bingec gagaingte, aibaba ingucne ngengela aiaine mi aigac. <sup>4</sup> Ngenge yowa sowacne gameineholec nga yowa kosaine ailu delec gameineholec, yowa ingucne micnginangkocni ofeme mi madickedaiecte. Ngenge yogo hegilelu kwele-madic yowa mibong madickedaiecte. <sup>5</sup> Aime selo-boic ngic-ngigac nga ngic-ngigac gaga kosaine wonongkolec gacaigaing. Nga ngic-ngigac hane ailu wiyac badaingte, aibaba yogo siduc-gbong ingucne alang badaingte. Ngic-ngigac yogo yenge Kristo nga Wapongte ngani-damangka nalic mi gadaingte. Ailu yekele wiyac monic nalic mi badaingte. Ngenge yogo ngage-moto-benangkedaing.

*Angocte aibaba*

**4:17:** 1Pi 1:14; Rom 1:21    **4:22:** Rom 8:13; Kol 3:9    **4:23:** Rom 12:2    **4:24:** Fike 1:26; Kol 3:10    **4:25:** Kol 3:8-9    **4:26:** Yak 1:19-20    **4:29:** Kol 4:6    **4:30:** Yes 63:10; 1Tim 5:19; Efs 1:13-14    **4:31:** Kol 3:8    **4:32:** Mat 6:14; 18:22-35; Kol 3:12-13    **5:1:** Mat 5:48    **5:2:** Hib 10:10; Wah 29:18    **5:5:** 1Kor 6:9-10; Kol 3:5

<sup>6</sup> Monicti yowa kwesacine edocngebame ngenge yogo ngagebong noine mi aidaic. Yowa wewe ngic ingucne yengele bikicte ameine Wapongti aalicineholec baduyeleadaicte. <sup>7</sup> Ilec ailu ngenge yengeholec mi wetackedaing. <sup>8</sup> Ngenge molickelu kundungte alingka gaibong. Nga yakumacbac Sugucneholec wetackelu angocinele alingka gagaing. Ilec angocte adu-madec ingucne gadaing. <sup>9</sup> Aime angocte aibaba noine yanguc fagac, aibaba madicne nga gaga dondone, ailu yowa noine inguc fagac. <sup>10</sup> Sugucnedi aibaba ngageme madickecaigac, yogo wosaelu aidabiyeng. <sup>11</sup> Ngic-ngigac aling gocne yenge kundungte aibaba aibong aibabangineng noine mikac aicaigac, ngenge yogo yengeholec mi wetackedaing, miyac. Ailu ngenge aibabangineng yegen a angocina bayegengkebong funginengineng ngani-motodaing. <sup>12</sup> I yangucte, yenge sowacnenginengte aibaba sangke-sangke aicaigaing, yogo ngengi mibong gameineholec aidaicte. <sup>13</sup> Ailu aibaba ingucne sasawa yegen lobong angocti kweme yegengkedaicte.

<sup>14</sup> Yogolec silicine yanguc, wiyac sasawa angocti kweme yegengkedaicte. Ilec ailu yanguc miicne,  
 “O, ngic gung falu gagic, ga gboliyelu homackacni fangkec. Inguc aiyengka Kristole angocti bacgume yegengkedamecte.”

*Gaga madicne gadabeleng*

<sup>15</sup> Ilec ngenge aibaba madicnele yefengineng ngani-motolu hikedaing. Ailu ngenge ngage-ngagenineng mikac ingucne mi gadabiyeng, miyac. Ngenge ngage-ngagemotockolec ailu gadabiyeng. <sup>16</sup> Yanguctihac aibaba sowacnedi sawelu fagacte, ngenge damengngineng nalic wickedaing. <sup>17</sup> Ngenge ngic-ngigac ngage-ngage mikac ingucne mi gadabiyeng, miyac. Ailu Sugucnedi ngageme wiyac madicne aigac, ngenge yogo ngagemotolu gadabiyeng. <sup>18</sup> Ngenge waing misa homacne nolu kwele-sifuc mi aidabiyeng. Yogodi gagangineng basowaledaicte. Asudi kwelenginang wakedaic. <sup>19</sup> Wakeme miti geewa gee fagac nga malac fuluna gee ailu Tili Asudi gee bafuwangedaicte, ngenge gee yogo hole-ngagac aidabiyeng. Ailu ngenge gee holelu kpeng nga yoming silicine haicne monic-monic welu fitolu Sugucne kweledi mitengkedabiyeng. <sup>20</sup> Ailu ngenge Sugucnenonggeng Yesu Kristo, yele wacka damengsoc Wapong Mamac wiyac sasawale kwele-madic edodabiyeng.

*Ngawe-ngigacte yowa*

<sup>21</sup> Ngenge Kristo alang bacnolu yele ailu ngengileng bawacnagulu agofocngineng yengele yowa ngagelu gadabiyeng.

<sup>22</sup> Ngigac ngawegoneholec, ga Sugucnela bawacnagulu yele yowa ngagelu gagic, inguchac ngawegonela bawacnagulu yele yowa ngagelu gadamec. <sup>23</sup> I yangucte, Kristodi habule hodocine aigac, ingucnehac ngawedi ngagacinele hodocine aigac. Kristodi habu nongileng hodoc aigac, aime nongilengti yele hige-moleine nga noi-hewacine aigabeleng. Ailu yedi Asa-baba ngicnonggeng aigacte ailu yedi bikicte ameine bagac. <sup>24</sup> Yesule habudi Kristola bawacnagulu yele yowa ngagelu gagaing, ingucnehac ngigac ga ngawegonela bawacnagulu gadamec.

<sup>25-27</sup> Kristodi habufocine nongileng kwele-angacka ago ainolelu nongileng ailu yeicne gagaine hegilewec. Hegilelu nongileng Wapongte bingec ainangte ye yeicne yowale tapiliwa misadi lowacnubalu suwecnubawec. Suwecnubalu bacnubame nongileng Yesule haicka habufocine fikelu gadabelengte. Nongileng madicne nga gbagbacne sowacnenonggeng mikac galu, tapili nga hibi-kwelengngineholec yele haicka fikenangte ngagewec. Kristodi kwele-angacka yeicne gagaine hegilewec, ingucnehac mamac, ga ngigagone ye kwele-angacka ago aicnodamec. <sup>28</sup> Mamac, ga yefe yogo balaihelu ngigacgone yele kweledi angac ngagacnodamec. Gageicne socte aigelecaigac, silicine ingucnehac, ngigacgone yele angacgudaic. Ngic monic ye kweledi ngigacinele angac ngagecaigac, ye yeicne angac ngagenagugac ingucne aigac. <sup>29</sup> Aime monic yeuctihac socinele ngaba nalic mi aidaicte, yogo miyachenang. Ye socine ngani-damong aicnolu noba-nosing madicne lacnolu gadaicte. Kristodi habufocine nongilang inguc hocne aicaigac. <sup>30</sup> Nongileng Kristole hige-mole nga donge-hedec moniyang ailu gagabeleng. <sup>31</sup> Yowa monic yanguc kwelengkeicne fagac,

“Ilec ngic monic ye nenggac-mamackecine hegilecepalu ngigacineholec wetackeme, yeke soc nga kwele-moniyang ailu gadabiyecte.”

(*Fike 2:24*)

<sup>32</sup> Aime ngage-ngage sangkeicne yogo gbolongne ailu suguledaicte. Yogo Kristo ye ngawe ingucne nga habufocine ngenge ngigac ingucne aigaingte yengele inguc ngagelu migabac.

<sup>33</sup> Ilec ngic ngenge filesoc filesoc ngengileng kweledi angac ngagenagucaigaing, silicine ingucnehac ngigacfocngineng kweledi angac ngageyeledaing. Nga ngigac ngenge inguchac ngawefocngineng alang bayeledaing.

## 6

### *Nenggac-mamac nga adu-madec*

<sup>1</sup> Adu-madec, ngenge ngengileng Sugucnele ailu nenggac-mamacfocngineng yengele yowa balaibelu gadabiyeng, yefe yogodi dondonne aigac. <sup>2-3</sup> Ung-yowa yanguc kwelengke-icne,

“Ga inguc aiyengka wiyac sasawa nalic fikegeleme himongka dameng dalicne gahomadamecte.” (Wah 20:12; Yef 5:16)  
Ung-yowa yogodi molic-molic mimipang yowa aigac.

<sup>4</sup> Mamac, ngenge adu-madec yengele aalic mi bafuwayeledabiyeng, miyac. Ngenge Sugucnele yowa edocebalu bamadicebabong yenge sugulelu sanangkedabiyeng.

### *Kwelec kwekwe nga bolele damong*

<sup>5</sup> Kwelec kwekwe, ngenge Kristole yowa balaibecaigaing, silicine ingucnehac himongka bolele damongfocngineng yengele yowa balaibelu ngageboc mikac domalu hangoc ailu dengdenggebame kwesac mi aidabiyeng. <sup>6</sup> Ngenge Kristole kwelec kwekwe ganogale Wapongte yowa kwele-madicka ngagelu damengsoc bolengineng madicne angacka badabiyeng. Inguc ailu bolele damongfocngineng yenge nganicngabagaing me mi nganicngabagaing, aime sifu ngenge bole madicne sugu badabiyeng. <sup>7</sup> Ngenge ngic yengele bole bacaigabiyeng, dameng iwa Sugucne ngagesilu yele bole ingucnehac yogo kwele-madicka badabiyeng, bole yogo ngicte bole miyac. <sup>8</sup> Aime yanguc ngagegaing, ngenge bolele damong me kwelec kwekwe gagaingka, ngenge bole madicne balu gabong Sugucnedi yogolec ameine sockahac badungeledaicte.

<sup>9</sup> Bolele damong gagaing, ngenge ingucnehac kwelec kwekwefocngineng hangoc mi bafuwayeledaing, kwele-ulucka ayeledaing. Ngenge yanguc ngagedaing, honocmengka yenge nga ngenge Sugucnengineng moniyang gagac. Yela feicne waicne monic mi gagaing.

### *Lokwesacka sanangkelu domadaing*

<sup>10</sup> Yowa mimooctonogale mibe, ngenge Sugucnela hole-sanangkebong tapilitowainedi ngengela falockelu fame tapiliholec gadabiyeng. <sup>11</sup> Ngenge Aleng Sugucnenginengti kwe-sacka ngaba aingeleme ngenge sanangkelu domaningte hudule wiyac sasawa Wapong-tacni holebong haudaic. <sup>12</sup> I yangucte, nongilengti ngic himong-sockolec yengeholec hudu mi wedabelengte, miyac. Nongileng aleng micne nga wiyac haicine monic-monic goncne tapilinginengkolec gagaing, yengeholec hudu welu gagabeleng. Aleng yogo yenge kundungte tapili sugucne nga feicne ailu damong galu himongka nga sawawa bolengineng bacaigaing. <sup>13</sup> Ilec Wapongtacni hudule wiyac sasawa holebong haume kindololo damengka ngaba yengi tapilingineng nalic mi bawadaingte. Aime ngenge sanangne domadaingte.

<sup>14</sup> Ngenge ilec yanguc aidabiyeng, wiyac sasawa noinedi umbika ingucne aime ngenge yogo hewacnginang hefedabiyeng. Hefelu gaga dondonnedi maleku ingucne aime somecnagudaing. <sup>15</sup> Kwelengineng baefeckebong aibaba yogo hige-ebec ingucne aime ngenge yogo holebong haume sanangke galu Siduc Madicne ngagesingkelu kwele-mogung aidaing. <sup>16</sup> Ailu ngenge wiyac sasawa yogo balu gadaing. Ailu ngage-ngagesingninengti sukuku ingucne hefedaing. Ngenge yogo damengsoc hefelu domabong Kindololo fileinedi lebe-madecine dac-ubilangngineholec balockeme welelu sukukuwa kwelu morgungkedaic. <sup>17</sup> Ailu asa bacnggebame wasecne aigaingte aen duu ingucne holebong haudaic. Aime Tili Asulacni hudule fitec wacine Wapongte yowa. Ngenge yogo balu gadaing. <sup>18</sup> Asudi damengsoc baficnggebame Wapong wacke-wasic aicnolu milockelu gadaing. Ngenge deboc-gboli galu ngic-ngigac Wapongte bingec sasawa yengele ngagesilu sanangnehac Wapong milockedaing.

<sup>19</sup> Ailu micne efeckeme hangoc mikac galu Wapongti yowa neleme Siduc Madicnele ngage-ngage sangkeicne yogo milu edocebadacte. Ngenge nale yogolec Wapong milockedaing. <sup>20</sup> Ailu na yogolec siduc mibe muc-macka locnubong ngiyegabac. Ilec na hangoc mikac yowa madicne edocebadacte yogolec milockedaing.

### *Yowa moto-motoine*

**6:1:** Kol 3:20    **6:4:** Kol 3:21; Mige 78:4; Ynn 22:6    **6:5:** Kol 3:22-23; Tit 2:9-10; 1Pi 2:18    **6:8:** 2Kor 5:10; Kol 3:24-25    **6:9:** Kol 4:1; Rom 2:11    **6:11:** Rom 13:12; 2Kor 10:4    **6:12:** 1Pi 5:8-9    **6:14:** Yes 11:5; 59:17; 1Tim 5:8    **6:15:** Rom 10:15    **6:17:** Hib 4:12    **6:18:** Luk 18:1; Kol 4:2; 1Tim 5:17    **6:19:** Kol 4:3-4; 2Tim 3:1  
**6:20:** 2Kor 5:20; Film 9

<sup>21</sup> Tikikusdi fulu gaganele fungine nga bole bacaigabac, yogolec edocngebayackedaicté. Ngic yogo ngic hae-gbanonggeng, ailu kwelenonggengti yele angac ngagegabeleng. Ye tatakic mikac Sugucnele mic-yowa balaibelu baficebacaigac. <sup>22</sup> Yedi nongele yowa-siduc edocngebame ngagebong ngengele kwele basanangkenogale salebe fudaicté.

<sup>23</sup> Wapong Mamac nga Sugucnenonggeng Yesu Kristo yeki ngic hae-gbafocne ngenge kwele-mogungkolec galu kweledi angac ngagenaguningte ngage-ngagesingngineng basanangedabiyec. <sup>24</sup> Ngic-ngigac Sugucnenonggeng Yesu Kristo kwelenginengti yele angac ngagecaigaing, ngengele kwele-madic nga angactowa moto-motoine mikac yogodi fagidaic.

Yogo foinac.

## **Poldi Filipai Habu Yengele Hibi Kwelengkewec**

### *Mimi-yegeng yowa*

Filipai yogo taon sugucne monic Masedonia prowins iwa fagac. Pol ye Yesule siduc mac nga taon fagacsoc minogale mac lolickelu gawec. Ye alecine yaeckang Filipai iwa hikewec (Salecebaicne 16:12-40). Hikelu Yesule siduc milu edocebame iwa Yesule habu fikeibong. Hegile hikelu yogolec lobeina alecine habackang Filipai iwa hatacmac hikelu ngiye-fac aiwec. Ailu Yerusalem hikewec (Salecebaicne 20:6). Yerusalem hikelu game Roma ngic yengi muc-macka loibong. Dameng iwa Roma gamang ye Roma taon nga Israel himong fagaingsoc damongkewec. Ye Roma iwa bahikebong muc-macka iwa ngiyewec (Salecebaicne 21, 28). Muc-macka ngiyelu Timotiholec hibi yago kwelengkelu Epafodaitus lacnoboc bahikelu Yesule habu Filipai gaibong yenge yelewec.

Soc tofaine helockeicnele aibaba yogolec fungine yanguc, Wapong ye Abraham yanguc milu edowec, "soc tofangineng helockedaing." Aibaba yogo socte maa yegengkeme Wapongte aling gacaigaing. Ilec ailu Israel aling yenge Abrahamte fikesaweckacni, yenge Wapongte yowa balaibenogale aibaba yogo balaibecaigaing. Yesule damengka Israel ngic-ngigac gocne yenge ngagebong soc tofangineng mi helockeicne yenge Wapongte aling nalic mi gadaingte. Poldi ngage-ngage yogo Filipai 3:2-5 iwa kwelengkewec fagac.

### *Yowa yago hibi nebcina fagac*

1:1-11 Kwele-madic yowa

1:12-30 Polle aibaba yogo yanguc, ye umackolec game Kristodi bafickeme beliyelu gawec

2:1-30 Nongileng Kristo ingucne aidabeleng

3:1-21 Sawang-yowa gocne miwec

4:1-23 Wapongte yowa weduyelewec

### *Hibile molic-molic yowa*

<sup>1</sup> Na Kristo Yesule kwelec kwekwe ngic Pol, na nga Timoti, noki ngengele hibi yago logabelec. Ngic-ngigac Wapongte bingec Filipai taonka Kristo Yesuholec wetackelu gacaigaing, gocne yengele damongfocngineng, nga gocne yengele mole-baficfocngineng, sasawa ngengela hibi yago logabelec.

<sup>2</sup> Mamacnonggeng Wapong nga Sugucnenonggeng Yesu Kristo yekele kwele-madic, nga kwele-mogungtowadi ngengela fadaic.

### *Kwele-madic yowa*

<sup>3</sup> Na ngengele ngagesicaigabac, dameng iwa Wapongne kwele-madic edocaigabac. <sup>4-5</sup> Siduc Madicnele bole molickelu baofecgubeng yakumac aigac, nenge naholec bolele aling moniyang ailu gaibeng. Ilec ailu ngengele ngagesilu belic-belicka milockecaigabac.

<sup>6</sup> Ailu yanguc ngagepangkecaigabac, Wapongti bole madicne kwelengingang biyachac molickelu bawec, yogo taockelu balu gagac. Bagacgu Kristo Yesule damengtowa kwesime, iwa boleine yogo bamoctoyackedaicte. <sup>7</sup> Na ngengele inguc ngagelu kwelenedi angacume gabe dondongkegac. Na muc-macka gagabac, me Siduc Madicnele fungine mibe yegengkegac, me Siduc Madicne basanangkegabac, iwa nengele sasawadi naholec Wapongte kwele-madicka aling moniyang gagabeleng.

<sup>8</sup> Wapongti yogo foinac widecume yowa yanguc migabac, Kristo Yesule kwele-sowacti molickeme nengeholec ganogale angacnugac.

<sup>9-10</sup> Aime aibaba weni yogodi madicne aigac, nengele yogo nalic wosaeningte yanguc milockecaigabac, nengele kwele-angacka damongnagulu gadabiyeng. Aime angac yogodi sugulelu ngengele ngage-ngagewa bafickelu kweme haulu gbolongne aime, Wapongte yefe ngage-motodaingte, inguc milockecaigabac. Nengele inguc ngage-motolu Kristole damengtowa kwesime, gbagbacne nga bikicngineng mikac domadaingte. <sup>11</sup> Domaebongka gaga dondonnele noine Yesu Kristole wacka bame wakengeleadaicte. Yogodi Wapongte wac feicne nga mimi-madic bafuwadaicte.

### *Muc-macka ngiyeme Kristole siduc sugulewec*

12-13 Aime lebe-ngic ngictaule oda kwelina gaibong, ailu ngic-ngigac sasawa yawa gaibong, yenge sasawadi yanguc biyac ngani-motoibong, ngic yogo ye Kristole ailu muc-macka gagac. Gabe nala pasi fikewecte Siduc Madicnele bole hatacmac basanangkeme sugulewec. Ngic hae-gbafocne, ngenge yogo ngageningte angacnugac.\* 14 Muc-macka ngiyegabacte ngic hae-gbafocnonggeng bocyac yenge ngage-ngagengineng Sugucnela lobong sanangkewec. Sanangkeme Wapongte yowa hangoc mikac milu gagaing.

15-17 Na sanangne domalu Kristole Siduc Madicne edocebalu weduyelenogale Wapongti locnuwec, yenge yogo ngagelu yefe dondongna Kristole siduc kwele-angacka mibong yegengkelu fagac. Habu tofaine yengibac soc bafefe nga ngaba ngage-ngagewa galu Kristole siduc mibong yegengkelu fagac. Milu nale yanguc ngagesigaing, ye muc-macka game Kristole siduc mibong umac haicine monic-monic bafuwadaicte. 18 Ailu ngage-ngage kwesacine me ngage-ngage noine Kristole siduc mibong yegengkelu facaigac, yogo ngagebe madickegac. I yangucte, yenge Kristole siduc mibong yegengkegac, yogodi wiyac feicne aigac. Inguc ngagelu yanguctihac beliyegabac. Ailu hatacmac beliyedactehac. 19 Inguc aibong ngengele mimilolc nga Yesu Kristole Asudi bafuwacnugac. Ilec yanguc ngagesigabac, umacne baickeme wasecne aidacte. 20 Aime angacne yanguc fame wangep gagabac, wiyac monicte me monicte ngagebe gameineholec mi aidaicte. Na gadacte me homadacte, socnedi wiyac aidacte yogo Kristo wac sugucne lacnolu gadacte. Ilec mi hangocnugac.

21 Naneicne gagane yogo Kristo wac feicne lacnolu gagabac, yogo ngagebe madickegac. Aime homadacte iwa yeholec wetackelu gadacte, yogo ngagebe madicke-benangkegac. 22 Aime sockolec galu bole babe noine bocyac fikedaicte. Ilec wenuc midacte, gagane me homacne, yogo mi ngage-motogabac. 23 Angac yaeckang ingucnedi fulucnume gagabac. Homalu Kristoholec ganogale bocyac ainelegac, yogodibac wiyac sasawa ewaliyackedaicte. 24 Aimebac ngengele madicnele ailu gagane hatacmac taockelu gadacte. 25 Yogo yanguc ngagepangkegabac, na ngengeholec galu baficngebabe, ngage-ngagesingnineng sugulelu sanangkeme beliyelu gadaingte. 26 Aime ngengeholec hatacmac ganogale fube Kristo Yesule ailu belic-belic sugucnehac aidaingte.

#### *Weyebic aingeledaingte*

27-28 Na fulu nganicngebadacte, me dalicka galu ngengele yowa-siduc yanguc ngagedacte. Ngenge asuningeng moniyang, nga kwelengineng moniyang galu, ngabafocngineng yengele mi hangocngabadaic. Ailu ngenge sanangne domalu yengi Siduc Madicne ngagesingkeningte, bole yogo doicineholec bacaigaing. Inguc fikenale ngenge Kristole Siduc Madicne yogolec silicka gadabiyeng. Aibaba yogodi ngabafocngineng yanguc edalicebadaicte, yenge sowalelu miyac aidaingte. Aimebac ngengele bikicte ameine bame wasecne aidaingte. Wapongti inguc aidaicte. 29 Ilec ngenge Kristole ailu wiyac yanguc ngelewec, ngenge Kristo ngagesingkeibong ingucnehac, yele ailu ngaba nga doicka locngubaibong, ingucnehac ngelewec. 30 Molickelu doickolec gagale boletowa balu gaiba, yogo dongedi nganiibong. Ailu yakumac balu gagabac yogo ngagegaing, silicine ingucnehac ngenge yakumac balu gagaing.

## 2

#### *Dongengineng Kristola hiladaing*

1 Ngenge Kristoholec wetackeibong, yogodi basananggebame Kristole kwele-angacti bakolocngewalu gagac. Ailu Tili Asuholec kpatulecngewalu kwele-mogung aingelelu kwele-sowac ngagengelegac. 2 Ilec ailu hewacnginang ngage-ngage moniyang nga kwele-moniyangka kweledi angac ngagenagudaing. Inguc aibong na beliyelu ngagebe motodaicte. 3 Ngenge wac sugucne banogale mi aidaing. Ailu soc bafefe mi gadabiyeng. Ngenge aibaba yogo hegilelu socngineng bawacnagulu, ngic-ngigac agofocngineng yengele wac bafelu ngengileng wac bawalu gadabiyeng. 4 Gageicne woc-wiyac sugu mi damongkedamec, agofocgone yengele woc-wiyac momochac baficebalu damongkedamec.

5 Kristo Yesule pasi nga ngage-ngage fagac, ngenge silicine yanguc ngagedabiyeng.

6 Kristo ye Waponghac gawec.

Ailu ye Wapongkolec angasoc ganogale mi ngagewec.

7 Ye yeicne gaga hegilelu kwelec kwekwe ngic aiwec.

Ailu ye ngic soc balu ngic silic fikeme nganiibong.

\* 1:12-13: Ngictau yele oda kwelina yeicne macine fawec. Ailu ofis haicine monic-monic nga muc-mac, ailu bole alingte mac fayackewec. 1:12-13: Sale 28:30 1:19: 2Kor 1:11 1:21: Gal 2:20 1:23: 2Kor 5:8 1:27-28: Efs 4:1; 1Tim 2:12 1:29: Sale 16:19-40 2:3: Gal 5:26 2:4: 1Kor 10:24 2:6: Yoa 1:1-2; 17:5 2:7: 2Kor 8:9; Yoa 1:14

<sup>8</sup>Ye ngic fikelu yeuctihac socine bawalu Wapongte yowa balaibelu gacgu homawec.

Homacine yogo malicpongka homawec.

<sup>9</sup>Ilec ailu Wapongti ye bafelu wac feicnehac lacnolu gunungkewec, wac yogo wac sasawa ewaliyackegac.

<sup>10</sup>Ye inguc aime honocmengka gagaing, nga himongka gagaing, ailu wiyac sasawa gagaing, yenge Yesule wacka socngineng bawacnagulu ketadi holecnoyackening.

<sup>11</sup>Ailu ngic-ngigac sasawadi Yesu Kristo ye Sugucne, inguc mibong yegengkedaic.

Inguc aibong wac feicne yogodi Wapong Mamacte ainowagac.

#### *Himongka angoc ingucne ganoga*

<sup>12</sup>Ilec agofocne kwelenedi ngengele angac ngagegabac, ngenge esecne damengsoc yowane balaibelu gaibong. Yogo ngengele emewa gabe yowane balaibeibong. Ingucnehac yakumac dalicka gabe ngenge yowane balaibelu hangoc ailu dengdenggebame boletowa balu gadabiyeng. Gacgubong damengngine kwesime wasecne aidaingte. <sup>13</sup>Wapong ye bole aling madicne fikenale kwelenginang bole balu gagac. Inguc balu game ngagenenginangti ye balaibedaingte. Ailu bole yogo baningte tapili ngelelu gagac.

<sup>14</sup>Ilec bole sasawa badabiyengtewa, ngenge tatakic yowa nga yowadi fec-wac mi ainagudabiyeng. <sup>15</sup>Inguc aidaingtewa, yanguc edalidaingte, Wapongte adu-madec gagaing, ngenge sowacnengineng mikac galu gbagbacne nga dondonne domadabiyeng. Ngenge, ngic-ngigac sowacnebenang nga yefe lilolu gagaing, yengele hewacnanginang domalu Wapongte yowa gagaingholec bagalu angoc ingucne himongtowa yagowa kwebong angoledaicte. <sup>16</sup>Ngenge inguc aibong, Kristole damengtowa kwesime, ngengele ngagebe wiyac feicne aidaicte. Aime yanguc midacte, na moc mi gasackeiba, me bolene baiba yogo noine mikac monic mi aiwec. <sup>17</sup>Ngenge ngage-ngagesingte bole yogo depecte hasoc ingucne balu gagaing. Aime ngabafocne yengi wehomacnulu yogolec feina nale sac sotingkedaingtewa, na sifu yogolec angac ngagelu ngengeholec beliyegabac.\* <sup>18</sup>Aime ngenge yefe iwahac angac ngagelu naholec momoc beliyedabeleng.

#### *Timoti nga Epafodaitus*

<sup>19</sup>Sugucne Yesudi ngageme nalic aime, dameng mi daliweme Timoti salebe fudaicte. Ailu ye hefaliyelu ngenge wenuc gagaing, yogolec siduc edocnume kwelene madickedaicte. <sup>20</sup>I yangucte, ngic monic Timoti ingucne naholec mi gagac, miyac. Ye moniyangti sugu kweleinedi sugucnehac ngengele aicaigac. <sup>21</sup>Aime ngic-ngigac naholec gagaing, yenge yengileng wiyacte sugu ngagecaigaing. Ailu Yesu Kristole wiyacte monic mi ngagecaigaing. <sup>22</sup>Aime Timoti ye aibabaine madicne, ngenge yogo ngagegaing. Ye madecti mamacineholec bole balu gagac, silicine ingucnehac, naholec Siduc Madicnele bole baficnume balu gagabelec. <sup>23</sup>Aime nala yefe wenuc fikedaicte, yogo ngage-motolubac ye biyac salebe funale ngagesigabac. <sup>24</sup>Ailu Sugucne ngagepangkeli yanguc ngagegabac, naneuc dameng mi daliweme ngengela inguchac fudacte.

<sup>25</sup>Aime ngengi salecebainengineng Epafodaitus salebong kwesi domalu kwesingnume, wiyac monicte mi kpungkegabac. Ye naholec bole balu gagac. Ailu naholec galu Sugucnele hudu-baba ngic, ye gbane ingucne ailu gagac. Aime ye salebe ngengela hatacmac funale ngagebe fudaicte. <sup>26</sup>Ye huc aicnome siducine ngageibong. Ilec ailu ye ngengele ngageboc ailu kweleinedi ngengele aicnolu gagac. <sup>27</sup>Aime foinac, ye huc aicnome homanogale aiwec. Entacka ye homadecka, na kwele-umac sugucne feina taockeneleme ngagedacka. Ailu ye sugu miyac, Wapongti na momoc kwele-sowac ngagenotelu baficnupawec. <sup>28</sup>Aime ngengi ye nganilu beliyedaingte. Aime na kwele-sowac mikac ganogale ye salebe ngengela fudaicte, yogo sanangnehac ngagesigabac. <sup>29</sup>Aime ngenge Sugucneholec wetackeningte ailu, ye kwelenginangti angac ngagecnolu mac holecnolu ye nga ngic ingucne gocne gagaing, yenge alang bayeledaing. <sup>30</sup>Ailu ngengi baficnuningte kpungkeebongka, yedi kwesilu baficnume Yesu Kristole bolele ailu socine basowalelu homanogale aiwec.

### 3

#### *Kristoholec gaga*

<sup>1</sup>Ilec yanguc taockelu migabac, ngic hae-gbafocne, ngenge Sugucneholec wetackelu belic-belicka gadabiyeng. Na yowa molickelu kwelengkengeleiba, yogo hatacmac kwelengkengelenogale mi takicnugac, miyac. Ngenge yowa yogodi asa bacngebadaicte.

**2:8:** Hib 5:8; 12:2    **2:9:** Sale 2:33; Efs 1:20-21; Hib 1:3-4    **2:10:** Rom 14:11    **2:11:** Rom 10:9    **2:15:** Dan 12:3; Filp 1:10; 2Tim 2:19    \* **2:17:** Wapongti angac ngagenale, Yuda yenge depeccineng madicne feina waing misa sotiyeibong haulu gawec. Polle sac silicine ingucnehac sotiyeidaicte, ilec beliyewec. Himong kisiwa 15:3-10 iwa wafedaing.    **2:18:** Filp 3:1; 4:4    **2:21:** 2Tim 4:10    **2:25:** Filp 4:18



<sup>2</sup> Ngic aibabangineng hoda ingucne wonongkolec gagaing,\* yenge aibaba sowacne aicaigaing, ngenge ngic yogo yengele ngani-motolu gadabiyeng. Ngic yogo yenge kwe-sacngebalu yanguc edocngebacaigaing, “Ngenge soc tofangineng helockedabiyeng.” Ilec ngani-motolu gadabiyeng. <sup>3</sup> Wapongte Asudi pasi nongilang bame afeelu kwelec kwegabeleng, nongilengti hocne soc tofangineng helokeicne ingucnehac kwelenonggang ngagesilu aicaigabeleng. Nongileng Kristo Yesule ngagebeng feicne aigac. Ailu soconngengte maale monic mi ngagepangkegabeleng.

<sup>4</sup> Aime ngage-ngagene yogo aibabana lobe fanale ngagedacka. Aime ngic gocne yenge aibabanginang ngage-ngagengineng lobong facaigac, ingucnehac lobe fadecka midec, na silicine ingucnehac ewalicebalu aidacte. <sup>5</sup> Aime fikebe hadeng 8 aiyemewa soc tofane helockebong. Na Israel alingackni nga Benyaminte fikesaweckacni. Na Hibru ngicbenang ailu Hibru alingackni. Ailu Farisaio yengeholec Wapongte yefe-yowa balaibeiba. <sup>6</sup> Ailu na yefe-yowa monic mi hegilelu ngic dondonne gaiba. Ailu na Wapongte yefe-yowa basanangkengale dogbac ailu Yesule habu weyebic aiyelelu gaiba.

<sup>7</sup> Ailu molickelu wiyac bagalu ngagebe yogodi baficnudaicte ingucne aiwec, yogo hocne yakumac Kristole ailu ngagebe wiyac sasawa yogo babaficine mikac aigac. <sup>8</sup> Na Sugucnene Kristo Yesule babafic yogo ngagebe feicnetowa aigac. Ilec ailu esecne galu wiyac sasawa aiiba, yogolec ngagebe babaficine mikac aicaigac. Gagana Kristo banogale ailu, wiyac sasawa ngagebe yafoine aiyackewec, yogo biyac hegileyackeiba. <sup>9</sup> Wapongte yefe-yowa balaibelu neicne tapiliwa ngic dondonne nalic mi aidacte. Wapongti ngage-ngagesingte yefe yanguc lowec, monic ye Kristo ngagesingkedaicte, ye ngic dondonne aidacte. Ingucnele ailu Kristoholec wetackebe Wapongti ngic dondonne wacnune madickegabc. <sup>10</sup> Ailu Kristo yeicne nga Wapongte tapili yeuctihac Kristo bagholiyeme homackacni fangkewec, yogo homacnehac ngagenogale ainelegac. Ailu yeholec galu doic ngagelu ye homawec, ingucnehac galu homanogale ngagegabac. <sup>11</sup> Inguc aigacgu homackacni gboliyelu fangkengale ngagesigabac.

#### *Gbelong ainogale gasackedamec*

<sup>12</sup> Na gasasac bole yogo biyachac bamoctoiba, me biyac ewalilu gbelong aiiba, na inguc mi migabac, miyac. Kristo Yesudi bacnuwec. Ilec ailu yogo banogale gasasac bole balu gagabachac. <sup>13</sup> Ngic hae-gbafocne, na gbelong ailu wiyac biyachac baiba, inguc mi ngagesigabac. Ailu bole moniyang yanguc balu gagabac, wiyac biyachac aiiba, yogo hatacmac mi ngagesilu gagabac. Ailu wiyac lobewa fikedaicte, yogo banogale bole sanangne balu gagabac. <sup>14</sup> Ailu na biyachbenang maawa† hikelu gbelong ailu wiyac banogale gasackegabac. Yogolec hocne Wapongti wacnuwecte Kristo Yesuholec wetackelu honocmengka gadacte.

<sup>15</sup> Aime ngage-ngagesingka biyachac sugulelu sanangkeibeng, nongileng sasawadi inguc gasackenogale ngagesidabeleng. Aime ngage-ngagengineng fulucnagudaingtewa, Wapongti ngage-ngagengineng yogo inguchac bame yegengkegeidaicte. <sup>16</sup> Ailu yowa biyachac ngagelu gaibeng, yogohac balaibelu hikedabeleng.

#### *Ngage-ngage madicne*

<sup>17</sup> Ngic hae-gbafocne, nani molickengelebe ngenge yogo nganilu silicine ingucnehac balaibecnudabiyeng. Ailu ngic nongele silic balaibecaigaing, ngenge dongengineng yenge nganicebalu balaibedaing. <sup>18</sup> Molickelu dameng bocyac yowa edocngebalu gaiba, yogo yakumac hiyalu donge-misane wame hatacmac edocngegabac. Ngic bocyac yengi Kristole malicpongte ngaba ailu gagaing. <sup>19</sup> Wapongnineng kwesacine, yogodi nosingte gobe ingucne aicaigac. Aime aibabangineng gameineholec, yogodi yengele kwelewa madickecaigac, ailu yengele ngage-ngage yogo himongte gagawa fagac. Ngic ingucne yenge homeabongka gagangineng sowaledaicte.

<sup>20</sup> Aime nongileng wacnonggeng honocmengka fagacte honocmengte aling gagabeleng. Ailu Asa-baba ngicnonggeng Sugucne Yesu Kristo honocmengkacni kwesidaicte, ye le wangep gagabeleng. <sup>21</sup> Ye wiyac sasawa yeicne bagewa lonale tapili facnogac. Ailu ye le tapili yogodi himong-soconggeng waweweine yogo bafaliyeme yeicne soc ingucne tapili nga hibi-angoctowaineholec aidacte.

\* **3:2:** Israel ngic-ngigac yenge aling gocne bawacebaningte hoda wacebalu gaibong. Siduc yawa Poldi Israel ngic-ngigac gocne hoda wacebawec. **3:3:** Rom 2:29 **3:4:** 2Kor 11:18 **3:5:** Luk 1:59; 2Kor 11:22; Sale 23:6 **3:6:** Sale 8:3 **3:7:** Mat 13:44,46 **3:9:** Rom 3:21-22 **3:10:** Rom 6:3-5; 8:17 **3:12:** 1Tim 6:12,19 † **3:14:** Maa yogo Kristo ingucne ainogale migac. **3:14:** 1Kor 9:24 **3:15:** 1Kor 2:6 **3:17:** 1Kor 4:16 **3:19:** Rom 16:18 **3:20:** Efs 2:6,19 **3:21:** 1Kor 15:28,43-53

## 4

*Polle mimi-madic*

<sup>1</sup> Ilec ailu, ngic hae-gbafocne, kwelenedi ngengele angacnume nganicngebano-gale ainel-gagac. Ngengi belic-bellic bafuwanelebong angacnugac. Ailu agofocne kwele-angackolec, ngenge yogolec ailu Sugucneholec wetackelu sanangne gadabiyeng.

<sup>2</sup> Yuodia nga Sintike, ngeke Sugucneholec wetacke galu kwele-moniyang ainagunice, mimiloc yowa sanangne edocngepagabac. <sup>3</sup> Aime agone, ga naholec bole bacaigicte yanguc edocngugabac, ngigac yaeckang yogo baficepadamec. I yangucte, yeke nga Kelemente, ailu ngic-ngigac nebocine gocne yenge naholec galu Siduc Madicnele bole balu gagaing, yengele wac Gagale hibiwa fagac.

*Belic-belicka gaga*

<sup>4</sup> Ngenge damengsoc Sugucneholec wetacke galu belic-belicka gadabiyeng. Ailu hat-acmac migabac, ngenge belic-belicka gadabiyeng. <sup>5</sup> Sugucne emenonggang gagac. Ngic-ngigac sasawadi nganicngebabong ngenge gaga ulucne ailu gadaing. <sup>6</sup> Ngenge wiyac monicte mi medecnegebadaic. Ailu ngenge wiyac sasawale aingeleme, Wapong kwele-madicka wackelu uwacnolu milockedaing. <sup>7</sup> Inguc aiyebongka Wapongte kwele-mogungti ngage-ngage-motoc sasawa ewaligac, yogodi kwelengineng nga ngage-ngagenginengte asa bame, Kristo Yesuholec wetackelu gadaingte.

*Aibaba gbagbacne*

<sup>8</sup> Ngic hae-gbafocne, yowa monic yanguc minogale ngagesigabac. Aibaba noine nga alang-babaholec, nga dondonne ailu gbagbacne, aibaba weni yogodi nganibong angacine aicaigac. Ailu ngagebong madicne aicaigac, ailu aibabangineng madicne, nga mitengnebanogale silic aicaigac, aibaba sasawa ingucnedi ngage-ngagengineng bame wakeyackedaic. <sup>9</sup> Aime nani ngage-ngage wedungelebe ngageibong, ailu yowa nalacni hedecnginengti ngageibong, ailu dongenginengti nale aibaba nganiibong, ngenge bole yogo bayackedabiyeng. Ngenge inguc aibong kwele-mogungte Wapong ye ngengeholec gadaicte.

*Filipai yengele kwele-madic yowa*

<sup>10</sup> Ngenge hatacmac nale ngagesilu aibabangineng hole-gboliyelu wiyac gocne baficnuningte loneleibong. Ilec Sugucne mitengkelu beliyegabac. Ngenge biyachac molickelu nale ngagesibong, yogo noine. Ailu baficnuningte yefe monic mi fawecte kpungkelu hegileibong. <sup>11</sup> Na wiyac gocnele kpungkegabac me balu gagabac, na yogolec mi edocngebacaigabac. Woc-wiyacne fanelegac, yogo sugu balu ngagebe nalic aime gacaigabac. Inguc ganogale ngage-ngage biyachac baiba. <sup>12</sup> Ailu dameng gocna waweweine gaga, nga dameng gocna moneng-mafaholec gaga, yogo biyachac gaiba. Ailu dameng gocna nosing nogebac ailu gaga, nga dameng gocna nosing homacka gaga, nga wiyac bocyackolec gaga me woc-wiyac mikac gaga, yogo sasawa biyachac galu nganiiba. Gaga ingucne galu ngagebe nalic aime gacaigabac.

<sup>13</sup> Kristodi tapili nelegacte, wiyac sasawa yogo nalic aiyackedacte. <sup>14</sup> Umacka gaebewa ngengi baficnuibong, aibaba yogolec ngagebe madickegac. <sup>15</sup> Siduc Madicne molickelu edocngebaiba. Ailu Masedonia hegilelu hikeiba, dameng iwa Filipai habu ngengi sugu hiye-moneng baficnuibong, yogo ngagegaing. <sup>16</sup> Aime Tesalonika iwa galu wiyac gocnele heic aibe, ngenge ngagelu dameng gocna inguchac baficnulu lolu gaibong. <sup>17</sup> Inguc mibe ngengi hatacmac wiyac neleningte milocnubagac, inguc mi ngagedaing. Na ngagebe ngenge ameine madicne lobewa badaingte.

<sup>18</sup> Epafodaitusdi wiyac gocne ngengelacni balu kwesilu nelewec. Aime wiyac monicte mi kpungkelu gagabac, wiyacne bocyac fame gagabac. Aime wiyac neleicne yogodi depec hoine madicne ingucne angacine aigac, Wapongti yogo nganime madickegac. <sup>19</sup> Wapongne ye woc-wiyacine wac feicneholec. Ailu yedi ngenge woc-wiyacne kpungke-caigaing, yogo Kristo Yesule ailu nalic ngeleyackedaicte. <sup>20</sup> Wapong Mamacongngeng Yela wac feicne moto-motoine mikac fafegidaic, yogo foinac.

*Yowa moto-motoine*

<sup>21</sup> Ngic-ngigac Wapongte bingec sasawadi Kristo Yesuholec wetackelu gagaing, nongele wenac-madic yogo yengela fugac yogo ngengi edocebadaing. Ngic hae-gbafoccongngeng yawa naholec gagabeleng, yengele wenac-madic inguchac ngengela fugac. <sup>22</sup> Aime ngic-ngigac Wapongte bingec sasawa yawa gagaing, yengele wenac-madic inguchac ngengela

lobong fugac. Ailu aling yogo gocne Sisale macka gagaing, yenge wenac-madicngineng sugucnehac ngengela lobong fugac.

<sup>23</sup>Sugucnenonggeng Yesu Kristole kwele-madicti asunginang fadaic.  
Yogo foinac.

## **Poldi Kolosi Habu Yengele Hibi Kwelengkewec**

### *Mimi-yegeng yowa*

Kolosi yogo taon monic, yogo Asia prowins iwa fawec. Taon iwa Yuda ngic-ngigac gocne nga Israel yengele alingkacni miyac yenge homacnedi gaibong. Molickelu Poldi Epafas saleme Kolosi iwa hikelu Yesule siduc edocebame gocne yenge ngagesingkeibong. Ngagesingkeibong Yesule habu iwa fikeibong. Pol yeicne iwa mi hikewec. Aime wewedu gocne yenge yowa kwesacine yanguc edocebaibong, “Ngenge angelo nga wiyac tapilingi-nengkolec alang bacebadaing. Ailu Yesu ye Wapongte madec noine miyac, ye angelo ingucne. Ailu yele yefe-yowa gocne balaibedaing.” Yenge yowa kwesacine ingucne bocyac milu weduyelelu gaibong.

Dameng iwa Poldi Yesule siduc edocebawecte muc-macka lobong ngiyewec. Ngiyeme Epafasdi welelu Yesule habu Kolosi gaibong, yengele siduc edome Poldi hibi yago kwelengkeli saleme hikewec. Yesu homackacni gboliyelu honocmengka feme hifa 32 ngama ingucne motome, hibi yago kwelengkewec.

### *Yowa yago hibi nebcina fagac*

1:1-8 Poldi wenac-madic nga kwele-madic yowa kwelengkeyelewec

1:9-2:19 Kristole fungine nga aibaba ainolecaigac, yogo Poldi weduyelewec

2:20-4:6 Gaga gbolice ingucne balaibedabeleng

4:7-4:18 Yowa moto-motoine yogo kwelengkeyelewec

### *Hibile molic-molic yowa*

<sup>1</sup> Na Pol, Wapongti bawosaecnume Kristo Yesule salecebaicne aigabac. Nga Timoti ye ngic hae-gbanonggeng. <sup>2</sup> Noki Wapongte bingec ngic hae-gha ngenge Kristoholec wetackelu ye ngagesingkelu Kolosi taonka gagaing, ngengela hibi yago lobec fugac. Ailu Wapong Mamacongngeng yele kwele-madic nga kwele-mogungtowadi ngengela fadaic.

### *Kwele-madic yowa*

<sup>3</sup> Noke ngengele ailu mimiloc bole bacaigabelec, Wapong ye Sugucnenonggeng Yesu Kristo yele Mamac, yela kwele-madic damengsoc edocaigabelec. <sup>4-5</sup> I yangucte, ye wiyac honocmengka lome wangepngineng fagac, yogo lobewa banogale ngagesilu gacaigaing. Ilec ailu ngenge Kristo Yesuholec wetackelu ye ngagesingkelu gagaing. Ailu Wapongte bingec sasawa yenge kweledi angac ngageyelecaigaing, ngic yengi yogo biyachac edoc-nupabong ngageibec. Aime yowa noine, yogo Siduc Madicne, yogo ngengela biyachac kwesime ngageibong. Yowa yogo kwelina wiyac honocmengka wangepngineng fagac, yogo ngageibong. <sup>6</sup> Silicine ingucne Siduc Madicnedi himongne himongne sawelu hikegac. Hikeme noine madicne bafuwagaing. Aime ngenge Wapongte kwele-madicte silicine ngani-motolu Siduc Madicne ngageibong, iwacni ofegacgu yakumac ingucnehac ngengela sawelu fagac.

<sup>7-8</sup> Asudi ngengela bole bame kweledi angac ngagenaguibong, kwele-angackolec agononggeng Epafasdi siduc yogo edocnupawec. Epafas ye Siduc Madicne wedungelewec, ailu ye ngagepangkebeng ye yanguctihac baficngbalu Kristole kwelec kwekwe ailu ye nokeholec gagac.

### *Wapongte aling*

<sup>9</sup> Aime molickelu ngengele kwele-angac ngageibec, iwacni ngengela fikewecte ailu milockelu yanguc uwacaigabelec. Wapongti wiyac ngagem madickegac, ngage-ngage yogodi kwelengning bame wakengeleme, Asu yeuctihac ngage-ngage madicne nga ngage-ngage-motoc ngeledaic. <sup>10</sup> Inguc fikeme ngenge Sugucnele yowa sasawa balaibebong, ye yogo nganilu ngagem madickedaic. Aime ngengele bole nga aibabanginengte noine madicne bafuwayackeme, Wapongte ngage-ngagewa sugulelu sanangkedaing. <sup>11</sup> Ailu yeicne tapili nga hibi-angoctowaine yogodi basananggebadaic. Inguc aime ngenge tapili sasawa balu belic-belicka tatakic mikac sanangnebenang gadaing. <sup>12</sup> Wapongte bingec yengele wiyac angocte ngani-damongka loicne fagac, yogo baningte Wapong Mamacti bamadicngbewec. Aime ngenge belic-belicka kwele-madic edolu gadabiyeng. Noke ngengele ailu inguc hocne milockecaigabelec.

### *Wapong Madecine*

<sup>13</sup> I yangucte, kundungti damongnubadaickale, Mamacti yogolec tapiliwacni baicnubalubac Madecine kweleinedi angackecaigac, yele ngani-damongka locnubawec. Aime nongileng yanguctihac inguc gagabeleng. <sup>14</sup> Wapong Madecinele ailu ye bikicte muckacni lukecubalu bikicnonggeng hegilewec.

<sup>15</sup> Wapong mi nganicaigaing. Ailu Madec ye yele silicine ingucnehac nganibong gawec ailu gagac. Ye wiyac sasawa fikeibong, yogolec molic-molic haenonggeng feicne ailu gagac. <sup>16</sup> Aime Wapongti wiyac sasawa fikenale ngagelu Madecine bole-yowa milu edome wiyac sasawa himong nga sawa kwelina fayackegac, yogo bafuwayackewec. Yengele aling yanguc, wiyac dongedi ngani-nganiine, nga mi ngani-nganiine, yogo sawa hewacka ngictau nga sugucne-aling gocne gagaing. Ailu damong nga aling tapilinginengkolec gagaing. Wapong Madecineholec yeki wiyac sasawa yogo bafuwayackeiboc. Ilec ailu wiyac sasawa yenge Madec mitengkedabiyeng. <sup>17</sup> Ailu wiyac sasawa mi fikeemewa ye biyachac gawec. Ailu Wapongti bole-yowa micnome wiyac sasawale fungine basanangkeme gagaing.

<sup>18</sup> Madec ye yeicne habule hodocine, nga habudi yele noi-hewacine. Ailu ye wiyac sasawale feicne ainale molickenolelu homackacni gboliye fangkelu fikewec. Fikelu habu molickenolelu gagac. <sup>19</sup> Wapongti yanguc ngagesime madickewec, Wapongte kwele ngage-ngageine bucbuchac Madecinele fagac. <sup>20</sup> Ye Madecinele inguc ngagelu wiyac sasawa himongka nga honocmengka fagaing, yogo Wapongkolec kwele-moniyang ainale ngagewec. Inguc ngagewecte Madecinele sac malicpongka wame homawec, yogodi balu wiyac sasawa bamadickeme kwele-mogung fikewec.

<sup>21</sup> Aime ngenge esecne kwele ngage-ngagenginengti Wapongta kwilic galu yele ngabafocine ailu aibabangineng sowacneholec gaibong. <sup>22</sup> Inguc galu sifu Wapongte bingec nga sowacne mikac ailu kpkpolic mikac ainale, yedi bacnggebalu Wapongte haicka locngabame domaningte ngagewec. Yogo noine fikenale ye homawec, dameng iwahac yeicne soc-biucine ngengele bikicte ameine badume kwele-moniyang fikewec. <sup>23</sup> Ngic yenge esecne Siduc Madicne yogo edocebalu weduyebeibong, ngenge nga wiyac sasawa Wapongti mime fikeibong, yenge yowa yogo sasawadi ngageibong. Aime ngenge Siduc Madicnele noine iwa ede-sanangke domalu ngagesingkelu wangec galu mi hegilegailingka, ngenge yele haicka domagaing. Aime Pol nani Siduc Madicne yogolec mole-bafic ganogale Wapongti bafuwacnuwec.

### *Boleinele fungine*

<sup>24-25</sup> Nani Wapongte yowa sasawa ngengela mibe yegengkenale bole aling yogo na nelewec. Neleme yowa yogolec mole-bafic ngic aiiba. Aime ngengibac Kristo yeicne habule noi-hewacine. Ngenge yele ailu doic ngageibong. Aime nani baficnggebalu ngengele ailu neicne socnedi doic ngagelu Kristo ingucne gagabac. Inguc ngagelu beliyegabac. <sup>26</sup> Ailu Siduc Madicne micaigabac, yogo esecne ngic-ngigac aling sasawa gaofeibong, yengela sangke-sangke fawec. Damengsoc inguc fame yanguctihac Wapongte bingec gagaing, ngengela yegengkewec.

<sup>27</sup> Wapongti yowa sangkeme fawec, yogo Wapongte bingec ngengela mime yegengkenale ngagewec. Yowa sangkeicne yangucti fawec, yedi Israel yengele alingkacni miyac, yengela tapili nga hibi-angocine bocyac edalicebadaicte. I yangucte, Kristodi kwelenginang gagac. Aime yele bolele ailu Wapongti honocmengka ngengele tapili nga hibi-angoc lome wangecngineng fagac. <sup>28</sup> Aime ngic-ngigac yenge filesoc filesoc Wapongte haicka Kristoholec wetackelu sugule-sanangkelu domaningte nonge yele mibeng yegengkeyegac. Ailu ngic-ngigac sasawa filesoc sawang-yowa milu, ngage-ngage-motockolechenang yenge yowa edocebalu weduyelelu gagabeleng. <sup>29</sup> Yowa ingucne mibe Kristo yeicne tapilitowadi basanangnulu baficnume, boletowa umacnehac balu gagabac.

## 2

<sup>1</sup> Kolosi ngic-ngigac ngenge, nga Laodisea taonte ngic-ngigac, ailu ngic-ngigac gocne sawadi haic-mesune mi ngagegailing, ngengele nga yengele ailu doic ngagelu boletowa balu gagabac, ngenge yogo ngageningte ngagegabac. <sup>2</sup> Yesule habu kweledi angac ngagenagulu kwele-moniyang ainagulu gadabiyeng. Ailu ngengele kwelewa mibasanang ainogale boletowa balu gagabac. Inguc aibe ngage-ngage-motoc sasawa sanangne badaingte,

yogodi madicnengineng ingucne fangeleme, Wapongte yowa sangkeicne ngage-motobenangedaing. Aime yele yowa sangkeicne, yogo Kristo hocne. <sup>3</sup> Yela hocne ngage-ngage-motoc nga ngage-ngage madicne sasawa sangkeicne fagac, yogo ngage-motodaing. <sup>4</sup> Aime monicti kwesac-yowa monic milu kwesacngebalu kwele basifuc aingeledaickale, hibi yago kwelengkenegelegabac. <sup>5</sup> Na socti ngengeholec mi gagabac, yogo noine. Aime iluc-asunedibac ngengeholec galu yanguc ngagegabac, ngenge Kristoholec wetackelu ye sanangne ngagesingkelu gagangineng madicne alingkelu gagabiyeng. Inguc nganicngebalu beliyegabac.

*Misa-lowac*

<sup>6</sup> Ilec ailu ngenge Kristo Yesu babong Sugucnengineng aime kwelenginang lolu angacngabawec, yogolec silicka ngenge ye balaibelu gadabiyeng. <sup>7</sup> I yangucte, ngenge yela godocnengineng sanangne bame sugule-sanangedabiyeng. Ailu yowa edocngebalu wedungelewec, yogodi ngage-ngagesingnineng basanangkeme domadaing. Aime ngengelela kwele-madic yowa ingucnehac wakelu fagidaic.

<sup>8</sup> Monicti ngic yengileng ngage-ngagewa milu kwesacka mengocngebalu hefecngedadaickale, ngenge ngani-motolu gadaing. Ngage-ngage ingucne, yogo Kristolacni miyac. Yogo ngesa-ngambofocngineng yengele yefe-yowa, nga himongtowa yagolec alengkolec bafuwaibong. <sup>9</sup> I yangucte, Kristo yeicne socka Wapong yeicne gagaine buchuchac fagac. <sup>10</sup> Aime ngenge Kristoholec wetackebong yedi bame wakengeleme gagaing. Kristo ye sawawa nga himongka damong nga aling tapilinginengkolec gagaing, yengele hodocnengineng. <sup>11</sup> Aime ngenge yeholec wetackelu gabong ngengelela soc tofaine helockelu baickeicnele aibaba silic ingucne fikewec. \* Aibaba yogo monicti moledi mi bawec, miyac. Kristodi soc tofaine helockelu baickeicnele ailu aibaba yogo bawecte, ngengileng kwele esecnele gaga helockelu baickewec. <sup>12</sup> Ailu ngenge misa lowaibong, iwa Kristoholec longngabawec ingucne. Aime Wapongti Kristo homackacni bagboliyewec. Wapongti bole tapiliineholec bacaigac, ngenge yogo ngagesingkeibongte, yefe iwa ngenge inguchac misa lowaibong, iwa yedi Kristoholec bagboliyecngabawec ingucne.

*Kristoholec gbelong aibeng*

<sup>13</sup> I yangucte, ngenge esecne bikickolec galu homaicne ailu kwele esecnele gaga mi helockeibong. Homaicne ingucne gabong yedi Kristoholec bagboliyecngabalu bikicnengineng sasawa hegilegelelu hatacmac mi ngagesiwec. <sup>14</sup> Bikicte hibi monic kwelengkeicne fagac, yogodi amengineng bafuwangelewec. Aime Kristodi hibi yogo hocne bilingti malicpongka weme domawec. Ye inguc aime yowa hibiwa kwelengkeicne fagac, yogo baickeyackewec. <sup>15</sup> Ailu ye yeuctihac malicpongka domawec, yogowahac aleng yogo yengele damong nga wiyac gocne bole-yowa tapilinginengkolec gaibong, yogo yengele hudule wiyacnengineng hemolongkeyackewec. Aime tapili mikac yegena domalu gamenginengkolec aibong.

*Kristodi lukecngabawec*

<sup>16-17</sup> Ilec ailu nosing-misanginengte yefe, ailu hombang dameng me Sabat dameng, me tamacne gbolicne weledaicte, wiyac sasawa yogo wiyac lobewa fikedaicte, yogolec ilucine. Nga Kristodibac wiyac noine aigac. Ilec ailu wiyac ilucinele mi ngagesidaing. Entacka monicti yanguc midaicte, "Dameng iwa ngagedaing," ye nalic mi wosaecngabalu misowalecngedadaic. <sup>18</sup> Ailu gocne yengi gung haicne monic-monic nganilu kwesacka bawacnagulu angelo mitengebagaing. Ngic ingucne yenge kwelengineng esecnele ngage-ngage sisifucine moc balaibelu, yengileng ngagebong wiyac feicne aicaigac. Ilec yengi inguc aidaing mibong, ngenge ngic ingucne mi ngagecbedaing. Aime yenge mi mimotocngedadaing. <sup>19</sup> Aling ingucne yenge Kristo hegilelu gacaigaing. Kristo ye yeicne habule hodocine. Ailu yelacni luwe nga ginong wabong ye socine kpatulecubame domacaigabeleng. Inguc aime Wapongti basugulecubame gagabeleng.

<sup>20</sup> Aime ngenge Kristoholec homabong himongte aleng tapilingineng biyachac baicebame hegileibong ingucne aigaingka, ngenge omale yengele yefele bagewa gagaing? <sup>21</sup> Ngic-ngigac yenge himongte yefe yogo balaibelu yanguc micaigaing, "Ga yogo mi badamec." Nga "Ga yogo nonganic mi aidamec." Ailu "yogo mi bauwadamec." Yenge inguc mibong ngenge yogo aibong mi madickedaicte. <sup>22</sup> Yogo ngic mimiwa nga ngic weweduwa sugu. Ailu wiyac yogo ngengi banoc ailu balu gabong miyac ainale loicne.

2:3: 1Kor 1:24,30    2:4: Rom 16:18    2:5: 1Kor 5:3    2:7: Efs 3:17    2:9: Yoa 1:14,16    2:10: Efs 1:21-22    \* 2:11: Yuda yenge soc tofangineng lolic-lolic helockelu baicelu gaibong. Poldi aibaba yogolec ngagesilu nangeng yowa miwec.    2:11: Rom 2:29    2:12: Rom 6:4    2:13: Efs 2:1,4-5    2:14: Efs 2:14-16; 1Pi 2:24    2:16-17: Rom 14:1-12; Hib 8:5    2:19: Efs 2:21; 4:16    2:20: Gal 4:3,9; 1Tim 4:3    2:22: Mat 15:9

<sup>23</sup> Aime ngic ingucne yenge yengung yanguc micaigaing, “Yefe-yowanonggeng yogo ngage-ngage-motockolec.” Yenge inguc milu yengung gee nga mimilocle yefe balaibelu, aibaba kwesacina bawacnagucaigaing. Aime Wapongti ngageyeleme madickenale socnginengte wiyac hegilecaigaing. Ngagegaing, ngic ngage-ngagewa aibaba ingucnedi madicne aigac. Aimebac noine monic mi bafuwayeledaicte, me yogodi kwele esecnele angac monic mi bawadaicte, miyac.

### 3

#### *Homackacni gboliyelu fangkeibeng*

<sup>1</sup> Ilec ailu ngenge Yesuholec homackacni momoc gboliyelu fangkeibongka, wiyac wilini fagac, yogolec angacngabadaic. Kristo ye Wapongte foleinapec iwa ngiyegac. <sup>2-4</sup> Ngenge biyac Kristoholec homaibong. Ailu gagangineng yeholec Wapongte emewa gagaing. Ailu gaga yogo sangkeme ngic-ngigac yenge mi nganicaigaing. Kristo ye gaganginengte fungine. Yedi fikelu yegengkeme, dameng iwa ngenge yeholec yele wac feicne iwa momochac fikelu yegengkedaingte. Ilec ngenge wiyac wilini fagac, yogobac ngagesilu gadaing. Nga himongka wiyac fagac, yogo mi ngagesidaing.

#### *Wiyac esecne miyac aiwec*

<sup>5</sup> Ilec ngenge himongte angac haicine monic-monicti kwelenginang fangelegac, yogo hegilebong homadaic. Aibaba yangucne yogo, selo-boic nga gaga kosaine, ailu kwele fangke-fangke aibaba, nga aibaba sowacne, ailu hane aibaba. Hane aibaba yogo hocne siduc-gbong alang bayelecaigaing ingucne aigac. <sup>6</sup> Ngic-ngigac yenge aibaba ingucne bagacgu Wapongte yowa hegilebong yedi yogolec ameine aalicineholec baduyeleadaicte. <sup>7</sup> Aime esecne ngenge ngengileng mi ngagesingkeibong, dameng iwa yengeholec galu aibaba ingucne bocyac ailu gaibong. <sup>8</sup> Ailu ngenge yakumac aalic nga aibaba dacineholec, ailu sisipilic yowa yogo hegiledaing. Ailu misulec-yowa nga yowa sowacne yogo micnginangkocni mi ofenale damongkedaing.

<sup>9</sup> Ngenge kwesac mi ayeleadaing. I yangucte, ngenge soc-kwelengineng esecne aibabaineholec biyac hemoctolu hegileibong. <sup>10</sup> Ngenge yogo hegilelu soc-kwelengineng gbolicne balu holelu gagaing. Aime Wapongti soc-kwelengineng gbolicne bafuwalu hatacmac hole-gboliyecaigac. Ailu yefe yogowa yele ngage-ngage-motoc noine longelegac, yogodi yeicne silic ingucne aidaicte. <sup>11</sup> Inguc hole-gboliyecngabame ngenge Grik ngic-ngigac me Yuda ngic-ngigac aigaing, mimi ingucne yogo miyac aigac. Aime ngenge soc tofangineng helockeicne me soc tofangineng mi helockeicne, me ngenge Grik ngic-ngigac alingka mi taockeicne, me himong dalickacni\* ingucnebenang gagaing. Me ngenge kwelec kwekwe ngic-ngigac gagaing, me ngic monicte bagewa mi gagaing, ye yowa sasawa ingucnele mi aicnocaigac. Kristodi ngic-ngigac ngengele kwelewa buchuchac gadaictewa, yedibac wiyac sugucnebenang aigac.

#### *Gaga gbolicne*

<sup>12</sup> Wapong ye kweledi angac ngagengelelu bawosaecngabame yeicne bingec gagaing. Ilec ailu ngenge kwelenginengti ngic-ngigac yengele kwele-sowac ngagelu baficebalu gadaing. Ailu bawacnagulu ulucne galu ngic-ngigac yengele mi takicngabadaic. Ngenge aibaba yogo sasawa ngakpi ingucne holebong haume balu gadaing. <sup>13</sup> Ailu ngenge wiyac ailu mi kpatalacnagudaing. Ailu monicti yowa kwekwe aigacka, ngenge yogo hegiled-abiyeng. Sugucnedi ngengele bikic yogo biyachac hegilengelewec, silicine ingucnehac ainagudaing.

<sup>14</sup> Aime ngenge yogo sasawa aigacgu angacngineng feicne yogo kweledi angac ngagenagulu gadabiyeng. Inguc gabong kwele-angacti muc ingucne ailu hefecngabame ngenge sasawadi moniyang ailu gadaingte. <sup>15</sup> Inguc gaebongka Kristole kwele-moniyangti kwelengineng damongkedaic. Ngenge soc moniyang inguc ainingte yedi biyachac wacngabawec. Ailu Wapong kwele-madic micnolu gadabiyeng.

<sup>16</sup> Kristole yowadi kwelenginang wakedaic. I yangucte, ngage-ngage-motockolec edonagulu wedunagulu sawang-yowa midabiyeng. Ailu Miti geewa gee fagac, nga malac fuluna gee, ailu Tili Asudi gee bafuwangelelu gagac, ngenge yogo kwelenginang kwele-madicka Wapong holecnodaing. <sup>17</sup> Ngenge wiyac sasawa midaingte me aidaingte, ngenge yogo Sugucne Yesule wacka aidaing. Ailu ngenge ye ngagesilu Wapong Mamac kwele-madic edodabiyeng.

**3:1:** Mrk 12:36; 16:19; Efs 1:20    **3:2-4:** Mat 6:33    **3:5:** Rom 6:6,11; Efs 4:19; 5:3-6    **3:8:** Efs 4:25-29; 5:4  
**3:9:** Efs 4:22,25    **3:10:** Efs 4:24    \* **3:11:** Grik yowawa himong monic wacine Sikitiya kwelengkeicne.    **3:11:**  
Gal 3:28    **3:12:** 1Pi 2:9    **3:13:** Efs 4:2,32    **3:14:** Rom 13:8-10    **3:15:** Filp 4:7; 1Kor 12:27; Efs 4:4    **3:16:**  
Efs 5:19    **3:17:** 1Kor 10:31; Efs 5:20

*Golowacte gaga*

<sup>18</sup> Ngigac ngawegoneholec, ga ngawegonela bawacnagulu yele yowa ngagelu Sugucneholec wetackelu gagamecka aibaba yogodi nalic aidaicte. <sup>19</sup> Ngawe, ga ngigacgone kwele-angacka ago aicnodamec. Ailu tatakic me ngaba monic mi aicnodamec. <sup>20</sup> Adu-madec, ngenge wiyac sasawa ngagelu nengac-mamacfocngineng yengele yowa balaibelu gadabiyeng. Sugucnedi aibaba ingucnele ngageme madickegac. <sup>21</sup> Adu-madec yenge kwele-umac badaingkale, mamac ngenge hungka baba mi aiyeledaing.

<sup>22</sup> Kwelec kwekwe ngic-ngigac gagaing, ngenge himongte sugucnefocngineng yengi wiyac monicte yogo me yogo mibong, ngenge yengele yowa sasawa ngagelu balaibedaing. Yengi ngengele madicne ngageningte yengele haicka sugu yowa balaibelu mi aidaing. Yenge mi nganicngebabongkahac ngenge yengele yowa balaibedaing. Ngenge bolewa kwelengineng salelu Sugucne alang bacnolu bolengineng badabiyeng. <sup>23</sup> Ailu bole yogo me yogo bagaing, iwa kwelengineng saledabiyeng. Ngenge yogo ngic yengele ngagelu mi badaing, miyac. Ngenge Sugucnele ngagelu bolengineng badabiyeng. <sup>24</sup> Aime ngic yengele bole hocne bagaing, yogo Sugucne Kristole bole ingucne ngagelu balu gagaing. Inguc ailu Sugucnedi ameine badungelenale mole-damocine ngeledaicte, yogo ngagegabiyeng. <sup>25</sup> Sugucnela feicne waicne mi fagac. Ilec monicte aibabaine sowacne balu game Sugucnedi yogolec silicina ameine lacnodaicte.

**4**

<sup>1</sup> Ngic ngenge kwelec kwekwe aling yengele sugucne gagaing, ngenge yanguc yogo biyac ngagegaing, ngengele Sugucne wilini honocmengka gagac. Ilec ngenge kwelec kwekwefocngineng aibaba dondonnele silicina aiyelelu gadaing.

*Mimiloc nga Wapongte aibaba*

<sup>2</sup> Ngenge mimiloc bolewa sanangkelu deboc-gboli galu kwele-madic edodabiyeng. <sup>3</sup> Ngenge nongele ngagelu inguchac yanguc milockedaing, Wapongti yowale yefe banoleme Kristole ngage-ngage sangkeicne fagac, yogo mibeng yegengkenale ngagedaing. Yowa yogolec hocne muc-macka ngiyegabac. <sup>4</sup> Yowa yogo dondonne neleme yowa silicina mibe yegengkenale milockedaing.

<sup>5</sup> Ngenge ngic-ngigac lobina gagaing, yengele hewacka ngage-ngage-motockolec galu, Sugucnele yefe edalicebaningte ngenge damengningeng nalic wickedaing. <sup>6</sup> Ailu ngenge damengsoc ngic-ngigac yengele yowa ameine filesoc filesoc wenuc bafaliyebeng ngageningte ailu, yowanginengti kwele-madicineholec kiwecti angacine aicaigac, ingucnehac aidaic.

*Wenac-madic yowa*

<sup>7</sup> Aime nale yowa-siduc sasawa yogo ngic hae-gbanonggeng Tikikusdi edocebadaicte. Na kwelenedi yele angac ngagelu gagabac. Ailu ye tatakic mikac Sugucnele mic-yowa balaibelu mole-bafic gagac. Ailu ye nongilengkolec momoc Sugucneholec wetackelu yele kwelec kwekwe aling ailu momoc gagabeleng. <sup>8</sup> Ye hocne nonge momoc gagabeleng yogolec silicine edocngebadaicte. Ailu ngengele kwele basanangkenogale salebe fudaicte. <sup>9</sup> Aime ngengele ngic hae-gbaningeng monic, wacine Onesimus, ye salebe Tikikusholec fudaicte. Onesimus ye Sugucnele yowa balaibegac, yele ailu kweledi angac ngagelu gagabeleng. Aime yeki aibaba yawa fikewec, yogolec siduc edocngebadaibiyecte.

<sup>10</sup> Aime Aristakus ye naholec muc-macka ngiyeibec, yedi ngengele wenac-madic lome fugac. Ailu Mareko, Banabas nefeine, yedi inguchac wenac-madic lome fugac. Ngenge yele yowa biyac baibong, yedi ngengela fudaictewa, hefoledaing. <sup>11</sup> Ailu Yustus, yele wacine monic Yesu yedi wenac-madic lome fugac. Aristakus nga Mareko ailu Yustus yengi sugu Yuda ngic soc tofangineng helockeicne nongileng alingnonggang baficnuba-caigaing. Ailu Wapongte ngani-damongte bole nongileng momochac balu gagabeleng. Yengi basanangnulu gagaing.

<sup>12</sup> Kristo Yesule kwelec kwekwe Epafas, ye ngengele alingkacnidi, wenac-madicine ngengela lome fugac. Aime ngenge sugule-sanangkelu domaningte nga Wapongte ngage-ngage nga angac sasawa ngage-motolu iwa bucbuchac ganingte, ye inguc ngagegac. Ilec ngengele ailu damengsoc mimiloc bole umacnehac balu gagac. <sup>13</sup> I yangucte, ye ngenge nga Laodisea ngic-ngigac, ailu Hirapolis ngic-ngigac ngengele ailu boletowa balu gagac, yogolec mibasanang ailu edocngebabac. <sup>14</sup> Aime Luka, ye dota, yele kwelenonggenngti



angac ngagecnogabeleng, ye nga Demas, yeke wenac-madicnginec inguchac loboc ngen-gela fugac.

<sup>15</sup> Nimpa, nga Yesule habu yele macka kpaduckecaigaing, nga Laodisea taonkacni ngic hae-gbafocne yengela nale wenac-madic lobong hikena.

<sup>16</sup> Aime ngenge hibi yago wafebong motome, lobong Laodisea habu, yengela hikeme yenge nganilu wafedabiyeng. Ailu nale hibi monic Laodisea salebe hikewec, iwacni kwesidaicte, silicine yogo ingucnehac wafedabiyeng. <sup>17</sup> Aime Arkipus yanguc edod-abiyeng, "Sugucnedi bole biyachac gelewec, ga bole yogo sasawa balaibelu balu gaangka bolegone motodaic."

<sup>18</sup> Aime Pol nani wenac-madic yago neicne moledi kwelengkegabac. Aime muc-macka ngiyeebewa nale ngagesidaing. Sugucnele kwele-madicti ngen-gela fadaic. Yogo foinac.

## **Poldi Tesalonika Habu Yengele Molic-molic Hibi Kwelengkewec**

### *Mimi-yegeng yowa*

Tesalonika yogo taon sugucne monic Masedonia himongka kiwec mecina fawec. Poldi Tesalonika hikelu Yesule Siduc edocebalu weduyelewec. Weduyeleme Yuda ngic-ngigac gocne nga Israel yengele alingkaacni miyac, yengelacni homacnedi yowaine ngagesingkeibong. Aime Yuda ngic-ngigac micne gocne yengi hasowac ailu welu yebiyebong hikewec (Salecebaicne 17:1-14).

Hikelu lolickelu Korin taonka hikelu gawec. Galu Timoti saleme Tesalonika hikelu iwacni hefaliyelu siducngineng edowec. Yesu homackacni gboliyelu honocmengka feme hifa 20 ngama ingucne motome, hibi yago kwelengkewec. Hibi yagowa Poldi basanangebalu Yesule kwesi-kwesi damengte fungine mime yegengkewec.

### *Yowa yago hibi nebocina fagac*

1:1 Wenac-madic yowa

1:2-10 Yengele aibaba nga ngage-ngagesingte mitengebawec

2:1-3:13 Pol nga bole-ngic yengele aibaba nga ngage-ngage

4:1-12 Ngic-ngigac ngagesingkegaing, yenge aibaba madicne balaibedaing

4:13-5:11 Yesule kwesi-kwesi damengte siduc weduyelewec

5:12-28 Yowa basanangkelu wenac-madic milu kwelengkeyelewec

### *Hibile molic-molic yowa*

<sup>1</sup> Yesule habu Tesalonika taonka galu Wapong Mamac nga Sugucne Yesu Kristoholec wetackelu gagaing, ngengele hibi yago Pol, Sailas nga Timoti, nongi logabeleng. Kwele-madic nga kwele-mogungtowadi ngengela fadaic.

### *Tapiliholec nga Tili Asuholec*

<sup>2-3</sup> Ngenge ngagesingkelu aibaba madicne bafuwalu ngic-ngigac agofocngineng yengele kwelenginengti angacnebanale bole sugucnehac bacaigaing. Ailu ngenge tatakic mikac galu Sugucnenonggeng Yesu Kristole ailu wangec gagaing. Yogo ngagesilu damengsoc Wapong Mamacnonggengte haicka kwele-madic micnolu ngenge mimilocka locngeba-caigabeleng.

<sup>4</sup> Ngic hae-gbafocnonggeng, Wapongte kweledi ngengele angackeme bawosaecnegebawec, yogo ngagegabeleng. <sup>5</sup> Yogolec fungine yanguc, nonge ngengela Siduc Madicne balu kwesiibeng, yogo yowa sugu monic mi ngeleibeng, miyac. Nonge tapiliholec nga Tili Asuholec, aime noine sanangnehac ngagegacgu bakwesilu ngeleibeng. Ngengeholec gaibeng, iwa ngengele aling aibeng ailu baficngebaibeng, ngenge yogolec silicbac ngagegaing. <sup>6</sup> Ngenge aibabanonggeng balaibelu Sugucnele pasi inguchac balaibelu gagaing. I yangucte, ngenge doic sugucne bocyac ngagelu gaibong. Ailu sifu Wapongte yowa ngagelu angacnegebawec. Angacnegebame Tili Asudi baefecnegebame belic-belicka gaibong.

<sup>7</sup> Ilec Masedonia nga Akaia ngic-ngigac ngage-ngagesingkolec gagaing, yengi ngengele aibabangineng madicne ingucne yogo nganilu inguchac balaibecaigaing. <sup>8</sup> Sugucnele yowadi ngengelacni molickelu Masedonia nga Akaia himongka mibong sawelu hikeme ngengeibong. Aime ngenge Wapong ngagesingkeibong, yowa-siduc yogodi inguchac himong neboc nga nebocka sawelu hikewec. Inguc aime nongi bole yengela taockelu balu hike-hikeine yogo ngengi baefeweibong. <sup>9</sup> Yenge yengungtihac Tesalonika ngengele siduc yanguc mibong yegengkelu hikegac, "Pol agokecineholec ngengela kwesibong ngengi mac holeyelelu bacebaibong. Ailu ngenge Wapong gagaineholec nga yowaine noineholec yeke kwelec kwekwe aling ainingte, siduc-gbongfocngineng haicine monic-monic hegilecebalu Wapongta taockeibong. <sup>10</sup> Ailu yanguctihac Madecine honocmengkacni wanale wangec gagaing." Yenge siduc inguc mibong hikegac. Wapongti Madecine bagboliyeme homackacni gboliyelu fangkewec. Ailu ameine aalicineholec badu-badule damengine kwesidaicte. Ailu Yesudi hocne umac yogowacni baicnubame wasecne aigabeleng. Ngenge yogo ngagesingkegaing.

## 2

### *Tesalonika taonka*

<sup>1</sup> Ngic hae-gbafocne, nonge ngengeholec gaibeng, yogo noineholec aiwec, yogo nonge ngagegaing. <sup>2</sup> Nonge Filipai himongka molicke hikelu gaebengka, yengi doicka locnubalu misulec ainoleibong. Iwacni Tesalonika hikebeng ngic-ngigac gocne yengi inguchac yowa mife-miwa bocyac ainoleibong. Inguc ainolebong nonge Wapongti molickenoleme hangoc mikac galu Wapongte Siduc Madicne mibeng yegengkengelewec, nenge yogo ngagegaing. <sup>3</sup> Nonge yowa kosa monic mi mibeng yegengkewec, miyac. Ailu wiyac monic kwesacka ewalicngebanoale mi aibeng. Ailu kosa ganangte aibaba sowacne monic mi aibeng. <sup>4</sup> Aime Wapongti wosaecnubalu ngageme nalic aime Siduc Madicne noleme damongkelu mibeng yegengkedaicte. Ngic yengi ngagebong madickenale yowa monic mi edocngebalu gaibeng, miyac. Wapong kwelewa ngani-ngani fileine, yedi angac ngagenolenale yele yowa milu gagabeleng.

<sup>5</sup> Ailu nonge mic-heloc yowa monic mi edocngebaiabeng. Nga hane aibaba ingucne monic mi aibeng, miyac. Yogo Wapongti widcnubagac, yogo ngagegaing. <sup>6</sup> Aime ngic yengelacni wac feicne banogale monic mi ainolegac. Yogo ngengelacni nga ngic gocne yengelacni inguchac banogale monic mi ainolecaigac. <sup>7</sup> Nonge hewacka Kristole salecebaicne gagabeleng, yogo nalic mibeng baficnubadaingte. Aime sifu bawacnagulu ulucne gaibeng. Nenggac monicti yeicne kogocine amuc gumelu damongkecaigac, silicine yogolec soc damongngebaiabeng. <sup>8</sup> Ailu nonge ngengeholec galu kwelonngengti ngengele angac ngagelu angacka Wapongte Siduc Madicne wedungeleibeng. Ailu yogo sugu miyac, nonge ngengele inguc ailu gaganonggeng hegilenogale ngegaibeng.

<sup>9</sup> Wapongte Siduc Madicne edocngebalu wedungeleibeng, dameng iwa ngengeholec galu soctepecka wiyacte umac monic mi bafuwangelanangte ngegaibeng. Ilec ailu deboc hadeng bole sugucnehac doic feina balu gaibeng. Ngic hae-gbafocne, yogo ngengung ngagegaing. <sup>10</sup> Nonge gbagbacne nga dondonne ailu bikic mikac aibaba ingucne balu gaibeng. Nenge ngega-ngagesingkolec yogo nganilu ngagebong, Wapongti inguchac widcnubawec. <sup>11-12</sup> Nenge Wapongte ngani-damong nga wac feicne iwa ganingte yedi hefolecngabawec. Nenge yele ngega-ngage nga angac balaibeningte ailu mamac monicti yeicne adu-madecfocine hacedacaigac, nongi silicine ingucnehac dogbac aingelelu mibakoloc aingleibeng, yogo ngegaibiyeng.

### *Ngaba fikewec*

<sup>13</sup> Aime ngengela kwesilu Wapongte yowa mibeng yegengkeme ngagelu yanguc mii-bong, "Yogo foinac, yogo Wapongte yowa, yogo ngic yengele yowa miyac." Inguc milu yele yowale angacngebame baiabong. Ilec ailu nonge damengsoc Wapong kwele-madic edolu gagabeleng. Wapongte yowa miibeng, yogodi ngega-ngagesingkolec, ngengele kwelenginang bole balu gagac. <sup>14</sup> Ngic hae-gbafocne, Wapongte habu Yudeya himongka Kristo Yesuholec wetackelu gagaing, yengela doic fikewec, silicine ingucnehac ngengela inguchac fikeme, nenge yenge ingucnehac aibong. Aling gocne ngengele himongkacnidi umac yogo bafuwangeleibong. Silicine ingucnehac Yuda ngic-ngigac yengelacni aling-focngineng yenge umac bafuwaibong. <sup>15-16</sup> Yengi hocne Sugucne Yesu nga Wapongte siduc-mimi ngic wehomacebaibong. Israel yengele alingkacni miyac yengi wasecne ainingte nonge Wapongte yowa edocebacaigabeleng. Aime yenge yogo mi ainingte Yuda ngic-ngigac yengi bolenonggeng welockelu weyebic ainolelu ngic-ngigac sasawa lobe holecebaicaigac. Wapong ye yogo nganilu ngageme mi madickecaigac, yenge damengsoc bikicngineng taockeme taoc gagaing. Yuda ngic-ngigac yenge inguc aibong Wapongti yogolec ameine aalicineholec dameng iwahac baduyeledaicte.

### *Hatacmac nganicnedaicte*

<sup>17</sup> Ngic hae-gbafocne, ngengeholec gabeng yebicnubabong hikeibeng, dameng iwa soci sugu hegilecngebaiabeng. Nga kwelonngengtibac miyac. Ilec ailu nenge hatacmac nganicneganangte bocyac ainolegac. <sup>18</sup> I yangucte, nonge ngengela hatacmac funogale ngagesilu gaibeng, yogo foinac. Aime naneicne biyachac ngengela funogale dameng bocyac ainelewec. Aime Satangti yefenonggeng hedickeme kpungkeibeng. <sup>19</sup> Sugucne Yesudi kwesilu nonge bolele ailu nenge nganicngebalu madicne mime wac feicne badabelengte. Nonge gbelong ailu nenge sil ingucne bacngebabagabeleng. Nonge inguc ngagesilu beliyelu wangec gagabeleng. <sup>20</sup> Nonge ngengele ngagesilu wac feicne nga belicbelickolec aigabeleng.

## 3

<sup>1-2</sup> Ilec ailu nonge kwelenonggenti ngengele angacnubawec, aime nalic mi fudabelngte. Ilec medecnubame ngengele ngagesilu yanguc miibeng, “Nonge sugu Atens taonka ngiyelu, nalic ngic hae-gbanonggeng Timoti salebeng fudaicte.” Inguc milu salebeng fuwec. Timoti ye Wapongte bole-ngicti nongeholec momoc bole balu Kristole Siduc Madicne mime yengkecaigac. Yedi ngengela fulu ngage-ngagesingka basanangnebalu mibakoloc aingelenale milu salebeng fuwec. <sup>3</sup> Umac haicine monic-monic ingucnedi ngengela fikeme, ngic-ngigac gocne kwelenginengti wawedaickale ailu, Wapongti umac ingucne tengkenangte ngagenolewec, ngenge yogo ngagegaing. <sup>4</sup> Ngic yengi weyebic ainoledaingte, yogo biyachac ngengeholec galu edocngebaibeng. Aime yogo biyachac fikewec, ngenge yogo ngagegaing. <sup>5</sup> Ilec ailu na inguc gabe kwelenele tapili wame, ngengele ngage-ngagesingte silicine ngagenogale Timoti salebe ngengela fuwec. Aime boletowa ngengela baibeng, yogo Lokwesac Ngicti kwesacngebame noine mikac aidaickale ailu, ngagenogale Timoti salebe ngengela fuwec.

*Haic-mesungineng nganinoga*

<sup>6</sup> Aime Timoti ye ngengelacni hefaliyelu siducngineng madicne yanguc mime yegengkenolewec, ngenge ngage-ngagesingkolec galu kwelenginengti angac ngagenagucaigaing. Ailu ngenge damengsoc nongele ngagesilu kwele-efec ailu gacaigaing. Aime nonge ngengele haic nganinangte ainolegac, silicine ingucnehac ngengi nongele haic nganinogale aingelecaigac, inguc hocne edocnubawec. <sup>7</sup> Ngic hae-gbafocnonggeng, nonge kwele-umac nga doic sugucne ngageebengka ngengele ngage-ngagesingte yowa-siducti nongele kwele basanangkewec. <sup>8</sup> I yangucte, ngenge Sugucneholec wetackelu gagangineng sanangne gagaingte ailu nonge gaga gbolicne gagabeleng. <sup>9</sup> Aime nonge ngengele ailu Wapongnonggeng hatacmac mitengkenogale ngagegabeleng. Aime ngengele ailu yele haicka belic-belicka galu beliyebeng madickegac. <sup>10</sup> Aime nonge ngengele haic nganinangte deboc hadengsoc sanangnehac milockelu gagabeleng. Inguc nganilu ngage-ngagesingnineng taockelu sanangkenale baficngebadabelngte.

*Wiyac madicne*

<sup>11</sup> Aime Wapong Mamacongngeng nga Sugucnenonggeng Yesu yeki yefe bafuwanoleboc nonge ngengela fudabeleng. <sup>12</sup> Aime kwelenonggengti angac ngagengelecaigabeleng, silicine yogolec soc Sugucne Yesu yeuctihac kwele-angacngineng hatacmac taockelu bame sugulengele daic. Aime kwelenginengti angac ngagenagulu ngic-ngigac nebocine momoc kwelenginengti angac ngageyelelu gadabiyeng. <sup>13</sup> Inguc aibong ye kwelengineng basanangkelu gadaic. Aime Sugucnenonggeng Yesu ye ngic-ngigac focine yeicne bingec yengeholec kwesidaicte, dameng iwa ngenge gbagbacne nga sowacnengineng mikac galu Wapong Mamacongngeng yele haicka domadaingte.

## 4

*Gaga gbagbacne*

<sup>1</sup> Ngic hae-gbafocnonggeng, nonge Sugucne Yesuholec wetackelu yowa yanguc biyac edocngebaibeng, Wapongti nganicngebame madickenngte ngenge yele yefe balaibed- abiyeng. Inguc edocngebaibengte, ngenge yogo yanguctihac inguc gagaing. Aime yogodi ngengele hewacka sugulelu sanangkenale ngage-ngagesingcineng basanangkenogale ung-yowa hatacmac taockelu edocngebagabeleng. <sup>2</sup> Nonge ung-yowa sasawa Sugucne Yesu-lacni ngagelu edocngebaibeng, yogo ngagegaing. <sup>3</sup> I yangucte, Wapongte ngage-ngage nga angac yogo yanguc fagac, ngenge gaga gbagbacnebenang gadaing. I yangucte, ngenge selo-boic aibaba hegilelu <sup>4</sup> socngineng filesoc madicne damongkelu gbagbacne nga alang-babaholec gadaing. <sup>5</sup> Israel yengele alingcakni miyac, yenge Wapong mi ngagelu gaga kosaine yogolec angac sugucnehac ngagelu balaibelu gagaing, ngenge yenge ingucnehac mi aidaing. <sup>6</sup> Ngenge bikickolec ailu ngic hae-gbafocngineng yengele ngawe me ngigac ewalicebadaingkale, socte angacte ailu yengeholec selo-boic aibaba mi aidaing. Sugucne ye bikic ingucnele ngagelu ameine ingucnehac yeledaicte, nonge yogolec sawang-yowa sanangne biyachac milu edocngebaibeng. <sup>7</sup> Wapongti gaga gbagbacne ganangte wacnubawec. Gaga kosaine ganangte mi wacnubawec, miyac. <sup>8</sup> Ilec yanguc aigac, ngengelacni monicti yowa yago milu hegilegac, ye ngic yengele yowa mi hegilegac, ye Wapongti Tili Asuine ngelewec, yele yowa hegilegac.

*Kweledi doficnagulu angacnubadaic*

<sup>9</sup> Ngege kweledi angac ngagenaguningte Wapongti yefe yogo biyachac edocngebalu wedungelewec. Ilec ngege ngic hae-gbafocngineng yenge kweledi angac ngageyeleningte yowa, yogolec monic mi kpungkegaing. Aime nonge yowa yogo hatacmac mi kwelengkedabelengte. <sup>10</sup> Foinac, ngengi Masedonia prowins nebec nga nebocka ngic hae-gbafocnonggeng Yesule habu sasawa gagaing, ngege kwelenginengti yengele angac ngagelu gagaing. Aime aibaba yogodi ngegele hewacka sugulelu yegengkenale sanangne migabeleng. <sup>11</sup> Aime ngege ulucne galu bolengineng damongkelu ngengungtihac molenginengti bole balu ganingte ngage-ngagening sanangne fadaic. Molickelu aibaba ingucnele edocngebaibeng. <sup>12</sup> Bole inguc babong ngic-ngigac lobeina gagaing, yengele haicka aibabangineng dondonnedi yengele kwelewa kwefangkeme alang bangeledaingte. Aime molenginengti bole inguc babong ngege wiyac monicte nalic mi kpungkedaingte.

*Kristoholec sasawadi fedabelengte*

<sup>13</sup> Ngic-ngigac yenge honocmengte wangec gaga yogo mi ngagelu, yenge homacdamangka hii-songgong sugucnehac aicaigaing. Ngic hae-gbafocnonggeng, ngege kwelesowac ingucnehac mi aidaing. Ngege homabong yengela oma wiyac fikedaicte, yogolec fungine ngage-motoningte angacnubame ngagelu migabeleng. <sup>14</sup> I yangucte, Yesu ye homalu gboliyelu fangkewec, yogo noinebenang ngagesingkegabeleng. Ilec ailu ngic-ngigac yenge biyachac Yesu ngagesingkelu homaibong, yenge Wapongti mengocebame Yesuholec kwesidaingte, yogo ngagesingkegabeleng. <sup>15</sup> I yangucte, Sugucnele kwesi-kwesi damangka ngic-ngigac gbolicne gagabeleng, nongilengti ngic-ngigac ngage-ngagesingkolec homaibong, yenge nalic mi molickeyeledabelengte. Yogo Sugucnedi yowa monic inguc miwec yogo balaibelu edocngebagabeleng. <sup>16</sup> Sugucne ye dameng iwa yowa tapiliineholec mime, angelo yengele damong monicte wackedaicte. Aime dameng iwahac Wapongte kpeng hiyadaicte. Hiyame Sugucne yeicne honocmengkacni sawawa kwesidaicte. Kwesime ngic-ngigac Kristoholec wetackelu homaibong, yenge molickelu gboliyelu fangkedaingte. <sup>17</sup> Fangkebong ngic-ngigac gbolicne gagabeleng, nongileng yengeholec inguchac kaguwa kwelina fulucnubame, nongileng sasawadi momochac Sugucneholec fedabelengte. Yogolec ailu Sugucneholec gaga-sanang gadabelengte. <sup>18</sup> Ilec ailu ngege yowa yogo edonagulu mibasanang ainagulu gadabiyeng.

**5***Kwele-gboli ganoga*

<sup>1-2</sup> Ngic hae-gbafocnonggeng, hise-baba ngic yengi debocka kwesilu hise babong nongileng kwesi-kwesi damengngineng mi ngagecaigabeleng, silicine ingucnehac Sugucnele damengtowa yogo kwesidaicte. Ngege ngengungtihac yogo biyac ngagegaing. Yogo ma damangka me ma hadangka fikedaicte, yogolec hibiwa hatacmac nalic mi kwelengkelu ngeledabelengte. <sup>3</sup> Aime ngic-ngigac yengi yanguc midaingte, "Kwele-mogung nga damongkolec gagabeleng." Inguc mibong, dameng iwahac umacti basowalecebanale fikeyeledaicte. Umac yogo ngigac gobeholecti madec banogale dameng mi ngeagemewa gado hicaigac, silicine ingucnehac biyachenang fikeyeledaicte. Fikeyeleme hangoc nalic mi hikedaingte.

<sup>4</sup> Aime ngic hae-gbafocne, hise-baba ngic kwesime ngege kwatackecaigaing, silicine ingucnehac dameng yogo kwesime nalic mi kwatackedaingte. I yangucte, ngege kundungka mi gagaing, miyac. <sup>5</sup> Ngege sasawadi wenac nga angocce adu-madecfocine, aime nongileng deboc me kundungte aling miyac. <sup>6</sup> Ilec gocne gung facaigaing, silicine ingucnehac gung mi fadaing. Nongileng ngage-ngage damongkelu deboc-gboli galu damongnagudabeleng. <sup>7</sup> Aime gung-fafa ngic yenge debocka gung facaigaing. Nga misa sanangne nono yenge debocka misa nolu kwelengineng sifuwecaigac.

<sup>8</sup> Aimebac nongileng wenac agofocine. Ilec ailu ngagenagulu damongnagudabeleng. I yangucte, ngage-ngagesing nga kweledi angac ngagenagulu gaga, yogodi malekunonggeng ingucne holebeng haudaic. Aime wangec galu wasecne ainangte ngagesigabeleng, yogodi aen duunonggeng ingucne aime holelu domadabeleng. <sup>9</sup> I yangucte, Wapongti mimocto-mimoctole damangka ameine aalicineholec badunale mi edocnubawec. Ye Sugucnenonggeng Yesu Kristodi bikicte ameine bame wasecne ainangte edocnubawec. <sup>10</sup> Kwesi-kwesi damengina, gocne gbolicne gadabelengte nga gocne biyac homadabelengte, nongileng sasawadi yeholec gbolicne ganangte yedi hocne nongilengte

ailu homawec. <sup>11</sup> Ilec ailu ngenge yanguctihac yowa edonagulu basanangnagulu baficnag-ulu gacaigaing, ingucnehac hatacmac taockelu aidaing.

*Damongfocngineng nga ngic hae-gbafocngineng*

<sup>12</sup> Ngic hae-gbafocnonggeng, ngenge yanguc edocngebagabeleng, bole ngic-ngigac yenge ngengele hewacka boletowa balu gagaing, ngenge yenge alang bacebadabiyeng. Yenge Sugucneholec wetackelu damongngebalu sawang-yowa milu gacaigaing. <sup>13</sup> Yenge bole inguc balu gagaingte ailu kwelenginengti yengele angacnebame ngenge yogolec ngagebong feicne aidaic. Ailu ngengileng hewacka kwele-moniyang ainagudabiyeng.

<sup>14</sup> Ngic hae-gbafocnonggeng, nonge sawang-yowa milu yanguc edocngebagabeleng, ngic-ngigac oyong gacaigaing, ngenge yenge sawang-yowa edocebadabiyeng. Ailu kwelengineng wawaine gacaigaing, yenge basanangebadaabiyeng. Ailu ngic-ngigac gocne sockapec tapili-wawa gacaigaing, yenge baficebadabiyeng. Ailu ngic-ngigac sasawa yengele tatakic mikac ulucne gadabiyeng. <sup>15</sup> Sowacnele ameine sowacnehac badungeledaickale, ngenge damongnagulu gadabiyeng. Aime ngenge damengsoc ngengileng hewacka ngic-ngigac sasawa yengeholec aibaba madicne ainogale bole sanangnehac balu gadabiyeng.

*Mimi-madic yowa*

<sup>16</sup> Ngenge damengsoc belic-belicka gadabiyeng. <sup>17</sup> Ailu ngenge damengsoc milockelu gadabiyeng. <sup>18</sup> Aime ngengele wiyac sasawa fikengeledaicte, yogolec Wapong kwele-madic edodabiyeng. Ngenge Kristo Yesuholec wetackegaing. Ilec ailu Wapong ye aibaba yogolec ngageme angacine aicaigac.

<sup>19</sup> Ngenge Tili Asule dac mi hepisickedabiyeng. <sup>20</sup> I yangucte, Wapongte siduc-mimi ngic yengele yowa edocngebabong, ngenge yowa yogo ngagebong sowaleme mi hegiled-abiyeng. <sup>21</sup> Ngenge yowa yogo sasawa ngagelu ngage-wosaec ailu madicne sugu badabiyeng. <sup>22</sup> Ailu ngenge sowacne haicine monic-monic yogo nganilu lobe holedabiyeng.

*Sugucnenonggeng kwesidaicte*

<sup>23</sup> Wapong ye kwele-mogung fileine. Ye gbagbacne gagale pasi bame sugulelu wakengeledaic. I yangucte, Sugucnenonggeng Yesu Kristo kwesidaicte, wasufocngineng nga ilucfocngineng ailu socngineng bucbuchac dondonne nga bikicngineng miyac aingelenale bacnebame gadaing. <sup>24</sup> Wapongti wacngebalu bacnegebawec, ye yowaine miwec yogo balaibecaigac. Ilec boleine bagacgu bamoctongeledaicte.

<sup>25</sup> Ngic hae-gbafocnonggeng, ngenge nongele inguchac ngagesilu milockelu gadabiyeng.

<sup>26</sup> Ngenge Wapongte bingec ailu gagaingte aibabaine balaibelu ngic hae-gbafocnonggeng sasawa molewa babac ainagulu\* wenac-madic minagudaing. <sup>27</sup> Ailu ngenge hibi yago ngic hae-gbafocnonggeng sasawa wafeyeledabiyeng, yogo Sugucnele wacka edocngebagabac.

<sup>28</sup> Sugucnenonggeng Yesu Kristole kwele-madicti ngengeholec fadaic.

Yogo foinac.

5:10: Rom 14:8-9; 1Tim 4:14    5:14: 2Tim 3:6,11    5:15: Rom 12:17; 1Pi 3:9    5:16: Filp 4:4    5:18: Efs 5:20

5:19: Efs 4:30    5:21: 1Yoa 4:1    5:23: 2Tim 3:3    5:25: Kol 4:3; 2Tim 3:1    \* 5:26: Polle damengka yenge molewa babac ainogale bafaliyelu yanguc kwelengkewec, "muducnagudaing."

## **Poldi Tesalonika Habu Yengele Hibi Monic Hatacmac Kwelengkewec**

### *Mimi-yegeng yowa*

Tesalonika yogo taon sugucne monic Masedonia himongka kiwec mecina fawec. Poldi Tesalonika hikelu Yesule Siduc edocebalu weduyelewec. Weduyeleme Yuda ngic-ngigac gocne nga Israel yengele alingcakni miyac, yengelacni homacnedi yowaine ngagesingkeibong. Aime Yuda ngic-ngigac micne gocne yengi hasowac ailu welu yebiyebong hikewec (Salecebaicne 17:1-14).

Hikelu lolickelu Korin taonka hikelu gawec. Pol ye ngageme Tesalonika ngic-ngigac gocne yenge ngage-ngage kwesacine yanguc ngageibong, Yesu biyac kwesidaicte, inguc milu hangocebawec. Ilec ailu yenge bole mi balu moc ngiyelu gaibong. Yesu homackacni gboliyelu honocmengka feme hifa 20 ngama ingucne motome, Poldi hibi yago kwelengkulu saleme hikewec. Gocne yengi yanguc ngagegaing, hibi yago Tesalonika yengela kwelengkeme alecine yaeckang aiwec. Nga gocne yengi yanguc ngagegaing, hibi yago molickelu lome hikewec.

### *Yowa yago hibi nebocina fagac*

1:1-2 Wenac-madic yowa

1:3-12 Sugucnele ailu doicka fegaing, yogodi madicne aigac

2:1-17 Wapongte ngaba ngic nga Yesule kwesi-kwesi dameng

3:1-15 Ngic-ngigac ngage-ngagesingkolec, yenge aibaba madicne aidaing

3:16-18 Wenac-madic yowa nga yowa moto-motoine

### *Hibile molic-molic yowa*

<sup>1</sup> Yesule habu Tesalonika taonka galu Wapong Mamacnonggeng nga Sugucne Yesu Kristoholec wetackelu gagaing, ngengele hibi yago Pol, Sailas nga Timoti, nongi logabeleng.

<sup>2</sup> Wapong Mamac nga Sugucne Yesu Kristo, yekele kwele-madic nga kwele-mogungtowadi ngengele fadaic.

### *Yesule habu yengele milockedaing*

<sup>3</sup> Ngic hae-gbafocnonggeng, ngenge sasawadi ngic hae-gbafocngineng yenge kweledi filesoc angac ngageyelelu gagaing, aibaba yogodi ngengele hewacka sugulelu sanangkegac. Ailu ngenge ngage-ngagesingngineng sugulegac. Ilec ailu nonge ngengele ailu damengsoc Wapong kwele-madic edodabeleng. Aime mimiloc yogodi madickegac.

<sup>4</sup> Ngabafocngineng yengi weyebic ainglebong, ngenge doic ngagelu ulucne galu ngage-ngagesingngineng mi wickebong wawec. Yogo nganilu ngengele ngagebeng feicne aigac. Ilec ailu Wapongte habu falegaing, yengela siduc yogo edocebalu wacngineng bafegabeleng.

### *Damengtowa*

<sup>5</sup> Ngenge Wapongte ngani-damongte ailu doic ngagecaigaing. Wapongti doicngineng yogo nganilu kweleine madickeme ngenge Wapongte ngani-damongte aling wacgebadaicte. Nga ngabafocngineng yenge sowacnengineng mimotodaicte, yogodi hocne yekele pasidonne edalicnubagac.

<sup>6</sup> Wapong ye pasidonne fileine. Ilec ngic doicka longebacaigaing, yenge yedi ameine baduyelelu doicka ingucnehac locebadaicte.

<sup>7</sup> Aime ngenge nga nonge momochac doicka gagabeleng, iwa doicnonggeng bame mogungkedaicte. Aime Sugucne Yesu ye angelofocine tapilingingngolec, yengeholec honocmengcakni kwesilu yegengkedaingte, dameng iwa inguc fikedaicte.

<sup>8</sup> Ye dacubilingineholecti kwesilu ngic Wapong mi ngagecaigaing, nga Sugucnenonggeng Yesule Siduc Madicne yowa mi balabacaigaing, yenge bikicnginengte ameine baduyeleleadaicte.

<sup>9</sup> Baduyeleleadaicte yogo yenge Sugucnele haickacni nga tapiliine ailu hibi-angocine iwacni baicebalu doic moto-motoine mikac iwa basowalecebadaicte.

<sup>10</sup> Kwesi-kwesi dameng iwahac ngic-ngigacfocine Wapongte bingec gagaing, yenge wacine bafedaingte. Ailu ngic-ngigac ngage-ngagesingngineng yenge sasawadi ye nganilu mitengkedaingte. Aime ngenge edocngebalu mibeng yegengkeme ngagesingkeibongte ailu, ngenge yogo hocne aidaingte.

<sup>11</sup> Ilec ailu nonge ngengele ngagesilu damengsoc yanguc milockelu gagabeleng, Wapongnonggengti wacgebawec, ye nganicngebalu kweleine madickedaic. Aime ngenge ye ngagesingkelu boleinele angac bafuwalu aibaba madicne balu bolengineng

tapiliineholec bagacgubong motodaic. <sup>12</sup> Ngenge inguc aibong ngic-ngigac yengi ngengele ailu Sugucnenonggeng Yesu wacine bafedaing, aime yedi ngenge inguchac wacngineng bafedaic. Yogo Wapongnonggeng nga Sugucne Yesu Kristo yekele kwele-madicta ailu inguc fikedaicte.

## 2

### *Yesule kwesi-kwesi dameng*

<sup>1</sup> Ngic hae-gbafocnonggeng, Sugucnenonggeng Yesu Kristole kwesi-kwesi damengka yeholec ganangte kpaducnubadaicte, yogolec yowa monic yanguc edocngebabeng ngagening. <sup>2</sup> Ngic gocne yenge Sugucnele kwesi-kwesi dameng yogo biyac kwesiwec micaigaing. Aime gocne yengi nongele micka lolu yanguc micaigaing, “Yowa monic nongilang kwesigac, me hibi monic nongilang kwesigac, me monicti Asulacni yowa balu migac.” Ngenge yowa ingucne ngagedaingtewa, kwatackelu tapilingineng mi wadaic.

<sup>3</sup> Monicti lokwesacka yowa haicine monic-monic ingucne edocngebame ngenge yekele yowa mi ngagedaing. I yangucte, Sugucnele dameng yogo mi kwesidaicte iwa ngic-ngigac yenge Wapong lobe holecnolu ngaba aicnodaingte. Inguc aibong yefe-yowa wewe ngic monicti yegena fikelu yegengkedaicte. Inguc yegengkeme lobewa Sugucne kwesidaicte. Aime Wapongti lobewa ngic yogo dac-sanangka wickedaicte. <sup>4</sup> Ailu Sugucne mi kwesiyemewa ngic yedi Wapong nga siduc-gbong ailu oma wiyac ngic-ngigac yengi alang bayelelu milockeyelecaigaing, yogo sasawa baicebalu yeuctihac feicne aiyeleadaicte. Inguc ailu ye Wapongte Ibu-macka felu iwa ngiyelu yeicnele yanguc midaicte, “Na hocne Wapong.” <sup>5</sup> Na ngengeholec galu yogo biyachac edocngebaiba. Ngenge yogo biyachac ngigecgebawec, me? <sup>6</sup> Dameng yanguctihac ngic yogo mi fikelu yegengkenele aka fagac, ngenge yogo ngagegaing. Ilec ailu ye damengngina kwesilu yegena domadaicte.

<sup>7</sup> Aime yefe-yowa wewele ngage-ngage sangkeicnele aibaba, yogodi boleine biyac balu gagac. Aime monic ye yogo fikenale aka holelu gagac, ye baickemebac, <sup>8</sup> yefe-yowa wewele ngic yegena fikedaicte. Fikelu yegengkeme, Sugucne Yesudi kwesilu mic-asuinedi basowalelu tapili angocinedi baickeme miyac aidaicte. <sup>9</sup> Ngic yogo ye Satangti bafuwame gadaicte. Ye ngic-ngigac kwesac aiyelenale tapiliine sasawa nga pasile maaine ailu pasi mi ngani-nganiine kwesacineholec edalicedadaicte. <sup>10</sup> Ailu kwesac-aibaba sowacne sasawa yogoholec ngic-ngigac dac-sanangte yefewa haugaing, yenge mengocebalu kwe-sacebadaicte. Yenge yowa noine yogolec kweledi mi angacebadaicte. Ilec ailu wasecne nalic mi aidaingte.

<sup>11</sup> Ilec ailu Wapongti kwele basifucte tapili yengela lome kwesac yogo ngagesingkedaingte. <sup>12</sup> Ngic-ngigac sasawa yogo yenge yowa noine mi ngagesingkelu angacka aibaba kosaine balaibelu gacaigaing. Inguc gabong Wapongti bikicte ameine mime motoyeleadaicte.

### *Sugucnedi bawosaecgebawec*

<sup>13</sup> Sugucnele kwele-angac alingfocine nga ngic hae-gbafocnonggeng, Tili Asuinedi gbabacne gagawa basugulecnggebame, ngenge yowa noine ngagesingkeibong. Yefe yogowa Wapongti bamadicnggebame wasecne ainingte wiyac sasawa mi fikeemewa biyac bawosaecgebawec. Ilec ailu nonge ngengele ailu damengsoc Wapong kwele-madic edodabeleng. <sup>14</sup> Aime nonge Siduc Madicne edocngebabeng ngenge yogo ngagelu yowa noine balu wasecne ainingte Wapongti wacngebawec. Inguc ailu ngenge Sugucnenonggeng Yesu Kristole wac feicne badaingte.

<sup>15</sup> Ngic hae-gbafocnonggeng, ilec ailu yanguc aigac, nonge yowa micka nga hibiwa edocngebalu wedungeleibeng, ngenge yefe iwa sanangne balu domadabiyeng. <sup>16-17</sup> Wapong Mamacnonggeng yedi hocne kwele-angacka kwele-madicinele ailu madicneinele wangec gaibong, yogo nolelu kwelenonggeng moto-motoine mikac basanangkenolelu gagac. Ye nga Sugucnenonggeng Yesu Kristo yeki yowa madicne nga bolenginec sasawa yogolec kwelina ngage-ngagengineng yeuckelu kwelengineng basanangedabiyec.

## 3

### *Sugucnele yowa-siduc sugulelu hikedaic*

<sup>1</sup> Ngic hae-gbafocnonggeng, yanguc taockelu mibeng ngagening. Ngenge nongele ailu yanguc milockedaing, nonge Sugucnele yowa mibeng sawelu biyac sugulelu hikeyackedaic. Aime ngic-ngigac aling gocne yenge yowa yogo ngagelu Sugucne bafelu gadaing.



Ngengela fikewec, silicine ingucnehac ngic-ngigac gocne yengela fikelu hikedaic. <sup>2</sup> Ngic-ngigac bocyac yenge ngage-ngagesingnineng mikac, inguc gagabiyeng. Ilec ngic-ngigac sowacneholec nga bikickolec yengi mi basowalecnubabong Wapongti yengele molewacni baicnubadaic, nenge yogolec milockedaing. <sup>3</sup> Aime Sugucne ye yowaine micaigac yogo balaibelu basananggebame Kindololo fileinedi mi basowalecngabanale asa bacngeba-caigac. <sup>4</sup> Nonge Sugucne ailu ngengele yanguc ngagepangkegabeleng. Nonge yowa milu edocngebalu basananggebabeng, nenge yogo balaibelu gagaing, ailu gadaingte. <sup>5</sup> Gaebongka Sugucnedi kwelenginang pasi bame Wapongte kwele-angacti somecngebame Kristo ingucnehac sanangkelu gadabiyeng.

*Deboç hadeng bole baibeng*

<sup>6</sup> Ngic hae-gbafoçnonggeng, ngic hae-gba gocne yenge oyong gabong yefe weduyeleibeng, yogo mi balaibegabiyeng. Nenge ngic hae-gba ingucne yengele emewa mi gadabiyeng. Nonge yogo Sugucnenonggeng Yesu Kristole wacka edocngebalu basananggebagabeleng. <sup>7</sup> Aime nonge gaibeng, nenge silicine yogohac ganingte ngagebeng madickegac, nenge ngengung yogo ngagegaing. Aime ngengeholec gaibeng, iwa oyong monic mi gaibeng, miyac. <sup>8</sup> Nonge ngengele hewacka galu ngic monictacni nosing fuline mikac moc balu mi nolu gaibeng. Nonge umac gocne ngedabelengkale, molenonggengi deboç hadeng soctepecka doic-bole sugucnehac balu gaibeng. <sup>9</sup> Nonge Wapongte bolele fuli nalic babeng madickedekalesoc, aime yogo hegilelu aibaba aibeng, yogo ngengi nganilu balaibeningte aibeng. <sup>10</sup> Aime ngengeholec gaibeng, iwa yefe-yowa yanguc edocngebaibeng, "Ngc monic ye bole mi badaictewa, ye nosingka bafickenogale mi ngagedaing." <sup>11</sup> Nonge inguc milu dameng monickabac siduc monic yanguc ngeaibeng, nengelacni ngic gocne yenge bole mi balu oyong gacaigaing. Ailu monicte bole fengka haulu moc domalu nganicebacaigaing. <sup>12</sup> Nonge Sugucne Yesu Kristole wacka ngic ingucne yenge mibasanang aiyelulu yowa sanangne yanguc edocebadabelengte, "Nenge gagangineng bafuwanogale madicne ngiyelu socte bole badabiyeng."

<sup>13</sup> Ngic hae-gbafoçnonggeng, nenge aibaba madicne ainogale kwelenginengti mi taticngebadaic. <sup>14</sup> Aime nonge yowa yago hibiwa kwelengkengelegabeleng, monicti yowa yogo mi balaibedaictewa, nenge yeholec mi gadabiyeng. Inguc aibong ye gameedaicte. <sup>15</sup> Ailu ngengi ngic monic ingucne ngaba mi aicnodabiyeng, miyac. Ye agong holecnobong ngengele ngic hae-gba aidaic.

*Mimi-madic yowa*

<sup>16</sup> Sugucne kwele-mogung fileine ye yeuctihac damengsoc yefe haicine monic-monicka kwele-mogung ngedaiaic. Ye sasawa ngengeholec gadaic.

<sup>17</sup> Na Pol, naneuctihac molenedi wenac-madic hibine kwelengkengelegabac. Ngic-ngigac sasawadi nale mole hibile maaine nganilu noine ngageningte inguc kwelengke-caigabac.

<sup>18</sup> Sugucnenonggeng Yesu Kristole kwele-madicti ngengeholec fadaic.

Yogo foinac.

## **Poldi Timotile Molic-molic Hibi Kwelengkewec**

### *Mimi-yegeng yowa*

Timoti ye Asia prowins iwacni. Mamacine ye Grik ngic, nga nenggacine ye Yuda ngigac. Poldi Yesule siduc edocebawec. Edocebame Timoti ye ngagelu ngagesingkelu gawec. Dameng iwa Pol ye Timotile mamac ingucne fikelu damongkeme yeholec Yesule bole balu gaiboc.

Pol ye molickelu Roma iwa muc-macka ngiyegacgu hegile haulu hikewec. Yogolec lobeina Timoti ye Yesule habu Efesas iwa gaibong, yenge baficebanale saleme hikewec. Yesu homackacni gboliyelu honocmengka feme hifa 33 ngama ingucne motome, Poldi hibi yago Timotile kwelengkelu lome fuwec. Wewedu kwesacine gocne yengele sawang-yowa micnowec. Ailu Yesule habu yengele damong nga Timoti yeicne yengele aibaba madicne yogolec kwelengkeyelewec.

### *Yowa yago hibi nevocina fagac*

1:1-2 Wenac-madic yowa

1:3-20 Wapongte yowa nga yowa noine sugu weduyeledaica

2:1-15 Yefe wenucka Wapong mitengkedaing

3:1-16 Yefe wenucka Yesule habu yengele damong bawosaedaica

4:1-16 Aibabaine nga wewedule yowaine damongkedaica

5:1-6:21 Yefe wenucka bole balu Yesule habu damongkedaica

### *Hibile molic-molic yowa*

<sup>1</sup> Kristo Yesule wancang gagabeleng, ye nga Asa-baba ngicnonggeng Wapong yeki na Pol yowa milu edocnuboc, Kristo Yesule salecebaicne aiiiba. <sup>2</sup> Ga ngage-ngagesinggonele ailu madecnebenang aigic, Timoti, gale hibi yago kwelengkegelegabac. Wapong Mamac-nonggeng nga Sugucnenonggeng Kristo Yesu, yekele kwele-madic nga kwele-sowac ailu kwele-mogungtowadi gala fadaic.

### *Sawang-yowa*

<sup>3-4</sup> Na Masedonia prowins iwa hikenogale ailu yowa sanangne miiba, yogo hatacmac edocgugabac, ga Efesas mi hegiledamec. I yangucte, ngic gocne yenge Yesule habu kwelina kwesac-yowa gocne silicine monic weduyelecaigaing. Ailu yenge siduc esecne nga ngesa-ngambo esecne gaofebong, yengele fikesaewect fung kwenogale ailu yowanginengti fec-wac aicaigac. Inguc aime Wapongte yowa gocne balaibeningte ailu ngage-ngagesingnginengte yefe hegilecaigaing. Ilec yenge sanangnehac edocebalu kpatalayeledamec. <sup>5</sup> Gagi yowa milockelu edocebaengka noine fikedaicte, yogo kweledi angac ngagenagudaingte. Fagung-fagung ayeleme Wapongte haicka kwelengingng gbagbacne ailu game mikac ngage-ngagesing noine kwesac mikac kwelengingang wakeme iwacni kwele-angac fikeyeledaicte. <sup>6</sup> Gocne yenge aibaba ingucne mi fikenale ngagesilu yowa kosa micaigaing. <sup>7</sup> I yangucte, yenge Wapongte yefe-yowa edocebalu weduyeleningte bocyac ayelecaigac. Aime sifu yenge yengungtihac yowa sanangne micaigaing, yowa yogolec fungine mi ngage-motogaing.

### *Wapongte yefe-yowale bole*

<sup>8</sup> Monicti Wapongte yefe-yowale yefe dondonne balu gadaictewa, yogodi noine madicne bafuwacnodaicte, yogo ngagegabeleng. <sup>9</sup> Aime yanguc ngagedabeleng, yefe-yowa yogo ngic dondonne gagaing, yengele ngagelu mi loicne. Yogobac aling yangucne yengele ailu loicne, ngic-ngigac yefe-yowa welu mansanang ailu Wapong lobe holecnolu gagaing. Yenge bikic bafuwalu gbagbacne gaga mi ngagesilu angacngineng himongte wiyacte aicaigac. Ailu yenge nenggang-mamacfocngineng weyebic ayelelu ngic-ngigac gocne wecebabong homacaigaing. <sup>10</sup> Ailu yenge selo-boic nga ngicti ngickolec selo-boic bole bacaigaing. Yenge ngic-ngigac hise bacebalu hatacmac salecebaigaing. Ailu yenge yowawa domalu yowa noine mipangkelubac kwesac-yowa micaigaing. Ailu yenge ngic kwesacine gagaing. Aime ngage-ngage dondonne wedungeleibeng, yogo ngic-ngigac gocne yenge hegilecaigaing. Yefe-yowa yogo ngic-ngigac ingucne yengele ngagelu loicne fagac. <sup>11</sup> Wapong ye kwele-angacte fileine, ye tapili nga hibi-angocineholec. Yedi Siduc Madicne naneicne neleme yogo damongkelu wedungelelu gababac.

*Siduc Madicnele noine*

<sup>12-13</sup> Ailu na molickelu Yesu sulelu habufocine weyebic aiyelelu kindololo ngic gaiba. I yangucte, na aibaba noine mi ngage-motolu Yesu mi ngagesingkelu kosa gaiba. Ilec ailubac Sugucnenonggeng Kristo Yesudi kwele-sowac ainelewec. Ye nale ngagemewowaine balaibecaigabacte ailu, tapili nga boleine neleme balu gagabac. Ilec yele kwele-madic micaigabac. <sup>14</sup> Inguc gaebewa Sugucnenonggengte kwele-madic nga kwele-ngac sugucnehachenang, yogo ngage-ngagesingkolec Kristo Yesulacni nala kwesiwec. <sup>15</sup> Kristo Yesudi himongtowawa bikic-baba ngic bamadicnubame wasecne ainangte wawec. Yowa yogo nalic ngagepangkedabeleng. Ailu ngic-ngigac sasawadi yogo ngagelu sebilebong madickedacte. Ailu naneicnebac bikic-baba sasawa ewalicebalu ngic sowacnebenang aiba. <sup>16</sup> Inguc gaebewa, sifu Kristo Yesu ye tatakic mikac pasiine yogo yegena fikelu yegengkenale kwele-sowac ainelewec. Inguc aineleme ngic yenge ye ngagesingkelu gaganang baningte naneuctihac sosocine ailu molickeyeleiba. <sup>17</sup> Ngictau homacine mikac gaginowagac ailu mi nganiicne ye moniyangti Wapong gagac. Yela alang-baba nga wac feicne moto-motoine mikac fafegidaic, yogo foinac.

*Kwele-ngage-ngage gbagbacne*

<sup>18</sup> Madecne Timoti, ga hudu-baba ngic ingucne ailu Wapongte bole balu gadamec. Inguc ainogale yenge Wapongte siduc-yowa gala mibong ngageing, yogo balaibecte edocugabac. <sup>19</sup> Ga ngage-ngagesingkolec galu kwele ngage-ngagegone madicne damongkelu gadamec. Ngic gocne yenge aibaba yogo hegilelu ngage-ngagesingngineng wickebong wawelu sowaleicne. <sup>20</sup> Aime yengelacni Himenaus nga Aleksanda, yeke Satangte molewa locepaiba. Inguc locepabe yeke Wapongte wac hatacmac misulec mi ainicte umacka felu ngage-motodabiyecte.

**2***Mimiloc bole*

<sup>1</sup> Nongileng Wapongti ngic-ngigac sasawa baficebanale yengele ailu Wapong milockelu kwele-madic edolu gadabeleng. Yogodi bole sugucne aigac. Ilec yowa sanangne migabac. <sup>2</sup> Ngic-ngigac ulucne nga kwele-efekolec galu Wapongte ngage-ngage balaibelu aibaba dondone aicaigaing, yengele gaga madicne. Aime ingucne ganangte ngictau nga damong sasawa yengele ailu milockedabiyeng. <sup>3</sup> Mimilocnonggeng ingucne yogo madicne. Aime Wapongti bikicte ameine Asa bacnubawec, yedi mimiloc yogo ngagemewowaine madickedgagac. <sup>4</sup> Ailu ye ngic-ngigac sasawa yenge wasecne ailu yowaine noine ngage-motoningte aicnolu gagac. <sup>5</sup> I yangucte, Wapong moniyangti gagac. Aime Wapong nga ngic-ngigac nongileng hewacka ngaba fagacte ngic hewacine moniyangti sugu gagac, ngic yogo wacine Kristo Yesu. <sup>6</sup> Ye yeuctihac ngic-ngigac sasawa amenonggeng banogale gagaine hegilewec. Yowa yogolec damengbenangine kwesiwec, yogo mime yegengkeme ngagegagac. <sup>7</sup> Na yowa yogo mibe yegengkenale Wapongti naneicne bawosaecnulu salecebaicne locnucne. Locnume Israel yengele alingcacni miyac, yenge yowa noine ngage-ngagesingkolec edocebalu weduyeleiba. Yogo noinebenang, kwesac mi aigabac.

*Ngic nga ngigac Yesule habuwa gagaing, yengele yowa*

<sup>8</sup> Ilec ailu nale ngage-ngage nga angac yogo ngic yengele yanguc migabac, ngic mac-aling neboc nga nebocka gagaing, yenge aalic nga yowangineng mife-miwa mikac molengineng gbagbacne bafangkelu milockedaing.

<sup>9</sup> Na ngigac yengele inguchac yanguc migabac, ngigac yenge aibaba madicnele ngakpi-kpoluc wosaelu ngani-nganiine madicne holebong haudaic. Ailu yenge hibi keleng bafuwanogale kwanang fuline sugucnehac mi holedabiyeng, me hodocngineng mi midedkedabiyeng. Ailu yenge wiyac haicne monic-monic goldi baicne mi holedabiyeng. Ailu ngakpi fuline sugucnehac mi holedabiyeng. <sup>10</sup> Ngigac monic ye Wapongte ngage-ngage balaibecaigac, yogolec mime yegengkeme aibaba madicne aicaigac, aibaba yogodi hibi kelengngine aidaic. <sup>11</sup> Ailu ngigac yenge aibaba ulucne ailu wewedu-yowa yogo ngagelu yowa balaibelu gadabiyeng. <sup>12</sup> Ailu ngigac yengi ngic yengele damong ailu yowa edocebalu weduyeleningte mi mimoctogabac. Ngigac yenge hendolong hegilelu ulucne gadabiyeng. <sup>13</sup> I yangucte, Wapong ye molickelu Adam bafuwalu Ewa lobe bawec. <sup>14</sup> Aleng Sugucneningngti Adam mi kwesackewec. Ye ngigac kwesackeme yefe-yowa hegilelu sowacne bafuwawec. <sup>15</sup> Ngigac monic ye Yesu ngagesingkelu gbagbacne galu ngic-ngigac

yengele kweleinedi angackeme gagaine wosaedaictewa, ye kogoc babale ailu wasecne aidaicte.\*

### 3

#### *Yesule habu damong*

<sup>1</sup> Ngic monic ye Yesule habu yengele damong bole banogale aigacka ye bole yogo madicnele aicnogac, yowa yogo nalic ngagepangkedabeleng. <sup>2</sup> Ilec ailu Yesule habu yengele damong ye kpokpolic mikac gadaic. I yangucte, ye ngigacine moniyang sugu gadaic. Ailu ye damongnagulu gagaine madicne damongkedaic. Ye alang bacnobong galu ngic-ngigac macina hefolecebadaic. Ailu wewedu bole yogolec silicine ngagedaic. <sup>3</sup> Ye waing misa nolu kwele-sifuc ngic mi gadaic. Ailu ye ngic-ngigac weyebic mi ayeleadaic. Ye ngic ulucne ailu kwele-mogungkolec gadaic. Ailu ngage-ngageine hiye-monengte angacine sugucnehac mi fadaic. <sup>4</sup> Ye yeicne golowacfocine madicne damongebadaic. Ailu yeicne adu-madecfocine yenge yowaine balaibelu alang bacnoningte damongebadaic. <sup>5</sup> I yangucte, ngic monic ye golowacfocine damongebanale yefe mi ngagegacka, ye Wapongte habu damongebanogale yefe wenucka damongebadaicte? <sup>6</sup> Aleng Sugucnengineng ye soc bafefele ailu yowawa wawelu ameine bawec. Aime damong ye silicine ingucnehac soc bafefele ailu yowawa wawelu ameine badaickale, ye kwele-hefaliyec gbolicnedi Yesule habu yengele damong mi aidaic. <sup>7</sup> Ailu ngic-ngigac yengele haicka gameedaickale, nga Aleng Sugucnenginengte subadi wedaickale ailu, ngic-ngigac lobeina gagaing, yenge inguchac ye alang bacnobong madickedaicte.

#### *Mole-bafic ngic-ngigac*

<sup>8</sup> Yesule habu yengele mole-bafic ngic yenge inguchac aibabangineng silicine madicne aidabiyeng. Yenge belungineng yaeckangkolec mi gadaing. Ailu waing misale angac sugucnehac mi ngagedaing. Ailu hasowacka hiye-moneng banogale mi gadabiyeng. <sup>9</sup> Yenge kwelenginengti ngage-wosaec ainagulu gbagbacne galu ngage-ngagesingte yowa sangke-sangke fawecti yegengkegac, yogo balu gadabiyeng. <sup>10</sup> Ngic habu yengele mole-bafic ngic ainogale aiyeleme, ngenge ngic ingucne yengele funginengineng ngani-wosaec aidaing. Inguc aibong yenge kpokpolic mikac aime, ibac Yesule habu yengele mole-baficte bole yogo nalic badabiyeng. <sup>11</sup> Ailu mole-bafic ngic yengele ngigacfocngineng yenge inguchac aibabangineng silicine madicne balu gadaing. Yenge ngic me ngigac monicte kwesac-yowa mi midaing. Yenge damongnagulu yowa sasawa madicne milu yogo balaibedaing. <sup>12</sup> Ailu mole-bafic ngic ye ngigacine moniyang sugu gadaic. Ye yeicne adu-madecfocine nga golowacfocine yenge madicne damongebadaic. <sup>13</sup> I yangucte, mole-bafic ngic yenge bole madicne balu gabong, habu yengi alang bayelebong, yenge Kristo Yesu ngagesingkegaing, yefe yogowa sanangne domadaingte.

#### *Kristole fungine*

<sup>14</sup> Na gale ngagesilu hibi yago kwelengkelu gala biyac funogale ainelegac. <sup>15</sup> Aimebac boledi hefecnume biyac mi fudactewa, Yesule habu yenge yefe wenuc gadabiyengte, yogo ngagedamec. Ilec ailu hibi yago kwelengkegabac. Yesule habu yenge Wapong gagaineholec, yele golowac nga yowa noinele bosing sanangne ingucne. <sup>16</sup> Wapongte ngage-ngage fungine yogo sangke-sangke fawec, yogo sugucnehac ailu feicnebenang. I yangucte, Ye socka fikelu yegengkewec. Aime Asudi fungineine dondonne yogo yegena bame angolewec. Aime angelo yenge ye nganiibong. Ngic-ngigac yenge yele siduc Israel yengele alingkacni miyac, yenge edocebalu weduyelebong

Himongtowa neboc nga nebocka hikeme ngagesingkeibong.

Ye Wapongti tapili nga hibi-angocka hatacmac bame fewec iwa gagac.

### 4

#### *Kwesac-yowa*

<sup>1</sup> Tili Asudi yowa yegena yanguc milu gagac, yakuc dameng moto-motoina\* ngic gocne yenge ngage-ngagesingngineng wickebong wadaicte. Ailu yenge aleng yengele yowa

\* **2:15:** Ye oma wiyac ngagesilu kogoc babale yowa kwelengkewec, Wapongte bole-ngic yenge yogolec funginele kwele-moniyang mi aigaing. **3:1:** Sale 20:28 **3:2:** Tit 1:6-9 **3:7:** 2Kor 8:21 **3:11:** Tit 2:3 **3:16:** Yoa 1:14

\* **4:1:** Hibi gocna "dameng moto-motoina" kwelengkelu yanguc ngageibong, Yesu homackacni gboliyelu fangkewec, dameng moto-motoina fungkewec. Ailu ye hatac kwesidaicte, dameng iwa dameng moto-motoina motodaicte.

ngagebong, asu haicine monic-monic yengi kwesac-yowa aiyelelu bacebadaingte. <sup>2</sup> I yangucte, kwesac-ngic yenge kwele ngage-ngagingeng kundung kwelu sowaleicne, yenge ngic-ngigac kwesac aiyelelu <sup>3</sup> yanguc micaigaing, “Ngic-ngigac mi banagunoga.” Nga “Nosing gocne mi nonoga.” Yenge inguc milu aka holeyelelu edocebagaing. Aimebac ngic-ngigac yenge Wapongte yowa noine ngagelu Yesu ngagesingkelu gagaing, yenge nosingngineng yogo kwele-madicka baningte Wapongti nosingngineng bafuwayelewec. <sup>4</sup> Wapongti wiyac sasawa mime fikeyackewec, yogo madicne. Ilec wiyac yogo kwele-madicka balu gadaingtewa, yogo nalic nodaingte. Monic lobe nalic mi holecnodaingte. <sup>5</sup> Yogo Wapongte yowa nga mimilocti bame gbagbacne aidaicte.

#### *Wapongte wewedu-yowa*

<sup>6</sup> Ga ngic hae-gbafocnonggeng yowa yago edocebalu weduyelegic, dameng iwa Kristo Yesule mole-bafic ngic madicne aidamecte. Mole-bafic ngic ingucne gadamectewa, ngage-ngagesingte yowa madicne wedugelebong balaibeing, yogodi ngage-ngagegone basanangkedaicte. <sup>7</sup> Ga himongte yowa-siduc haicine monic-monic gagaine nga babaficine mikac yogo lobe holecnolu geicne gagawa Wapongte pasi nga yefe yogo basanangkedamec. <sup>8</sup> Ngic loling ainogale socngineng baefeckecaigaing, yogodi babaficine efecnemac aigac. Ngic-ngigac yenge Wapongte pasi nga yefe basanangkecaigaing, yogodi gagangineng bucbuchac bafuwadaicte. Yogo yakumacte gaga basanangkegac, ailu gaga lobewa kwesidaicte yogo inguchac basanangkedaicte. Wapongti inguc mipangkelu gagac. <sup>9</sup> Yowa yogo nalic ngagepangkedabeleng. Ailu kwelengonggeng iwa nalic lobeng fame ngagesingkedabelengte. <sup>10</sup> Wapong gagaineholec, yeholec wetackelu wangec gagabeleng, yedi ngic-ngigac sasawa bikicte ameine Asa bacebalu gagac. Ailu ngagesingkegabeleng, ye nongelebenang hocne. Wapongti inguc aime boletowa doicineholec balu gagabeleng. <sup>11</sup> Aime ngic-ngigac yenge yowa yogo balaibeingte sanangne edocebalu weduyeledamec.

#### *Timotile aibaba*

<sup>12</sup> Ga ngic soc-gboli gagicte gocne yengi gale ngagebong waicne mi aidaic. Aime yowa mimigone nga aibabagone, ailu ngic-ngigac kwelegonedi yengele angacgucaigac, nga ngage-ngagesinggone ailu aibabagone gbagbacne, ngic-ngigac ngage-ngagesingkoklec yenge aibabagone yogo nganilu balaibedabiyeng. <sup>13</sup> Aime ngic-ngigac yengeholec Wapongte hibi wafe-ngagec ailu kwelengineng kwefangkelu edocebalu weduyelelu gaengka fudacte. <sup>14</sup> Aime Yesule habu yengele damong yenge molenginengti feigona lolu siduc-yowa mibong, Tili Asule kwele-madicta tapili monic baing, yogo mi ngigecgudaic. Ga tapili yogoholec bole balu gadamec. <sup>15</sup> Aime ga sugulelu sanangkegic, ngic-ngigac yenge yogo nganingte ngage-ngagegone bolegona loengka sanangnehac fame yogo balaibelu balu gadamec. <sup>16</sup> Bagalu geicne damongnagulu yowa edocebalu weduyelegaigic, yogo inguchac damongkedamec. Inguc aidamectewa, ga nga ngic-ngigac yowagone ngage-caigaing, ngenge momochac wasecne aidaingte.

## 5

#### *Wapongte habuwa gaga*

<sup>1</sup> Ga ngic sugucne monic yowa edonogale milu tapiliholec ailu dacineholec mi aicnodamec, ga kweleine yeuckel mamacgone yowa edocaigic, silicine ingucnehac ye yowa edodamec. Ailu ngic hae-gbafocgone yengele kwele yeuckenogale aicaigic, silicine ingucnehac ngic soc-gboli aiyeledamec. <sup>2</sup> Ailu nenggacgone aicnocaigic, silicine ingucnehac ngigac sugucne yenge aiyeledamec. Nga sengfocgone yengele aicaigic, silicine ingucnehac ngigac soc-gboli yengele kwelegone gbagbacne faemewa aiyeledamec.

#### *Ngigac-hosec*

<sup>3</sup> Ngigac-hosec babaficngineng mikac gagaing, Yesule habu ngenge yenge alang bayelelu baficebadabiyeng. <sup>4</sup> Aimebac ngigac-hosec monic ye adu-madecfocine me ata-ngesafocine yengeholec gadaicte, yengungtihac molickelu hosecngineng ngani-damong aicnongte bole badabiyeng. Yogo Yesule habu yengele bole miyac. Yenge inguc ailu nenggac-mamacfocngineng yengele ame baduyeledabiyeng. Aibaba yogodi Wapongte haicka madickedaicte. <sup>5</sup> Aime ngigac-hosec monic ye ngaweine homadaicte, aime yeicnac babaficine mikac galu Wapongti bafickenale ngagepangkelu deboc hadeng milockecaigac. <sup>6</sup> Aime ngigac-hosec monic ye socte angac balaibecaigac, ye sockapecte sugu gacaigac. Nga kwelewapectabac ye homaicne gacaigac. <sup>7</sup> Ngigac-hosec yengele yowa yogo ngic-ngigac sanangnehac edocebadamectewa, gocne yengi yengela kpokpolic nalic mi aidaingte. <sup>8</sup> Monic ye sac-tofafocine ngani-damong mi aiyeledaicte. Ailu yeicne golowac inguchac mi

damongbadaictewa, ye ngage-ngagesingngine biyac hegilelu aibaba sowacne aidaicte. Ailu yele sowacnedi ngic-ngigac Wapong mi ngagesingkegaing, yengele sowacne ewalidaicte.

*Hosec yengele bole aling*

<sup>9-10</sup> Aime ngigac-hosec monic ye hifaine 60 inguc biyachac ewaliwec, ailu ngic moniyangte ngigac sugu gawec. Ailu aibabaine madicne fawec nga fagac, yogo ngic-ngigac sasawadi biyachac ngani-ngagec aicnolu gaibong. I yanguc, ye adu-madecfocine madicne ngani-damong aiyelelu gawec. Nga ngic-ngigac hefolecebalu gawec. Ailu Wapongte bingec higengineng suweyelelu gawec.\* Ailu ye ngic-ngigac umacka gaibong yenge basanangebalu gawec. Ailu ngic-ngigac baficebanale dameng monic mi wickelu gawec. Ngigac-hosec ingucne yele wac sugu ngigac-hosec yengele babaficte wac-alingka kwelengkenoga.

<sup>11</sup> Ngigac-hosec hifangineng waicne gagaing, ga yengele wac-alingbac iwa mi kwelengkedamec. Yenge Kristole bolele takicebame ngicte angac hatacmac ngagelu ngickolec ganingte aidaingte. <sup>12</sup> Yogo yenge molickelu Kristole bolele yowa hefeibong, yogo hegilelu yowawa felu ameine umac bafuwadaingte. <sup>13</sup> Ailu yenge oyong galu mac-boneng lolickecaigaing. Ailu yogo sugu miyac, yenge gube yowa milu monicte bole fengka haucaigaing. Ailu gocne yengele wiyacte yowa nongilengti mimilesoc miyac, yogo sifu midaingte. <sup>14</sup> Ilec ailu ngigac-hosec hifangineng waicne gagainghac yengele ngagelu yanguc lobe balaibedabiyeng. Yenge ngic hatacmac balu kogoc bafuwalu macngineng damongkedabiyeng. Yenge inguc aibong ngabanonggeng gagac, yedi yengele misulec-yowa nalic mi midaicte.

<sup>15</sup> Ngigac-hosec gocne yenge yefe biyachac lilolu Satang balaibeibong. <sup>16</sup> Aime ngage-ngagesingkolec ngigac gagaing, yengele macka ngigac-hosec gocne gagaingka, yenge ngani-bafic aiyelebong Yesule habu yengela umac mi fikedaic. Inguc ailu habu yenge ngigac-hosec waweweine babaficngineng mikachenang gagaing, yenge sugu ngani-bafic nalic aiyeledabiyeng.

*Bolele fuli yelenoga*

<sup>17</sup> Yesule habu damong yenge habu madicne ngani-damong aiyelelu bolengineng ba-caigaing, yenge alang bayelelu bolele fuli yelenoga. Yengelacni gocnedi yowa mibong yegengkeme edocebalu weduyelelu bole sugucnehac balu gagaing, yenge alang sugucnehac bayeledaing. <sup>18</sup> Yogolec Wapongte hibidi yanguc migac,

“Ngicti wit socine litonogale ngagelu bulumaka bole sugucnehac lacnome wit feina edelu lolickecaigac. Ilec mesuine mi hefebong ye bole bagacte fuline nodaic.”† (Yef 25:4)

Aime

**“Bole-ngic yenge bolenginengte bole-fulingineng bafuwadaingte, yogodi madickedaicte.”**

(Luk 10:7)

<sup>19</sup> Aime ngic moniyangti sugu Yesule habu damong monic yowawa lonogale mime, nenge yowa yogo mi ngagedaing. Ngic yaeckang me habackangti yowa yogo milu edocngebabong, iwabac nenge yowa yogo ngagedaing. <sup>20</sup> Damong gocne yenge bikic bafuwacaigaingka, gagi ngic-ngigac yengele haicka mibating aiyeleengka, ngic-ngigac yenge inguc nganilu yengungtihac hangocebame gagangineng wosaedaingte. <sup>21</sup> Aime na Wapong nga Kristo Yesu ailu angelo bawosaecebaicne, yengele haicka mibatingte yowa yogo balaibecte sanangne edocgugabac. Ga inguchac moc ngageung ailu nebeyang sugu domalu yowa kosa mi midamec, ngage-wosaec ailu midamec. <sup>22</sup> Aime ga damong bawosaenogale molegone yengele feiwa biyac mi lodamec. Ga inguc aidamectewa, yengele bikicka taockedamecte. Ga gbagbacne gadamec.

<sup>23</sup> Gobe hii-hii nga huc bocyac aigelecaigac. Ilec misabenang sugu mi nodamec. Ga gobegonele ailu waing kpisicnemas inguchac nodamec.

*Ngic-ngigac aibabanginengti balaibecebadaicte*

<sup>24</sup> Ngic gocne yengele bikic biyac fikelu yegengkelu fagac, yenge yowawa biyac fedaingte. Nga gocne yengele bikic sangke-sangke fagac, yenge lobewa yowawa fedaingte hocne. <sup>25</sup> Silicine ingucnehac aibaba madicne gocne yakumac yegena fagac. Aime aibaba madicne gocne yakumac yegena mi fagac, yogo gacgu nalic mi sangkelu fadaicte.

\* 5:9-10: Yengele damengka kwelec kwekwe yenge bole yogo balu gaibong. Yoane 13:1-17 iwa Yesudi aibaba ingucne balu bawacnagulu silicine ingucne balaibenangte aiwec. 5:14: 1Kor 7:9 † 5:18: Ilucngineng yogo 1 Korin 9:9 iwa fagac. 5:18: 1Kor 9:9; Mat 10:10 5:19: 2Kor 13:1 5:20: Efs 5:11

## 6

*Kwelec aling*

<sup>1</sup> Wapongte wac nga yowaine weduyeibeng, yogo ngic-ngigac yengi milu suledaingkale, kwelec kwekwe ngic gagaingti sugucnefocngineng alang bayelebong madickedaicte. Inguc ngagesilu aidaing. <sup>2</sup> Aime kwelec kwekwe aling gocne yengele sugucnefocngineng ngage-ngagesingkolec gagaing. Yenge ngic hae-gbafocnonggeng aigaingte ailu ngageyelebong waicne mi aidaic. Sugucnefocngineng yenge Yesu ngagesingkebong kwelec kwekwefocngineng yenge kweledi angac ngageyelelu gagaing. Ilec ailu angacka kwelec kwekwe alingte silicka taockelu sugucnefocngineng kwelec kweyeledabiyeng. Ga aibaba yogo weduyelelu kwelengineng kwefangkedamec.

*Wewedu kwesacine*

<sup>3</sup> Sugucnenonggeng Yesu Kristole yowa ngagebeng dondonne aime Wapongte pasi nga yefe wedungeleibeng. Aime monic ye yowa yogo lobe holecnolu yefe monic wedungelelu gacaigac, <sup>4</sup> ngic ingucne ye kweleina soc bafefe aibaba yogo fagac. Ailu ye wiyac monic mi ngage-motogac. Yele angac yogo sowacneholec gagac. Nga ngic yengeholec yowanginengti yowa nebocinele fungine mibong fena wana, nga ngage-ngage haicine monic-monic edocebacaigac. Yowa ingucnedi hasowac nga ngaba silic ailu misulec-yowa nga ngageung bafuwadaicte. <sup>5</sup> Ngic-ngigac ingucne yenge ngage-ngagengineng fongkeme ngaba moto-motoine mikac aiyelecaigaing. Yowa noine yogo kwelenginang mi fagac, biyac baickeicne. Yenge Wapongte pasi nga yefe balaibelu moneng-mafa bafuwaningte ngagesicaigaing.

<sup>6</sup> Aimebac monic ye woc-wiyacine balu gagac, yogo andoine ngagelu Wapongte pasi nga yefe balaibecaigac, ye yefe yogowa kwelele wiyac madicne bocyac bafuwadaicte. <sup>7</sup> I yangucte, himongtowa yagowa mochenang fikeibeng. Aime himong yago hegilelu hikenogale inguchac mochenang hikedabelengte. <sup>8</sup> Nosing nga ngakpi-kpolucnonggeng fanoledaictewa, yogo andoine gadabeleng.

<sup>9</sup> Ngic-ngigac moneng-mafatowaholec ainingte ngagelu gacaigaing, yenge lokwesacka febong socte angac yogodi suba ingucne bacebame aibabangineng kapaine aime gagangineng basowaledaingte. Aibaba ingucnedi basowalecebame miyac aidaingte. <sup>10</sup> I yangucte, hiye-monengte angac, yogodi sowacne sasawa yengele fungine. Ngic-ngigac gocne yenge hiye-monengte angac sugucnehac ngagelu gacaigaing, yogodi ngage-ngagesingngineng madicnele yefe lilolu kwele-umac sugucnehac bafuwayelewec.

*Timotile ung-yowa*

<sup>11</sup> Aimebac Wapongte ngic, ga aibaba yogo nganilu lobe holecnolu hikedamec. Gaga dondonne balaibelu Wapongte pasi nga yefe yogodi gagagona sanangkanale mamang hidudamec. Ailu Yesu ngagesingkelu Wapong nga ngic-ngigac yengele kwelegonedi angac ngageyeledamec. Ailu tatakic mikac galu gaga ulucne balu gadamec. <sup>12</sup> Ngage-ngagesingte ailu hudu madicne welu gasackedamec. Ailu bole sugucnehac balu gasackelu gaga-sanangka hike sulumedamecte. Yogo banogale Wapongti wacguwec. Ailu yefe madicne yogo balaibenogale aigic, yogo molickelu ngic-ngigac yengele haicka miyengka yegengkeme basananguwec.

<sup>13</sup> Aime Wapongti wiyac sasawa gaganginengkolec lowec. Ailu Kristo Yesu yedi Pontius Pailatle haicka fungine madicne mime yegengkewec. Na Wapong nga Yesu yekele haicka yanguc sanangne edocgugabac. <sup>14</sup> Ung-yowa ngagegic, yogo balaibelu bikic mikac gala kpokpolic mi aicaigaing, yogo balu gaengka Sugucnenonggeng Yesu Kristole kwesi-kwesi dameng yogo fikelu yegengkedaic. <sup>15</sup> Aime Wapong yeuctihac damengngine ngagegac, yogo fikedaicte. Wapong ye kwele-angackolec, yedi sugu damong yengele Damong, ailu ye ngictau yengele Ngictau nga sugucne yengele Sugucne. <sup>16</sup> Ye moniyangti sugu dongkedongkeine mikacti angocine kwelina gagac. Aime angoc yogolec kwelina monicti nalic mi fedaicte, miyac. Ailu ye monicti mi nganiwec ailu nalic mi nganidaicte. Yela alang-baba nga tapili moto-motoine mikac fafeginowagac. Yogo foinac.

*Ngic moneng-mafatowanginengkolec*

<sup>17</sup> Ngic-ngigac dameng yagowa moneng-mafanginengkolec gagaing, yenge soc bafefe mi ainingte yowa sanangne edocebadamec. Moneng yogo miyac aidaicte mecne. Ilec yogo mi ngagepangkedaing. Wapongtibac wiyacnonggeng haicine monic-monic angacka banangte bafuwanolelu gagac, yeicne sugu ngagepangkedaing, inguc edocebadamec. <sup>18</sup> Yenge bole madicne balu gabong aibabangineng madicnedi moneng-mafangineng aidaic. Ailu yenge woc-wiyacngineng balu gagaing, yogo kwelengineng efeckeme yogo

botoc balu ngic-ngigac waweweine yeleningte yowa milu edocebalu basanangedamec. <sup>19</sup> Yenge inguc bagacgu gagangineng lobewa kwesidaicte, iwa wiyacngineng madicnele luwangka mac ngiye-ngiye madicne bamadickedaingte. Bamadickelu gaga noina fedaingte.

*Yowa moto-motoine*

<sup>20</sup> Oc, Timoti, Wapongti wiyac damongkecte gelewec, yogo madicne damongkelu gadamec. Ailu himongte siduc nga yowa kosa haicine monic-monic, yogo lobe holeyeledamec. Ngic gocne yengi yanguc micaigaing, “Nonge yowa ngage-ngagemotockolec balu gagabeleng.” Aime yowangineng yogodi yowa kwesacine aigac. Ga yogo ngagelu hegiledamec. <sup>21</sup> Aime ngic gocne yenge ngage-ngage iwa wetackelu ngagenngagesingte yefe liloibong.

Wapongte kwele-madictowadi ngengeholec fadaic. Yogo foinac.



## **Poldi Timotile Hibi Monic Hatacmac Kwelengkewec**

### *Mimi-yegeng yowa*

Timoti ye Asia prowens iwacni. Mamacine ye Grik ngic, nga nenggacine ye Yuda ngigac. Pol ye Yesule siduc edocebame Timoti ye yogo ngagelu ngagesingkwec. Ngagesingkeme, Pol ye Timoti mamacine ingucne ailu damongkeme yeholec Yesule bole balu gaiboc.

Pol ye molickelu Roma iwa muc-macka ngiyegacgu hegile haulu hikewec. Timoti Yesule habu Efesas iwa gaibong, yenge baficebanale saleme hikewec. Inguc gacgume Poldi Yesule siduc hatacmac edocebame ngageibong. Inguc mime hatacmac balu Roma iwa muc-macka lobong alocine yaeckang iwa ngiyewec. Ngiyelu yanguc ngagewec, “Yenge wehomacnudaingte mecne.” Ilec Poldi Timoti basanangkeme doicka sanangne domanale hibi yago kwelengkewec. Yesu homackacni gboliyelu honocmengka feme hifa 35 ngama ingucne motome, Poldi hibi yago alocine yaeckang kwelengkewec Timotile lome fuwec.

### *Yowa yago hibi nebocina fagac*

1:1–2 Wenac-madic yowa

1:3–7 Poldi Timoti ngagesingkwec kwele-madic yowa edowec

1:8–2:13 Timoti sanangne domalu bole doicineholec bame madickedaicte

2:14–26 Kristole bole-ngic noine, yengele maa

3:1–9 Dameng moto-motoina bikicngineng sugulebenangkedaicte

3:10–4:5 Timoti boleinele sawang-yowa miwec

4:6–18 Pol yele angac nga ngage-ngage

4:19–22 Yowa moto-motoina nga wenac-madic yowa

### *Hibile molic-molic yowa*

<sup>1</sup> Na Pol, Wapongti ngageneleme Kristo Yesule salecebaicne aiiba. Aime ngic-ngigac yenge Kristo Yesuholec wetackelu yelacni gaga badaingte, mimipang yowa yogo mibe yegengkeyelenale salecnuwec. <sup>2</sup> Timoti madecne, na kwelenedi gale angac ngagelu hibi yago logelegabac. Wapong Mamac nga Sugucnenonggeng Kristo Yesu, yekele kwele-madic nga kwele-sowac ailu kwele-mogungtowadi gala fadaic.

### *Timotile ung-yowa*

<sup>3</sup> Ngesa-ngambofocne yenge Wapong afeelu kwelec kwecnoibong, ingucnehac na kwele ngage-ngagene gbagbacne galu alang bacnolu kwele-madic micnogabac. Inguc milu deboc nga hadengsoc gale ngagelu milockelu gagabac. <sup>4</sup> Donge-misagone wame nganiiba, yogo ngagesibe kwelenedi gale aineleme hatacmac nganicgunogale ainelegac. Ailu nganicgulu belic-belic sugucnehac bafuwanogale ngagesigabac. <sup>5</sup> Ngage-ngagesinggone kwesacine mikac fagac, yogo ngagesibe kwelene madickegac. Ngage-ngagesing yogo hocne molickelu atagone Lois nga nenggacne Yunis, yekela fawec. Ngage-ngagesing yogo hocne yanguc-tihac gala fagac, yogo ngage-benangkegabac.

<sup>6</sup> Ilec ailu yanguc edocgugabac, na molickelu molene feigona loiba iwa Wapongti kwele-madicnele tapili monic gelewec, yogo hatacmac hole-gboliyecte ngagesigabac. <sup>7</sup> I yangucte, Wapongti Asu nolewec, yogodi tapili-wawa mi bafuwanolewec, miyac. Ye tapiliholec ganangte ailu kwelengonggengti ngic-ngigac angac ngageyelenangte nga aibaba madicne damongkenangte ailu bafuwanolewec. <sup>8</sup> Ilec ga game mikac galu Sugucnele yowa-siduc miyengka yegengkeme suguledaic. Aime na yele ailu muc-macka ngiyeibale nale ngageengka gameineholec mi aidaic. Ga inguchac Wapongte tapiliwa Siduc Madicnele ailu na ingucnehac doic ngagedamec.

<sup>9</sup> Aime wasecne ainangte ngagelu bikicte ameine bame Wapongte bingec ganangte Wapongti wacnubawec. Nongilengti aibaba madicne aibeng inguc mi aiwec, miyac. Ye yeuctihac alingkelu ngageme fawec, yogo biyachacbenang himong nga sawa mi fikee-bocka Kristo Yesule madicnele ailu kwele-madic ainolewec. <sup>10</sup> Inguc faemewa yakumac hocne Asa-baba ngicnonggeng Yesu Kristodi kwesime Wapongte kwele-madic yogo fikelu yegengkewec. Yegengkeme yedi homac baickelu gaga dangke-dangkeine mikac, yogo balu kwesime yegengkeme nganiibeng. Yedi Siduc Madicne noleme gaga-sanangte aibaba ngani-motoibeng.

<sup>11</sup> Ilec Siduc Madicnele ailu yogo mibe yegengkeme ngic-ngigac weduyelelu salecebaicne aibeke wacnuwec. <sup>12</sup> Yogolec ailu doic feina gagabac. I yangucte, na ye ngagesingkelu gagabac, ye ngagegabacte nalic mi gamenudaicte. Aime ngage-ngagesingne sanangne yanguc fagac, ye tapiliineholecte gagane yela lobe fagac, yedi yogo damongkelu gaemewa damengngine kwesidaicte. <sup>13</sup> Na Wapongte yowa ngic-ngigac silicina weduyelecaigabac, gageuc yogo ngagegic. Aime yogolec silicina edocebalu weduyeledamec. Aime Kristo Yesuholec wetackelu ngage-ngagesing nga kwele-angacka galu Wapongte yowa yogo sebilelu balaibedamec. <sup>14</sup> Tili Asu nongileng kwelewa gagac, yedi nenggac ngiyegeleme Wapongti wiyac madicne balu gelewec, yogo damongkeengka fadaic.

### *Babafic aling*

<sup>15</sup> Ngic Asia prowins iwa gagaing, yenge sasawadi nale takicebame biyachac hegilecnuibong, yogo ngagegic. Figelus nga Hemogenes yeke inguchac hegilecnuiboc. <sup>16-17</sup> Aime sifu muc-macka ngiyeebewa Onesiforus ye Roma taonka kwesilu sanangne basacnulu gacgu bafuwacnuwec. Ailu senti hefecnuibong, yogolec mi gameame dameng bocyac basanangnume madicne gaiba. Ilec Sugucnedi Onesiforus golowacfocine kwele-sowac aiyeleidaic. <sup>18</sup> Aime Efesas taonka molickelu gaibawa, yedi socne damongkelu bole sugucnebenang bawec, yogo gageuctihac nganilu biyac ngagegic. Ilec Sugucnedi ngagecnolu damengtowaina kwele-sowac aicnodaic.

## 2

### *Sugucnele bole-ngic*

<sup>1</sup> Ilec ailu madecne, Kristo Yesule kwele-madicti basananggume tapiliholec gadamec. <sup>2</sup> Ga nga widec ngic-ngigac bocyac ngenge momochac yowane ngageibong. Yowa yogo ngic yefe mi liloicaigaing, edocebaengka damongkedabiyeng. Damongkelu yengi ngic-ngigac nebocine taockelu edocebalu weduyeledaingte. <sup>3</sup> Aime Kristo Yesule hudu-baba ngic madicne ailu naholec doicka galu mi takicgudaic. <sup>4</sup> Hudu-baba ngic bole balu gagaing, yenge hudu-baba sugu ngagegaing. Lobeina bole haicne monic-monic fagac, yogo monic mi badaingte, miyac. Ngic ingucne ye damongngine yeholec yowa milu hefeicne, damong ye ngageme madickenale yele yowa yogo balaibelu bole balu gadaicte. <sup>5</sup> Aime loling ngic monic ye lolingka gasackelu gbelong aigac. Aimebac lolingte yefe-yowa lilogacte lolingte maaine sil yogo nalic mi badaicte. <sup>6</sup> Aime monic ye sanangkelu bole hole-duwec aicaigac, ye molickelu nosingngine badaicte, yogodibac madickedaicte. <sup>7</sup> Na yowa migabac, yogo ngage-ngagegona lolu balu gadamec. Aime ngage-motocete wiyac sasawa Sugucnedi bafuwageledaicte.

<sup>8</sup> Yesu Kristo, Dawidile fikesaweckacni, ye homackacni gboliyelu fangkewec, ye ngagesilu gadamec. Yele Siduc Madicne hocne milu edocebalu gagabac. <sup>9</sup> Na yogo milu edocebalu gagabac. Ilec ailu doic ngagelu balu gabe, ngic yengi kindololo ngic muc-macka locebalu hefeicaigaing, silicine yogo ingucnehac muc-macka lochnulu hefecnuibong. Aime sifu Wapongte yowa yogo muc-macka nalic mi hefedaingte, miyac. <sup>10</sup> Kristo Yesudi ngic-ngigacfocine bawosaecebaicne bikicte ameine bame, yenge inguchac wasecne ailu gaganangte hibi-angoc badaing. Ilec ailu na doic sasawa nalic ngagelu sanangne domalu umac yogo bagabac.

<sup>11</sup> Yowa monic yogo nalic ngagepangkedabeleng, yogo yanguc fagac, Yeholec homaibeng. Ilec nongileng momoc yeholec inguchac gaga gadabelengte. <sup>12</sup> Ailu umac balu sanangne gadabelengtewa, yeholec ngictau aidabelengte. Nga ye lobe holecnodabelengtewabac, ye inguchac lobe holecnubadaicte. <sup>13</sup> Ailu yowaine mi balaibedabelengtewa, ye sifu yowaine balaibelu gadaicte. I yangucte, yogo yeicne fungine, aime ye yeicne nalic mi holenagudaicte.

### *Yowangineng fec-wac mi aidaic*

<sup>14</sup> Ga yowa kwelengkegabac, yago ngic yogo yenge hole-gboliyelu edocebanong. Aime yenge yowa gocne ngagelu yowanginengti yowa nebocinele funginele mibong fec-wac aidaickale, sawang-yowa yogo sanangnehac Wapongte haicka edocebanong. Yowa fec-wackolec mimi, yogo babaficine mikac. Ngic-ngigac yenge yogo ngagebong yowa yogodi bocyachenang basowalecebadaicte. <sup>15</sup> Wapongte kwelewa madickenale sanangnehac galu bolegone badamec. Ailu yowa noinele fungine dondonne midamec. Inguc ailu Wapongte haicka bole-ngic ganogale mi gamegudaicte. <sup>16</sup> Aime ngic-ngigac himongte siduc nga yowa kosaine micaigaing, yogo lobe holeyelelu gadamec. Ngic-ngigac yowa

ingucne mibong yogodi mengocebame Wapong alang mi bacnolu dalicka taockeme taoc hikedaingte. <sup>17</sup> Ailu yenge yowangineng mibong suguleme yogodi waic sanangne ingucne hatacmaç sugulelu hikedaicte. Himenaus nga Filetus yeke ngic ingucne yengelacni. <sup>18</sup> Yeke yowa noine hegilelu yefe lilolu micaigaic, “Ngc-ngigac yenge homackacni gboliyelu fangkedaingte, yogo biyachac fikewec.” Inguc milu ngic-ngigac gocne yengele ngage-  
ngagesing basowalegabayec.

### *Bolele yowa*

<sup>19</sup> Aime sifu Wapongti bosing sanangne lome hauwec domagac, yogo ululung nalic mi aidaicte. Yogowa yowa yanguc kwelengkeicne fagac,  
“Sugucnedi ngic-ngigac focine ngagecebagaç.”

(Him 16:5)

Ailu monic yanguc,

“Ngc-ngigac Sugucnele wac wackecaigaing, yenge aibabangineng sowacne, yogo sasawa hegilelu lobe holecnolu gadabiyeng.”

<sup>20</sup> Aime ngic woc-wiyactowaineholec yele macka hebec-kudi haicine monic-monic ngiyegaing. Gocne gol nga siliwadi baicne yogo bolengineng alang-babaineholec aigac. Nga gocne yoc nga gbakitacti baicne yogo bolengineng yafoineholec aigac. <sup>21</sup> Inguc aime ngic monic ye yeicne wiyac yafoineholec yogowacni suwenagudaicte, ye hebec-kudi alang-babaineholec, yogo ingucne. Ye Wapongte bingec aime Fileinedi bame bole madicne banogale silic aigac.

### *Gaga ulucne*

<sup>22</sup> Himongka socte angac soc-gboli yengela facaigaing, yogowacni hangoc baicke hikelu dalicka gadamec. Ngic gocne yenge kwelengineng gbagbacne galu Sugucnele wac wackecaigaing. Aime yengeholec bole sanangne balu yefe dondonne balaibelu ngage-  
ngagesingkolec gadamec. Ailu kwelegonedi ngic-ngigac yengele angac ngageyelelu kwele-  
mogungkolec gadamec. <sup>23</sup> Ga yowa kosaine nga babaficine mikac, yogo hegiledamec. Aibaba yogodi hocne ngaba bafuwame yuwenac fikecaigaic, yogo ngagegic. <sup>24</sup> Sugucnele kwelec kwekwe ngic ye yuwenacka mi gadaic. Ye ngic-ngigac sasawa yengeholec ulucne galu wewedu bolele fungine ngagelu ngic-ngigac yengele tatakic mikac gadaic. <sup>25-26</sup> Aime Aleng Sugucnenginengti suba ingucne ngic-ngigac gocne bacebame, yele angac nga ngage-  
ngage balaibecaigaing. Yenge Sugucnele kwelec kwekwe ngic yele yowa hedickecaigaing, inguc aibong yedi yengeholec ulucne galu edocebalu weduyeledaic. Inguc aiyeleme Wapongti kwelengineng hefaliyeningte tapili yeledaicte mecne. Inguc aiyeledaicte-  
wabac, yenge kwelengineng ileckeme yowa noine ngage-motolu, Aleng Sugucnenginengte molewacni fotockelu hikeyackedaingte.

## 3

### *Dameng moto-motoine*

<sup>1</sup> Dameng moto-motoina\* umac haicine monic-monic fikedaicte, yogo ngageng fadaic. <sup>2</sup> I yangucte, dameng iwa ngic-ngigac yenge yengileng angac nga hiye-monengete angac bocyac ngagedaingte. Yenge yengileng wiyacte mibong feicne aime, socnengineng bafelu misulec ailu nenggac-mamacfocnengineng yengele yowa kwedaingte. Ailu ngic-ngigac wiyac yeledaingte, yengele kwele-madic monic mi ngagedaingte. Aime gaga gbagbacne yogo yengela mi fadaicte. <sup>3</sup> Aime yenge ngic-ngigac agofocnengineng yengele mi angace-  
badaicte. Ailu ngic-ngigac yengele bikic mi hegiledaingte. Yenge gocne yengele kwesac-  
yowa milu aibabangineng mi damongkelu wecebalu doic sugucnebenang ye lelu aibaba madicne kwelenginengti hegiledaingte. <sup>4</sup> Yenge mic-heloc aiyelelu mi ngage-motolu aibabangineng moc aidaingte. Ailu socnengineng bafelu fefeyac aidaingte. Socte angacti yengele gaganginang suguleme Wapongte angacbac hegiledaingte. <sup>5</sup> Ailu yenge socti sugu Wapongte gagale silic ingucne gadaingte. Ailu Wapongte tapili nga pasi yogo hegilelu lobe holecnodaingete. Ilec ga yengeholec wetackelu mi gadamec.

<sup>6-7</sup> Ngigac gocne yenge mic-heloc aibabangineng ailu angacnengineng sowacne haicine monic-monic balaibelu gabong bikicnengineng umalecaigaic. Ailu yenge wewedu-yowa ngagelu gagaing. Nga yowa noinebac nalic mi ngage-motodaingete. Ilec ailu ngic yogo yenge madicne silic ingucne galu mac-boneng hikelu ngigac yogo yowawa mic-heloc aiyelecaigaing.

**2:16:** 1Tim 4:7    **2:17:** 1Tim 1:20    **2:19:** Yoa 10:14; 1Kor 8:3    **2:22:** 1Tim 6:11    **2:23:** 1Tim 4:7    \* **3:1:**

Hibi gocna “dameng moto-motoina” kwelengkelu yanguc ngageibong, Yesu homackacni gboliyelu fangkewec, dameng moto-motoine fungkewec. Ailu ye hatac kwesidaicte, dameng iwa dameng moto-motoine motodaicte.    **3:1:** 1Tim 4:1

**3:5:** Mat 7:15,21; Tit 1:16

<sup>8</sup> Aime esecne Yanes nga Yamberes yeke Mosesle yowa hedickeiboc, ingucnehac ngic ngigabac, yenge ngage-ngage kwesacineholec galu yowa noine hedickecaigaing. Ailu ngage-ngagesingte yefe lilogaing. <sup>9</sup> Yanes nga Yamberes yekele aibaba kosaine yogo yegena fikeme ngic-ngigac sasawadi yogo nganiibong. Ingucnehac sasawadi ngic yogo yengele aibabangineng kosaine yogo ngani-motodaingte. Aime kwesac-yowangineng yogo hatacmac mi suguledaicte.

*Salecebaicne yengele silicka ganoga*

<sup>10</sup> Aime Timoti, gabac na wiyac wedugeleiba, yogo ngagelu balaibelu gagic. Ailu na aibaba aiiba, nga gaganele yefe loiba, yogo ngagegic. Ailu tatakic mikac ngage-ngagesingkolec galu kwelenedi ngic-ngigac yengele angac ngageyelelu sanangnehac gaiba. <sup>11</sup> Ailu na Antiok nga Aikoniam ailu Lista taonka gabe weyebic aineleibong, aime umacka nga doicka gaiba. Inguc gaebewa Sugucnedi umac sasawa yogowacni baficnulu gawec, yogo ngagegic. <sup>12</sup> Aime ngic-ngigac sasawa Kristo Yesuholec wetackelu Wapong alang bacnolu ganingte ngagegaing, yenge inguchac weyebic aiyeledaingte. <sup>13</sup> Aime bikic-baba ngic nga kwesac-ngic yenge ngic-ngigac lokwesacka locebacaigaing, yenge sowacnengineng hatacmac sugulelu sanangkeme sowale-benangkeadingte. Ailu yenge yengungtihac kwesac ainagulu gocne inguchac kwesacebabong wawedaingte.

*Yowa babaficineholec*

<sup>14-15</sup> Ngic-ngigac gocne madicne ngageyelecaigic, yenge ga gegecne gaing, dameng iwa Wapong yeicne hibi kwelengkeicne fagac, yogo wedugeleibong. Wedugelebong yowa yogo ngageng ngage-ngagegane baefeckeme Kristo Yesu ngagesingkeng bikicte ameine bame wasecne aing. Ga yogo ngagepangkelu gadamec. Inguc gaengka yogodi gagagone basanangkeadaicte. <sup>16</sup> Aime yowa Wapongte hibiwa kwelengkeicne fagac, yogo sasawa Wapongti asuine fitome ngicte ngage-ngagewa haume kwelengkeibong. Hibi yogodi yanguc baficnubagac, Wapongte mic-yowadi ngelengnubalu wedunolegac. Ailu bamadicnubalu yefe dondonne balaibenangte damongnubagac. <sup>17</sup> Inguc aime Wapongte ngic-ngigac yenge bolele ngage-ngage nga tapili yogolec silicina balu bole madicne haicine monic-monic baningte hibi yogo yelewec.

## 4

*Bole sanangne banoga*

<sup>1</sup> Kristo Yesu ye ngani-damongngina fikelu domadaicte, iwa gbolicne nga homaicne wosaacebalu mimoctoebadaicte. Na Yesu nga Wapong yekele haicka sanangnehac edocugabac. <sup>2</sup> Ga dameng madicna, me miyac, iwa sifu efeckelu Wapongte yowa milu ngic-ngigac edocebalu mibating aiyeledamec. Ailu tatakic mikac wiyac sasawa ngelengebalu edocebalu weduyelelu basanangebadamec. <sup>3</sup> Dameng monic kwesidaicte, iwa ngic-ngigac yenge wewedu-yowa dondonne ngagenogale takicebadaicte. Yengebac yengileng angac balaibelu wewedu ngic bocyac kpaducebadaingte. Kpaducebabong yengi ngic-ngigac yengele hedecka yowa angacine aigac, yogo weduyeledaingte. <sup>4</sup> Ailu yenge yowa noine hegilelu lobe holecnodaingte. Ailu siduc esecne nga siduc noine mikac, iwa wetackelu yefe lilodaingte. <sup>5</sup> Aime gageuc wiyac sasawa damongebaengka umac fikegeleme tatakic mikac sanangne domadamec. Inguc domalu Wapongte Siduc Madicne edocebalu Wapongti bole-yowa gelewec, yogo sasawa balaibelu gadamec.

*Poldi homanale miwec*

<sup>6</sup> Aime homac-damengne biyac welegacte ngic yenge waing Wapongte ibu locaigaing, silicine ingucnehac sacne sotingkeme gaganedi ibu ingucne aidaicte. <sup>7</sup> Hudu madicne biyac welu bamoctoiba gagabac. Ailu ngic gbelong ainingte gasackecaigaing, silicine ingucnehac sanangnehac gasackelu biyac bamoctoiba gagabac. Ailu ngage-ngagesingne sanangne balu gaiba. Ailu mi wickebe wawec. <sup>8</sup> Yakumachac gaga dondonnele duu nale wangec loicne fagac. Ailu Sugucne ye pasi dondonnele wowosae-ngic, yedi dameng iwa duu yogo neledaicte. Aime yogo na sugu mi neledaicte, miyac. Ngic-ngigac sasawa yenge ye kwesi-kwesi damengngina fikelu yegengkenale kwelenginengti angac ngagegaing, yedi yogo yenge inguchac yeledaicte.

*Bole-yowa gocne*

<sup>9</sup> Ga kwesinogale sanangkelu nala biyachenang kwesidamec. <sup>10</sup> I yangucte, Demas ye dameng yagolecte gagale angac ngagelu biyachac hegilecnulu Tesalonika taonka hikewec. Aime Keresken ye Sugucnele bole banale Galata prowins iwa hikewec. Aime Titus ye

inguchac Damatia prowins iwa hikeme <sup>11</sup> Lukadi sugu naholec gagac. Mareko ye bole baficnucaigacte ailu gagi ye bafuwalu mengockeng gaholec kwesidabiyec. <sup>12</sup> Tikikus ye Efesas salebe hikewec. <sup>13</sup> Aime funogale milu ngakpine dalicne Toas taonka Kapusle macka hegilebe ngiyewec, yogo nga nale hibi kpadidiweicne sasawa iwa locebabe faibong, yogo momoc bacebalu kwesidamec. Ailu hibine lama socina kwelengkeicne fagac, yogo ngagebe wiyac feicne aigacte yogo momoc balu kwesidamec.\*

*Damongnagulu ganoga*

<sup>14</sup> Aleksanda ye aen dacka lobelu woc-wiyac bacaigac, yedi umac bocyac bafuwanelewec. Aime Sugucnedi aibabainele ameine baducnodaicte. <sup>15</sup> Ye dacine inguc ailu yowanonggeng bocyac mife-miwa ailu gawec. Ilec ga ngic yele damong balu gadamec.

*Polyowawa loibong*

<sup>16</sup> Aime na molickelu Roma iwa yowawa domalu funginene miiba, dameng iwa moniciti naholec mi domawec, sasawadi hegilecnuyackeibong. Aime inguc aibongte yogodi mi baumalecebadaic. <sup>17</sup> Na Siduc Madicne Israel yengele alingcacni miyac, yengela mibe yegengkenale Sugucnedi sifu naholec domalu tapili nelewec. Ailu nale agong holelu nale homac yogo laionte mickacni ingucne baicnuwec. <sup>18</sup> Ngic yengi umac haicine monic-monic ainelenogale ngagegaing. Aime Sugucnedi yogowacni inguchac baficnune wasecne aibe honocmeng ngani-damongngina locnudaicte. Yela wac feicne moto-motoine mikac fafegidaic, yogo foinac.

*Wenac-madic*

<sup>19</sup> Nale wenac-madic Prisila nga Akwila ailu Onesiforus golowacfocine yengela loengka hikedaic. <sup>20</sup> Erastus ye Korin iwa gagachac. Nga Tofimus yebac hucti bawecte Miletus taonka hegilebe ngiyewec. <sup>21</sup> Aime tilo-gbelong dameng aidaickale, sanangkelu biyac kwesidamec. Yubulusdi wenac-madic gala lome fugac. Ailu Pudens nga Linus ailu Kalaudia nga ngic hae-gbafocnonggeng sasawa, yenge inguchac wenac-madicngineng gala lobong fugac.

<sup>22</sup> Sugucnedi gale asuholec gadaic. Aime kwele-madicinedi ngengela fadaic. Yogo foinac.

---

**4:10:** 2Kor 8:23; Sale 15:37-39; Kol 4:14      \*      **4:13:** Hibi bocyac yogo papirus hekengnginedi baicne iwa kwelengkelu gaibong. Papirus hekengngine yogo siming hekengngine ingucne sugucnehac. Hibingineg gocne yogo yenge lama me noning socina kwelengkelu gaibong. Socine yogo fuline sugucnehac.      **4:13:** Sale 20:6      **4:14:** 1Tim 1:20; Mige 62:12; Rom 2:6      **4:19:** Sale 18:2; 2Tim 1:16-17      **4:20:** Sale 19:22; 20:4; Rom 16:23

## **Poldi Titusle Hibi Kwelengkewec**

### *Mimi-yegeng yowa*

Titus ye Grik ngic. Poldi Yesule Siduc Madicne edome ngagesingkeme yeholec lolickelu bole balu gaiboc. Pol ye Titus saleme alecine yaeckang Korin taonka hikelu bole bawec (2 Korin 7:6-7; 8:6,16). Yogolec lobeina Krit nucka lome hikelu Yesule Habu iwa damongebalu gawec.

Pol ye lolickelu Roma iwa muc-macka ngiyegacgu hegile haulu hikewec. Yesu homack-acni gboliyelu honocmangka feme hifa 34 ngama ingucne motome, Poldi hibi yago Titusle kwelengkelu lome fuwec. Wewedu kwesacine gocne yengele sawang-yowa edowec. Ailu Yesule habu wenuc madicne damongebalu damongfocngineng bawosaecebame yengele aibaba madickenale kwelengkeyewec.

### *Yowa yago hibi nebocina fagac*

1:1-4 Wenac-madic yowa

1:5-16 Yesule habu damong yengele aibaba

2:1-3:11 Yesule habu kwelina habu gocne yengele aibaba madicne

3:2-15 Yowa moto-motoine

### *Hibile molic-molic yowa*

<sup>1</sup> Na Pol, Wapongte kwelec kwekwe ngic nga Yesu Kristole salecebaicne. Wapongte ngic-ngigac bawosaecebaicne yengi yele pasi nga yefe noine ngagesingkelu ngage-motoningte locnuwec. <sup>2</sup> Yowa yogodi gaga-sanang bafuwadaicte, yogolec wangec gagabeleng. I yangucte, Wapongta kwesac monic mi fagac. Molickelu wiyac sasawa mi fikeibongkacnihac yedi gaga-sanang banangte yowa mipangkewec. <sup>3</sup> Aime yeicne damengngine kwesime yowaine dondonne ngic-ngigac yeleme mibong yegengkewec. Yogo minogale Wapongti bikicte ameine Asa bacnubawec, yedi edocnulu neleme damongkegabac. <sup>4</sup> Titus, ga naholec ngage-ngagesing moniyang ngagesingkelu madecnebenang aigic, na hibi yago gala logabac. Wapong Mamac nga Asa-baba ngicnonggeng Kristo Yesu, yekele kwele-madic nga kwele-mogungtowadi gaholec fadaic.

### *Bole-yowa*

<sup>5</sup> Bole nebocine fawec, yogo bamoctocte ngagelu Krit nucka hegilecugube ngiyeing. Ailu bole aling edaliguiaba, yogo balaibelu taon falegacsoc, iwa hikelu Yesule habu damong bawosaecebalu bole-yowa yeledamec. <sup>6</sup> Ngic monic ye kpkpolic mikac gacaigac, ailu ngigacine moniyang sugu gagac. Ailu ye adu-madecfocine ngage-ngagesingkolec gagaing. Ailu adu-madecfocine yenge aibaba kosaine me mansanang gaga, yowa-siducngineng ingucne monic mi fikecaigac. Ngic ingucne ye damong nalic aidaicte. <sup>7</sup> I yangucte, Yesule habu damong ye Wapongte wiyac damongkedaicte. Ilec kpkpolic mikac gadaic. Ailu ye yeicnele ngageme feicne mi aidaic. Ailu ye ngic dacine mi aidaic. Ye waing misa nolu kweleine mi sifuwedaic. Ye kindololoine mikac ailu ye hasowacka hiye-moneng banogale mi gadaic. <sup>8</sup> Yebac ngic-ngigac macka hefolecebadaic. Ailu aibaba madicne yogolec angac ngagedaic. Gagaine madicne damongkedaic. Ailu dondonne nga gbagbacne galu aibabaine nga angacine damongnagudaic. <sup>9</sup> Aime yowa ngage-ngagepangkolec edocebalu weduyeleibeng, yowa yogo sanangne balu gadaic. Ngic ingucne ye yanguc nalic aidaic, ngic-ngigac yefe dondonne weduyelelu kwelengineng kwefangkedaic. Aime gocne yengi yowanonggeng kwecaigaing, yenge ngelengebalu edocebadaic.

### *Wewedu kwesacine*

<sup>10</sup> I yangucte, mansanang ngic-ngigac bocyacti gagaing. Yenge yowa babaficine mikac moc micaigaing. Ailu ngic-ngigac kwesac aiyelecaigaing. Aime Yuda ngic soc tofangineng helockeicne, yengi hocne aibaba ingucne ailu gacaigaing. <sup>11</sup> Yenge moneng-mafatowa kwesacka bafuwangogale yowa mimi-sifucineholec edocebalu weduyeleigaing. Inguc aiyelebong golowac gocne sasawadi siyeckelu sowalegaing. Ilec ailu ngic ingucne yengele mic-yowangineng kpatalayedabiyeng. <sup>12</sup> Krit ngic yengilangkocni yengele siduc-mimi ngic monicti yengileng yanguc miwec, “Krit ngic yenge damengsoc damengsoc kwesac aicaigaing. Ailu nosing nolu gebecebame oyong galu kate-sic sowacne ingucne gagaing.”

<sup>13</sup> Yele yowa yogo noine. Ilec yenge ngage-ngagesingnineng bamadickeng madicke-nale ung-yowa sanangne ngelengkelu edocebamec. <sup>14</sup> Ailu Yuda ngic-ngigac yenge siduc esecne gocne milu ung-yowa ngickacni basanangkelu yowa noine hegilelu lobe holecnocaigain. Yenge yowa ingucne mi ngagesiningte, yogo sanangnehac ngelengkelu edocebamec.

<sup>15</sup> I yangucte, ngic-ngigac gbagbacne gagaing, yengele gagawa nosing nga woc-wiyacngineng gbagbacne fagac. Aime ngic-ngigac gocne biyachac wonongkolec ailu ngage-ngagesingnineng mikac gagaing, yengele ngage-ngage-motoc nga kwele ngage-ngagengineng momochac wonongkolec aigac. Ailu wiyacngineng gbagbacne monic mi fagac.\* <sup>16</sup> Yenge Wapong ngagegabeleng, yogo micnginengti sugu mibong yegengkecaigac. Nga aibabanginengtibac ye lobe holecnogaing. Aibabangineng sowacne yogo memen-guine aigac. Aling yogo yenge yowa wegaging. Ailu aibaba madicne monic nalic mi aidaingte.

## 2

### *Ngic-ngigac yengele yowa*

<sup>1</sup> Aime gageicne Wapongte yowa madicne nga dondonne fagac, yogo balaibelu weduyeledamec. <sup>2</sup> I yangucte, mamac yenge mogungne galu damongnagulu aibabanginengti alang-baba ailu gadabiyeng. Ailu yenge ngage-ngagesingnineng damongkelu ngic-ngigac yengele kwelenginengti angac ngageyelelu tatakic mikac sanangne gadabiyeng.

<sup>3</sup> Aime nenggac yenge inguchac ngic-ngigac Wapongte ngage-ngage balaibecaigain, yengele silic ingucne aibabanginengte alingka gadabiyeng. Ailu yenge ngic-ngigac gocne kwesac-yowa mi edocebadiyeng. Ailu waing misa bocyac nolu, yogolec umacka mi gadabiyeng. Wiyac madicne fagac, yenge yogo ngic-ngigac weduyeledabiyeng. Aibaba ingucne yogo weduyeledamec. <sup>4</sup> Ilec nenggac yengi ngigac-adu ngawefocnginengkolec yenge yanguc weduyeledabiyeng. Yenge ngawefocngineng nga adu-madefocngineng yenge kwelenginengti angac ngageyelelu <sup>5</sup> damongnagulu gbagbacne gadabiyeng. Ailu yenge mac-bolengineng balu madicne galu ngawefocngineng yengele yowa ngaged-abiyeng. Inguc aibong monicti Wapongte yowa nalic mi milu suledaicte.

<sup>6</sup> Ga soc-gboli ngic inguchac damongnaguningte ngage-ngagengineng kwefangkelu edocebamec. <sup>7</sup> Ailu wiyac sasawa yogowa, gageuc galu aibabagone silicne madicne aiyengka balaibecgadabiyeng. Ga wewedu-yowagone yogo alang-babaineholec ailu yowa noineholec weduyelenong. <sup>8</sup> Aime ngabafocgone yenge gale yowa sowacne monic nalic mi miningte ailu gameebanale, ngic-ngigac yowa noine babaficineholec edocebala gadamec. Nongele yowa kwekwe ingucne nalic mi aidaingte.

### *Kwelec kwekwe ngic*

<sup>9</sup> Kwelec kwekwe ngic-ngigac sugucnefocngineng yengeholec gagaing, yenge sugucne-focngineng yengele yowa sasawa balaibedabiyeng. I yangucte, sugucnefocngineng yengi ngageyelebon madickenale bolengineng balu sugucnefocngineng yengele yowa ameine mi bafaliyedaing. <sup>10</sup> Yenge sugucnefocngineng yengelacni wiyac monic hise mi badaing, miyac. Yenge bole sasawa bagacgu yowa balaibe-balaibe ngic-ngigac madicne aidaing. Ga inguc weduyeledamec. Ailu yenge aibaba ingucne aibong, Wapongti bikicte ameine Asa bacnubawec, yele wewedu-yowa yogo ngic-ngigac yenge yowa madicneineholec ngagedaingte.

### *Kristole wangec gagabeleng*

<sup>11</sup> I yangucte, Wapongte kwele-madicti ngic-ngigac sasawa yengela fikelu yegengkeme bikickacni wasecne ainingte kwele-madic bafuwayelewec. <sup>12-13</sup> Yesu Kristo, ye Wapong feicnetowa nga Asa-baba ngicnonggeng, yedi tapili nga hibi-angocka kwesilu fikelu yegengkeadaicte. Ilec ailu wangec galu kwele-angacka gagabeleng. Inguc gaebengka Wapongte kwele-madicti yefe wedunoleme yanguctihac himongtowa yagolec aibaba nga angac lobe holecnodabeleng. Inguc ailu gaganonggeng damongnagulu yefe dondonne balaibelu Wapong alang bacnolu gadabeleng. <sup>14</sup> Aime Yesu Kristodi yefe-yowa wewele muckacni lukecnubanale, yeuctihac ngabafocine yengele molewa lonaguwec. Ailu suwec-nubame nongileng yeicne ngic-ngigac ailu bole madicne mamang hidulu banangte aibaba yogo ainolewec.

**1:13:** 2Tim 4:2    **1:14:** 1Tim 4:7    \* **1:15:** Poldi yanguc miwec, nosing nonole aka monic mi fagac. Aime gocne yengibac yanguc miibong, nosing gocne yogo akaineholec. Mareko 7:19, Roma 14, nga Depec-baba 11-15 yogolec fungine nga ngage-ngage iwa kwelengkeicne fagac.    **1:16:** 1Yoa 1:6; 2:4    **2:3:** 1Tim 3:11    **2:5:** Efs 5:22    **2:7:** 1Tim 4:12    **2:8:** 1Pi 2:15    **2:9:** 1Tim 6:1    **2:12-13:** 1Yoa 2:16    **2:14:** Gal 1:4; Wah 19:5; Yef 4:20; 7:6; Esek 37:23; 1Pi 2:9

<sup>15</sup> Ga yowane yogo balu kwelengineng kwefangkelu ngelengkelu edocebadamec. Ga yowa sasawa yogo tapili geleicne, yogolec silicina edocebadamec. Aime monicti gale ngageme wawaine mi aidaic.

### 3

#### *Ung-yowa*

<sup>1</sup> Ga yowa yanguc hole-gboliyelu edocebadamec, ngic-ngigac yenge gamangfocngineng nga damongfocngineng yengele yowa ngagelu balaibelu bole madicne banogale dameng-soc efeckelu gadabiyeng. <sup>2</sup> Ailu yenge monic misulec mi aicnodaing. Yenge kwele-mogungkolec ulucne galu ngic-ngigac sasawa yengele umac ngage-motolu kwele-madic aibaba aiyeledabiyeng. <sup>3</sup> I yangucte, nongileng inguchac molickelu ngage-ngage-motoc mikac galu yowa kwebeng gocne yengi kwesacka mengocnubabong yefe liloibeng. Aime sisipilic aibaba nga angac haicine monic-monic yogodi hefecnubawec. Nongileng kweledacka gocne yengele hasowac ngagelu gaibeng. Ailu kweledi wicnubabong ingucnehac wicebaibeng. <sup>4</sup> Aime sifu Wapong Asa-baba ngicnonggeng, yele baba-madicne nga aibaba madicne yegena fikelu yegengkewec. <sup>5</sup> Dameng iwa yedi suwecnubame Tili Asudi bole bame fike-fike gbolicne fikeibeng. Ye nongilengti bole dondonne baibengte ailu mi bamadicnubawec. Ye nongileng kwele-sowac ngagelu bamadicnubame wasecne aibeng. <sup>6</sup> Aime yedi Asa-baba ngicnonggeng Yesu Kristo yele ailu Tili Asu umacnehac sotingkenolewec. <sup>7</sup> Sotingkenolelu kwele-madicinele ailu dondonne wacnubame gagabeleng. Inguc galu mole-damocnonggeng yogo gaga moto-motoine mikac, yogo banangte ngagesilu wangec gagabeleng. <sup>8</sup> Yowa yogo nalic ngagepangkegabeleng.

<sup>9</sup> Lec yowa yogo tapiliineholec edocebalu weduyelecte ngagegabac. Inguc aiyengka ngic-ngigac Wapong ngagesingkelu gagaing, yenge aibaba madicne yogo wosaelu ainingte bocyac aiyeledaic. Bole ingucne yogo madicne ailu ngic-ngigac yengele babaficngineng aigac. <sup>10</sup> Aimebac ngic-ngigac gocne yenge yowa silicine madicne miyac yowanginengti fec-wacineholec micaigaing. Ailu ngesa-ngambo yengele fikesawecte fung kwelu yefeyowale yowa gocne fagac, yogolec yowanginengti fec-wac aime ngaba aicaigaing. Ga yowa ingucne ngagelu lobe holecnolu hegiledamec. Yowa ingucne yogo babaficine mikac nga yogodi noine monic mi bafuwadaicte. <sup>11</sup> Gulu-kwoc ngic monicti kwesime dameng moniyang ung-yowa edoengka mi ngageme, edong alecine yaeckang aidaic. Aime yowagone mi ngagemebac hegileng yeicnac gadaic. <sup>12</sup> Ngic ingucne ye yefe lilolu bikic bafuwalu yeuctihac yowawa lonagulu mimoctocnagugac.

#### *Yowa moto-motoine*

<sup>12</sup> Na Ateamas me Tikikus gala salebe fume ga nala Nikopolis taonka sanangkelu biyac kwesidamec. Na tilo-gbelong damengka iwa ganogale biyachac ngagesiiba. <sup>13</sup> Apolos nga gamangte yefe-yowale ngic wacine Senas, yeke yefele wiyac monicte mi kpungkenicte, ga babafic sanangnehac aiyetelu salecepang hikedabiyec. <sup>14</sup> Aime ngic-ngigacfocnonggeng socte gagale noine mi bafuwadaingkale, yenge inguchac ngic-ngigac umacngineng nganilu aibaba madicne ailu baficebaningte yefe weduyeleng ngagedaing. <sup>15</sup> Ngic-ngigac naholec gagabeleng, yengi wenac-madicngineng gala lobong fugac. Aime ngic-ngigac Wapong ngagesingkelu nongele kwele-angac ngagegaing, yenge nongele wenac-madicnonggeng edocebanong.

Kwele-madicti sasawa ngegela fadaic. Yogo foinac.



## **Poldi Filemon Yele Hibi Kwelengkewec**

### *Mimi-yegeng yowa*

Filemon ye ngic monic woc-wiyacine homacneholecti Kolosi taonka gawec. Ye Yesu ngagesingkeme Yesule habu yenge yele macka kpaduckeibong. Ailu ye Pol agoine gawec. Filemon yele kwelec kwekweine monic, wacine Onesimus, ye Filemon hegile hikelu Pol bafuwawec. Bafuwame Poldi Yesule siduc edome ngagesingkelu ye bafickewec.

Filemon nga Onesimus yeke ngaba ingucne gaiboc. Inguc gaboc Poldi baficepanogale hibi yago kwelengkewec. Yesu homackacni gboliyelu honocmengka feme hifa 32 ngama ingucne motome, hibi yago kwelengkewec.

### *Hibile molic-molic yowa*

<sup>1</sup> Na Poldi Kristo Yesule siduc mibe yegengkeme muc-macka locnubong ngiyegabac. Ailu ngic hae-gbanonggeng Timoti, noki hibi yago lobec Filemon gala fugac. Ga bole moniyangnonggeng aime kwelenonggecti gale angac ngagelu gagabelec. <sup>2</sup> Sengnonggeng Afia nga Sugucne bole-baba ngic agononggeng Arkipus, ye nga Yesule habu Filemonte macka kpaduckeicaigaing, hibi yago ngengele momoc logabelec. <sup>3</sup> Mamacnonggeng Wapong nga Sugucnenonggeng Yesu Kristo, yekele kwele-madic nga kwele-mogungtowadi ngengela fadaic.

### *Kwele-madic yowa*

<sup>4-5</sup> Filemon, ga Sugucne Yesu ngagesingkelu Wapongte bingec sasawa yengele kwele-gonedi angac ngageyelecaigic, gale siduc inguc ngagecaigabac. Ilec ailu mimilocna gale ngagelu damengsoc Wapong kwele-madic edolu gagabac. <sup>6</sup> Ga ngage-ngagesingka nongeholec momoc taockelu Kristoholec wetackelu gagabeleng. Ilec Kristole wiyac madicne sasawa bagabeleng, yogo sasawa gagi ngage-motocete milockeicaigabac. <sup>7</sup> Ngic hae-gbane, kwelegonedi Wapongte bingec yenge ago bacebalu angac ngageyelelu kwelengingeng hole-gboliyecaigamec. Yengela inguc nganiibale aibabagone yogodi basanangnume homacne-hac beliyegabac.

### *Onesimus*

<sup>8</sup> Ilec ailu Kristoholec wetacke galu bole geleicne yogo badamecte, na ngagelu ung-yowa yogo nalic edocgudacte. <sup>9</sup> Aime sifu kweledi angac ngagegelelu aibaba madicna domalu yowa ulucnedi sanangne milocgudacte. Aime na Pol, ngic dandangngine yanguctihac Kristo Yesule ailu muc-macka gagabac. <sup>10</sup> Na madecne monic yele yowale sanangne milocgudacte. Na muc-macka galu Yesule siduc micnobe ngagesingkeme mamacinele silic ingucne fikelu gaiba, wacine Onesimus.\* <sup>11</sup> Ye esecne molickelu gaholec gawec, iwa mi baficgulu gawec. Nga yakumacbac ga nga na nokilec momochac baficnupalu gadaicte. <sup>12</sup> Naneicne kwelene salegabac ingucne ye salebe gala hefaliyelu fudaicte. <sup>13</sup> Siduc Madicnele ailu muc-macka gaebewa, yedi gale mac balu naholec yawa galu baficnudecka ingucne, yogo nalic aidec inguc ngageiba. <sup>14</sup> Aime gagi mi miyengka nani ye kwelenele sebilebe hegiledameckale ailu, hegileiba. Aime nale angacte miyac, geicne angac balaibelu aibaba madicne ainelecte salebe fudaicte.

### *Kwelec kwekwe ngic*

<sup>15</sup> Onesimus ye ngage-ngagesingkolec agogone gaholec mac-fung ganogale mecne molickelu hegileguwec. <sup>16</sup> Hegilecgulu kwelec kwekwe ngic silicka hatacmac mi kwesidaicte, miyac. Ye yakumac ngic hae-gbanonggeng kwele-angacka gacaigac. Na yele ingucbenang ngagegabac. Aime yedi gale kwelec kwekwe aigac. Nga ngage-ngagesingka Sugucnele ailu ye momochac ngic hae-gbagone aigac, aibaba yogo wiyac feicne. <sup>17</sup> Ilec ailu ga ngageng nokilec ago-ago aigabelecka, Onesimus fudaicte, ye inguchac nani fube na aineledameckalesoc silicine ingucnehac yele angacgume badamec. <sup>18</sup> Aime yedi yefe ewalilu wiyacgone monic basowalewecka, me yele tofa monic gala fagacka, yogo sasawa hegileng nale wacka fadaic. <sup>19</sup> Na Pol neicne molenedi hibi yago kwelengkegabac. Na tofa yogo ameine badugeledacte. Aime na Yesule siduc milu edocgube ngagesingkeing. Ilec geicne gagale amegone nala fagac, yogolec yowabac mi migabac.

### *Bole aling nga wenac-madic*

**1:2:** Kol 4:17; 2Tim 2:3    **1:7:** 2Kor 7:4    **1:10:** Onesimus wacine fungine yogo babaficneholec.    **1:10:** Kol 4:9; 1Kor 4:15    **1:16:** 1Tim 6:2

<sup>20</sup> Ga foinac ngic hae-gbane, Sugucnenonggeng Kristole ailu na baficnung kwelene hole-gboliyedaic. <sup>21</sup> Aime yowa ngagelu balaibedamecte yogo fagac, yogo ngagepangkelu hibi yago kwelengkegelegabac. Aime Onesimusle migabac, yogo gagi taockelu hatacmac aidamecte, yogo ngagegabac.

<sup>22</sup> Ailu monic yanguc ngagesilu wangec gagabac, ngengele mimilocnginengte ailu muc-mackacni bamoctocnubong ngengele fudacte. Ilec nale mac kweline monic bamockedamec.

<sup>23</sup> Na Epafasholec noke momoc Kristo Yesule ailu muc-macka gagabelec, yedi gale wenac-madic lome fugac. <sup>24</sup> Ngic naholec galu bole momochac bacaigabeleng Mareko, Aristakus, Demas nga Luka, yenge inguchac wenac-madicngineng lobong fugac. <sup>25</sup> Sugucnenonggeng Yesu Kristole kwele-madicti asunginang fadaic. Yogo foinac.

## Hibru Yengele Hibi

### *Mimi-yegeng yowa*

Hibi yago Yuda ngic-ngigac yengele kwelengkeyelewec. Yuda ngic-ngigac yengele yowa wacine nga wacngineng esecne yogo Hibru wackeibong. Ngic kwelengkewec, wacine mi ngagegabeng. Ye Yuda ngic monic Yesu ngagesingkewec.

Dameng iwa Yuda ngic-ngigac gocne yenge Yesu ngagesingkeibong. Ngagesingkelu doic ngagebong weyebic aiyelelu basowalecebaibong. Basowalecebabong Yesule gaga yogo hegilelu yefe-yowa esecne hatac balaibenogale ngagesiibong. Inguc ngagesibong ye Yesule fungine kwelengkeyelelu kwelengineng basanangkeyelewec.

### *Yowa yago hibi nebcina fagac*

- 1:1–3 Kristodi Wapongte yowa mime yegengkegac
- 1:4–2:18 Kristodi angelo ewaligac
- 3:1–4:13 Kristodi Moses nga Yosuwu ewalicepagac
- 4:14–7:28 Kristodi depec-baba ngic ewaligac
- 8:1–9:28 Kristole dodofic gbolicnedi dodofic esecne ewaligac
- 10:1–39 Kristole depecti depec esecne ewaligac
- 11:1–12:29 Ngage-ngagesingi sugu bamadicebalu gagac
- 13:1–25 Aibaba madicne nga wenac-madic yowa

### *Madec ye wiyac sasawale Sugucne*

<sup>1</sup> Esecnebenang Wapongti yowaine siduc-mimi ngicfocine yengele micka lowec. Yogo dameng bocyac yefe haicine monic-monicka weduyelewec. Yowa yogo yengi ngam-bofocnonggeng yenge edocebalu gaibong. <sup>2</sup> Aime yanguctihac dameng moto-motoina gagabelangka, ye yowaine Madecinele micka lome yedi yowa edocnubawec. Himongka nga sawawa ailu honocmengka wiyac sasawa fagac, yogo Wapong Madecinele molewa lome yeholec bafuwaiboc. Aime mole-damocinele wiyac sasawa yogo Madecinedi banale micnowec. <sup>3</sup> Aime Madec ye yeuctihac Wapongte tapili nga hibi-angoc. Ailu yeke silicnginec moniyang aigaic. Aime Madec ye yowaine tapilineholec ailu yowa yogodi wiyac sasawa himongka nga sawawa ailu honocmengka fayackegac, yogo bafuwayackewec fagac. Ailu ye ngic-ngigac sasawa nongileng bikic suweyackelu bole bamoctolu honocmengka Ngictau tapilineholec yeke foleinapec iwa fewec ngiyegac.

### *Angelo yengele Sugucnengineng*

<sup>4</sup> Madec ye angelo sasawa yengele sugucnengineng. Ailu ye wac sugucnehac mole-damocte alingka bawec, wacine yogodi angelo yengele wac sasawa ewalicebagac. <sup>5</sup> Aime Wapongti angelo monic yanguc mi edocebawec, “Na yakumac mibe yegengkeme edocgugabac, ga nale Madec nga na gale Mamac.” (*Mige 2:7*)

Ailu ye angelo monicte ngagelu yanguc mi miwec,

“Na yele Mamac, aime yedi nale Madec aidaicte.” (2Sm 7:14; 1Ngt 17:13)

<sup>6</sup> Ailu ye molic-molic Madecine himongtowa yagowa ganale mengockelu kwesiwec, dameng iwa yanguc miwec,

“Wapongte angelo sasawa yenge ketadi holecnolu afeedabiyeng.” (Yef 32:43)

<sup>7</sup> Ailu angelo yengelebac yanguc miwec,

“Ye angelofocine bole-yowa edocebalu gbelong ingucne salecebame yengi dac-ubilang ingucne yowaine balu hikelu ye kwelec kwecnodaingte.” (Mige 104:4)

<sup>8</sup> Ailu Madecinele ngagelu yanguc miwec,

“Wapong, gale ngictau bole yogo moto-motoine mikac fafeginowagac. Ailu ngictau tapiligonele wacine yogo pasi dondonne.

<sup>9</sup> Ga ngic-ngigac yengele gaga dondonnele angacgucaigac. Nga yefe-yowa wecaigaing, yogobac kwelegonedi hegilecaigic. Ilec ailu na Waponggonedi, gale Wapong milu ga bawosaecgugac. Ailu belic-belicte helocti hosocgume gale belic-belic yogodi agofocgone yengele ewaligac.” (Mige 45:6-7)

<sup>10</sup> Ailu Wapong Mamac ye hatacmac Madecinele yanguc miwec,

“Oc, Sugucne, molickelu himongte kwesing loing. Ailu sawawa wiyac fayackegac, ga yogo sasawa molegonedi bafuwayackeing.

- <sup>11</sup> Yenge miyac aiyackedaingte nga gabac gagidamecte. Yenge sasawadi ngakpi ingucne lokeyackelu miyac aidaingte.
- <sup>12</sup> Gagi honocmenga wiyac fagaing, yenge ngakpi ingucne weducebadamecte. Ailu ngic-ngigac yengi ngakpi-kpoluc baickelu gbolicne holecaigaing, ga yogo ingucnehac esecne baicebalu gbolicne lodamecte. Ailu ga damengsoc silic moniyang ingucnehac gadamecte. Aime gale hifa-dameng yogo moto-motoine mikac.” (*Mige 102:25-27*)
- <sup>13</sup> Aime Wapongti angelo monic yanguc mi edowec,  
 “Ga folenapec ngiyeengka ngabafocgone yenge hige gone bageina locebabe ngiyedaingte.” (*Mige 110:1*)
- <sup>14</sup> Angelo sasawa yenge asu ailu bole balu gagaing. Aime ngic-ngigac bikicte ameine bame mole-damocine baningte wangec gagaing, angelo yengi yogo yengele kwelec kwenogale Wapongti salecebacaigac.

## 2

### *Wapongte yowa lobe mi holenoga*

<sup>1</sup> Ilec ailu yefe lilolu gadabelengtewa, yowa sasawa yogo ngage-motolu balu gadabeleng. <sup>2</sup> Mosesle damengka angelodi ye yowa edoibong, yogo sanangnehac loicne fawec. Inguc fame Israel ngic-ngigac yenge yowa yogo hegileibong ailu mi balaibebong, yenge bikicnginengte silicina ameine dondonne baibong. <sup>3-4</sup> Aime Sugucnedi hatacmac bikicte ameine banale tapiliine feicnebenang edocebawec. Yedi molickeme yowaine ngageibong, yengi yogolec yowa mibasanang ailu edocnubaibong. Aime Wapong yeuctihac yowaine basanangkeme ngagesingkeningte pasi damuineholec nga pasi mi ngani-nganiine ailu pasi bibiineholec bawec. Balu angacine balaibelu Tili Asule kwele-efecte tapili nolelu gawec. Ye inguc aiwecte nongileng bikicte ameine banale yowa hegiledabelengtewa, wiyac yogolec ameinele hangoc nalic mi hikedabelengte.

### *Yesu ye feicnetowanonggeng*

<sup>5</sup> Himongtowa himong gbolicne fikenale yowaine micaigabeleng, yogo angelo yengele bagewa mi loicne. <sup>6</sup> Aime hibiwa yowa monic yanguc biyachac miwec,  
 “Gagi himongka ngic-ngigacfocgone gabong ngagesicebacaigic. Aime yenge waweweine gabong sifu madicne damongebacaigic. <sup>7</sup> Dameng bangkacnemac angelo yengele wamicne ainogale gagi locebaengka gaibong. Ailu yenge alang-baba nga wac feicneholec gagale duu ingucne holeyeleing. <sup>8</sup> Aime Wapongti wiyac sasawa yele higeinele bagewa loyackewec.” (*Mige 8:4-6*)

Yedi wiyac sasawa yogo yele higeinele bagewa bucbuchac lome damongebaibong. Aime yanguctihac wiyac ngani-damongte pasi yogo mi fikeme nganigabeleng. <sup>9</sup> Aime nongileng Yesu nganilu yanguc ngagegabeng, Wapongti pasi bame Yesu ye dameng bangkacnemac angelo yengele wamicne gawec. Game Wapongti kwele-madic ainolewecte Yesu ye ngic-ngigac sasawa nongileng amenonggeng balu doic ngagelu homawec. Ilec ye tapili nga wac feicne ailu alang balu gacaigac. <sup>10</sup> Wapongti wiyac sasawa bafuwayackewec aime ye yogolec fileine. Ailu ye adu-madecfocine bocyac mengocebame wac feicneholec ainingte bikicte ameine banale molic-molic ngic doicka lowec. Lome ye yeicne socti doic ngagelu boleine bamoctome gagaine bucbuchac madicne aiwec. Yedi inguc aiwecte Wapong adu-madecfocine yenge wac feicne yogowa nalic gadaingte. <sup>11</sup> Yesudi gbagbacne gagale suwe-suwe bole balu gagac. Aime ngic-ngigac gbagbacne gagale suwecebame gagaing, ye nga yengileng gbagbacne ailu aling moniyang gagaing. Ilec ailu ye yeicne kwa-gbafocine minogale mi gameedaicte. <sup>12</sup> Ye yanguc migac,  
 “Na gale wac sugu ngic hae-gbafocne edocebalu mibe yegengkeyedaicte. Ailu habu hewacnginang domalu mitenggudacte.” (*Mige 22:22*)

<sup>13</sup> Ailu hatacmac yanguc migac,

“Na yele yowa balaibedacte.”

(*Yes 8:17*)

Ailu hatacmac migac,

“Ngagegailing, Wapongti adu-madec nelewec, yenge naholec yagowa gagabeleng.” (*Yes 8:18*)

<sup>14</sup> Aime Aleng Sugucnengineng ye homacte tapili bacaigac. Aime Yesudi ye nga homac basowalecepanale homawec. Wapong adu-madecfocine nongileng soc-biucnonggengkolec, aime ye silic ingucnehac soc-biuckolec aiwec. Inguc aiwecte ailu Aleng Sugucnengineng basowalewec. <sup>15</sup> Aime nongileng gaganonggeng bucbuchac homacte hangocnubame muc ingucne bacnubacaigac. Aime ye soc-biuckolec aiwecte

ailu nongileng homacte hangoc yogolec muckacni lukecnubawec. <sup>16</sup> Foinacbenang, ye Abraham ngambofocine nongileng baficnubalu gagac. Ye angelo inguc mi baficebacaigac, miyac. <sup>17</sup> Ye bikicte amenonggeng banogale ailu wiyac sasawa ngageme gbafofocine nongileng silicbenang ailu monic mi lilowec. Ye inguc ailu ngic-ngigac nongileng kwelesowac aiwec. Ailu bole-yowa balaibelu Wapongte haicka ngic-ngigac nongileng depecbaba ngic yengele damong sugucne aiwec domagac. <sup>18</sup> Ye yeicne lokwesacka felu doic ngagewec. Ilec ye ngic-ngigac lokwesacka fecaigaing, yenge baficebanogale aicaigac.

### 3

#### *Madecti Moses ewaligac*

<sup>1</sup> Ngic-ngigac Wapongte bingec, ngenge ngic hae-gbafofocne, ngenge honocmengte wawacti ngengela inguchac kwesiwec. Ilec ngenge ngage-ngagengineng Yesula lod-abiyeng. Yedi hocne salecebaicne nga depec-baba ngic yengele damong sugucne aigac. Aime nongileng yele wac mibeng yegengkeme gagabeleng. <sup>2</sup> Moses ye Wapongte bole-yowa balaibelu Wapongte macka yowaine ngagelu gawec. Aime Wapongti Yesu bole-yowa lacnome yedi Mosesle silic ingucne ailu bole-yowa yogo balaibelu gawec. <sup>3</sup> Macbaba ngicti mac sugucnehac bacaigac. Ailu yeicne wacti mac wacine ewaligac. Silicine ingucnehac Yesudi Moses ewalime nongileng yele alang bagabeleng. <sup>4</sup> Macbenang sasawa yogo ngicti baicne nga Wapongtibac wiyac sasawa bafuwayackewec. <sup>5</sup> Moses ye Wapongte macka kwelec kwekwe galu Wapongte bole-yowa balaibelu gawec. Inguc gawecte ailu yowa lobewa fikenale miwec, yogo mime yegengkewec. <sup>6</sup> Aime Kristo ye Wapongte Madec galu bole-yowa balaibelu yele mac-damong gagac. Aime nongileng hangoc mikac honocmengte wiyac badabelengte, yogo wiyac feicne inguc ngagelu sanangnehac balu wangep gadabelengtewa, Wapongte mac hocne aigabeleng.

#### *Ngage-ngagesing mi hegilenoga*

<sup>7</sup> Ilec ailu Tili Asudi yanguc migac,  
 “Entacka ngenge yakumac yele yowa ngagegaingka, <sup>8</sup> kwelengineng mi hefedaing. Ngambofocnonggeng yenge molickelu himong kisiwa misaine mikacka yowa kwekwe ainelelu kwesacnubong, yogo ingucnehac hatacmac mi aidabiyeng. <sup>9</sup> Yenge nani hifa 40le kwelina bole balu gaiba, yogo nganilu na kwesacnulu gaibong. <sup>10</sup> Aime ngic-ngigac dameng iwa gaibong, yengele aalic ngagelu yanguc miiba, ‘Yenge kwelenginengti damengsoc yefe lilolu gacaigaing ailu nale yefe fagac, yogo balaiben- ingte mi ayelecaigac.’ <sup>11</sup> Ilec na aalic ngagelu mipangkelu yanguc miiba, ‘Yenge nale ngiye-ngagec gagawa nalic mi fedaingte.’”  
 (*Mige 95:7-11*)  
<sup>12</sup> Ngic hae-gbafofocne, ngengelacni monicti kwele ngage-ngageina ngage-ngage sowacne ofeme ngage-ngagesing hegilelu Wapong gaga fileine lobe holecnodaickale, ngenge nganimotolu gadabiyeng. <sup>13</sup> Wapongte hibidi “yakumac” inguc migacte ngenge hadengsoc kwelengineng kwefangnagudabiyeng. Bikicti ngengelacni gocne kwesac ayeleme kwelengineng hefedaingka, ngenge inguc aidabiyeng. <sup>14</sup> Nongileng molic-molic momoc galu Kristo sanangnehac ngagesingkelu gaibeng. Aime silicine yogo balu gabeng dameng moto-motoine fikeme sanangnehac domadabelengtewa, Kristoholec wetackelu domadabelengte. <sup>15</sup> Aime hatacmac yowa yanguc miicne fagac,  
 “Entacka ngenge yakumac yele yowa ngagegaingka, kwelengineng mi hefedaing. Ngambofocnonggeng yenge molickelu yowa kwekwe aineleibong, ingucnehac hatacmac mi aidabiyeng.”  
 (*Mige 95:7-8*)  
<sup>16</sup> Ngagegaing, Mosesdi Isip himongkacni ngic-ngigac mengocebame hikeibong. Hikelu yenge sasawadi Wapongte yowa ngagelu hegileibong. Ailu aibaba haicine monic-monic aibong. <sup>17</sup> Ailu yenge yowaine kwelu bikic bafuwaibongte, yedi hifa 40le kwelina ngaba ayeleme himong kisiwa misaine mikacka iwa homayackeibong fagaing. <sup>18</sup> Ailu ye ngic-ngigac yele yowa hegileibong, yenge sugu ngiye-ngagec gagawa mi feningte mipangkewec. <sup>19</sup> Aime yanguc ngani-motogabeleng, yenge mi ngagesingkeibong. Ilec ailu yenge himong miwec, iwa mi fedaingte.

### 4

#### *Ngaye-ngagec bafuwanoleidaicte*

<sup>1</sup> Wapongti ngiye-ngagec gagawa fenangte mipangkewec, yogo fagac. Aime gacgu ngengelacni gocnedi fenogale kpungkedaingka, ngenge damong balu gadabiyeng. <sup>2</sup> Esecne Yuda ngic-ngigac yenge Siduc Madicne ngagebong yegengkeyelewec,

nongileng ingucnehac yogo ngagebeng yegengkenolewec. Aime yenge yogo ngagelu mi ngagesingkeibongte mi baficebawec. <sup>3</sup> Aime ngic-ngigac ngagesingkelu gagabeleng, nongilengtibac ngiye-ngagec gaga yogolec aling aigabeleng. Wapongti himong nga sawa yeke bacepame motome, wiyac sasawa bamoctoyackelu ngiye-ngagec gaga yogo lowec.

Ye inguc lolu sifu yanguc miwec,

“Ilec na yengele aalic ngagelubac yanguc mipangkeiba, ‘Yenge nale ngiye-ngagec gagawa nalic mi fedaingte.’”

(Mige 95:11)

<sup>4</sup> Hadeng 6 motome hadeng 7te yowa fagac, yogolec yowa monic yanguc kwelengkeicne fagac,

“Hadeng 6 motome Wapong ye boleine sasawa loyackelu 7ka ngiye-ngagewec.” (Fike 2:2)

<sup>5</sup> Aime iwahac yowa yogolec nebcina yanguc miwec,

“Yenge nale ngiye-ngagec gagawa nalic mi fedaingte.”

(Mige 95:11)

<sup>6</sup> Ngic-ngigac gocne yenge ngiye-ngagec gagawa nalic fedaingte. Aime gocne yenge molickelu Siduc Madicne ngagebong yegengkwec, yenge yowa mi balaibeibong. Ilec ngiye-ngagec gagawa mi fedaingte. <sup>7</sup> Ilec ailu dameng dalicnehac aime Wapongti hat-acmac dameng monic wacine “yakumac” inguc mipangkelu yowa Dawidi lacnome yedi hocne yanguc miwec,

“Entacka ngenge yakumac yele yowa ngagegaingka, kwelengineng mi hefedaing.” (Mige 95:7-8)

<sup>8</sup> Yosuwadi ngiye-ngagec himongka mengocngebalu fedeckabac, Wapongti lobewa ngiye-ngagec dameng monicte nalic mi midec. <sup>9</sup> Ilec yanguc ngagegabeleng, Wapongte ngic-ngigac yengele hombangte ngiye-ngagec dameng yogo fagachac. <sup>10</sup> Aime Wapongti boleine lolu ngiye-ngagewec, silicine ingucnehac monic ye Wapongte ngiye-ngagec gagawa felu boleine lolu ngiye-ngagedaicte. <sup>11</sup> Aime Mosesle damengka molickelu aling gocne yenge waweibong, nongilangkocni monicte yenge ingucne yowa wewe aidaingkale, nongileng ngiye-ngagec gaga iwa fenangte ngagelu bole sanangnehac balu gadabeleng.

#### *Wapongte yowa gagainholec*

<sup>12</sup> Wapongte yowa yogo gagainholec ailu boleine damengsoc balu gagac hocne. Yogo hudule fitec sasawa micine nebc nga nebc yogo ewalicebalu mictetecinebenang aigac. Yogodi nongiac sasawa nganime dulungkelu nebocka hike sulumecaigac. Yogo asu nga kwele-ilucnonggeng heucepalu luwe gbongtoc nga luwe kwelina helocine nganicepaigac. Ailu kwelenonggang ngage-ngage nga aibaba sangkelu balu gagabeleng, yogo wosaelu noine bame yegengkenolecaigac. <sup>13</sup> Aime Wapongti wiyac sasawa mime fikeyackewec, yogolec wiyac monicte yele haicka sangke-sangke mi fagac. Wiyac sasawa yogo yegena fikelu yele donge feina fayackegac. Ailu yela hocne gaganonggengte siduc babeng yogo wosaeyackedaicte.

#### *Yesu ye depec-baba ngic yengele damong sugucne*

<sup>14</sup> Aime depec-baba ngic yengele damong sugucnedi honocmengka fewec gagac, yogo Yesu hocne, Wapongte Madec, ye nongileng. Ye inguc gagacte ngage-ngagesingnonggeng mibeng yegengkecaigac, yogo ngagelu sanangnehac balu gadabeleng. <sup>15</sup> Lokwesac fikenolecaigac, silicine ingucnehac depec-baba ngic yengele damong sugucne ye ingucnehac fikecnoyackewec. Ailu ye bikic monic mi bafuwawec. Ilec nongileng tapilinnonggeng wame ye ngani-ngagec aiyackelu nongilengte kwele-sowac ngagelu gagac. <sup>16</sup> Ilec nongileng hangoc nga ngageboc mikac galu Wapong emeina hikedabeleng. Inguc aime babafic damengbenang kwesime yele kwele-sowac bafuwabeng yedi kwele-madicine noleme baficnubadaicte.

## 5

<sup>1</sup> Wapongti Israel yengele depec-baba ngic yengele damong sugucne ngickacni basawaelu mimoctocaigaic. Mimoctome, yedi ngic-ngigac yengele ailu Wapongte haicka domalu boleine balu kwele-madicte ibu nga bikicte hasocte depec locaigac. <sup>2</sup> Ailu depec-baba ngic ye yeicne tapiliine mikac gacaigac. Ilec ngic-ngigac ngage-ngage-motocngineng mikac yefe liloaigaing, yenge nalic madicne ayeleadaicte. <sup>3</sup> Ye tapiliine mikacte ailu yeicne nga ngic-ngigac yengele bikicte hasocte depec momoc bacaigac, yogo ngic-ngigac yengele sugu miyac. <sup>4</sup> Ailu ngic monicte depec-baba ngicte damong sugucnele mac ngiye-ngiye yogo yeicne kweleinele nalic mi badaicte. Wapongti Aron wackelu depec-babale damong sugucne bole-yowa lacnowec. Silicine ingucnehac Wapongti depec-babale damong sugucne sasawa wacebalu bole-yowa yelecaigac. <sup>5</sup> Aime Kristo ye inguchac yeutihac

depec-baba ngic yengele damong sugucne ainogale ailu wactowaine mi bafewec, miyac. Wapongti yeke yanguc miwec,  
 “Na yakumac mibe yegengkeme edocgugabac, ga nale Madec, nga na gale Mamac.” (*Mige 2:7*)

<sup>6</sup> Ailu monicka yanguc kwelengkeicne fagac,  
 “Gagi Melikisidek yeke silic ingucne depec-baba ngic moto-motoine mikac gagingowagic.” (*Mige 110:4*)

<sup>7</sup> Yesu ye himong-sockolec galu yanguc milockewec, “Gagi sugu homackacni nalic bag-boliyecnudamecte. Ilec bacifnudamec.” Inguc wacke-wasic aicnolu sugucnehac aukwelu hiyalu milockewec. Ailu ye Wapong alang bacnolu yowaine balaibelu gawecte Wapongti mimilocine ngagewec. <sup>8</sup> Yesu ye Madecinebenang. Ailu ye sifu doic ngagewecte yowaine balaibelu gagale pasi bawec. <sup>9</sup> Ailu ye doic ngagewecte madickewec. Yedi inguc aime ngic-ngigac yenge Yesule yowa ngagelu balaibeibongte ailu Yesudi aiyeleme wasecne ailu gaga moto-motoine mikac gagingowagic. <sup>10</sup> Inguc aime Wapongti yeke yanguc miwec, “Gagi Melikisidek yeke silic ingucne depec-baba ngic yengele damong sugucne gagingowagic.”

#### *Kogoc ingucne mi ganoga*

<sup>11</sup> Melikisidek yeke yowa bocyac fanolegac. Aime ngenge yowa ngageningte kwelenging fongkecaigac. Ilec edocngebalu wedungelenogale ngagebeng kpfungkegac. <sup>12</sup> Ngenge dameng dalicne biyachac ngage-ngagesingkolec galu wewedu hole biyachac babong madickedec. Aime sifu yanguctihac monicti ngengela kwesilu Wapongte yowa funginacni-hac hatacmac edocngebalu wedungelenogalesoc aigac. Ngenge nosing sanangne nonolesoc mi aigaing, ngenge amucte sugu aingelegac. <sup>13</sup> Aime ngic monic ngage-ngagesingkolec gagac, ye kogoc amuckacni gagaing, yenge ingucne gagac. Ye gaga dondonnele yowa mi ngage-motogac. <sup>14</sup> Nosing sanangne yogo ngic-ngigac biyachac sugulelu sanangkeicne yengele. Aime ngic-ngigac ingucne yenge ngage-ngageningte dameng dalicne biyachac yeuckelu aibaba wenidi madicne me sowacne, yogo wosaelu ileckelu gagaing.

## 6

#### *Nongileng sugulelu sanangkedabeleng*

<sup>1-2</sup> Ngenge molickelu Kristole yowa fungke-fungkeine yanguc wedungeleibeng, kwele-hefaliyec ailu homacte aibaba hegilenoga ailu Wapong ngagesingkenoga. Ailu misalowacte wewedu haicne monic-monic, nga moledi ngic feina lolole bole. Ailu homackacni gboliyelu fangke-fangke nga dac-sanangka doic moto-motoine mikac ngagenoga. Yowa fungke-fungkeine yogo hatacmac mi minoga. Yowa yogo macte bosong ingucne hatacmac wickebeng haume yogo mi madickedaicte. Yogolec feina gbolicne kpatulelu minoga. <sup>3</sup> Ilec Wapongti ngageme nalic aidaictewa, inguc aidabelengte.

<sup>4</sup> I yangucte, ngic-ngigac gocne yenge angoc biyachac yekeicne. Aime honocmengete kwele-madicte nosing nganilu Tili Asuholec biyachac aibong. <sup>5</sup> Ailu yenge Wapongte yowa esockebong angacine aiyemewa lobewa Wapongte tapili fikedaicte, dameng yogo inguchac nganiibong. <sup>6</sup> Aime ngic-ngigac yogo nganilu wawelu lobe holedaingtewa, yenge hatacmac kwele-hefaliyecte nalic mi bacebadaicte. Yogobac yenge Wapongte Madec yegen misulec aicnolu malicpongka hatacmac wecaigaing.

<sup>7</sup> Himong monicka macti dameng bocyac kweme bolewa misa fikeme ngic-ngigac yenge iwa nosing duwebong noine fikeyeleme yanguc midaingte, himong yogowa Wapongte liwe fagac. <sup>8</sup> Aime himong monicka muc somangineholec nga tembang-haseng fikedaictewa, himong yogo boleine mikac aime hole-duwec mi ainoga. Aime dameng bangkaleme dacti lobeme miyac aidaicte.

#### *Ngenge mole-damocngineng badabiyeng*

<sup>9</sup> Agofocne kwelenedi ngengele angac ngagegabac, ngenge ngic-ngigac ingucnedi wasecne aigaing, wiyac madicneholec aigaing, yogo hocne ngagepangkelu gagabeleng. Inguc ngagepangkelu sifu ung-yowa migabeleng. <sup>10</sup> Wapongti yefe dondonna yowa nga aibabangineng wosaedaicte. Ngenge bole bacaigaing ailu kweledi yeke wacte angacnge-bacaigac, ye yogo nalic mi ngigeckedaicte. Ailu ngic-ngigac Wapongte bingec yogo ngenge ngani-bacif aiyeleibong. Ailu taockelu aiyelelu gagainghac, ye yogo ingucnehac nalic mi ngigeckedaicte. <sup>11</sup> Aime ngenge ngageboc mikac galu wiyac fikengelenale ngagesingkelu wangep gagaing. Ailu ngenge yogo filesoc filesoc banogale mamang hidulu bole balu gabong dameng moto-motoine kwesidaicte. Ngenge inguc ganingte ainolegac. <sup>12</sup> Ilec ngenge oyong mi gadabiyeng. Ngic-ngigac ngage-ngagesing sanangnehac tatakic mikac

balu gacaigang, yenge mole-damocngineng Wapongti molickelu baningte mipangkewec, yogo badaingte. Nenge inguc ailu yengele silic ingucnehac balaiabedabiyeng.

*Noine fikedaicte*

<sup>13</sup> Wapongti mipangkulu Abraham wiyac lobewa lacnodaicte. Ailu yele Sugucne monic mi gawecte ye yeicne wacine wackelu yanguc milu mipangkewec,

<sup>14</sup> “Foinacbenang, na mimi-madic milu edocgudacte, aime fikesawecgone sawedaic.” (*Fike 22:16-17*)

<sup>15</sup> Aime Abraham ye dameng dalicnehac wangec gawec. Ailu kweleinele tapili mi wame galu Wapongti wiyac lacnonale mipangkewec, yogolec noine fikeme nganiwec.

<sup>16</sup> Aime ngic-ngigac yenge yowangineng mibong sanangkenale sugucnengineng wackelu yowangineng mibong sanangkecaigac. Yenge inguc aidaingtewa, yowa mife-miwa aibabangineng yogo motoyackedaicte. <sup>17</sup> Aime Wapongti inguchac yowaine mipangkeme sanangkewec. Ailu Abraham ngambofocine yengela yowaine monic-mi monic-mi mi aiwec. Yenge yogo ngagelu dodofic tapiliine momochac ngage-motoyackeningte inguc miwec. <sup>18</sup> Ye inguc milu yowa sanangnehac yaeckang bafuwanolewec. Wapong ye yowaine kwesac nalic mi aidaicte. Aime yowa yaeckang yogo mimipang nga yeicne wacine wackeme inguc fawec.\* Aibabaine ingucne ngagebeng yogodi umacnehac basanangnubame himongte wiyac nalic hegilelu mimipang lobewa banangte miwec, yogo sanangnehac balu wangec gagabeleng. <sup>19</sup> Aime Wapongti mimipang banangte edocnubawec, yowa yogodi kwelengngengte angga ingucne aigac. Mimipang yogodi yele mac gbagbacne iwa felu kpoluctowa luluwackelu kweline gbagbacnebenang iwa sanangnehac fagac. <sup>20</sup> Aime Yesu ye nongileng ailu yogolec kwelina molickenolelu fewec. Ye Melikisidek yele silic ingucne depec-baba ngic yengele damong sugucne moto-motoine mikac gagingowagac.

## 7

*Melikisidek yele fungine*

<sup>1</sup> Melikisidek ye Salem taonte ngictau. Ailu Wapong feicnetowa yele depec-baba ngic gawec. Aime Abraham ye ngictau gocne yengeholec wenagulu wehomacebaweckacni hefaliyelu kwesime, yedi Abraham yefewa bafuwalu mimi-madic milu edowec. <sup>2</sup> Edome Abrahamti woc-wiyacine sasawa huduwacni bawec, iwacni 10kacni moniyang heuckelu Melikisidek lacnowec. Aime Melikisidek yele wacinele fungine yogo yanguc, “Gaga dondonnele ngictau.” Ailu hatacmac “Salem taonte ngictau” yogolec fungine “kwele-mogungte ngictau.” <sup>3</sup> Ailu ye nenggac-mamac nga ngesa-ngambofocine yengele wacalingineng monic mi kwelengkeicne fagac. Nga ye fike-fike damengngine mikac ailu ye homac damengngine mikachac, ye Wapongte Madecte silic ingucnehac ailu depec-baba ngic damengsoc gagingowagac.

<sup>4</sup> Aime ngambonongeng Abraham ye yeicne wiyacine huduwacni bawec, yogo 10kacni heuckelu moniyang lacnowec. Ilec nenge ngani-motodabiyeng, Melikisidek ye ngic feicnetowa. <sup>5</sup> Aime Liwai nga ngic hae-gbafocine yenge Abraham ngambofocine. Liwai ngambofocine yenge fikesawec ailu depec-babale bole balu ganingte Wapongte ung-yowa baibong. I yangucte, Liwai ngambofocine yenge 10kacni moniyang yogo Liwai hae-gbafocine yengele ngambofocineng yengelacni bakpaduc aidabiyeng, yefe-yowadi inguc migac. Aime ngic-ngigac yogo yenge Abraham ngambofocine. Ailu sac-tofafocineng galu sifu yengelacni 10kacni moniyang balu gaibong. <sup>6</sup> Aime Melikisidek ye yengele alingcacni mi fikewec, miyac. Ailu ye sifu Abrahamtacni 10kacni moniyang balu mimi-madic milu edowec. Abrahamti hocne Wapongte mimipang balu gawec. <sup>7</sup> Aime ngic mimi-madic milu edowec, yedi mimi-madic bawec, ye ewaligac. Monicti yowa yogo kwesac mi midaicte.

<sup>8</sup> Ailu monic yanguc, depec-baba ngic homacte bagewa gagaing, yenge 10kacni moniyang kpaduckelu balu gaibong. Nga Abrahamtibac 10kacni moniyang yogo Melikisidek lacnome bawec, yedibac gagachac hocne, inguc yegengkegac. <sup>9-10</sup> Aime yowa yanguc nalic midabelengte, Melikisidek ye Abrahamti yefewa wiyac lacnowec, dameng iwa Liwai ye ngamboinele kwelewa biyachac ngiyewec. Liwai ngambofocine yenge 10kacni moniyang babale ngic, aime Abrahamti 10kacni moniyang yogo biyachac balu Melikisidek lacnowec, yogo Liwai ngambofocine yengungtihac lacnoibong ingucne aigac.

*Depec-baba ngic noine*

**6:14:** Fike 12:1-3; 13:14-18; 15:1-21; 17:1-27; 18:1-15; 22:1-18 \* **6:18:** Fike-fike 12:7; 13:15; 15:1-21, iwa Wapongti Abrahamkolec yowa milu hefewec. Ailu Fike-fike 22:16-17 iwa ye yowaine mipangkewec. Ilec yowa sanangne yaeckang kwelengkeicne fagaic. **6:18:** Him 23:19 **6:19:** Dep 16:2-3 **7:1:** Fike 14:17-20 **7:5:** Him 18:21



<sup>11</sup> Aime Israel ngic-ngigac yenge yefe-yowa baibong, iwa yanguc fawec, Liwaile aling yenge depec-babale bole badabiyeng. Aime yenge depec-babale bole babong wiyac sasawa madickededeca, Wapongti depec-baba ngic gbolicne monic hatacmac fikenale monic mi mided. Aime yanguc fikedaic, depec-baba ngic gbolicne Melikisidek gawec, silicine ingucnehac fikedaic. Ailu ye Liwai ngamboine Aronte aling kacni fikeibong ingucne miyac. <sup>12</sup> Aime depec-babale bole aling gbolicne fikedaictewa, yefe-yowa gbolicne inguchac fikedaic, yefe monic mi fagac. <sup>13-14</sup> Sugucnenonggeng ye Yudale fikesaweckacni fikewec, yogo ngagegabeleng. Aime Yudale aling, yengelacni monicti depec-baba ngic ainale, Mosesdi monic mi miwec, miyac. Aime Yudale fikesaweckacni monicti alata mi nganidamong ailu gawec.

*Melikisidek yele silic*

<sup>15</sup> Aime Sugucnenonggeng ye Yudale fikesaweckacni fikelu gawec. Aime Melikisidek ye depec-baba ngic gawec, silicine ingucnehac ye depec-baba ngic aiwec. Yogodi hatacmac mime yegengkegac, Liwaile aling yengele depec-babale bole yogo andoine miyac. <sup>16</sup> Depec-baba ngic ye sac aling moniyangte kwelina balaibelu fikedaic, yefe-yowadi yogo migac. Aime Sugucnenonggeng ye gaga moto-motoine mikac yogolec tapiliwa depec-baba ngic aiwec. <sup>17</sup> Yele ngagelu yowa yanguc mime yegengkeicne fagac, "Gagi Melikisidek yele silic ingucne depec-baba ngic moto-motoine mikac gagingawec."

*(Mige 110:4)*

<sup>18</sup> Ung-yowa tapiliine waicne nga babaficine mikac yogo molickelu kwesiwec. Ailu yowa yogodi pasi molickelu bawec, yogo baickeme moc fawec. <sup>19</sup> Yefe-yowadi baba-madic bole bucbuchac madicne monic mi bawec, miyac. Aime Wapongti yanguctihac yefe madicne monic bafuwanolewec, yogodi molickelu yefe fawec, yogo ewaligac. Aime nongileng yefe yogo balaibelu Wapongte emewa hikelu gadabelengte.

<sup>20</sup> Wapong ye yowaine basanangkelu Yesudi depec-baba ngic ainale mipangkewec. <sup>21</sup> Depec-baba ngic Liwaile aling kacni yengele baba-sanang yowa ingucne monic mi fawec. Ye yogo Yesu micnolu yanguc edowec, "Sugucne ye yowaine basanangkelu yanguc miwec, 'Ga depec-baba ngic moto-motoine mikac gagingawec.' Ye yowaine inguc mime sanangkewec, yogo nalic mi hegiledaicte."

*(Mige 110:4)*

<sup>22</sup> Wapongti Yesule inguc mime sanangkewec. Ilec ailu Yesudi dodofic gbolicne yogolec nenggac ngiyegac. Inguc ngiyeme dodofic gbolicnedi esecnele tapili ewaligac.

<sup>23</sup> Depec-baba ngic Liwaile aling kacni yenge ngic bocyac. Aime homacaigangti bole yogo balu ganingte homacti depec-babale bole yogolec aka aiwec. Ilec ailu monic homame monicti depec-babale bole yogo taockeme taoc balu gaibong. Ailu yakumac bacaigaing. <sup>24</sup> Aime Yesudibac moto-motoine mikac gagingawac. Ilec depec-babale bole yeholec moto-motoine mikac ailu fagingawac. <sup>25</sup> Ye gaga-sanang galu Wapongkolec mingagec ailu baficnubame ganogac ngic-ngigac yela yefe Wapongta hikedabelengte. Nongileng sasawa bikicte ameine banale nalic mi kpungkedaicte.

<sup>26</sup> Aime depec-baba ngic yengele damong sugucne yedi hocne nalic baficnubadaicte. Ye gbagbacne nga bikicine mikac, ailu wonong mikac. Wapongti ye ngic bikic-baba yengele hewackacni baickeme ye wiyac sawawa fagac, yogo ewalicebalu wileng gagac. <sup>27</sup> Aime depec-baba ngic yengele damong sugucne Liwaile aling kacni yenge hadengsoc yengileng bikicte depec lolubac ngic-ngigac yengele bikicte lobe lolu gaibong. Aime Yesudibac aibaba yogolec bagewa mi gawec, miyac. Yebac depec milu yeicne lonaguwec. Ailu ye yogo damong moniyang sugu bame motowec. <sup>28</sup> Foinac, Wapongte yefe-yowadi ngic tapilingineng waicne bole-yowale wacebalu gagac. Ailu depec-baba ngic yengele damong sugucne ailu gacaigaing. Aime yowa sanangne fikewec, yogodi Madec bole-yowa micnome ye mac ngiye-ngiyeine balu tapili-wawa mikac nga madicne moto-motoine mikac fafeginowagac iwa gagac.

## 8

*Depec-baba ngic yengele damong sugucne bole balu gagac*

<sup>1</sup> Ilec ailu yanguc fagac, depec-baba ngic yengele damong sugucne honocmengte Ngictau ngiye-ngiye, yogolec foleinapec mac ngiye-ngiyeine balu ngiyegac, ye nongileng. <sup>2</sup> Ailu ye mac gbagbacne, yogo kpoluc-fale\* noine honocmengka domagac, iwa bole balu gagac. Kpoluc-fale yogo ngicti mi baicne, miyac. Sugucne yeuctihac yogo balu lowec.

7:13-14: Yes 11:1; Mat 2:6; Miye 5:5

7:19: Hib 9:9

7:21: Hib 5:6

7:22: Hib 8:6; 12:24

7:25: Rom 8:34

7:27: Hib 5:3

\* 8:2: Esecne himongka Mosesdi kpoluc-fale bafangkewec. Yogolec lobeina Solomonti Ibu-mac bame kpoluc-fale mi aiwec.

<sup>3</sup> Wapongti depec-baba ngic yengele damong sugucne yenge bole-yowale wacebame kwele-madicta ibu nga bikicte hasocte depec locaigaing. Ilec ailu Yesu Kristodi inguchac depec monic lodaicte. <sup>4</sup> Depec-baba ngic yenge Wapongte yefe-yowa balaiabelu Wapong ibu lacnoningte bole yogo biyachac balu gaibong. Ilec ye himong yagowa gadecka depec-baba ngic nalic mi aidec. <sup>5</sup> Mosesdi kpoluc-fale balu bafangkenogale aime, Wapongti sawang-yowa yanguc milu edowec,

“Na tikiwa sosocine edalicguiba, ga silicine yogobenang balaiabelu wiyac sasawa banogale ngani-motolu badamec.”

(Wah 25:40)

Aime ngic yakumac mac gbagbacna afeelu kwelec kwecaigaing, yenge Moses ingucne ailu honocmengte sosocine balaibelu kwelec kwecaigaing.

### *Dodofic gbolicne*

<sup>6</sup> Yesu ye dodofic gbolicnele ngic hewacine, dodofic yogo yowa mipangkeicne tapili-ineholec balu gagac. I yangucte, dodofic gbolicnedi dodofic esecne ewaligac. Ailu yele depec-babale bole, yogodi himongte depec-babale bole inguchac ewalidaicte. <sup>7</sup> Dodofic esecne umacine mikac aidecka midec, dodofic gbolicne monicti yele mac nalic mi badec.

<sup>8</sup> Aime Sugucne Wapongti ngic-ngigac focine nganicebame bikicnginengkolec aibongte ailu yanguc miwec,

“Ngagegaing, gacgu dameng monic kwesidaicte, iwa na Israel nga Yuda ngic-ngigac yengeholec dodofic gbolicne monic badacte. <sup>9</sup> Dodofic yogo molickelu ngambocngineng yengeholec baiba, ingucnehac miyac. Dameng iwa nani molenginang balu Isip himongkacni mengocebalu kwesiiba. Yenge dodofic baiba, yogo hegilelu gaibongte nani inguchac yenge hegilecebalu lobe holeyeleiba.”

Ye hatacmac inguc taockelu miwec,

<sup>10</sup> “Na lobewa dodofic gbolicne Israel ngic-ngigac yengeholec badacte, yogolec silicine yanguc. Yefe-yowane yogo ngic-ngigac yengele ngage-ngagewa lolu hibine yogo kwelenginangbenang kwelengkedacte. Ailu nani Wapongngineng gabe yenge ngic-ngigac focne gadaingte. <sup>11</sup> Aime dameng iwa ngic-ngigac kpicnacni ofecgu sugucna motodaicte, yenge sasawadi ngagecnudaingte. Ilec ailu monicti agoine me ngic hae-gbaine monic ‘ga Sugucne ngagesinong’ inguc mi edolu weducnodaicte. <sup>12</sup> Na kwele-sowac aiyeledacte. Aime yenge aibaba sowacne nga bikic bafuwagaing, yogo sasawa hegilelu hatacmac mi ngagesidacte.”

(Yer 31:31-34)

<sup>13</sup> Ye dodofic gbolicne monicte miwec, iwa dodofic molickelu bawec, yogo esecne aigac, inguc mime yegengkewec. Aime wiyac monic biyachac hegileicne yogo esecne aigac, yogo dameng kpicnemas falu miyac aidaicte.

## 9

### *Kpoluc-fale kweline*

<sup>1</sup> Dodofic molickelu kwesiwec, yogolec afec-afec yowaine nga yefe-yowaine fawec. Aime kpoluc-fale gbagbacne himongka yawa faweac. <sup>2</sup> Aime kpoluc-fale kweline molic-molic fawec, yogolec wacine Kweline Gbagbacne. Aime kweline molic-molic iwa hifa higeineholec domalu gawec. Ailu tebo monic domawecka bret Wapongte bingec feina loicne ngiyelu gawec. <sup>3</sup> Aime kpoluc monic hewacina domawec, nebocina kweline monic fawec, kweline yogo wacine Gbagbacnebenang. <sup>4</sup> Iwa hasoc hoine madicne lobe-lobele alata goldi baicne nga dodoficte katapa domaiboc. Dodoficte katapa yogo goldi lolu bakatakeicne. Ailu yogolec kweline hebec goldi baicne mana nosingkolec lobong ngiyelu gawec. Aronte yasu gidicine weicne nga dodoficte posa-tafe iwa inguchac lobong ngiyelu gawec. <sup>5</sup> Katapa yogolec feina angelo ilucine ingucne wiyac monic yeke Wapongte tapili nga hibi-angoc edaliiboc. Ailu kwenggelengnginecti tapaina hedicckelu someckelu domalu gaiboc. Wapongti iwa hocne bikicnginengte ameine hegilelu gawec. Aime kpoluc-fale nga wiyac sasawa kwelina fagac yogolec yakumac yowa homacne yanguctihac mi midacte.

<sup>6</sup> Yenge kpoluc-fale ngani-nganiine inguc balu gabong depec-baba ngic yenge mac kweline molic-molic iwa ngi afeelu kwelec kwecnolu gaibong. <sup>7</sup> Aime depec-baba ngic yengele damong sugucne yedi sugu mac kweline monic iwa hifasoc alicne moniyang sugu felu gawec. Ailu ye moc mi felu gawec, miyac. Ye damengsoc sac balu felu yeicne bikic nga ngic-ngigac yenge bikic fungine mi ngagelu moc kosa balu gaibong. Yogolec ailu ibu lonogale bafelu gaibong. <sup>8</sup> Aime dameng iwa Tili Asudi yanguc edalicnubagac. Kpoluc-falele aibabaine faemewa Kweline Gbagbacnebenang iwa ngic-ngigac yengi feningte yefeine monic mi fikelu yegengkedaicte. <sup>9</sup> Ngic-ngigac yanguctihac afeelu kwelec kwekwe

gagaing, yenge yogolec sosocine ingucne aigac. Yenge Wapongte kwele-madicte ibu nga bikicte hasocte depec bafelu locaigaing. Aime yogodi yengele kwele ngage-ngagingeng sasawa bucbuchac nalic mi suweyedaicte. <sup>10</sup> Aime bole yogo nosing misa nolu nga suwe-suwele aibaba haicine monic-monic yogo socte bole sugu bacaigaing. Wapongti yefe-yowa yogo yeleme, yenge yogo balaibelu gacgubong gaga gbolicne monicte dameng kwesiwec.

*Kristo ye depec-baba ngic yengele damong sugucne*

<sup>11</sup> Aime Kristo ye biyachac kwesilu wiyac sasawa madicne yawa fagac, yogolec depec-baba ngic yengele damong sugucne aiwec. Inguc ailu kpoluc-fale monic madicnebenang moledi mi baicne ailu himongkacni wiyac monicte mi baicnedi domawec. Yogo sugucne nga madicne ailu esecne ewali-benangkegac. <sup>12</sup> Kristo ye noning ngicne me bulumaka madicinele sac balu mi fawec, miyac. Ye yeicne sacti dameng moniyang sugu ibu balu Kweline Gbagbacnebenang, iwa fewec. Felu yeicne sacti fulinonggeng bawec, sac yogodi fafa-sanang faginowagac. <sup>13</sup> Ngic-ngigac yenge Wapongte haicka wonongkolec aibong depec-baba ngic yengi noning me bulumaka ngicne yengele sac nga bulumaka ngicne madec mi baicne dacti lobeceame defe ailu gaibong. Aime sac nga defe yogo balu ngic-ngigac wonongnginengkolec yengele feinginang wickebong kpaluwacebalu gawec. Kpaluwacebame motome ngic-ngigac yenge Wapongte haicka sockapec gbagbacne ailu gaibong. Ilec ailu yanguc ngagedaing, <sup>14</sup> Kristo ye gaga-sanangte Tili Asuholec domalu yeicne dondone ailu gagaine depec ingucne Wapongta loyackewec. Yele sacti bulumaka nga sic sacngineng sasawa ewaligac. Yogodi kwele ngage-ngagenonggeng suweyackeme homacte aibabanonggeng sowacne miyac aime Wapong gagaineholec afelelu kwelec kwec-nodabengte.

<sup>15</sup> Kristo yeicne gagaine loyackelu homalu fulinonggeng balu dodofic esecne yogolec bagewacni baicnubawec. Baicnubame nongileng dodofic esecne yogolec yefe-yowa hegileibeng. Kristo ye dodofic gbolicnele ngic nga Wapong nongileng ngic hewacnggeng aiwec. Wapongti mipangkeme ngic-ngigac wacnubalu gagac, nongileng gaga-sanangte mole-damoc yogo banangte Kristodi inguc aiwec. <sup>16</sup> Mole-damocte hibi monic fadaictewa, yanguc ainoga, fileine ye homame yogo mibong yegengkadaicte. <sup>17</sup> Fileine ye gbolicne gaemewa mole-damocte hibi kwelengkeicne yogo moc fadaicte. Nga fileinedi homadaicte-wabac, mole-damocte hibi yogo sanangkedaicte.

<sup>18</sup> Ilec ailu dodofic esecne yogo sacti basanangkewec. <sup>19</sup> Aime Mosesdi ung-yowa yefe-yowawa fagac, yogo sasawa ngic-ngigac milu edocebame motome, bulumaka madicine nga noning ngicne sacngineng balu misaholec lalickewec. Lalickelu lama dowecine sasacne hisop yoc hekengineholec\* balu sacka kpomuluckewec. Kpomuluckelu yogodi hibi kpadidiweicne ailu ngic-ngigac sasawa feinginang wickeme kpaluwacebalu gawec. <sup>20</sup> Kpaluwacebame yanguc edocebawec,

“Sac yago dodoficte sac. Ailu ngenge dodofic kwelina ganingte Wapongti ung-yowa edocngebawec.”

(Wah 24:8)

<sup>21</sup> Aime Moses ye kpoluc-fale feina nga kwelina ailu hasocte depec lolole wiyac haicine monic-monic ngiyewec, yogo inguchac sacti sotiyeme sasawa lowacebayackewec. <sup>22</sup> Inguc aime yefe-yowale aibabawa sacti wiyac bame gbagbacne aidaicte. Nga sac monic mi wadaictewa, bikic hegile-hegile monic mi fikedaicte.

*Kristo ye depec noine*

<sup>23</sup> Himongka kpoluc-falewa wiyac fagac, yogodi mac gbagbacne honocmengka fagac, yogolec sosocine aigac. Aime yogodi Wapongte haicka gbagbacne ainogale depecte sacti suwelu gaibong. Aime wiyac noine honocmengka fagac, yogo gbagbacne ainale depecte sac madicne nga feicnebenangte fagac. <sup>24</sup> Kristo ye kpoluc-fale gbagbacne moledi baicne ailu wiyac noine fagac yogolec sosocine aigac, mac iwa mi fewec, miyac. Yedi nongilengte ailu Wapongte haicka domanale honocmeng noina fewec. <sup>25</sup> Aime depec-baba ngic yengele damong sugucne ye hifasoc sic sacine balu Kweline Gbagbacnebenang, iwa felu gawec. Aime ye ailu gawec, Kristo ye yogo ingucnehac mi aiwec. Ye dameng bocyac depec banagulu fenogale mi fewec.

<sup>26</sup> Kristodi inguc ganogale midecka, ye himong nga sawawa wiyac sasawa molickelu fikeibockacnihac dameng bocyac sacine wame doic ngagedec. Ailu ye inguc mi aiwec, miyac. Ye dameng motonogale aiyemewa himongtowa yagowa dameng moniyang sugu fikewec. Fikelu ngic-ngigac bikicnonggeng baickenale Wapongta yeicne socine mimoc-tolu lome depecte boleine bayackewec. <sup>27</sup> Aime ngic-ngigac sasawa dameng moniyang

9:9: Hib 10:1-2    9:13: Dep 16:15-16; Hib 10:4; Him 19:9,17-19    9:14: 1Pi 1:18-19    \* 9:19: Hisop yogo yoc monic hekengngine sanangnedi lucmefiyangkolec. Hisop yogo sifecka yoc hekengngina fagac.    9:21: Dep 8:15,19  
9:22: Dep 17:11    9:23: Hib 8:5; 10:1    9:26: Hib 10:10

sugu homanangte miwec. Ailu lobewa gagu yowawa domadabelengte. <sup>28</sup> Yogo inguc-nehac Kristodi dameng moniyang sugu ngic-ngigac sasawa nongileng bikicte ameine banogale ailu depecnonggeng aiwec. Ailu lobewa kwesidaicte, iwa bikicte ame banale mi kwesidaicte. Dameng iwa ngic-ngigac Kristole wangec gagaing, yengela fikeme wasecne aidaingte.

## 10

### *Tapiliine faginowagac*

<sup>1</sup> Wiyac madicne lobewa kwesidaicte, Wapongte yefe-yowa yogo wiyac yogolec sosocine aigac, yogodi wiyac noine mi aigac. Inguc aime ngic yenge hifane hifane Wapong afeelu kwelec kweningte yele emewa kwesilu depecngineng silicine moniyang sugu lolo gaibong. Aime yogodi yefe-yowale tapiliwa yenge sasawa nalic mi bamadicebadaicte. <sup>2</sup> Yefe-yowadi yenge sasawa bamadicebadecka midec, yengela depec lolo yogo biyachac miyac aidecka. Ailu bikicngineng biyachac miyac aime yenge kwele ngage-ngageningeng gbagbacne galu bikicnginengte umacte ailu hatamac mi gamebadec. <sup>3-4</sup> I yangucte, bulumaka ngicne nga noning ngicnele sacti bikic baic-baictesoc mi aigac, miyachbenang. Yogolec ailu depecte hasoc hole-holele aibaba yogodi hifasoc bikicngineng hole-gboliyeme ngagesilu gaibong.

<sup>5</sup> Ilec ailu Kristodi himongka walu yogolec ngagesilu Wapong yanguc edowec, “Ga kwele-madicté ibu nga bikicte depec haicine monic-monic, yogolec mi aigelelu gawec. Gabac himong-soc monic bamockelu noleing. <sup>6</sup> Aime ngic-ngigac yenge lama-bulumaka bucbuchac bikicnginengte depec balu dacka lobong lobecaigac, depec yogo yekele mi angacgudaicte. <sup>7</sup> Inguc aime yanguc miiba, ‘Wapong, ngagegic, na gale angac balaibenogale kwesiiba ailu hibi kpadidiweicnele kwelina nale aibabale kwelengkeicne fagac.’” (Mige 40:6-8)

<sup>8</sup> Hasocte depec sasawa yogo Wapongte yefe-yowa balaibelu locaigaing. Aime Sugucnedibac yowa yanguc miwec, “Kwele-madicté ibu nga bikicte depec haicine monic-monic nga lama-bulumaka bucbuchac bikicnginengte ailu dacka lobecaigac, yogolec mi aigeledaicte. Ailu yogolec mi angacgudaicte.” <sup>9</sup> Inguc milu yanguc miwec, “Ngagegic, na gale angac balaibenogale kwesiiba.” Inguc milu yedi yefe gbolicne basanangkenogale yefe esecne yogo baickeme moc fawec. <sup>10</sup> Yesu Kristodi nongilengte ngagelu angac yogo balaibelu socine bahikelu dameng moniyang sugu depec lome yefe iwa gbagbacne aibibeng gagabeleng. <sup>11</sup> Depec-baba ngic yenge hadengsoc domalu depec-babale boleningeng bacaigaing. Ailu yenge depecte silicine yogohac damengsoc damengsoc bacaigaing, yogodi ngic-ngigac bikicngineng baic-baictesoc mi aigac. <sup>12</sup> Aime depec-baba ngicnonggeng Kristodi bikic baicnele depec moniyang sugu tapiliine moto-motoine mikac, yogo Wapongte foleinapec lome ngiyegac. <sup>13</sup> Aime Wapongti ngabafocine yele higeinele bagewa locebadaicte, ye yogolec wangec ngiyegac. <sup>14</sup> Yedi depec moniyang sugu lome ngic-ngigac sasawa bamadicebame yenge gaga gbagbacne moto-motoine mikac bame gaginowagaing.

<sup>15</sup> Aime Tili Asudi inguchac mibasanang ailu yanguc edocnubawec, <sup>16</sup> “Sugucnedi yanguc migac, ‘Na lobewa dodofic gbolicne ngic-ngigac focne yengeholec badacte, yogolec silicine yanguc. Yefe-yowane yogo ngic-ngigac yengela ngagenagewa lolu, hibine yogo kwelenginangbenang kwelengkedacte. <sup>17</sup> Ailu bikicngineng nga yefe-yowa wewengineng yogo sasawa hegiledacte. Ailu hatamac mi ngagesidaicte.’” (Yer 31:33-34)

<sup>18</sup> Aime Sugucnedi bikicnonggeng hegileme miyac aiwecte, bikic baic-baicte depecte bole yogo hatamac mi banoga.

### *Ngage-ngagesingkolec nalic fenoga*

<sup>19-20</sup> Ngic hae-gbafocnonggeng, Yesu yeicne sacte tapiliwa nongileng hangoc mikac galu kpoluc nu falockelu Kweline Gbagbacnebenang iwa nalic fedabelengte. Yedi yefe gbolicne nga gagaineholec laliyenolewec. Ilec ailu kpoluc nuwa yefe hikegabeleng, yogo yeicne socti yefe yogo hocne nolewec. <sup>21</sup> Depec-baba ngic feicnetowanginengti Wapong golowac-focine damongnubalu gagac. <sup>22</sup> Aime nongileng molickelu kwele ngage-ngagenonggeng gameineholec ailu mi madickecaigac. Aime yedi yogo wickeme kpaluwacnubame gbagbacne fagac. Aime socnonggeng misa gbagbacnedi suweme gbagbacne aibibeng. Ilec ailu nongileng kwelengnonggeng noine yogodi gaganonggeng wosae-benangkeme ye bucbuchac ngagesingkelu Wapongte emewa hikedabeleng. <sup>23</sup> Sugucne mole-damoc nolennale yowa mipangkewec, ye yowaine yogo balaibedaicte. Aime yogo nongilang fikenalé wangec galu mibeng yegengkegac, yogo sanangne balu gadabeleng. <sup>24</sup> Aime kwele-angac nga

aibaba madicne ainangte nongileng ngani-damong aiyelelu basanangebalu gadabeleng. <sup>25</sup>Ngic-ngigac gocne yenge kpaduckeningte hegilecaigaing, yogo mi aidaing. Damengtowa bangkalegac, nenge yogo biyac ngagegaingte basanangebalu gadabeleng.

*Sugucne hegiledaingkale damongnagudabiyeng*

<sup>26</sup>Nongileng yowa noinele ngage-ngage balu ngage-motolubac bikicte aibaba hatacmac angacnubame balu gadabelengte, me? Entacka inguc aidabelengtewa, nongileng bikicte ailu depec monic hatacmac nalic mi lodaicte. <sup>27</sup>Umactowanonggeng hangocineholec yogo Wapongte ngabale wowosae damengka dactowa monicti lobelu basowalenale wangc-nonggeng fagac.

<sup>28</sup>Monicti Wapongte yefe-yowa Mosesdi kwelengkewec, yogo weme, ngic yaeckang me habackang yenge yogo nganilu yowawa lobong, ye kwele-sowac mikac wehomalu gaibong. <sup>29</sup>Aime dodoficte sacti ngic monic biyachac suweme gbagbacne aiwec, ye lobewa sac yogo ngageme wiyac omane aiwec. Aime Wapongte Madecte feiwa nolac edelu kwele-madicte Asu misowaledaictewa, yela ameine efecne mi fikecnodaicte, yogo ngagegaing. <sup>30</sup>Aime

“Sowacnele ameine badu-badu, yogo nale bole. Aime na ngic-ngigac bikicnginengte ameine baduyeledacte.” (Yef 32:35)

Sugucnedi yowa inguc miwec, yogo ngagegabeleng. Ailu ye hatacmac yanguc miwec, “Sugucnedi ngic-ngigacfocine wosaecbalu yowangineng midaicte.” (Yef 32:36; Mige 135:14)

<sup>31</sup>Wapong gagaineholecte molewa fenoga, yogo hangocineholec nga umacineholecbe-nang.

*Sanangkelu gadabeleng*

<sup>32</sup>Nenge molickelu Yesule angoc baibong, dameng iwa Siduc Madicnele ailu boletowa balu doic ngageibong, yogo mi ngigecngებადაი. <sup>33</sup>Ailu ngic yengi dameng gocna ngic-ngigac yengele haicka locngebalu midelec nga yowa gameineholec ailu weyebic aingeleibong. Aime dameng gocna ngaba yengi ngengele agofocngineng inguc aiyelebong, ngengi ago aiyelelu yengeholec domaiibong. <sup>34</sup>Nenge muc-macka ngic yengeholec momochac doic ngageibong. Aime ngic yengi gocne ngengelacni muc-macka locebaibong. Ailu ngaba gocne yengi ngengelacni moneng-mafangineng hise baibong. Inguc aibong nenge beliyelu yanguc ngageibong, moneng-mafanonggeng faginowagac yogodi himongtowa yagolec moneng-mafa ewaliyackegac. <sup>35</sup>Ilec nenge hangoc mikac gadabiyeng. Gacgu aibaba yogolec fuline sugucnehac bafuwadaingte. <sup>36</sup>Nenge tatakic mikac gadaingte-wabac, madickedaicte. Yogodi baficngebame nenge Wapongte yowa balaibelu mole-damocngineng mipangkewec, yogo badaingte.

<sup>37</sup>Aime dameng bangkacnemac fagac, yogo motome, “Ngic kwesinale miwec, ye dameng monic mi wickedaicte, miyac. Ye biyachenang kwesidaicte. <sup>38</sup>Ngic-ngigacfocne dondonne gagaing, nenge ngage-ngagesingkolec gaginowagaing. Aime ngengelacni monicti lobe holecnudaictewa, nani yele ngegabe mi madickedaicte.” (Hab 2:3-4)

<sup>39</sup>Nongileng ye lobe holecnolu sowalenangte aling miyac. Ngage-ngagesingkolec galu gbelong ailu asunonggengkolec gaga-sanangka fedabelengte.

## 11

*Ngage-ngagesingte fungine*

<sup>1</sup>Wiyac monic fikenolenale sanangnehac ngagesilu gagabeleng, yogo dongedi mi nganilu sifu ngagebeng noine aigac, aibabanonggeng yogolec wacine ngage-ngagesing. <sup>2</sup>Ngic-ngigac esecne gaibong, yenge ngage-ngagesingkolec gaibongte ailu Wapongti mibasanang aiyelelu madicne wacebawec.

<sup>3</sup>Wiyac dongedi nganicaigabeleng, yogo wiyac dongedi mi ngani-nganiinacni fikeibong. Wapong ye yowa mime himong nga sawa yago fagaic, yogo fikeiboc, yogo ngagesingkeibengte ngage-motogabeleng.

*Ngage-ngagesingkolec ngic-ngigac*

<sup>4</sup>Abel ye ngagesingkewecte Wapongte depec lobewec, yogodi Keinte ibu ewaliwec. Ewalime Wapongti yele depec nganilu ngageme madickeme ngic dondonne wackewec. Abel ye biyachac homawec. Ailu sifu yele ngage-ngagesingte yowaine miwec yogo fagachac.

<sup>5</sup> Enok ye ngagesingkewecte monic mi homawec. Aime Wapongti ye moc sugu baickeme fewec. Ye mi feemewa Wapongti yele yanguc miwec, “Na yele ngagebe madickegac.” Inguc milu Wapongti ye baickeme ngic-ngigac yenge ye basackeibong, ailu monic mi bafuwaibong.

<sup>6</sup> Aime monic ye Wapongte emewa hikenogale ngagegacka, ye yanguc ngagesingkelu hikedaic, Wapong ye gagac hocne aime ngic-ngigac ye wackelu basackeicaigang, yenge ameine madicne yeledaichte. Nga monic ye ngage-ngagesingngine mikac gacaigacka, Wapongti yele ngageme mi madickedaihte, miyabenang.

<sup>7</sup> Ngic-ngigac yenge misa sugucne kwesinale umacine fikewec yogo mi ngani-motoibong, Wapongti Noa sawang-yowa inguc edowec. Edome Noa ye yowaine ngagesingkewecte alang bacnolu wage monic bawec. Inguc bame yeicne nga golowacifocine umackacni olocebame wasecne gaibong. Ye ngagesingkewecte himongte ngic-ngigac yengele aibaba sowacne bame yegengkeme, Wapongti sowacnenginengte ailu yowawa locebawec. Ye ngagesingkewecte ngic dondonne yengele mole-damoc bawec.

<sup>8</sup> Wapongti Abraham wackeme yele yowa ngagesingkewecte ye balabelu yeicne himongngine hegilelu himong monicka hikenogale ngageme mi kpungkewec. Himong Wapongti lacnonale miwec, yogodi mole-damocine aiwec. <sup>9</sup> Wapongti himong lacnonale yowa mipangkewec, ye Wapongte yowa ngagesingkewecte hikelu kwilic-ngic ingucne gawec. Galu kpoluc-faleine bame domawec. Aime Aisak nga Yakobo yeke aibaba yogohac ailu gaiboc. Yeke Abrahamkolec dodoficte himong yogo balu gabong yogodi mole-damocngineng aiwec. <sup>10</sup> Wapong yeuctihac taon sanangne esecne molickelu bafuwawec, yogo fafeginowagac. Aime Abraham ye kwilic galu taon yogolec wangec gawec.

<sup>11</sup> Ailu ye ngic dandangngine aiwecte gboli nalic mi bafuwadaichte. Aime Sara ye inguchac ata dandang kogoc-baba damengngine biyachac miyac aiwec. Abraham ye Wapongte yowa ngagesingkelu gawecte madec monic kwefickewec.† Wapong ye yowaine mipangkelu yogo balabeladaichte hocne, ye inguc ngagesiwec. <sup>12</sup> Ilec ailu ngic ye homanogale aiwec. Aime kogoc nalic mi bafuwadaichte, yelacni sifu ngambofocine bocyac fikelu saweibong. Ngambofocine yogo yenge sawawale asocmeng nga kiwecka dingong ingucne aiibong, yogo ngicti dzalengineng nalic mi wafenoga.

<sup>13</sup> Ngage-ngagesingkolec ngic-ngigac molickelu gaibong, yenge hocne Wapongte yowa ngagesingkelu homaibong. Aime Wapongti himong yagohac yengele himong mipangkewec, yogo monic mi bafuwayelewec. Yenge wiyac dalickahac fame fulucke nganibong angacineholec aime yanguc mibong yegengkewec,

“Nonge himongka yawa dameng kpisicnemac kwilic gagabeleng.” (Fike 23:4)

<sup>14</sup> Aime ngic-ngigac yowa silicine ingucne micaigaing, yenge yengileng himong bafuwanogale babasac bole gabagong yegengkegac. <sup>15</sup> Ailu yenge himongngineng esecne molickelu gaibong ailu hegileibong, yogo ngagesidabongka midec, yenge nalic hatamac hefaliyelu hikedabong. <sup>16</sup> Aime himong monicti himong esecne ewaligac, wacine honocmeng, yenge himong yogolec aiyelewec. Ilec ailu “Wapong ye Wapongnonggeng,” yenge inguc mibong, ye mi gameewec. I yangucte, yedi yengele ngagelu taon monic biyachac bamadickewec.

<sup>17-18</sup> Wapongti Abraham lokwesacka lome, ye yowaine ngagesingkelu madecine depec ingucne lobenogale aiwec. Aime Wapongti madec yele esecne molickelu yanguc mipangkewec,

“Aisakte fikesaweckacni yengi gale ngesa-ngambofocgonebenang aidaingte.” (Fike 21:12) Madecine moniyang yogo hocne ye dodoficte aling gawec, aime sifu ye balu depecine ainale miwec. <sup>19</sup> Aime ye yanguc ngagesilu gawec, “Wapongti ye homackacni inguchac nalic bagbolyedaichte.” Ilec nangeng yowa yanguc holelu migabeleng, “Wapongti Aisak homackacni bawec.”

<sup>20</sup> Aime ye dodoficte yowa ngagesingkelu wiyac lobewa fikedaichte, yogo ngagesilu Yakobo nga Esau mimi-madic milu edocepawec.

<sup>21</sup> Aime Yakobo ye Wapong ngagesingkelu gawecte homanogale ailu yele wacka Yosefe madeckecine filesoc mimi-madic milu edocepawec. Edocepalu yasunedni kwesingnagu domalu Wapong afeewec.

**11:5:** Fike 5:21-24    **11:7:** Fike 6:13-22; 7:1    **11:8:** Fike 12:1-5    \* **11:9:** Yogolec fungine Fike-fike 15:1-21 iwa fagac.    **11:9:** Fike 35:12    † **11:11:** Hibru yowawa fungine yegena mi aigac. Ilec ailu gocne yanguc bafaliyecaigaing, Sara ye inguchac Wapongte yowa ngagesingkelu gawec.    **11:11:** Fike 18:11-14; 21:2; Rom 4:19    **11:12:** Fike 15:5; 22:17    **11:13:** Mige 39:12; 1Pi 2:11    **11:17-18:** Fike 22:1-14    **11:19:** Rom 4:17    **11:20:** Fike 27:27-29,39-40  
**11:21:** Fike 47:31-48:20

<sup>22</sup> Yosefe ye Wapongte tapili ngagesilu dodoficte yowaine ngagesingkelu Israel ngic-ngigac Isip himongkacni hefaliye hikeningte yowa miwec. Ilec ailu yeicne luwe balu hikeningte ngagesilu milockelu edocebawec.

*Mosesle siduc*

<sup>23</sup> Moses fikewec, dameng iwa madec fikebong wehomacebanogale, ngictaudi inguc mime fawec. Aime nenggac-mamackecine yeke ye silicine madicne nganilu ngictaule mi hangocepame mimipang yowaine hegileiboc. Hegilelu Wapong ngagesingkelu tamacne habackang madecnginec balu sangkeboc fawec. <sup>24</sup> Aime Moses ye sugulelu ngagesingkewecte Farao aduinele madec, yeke inguc miningte takickewec. <sup>25</sup> Ye bikicte kwele-madic ngagelu dameng bangkacnemas ganale mi aicnowec. Ye Wapongte ngic-ngigac yengeholec umac balu ganale ngageme madickewec. <sup>26</sup> Ailu ye Isip himongte moneng-mafa yogolec ngageme wiyac omane aiwec. Kristofe ailu game banogale ngageme wiyac feicne aiwec, yogodi Isip himongte moneng-mafa ewaligac. Ye yogo ngagesilu Wapongtacni fuliine madicne banogale donge hilawec. <sup>27</sup> Ye Wapongte yowa ngagesingkewecte Isip himongte ngictau yeke aalicinele mi hangockewec. Ailu Isip himong hegilewec. Ye Wapong mi nganiicne yogo, ye dongedi mi nganiwec ailu nganilu gagac ingucne doic ngagecgu kweleine mi wawec. <sup>28</sup> Ngic-wewe angelodi Israel ngic-ngigac yengele molic-molic madecfocngineng wehomacebadaickale, ye Wapong ngagesingkewec. Ngagesingkelu Ewalicebaicnele Hombangte lama madecine welu sacinedi nungingangsoc hosoyackewec.

<sup>29</sup> Aime Israel ngic-ngigac yenge ngagesingkeibongte Kiwec Sasacnedi siyeckelu yefe ingucne kelengkelu fame falockeibong. Isip ngic yenge inguchac falockenang milu lebong kiwec hatacmac fafaina fanale ailu banagume yenge kiwec nolu homayackeibong.

*Ngagesingkelu gabong wiyac fikewec*

<sup>30</sup> Israel yenge Wapongte yowa ngagesingkeibongte Yeriko taonte odatowa posadi baicne, yogo lolicebong hadeng 7 aiyemewa heliyelu wayackewec. <sup>31</sup> Oda mi heliyewec, dameng iwa ngic yaeckang yeke sangkelu Yeriko taon ngani-ngagec ainogale hikeboc yefengigac Rahap ye Wapong ngagesingkewecte ailu kwele-mogungka hefolecepawec. Ilec ailu Yeriko ngic-ngigac ngage-ngagesingngineng mikac yenge sowaleibong inguc ye mi sowalewec.

<sup>32</sup> Aime na Gideon nga Barak ailu Samson nga Yefata ailu Dawidi nga Samuel ailu siduc-mimi ngic sasawa, yengele siduc inguchac nalic midacka. Aime nale dameng monic mi fagac. <sup>33</sup> Yenge ngagesingkeibongte ailu ngictau bocyac yengele hudu-baba ngicfocngineng tapilingineng bawalu ngictaufocngineng aibong. Ailu laion micngineng badickeibong. Aime yefe-yowa fawec yogo dondonne damongkelu Wapongti wiyac mipangkeibong yogo baibong. <sup>34</sup> Yenge dac sugucne babong pisickewec. Aime ngabafocngineng yengi hudu-baba fitecti wehomacebanogale aiyelebong hikeibong. Yenge tapili-wawa gabong Wapongti tapili yelewec. Yenge hudu tapiliineholec welu kwilic-ngic yengele hudu-baba ngic bocyac yebicebaibong. <sup>35</sup> Ngigac gocne yenge ngagesingkelu gabong Wapongti alingfocngineng bagboliyecebame homackacni fangkebong yengela hatacmac locebawec.

Ngictau gocne yenge ngage-ngagesingkolecte ailu hududi weba-doic aiyelelu Wapongte yowa hegileningte milu edocebaibong. Aime ngage-ngagesingkolec yenge homackacni gboliyelu fangke-fangke, yogolec gaga madicne ngagesilu muc-mackacni ngictau yengele yowa hegilelu mi hikeibong. <sup>36</sup> Aime gocne yenge ngic haicka mife-miwa aibong. Nga gocne yenge midelec aiyelelu muc-hududi wecebaibong. Ailu gocne yenge senti witicebalu muc-macka locebaibong. <sup>37</sup> Aime gocne yenge posadi holecebaibong. Nga gocne segedi socngineng balockeibong. Nga gocne hudu-babale fitecti wehomacebaibong. Nga gocne yenge ngakpi-kpolucnginengti miyac aime lama nga noning socine holelu gaibong. Ailu socte wiyacne kpungkelu gaibong. Inguc aibong ngic-ngigac yengi weyebic aiyelebong umac feina gaibong. <sup>38</sup> Galu yenge himong kisiwa misaine mikacka nga himong yeficina, ailu henebewa nga himong yefina lolickelu gaibong. Yenge madicnengineng bakwesilu ngic-ngigac sowacne mac-himongnginengkolec yengele hewacka gaibong. Aime ngic-ngigac yogo yenge himongte ngic-ngigac yengeholec gagalesoc mi aiwec.

<sup>39</sup> Aime ngic-ngigac yogo yenge ngage-ngagesingkolec gaibongte Wapongti nganicebame madickewec. Ailu yenge dodoficte wiyac baningte yowa mipangkeicne, yogo himongka

galu monic mi baibong. <sup>40</sup> Wapongti nongileng wiyac feicne lonogale ngagewec. Ailu yenge nongilengkolec momochac bamadicnubanale ngagesiwec.

## 12

### *Yesule ngagelu gasackedabeleng*

<sup>1</sup> Ngic-ngigac ngage-ngagesingkolec siducngineng alingkelu inguc kwelengkegabac, yenge homacnedi lolicke domalu nganicnubalu ngage-ngagesingnineng wideckegaing. Ilec ailu wiyac sasawa baumalecnubagac, yogo baickeyackenoga. Aime bikicti bacnubalu witicnubalu gagac, yogo helockeyackelu baickeyackenoga, yefe edalicnubalu fagac, yogo sanangnehac balaibelu gasackelu hikedabeleng. <sup>2</sup> Hikelu dongenonggeng Yesula hiladabeleng. Yedi ngage-ngagesingnonggeng filesoc fileloc bamadickelu gadaicte. Ailu ye hocne ngage-ngagesing yogolec fungine. Ye belic-belic lobewa kwesidaicte, yogo ngagesilu malicpongte doicka felu wiyac gameineholec yogo balaibelu ngageme efecne aiwec. Inguc ailu Wapongte mac ngiye-ngiye foleinapec yogowa fewec yakumac ngiyegac hocne. <sup>3</sup> Aime Yesudi molickelu doic ngageme bikic-baba ngic yenge ye yowa kwekwe aicnoibong. Aime ngenge tapili-wawa ailu kwelengineng wadaickale, Yesu ngagesilu gadabiyeng.

### *Mamac ye pasi alingka ainoledaicte*

<sup>4</sup> Aime ngenge bikic hegileningte hudu wecaigaing. Ailu sacngineng wanale gagawa mi felu gagaing. <sup>5</sup> Aime Wapongti madefocine basananggebanale yanguc edocngebagac, ngenge yogo mi ngigecgebadaic.

"Madecne, Sugucnedi webating aigeleme ga ngageengka wiyac omane mi aidaic. Nga yedi yowa sanangne mime kwelegone mi wadaic.

<sup>6</sup> Sugucne ye ngic-ngigac monicte angackedaictewa, ye gagaine batingkecaigac. Ailu madecine ingucne ailu angac ngagecnodaictewa, yogo ye webating aicnoicaigac." *(Ynn 3:11-12)*

<sup>7</sup> Ngenge Wapong madefocine. Aime mamac sasawadi madefocngineng webating ayelecaigaing, silicne ingucnehac Wapongti doicka locngebalu bamadicngebadaicte.

<sup>8</sup> Ailu yedi madefocine sasawa aibabanginengte ba-bating bole badaicte. Aime ngenge inguc mi aingeledaictewa, yele adu-madefocinebenang mi aidaingte. Ngenge kosa galu kweficebaibong yenge ingucne aidaingte. <sup>9</sup> Ailu himongka mamacfocnonggeng yengi batingnubabong nongileng yengele aibaba yogo ngagesilu alang bacebacaigabeleng. Aime asu yengele Mamacti batingnubame yele yowa balaibelu gaga-sanang badabeleng. <sup>10</sup> Mamacfocnonggeng yenge ngage-ngagengineng fagac, yogolec silicina dameng bangkacnemac sugu batingnubacaigaing. Nga Wapongti batingnubacaigac, yogodibac babaficneholecbanang aigac. Nongileng yele gaga gbagbacne iwa taockelu ganangte inguc aicaigac. <sup>11</sup> Aime ba-bating yogo yanguctihac kwele-sowac doicneholec bafuwano-lecaigac, yogodi belic-belic mi aidaicte, miyac. Aime ngic-ngigac yenge ba-batingka sugule-sanangkelu gagaing, yengela aibaba yogodi lobewa nganime aibaba dondonne nga kwele-mogungka gaga yogolec noine bafuwadaicte.

### *Sanangkelu ganoga*

<sup>12</sup> Ilec ailu ngenge molengineng tapiliine wadaicte, me higengineng sowacne yogo basanangkedabiyeng. <sup>13</sup> Ailu ngic-ngigac hige-sowac higengineng patickedackale, "Ngenge yefengineng holelu someckedaing." *(Ynn 4:26)*  
Ngenge inguc aibong higengineng madickedaic.

### *Wapongte kwele-mogung mi wickenoga*

<sup>14</sup> Ngenge gaga gbagbacne mi gadaingtewa, Sugucne nalic mi nganidaingte. Ilec ngenge ngic-ngigac sasawa yengeholec kwele-mogung nga gbagbacne ganingte bole sanangne badabiyeng. <sup>15</sup> Ngengelacni monicti Wapongte kwele-madickacni wawedaickale, nganimotolu gadabiyeng. Aime ngengele hewackacni wiyac aalic nga kwele-umac yogodi aingeledaickale, nganimotolu gadabiyeng. Ailu yogodi umac bafuwangeleme kwele-sowacti bocyac basowalecnggebadaicte. <sup>16</sup> Ailu ngengele hewackacni monicti selo-boic aibaba aidaickale, me Esau ingucne Wapongte kpaoma aidaickale, ngenge nganimotolu gadabiyeng. Esau ye molic-molic madecte mole-damoc badaicte. Aimebac ye nosing moniyang yogolec mole-damoc gbaineholec lanac-ganac aiboc. <sup>17</sup> Ailu ngagegaing, ye lobewa mamacinelacni mimi-madic yogo banogale milockelu hiyame mamacanale hegilewec. Aime kwele-hefaliyecte yefe monic mi fikecnowec.

### *Honocmengete Yerusalem*



<sup>18</sup> Israel ngic-ngigac yenge Mosesholec Sinai tiki bangkalelu nganibong dac-ubilang lobeme hasocine kundung kwelu badicke-benangkewec. Aime gbelong weme <sup>19</sup> kpeng monic sugucnedi hiyame yowa-malac monicti yowa mime hangocebame mi ngageningte uwacnoibong. <sup>20</sup> Inguc mibong, yowa yogodi umac sugucnehac bafuwayelewec, “Ngic me sic monicti tiki iwa feme ngenge yogo posadi holebong homadaic.” (Wah 19:12-13)

<sup>21</sup> Aime wiyac nganiibong yogolec bocyachenang hangocebame, Mosesdi inguchac yanguc miwec,

“Na hancocume dengdengnugac.”

(Yef 9:19)

<sup>22</sup> Ngenge Sinai tiki ingucne iwa monic mi kwesiibong, miyac. Ngenge Sion kupic, yogo Wapong gagaineholec yele taon ailu honocmengte Yerusalem, iwa belic-belicte tutumangka kwesiibong. Aime angelo habu taosenkacni fegac, yogolecsoc tutumang iwa tumaneibong. <sup>23</sup> Aime ngic-ngigac sasawa yengele Wapong, ye mimocto-mimocto ngicngineng, ailu ngic-ngigac Wapongti filesoc bamadicebalu yenge dondonne wacebawec, yengele asungineng. Aime honocmengte hibiwa wacngineng kwelengkeicne fagac, yogo yenge molic-molic adu-madec ingucne gagaing, yenge honocmengte habu aigaing. Yenge sasawadi momoc kpatulelu iwa gagaing. <sup>24</sup> Aime ngenge Yesula kwesiibong yedi dodofic gbolicne ngic hewacine aigac hocne. Aime ye sacine wickewec, yogodi Abelle sacti yowa miwec, yogo ewalilu tapiliineholecbanang midaicte.

<sup>25</sup> Ilec Wapongti ngenge yowa edocngebalu gagac, ye lobe holecnodaingkale, damongngineng balu ganingte migac. I yangucte, Mosesdi himongka galu ngic-ngigac ung-yowa sanangne edocnebame, yenge yele yowa ngagenogale takicebame hegile galu bikicte ameine baibong. Aime Wapongti honocmeng iwacni ung-yowa edocnubame yowaine lobe holedabelengtewabac bikicte ameine iwacni inguchac nalic mi hikedabelengte. <sup>26</sup> Mosesle damangka Wapongte yowa-malacti himong igockeme uc aiwec. Nga yanguctihacbac yanguc mipangkelu edocnubalu gagac,

“Dameng monicka hatacmac himong igockebe uc aidaicte, iwabac himong sugu miyac, honocmeng momochac igockebe uc aidaicte.”

(Hag 2:6)

<sup>27</sup> Aime “dameng monicka hatacmac” yowa yogodi yanguc mime yegengkeme edocnubagac, wiyac molic-molicina mime fikeyackewec, ye yogo igockeme miyac aiyackedaicte. Aime wiyac sasawa mi fikeemewa fawec, ye yogo momoc igockeme sanangnehac domalu fafa-sanang fadaicte.

<sup>28</sup> Aime ngani-damong monic noleme balu gagabeleng, yogo igockedaicte dameng iwa nalic mi sowaledaicte. Ilec ailu nongileng Wapong kwele-madic ngagecnobeng ye ngageme madickedaicte, yefe iwa yele bagewa galu alang bacnolu afeelu kwelec kwedabeleng.

<sup>29</sup> “Foinac, Wapongnonggeng ye dac-ubilang ingucne ailu wiyac sasawa lobeme miyac aiyackedaicte.”

(Yef 4:24)

## 13

### *Mac holeyeledabeleng*

<sup>1</sup> Ngic hae-gbafocne, ngenge ngengungtihac kwelenginengti angac ngagenagulu ago ainagulu gadabiyeng. <sup>2</sup> Ngic-ngigac haic fulune ngengela kwesiibong ngenge yenge macnginang locebanogale mi hegiledaing. Ngic-ngigac gocne yenge inguc aibong, yenge ngichenang macka locebagabeleng milu angelo gocne macka locebaibong. <sup>3</sup> Aime ngic-ngigac muc-macka ngiyebong ngenge yengeholec momochac ngiyegaing, silicine yogo ingucnehac ngengi yengele ngagesilu baficebadabiyeng. Nga ngic-ngigac gocne weceba-caigaing, yogo ngengele soc momochac wegaing, silicine yogo ingucnehac ngengi yengele ngagesilu baficebadabiyeng.

<sup>4</sup> Aime ngawe-ngigac banagucaigaing aibaba yogo alang bacnodabiyeng. Aime ngawengigac yeke momochac mapicngineng alang bacnolu selo-boic aibaba mi aiboc wonong mikac fadaic. I yangucte, Wapongti selo-boic ngic-ngigac funginengineng wosaelu ameine yeledaicte hocne. <sup>5</sup> Aime ngenge hiye-monengte angac sugucnehac mi ngagedabiyeng, ngenge wiyac biyac fangelegac, yogo sugu andoine aigac, ngenge inguc ngagelu gadabiyeng. Wapong yeuctihac yanguc biyachac miwec,

“Na ngenge mi hegilecnebadacte. Ailu wiyacngineng lilolu nalic mi lobe holengeledacte, yogo miyachenang.”

(Yef 31:6)

<sup>6</sup> Ilec sanangkelu hangoc mikac galu yanguc nalic midabelengte,

“Sugucne ye nongileng babaficnonggeng, aime ngic monicti wiyac monic ainoleme ilec nalic mi hangocnubadaicte.” (Mige 118:6-7)

*Ngage-ngagesingnonggeng balaibenoga*

<sup>7</sup> Ngenge micnefocngineng Wapongte yowa edocngebalu wedungelelu gaibong ailu noine wenuc bafuwaibong, yogo ngagesilu gadabiyeng. Ngenge domalu ngage-ngagesingnonggeng ngani-motolu yengele silic balaibedabiyeng. <sup>8</sup> Yesu Kristo ye awecnahac nga yakumac ailu damengsoc silicine moniyang gaginowagac.

<sup>9</sup> Wapongte kwele-madicti kwele ngage-ngageningeng basanangkeme sanangne domadaingte, yogodi wiyac madicne. Aime noba-nosingte yefe-yowa haicine monic-monic yogodi kwelengineng nalic mi basanangkedaicte. Ilec ngenge yowa kwesacine gbolicne haicine monic-monic wedungelebong yowa ingucnedi mi mudocngebadaic. <sup>10</sup> Aime nongileng Yesudi alatanonggeng ingucne aime gagabeleng. Aime depec-baba ngic yenge kpoluc-falewa afeelu kwelec kwelu gagaing, yenge Yesudi alata aigac, iwacni nosing monic nalic mi balu nodaingte. <sup>11</sup> Depec-baba ngic yengele damong sugucnedi sic yengele sac balu Ibu-mac Kweline Gbagbacnebenang, iwa bafelu bikic baic-baicte ibu lolu gaibong. Ailu sic noinebac ngiye-domac aicaigaing mac yogolec lobaina lobong lobelu defeine sugu ailu gawec. <sup>12</sup> Ilec Yesudi inguchac yeicne sacti ngic-ngigac gbagbacne bacebanale taon nuinele lobina doic ngagewec. <sup>13</sup> Ilec ngiye-domac aicaigabeleng, yogolec lobaina yela hikelu yeholec momochac ye game bawec ingucnehac badabeleng. <sup>14</sup> Himong yagowa nongileng taon sanangne monic mi fagac. Ilec nongileng taonnggeng lobewa kwesinale donge hilalu gagabeleng.

*Mimi-madicti ibu*

<sup>15</sup> Ilec nongileng Yesule wacka Wapong damengsoc mitengkedabeleng, yogodi ibu noine aidac. Micnonggenti wacine mibeng yegengkeme noine bafuwadabeleng. <sup>16</sup> Aime ngic-ngigac gocne ngani-bafic aiyeledabiyeng. Ailu wiyacngineng fagac, yogo heuckelu yeledabiyeng, aibaba yogo mi hegiledaing. Wapongti ibu ingucnele hocne ngageme madickedacite.

*Yowangineng balaibenoga*

<sup>17</sup> Ngenge micnefocngineng yenge alang bacebalu yowangineng balaibedabiyeng. I yangucte, yenge deboc-gboli galu kwele-asungineng damongkelu bolenginengte yowasiduc Wapongta minogale damengngineng loicne fagac. Yogowa yengele bole yogo belic-belicineholec aidac. Ngenge kwele-umacka bole yogo badaingtewa, na ngagebe ngenge nalic mi baficngebadaicte.

*Wenac-madic*

<sup>18</sup> Ngenge nongele milockedaing. Nonge kwele ngage-ngagenonggeng gbagbacne, inguc ngagepangkelu gagabeleng. Aime aibabanonggeng sasawa madicne fanale ainolegac. <sup>19</sup> Ngenge hatacmac mimilockabenang baficnubadaing, yogo kpafengngebagabac. I yangucte, na dameng mi wickedacte. Ailu ngengela biyachenang hefaliye funogale ngagesigabac.

<sup>20</sup> Sugucnenonggeng Yesu ye lama-damongtowa ingucne damongnubagac. Aime Kwele-mogungte Wapongti Yesu homackacni bagbolyeme fangkewecte Yesule sacka dodofic sanangne fafeginowagac. <sup>21</sup> Wapongti hocne Yesu Kristole ailu bole madicne sasawa banogale tapili bame wakengeleme yeicne angac nga ngage-ngage balaibedaingte. Ye inguc ainolelu ngageme madickedacite, aibaba yogodi nongela fikedaic. Aime yela wac feicne moto-motoine mikac fafegidaic, yogo foinac.

<sup>22</sup> Ngic hae-gbafocne, na hibi yago kwelengkegabac, yogo dalicne miyac. Ilec ngenge yowa yago tatakic mikac galu ngageningte kwelengineng kwefangngebalu migabac. <sup>23</sup> Ailu monic yanguc edocngebabe ngagening, yenge ngic hae-gbanonggeng Timoti mucmackacni lukecnoibong. Ilec ye nala biyac kwesidaictewa, noke momochac ngengela biyac fulu nganicngebadabelecte.

<sup>24</sup> Nongele wenac-madicti damongfocngineng ailu ngic-ngigac Wapongte bingec sasawa ngengela fugac. Ailu alingfocnonggeng Itali himongkacni yenge inguchac wenac-madicngineng ngengela logaing.

<sup>25</sup> Wapongte kwele-madicti ngic-ngigac sasawa ngengela fadaic.

Yogo foinac.

## Yakobos Yedi Hibi Kwelengkewec

### *Mimi-yegeng yowa*

Yakobos, ye Yesule gbaine, ye Yesule habu Yerusalem iwa gaibong, yengele micne monic. Yesu homalu homackacni gboliyelu fangkeme hifa 20 ngama ingucne motome, yedi hibi yago kwelengkelu Yesule habu gocne yengela saleme hikewec. Ngic-ngigac ngage-ngagesingkolec, yenge aibaba wenuc aicaigaing, yogolec kwelengkeyelewec.

### *Yowa yago hibi nevocina fagac*

1:1 Wenac-madic yowa

1:2-18 Umac haicine monic-monic

1:19-27 Wapongte yowa sugu ngagebeng mi madickegac, yogo balaibedabeleng

2:1-13 Ngic-ngigac nganicebalu aibaba silicine moniyang aiyeledabeleng

2:14-26 Aibaba yogodi ngage-ngagesing edaligac

3:1-18 Micnonggeng damongkelu yowa madicne sugu midabeleng

4:1-5:6 Yefe sowacne ewalilu Wapongte aibaba balaibedabeleng

5:7-20 Aibaba madicna sanangkelu domadabeleng

### *Wenac-madic yowa*

<sup>1</sup> Na Yakobos, Wapong nga Sugucne Yesu Kristo yekele kwelec kwekwe gagabac. Na hibi yago kwelengkelu Israel ngesa-ngambofocngineng 12 himongne himongne ngic-ngigac sasawa singsalolong kwelu gagaing, nale wenac-madic ngengela lobe fugac.

### *Umac haicine monic-monic*

<sup>2</sup> Ngic hae-gbafocne, lokwesac nga umac haicine monic-monic fikengeledaichte, wiyac yogo sasawa belic-belicineholec, ngenge inguc ngagedaing. <sup>3</sup> Ngenge yanguc ngage-gaing, ngage-ngagesingngineng lokwesacka lobong yogodi basananggebame ngic-ngigac sanangne aidaingte. <sup>4</sup> Ailu ngenge tatakic mikac sanangne galu bolengineng bubbuchac badaingte. Bamoctolu sugule-benangkelu, wiyac monicte kauc nalic mi badaingte.

### *Wapongtacni ngage-ngage-motoc*

<sup>5</sup> Wapong ye pakeng-yowa mi micaigac. Ye angacka galu ngic-ngigac ngage-ngage bocyac yelecaigac. Ilec ngengele hewackacni ngic me ngigac monicni ngage-ngage-motocine lome songtoleme, ye Wapong milockelu uwacnome lacnodaichte. <sup>6</sup> Aime ye uwacnolu milockenogale milu, iwabac ngageboc mikac ngagesingkelu milockedaing. Monic ye ngageboc aidaichte, ye kiwecte dibong ingucne, gbelongti yogo ewalilu lec-welec aime kosa wecaigac. <sup>7</sup> Ngic-ngigac ingucne yenge, Sugucnelacni wiyac monic nalic badabelengte, inguc mi ngagesidaing. <sup>8</sup> Ngic-ngigac ingucne yenge himongte gaga nga Wapongte gaga momochac balaibelu yengileng yefe sasawa yogo ngagebockolec gagaing.

### *Ngic feicne waicne*

<sup>9</sup> Ngic hae-gbanonggeng monic ye waweweine gacaigac, Wapongti yele ngageme feicne aigac, ye yogolec angac ngagedaic. <sup>10</sup> Aime ngic monic moneng-mafaineholec, Wapongti yele ngageme waweweine aigacte ye angac ngagedaic. Daling aliinedi kpinding kwelina siyeckelu molongkelu miyac aicaigac, ngic yogo ye ingucnehac miyac aidaichte. <sup>11</sup> Aime ubiyacte wenac dacineholecti ofelu kpinding kweme sokuwelu aliine silicine madicne molongkeme miyac aidaichte. Nga ngic moneng-mafaholecti wiyac bafuwanale boletowa bacaigac, ye silicine ingucnehac molongkelu miyac aidaichte.

<sup>12</sup> Monic lokwesacka sanangne domalu umac badaichte, ye kwele-angackolec. Aime ngic-ngigac Wapong kwelenginengti angac ngagelu aicnoaigaing, yenge gaga-sanang yelenale mipangkewec. Monic ye lokwesacka sanangkelu gagac, ye yogo hocne badaichte. <sup>13</sup> Bikicte lokwesacti ngic monic fikecnome, ye yanguc mi midaic, "Wapongti lokwesacka locnugac."

I yangucte, wiyac sowacnedi Wapong nalic mi fuluckedaichte. Nga Wapongti ngic monic bikicte lokwesacka inguchac mi lodaichte, miyac. <sup>14</sup> Ngic yengileng angacti lokwesacka file-soc locebadaichte. Ailu yengileng angacti bacebame kwesac ngage-ngage ngagelu aibaba haicine monic-monic ainogale angac ngagedaingte. <sup>15</sup> Aime angac sowacnedi gobeelu mader monic badaichte, ye wacine bikic. Aime bikicni sugulelu homac bafuwadaichte.

<sup>16</sup> Ngic hae-gbafocne kwelenedi ngengele angac ngagegabac, ngenge kwesacngebabong yanguc mi ngagedaing, Wapongti bikicte lokwesacka locnubagac. <sup>17</sup> Wapong ye angoc

sawawa fagac yogolec Mamac. Ailu yela kundung monic mi fagac, miyac. Yela angoc fawecti fagac, nga faginowagac. Aime wilengkacni wiyac madicne nga dondonne sasawa salenoleme wacaigaing, yogo kwele-madicneholec inguc nolelu gagac. <sup>18</sup> Wapong ye angacinele ailu yowa noina gobeelu bacnubame yele adu-madecfocine fikeibeng gagabeleng. Yedi mime wiyac sasawa himongka fikeyackewec, yogolec hodocine hole-hole ainangte inguc ainolewec.\*

#### *Yowa ngagelu balaibenoga*

<sup>19</sup> Ngic hae-gbafocne kwelenedi ngengele angac ngagegabac, ngenge yanguc ngagening, yowa monic mibong kwesime ngenge biyac hedec lodabiyeng. Lolu yowa yogolec ameine biyac mi midabiyeng, me aalic biyac mi ngagedaing. <sup>20</sup> Wapongte haicka ngicte aalicti aibaba dondonne mi kwefickedaiacte, miyac. <sup>21</sup> Ilec ailu ngenge aibaba wonongkolec nga sisipilic aibaba ingucne bocyac fagac, yogo sasawa baickeyackedaing. Ailu ngenge ulucne gacgubong yowa kwelenginang duweicne, yogolec tapilidi kwele-asungineng biktice ameine bame wasecne aidaingte. Yowa yogo hefoleadaing.

<sup>22</sup> Ngenge Wapongte yowa hedecti sugu mi ngagedaing. Ngenge yowaine ngagelu balaibedaingte, yogodibac madickedaiacte. Inguc mi aidaingtewa, ngenge ngengileng kwesac ainagulu ngagebong ngic madicne gagabeleng ingucne aidaiacte. <sup>23</sup> Monic ye Wapongte yowa moc sugu ngagelu yogo mi balaibedaictewa, ye ngicti yeicne haic-mesuine iluc nganicka nganicaigac, yogo ingucne. <sup>24</sup> Ye ilucine nganilu gacgu iwahac yeicne nganinaniine weningucne, yogo biyac ngigeckedaicte. <sup>25</sup> Wapongte yefe-yowa dondonne, yogodi muckacni lukeycubacaigac. Aime monicti yefe-yowa yogo ngani-ngagec aigacgu mi ngigeckeme aibabaine balu gadaicte, ye kwele-angackolec aidaiacte.

#### *Alang-baba noine*

<sup>26</sup> Monic ye yeuctihac yanguc ngagedaiacte, Na Wapong alang bacnolu gagabac, inguc milu beluine mi damongkedaictewa, yele alang-baba yogodi yefe lilome babaficne mi aidaiacte. Ye yeicne kweleina kwesac aidaiacte hocne. <sup>27</sup> Aime Wapong Mamacnonggeng yele haicka alang-babale aibaba gbagbacne, nga wonong mikac, yogolec silicine yanguc. Himongtowa yagolec angac lobe holecnolu, wonong mikac galu buwenac nga ngigac-hosec umacka gagaing, yenge ngani-damong aiyeledabeleng. Yogodi Wapongte alang-baba madicne.

## 2

#### *Aibaba silicine moniyang*

<sup>1</sup> Ngic hae-gbafocne, Sugucnenonggeng Yesu Kristo ye tapili nga wac feicneholec gagac. Ailu ye ngagesingkegaing, ngenge ngic feicne waicne nganicebalu aibabanginengte silicka mi aiyeledaing. <sup>2</sup> I yangucte, ngic monicti ngengele kpakpaduc macka fedaicte. Ye ling goldi baicne, ailu ngakpi hibine madicne holelu kwesidaicte. Aime dameng iwahac ngic monic waweweine ye inguchac ngakpiine esecne wonongkolec holelu kwesidaicte. <sup>3</sup> Inguc kwesiboc ngenge ngic ngakpiine hibine madicne holecac, ye nganilu yele midaingte, "Agone, ga yawa wele ngiye-ngiye madicna ngiyec." Inguc milu ngic waweweine yelebac yanguc midaingte, "Ga edi hikelu domac," me "Ga emena hige ede-edena wangiyenong." <sup>4</sup> Inguc aidaingtewa, ngenge ngengileng silicngineng ngani-motolu yefe sowacna ngicngigac agofocngineng wosaecbadaingte, me? Yogo mi madickedaiacte.

<sup>5</sup> Ngic hae-gbafocne ngengele angac ngagegabac, ngenge ngagening. Ngic-ngigac himongtowa yagowa waweweine gagaing, yenge ngage-ngagesing feicneholec aidaingte. Ailu ngani-damongte mole-damoc badaingte. Wapongti inguc ngagelu bawosaecbawec, me? Oc. Ngic-ngigac kweledi Wapongte angac ngagelu aicnocaigaing, yogo yengi ainingte mipangkewec. <sup>6</sup> Nga ngengebac ngic-ngigac waweweine game bafuwayelecaigaing. Aime ngic mafatowanginengkolec yengi hocne basowalecngelalu yowawa locngebacaigaing, me? Oc, aime omale yenge sugu alang bacebacaigaing? <sup>7</sup> Yesule wac madicne molickelu feinginang fewec. Aime moneng-mafanginengkolec yengi hocne wac yogo milu sulecaigaing, me? Oc, yenge inguc aicaigaing.

#### *Ngageboc mikac gaga*

<sup>8</sup> Aime Wapongte hibiwa yefe-yowa yanguc kwelengkeicne fagac, "Gageicne aigelecaigac, silicine ingucnehac ngic-ngigac gale emewa gagaing, yengele kwelegonedni ago aiyelelu angac ngageyelelu gadamec." (Dep 19:18)

\* **1:18:** Noba-nosing gbolicnacni hodocine holecacigabeleng, yogo ingucnehac ainangte edocnubawec. **1:18:** Yoa 1:13 **1:20:** Ngag 7:9 **1:21:** Kol 3:8; 1Pi 2:1 **1:22:** Mat 7:26; Rom 2:13 **1:25:** Rom 8:2; Yak 2:12 **1:26:** Mige 141:3 **2:1:** Sale 10:34; Yak 2:9 **2:5:** 1Kor 1:26-28

Ngenge ngani-damongte yefe-yowa yogo foinac balaibecaigaingka, aibaba madicne aigaing. <sup>9</sup> Ailu ngenge ngic feicne waicne nganicebalu aibabanginengte silicka aiyele-gaingka bikic bafuwadaingte. Aime yefe-yowadi bikicngineng mime yegengkeme yefe-yowa wewe ngic, inguc wacngedadaicte. <sup>10</sup> I yangucte, monic ye yefe-yowa sasawa bal-aibeyackelu, hewacine moniyang sugu hegiledaicte, ye hewacine sasawa yogolec ameine badaicte. <sup>11</sup> I yanguc, Wapongti yanguc miwec fagac,

“Ga selo-boic mi aidamec.”

Ailu hatacmac yanguc,

“Ga ngic-ngigac mi wehomacebadamec.”

(Wah 20:13-14; Yef 5:17-18)

Aime selo-boic mi ailu ngic wehomadamectewa, yefe-yowa wewe ngic biyac ailu gagic. <sup>12</sup> Wapongte yefe-yowadi muckacni lukecnu bagac. Ailu yedi yefe-yowa yogo balaibelu aibabanonggeng wosaedaicte. Ilec ngenge inguchac yefe-yowa yogo yowanginang nga aibabanginang balaibedaing. <sup>13</sup> Monic ye ngic-ngigac kwele-sowac mi aiyelecaigac, ye yowawa lobong dameng iwa kwele-sowac mikac mamoctodaicte. Aime monic ye kwele-sowackolec gacaigacti yowawa domalu gbelong aidaicte.

### *Ngage-ngagesingkolec gaga*

<sup>14</sup> Ngic hae-gbafocne, ngic monicti midaicte, “Na ngage-ngagesingkolec gagabac.” Inguc milu aibabaine madicne mi facnogacka, ngage-ngagesingngine yogolec noine mi bafuwadaicte. Aime ngage-ngagesing ingucnedi umackacni nalic bamoctodaicte, me? Yogo miyac. Ilec ailu ye wasecne mi aidaicte. <sup>15</sup> Ngic hae-gba me adu-seng yengelacni monic, ye gagaina oma ngakpi-kpoluc holedaicte? Ailu hadengsoc nosing nonogale kpungkeme, <sup>16</sup> ngengelacni monicti yele yanguc midaicte, “Ga kwele-mogungkolec galu gbelong ngakpigone holelu nosing nogebac aidamec.” Ye micti sugu inguc milu socte wiyacka kpungkegac, yogo mi lacnodaictewa, wiyac madicne noine fikedaicte, me? Yogo miyac. <sup>17</sup> Inguc aime ngage-ngagesingine aibabaine mikac fagac, yogo noine mikac, homaicne.

<sup>18</sup> Aime monicti yanguc midaicte, “Ga ngage-ngagesinggoneholec gagic. Nga nabac aibabane madicne balu gagabac.” Ngage-ngagesinggone aibabaine mikac, yogo edalicnungka nganilubac, aibabane edalicgube ngage-ngagesingne nalic nganidamecte. <sup>19</sup> Wapong ye moniyang sugu gagac, yogo biyac ngagesingkedamecte, yogodi madicne. Aimebac yogo sugu nalic mi aigac. Aleng yenge inguchac yogo ngagesingkelu hangocebame dengdengbacaigac.\* <sup>20</sup> Nga gabac ngage-ngagesingkolec galu aibabagone mikac gagic, yogo noine monic mi bafuwadamecte, miyac. Ga ngic ngage-ngagegone mikac ingucne, yogolec silicine ngage-motodamec.

<sup>21</sup> Molickelu nongileng ngambononggeng Abraham ye madicine Aisak depec hocne milu alatawa lome, Wapongti yele ngage-ngagesing yogo aibabaneholec nganilu ngic dondonne wackewec. <sup>22</sup> Aime yele ngage-ngagesing nga aibabaine, yeke baficnagulu yekilec momochac bole baiboc. Aime aibabainedi ngage-ngagesinginele bole bamoctome sugulewec, yogo ngani-motogic. <sup>23</sup> Aime yogodi noine aigac. Nga Wapongte hibidi edalicnubalu yanguc migac,

“Abraham ye Wapong ngagesingkewecte ailu, ye ngic dondonne wackewec.” (Fike 15:6)

Ailu yele yanguc migac, “Ye Wapong agoine.” <sup>24</sup> Ilec ailu Wapongti ngic monic aibabainele ailu ye ngic dondonne wackedaicte, yogo ngage-ngagesingka sugu miyac, ngenge yogo ngani-motogaing.

<sup>25</sup> Aime silicine ingucnehac Wapongti yefe-ngigac Rahap aibabainele ailu dondonne wackewec, me? Oc, yedi ngic salecepabong kwesiboc macka locepawec. Locepalu monicka yefe salecepame hikeiboc. <sup>26</sup> Soc asuine mikac, yogo homaicne. Aime silicine ingucnehac ngage-ngagesing aibabaine mikac, yogo ingucnehac homaicne.

## 3

### *Mic-yowanonggeng*

<sup>1</sup> Ngic hae-gbafocne, ngengelacni bocyacti Wapongte yowale wewedu ainingte mi ngagesidaing. Wapongti ngic-ngigac yowawa locebadaicte, dameng iwa wewedu bolenonggengte funginenonggeng sugucnehac wosaelu yowanonggeng mimoctodaicte.

<sup>2</sup> Nongileng sasawadi dameng bocyaca bikicka wawegabeleng. Aime monic ye yeicne yowa damongkelu bikic mi bafuwadaictewa, ye sugule-benangkelu socine ingucnehac

**2:8:** Mat 19:19; Gal 5:14    **2:9:** Yef 1:17    **2:10:** Mat 5:19    **2:11:** Rom 13:9    **2:12:** Gal 6:2; Yak 1:25; 1Pi 2:16  
**2:13:** Mat 5:7; 18:32-35    **2:15:** 1Yoa 3:17    **2:18:** Gal 5:6    \* **2:19:** Aleng yenge moc ngagesingkecaigaing, aibabangineng madicne monic mi fagac. Ilec ngage-ngagesingngine yogo noine mikac.    **2:21:** Fike 22:9-12    **2:22:** Hib 11:17-18    **2:23:** 2Ngsi 20:7; Yes 41:8    **2:25:** Yos 2:1-21; Hib 11:31

damongkenale mi kpungkedaicte. <sup>3</sup> Aime becasic yenge yowanonggeng ngagelu bal-aibeningte, micnningang aen kpicine lobeng aente ailu socngineng buchuchac ngagenagengineng balaiabedaicte. <sup>4</sup> Ailu lac-wage kiwecka gagaing, yogo inguchac ngagegaing. Yenge wiyac sugucnebenang, aime gbelong sanangnedi bacebame lac-wage damong ye puli hakicinedi weme lac-wagetowa yogo yele mole balaibedaicte.

<sup>5</sup> Aime belu ye inguchac socnonggang wiyac kpicine adic. Ailu sifu yowatowa milu socnonggeng bafedaicte. Aime ngagegaing, dac kpicine hakicti molickelu lobeme yoc-kate sugucnebenang lobecaigac. <sup>6</sup> Belunonggeng yogo dac ingucne, yogodi hocne socnonggengte wiyac sasawa ewalicebalu sowacnele nenggacine aicaigac. Aime dac-sanangti belunonggeng lome lobeme, belunonggengti socnonggeng sasawa bame wonong aime gaganonggeng sasawa yogo dacka lome lobedaicte. <sup>7</sup> Bec-sic nga nango, ailu hema nga kiwecka sic haicine monic-monic fayackegaing, yenge esecne nga yakumac yowa weduyelelu damonggebagabeleng. <sup>8</sup> Aime sifu monic ye beluine nalic mi damongkecaigac, belu yogo ngiye-ngagecine mikac sowacne balu game homacte marasingti yela wake-caigac.

<sup>9</sup> Nongileng belunonggengti Sugucne Mamacnonggeng mitengkecaigabeleng, aime belunonggeng yogodi hocne ngic-ngigac Wapongte silic bacebaicne, yenge sawecebacaigabeleng. <sup>10</sup> Mic-sabang moniyang yogowacni mimi-madic yowa nga sawec-yowa momochac wacaigac. Ngic hae-gbafocne, yogodi mi madickegac. <sup>11</sup> Misa dongeine moniyang iwacnihac, misa sawecne nga hobecine momochac nalic wadabiyecte, me? Yogo miyac. <sup>12</sup> Ngic hae-gbafocne, fik yocti oliwa hucine nalic badaicte, me waing mucka fik hucine nalic fikedaicte, me? Yogo miyac. Silicine ingucnehac kiweckolec misa nalic mi filanoga.

#### *Ngage-ngage-motoc noine*

<sup>13</sup> Ngengelacni monicti ngage-ngage-motoc nga ngage-ngageine ileckeicne balu gadaicte, ye ngage-ngage-motoc iwacni ulucne galu aibabaine madicne edalicngabadaicte. <sup>14</sup> Aimebac ngenge kwelenginang hasowac ngabaholec ailu ngengileng sugu doficnagudaingtewa, ngengileng socngineng bafelu kwesacka galu yowa noinele yowa kwekwe mi aidaing. <sup>15</sup> Ngage-ngage-motoc kwesacine ingucne yogolec fungine honocmengkacni miyac, yogobac himongkacni, ailu kwele esecne nga aleng yengele bole. <sup>16</sup> Ngenge kwelenginang hasowac ngabaholec ailu ngengileng sugu doficnagudaingtewa, ngenge yuwenackolec ingucnehac galu, aibaba sowacne haicine monic-monic aigacgu siyeckelu gadaingte. <sup>17</sup> Ngage-ngage-motoc wilengkacni wacaigac, yogodi molickelu ngage-ngage gbagbacne lolu, hatacmac kwele-mogung nga aibaba ulucne bafuwagac. Ailu kwelewa bawagac, ailu kwele-sowackolec, nga noine madicne, ailu angasoc aigac, ailu kwesac-yowa mi fagac. <sup>18</sup> Ngic-ngigac kwele-mogung gagale bole bacaigaing, yenge kwele-mogung wasecne duwebong gaga dondonnele noine fikeyedaicte.

## 4

#### *Ngenge kwelenginang hefaliyedaing*

<sup>1</sup> Hewacnningang hudu nga ngaba yogo wenuwacni kwesilu kpfallengebagac? Ngani-angac fagac, yogo kwelenginangkocni, me? Oc, iwacni kwelenginang yuwenac aicaigaing. <sup>2</sup> Ngenge andac ailu wiyac mi bacaigaing. Ilec ailu ngic wehomalu hasowac ngagelu wiyac nalic mi babong fikedaicte. Ailu ngenge ngelec-ngelec nga yuwenac aicaigaing. Ailu ngenge mimilocnningeng mikac gagaingte wiyac madicne nalic mi badaingte. <sup>3</sup> Ngengebac wiyac banogale milockelu yanguc ngagesicaigaing, Socte ngani-angacka moneng-mafanonggeng nalic wickedabelengte. Inguc ngagelu ngenge kosa milockelu yogolec noine monic mi badaingte.

<sup>4</sup> Ngic-ngigac selo-boic ingucne aicaigaing, ngenge yanguc mi ngagegaing, me? Monic ye himongtowa yagolec gaga yogolec agoine aicaigac, ye Wapongte lobe hocnodaicte. Ilec monic ye himongtowa yagolec gagale ago ainogale aigac, ye Wapongte ngabale aling aigac. <sup>5</sup> Wapongte hibiwa yowa yanguc fagac, Ye asunonggeng nongileng kwelewa lome ngyegac. Ilec nongileng yele aling ganangte bocyac aicnolu gagac. Ngenge yele aalic bafuwadaingkale, ye mi hegiledaing.\* Yowa yogo moc mi kwelengkeicne fagac, yogo ngagegaing, me? <sup>6</sup> Aimebac ye kwele-madic sugucne ewalilu ainolegac, yogolec hocne Wapongte hibidi yanguc migac,

3:6: Mat 12:36-37; 15:11,18-19    3:8: Rom 3:13    3:18: Mat 5:9; Hib 12:11    4:1: Rom 7:23    4:4: Rom 8:7;

1Yoa 2:15    \* 4:5: Wapongte hibile ngage-ngage ngic yenge yogolec yowa yanguc ngagegaing, Yakobos ye Wapongte hibiwacni yowa gocne yago ingucne kpatulecebalu migac, Wahikeicne 20:5; 34:14; Sekariya 8:2

“Wapongti ngic soc bafefe gagaing, yengele takickeme ngaba aigac. Nga soc-kwelengineng bawalu gagaing, yenge kwele-madic aiyelelu gagac.” (Ynn 3:34)

<sup>7</sup> Ilec ngenge Wapongte bagewa gadaing. Ilec ailu Aleng Sugucnenginengte yowa kwelu lobe holecnodaing. Inguc aiyebongka ye hegilecngebalu hikedaicte. <sup>8</sup> Ailu ngenge Wapongte emewa ledaing. Inguc leebongka ye inguchac ngengele emewa weledaicte. Bikic-baba ngic, ngenge molengineng suwedaing. Nga ngic-ngigac kwele-yaeckolec gagaing, ngenge kwelengineng suwe-bamadic aibong gbagbacne aina. <sup>9</sup> Ngenge ube-hobec nga kwele-sowac ngagelu hii-songgong aidaing. Ailu gougouholec gagaing, ngenge hefaliyelu maguc-maguc aidaing. Nga belic-belicka gagaing, ngenge hefaliyelu kwele-umackolec aidaing. <sup>10</sup> Ngenge Sugucnele haicka bawacnagudaing. Inguc aibong yedi wacnagineng bafedaicte.

#### *Ngenge ngengung mi wosaecnagudaing*

<sup>11</sup> Ngic hae-gbafocne, ngenge ngengung mi misowalecnagudaing. Monic ye ngic hae-gbaine misowaledaicte, me aibabaine wosaelu misowaledaicte, ye yefe-yowa misowalelu wosaegac. Ailu yefe-yowa wosaelu bawagicka, ga yefe-yowa mi balaibecaigic, miyac. Gagibac yefe-yowale wowosae-ngic ailu gagic. <sup>12</sup> Yefe-yowale wowosae-ngic, ye yefe-yowa kwelengkewec, ye moniyangti sugu gagac. Ailu yedi hocne nalic bikicte ameine bame wasecne aidaingte, me basowalecngebame miyac aidaingte, ye yogolec tapili facnogac. Ga monic emegona gagac, ye wosaecte tapili yogo madi gelewec? Monic mi geleicne, miyac.

#### *Soc bafefe ngic*

<sup>13</sup> Gocne yenge yanguc migaing, “Nonge yakumac me saeme taon iwa me taon monicka hikelu hifa moniyangte kwelina iwa galu woc-wiyac fuli balu salelu hiye-monengnongggeng hatacmac bafuwadabelengte.” Ngic-ngigac bole ingucne nalic bacaigaing. Aime sifu ngengele yanguc mibe ngagening. <sup>14</sup> “Ngenge saemele gaganginengte silic wenuc aidaicte, yogo monic mi ngagegaing. Gagangineng yogo hasoc ingucne, dameng kpisicnemas ofelu miyac aidaicte.” <sup>15</sup> Ngenge yanguc mibong madickedaicte, “Sugucnedi ngageme madickedaicte, nonge gaguc bole yogo me yogo badabelengte.” <sup>16</sup> Aime ngenge ngage-ngageningeng yogo feicne ngagelu socnagineng bafelu micaigaing. Yowa ingucne yogo aibaba sowacnebenang aigac. <sup>17</sup> Ilec ngagegaing, monic ye aibabaine madicne ainale ngage-ngage-motoc facnogac. Ailu yogo sifu hegiledaicte, ye bikickolec aidaicte.

## 5

#### *Ngic-ngigac moneng-mafanginengkolec*

<sup>1</sup> Ngic-ngigac moneng-mafanginengkolec, ngenge ngagening, umac sugucnedi ngengele fikelu basowalecngebadaicte. Ilec ailu, ngenge aukwelu hiyaning. <sup>2</sup> Ngenge woc-wiyacnagineng musungkelu miyac aidaicte. Ailu ngakpi-kpolucnagineng yogo une-kwadacangti nome miyac aidaicte. <sup>3</sup> Hufengti gol nga siliwangineng badaicte. Ailu hufeng yogodi siduc-mimi ngic ailu funginengineng mime yegengkedaicte. Aime woc-wiyacnaginengti socnaginang dac ingucne lobecngebadaicte. Ngenge dameng motomoina hocne moneng-mafangineng bakpaduc aibong, yogodi inguc fikengledaicte. <sup>4</sup> Ngagegaing, bole-ngicfocnagineng yenge nosing ngengileng bolenginangkocni noine fuluckelu ngeleibong. Ngelebong ngenge bole-fuli mi yeleibong. Aime fuli yogodi hiyalu gagac. Aime bole-ngic yenge nosing noine kpaduckeibong, yenge inguchac hiyabong Sugucne Tapilitowa Fileine, ye le hedecka biyac haume ngagewec. <sup>5</sup> Ngenge himongka galu socte angac balaibeibong. Balaibeibong moneng-mafanginengti gaganginang wakewec. Aime Wapongti ngic-ngigac wehomacebanale damengngine bangkaleemewa, ngengebac nogebac ailu gagainghac. <sup>6</sup> Ngenge ngic dondone yowawa lolu mimoctolu webong homawec. Aimebac ye ngaba monic mi balu gawec.

#### *Yesu kwesidaicte*

<sup>7</sup> Ngic hae-gbafocne, ngenge ilec tatakic mikac wangec gaebongka Sugucne kwesidaic. Aime ngagegaing, nosing-bole filefocine yengi nosingnagineng duwebong mac kweme yengi nosingnagineng himongkacni sugulenale tatakic mikac noinele damengte wangec gacaigaing. <sup>8</sup> Aime Sugucnele kwesi-kwesi dameng biyac bangkale welegacte ailu, ngenge inguchac kwelengineng basanangkelu tatakic mikac wangec gadabiyeng.

<sup>9</sup> Ngic hae-gbafocne, ngagegaing. Wowosae-ngic ye nu lobina biyac kwesilu domagac. Ngege yowawa wawedaingkale, ngengungtihac yowa kwekwe mi ainagudaing. <sup>10</sup> Siduc-mimi ngic molickelu Sugucnele wacka yowa milu gaibong, yenge tatakic mikac umac balu ulucne gaibong. Ngic hae-gbafocne, ngege yengele silic ingucnehac balabelu inguc aidaing. <sup>11</sup> Ngagegaing, ngic-ngigac tatakic mikac gaibong, yengele ngagebeng kwele-angackolec aiwec. Aime ngege Yople yowa-siduc biyac ngageibong. Ye umacka sanangne tatakic mikac gawecte ailu, Sugucnedi yela pasi madicne bawec. Sugucnedi kwele-sowac sugucnehac, nga ngageboc mikac aibabaine ingucne aicaigac.

*Yowa sanangkenale mi minoga*

<sup>12</sup> Aime ngic hae-gbafocne, yowa noine monic yanguc, ngege yowangineng sanangkenale wiyac monic wackelu mi mibong sanangkedaic. Ngege honocmeng me himong wackelu yowangineng mibong mi sanangkedaic. Ailu wiyac sugucne monic wackelu inguchac mi mibong sanangkedaic. Ngege galu yowawa wawedaingkale, “foinac” yogo foinac. Nga “miyac” yogo miyac, inguc sugu midaing.

*Ngage-ngagesingkolec milockenoga*

<sup>13</sup> Ngengelacni ngic me ngigac monicti umac gocne fikecnodaictewa, ye milockedaic. Ailu monicti belic-belicka gadaictewa, ye mimiteng gee holedaic. <sup>14</sup> Aime ngengelacni monicti huc aicnodaictewa, Yesule habu damong wacebame yengi yele ailu Sugucnele wacka helocti hosocnolu milockedaing. <sup>15</sup> Inguc aibong mimiloc ngage-ngagesingkolec, yogodi huckolec ye bamadickedaicte. Ailu Sugucnedi bafickeme fangkedaicte. Aime ye bikickolec aigacka, Sugucnedi bikicine hegileme miyac aiyackedaicte. <sup>16</sup> Ilec ailu ngege madickenogale bikicngineng ngengungtihac mifickeyackelu mimilocti baficnagudaing. Monic ye dondonnedi milockedaicte, yogodi wiyac tapilineholec ailu babaficineholec aidaicte. <sup>17</sup> Elaiya ye ngicbenang nongileng ingucnedi mac mi kwenale milockeme mac mi kweme hifa habackang nga nebocine aiwec. <sup>18</sup> Ailu ye hatacmac milockeme sawawacni mac kweme himongti nosing hatacmac kwefickeme fikewec.

*Yefe lilonoga*

<sup>19</sup> Ngic hae-gbafocne, ngengelacni monicti yowa noinele yefe lilolu kosa hikedaidictewa, monicti ye bafickeme ye hatacmac hefaliyedaicte. <sup>20</sup> Ailu ye yanguc ngagedaic, ye ngic bikickolec bafickeme sowacnele yefewacni hefaliyegac, ye ngic yele kwele-asuine homackacni bamoctocnome, bikicine bocyac miyac aidaicte.



## Pita Yedi Molic-molic Hibi Kwelengkewec

### *Mimi-yegeng yowa*

Pita, ye Yesule mic-tengteng monic. Yedi Yesu homalu homackacni gboliyelu fangkeme hifa 34 ngama ingucne motome, hibi yago kwelengkelu Yesule habu gocne yengela saleme hikewec. Dameng iwa ye Roma iwa gawec. Yesule habu yogo yenge Asia prowins nebocina kiwec Saecne fawec, emeina mac-aling faibong, yenge mac-aling iwa gaibong.

Ngic-ngigac Yesu ngagesingkeibong, yengele ngabadi umac yeleibong. Ilec ailu yenge Yesu hegiledaingkale, Pitadi baficebanale hibi yago kwelengkeyelewec.

### *Yowa yago hibi nebocina fagac*

1:1–2 Molic-molic yowa

1:3–2:10 Kristoholec gagale fungine

2:11–4:11 Habu gocne yengeholec madicne gadaing

4:11–5:12 Ngaba yengi umac yelebong umackolec gaibong

5:12–14 Yowa moto-motoine nga wenac-madic yowa

### *Hibile molic-molic yowa*

<sup>1</sup> Na Pita, Yesu Kristole salecebaicne gagabac. Wapongti bawosaecngebame Pontus nga Galata ailu Kapadosia nga Asia ailu Bitinia himongka gagaing, ngic-ngigac ngenge himongtowa yagowa kwilic kwesilu singsalolong kwelu gagaing, ngengele hibi yago kwelengkengelegabac. <sup>2</sup> Wapong Mamacti biyachac ngageme fawecte, yedi bawosaecngebalu yanguc mimoctowec, Tili Asudi ngengela bole bame ngenge sugule-sanangkulu Wapongte bingec aidaingte. Inguc ailu ngenge Yesu Kristole yowa balaiibong, yele sacti wickeme suwecngewec gagaing. Yele kwele-madic nga kwele-mogungtowadi ngengela sawelu fadaic.

### *Gaga-sanangte wangec gagaing*

<sup>3</sup> Wapong ye Sugucnenonggeng Yesu Kristo yele Mamac, ye mimitengineholec. Yedi kwele-sowactowa ngagenolelu Yesu Kristo bagboliyeme homackacni fangkewec. Yefe iwa nongileng gaga bafuwanoleme fike-fike gbolicne fikeibeng. Inguc fikelu wangec gagabeleng. <sup>4</sup> Ye inguc aime mole-damocngineng honocmengka felu baningte biyachac lowec fagac. Aime wiyac yogo mi miyac aidaiecte. Ailu yogo nalic mi dangkedaicte, yogo gbagbacne faginowagac. <sup>5</sup> Ngenge ngage-ngagesingkeic gaebongka Wapong ye tapili-ineholecti damongngebame dameng moto-motoina wasecne aidaingte. Inguc fikendale efeckelu fagac.

<sup>6</sup> Aime dameng kpisicnemac yagowa umac nga lokwesac haicine monic-monic fikengeleme, ngenge sifu wiyac lobewa kwesidaicte, yogolec ngagelu mamang hidulu beliyelu gagaing. <sup>7</sup> Gol silicine ngagegabeleng. Ngic yengi yogo esoickelu silicine nganimotonogale dacka lobong lobeme wosaecaigaing. Aime gol noine yogo fikedaicte. Ailu yogo sifu lobewa miyac aidaiecte. Aime umac nga lokwesacti ngage-ngagesingngineng esoickebong noine yegengkegac, yogo gol ewalilu wiyac feicne aigac. Yesu Kristodi fikelu yegengkedaicte, dameng iwa ngage-ngagesingngineng yogodi mimi-madicneholec nga wac feicneholec ailu alang-babaineholec aidaiecte. <sup>8-9</sup> Ngenge ye dongenginengti mi nganiibong. Ailu sifu kwelenginengti yele angac ngagegagaing. Ailu yanguctihac ye mi nganicaigaing. Ailu sifu ngenge ye ngagesingkegaing. Ailu ngenge ye ngagesingkebong, yedi kwele-asunginang bikicte ameine bame, ngenge wasecne aigaing. Ngenge yogo ngagesilu belic-belic sugucnehac nga wac feicneholec ailu gagaing.

### *Wapongti wiyac baningte aling lowec*

<sup>10</sup> Siduc-mimi ngic yenge ngengi Wapongte kwele-madic banogale siduc-yowa miibong. Ailu ngenge wasecne aidaingte. Aime yengileng yefe yogo ngage-motoningte boletowa balu gaibong. <sup>11</sup> Inguc aibong Kristole Asudi yengele kwelewa game, Kristo ye doic ngagelu lobewa wac feicneholec banowagac, yogo Kristole Asudi kwelenginang gawecte gungka biyachac edalicebame mibong yegengkewec. Ailu yogo male yowa, nga ma damengka fikeme nganinogale donge hilalu gaibong. <sup>12</sup> Donge hilalu yengileng nganingte miyac, yogo ngenge baficngebanogale yowaine mibong yegengkelewece. Aime Wapongti yogo edalicebame yenge ngage-motoibong. Aime Wapongti Tili Asu honocmengkacni

himongka saleme walu tapili yeleme, gocne yenge Siduc Madicne yogo balu ngengela mibong yegengkeme ngageibong. Aime angelo yenge inguchac yogo nganinogale aiyele-caigac.

*Gaga gbolicne*

<sup>13</sup> Ilec ailu kwele ngage-ngagegone wosaelu aibabagone ailu gageicne damongnagulu Yesu Kristole kwesi-kwesi damengka fikelu yegengkedaicte, iwa kwele-madicine balu kwesidaicte. Ga ngage-ngagegone buchuchac yele kwele-madicka sanangne loengka fame wangep gadamec. <sup>14</sup> Ngenge esecne Siduc Madicnele yowa mi ngage-motolu socte angac balaibeibong. Ailu ngenge adu-madec ingucne yowa balaibelu gadabiyeng. Aime socte angacti hatacmac mi damongngebadaic. <sup>15</sup> Wapongti wacngabawec, ye gbagbacne, aime ngenge ingucnehac hadengsoc aibabangineng gbagbacne aidaing. <sup>16</sup> Ilec yanguc kwelengkeicne fagac, “Na gbagbacne. Ilec ailu ngenge gbagbacnehac gadabiyeng.” (Dep 11:44-45; 19:2; 20:7)

*Kristole sacti fuli bacnubawec*

<sup>17</sup> Wapong ye lemi-welemi mi facnogac. Ailu ye ngic-ngigac filesoc filesoc aibabanginengte silicka yowangineng mimoctogac. Aime ngenge ye “Mamac” wackedaingtewa, ngenge yakumac kwilic gagaing, dameng yagowa yele hangocngbame alang bacnolu gadabiyeng. <sup>18</sup> Ngenge esecne ngambofocngineng yengele gagawa moc gaebongka, Wapongti fulingineng balu bikicte muckacni lukecnubawec, yogo siliwa me goldi mi fuli bacngabawec. I yangucte, siliwa nga gol yeke miyac aidabiyecte. <sup>19</sup> Yebac Kristole sacti fuli bacngabawec. Aime Kristole sac yogo wiyac feicnebenang, ye lama madecine monic puling, me sowacneine mikacti depecte lama ingucne wehomawec.

<sup>20</sup> Himong nga sawa mi fikeebocka, Wapongti Kristo biyachac bawosaewec. Bawosaeme ye yakumac dameng moto-motoina ngengele ailu fikelu yegengkewec. <sup>21</sup> Fikelu yefe bafuwangeleme, yanguctihac Wapong ngagesingkelu gagabiyeng. Ye Madecine homack-acni bagboliyeme fangkeme wac feicne lacnowec gagac. Ilec ailu ngengileng Wapong ngagesingkelu yela ngage-ngagengineng lolu wangep gagabiyeng.

*Wapongte yowa faginowagac*

<sup>22</sup> Ngenge yowa noine balaibeibong yogodi kwelenginang suweme, kwelenginengti angac sugucnehac ngagelu aigabiyeng. Ilec ngenge ngic hae-gbafocngineng yengele kwelengineng gbagbacnedi angac kwesac mikac ngagelu damengsoc ayeledabiyeng.

<sup>23</sup> Wapongte yowa yogo gagaineholec ailu sanangne domagac. Yowa yogodi bagboliyecngabame fike-fike gbolicne fikeibong. Yogo socte wasec hucine dongke-dongkeineholec ingucne miyac. Yogo dongke-dongkeine mikac, yogodi kwodu ofelu gaga-sanangkolec aidaicte.

<sup>24</sup> Ilec yowa yanguc kwelengkeicne fagac,

“Ngic-ngigac sasawa himongka gagaing, yenge kpinding ingucne. Ailu wacngineng feicne yogo daling aline ingucne. Yenge kpinding nga daling aliine dangkecaigaing, yogo ingucnehac molongkelu dangkedaingte. <sup>25</sup> Sugucnele yowadibac fafa-sanang fagidaicte.” (Yes 40:6-8)

Yogodi Siduc Madicne aigac. Aime ngic yenge yogo mibong yegengkengeme ngageibong.

## 2

*Asule amuc*

<sup>1</sup> Ilec ailu ngenge sisipilic haicine monic-monic nga kwesac-aibaba ailu hasowac aibaba hagedaing. Ailu ngic-ngigac mi sulecebadabiyeng.

<sup>2-3</sup> Sugucne ye madicne, ngenge yogo biyachac nonganiibong. (Mige 34:8)

Ilec ngenge kogoc gbolicnedi amucte aicnocaigac, silicine ingucnehac Wapongte yowa yogo asule amuc gbagbacne yogolec aingeledaic. Ngenge yogo nolu sugulebong yedi bikicte ameine bame wasecne aidaingte.

*Depec-baba ngic gbagbacne*

<sup>4</sup> Sugucne ye posatowa gagaineholec ingucne, ngenge yela kwesilu gagabiyeng. Ngic yenge posa yogolec posa sowacne milu baickeibong. Aime Wapongtibac posa yogolec ngageme feicne aime yogo hocne bawosaewec. <sup>5</sup> Aime ngenge inguchac posa gagaineholec yele silic aigaing. Aime Wapongti ngenge posa ingucne bacngebalu asule ibu-macine bacngebacaigac. Bacngebame ngenge yeicne depec-babale bingec ailu Asule yefewa

mimitengti depec ingucne logaing, yogo Yesu Kristole ailu Wapongti nganime madickegac.  
<sup>6</sup> Ilec Wapongte hibiwa yowa yanguc kwelengkeicne fagac,

“Ngagegaing, na posa-bosing silicine monic feicne yogo bawosaelu Sion iwa gunungkegabac. Monicti ye ngagesingkedactewa, ye nalic mi gameedaicte.” (Yes 28:16)

<sup>7</sup> Ngic-ngigac ye ngagesingkelu gagaing, ngengela posa yogodi silicine monic alang-babaineholec aigac. Nga mi ngagesingkegaing, yengela yanguc fikedaicte,

“Mac-baba ngic yengi posa monic sowacne milu wickeibong. Aime posa yogodi macte posa-bosing ailu sanangne domadaicte.” (Mige 118:22)

<sup>8</sup> “Aime yenge posa yogodi edebong kwopocebame wawelu ngame-sowac bafuwadaingte.” (Yes 8:14)

Yenge Wapongte yowa wecaigaingte inguc aidaingte, yowa yogo biyachac yengele milu loicne.

<sup>9</sup> Wapongti hocne ngenge ngengung kundungkacni kwesiningte wacngebalu angocina hefolecnglobalu yeicne angocine feicne, iwa loicgebawec.

“Aime ngenge Wapongte pasi tapilicneholec mibong yegengkenale, yedi ngenge aling-focine bawosaecnglobalu. Aime ngictaule depec-baba ngic bacnglobalu gagaing. Ngenge yeicne bingecte aling bacnglobalu ngic-ngigacfocine gagaing.” (Wah 19:5-6; Yes 43:20)

<sup>10</sup> Ngenge esecne Wapongte habu moniyang mi gaibong, miyac. Aime yakumachac Wapongte ngic-ngigacfocine ailu ye habu gagaing. Ngenge esecne Wapongte kwele-sowac monic mi nganilu gaibong. Aime yanguctihac ye kwele-sowac nganilu gagaing.

*Ngage-ngagesingngineng mikac yengeholec galu baficebanoga*

<sup>11</sup> Agofocne kwelenedi ngengele angac ngagegabac, ngenge himong yagowa kwilic gagaing.\* Ilec ngenge kwele esecnele angac haicine monic-monicti kwele-asunginang hudu wecaigac. Aime ngenge yogo hegilelu ganingte sanangne migabac. <sup>12</sup> Ngenge ngic-ngigac Wapong mi ngagegaing, yengele hewacka aibabangineng madicne ailu gadaing. Yengi ngenge yanguc misowalecnglobalu, “Ngenge yefe-yowa hegilecaigaing.” Inguc milubac aibabangineng madicne nganibong Wapongti yengela kwesidaicte, dameng iwa yenge wacine bafedaingte.

*Micne yenge alang bacebadaing*

<sup>13</sup> Ngenge Sugucnele ailu kiya gamang nga ngic sugucne, yengele bagewa galu yowangineng ngagelu gadabiyeng. Yogo ngictaudi tapili feicne balu gagac, <sup>14</sup> aime yele bagewa gawana sasawa gagaing. Ngictaudi bole-yowa yeleme yenge ngic-ngigac aibabangineng sowacne aicaigaing, yenge ameine baduyelecaigac. Nga aibaba madicne aicaigaing, yenge mitengebacaigac. <sup>15</sup> Ngic ngage-wosaecngineng mikac yenge wiyac monic mi ngagemotogaing, yogo yenge ngengi aibabangineng madicne aibong nganilu yowa mi midaing, yogodi Wapongte angac aigac. <sup>16</sup> Ngenge mucti mi witicnglobalu. Aime muc mikac gaga yogo gagaingte ailu sisipilic aibabanonggeng nalic aidabelengte milu mi ngagedaing, miyac. Ngenge Wapongte kwelec kwekwe aling gadabiyeng. <sup>17</sup> Ailu ngenge ngic-ngigac sasawa alang bayelelu ngage-ngagesingkolec ngic hae-gbafocngineng kwelengingte angac ngageyelelu aidabiyeng. Ailu Wapongte hangocnglobalu alang bacnolu ngictau alang bacnodabiyeng.

*Doicka sanangne gadaing*

<sup>18</sup> Kwelec kwekwe ngic gagaing, ngenge sugucnefocngineng alang bacebalu yengele bagewa galu yowangineng ngagelu gadabiyeng. Sugucnefocngineng ulucne nga madicne gagaing, yengele sugu miyac. Ngenge sugucne sowacne momochac inguc aiyeledabiyeng. <sup>19</sup> Monic ye Wapongte yowa kwele ngage-ngageina fame yogo balaibelu game nganilu, sifu ye umacka lobong doic ngagedaicte. Ailu aibaba iwa ye sanangkelu domagacte aibaba yogodi kwele-madicneholec aigac. <sup>20</sup> Aime ngic yengi bikicnginengte ailu wecnglobalu ngenge doicka felu yogolec bagewa sanangne gadaingtewa, yogolec wiyac monic madicne mi fagac, miyac. Ngenge aibabangineng madicne aibong doicka loicnglobalu yogolec bagewa sanangne gadaingte, yogodi Wapongta kwele-madicneholec aigac.

*Kristole hige-yefe*

<sup>21</sup> Ngenge inguc ainingte Wapongti wacnglobalu. Ailu ngenge Kristole hige-yefe balaibeningte ye ngengele ailu doic ngagelu yefe yogo edalicnglobalu.

2:5: Efs 2:21-22; Miye 1:6    2:6: Efs 2:20    2:9: Yef 7:6; 14:2; Yes 9:2; Tit 2:14; Sale 26:18; Efs 5:8    2:10: Hos 2:23  
 \* 2:11: Macngineng noine yogo honocmeng.    2:11: Gal 5:17,24    2:12: Mat 5:16    2:13: Tit 3:1    2:15: 1Pi 3:16  
 2:17: Rom 12:10    2:18: Efs 6:5    2:20: 1Pi 3:14,17    2:21: Mat 16:24; Yoa 13:15

22 “Ye bikic monic mi bafuwawec. Ailu yele mickacni kwesac-yowa monic mi ngageibong.”  
(Yes 53:9)

23 Aime yenge misulec aicnobong ye yowangineng ameine monic mi bafaliyelu miwec. Ailu ye doic ngagelu yenge basowalecebanogale monic mi aiwec, miyac. Ye umacine yogo Wapongti yowa dondonna wosaclu micronale, yele molewa lowec. 24 Ye yeicne socinedi nongileng bikic atickelu malicpongka domawec. Domame nongileng bikickacni homalu yefe dondonne balaibenangte inguc aiwec. Aime ye weibong, doic yogodi ngengele kwelele huc-doic yogo bamadickenale baficngebawec. 25 Ngenge esecne lama ingucne yefe lilolu singsalolong kwelu gaibong. Aime yanguctihac Lama-damong yela biyachac hefaliye kwesibong, yedi hocne kwele-asungineng ngani-damong aingelecaigac.

### 3

#### *Ngawe-ngigac gaga*

1-2 Aime ngigac, ga kwelec kwekwe aicaigaing, yefe yogohac ngawegone yele bagewa galu yowaine ngagelu gadamec. Aime ngic monicti Wapongte yowa mi ngagesingkedaictewa, ngigacine, ga yowa mikac aibabagonedi madicne aicaigic. Aime ngawegone ye aibaba yogo nganime aibabagonedi Sugucnele yefewa nalic fuluckeme hikedaiacte. 3 Ngigac ngenge hodoc-dowecngineng mideckecaigaing. Nga kwanang goldi baicne socnginang locaigaing. Ailu ngakpi-kpoluc ngani-nganiine madicne holecaigaing. Aibaba yogodi aibabangineng madicne mi bafuwadaicte. 4 Aime asungineng ulucne nga kwele-mogungkolecti kwelengineng kwelina sangke-sangke fagac, yogodi ngani-ngani madicne bafuwadaicte. Yogolec hibile tapiliine mi wacaigac ailu faginowagac. I yangucte, Wapongte haicka yogodi wiyac feicne aigac. 5 Ngigac esecne Wapongte bingec gaibong, yenge silicine ingucnehac hibingineng bawalu ngawefocngineng yengele yowa ngagelu Wapongta ngage-ngagengineng lolu wangec gaibong. 6 Yogo Sara ingucne, ye ngaweine Abrahamte yowa balaibelu “sugucnene” milu gawec. Ngenge aibaba madicne aigacgu ngic me wiyac monicte mi hangocngebabacka, ngenge Sara adufocine ailu gaigaing.

7 Ngigacte tapili, yogo ngictesoc miyac. Ngic ngigackolec, ga yogo ngagesilu yogolec silicka yeholec gadamec. Aime ga gagale kwele-madic yogolec mole-damoc yogo yeholec momochac badabiyeacte. Aime wiyac monicti gale mimilocte aka holedaickale ailu, ngicagone alang bacnolu gadamec.

#### *Kwele-angacka doficnagudabeleng*

8 Yowa kpatulelu mibe, ngenge sasawadi kwele ngage-ngagengineng moniyang fadaic. Ngenge kwele-sowac aiyelelu kweledi angac ngagelu aiyelelu kwele-sowacka baficebalu ngengileng bawacnagulu gadabiyeng. 9 Ngic-ngigac yenge sowacne aingelebong, ngenge sowacne ameine mi aiyeledabiyeng. Ailu yenge misofoc aingelebong, ngenge ameine misofockolechac mi aiyeledabiyeng, miyac. Mimi-madic yogo ngengele mole-damoc ainale wacngebaicne. Ilec ailu ngengi yenge inguchac mimi-madic milu edocebadabiyeng.

10 I yangucte,

“Monic ye gagale angac ngagelu gagac, ailu dameng madicne nganinogale aicnolu gagac, ye yowa sowacne nga kwesac-yowa midaickale, micine damongkedaic.

11 Ye aibaba sowacne lobe holecnolu aibaba madicne ailu gadaic.

Ailu ye kwele-mogungte yefe bafuwanale bole sanangne badaic.

12 Sugucnedi ngic-ngigac dondonne yengela donge hilalu mimilocnginengte hedec locaigac.

Nga sowacne aicaigaing, yengebac lobe holecebalu hegilecebacagaic.” (Mige 34:12-16)

#### *Doickolec gaga*

13 Ga aibaba madicne ainogale mamang hidulu aidamectewa, weni yengi basowalecgu-daingte? Yenge nalic mi basowalecguidaingte. 14 Aime sifu ngenge dondonne gaganginengte ailu, yengi ngenge doicka locngebadaingtewa, yogo ngenge kwele-angackolec.

“Ngenge yengele damungebame hangoc mi aidaing.”

(Yes 8:12)

15-16 Aimebac ngenge Kristo kwelenginang lobong Sugucnengineng aime balu gadaing. Ailu madicnengineng yogolec wangec gabong lobewa kwesidaicte, yogolec fungine sasawadi uwangelebong ameine bafaliyelu edocebaningte damengsoc efeckelu gadabiyeng. Ngenge ameine uwanogale ngageboc mikac, ulucne nga alang babaineholec ailu kwele ngage-ngagengineng gbagbacne galu ameine bafaliyelu edocebadaing. Ngenge inguc aidaingtewa, Kristole ailu aibabangineng madicne aicaigaing. Yogolec ailu ngic mimi-soling aingelecaigaing, yenge gameebadaicte. 17 Monic ye aibabaine madicnele ailu

Wapongti ngagecnogacka doicka lodaingte, yogodi madickedaighte. Aime monic ye aibabaine sowacnele ailu doicka lodaingte, ye mi mitengkedaing.

*Kristo doicka loibong*

<sup>18</sup> Kristodi Wapongte emewa locngebanale alecine moniyang bikicte amengineng bame doicka loibong. Ngic dondonnedi ngic-ngigac nongileng dondonne miyac, nongilengte ailu inguc aiwec. Ye sockapec webong homawec, aime asuwapecakabac bagholiyeme gagac. <sup>19</sup> Galu aleng gocne muc-macka gagaing, yengela hikelu yowa edocebalu weduyelewec. <sup>20</sup> Noa ye wageine baemewa aleng yenge Wapongte yowa hegileibong, yogo yengela hikewec.

Noale damengka Wapongti ngic-ngigac yengele tatakic mikac wangecngineng gawec. Aime Noa ye wageine badickeme, dameng iwa Wapongti ngic-ngigac efecnemac, 8 sugu misawacni baicebame wasecne aibong. <sup>21</sup> Misa yogodi Misa-lowacti umackacni bamoc-tocngebogac, yogolec ilucine aigac. Misa-lowac yogo socte wonong monic mi suwey-ackedaighte, miyac. I yangucte, Yesu Kristodi homackacni gboliyelu fangkewecte ailu, kwele ngage-ngagening madicne aigacte, misa-lowac yogodi Wapongte haicka inguc yegengkedaighte. <sup>22</sup> Yesu ye biyachac honocmengka fewec. Ailu ye Wapong foleinapecka gagac. Aime angelo nga wiyac gocne wac sugucne baicne, ailu wiyac gocne bole-yowa tapilinginengkolec, yogo yenge yele bagewa biyachac locebaince gagaing.

## 4

*Wapongte yowa balaibenoga*

<sup>1</sup> Kristo ye sockolec doicka loibong. Aime ye doic ngagewec, silicine ingucnehac ngenge nalic ngagedaingte, ngage-ngage yogodi malekungineng ingucne aidaic. Monic ye sockolec game doicka loibongka, ye bikicte yefe biyachac hegilewec. <sup>2</sup> Ilec ailu yanguctihac sockapec domalu ye ngic-ngigac yengele angac haicine monic-monic hatacmac mi balaibedaicte. Yebac Wapongte ngage-ngage nga angac sugu balaibedaicte. <sup>3</sup> Ngic-ngigac Wapong mi ngagegagang, yengele socte gagale angac yogolec aibaba yanguc fagac. Selo-boic aibaba nga ngani-angac aicaigaing. Ailu misa sanangne alingfocngineng yengeholec nolu kwelengineng sifuweme gee wecaigabiyeng. Ailu yefe lilolu siduc-gbong haicine monic-monic balaibecebalu alang bacebacaigaing. Ngenge esecne aibaba ingucne ailu gaibong, aibaba yogolec dameng biyac miyac aigac. <sup>4</sup> Yenge aibabangineng silicine haicine monic-monic kosabenang homacnehac aibong, ngenge yengeholec hatacmac mi taockelu gagaing. Aime yenge yogo nganilu ngagebong silicine monic aime misulec aingelegaing. <sup>5</sup> Aime Wapong ye ngic gbolicne nga homaicne aibabangineng mimoc-tonale efeckelu gagac, yenge yela funginengineng midaing. <sup>6</sup> Ngic-ngigac yenge Siduc Madicne mime yegengkeme ngagelu homaibong, yenge esecne sockapec gaga gaibong, yogolec ameine homaibong. Ailu sifu asuwabac Wapong gagac ingucnehac nalic gadaingte.

*Bole haicine monic-monic ngelewec*

<sup>7</sup> Wiyac sasawa yogo miyac ainingte dameng biyac bangkalegac. Ilec ngenge mimiloc bole baningte kwele basifuc mi ailu damongnagulu gadabiyeng. <sup>8</sup> Kweledi angac ngagelu ainagulu gaga yogodi yengele bikic haicine monic-monic bocyac someckeyackegac. Ilec ngenge mamang hidulu kweledi angac ngagelu ainagulu gadabiyeng, yogodi wiyac feicne aigac. <sup>9</sup> Ngenge tatakic nga lobe-yowa mikac galu kwele-madicka hefolec-nagulu macka lonagulu damongnagudabiyeng. <sup>10</sup> Wapongti ngageboc mikac kwele-madicinele tapili haicine monic-monic botoc balu ngelewec. Ilec ngenge Wapongte kwele-madicka galu filesoc filesoc baficnagulu wiyac yogo madicne damongkelu gadabiyeng. <sup>11</sup> Monic ye yowa noine ngic-ngigac yengela mime yegengkegacka, ye Wapongte yowa balaiabelu fungine mime yegengkedaic. Nga monic ye baficebalu gacaigacka, ye Wapongti tapili lacnoaigac, yogolec silicina babafic bole badaic. Inguc aibong ngic-ngigac yenge aibaba sasawa yogo nganilu, Yesu Kristole ngagelu Wapong wacine bafedaingte. Yela wac feicne nga tapili moto-motoine mikac fafeginowagac, yogo foinac.

*Doicka galu beliyedabiyeng*

<sup>12</sup> Agofocne kwelenedi ngengele angac ngagegabac, lokwesac doickolec fikengeledaighte, yogolec mi kwatackedaing. Aime yogo fikengeledaighte, yogodi aibaba fulune mi aigac. <sup>13</sup> Aime inguc fikengeledaighte iwa, ngenge Kristoholec taockelu doic ngagelu yogolec silicina beliyedaing. Inguc aibong ye gagu wac feicne fikelu yegengkedaighte, dameng iwa ngengele belic-belic sugucnehac fikedaicte. <sup>14</sup> Aime ngic-ngigac yengi Kristole wacte ailu

yowa kwelu midelec aingeledaingtewa, nenge kwele-angackolec. Iyangucte, yenge inguc aingelebong, Wapongte Asu wac feicneholec, ye ngengele kwelewa gagac. <sup>15-16</sup> Aime monic ye wacine, “Kristole aling,” inguc miningte doic ngagedaictewa, ye yogolec mi gameedaic. Ye wac yogolec ailu Wapong wacine bafedaic. Aime ngengelacni monicti ngic-wewe, me woc-wiyac hise-baba, me kindololo ngic gacaigac, me ngic-ngigac gocne yengele wiyacte andac ailu kwelina haucaigac, ye aibabaine ingucnele ailu doic ngagelu gameedaicte. Ilec nenge aibaba ingucne mi ailu gadaing.

<sup>17</sup> I yangucte, Wapong ye molickelu yeicne golowacfocine yengela aibabangineng wosaelu mimoctonale damengngine bangkalegac. Aime ye nongilang boleine yogo molickelu badaictewa, aling gocne yenge Siduc Madicnele yowa kwecaigaing, yogo yengela boleine ingucnehac taockelu aibabanginengte ameine umacnehac yeledaicte.

<sup>18</sup> Aime,

“Ngic-ngigac dondonne gacaigaing, yenge wasecne aidaingte, yogo efecne miyac, umacineholec. Aibaba ingucne fikeyeledaictewa, bikic-baba ngic nga Wapong lobe holecnocaigaing, yengela wenuc fikedaicte? Wapongti amengineng umacnebenang yeleme doictowa ngagedaingte.”

(Ynn 11:31)

<sup>19</sup> Ilec ailu ngic-ngigac gocne Wapongti ngageyelewecte doic ngagecaigaing, yenge aibabangineng madicne aidaing. Ailu kwele-asungineng buchuchac Wapongti himong nga sawa bafuwawec, yele molewa lodaing. I yangucte, ye mic-yowaine balaibelu gagac.

## 5

### *Ngic micne*

<sup>1</sup> Kristo ye doic ngagewec, yogo dongenedi nganiiba. Aime yogolec mibasanang ailu gagabac. Ailu yele wac feicne fikedaicte, iwa nongileng momochac gadabelengte. Yesule habu damong, na nengeholec inguchac bole yogo balu gagabac. Ilec ailu sanangne milu yanguc edocngebagabac, <sup>2</sup> Lama-damong ye lamafocine madicne damongbacaigac, silicine ingucnehac nenge Wapongte habudi ngengele hewacka gagaing, yenge madicne damongbadabiyeng. Bole yogo kwele-umacka mi badabiyeng, nenge kwele-madicka bole yogo babong Wapongti ngageme madickedaicte. Ailu nenge ngage-ngagenginang hiye-monengkolec ainingte bole yogo mi badabiyeng. Nenge bolengineng yogo mamang hidulu badabiyeng. <sup>3</sup> Wapongti habu ngelewec, yogo ngengi yengele feicne ingucne mi gadabiyeng. Nenge aibaba madicne ngic-ngigac habu yogo edalicebabong, yenge yogo nganilu balaibedaing. <sup>4</sup> Inguc gaebongka Damong Sugucnedi lama-damong ingucne fikelu yegengkedaicte, dameng iwa yedi wac feicne dangke-dangkeine mikac ngeledaicte.

### *Ulucne gaga*

<sup>5</sup> Soc-gboli nenge inguchac damongfocngineng yengele bagewa galu yowangineng ngagelu gadabiyeng. Ailu nenge sasawadi bawacnagudabiyeng, yogodi ngakpi-kpoluc ingucne holebong haudaic. I yangucte,

“Wapongti ngic soc bafefe gagaing, yengele takickeme ngaba aigac. Nga soc-kwelengineng bawalu gagaing, yenge kwele-madic aiyelulu gagac.”

(Ynn 3:34)

<sup>6</sup> Ilec nenge Wapongte mole sanangne yogolec bagewa bawacnagudaing. Inguc gaebongka Wapongti yeicne damengka wacngineng bafedaicte. <sup>7</sup> Ye yeuctihac ngani-damong aingelelu gagacte, nenge kwele-umacngineng sasawa yela lodabiyeng.

### *Sanangne domadaing*

<sup>8</sup> Ngabangineng Aleng Sugucnengineng, ye laion ingucne aukwelu lolickelu ngic-ngigac gbocebanale basacebalu boletowa balu gagac. Ilec nenge sanangne domalu deboc-gboli galu damongnagulu <sup>9</sup> ngage-ngagesingnginengti Aleng Sugucnenginengte yowa wepackedaing. Wepackelu yanguc ngagedaing, ngage-ngagesingkolec ngic haefabofcngineng himongne himongne gagaing, yenge doic ingucnehac ngagelu gagaing.

<sup>10</sup> Wapong kwele-madic fileine, yele wac feicnedi fafa-sanang fagac, iwa ngengi Yesu Kristoholec ganingte yedi wacngebawec. Ailu nenge doicka dameng bangkacnemac gaebongka, Wapong yeuctihac bamadicnglobalu nenggac ngiyengeleme sanangkelu domadaingte. <sup>11</sup> Ye Tapili fileinedi gaga-sanang gagingowagac, yogo foinac.

### *Wenac-madic yowa*

<sup>12</sup> Sailas ye nenge-ngagesingkolec ngic hae-gbanonggeng yele yanguc ngagelu migabac, ye bolewa sanangne domalu baficnume hibi bangkacne yago kwelengkenggelegabac. Na Wapongte kwele-madic noine yogolec mibasanang ailu mibe yegengkegac, nenge yogolec

hewacka sanangne gadabiyeng. <sup>13</sup> Aime Babilon\* taonka Yesule habu gagaing, Wapongti yenge nga ngenge momochac bawosaecngebawec, yenge nga madecne Mareko, yenge wenac-madic yowa ngengela lobong fugac. <sup>14</sup> Ngenge wenac-madic milu kwele-angacka molewa babac ainagudaing.† Ngic-ngigac sasawa Kristoholec wetackelu gagaing, kwele-mogungti ngengela fadaic.

---

**5:12:** Sale 15:22,37-40; 12:2,25; 13:13    **\* 5:13:** Babilon, yogo Roma taonte nangeng yowa monic, yedi kwelengkewec.  
**5:13:** 2Tim 4:11    **† 5:14:** Pitale damengka yenge aibabanginengte ailu yanguc kwelengkewec, "kwele-angackolec muducnagudaing."

## Pita Yedi Hibi Monic Hatacmac Kwelengkewec

### *Mimi-yegeng yowa*

Pita, ye Yesule mic-tengteng monic. Yedi Yesu homalu homackacni gboliyelu fangkeme hifa 36 ngama ingucne motome, hibi yago kwelengkelu Yesule habu gocne yengela saleme hikewec. Wewedu gocne yengi kwesac-yowa milu weduyeleibong. Ilec ailu Yesule yowa noine sanangne balu domaningte kwelengkeyelewec.

### *Yowa yago hibi nehocina fagac*

1:1-2 Wenac-madic yowa  
1:3-21 Ngage-ngagesingte gaga  
2:1-22 Kwesac-yowale sawang-yowa miwec  
3:1-18 Yesu hatac kwesidaicte

### *Hibile molic-molic yowa*

<sup>1</sup> Na Saimon Pita, Yesu Kristole kwelec kwekwe ngic nga salecebaicnedi hibi yago kwelengkengelegabac. Yesu Kristo ye Wapong nga Asa-baba ngicnonggeng, ye dondonne. Ilec ailu nongileng ngage-ngagesingte fengngine moniyang bafuwanoilewec. Yogo wiyac feicnebenang. Ngic-ngigac inguc ngagesingkegacing, ngengele kwelengkengelegabac. <sup>2</sup> Aime ngenge Wapong nga Sugucnenonggeng Yesu yeke momochac ngagecepabong, yekele kwele-madic nga kwele-mogungtowadi ngengela sawelu fadaic.

### *Yeicne ingucnehac gaga*

<sup>3</sup> Wapongti yeicneholec ganangte madicnebenangine nga yeicne wac feicne yogowa wacnubawec. Nongileng Wapong ye noine inguc ngagebeng, yeuctihac kwesilu yeicne gaga nga yefe balaibenangte tapili sasawa nolewec.

### *Ngage-ngagesingkolec gaga*

<sup>4</sup> Aime yefe yogowa Kristodi mimipangine madicne nga feicne yogo nolelu locnubame gagabeleng. Inguc aime ngenge Wapongte gagawa taockelu himongte angac yogo hegilelu nalic gaging. <sup>5</sup> Ngenge gaga yogolec ailu efeckelu sanangne domalu ngage-ngagesingnginengti aibaba madicne bafuwadaing. Aime aibabangineng madicnedi ngage-ngage-motoc bafuwadaing. <sup>6</sup> Aime ngage-ngage-motocnginengti damongnegebame gaga bafuwadaing. Bafuwame gaga yogodi sanangne gaga bafuwadaing. Aime sanangne gagadi Wapongte yowa balaibelu bafuwadaing. <sup>7</sup> Wapongte yowa balaibe-balaibedi ngic hae-gba kweledi angac ngagenagulu gaga bafuwadaing, yogodi ago aiyelelu kweledi angac ngagelu aiyelebong gaga bafuwadaing.

<sup>8</sup> Aibaba sasawa yogodi ngengela sugulelu sanangne fayackegacka, ibac ngenge Sugucnenonggeng Yesu Kristo ye ngage-motolu gaging. Gabong gaga yogolec noine madicne bocyac fikengeledaicte. Ilec monic mi kpungkedaingte. <sup>9</sup> Aime monic ye gaga yogo mi facnogacka, ye donge-pisic ingucne ailu wiyac dalicka yefe nalic mi ngani-motodaicte, silicine yogolecsoc. Ye hikicine esecne suweicne, yogo biyachac ngigeckewec.

<sup>10</sup> Ngic hae-gbafocne, ngenge Wapongti biyachac wacngebalu bawosaecngabawec. Ilec ngenge mamang hidulu sanangne domaning. Inguc aidaingtewa, nalic mi wawedaingte. <sup>11</sup> Inguc aibong yedi kwele-madictowa ainglelu, Sugucne nga Asa-baba ngicnonggeng Yesu Kristo yele gaga-sanangte ngani-damongka bacngebalu fedaicte.

### *Pitadi yeicne homanale yowa hatac edocebawec*

<sup>12</sup> Ngenge yowa noine biyachac ngagelu balu gaibong, yogo ngagegabac. Ailu sifu damengsoc yowa yogo hatacmac edocngabanogale ngagegabac. <sup>13-14</sup> Ailu socne yago hegilenogale damengngine bangkalegac, Sugucnenonggeng Yesu Kristodi yogo biyachac mime yegengkeme ngageiba. Ilec sockolec gagabac, iwa yowa gocne hatacmac edocngabanogale ngagebe dondongkegac. <sup>15</sup> Aime na bole yogo damengsoc mamang hidulu balu gagabac. Bagacgu homabe, yowa yogo mi ngigecegebadaicte.

### *Sugucne dongenonggengti nganiibeng*

<sup>16</sup> Nonge Sugucnenonggeng Yesu Kristole tapili nga kwesi-kwesile miibeng, yogo siduc esecne kwesacineholec taokebeng angacine ainale mi miibeng. Nonge yele tapili nga wac feicne dongenonggengti nganilu ngageibengete ailu yowa yanguc migabac. <sup>17</sup> Wapong



Mamac, ye Tapili nga Wac feicnetowaholec, yedi Yesu alang bacno-bacno nga wac feicne lacnome yowa-malacinedi fikelu yanguc miwec,

“Yogo nale Madec, kwelenedi yele angac ngagegabac. Na ye ngani-angac aicnogabac.”  
(*Mat 17:5; Mrk 9:7; Luk 9:35*)

<sup>18</sup> Nonge Wapong yeicne tikiwa yeholec momochac domabeng yowa-malac yogodi honoc-meng kacni fikeme ngageibeng.

### *Siduc-mimi yengele yowa*

<sup>19</sup> Inguc ngageibengte siduc-mimi ngic yengi yowa esecne kwelengkeibong, yogo nongilang sanangne fagac. Yowa yogo hifa monic ingucne ailu, mac-himong kundung fagac, iwa kweme angolegac. Yowa yogo ngagesidaing. Ngagesigacgu ubiyacte asocmengti kweleng-inang angolelu bacngebame yegengkedaingte, yogo Yesule kwesi-kwesi dameng ingucne aigac. <sup>20</sup> Aime siduc-mimi ngic yengele yowa sasawa Wapongte hibiwa kwelengkeicne fagac, yogo yenge yengileng kwelenginengte yowa monic mi miibong, miyac. Ngenge yogo ngage-motodaing. <sup>21</sup> I yangucte, siduc-yowa yogo ngic angacka fikeme mi miibong, yogo Tili Asudi bacebame Wapongtacni yowa kwesime miibong.

## 2

### *Siduc-mimi kwesacine*

#### *Yud 4-13*

<sup>1</sup> Esecne Israel ngic-ngigac yengele hewacka siduc-mimi ngic kwesacine gaibong, ingucnehac ngengele hewacka wewedu kwesacine inguchac gadaingte. Yenge mimi-sifuc yowa gocne kwesacine milu ngengela bakwesilu ngage-ngagesingnineng basowaledaingte. Aime Sugucnedi biyachac fuli bacebawec, yenge ye inguchac bisockelu yengungtihac umac yengileng feiwa lobong, yogodi basowalecebadaicte. <sup>2</sup> Wewedu kwesacine yenge aibaba sowacne haicine monic-monic gameineholec aibong, ngic-ngigac bocyacti yogo balaibedaingte. Aime ngic-ngigac gocne yengi aibaba yogo nganilu yowa noinele yefe yogolec misulec aidaingte. <sup>3</sup> Aime wewedu yogo yenge ngengele woc-wiyacte hane aibaba ailu kwesac-yowa milu ewalicngebadaingte. Aime Wapongti pasi ingucnele esecnehac mimocowec. Ailu yenge yowawa locebalu basowalecebadaicte.

### *Ameine baduyeleadaicte*

<sup>4</sup> Angelo yenge bikic bafuwabong, Wapongti mi olocebawec, yenge dac-sanangka wicebame haubong. Haubong yedi kundung sanangnele long iwa witicebawec. Witicebame mimoc-to-mimoc-tole damengte wangec gagaing. <sup>5</sup> Aime Noale damengka ngic-ngigac habu sugucnedi Wapongte yowa mi ngagebong mi olocebawec, miyac. Ye mime misa-lumongti ofelu yenge somecebame homaibong. Aime Noa ye aibaba dondonnele edocebawec, ye nga yeholec ngic-ngigac 7, yenge sugu olocebawec. <sup>6</sup> Aime Sodom nga Gomora taon, yeke mimoc-tocepalu basowalecepame dac defenginec sugu fawec. Aime ngic-ngigac Wapongte yefe lilolu gagaing, yengela gacgu pasi ingucnehac fikenale edalicebalu inguc aiwec. <sup>7</sup> Yenge selo-boic aibaba, nga sowacne haicine monic-monic ailu Wapongte yowa weibong. Aime Loti ye ngic dondonnedi aibabangineng ingucne nganilu kweleine umaleme Wapongti olockewec. <sup>8</sup> Ye ngic dondonnedi yengele hewacka gawecte, hadengsoc yefeyowa welu gaibong, yogo nganilu kweleinedi yengele aibaba sowacnele ailu umac balu takickeme gawec.

<sup>9</sup> Ngenge yogo nganilu Sugucnele yefe yanguc ngagedaingte, ngic-ngigac Wapong alang bacnolu yele yowa balaibecaigaing, yengela lokwesac fikeyeleme, Sugucnedi yenge olocebadaicte yogolec tapili facnogac. Nga ngic-ngigac dondonne mi gacaigaing, yenge muc-macka locebame ngiyeebongka, yowawa locebadaicte yogolec dameng kwesidaicte. <sup>10</sup> Ngic-ngigac yenge kwele esecnele angac balaibelu aibaba sowacne wonongkolec aicaigaing, yedi yengela inguc hocne aicaigac. Yenge sugucnengeng lobe holecnolu yowainele mife-miwa aicnolu yengileng angac balaibelu hangoc mikac sawawale angelo wac feicneholec sulecebadaingte. <sup>11</sup> Aime angelo tapilingineng feicnebenang yenge sifu Sugucnele haicka yenge mi wosaclu sulecebacaigaing.

### *Wewedu kwesacine*

<sup>12</sup> Sic yenge ngage-ngagengineng mikac angacngineng balaibecaigaing, yenge sebuwa mucti bacebame wecebaningte fikecaigaing. Aime wewedu kwesacine yenge sic ingucne moc angacngineng balaibecaigaing. Ailu wiyac gocne mi ngagegaing, yogo yowa milu

sulecebacaigaing. Ailu yenge aibabangineng sowacne balaibebong yogodi basowalece-badaicte. <sup>13</sup> Yenge aibaba sowacne ailu yogolec ameine badaingte. Yenge mic-heloc ailu wenac hewac-hewacka nosing nga misa sanangne bocyac nolu lolic holeningte aiyele-caigac. Aime yenge ngengeholec nosing mic-walec momoc nocaigaing, iwa yenge aibaba wonongkolec nga gameineholec ailu beliyelu gacaigaing. <sup>14</sup> Inguc galu aibaba sowacne bocyac ailu selo-boic ngigac yengele angac ngagelu heloc ailu bikic bafuwacaigaing. Ailu ngic-ngigac ngage-ngagesingka mi sanangkeicne, yenge aibaba sowacna yowa heloc aiyelecaigaing. Ailu hane aibaba ainogale wedunagucaigaing. Aling ingucne yenge Wapongte aallice bagewa gagaing.

<sup>15-16</sup> Balam Beor madecine, ye moneng-mafale angac ngagelu Wapongte yefe lilolu hiye-monengte bole bawec. Bame donggi yowa mi micaigacti, ngic-malac ingucne yowa milu haneckewec. I yangucte, Wapongte siduc-mimi ngicti yefe lilolu aibaba kapaine aidaickale, aka holecnowec. Aime wewedu kwesacine, yenge Balamte yefe balaibelu yefe dondone hegilelu yefe lilolu gagaing. <sup>17</sup> Misa dongeine dike-dikeine, nga lai-yafala gbelong yeki mac mikac kaguwa moc welu igockecaigaic, wewedu kwesacine yenge silicine ingucne, yowa mipangkecaigaing, yogo noine mi fikecaigac. Wapongti yengele mac ngiye-ngiye yogo kundung saecnebenang iwa ganingte loyelewec.

<sup>18</sup> Ngic-ngigac yefe liloaigaing, yengelacni gocnedi baickelu yefe dondonna hikebong, wewedu kwesacine yengi yengela yowa heloc aiyelegaing. Ailu yowa sugucne noine mikac yogo milu selo-boicte yefe nga kwele esecnele angacka hatacmac bacebacaigaing. <sup>19</sup> Aibaba sowacnele yefedi wewedu kwesacine witicebame, yenge yanguc mipangke-caigaing, “Ngiç-ngigac yowanonggeng ngagedaingte, ngenge wiyac monicti mi witicng-e-badaicte.” Inguc milu yefe liloaigaing. I yangucte, ga wiyac monicti witicgudaictewa, ye le kwelec kwecnodamecte. <sup>20</sup> Aime yenge Sugucnenonggeng nga Asa-baba ngicnonggeng Yesu Kristo ngage-motolu himongte aibaba wonongkolec biyachac hegileibong. Ailu yenge hatacmac bikickolec aidaingtewa, umactowanginengkolec aidaingte. Aime umac yogodi esecne umackolec gaibong, yogo ewaligac.

<sup>21</sup> Monic ye Sugucnele ung-yowa gbagbacne balu yefe dondonna ngagelu gagac, ye iwacni hatacmac hefaliyelu umac sugucnehac bafuwadaicte. Entacka ye molickelu yefe dondonna mi ngagedecka umac efecne aidec. <sup>22</sup> Aime yowa monic yanguc milu kwelengkeicne fagac,

“Hoda ye mengulu memenguine yogo hatacmac hefaliyelu nocaigac.” (Ynn 26:11)

Nga

“Bec ye misa lowalubac hatacmac nolac lowadaicte.”

Yowa yogolec noine yengele gagawa fikelu gagac.

### 3

#### *Kristo kwesidaicte*

<sup>1</sup> Agofocne kwelenedi ngengele angac ngagegabac, ngengele hibi alecine yaeckang yago kwelengkelegabac. Hibi yaeckang yagodi kwele ngage-ngageningeng hole-gbolyiyeme ngage-motolu gbagbacne gadabiyeng. <sup>2</sup> Wapongte siduc-mimile bingec, yenge wiyac lobewa fikenale yowa yogo biyachac kwelengkeibong. Aime Sugucne Asa-baba ngic-nonggengti ung-yowa salecebaicne yeleme, yengi ngengela kwesilu yogo edocngebaibong. Aime yogo ngagebong fawecte hatacmac hole-gbolyiyengelegabac.

<sup>3</sup> Ngenge yanguc ngage-motodaing, dameng moto-motoina mimi-soling ngic-ngigac gocne yenge fikedaingte. Fikelu yengileng aibaba sowacne balaibelu kwele fangke-fangke nga mimi-soling aingelelu <sup>4</sup> yanguc midaingte, “Ngiç kwesinale mipangkewec, ye weni yogo gagac? Wapongti molickelu wiyac sasawa mime fikeibong. Aime ngesa-mamacfocnonggeng homaibongkacni doma ofegacgu yakumac gagabeleng, iwa wiyac sasawa esecnehac fikelu fawec, ingucnehac yakumac fikelu fagac. Ilec Yesu mi kwesidaicte.”

<sup>5</sup> Yenge inguc milu siduc yanguc fagac, yogo hegilegaing. Wapongti esecnebenang yowa mime sawa fikewec, aime himong misawacni fikelu ofe yegengkelu misaholec fawec. <sup>6</sup> Aime ye gacgu hatacmac misa edome sugulelu himongka wiyac sasawa fawec, yogo someckeme sowalelu miyac aiyackewec. Yenge siduc esecne yogo hegilegaing. <sup>7</sup> Aime Wapong ye hatacmac yowa mime, himong yago nga wiyac sasawa yanguctihac sawawa fayackegac, yogo dacte wangep locebame fagaing. Gacgu ngic-ngigac Wapong lobe holecnolu gagaing, yenge ye yowawa ameine balu sowaledaingte, dameng iwa himong nga wiyac sawawa fayackegac, yogo dacti lobeyackedaicte.

<sup>8</sup> Agofocne kwelenedi ngengele angac ngagegabac, ngenge wiyac moniyang yagolec mi ngicecnebadac, Sugucnele ngage-ngagewa hadeng moniyang yogo hifa 1 taosen ingucne aigac. Aime hifa 1 taosen, yogo hadeng moniyang ingucne aigac.

<sup>9</sup> Sugucne ye kwesinale mipangkewec, dameng yogo igockeme uneng hikelu gagac, ngic gocne yengi inguc micaigaing. Aime inguc miyac. I yangucte, ngic-ngigac dac-sanangka hauningte takicebacaigac. Ngic-ngigac sasawadi kwele-hefaliyec ainingte aicnogac, yogolecbac ye tatakic mikac wangecngineng gagac. <sup>10</sup> Aime hise-baba ngic yengele kwesi-kwesi dameng mi ngagecaigabeleng, silicine ingucnehac Sugucnele damengtowa yogo kwesidaicte. Dameng iwa sawawa wiyac sasawa fayackegac, yogo dacti lobeyackedaicte. Aime sawa yogo uctowaineholec aockeme miyac aiyackedaicte. Aime himong nga wiyac sasawa moledi baicne feina fayackegac, yogo hatacmac mi fadaingte.

<sup>11-12</sup> Inguc ailu wiyac sasawa sawawa fayackegac, yogo dacti lobocebayaackeme miyac aiyackedaicte. Ilec ailu ngenge gagangineng damongkelu gbagbacne galu Wapongte yowa sebilelu alang bacnolu gadabiyeng. Inguc galu Wapongte damengtowa kwesidaicte, yogolec hataecnolu wangec gadabiyeng. <sup>13</sup> Aime himong nga sawa gbolicne iwa wiyac dondonnedi sugu fadaicte, yogo lobewa fikenale mipangkewec, nongileng yogolec wangec gagabeleng.

#### *Damongnagulu gadabeleng*

<sup>14</sup> Ilec ailu agofocne kwelenedi ngengele angac ngagegabac, ngenge wiyac yogolec wangec galu Yesule haicka domabong yanguc bafuwadaic, ngenge kwele-moniyang galu gbagbacne nga wonong mikac gagabiyeng. Inguc fikenale filesoc mamang hidulu gadabiyeng. <sup>15</sup> Aime ngenge wasecne ainingte Sugucnenonggengti tatakic mikac boleine balu gagac, ngenge yogo ngagesidaing. Aime ngic hae-gbanonggeng Pol kwelenedi yele angac ngagegabac, Wapongti ngage-ngage-motoc lacnome, ye yogo balabelu yowa yogo hocne ngagesilu hibiwa kwelengkengeme wafeibong. <sup>16</sup> Aime ye hibi sasawa kwelengkewec, yowa yogohac yago kwelengkengelegabac, yogo momochac mime yegengkegac. Aime ye yowa kwelengkengewec, yogo Wapongte hibi. Yowa gocnedi yegena mi aigac. Ilec ailu ngic-ngigac gocne ngage-ngage-motocngineng mikac gagaing, yenge yowa yogo bafaliyebong yefe monicka hikecaigac. Ailu Wapongte hibi gocna yowa fagac, iwa inguchac aicaigaing. Ngic-ngigac yogo yenge yengung basowalecnagudaingte.

<sup>17</sup> Agofocne kwelenedi ngengele angac ngagegabac, ngenge yogo biyachac ngageibong. Ilec yefe-yowa wecaigaing, yengi mengocnebabong ede-sufalelu yefe sanangne iwacni wawedaingkale, ngenge damongnagulu sanangne gadabiyeng. <sup>18</sup> Aime Yesu Kristo ye Sugucnenonggeng nga Asa-baba ngicnonggeng, ngenge yele kwele-madic nga ngagenagetowa iwa sugulelu sanangkedabiyeng. Ye yakumac nga damengngine moto-motoine mikac wacine bafedabeleng, yogo foinac.

## Yoane Yedi Molic-molic Hibi Kwelengkewec

### *Mimi-yegeng yowa*

Yesu homalu homackacni gboliyelu fangkeme hifa 60 ngama ingucne motome, Yoane, ye Yesule mic-tengteng monic, yedi hibi yago kwelengkelu Yesule habu gocne yengela saleme hikewec.

Ngic gocne yengi kwesac-yowa yanguc miibong, “Soc-biuc yogo wiyac sowacne sugu aigac. Ilec Yesu ye soc-biuckolec noine mi aiwec. Aime Yesu ye Wapongte Madec noine miyac. Ailu Yesu ye hatacmac mi kwesidaicte.” Yenge kwesac-yowa inguc mibong ngageibongte ailu sawang-yowa kwelengkeyelelu yowa noine nga kwele-angacte aibaba basanangkewec.

### *Yowa yago hibi nevocina fagac*

- 1:1–4 Hibile yowa noinele fungine
- 1:5–2:17 Angocte yefe nga kundungte yefe
- 2:18–2:27 Kristole ngaba
- 2:28–3:24 Wapongte adu-madecfocine noine
- 4:1–5:4 Kwele-angacte fungine
- 5:5–21 Wiyac noine ngage-motogabeleng

### *Yowadi gagaholec aigac*

<sup>1</sup> Ngic esecnebenang molickelu gawec, yele siduc kwelengkengelegabeleng. Nonge ye hedecnonggengti ngagelu, dongenonggengti ngani-nganiine nga aibabaine nganilu, molenonggengti bauwaibeng. Yowadi gagaholec aigac, ngic yele hocne mibeng yegengkegac. <sup>2</sup> Gaga-sanang fileine ye hocne fikeme nganilu, yele ailu mibasanang aingelelu mibeng yegengkeme edocgebacaigabeleng. Ye esecne Mamackolec gawecti nongilang fikewec. <sup>3</sup> Nonge wiyac ngani-ngagec aibeng, yogo nenge nongeholec gaga walec ganangte mibeng yegengkegac. Aime gaga walec, yogo Mamac nga Madecine Yesu Kristo, yekeholec momochac walec gagabeleng. <sup>4</sup> Nongileng sasawa belic-belicti wakenolenale yowa yago kwelengkengelegabeleng.

### *Angocka gaga*

<sup>5</sup> Nonge yelacni yowa yago ngagelu ngengela yanguc mibeng yegengkegac, Wapong ye angoc, aime yela kundung monic mi fagac, miyac. <sup>6</sup> Aime yeholec momoc walec ganangte milu sifu kundungte aibabawa gadabelengtewa, nongileng kwesac ailu aibaba noine mi balaibedabelengte. <sup>7</sup> Ye angocka gagac. Aime nongileng ingucnehac angocka gagabelengka, gaga walec moniyang gagabeleng. Inguc gaebengka madecine Yesule sacti bikicnonggeng sasawa suwenoleyackegac.

<sup>8</sup> Aime bikic mikac gagabeleng midabelengtewa, nongileng kwesac aibeng yowa noinedi kwelenonggang mi fadaicte. <sup>9</sup> Aime bikicnonggeng mifickebeng, Wapong pasi dondonne balu yeicne yowa balaibelu gacaigacti, bikicnonggeng hegilenolelu sowacnenonggeng sasawa suweyackedaicte. <sup>10</sup> Aime nongileng bikic monic mi bafuwaibeng midabelengtewa, Wapong ye kwesac-ngic ingucne mibeng yele yowadi kwelenonggang monic mi fadaicte.

## 2

<sup>1</sup> Adu-madecfocne, nenge bikic mi baningte hibi yago kwelengkegabac. Aime monicti bikic bafuwadaicte, nongileng ngic-hewacnonggeng monic gagac, yogo Yesu Kristo. Ye ngic dondonnedi Mamacte dongewa pasi dondonne bacaigac. <sup>2</sup> Ye nongileng bikicte ailu yeuctihac bikicte ameine badu-badule fuli biyachac bawec. Ailu nongileng sugu miyac, himongtowa yagolec ngic-ngigac sasawa, yengele momochac bawec.

<sup>3</sup> Aime nongileng Wapongte ung-yowa fagaing yogo balaibegabelengka, ye ngagemotolu gagabeleng, inguc ngagegabeleng. <sup>4</sup> Monic ye Wapong ngagegabac milu yele ung-yowa mi balaibecaigac, ye kwesac-ngic ailu yele kwelewa yowa noine monic mi fagac. <sup>5</sup> Aime monic ye Wapongte yowa ngagelu balaibedaicte, ye kwele ngage-ngageinedi Wapongte angac ngagecnome yogolec noine bamadickedacite. Yefe iwa hocne Wapongte kwelewa gagabeleng, yogo ngage-motogabeleng. <sup>6</sup> Aime monic ye Wapongte kwelewa gagabac micaigac, ye Yesudi gaga gawec, ingucnehac gadaic.

<sup>7</sup> Agofocne kwelenedi ngengele angac ngagegabac, na ung-yowa gbolicne monic mi kwelengkegabac, miyac. Ngenge yowa esecne molickelu balu ngagelu gaibong, yogohac hatacmac kwelengkegabac. Ngenge yowa esecne ngageibong, yogodi ung-yowa esecne aigac. <sup>8</sup> Kundung baickeemewa angoc noinedi biyac fikelu angolegacte ailu ung-yowa yago gbolicne hatacmac kwelengkegabac. Yogodi Sugucnela nga ngengela noine aigac.

<sup>9</sup> Aime monic ye angocka gagabac milu ngic hae-gbaine kweledi wickedaicte, ye kundungka gagac hocne. <sup>10</sup> Aime monic ye ngic hae-gbaine ago aicnolu kweleinedi yele angac ngagecnolu aicnocaigac, ye angocka game kweleina wiyac monicti okac ingucne mi aicnodaicte. <sup>11</sup> Nga monic ye ngic hae-gbaine kweledi wickedaicte, ye kundung kwelina lolickedaicte. Aime kundungti dongeine bame kundung kweme, ye yefe wenuwa hikegac, yogo mi ngagedaicte.

<sup>12</sup> Adu-madecfocne, Wapongti Yesule wacte ailu bikincingeng hegilewec.

Yogolec ailu hibi yago kwelengkengelegabac.

<sup>13</sup> Mamac, ngenge esecne fungina molickelu gawec, ailu gagac, ngenge ye biyachac ngageibongte ailu hibi yago kwelengkengelegabac.

Ailu soc-gboli ngic, ngenge Kindololo fileine biyachac ewaliibongte ailu, hibi yago kwelengkengelegabac.

<sup>14</sup> Adu-madec, ngenge Wapong Mamac biyachac ngagecnoibongte ailu, hibi yago kwelengkengelebac.

Mamac, ngic esecnahac molickelu gawec, ailu gagachac, ngenge ye biyachac ngagecnoibongte ailu, hibi yago kwelengkengelebac.

Soc-gboli ngic, ngenge tapilinginengkolec ailu Wapongte yowadi ngengela fame, Kindololo fileine biyachac ewaliibongte ailu hibi yago kwelengkengelebac.

#### *Himongte angac*

<sup>15-16</sup> Ngenge himongtowa yagolec gaga nga himongtowa yagolec wiyac sasawa fagac, yogolec angac mi ngagedaing. I yangucte, himongtowa yagolec wiyac sasawale angac yogo yanguc fagac. Socti angackolec gaga, nga donge-helockolec gaga, ailu himongtowa yagolec moneng-mafale ailu wae sugucneholec gaga, yogo Mamactacni miyac. Yogo himongtowa yagowacni. Aime monic ye himongtowa yagolec angac ngagelu gadaicte, ye kwelewa Mamacte angac mi fagac. <sup>17</sup> Aime himongtowa nga aibabaine angacine, yogo gacgu miyac aiyackedaicte. Aime monic ye Wapongte yowa balaibecaigac, ye gagaine moto-motoine mikac gaginowagac.

#### *Kristole ngaba*

<sup>18</sup> Adu-madecfocne, dameng yago motonogale aigac. Aime Kristole ngaba kwesinale mibong ngageibong, ngaba ingucne bocyacbenangti biyachac fikelu yegengkelu gagaingte ailu dameng motonogale aigac, yogo ngage-motogabeleng. <sup>19</sup> Yenge nongilengkolec gaibong. Ailu sifu nongileng alingacni miyacte hegilecnubaibong. Nongileng alingacni aidabongka midec yenge nongilengkolec gadabong. Yenge sasawa nongileng alingacni miyac, yogo yegena fikelu yegengkenale, inguc fikewec.

<sup>20</sup> Aime Kristo ye gbagbacne, yedi Asu ngeleme ngenge sasawadi yowa noine ngageyackegaing. <sup>21</sup> Ngenge yowa noine mi ngagegaing milu ngengele hibi yago mi kwelengkegabac, miyac. Ngenge yowa noine ngagegaing. Aime yowa noinacni kwesac monic mi kwesicaigac, yogo ngage-motogaingte ailu hibi yago kwelengkengelegabac.

<sup>22</sup> Yesu ye Mesia gagac, monicti yogo bisockedaicte, ye kwesac-ngic aidaicte. Aime monic ye Mamac nga Madec yeke bisocepadaicte, ye hocne Kristole ngababenang aidaicte. <sup>23</sup> Monic ye Madec bisockedaicte, ye Mamackolec mi wetackelu gadaicte. Nga monicti Madecte mime yegengkeme ngagesingkedaicte, ye Mamackolec inguchac wetackelu gadaicte.

<sup>24</sup> Ngenge ngengileng yowa molickelu ngageibong, yogodi ngengele kwelewa fagidaic. Ngenge inguc aidaingtewa, Madec nga Mamac yekeholec wetackelu gadabiyengte. <sup>25</sup> Madec ye yeuctihac gaga-sanang nolenale mipangkelu edocnubawec. <sup>26</sup> Ngic gocne yengi kwesacka mengocngebadaingkale, hibi yago kwelengkengelegabac.

<sup>27</sup> Ngic ingucne yengi wedungenogalesoc mi aigac. Yesudi esecne Asu ngeleme baibong, yogodi kwelenginang falu wiyac sasawa wedungeledaicte. Ailu Asudi yowa wedungeledaicte, yogo noinebenang, yogo kwesac miyac. Ngenge yefe iwa yeholec wetackelu gadabiyeng.

#### *Wapongte adu-madec*

**2:7:** Yoa 13:34; 2Yoa 5-6      **2:8:** Rom 13:12; Yoa 1:9      **2:9:** 1Yoa 4:20      **2:10:** Rom 14:13      **2:11:** Yoa 12:35  
**2:15-16:** Rom 8:7; 13:14      **2:17:** Mat 7:21      **2:18:** Mat 24:5,24; 2Yoa 7      **2:19:** Sale 20:30      **2:20:** 1Kor 2:15  
**2:22:** 1Yoa 4:3; 2Yoa 7      **2:23:** Yoa 5:23; 1Yoa 4:15; 5:1      **2:27:** Yoa 16:13

<sup>28</sup> Adu-madecfocne ngagening, Yesu ye fikelu yegengkenale nongileng yele kwesi-kwesi damangka yele haicka game mikac sanangne domanangte ngenge yeholec wetackelu gadabiyeng. <sup>29</sup> Yesu ye dondonne, ngenge inguc ngagegaingka, ngenge inguchac yanguc ngagegaing, monic ye aibaba dondonne aicaigac, ye Sugucnele ngic fikewec gagac.

### 3

<sup>1</sup> Ngagegaing, Mamac ye yeicne adu-madecfocine wacnubanale kwele-angac sugucnebenang nolewec. Aime nongilengti hocne yele adu-madecfocine gagabeleng. Aime himongtowa yagolec ngic-ngigac yenge Yesu mi ngageibongte ailu nongileng inguchac mi ngagecubagaing. <sup>2</sup> Agofocne kwelenedi ngengele angac ngagegabac, nongileng yakumac Wapong adu-madecfocine gagabeleng. Gacgu wenuc aidabelengte, yogo mi mime yegengkenoleme ngagegabeng. Gacgu ye fikelu yegengkeme nganinoga, yogowabac yeicne silic ingucne aidabelengte, yogo ngagegabeng. <sup>3</sup> Ngic-ngigac Yesuholec wetackelu madicne yogo fikenale ngagesingkelu wangep gagaing, yenge sasawadi gagangineng suweyackelu ye gbagbacne gagac, silicine ingucnehac gbagbacne aidaingte.

<sup>4</sup> Aime ngic-ngigac bikic bafuwalu gagaing, yenge yefe-yowa welu gagaing. I yangucte, bikicti yefe-yowa baickegac. <sup>5</sup> Yesudi bikicnonggeng baickenale fikewec. Aime yela bikic monic mi fagac, ngenge yogo ngagegaing. <sup>6</sup> Aime ngic-ngigac yeholec wetackelu gagaing, yenge bikic mi bafuwalu gagaing. Aime ngic-ngigac bikickolec gagaing, yengi ye mi nganiibong ailu ye mi ngageibong gagaing.

<sup>7</sup> Adu-madecfocne, monicti bikic nalic aidaingte milu kwesacka mengocngebame ngenge ye mi balaiabadabiyeng. Monic ye aibaba dondonne aicaigac, ye Yesu ingucne ngic dondonne gagac. <sup>8</sup> Aleng Sugucnenginengti molickelu bikic bafuwawecte, monic ye bikicte aibaba aicaigac, ye hocne Aleng Sugucnenginengte ngic. Aime Wapongte Madecti Aleng Sugucnenginengte bole basowaleme miyac ainale ailu fikewec. <sup>9</sup> Ngic-ngigac Wapongtacni fikeibong, yenge bikic monic mi bafuwacaigaing, miyac. Wapongte gaga yogodi yengele kwelewa fagacte bikic bafuwawanogale kpungkedaingte. <sup>10</sup> Aime ngic-ngigac aibaba dondonne mi aicaigaing, me ngic hae-gbafocngineng yengele kwelenginengti angac mi ngagelu aiyelecaigaing, yenge sasawa Wapongtacni miyac. Aibaba yogowa hocne weni yogodi Wapongte adu-madec nga weni yogodi Aleng Sugucnenginengte adu-madec, yogo yengkedacte.

#### *Angac ngagenagudabeleng*

<sup>11</sup> Ngenge esecne molickelu yowa yanguc ngageibong, nongileng ago ainagulu kwelenonggengti angac ngagelu ainagudabeleng. <sup>12</sup> Ngenge Kein ingucne mi aidabiyeng. Ye Kindololo fileine balaiabelu gbaine wehomawec. Omale wehomawec? I yangucte, ye yeicne aibabaine sowacne facnowec. Nga gbainele aibabadi nganime dondonne aiwecte ailu gbaine wehomawec. <sup>13</sup> Ngic hae-gbafocne, himongtowa yagolec ngic-ngigac yengi kweledi wicngebadaingte. Aime ngenge wiyac yogo aibaba gbolicne fikegac inguc mi ngagedaing. <sup>14</sup> Nongileng ngic hae-gbafocnonggeng yengele kweledi angac ngageyelelu aiyelecaigabelengte ailu homac hegilelu gagawa felu gagabeleng, yogo ngagegabeng. Aime monic ye kweleinedi yengele angac mi ngageyelelu aiyelecaigac, ye homacka gacaigac. <sup>15</sup> Aime ngic-ngigac ngic hae-gbafocngineng yengele kweledi wicebacaigaing, yenge sasawadi ngic-wewe ailu gagaing. Aime ngic-ngigac ingucne yengele kwelewa gaganasang mi fagac, yogo ngagegaing.

<sup>16</sup> Yesu Kristo ye nongilengte ailu gagaine hegilewec. Aime pasi yogo nganilu kwele-angacte aibaba ngagelu gagabeleng. Ilec nongileng inguchac ngic hae-gbafocnonggeng yenge baficebalu gaganonggeng hegilenogale efeckelu gadabeleng. <sup>17</sup> Monicti himongtowa yagolec wiyackolec galu ngic hae-gbaine monic nganime socte moneng-mafawa waweweine gagac. Inguc nganilu kweleina kwele-sowac mi ngagelu mi bafickedactewa, Wapongte kwele-angacti yele kwelewa mi fagac.

<sup>18</sup> Adu-madecfocne, "Nongileng kweledi angac ngageyelelu aiyeledabeleng." Yogo micti me yowadi sugu mi midabeleng, miyac. Nongileng aibaba yogo noineholecbenang aidabeleng. <sup>19-20</sup> Inguc ailu yowa noinele alingka gagabeleng, yogo ngagedabelengte. Aime kwelenonggengti wiyac monicte yowawa locnubame, Wapongte haicka kwele-mogung gadabelengte. I yangucte, Wapong ye feicnetowanonggeng ailu ye nongileng kwelewa wiyac sasawa fagac, yogo ngageyackegac. Ailu Wapongti nongileng kwelewa nage-ngage fagac yogo ewaligac.

<sup>21</sup> Agofocne kwelenedi ngengele angac ngagegabac, kwelenonggengti yowawa mi lounubadaictewa, Wapongta ngageboc mikac hikedabelengte. <sup>22</sup> Nongileng inguc galu ung-yowaine balaibelu yele angacka fagac, yogo ainogale, wiyac monicte Wapong uwacnolu bacaigabeleng. <sup>23</sup> Aime ung-yowaine yanguc fagac, nongileng Madecine Yesu Kristo ngagesingkedabeleng. Ailu kweledi angac ngagenagulu ainagudabeleng. Yedi ung-yowa yogo hocne nolawec. <sup>24</sup> Monic ye ung-yowaine balaibecaigac, ye Wapongt kwelewa game Wapongti yele kwelewa gagac. Ailu Wapongti Asuine nolawec kwelenonggang gagac. Ilec ailu Wapongti kwelenonggang gagac, yogo ngage-motogabeleng.

#### 4

##### *Siduc-mimi ngicte yowa ngani-wosaec ainoga*

<sup>1</sup> Agofocne kwelenedi ngengele angac ngagegabac, siduc-mimi ngic kwesacine bo-cyacti himongtowa yagowa lolickelu gagaingte ailu, ngenge yowangineng sasawa mi ngagesingkedaing. Ngenge ngani-wosaec ailu yengele asu yogo Wapongtacni me miyac, yogo ngani-motodaing. <sup>2</sup> Ngenge Wapongte Asu silicine yangucka ngani-motodaingte, ngic-ngigac sasawadi Yesu Kristo ye ngic soc-biuckolec fikewec gagac, yogo mibong yegengkedaicte, yenge Wapongtacni. <sup>3</sup> Aime ngic-ngigac sasawadi Yesule inguc mi mibong yegengkedaicte, yenge hocne Wapongtacni miyac. Ngic yogo yengi Yesu Kristole ngaba yele tapili bagaing. Ngaba ye esecne kwesinale mibong ngageibong, yele tapili hocne himongtowa yagowa biyac fame balu gagaing.

<sup>4</sup> Adu-madecfocne, ngenge Wapongtacni. I yangucte, ye ngengele kwelewa ngiyegac, yele tapilidi Kindololo fileine himongtowa yagowa gagac, yele tapili ewaligac. Ilec ailu ngenge siduc-mimi ngic kwesacine biyachac ewalicebalu gagaing. <sup>5</sup> Yenge himongtowa yagowacni. Ilec yenge himongtowa yagolec ngage ngage bagalu yowa mibong, himongtowa yagolec ngic-ngigac yengi yengele yowale hedec logaing. <sup>6</sup> Nongileng Wapongtacni. Ilec ngic-ngigac Wapong ngagegac, yenge nongileng yowa hedec kwelu ngagegacgaing. Aime monic ye Wapongtacni miyac, yedibac nongileng yowa mi ngagegacgaing. Aibaba iwa hocne nongileng yowa noinele Asu nga asu kwesacine ngani-motodabelengte.

##### *Wapongte kwele-angac*

<sup>7</sup> Agofocne ngengele angac ngagegabac, kwele-angacte aibaba, yogo Wapongtacni. Ilec nongileng ago ainagulu kwelenonggengti angac ngagelu ainagudabeleng. Aime ngic-ngigac kweledi angac ngagelu aicaigac, yenge Wapongtacni fikeibong. Ailu yenge Wapong ngagegac. <sup>8</sup> Wapongti kwele-angacka gagale fungine aigac. Ilec monic ye kweleina angac mi ngagelu aicaigac, ye Wapong mi ngagegac. <sup>9</sup> Aime Wapong ye Madecine moniyang sugu, yela gaga-sanang banangte saleme himongtowa yagowa wawec. Yefe iwa hocne Wapongti nongileng kweleinedi angac ngagelu ainolegac, yogo yegengkegac. <sup>10</sup> Nongilengti molickelu Wapongte kwelenonggengti angac ngagelu mi aibeng, miyac. Yedi nongileng ailu kweleinedi angackeme Madecine yogo nongileng bikicte ailu yeuctihac bikicte ameine badu-badule fuli banale saleme wawec. Yogodi kwele-angacte fungine aigac. <sup>11</sup> Agofocne kwelenedi ngengele angac ngagegabac, Wapongti kweleinedi inguc angackeme ainolewecte, nongilengti inguchac kwelenonggengti angacnubame ainagudabeleng. <sup>12</sup> Monicte Wapong mi nganiwec. Aime nongileng kwelenonggengti angac ngagenagulu ainagudabelengka, Wapongti nongileng kwelewa game yele kwele-angacka gaga yogodi nongilang suguleme nganigaing.

<sup>13</sup> Aime ye yeicne Asuine nolawecte ailu yanguc ngagegabeng, nongileng yele kwele kwelina gabeng, yedi nongileng kwele kwelina inguchac gagac. <sup>14</sup> Mamacti ngic-ngigac himongtowa yagolec bikicte amengineng banale Madecine lome wawec. Nongileng yogo nganilu mibong yegengkegac gagabeleng. <sup>15</sup> Monic ye yanguc mime yegengkedaicte, "Yesu ye Wapongte Madec." Wapongti yele kwelewa game, yedi Wapongte kwelewa gagac. <sup>16</sup> Aime Wapongti kweleinedi angackeme ainolecaigac, yogo ngage-motolu ngagesingkelu gagabeleng.

Wapong ye kwele-angacka gagale fungine aigac. Aime monic ye kwele-angacka gaga gacaigac, ye Wapongte kwelewa game Wapongti yele kwelewa gagac. <sup>17</sup> Inguc gaebengka kwele-angacka gagadi nongilang sawelu sugulegac. Suguleme mimocto-mimocto damengka nongileng ngageboc mikac sanangkelu domadabelengte. Aime nongileng himongtowa yagowa Yesu ingucnehac ailu gagabeleng. <sup>18</sup> Hangockolec gaga, yogo ba-batingngineholec. Aime monic hangocka gagacka, kwele-angacka gaga yogo yela

mi sugulelu gagac. I yangucte, kwele-angacka gaga yogodi hangoc mikac aigac. Ilec ailu kwele-angacka gagadi sugucnehac fagac, yogodi hangoc baickedaiacte.

<sup>19</sup> Wapongti molickelu kweleinedi angackeme ainolewecte kwelenonggengti angac ngagelu aigabeleng. <sup>20</sup> Aime monic ye “Wapongte kwelenedi angacnume aigabac” milubac ngic hae-gbaine ye kweledi wickedaicte, ye kwesac-ngic. Monic ye ngic hae-gbaine dongedi nganicaigac, yele kweleinedi mi angackeme aidaicte, ye Wapong dongedi mi nganiicne, yele kweleinedi nalic mi angackeme aidaicte. <sup>21</sup> Sugucnedi ung-yowa yanguc nolewec, monic ye Wapongte kweleinedi angackeme aicaigac, ye ngic hae-gbafocine yengele inguchac kweleinedi angackeme aidaic.

## 5

### *Madec ngagesingkenoga*

<sup>1</sup> Yesu ye Mesia gagac, ngic-ngigac inguc ngagesingkegaing, yenge Wapongtacni fikeibong. Aime monic ye mamac monicte kweleinedi angac ngagecnolu aicnogac, ye adu-madecinele inguchac kweleinedi angac ngagecnolu aicnogac. <sup>2</sup> Yogolec silicina nongileng Wapongte kwelenonggengti angac ngagelu aicnolu ung-yowaine balaibegabeleng. Inguc aigabelengka, yanguc ngagegabeleng, Wapong adu-madecfocine yengele kwelenonggengti angac ngageyelelu aiyelegabeleng. <sup>3</sup> Nongileng Wapongte kwelenonggengti angac ngagecnolu aigabeleng, yogo yanguc, ung-yowaine balaibegabeleng. Aime yele ung-yowa balaibelu gabeng umac mi nolegac.

<sup>4</sup> Ngic-ngigac Wapongtacni fikeibong, yenge sasawadi gbelong ailu himongtowa yagolec tapili ewaligaing. Aime nongileng ngage-ngagesingkelecti gbelong ailu himongtowa yagolec tapili sasawa ewalinoga. <sup>5</sup> Madi gbelong ailu himongtowa yagolec tapili ewaligaic? Yesu ye Wapongte Madec. Aime monic ye yogo ngagesingkedaiacte, yedi sugu himongtowa yagolec tapili ewaligaic.

<sup>6</sup> Ye misawa nga sacka kwesiwec, yogo Yesu Kristo hocne. \* Ye misawa sugu mi kwesiwec, miyac. Ye misawa nga sacka momochac kwesiwec. Aime Asu ye yowa noinele Asu. Ilec ailu yedi Yesule mime yegengkegac. <sup>7-8</sup> Wiyac habackang, yogo Asu nga misa ailu sac, yenge Yesule mibong Wapongte Madec yegengkeme kwele-moniyang ailu gacaigaing. <sup>9</sup> Ngic yengi yowa mibong yegengkeme yowangineng ngagesingkecaigabeleng. Inguc aidabelengtewa, yanguc ngagedabeleng, Wapongti yowa mime yegengkedaiacte, yogodi feicne aigac. Ailu ye Madecinele yowa mime yegengkecaigac, yogo ngagesingkedabeleng. <sup>10</sup> Monic ye Madecine ngagesingkegac, ye kweleinedi yanguc mime yegengkegac, “Yesu ye Wapongte Madec.” Nga monic ye Wapong Madecinele yowa mime yegengkwec, yogo mi ngagesingkegacka, yedi Wapong kwesac aicnogac, inguc micnogac. <sup>11</sup> Aime yowa yogodi yanguc edocnubame yegengkegac, Wapongti gaga moto-motoine mikac nolewec. Aime gaga yogodi Madecinela fagac. <sup>12</sup> Monic ye Madeckolec wetackelu gagac, ye gaga noineholec gagac. Nga monic ye Wapongte Madeckolec mi wetackelu gagac, yele gaga noine mikac aigac.

### *Hibi moto-motoine*

<sup>13</sup> Ngic-ngigac Wapong Madecine ngagesingkegaing, yenge gaga-sanangkolec gagaing, nengege yogo ngage-motoningte hibi yago kwelengkengelegabac. <sup>14</sup> Aime nongileng yanguc ngage-motolu ngagepangkegabeleng, wiyac monicte millockenogale milu yeicne angac balaibelu uwacnobeng, ye ngagenoledaicte. <sup>15</sup> Aime mimilocnonggeng ngagenoleme, wiyac yogo noine biyac badabelengte, inguc hocne ngagelu gagabeleng.

<sup>16</sup> Monicte bikic monic bafuwadaicte, aime bikic yogodi gaga-sanang mi hedickecnogac. Aime monicte ngic hae-gba monicte bikic yogo nganilu yele ailu millockedaicte, Wapongti bikickolec ngic ye gaga lacnodaicte. Bikic yogodi gaga-sanang mi hedickecnogac, inguc migabac. Aime bikicte gaga-sanang hedickegac, † bikic ingucnele millockeningte mi migabac. <sup>17</sup> Sowacne sasawa yogo bikic, nga bikic gocne yogodi gaga-sanang mi hedickegac.

<sup>18</sup> Nongileng yanguc ngagegabeleng, ngic-ngigac Wapongtacni fikeibong, yenge sasawadi bikic mi balu gagaing. Aime yeicne Madecinedi bacebame, Kindololo fileinedi nalic mi basowalecebadaicte. <sup>19</sup> Aime nongileng Wapongte adu-madecfocine gagabeleng, yogo ngage-motogabeleng. Aime himongtowa yago nga ngic-ngigac ngage-ngagesing mikac

4:21: Mrk 12:29-31    5:1: 1Yoa 4:15    5:3: Yoa 14:15,23-24    \* 5:6: Misa yogo Yesudi misa lowawec, dameng iwa nangeng yowa kwelengkewec. Nga sac yogo Yesu homawec, dameng iwa nangeng yowa kwelengkewec.    5:6: Yoa 1:29-34    5:7-8: Yoa 15:26    5:9: Yoa 5:32-37    5:10: Gal 4:6    5:12: Yoa 3:36    5:13: Yoa 20:31    5:14: Yoa 14:13; 1Yoa 3:21-22    † 5:16: Monic ye Yesu lobe holecnogac, ye gaga-sanang nalic mi badaicte.    5:16: Mat 12:31    5:18: 1Yoa 3:9



yenge Kindololo fileinele tapilile bagewa fagaing. <sup>20</sup> Aime nongileng yowa noinele Fileine ngagenangte, Madecinedi walu ngage-ngage-motoc nolewec, yogo ngagegabeleng. Aime Wapong yowa noinele fileine, yele kwele kwelina nga Madecine Yesu Kristo, yele kwele kwelina momochac gagabeleng. Yesudi hocne Wapong noine ailu gaga-sanang. <sup>21</sup> Adu-madecfocne, ngenge siduc-gbong yengele emewa mi hikeningte damong balu gadabiyeng. Yogo foinac.

## Yoane Yedi Hibi Monic Hatacmac Kwelengkewec

### *Mimi-yegeng yowa*

Yesu homalu homackacni gboliyelu fangkeme hifa 60 ngama ingucne motome, hibi yago kwelengkewec. Ngic kwelengkewec, ye ngaba yengele ngagelu wacine yegena mi lowec mecne. Aime ngagegailing ngic wacine Yoane, ye Yesule mic-tengteng monic.

Hibi badaingte, yogo yengele ngagelu "nenggac nga adu-madecfocgone" kwelengkewec. Ngic gocne yenge ngagebong ye Yesule habu monicte ngagelu nangeng yowa "nenggac" inguc milu kwelengkewec. Ailu moto-motoina yowa ingucne yogo Yesule habu monic yengele ngagelu "senggone" kwelengkewec.

Yesule Siduc Madicne iwa "yowa noine" kwelengkewec. Ailu kwele-angacte aibaba basanangkelu ngic gocne kwesac-yowa weduyelecaigaing, yengele sawang-yowa milu kwelengkewec.

### *Kwele-madic yowa*

<sup>1</sup> Na Yesule habu damongngineng. Nenggac bawosaecguicne, ga nga adu-madecfocgone ngengela hibi yago kwelengkewec. Na yowa noinele ailu ago aingelelu kwelenedi angac ngagengelelu gagabac. Ailu na sugu miyac, ngic-ngigac sasawa yowa noine ngagegailing, yenge inguchac nenge ago aingelelu kwelengingenti angac ngagengelelu gagaing.

<sup>2</sup> Aime yowa noinedi nongileng kwelewa fagacte inguc aigabeleng. Ailu damengsoc nongilengkolec faginowagac.

<sup>3</sup> Nongileng yowa noine nga kwele-angacka gaga gagabeleng, nongilang Wapong Mamac, nga Madecbenangngine Yesu Kristo, yekele kwele-madic nga kwele-sowac ailu kwele-mogungtowa yogodi fanoledaicte.

### *Ung-yowa*

<sup>4</sup> Adu-madecfocgone gocne yenge yowa noine Mamacti mime ngageibeng, ung-yowa yogo balaibelu gagaing, na yowa yogo ngagelu beliyegebac. <sup>5</sup> Aime nenggac, na ung-yowa yanguc milockengelebe balaibedaing, Nongileng ago ainagulu kwelengingenti angac ngagenagulu gadabeleng, yogo ung-yowa gbolicne mi kwelengkewec gagabac, miyac. Yogo hocne molickelu balaibelu gaibeng. <sup>6</sup> Aime Wapongte ung-yowafocine balaibelu gagabiyeng, yogodi kwele-angacte fungine. Aime nenge kwele-angacte ung-yowa yogo molickelu ngageibong, yogo balaibelu gadaing.

<sup>7</sup> Aime kwele basifuc ngic bocyacti himongtowa yagowa lolickelu gacaigaing. Yenge Yesu Kristo ye ngic soc-biuckolec fikelu gagac, yogo mi ngagesingkelu ye bisockelu gagaing. Ngic ingucne yenge Kristole ngababenang ailu kwele basifuc ngic. <sup>8</sup> Nenge yogolec bulongineng madicne balu damongnagulu gadaing. Wiyac banogale boletowa baibeng, yogo hegiledaingkale, damong balu fulingineng bucbuchac badabiyeng. <sup>9</sup> Ngic gocne yenge galu Kristole wewedu-yowa hegilelu yowa gocne taockelu gagaing, yenge Wapong mikac gagaing. Aime monic ye wewedu-yowaine sanangne balu game, Mamac nga Madec yeke momochac yeholec gagabiyec. <sup>10</sup> Nga monic ye wewedu-yowaine silicine ingucnehac mi balu kwesidaictewa, nenge yeholec molewa babac mi aidaing. Ailu nenge ye macnginang mi mengockelu fedaing. <sup>11</sup> Monic ye ngic ingucne yeholec molewa babac aidaictewa, ye ngic yogo bafickeme, yele bole sowacne, yogo badabiyecte.

### *Yowa moto-motoina*

<sup>12</sup> Nani yowa bocyac kwelengkewec ainelegac. Aimebac yogo hibiwa kwelengkewec mi ainelegac. Yogolec ailu belic-belicnonggeng sugucnehac fikenale naneuc ngengela fube haicti nganinagulu yowa mingagec ainangte ngagesigabac.

<sup>13</sup> Senggone bawosaicne, yele adu-madecfocine yenge wenac-madicngineng ngengela lobong fugac.

## Yoane Yedi Hibi Kwelengkeme Alecine Habackang Aiwec

### *Mimi-yegeng yowa*

Yesu homalu homackacni gboliyelu fangkeme hifa 60 ngama ingucne motome, Yoane ye hibi yago kwelengkelu ngic monic wacine Gaius yela lome hikewec. Ngic kwelengkewec, ye wacine yegena mi lowec. Aime ngic wacine Yoane, ye Yesule mic-tengteng monic, inguc ngagegaing.

Yesule Siduc Madicne iwa “yowa noine” kwelengkewec. Demitius ye aibaba madicne aiwecte mitengkewec. Ailu Dioterefes yele sawang-yowa kwelengkewec.

### *Kwele-madic yowa*

<sup>1</sup> Na Yesule habu damongngineng. Gaius agone gale angac ngagegabac, na yowa noinele ailu kwelenedi angac ngagegelelu hibi yago kwelengkegelegabac.

<sup>2</sup> Agone kwelenedi gale angac ngagegabac, ga kwelegona ilucgone umacine mikac. Aime wiyacgone sasawa ingucnehac nalic ainale nga hucine mikac ainale milockegabac. <sup>3</sup> Ga aibaba noine nga yowa noine madicne balaiibelu balu gacaigic, gale yowa-siduc yogo ngic hae-gbafocnonggec gocne yengi kwesilu mibong beliyebenangkeiba. <sup>4</sup> Adu-madecfocne yenge yowa noina gagaing, yogo ngagebe belic-belic yogodi wiyac sasawa ewalicaigac.

### *Mimi-madic yowa*

<sup>5</sup> Agone kwelenedi gale angac ngagegabac, aibabagone madicne yogo mi hegileing. Ailu nongileng ngic hae-gbafocnonggeng dalickacni kwesicaigaing, yenge momochac baficebacaigic. <sup>6</sup> Ailu ga yengele kwelegonedi angac ngagelu aiyelelu baficebacaigic, ngic yengi mimi-madicgone yogo Yesule habu yengele haicka mibong ngageibeng. Ailu yenge hatacmac hikeningte aibong, gagi Wapong angacinele silicka wiyac aiyelelu yefele babafic wiyac gocne yelelu salecebng madickedaitce. <sup>7</sup> Yenge Yesule wacte ailu bole balu hikeibong, iwa ngic-ngigac Wapong mi ngagegaing, yengelacni babafic monic mi baibong. <sup>8</sup> Ilec yowa noinele bole nongileng momochac banangte, yefe yogo fikenale ngic ingucne kwele-madicte babafic yeledabeleng.

<sup>9</sup> Na Yesule habu yengela hibi monic kwelengkeyeleiba. Aime Dioterefes ye yeuctihac micne ganogale aicnome, ye nonge hegilecnubacaigac. <sup>10</sup> Aime nani gacgu ngengela fudacte, ibac ye aibaba aicaigac, yogo dondonne mi-uwac aicnodacte. Ailu ye nongele kwesac-yowa kosa milu aibaba sowacne ingucne aicaigac. Ailu yogo sugu miyac, ngic hae-gbafocnonggeng inguchac mac mi holeyelecaigac. Aime gocne yengi ngic hae-gbafocnonggeng mac holeyelenogale mibong, yedi welockelu habu lobina locebacaigac, yogo hocne mibe yegengkedaicte.

<sup>11</sup> Agone kwelenedi gale angac ngagegabac, gagibac aibaba sowacne ingucne mi bal-aibedamec, miyac. Ga aibaba madicne balaiibedamec. Aime monic ye aibaba madicne aicaigac, ye Wapongtacni, nga monic ye aibaba sowacne aicaigac, yebac Wapong monic mi ngagelu gagac. <sup>12</sup> Ngic-ngigac sasawa yenge Demitiusle aibaba yogo madicne micaigaing. Aime yowa noinedi inguchac yele mime yegengkecaigac. Nonge inguchac yele mibeng yegengkeme mitengkecaigabeleng. Aime nongileng mimi yogodi noine aigac, yogo ngagegic.

### *Yowa moto-motoine*

<sup>13</sup> Na yowa bocyac kwelengkegelenogale ainelegac. Aimebac yogo hibiwa kwelengkegelenogale mi ainelegac. <sup>14</sup> Na gala bangkacnemac fulu gaholec haicti nganinagulu yowa mingagec ainacte ngagesigabac. <sup>15</sup> Kwele-mogungti gaholec fadaic. Agofocnonggeng yawa gagaing, yengi gala wenac-madic yowa logelegaing. Aime nale wenac-madic lobe fume gagi agofocnonggeng wacnginangsoc yenge edocebamec.

## Yude Yedi Hibi Kwelengkewec

### *Mimi-yegeng yowa*

Yesu homalu homackacni gboliyelu fangkeme hifa 40 ngama ingucne motome, Yude ye hibi yago kwelengkelu Yesule habu monic yengela lome hikewec. Yude ye Yesu nga Yakobos yekele gbanginec (Mataio 13:55, Mareko 6:3). Ngic gocne yengi kwesac-yowa weduyeibongte ailu hibi yago kwelengkelu sawang-yowa milu yowa noine basanangkewec.

### *Mimi-madic yowa*

<sup>1</sup> Na Yude, Yesu Kristole kwelec kwekwe ngic ailu Yakobos gbaine. Wapong Mamacti ngic-ngigac wacngebalu ngengele kweleinedi angac ngagengelelu aingelecaigac, ngenge sanangne domaningte Yesu Kristodi damongngebalu gagac, ngengela hibi yago logabac. <sup>2</sup> Wapongte kwele-sowac nga kwele-mogung, ailu kwele-angacka gaga yogodi ngengela sawelu fadaic.

### *Wewedu kwesacine*

#### *2Pi 2:1-18*

<sup>3-4</sup> Agofocne kwelenedi ngengele angac ngagegabac, Wapongti nongileng momoc wasecne ainangte bamadicnubawec, yogolec hibiwa yowa kwelengkengelenogale efeckebenangkeiba. Aime yowa yogo hegilelu ngic gocne hewacnginang sangke-sangke biyac ofeibong gagainghac, yengele ailu yowa monic kwelengkenogale ngagegabac. Yowa yogo yanguc, ngenge yefe wenucka Wapong ngagesingkenangte yedi esecne yeicne bingec nongileng ngage-ngagesing noleyackeme damongkeibeng, yogolec hudu sanangnehac wedabelengte. Ailu ngenge yogo mi hegileningte sanangne migabac. Wapongte hibiwa ngic yogo yengele ngagelu esecnehac yowa yanguc kwelengkeicne fagac, "Wapong ye aibabangineng wosaelu mimoctome bikicte ameine fikeyeledaicte." Ngic yogo yenge himongte aibaba balaibeibong Wapongnonggengti kwele-madicte pasi bame yenge bafaliyelu mibong socnginengte gagale angac ngagelu sowacnele aka monic mi holecaigaing. Ailu yenge Filenonggeng nga Sugucnenonggeng Yesu Kristole ngagebong ngic waicne aime bisockecaigaing.

<sup>5</sup> Ailu ngenge yago biyachac ngageibong. Aime hatacmac hole-gboliyengelenogale ngagegabac. Sugucnedi molickelu ngic-ngigacfocine Isip himongka umackacni bamocto-cebame kwesibong. Aime yogolec lobeinabac ngic-ngigac yogo yenge mi ngagesingkeibong, yenge wecebame homayackeibong. <sup>6</sup> Aime angelo gocne yenge Sugucnedi bole tapiliineholec yelewec, yogolec ngagebong feicne mi aime, machenangineng hegilelu waibong. Aime Wapongti sen sanangne moto-motoine mikac, yogodi witicebalu kundung sanangne kwelina locebawec. Locebame mimocto-mimoctole damengtowa yogolec wangec gagaing. <sup>7</sup> Yenge esecne Sodom nga Gomora ngic-ngigac, ailu taon aling gocne yekele emewa faibong, yenge angelo yengi aibaba aibong, yogo ingucnehac aibong. Yenge selo-boic aibaba, ailu socnginengte angac kosa balaibeibong. Sodom nga Gomora ngic-ngigac yenge dacka lobecebawec, yenge dac moto-motoine mikac yogo ingucnehac aigaing. Ailu iwa gagcu bikicnginengte ameine balu gagainghac.

<sup>8</sup> Aime kwesac-ngic yengele hewacka gagaing, yenge gung kosaine ngagecaigaing, yenge yogo ngagelubac socngineng basowalebong wonongkolec aicaigac. Yenge kwelenginengti tapili feicne yogo hegilelu angelo wac feicneholec gagaing, yenge pepece aiyelelu misulec aiyelecaigaing. <sup>9</sup> Aime Maikel ye angelo yengele micne monic gagac, ye aibaba ingucne mi aiwec. Ye Aleng Sugucnenginengkolec Mosesle kponggbongte ailu yowanginecti fefesisilic aiwec. Aime ye Aleng Sugucnengineng misulec aicnolu umacka lonogale yowa monic nalic mi miwec, miyac. Ye yanguc sugu miwec, "Sugucnedi ngelengkelu gale yowa mimoctodaic." <sup>10</sup> Aime ngic migabac yogo, yenge bec-sic ingucne ngage-ngagening mikac galu wiyac monicte fungine mi ngagegaing. Yenge angelo feicne yengele silicngineng mi ngage-motolu misulec aiyelecaigaing. Ailu wiyac socnginengti ngagegaing, yogo balaibelu yengileng basowalecnagugaing.

<sup>11</sup> Mee, yenge medecebadaic. Yenge Keinte yefe balaibelu gaibong. Ailu hiye-monengnineng banogale Balamte aibaba kosaine ingucnehac yogodi mengocebame yenge yefe iwa hikeibong. Aime Koradi yowa kwekwe aiwec, silicine yogo ingucnehac

yenge yowa kwekwe biyachac aibong, yogodi umacnehac basowalecebawec. <sup>12</sup> Yenge game mikac ngengeholec nosing kwele-angacka walec nocaigaing. Ailu yafu holecaigaing, yenge lama-damong ingucne lamafocngineng nosing mi gumecebalu yengileng nocaigaing. Ailu yenge kaguwa mac mikac gbelongti fitolinkeme moc hikecaigaing,\* yogo ingucnehac aigaing. Ailu yenge yoc gocne noine damengka noine mikac ailu homame fuluckelu wickedaingte, yogo ingucnehac aigaing. Ngic yogo yenge homac yaeckang biyachac homaibong. <sup>13</sup> Aime dibong sugucnehac welu sofololoc yafoineholec balu kwesicaigac, yenge gamengineng yogo ingucnehac fikedaicte. Yenge asocmeng yefe lilogaing, yogo ingucnehac gagaing. Aime yengele mac yogo kundung saecnebenang moto-motoine mikac iwa loicne fagac.

<sup>14</sup> Aime Enok ye Adamte fikesawec yengelacni alecine 7ka fikewec, yedi yengele Wapongte siduc-yowa yanguc miwec, “Nganining, Sugucnedi yeicne angelofocine habu taosenkacni fegac, yenge bacebame kwesidaingte. <sup>15</sup> Kwesilu ngic-ngigac sasawa aibabanginengte silicina wosaeccebalu mimoctocebadaicte. Aime ngic-ngigac sasawa himongte aibaba haicine monic-monic bagalu bikic bafuwalu Wapongte ngaba-yowa milu yowa kwekwe gaibong, yenge yogolec ameine badaingte.”† <sup>16</sup> Yenge yowa bocyac wafelu yowa kwecaigaing. Ailu ube-kwekwe nga socnginengte angac balaibelu soc bafefe gacaigaing. Aime ngic-ngigac yengi yengele angac balaibeningte yowa heloc madicne aiyelecaigaing.

### *Salecebaicnele yowa balu ganoga*

<sup>17</sup> Agofocne kwelenedi ngengele angac ngagegabac, Sugucnenonggeng Yesu Kristole salecebaicne yenge wiyac fikenale esecne miibong, ngenge yowa yogo ngagesidaing. <sup>18</sup> Yowa yanguc edocnebalu gaibong, “Dameng moto-motoina ngic gocnedi misulec aidaingte, yenge himongte wiyac sugu ngagesilu yengileng socnginengte angac balaibedaingte.” <sup>19</sup> Yenge hocne kwele esecnedi damongebame habu heucebabong Tili Asuholec mi gacaigaing.

<sup>20</sup> Aime agofocne kwelenedi ngengele angac ngagegabac, ngenge ngagenagesingnineng gbagbacnebenang aigaing, yogo sugulelu sanangkeningte ngagelu domadabiyeng. Aime Tili Asudi ngengela bole bame ngenge mimilolc bole badabiyeng. <sup>21</sup> Ailu Wapongte kwele-angacka ganingte bole badabiyeng. Aime inguc gaebongka Sugucnenonggeng Yesu Kristodi kwele-sowac aingelelu gaga moto-motoine mikac ngelenale wangec gadabiyeng.

### *Yefe lilonoga*

<sup>22</sup> Ngic-ngigac ngagebockolec aicaigaing, ngenge yengele kwele-sowackolec baficebalu <sup>23</sup> gocne dackacni baicebadabiyeng. Ailu yenge kwele esecnedi ngakpi-kpolucngineng bame wonongkolec aicaigac, yenge inguchac kwele-sowackolec baficebadaing. Inguc ailu ngenge yengele bikicte hangocnegebame, kwele esecnele ngakpi-kpolucngineng wonongkolec yogo lobeyackedabiyeng.

### *Wapongte mimi-madic yowa*

<sup>24</sup> Wapong yeuctihac nalic damongnegebame mi wawedaingte. Yedi ngenge mengcngcebalu yeicne tapili nga hibi-angocineholecte dongewa locnegebame ngenge sowacngineng mikac iwa belic-belicnginengkolec domadaingte. <sup>25</sup> Asa-baba ngicnonggeng Wapong moniyangti sugu gagac. Yedi Sugucnenonggeng Yesu Kristole yefewa Asa bacnubagac. Ye wac feicneholecti ailu feicnetowanonggeng nga tapili fileine ailu wiyac sasawa fagac, yogolec hodocine aigac. Ye wiyac sasawa mi fikeemewa ye biyachac gawec, nga yakumac gagac, ailu gaginowagac, yogo foinac.

**1:11:** Fike 4:7-8; 1Yoa 3:12; 2Pi 2:15; Him 16:1-35 \* **1:12:** Himong iwa misa homacne mi faibong. Ilec ailu kaguwa mackolec yogo wiyac madicne. Nga kaguwa mac mikac, yogo noine mikac, yenge inguc ngagelu gaibong. **1:12:** 2Pi 2:13,17 **1:14:** Fike 5:18,21-24 † **1:15:** Yowa yogo Enok 1:9 yogowacni. Hibi yogo Wapongte hibiwa mi fagac. Ngic yele siduc yogo Fike-fike 5:19-24 iwa fagac. **1:18:** 2Pi 3:3 **1:20:** Kol 2:7 **1:23:** Sek 3:2; Miye 3:4 **1:25:** Rom 16:27; 2Pi 3:18

## Yesule Miyegengkeicne Yoanedi Kwelengkewec

### *Mimi-yegeng yowa*

Yoane ye Yesule siduc edocebame Roma gamangti balu Patmos nucka lobong mucmacka ingucne gawec. Ngic-ngigac gocne wosaelu yanguc ngagegaing. Yoane yogo ye Yesule mic-tengeng. Dameng iwa Roma gamangti Yesule habu ngaba aiyelelu doicka locebaibong.

Yesu homackacni gboliyelu honocmengka feme hifa 65 ngama ingucne motome, Yoane Patmos nucka gaemewa Yesudi gungka ingucne fikecnolu yowa edolu wiyac lobewa fikedaicte, yogolec soc holelu mime yegengkewec. Nga wiyac lobewa fikedaicte, yogo yele dongewa biyachac fikeme nganiwec. Ilec yowa gocne ye biyac fikeicne ingucne kwelengkewec. Aime wiyac fikibong nganicebawec, yogo damengngineng alingka mi balaibegaing mecne. Wiyac ngani-ngagec ailu hibi yagowa kwelengkewec. I yangucte, Yesule habu basanangebame Yesuholec taocke-galu umacka mi wawedaingkale, hibi yago kwelengkewec. Umac monic, yogo gamangti mime damongngineng ye wapong ingucne afeedabieng, ye sawang yowa inguc kwelengkewec. Aime Yesu ye wac feicne badaicte. Ailu Wapongti yele ngaba nga Satang ewalicebame sowalebong yeicne aling bamadicebame yeholec gadaingte, siduc yogo kwelengkewec.

Aime noine, Wapongte siduc-mimi ngic yenge wiyac lobewa fikedaicte, yogolec yowa kwelengkeibong, dameng iwa wafebong nebocinele fungine yegenabenang mi fikegac. Aime siducngineng noine fikedaicte, dameng yogowabac yegenabenang aidaicte. Ailu hibi yagowa wiyac homacne yengele dzaleine 7 me dzaleine 12 fagac. I yangucte, dzaleine 7 nga 12te fungine yogo soc holelu wiyac bucbuchac fagac me wiyac moto-motoine motogac.

Yowa homacnele fungine yogo Wapongte Hibi Esecne iwa yowa kwelengkeicne fagachac. Yogolec bageina hibi wacngineng nga fengngine fagac.

### *Yowa yago hibi nebocina fagac*

1:1-8 Molic-molic yowa

1:9-20 Yesudi gungka ingucne Yoane fikecnowec

2:1-3:22 Yesule habu 7 yengele yowa

4:1-5:14 Wiyac honocmengka nganiwec

6:1-8:1 Umac 7 hibiwa fagac, yogo himongka fikedaingte

8:2-11:19 Angelo 7 yenge kpeng 7 fitobong himongka nga sawawa umac fikedaingte

12:1-13:18 Satang nga yele bole-ngic yaeckang yenge himongka yegena fikelu gadaingte

14:1-15:8 Wiyac haicine monic-monic nganilu ngagewec

16:1-21 Angelo 7 yenge pele 7 sotingkebong Wapongte aalictc ameine himongka fikedaicte

17:1-18:24 Wapongti Babilon basowaledaicte

19:1-20:15 Yesudi kwesilu ngabaine Satangkolec wenagulu dac kiwec ingucne iwa lodaicte

21:1-22:5 Honocmeng nga himong ailu Yerusalem gbolicne

22:6-21 Yesu nga Yoane yekele baba-sanangte yowa nga sawang-yowa

### *Yoanedi wiyac nganiwec yogo miwec*

<sup>1</sup> Yowa yago Yesu Kristodi mime yegengkegac. Yele kwelec kwekwe ngic-ngigacfocine yenge wiyac biyac fikenale edalicebadaicte, yogo Wapongti Yesu lacnowec. Ailu angeloine monic saleme yedi yowa maaineholec mime yegengkeme kwelec kwekwe ngicine Yoane, na hocne yowa yogo edocnuwec. <sup>2</sup> Edocnulu Wapongte yowa nga Yesu Kristole siduc mime yegengkeme nani wiyac naneuc dongenedi ngani-ngagec aiiba, yogo sasawa mibe yegengkegac. <sup>3</sup> Dameng bangkalegacte monicti Wapongte siduc-yowa yago wafe-ngagec aiyelegac, ye kwele-angackolec aigac. Aime ngic-ngigac yenge yowa yagowa kwelengkeicne fagac, yogo ngagelu balaibegaing, yenge inguchac kwele-angackolec aigaing.

### *Yesule habu yengele yowa*

<sup>4</sup> Na Yoanedi Asia prowins kwelina Yesule habu 7 gagaing, ngengele hibi yago kwe-lengkegabat. Wapong gawec nga gagac ailu gacgu kwesinowagac, ye ngictaule ngiyen-giyewa ngiyegac. Nga asu 7\* yenge yele emewa gagaing, yengelacni kwele-madic nga kwele-mogungtowadi ngengeholec fadaic. <sup>5</sup> Aime Yesu Kristo yelacni inguchac fadaic. Ye yowa balaibe-balaibe widac ngic noine. Ye molickenolelu homackacni gboliyelu fangkelu fikewec. Ailu himongte ngictau yengele damongningeng. Ailu ye nongileng kweleinedi angac ngagelu sacinedi bikickacni bamotocnubawec. <sup>6</sup> Bamotocnubalu ngani-damongte habu bacnubalu yeicneholec alingnubawec. Alingnubame nongileng yele Wapong Mamacinele depec-baba ngic ingucne ailu mimiteng bole balu gagabeleng, yogolec inguc aiwec. Yela wac feicne nga tapili yogo moto-motoine mikac fafegidaic, yogo foinac.

<sup>7</sup> Nganing, ye kaguwa kwelina kwesime ngic-ngigac sasawa yenge dongenginengti nganidaingte. Aime socina sangaladi kwembalackeibong, ngic yogo yenge dongenginengti ye inguchac nganidaingte.

Aime himong fengningang fengningangsoc ngic-ngigac sasawa yenge ye ngagesilu kwele-sowac sugcnehac ailu hiyadaingte. Oc, yogo fikedaicte, yogo foinac.

<sup>8</sup> Sugucne Wapongti yanguc migac, “Ye gawec nga gagac ailu gacgu kwesinowagac, yogo naneutihac. Na Tapilitowa Fileine, na ‘A’ nga ‘Y’, yogo molic-molicine iwacni moto-motoine.”†

### *Kristo nganiwec*

<sup>9</sup> Na Yoanedi Wapongte yowale nga Yesule mibe yegengkewec ailu Patmos nucka gaiba. Na ngengele ngic hae-gbangineng, ngenge nga na nongileng momoc Yesuholec wetackelu doic nga Wapongte ngani-damong bagacgu tatakic mikac sanangne gagabeleng. <sup>10</sup> Sugucnele hadeng‡ monicka Asudi nala bole bame, lobena yowa-malac monic sugucnehac kpeng ucine ingucne ngagebe <sup>11</sup> yedi yanguc miwec, “**Ga wiyac nganigic, yogo hibiwa kwelengkec. Kwelengkelu Yesule habu yenge taon 7, yogo Efesana nga Simina ailu Pegamung nga Taiataira ailu Sadis nga Filadelfia ailu Laodisea, ga hibi yogo yengela loengka hikeme nganibong lolickena.**”

<sup>12</sup> Inguc mime yowa-malac yogo ngagelu nganinogale hefaliyeiba. Hefaliyelu nganibe hifa yenge higengineng 7 edelu domaibong. Hige 7 yogo goldi baicne ingucnedi domabong nganiiba. <sup>13</sup> Nganicebabe yengele hewackacni monict Ngicte Madecte silic ingucne domawec. Ye ngakpiine dalicne holeme susucinedi higeine someckeicne, nga mondacina umbika goldi baicne yogodi hefeicne fawec. § <sup>14</sup> Ye hodoc-luweine nga hodoc-dowecine kwalac-kwalac yogo lama dowecine suweicne nga kaguwa wenacti kweme kwalackegac ingucne\*\* ailu dongeine yogo dac-ubulang ingucne. <sup>15</sup> Aime aen sasacne dacka lobebong latak-latacineholec aicaigac, ye higeine yogo ingucne aiwec. Aime yowa-malacine yogo misa dundung bocyac yengele ucngineng ingucne aiwec. <sup>16</sup> Ye mole-foleinapecti asocmeng 7 bacebalu domawec. Aime micinacni hudu-babale fitec micine nga lobeine yogo micine-holectihac ofelu wawec. Haic-mesuine yogo wenac-dongeine tapiliineholec ofecaigac, yogo ingucne aiwec.

<sup>17</sup> Aime ye nganilu higeine emeina wawelu homaicne ingucne fabe, yedi mole-foleinedi nale feiwa lolu yanguc miwec, “**Ga mi hangocguna, na molic-molicine nga moto-motoine.** <sup>18</sup> **Nganigic, na gaganeholec gagabac. Na homaiba ailu hatacmac gbolicne gagabac. Ailu ngagegic, na moto-motoine mikac gaibadi gagabachac, homac nga Wangec-mac yekele ki balu gagabac.**

<sup>19</sup> **“Ilec ga wiyac nganigic yogo kwelengkec. Yogo wiyac yakumac fagac ailu lobewa fikedaicte, yogolec kwelengkec.** <sup>20</sup> **Asocmeng 7 mole-foleinedi bacegabac.**

\* **1:4:** Ngic gocne yengi yanguc ngagegac, asu 7 yogo Tili Asu wacine monic. Nga ngic gocne yengi yanguc ngagegac, asu 7 yogo angelo me angelo ingucne wiyac gocne. **1:4:** Dan 7:9-14; Wah 3:14-15; Miye 3:1; 4:5 **1:5:** Kol 1:18; Mige 89:27,37 **1:6:** Dan 7:18; Wah 19:6; 1Pi 2:9; Miye 5:10; 20:6 **1:7:** Dan 7:13; Sek 12:10; Mat 24:30; Yoa 19:34-37; 1Tes 4:17 † **1:8:** Grik yowawa ye yanguc miwec, “Naneutihac Alfa nga Omega.” Alfa yogo Grik yowa nenggacinele hibi molic-molicine nga Omega yogo moto-motoine. “A” yogo migabac yowa nenggacinele molic-molicine nga “Y” yogo moto-motoine. **1:8:** Miye 21:6; 22:13 ‡ **1:10:** Sonda wacine monic yogo Sugucnele hadeng. Gocne yengi ngagebong, yogo Sugucnele hadeng monic lobewa fikedaicte. **1:10:** Wah 19:16 **1:11:** Dan 7:10 **1:12:** Sek 4:2,10 § **1:13:** Depec-baba ngic yenge ngakpi ingucne holelu gaibong. **1:13:** Dan 7:13; 10:5 \*\* **1:14:** Grik yowawa “Mac tilowa wiyac kwalac-kwalac kaguwa kwelinacni mac ingucne wacaigac,” inguc kwelengkeicne fagac. **1:14:** Esek 43:2; Dan 7:9; 10:6; Miye 2:18; 19:12; 14:2 **1:16:** Dan 12:3; Yes 11:4; 49:2; Hib 4:12; Miye 2:12; 19:15 **1:17:** Dan 7:15; 10:9-12; Yes 44:6; 48:12; Miye 2:8; 22:13

**Ailu hifa higengineng 7 goldi baicne nganigic, yogolec ngage-ngage sangkeicne yang fagac. Asocmeng 7 yenge Yesule habu 7, yengele angelo.†† Nga hifa higengineng 7 yenge Yesule habu 7 aigaing.”**

## 2

*Efesas habu*

**1 “Ga Yesule habu Efesas iwa gagaing, yengele angelola yowa yago kwelengkec.”**

“Ngic asocmeng 7 mole-foleinedi bacaigac. Ailu hifa higenginengkolec 7 goldi baicne yengele hewacka lolickecaigac, yedi Efesas iwa ngengele\* yanguc migac, 2 ‘Na ngengele aibabangineng nga doic-bolengineng ailu sanangne domacaiga-biyeng, yogo ngageyackegabac. Ailu ngenge ngic-ngigac sowacne yengele mi aingelecaigac, yogo ngagegabac. Ngic gocne yenge yengileng salecebaicne micaigaing. Ailubac yenge salecebaicne mi aigaing, ngenge yenge lokwesac aiyeele-bongka yenge kwesac-ngic, yogo biyac yegengkeibong. 3 Ngenge tatakic mikac sanangne domacaigabiyeng. Aime nale wacte ailu umac bocyac balu tapilingineng mi wawec.’”

4 “Aime molickelu kwele-angacnginengte aibaba yogo hegileibong, yogolec ngagebe mi madickegac. 5 Ngenge esecne gagangineng wenucka hegilelu wawebong, yogolec ngage-ngage bole badabiyeng. Ailu kwelengineng hefaliyeme aibabangineng molickelu wenuc ailu gaibong, yogo aidabiyeng. Inguc mi ailu kwelengineng mi hefaliyedabiyengtewa, na ngengela kwesilu hifangineng higeineholec macinacni baickedacte. 6 Ngenge aibabangineng madicnebac yanguc, ngenge Nikolas habu† yengele aibaba yogo kwelenginengti hegilecaigaing, na inguchac yogo kweledi hegilecaigabac.”

7 “Monic hedeckolec ye Asudi Yesule habufocine yowa edocebagac, yogo aneng ngagedaic. Nga monic ye hudu welu gbelong aidaicte, ye gagale yoc Wapongte mac madicnebenang iwa domagac, yogowacni noine nalic lacnobe nodaicte.”

*Simina habu*

**8 “Ga Yesule habu Simina iwa gagaing, yengele angelola yowa yago kwelengkec.”**

“Ngic molic-molic nga moto-motoine, ye homalu gboliyewec gagac, yedi Simina iwa ngengele yanguc migac, 9 Ngenge doic ngagelu socte wiyacka waweweine gagabiyeng, yogo ngageyackegabac. Ailu sifu kwelele wiyacka wakegabiyeng. Ngic misulec aigelecaigaing, yenge yengileng Yuda ngic-ngigac milubac Yuda ngic-ngigac noine mi ailu Satangte kpakpaduc mac aigaing, na yogo inguchac ngagegabac. 10 Ngenge doic ngagenogale mi hangoncgebadaic. Aleng Sugucnengineng ye lokwesacka locngebhanale ngageme, ngengelacni gocne muc-macka locngebabong, ngenge hadeng 10te kwelina doickolec gadaingte. Aime ngenge nale yowa balaibelu sanangne galu homaebongka, gagale maaine sil ingucne ngeledacte.”

11 “Monic hedeckolec ye Asudi Yesule habufocine yowa edocebagac, yogo aneng ngagedaic. Nga monic ye hudu welu gbelong aidaicte, ye homac alecine yaeckangti nalic mi basowaledaicte.”

*Pegamum habu*

**12 “Ga Yesule habu Pegamum iwa gagaing, yengele angelola yowa yago kwelengkec.”**

“Ngic hudu-babale fitec micine nga lobeine yogo micineholechac balu domagac, yedi Pegamum iwa ngengele yanguc migac, 13 ‘Satangti ngictaule ngiyengiyewa ngiyegac, ngenge taon iwa gagabiyeng, yogo ngagegabac. Ailu Satangti gagac, iwa Antipas ye nale yowa sanangne mime yegengkeme balaibelu game, ye wehomaibong. Aime ngengele hewackacni Antipas wehomaibong. Aime

†† **1:20:** Grik yowawa angelo yogolec fungine yaeckang heuckeicne, yogo angelo me salecebaicne. Angelo yago fagac, yogo angelo monicti me ngic monicti yogo mi mime yegengeicne. **1:20:** Dan 2:28-30; 12:1-3 \* **2:1:** Yesule habu 7, yengele angelola kwelengkeyewec. Gocne yengi yanguc ngagegaing, angelo yogo ngicbenang yengele damong. Ailu ye damongte ngagelu Grik yowawa “ga” milu kwelengkewec. Aimebac yowa sasawa yogo Yesule habu yengele aibaba nga yowa, yogo damongte yowa sugu miyac. Ilec ailu Grik yowawa “ga” hafaliyelu “ngenge” kwelengkegabeleng. **2:1:** Miye 1:16 **2:2:** 1Yoa 4:1 **2:5:** Miye 3:3 † **2:6:** Nikolas nga ngic-ngigac yele yowa balaibelu yanguc ngageibong, siduc-gbong alang bacnocaigaing, nga selo-boic aibaba aicaigaing, aibaba ingucne umacine mikac nalic ainoga. **2:7:** Yes 6:9-10; Esek 3:27; Fike 2:9; Miye 22:2,19 **2:9:** 2Kor 11:14-15; Miye 3:9 **2:10:** Dan 1:12-15; 2Tim 4:8; Yak 1:12 **2:11:** Miye 20:14; 21:8



ngenge sifu ngagesingnulu nale wac sanangne balu gaibong. Ailu wacne mi bisockeibong.’”

<sup>14</sup>“Aibaba gocne ngengela fagac, yogolec ngagebe mi madickegac. Ngic-ngigac gocne ngengeholec gacaigaing, yenge Balamte wewedu-yowa balaibecaigaing. Yedi Israel alingfocine okac ingucne lome waweningte Balak weducnowec. I yangucte, yenge siduc-gbongte depecte sic nolu selo-boic bole<sup>‡</sup> banogale inguc aiwec. <sup>15</sup> Ingucne gocne yenge Nikolas habule wewedu-yowa balaibecaigaing, yenge inguchac ngengeholec gagaing. <sup>16</sup> Ilec ailu kwelengineng hefaliyena. Inguc mi aidabiyengtewa, na ngengela biyachenang fudacte ailu hudu-babale fitec micna fagac yogodi wecebadacte.”

<sup>17</sup>“Monic hedeckolec ye Asudi Yesule habufocine yowa edocebagac, yogo aneng ngagedaic. Nga monic ye hudu welu gbelong aidaicte, ye nani mana nosing sangkeicne yogo lacnodacte. Ailu posa monic kwalac-kwalacka wac gbolicne monic kwelengeicne fagac, yogo lacnodacte. Wac yogo monicti mi ngagedaicte, ngic posa nalacni badaicte, yedi sugu ngagedaicte.”

*Taiataira habu*

<sup>18</sup> “Ga Yesule habu Taiataira iwa gagaing, yengele angelola yowa yago kwe-lengkec.”

“Wapongte Madec ye dongeine dac-ubilang ingucne. Ailu aen sasacne dacka lobehong latak-latacine aicaigac, higeine yogo ingucne, yedi Taiataira iwa ngengele yanguc migac. <sup>19</sup> ‘Na aibabangineng nga kwelenginengti ngic-ngigac yengele angacgebacaigac, yogo ngagegabac. Aime ngage-ngagesingnineng sanangkeme galu tatakic mikac bolewa baficebacaigabiyeng, yogo ngageyackegabac. Ailu aibabangineng yakumacti esecne molickelu aibaba ailu gaibong yogo ewaligac.’”

<sup>20</sup> “Aime sifu ngigac wacine Yesebel, ye yeicne siduc-mimi ngigac micaigac. Ye wewedu bole kwesacine bagacgu selo-boic aibaba nga siduc-gbongte depecte sic nolu, yefe iwa nale kwelec kwekwe ngic-ngigacfocne bacebalu gawec. Aime ngenge yogo mi kpatalacnolu gacaigabiyengte ngagebe mi madickegac. <sup>21</sup> Ye nani kweleine hefaliyena dameng lacnoiba. Aime ye kweleine hefaliyeme selo-boic aibabaine hegilenale mi aicnogac.”

<sup>22</sup> “Ngagegaing, ngigac ye huc aicnome mapicina fanale lodacte. Aime ngic-ngigac weni yengi yeholec wetackelu selo-boic aibaba aicaigaing, yenge yeie aibaba yogo hegilelu kwelengineng mi hefaliyedaingtewa, doic umacne-hachenang ngagedaingte. <sup>23</sup> Aime na yeie adu-madecfocine hucti wecebabe homadaingte. Inguc aibe Yesule habu sasawadi yanguc ngage-motodaingte, na ngage-ngagewa nga kwelewa ngani-wosaec ngic. Na ngenge filesoc aibabanginengte silicka ameine badungeledacte. <sup>24-25</sup> Aime Taiataira habuwa ngic-ngigac tofaine gagaing, ngenge Yesebelle wewedu nga Satangte ngage-ngage gbolongne migaing, yogo mi haibong. Ngenge yanguc edocngebagaibac, wiyac fangelegac, ngenge yogo sanangne balu gadaing. Aime yogolec feiwa umac monic mi taokedacte. Aime yogo balu gabong na fudacte.”

<sup>26-27</sup> “Monic ye hudu welu gbelong aidaicte ailu nale aibaba sanangne balu game dameng motodaicte, yeie yanguc migabac, Na Mamacnelacni bole-yowa tapiliine-holec balu himongne himongne yengele Sugucne gagabac. Aime silicine ingucnehac ngic gbelong aidaicte, himongne himongne yengele sugucne ganogale bolele hibi nga tapili lacnodacte.

‘Aime ye ngictaule yasu aenti baicne yogo balu damongebalu gadaicte. Ailu ngicti hebec kwouckecaigaing, silicine ingucnehac gocne kwoucebadaicte.’ (*Mige 2:9*)

<sup>28</sup> Ailu na ubiyacte asocmeng yogo inguchac lacnodacte. <sup>29</sup> Monic hedeckolec ye Asudi Yesule habufocine yowa edocebagac, yogo aneng ngagedaic.”

**2:13:** Mige 89:37; Yes 43:10-12    **‡ 2:14:** Dameng gocna, yogo ngic-ngigac yenge selo-boic aibaba aigaing. Nga dameng gocna yogo Wapong nga siduc-gbong me wapong kwesacine yeke momoc alang bacepagaing, yogo selo-boic aibabale silic ingucne.    **2:14:** Him 22:5-25:3; 31:16; 2Pi 2:15    **2:16:** Him 31:8; Yos 13:22; Miye 3:11    **2:17:** Wah 16:4,14-15,33-34; Yoa 6:48-50; Yes 62:2    **2:18:** Dan 3:23-25; 10:6; Miye 1:14-15    **§ 2:20:** Ngigac siduc-yowa miwec, yeie aibaba yogo ngictau Ahab ngigacine Yesebelle aibaba ingucne aiwec. Yedi siduc-gbong nga hefec-dinac aibaba gocne bakwesilu Israel ngic-ngigac bacebame siduc-gbong afeelu gaibong.    **2:20:** 1Ngt 16:31; 2Ngt 9:22    **2:23:** Mige 7:9; Yer 17:10; Miye 20:12-13    **2:24-25:** Miye 3:11    **2:28:** Him 24:14-20; Miye 22:16; 2Pi 1:19

## 3

*Sadis habu*

<sup>1</sup>“Ga Yesule habu Sadis iwa gagaing, yengele angelola yowa yago kwelengkec.”

“Ngic Wapongte asu 7 nga asocmeng 7 balu domagac, yedi Sadis iwa ngengele yanguc migac, ‘Na aibabangineng ngageyackegabac. Ngenge gagaholec gagabiyeng edocngebacaigaing. Ailu sifu ngenge homaicne silic gagabiyeng.

<sup>2</sup> Ilec ailu ngenge yeucnagulu deboc-gboli gadaing! Aibabangineng tofaine homanogale ailu fagac, yogo bamadickelu basanangkening. I yangucte, ngenge aibabangineng ngani-motogabac. Aimebac Wapongnele ngani-nganiwa nalic mi aigac. <sup>3</sup> Yowa molickelu ngengela kwesime ngagelu baibong, yogo ngagesilu balaibedabiyeng. Ailu kwelengineng hefaliyedabiyeng. Inguc ailu ngenge deboc-gboli mi gadaingtewa, na hise-baba ngic ingucne ngengela fudacte. Ailu ma damangka fulu webating aingeledacte, yogo nalic mi ngagedaingte.’”

<sup>4</sup> “Aime ngengele aling kacni ngic-ngigac efecnemacti sugu aibabanginengti ngakpi-kpoluc ingucne babong wonongkolec mi aiwec. Na nganibe andoine aigaingte yenge ngakpi-kpoluc kwalacne holelu naholec momoc hike-kwesic aidabelengte. <sup>5</sup> Inguc ailu monic ye hudu welu gbelong aidaicte, ye ngakpi-kpoluc kwalacne holedaicte. Aime na yele wac Gagale hibiwacni nalic mi baickedacte. Ailu yele wac yogo Mamacne nga angelofocine yengele haicka mibe yegengkedaicte. <sup>6</sup> Monic hedeckolec ye Asudi Yesule habufocine yowa edocebagac, yogo aneng ngagedaic.”

*Filadelfia habu*

<sup>7</sup> “Ga Yesule habu Filadelfia iwa gagaing, yengele angelola yowa yago kwelengkec.”

“Gbagbacne nga yowa noinele fileine, yedi Dawidile ki balu gagac. Ye nu laliyeme monicti nalic mi holedaicte. Ailu nu holeme monicti nalic mi laliyedaicte. Aime yedi Filadelfia iwa ngengele yanguc migac, <sup>8</sup> ‘Na aibabangineng ngageyackegabac. I yangucte, ngenge tapili-wawa gaibong ailu sifu nale yowa balaibelu wacne mi hegileibong. Ilec ngagegaing, nu monic ngengele haicka laliyengelebe, monicti yogo nalic mi holedaicte.’”

<sup>9</sup> “Aime ngagegaing, ngic gocne yenge Satangte kpakpaduc mackacni, yenge yengileng kwesac ailu Yuda ngic-ngigac micaigaing. Ailu yenge Yuda ngic-ngigac noine mi aigaing, miyac. Aime na kwelenedi ngengele angac ngagegabac, yogo yengi ngage-motoningte aiyelebe, yenge ngengele higewa fulu ketadi holelu alang bangeledaingte. <sup>10</sup> Ngenge tatakic mikac sanangne ganingte edocngebaiba, yogo noine balu gaibongte ailu lokwesac damangka mi febong na bacngebabe wasecne aidaingte. Lokwesac yogo himongtowa yagowa buchuchac ngic-ngigac yengela fikenale miicne fagac.”

<sup>11</sup> “Na biyac fudacte. Ilec ngenge sil badabiyengte, yogo monicti mi banale wiyac fangelegac, ngenge yogo sanangne balu gadaing. <sup>12</sup> Monic ye hudu welu gbelong aidaicte, ye nani gunungkebe Wapongnele Ibu-mac kwelinele bosing sanangne aidaicte. Ailu ye Ibu-mac yogo hatacmac mi hegiledaicte. Aime na Wapongnele wac ailu Wapongnele taon sugucnele wacine, nga neicne wacne gbollicne, wac habackang yogo yele feiwa kwelengkedacte. Taon sugucne yogo Wapongnele taon, yogo Yerusalem gbollicne ailu yogo honocmeng kacni nale Wapongtacni wadaicte.”

<sup>13</sup> “Monic hedeckolec ye Asudi Yesule habufocine yowa edocebagac, yogo aneng ngagedaic.”

*Laodisea habu*

<sup>14</sup> “Ga Yesule habu Laodisea iwa gagaing, yengele angelola yowa yago kwelengkec.”

“Ngic wacine Noine, ye Wapongte yowa balaibecaigac. Ailu yowa noine yogolec widec aigac. Ye Wapongti wiyac sasawa mime fikeibong, yogolec fungine gagac, yedi hocne yowa yago Laodisea iwa ngengele yanguc migac, <sup>15</sup> ‘Na aibabangineng ngageyackegabac. Ngenge dacine me mogungne mi gagabiyeng. Ngenge dacine sugu me mogungne sugu gaebongkabac angac

ngagedaba. <sup>16</sup> Aime ngengebac dacine me mogungne mi gagabiyeng. Ngenge hewacnginac dac-dacine gagaingte ailu micnacni mengucngebanoale aigabac.\*  
<sup>17</sup> Nonge moneng-mafatowanonggengcolec ailu wiyac monicte mi kpungkelu gagabeleng, ngengilengte inguc milu sifu kwele-umactowaholec gagabiyeng. Ailu ngic-ngigac yenge ngengele kwele-sowac ngagegaing. Ailu waweweine nga dongepic ailu senggang gagabiyeng, yogo mi ngagegabayeng. <sup>18</sup> Ilec yanguc edocngebagabac, kwelele mafatowaholec ainogale nalacni gol dacti lobeicne fuli badabiyeng.† Ailu senggang gameineholec mi ganingte ngakpi-kpoluc kwalac-kwalac balu ngakpi-kpoluckolec aidabiyeng. Ailu dongengineng hilanogale donge suwele helocti dongengineng suwenogale nalacni fuli badabiyeng.’”

<sup>19</sup> “Na ngic-ngigac weni yengele kwelenedi angac ngageyelecaigabac, yenge ngelengebalu edocebalu webating aieyelecaigabac. Ilec sanangkelu kwelengineng hefaliyena. <sup>20</sup> Ngagegaing, na nuwa domalu kpong-kpong holelu gagabac. Holelu gabe monicte nale yowa-malacnele hedec lolu ngagelu nu laliyeneleme, na yela febe noke momoc ngiyelu nosing momoc nodabelecte.”

<sup>21</sup> “Na hudu welu gbelong ailu febe Mamacneholec yele ngictaule ngiyeyewa ngiyecaigabelec. Silicine ingucnehac monicte hudu welu gbelong aidaicte, ye nani ngictaule ngiye-ngiyene lacnobe noke momoc ngiyedabelecte.

<sup>22</sup> Monic hedeckolec ye Asudi Yesule habufocine yowa edocebagac, yogo aneng ngagedaic.”

## 4

### *Honocmengte mimi-madic*

<sup>1</sup> Inguc mime na honocmengka nu monic laliyeicne nganiiba. Hei, yowa esecne kpeng ucine ingucne yowa-malac monic edocnume ngageiba, yedi yanguc miwec, “**Ga yawa ofenong. Yagolec lobeina ma pasi fikedaicte, yogo edalicgudacte.**” <sup>2</sup> Hei, inguc mime iwahac Asudi nala bole bame nganibe honocmengka ngictaule ngiye-ngiye loicne iwa monicte yogolec feina ngiyewec. <sup>3</sup> Yele angoc yogo posa basufaleicne, yogo posa sasacne nga posa hunga, yeke ingucne. Ailu hulilic monic posa hedonggholi ingucne, yogodi ngictaule ngiye-ngiyewa lolickelu fawec.\*

<sup>4</sup> Ailu ngictaule ngiye-ngiye ngiyeme ngictaule ngiye-ngiye gocne, dzalengineng 24, yenge ngictaule mac ngiye-ngiye yogo lolickelu ngiyecaigaing. Ngiye-ngiye yogolec feina damong 24 ingucti ngiyecaigaing. Damong yenge ngakpingineng kwalac-kwalac holelu hodocngineng feina ngictaule duu goldi baicne holelu ngiyecaigaing. <sup>5</sup> Inguc nganicebabe pilatac bame gbululung ucine sugucnehacti ngictaule ngiye-ngiyewacni fikewec. Ngictaule ngiye-ngiyele haicka hifa 7 lobecaigaing, yogo Wapongte asu 7. <sup>6</sup> Aime ngictaule ngiye-ngiyele haicka wiyac monic kiwec sugucne ingucne galasdi baicne, galas yogo wonongngine mikac nganiiba.

Aime ngictaule ngiye-ngiyewa neboc nga neboc 4, iwa wiyac gaganginengcolec 4 yengi hewalingkelu domacaigaing. Yenge emengineng nga lobengineng sasawa yogo dongedi wawayackeicne. <sup>7</sup> Wiyac gagaineholec monic ye bulumaka ngicne tapiliineholec ingucne. Aime yele lobeina, wiyac gagaineholec monic ye haic-mesuine ngani-nganiine ngic ingucne. Aime moto-motoina wiyac gagaineholec monic, ye hikic sugucnedi filalangkecaigac, ingucne aiwec. <sup>8</sup> Wiyac gaganginengcolec 4 yenge filesoc filesoc kwenggelengineng 6. Ailu socngineng sasawa yogo dongedi saweyackeicne. Ailu kwenggelengineng bageina yogo inguchac dongeholec. Ailu yenge hadeng nga debocsoc ngiye-ngagec mikac yanguc milu gacaigaing,

“Sugucne Wapong Tapilitowa Fileine,  
 Ye gbagbacnedi, gbagbacne, ailu gbagbacne.  
 Ye gawec nga gagac ailu gacgu kwesinowagac.”

<sup>3:15</sup>: Rom 12:11 \* <sup>3:16</sup>: Taon iwa misa dongeine faibong. Misa gocne yenge dacine aime ngic-ngigac hikelu lowalu madickeibong. Nga misa gocne yenge mogungne aime ngic-ngigac hikelu balu nolu sanangkeibong. Ilec ailu dacine nga mogungne yeke momoc madicne aigaic. Nga wiyac dac-dacine yogo madicneine mi fagac. <sup>3:17</sup>: Hos 12:8; 1Kor 4:8; Luk 12:21 † <sup>3:18</sup>: Dacti gol yafoine lobeyackeme wosaeme gol noine sugu badamecte. Gol yogo kwelele wiyac madicnebenang yogolec soc holecicne. <sup>3:18</sup>: Yes 55:1; Miye 4:4 <sup>3:19</sup>: Ynn 3:11-12; 1Kor 11:32; Hib 12:6; Miye 2:5  
<sup>3:20</sup>: Yoa 14:23 <sup>4:1</sup>: Dan 2:28-29; 7:9; Wah 19:16-19; Miye 1:1,10 <sup>4:2</sup>: Yes 6:1 <sup>4:3</sup>: Esek 1:26,28 \* <sup>4:3</sup>: Posa wacngineng yogo yanguc, yaspa, kanelian, nga emeral. <sup>4:4</sup>: Dan 7:10; Miye 3:18 <sup>4:5</sup>: Esek 1:13; Sek 4:2; Miye 1:4; 8:5; 11:19; 16:18 <sup>4:6</sup>: Dan 7:2-3; Esek 1:5-10,22; 10:14 <sup>4:8</sup>: Yes 6:2,3; Esek 1:18; 10:12

<sup>9</sup> Aime ngictaule mac ngiye-ngiyeina ngiyecaigac, ye gaga-sanang gagingowagac. Aime wiyac gaganginengkolec yenge yele wac bafelu alang bacnolu kwele-madic micaigaing. Inguc micaigaingka, <sup>10</sup> ye ngictaule ngiye-ngiyeina ngiyecaigac, ailu gaga-sanang gagingowagac, damong 24 yenge yele higewa ketadi holecaigaing. Holelu ye afeelu ngictaule duungineng bamocotolu ngictaule ngiye-ngiyeinele emeina wickebong wame yanguc mi-gaing,

<sup>11</sup> “Ga Sugucne ailu Wapongnonggeng.

Gagi wiyac sasawa miyengka fikeyackelu gaganginengkolec fagaing.

Gageuc ngagelu inguc bafuwayackeingte, ga andoine. Ilec ailu wac feicne nga alang-baba ailu tapili sasawa badamecte.”

## 5

### *Hibi kpadidiweicne*

<sup>1</sup> Wapong ngictaule ngiye-ngiyeina ngiyecaigac, ye hibi kpadidiweicne monic mole-foleina balu ngiyegac. Aime hibi yogo kwelina nga lobina kweleng kwelengkeicne fagac. Aime iwa yoc sopiyaine <sup>7</sup> ingucnedi bakatackelu kpakpatalac aka loicne nganiiba. <sup>2</sup> Na angelo monic tapiliineholec nganibe yedi malac sugucnehac yanguc aukwelu wackewec, “Hibiwa yoc sopiyainedi aka lolu bakatackeiicne yogo madi nalic baickelu bafilamenale silicine ngagegac?” <sup>3</sup> Wackeme basackebong honocmengka me himongka me himong bageina monicti hibi kpadidiweicne yogo nalic mi bafilamedaicte, me kweleng yogo ngani-nganilesoc mi fagac. <sup>4</sup> Aime monicti hibi yogo bafilamelu nganinogalesoc nalic mi aiwecte ailu, kwelene sowaleme hiyaiba. <sup>5</sup> Hiyabe damongfocngineng yengelacni monicti yanguc edocnuwec, “Ngagegic, ga mi hiyanong! Yuda yengelacni laion yogo, ye Dawidi ngambofocine yengele fikesaweckacni gidec, yedi gbelong aiwec. Ilec ailu ye hibi kpadidiweicne yele aka <sup>7</sup> bakatackeiicne, yogo nalic baickelu bafilamedaicte.”

### *Lama madecine*

<sup>6</sup> Inguc mime yanguc nganiiba. Ngictaule ngiye-ngiye nga wiyac gaganginengkolec 4, ailu damong 24 yengele hewacka Lama madecine monic domawec, ailu ye webong homaicne ingucne aiwec gagac. Lama madecine yogo ye begicine <sup>7</sup> ailu dongeine <sup>7</sup>. Dongeine yogo Wapongte asu <sup>7</sup>, yenge Wapongti himongka salecebame gagaing. <sup>7</sup> Yedi hocne lelu ngictaule ngiye-ngiyewa ngiyewec, yele mole-foleinacni hibi kpadidiweicne yogo bawec. <sup>8</sup> Hibi yogo balu domame, wiyac gaganginengkolec 4 nga damong 24 yenge yele haicka ketadi holeibong. Damong sasawadi gita mucine homacne, ailu pele goldi baicne yogo filesoc balu domaibong. Pele yogowa marasing hoine madicne fawec. Fame marasing hasockolec pelewacni ofewec, yogo Wapongte bingec yengele mimilocngineng, yogodi pelengineng wakeyackeicnedi ofelu fawec.

### *Lama madecine afeibong*

<sup>9</sup> Aime yenge gee monic gbolicne yanguc holeibong. “Gagi hibi kpadidiweicne yogo nalic balu aka bakatackeiicne yogo baickedamecte. I yangucte, ngic yengi wecgubong gagi sacgonedi ngic-ngigacfocgone fuli bacebaing. Ailu ga himong fengningang fengningangsoc ngic-ngigac, nga yowane yowane, ailu soc haicine monic-monic, nga himongne himongne ngic-ngigac sasawa, yengelacni moniyang moniyang fuli bacebang Wapongte aling ailu gagaing. <sup>10</sup> Fuli bacebang Wapongte ngani-damongte alingka gadaingte. Ailu yenge depec-baba ngic ingucne ailu Wapong kwelec kwecnodaingte. Aling yogo yengi himongne himongne yengele damong aidaingte.”

<sup>11</sup> Na dongene lokeme nganibe angelo bocyac yengele dzalengineng yogo 100 milion ewaligac. Ailu taosen nga taosen hatacmac feina taoockegaing. Yengi ngictaule ngiye-ngiye nga wiyac gaganginengkolec, ailu damong 24 hewalingebabong, yowa-malacngineng ngageiba. <sup>12</sup> Yengi sanangne wackelu aukwelu yanguc miibong, “Lama madecine wehomaicne, Yedi damongte tapili nga woc-wiyactowa ailu ngage-ngage-motoc, nga tapili ailu alang-baba, nga wac feicne ailu mimi-madic yogo nalic lacnobong badaicte.”

<sup>13</sup> Aime wiyac sasawa Wapongti mime fikeyackeibong, yenge honocmengka nga himongka ailu himong bageina nga kiwecka, yengele kweliwa wiyac sasawa gagaing, yenge yowa yanguc mibong ngageiba.

**4:9:** Dan 4:34; 12:7    **4:10:** Miye 7:10,15; 19:4    **4:11:** Dan 4:35-37    **5:1:** Dan 7:10; 12:9; Yes 29:11; Esek 2:9-10  
**5:4:** Dan 7:15    **5:5:** Dan 7:13-14,16; Fike 49:9; Yes 11:1,10; Miye 22:16    **5:6:** Sek 4:10; Yes 53:7; Yoa 1:36; Miye 13:8    **5:8:** Miye 8:3-4; Mige 141:2    **5:9:** Mige 33:3; 40:3; 96:1; 98:1    **5:10:** Dan 7:18,22,27; Wah 19:6; Yes 61:6; Miye 1:6; 20:6    **5:11:** Dan 7:10; Hib 12:22    **5:12:** 1Ngsi 29:11-12

“Ye ngictaule mac ngiye-ngiyeina ngiyegac nga Lama madecine, Yekela mimi-madic nga alang-baba, ailu wac feicne nga tapili moto-motoine mikac fafegidaic.”

<sup>14</sup> Inguc mibong wiyac gaganginengkolec 4 yengi “yogo foinac” miibong. Aime damong 24 yenge ketadi holecnolu yeke afecepaibong.

## 6

### *Yoc sopiyainedi aka bakatackeicne baickewec*

<sup>1</sup> Na nganibe Lama madecinedi kpakpatalac aka 7 bakatackeicne fawec, yogo molic-molic moniyang hibiwacni baickewec. Aime wiyac gaganginengkolec 4 yengelacni monicti yowa-malacine gbululung ucine ingucnedi wackelu aukwelu yanguc mime ngageiba, “Ga welec!” <sup>2</sup> Hei, inguc mime na hilalu becasic kwalac-kwalac monic nganiiba. Aime ye feiwa wiyac monicti lebeineholec ngiyewec. Monicti ngictaule duu monic lacnowec. Aime ye holelu becosicka hikelu huduwa ewalicebalu gbelong ainogale aiwec.

<sup>3</sup> Aime Lama madecinedi aka bakatackeicne monic hatacmac baickewec, iwa ngagebe wiyac gagaineholec monicti yanguc miwec, “Ga welec!” <sup>4</sup> Inguc mime becasic monic sasacnedi kwesiwec. Yele feiwa wiyac monic ngiyewec, monicti wiyac goncne lacnowec. Ye kwele-mogung baic-baicta tapili ailu himongne himongne ngic-ngigac yengungtihac wehomacnaguningte tapili yogo lacnowec. Ailu monicti hudu-babale fitec sugucne monic lacnowec.

<sup>5</sup> Aime Lama madecinedi aka bakatackeicne monic baickeme alecine habackang aiwec. Baickeme wiyac gagaineholec 3 yedi yanguc mime ngageiba, “Ga welec!” Hei, inguc mime becasic saec-saec monic nganiiba. Aime wiyac monic ye feiwa ngiyewec, ye sigel monic moleina balu ngiyewec. <sup>6</sup> Aime wiyac gaganginengkolec 4, yengele hewackacni yowa-malac ingucne monicti yanguc mime ngageiba, “Nosing lolocce dameng aime wit lita moniyangte fuli, yogo sugucnehac hadeng moniyangte bole-fuli aigac. Nga bali lita habackang, yogo hadeng moniyangte bole-fuli aigac. Aime ga heloc nga waing mi basowaledamec.”\*

<sup>7</sup> Lama madecinedi aka bakatackeicne monic baickeme alecine 4 aiwec. Baickeme ngagebe wiyac gagaineholec 4 yedi yanguc miwec, “Ga welec!” <sup>8</sup> Hei, inguc mime becasic dagec-dagec monic nganiiba. Aime wiyac ye feiwa ngiyewec, wacine Homac. Ye wiyac monic wacine Wangec-mac, ye mengockeme kwesiiboc. Kwesilu yeki himongtowa habu 4 iwacni heuckelu iwa nebocine yogo yeki hudu-babale fitec nga loloc ailu huc nga himongte kate-sic bacebaboc kwesidaingte. Kwesilu wiyac yogo yengi ngic-ngigac wecebabong homadaingte, yogolec tapili yeke yeteicne.

<sup>9</sup> Aime Lama madecinedi aka bakatackeicne monic baickeme alecine 5 aiwec. Baickeme iwa yanguc nganiiba. Ngic-ngigac Wapongte yowa bagalu mibong yegengkeme wecebabong homaibong, yengele ilucfocngineng alata bageina ngiyeibong. <sup>10</sup> Yenge iwa ngiyelu dacinaholec aukwelu yanguc wackeibong, “Oc, Sugucnenonggeng, ga gbagbacne gaga nga yowa noinele fileine. Ga ameine badu-badule dameng badaliwelu sacnonggenge bikic yogolec ngagelu ngic himongka galu wecnubaibong, yenge ma damengka mimocto-cebalu bikicnginengte ameine yeledamecte?”

<sup>11</sup> Inguc mibong ngakpi dalicne kwalacne filesoc ye lelu yanguc edocebawec, “Gocne yengi nenge wecngebabong homaibong, silicine ingucnehac kwelec kwekwe agofocngineng, yenge ngic hae-gbafocngineng aigaing, yenge momochac wecebabong homadaingte. Homabong dzalengineng ngageibawa feholeme motodaicte. Ilec nenge kpisicnemac hatacmac ngiye-ngagedaing.”

<sup>12</sup> Aime ye aka bakatackeicne monic baickeme alecine 6 aiwec. Baickeme nganibe memeya sugucnehac bame wenac-dongeine saeckewec, yogo kwele-sowacte ngakpi saecne ingucne aiwec. Aime tamacne ye bucbuchac sac ingucne aiwec. <sup>13</sup> Aime gbelong sugucnedi welu fik yoc hucine manggangne yockacni wemolungkeme wacaigaing, silicine ingucnehac asocmeng sawawa fagaing, yenge himongka molongkelu waibong. <sup>14</sup> Wabong ngicti hibi kpadidiwecaigaing, silicine ingucnehac sawa ye kpadidiwelu miyac aiwec. Miyac aime tiki nga nuc sasawadi mac ngiye-ngiyengineng hegileyackeibong.

<sup>15</sup> Inguc aime himongte ngictau nga ngic sugucne ailu hudu-baba ngic yengele damong. Nga ngic mafatowanginengkolec ailu ngic sanangne, nga kwelec kwekwe aling

**5:14:** Dan 7:27    **6:1:** Miye 4:6; 5:1    **6:2:** Sek 1:8; 6:1-6    **6:4:** Esek 21:9-15    \* **6:6:** Grik yowawa moneng monic wacine denarius kwelengeicne. Yoanele damengka moneng yogo moniyangti hadeng moniyangte fuli aiwec. Bali yogo padi ingucne nosing monic.    **6:8:** Yer 15:1-3; Esek 5:12,17; 14:21    **6:10:** Dan 8:13; Mige 78:10    **6:11:** Miye 7:9,13; 19:14    **6:12:** Yes 13:10-13; Esek 32:6-8; Mat 24:29; Sale 2:20; Miye 8:12; 11:13; 16:18    **6:13:** Yes 34:4  
**6:14:** Miye 16:20

sugucnefocngineng yengele bagewa gaibong, ailu ngic-ngigac ngic monicte bagewa mi gaibong. Yenge sasawadi hikelu henebe kwelina, nga posa sugucne sugucne bagenginang sangkeyackeibong. <sup>16</sup> Sangkelu yengi tiki nga posa yanguc edocebaibong, “Ngenge feinonggang walu Wapongti ngictaule ngiye-ngiyewa ngiyegac, yele haicka nga Lama madecinele aalichte ameine iwacni somecnubadabiyeng. <sup>17</sup> I yangucte, yekele aalichte amenginate damengtowa biyac kwesigacte, madi sanangkelu domadaicte? Monicti nalic mi domadaicte!”

## 7

### *Ngic dzalengineng 144 taosen*

<sup>1</sup> Inguc nganibe motome angelo 4 nganicebaiba. Yenge himongtowa yagolec unggulucine 4, iwa domaibong. Aime nganicebabe yenge himongte gbelong 4 balu sebilelu domaibong, gbelong yogo yenge himongka me kiwecka me yocka nalic mi wedaingte.

<sup>2</sup> Aime angelo 4 yenge himong nga kiwec basowalecepaningte tapili yeleicne. Aime na angelo monic nganiiba. Ye Wapong gagaineholec yele akale maa bagalu wenac ofe-ofeinacni kwesiwec. Yedi angelo 4 yenge wacebalu yanguc miwec, <sup>3</sup> “Ngenge himong me kiwec me yoc biyac mi basowalecebadabiyeng. Nonge Wapongnonggengte kwelec kwekwefocine yengele meiwa akale maa loyebileng wasecne aibong ibac ngenge wiyac sasawa basowalecebadabiyeng.” <sup>4</sup> Aime ngic yengele meiwa akale maaholec, yengele dzalengineng 144 taosen mibong ngageiba. Akale maaholec yogo yenge Israel madecfocine 12 yengele habuwacni. <sup>5</sup> Yengele meiwa akale maaholec yengele dzalengineng yanguc,

Yudale fikesaweckacni 12 taosen,  
Rubente fikesaweckacni 12 taosen,  
Gatle fikesaweckacni 12 taosen.

<sup>6</sup> Asele fikesaweckacni 12 taosen,  
Nafatalile fikesaweckacni 12 taosen,  
Manasele fikesaweckacni 12 taosen.

<sup>7</sup> Simeonte fikesaweckacni 12 taosen,  
Liwaile fikesaweckacni 12 taosen,  
Isakale fikesaweckacni 12 taosen.

<sup>8</sup> Sebulunte fikesaweckacni 12 taosen, nga  
Yosefele fikesaweckacni 12 taosen, nga  
Benyaminte fikesaweckacni 12 taosen.

### *Habu sugucnedi Wapong afeeibong*

<sup>9</sup> Hei, inguc nganibe motome habutowabenang nganicebaiba. Aime yengele dzalengineng yogo monicti nalic mi wafedaicte. Ngic-ngigac nganicebaiba, yenge himongne himongne yogowacni, nga himong fengnginang fengnginangoc ngic-ngigac ailu soc haicine monic-monic, nga yowane yowane, yengelacni. Ailu yenge ngakpingineng dalicne kwalac-kwalac holelu molenginang kpongngeng leso balu ngictaule ngiye-ngiyewa nga Lama madecinele haicka domaibong. <sup>10</sup> Domalu yanguc milu sugucnehac aukwelu wackeibong, “Wapongnonggeng ngictaule ngiye-ngiyewa ngiyegac, ailu Lama madecine, ngekele tapiliwa baficnubaboc wasecne gagabeleng.”

<sup>11</sup> Inguc mibong angelo sasawadi domalu ngictaule ngiye-ngiye nga damong 24 ailu wiyac gaganginengkolec 4 hewalingebaibong. Angelo yenge ngictaule ngiye-ngiyele haicka wafalu ketadi holecnolu haicngineng heluluckelu Wapong afeeibong. <sup>12</sup> Afeelu yanguc miibong,

“Foinac, mimi-madic nga wac feicne, ailu ngage-ngage-motoc nga kwele-madic ailu alangbaba nga damongte tapili ailu tapilitowa yogo sasawa Wapongnonggengte aigac. Yogo damengsoc damengsoc damengngine moto-motoine mikac fafegidaic, yogo foinac.”

### *Doic sugucnebenang motowec*

<sup>13</sup> Inguc mibong, damong yengelacni monicti yanguc uwanelewec, “Ngic-ngigac ngakpingineng dalicnedi kwalac-kwalac yago, yenge weni yengi ailu yenge wenuwacni kwesigaing?”

<sup>14</sup> Uwaneleme ameine yanguc edoiba, “Sugucnene, gageuc ngagegic.”

Inguc mibe yedi yanguc edocnuwec, “Ngic-ngigac yago yenge doic sugucnebenang yogowacni kwesilu ngakpingineng dalicne Lama madecinele sacti suwebong kwalac-kwalac aigac. <sup>15</sup> Ilec ailu yenge deboc hadeng Wapongte Ibu-mac kwelina ngictaule ngiye-ngiyele

haicka domalu ye afeelu kwelec kwecnolu gagaing. Babong Sugucne ngictaule ngiyen-nyiyewa ngiyegac, ye yengeholec galu kpoluc-faleine yengele feiwa lome ngiyedaicte. <sup>16</sup>Aime yenge nosingte hatacma mi homadaingte. Ailu misale mi ayeledaicte. Ailu wenac me wiyac gocnedi socngineng hatacma mi kweme malawedaingte. <sup>17</sup>I yangucte, Lama madecine ngictaule ngiyen-nyiyele hewacka domagac, yedi damongebalu gagale misa dongaina mengocebalu hikeme nodaingte. Aime Wapongti donge-misangineng sasawa suweyackedaicte.”

## 8

### *Aka bakatackeicne moto-motoine baickewec*

<sup>1</sup>Lama madecinedi aka bakatackeicne moto-motoine baickeme alecine 7 aiwec. Baickeme iwa honocmengka 30 minit ngama ingucne hendolong mikac ningbenang kwelu fawec.

<sup>2</sup>Ning kweme angelo 7 Wapongte haicka domacaigaing, monicti yenge kpeng 7 yeleme nganicebaiba.

<sup>3</sup>Aime angelo monicti pele goldi baicne yogo bakwesilu alata emeina lelu domawec. Domame monicti marasing hoine madicne bocyac lacnowec. Lacnome yogodi Wapongte bingec sasawa yengele mimilockolec kpatulelu alata goldi baicne ngictaule ngiyen-nyiyewa emeina domawec, iwa lolu hasoc holewec. <sup>4</sup>Ye inguc aime ye le molewacni hasoc hoine madicnedi Wapongte bingec yengele mimilockolec kpatulelu Wapongta fewec. <sup>5</sup>Feme angelo ye alatawacni dac balu peleina kweme haulu wakeme himongka wickeme sotingkelu wawec. Wame gbululung holeme uc sugucnehac fikewec. Ailu pilatac bame memeya bawec.

### *Angelo 4 yenge kpengnginengkolec*

<sup>6</sup>Bame angelo 7 kpengnginengkolec yenge kpeng fitonogale efeckeibong. <sup>7</sup>Efeckeibong angelo molic-molic yedi kpeng fitome mac hucine sanangkeicne\* nga dac sackolec kpatulelu himongka wickeme sotingkelu wawec. Wame himongtowa habu sugucne yogowacni habackang heuckelu iwacni nebocine lobewec. Ailu yoc sasawa himongtowa yogolec feina domagaing, yenge habu sugucne yengelacni habackang yogowacni heuckelu iwacni nebocine lobewec. Ailu kpadding sasawa dacti lobeyackewec.

<sup>8</sup>Aime ye le lobeina angelo 2 yedi kpeng fitome monicti tiki sugucne dacineholec ingucnedi kiwecka wickeme wame kiwec habu sugucne yogowacni habackang heuckelu iwacni nebocine sac aiwec. <sup>9</sup>Aime kiwecka sic gaganginengkolec gagaing, habu sugucne yogowacni habackang heuckelu iwacni nebocine homayackeibong. Ailu wage aling sugucne yogowacni habackang heuckelu iwacni nebocine sowalelu miyac aibong.

<sup>10</sup>Aime ye le lobeina angelo 3 yedi kpeng fitome sawawacni asocmeng sugucne monic hifa ingucne lobelu motolu wawec. Wame misa sugucne nga misa dongeine yenge habu sugucne yogowacni habackang heuckelu iwacni nebocinele feina holewec. <sup>11</sup>Asocmeng yogo wacine Hobecine. Aime misa habu sugucne yogowacni habackang heuckelu iwacni nebocine yogo hobecine aiwec. Aime misa hobecine aiwecte ailu ngic-ngigac bocyacti nolu homaibong.

<sup>12</sup>Aime angelo 4 yedi kpeng fitowec. Fitome wenac nga tamacne ailu asocmeng yengele angocte tapili yogo aling habackang heuckelu iwacni nebocine kundung kwenale baickewec. Baickeme hadengte dameng yogowacni habackang heuckelu iwacni nebocinedi mi angoleibong. Aime deboc ye inguchac aiwec.

<sup>13</sup>Aime nganibe hikic monic sawa hewacka wileng filalangkeme yowa-malacine ngageiba. Yowa yogo sugucnehac wackelu yanguc miwec, “Mee, mee, mee, angelo habackang yenge kpeng fitobong ucngineng sugucnehac hiyabong yowale umac habackang ngagedaingte. Ilec ngic-ngigac himongka gagaing, ngenge medecngebadaic.”

## 9

### *Angelo 5 yedi kpeng fitowec*

<sup>1</sup>Angelo 5 yedi kpeng fitome na asocmeng monic honocmengkacni walu himongka holewec yogo nganiiba. Nganibe monicti long sugucnebenang hauyackeicne, yogolec yefeinele ki asocmeng lacnowec. <sup>2</sup>Lacnome yedi ki yogo balu long sugucnebenang yogo

**7:15:** Wah 19:6,10; Esek 37:26-28    **7:16:** Yes 49:10    **7:17:** Mige 23:1-2; Yes 25:8; Miye 21:4    **8:1:** Hab 2:20; Sek 2:13; Sef 1:7    **8:3:** Miye 5:8; 6:9-11; Wah 30:1-3    **8:5:** Dep 16:12; Wah 19:16-19; Miye 11:19; 16:18    \* **8:7:** Himong mogungna mac hucine sawawa mogungkelu posa ingucne sanangkulu wacaigaing.    **8:7:** Wah 9:23-26; Esek 5:2; 38:22; Yol 2:30    **8:11:** Wah 7:20-25; Yer 9:15    **8:12:** Wah 10:21-23; Esek 32:7; Miye 6:12-13    **8:13:** Miye 9:12; 11:14    **9:1:** Luk 10:18; Miye 20:1

bamoctowec. Bamoctome dacti bole lobeme hasoc sugucnehac fecaigac, hasoc silicine ingucnedi longkacni ofewec. Long iwacni hasoc ofelu wenac nga sawa hedicepame kundung kweiboc. <sup>3</sup> Aime hasockacni ipowa ofelu himongka waibong. Wabong monicti himongte wame-wame yengele tapili ingucne yenge yelevu <sup>4</sup> yanguc edocebawec, "Ngenge kpingind nga wiyac sasawa hekengngineng sabaineholec fagaing, ailu yoc mi basowale-cebadabiyeng. Ngenge ngic-ngigac Wapongte akale maa yengele meiwa mi balu gagaing, yenge sugu basowalecebadabiyeng. <sup>5</sup> Ngenge tamacne 5 iwa doic sugu yeledaing. Ailubac yenge mi homadaing." Aime wame-wamedi hiecbame doic ngagecaigaing, doic ingucne aidaicte. <sup>6</sup> Dameng iwa ngic-ngigac yenge homanogale homac basackelu aibibiyedaingte. Ailu homanogale aiyeleadaicte. Aimebac homacti yenge hegilecebadaiacte.

<sup>7</sup> Aime ipowa yenge ngani-nganingineng hudu-babale becasic yenge ingucne. Hodocnginang duu goldi baicne ingucne ngiyewec. Nga haic-mesungineng yogo ngic-ngigac yengele haic-mesu ingucne. <sup>8</sup> Aime hodoc-dowecngineng yogo ngigac yengele ingucne. Ailu micluwengineng yogo laion yengele mic-luwe ingucne. <sup>9</sup> Ailu maleku holeibong, yogo aenti ngakpi ingucne baicne. Aime kwenggelengngineng ucine yogo becasic bocyacti hudule gasackelu keleta fuluckelu ucineholec hikecaigaing ingucne. <sup>10</sup> Ailu gicngineng micineholec yogo wame-wame gicngineng ingucne aiwec. Aime yenge ngic-ngigac basowale-cebanogale tapilingineng yogo tamacne 5 yogolecsoc fadaicte. Aime tapilingineng yogo gicnginang ngiyewec. <sup>11</sup> Long sugucnebenang, yogolec angelodi\* yengele ngictaungineng gawec. Yele wacine yogo Hibru yowawa Abadon, nga Grik yowawa Apolion.<sup>†</sup>

<sup>12</sup> Mee, yowale umac molic-molic yogo motogac. Ngagegaing, yogolec lobeina, yowale umac yaeckangti kwesidabiyecte.

#### *Angelo 6 yedi kpeng fitowec*

<sup>13</sup> Aime angelo 6 yedi kpeng fitome Wapongte haicka alata goldi baicne, yogolec unggulucina begic 4, yengelacni mic-yowa monic ngageiba. <sup>14</sup> Ngagebe yedi angelo 6 kpengineholec yanguc edowec, "Angelo 4 Yufretis misa sugucne mecina witicebabong domagaing, yenge lukecebanong." <sup>15</sup> Angelo 4 yenge ngic-ngigac habu sugucne yogowacni habackang heuckelu iwacni nebocine wehomacebanogale efeckeibong. Efeckebong dameng nga hadeng ailu tamacne nga hifa-dameng yogolec efeckelu gabong yedi lukecebwec. <sup>16</sup> Aime yengeholec hudu-baba ngic becasic feina ngiyebong, yengele dzalengineng 200 milion mibong ngageiba.

<sup>17</sup> Aime gungka ingucne dongene lokeme nganibe hudu-baba ngic becasicnginengkolec yengele silicngineng yanguc nganiiba. Yenge ngakpingineng aenti baicne yogo hibine sasacne dac ingucne ailu sowac-sowac nga dagec-dagec, yogo posa wacine salfa ingucne. Nga becasicne hodoc yogo laion ingucne. Aime micnginangkocni dac nga hasoc ailu salfa-posadi ofelu hikeibong. <sup>18</sup> Doic habackang, dac nga hasoc ailu salfa-posa ubilangineholec, yenge becasic micnginangkocni ofelu ngic-ngigac habu sugucne yogowacni habackang heuckelu iwacni nebocine wehomacebaibong. <sup>19</sup> Tapili yogo becasic micnginang nga gicnginang ngiyewec. Aime gicngineng yogo yenge hema ingucne hodocnginengkolec. Ailu yenge yogodi wiyac haicne monic-monic basowalecaigaing.

<sup>20</sup> Aime ngic-ngigac nebocine doic yogodi mi wehomacebaibong, yenge moledi aibaba gocne balu gaibong, aibabangineng yogolec kwelengineng mi hefaliyeibong. I yangucte, yenge aleng nga siduc-gbong yogo gol, siliwa, kopa, nga posa, ailu yocti baicne alang bayelelu afeebaningte aibaba yogo mi hegileibong. Siduc-gbong yogo molenginengti baicne. Ailu siduc-gbong ingucne yenge wiyac monic mi nganidaingte. Nga hedecnginengti yowa monic mi ngagedaingte. Ailu higenginengti nalic mi edelu hikedaingte. <sup>21</sup> Aime ngic-ngigac yogo yengi ngic-ngigac gocne wecebabong homaibong. Ailu hefaci nga mosoc aibaba, ailu selo-boic aibaba nga hise aibaba, yogo sasawa bagalu kwele-hefaliyec monic mi aiibong.

## 10

### *Angelo monic nga hibi kpadidiweicne*

<sup>1</sup> Aime na angelo tapiliineholec monic nganibe honocmengkacni wawec. Ye kaguwadi ebeckeicne. Aime hodocina hulilic ngiyewec. Nga haic-mesuine yogo wenac-dongeine ingucne ailu higekecine yeke bosing ingucne dac-ubilangkolec. <sup>2</sup> Ailu ye hibi kpisicne

**9:2:** Fike 19:28; Yol 2:2,10; Wah 10:12-15    **9:4:** Miye 7:3    **9:6:** Yop 3:21; Yer 8:3    **9:7:** Yol 2:4    **9:8:** Yol 1:6  
**9:9:** Yol 2:5    \* **9:11:** Satang ye angelo monic. Ilec ye angelo yogo mecne. Ailu 9:1 iwa asocmeng monic wawec, yogo ye mecne.    † **9:11:** Apolion wac yogolec fungine yogo, ye kindololo ngic.    **9:11:** Wah 12:23    **9:15:** Miye 8:7-12  
**9:17:** Fike 19:24,28; Esek 38:22    **9:20:** Miye 16:9,11; Mige 115:4-7; 135:15-17; Dan 5:23    **10:1:** Miye 5:2-3; Esek 1:26-28



monic kpadidiweicne yogo biyac bafilameicne moleina balu domawec. Domalu hige foleine yogo kiwecka nga kanaine yogo himongka lowec. <sup>3</sup> Lolu laionti aukwecaigac, silicine ingucnehac dacineholec aukwewec.

Aukweme gbululung 7 yenge mic ucnginengkoolec yowa miibong. <sup>4</sup> Inguc mibong kwelengkenogale aibe, honocmengkacni mic-yowa monicti yanguc milu edocnuwe ngageiba, "Gbululung 7 yowa migaing yogo mi kwelengkec. Yogo ngage-ngagegona loengka fadaic."

<sup>5</sup> Inguc mime angelo biyachac nganiiba, yedi kiwecka nga himongka domalu molefoleine honocmengka haic bafangkwec. <sup>6</sup> Bafangkelu mimipang sanangne yanguc miwec, "Sugucne gagac nga gaginowagac, yedi mime sawa nga himong ailu kiwec nga yengele kwelinginang wiyac sasawa fagaing, yogo fikeyackebong. Na yele wac wackelu yowane basanangkelu yanguc migabac, 'Ye wangec hatacmac mi aidaicte.' <sup>7</sup> Wapongti kwelec kwekwefocine, yenge siduc-mimi ngicfocine gagaing, yenge yeicne ngage-ngage sangkeicne yogo biyachac mime yegengkeyelewec. Aime angelo 7 yedi kpeng fitonogale aidaicte, dameng yogowa ngage-ngage sangkeicne yogo noine fikeme motodaicte."

<sup>8</sup> Aime molickelu mic-yowa honocmengkacni ngageiba, yedi hatacmac milu yanguc edocnuwec, "Ga lelu angelo kiwecka nga himongka domagac, yeke molewacni hibi bafilameicne, yogo badamec." <sup>9</sup> Inguc mime na angelola lelu hibi kpisicne bafilameicne yogo nelenale edoiba.

Edobe yedi yanguc miwec, "Ga balu noc. Aime yogodi micgona bebec misaine ingucne angacine aidaicte. Nga gobegona haumebac gobe hihi aigeledaicte."

<sup>10</sup> Inguc mime na angelole molewacni hibi kpisicne bafilameicne yogo balu nobe micnabac bebec misaine ingucne angacine aiwec. Nga gobena haumebac gobe hihi aineleme <sup>11</sup> yanguc edocnuibong, "Ga ngic-ngigac soc haicine monic-monic, nga himongne himongne, ailu yowane yowane, nga ngictau bocyac yengela wiyac fikedaicte, yogolec Wapongte siduc-yowa\* hatacmac midamec."

## 11

### *Ngic yaeckang yekei yowa miboc yegengkwec*

<sup>1</sup> Aime monicti kpetele maa monic yogo kumicnang muc ingucne nelelu yanguc edocnuwec, "Ga fangkelu Wapongte Ibu-mac nga alatale maa balu ngic-ngigac yogowa Wapong afeecaigaing, yengele dzalengineng momoc badamec. <sup>2</sup> Ailu Ibu-macte sobeng odaineholec fagac, yogo Israel yengele alingkcacni miyac yenge yeicne. Ilec ailu ga sobeng yogolec maaine mi badamec. Yengi tamacne 42le kwelina taon gbagbacne\* yogo edosockelu basowaledaingte. <sup>3</sup> Dameng iwahac na wideckecne tapili yetebe yekei kwelesowacte ngakpi holelu hadeng 1 taosen 260le† kwelina nale siduc-yowa midabiyecte."

<sup>4</sup> Yeke oliwa yoc yaeckang, nga Sugucne himongtowa bafuwawec, yeke haicka hifa higeineholec yaeckang ingucne domagabiyec. <sup>5</sup> Ngic gocne yengi yeke basowalecepanogale ngagedaingtewa, dacti yekele mickacni ofelu ngabafonginec lobecbame homadaingte. Ailu hatacmac mibe, monicti yeke basowalecepanogale ngagedaictewa, ye inguc hocne homadaic. <sup>6</sup> Wideckecne yeke yowa-siduc milu gaboc sawawa wileng hedickeme mac monic mi kwedaicte, yeke bole-yowa yogo tapiliineholec balu gagaic. Ailu yeke yekuhuc-tihac miboc misadi hefaliyelu sac ainale bole-yowa tapiliineholec balu gagaic. Ailu yeke yekilec angacte doic haicine monic-monic himongka loyelenicte bole-yowa tapiliineholec ingucnehac balu gagaic.

<sup>7</sup> Aime yeke fungine miboc yegengkeme edocebayackeboc motome, hudu-baba-sicti long sugucnebenang, yogolec kwelinacni ofelu yekeholec wenagulu yeke huduwa ewalicepalu wehomacepadaicte. <sup>8</sup> Wehomacepalu kponggbongnginec yogo taon yefeina locepame fadabiyecte. Taon sugucne yogolec wacine nangeng yowa holelu Sodom nga Isip micaigaing. Aime mac iwa hocne Sugucnenonggeng malicpongka webong homawec. <sup>9</sup> Aime hadeng habackang nga hadeng monic nebocine yogowa ngic-ngigac soc haicine monic-monic, nga himong fengnginang fengnginangsoc ngic-ngigac. Ailu yowane yowane nga himongne himongne ngic-ngigac yenge yekele kponggbong nganilu longepadaingkale, kpatalayeledaingte. <sup>10</sup> Kpatalayelebong ngic-ngigac himongte wiyacka wetackelu gagaing,

**10:3:** Mige 29    **10:4:** Dan 12:4,9    **10:5:** Yef 32:40; Dan 12:7    **10:7:** Amo 3:7    **10:9:** Esek 2:8-3:3

\* **10:11:** Wapongte siduc-yowa yogo hibi kpisicne bafilameicne iwa fawec. Yowa yogo angacine nga gobe hihiineholec momoc aidaicte.    **11:1:** Esek 40:3; Sek 2:1-2    \* **11:2:** Ibu-mac Yerusalem iwa domawecte taon gbagbacne wackebong.

**11:2:** Luk 21:24; Miye 13:5    † **11:3:** Hadeng 1 taosen 260 yogo tamacne 42 aigac. Nga tamacne 42 yogo hifa habackang nga nebocine aigac.    **11:4:** Sek 4:2-3,11-14; Miye 1:20; Yef 19:15    **11:5:** 2Sm 22:9; Mige 97:3    **11:6:** 1Ngt 17:1; Wah 7:17-20; 1Sm 4:8    **11:7:** Dan 7:7,21; Miye 12:17; 13:7; 17:8    **11:8:** Luk 13:34    **11:9:**

Mige 79:2-3

yenge sasawadi ngac nga kwele-madic ngagelu kwele-madict woc-wiyac gocne lanagu-daingte. Siduc-mimi ngic yaeckang yeke ngic-ngigac yogo doicka locebaiبوcte inguc aiyetedaingte.

<sup>11</sup> Aime hadeng habackang nga hadeng monic nebocine motome, gagale asudi Wapong-tacni kwesilu yekela haume yeke hatacmac fangkelu domaiboc. Domaboc nganicepalu yenge damuebame hangoc sugucnehac aibong. <sup>12</sup> Aime honocmengkacni yowa-malac monic yanguc edocepame ngageiboc, “Ngeke yawa ofenic!” Inguc mime ngabafocnginec yenge yeke nganicepabong kaguwa kwelina honocmengkaca feiboc.

<sup>13</sup> Feiboc dameng iwahac memeya sugucnehac bame taon yogolec nebocine 10 iwacni nebocine moniyang siyeckewec. Memeya sugucne bawec, yogolec kwelinacni ngic-ngigac dzalengineng 7 taosen yenge homaibong. Homabong ngic-ngigac nebocine yenge hangoc-ebame Wapong honocmengkaca gagac, yele wac bafeibong. <sup>14</sup> Mee, yowale umac alecine yaeckang yogo motogac. Yanguc ngagedaing, yogolec lobeina, yowale umac moniyangti sugu fagac, yogo biyac fikedaicte.

*Angelo 7 yedi kpengine fitowec*

<sup>15</sup> Aime angelo 7 yedi kpeng fitome honocmengkacni yowa-malac sugucne yanguc miibong,

“Yakumac Sugucnenonggeng nga Kristo bawosaeicne, yeki himongtowale ngani-damong yogo balu damongkelu gagaic.

Ailu Sugucnenonggengti ngictau gagac ailu gaginowagac.”

<sup>16</sup> Inguc miibong damong 24 Wapongte emewa ngictaule ngiye-ngiyenginang ngiye-caigaing, yenge ketadi holecnolu haicngineng heluluckelu Wapong afeebong. <sup>17</sup> Afeelu yanguc miibong,

“Sugucne Wapong Tapilitowa Fileine, nonge kwele-madic edocgugabeleng.

Ga biyachac gaing, ailu ga yakumac gagichac.

Gageicne tapilitowa balu yakumac ngictau bole balu gagic.

<sup>18</sup> Ngic-ngigac himongne himongne gagaing, yenge aalic ngagebong, gale aalictc ameinele damengtibac yanguctihac kwesilu gagac.

Gagi ngic-ngigac homaibong yenge wosaeebalu mimoctocebadamecte.

Ailu kwelec kwekwefocgone yenge gale siduc-mimi ngic, gageicne bingec ngic-ngigacfocgone, sugucne nga kpsicnedi gale wagone alang bagelecaigaing, yenge aibabanginengte ameine yeledamecte.

Aime ngic-ngigac gocne yengi himongtowale ngic-ngigac nga wiyac sasawa basowale-caigaing, gagi yenge basowalecebadamecte.”

<sup>19</sup> Aime honocmengkaca Wapongte Ibu-mac nuine laliyebong. Ailu yele dodoficte katapa dongenginengti nganiibong. Nganiibong pilatac bame gbululung nga uc sugucnehac holeibong. Aime memeya bame mac hucine sanangkeicne yogo sugucnehac waibong.‡

## 12

*Ngigac nga hematowa*

<sup>1</sup> Aime maa monic sugucnehac sawawa yanguc fikewec. Ngigac monic ngiyewec, ye wenacti ngakpi ingucne aicnowec. Nga higeinele bagewa tamacne ngiyewec. Aime hodocina asocmeng 12 yengi ngictaule duu ingucne ngiyeibong. <sup>2</sup> Ye gobeholec, aime kogoc fikanale gado hime aukwewec.

<sup>3</sup> Aime maa monic sawawa fikewec. Hei, hematowa sasacne ingucne monic sugucnebenang ngiyewec. Ye hodocine 7 nga begicine 10. Ailu ye hodocina ngictaule duu 7 holelu ngiyewec. <sup>4</sup> Ngiyelu ye gicinedi sawawale asocmeng habu sugucne yogowacni habackang heuckelu iwacni nebocine pelengkelu himongka wicebawec. Aime ngigac yogo kogoc banale aime hematowa ye kogoc yogo gbokenale ngagelu ngigac yele haicka domawec.

<sup>5</sup> Domame ngigac ye madec monic bawec. Bame yele gboli yogo biyachbenang Wapongta balu feibong. Bafelu yele ngictaule ngiye-ngiyewa lobong fawec. Aime madec yogo, ye himongne himongne ngic-ngigac aen yasudi damongebadaicte. <sup>6</sup> Aime ngigac ye himong kisiwa misaine mikacka hangoc hikewec. Hikeme yengi ye hadeng 1 taosen 260le kwelina noba-nosing lacnolu ngani-damong aicnodaingte. Wapongti yele mac ngiye-ngiye iwa biyachac bamockewec.

11:11: Esek 37:5,10

11:12: 2Ngt 2:11

11:13: Esek 38:19; Miye 6:12; 16:18; Dan 4:34

11:14: Miye 9:12

11:15: Wah 15:18; Mige 10:16; Dan 2:44; 7:14

11:18: Mige 110:5; Rom 2:5; Miye 20:11-13; Mige 115:13

‡ 11:19:

Himong mogungna mac hucine sawawa mogungkelu posa ingucne sanangkelu wacaigaing. 11:19: Hib 9:4; Miye

8:5; 15:5; 16:21

12:1: Fike 37:9-11

12:2: Mika 4:10

12:3: Dan 7:7; Esek 29:3

12:4: Dan 8:10

12:5:

Yes 7:14; 66:7; Mige 2:9; Miye 19:15

*Maikel nga hematowa*

<sup>7</sup> Aime honocmenga hudu sugucne fikewec. Iwa yanguc fikewec, Maikel nga angelofocine yenge hematowa yeholec wenagulu hematowa nga angelofocine yenge hudu ameine bafaliyeibong. <sup>8</sup> Ailu tapilingineng mikac aime yengi hatacmac honocmenga gagale sawaine monic mi fawec. <sup>9</sup> Aime hematowa ye hema esecne, yele wac monic Aleng Sugucnengineng nga Satang, ye nga angelofocine wicebabong himongka waibong. Yedi himongtowawa ngic-ngigac sasawa kwesacka mengocebame yenge ye balaibeccaigaing. <sup>10</sup> Aime yowa-malac sugucne monic honocmenga yanguc mime ngageiba, "Wasecne ainogale dameng nga tapili ailu ngani-damong yogolec fileine Wapong, yogo yakumac noine fikegac.

Aime Kristo bawosaewec, yedi yakumac yogolec bole-yowa tapiliineholec balu gagac. Ngic hae-gbafocnonggeng yowawa locebacaigac, yedi Wapongnonggengte haicka deboc hadeng yowawa locebalu game ye biyachac honocmengkacni wickebong wawec.

<sup>11</sup> Ngic hae-gbafocnonggeng yenge Lama madecinele sac nga Sugucnele yowa mibong yegengkewecte gbelong ailu Aleng Sugucnengineng huduwa ewaliibong.

Ailu yengileng kwelenginengi gaganginengte ngagebong feicne mi aime homacte mi hangocebawec.

<sup>12</sup> Honocmeng nga aling honocmenga gacaigaing, ngenge wiyac honocmenga fikewecte ailu beliyedaing.

Aimebac, mee, himongka nga kiwecka gagaing, nenge medecgebadaic.

I yangucte, Aleng Sugucnengineng ye ngenela kwesigac.

Ailu damengngine bangkaleme ngagegacte ailu kwele-dackolec aalickegac."

<sup>13</sup> Yenge hematowa himongka wickebong wawec, ye yogo ngani-motolu ngigac kogoc gobeelu madec bawec, ye yebiyewec. <sup>14</sup> Yebiyeme ngigac ye hemale haickacni hangoc hikelu himong kisiwa misaine mikacka hikenale aime, monicti ngigac yogo hikictowa kwegecine lacnome filalangkelu hikewec. Mac yogo yele mac ngiye-ngiye iwa biyachac bamockewec, yogowa hikewec. Ye iwa hifa 3 nga hifa monic nebocine dameng inguc ngiyeme yengi ye ngani-damong aicnolu nosing lacnodaingte. <sup>15</sup> Lacnobong hemadi ye yebiyelu lumong ingucne banale micinacni misa mengume misa ingucne walu hikewec.

<sup>16</sup> Hikeme himongti ngigac bafickelu micine angkeme, hematowadi misa micinacni mengume wame, himongti misa yogo gbokewec. <sup>17</sup> Gbokeme hematowa ye ngigac yele aalic ngagewec. Ngagelu hike ngigac yele adu-madecfocine Wapongte ung-yowa balaibelu gacaigaing, ailu Yesu Kristole siduc yogo mibong yegengkeme balaibecaigaing, yenge hudu sugucnedi wecebanale hikewec. <sup>18</sup> Ailu ye kiwec mecina dingongka domawec.

**13***Hudu-baba-sic monic kiweckacni ofewec*

<sup>1</sup> Aime nganibe kiweckacni hudu-baba-sic monic ofewec. Ye begicine 10 nga hodocine 7, aime begicine yogolec feina ngictaule duu 10 ngiyeibong. Aime hodoc yogo yengele feinginanng Wapong fecnogac, yogolec wac haicine monic-monic kwelengkeicne fawec.

<sup>2</sup> Aime sic yogolec socine yogo kate-ngiyaungtowale soc ingucne aiwec. Nga micine yogo laionte mic ingucne. Ailu higeine yogo beya ingucne fingacine dalicne.

Aime hematowa ye bole-yowa tapiliineholec ailu ngictaule ngiye-ngiyeine yogo ngic-ngigac bocyac damongebanale hudu-baba-sic bole-hibi yogo lacnowec. <sup>3</sup> Aime hudu-baba-sic yogo hodocine monic lofocineholec nganiiba. Hodocine yogo webong waic-towaineholec ailu homaicne ingucne aiwec. Ailubac yogo wisiyewec. Aime himongne himongne ngic-ngigac bocyacti hudu-baba-sic yogo nganilu kwatackelu ye balaiibeibong. <sup>4</sup> Balaibeibong hematowa ye hudu-baba-sicti ngic-ngigac damongebanale bole-yowa tapiliineholec lacnowecte ailu hematowa afeeibong. Ailu yenge hudu-baba-sic momoc afeelu yanguc miibong, "Madi ye ingucne aidaicte? Ailu madi yeholec hudu nalic wedaicte?"

<sup>5</sup> Tapili lacnome ye kosa aukwelu Wapong misulec aicnowec. Aime tapili yogo lacnome, ye tamacne 42le kwelina Wapong ye ngagecno-ngiyeme ngic-ngigac damongebanale bole-yowa nga tapili balu gawec. <sup>6</sup> Ailu ye micine angkelu Wapong misulec aicnolu Wapong wacine nga macine ailu aling honocmenga gagaing, yenge misulec aiyelewec. <sup>7</sup> Inguc aiyeleme Wapongti ngagecno-ngiyeme ye Wapongte bingec yengela hudu welu yenge

**12:7:** Yud 9; Dan 12:1 \* **12:8:** Dan 2:35 **12:9:** Fike 3:1,14; Luk 10:18; 22:31; Miye 20:2 **12:10:** Yop 1:11; Sek 3:1 **12:12:** Yes 44:23; 49:13 **12:14:** Dan 7:25; 12:7; Wah 19:4; Yef 32:10-12 **12:17:** Miye 11:7 **13:1:** Miye 12:3; 17:3,7-12 **13:2:** Dan 7:4-6 **13:3:** Fike 3:15; Miye 17:8 **13:5:** Dan 7:8,25; 11:36; Miye 11:2 **13:6:** Dan 8:11

huduwa ewalicebalu gbelong aidaicte. Ailu ye himong fengnginang fengnginangsoc ngic-ngigac, nga soc haicine monic-monic, ailu yowane yowane, nga himongne himongne ngic-ngigac, yenge damongebanale bole-yowa tapiliineholec lacnowec. <sup>8</sup> Inguc lacnome ngic-ngigac himongka gagaing, yengele wacngineng Gagale hibiwa mi fagac, yenge sasawa hudu-baba-sic afeedaingte. Gagale hibi yogo Lama madecine webong homawec, yele hibi. Ailu himong bafuwawec, dameng yogowa ngic-ngigac focine wacngineng kwelengkeicne fawec. <sup>9</sup> Monic hedeckolec gagacti yowa yago aneng ngagedaic.

<sup>10</sup> Monic balu muc-macka lonogale mibong, ye muc-macka hikedaic.

Monic hudu-babale fitecti wehomanogale milu, ye webong homadaic.

Ilec Wapongte bingec yenge tatakic mikac doickolec wangec galu ngage-ngagesingkolec gadabiyeng.

#### *Hudu-baba-sic monic ye himongkacni ofewec*

<sup>11</sup> Inguc aime nganibe hudu-baba-sic monic himongkacni ofewec. Ye begicine yaeckang, yogo lamale ingucne. Ailu hematowale yowa ingucne miwec. <sup>12</sup> Inguc milu yedi hudu-baba-sic kiweckacni molickelu ofewec, ye bafickenale yele bole-yowa tapiliineholec sasawa balu gawec. Ailu himongka ngic-ngigac gagaing, yenge aiyeleme hudu-baba-sic kiweckacni ofewec, ye afeebong. Ye biyac homawec, inguc ngageibong. Aimebac waicine biyachac wisiyewec. <sup>13</sup> Aime hudu-baba-sic himongkacni ofewec, yedi pasile maaine sugucnehac balu gawec. Monic yanguc fikewec, ngic-ngigac yengele haicka sawawacni dac himongka wawec. <sup>14</sup> Ailu kiweckacni ofewec, ye bafickelu pasile maaine bawecte ailu ngic-ngigac himongka gagaing, yenge kwesacka mengocebame ye balaihelu gaibong. Ailu ngic-ngigac himongka gagaing, yenge edocebame hudu-baba-sic ye hudu-babale fitecti esecne biyachac webong homaicne ingucne gawec, yele iluc monic balu alang bacnoningte edocebawec.

<sup>15</sup> Babong hudu-baba-sic himongkacni ofewec, yedi hudu-baba-sic kiweckacni yele ilucine yogo asu lacnonale tapili lacnowec. Lacnome iluc yogodi yowa mimi aiwec. Aime ngic-ngigac sasawa yenge iluc yogo mi afeedaingte, yogo yenge wehomanebanale tapili balu gawec. <sup>16</sup> Balu game hudu-baba-sic himongkacni ofewec, yedi ngic-ngigac sasawa sugucne nga kpisicne, mafaholec nga mafa mikac, kwelec kwekwe ngic sugucnefocngineng yengele bagewa gagaing. Nga ngic-ngigac ngic monicte bagewa mi gagaing, yenge sasawadi maa monic mole-folenginang me meinginang balu ganingte yoingebalu yelewec. <sup>17</sup> Inguc aime ngic monicte hudu-baba-sic kiweckacni ofewec, yele wacine me dzalewa wacine, yogolec maaine mi balu gagacka, ye wiyac monic fuli nalic mi badaicte, me mi saledaicte. <sup>18</sup> Hudu-baba-sicte dzale yogo ngic monicte dzale, yogo 666. Aime monic ngage-ngageholecti wacinele dzale yogo wafelu maainele fungine ngage-motodaic.

## 14

#### *Lama madecine nga ngicfocine 144 taosen*

<sup>1</sup> Hei, na Lama madecine nganibe ye Sion tikiwa ngic 144 taosen yengeholec domawec. Ngic domaibong, yenge Lama madecinele wac nga Mamacinele wac yengele meiwa kwelengkeicnedi domaibong. <sup>2</sup> Aime honocmengkacni uc monic misa dundung sugucne yele uc ingucne aiwec. Yogo gbululung sugucnehac holecaigacte uc ingucne ngageiba. Ailu yogo gita wewe ngic yengi gita mucngineng homacne webong ucine fikecaigac, yogo ingucne ngageiba. <sup>3</sup> Aime ngictaule ngiye-ngiyewa nga wiyac gaganginengkolec 4 ailu damong yengele haicka domalu gee gbolicne monic holeibong. Holebong ngic 144 taosen himongkacni biyachac fuli bacebaicne, yenge sugudi gee yogo nalic ngagelu holedaingte. <sup>4</sup> Ngic yogo yenge ngigac yengeholec monic mi faicne. Ailu wonongngineng mikac gbagbacnebanang gaibong. Yenge Lama madecinedi mac wenuwa hikecaigac, iwa ye balaibecaigaing. Lama madecinedi himongte ngic-ngigac yengele hewackacni fuli bacebame yenge Wapong nga yeicne molic-molic alingfocine aiibong. <sup>5</sup> Ailu yenge micnginengti yowa kwesacine monic mi miibong, yenge gbagbacne nga sowacnengineng mikac gaibong.

#### *Angelo habackang*

<sup>6</sup> Na angelo monic nganiiba, ye sawa hewacka falockelu hikewec. Hikelu Siduc Madicne fafeginowagac, yogo ngic-ngigac himongka gagaing, yenge milu edocebame yegengkenale balu gagac. Bagalu himongne himongne ngic-ngigac, nga himong fengnginang fengnginangsoc ngic-ngigac, ailu yowane yowane, nga soc haicine monic-monic, yengela <sup>7</sup> yowa

**13:7:** Dan 7:23; Miye 11:7    **13:8:** Dan 12:1-2; Mige 69:28; Miye 17:8; 20:12,15; 21:27    **13:10:** Yer 15:2; 43:11; Miye 14:12    **13:11:** Dan 7:17; 8:3    **13:13:** Mat 24:24; 1Ngt 18:24-39; Miye 19:20    **13:14:** Dan 8:25; Yes 27:1  
**13:16:** Miye 14:9-11; 16:2; 20:4    **14:2:** Miye 1:15; 19:6    **14:3:** Yes 35:10; 42:10; Miye 5:9; 7:4

sugucnehac wackelu edocebalu yanguc miwec, “Ngenge Wapongte hangocngebame alang bacnolu wacine bafedabiyeng. Wapong ye ngengele aibaba wosaelu mimoctodaicte, yogolec dameng biyac bangkale welegacte ngenge sawa nga himong ailu kiwec nga misa dongeine bafuwacebawec, ye afeedaing.”

<sup>8</sup> Inguc mime angelo 2 yedi ye balaiibe welelu yanguc miwec, “Babilon taontowa\* ye waweicne hocne, Babilon yogo biyac waweicne fagac. Yedi hocne selo-boic aibabaine angacineholec, yogo waing misa ingucne himongne himongne ngic-ngigac sasawa gumecebame nowackelbong.”

<sup>9</sup> Inguc mime angelo 3 yedi yeke balaiibecepalu kwesilu yowa-malac sugucnehac yanguc miwec, “Monic ye hudu-baba-sic nga ilucine afeccaigac, ailu yele maa yeicne meywa me moleina balu gagacka, <sup>10</sup> ye yeicne Wapongte kwele-dacte waing misa nodaicte. Waing yogo sanangnebenang misaholec mi lallickeicne, ye aalict kwenocce kap iwa sotingkeme hauicne ngiyegac. Aime Wapong yeicne angelofocine ailu Lama madecine, yengele haicka dac nga salfa-posa ubilangineholec yogolec kwelina doictowa ngagedaicte. <sup>11</sup> Aime ngic-ngigac hudu-baba-sic nga ilucine ketadi holecnolu afeelu gaibong. Ailu yele wacte maa baibong. Ngic-ngigac yogo yenge dacka doictowa ngabong yogolec hasocci damengsoc moto-motoine mikac ofelu hasocebalu game yenge deboc hadeng kwele-mogung monic mi bafuwadaingte.” <sup>12</sup> Inguc aime Wapongte bingec yenge Wapongte ung-yowa balaibelu Yesu ngagesingkelu gaging, yenge tatakic mikac sanangne gadabiyeng.

<sup>13</sup> Aime honocmengkacni yowa-malac monic yanguc fikelu edocuwec, “Ga hibiwa yanguc kwelengkec, ‘Yakumacbac molickelu ngic-ngigac Sugucneholec wetackelu homagaing, yenge kwele-angackolec.’”

Inguc mime Asudi yanguc miwec, “Oc, aibabangineng madicne ngagesilu bacebame yenge doic-bolewacni ngiye-ngagedaingte.”

#### *Himongtowawa noine babale dameng*

<sup>14</sup> Hei, na kaguwa monic kwalac-kwalac nganiiba. Nganibe yogolec feina ngic monic silicine ngicte madec ingucne ngiyewec. Ye hodocina ngictaule duu monic goldi baicne holelu moleina noine-wewele fitec monic micineholec balu ngiyewec. <sup>15</sup> Balu ngiyeme angelo monicti Ibu-mackacni walu ngic kaguwa feina ngiyewec, ye sugucnehac wackelu yanguc edowec, “Himongte nosing noine houweme wewele dameng biyac kwesigacte ailu, ga noine-wewele fitecgonedi balu noine welu banong.” <sup>16</sup> Inguc mime ngic kaguwa feina ngiyewec, yedi noine-wewele fitecinedi himongka ngosockelu himongte nosing noine welu bawec.

<sup>17</sup> Weme angelo monic honocmengte Ibu-mackacni wawec, ye inguchac noine-wewele fitec monic micineholec balu ngiyewec. <sup>18</sup> Aime angelo monic ye dac damongkenale bole-yowa nga tapili balu gawec, yedi alatawacni kwesiwec. Kwesilu yowa-malac sugucnehac wackelu angelo monic noine-wewele fitec micineholec balu ngiyewec, ye yanguc edowec, “Himongka waing noine biyac houweyackegac. Ilec ga noine-wewele fitecgone micineholecti waing noine welockelu kpaduckeyackec.”

<sup>19</sup> Wackeme angelo yogodi noine-wewele fitecinedi himongka ngosockelu himongte waing noine helockelu kpaducebalu Wapongte kwele-dacte waing hesoc-hesocce posatowa sugucna wicebame faibong. <sup>20</sup> Fabong waing hesoc-hesocce posatowa taon lobina domawecti hesocbawec. Aime waing hesoc-hesocce posatowa iwacni sac walu sugulelu fangkewec, yogo becosic yengele ube oiyalu fame himong 300 kilomitalosoc hikelu wakewec.†

## 15

#### *Angelo 7 peleholec*

<sup>1</sup> Na honocmengka maa monic feicne damuineholec fikeme nganiiba. Nganibe angelo 7 yenge doic 7 moto-motoine balu domaibong. Doic 7 yogo fikeemewa Wapongte kwele-dac motoyackedaicte. <sup>2</sup> Na wiyac monic kiwec ingucne galasdi baicne dackolec lallickeicne ingucne nganiiba. Nganibe ngic-ngigac yenge hudu-baba-sic nga ilucine ailu dzalewa wacine alang mi bacnolu huduwa ewalicebalu gbelong aibong, yenge nganicebaiba.

\* **14:8:** Taon yogolec ngic-ngigac yenge habu moniyang gaibongte ailu ngigac monic ingucne “ye” kwelengkewec.  
**14:8:** Yes 21:9; Dan 4:30; Yer 51:7,8; Miye 17:2; 18:2,3 **14:9:** Miye 13:12-17 **14:10:** Fike 19:24; Mige 75:8; Yes 51:17,22; Yer 25:15-16; Esek 38:22; Miye 16:19; 20:10; 21:8 **14:11:** Yes 34:10 **14:12:** Miye 13:10 **14:14:** Dan 7:13 **14:18:** Yol 3:13 † **14:20:** 300 kilomita yogo Finschhafenkocni hikegacgu Goroka, dalicne yogolecsoc. Ye stadia 1 taosen 600 kwelengkewec. Stadia moniyang yogo 185 mita ingucne aigac. **14:20:** Yes 63:2-3; Miye 19:15

Yenge Wapongti gita mucine homacne biyachac yelewec, yogo kiwec feina balu domai-bong. <sup>3</sup> Ailu yenge Wapongte kwelec kwekwe ngic Moses nga Lama madecine, yekele gee yangang milu holeibong.

“Sugucne Wapong Tapilitowa Fileine, aibabagone yogo feicne nga damuineholec.

Ailu ga himongne himongne yengele ngictau. Gale yefe yogo dondonne nga noine.

<sup>4</sup> Sugucne ga sugu gbagbacne. Ilec ailu madi mi hangockeme wacgone mi bafedaicte?

Ailu gale pasi dondonne yogo yegena fikewecte ailu, himongne himongne ngic-ngigac sasawa yenge kwesilu gale haicka ketadi holelu afevedaingte.”

<sup>5</sup> Inguc holebong motome nganibe honocmengka Wapongte Ibu-macka dodofic katapale kpoluc-fale yogolec nuine laliyeibong. <sup>6</sup> Laliyeibong angelo 7 yenge doic 7 balu domai-bong, yenge ngakpi-kpoluc kwalacne kpoluc madicnebenang yogo angocineholec holelu umbika goldi baicne yogodi mondacngineng hefelu Ibu-mackacni waibong. <sup>7</sup> Wabong wiyac gaganginengkolec 4 yengelacni monicti angelo 7 yenge pele 7 yelewec. Pele yogo goldi baicne ailu Wapong gagac nga gaginowagac, yele kwele-dacti iwa wakeicne fawec. <sup>8</sup> Fame Wapongte hibi-angoc nga tapili, yogolec hasocti Ibu-mac kweline wakewec. Dameng iwa monicti Ibu-mac yogolec kwelina nalic mi fedaicte. Aime angelo 7 yengele doic 7 yogo sasawa motoyackeme Ibu-macka hatacmac fedaingte.

## 16

### *Wapong kwele-dacinele pele*

<sup>1</sup> Na Ibu-mackacni yowa-malac monic sugucnehac ngagebe yedi angelo 7 yanguc edocebawec, “Ngenge hikelu Wapongte kwele-dacti pele 7 wakeicne yogo himongka sotingkebong hauna.” <sup>2</sup> Inguc mime angelo molic-molic yedi hikelu pele yogo sotingkeme himongka hauwec. Haume ngic-ngigac hudu-baba-sicte maaine balu gaibong, nga ilucine afeelu gaibong, yenge waic-sanang sowacne doicineholecti fikeyelewec.

<sup>3</sup> Aime angelo 2 yedi pele sotingkeme kiwecka hauwec. Haume kiwec hefaliyelu ngic homaicnele sac ingucne aiwec. Aime wiyac sasawa gaganginengkolec kiwecka gaibong, yogo homayackeibong.

<sup>4</sup> Homabong angelo 3 yedi pele sotingkeme misa sugucna nga misa dongeina haume misa yogo sasawadi sac aiyackeibong. <sup>5</sup> Aime angelo 3 ye misa fileine aigac, yedi ngagebe yanguc miwec,

“Sugucne gbagbacne fileine, ga biyachac gaing ailu yakumac gagic.

Ga pasigone yogo dondonne.

Ailu wiyac sasawa yago yowawa locebaing.

<sup>6</sup> I yangucte, wiyac yogo yengi geicne bingec ngic-ngigacfogone nga siduc-mimi ngic wecebabong yengele sac sotingkelu wawec.

Ilec ailu gagi sac misawacni noningte gumecebaangka nobong amengineng yogo dondonne aigac.”

<sup>7</sup> Inguc mime ngagebe alatadi yanguc miwec,

“Oc, Sugucne Wapong Tapilitowa Fileine, ga ngic-ngigac wosaeccebalu yefe dondonna nga noina balaibelu aibabangineng mimoctoagac.”

<sup>8</sup> Aime angelo 4 yedi pele sotingkeme wenacte feiwa haume wenac ye dacineholec ailu ngic-ngigac lobecebanale tapili bawec. <sup>9</sup> Balu dacine sugucnehacbenang ailu lobece-bawec. Aime sifu ngic-ngigac yenge kwelengineng mi hefaliyeibong. Yenge doic 7 yogolec fileine Wapong, yele wac feicne mi bafelu misulec aicnoibong.

<sup>10</sup> Aime angelo 5 yedi pele sotingkeme hudu-baba-sicte mac ngictaule ngiye-ngiyewa haume yele ngani-damong yogo kundung kwewec. Ailu ngic-ngigac yenge doic sugucnehac ngageibongte ailu mamang hiduibong. <sup>11</sup> Ailu yenge doic nga waic socnginang fikewec. Yogolec ailu honocmengte Wapong misulec aicnoibong. Ailu aibabangineng yogolec kwelengineng mi hefaliyeibong.

<sup>12</sup> Aime angelo 6 yedi pele sotingkeme Yufretis misa sugucna hauwec. Haume ngictau wenac ofe-ofeinacni yengele yefe fikenale misa yogo dikewec. <sup>13</sup> Dikeme nganibe hematowa nga hudu-baba-sic ailu siduc-mimi ngic kwesacine,\* yengele mickacni asu habackang silicngineng wabolac ingucne wonongnginengkolecti ofelu waibong.

**15:3:** Yef 32:4; Wah 15:1; Mige 139:14; 145:17 **15:4:** Yer 10:6-7; Mige 86:9-10; 98:2 **15:5:** Wah 38:21 **15:7:** Yes 51:17,22 **15:8:** Esek 10:2-4; 1Ngt 8:10-11; 2Ngsi 5:13-14; Yes 6:4 **16:1:** Yes 66:6; Yer 10:25; Esek 14:19 **16:2:** Wah 9:10; Miye 13:12-17 **16:3:** Wah 7:17-21 **16:6:** Yes 49:26; Mige 79:3 **16:7:** Yef 32:4; Mige 19:9; Miye 15:3 **16:9:** Miye 9:20-21 **16:10:** Wah 10:22; Yes 8:21-22; Mige 79:5,10 **16:12:** Fike 15:18; Yes 11:15 \* **16:13:** Hudu-baba-sic himongkacni ofewec, yele siduc yogo Miyegengeicne 13:11-15 iwa fagac. Yedi hocne siduc-mimi ngic kwesacine aigac. Miyegengeicne 19:20 iwa yegena aidaicte. Ye hudu-baba-sic molickelu kiweckacni ofewec, ye bafickecaigac. **16:13:** Wah 8:3-7; Sek 12:3-4

<sup>14</sup> Asu yogo yenge aleng sowacnebenang. Ailu pasile maaine bacaigaing. Wapong Tapilitowa Fileine, yedi ngic-ngigac wosaecnebanale bole badaicte. Dameng yogolec ailu aleng yenge himong sasawale ngictau yengela hikelu Wapongkolec hudu weningte kpaducebaibong.

<sup>15</sup> Aime monicti miwec,

**“Ngagegaing, na hise-baba ngic ingucne kwesidacte. Kwesibe monic ye deboc-gholi galu ngakpi-kpolucine damongkelu game ngic-ngigac yengi senggangine mi nganidaingte. Aime mi gameedaicte, ngic ingucne ye kwele-angackolec.”**

<sup>16</sup> Aime aleng yengi himong monic Hibru yowawa wacine Amagedon, iwa ngictau kpaducebaibong.

<sup>17</sup> Kpaducebabong angelo 7 yedi pele sotingkeme sawawa haume Ibu-mackacni yowamalac sugucnehac ngictaule ngiye-ngiyewacni welelu miwec, “Wapongte kwele-dac biyac miyac aigac.” <sup>18</sup> Inguc mime pilatac bame gbululung holeme uc fikewec, aime memeya sugucnehac bawec. Aime ngic-ngigac himongka esecne gaibong, dameng iwa memeya sugucnehac nga feicnebenang ingucne monic mi bawec. <sup>19</sup> Memeya balu Babilon taon sugucne bauckeme habackang aiwec. Ailu himongne himongne ngic-ngigac yengele taon bocyac sowaleibong. Sowalebong Wapongti Babilon taonte ngic-ngigac yengele ngagesilu kwenocite kap iwa kwele-dacte waing aalicineholec yogo yelwec. <sup>20</sup> Aime nuc sasawa yenge hikelu sangkeyackeibong. Aime ngic-ngigac yenge tiki basackelu monic mi nganiibong. <sup>21</sup> Aime sawawacni mac hucine sanangkeicnedi walu ngic-ngigac feinginang holeme yenge doic sugucnehac ngageibong. Mac hucine moniyang moniyangte umacine yogo 40 kilo-lesoc aiwec. Aime ngic-ngigac yenge doic sugucnebenang ngagelu Wapong misulec aicnoibong.

## 17

### *Yefe-ngigacti ameine bawec*

<sup>1</sup> Angelo 7 yenge pele 7 balu gaibong, yengelacni monicti nala kwesilu naholec yowa mingagec ailu yanguc miwec, “Yefe-ngigac sugucne ye misa bocyac yengele feinginang ngiyegac, Wapongti aibabainele ameine lacnodaicte. Ga weleng yogo edalicgudacte. <sup>2</sup> Himongte ngictau yenge yeholec selo-boic aibaba aibong. Aime yele selo-boic aibabale waing misadi ngic-ngigac himongka gagaing, yengele kwele nga ngage-ngage bame si-fuweicne.”

<sup>3</sup> Aime angelodi Asule tapiliwa bacnume himong kisiwa misaine mikacka hikeiba. Hikelu nganibe ngigac ye hudu-baba-sic monic sasacne, yele feiwa ngiyewec. Aime hudu-baba-sic ye hodocine 7 nga begicine 10. Ailu ye socine sasawa yogo Wapong fecnogac, wac ingucnedi wakeyackeicne. <sup>4</sup> Ngigac yogo ye ngakpi-kpolucine mondo-sasac nga giweng, ailu gol nga posa basufaleicne, ailu kwanang fuline sugucnehac latac-latacine holelu ngiyewec. Ailu ye kwenocite kap monic goldi baicne, iwa selo-boic aibabaine wonongkolec nga wiyac sowacnebenang memengucnedi wakeyackeicne yogo moleina balu ngiyewec. <sup>5</sup> Ailu yele meiwa wac monic sangkeicne yogo kwelengkeicne fawec. Wac yogo yanguc, Babilon taon sugucne yogo wiyac sowacnebenang memengucnedi fikelu himongte yefengigac yengele nenggacngineng aigac.

<sup>6</sup> Aime ngigac nganiiba, yedi Wapongte bingec yenge Yesule yowa-siduc mibong yegengkewec, yenge wehomacebaibong, yengele sac nolu kweleine sifuwewec. Aime na ye nganilu kwatatacke-benangeiba. <sup>7</sup> Kwatackebe angelodi yanguc edocnuwec, “Ga omale kwatackegic? Na ngigac nga hudu-baba-sic hodocine 7 ailu begicine 10 yedi ngigac yogo atickelu gacaigac, yekele ngage-ngage sangkeicnele fungine yogo edocgudacte. <sup>8</sup> Ga hudu-baba-sic nganigic ye biyachac gawec nga yakumac mi gagac. Ye long sugucnebenang iwacni ofedaicte. Ailu ye sowalennale hikedaicte. Aime ngic-ngigac himongka gagaing, yengele wacngineng Gagale hibiwa mi kwelengkeicne fawec, yogo Wapongti himong bafuwawec, iwacni fike-ofewec. Yenge hudu-baba-sic esecne biyachac gawec, nga yakumac mi gagac, ailu kwesilu gadaicte, aimebac yenge nganilu kwatackedaingte.

<sup>9</sup> “Ngage-ngage-motoc nga ngage-ngage ileckeicne yanguc balu ganoga. Hodoc 7 yogo tiki 7 aigac. Aime ngigac yedi tiki yogo yengele feinginang ngiyegac. <sup>10</sup> Aime hodoc yogo yenge inguchac ngictau 7. Yengelacni 5 yenge biyachac waweibong. Aime moniyangtibac ngiyegac. Nga monic yebac mi kwesigachac. Ye kwesilubac dameng kpicicnemac

**16:14:** Miye 19:19    **16:15:** Mat 24:43-44; Miye 3:3    **16:16:** Sek 12:11    **16:18:** Wah 19:16-18; Dan 12:1-2; Miye 4:5; 8:5    **16:19:** Miye 14:10    **16:20:** Miye 6:14    **16:21:** Wah 9:23-24; Esek 38:19-22; Miye 11:19    **17:1:** Yer 51:12-13    **17:2:** Yes 23:17; Yer 51:7; Miye 14:8    **17:3:** Yes 21:1-2; Miye 13:1    **17:4:** Yer 51:7-8; Miye 18:16  
**17:5:** Dan 4:9,30    **17:6:** Dan 4:17; Miye 18:24; 19:2    **17:7:** Miye 13:1    **17:8:** Dan 12:1; Miye 11:7; 13:7  
**17:9:** Dan 12:10

ngiyedaicte. <sup>11</sup> Hudu-baba-sic biyachac gawec nga yakumac mi gagac, ye inguchac ngictau yogo yengela taockeme dzalengineng 8 aigaing. Ailu agongineng monic ye hocne 7 yengela taockelu sowalena hikedaicte.

<sup>12</sup> "Begicine 10 nganigic, yogo ngictau 10 himongte ngani-damongngineng mi baibong-hac, yengebac dameng moniyangtesoc inguc hudu-baba-sickolec ngictau bole banogale bole-yowa tapiliineholec badaingte. <sup>13</sup> Yenge ngage-ngage moniyang sugu bagalu bole-yowa tapilinginengcolec yogo hudu-baba-sic lacnobong yedi tapili yogo balu gadaicte. <sup>14</sup> Aime yenge Lama madecineholec wenagulu yedi huduwa ewalicebalu gbelong aidaicte. I yangucte, Lama madecine ye sugucne yengele Sugucne, nga ngictau yengele Ngictau. Aime ngic-ngigac biyachac bawosacebalu wacebawec, yenge Lama madecinele yowa balaibecaigaing, yenge yeholec gadaingte."

<sup>15</sup> Aime angelodi yanguc edocnuwec, "Ngic-ngigac soc haicine monic-monic, nga habu-towa, ailu himongne himongne ngic-ngigac, nga yowane yowane ngic-ngigac, yenge misa bocyac ingucne. Yogo nganime yefe-ngigacti yengele feingitang ngiyewec. <sup>16</sup> Ga hudu-baba-sicte begic 10 nganiing, yogo yenge hudu-baba-sickolec wetackelu yefe-ngigac lobe holecnolu wiyacine badaingte. Aime ye mochenang senggang ngiyedaicte. Ngiyeme yenge ngigac yele biuc nolu yeicne wickebong dacti lobedaicte. <sup>17</sup> Wapongti kwelenginang ngage-ngage yogo yelewecte, yenge ngage-ngage moniyang ailu ngictau bolele tapilingineng yogo hudu-baba-sic lacnodaingte. Lacnolu yenge hudu-baba-sicte yowa balaibe galu Wapongti yowa biyachac ngagemefaweckasoc balaibelu bole aling sasawa bagacgubong Wapongte ngage-ngage fawec, yogo motodaicte. <sup>18</sup> Aime ngigac nganiing yogo, ye taontowa sugucnele soc holeibong. Taon yogo himongte ngictau yengele damong ailu ye ngictau bolele tapili balu gagac."

## 18

### *Babilon sugucne*

<sup>1</sup> Yogolec lobeina nganibe angelo monic bole-yowa tapilitowaineholec balu ngiyewec, ye honocmengkacni wame yele hibi-angocti himong bame angolewec. <sup>2</sup> Angoleme yowamalactowaine tapiliineholecti yanguc wackewec,

"Babilon\* taontowa ye waweicne hocne, Babilon yogo biyac waweicne fagac.

Waweme aleng yengele mac-himong nga aleng wonongnginengcolec sasawa ailu nango sic sasawa sowacnebenang wonongnginengcolec, yengele mac-himong aiwec fagac.

<sup>3</sup> Yele selo-boic aibabaine yogo angacineholec waing misa ingucne himongne himongne ngic-ngigac sasawa yengi noibong.

Himongte ngictau yenge yeholec selo-boic aibaba aiibong.

Ailu Babilon yele tapili nga mafatowainele angacte ailu himongte ngic-ngigac yenge woc-wiyac salecaigaing, yenge mafatowanginengcolec aiibong."

<sup>4</sup> Aime yengebe honocmengkacni yowa-malac monic yanguc miwec,

"Ngic-ngigacfocne, ngenge yeholec bikickolec mi ainingte, nga bikicte ameinele doic yeholec mi ngageningte ngenge ye hegilelu hikening.

<sup>5</sup> Ye bikic yogo balu kpaduckelu hole feme honocmengka fegac. Aime Wapong ye aibaba sowacne yogo ngagesilu gagac.

<sup>6</sup> Aime yedi aibabaine sowacne ainglewec, yogolec ameine inguchac bafaliyecnolu aibabaine ainglewec ingucnehac feicnehac ailu lacnodaing.

Aime ye pele kwelina misa kweme haume lalickelu yelewec, iwa oma wiyacti ngiyewec, yogo ngagelu ngengi feicnehac lalickecnolu lacnodaing.

<sup>7</sup> Inguc aime ye yeicne socine bafelu mafa nga gaga angacineholec balu gawec, yogolec silicina doic nga kwele-sowac lacnodaing.

I yangucte, ye kweleina yanguc nagecaigac, 'Na hosec miyac, na ngigac-tau.

Ilec kwele-sowac nalic mi ngagedacte.'

<sup>8</sup> Ilec ailu hadeng moniyangte kwelina homac nga kwele-sowac ailu nosingte lolocti molickecnome yele feiwa doic ingucne fikeme ngigac ye dacti lobedaicte.

I yangucte, Sugucne Wapong ye tapiliineholecti, yele pasi wosaelu sowacnele ameine mimoctodaicte."

---

**17:12:** Dan 7:7,24    **17:14:** Dan 7:21    **17:16:** Esek 23:25-29; Miye 18:8    **18:1:** Esek 43:2    \* **18:2:** Fengngine iwa Babilonte siduc fagac. Ilec taon yogolec ngic-ngigac yenge habu moniyang gaibongte ailu ngigac ingucne "ye" nga "ga" kwelengkewec.    **18:2:** Miye 14:8; Yes 13:21; 21:9; 34:10-14; Yer 50:39; 51:9    **18:4:** Yes 48:20; Yer 50:8; 51:6,45; 2Kor 6:17    **18:5:** Fike 11:5-9; 18:20-21; Yer 51:9    **18:6:** Mige 137:8; Yer 50:15,29; 2Tim 1:6    **18:7:** Yes 47:7-9  
**18:8:** Miye 17:16



9 “Aime himongte ngictau yenge ngigac yeholec selo-boic aibaba aibong. Ailu mafa nga gaga angacineholec balu gaibong. Ngictau yogo yenge dac yogolec hasocine nganilu yele hisonggong nga kwele-sowac ngagedaingte. 10 Yenge yele doicte hangocebame dalickabenang domalu yanguc midaingte,

‘Ga dameng bangkacnele kwelina molickelu yowawa loguwecte ameine biyac welegac. Ilec ailu, Babilon, ga taon sugucne nga tapiligoneholec, gale kwele-sowac sugucnehac aigelegabeleng.’

11 Aime himongte ngic-ngigac yenge woc-wiyac salecaigaing, yogo monicti mafangineng hatacmac fuli mi badaicte. Ilec yele ailu hisonggong nga kwele-sowac ngagedaingte.

12 Mafa gocne, yogo gol nga siliwa ailu posa basufaleicne, ailu kwanang fuline sugucnehac. Ailu kpoluc hodocineholec madicnebenang hibine mondo-sasac nga giweng, ailu siliga ingucne madicne. Aime yoc sasawa hoine madicne ailu wiyac sasawa elefante begicti baicne, ailu wiyac haicne monic-monic yoc sanangne fuline sugucnehacti baicne. Ailu kopadi nga aenti baicne, ailu posa basufaleicne ailu hibine madicne wiyac sasawa yogodi baicne. 13 Yogo wiyac monic mosoi yoc ingucne nga gime-aniyang wiyac ingucne ailu wiyac hasoc hoine madicneholec nga tokic hoine madicne. Nga yoc misainedi baicne yogo hasoc hoine madicne, ailu waing misa nga oliwa helocine, ailu flawa madicne nga wit hucine.† Bulumaka nga lama ailu becotic nga keleta. Aime ngic-ngigac bacebabong kwelec kwekwe gaibong, yenge yogo mafa ingucne salecebanogale bacebaibong.

14 “Ilec ailu ngic-ngigac woc-wiyac salecaigaing, yenge yanguc midaingte, ‘Gale soc-kwelegonedi wiyac noinele aicnolu gawec, yogo hegilecguwec. Aime wiyac sasawa madicne hibi-angocineholec, yogo galacni biyac hikeyackewec. Aime wiyac ingucnehac hatacmac mi bafuwadamecte.’

15 “Inguc aime ngic-ngigac yenge woc-wiyac salecaigaing, yenge yefe-ngigacti baficebalu wiyac sasawa yago yelacni fuli balu mafatowanginengkolec aibong. Yenge yele doicte hangocebame dalickabenang domalu hisonggong nga kwele-sowac ngagedaingte. 16 Ailu yanguc midaingte,

‘Taontowa, gale kwele-sowac sugucnehac aigelegabeleng.

Ga ngakpi-kpoluc madicnebenang mondo-sasac nga giweng, ailu gol nga posa basufaleicne fuline sugucnehac, ailu kwanang fuline sugucnehac, yogodi loicne inguc fawec.

17 Yogo dameng bangkacnele kwelina mafatowa sasawa dacti lobeyackeme miyac aiyackewec.’

Ailu wage bacaigaing damong sasawa nga yengele bagewa galu wagewa bole bacaigaing, ailu kiwecka hike-kwesic aicaigaing. Ailu ngic-ngigac sasawa kiwecka sic bacaigaing, yenge sasawa dalicka domadaingte. 18 Domabong ye dacti lobeme hasocine nganilu yanguc milu wackedaingte, ‘Taon esecne nga yakumac fagac, taontowa ingucne monic mi fagac, yogo miyac.’ 19 Yenge hodocnginang lube wickelu hisonggong ailu wackelu kwele-sowac ngagelu yanguc midaingte,

‘Ye dameng bangkacnele kwelina dacti lobeyackeme miyac aiwec.

Ilec taontowa, gale kwele-sowac sugucnehac aigelegabeleng. Aime ngic-ngigac sasawa wagenginengkolec kiwecka hikecaigaing, yenge yelacni mafatowanginengkolec aibong.’

20 Wapongti ngengele ameine yele feiwa lowecte ailu, honocmengka gagaing, nga Wapongte bingec ailu salecebaicne nga Wapongte siduc-mimi ngic, ngenge yele ameinele ailu beliyedaing.”

21 Aime angelo tapiliineholec monic, yedi balinga sugucne monic balu wickeme kiwecka haume yanguc miwec,

“Yenge Babilon taontowa dacineholec inguc wickebong haume hatacmac nalic mi bafuwadaingte.

22 Wickebong gita mucine homacne wewe, nga gee hole-hole ailu muluc fito-fito, nga kpeng fito-fito, yogo yenge gale kweliwa hatacmac nalic mi ngagedaingte.

Ailu mole-hibi haicne monic-monic yogolec bole-ngic, yenge gale kweliwa hatacmac nalic mi gadaingte.

Aime posadi flawa wesockecaigaing, yogolec ucine gale kweliwa hatacmac nalic mi ngagedaingte.

23 Gale kweliwa hifa angocine hatacmac nalic mi kweme angoledaicte.

**18:9:** Esek 26:16-18; 27:30-35    **18:11:** Esek 27:36    **18:12:** Esek 27:12,13,22    † **18:13:** Mosoi yoc ingucne yogo wacine sinamon, yogo nosing gocna lobong angacineholec aidaicte. Tokic wacine yogo mira, nga yoc misaine wacine yogo frangkinsens.    **18:15:** Esek 27:31,36    **18:16:** Miye 17:4    **18:17:** Yes 23:14; Esek 27:27-29    **18:18:** Esek 27:32    **18:20:** Yes 44:23; Yef 32:43; Yer 51:48    **18:21:** Yer 51:63-64; Esek 26:21    **18:22:** Yes 24:8; Esek 26:13

Aime ngic-ngigac banagunogale aiboc, yekele kwele-madicté aukwecaigaing, ucine ingucne gale kweliwa hatacmac nalic mi ngagedaingte.  
 I yangucte, gale ngic-ngigac yenge woc-wiyac salecaigaing, yenge himongte ngic-ngigac sugucne gaibong.  
 Nga ga mosoc aibabagone sowacnedi himongne himongne yogolec ngic-ngigac sasawa kwele basifuc aiyeleing.  
 24 Ailu taontowa yogolec kwelina Wapongte siduc-mimi ngic nga Wapongte bingec ailu ngic-ngigac sasawa himongka wecebabong homaibong, yengele sacngineng bafuwaibong.”

## 19

### *Haleluya, Wapong mitengkegabiye*

<sup>1</sup> Yogolec lobeina honocmengka aling sugucnebenangti yowa-malac ingucne ngegebe yanguc miibong,

“Haleluya, \* bikicte ameine bame wasecne aigabeleng.

Ilec bole nga wac feicne ailu tapili, yogodi Wapongnonggengte aigac.

<sup>2</sup> I yangucte, ye ngic-ngigac yowangineng wosaelu yefe dondongna nga noina balaibelu aibabangineng mimoctocaigac.

Ailu ye yefe-ngigac sugucne selo-boic aibabainedi himongtowa basowalewec, yele aibaba wosaelu Wapongte kwelec kwekwefocine wehomacebaibongte ailu yengele sacnginengte ameine ye lacnowec.”

<sup>3</sup> Ailu yenge hatacmac yanguc miibong,

“Haleluya, yefe-ngigacte hasoc yogo moto-motoine mikac fafeginowagac.”

<sup>4</sup> Inguc mibong damong 24 nga wiyac gaganginengkolec 4, yenge ketadi holecnolu Wapong ngictaule ngiye-ngiyewa ngiyegac, ye afeelu yanguc miibong,

“Yogo foinac, haleluya.”

<sup>5</sup> Inguc mibong yowa-malac monic ngictaule ngiye-ngiyewacni yanguc miwec,

“Wapong kwelec kwekwefocine, wac feicneholec nga waweweine gagaing, ngege alang bacnoicaigaing, ngege Wapong mitengkening.”

### *Lama madecinele baba-tumang*

<sup>6</sup> Inguc mime yowa-malac monic ngegeiba, yogo ngic-ngigac aling sugucnehac yengele yowa-malac ingucne aiwec. Yogo misa dundung sugucne yele ucine, nga gbululung sugucnele ucine ingucnedi yanguc miibong,

“Haleluya, Sugucne Wapongnonggeng Tapilitowa Fileinedi ngictau ailu damongnubagac.

<sup>7</sup> Lama madecinele baba-tumang dameng kwesime ngigacinedi<sup>†</sup> biyac efeckegacte ailu, yele kwele-madic ngagelu beliyelu Lama madecinele wac bafedabeleng.

<sup>8</sup> Inguc ailu ngigacine ngakpi-kpolucine madicnebenang gbagbacne nga hibi-angocineholec holenale Wapongti lacnowec.”

Ngakpi-kpolucine madicnebenang yogo Wapongte bingec yengele aibaba dondongne.

<sup>9</sup> Inguc mime angelodi yanguc edocnuwec, “Ga hibiwa yanguc kwelengkec, Lama madecinele baba-tumangte fatawa wacebaicne, yenge kwele-angackolec.” Inguc milu yanguc miwec, “Yowa yago Wapongte yowa noine.”

<sup>10</sup> Inguc mime na angelo yele higewa ketadi holecnolu afeenogale aiiba. Aime yedi yanguc edocnuwec, “Inguc mi ainong! Na ga nga ngic hae-gbafocgone Yesule yowa yogo mibong yegengkeme balu gagaing, ngegele kwelec kwekwe ngic agongineng. Siduc-mimi yengele yowale kwele-ngage-ngage yogo Yesule yowa miyegengeicne hocne. Ilec ailu ga Wapong afeenong.”

### *Becosic lalacne*

<sup>11</sup> Inguc mime honocmeng angkeme nganiiba. Hei, na nganibe ngic monic becosic monic lalacnele feiwa ngiyewec. Aime ngic ngiyewec, yele wacine yanguc, Yowaine Balaibecaigac, ailu Yowa Noine micaigac. Ailu ye pasi dondongne yogowa ngic-ngigac yowawa locebalu huduwa wecebaicaigac. <sup>12</sup> Ye dongeine yogo dac-ubilang ingucne, nga hodocina ngictaule duu bocyac holewec. Ailu socina wacine monic kwelengkeicne, yogo monicni nalic mi ngagedaicté, yeuc sugu ngegegac. <sup>13</sup> Ailu ye ngakpi dalicne monic sacka

**18:23:** Yer 7:34; 16:9; 25:10; Yes 23:8-9 **18:24:** Yer 51:49; Miye 17:6 \* **19:1:** “Haleluya” yogo Hibru yowa. Yogolec fungine yanguc, Wapong mitengkegabeleng. **19:1:** Mige 104:35 **19:2:** Mige 19:9; 2Ngt 9:7; Yef 32:43; Miye 6:10 **19:3:** Yes 34:9-10 **19:4:** Mige 106:48 **19:6:** Mige 95:10; Yes 52:7; Miye 14:2 † **19:7:** “Ngigac” yogo Yesule habu yengele milu kwelengkwec. Monic 2 Korin 11:2 yogowa kwelengkeicne. **19:7:** Yes 61:10; Miye 21:2 **19:9:** Mat 22:2-3 **19:10:** Sale 10:25,26; Miye 22:8-9 **19:11:** Miye 1:5; 6:2; Mige 96:13; Yes 11:4 **19:12:** Dan 10:6; Miye 1:14; 2:17

kpomuluckeicne hولةwec. Ngic yele wacine yogo Wapongte Yowa. <sup>14</sup> Aime honocmengte hudu-baba ngic aling yenge ye balaibeibong, yengele becosingning yogo lalacne. Ailu ngakpingineng ngani-nganiine madicnebenangti lalacne nga gbagbacne. <sup>15</sup> Aime micinacni hudu-baba fitec monic micineholec ofelu wawec, ye yogodi himongne himongne ngic-ngigac wecebadaicte. Ailu ye ngictaule aen yasudi ngic-ngigac sanangne damongebadaicte. Ailu Wapongte Tapilitowa Fileine yele kwele-dac aalicineholec, yogo waing noine hesoc-hesocte aibaba ingucne. Aime ngic yogo yedi waing noine hesocebadaicte. <sup>16</sup> Kpolucina nga ponggaina wac monic yanguc kwelengkeicne fawec, "Ngictau yengele Ngictau, nga sugucne yengele Sugucne."

<sup>17</sup> Aime nganibe angelo monicti wenac feina domalu yowa-malacine sugucnehac wack-elu nango sasawa sawa hewacka filalangkecaigaing, yenge yanguc edocebawec, "Welening! Ngenge kpaduckelu Wapongte nosingtowa sugucna kwesining. <sup>18</sup> Kwesilu ngictau nga hudu-baba ngic yengele damong, ailu ngic tapilinginengkolec, ailu becosic nga ngic-ngigac yengele feiwa ngiyegaing. Ailu ngic-ngigac ngic monicte bagewa gagaing, ailu kwelec kwekwe sugucnefocngineng yengele bagewa gagaing, ailu wac feicne nga waweweine, yengele soc-biucngineng nocebaniing."

<sup>19</sup> Aime na hudu-baba-sic nga himongte ngictau yenge hudu-baba ngicfocnginengkolec nganicebaiba. Nganicebabe yenge ngic becosic feina ngiyewec, ye nga hudu-baba alingfocine yengeholec hudu wenaguningte kpaduckeibong. <sup>20</sup> Aime siduc-mimi ngic kwesacinedi hudu-baba-sicte haicka pasile maaine balu gawec. Ailu ngic-ngigac hudu-baba-sicte maa bayackeibong. Ailu yele ilucine afeelu gaibong, yenge yedi kwele basifuc aiyelewec. Aime ngic besocka ngiyewec nga alingfocine yengi hudu-baba-sic nga siduc-mimi ngic kwesacine yeke bacepalu, dac nga salfadi lobelu kiwec ingucne ailu fagac, yogolec kwelina gbolicne wicepabong hauiboc. <sup>21</sup> Aime becosic feina ngiyewec, yele mickacni hudu-babale fitec ofelu wawec, yogodi himongte ngictaule hudu-baba ngic sasawa wecebame homaibong. Homabong nango sasawa yengi kwesilu soc-biucngineng nolu gebecebawec.

## 20

### *Aleng Sugucnengineng muc-macka loibong*

<sup>1</sup> Aime angelo monic nganiiba. Nganibe ye long sugucnebenang, yogolec ki nga sentowa monic moleina balu honocmengkacni wawec. <sup>2</sup> Walu hematowa, ye hema esecne, wacine monic Aleng Sugucnengineng, ailu Satang, ye balu hifa 1 taosentesoc ngiyenale senti hefewec. <sup>3</sup> Aime himongne himongne ngic-ngigac hatacmac mi kwesacebanale hefelu long sugucnebenang, iwa wickeme haume nu holecnolu aka lowec. Aime ye hifa 1 taosen game motome, ye hatacmac lukecnome dameng bangkacnemas mucine mikac gadaicte.

<sup>4</sup> Aime na ngictaule ngiye-ngiye bocyac nganiiba. Aime ngictaule ngiye-ngiye yogolec feina ngic-ngigac ngiyeibong, yenge ngic-ngigac yowawa locebaningte bole-yowa yeleicne. Ailu habu monic yengela yanguc nganiiba, hudu-baba-sic nga ilucine mi afeelu gaibong. Ailu yele maa yengele meiwa nga molenginang mi baibong. Yenge Yesu ngagesingkelu siducine milu gaibong. Ailu Wapongte yowa mibong yegengkewec. Inguc ailu gabong ngic yengi ubengineng welockeibong, yengele ilucfocngineng nganicebaiba. Nganicebabe yenge sasawadi gboliyelu hifa 1 taosentesoc Kristoholec galu ngic-ngigac damongebai-bong. <sup>5</sup> Yogodi homackacni gboliyelu fangke-fangke yogolec molic-molicine aigac. Aime gocne homaibong, yenge mi gboliyelu fangkebong hifa 1 taosen motome fangkedaingte.

<sup>6</sup> Aime Sugucnedi ngic-ngigac molic-molic homackacni gboliyelu fangke-fangke iwa balu taosebadaicte, yenge Wapongte bingec nga kwele-angackolec. Aime homac alecine yaeckangti yenge nalic mi bacebadaicte, yenge Wapong nga Kristole depec-baba ngic ingucne mimiteng bole bagalu hifa 1 taosen yeholec ngic-ngigac damongebadaingte.

### *Aleng Sugucnengineng basowale-benangkeibong*

<sup>7</sup> Aime hifa 1 taosen motome Satang muc-mackacni lukecnodaicte. <sup>8</sup> Lukecnome, ye hikelu himongne himongne ngic-ngigac kwesacka mengocebame ngic-ngigac himong-towa yogolec mecine 4 iwa gagaing. Himong yogo wacnginec Gok nga Magok, yogowacni ngic-ngigac yenge hudu weningte kpatulecebadaicte. Yogo yengele dzalengineng kiwec mecina dingong fagac ingucne. <sup>9</sup> Kpatulecebame yenge himongne himongne hikelu Wapongte bingec yenge taonka gagaing, yengele kweleinedi angackecaigac, taon iwa hikelu hewalingkelu domaibong. Domabong honocmengkacni dacti walu hudu-baba ngic

lobecebayackewec. <sup>10</sup> Lobecebayackeme Aleng Sugucnengineng ye ngic-ngigac kwesace-bawec, ye dac nga salfadi lobelu kiwec ingucne ailu fagac, yogowa wickebong hauwec. Aime hudu-baba-sic nga siduc-mimi ngic kwesacine, yeke iwa momochac galu deboc hadeng doic ngagedaingte ailu ngagenowagaing, yogo moto-motoine mikac.

*Wowosae dameng fikedaicte*

<sup>11</sup> Aime ngictaule ngiye-ngiyetowa kwalac-kwalac monic sugucnehac nganiiba. Aime ye mac ngiye-ngiye yogolec feina ngiyewec, ye momoc nganiiba. Yele haicka himong nga sawa yeke hikeboc miyac aime macnginec sawaine sugu fawec. <sup>12</sup> Aime ngic-ngigac feicne nga waweweine biyachac homaibong yenge ngamecebaiba. Ngamecebabe yenge Wapongte haicka domabong ye hibi gocne bacebalu bafilamewec. Ailu hibi monic wacine Gagale hibi yogo momoc balu bafilamewec. Aime hibi gocne iwa ngic-ngigac homaibong yengele aibabanginengte kwelengkeicne fagac. Aime ye iwa nganilu aibabangineng mimoctowec. <sup>13</sup> Aime kiwecka homalu hauibong gagaing, yenge kiwecti hegilecebame ofeibong. Yenge homac nga Wangec-macka homaibong gagaing, yeke inguchac yenge hegilecebaboc ofeibong. Inguc ailu ngic-ngigac filesoc filesoc aibabanginengtesocka mimoctowebawec. <sup>14</sup> Mimoctocelebalu homac nga Wangec-mac yeke nga ngic-ngigac focnginec momochac dac lobelu kiwec ingucne ailu fagac, yogowa wicebame hauibong. Yogodi homac alecine yaeckang aigac. <sup>15</sup> Ailu ngic-ngigac wacngineng Gagale hibiwa mi kwelengkeicne fagac, yenge dac lobelu kiwec ingucne ailu fagac, yogowa wicebame hauibong.

## 21

*Himong nga sawa gbolicne*

<sup>1</sup> Aime na sawa nga himong gbolicne ngamecepaiba. Aime himong nga sawa esecne faiboc, yeke miyac aiboc. Aime kiwec ye hatacmac mi fadaicte. <sup>2</sup> Na taon gbagbacne, yogo Yerusalem gbolicne nganibe Wapongtacni honocmengkacni wawec. Wame ngi-gacti ngaweineholec molewa babac ainogale efeckecaigac, ngani-nganiine yogo ingucne ngawe-bingecinele ailu leso babong ngani-nganiine madicnebenang ailu ngiyewec.

<sup>3</sup> Ngiyeme na yowa-malac monic ngictaule ngiye-ngiyewacni ngagebe yanguc miwec, “Ngagegacing, Wapongte kpoluc-faledi ngic-ngigac yengeholec game yenge yele aling aidaingte. Ailu Wapong yeuctihac yengeholec galu Wapongngineng gadaicte. <sup>4</sup> Ailu yedi donge-misangineng sasawa dongenginangkocni suweyackedaicte. Aime homac nga kwele-sowacte hisonggong, ailu doic yenge hatacmac mi fadaingte. Wiyac esecne faibong, yogo biyac miyac aiyackeibong.”

<sup>5</sup> Aime Sugucne ngictaule ngiye-ngiyewa ngiyewec, yedi yanguc miwec, “Ngagegacing, na wiyac sasawa babe gbolicne fikeyackegac.” Inguc milu edocnuwec, “Ga yowa yogo kwelengkec. I yangucte, yowa yago noine, aime ngic-ngigac yenge yogo nalic ngagepangkegacing.” <sup>6</sup> Milu hatacmac yanguc edocnuwec, “Yogo biyac motogac. Na ‘A’ nga ‘Y’, yogo molic-molicine iwacni moto-motoine. Ngic-ngigac monicti misale aicnome, ye misa dongeinacni gagale misa moc nonale lacnodacte. <sup>7</sup> Monicti hudu welu gbelong aidaicte, ye wiyac sasawa yago mole-damoc bame, nani yele Wapong aibe yedi macedne aidaicte. <sup>8</sup> Aime ngic-ngigac hangocebacaigac, nga ngage-ngagesingngineng mikac. Ailu aibabangineng sowacne wonongkolec nga ngic-wewe. Ailu selo-boic ngic, nga hefec nga mosoc bacaigaing. Ailu siduc-gbong alang bacnocaigaing, nga kwesac ngic-ngigac. Ngic-ngigac sasawa ingucne yengebac dac nga salfadi lobelu kiwec ingucne ailu fagac, yogowa hauyackedaingte. Yogo homac alecine yaeckang aigac.”

*Yerusalem gbolicne*

<sup>9</sup> Aime angelo 7 yenge pele 7 yogo doic 7 moto-motoinedi wakeyackeicne yogo balu domaibong, yengelacni monicti nala welelu yanguc miwec, “Ga welec. Aime nani Lama macedinele ngigac-bingecine edaligudacte, ye yele ngigac.” <sup>10</sup> Inguc mime Asule tapiliwa bacnume tiki sugucne nga dalicne, yogolec feina felu Wapongtacni taon gbagbacne Yerusalem, honocmengkacni wame edalicnuwec. <sup>11</sup> Taon yogo ye Wapongte tapili nga hibi-angockolec. Yogo posa basufaleicne fuline sugucnehac posa sasacne ingucne wonong mikac, ailu latac-latacineholec. <sup>12</sup> Ailu odaine posadi baicne, yogo sugucnedi dalicne bafeicne. Ailu nuine 12 domagaing, aime nuina angelo 12 domagaing. Ailu nuina Israel

20:9: 2Ngt 1:10    20:10: Mige 11:6; Miye 19:20; 21:8    20:12: Dan 7:9-10; Mat 25:31-46; Sale 17:31; 2Kor 5:10; Miye 13:8    20:13: Rom 2:6; 1Pi 1:17; Miye 2:23; 22:12    20:15: Dan 12:1-2    21:1: Yes 65:17; 2Pi 3:13    21:2: Yes 52:1; 61:10; Hib 11:16; 12:22; Miye 3:12    21:3: Dep 26:11-12; Esek 37:27; Sek 2:10-11; 2Kor 6:16    21:4: Yes 25:8; 35:10; 65:19; Miye 7:17    21:5: 2Kor 5:17    21:6: Yes 49:10; 55:1; Yer 2:13; Yoa 7:37; Miye 1:8,17; 22:17    21:7: 2Sm 7:14; Mige 89:26-27    21:8: Mat 25:41; Hib 10:38-39; Miye 20:15; 22:15    21:10: Esek 40:2    21:11: Yes 58:8; 60:1-2,19

fikesaweckacni 12 yengele wacngineng inguchac kwelengkeicne domagaing. <sup>13</sup> Aime wenac ofecaigacka haic nu habackang, notka haic nu habackang, nga sautka haic nu habackang, ailu wenac haucaigacka haic nu habackang domagaing. <sup>14</sup> Taon sugucnele oda yogo posa yogolec fungine 12. Aime fungine 12 iwa Lama madecinele salecebaicne 12 yengele wacngineng kwelengkeicne domagac.

<sup>15</sup> Aime angelo naholec mingagec aibec, yedi taontowa sugucne nga nuine ailu oda posadi baicne, yogolec maaine banogale kpetele maa monic yasu goldi baicne balu domawec. <sup>16</sup> Badomame taontowa sugucne yogolec fungine 4. Ailu mecine sasawa yengele maangineng andohac aibong. Aime angelodi maa babale yasudi maaine bame maaine yogo 12 taosen stadia\* aiwec. Nga mecine ailu feinale dalicnele maaine yogo moniyang aiboc. <sup>17</sup> Ye oda adecne yogolec bangkacnele maaine yogo bame 144 kubit aiwec.† Maa yogo ngic-ngigac yengi bacaigaing, aime angelo yengele maa yogohac aigac. <sup>18</sup> Oda yogo posa sasacnedi baicne. Nga taontowa sugucne yogo golbenangti baicne, yogo galas ingucne latak-latacine aigac. <sup>19</sup> Aime taon sugucnele oda fungina posa basufaleicnedi loyackeicne, posa yogo sasawa fuline sugucnehac, ingucnedi lesoine loicne. Fungine molic-molic iwa

posa sasacnedi loicne, lobeina, iwa  
 posa sowac-sowacti loicne,  
 3 iwa posa kwalacne, nga  
 4 iwa posa hedongboli. <sup>20</sup> Ailu  
 5 iwa posa hibine medeng-medeng nga kwalac-kwalac ingucne,  
 6 iwa posa sasacne monic,  
 7 iwa posa dagec-dagec,  
 8 iwa posa hedongboli ingucne monic, nga  
 9 iwa posa dagec-dagec ingucne monic. Ailu  
 10 iwa posa hedongboli haicne monic,  
 11 iwa posa sowac-sowacti dagecne pung-pung kweicne, nga  
 12 iwa posa mondo-sasac.

Posa hibine ingucnedi locebaicne domagaing.‡ <sup>21</sup> Yogowa kwanang hucine sugucnehac 12 ingucti nu 12 iwa domagaing. Aime nu filesoc filesocka hucine moniyang moniyangti baicne. Ailu taon sugucnele yefe yogo golbenangti baicne, yogo galas ingucne bageina nalic nganinoga.

<sup>22</sup> Aime taon yogolec kwelina Ibu-mac monic mi nganiiba. I yangucte, Sugucne Wapong Tapilitowa Fileine nga Lama madecine yeki ugu Ibu-mac aigaic. <sup>23</sup> Aime Wapongte tapili nga hibi-angocti taontowa sugucne yogo bame angolegac, aime Lama madecinedi hifaine aigac. Ilec taontowa iwa wenac nga tamacne yekele angoc mi ngagesigaing. <sup>24-25</sup> Aime kundung ye iwa mi fadaicte, ilec hadengsoc taon nuine nalic mi holedaingte. Aime himongne himongne ngic-ngigac yenge taonte angocka lec-welec aidaingte. Aime himongte ngictau yenge wiyacngineng wac feicneholec balu felu iwa ibu ingucne lodaingte. <sup>26</sup> Lobong himongne himongne ngic-ngigac yenge wiyacngineng alang-babaineholec nga wac feicneholec balu yogolec kwelina fedaingte. <sup>27</sup> Ailu wiyac monic wonongkolec nga ngic-ngigac aibabangineng sowacnebenang memenguine, ailu kwesacnginengkolec, yenge taontowa yogolec kwelina nalic mi fedaingte, miyac. Ngic-ngigac wacngineng Lama madecinele Gagale hibiwa kwelengkeicne fagac, yengi ugu fedaingte.

## 22

### Gagale misa

<sup>1</sup> Aime angelodi misa monic gagaineholec edalicnuwec. Misa yogo latak-latacine ailu Wapong nga Lama madecine yekele ngictaule ngiye-ngiyewacni ofelu <sup>2</sup> taontowale yefe sugucnele hewacka hikelu fagac. Fame mecine neboc nga neboc iwa gagale yoc domagaing, yeke hifasoc noine aibec alecine 12 aicaigac. Yeke tamacnesoc noineholec aicaigaic. Ailu yoc yekele hekengnginecti himongne himongne ngic-ngigac bamadicebanoga. <sup>3</sup> Aime monicti Wapongte aalicta bagewa hatamac mi gadaicte, miyac. Wapong nga Lama madecine yekele ngictaule ngiye-ngiye sugudi taon iwa ngiyeme kwelec kwekwefocine

**21:12:** Esek 48:30-35    **21:15:** Esek 40:3; Miye 11:1    \* **21:16:** 12 taosen stadia yogo Vanimohocni hikegacgu Honiara yogolecsoc, yogo 2 taosen 220 kilomita ngama ingucne. Stadia moniyang yogo mita 185 ingucne aigac.    † **21:17:** 144 kubit yogo 65 mita ngama ingucne. 12 taimis 12 yogo 144 aigac.    **21:18:** Yes 54:11-12    ‡ **21:20:** Posa wacngineng yogo yanguc, 1-yaspa, 2-safaya, 3-kalsedoni, 4-emeral, 5-sadoniks, 6-kanelian, 7-krisolait, 8-beril, 9-topas, 10-krisopres, 11-yasint, 12-ametist. Ilucngineng yogo hafac 481 yogowa fagac.    **21:23:** Yes 60:19-20; Miye 22:5    **21:24-25:** Yes 60:3,5,11    **21:27:** Yes 52:1; Esek 44:9; 1Kor 6:9-10    **22:1:** Esek 47:1    **22:2:** Fike 2:9; Esek 47:12; Yol 3:18; Sek 14:8

yenge ye afeelu kwelec kwecnodaingte. <sup>4</sup> Yenge yele haic-mesuine nganidaingte, aime ye wacine yengele meiwa kwelengkeme fadaicte. <sup>5</sup> Iwa kundung hatacmac mi aidaicte, nga hifa me wenacte angoc yogo mi ngagesidaingte. I yangucte, Sugucne Wapongte angocti angoledaicte. Aime ngic-ngigac yenge ngictaule bole badaingte, yogo dameng moto-motoine mikac balu gadaingte.

<sup>6</sup> Aime yanguc edocnuwec, “Yowa yago noine, aime ngic-ngigac yenge yogo nalic ngagepangkegaing. Aime Sugucne ye siduc-mimi ngic yengele kwele-ngage-ngageningte Wapong, ye kwelec kwekwefocine wiyac biyac fikedaicte, yogo nganingte ailu angeloine salewec.”

*Yesu kwesidaicte*

<sup>7</sup> **“Ngagegaing, na biyac kwesidacte! Monic ye siduc-mimi ngic yele yowa hibi yagowa kwelengkeicne fagac, yogo balu madicne balaibelu gadaicte, ye kwele-angackolec.”**

<sup>8</sup> Na Yoanedi wiyac yogo ngani-ngagec aiiba. Aime nganibe motome angelo wiyac edalicnuwec, yele higewa ketadi holecnolu afeenogale aibe <sup>9</sup> yedi yanguc edocnuwec, “Inguc mi ainong. Na ga nga siduc-mimi ngic hae-gbafocgone, yenge ailu ngic-ngigac hibi yagolec yowa madicne balu balaibelu gacaigaing, ngengele kwelec kwekwe agongineng. Ga Wapong afeenong!”

<sup>10</sup> “Dameng bangkalegacte ailu ga hibi yagolec siduc-yowa yogo aka mi lolu hegileng fadaic, miyac. Ga miyengka yegengkadaic. <sup>11</sup> Monic ye aibaba sowacne aicaigac, ye aibaba yogohac balu gadaic. Nga wonongkolec gagac, ye ingucnehac gadaic.\* Aime aibaba dondonne aicaigac, ye dondonnehac aidaic. Ailu Wapongte bingec gagac, ye Wapongte bingec gadaic.”

<sup>12-13</sup> **“Ngagegaing, na ‘A’ nga ‘Y’, molic-molic nga lobe, ailu molic-molicine iwacni moto-motoine. Na biyac kwesilu ngic-ngigac filesoc filesoc aibabanginengte ameine yelenogale balu kwesidacte. <sup>14</sup> Balu kwesihe ngic-ngigac ngakpingineng dalicne suweicne, yenge kwele-angackolec. I yangucte, yenge gagale yoc noine noningte tapili yeleicne, ailu taon nuina yefe nalic fedaingte. <sup>15</sup> Aime ngic-ngigac hoda ingucne aibabangineng wonongkolec gagaing, nga hefec nga mosoc bacaigaing, ailu selo-boic aling nga ngic wecebacaigaing. Nga siduc-gbong alang bayelecaigaing, ailu sasawadi kwesac-aibabale angac ngagelu kwesac aicaigaing, yengebac taon lobina gadaingte. <sup>16</sup> Na Yesudi angelone salebe yedi yowa yago nale habufocne ngengela mime yegengkengelenale kwesiwec. Na Dawidilacni gidec, nga ngamboine, ailu ubiyacte asocmeng hibi-angocineholec, na yogo hocne.”**

<sup>17</sup> Asu nga Lama madecinele ngicac-bingecine yeki “Ga welec” migabiyece. Ailu monic ye yowa yogo ngagedaicte, ye “Ga welec” midaic. Aime monic ye misale aicnocaigac, ye kwesilu gagale misa fuline mikac moc balu nodaic.

*Yowa moto-motoine*

<sup>18</sup> Aime ngic-ngigac hibi yagolec siduc-yowa ngagegaing, ngengele sawang-yowa milu yanguc migabac, “Monicti yowa yago fagac, iwahac yowa monic taockedaictewa, Wapongti hibi yagowa doicte kwelengkeicne fagac, ye iwa taockedaicte. <sup>19</sup> Ailu monicti siduc-yowa yago fagac, iwacni yowa monic baickedaictewa, Wapongti gagale yockacni noine nebocine ye mi lacnodaicte. Ailu taon gbagbacnele hibi yagowa kwelengkeicne fagac, iwa nalic mi fedaicte.” <sup>20</sup> Aime wiyac yagolec mime yegengkengelegac, yedi yanguc migac, **“Noine, na biyac kwesidacte.”**

Yogo foinac. Oc, Sugucne Yesu, ga welec.

<sup>21</sup> Sugucnenonggeng Yesule kwele-madicti Wapongte bingec sasawa ngengela fadaic. Yogo foinac.

**22:3:** Sek 14:11    **22:4:** Mat 5:8; Miye 3:12    **22:5:** Dan 7:18,27; Miye 5:10; 20:6; 21:23,25    **22:6:** Miye 1:1

**22:7:** Miye 1:3    **22:8:** Miye 19:10    **22:10:** Dan 12:4    \* **22:11:** Aibaba sowacne ingucnedi mi madickegac.

Aimebac monicti kwele-hefaliyecte mi aigac, ye aibaba ingucne bagacgu dacka haudaicte.    **22:11:** Dan 12:10; Esek

3:27    **22:12-13:** Yes 40:10; 44:6; Yer 17:10; Miye 1:8,17; 21:6; 2:23    **22:14:** Fike 2:9; 3:22    **22:16:** Him 24:17; Yes

11:1,10; Rom 1:3; Miye 2:28; 5:5    **22:17:** Yes 55:1; Miye 21:6    **22:18:** Yef 4:2; 12:32    **22:20:** Miye 2:16